


Konda: కడెం బసదు
నగళొకబరొ



Konda Dora New Testament which was published in 2006

Konda: కొండ బాసదు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files dated 7 May 2025

840896da-3a66-5e43-9018-4a95a349d60c

Contents

మత్తయి	1
మార్కు	70
లూకా	112
యోహాను	181
అపొస్తలు	235
రోము	305
1కొరింథి	340
2కొరింథి	371
గలతీ	390
ఎఫెసీ	402
పిలిప్పీ	414
కొలోసీ	422
1దెస్స	431
2దెస్స	438
1తిమోతి	442
2తిమోతి	451
తీతు	457
పిలోమో	461
ఎబ్రి	463
యాకోబు	488
1పేతురు	496
2పేతురు	504
1యోహాను	509
2యోహాను	517
3యోహాను	519
యూదా	521
ప్రకటన	524

మత్తయి రాస్తి సువార్త

నెల్ల కిబిసినిక

దేవుణు మాటెజ్ రాస్తిమన్ని పుస్తకమాతి బయ్బిలుదు పడాయ్ ఒపుమానం, కొత్త ఒపుమానం ఇజి రుండి ముక్కెజ్ మన్నె. పడాయ్ ఒపుమానమ్దు యేసుప్రబు వందిజ్ వెహ్తామన్ని సజతిజ్, ఎలాగ పూర్తి ఆతె ఇజి కొత్త ఒపుమానం జాగర్త నద్విజి సుండేతిజ నెస్తిజానాద్. కొత్త ఒపుమానమ్దు మన్ని మొదోహి పుస్తకమ్నె మత్తయి రాస్తి సువార్త. యేసు ప్రబు సిసుర్ లోఇ మన్ని పన్ను పెర్నికానాతి మహి మత్తయి ఇనికాండ్రె ఇక్క రాస్తమనాన్. (మత్తయి 9:9-13) యేసు ప్రబుజ్ సిలువ పొక్తి వెనుక, ఇంజుముంజు 25-35 వంటెజ్ వెనుక ఇక రాసి ఆత మనాద్. ఇజి యా సజతిజ్ వందిజ్ నెస్తికార్ వెహ్సినార్. దేవుణు వన్ని ప్రవక్తరు వెట వర్గతిమహి క్రీస్తు ఇనికాన్ యేసుప్రబునె ఇజి యూదుర్ ఆతికార్ నెస్తిజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గితి సజతిజ్ వందిజ్ దేవుణు ముజాల వన్ని ప్రవక్తరు వెట వర్గతిక ఎలాగ అయాలెకెండెనె పూర్తి ఆతె ఇజి పడాయ్ ఒపుమానమ్దాన్ దన్ని వందిజ్ మన్ని మాటెజ్ లాగ్ని రుజుప్ కిజి తోరిసినాన్. దేవుణు ప్రవక్తరు వెట వర్గితి సజతిజ్ యేసుప్రబు బత్తుడు అయాలెకెండె పూర్తి ఆతె (మత్తయి 1:23, 2:6, 14, 18, 23) ఇస్రాఏలు లోకుర్ రాజు ఆతిమహి దావీదు తెగాదు పుట్టికాన్ ఇజి రుజుప్ కిడెజ్, వన్ని తెగాదు పుట్టివరి పేరుకుబా మజి తోరిసినాన్. మరి దేవుణు ఏలుబడిః కిని వందిజ్ యా పుస్తకమ్దు నండొ సుట్టు రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్తిన్తి కతెజ్ యా పుస్తకమ్దు 13-14 అద్యయమ్కాజ్ రాస్త మనాద్. యేసు, దేవుణు మరిసి ఆతికాండ్రె ఇజి యా సువార్తదాన్ డటం వెహ్సినాన్.

యాక యేసు తెగ

1 అబ్రహాం తెగాదికాతి దావీదు రాజు* తెగదు పుట్టి యేసు క్రీస్తు తెగ యాక.

2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్నిర్, తంబేర్సీర్.

3 యూదా మరిసిర్ పెరెసుని జెరహు, వరి యాయ పేరు తామారు. పెరెసు మరిసి ఎస్రోము, ఎస్రోము మరిసి అరాము,

4 అరాము మరిసి అమ్మినాదాబు, అమ్మినాదాబు మరిసి నయస్సోను, నయస్సోను మరిసి సాల్మాను.

5 సాల్మాను మరిసి బోయజు, బోయజు యాయ పేరు రాహాబు, బోయజు మరిసి ఓబేదు, ఒబేదు యాయ పేరు రూతు. ఓబేదు మరిసి యెసయ.

6 యెసయ మరిసి రాజు ఆతి దావీదు. దావీదు రాజు మరిసి సొలోమోను, సొలోమోను అయ్సి, ముజాల ఊరియెజ్* ఆల్ని ఆతి మహికాద్.

7 సొలోమోను మరిసి రెహబాము. రెహబాము మరిసి అబీయా, అబీయా మరిసి ఆసా.

* 1:1 1:1 దావీదు ఇస్రాయేలు లోకుర్ వందిజ్ దేవుణు ఏర్పాటు కితి రాజు. వాండ్రు ఇస్రాయేలుది రుండి రాజు వన్ని ముజాల నవులు ఇనికాన్ ఏలుబడిః కిజి మహాన్. * 1:6 1:6 2నము 11:1-27.

8 ఆసా మరిసి యెహోసఫాతు. యెహోసఫాతు మరిసి యెహోరాము, యెహోరాము మరిసి ఉజ్జియా.

9 ఉజ్జియా మరిసి యోతాము, యోతాము మరిసి ఆహజు, ఆహజు మరిసి హిజ్కియా.

10 హిజ్కియా మరిసి మనసె, మనసె మరిసి ఆమోసు, ఆమోసు మరిసి యోసీయా.

11 యోసీయా మరిసిర్ యెకొనియని వన్ని దాద్నిర్, తంబేర్సిర్. వరి కాలమ్దు బబులోను దేసెమ్ది రాజు యూదురిజ్ వెట్టిపణి కినివరిలెకెండ్ అసి తొప్తా ఒత్తాన్.

12 బబులోను దేసెమ్దు సోహి వెనుక అబె యెకొనియెజ్ మరిన్ పుట్టాన్. వన్ని పేరు సయల్తీయెలు, సయల్తీయెలు మరిసి జెరుబాబెలు.

13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు.

14 అజోరు మరిసి సాదోకు, సాదోకు మరిసి ఆకిము, ఆకిము మరిసి ఎలిహూదు.

15 ఎలిహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు.

16 యాకోబు మరిసి యోసేపు, వన్ని ఆల్పి ఆతి మరియ పొటాదు క్రీస్తు ఇజి కూకె ఆతి యేసు పుట్టాన్.

17 యా లెకెండ్ అబ్రాహము బాణిజ్ అసి దావీదు రాజు దాక మొతం వద్నాల్లి తరమ్కు, దావీదు రాజు బాణిజ్ అసి యూదురిజ్ బబులోను దేసెమ్దు వెట్టి పణి కిని వరిలెకెండ్ తొప్పిఒతి కాలమ్దాక వద్నాల్లి తరమ్కు. యూదురు బబులోను దేసెమ్దు సోహి బాణిజ్ అసి యేసు క్రీస్తు దాక వద్నాల్లి తరమ్కు.

యా లెకెండ్ యేసు క్రీస్తు పుట్టాన్. కసెలిజాణిజ్

18 యేసు క్రీస్తు యా లెకెండ్ పుట్టాన్. వన్ని అయ్సి ఆతి మరియెజ్ యోసేపు వందిజ్ వెన్బాత మహాద్. గాని వారు రిఎర్ ఉండ్రె బానె గూర్విండ ముందాల్పె అది దేవుణు ఆత్మ సత్తుదాన్ పాత డిస్తాద్.

19 గాని దనిజ్ పేరు కితికాన్ ఆతి యోసేపు దేవుణు రూలుజ్ లోజిజి మనికాన్ కక, విజేరిజ్ ఎద్రు సిగు కిబిన్విండ, ఎయెర్బా నెన్విండ, దన్నిజ్ డిసి సిదెజ్ ఇజి ఒడ్డెబితాన్.

20 యోసేపు యా సజతిజు వందిజ్ ఆలోసనం కిజి మహివలె దేవుణు దూత కలాదు వన్నిజ్ తోరె ఆజి ఈహు వెప్తాన్, “దావీదు రాజు తెగ్గాతికాన్ ఆతి యోసేపు, నిజి పేరుకితి మని మరియెజ్ డగ్గుకిదెజ్ అనుమానం ఆమ. ఎందనిజ్ ఇహిజు దేవుణు ఆత్మ సత్తుదాన్ అది పాత డిస్తాద్ మనాద్.

21 అది ఒరెన్ కొడొః ఇడనాద్లె. వన్ని లోకాజ్ వరి పాపమ్కాణిజ్ వాండ్రు రక్కిస్సాన్లె. అందెజె వన్నిజ్ యేసు† ఇజి పేరు ఇడదెజ్వలె”,

22-23 “ఉండ్రె విడిః బోదెలి పాత డిసి ఒరెన్ మరిన్ ఇడాద్లె. వాండ్రు ఇమ్మానుయెలు ఇజి కూకె ఆనాన్లె”, ఇమ్మానుయెలు ఇహిజు దేవుణు మా వెట తోడుః మనాన్ ఇజి అర్దం. ముందాల దేవుణు ప్రవక్త వెట వర్తితి యా మాటెజ్ నిజం పూర్తి ఆదెజ్ యాకెజ్ విజు యా లెకెండ్ జర్గితె.

24 యోసేపు నిద్రదాన్ తెలిఆతిజ్ దేవుణు దూత వన్నిజ్ వెప్తా వజనె మరియెజ్ ఆల్పి లెకెండ్ వన్ని ఇండ్రొ కూక్ ఒత్తాన్.

† 1:21 1:21 యేసు ఇని మాటదిజ్ అర్దం, యెహోవ దేవుణు రక్కిస్సాన్ సిల్లిజు సాయం కిజినాన్.

* 1:22-23 1:22-23 యెసయ 7:14.

25 గాని మరియు మరిన్ ఇడ్షిదాక వాండ్రు దని డగ్రు సొన్వితాన్. మరిన్ పుట్టిజ్ వాండ్రు వన్నిజ్ యేసు ఇజి పేరు ఇట్టాన్.

2

తూర్పుదాన్ గ్వానురు వాజినార్

1 హేరోదు రాజు ఏలుబడికి కిజి మహివలె యూదయ దేసమ్దుమని బెత్తెహెము ఇని నాటో యేసు పుట్టాన్. వాండ్రు పుట్టి వెన్కా తూర్పు దరోటాన్ గ్వానురు* యెరూసలేం ఇని పట్టుమ్దు వాతార్

2 పట్టుమ్దు వాతార్, “యూదురిజ్ రాజు ఆదెజ్ ఇజి పట్టి కొణ్ణో: ఎంబె మనాన్? వాండ్రు పుట్టిదన్నిజ్ గుర్తు తోరిసిని సుక్క, మాపు తూర్పుదరోటు సుడ్తావ్. వన్నిజ్ పొగ్డిజి మాడిస్టెజ్ ఇజి వాత మనావ్”, ఇజి వెహ్టార్.

3 యా మాటెజ్ విహరె హేరోదు రాజుని వన్నివెట యెరూసలేమ్దికార్ విజేరె నండ్ గాబ్రి ఆతార్.

4 హేరోదు రాజు, పెరి పుజెరిజ్ విజెరిజ్ని యూదురి రూలుజ్ నెస్పిన్ని వరిజ్ విజేరిజ్ కూక్పిస్తాండ్రె, “క్రీస్తు ఆతికాన్ ఎంబె పుట్టాన్?”, ఇజి వెన్బాతాన్.

5 “యూదయ దేసమ్దుమని బెత్తెహెముదు”, ఇజి వారు వెహ్టార్, “ఎందనిజ్ ఇహిజ, యా లెకెండ దేవుణు ముజాల ఒరెన్ ప్రవక్త వెట వర్గిత మహాన్.”

6 “యూదయ దేసమ్దు మని బెత్తెహెమా, నీను యూదయ నాహ్వాజ్ లోఇ ఇజిరికి ఆఇ. ఎందనిజ్ ఇహిజ, నీ లోఇహాన్ ఒరెన్ రాజు లెకెండ† ఏలుబడికి కినికాన్ పుట్టాన్లె. వాండ్రు నా లోకుర్ ఆతి ఇస్తాయేలు లోకురిజ్ గవుడువెన్ లెకెండ మంజినాన్లె.”

7 నస్తివలె హేరోదు రాజు, మరి ఎయెర్బా నెన్ఎండ గ్వానురుజ్ కూక్పిస్తాండ్రె సుక్క తోరె ఆత్తి సరియాతి టయం వరిజ్ వెన్బాజి నెస్తాన్.

8 వరిజ్ బెత్తెహెమ్దు పొక్తాండ్రె, “మీరు సొన్ని నెగ్రెండ అయా కొణ్ణో:దిజ్ రెబాజి సుడ్జిజి వాండ్రు ఎంబె మనాన్ ఇజి నజిబా కల్లురు తగ్గె. అయావలె నానుబా సొన్ని వన్నిజ్ పొగ్డిజి మాడిస్సు”, ఇజి వరిజ్ వెహ్టాన్.

9 వారు రాజు వెష్టా మాట విహరె సోతార్. సొన్ని మహివలె, వారు తూర్పు దరోటు సుడ్జితిమహి సుక్క, వరి ముందాల నడిజి మహాద్. కొణ్ణో: మహి బాడ్డి మున్సు అందితిజ్ అయా సుక్క అబ్బె నిహాద్.

10 సుక్క సుడ్జితిజ్ వారు గొప్ప సర్ల ఆతార్.

11 ఇండ్రో సొహరె అయ్సీ ఆత్తి మరియు వెట మన్ని కొణ్ణో:దిజ్ సుడ్జితారె ముణుకుజ్ ఊర్జి వన్నిజ్ పొగ్డిజి మాడిస్టార్. నస్తివలె వారు ఒత్తిమహి పెటెజి రేతారె బజారం, సాంబ్రాణి, బోలాం‡ ఇనికెజ్ వన్నిజ్ నొండిత సితార్.

12 “హేరోదు రాజు డగ్రు మర్జి సొన్యాట్”, ఇజి దేవుణు దూత కలాదు వరిజ్ వెష్టా వజ, వారు మరి ఉండ్రె సరిదాన్ వరి దేసెం సొహర్.

అయ్గుప్పు దేసమ్దు సొన్నినార్

* 2:1 2:1 సుక్కెజి వందిజ్ సదువు నెస్తికార్. † 2:6 2:6 మికా 5:2. ‡ 2:11 2:11 సాంబ్రాణిసాంబ్రాణి ఇని మరాన్దాన్ దోహ్కప్పి నెగ్గి వాసనం మన్ని గొప్ప విలువాతి ఒస్తు బోలంబోలం ఇని మరాన్దాన్ నెగ్గి వాసనం మన్ని ఒస్తు మాయమ్కు లెకెండబా పణి కినాద్.

13 గ్వానురు మర్జి సొహి వెనుక ఒరెన్ దేవుణు దూత యోసేపుజ్ కలాదు తోరె ఆజి, “నీను నిజ్అ, హేరోదు రాజు కొడొడిజ్ సప్తెజ్ నుడొజినాన్. అందెజె వెటనె కొడొడిజ్ని అయ్సిజ్ అసి అయ్గుప్పు దేసమ్దు సొన్అ. మరి ఇనిక కిదెజ్ ఇజి నాను నిజి వెప్పొదాక అబెనె మన్అ”, ఇజి వెప్తాన్.

14 నస్తివలె వాండ్రు నిజితండ్రె, కొడొడిజ్ని అయ్సిజ్ అస్తాండ్రె అయా పొదొయ్నె అయ్గుప్పు దేసమ్దు సొండ్రెజ్ సొతాన్.

15 హేరోదు సానిదాక అబెనె మహాన్. “అయ్గుప్పు దేసమ్దాన్ నా మరిసిజ్ నాను కూక్త”, ఇజి దేవుణు ముందాల ప్రవక్త వెట* వర్గితి మాట యా లెకెండ్రె పూర్తి ఆతాద్.

16 గ్వానురు వన్నిజ్మోసం కితార్ ఇజి నెస్తాండ్రె హేరోదు రాజు నండ్రె కోపం ఆతాన్. వారు వెప్తా టయమ్దిజ్లెక కితాండ్రె బేత్తెహేమ్దుని, మరి డగ్గు మని ప్రాంతమ్కాజ్ మన్నినాహ్కాజ్ మన్ని రుండి పంటెజ్ని దన్ని అడిగి వయ్సు మని కొడొడిరిజ్ విజెరిజ్ సప్తెజ్ ఆడ్ర సితాన్.

17-18 “రామా నారుదాన్ ఉండ్రె పెరి జాటు వెహద్. గుండ్రె కొత్తె ఆజి అడొబాజిని జాటునె. రాహేలుసీ దన్ని కొడొడిర్ వందిజ్ అడొబాజినాద్. కొడొడిర్ సాతిజ్ అది ఓరిస్తెజ్ అట్వితాద్.” యిరిమ్య ప్రవక్తవెట దేవుణు ముజాల వర్గితిమహి యా మాట యాలెకెండ్రె పూర్తి ఆతాద్.

నజరేతుదు మర్జి వాజినార్

19 హేరోదు సాతి వెనుక అయ్గుప్పు దేసమ్దు మహి యోసేపుజ్ ఒరెన్ దేవుణు దూత కలాదు తోరె ఆతాండ్రె,

20 “నీను నిజ్అ, కొడొడిజ్ని అయ్సిజ్ అసి ఇస్రాయేలు దేసమ్దు సొన్అ. ఎందనిజ్ ఇహిజ, కొడొడిజ్ సప్తెజ్ నుడొజి మహికార్ సాత సొహార్”, ఇజి వెప్తాన్.

21 అందెజె యోసేపు నిజితాండ్రె కొడొడిజ్ని అయ్సిజ్ అస్తాండ్రె ఇస్రాయేలు దేసమ్దు మర్జి సొండ్రెజ్ సొతాన్.

22 గాని హేరోదు సాతి వెనుక వన్ని మరిసి ఆతి అర్కెలాయు యూదయ దేసమ్దు ఏలుబడి: కిజినాన్ ఇజి నెస్తాండ్రె అబ్బె సొండ్రెజ్ తియెలాతాన్. కలాదు వెప్తా లెకెండ్రె యూదయ దేసం సొన్విండ్ర గలీలయ ముటాదు సొహాన్.

23 అబ్బె నజరేతు ఇని పట్టమ్దు సొహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్లె”, ఇజి దేవుణు ప్రవక్తరు వెట క్రీస్తు వందిజ్ వర్గితిమహి మాటెజ్ యా లెకెండ్రె పూర్తి ఆతె.

3

బాప్తీసం సీని యోహాను యేసువందిజ్ సరి తయార్ కిజినాన్.

1-2 అయ దిసమ్కాజ్ బాప్తీసం సీని యోహాను వాతండ్రె, “దేవుణు ఏలుబడి: కిని కాలం డగ్గు ఆత మనాద్. అందెజె మీరు పాపమ్కు ఒప్పుకొడి:జి డి:సి సీదు”, ఇజి యూదయ బిడి:జ్ బూమి ప్రాంతమ్కాజ్ సాటిసి మహాన్.

* 2:15 2:15 హోసయ 11:1. § 2:17-18 2:17-18 ఇస్రాయేలు (యూదురి) లోకురిజ్ అనిగ్గొ ఆతి ఇస్సాకు మరిసియాతి యాకోబు అల్సినె రాహేలు. నెబుక్కద్నెసర్ బబులోనుదు ఏలుబడి: కిజి మహివలె ఎప్రయెన్ది యూదురిజ్ అస్త బత్తాన్. వరి లోఇ నండ్రెండ్రె బానె సప్పె ఆతార్.

3 “ప్రబు లోకుడగు వాడెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజి బిడిజిజ్ బూమిదాన్ ఒరెన్ డేల్ని వెహ్నిని కంటం వాజినాద్* ఇజి యెసయ ప్రవక్త వెట దేవుణు ముందాల వర్గితిక విని వందిజె.

4 యోహాను ఒంటె బులుస్కాణిజ్ తయార్ కితి సొకెజ్ తోడిగితాండ్రె, నడుముదు తోలు బెట్టు తోహె ఆజి మహాన్. వాండ్రు మేపిలెక్ని అడివి తేనె, తింజి బత్తిజి మహాన్.

5 యెరుసలేమ్దికార్ని, యూదయ దేసెమ్దికార్ విజెరె, మరి యొర్దాను గడ్డ డగు మని నాహ్కాణికార్ విజెరె సోతారె యోహాను వెహ్నికెజ్ వెండ్రెజ్ వన్నిడగు వాతార్.

6 వారు, కితి పాపమ్కు ఒప్పుకోడిజి యొర్దాను గడ్డదు వన్ని కియుదాన్ బాప్తినం లాగె ఆజి మహాన్.

7 పరిసయరు, మరి సదుకయరు నండొండార్ యోహాను బాప్తినం సీజి మహిబాన్ వాతార్. పరిజ్ నుడేజి వాండ్రు ఈహు వెహ్లాన్, “మీరు విసం మన్ని సరాన్ లెకెండ మన్నికిదెర్. దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కోపమ్దాన్ తప్రె ఆదెజ్ ఇజి మీరు వాతిదెరా? నిజమె అయలెకెండ ఇజి నాను ఒడిదెజ్ సిల్లెద్.

8 మీ పాపమ్కు ఒప్పుకోడిజి డిసి సీజి దనిజ్ తగితి పణిజ్కెజి తోరిస్తు.

9 ‘మాపు అబ్రాహాము తెగ్గాతికాప్, అందెజె మాపు సిక్సదాన్ తప్రె ఆనాప్లె’ ఇజి మీ మన్నుదు మీరు ఒడిబిమాట్. ఎందనిజ్ ఇహిజ, యా పణకాణిజ్ అబహముజ్ కొడొర్ పుట్టిజ్ దేవుణు అట్టికాన్ ఇజి నాను మిజి వెహ్నిన.

10 దేవుణు మరెక మొదొల్ కత్తి విసిర్దెజ్ కియుదు గొడెలి అస్తి వన్నిజ్ పోలిత మనాన్. నెగ్గి పట్టు అన్ఇ మరెకాజ్ విజు కత్తి సిసుద్ విసిర్నాలె.

11 మీరు పాపమ్కు ఒప్పుకోడిజి డిస్తి సీతి వందిజ్. నాను మిజి ఏరుదాన్ బాప్తినం సీజిన. నా వెనుక వానికాన్ నజి మిస్తి అతికారం మనికాన్. వన్ని జోడ్కు పిండెజ్ బా నాను తగ్గిక అవి. వాండ్రు దేవుణు ఆత్మదాన్ని, సిసుదాన్ మిజి బాప్తినం సీనాన్లె.

12 వాండ్రు గాలి ఇడ్ని సేహి కిదు అస్తి వన్నిజ్ పోలిత మనాన్. వాండ్రు వన్ని కలమ్దిజ్ సుబారం కిజి గాలి ఇట్టి కూలిజ్ కొటు ఇండ్రొ ఒసి వాక్నాలె. పొటుదిజ్ నంబిఇ సిసుదు సుర్నాన్లె.”

యేసు బాప్తినం లాగె ఆజినాన్.

13 నస్తివలె యోహాను కిదాన్ బాప్తినం లాగె ఆదెజ్, గలిలయదాన్ యేసు యొర్దాను గడ్డదు వాతాన్.

14 “నీ కియుదాన్ బాప్తినం లాగె ఆదెజ్, నజి అవ్సరం గాని నీను బాప్తినం లాగె ఆదెజ్ నా డగు వాతిదా?” ఇజి యోహాను వన్నిజ్ అడ్డు కిదెజ్ సుడతాన్.

15 “ఏలు యా లెకెండ జర్గిపిద్. విజు యా లెకెండ దేవుణుదిజ్ ఇస్వమాతివజి పూర్తి కినిక మజి తగ్గె”, ఇజి యేసు వెహ్లాన్. నస్తివలె యోహాను ఒప్పుకోటాన్.

16 బాప్తినం లాగె ఆతి వెటనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ ప్రావురపొటి లెకెండ యేసు ముస్కు డిగ్జి వానిక యోహాను సుడ్డతాన్.

17 “పిండ్రు నా ఇస్వమాతి మరిన్, విని ముస్కు నాను నండొ సర్ద ఆజిన”, ఇజి దేవుణు మంజిని బాడిదాన్ వెహ్నిని ఉండ్రొ జాటు వాతాద్.

4

యేసుజ్ నయ్యూన్ పరిస కిత్తిక.

1 వెనుక దేవుణు ఆత్మ యేసుజ్ బిడిజ్ బూమి ప్రాంతమ్దు నడపిస్తాన్. అబె నయ్యూన్ యేసుజ్ తపు కిబిస్తైజ్ పరిస కిజి సుడతాన్.

2 నలవయి రోస్కు రెయు పొకల్ ఉపాస్ మహి వెనుక వన్నిజ్ బజ కట్టాద్.

3 నయ్యూన్ వన్ని డగ్గు వాతండ్రై, “నీను దేవుణు మరిసి ఇహిజ, యా పణకుజ తిండి ఆఅ ఇజి వెహ్ అ”, ఇజి వెహ్ అన్.

4 నస్తివలె యేసు “లోకు బత్తిజినిక తిండిదానె ఆఎద్, గాని దేవుణు వెయుదాన్ వాని విజు మాటెజాణిజ్ బా బత్తిజినాన్ ఇజి దేవుణు మాటదు రాస్త మనాద్”*, ఇజి వన్నిజ్ వెహ్ అన్.

5 వెనుక సయ్తాను యేసుజ్ దేవుణు పట్టుం ఆతి యెరూసలేముదు కూక్త ఒతండ్రై, అబె మని దేవుణు గుడిః కొసాదు నిల్ ప్తాన్.

6 అబె నిల్ ప్తాండ్రై “నీను దేవుణు మరిసి ఇహిజ, ఇబ్బెణిజ్ అడిఃగి డాట్ అ. ‘నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్కు పణకుజ తగ్ లివిండ వారు నిజి వరి కిరాణిజ్ పెర్న అసార్” * ఇజి దేవుణు మాటదు రాస్త మనాద్”, ఇజి వెహ్ అన్.

7 యేసు వన్నిజ్, “ ‘నీ ప్రబు ఆతి దేవుణుదిజ్ పరిస కిదెజ్ ఆవిద్’ * ఇజిబా రాస్త మనాద్”, ఇజి వెహ్ అన్.

8 మరి ఉండ్రి సుటు, సయ్తాను యేసుజ్ నండొ ఎత్తు మని ఉండ్రి గోరోన్ ముస్కు ఎకిస్తాండ్రై యా లోకమ్దు మని విజు దేసిమ్ కాజ్, మరి వన్నాజ్ ముస్కు ఏలుబడిః కినివరి అతికారమ్ని వరిజ్ కలిగితి మనికెజ్ విజు తోరిస్తాన్.

9 అత్కెజ్ తోరిస్తాండ్రై, “నీను నా ఎర్దు ముణుకుజ్ ఊరిజ నజి పొగడిఃజి మాడిఃస్తిజి యాకెజ్ విజు నాను నిజి సీన”, ఇజి వెహ్ అన్.

10 యేసు వన్ని వెట, సయ్తానా, నా బాణిజ్ సాన్ అ, “నీ ప్రబు ఆతి దేవుణుదిజ్ పొగడిఃజి మాడిఃసి, వన్నిజి సేవ కిదెజ్ ఇజి దేవుణు మాటదు రాస్త మనాద్”, ఇజి వెహ్ అన్.

11 అయావలె సయ్తాను వన్నిజ్ డిఃసి సాహాన్. దేవుణు దూతార్ వాజి వన్నిజ్ నెగెణ్ సుడతార్.

యేసు సువార్త సాటిస్తైజ్ మొదొల్నినాన్

12 యోహాను కయ్ది మహాన్ ఇజి విహండ్రై యేసు గలిలయదు మని నజరేతు ఇని పట్టుమ్దు మర్జి వాతాన్.

13 వెనుక యేసు నజరేతు పట్టుం డిఃసి జెబులూను, నప్తాలి ప్రాంతమ్ కాజ్ డగ్గు, గలిలయ సందారం పడకాదు మని కపెర్నహమ ఇని పట్టుమ్దు వాతండ్రై బత్తితాన్.

14-16 “జెబులూను ప్రాంతమా, నప్తాలి ప్రాంతమా, యోర్దాన్ అతాహ పడక సమ్దరం డగ్గు మని యూదురు ఆఇకార్ బత్తిజిని గలిలయ ప్రాంతమా, సీకటిదు బత్కెజి మహికార్ గొప్ప జాయ్ సుడతార్. సావు ఉండ్రి నీడ లెకెండ్ మని దేసమ్దు బత్కెజి మహి లోకుర్ ముస్కు జాయ్ పుట్టాద్”*. ఇజి దేవుణు ముజాల యెసయ ప్రవక్త వెట వర్గితి మాట యా లెకెండ్ యేసు వాతిజ్ పూర్తి ఆతాద్.

* 4:4 4:4 ద్వితీ 8:3. * 4:6 4:6 క్రిస్త 91:11,12. * 4:7 4:7 ద్వితీ 6:16. * 4:14-16 4:14-16 యెసయ 9:1-2.

17 అయా వలెహాన్ అసి యేసు, “దేవుణు ఏలుబడిః కిని కాలం డగ్రు ఆత మనాద్. అందెజె మీ పాపమ్కు ఒప్పుకోడిఃజి డిఃసి సీదు”, ఇజి సాటిస్తాజ్ మొదోల్స్తాన్.

యేసు సిసూరిజ్ కూక్సినాన్

18 యేసు గలీలయ సమ్దరం ఒడుదాన్నడిసి మహివలె, పేతురు ఇజి కూకె ఆతిసిమోనుజ్ని, మరి వన్ని తంబెర్సి ఆతి అంద్రెయొజ్ సుడఃతాన్. వారు జాలెరిజు. వీరు రివిర్ సమ్దరమ్దు వల పొక్సి మొయొజ్అసి మహార్.

19 “నా వెట రదు. నా వెట వాదెజ్ లోకురిజ్ నెస్పిస్సివరి లెకెండ్ నాను మిజి తయార్ కినాలె”, ఇజి యేసు వరిజ్ వెహ్తాన్.

20 వారు వెటనె వరి వలేజ్డిఃస్తారె వన్ని వెనుక సొహార్.

21 అబెణిజ్ సొస్సి మహిజ్యేసు జెబెదాయి మరిసి ఆతి యాకోబుజ్ని, వన్ని తంబెర్సి ఆతి యోహానుజ్ సుడఃతాన్. వారు రిఎర్వరి బుబ్బ ఆతి జెబెదాయి వెట డోణిదు వలెజ్ నెగెణ్కిజి మహివలె యేసు వరిజ్ కూక్తాన్.

22 వెటనె వారు వరి డోణిని వరి బుబ్బెజ్డిఃస్తారె వన్ని వెనుక సొహార్.

యేసు జబ్బుది వరిజ్ నెగెండ్ కిజినాన్.

23 యేసు గలీలయ దేసెం విజు బూలాజి యూదురు మీటిజ్ కిజిని ఇల్కాజ్ వరిజ్ నేస్పిసి, దేవుణు ఏలుబడిః కిని కాలం వందిజ్ సువార్త సాటిసి మహాన్. విజు రకమ్ది జబ్బుది వరిజ్ని బాదదాన్ఇజ్ మహివరిజ్ నెగెండ్ కితాన్.

24 యేసు పేరు సిరియ దేసమ్దు విజు సారితాద్. రకరకమ్ది జబ్బుదివరిజ్లోకుర్వన్ని డగ్రు తతారె. నండో నోపిదాన్బాద ఆజి మహి వరిజ్, దెయం అస్తి వరిజ్, మూర్స జబు మహి వరిజ్, కిక్కుకాల్కు సాతివరిజ్వన్ని డగ్రు తతిజ్వాండ్రు వరిజ్ నెగెండ్ కితాన్.

25 గలీలయ, దెకపొలి*, యెరూసలేము, యూదయ, యొర్దాను అతాహి పడఃకదాన్ మంద లోకుర్ వాజి వన్ని వెట సొహార్.

5

గొరొన్ ముస్సు కిత్తి బోద.

1 యేసు మంద లోకురిజ్ సుడఃతాండ్రె ఉండ్రె గొరొత్ ఎక్తాన్. అబె బసిమహిజ్, వన్ని సిసూర్ వన్ని డగ్రు వాతార్.

2 అయావలె వాండ్రు వరిజ్ యా లెకెండ్ వెహ్సి బోదిస్తాజ్ మొదోల్స్తాన్.

3 “దేవుణుదిజ్ నెందితిలెకెండ్ బత్తిజి దన్నిలోఇ మాపు తకుదికాప్” ఇజి నెసి మజి మరి మండ్రెజ్ ఎయెర్బా ఇజి కోరిజినరో, దేవుణు సీజిని దీవనమ్కు మంజినె. ఎందనిజ్ ఇహిజు, వారు దేవుణు కిని ఏలుబడిఃదు మంజినార్.

4 ఏలు దుకమ్దాన్ అడఃబాజి మన్నికార్ దేవుణు సిని దీవనమ్కు మంజినికార్ ఆనార్లె, ఎందనిజ్ ఇహిజు దేవుణు వరిజ్ ఓదరిస్తాన్.

5 నిపాతి గుణం మనికార్ దేవుణు సిని దీవనంకు మంజినికార్ ఆనార్లె ఎందనిజ్ ఇహిజు యా లోకం విజు వరి సొంతం ఆనాద్.

6 దేవుణు వెహ్సి వజు నీతినిజాయ్దాన్ మండ్రెజ్ ఇజి నండో ఆస మనికార్ దేవుణు సిని దీవనమ్కు మంజినికార్ ఆనార్లె, ఎందనిజ్ ఇహిజు వరి మన్ను నిండ్రు ఆనిలెకెండ్ వరి ఆసెజ్ దేవుణు తీరిస్తాన్లె.

* 4:25 4:25 దెక్కుపొలి ఇహిజు పది పట్టుమకు ఇక్కెజ్ గలీలయ సమ్దరం అతాహి పడక మహా.

7 కనికారం తోరిస్నీకార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ దేవుణు వరి ముస్సు కనికారం తోరిస్నాన్లె.

8 నెగ్గి మస్సు మనికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణుదిజ్ సూణార్లె.

9 లోకుర్ సమాదనమ్దాన్ మండ్రెజ్ ఇజి పణి కినికార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణు కొడోఃర్ ఇజి కూకె ఆనార్లె.

10 దేవుణు వెహ్త్తి వజ నాయం వందిజ్ మల్లెజ్ ఓరిస్నీకార్ దేవుణు సీని దీవనమ్కు మంజినికార్ ఆనార్లె, ఎందనిజ్ ఇహిజ వారు దేవుణు కిని ఏలుబడిఃదు మంజినార్లె.

11 నా ముస్సు నమకం ఇట్టి వందిజ్ లోకుర్ మీ ముస్సు నిందెజ్ మోప్పి మిజి మల్లెజ్ కిజి, మరి మీ ముస్సు అబద్దమాతి సెఇ మాటెజ్ విజు వెహ్త్తి వెలె మీరు దేవుణు సీని దీవనమ్కు మంజినికార్.

12 అయావలె నండో సరద ఆజి మండ్రు. ఎందనిజ్ ఇహిజ పరలోకామ్దు* మిజి నండో పలం దోహ్కాద్లె. మీ ముందాల బత్తిజి మహి దేవుణు ప్రవక్తరుజ వెటబా వారు యాలెకెండ మల్లెజ్ కితార్.

సోరు - జాయ్

13 మీరు యా లోకమ్దు సోరు ననికిదెర్. గాని, సోరుదిజ్† రుసి సాహిజ, ఎలాగ దనిజ్ రుసి మరజి తపిస్తెజ్ ఆనాద్? అక వెల్లి విసీర్జి లోకుర్ మట్టెజ్నె ఆఎండ మరి ఇని పణిదిజ్బా రజక.

14 మీరు యా లోకమ్దు మనివరిజ్ జాయ్ననికిదెర్. గోరొన్ ముస్సు మని పట్నం డాజ్జి మండ్రెజ్ అట్విద్.

15 ఎయెర్బా ఉండ్రీ దీవ కసిసి తూముదాన్ ముసి ఇడ్ఎర్. గాని ఇండ్రొణివరిజ్ విజేరిజ్ జాయ్సినవజ దీవ కంతూదునె ఇడ్నార్.

16 అయాలెకెండనె, మీ బత్తు విజేరిజ్ జాయి సీనివజ మండ్రెజ్. నస్తివలె మీరు కిని నెగ్గి పణిజ సుడఃజి లోకుర్ విజెరె దేవుణు మంజిని బాడిఃదు మని మీ బుబాతి దేవుణుదిజ్ పొగిడిఃనార్.

దేవుణు సితీ రూలుజ వందిజ్

17 దేవుణు సితీ రూలుజ్ గాని, దేవుణు ప్రవక్తరు వెహ్త్తి మాటెజ్ గాని డెయ్జి పొక్తెజ్నాను వాత మన్న ఇజి మీరు ఒడ్బిమాట్. వనకాజ్ డెయ్జిపొక్తెజ్ ఇజి సిల్లెద్, గాని అయాలెకెండనె పూర్తి కిదెజ్నె నాను వాత మన్న.

18 ఏలుహాన్ అసి బూమి ఆగాసం సిల్లెండ అతిజ్బా దేవుణు మాటదు మని ఉండ్రీ ఇజిరి అక్సరం గాని, సున్న గాని, రాస్తి మని లెకెండ పూర్తి ఆఎండ సోన్ఉ ఇజి నాను మిజి నిజం వెహ్త్తి.

19 ఎయెన్బా దేవుణు మాటదు మని ఇజిరి ఆగ్నెజ్ లోఇ ఉండ్రీ దనిజ్ లోజిజి మన్ఏండ, అయాలెకెండ లోజిఏండ మండ్రెజ్ ఇజి లోకురిజ్ నెస్సిస్తిజ వన్నిజ్, దేవుణు ఏలుబడిః కినివరి లోఇ లావ్ ఇజిరికాన్ లెకెండ వాండ్రు ఇడ్నాన్లె. గాని ఎయెర్బా దేవుణు మాటదు రాస్తిమని లెకెండ లోకురిజ్ నెస్సిసి అయాలెకెండనె కిజి మహిజ దేవుణు ఏలుబడిః కినివరి లోఇ వారు గొప్ప పెరికార్ ఆనాన్లె.

* 5:12 5:12 దేవుణు మంజినిమబాడ్డి † 5:13 5:13 యేసుప్రబు కాలమ్దు ఏలు దోహ్కీ లెకెండ మన్ని సోరు సిల్లెత్తాద్. అయాలెలె సోరువెట తెల్లని ఇన్నబా కూడిత మహా తడి కిత్తిజ సోరు విజు కరిగిజ సానాద్, ఇన్ను మిగిలినాద్. అయాలెలె లోకుర్ సోరు రుసి సిల్లిక ఇజి వెహ్త్తి మహర్.

20 మీరు కిని పణిజ్, పరిసయరుజుని యూదురి రూలుజ్ నెస్సిస్సికార్ కిని పణిజ మున్సు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిఃదు మంజినిదెర్లె ఇజి నాను మిజి వెహ్సిన.

సప్తిక ఆవద్

21 “లోకాజ్ సప్తెజ్ ఆవద్”^{*} ఎయెన్బా ఒరెన్ వన్నిజ్ సప్తిజ, వన్నిజ్ తప్వెండ తీర్పు వానాద్లె ఇజి ముందాహాన్ అసి వెహ్తి మని మాట మీరు వెహిమనిదెర్ గదె?

22 గాని ఏలు నాను మిజి వెహ్తిక ఇనిక ఇహిజ ఎయెన్బా, మరి ఒరెన్ వన్ని మున్సు. కోపం ఆతిజ వన్నిజ్ తీర్పు వానాద్. ఎయెన్బా మరి ఒరెన్ వన్నిజ్ “పణిదిజ్ రెఇకి”, ఇజి వెహ్తిజ వాండ్రు సన్హద్రి సజం ఎద్రు దన్ని వందిజ్ సమాదనం వెహ్తిజ్వలె. ఎయెన్బా మరి ఒరెన్ వన్నిజ్ “బుద్ది సిలికి”, ఇజి వెహ్తిజ, వాండ్రు ఎలాకాలం సిను కసి మంజిని బాడిఃదు అర్పు మంజినాన్.

23-24 నీను దేవుణుదిజ్ సంద సుర్ని మాలి పీటాదు సంద సిదెజ్ సొనివెలె, మరి ఒరెన్ వన్నిజ్ నీ మున్సు. ఇనికాద్ కోపం మనాద్ ఇజి అబె నిజి ఎతు వాతిజ, సంద సిదెజ్తతి వన్కాజ్ అబె ఇడఃజి వెటనె సంద సుర్ని మాలిపీట డిఃసి సొన్సి, ముందాల నీను వనివెట రాజినం ఆఅ. వెనుక మర్జి వాజి దేవుణుదిజ్ సంద సుర్ని సిఅ.

25 నిజి కోర్డు కిదెజ్అకు మని వన్ని వెట బేగి రాజినం ఆఅ. టయం మనివెలె ఆక కిఅ. సిలిజ వాండ్రు నిజి తీర్పు కిని వరిజ్ ఒపజెహ్సాన్. తీర్పు కినికార్ నిజి జెలిదు ఇడదెజ్ అతికారిజ్ ఒపజెహ్సార్. వాండ్రు నిజి జెలిదు ఇడాన్.

26 ఉండ్రీ పయ్బా సిల్లెండ అపు మనిక విజు సీనిదాక నీను వెల్లి వాదెజ్ అట్ఇ, ఇజి నాను నిజి నిజం వెహ్సిన.

27 “రంకు బూలాదెజ్ ఆవద్” ఇజి వెహ్తి మనిక మీరు వెహి మనిదెర్ గదె.

28 గాని నాను మిజి వెహ్తిక ఇనిక ఇహిజ ఎయెన్బా మన్సుదు సెఇ ఆసదాన్ ఉండ్రీ అయ్లి కొణ్ణిదిజ్ బేస్తిజ వాండ్రు అయావలెనె దనివెట వన్ని మన్సుదు పాపం కితికాన్ ఆజినాన్.

29 నీ ఉణెర్ కణక నిజి తపు కిబిస్తిజ దనిజ్ లాగ్గి విసీర్అ. నీనె ఎల్ల కాలం సిను మంజిని బాడిఃదు సొన్సి అర్ఎండ, మీ ఒణ్ణిల్దాన్ ఉండ్రీ ముక సొహిజ అక్కాదె నెగెద్.

30 మరి నీ ఉణెర్ కియు నిజి తపు కిబిస్తిజ, దనిజ్ కత్తి విసీర్అ. నీనె ఎలాకాలం సిను మంజిని బాడిఃదు సొన్సి అర్ఎండ, నీ ఒణ్ణిల్దాన్ ఉండ్రీ ముక సొనికదె నెగెద్.

31 ఎయెన్బా వన్ని ఆల్నిజ్ డిఃసి సిదెజ్ ఇహిజ ఇబ్బెణిజ్ అసి నీను నా ఆల్ని ఆవద్ ఇజి దనిజ్ ఉండ్రీ విడిఃఆకు రాసి సిదెజ్ ఇజి వెహ్తిక మీరు వెహి మనిదెర్గదె?

32 గాని నాను మీ వెట వెహ్తిక ఇనిక ఇహిజ, రంకు బూలాఇదనిజ్ మాసి డిఃస్తి సితిజ, వాండ్రు దనిజ్రంకు బూలాదెజ్కిబిస్సికాన్ ఆజినాన్. మరి ఎయెన్బా దనిజ్పెండఃలి కితిజ వాండ్రు దనివెట రంకు బూలానికాన్ ఆజినాన్.

ప్రమాణమ్కాజ్ వందిజ్

33 మరి ఇనిక ఇహిజ, “ ‘నీను కితి ఒట్టు పొక్తిక అయాలెకెండ కివెండ తప్తెజ్ ఆవద్, దేవుణు ముందాల కితి ఒట్టుదిజ్ అయావజనె కిదెజ్’ ఇజి వెహ్తిక ముందాహాన్ అసి మీరు వెహిమనిదెర్ గదె.

^{*} 5:21 5:21 నిర్గమ 20:13.

34 నాను మీ వెట వెప్పొక ఇనిక ఇహిజ ఇనిదనిజ్ బా ప్రమాణం కిమాట్. ఆకాసం తోడు: ఇజి వెహ్మాట్, అక దేవుణు బసిని సింహాసనం.

35 సిలిజ బూమి తోడు: ఇజి వెహ్మాట్, అక దేవుణు వన్ని కాల్కు ఇడ్పి పీట. మరి యెరూసలేం తోడు: ఇజి వెహ్మాట్, రాజు ఆతి దేవుణుదిజ్ నెందితి పట్టుం.

36 నీ బుర్ర తోడు: ఇజిబా వెహ్మా, ఎందనిజ్ ఇహిజ నీ బుర్రది కొపువెంటి ఉండ్రీబా తెలాజ్ గాని కరిజ్ గాని కిదెజ్ నీను అట్ఇ.

37 మీ మాటేజ్ 'ఒబ ఇహిజ ఒబ', ఇజి మండ్రెజ్. 'ఆఎద్ ఇహిజ ఆఎద్', ఇజినె మండ్రెజ్. వనకాజ్ మిస్తికెజ్ సెఇ వన్నిబాణిజ్ వానికెజ్'.

కణకాదిజ్ బదులు కణక.

38 " 'కణకాదిజ్ బదులు కణక, పలుదిజ్ బదులు పలు' ఇజి దేవుణు మోసేజ్ సిత్తి మన్ని రూలుదు వెప్పి మహిక మీరు వెహిమనిదెర్ గదె?

39 నాను మిజి వెప్పొన, సెఇ పణిజ్ కిని వరిజ్ అడ్డు కిమ. మరి నీను వన్ని మున్కు కోపమాజి వాండ్లు నిజి కిత్తిదన్నిజ్ మర్జి కిదెజ్ ఆఎద్. ఎయెన్బా ఉణెర్ లెపాదు డెయ్యిజ, డేబ్ర లెపబా వన్నిజ్ తోరిన్అ.

40 ఎయెన్బా నిజి కోర్టు కిజి నీ సొక లాగ్దెజ్ నుడొతిజ, నీ కండువాబా వన్నిజ్ సీజి మన్అ.

41 మరి, ఒరెన్ రోమ నయనమ్దికాన్ వన్ని ఒస్తుజ్ పిండిజి వన్ని వెట 'ఉండ్రీ మయిలు దూరం రఅ' ఇజి నిజి బలవంతం కితిజ వన్నివెట రుండి మయిలుజ్ దూరం ఇడ్డి సొన్అ.

42 నిజి లొస్పివన్నిజ్ సీఅ, మరి నిజి అపు లొస్పివరిబాణిజ్ మొకొం మహ్మ" .

నీ పగ్గతి వరిజ్ ప్రేమిన్అ.

43 " 'నీ పడకాతి వన్నిజ్ ప్రేమిన్అ, పగాతి వరిజ్ ఇన్టం ఆవిండ మన్అ. మున్కు కోపమ్దాన్ మన్అ', ఇజి వెప్పిమహిక మీరు వెహిమనిదెర్ గదె?

44 గాని నాను మిజి వెప్పొక ఇనిక ఇహిజ, మీ పగ్గతి వరిజ్ ప్రేమిన్టు, మిజి హిమ్న కిజిని వరి వందిజ్ పార్దనం కిదు.

45 అహిజ మీరు పరలోకామ్దు మన్ని మీ బుబ్బాతి దేవుణుది నిజమాతి కొణొర్ ఇజి తోరె ఆనిదెర్లె. దేవుణు సెఇవరి మున్కుబా నెగ్గివరి మున్కుబా వన్ని పొదు జాయ్ సిబిసినాన్. నాయం మని వరి మున్కుబా నాయం సిలివరి మున్కుబా పిరు పొక్కినాన్.

46 మిజి ప్రేమిస్పివరిజె మీరు ప్రేమిస్పిజ దేవుణు మిజి పలం సీనాన్ ఇజి మీరు ఒడిజిబిజినిదెరా? పను పెర్నికార్బా ఆహొ కిజినార్ గదె?

47 మీరు మీ కూల వరిజె మీరు మాడిసినిదెర్ ఇహిజ మీరు ఆఇకార్ కినిదనిజ్ ఇంక మిస్తిక ఇనిక కిజినిదెర్? యూదురు ఆఇకార్బా అయాలెకెండ్ కిజినార్ గదె?

48 పరలోకామ్దు మన్ని మీ బుబాతి దేవుణు ఇని కల్తి సిలికాన్. అందెజె మీరుబా అయాలెకెండ్నె మండ్రు."

6

1 మీరు కిని నెగ్గి పణిజ్ లోకుర్ సుడెదెజ్ ఇజి వరి ముందాల కివిండ జాగర్త మండ్రు. ఎందనిజ్ ఇహిజ ఆహె కితిజ పరలోకామ్దు మని బుబ్బాతి దేవుణు బాణిజ్ మిజి ఇని పలంబా దోహ్కావద్.

2 అందెజె అవ్సరం మని వరిజ్ ఇనికబా సితిజ, వేసం కినికార్ కిని లెకెండ అక విజేరిజ్ తెలిని లెకెండ జోడుబాంక ఉకెపిసి డెల్ని వెహ్మట్. విజెరి ముందాల మజి గొప్పు పేరు వాడెజ్ ఇని ఆసదాన్ వారు యూదురు మీటిజ్ కిని ఇల్కాజ్, మరి సర్దు ఆహె కిబిస్సార్. వరిజ్ అయావలెనె పూర్తి పలం దోహ్కా మనాద్ ఇజి నాను మిజి నిజం వెహ్సిన.

3 గాని నీను అవ్సరమ్దు మనివరిజ్ సాయం కినివెలె, నీ ఉణెర్ కియు కినిక నీ డేబ్ర కియు నెస్తెజ్ ఆవద్.

4 అహిజు నీను సితిక ఎయెర్బా నెన్ఎండ మంజినాద్. అయావలె ఎయెర్బా నెన్ఎండ నీను కితిక సుడెజిని నీ బుబ్బాతి దేవుణు నిజి పలం సీనాన్లె.

5 మీరు పార్దనం కినివెలె వేసం కిని వరి లెకెండ మన్మాట్. లోకుర్ విజేరి సూణి లెకెండ యూదురు మీటిజ్ కిని ఇల్కాజ్, మరి సర్దు నిల్ని పార్దనం కిడెజ్ వరిజ్ ఇస్టం. వరిజ్ పూర్తి పలం దోహ్కా మనాద్ ఇజి నాను మిజి నిజం వెహ్సిన.

6 గాని నీను పార్దనం కినివెలె. నీను గదిదు సొన్ని సేహ్లా కెహ్సా, ఎయెర్బా తొఇ నీ బుబ్బాతి దేవుణు వెట పార్దనం కితి. అహిజు ఎయెర్బా నెన్ఎండ నీను కితిక సుడెజిని ఎయెరిజ్బా తోరె ఆఇ నీ బుబాతి దేవుణు నిజి పలం సీనాన్.

7 మరి మీరు పార్దనం కినివెలె యూదురు ఆఇ వరి లెకెండ పణిదిజ్ రెఇ మాటెజ్ వెహ్మట్. అయాలెకెండ లావ్ వర్గితిజానె దేవుణు వినాన్ ఇజి వారు ఒడెబిజినార్.

8 మీరు వరిలెకెండ మండ్రెజ్ ఆవద్. ఎందనిజ్ ఇహిజ మిజి అవ్సరం ఆతిక ఇనిక ఇజి మీరు లొన్ని ముందాల్ని మీ బుబ్బాతి దేవుణు నెసినాన్.

9 “అందెజె మీరు యా లెకెండ పార్దనం కిడెజ్. ‘పరలోకామ్దు మని మా బుబ్బాతి దేవుణు, లోకుర్ విజెరి నీ పేరు గొప్పు నెగ్గిక ఇజి గవ్వరం సిపిర్.

10 నీ ఏలుబడిః లోకుర్ విజెరి ముస్కు మనీద్. పరలోకామ్దు నిజి ఇస్టమాతికెజ్ జర్గిని లెకెండనె బూమి ముస్కుబా జర్గిపిద్.

11 రోజురోజుదిజ్ మజి కావాలిస్తి తిండి అయ రోజు మజి సీజి మన్అ.

12 వేరెదికార్ మా వెట కితి తపుజ్ మాపు వరిజ్ సెమిస్తి లెకెండనె, మాపు కితి తపుజ్ మజిబా సెమిన్అ.

13 పాపం కిబిస్తి సెఇ ఆసెజ్ మా లొఇ రెఎండ, సయ్తూను బాణిజ్ మజి తప్రిన్అ’.

14 లోకుర్ మిజి కిని తపుజ్ మీరు వరిజ్ సెమిస్తిజ, పరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిస్సాన్.

15 గాని, మీరు లోకుర్ మీ వెట కిని తపుజ్ మీరు వరిజ్ సెమిన్ఎండ మహిజ, పరలోకామ్దు మన్ని మీ బుబ్బాతి దేవుణుబా మీరు కిని తపుజ్ మిజి సెమిన్ఎన్.”

ఉపాస్

16 “మీరు ఉపాస్ కినివలె, వేసం కిని వరిలెకెండ మండ్రెజ్ ఆవద్. ‘మాప్ ఉపాస్ మంజినాప్’ ఇజి విజేరి నెస్తెజ్ ఇజి వారు మొకొ నీర్సం కిజి మంజినార్. అయావలెనె వరిజ్ పూర్తి పలం దోహ్కా మనాద్ ఇజి నాను మిజి నిజం వెహ్సిన.

17-18 గాని మీరు ఉపాస్ కినివెలె బుర్రాదు నూనె రాసె ఆజి మొకొ ఉఱ్ఱపాజి మండ్రు. అహిజు మీరు ఉపాస్ కినికనిక లోకుర్ ఎయెర్బా నెన్ఎర్. గాని ఎయెర్బా తొఇ

మీ బుబ్బతి దేవుణు ఒరేండ్రె నెస్సాన్. ఎయెర్బా నెన్ఎండ మీరు కినిక నుడేజిని మీ బుబ్బతి దేవుణు మిజి పలం సీనాన్.”

సమ్సారం

19 డొజారి డుగ్జి ఒతెజ్ అక్కు మని, మరి సెదని కరి తిండ్రెజ్ అకుమని యా బూమి ముస్సు మీ వందిజ్ సమ్సారం గణాన్మాట్.

20 గాని డొజారిబు డుగ్జి ఒతెజ్ అట్ఇ, మరి సెద గాని కరి గాని పాడే కిదెజ్ అట్ఇ దేవుణు మంజిని బాడిడు మీ వందిజ్ సమ్సారం గణన్దు.

21 ఎందనిజ్ఇహిజు నీ సమ్సారం ఎంబె మనాదొ అబెనె నీ మన్సుబా మంజినాద్.

22 కణక ఒడొల్దిజ్ దీవ లెకెండెనె మనాద్. నీ కణక నెగ్గక ఇహిజు నీ ఒడొల్దిజ్ విజు నెగ్గకెజ్ తసి మంజినాద్.

23 నీ సెఇ ఉదెసమ్దాన్ నీ కణుకెజాణిజ్ సుడిజు మహిజు, నీ మన్సు విజు సీకటి మంజినాద్. నీ ఒడొల్ విజుబా సీకటి ఆజి మంజినాద్. నిజి మనాద్ ఇజినీను ఒడొబిజిని జాయ్ సీకటి ఆతిజు, అయ సీకటి ఎసొనో సీకటి.

24 ఎయెన్బా రిఎర్ ఎజుమానిరు వందిజ్ ఉండ్రె లెకెండె పణి కిదెజ్ అట్ఎన్. ఒరెన్ వన్నిజ్ ప్రేమిని మరి ఒరెన్ ముస్సు ఇన్దుం సిల్లెండ మంజినాన్. సిల్లిజు ఒరెన్ వన్నిజ్ లొజిజి నమ్మకమాతి వనిలెకెండె మంజినాన్. మహివన్ని ముస్సు సెఇ మాటెజ్ వర్గిజి మంజినాన్. అయలెకెండెనె దేవుణుదిజ్ని డబ్బుదిజ్ ఉండ్రె లెకెండె ప్రేమిన్దెజ్ మీరు అట్ఇదెర్.

విసారిస్మాట్

25 అందెజె నాను మిజి వెహ్పిక ఇనిక ఇహిజు, ఇనిక తినాప్లె, ఇనిక ఉణాప్లె ఇజి మీ బత్తు వందిజ్విసారం ఆమాట్. మరి మా ఒడొల్వందిజ్ ఇనిక పొర్పానాప్లె ఇజి ఒడిబిమాట్. మీ పాణం తిండిదిజ్మిస్తిక ఆవదా? మీ ఒడొల్ సొక్క పాతెజు మిస్తిక ఆవదా?

26 ఆగాసమ్దు ఎగ్రిజిని పొటిజు సుడేదు. అవి విత్ఉ, కొయ్ఉ, ఒసి కొటుదు వాక్ఉ గాని పరలోకామ్దు మని మీ బుబ్బతి దేవుణు వనకాజ్ పొన కిజినాన్. మీరు వన్యా మిస్తి విలువ మనికిదెర్ ఆఇదెరా?

27 మీ లోఇ ఎయెన్బా విసారిస వన్ని బత్తుదిజ్ ఉండ్రె గంట కుడుప్తెజ్ అట్నాండ్రా?

28 మరి ఎందనిజ్ సొకెజు వందిజ్ మీరు విసారిసినిదెర్? మడిజు మని పూజు సుడేదు, అవి కన్దబాడ్ఉ, సొక కిదెజ్ నూలుజ్ తయార్ కిఉ.

29 అహిజ్బా విజు ఆస్తి కలిగితి మన్ని సొలోమోను రాజు యా ఉండ్రె పూజు లకెండె సొకు మన్ని ఉండ్రె సొక్క తొడిగివ్తాన్, ఇజి నాను మిజి వెహ్పిన.

30 నేడ్రు మంజి విగెహిజ్ సిసద్ సురె ఆని మడిజు మని యా గడిదిజ్ దేవుణు యా లెకెండె సొకు సిత్తాన్. అహిజు, ఇజిరి నమకం మనికిదెరా మరి ఒదె నగెండెమిజి సొకెజ్ తొడిగివ్తాండ్రా?

31 అందెజె మీరు, “ఇనిక తినాప్లె, మరి ఇనిక ఉణాప్లె, సిలిజు ఇనిక పొర్పానాప్లె”, ఇజి ఒడిబిజు బాద ఆమాట్.

32 ఎందనిజ్ ఇహిజు దేవుణుదిజ్ నెన్ఇకార్నె వినక వందిజ్ రెబూజినార్. యాకెజ్ విజు మిజి అవ్సరం ఇజి పరలోకామ్దు మని మీ బుబ్బతి దేవుణు నెసినాన్.

33 గాని విజు దనిజ్ ఇంక దేవుణు ఏలుబడిః కిని వందిజ్ని మరి వన్ని ఎద్దు మీరు నీతినిజుద్దుదాన్ మండ్రెజ్ ఇజి ఆస ఆజి మండ్రు. నస్తవలె మిజి కావాలిస్తెకెజ్ విజు మిజి దోహ్వాక్సె.

34 విగెహిజ్ వందిజ్ విసారిస్తాట్. విగెహిజ్ జర్గిని వన్కా వందిజ్ విగెహిజ్ విసారిస్తు. ఎమేణి రోజుదిజ్ తగితి కస్టం అయ రోజుదు మంజినె.

7

తీర్పు కిమాట్

1 “మహి వరి మున్కు తీర్పు కిమాట్. అహిజ దేవుణు మిజిబా తీర్పు కినాన్లె.

2 మీరు మహివరిజ్ ఎలాగ తీర్పు కినిదెరో అయలెకెండెనె దేవుణు మిజిబా తీర్పు వానాద్లె. మీరు ఇని కొల్దదానె దేవుణు మిజిబా తీర్పు సీనాన్లె.

3 నీ కణకాదు ఉండ్రె తూలం ననిక మహివలె, దనిజ్ సుడవండ, నీను, నీ తంబెరి కణకాదు మని ఇజిరి కసరాదిజ్ ఎందనిజ్ బేసిని?

4 ‘నీ కణకాదు తూలం ననిక మనివెలె అక లాగెండ, నీ తంబెరి కణకాదు మని ఇజిరి కసరాదిజ్ నాను లాగ్గి విసీర్చు’ ఇజి నీను ఎలాగ వెహిన్సాని?

5 వేసం కినికిదెరా, ముందాల నీ కణకాదు మని తూలం ననిక లాగెఅ. అయావలె నీ తంబెరి కణకాదు మని ఇజిరి కసరాదిజ్ నెగెండ సుడఃజి లాగెదెజ్ అట్టి.

6 దేవుణుదిజ్ సెందితి సజతిజ్ అక్కెజ్ ఇస్టం కిణ వరిజ్ నెస్పిస్తెజ్ ఇజి సుడఃమట్. అయలెకెండె కితిజ, వారు తిండి సీని వరిజ్ కట్టి సెఇ నుకుడిజ్ లెకెండె వారు కొంపం ఆజి మరజి మీ మున్కు వాజి అర్నార్. గొప్ప విలువ మనికెజ్ పండ్రెజ్ ముందాల ఇట్టిజ అక్కెజ్ వన్కాజ్ కాల్యాణిజ్ మట్టి లెకెండె వారుబా కినార్లె.

7 మీరు ఇనిక లొస్పిదెరో అక మిజి దేవును సీనాన్. ఇనిక మీరు రెబాజనిదెరో అక దేవుణు మిజి సీనాన్. కొతు మీ వందిజ్ దేవుణు సెప్లా రే ఆనాన్లె.

8 లొస్పివరిజ్ విజేరిజ్ దోహ్వాక్సె, రెబానివన్నిజ్ తోరో ఆజినాద్. కొత్తిని వన్నివందిజ్ సేప్లా రే ఆనాద్.

9 మీ మరిన్ మిజి తిండి లొస్పిజ, మీరు ఎయిదెర్బా వన్నిజ్ పణుకు సీనిదెరా?

10 మరి వాండ్రు మెయ లొస్పిజ, సరాన్సీనిదెరా?

11 మీరు సెఇకిదెర్ ఆతిజ్బా మీ కొడోరిజ్ నెగ్గి ఇనామ్కునె సీదెజ్ ఇజి నెస్పిదెర్. అహిజ పరలోకామ్దు మని మీ బుబ్బాతి దేవుణు, వన్నిజ్ లొస్పివరిజ్ దినిజ్ ఇంక మరి ఒదె నెగ్గి ఇనామ్కు సివంద్రా?

12 అందెజె విజు సజతిజ్ లోఇ, మహికార్ మిజి ఇనిక కిదెజ్ ఇజి మీరు కోరిజనిదెరో అయలెకెండెనె మీరు వరిజ్ కిదు. దేవుణు మోసెజ్ సీతి రూలుజ్ని దేవుణు ప్రవక్తరు వర్గితి మాటెజ అర్దం యాకాదె.”

ఒసార్ సరిని ఇహ్కూ సరి

13 ఇహ్కూ సరి గవ్నిదాన్ సొండ్రు. ఎందనిజ్ ఇహిజ నాసనమ్దు సొని సరి ఒసార్దిక. అయ గవునిబా ఒసార్దిక. అయ సర్దు సొనికార్ నండొండొర్ మనార్.

14 ఎలాకాలం మంజిని బత్తు సీని సరి ఇహ్కూదికాదె, దని గవునిబా ఇహ్కూదిక. అయ సరిదాన్ నడినికార్ కొకొండొరె.

మరాన్ని దని పట్కు

15 నెగ్గికాప్ ఇజి నాటిసినికార్ గాని తపు నెస్సిన్నీ ప్రవక్తరు వందిజ్ జాగర్త మండ్రు. వారు ప్రమాదమాతి మూర్కతం మని కార్నుకుడిజ్ లెకెండ్ మనికార్. గాని వెల్లిహన్ గొర్రె లెకెండ్ ప్రమాదం సిలికార్ ఇజి తోరె ఆజినార్.

16 వరి పణిజాణిజ్ మీరు వరిజ్ నెస్సిదెర్లె. ఎయెర్బా సాప్పుతుపెజాణిజ్ ద్రాసపట్టు కొయ్విర్. సాప్పు మరెకాజ్ బొడె పట్టు కొయ్విర్.

17 అయలెకెండ్నె విజు నెగ్గి మరెకాజ్, నెగ్గి పట్టునె అన్నె, మరి సెఇ మరాతు సెఇ పట్టునె అన్నె.

18 ఉండ్రీ నెగ్గి మరాతు సెఇ పట్టు అన్ఉ, మరి సెఇ మరాతు నెగ్గి పట్టు అన్ఉ.

19 నెగ్గి పట్టు అన్ఇ మరెక్ విజు కత్తి సినుద్ విసిరె ఆనెలె.

20 అయలెకెండ్నె వరి పణిజాణిజ్ మీరు వరిజ్ నెస్సిదెర్.

21 ప్రబువా, ప్రబువా ఇజి నజీ కూక్కికార్ విజెరె దేవుణు ఏలుబడిఁదు మన్విర్, గాని పరలోకామ్దు మని నా బుబెజ్ ఇష్టమాతి వజ కినికాండ్రె దేవుణు ఏలుబడిఁదు మంజినాన్.

22 తీర్పు తీరిసిని దిన్మదు నండొండార్ నా డగ్రు వాజి, “ప్రబువా, ప్రబువా మాపు నీ పేరుదాన్ దేవుణు ప్రవక్తరు వజ వర్గిఎతాపా? నీ పేరుదాన్ దెయమ్కాజ్ పెర్వితాపా? నీ పేరుదాన్ నండొ బమాతి పణిజ్ కిఎతాపా?”, ఇజి వెహ్నార్.

23 అయావలె, “నాను మిజీ ఎసెజ్బా నెన్ఎత. సెఇ పణిజ్ కినికిదిరా, నా డగ్రుహన్ సొండ్రు ఇజి వరిజ్ తినాజ్ వెహ్నా.

బుద్ధి మనికాన్ని బుద్ధి సిలికాన్

24 అందెజె, యా నా మాటెజ్ వెంజి అయా వజ కినికాన్ ఎయెన్బా, సటు మున్ను వన్ని ఇలు తొహ్తి బుది మనివన్నిజ్ పోలిత మనాన్.

25 పిరు వాతాద్. గడ్డెజ్ నిండ్రీజి సొహె. గాలి వాజి అయ ఇలు మున్ను డెఁతూద్ గాని అయ ఇలు పునాది సటు మున్ను మనిజ్ అర్ఎతాద్.

26 గాని యా నా మాటెజ్ వెంజి వన్యా లెకెండ్ కిఇకార్ ఎయెన్బా ఇన్ను మున్ను వన్ని ఇలు తొహ్తి బుద్ధి సిలి వన్నిజ్ పోలిత మనాన్.

27 పిరు వాతాద్. గడ్డెజ్ నిండ్రీజి సొహె. గాలి వాజి అయ ఇలు మున్ను డెఁయ్తాద్. అయావలె అయ ఇలు నండొ జాటుదాన్ అడిఁగి అర్తాద్.”

28 యేసు యా మాటెజ్ వెహ్తి వీజితిజ్ లోకుర్ విజెరె వన్ని బోదదిజ్ బమ్మ ఆతార్.

29 ఎందనిజ్ ఇహిజు వాండ్రు, యూదురి రూలుజ్ నెస్సిన్నీ వరి లెకెండ్ ఆఎండ, అతికారం మనివన్ని లెకెండ్నె వాండ్రు బోదిస్తాన్.

8

1 యేసు అయ గొర్రొండిఁగిజి వాతివలె మంద లోకుర్ వన్ని వెనుక వాతార్.

2 కుస్తు రోగం* మనికాన్ ఒరెన్ వాతండ్రె వన్ని ముందాల ముణుకుజ్ ఊర్జి, “ప్రబువా, నాను నెగెణ్ ఆదెజ్ ఇజి నిజీ మన్ను మహిజు, నజీ నెగెణ్ కిదెజ్ అట్టి”, ఇజి వెహ్నాన్.

3 అందెజె వాండ్రు కియు సాప్పి వన్నిజ్ముట్టాండ్రె, “నజీ మన్ను మనాద్, నీను నెగెణ్ ఆఅ”, ఇజి వెహ్నాన్. వెటనె వన్నిజ్మహి పెరి జబు డిఁస్త సొహాద్.

* 8:2 8:2 కుస్తు రోగం ఇహిజు పెరిజబ్బు అయ జబ్బు వాతిజు కిక్కు. కాల్య మన్ని డెస్సిజ్ తెవ్విజు సొనాదెలె జబ్బు మన్నిజాన్ ముట్టిజు నెన్విర్

4 నస్తవలె యేసు వన్నివెట, “యాక ఎయెరిజ్ బా ఇనికబా వెహ్ ము. నీను తీనాజ్ సొన్ని నీ ఒడోల్ పుజేరిజ తోరిన్ అ. నీను నెగెన్ ఆతి దనిజ్ వరిజ్ రుజుప్ లెకెండ్ మోసా ముజలె ఆడ్ర సితి వజ దేవుణుదిజ్ సంత సితి”, ఇజి వెహ్ న్.

ఒరెన్ సదాతిపతి ఆతి వన్ని నమకం

5-6 యేసు కెపెర్నహము ఇని పట్టుమదు వాతివెలె సదాతిపతి† ఒరెన్ వన్ని డగ్రు వాతండ్రి, “ప్రబువా, నా పణిమన్ని ఒరెన్ కికు కాల్కు సాని జబుదాన్ నండ్ బాద ఆజి నా ఇండ్రి గూర్త మనాన్”, ఇజి వెహ్ పి బతిమాలితాన్.

7 “నాను సొన్ని వన్నిజ్ నెగెన్ కిన”, ఇజి యేసు వెహ్ న్.

8 నస్తవలె అయ సయనమది అతికారి ఈహు వెహ్ న్, “ప్రబువా, నీను నా ఇండ్రి వాదెజ్ నాను తగ్గిక ఆవ. గాని నీను ఉండ్రి మాట వెహ్ పిజ ఆనాద్, నా పణిమన్ని నెగెన్ ఆనాన్.

9 నీను అయాలెకెండ్ కిదెజ్ అట్టిఇజి నాను నెసిన. ఎందనిజ్ ఇహిజ నా మున్కు అతికారం మన్నికార్ మనార్. నా అడిగి సయనమదికార్ మనార్. నాను ఒరెన్ వన్నిజ్ ‘సొన్ అ’ ఇహిజ సొనాన్. మరి ఒరెన్ వన్నిజ్ ‘ర అ’ ఇహిజ వానాన్. నాను నా పణి మనిసిదిజ్ ‘అయ పణి కి అ’ ఇహిజ వాండ్రు ఆక కినాన్.”

10 యేసు యా మాట వెంజి బమ్మ ఆతాండ్రి వన్ని వెనుక వానివరిజ్ సుడోజి, “వన్నిజ్ మన్ని లెకెండ్ దేవుణు మున్కు నిసా పెరి నమకం మని ఎయెరిజ్ బా ఇస్రాయేలు లోకుర్ నడిమి, నాను సుడోదెజ్ సిల్లె ఇజి నాను మిజి నిజం వెహ్ పిన్.

11 నాను మిజి వెహ్ పి ఇనిక ఇహిజ, దేవుణు కిని ఏలుబడిః వానివలె, తూర్పుదాన్ పడఃమరదాన్ నండ్ లోకుర్ వాజి అనిగొగొర్ ఆతి అబ్రాహము, ఇస్సాకు, యాకోబు ఇని వరివెట పరలోకామ్దు విందుదు బస్సార్.

12 గాని దేవుణు కిని ఏలుబడిఃదు తప్ ఎండ మంజినాప్ లె ఇజి ఒడోబిజిని వరిజ్ వెల్లి సీకటిదు విసిర్ నాన్. అబె లోకుర్ అడఃబాజి పల్కు కొహ్ క్వి మంజినార్.”

13 యేసు అయా సదాతిపతిజ్, “సొన్ అ, నీను నమ్మితి వజనె జర్గినాద్”, ఇజి వెహ్ న్. అయ గడిఃయాదునె వన్ని పణిమనిసి నెగెండ్ ఆతాన్.

యేసు నండ్రి లోకురిజ్ నెగెండ్ కిజినాన్.

14 వెనుక యేసు పేతురు ఇండ్రి వాతాన్. వన్ని మీమ్ సి నోబుదాన్ గూర్తిమనిక సుడోతాన్.

15 వాండ్రు దని కియుదు ముట్టిజ్ సరి దనిజ్ మహి నోబు డిస్త సొహద్. అది నిజితాదె వన్నిజ్ నెగెండ్ సుడోదెజ్ మొదోల్ స్తాద్.

16 ఖాదు ఆతివలె, దెయమ్ కు అస్తి వరిజ్ నండ్రి డారిజ్, లోకుర్ వన్ని డగ్రు తతార్. వాండ్రు ఉండ్రి మాటదానె దెయమ్ కాజ్ పెర్తాన్, మరి జబుది వరిజ్ విజేరిజ్ నెగెన్ కితాన్.

17 “వాండ్రు మా నీర్ సమ్ కు లాగితాన్, మరి మా జబుజ్ వాండ్రు పిండితాన్”* ఇజి యేసయ ప్రవక్త వెట దేవుణు ముజాల వర్గితి మాటెజ్ పూర్తి ఆదెజ్ యాక జర్గితాద్.

యేసు వెట సొండ్రిజ్ ఇహిజ ఇనిక కిదెజ్

18 యేసు వన్ని డగ్రు మని మంద లోకురిజ్ సుడోజి సమ్ దరం అతాహ పడక సొండ్రిజ్ ఇజి వన్ని సిసూరిజ్ వెహ్ న్.

† 8:5-6 8:5-6 సదాతిపతి ఇహిజ రోమనయ్యుమ్దు మన్ని వందమణిసిర్ సయ్యుమ్ది వరిజ్ అతికారి.

* 8:17 8:17 యేసయ 53:4.

19 నస్తవలె, యూదురి రూలుజ్ నెస్పిస్సికాన్ ఒరెన్ వన్ని డగ్రు వాతండ్రె, “బోద కనికి, నీను ఎంబె సోహోజ్ బా నీ వెట నానుబా వాన్”, ఇజి వన్నిజ్ వెహ్తాన్.

20 నస్తవలె యేసు, “నకెజ బోరోజ్ మనె, ఆగాసమ్దు ఎగ్రిజిని పొటిజ గూడుకు మనె, గాని లోకు మరిసి ఆతి నజీ బుర్త డుట్సి మండ్రెజ్ బా బాడిః సిల్లెద్”, ఇజి వెహ్తాన్.

21 సిసూర్ లోఇ ఒరెన్ వాతండ్రె, “ప్రబువా నాను ముందాల సొన్ని నా బుబ్బ సాతి పిన్ గు పెర్జి పొక్సి వాన్”, ఇజి వెహ్తాన్.

22 నస్తవలె యేసు, “సాతికారోః వరి సాతి వరిజ్ పెర్జి పొక్సిర్, నీను నావెట రఅ”, ఇజి వన్నిజ్ వెహ్తాన్.

యేసు తుపాన్ దిజ్ ఆలెప్పిసినాన్

23 యేసుని వన్ని సిసూర్ డోణి ఎక్కారె అబ్బెణిజ్ సోత సాహార్.

24 వారు సొన్ని మహిజ్ యేసు డోణిదు నిద్ర కిజి మహాన్. వెటనె అయ నమ్దరమ్దు గాలితూపాన్ రేజితాద్. ఉల్కెజ్ వాజి అయ డోణి ముస్కు అర్తె.

25 సిసూరు సొన్ని వన్నిజ్ నిక్కారె, “ప్రబువా, సాన సానాప్లె, మజి రక్సిన్ అ”, ఇజి వన్నిజ్ నిక్కారె.

26 అయావలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?”, ఇజి వెహ్తాండ్రె నిజ్జి గాలిదిజ్ ఉల్కెజి అలెజి మన్ అ ఇహాన్. ఆకెజ్ పూర్తి పలక్ ఆతె.

27 వారు బమ్మ ఆతారె, “వీండ్రు ఎలాగ మర్తికాండ్రో? గాలిని ఉల్కెజ్ బా వన్నిజ్ లోజిజిన”, ఇజి వర్గితార్.

దెయం అస్తి రిఎరిజ్ నెగెండ్ కిజినాన్

28 యేసు నమ్దరం అతహి పడక మని గదరెను ఇని నారు అందితిజ్, దెయం అస్తికార్ రిఎర్, యూదురు వరి సాతివరిజ్ నమాది కిని సాలమ్ కాణిజ్ సోతారె వన్ని ఎద్రు వాతార్. వారు జంతు నని మూర్కతం మనికార్కక ఎయెర్ బా అయ సరి సాన్ ఎర్.

29 “ఓ దేవుణు మరిసి, మా వెట మిజి ఇని పణి? కాలం వాని ముజాల మజి బాద కిదెజ్ ఇబ్బె వాతిదా?”, ఇజి డేడిఃస్తార్.

30 వరి ఎద్రు కండెక్ దూరమ్దు పండ్రీజ్ మంద మెయ్ జు మహె.

31 అయ దెయమ్ కు వన్నిజ్ “నీను మజి ఉల్పిని లెకెండ్ ఇహిజ, అయ పండ్రీజి లోఇ మజి పొక్ అ”, ఇజి బతిమాల్ తె.

32 వాండ్రు వన్కాజ్ “సాండ్రు” ఇజి వెహ్తాజ్ అయ దయమ్ కు వరిజ్ డిఃస్సెనె పండ్రీజి లోఇ సాహె. అయ మంద పండ్రీజ్ విజు గొరోన్ ముస్కుహాన్ ఉహ్ క్సి సాహెనె నమ్దరమ్దు అర్తె సాతె.

33 పండ్రీజ్ మేప్పికార్ ఉహ్ క్సి సొన్ని పట్టుమ్ దివరిజ్ జర్గితికెజ్ విజు వెహ్తార్. దెయం అస్తి మహివరిజ్ జర్గితికబా వెహ్తార్.

34 నస్తవలె అయ పట్టుమ్ దికార్ విజెరె సోసి యేసుజ్ సుడెదెజ్ వన్ని ఎద్రు వాతార్. వన్నిజ్ సుడెఃతిజ్, వరి నారు డిఃసి సాన్ అ ఇజి వన్నిజ్ బతిమాల్ తార్.

‡ 8:22 8:22 అయాలెకెండ్ వెహ్తవలె దేవుణువెట ఇని పొత్తు సిల్లె ఆత్మదిజ్ నెందితి సజతిజి వందిజ్ యేసు వెహ్తానాన్. నిజం సాతివరి వందిజ్ ఆవద్. యా మాటెజ్ దేవుణు ఏలుబడిః అడిగి మన్ ఇ వరి వందిజ్ వెహ్తానాన్.

యా మాటెజ్ యాలెకెండ్ నె లూక 15:24,32, మరి ఎపెసు 2:1 బాన్ బా రాప్త మనాద్. § 8:28 8:28 యేసుప్రబు కాలమ్దు సుట్టు బోరోకిజి సాలమ్ లెకెండ్ తయార్ కిజి సాతి వరిజ్ నమాది కిజి మహార్. పీసుగు సాలమ్ లోఇ ఇడ్డి వణుకుదాన్ సాలమ్ దిజ్ మూసి మహార్.

9

యేసు కిక్కుకాల్కు అర్థి వన్నిజ్ నెగెండ్ కిజినాన్

1 యేసు డోణి ఎక్టాంత్తె సెరు డాట్టి కపెర్నహము ఇని వన్ని సొంత పట్నమ్దు వాతాన్.

2 అయావలె సెగొండార్ కికు కాల్కు అర్థి మంసమ్దు గూరిజిమహి ఒరెన్ వన్నిజ్ యేసు డగ్రు తతార్. దేవుణు ముస్కు వరి నమకం యేసు సుడేతాంత్తె, “మరిన్, దయరమ్దాన్ మన్అ, నీ పాపమ్కు సెమిస్త మన”, ఇజి కికు కాల్కు అర్థి వన్నిజ్ వెహ్హన్.

3 యూదురి రూలుజ్ నెస్పిస్సికార్ సెగొండార్ “పీండ్రు దేవుణుదిజ్ దూసిస్పాన్”, ఇజి వరి లోఇ వారె వర్థితార్.

4 యేసు వరి మన్నుదు మనికెజ్ నెస్తాంత్తె ఈహు వెహ్హన్ “మీరు ఎందనిజ్ మీ మన్నుదు సెఇకెజ్ ఒడేజినిదెర్?”.

5 “నీ పాపమ్కు సెమిస్తమన ఇజి వెహ్హనిక సులునా? నీను నిజ్జి నడిఅ ఇజి వెహ్హనిక సులునా?”.

6 “లోకు మరిసి ఆతి నజి బూమి ముస్కు పాపమ్కు సెమిస్తెజ్ అతికారం మనాద్ ఇజి మీరు నెస్తెజ్ వెలె.” వెనుక కికు కాల్కు అర్థివన్ని వెట, “నిజ్జెఅ నీ మన్సం అసి ఇండ్రో సొన్అ”, ఇజి యేసు వెహ్హన్.

7 వాండ్రు నిజ్జెతంత్తె ఇండ్రో సొహాన్.

8 లోకుర్ విజెరె అక సుడేజి బమ్మ ఆతార్. లోకురిజ్ యా లెకెండ్ అతికారం సీతి దేవుణుదిజ్ పొగిడితార్.

యేసు మత్తాయిజ్ కూక్కినాన్

9 యేసు అబెణిజ్ సొస్సి మహిజ్, పన్ను పెర్నికాన్మత్తయి ఇనికాన్వన్ని బాడిఃదు బస్త మహాన్. యేసు వన్నిజ్ సుడేజి, “నా వెట రఅ”, ఇజి వెహ్హిజ్, వాండ్రు నిజ్జెతాండ్రు యేసు వెట సొహాన్.

10 వెనుక యేసు మత్తాయి ఇండ్రో బోజనం కిదెజ్ బస్సి మహిజ్, నంఠెండార్ పన్ను పెర్నికాన్ని* పాపం కినికార్ ఇజి పరిసయెరు వహ్హికార్ వాతారె వన్ని వెటని వన్ని సిసూర్ వెట బోజనమ్దిజ్ బస్తార్.

11 పరిసయెరు అక సుడేజి, “ఎందనిజ్ మిజి నేర్పిస్సికాన్ పన్ను పెర్నికాన్ వెట, పాపం కినివరి వెట బోజనం కిజినాన్”, ఇజి వన్ని సిసూర్జ వెన్బాతార్.

12 యేసు అయ మాట విహంత్తె, “జబు మనివరిజె డాక్టర్ అవ్సరం, నెగెణ్ మని వరిజె డాక్టర్ అవ్సరం సిల్లెద్”, ఇజి వెహ్హన్.

13 “మీరు మహి వరి ముస్కు కనికారం తోరిస్తెజ్ ఇజినె నాను కోరిజిన గాని కత్తి పూజెజు నాను కోరివి*, ఇజి దేవుణు వెహ్హి మాటది అర్థం ఇనికాదో ఇజి మీరు సొస్సి నెస్తు. పాపం కిని వరిజ్ కూక్క్తెజె నాను వాత మన, నెగెణ్ మనికాప్ ఇజి ఒడేబిని వరిజ్ ఆవెద్”, ఇజి వెహ్హన్.

యేసుజ్ ఉపాస్వందిజ్ వెన్బాజినార్.

* 9:10 9:10 పన్ను పెర్నికాన్ యూదురు ఇస్టం కివితార్. యూదురు పన్ను పెర్నికాన్ తక్కుదికార్ మరి గొప్ప పాపం కినికార్ ఇజి ఒడేబిజి మహాన్. వారు రోమ ప్రబుత్వం వందిజ్ పన్ను పెర్ని మహాన్. అక్క యూదురి రులుదిజ్ పడిఃఎండ మహాద్. వారు కిని పణిదాన్ వారు ఆఇవరివెట కూడేజి మహిజ్ వారు సుబ్బురం సిల్లికార్ ఇజి వరివందిజ్ ఒడేబిజి మహాన్. ✱ 9:13 9:13 హోనయ 6:6.

14 నస్తవలె యోహాను సిసూరు వన్ని డగ్రు వాజి, “మాపుని పరిసయరు డిన్విండ ఉపాస్ మంజినాప్, గాని నీ సిసూర్ ఎందనిజ్ ఉపాస్ మన్వర్?”, ఇజి వెన్బాతార్.

15 దనిజ్ యేసు ఈహు వెప్తాన్, “పెండ్లి దజడాఃయెన్, పెండ్లి కూలెజ వెట మని వెలె వారు దుకమ్దాన్ మంజినారా? పెండ్లి దజడాఃయెన్ వరిబాణిజ్ కూకె ఆతి వెనుక వారు ఉపాస్ మంజినార్.”

16 “ఎయెర్బా పడాయ్పాతదు కొత పాత ముక కుడుఃప్పి గుత్వర్. ఆహె కితిజ కొత పాత ముక కేట ఆజి కిజినిక మరి లావ్ఆనాద్.

17 ఎయెర్బా పడాయ్ తోలు సన్నిదు కొత ద్రాక్కు కల్లు వాక్వర్. ఆహె కితిజ కొత ద్రాక్కు కల్లు పులాజ్ ఆనివెలె తోలు సని పెడెల్నాద్, ద్రాక్కు కల్లు వెల్లి సోనాద్. మరి సని పాడానాద్. కొత ద్రాక్కు కల్లు కొత తోలు సన్నిదునె వాక్తజ్. అయావలె రుండిహా పాడః ఆఉ.”

సాతి అయ్లీని జబు మని బోదిలి

18 యేసు యా మాటెజ్ వరి వెట వెప్పి మహివలె, యూదురి మిటిజ్ కిని ఇండ్రోణి ఒరెన్ అతికారి వాతండ్రె వన్ని ఎద్రు ముణుకుజ్ ఊర్జి, “నా గాలు యెలె సాతాద్. నీను వాజి నీ కియు దని ముస్సు ఇడఃఅ. అది బత్కినాద్”, ఇజి వెప్తాన్.

19 యేసు నిజితండ్రె వన్ని వెట సాహాన్. వన్ని సిసూర్బా సాహార్.

20-21 నస్తవలె పనెండు పంటజాణిజ్ వెల్లి ఆని జబుదాన్ బాద ఆజిమహి ఉండ్రీ బోదిలి, “యేసు తొడిఃగితిమని నీరి సొక్కదు ముట్టిజ సరి నాను నెగెండ్ ఆస”, ఇజి దని మస్సుదు ఒడఃబితాదె వన్ని వెనుక వాతాదె వన్ని పాత సెంగుదు ముట్టాద్.

22 యేసు వెనుక మర్జి దనిజ్ సుడఃజి, “ఓ బయి దయ్ రమ్దాన్ మన్అ. నీను నా ముస్సు ఇట్టి మని నమకమ్నె నిజి నెగెణ్ కిత మనాద్”, ఇజి వెప్తాన్. అయావలెనె అయ బోదిలి నెగెండ్ ఆతాద్.

23-24 నస్తవలె యేసు అతికారి ఇండ్రో వాతిజ్, పిరుడిః ఊక్కివరిజ్ గగోల్ ఆని వరిజ్ సుడఃజి, “ఇబ్బెణిజ్ సొండ్రు, యా ఇజిరి బయి నిద్ర కిజినాద్ గాని సావద్”, ఇజి వెప్తాన్. వారు వన్నిజ్ వెక్కిసి సిక్టార్.

25 అబె నిండ్రీతి మహి లోకురిజ్ విజేరిజ్ వెల్లి పొక్తి వెనుక, యేసు ఇండ్రో డుఃగితాండ్రె అయ్లీ కీదు అస్తిజ్అది నిజితాద్.

26 యా కబ్బురు అయ ప్రాంతం విజు సారితాద్.

యేసు గుడ్డిదివరిజ్ని గుల్లవన్నిజ్ నెగెండ్ కిజినాన్.

27 యేసు అబెణిజ్ సొన్ని మహివలె రివెర్గుడ్డిఃవారు వన్ని వెనుక వాతారె, “ఓ దావీదు మరిసి, మా ముస్సు కనికారం తోరిన్ఆ”, ఇజి డేల్ని వెప్తాన్.

28 యేసు ఇండ్రో డుఃగితి వెనుక వారు వన్ని డగ్రు వాతార్. వాండ్రు వరిజ్ ఈహు వెన్బాతాన్. “ ‘యాక కిదెజ్ నాను అట్టు’, ఇజి మీరు నమిజినిదెరా?”, “ప్రబువా మాప్ నమ్మిజినాప్”, ఇజి వారు వెప్తాన్.

29-30 నస్తవలె యేసు వరి కణకెజ ముట్టి ఈహు వెప్తాన్. “మిరు నమ్మితివజనె యాక మిజి జర్గిపిద్”, ఇజి వెప్తా వెటనె వరి కణకు బేస్తార్. “ఎయెర్బా యాక నెస్తెజ్ఆవెద్”, ఇజి యేసు వరిజ్ గట్టిజ వెప్తాన్.

31 గాని వారు సాహారె అయ ప్రాంతం విజు వన్ని వందిజ్ సాట్టార్.

32 యేసుని వన్ని సిసూర్అబెణిజ్సొన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతార్.

33 యేసు దెయమ్దిజ్ఉల్ఫి వెటనె అయ గుల్ల వాండ్రు వర్గిదెజ్ మొదోల్స్తాన్. అక సుడేజి లోకుర్ విజేరె బమ్మ ఆతారె, “ఎసెజ్బా ఇస్రాయేలు దేసమ్దు యా లెకెండ్ ఇనికబా జర్గివితాద్”, ఇజి వర్గితార్.

34 గాని పరిసయరు ఈహు వెహ్తార్, “దెయమ్కాజ్ నెయ్యి సాయమ్దానె వీండ్రు దెయమ్కాజ్ పేర్జినాన్”.

పణిమన్సిర్ తక్కు

35 యేసు విజు పట్టుమ్కాజ్, విజు నాహ్కాజ్ బూలాజి యూదురు మీటిజ్ కిని ఇల్కాజ్ వరిజ్ నేర్పిసి, దేవుణు ఏలుబడిః కిని వందిజ్ సువార్త వెప్పి విజు రకమ్ది జబుది వరిజ్, బాదదాన్ మని వరిజ్ నెగెండ్ కితాన్.

36 యేసు మంద లోకాజ్ సుడేజి, వన్ని పాణం నొతాద్. ఎందనిజ్ ఇహిజ వారు గవుడుఎన్ సిల్లెండ సద్రితి గొరెజ్ లెకెండ్, ఇనిక కిదెజ్ ఇజి నెన్ఇ వరి లెకెండ్ మహార్.

37-38 నస్తివలె యేసు వన్నిసిసురిజ్, “కొయ్దెజ్ మన్ని పంటలెకెండ్ లోకుర్ నండొండార్ మన్నె. గాని కొయ్నికార్ తకునె. అందెజె వన్ని పంట కొయ్ని వందిజ్ పణికిని వరిజ్ పోక్ అ ఇజి కోత యజుమానిజ్ బతిమాలద్”, ఇజి వెహ్తాన్.

10

యేసు పన్నెండు మణిసి సిసురిజ్ కూక్కినాన్

1 యేసు వన్ని పనెండు మన్ని సిసుర్జు డగ్రు కూక్కాండ్రె దెయమ్కాజ్ పేర్దెజ్, మరి విజు రకమ్ది జబుది వరిజ్ని బాదదాన్ మని వరిజ్ నెగెండ్ కిదెజ్ వరిజ్ అతికారం సితాన్.

2 అయ పనెండు మన్ని అపొస్తుడురి పేరుకు ఇకెజ్. మొదోహికాన్సీమోను, (వేతురు ఇజి వాండ్రు కూకె ఆతాన్) వన్ని తంబెర్సి ఆతి అంద్రెయ, జెబదయ పొటాదికార్యాకోబుని యోహాను,

3 పిలిపుని బర్థొలోమాయి, తోమని పన్ను పెర్జి మహికాన్ మతాయి, అలపయ పొటాదికాన్ యాకోబు, తదాయి

4 యూదయ దేసం వందిజ్ ఉసారాజిని సీమోను*, యెసుజ్ మోసిం కిజి ఒపజెప్పికాన్ ఆతి ఇస్కరియోతు యూద.

5 యేసు అయ పనెండు మన్ని సిసురిజ్పోక్కివలె ఈహు వెహ్తాన్. “యూదురు ఆఇవరి నడిఃమి మీరు సొన్యాట్. సమరియదివరి పట్టుమ్కాజ్బా సొన్యాట్.

6 గాని మీరు ఇస్రాయేలుది మురుతి గొరెజ్లెకెండ్ మనివరి నడిఃమి సొండ్రు.

7 మీరు సొన్ని, ‘దేవుణు ఏలుబడిః కినిక డగ్రు ఆత మనాద్’ ఇజి సొట్టు.

8 జబుదివరిజ్ నెగెండ్కిదు, సాతి వరిజ్ నిక్తు, పెరి కన్ఠమ్ది వరిజ్ నెగెణ్కిదు, దెయమ్కాజ్ పేర్దు. యా పణిజ్ కిదెజ్ అతికారం సెడ్డిఃనె మిజి దోహ్కాక్ మనాద్. అందెజె మీరు ఎయెర్బాణిజ్బా ఇనికబా లొస్ఎండ ఇకెజ్నడిఃనె కిదు.

9 మీరు సొనివెలె బజారం, రుపాయ్ గాని వెండి, రుపాయ్ గాని రాగి రుపాయ్ గాని మీ సన్నిదు ఒమాట్.

10 పయ్నం కినివెలె సన్ని ఒమాట్. రుండి సొక్కెజ్, జోడ్కు, డుడు ఇనికబా ఒమాట్. ఎందనిజ్ ఇహిజ పణికినికాన్ వన్నిజ్ కావాస్తికెజ్ దోహ్కాక్ తగ్గికాన్.

* 10:4 10:4 కనానియదికాన్ సీమోను - తెలుగు రోముది ఏలుబడిఃదాన్ యూదురు దేసమ్దిజ్ విడుదల కిదెజ్ ఉసారాదాన్ సుడేజిని యూదురు సజం మనాద్ అయా సజమ్దికాన్ ఒరెన్ సీమోను.

11 మీరు ఎమేణీ పట్టణముదు సోహిజ్ బా అబె ఒరెన్ నెగ్గివన్నిజ్ రెబాజి వన్ని ఇండ్రోనె అబెణీజ్ సోని దాక మండ్రు.

12 మీరు అయ ఇండ్రో డుఃగితిజ సరి, 'మిజీ సమాదనం మనిద్' ఇజి వెహ్టూ.

13 అయ ఇండ్రోణికార్ మిజీ డగ్రు కిఇతిజ, నస్తవెలె మీరు వెహ్పిలెకెండ్ వరిజ్ దీవనమ్కు మంజినె. వారు తగిఇకార్ ఇహిజ అయాలెకెండ్ వరిజ్ జర్గివద్.

14 మీరు ఉండ్రీ పట్టణముదు గాని, ఉండ్రీ ఇండ్రో గాని అందితిజ, వారు మిజీ డగ్రు కివీండ మరి మీ మాటెజ్ డగ్రు కివీండ మహిజ, వరి ముస్కు వారె దేవుణు బాణిజ్ సిక్కు అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టణమునో ఇల్లునో డిఃసి సోనివెలె మీ పాదమ్కాణి దుల్లి దూల్ప్పి సొండ్రు.

15 దేవుణు తీర్పు తీరిన్ని రోజుదు అయ పట్టణముదు మని వరిజ్ ఒద్దె లావ్ సిక్కు సీనానై ఇజి నాను మిజీ నిజం వెహ్పిన. సోదోమ గొమోర పట్టణముకాజ్ మహివరిజ్ సోన్ని సిక్కు మన్వద్.

16 కార్నుకుడిఃజ నడిఃమి గొరెజ్లెకెండ్ నాను మిజీ లోకుర్ నడిఃమి పోక్కిన. అందెజె మీరు సరాస్కు లెకెండ్బుది మనికిదెర్, పావుర పొటిజ లెకెండ్ సెఇకెజ్ ఇనికెజ్ సీలికిదెర్ ఆజి మండ్రు.

17 లోకుర్ వందిజ్ జాగర్త మండ్రు. వారు మిజీ కోర్టుదు ఒపజెప్పి, మరి యూదురు మీటిజ్ కిని ఇల్కాజ్ మిజీ కొర్డెజణిజ్ డెయ్యినార్లె.

18 రాజురిజ ముందాల, అదికారిజ ముందాల నా ముస్కు నమకం ఇట్టి వందిజ్ మజీ అసి తోహ్పి ఒనార్లె. వరి ముందాలని యూదురు ఆఇ వరి ముందాల నా వందిజ్ మీరు వరిజ్ సువార్త వెహ్పిదెర్లె.

19 గాని వారు మిజీ తోహ్పి ఒనివెలె ఇనిక వెహ్పాజ్, అక ఎలాగ వెహ్పాజ్ ఇజి మీరు బెజి ఆమాట్. అయావలెనె వర్గిదెజ్ సరి ఆతి మాటెజ్ మిజీ దోహ్కెల్.

20 ఎందనిజ్ ఇహిజ అయావలె వర్గినిక మీరు ఆఇదెర్. మీ బుబ్బు ఆతి దేవుణు ఆత్మ మీ లోఇహాన్ వర్గినాన్లె.

21 దాద్ది తంబేరిజ్, తంబెరి దాద్దిజ్, అపోసి మరిసిజ్ సపైజ్ ఒపజెప్పార్లె. కొడోర్ అయ్సి అప్పొసిర్ ముస్కు గొడబ ఆజి వరిజ్ సపిస్సార్లె.

22 నా ముస్కు నమకం ఇట్టి వందిజ్ విజేరె మీ ముస్కు పగదాన్ మంజినార్లె. గాని ఆకార్ దాక ఓరిన్ని వన్నిజ్ దేవుణు రక్కిస్సాన్లె.

23 ఉండ్రీ నాటో మిజీ హిమ్స కితిజ, మరి ఉండ్రీ పట్టణముదు ఉహ్కెన్ సొండ్రు. లోకు మరిసి వాని ముందాల సువార్త సాటసిని పణి పూర్తి వీజ్ఎండ ఆనాద్, ఇజి నాను మిజీ నిజం వెహ్పిన.

24 సద్వినికాన్ నెస్పిస్పివన్ని ముస్కు పెరికాన్ ఆవన్. పణిమన్ని యెజుమాని ముస్కు పెరికాన్ అవన్.

25 సద్వినికాన్ నెస్పిస్పివన్ని లెకెండ్ ఆతిజ ఆనాద్. పణిమన్ని యెజుమాని లెకెండ్ ఆతిజ ఆనాద్. ఇండ్రోణి యెజుమానిజ్ వారు బయిల్జెబులు† ఇజి కూక్కి మోసం వెహ్టో ఇహిజ ఇండ్రోణికార్ ఆతి మీ వందిజ్ మరి ఎసోనో సెఇ మాటెజ్ వెహ్టోలె.

† 10:25 10:25 దేవుణుదిజ్ పొగడిఃజి మాడిఃసెఇ యూదురు ఆఇకార్ మాడిఃసి మహి, ఉండ్రీ బొమ్మనె బెయల్జెబులు. యూదురు అయ బొమ్మదిజ్ "పొర్లిజ్ మాడిఃసి బొమ్మ", ఇజి వెక్కి వహ్పి మహో. అందెజె వారు యేసుప్రబుజ్ బెయల్జెబులు ఇజి కూక్కివెలె వన్నిజ్ నండో మోసం వెహ్టో మహో.

26 అందెజె వరిజ్ మీరు తియెల్ ఆమాట్. డాప్తి మనికెజ్ విజు తోరె ఆనెలె. నెన్వెండ మూస్తి మనికెజ్ విజు నెనె ఆనెలె.

27 మీ వెట నాను సీకటిదు వెప్తా మాటెజ్, మీరు జాయ్దు వెప్తు. మీ గిబిజ వెప్తా మాటెజ్ విజెరె వినిలెకెండ మిద్దెజు మున్సుహన్ మీరు డటం వెప్తు.

28 ఆత్మదిజ్ సప్తెజ్ అట్వెండ ఒడోల్దిజ్ నె సప్తెజ్ అట్టి వరిజ్ మీరు తియెల్ ఆమాట్. గాని ఆత్మని ఒడోల్దిజ్ సిసు మంజిని బాడిెదు పోక్కి నాననం కిదెజ్ అతికారం మని దేవుణుదిజ్ నె తియెల్ ఆజి మండ్రు.

29 ఉండ్రీ కాసుదిజ్ రుండి ఇజ్రి పంట పొటిజ్ పారె ఆజినెగదె. అహిజ్ బా నీ బుబ్బాతి దేవుణు నెన్వెండ దన్ని లోఇ ఉండ్రీబా అడ్డి బూమిదు సాదెజ్ ఇజి డిసి సీవన్.

30 నీ బుర్రది కొప్పు విజుబా లెక కిబె ఆత మనాన్.

31 అందెజె మీరు తియెల్ ఆమాట్. మీరు యా ఇజిరి పంట పొటిజు మిస్తి విలువ మనికిదెర్.

32 లోకుర్ ముందాల నజీ ఒప్పుకొణి, విజెరిజ్ నానుబా వరివందిజ్ పరలోకామ్దు మని నా బుబ్బాతి దేవుణు ఎద్దు ఒప్పు కొణా.

33 గాని ఎయెన్బా లోకుర్ ముందాల నజీ నెన్వె ఇజి వెప్తాజ, పరలోకామ్దు మని నా బుబ్బాతి దేవుణు ముందాల నానుబా వన్నిజ్ నెన్వె ఇజి వెప్తాలె.

34 బూమి మున్సు సమాదనం తప్పిసైజ్ నాను వాత మన ఇజి మీరు ఒడోబిమాట్. పగ తప్పిసైజ్ నె వాత, సమాదనం ఆఎద్.

35 ఎండనిజ్ ఇపాజ, మరిసిజ్ వన్ని అప్పొసి మున్సు, గాడ్నిజ్ దని అయ్సి మున్సు, కొడియెసిజ్ దని మీమ్సి మున్సు పగ కిబిసైజ్ నె నాను వాత మన.

36 నా మున్సు నమకం ఇట్టి వందిజ్ ఒరెన్ వన్ని మున్సు వన్ని సొంత ఇండ్రొణికారె పగాతికార్ ఆనార్.*

37 బుబెజ్ బా యాయెజ్ బా నజీ మిస్తి ప్రేమిస్సికాన్ నజీ తగ్గికాన్ ఆవన్. మరిసిజ్ బా గాల్నిజ్ బా నజీ మిస్తి ప్రేమిస్సికాన్ నజీ తగ్గికాన్ ఆవన్.

38 కన్జమ్కు ఒరిసైజ్ మన్సు సిల్లికాన్, మరి నా వెట సాదెజ్ ఇజిబా మన్సు సిల్లికాన్, ఎయెన్బా నజీ తగ్గికాన్ ఆవన్.

39 వన్ని పాణమ్దిజ్ కాపాడోదెజ్ ఇజి సుడితిజు వాండ్రు దన్నిజ్ సాన్పిస్సాన్. నా వందిజ్ వన్ని పాణం సొన్నిస్సికాన్ దనిజ్ కాపాడ్సాన్.

40 నిజీ డగ్రు కినికాన్ నజీనె డగ్రు కిజినాన్. నజీ డగ్రు కినికాన్ నజీ పోక్తివన్నిజ్ బా డగ్రు కిజినాన్.

41 ఒరెన్ దేవుణు ప్రవక్తెజ్, వాండ్రు దేవుణు ప్రవక్త ఇజి నెనె ఎయెన్బా వన్నిజ్ డగ్రు కితిజ, దేవుణు ప్రవక్తెజ్ దోహ్ క్కి లెకెండ వన్నిజ్ బా పలం దోహ్ క్కాద్లె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెనె ఎయెన్బా వన్నిజ్ డగ్రు కితిజ, నీతి నిజాయితిమని వన్నిజ్ దోహ్ క్కి లెకెండ వన్నిజ్ బా పలం దోహ్ క్కాద్లె.

42 యా నా సిసూర్ లోఇ ఇజిరి ఒరెన్ వన్నిజ్ వాండ్రు నా సిసూర్ ఇజి నెనె ఎయెర్ బా ఉండ్రీ గలన్ ఏరు సితిజ, దనిజ్ తగితి పలం తవ్వెండ వన్నిజ్ దోహ్ క్కాద్ ఇజి నాను మిజీ నిజం వెప్పాన్.”

11

యేసుని బాప్తిసం నీని యోహాను

1 యేసు వన్ని వనెండు మన్ని సిసూరజ బోదిసి వీజితి వెనుక, అబెణిజ్ సోసి గలిలయ దేసమ్దు మని పట్టమ్కాజ్, నాహ్కాజ్ సువార్త సాట్టెజ్, బోదిస్తెజ్ సోహాన్.

2-3 జెలిదు మని యోహాను క్రీస్తు కిని పణిజ వందిజ్ వెంజి, “వానికి నీనెనా? సిలిజ మరి ఒరెన్ వన్నిజ్ మాపు ఎద్దు సుడఃజి మండ్రెజ్నా?”, ఇజి వెన్బాదెజ్ వన్ని సిసూరజ యేసు డగ్గు పోక్తాన్.

4-5 యేసు వరిజ్ ఈహు వెప్తాన్, “గుడ్డిదికార్ సుడఃజినార్, సోటాదికార్ నడిఃజినార్, పెరి జబు మనికార్ నెగెణ్ అజినార్, బోయ్ రాదికార్ వెంజినార్, సాతికర్ నిజె అజినార్, బీదాతి వరిజ్ సువార్త వెహె అజినాద్, ఇజి యా లెకెండ్, మీరు సుడఃజినికెజ్, వెంజినికెజ్ మర్జి సొన్ని, యోహానుజ్ వెప్తా.

6 గాని నా ముస్కు మన్ని నమకం డిసి సెఇకాన్ దేవుణు సీని దీవెనమ్కు మంజినికాన్ ఆనాన్లె.”

7 యోహాను సిసూర మర్జి సొన్నిమహిజ్ యేసు యోహాను వందిజ్ ఈహు వర్గిదెజ్ మొదోల్స్తాన్. “ఇనిక సుడఃదెజ్ మీరు బిడిఃమ్ బూమి ప్రాతమ్దు సొహిమహిదెర్? గాలిదిజ్ దూజ్జిని గడిదిజ్ పోలితి ఒరెన్ వన్నిజ్ సుడఃదెజ్నా?”

8 సిల్లిజ మరి ఇనిక సుడఃదెజ్ మీరు సొహి మహిదెర్? నెగ్గి సొక్కెజ్ తోడఃగితి మని ఒరెన్ వన్నిజ్ సుడఃదెజ్నా? నూనాజ్ మని నెగ్గి సొక్కెజ్ తోడఃగితి మంజినికార్ రాజురి ఇల్కాజ్ మంజినార్ గదె?

9 సిల్లిజ మరి ఇనిక సుడఃదెజ్ మీరు సొహిమహిదెర్? ఒరెన్ దేవుణు ప్రవక్తెజ్ సుడఃదెజ్నా? నిజమె, దేవుణు ప్రవక్తెజ్ ఇంక పెరివన్నిజెన్ ఇజి నాను మిజి వెప్పిన.

10 ‘నాను నా కాబ్బు తనివన్నిజ్ నిజి ఇంక ముజాల పోక్కు. వాండ్రు నీ ముజాల నీ సరి నెగెండ్ కినాన్’* ఇజి వన్ని వందిజె దేవుణు మాటదు రాస్త మనాద్.

11 బోదెక పోటాదు పుట్టివరి లోఇ యోహాను ఇంక మిస్తికాన్ ఎయెన్బా సిలెన్. గాని దేవుణు ఏలుబడిః కినిదని లోఇ ఇజిరికాన్ ఆతికాన్, యోహానుజ్ ఇంక పెరికాన్ ఇజి నాను మిజి నిజం వెప్పిన.

12 బాప్టినం సీని యోహాను కాలమ్దాన్ ఏలుదాక దేవుణు ఏలుబడిః కినిక బలవందమ్దాన్ ముజాల వాజినాద్. మరి గొప్ప సత్తు మనికార్ దనిజ్ అడ్డు కిదెజ్ సుడఃజినార్.

13 మోసె సీతి రూలుజ్ని దేవుణు ప్రవక్తరు విజెరిబా దేవుణు ఏలుబడిః కినివందిజె యోహాను కాలమ్దాక వర్గిజి మహార్.

14 నమిదెజ్ మిజి ఇస్తం మహిజ, ఏలియ వానాన్లె ఇజి ముజాల వెప్తాజి విని వందిజెనె.

15 మీ గిబ్బిజ్జాణిజ్ నెగెండ్ వెంజి అయా వజ నడిఃజి మండ్రు.

16-17 ‘యా తరమ్ది వరిజ్ ఇనిదనిజ్ సమానం వెప్తాజ్? వారు సతారు బసి, మహివరిజ్ డేల్నిని కొడోర్ లెకెండ్ మనార్.’ ‘మాపు మీ వందిజ్ పిరుడిః ఉహ్కమ్ గాని డాట్ఇతిదెర్, సాతి ఇండ్రో పాటెజ్ పార్తాప్ గాని మీరు గుండె కొతె అజి మీరు అడఃబ ఇతిదెర్’.

18 యోహాను వాతివెలె వాండ్రు తిండి వందిజ్ లావ్ ఒడఃబివిండ రోజు ఉపాన్ కిజి మహాన్. వాండ్రు అయాలెకెండ్ తిన్ఎండ, ఉణెఎండ మన్నిజ్ వన్నిజ్ దెయం అస్తాద్ ఇజి వారు వెప్పినార్.

19 లోకు మరిసి ఆతి నాను తింజి, ఉణిజి వాతాన్కాక 'వీండ్రు తిండి కకూర్తికాన్' మరి ఉణిజి సోస్సికాన్, పన్ను పెర్నివరిజ్ని పాపం కిజిని వరిజ్ కూలాయెన్ ఇజి వారు వెస్సికాన్. గాని దేవుణు బాణిజ్ వాని గెణం మన్నికార్ వారు కిజిని నెగ్గి పణిజాణిజ్ అయ గెణం సరియాతిక ఇజి రుజుప్ కిజినాద్."

నమకం సిల్లికార్ మన్ని పట్టుమ్కు

20 మరి యేసు ఎమేణి పట్టుమ్కాజ్ నండో బమ్మ ఆతి పణిజ్ కితిజ్బా వారు వరి మన్ను మారిన్ఎతారొ, అయ పట్టుమ్కాజ్ మున్ను కోపం అజి వర్గితాన్.

21 అబయా! కోరజిని పట్టుమ్దు మనికిదెరా మిజి అస్సా గొప్ప కర్ణమ్కు, వానెనొ, అబయా! బెత్సెయ్దుపట్టుమ్దు మన్నికిదెరా మిజిబా ఎస్సా గొప్ప కర్ణమ్కు వానెనొ. ఎందనిజ్ ఇహిజ నాను మీ నడిమి కితి మహి బమ్మాతి పణిజ్ తూరుని సీదోసు పట్టుమ్కాజ్ కిని మంజినిక ఇహిజ వారు ఎస్సా ముజాలె బస్త సొక్కెజ్ తోడిగిజి ఒడోదు నీరు రాసె ఆజి ఉపాస్ కిజి వరి పాపమ్కు ఒప్పకొడోజి డిసి సీజి మన్ను మారిసి అయాలెకెండ్ మినికార్ ఇజి తొరొస్తార్ మరి.

22 అందెజె నాను నిజి వెస్సిక ఇనిక ఇహిజ తీర్పు తీరిన్ని రోజుదు తూరుని సీదోసు పట్టుమ్దివరిజ్ మిస్తి సిక్స మిజి వానాద్లె.

23 ఒకపెర్నహమా, "ఆగాసమ్దు మనికిదెరా, మీరు ఆగాసమ్దాక అందిజిని గొప్ప వారు ఇజి మీరు ఒడోబిజినిదెరా? గాని దేవుణు అయా లోకమ్దు విసిర్నె. మీ నడిమి కితి మహి బమ్మాతి పణిజ్ నాణు సోదోము పట్టుమ్దు కిని మంజినిక ఇహిజ అయ సోదోము పట్టుమ్దికార్ వరి అలవాటుజ్ డిసి సీజి అయ పట్టుమ్దిజ్ దేవుణు సిక్స సివీండ ఏలుదాక మహాద్ మరి.

24 అందెజె నాను నిజి వెస్సిక తీర్పు తీరిన్ని రోజుదు సోదోము పట్టుమ్దు మహివరిజ్ వాని దన్నిజ్ మిస్తి సిక్స మీ లోకురి మున్ను వానాద్లె."

వందితివరిజ్ కూక్కినిక.

25 వెనుక యేసు ఈహు వెప్తాన్, "పరలోకామ్దిజ్ని బూమిదిజ్ ప్రబువాతి నా బుబ్బా, నాను నిజి పొగ్డిజి. ఎందనిజ్ ఇహిజ గెణం మన్ని వరిజ్ని సదువు మన్ని వరిజ్ యా సజతిజ్ తెలియ కివీండ యా సదువు సిల్లి వరిజ్ తెలియ కిత్తి.

26 నిజమె బుబ్బా, ఈహు కినికాదె నిజి ఇస్టం ఆతాద్.

27 బుబ్బా విజు సజతిజ్ నా కిదు ఒపజెప్త మనాన్. బుబ్బా ఆవీండ మరి ఎయెర్బా మరిసిజ్ నెన్వీర్. మరిసిని, మరిసి వన్నిజ్ తెలివి కిదెజ్ ఎర్లితికారి బుబ్బెజ్ నెన్నార్. మరి ఎయెర్బా నెన్వీర్.

28 కర్ణబాడోజి బరు పిండోజి వందితి విజిదెరె, మీరు నా డగ్గు రదు. నాను మిజి రొబిన్ను.

29 నాను సార్లిదికాన్. నాను మెతని మన్ను మనికాన్. నా వెట కూడోజి ఉండ్రె పూండు మీ మెడః మున్ను పొకె అజి మాటు కూడోజి పణికినాట్, మీరు నా అడ్రెజ్ లోజిజి నా బాణిజ్ నెస్తు. నస్తవలె మీ పాణమ్కాజ్ నిమాలం కలగినాద్.

30 ఎందనిజ్ ఇహిజ నా కూడోజి నా పూండు అడిగి పణి కిత్తిజ పణి సూలు మంజినాద్, బరుబా సుల్కానిక మంజినాద్."

12

యేసు విస్త్రాంతిదినమ్మదు ప్రబు.

1 అయావలె యూదురి విస్త్రాంతిదినమ్మదు యేసు పంట గుడ్డెదాన్ సొన్ని మహివలె, వన్ని సినూరిజ్ బజ కట్టిజ్, వారు సెరెక్ తెప్పి నూల్ని తింజి మహార్.

2 అయాక పరిసయరు సుడఃతారె, “ఇదిలో, మోసె సిత్తి రులువజ విస్త్రాంతిదినమ్మదు కిదెజ్ ఆఇ పణి, నీ సినూర్ కిజినార్”, ఇజి యేసుజ్ వెహ్సార్.

3 వాండ్రు వరివెటె ఈహు వెహ్సాన్, “దావీదు రాజుని వన్నివెటె మహివరిజ్ బజ కట్టిజ్, వాండ్రు ఇనిక కిత్తాండ్రొ ఇజి మీరు దేవుణు మాటదు ఎసెజ్బా నద్విఇతిదెరా?”*

4 వాండ్రు ఇనిక కిత్తాన్ ఇహిజ, గుడారమ్దు† సొన్ని, దేవుణు ముజాల ఇడ్డిమహి రొట్టెజ్ లాగితాన్. వాండ్రుని వన్నివెటె మహికార్ విజెరి తిహార్. అయాక పుజెరిబునె తప్ప మరి ఎయెరిబా తిండ్రెజ్ ఆవద్ ఇజి మోసె సిత్తి రూలుదు వెహ్సా మనాద్.

5 దేవుణు గుడిఃదు మన్ని పుజెరిబు విస్త్రాంతిదినమ్మదు పణి కిజినార్ గాని అక తప్ప ఆవద్ ఇజి దేవుణు మాటదు రాస్తి మన్నిక మీరు ఎసెజ్బా నద్విఇతిదెరా?

6 దేవుణు గుడిఃదిజ్ ఇంక మిన్సికాన్ ఇబ్బె మనాన్ ఇజి నాను మిజి వెహ్సాన్.

7 “మీరు మహివరి ముస్సు కనికారం తొరిస్టెజ్ ఇజినె నాను కోరిజిన గాని కత్తిసిజిని పూజెజ నాను కోరివి”† ఇని మాటదిజ్ అర్దం మీరు నెసిమంజినిక ఇహిజ, ఇని తప్పబా కిఇవరి ముస్సు తప్పు మాటెజ్ వెహ్సావితార్ మరి.

8 ఎందానిజ్ నాను యాలెకెండ్ వెహ్సానిక ఇహిజ, లోకుమరిసి ఆతి నజి విజి దన్నిజ్ అతికారం మనాద్. విస్త్రాంతి దినమ్మదు లోకుర్ ఇనిక కిదెజ్వలె ఇజి వెహ్సాజ్బా నజి మనాద్.

9 అబ్బెణిజ్ సొన్ని మహివలె, వాండ్రు యూదురు మీటిజ్ కిని ఉండ్రొ ఇండ్రొ సొహాన్.”

10 వహ్తి అర్తి ఉండ్రొ కియు మన్నికాన్ ఒరెన్ అబ్బె మహాన్. యేసు ముస్సు తప్ప మొప్పెజ్ ఇనికాదొ ఉండ్రొ సజతివందిజ్ సుడిఃజి వారు వన్నిజ్ ఈహు వెన్బాతార్, “విస్త్రాంతిదినమ్మదు ఎయెరిజ్బా నెగెండ్ కినిక దేవుణు రూలుదిజ్ తగ్నాదా?”.

11 యేసు వరిజ్ ఈహు వెహ్సాన్, “మీ లోఇ ఎయెరిజ్బా ఉండ్రొ గొరె మహిజ, విస్త్రాంతిదినమ్మదు అక్క ఉండ్రొ గాందదు అర్తిజ, మీరు దనిజ్వెల్లి లాగ్ఇదెరా?

12 మెండగొరెదిజ్ ముస్సు లోకు ఎస్సానొ విలువ మన్నికాన్. అందెజె విస్త్రాంతిదినమ్మదు మేలు కినిక దేవుణు మోసెజ్ సిత్తి రూలుదిజ్ తగ్నాద్.”

13 అయావలె వాండ్రు వహ్తి కియు అర్తి వన్నిజ్ “నీ కియు సవఅ”, ఇజి వెహ్సాన్. వాండ్రు కియు సాహ్సాన్. అయావలె అక నెగెండ్ మన్ని మరి ఉండ్రొ కియు లెకెండ్ ఆతాద్.

14 గాని పరిసయరు వెల్లి సొహారె యేసుజ్ ఎలాగ సప్పెజ్ ఇజి వన్నిజ్ పడిఃఎండ ఆలోసనం కిత్తార్.

దేవుణు ఏర్పాటు కితికాన్

* **12:3 12:3** దావీదు రాజు కిత్తిక సముయేలు ప్రవక్త పుస్తకమ్మదు రాస్తి మనాద్. 21:1-6. † **12:4 12:4** గుడారమ్మదు విజి విస్త్రాంతి దినమ్మదు దేవుణుదిజ్ పూజి సిత్తిలెకెండ్ 12 కొత్త రొట్టెజ్, సమాజ గుడారమ్మదు మన్ని బల్దాదు ఇడ్డి మంజిని కొత్త రొట్టెజ్ ఇడ్డి బాణిజ్ లాగితి పడాయ రొట్టెజ్ పుజెరిబు తినార్. లేవి 24:5-9 అయకాలమ్మదు యెరుసల్లేమ్మదు మన్ని దేవుణు గుడిః సిల్లెతాద్. దావీదు రాజు మరియాతి సొలోమొను కాలమ్మదునె యెరుసల్లేమ్మదు మన్ని దేవుణు గుడిః వాండ్రు తొహ్సాన్. ✪ **12:7 12:7** హోసెయ 6:6.

15 యేసు అయా సజతి నెస్తాండ్రె అబెణిజ్ సాహాన్. నండొండార్ వన్ని వెనుక సాహార్. వాండ్రు వరి జబ్బుది వరిజ్ విజేరిజ్ నెగెండ కిత్తాన్.

16 నా వందిజ్ ఎయెరిజ్బా వెహ్యట్ ఇజి వరిజ్ వెహ్తాన్.

17 యెసయ ప్రవక్త వెట దేవుణు ముజాల వర్గితి యా మాటెజ్ పూర్తి ఆదెజ్ ఇజి యా లెకెండ జర్గితాద్.

18 “ఇదిలో, నాను ఏర్పాటు కితి నా పణి మన్ని వీండ్రె, నాను వన్నిజ్ ప్రేమిసిన, వన్ని ముస్కు సర్ల ఆజిన. నాను వన్ని ముస్కు నా ఆత్మదిజ్ పోక్కు. వీండ్రు విజు జాతిది వరిజ్ నాయం తీరిస్సాన్లె.

19 వీండ్రు జటిజ్ అవీన్, డేల్స్ ఏవీన్, విన్ని కంటం వీదిజు ఎయెరిజ్ వీన్ పీవీఎన్.

20 నలిగితి గడిడిజ్ వాండ్రు తెప్పి విసిర్ ఏవీన్, నమ్ని దీవదిజ్ వాండ్రు నప్ ఏవీన్. వాండ్రు నాయమ్దిజ్ గెల్పిసినాన్.

21 లోకుర్ విజేరె వన్నిజ్ ఆసదాన్ ఎద్రు సుడిజి మంజినార్. వాండ్రు విజు జాతిజు వరిజ్ నాయం తీరిస్సాన్.”*

యేసుని బయిల్ జెబ్బులు

22 అయావలె నెగొండార్, దెయం అస్తిమహిజ్ వర్గిదెజ్ అబిఇ గుల్ల ఆతి ఒరెన్ వన్నిజ్ యేసు డగ్రు తతార్. యేసు వన్నిజ్ నెగెండ కిత్తాన్. వాండ్రు సుడిడిజ్, వర్గిదెజ్ అట్టాన్.

23 లోకుర్ విజేరె బమ్మ ఆజి, “మాప్ ఎద్రు సుడిజి కాప్ కిజి మంజిని దావీదు రాజు తెగ్గదికాన్ వీండ్రు ఆవిండ్రా?” ఇజి వర్గిజి మహార్.

24 పరిసయరు అయ మాట విహరె, “విజు దెయమ్ కాజ్ నెయ్యి ఆతి బయిల్ జెబ్బులు సాయమ్దాన్ వీండ్రు దెయమ్ కాజ్ పెర్ జినాన్”, ఇజి వెహ్తార్.

25 యేసు వరి ఆలోసనమ్కు నెసి వరిజ్ ఈహు వెహ్తాన్. “ఎమేణి దేసెమ్ దికార్ బ వ రిజ్ వారె పగ ఆజి ఎర్లిజి మహిజు అయ దేసెం పాడానాద్. అయాలెకెండ ఎమేణి పట్టుమ్ దికార్ గాని ఇండ్రొణి కార్ గాని, వరిజ్ వారె, పగ ఆజి ఎర్లిజి మహిజు నీ ఎమేణి పట్టుం గాని ఇల్లు గాని ఏలుబా లావ్ రొస్కు నిల్పి మన్ ఏవీద్.

26 సయ్తాను అడిగి మన్నికార్ ఉండ్రీ జటుదికార్, మరి ఉండ్రీ జటుదివరివెట పగ ఆజి ఎర్లె ఆజి విదెం కిజి మహిజు, వన్ని ఏలుబడిః ఎలాగ లావ్ రొస్కు నిల్పి మంజినాద్.”

27 బయిల్ జెబ్బులు సాయమ్దాన్ నాను దెయమ్ కాజ్ పేర్లిజు, మీ లోకుర్ ఎలాగ దెయమ్ కాజ్ పేర్లినార్? అందెజె నా వందిజ్ మీరు వెహ్తాకెజ్ తపు ఇజి వారె రుజుప్ కిజినార్.

28 గాని దేవుణు ఆత్మ సత్తుదాన్ నాను దెయమ్ కాజ్ పేర్లిస ఇహిజు, నిజమె దేవుణు ఏలుబడిః కినిక మీ నడిమి వాత మనాద్.

29 సుడిఃదు, ఒరెన్ సత్తుమని వన్నిజ్ ముజాల తోహా ఏండ, వన్ని ఇండ్రొ డుగ్ జి ఇండ్రొణి సామనమ్కు ఎయెరిజ్బా ఒతెజ్ అట్పార్? ముజాల వన్నిజ్ అసి తోహిజు నె డొజు కిదెజ్ అట్పార్.

‡ 12:20 12:20 అయ మాటదిజ్ అర్థం ఇనిక ఇహిజు, లోకుర్ దేవుణు ముస్కు మన్ని నమకమ్దిజ్ కండెక్ వెనుక ఆతిజ్ నొ దయరం సిల్లెండ ఆతజ్ నొ యేసు వన్నిజ్ డిఃసి సివీన్ మొకొ మహావీన్. * 12:21 12:21 యెసయ 42:1-4.

30 నా వెట కూడ్డి మన్ ఇకాన్ ఎయెన్ బా నజి పగాతికాన్ ఆనాన్. లోకురిజ్ దేవుణు డగ్గు తత్తెజ్ నా వెట కూడ్డేజి మన్ ఇకాన్ లోకాజ్ సెద్దిస్సికాన్ ఆజినాన్.

31 మరి నాను మిజి వెహ్సానిక ఇనిక ఇహిజ, లోకుర్ కిని విజు పాపమ్ కాజ్, దూసణదిజ్ దేవుణు సెమిస్సాన్, గాని దేవుణు ఆత్మదిజ్ దూసిసి వెహ్సాజ ఆకెజ్ ఎసెజ్ బా సెమిస్ ఎన్.

32 లోకు మరిసి ఆతి నజి పడిఏవండ ఇనికబా వర్గితిజ దేవుణు వన్నిజ్ సెమిస్సాన్. గాని దేవుణు ఆత్మదిజ్ పడిఏవండ వర్గిని వన్నిజ్ యా లోకమ్ దుబా, వాని లోకమ్ దుబా దేవుణు సెమిస్ ఎన్.

33 మరాన్ నెగ్గక ఇహిజ దని పండుబా నెగ్గకదె. సిలిజ, మరాన్ నెగ్గక ఆఎండ మహిజ దని పండుబా నెగ్గక ఆఎద్. మరాతి పండుదానె మరాన్ ఎలాగ మర్తికాదొ ఇజి నెస్తెజ్ ఆనాద్.

34 విసం మన్నిసరాన్ నన్నికిదెరా, సెఇకిదెరాతి మీరు నెగ్గి మాటెజ్ ఎలాగ వర్గిదెజ్ అట్టిదెర్? మీ మన్నుదు మీరు ఒడిబిని దన్నిజ్ తగితి లెకెండెనె మీ వెయు వర్గిజినాద్.

35 నెగ్గి మన్ను మన్ని వన్నిజ్ కూలిజ్ కొట్టుకిత్తి మన్నిలెకెండె, వని మన్నుదు నెగ్గెకెజె మంజినె. అందెజె వన్ని వెయుదాన్ నెగ్గి మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె.

36 గాని నాను మిజి వెహ్సానిక ఇనిక ఇహిజ, దేవుణు తీర్పు తీరిస్సి రొజుదు, లోకుర్ వర్గితి మహి విజు మాటెజె వందిజ్ లెక్క సిదెజ్ వలె.

37 అహిజ మీ మాటెజాణిజె మీరు సిక్సదాన్ తపె ఆనిదెర్, సిల్లిజ మీ మాటెజాణిజె మీరు మీ మున్ను సిక్స తపె ఆనిదెర్.

ఓన ఉండ్రీ గుర్తు

38 నస్తివలె నెగ్గెండొర్ పరిసయరుని యూదురి రూలుజ్ నెస్పిస్సికార్ యేసు డగ్గు వాజి వన్నిజ్, “బోదకిసికి, నీను దెవుణుబాణిజ్ వాతికాన్ ఇనిదన్నిజ్ గుర్తు లెకెండె నీను తోరిసిని ఉండ్రీ బమ్మాతి పణి సుడుఁదెజ్ ఇజి కోరిజినామ్”, ఇజె వెహ్సార్.

39 వాండ్రు వరిజ్ “యా తరమ్ దికిదెర్ ఆతి మీరు సెఇకిదెర్. దేవుణుదిజ్ నెస్ ఇకిదెర్నె, గుర్తు లెకెండె ఉండ్రీ బమ్మాతి పణి కిజి తోరిన్ అ ఇజె వెహ్సాదెర్. గాని దేవుణు వ్రవక్త ఆతి ఓనెజ్ జర్గితిక తప్ప మరి ఇని గుర్తుబా ఎయెరిజ్ బా తోర్ ఎద్.

40 ఓన మూండ్రీ రొస్సు పెరి మెయ పొటాదు ఎలాగ మహండ్రొ, అయలెకెండెనె, లోకుమరిసి ఆతి నానుబా మూండ్రీ రొస్సు బూమి లోఇ మంజినలె.

41 ఓన వెహ్సా మాటెజ్ విహారి నినివెదికార్ వరి పాపమ్ కు ఒప్పు కొడిజె డిజెస్త సితార్. అందెజె తీర్పు తీరిసిని దినమ్ దు వారు యా తరమ్ ది వరి వెట నిల్పి విరిమున్ను తీర్పు తీరిస్సారలె. ఇదిలో, ఓనెజ్ మిస్తికాన్ ఒరెన్ ఇబ్బె మనాన్ ఇజి నాను వెహ్సాన.

42 ఆక్కరి దినమ్ కాజ్ తీర్పు తీరిసినివలె, దసిణ దేసెమ్ ది రాణి ఉండ్రీ సానిలెకెండె బాన్ మంజినాద్లె. ఎందనిజ్ ఇహిజ సాలోమోను వర్గిని గెణంమన్ని మాటెజ్ వెండ్రెజ్ నండొ దూరం మన్ని దన్ని దేసెమ్ దాన్ వాతాద్. ఇదిలో, సాలోమోనుజ్ మిస్తికాన్ ఒరెన్

§ 12:39 12:39 పడాయ ఒవుమానమ్ దు ఓన వందిజ్ రాస్త మనాద్ వాండ్రు పయనం కిజి పహి ఒడదాన్ నమ్ దరమ్ దు విసిర్ అతిజ్ ఉండ్రీ పెరి మెయ, దేవుణు వెహ్సా వజి వన్నిజ్ డిజెతాద్ మూండ్రీ రొస్సు వెనుక వన్నిజ్ నమ్ దరం ఒడ్డుదు పాణమ్ దాన్ కక్తాద్ ఓన గుర్తు వందిజ్ మూసె ఆని వందిజ్ మరి మూండ్రీ వాండ్రు సాతి వరి బాణిజ్ మరి మర్జి నిజిజె వెహ్సాన్.

ఇబ్బై మనాన్. గాని యా తరమ్దికార్ వన్ని మాటెజ్ గిబ్బిజ్ ఒడఁజి వెన్ ఏర్, అందెజె యా తరమ్ది వరిజ్ తీర్పు మంజినాదలె.

43 ఉండ్రీ దెయం ఒరెన్ వన్నిజ్ డిసి వెల్లి వాతి వెనుక, మండ్రెజ్ బాడ్డి వందిజ్ రెబాజి బిడిఁమ్ బూమిదు బూలాజినాద్. గాని ఎంబెబా దనిజ్ బాడ్డి దొహ్కావతాద్.

44 నస్తవలె 'నాను డిఁస్తి వాతి నా ఇండ్రో మర్జి సొనాలె', ఇజి దనిజ్ అదినె వెహ్వాద్. మర్జి వాతిజ్ అది డిఁస్తి సెత్తికాన్, నెగెండ్ సిపాజి సుబరం కిజి ఎయెర్ బా మన్ ఇ ఇల్లు లెకెండ్ మన్నక సూణాద్.

45 నస్తవలె అది మర్జి సొన్ని, దన్నిజ్ ఇంక సెఇకెజ్ అతి మరి ఏడు దెయమ్ కాజ్ దన్నివెట కూక్ తనాద్. అవిక్ వని లొఇ సొన్ని అబెనె బస కినె. అయావలె వన్ని గతి ముందాహి దనిజ్ ముస్సు కస్టం ఆనాద్. అయలెకెండ్ నె యా తరమ్ది వరిజ్ గతిబా మంజినాద్."

యేసు అయ్ సిని తంబెరిజు

46 యేసు మంద లోకుర్ వెట వర్గిజి మహివలె, వన్ని అయ్ సిని తంబెరిజు వన్నివెట వర్గిదెజ్ ఇజి వెల్లి నిహ మహార్.

47 అయావలె ఒరెన్, "ఇదిలో నీ యాయని నీ తంబెరిజు నీ వెట వర్గిదెజ్ ఇజి వెల్లి నిహ మనార్", ఇజి వన్నిజ్ వెహ్వాన్.

48 అందెజె వెహ్వా వన్నిజ్ సుడఁజి, "ఎయెద్ నా యాయ? ఎయెరు నా తంబెరిజు?", ఇజి వెన్ బాతాన్.

49 వన్ని సిసూర్ జి కియు తోరిసి, "ఇదిలో నా యాయని నా తంబెరిజు.

50 పరలోకామ్ దు మన్ని నా బుబ్బెజ్ ఇస్టం ఆతివజ కినికాండ్రె నా తంబెరి, నా తజి, నా యాయ", ఇజి వెహ్వాన్.

13

విత్కు విత్తివన్ని కత.

1 అయ దినమ్ దునె, యేసు ఇండ్రోణిజ్ వెల్లి సొన్ని సమ్ దరం పడఁకాదు బస్తాన్.

2 మంద లోకుర్ వన్ని డగ్గు వాతిజ్ వాండ్రు ఉండ్రీ డోణిదు ఎక్క బస్తాన్. లోకుర్ విజెరె సమ్ దరం పడఁకాదు నిహార్.

3 అయావలె వాండ్రు వరిజ్ సుడఁజి నండొ సజితిజ్ కత వజ వరిజ్ వెహ్వాన్ "ఒరెన్ రయ్లు వాండ్రు విత్కు విత్తెజ్ సొహాన్.

4 వాండ్రు విత్తి మహిజ్ సెగం విత్కు సరి పడఁకాదు అరై. పొటిజ్ వాజి వన్కాజ్ తిహె.

5 సెగం విత్కు సటు ముస్సు మని లావ్ లోతు నీలి డుల్లిదు అరై. డుల్లి లోతు లావ్ సిల్లితిజ్ అవి వెటనె నేరై.

6 గాని డుల్లి తకు మహిజ్ వెలెజ్ లొఇ సొన్ ఇతిజ్, పొదు సొసి ఎండ తాక్తిజ్ అవి సాతె.

7 సెగం విత్కు సాప్పుతువెజ అరై. సాప్పు తవుజ్ పెరిసి వన్కాజ్ అణసు తిగితె.

8 మరి సెగం విత్కు నెగ్గి బూమిదు అరై. అబ్బె విత్తి విత్తుదిజ్ వంద వంతుజ్, అరువయ్ వంతుజ్, మువయ్ వంతుజ్ లెక్క పండితె.

9 గిబ్బిజ్ ఒడఁజి వెంజి అయాలెకెండ్ నడిఁజి మండ్రు.

10 వన్ని సిసూర్ వాతారె, "ఎందనిజ్ నీను కత వజ వరిజ్ వెహ్వాని", ఇజి వన్నిజ్ వెన్ బాతార్.

11 వాండ్రు వరిజ్ ఈహు వెహ్హాన్. “దేవుణు ఏలుబడిః కిని వందిజ్ డాఃజీతి మని నజతిజ్ దేవుణు మిజీ తెలివి కిత మనాన్, గాని విరిజ్ తెలివి కివన్.

12 దేవుణు ఏలుబడి కిని వందిజ్ నెస్తి మని వన్నిజ్ మరి తెలివి కినాన్. వన్నిజ్ మరి నండో నెస్సిస్సాన్. ఇనికబా అర్థం ఆఇ వన్నిబాణిజ్ వాండ్రు నెస్తిమనికబా లాగె అనాద్.

13 ఎందనిజ్ నాను కత వజ వరిజ్ వెహ్హిన్ ఇహిజు, వారు సుడఃజినార్ గాని సుడఃతిక వరిజ్ తోరవిద్. వెంజినార్ గాని నెగెండ విన్వర్, అర్థంబా కివర్.

14-15 మీరు ఎస్తివలెబా వెంజినెదెర్ గాని అర్థం కిదెజ్ అట్ఇదెర్. ఎస్తివలెబా సుడఃజినెదెర్ గాని ఇనిక ఇజి నెన్ఇదెర్. వారు వరి కణకాణిజ్ సుడఃజి, గిబిజాణిజ్ వెంజి మన్సుదాన్ అర్థం కిజి నా దరోట్ మహ్తాజ, నాను వరిజ్ నెగెన్ కిత మరి. గాని అయ లెకెండ జర్గివిండ వరి మన్సు కొడుఃవుదాన్ నిండ్రిత మనాద్. వరి గిబబిజ్ మందజ్ ఆతె. వారు వరి కణ్కు మూక్త మనార్.* యా లెకెండ ఎసయ ప్రవక్తవెట దేవుణు ముజాల వర్గితి మాట వరి ముస్సు పూర్తి ఆతె.

16 మీ సుడఃజనికెజ్, వెంజనికెజ్, మీరు అర్థం కిజినెదెర్. అందెజె మీరు దేవుణు సీజిని దీవనమ్కు మన్సుకిదెర్.

17 నండొండార్ ప్రవక్తరుని నీతి నిజాయి్ మన్నికార్ మీరు సుడఃజిని వన్యాజ్ సుడఃదెజ్ ఆస ఆతార్, గాని సుడఃదెజ్ అట్వెతార్. మీరు వెంజిని వన్యాజ్ విండ్రెజ్ ఆస ఆతార్ గాని విండ్రెజ్ అట్వెతార్.

18 విత్కు విత్తివన్ని కతదిజ్ అర్థం మీరు జాగర్త వెండ్రు.

19 ఎయెన్బా దేవుణు ఏలుబడిః కిని వందిజ్ వెహ్హి మాటజ్ వెంజి దనిజ్ అర్థం అట్విండ మహిజ, నయ్తూన్ వాజి వన్ని మన్సుదు వితి దనిజ్ పెర్న ఒనాన్. యాకాదె మడిఃజ నడిఃమిహాన్ సాని సర్దు అర్తి మన్నివిత్కు.

20 నెగొండార్ సట్టు ముస్సు మని లోతు సీల్లి డుల్లి నన్నికార్. నెగం విత్కు అయా డుల్లిదు అర్తి, గాని వారు దేవుణు మాట వెంజి సరదదాన్ దనిజ్ వెటెనె మన్సుదు ఇడ్సార్.

21 వారు కండెక్ కాలం దేవుణుముస్సు నమకమ్దాన్ నిల్సార్. గాని కస్టమ్కు, స్రమెజ్ వానివలె వెటెనె దేవుణు ముస్సు మన్ని నమకం వారు డిఃసి సీజినార్.

22 మరి ఒరెన్ విత్కు అర్తి మన్ని సాప్పుతుపెజ్ నేర్ని బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ది బత్కు వందిజ్ విసారం ఆజి మరి డబ్బు వందిజ్ సెఇ ఆస ఆజి, వనిజ్ అణసు తిగ్జి మంజినె. వన్ని బత్కుదు పలం సీలి నన్నికాన్ అనాన్.

23 మరి ఒరెన్ విత్కు అర్తి మన్ని నెగ్గి బూమిలెకెండ మనాన్. వాండ్రు దేవుణు మాట వెంజి దనిజ్ అరదం కిజినాన్. వాండ్రు, విత్తి విత్తుదిజ్ వంద వంతుజ్, అరువయ్ వంతుజ్, ముపయ్ వంతుజ్ పలం సీనాన్.

కారు మొక్కెజ్

24 యేసు మరి ఉండ్రీ సజతి కత వజ వరిజ్ వెహ్హాన్. “దేవుణు ఏలుబడిః ఇహిజు, వన్ని మడిఃజ నెగ్గి విత్కు విత్తి వన్నిజ్ పోలిత మనాద్.

25 గాని విజేరె నిద్ర కిజి మహివలె, వన్ని పగాతికాన్ వాతాండ్రె, కూలిజ నడిఃమి కారు విత్కు వితాండ్రె సాహాన్.

* 13:14-15 13:14-15 యెసయ 6:9,10.

26 కూలిజ్ నేర్జి పిరితెనె, నెరెక్ పోక్తివలె, నెగ్గి కూలిజ్లెకెండ్ మన్ని కారుబా తోరితాద్.

27 వన్ని పణి మసిర్ మడిజు యాజుమాని డగ్గు వాతారె, “ఓ బాబు, నీను నీ మడిజు నెగ్గి విత్తునె వితిగదె? మరి ఎమేణి యా కారు మొక్కెజ్ వాతె?”, ఇజి వెన్బాతార్.

28 “ఒరెన్ పగాతికాన్ యాక కితాన్”, ఇజి వాండ్రు వెప్తాన్. అయ పణి మనిసిర్ మాపు సొన్ని వనకాజ్ లాగ్జి కొటు కిదెజ్ నిజి ఇస్టమ్నా? ఇజి వెన్బాతార్.

29 అయావలె వాండ్రు, “ఏలు పోని, నెగ్గి కూలిజ్లెకెండ్ మన్ని కారు మొక్కెజ్ మీరు లాగ్గివలె వనకవెట ఒకవేల కూలిజ్బా తెప్పిదెరను.

30 కొయ్ని కాలం వానిదాక రుండిబా కూడజి పిరిప్పిద్. కొయ్ని కాలమ్దు, నెగ్గి కూలిజ్ లెకెండ్ మన్నికారు మొక్కెజు ముజాల కొయ్జి కటెజ్ తోహ్ని సుర్దు, వెనుక కూలిజ్ కొయ్జి తసి నా కొటుదు వాక్తు’, ఇజి కొయ్ని వరిజ్ వెహ్నా”, ఇజి వెప్తాన్.

సర్కుగిడ కత

31 యేసు మరి ఉండ్రీ సజతి కత వజి వరిజ్ వెప్తాన్. “దేవుణు ఏలుబడిః ఇహిజు, సర్కు మొక్కెజ్ విత్కుదిజ్ పోలిత మనాద్. ఒరెన్, అక్క వన్ని మడిజు విత్తాన్.

32 అయాక విజు విత్కు లోఇ ఇజిరికాదె, గాని పిరితిజు కున మొక్కెజు విజు వనకాజ్లోఇ పెరిక ఆజి మరాన్ లెకెండ్ ఆనాద్. ఆగనమ్దు ఎగ్రిజిని పొటిజ్ వాజి దన్ని కొమెజు గూడు తోహ్ని బన్నె.

33 యేసు మరి ఉండ్రీ సజతి కత వజి వరిజ్ వెప్తాన్. “దేవుణు ఏలుబడిః ఉండ్రీ బోదెలి నండొ నెగ్గి దూరుదు కలప్తిమన్ని పులాజ్ మన్ని కండెక్ దూరుదిజ్ పోలిత మనాద్. అయాక కలప్తి మన్ని దూరుదిజ్ విజు పులాజ్ కినిదాక పణి కినాద్.”

34 యేసు కత వజనె విజు మాటెజ్ లోకురిజ్ వెప్తాన్. కత వజి ఆవిండ ఇనికబా వరిజ్ వెహ్నితాన్.

35 “నాను కత వజనె వెయ్దాన్ వెహ్నా. లోకం పుట్టి బాణిజ్ అసి డాఃజితిమన్ని సజతిజ్ నాను తెలివి కిన్”*, ఇజి ప్రవక్త వెట దేవుణు ముజాల వగ్రితి మాటెజ్ హుర్తి ఆతాద్.

36 సస్తివలె వాండ్రు లోకురిజ్ డిఃసి ఇండ్రొ సొహాన్. వన్ని సిసూర్ వన్ని డగ్గు వాజి, “మడిజు మన్నినెగ్గి కూలిజ్లెకెండ్ మన్ని కారు మొక్కెజు వందిజ్ వెప్తి కతదిజ్ అర్లం మజి వెహ్నితా”, ఇజి వెప్తార్.

37 అందెజె వాండ్రు ఈహు వెప్తాన్. “నెగ్గి విత్కు విత్తికాన్ లోకు మరిసి ఆతి నాను.

38 మడిజు యా లోకం. నెగ్గి విత్కు దేవుణు ముస్సు నమకం ఇడ్డి మన్ని దేవుణు కొడొర్ నెగ్గి కూలిజ్లెకెండ్ మన్ని కారు మొక్కెజ్, సయ్నాను కొడొర్.

39 వనకాజ్ విత్తికాన్ పగాతికాన్ అతి సయ్నాను. కోత్త కొయ్నిక యా లోకమ్దిజ్ అక్కరదినం. కొయ్నికార్ దేవుణు దూతార్.

40 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టుకిజి సుర్ని లెకెండ్నె యా లోకమ్ది అక్కరదినమ్బా వానాద్.

41-42 నెగ్గి కూలిజ్ లెకెండ్ మన్ని కారుదిజ్ లాగ్గి కొట్టు కిజి ససుద్ సుర్ని లెకెండ్, పాపం కిజిని వరిజ్, మరి పాపం కిబిన్నీ విజు దన్నిజ్ నా ఏలుబడిఃదాన్ వెల్లె పొక్తెజ్ ఇజి, లోకుమరిసి ఆతి నాను నా దూతారిజ్ పొక్తాలె. వారు వరిజ్ సిసుద్ విసిర్నాలె. అబ్బె వారు అడఃబాజి, పల్కు కొహ్ని మంజినార్.

* 13:35 13:35 క్రిచ్చన 78:2.

43 నీతి నిజాయ్త్వి మనికార్ వరి బుబ్బాతి దేవుణు కిని ఏలుబడిఁదు పొద్దు లెకెండ్ జాయ్ సీజి మంజినార్. మీరు గిబ్బిజ్ ఒండఃజి వెంజి అయావజ నడిఃజి మండ్రు.

దేవుణు ఏలుబడిః

44 “దేవుణు ఏలుబడిః కినిక, మడిఃజుదు డాప్తిమన్ని విలువాతి ఆస్తిదిజ్ పోలిత మనాద్. ఒరెన్ ఆ విలువాతి ఆస్తిదిజ్ సుడఃతిజ్, ఎయెర్బా నెన్ ఏండ్ మరి డాప్సి, గొప్పు నర్దదాన్ సొన్ని వన్నిజ్ మనికెజ్ విజు పొర్ని అయ మడిఃజు కొటాన్.

45 మరి నాను మిజి వెహ్సిన, దేవుణు ఏలుబడిః కినిక ఇహిజ, ఒరెన్ ముజెలు సవుకారి రెబాజిని గొప్పు విలువ మన్ని ముజెలు లెకెండ్ నె.

46 వాండ్రు రెబాజినిలెకెండ్ మన్ని, ఉండ్రీ విలువాతి ముజెలుదిజ్ సుడఃతాండ్రె, సొన్ని వన్నిజ్ కల్లితి మనికెజ్ విజు పొర్ని అయ ముజెలు కొటాన్.

47 మరి నాణు మిజి వెహ్సిన, దేవుణు ఏలుబడిః కినిక ఇహిజ, సమదరమ్దు పొక్కిని రకరకమ్ది మొయెజ్ అస్సి వలాదిజ్ పోలిత మనాద్.

48 అయ వల నిండ్రీతిజ్ మొయెజ్ అస్సికార్, వల పడకాదు లాగ్గి బసి, నెగ్గి మొయెజు గంపాదు ఇడ్వార్. సెజ మొయెజు విసీర్ నార్.

49 యా లెకెండ్ నె యా తరమ్ది ఆక్కర్ దినంబా వానాద్. దేవుణు దూతార్ వాజి నీతి నిజాయ్త్వి మన్ని వరిబాణిజ్, సెజవరిజ్ ఎర్లిస్వార్.

50 వారు వరిజ్ గొప్పు పెరి సిను బాడ్డిదు అర్పావ్. అబె అడఃబాజి, పల్కు కొహ్కొక్కి మంజినార్.”

51 “యా విజు సజతిజు వందిజ్ మిజి అర్థం ఆతాదా?”, ఇజి యేసు వరిజ్ వెన్బాతాన్. “ఒఒ”, ఇజి వారు మర్జి వెహ్వార్.

52 “దేవుణు ఏలుబడిః కిని వందిజ్ నెస్తి మన్ని యూదురి రూలుజ్ నెస్సిస్వికార్ విజేరె, వన్ని ఆస్తి ఇడ్డి మన్ని గదిదాన్ పడాంకెజ్, కొత్తకెజ్ ఉండ్రె లెకెండ్ వెల్లి తని ఇండ్రోణి ఎజుమానిజ్ లెకెండ్ మనాన్”, ఇజి వాండ్రు వరిజ్ వెహ్వార్.

53 యేసు యా కతెజ్ వెహ్వి వీజితి వెనుక, అబెణిజ్ సాహాన్.

54 వన్ని సొంత పట్టుమ్దు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెస్సిసి మహాన్. “విన్నిజ్ యా గెణం, యా బమ్మాతి పణిజ్ కిని సత్తు ఎంబెణిజ్ వాతాద్”, ఇజి వారు బమ్మ ఆజి వర్గితార్.

55 “వీండ్రు కంసెల్ వాండ్రు మరిసి ఆఎండ్రా? విన్ని అయ్సి పేరు మరియు గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె?

56 విన్ని తజిసిక్ మా వెట మనెగదె? యాకెజ్ విజు వినిజ్ ఎంబెణిజ్ వాతె?

57 వారు వన్ని ముస్సుకోపం ఆజి మహాన్. గాని యేసు వరిజ్ “ఒరెన్ ప్రవక్త, వన్ని సొంత ఇండ్రోనె గవ్దరవం సిల్లికాన్ ఆజినాన్”, ఇజి వెహ్వార్.

58 వన్ని ముస్సుకో వరిజ్ నమకం సిల్లితిజ్ వాండ్రు అబ్బె లావ్ బమ్మాతి పణిజ్ కివితాన్.

14

యోహాను బుర కత్తినార్

1-2 నన్నివలె హేరోదురాజు యేసు వందిజ్ మాటెజ్ విహండ్రె, “వీండ్రు సాతి వరిబాణిజ్ మర్జి నిజితి బాప్తినం సీని యోహాను. అందెజె యా బమ్మాతి పణికిని సత్తు వన్ని లోఱ మనాద్”, ఇజి వన్ని పణి మన్నిరిజ్ వెహ్వార్.

3 వన్ని తంబెరిసి ఆతి పిలిపు ఆల్ని హేరోదియ వందిజ్ హేరోదురాజు ఆడ్ర సిత్తిలెకెండె యోహానుజ్ అసి గొలుసుదాన్ తొప్పి జెలిదు ఇడ్డ మహార్.

4 ఎందనిజ్ ఇహిజ, “దనిజ్ నీ వందిజ్ అల్ని లెకెండె ఇడె ఆతిక దేవుణు మోసిజ్ సిత్తి రూలుదిజ్ పడివద్”, ఇజి యోహాను వన్నిజ్ వెప్తా మహార్.

5 యోహానుజ్ సప్తెజ్ ఇజి హేరోదు రాజు ఒడిఃబితాన్, గాని లోకుర్ విజేరి విండ్రు ఒరెన్ దేవుణు ప్రవక్త ఇజి వెప్పి మహిజ్ విన్నిజ్ సప్తెజ్ తియెలాత మహాన్.

6 హేరోదు రాజు పుట్టి రోజు వాతిజ్, హేరోదియ గాల్ని వాజి వరి వందిజ్ డాట్టి కరజితాద్. హేరోదు రాజుజ్ గొప్ప సర్ద ఆతాన్.

7 అందెజె అది ఇనిక లొస్తిజ్ బా సీన ఇజి వాండ్రు దనివెట ఉండ్రె ఒట్టు పొక్కి దన్నిజ్ ఉండ్రె మాట సిత్తాన్.

8 అయ్సి దనిజ్ సుత్తిన్తి లెకెండెనె అది సాహదె, “బాప్తిసం సీని యోహాను బుర్ర కత్తి ఉండ్రె పలెందు సిద”, ఇజి లొస్తాద్.

9 రాజు గొప్ప బాద ఆతాన్. గాని వాండ్రు కితి ప్రమాణం వందిజ్, వన్ని వెట విందుదిజ్ బన్తిమిహి కూలెజ్ వందిజ్ అది లొస్తిక సీదెజ్ ఇజి ఆడ్ర సితాన్.

10 జెలిదు మహి యోహాను బుర్ర కత్పిస్తన్.

11 వన్ని బుర ఉండ్రె పలెమ్దు ఇడ్డి తపిసి దనిజ్ సిబిస్తాన్. అది అయాక దని అయ్సి డగ్రు ఒత సితాద్.

12 యోహాను సిసూర్ వాజి వన్ని పినుగు పెర్ది ఒసి నమాది కితార్. నస్తివలె వారు యేసు డగ్రు వాతారె వెప్తార్.

అయ్దు వేలుజ్ లోకాజ్ బోజనం సీనిక

13 జరిగితి సజతిజ్ విజు విహొండ్రె యేసు ఉండ్రె డోణి ఎక్కి ఎయెర్ బా మన్ ఇ ఉండ్రె బాడ్డిదు ఒరేండ్రె సాహాన్. వాండ్రు సాహి సజతి వెంజి అయ పట్టుమ్దికార్ నండొండార్ నడిఃసి వన్ని వెనుక సాహార్.

14 వాండ్రు అతాహ పడక జోరి అందితిజ్, డోణిదాన్ డిగితాన్ అయా మంద లోకురిజ్ సుడఃతాండ్రె వరి మున్కు కనికారం ఆతాన్. వరి జబ్బుదివరిజ్ నెగెండె కితాన్.

15 పొద్దు ఆతివెలె వన్ని సిసూర్ వన్ని డగ్రు వాజి, “అక్క ఎయెర్ మన్ ఇ బాడ్డి, ఏలునె పొద్దు ఆతాద్. యా లోకుర్ నాహ్కాజ్ సాన్ని వారె వరిజ్ బోజనమ్కు కొండెజ్ వరిజ్ పొక్అ”, ఇజి వెప్తార్.

16 “వారు సాండ్రెజ్ అక్కర్ సిల్లెద్. మీరె వరిజ్ తిండ్రెజ్ ఇనికబా సీదు”, ఇజి యేసు వరిజ్ వెప్తాన్.

17 “ఇదిలో, మా వెట అయ్దు రొటెజ్ ని రుండి మొయెజ్ నె మనె”, ఇజి వారు వెప్తార్.

18 “అయకెజ్ నా డగ్రు తగాట్”, ఇజి యేసు వెప్తాన్.

19 వెనుక లోకాజ్ పసి గడ్డి మున్కు బస్త్రు ఇజి వెప్తాండ్రె అయ్దు రొటెజ్ ని రుండి మొయెజ్ కీదు అస్తాండ్రె ఆగాసం దరిజ్ సుడఃజి దేవుణుదిజ్ వందనమ్కు వెప్పి రొటెజ్ రుక్కి సిసూరిజ్ సితాన్. సిసూర్ అక లోకాజ్ సీబాత సితార్.

20 వారు విజేరి పొట పంజు తిహార్. వెనుక మిగిలిత్తి ముక్యెజ్ పన్నెండు గంపెజ్ సిసూర్ వెప్తార్.

21 బోదెక్సి కొడొర్ అవిండ తిహికార్ అయ్దువేలు మన్ని మొగకొడొర్ మహార్.

యేసు ఏరు మున్ను నడిసినాన్.

22 లోకురిజ్ పోక్తి వెటనె యేసు వన్ని సిసూర్జ వెటనె ఉండ్రీ డోణి ఎకిసి, వన్నిజ్ ఇంక ముజాల అతాహ పడక సొండ్రు ఇజి వరిజ్ పోక్తాన్.

23 వరిజ్ పోక్తి వెనుక, వాండ్రు ఒరేండ్రె పార్దనం కిదెజ్ ఉండ్రీ గొరొత్ ఎక్తాన్. పొదు ఆతివెలె వాండ్రు ఒరేండ్రె అబ్బె మహాన్.

24 గాని డోణి ఒడ్డుదాన్ నండో దూరం సొహాద్ గొప్ప గాలి కిజి మహిజ్ ఉల్కెజాణిజ్ డోణి ఇతల్ అతాల్ దూజ్జి మహాద్.

25 క్రోడిజామ్దు యేసు సందారమ్దు ఏరు మున్ను నడిజి వరి డగ్రు సొహాన్.

26 వాండ్రు సమ్దరమ్దు ఏరు మున్ను నడిసినిక సిసూర్ నుడేతారె తియెల్ అతార్. “అబయా యాక ఉండ్రీ దూబ”, ఇజి వారు తియెల్ ఆజి డెల్స్తార్.

27 వెటనె యేసు, “దయ్ రమ్దాన్ మండ్రు, ఇక నానె, తియెల్ ఆమాట్”, ఇజి వెప్తాన్.

28 పేతురు, “ప్రబువా, నీనె ఇహిజ, నాను ఏరు మున్ను నడిజి నీ డగ్రు వాదెజ్ సెలవ సిద్ అ”, ఇజి వెప్తాన్.

29 “రఅ”, ఇజి యేసు వెప్తాన్. నస్తివలె పేతురు డోణి డిగ్జి యేసు దరోట్ ఏరు మున్ను నడిత వాతాన్.

30 గాని గాలిదిజ్ నిజిత్తి ఉల్కెజ నుడేజి తియెలాజి వాండ్రు ముడుగ్జి మహాన్. “ప్రబువా నజి రసిన్ అ”, ఇజి డెల్స్తాన్.

31 వెటనె యేసు వన్ని కియు సాప్పి వన్నిజ్ అస్తాన్. “ఇజిరి నమకం మనికి, ఎందనిజ్ నీను అనుమానం ఆతి?”, ఇజి వెప్తాన్.

32 వారు డోణి ఎక్తిజ్ గాలి అలెతాద్.

33 నస్తివలె డోణిదు మనికార్ వాజి, “నిజమె, నీను దేవుణు మరిసిన్”, ఇజి వెప్పి వన్నిజ్ పొగడిజి మాడిస్తార్.

34 వారు అతాహ పడక సొన్ని గెనెసెరెతు నాటో అందితార్.

35 అబ్బెణి లోకుర్ వన్నిజ్ గుర్తు అస్తారె డగ్రు మని నాహ్కాజ్ కబ్బు పోక్తార్. లోకుర్ వరి కస్టమ్దు మన్ని వరిజ్ విజిరిజ్ వన్ని డగ్రు తత్తార్.

36 జబ్బు మన్నికార్ వన్ని సొక్క సెంగుబా ముట్టిజ్ బతిమాల్జి సెలవ లొస్తార్. ముట్టికార్ విజిరె నెగెండ్రె అతార్.

15

నెగ్గిక్కెజ్ సెఇక్కెజ్

1-2 నెగెండ్రార్ పరిసయ్యరుని యూదురిజ్ రూలుజ్ నెప్పిస్సికార్ యెరూసలేమ్దాన్ వాతారె యేసుజ్, “ఎందనిజ్ నీ సిసూర్ బోజెనమ్దిజ్ ముందాల కికు నొరబావీర్, పెద్దెల్జ అలవాటుజ నెక్కి పోక్కినార్?”, ఇజి వెన్బాతార్.

3 యేసు వరిజ్ ఈహు మరజి వెప్తాన్, “మీరు ఎందనిజ్ మీ అలవాటుజ వందిజ్ దేవుణు ఆడ్రెజ నెక్కి పోక్కినిదెర్?

4 మీ యాయ బుబ్బరిజ్ గవరం సీదు, మరి ఎయెర్బా అయ్సి అప్పొసిరిజ్* దూసిసి వెప్తిజ వన్నిజ్ తప్తెజవలె* ఇజి దేవుణు రూలుదు వెప్తా మనాద్.

* 15:4 15:4 నిర్గమ 21:17; తేవి 20:9.

* 15:4 15:4 నిర్గమ 20:12 ద్వితి 5:16.

5-6 గాని మీరు నెస్పిసిని దన్ని లోఇ తేడ మనాద్ మీరు నెస్పిసినిక ఇనిక ఇహిజ ఎయెన్బా, “నాను మిజి ఇనికబా ఉండ్రీ సాయం లెకెండ కిన ఇజి ఇట్టి మనిక, దేవుణుదిజ్ సంత సిత్త మన్ను” ఇజి అయ్సి అప్పొసిరిజ్ వెప్పిజ, వాండ్రు మరి గవ్తరమ్దాన్ నెగెండ సుడేదెజ్ అక్కర్ సిల్లెద్. ఇజి అయాలెకెండ మీ అలవాటు వందిజ్ మీరు దేవుణు మాటదిజ్ సిలి లెకెండ కిజినిదెర్.

7-9 వేసం కినికిదెరా, “యా లోకుర్ పరి బెద్వెజాణిజ్ నజి పొగ్గిజినార్ గాని పరి మన్ను నా బాణిజ్ దూరం మనాద్. వారు పణిదిజ్ రెవిండ నజి పొగ్గిడిజినార్. వారు నెస్పిస్సికెజ్ విజు లోకురి రూలుజ్నె, ✱ ఇజి యెసయ ప్రవక్త వెట దేవుణు ముజాల మీ వందిజ్ వర్గితిక నిజమె”, ఇజి వెప్హాన్.

10 యేసు అయ మంద లోకురిజ్ డగ్రు కూక్తాండ్రె ఈహు వెప్హాన్, “మీరు జాగర్త వెంజి నెగెండ అర్థం కిదు.

11 వెయుదాన్ లోఇ సొనిక ఇనికబా ఎయెరిజ్బా ఇనిక ఆవిద్. గాని లోఇహాన్ వెయుదాన్ వెల్లివాని మాటెజ్నె ఒరెన్ వన్నిజ్ సెఇక కినె.”

12 నస్తవలె వన్ని సిసూర్ వాతారె, “యా మాటెజ్వెంజి పరిసయ్యరు నండొ కోపం ఆతిక నీను నెస్సిదా?”, ఇజి వెప్హాన్.

13 వాండ్రు సిసూరిజ్, “పరలోకామ్దు మన్ని నా బుబ్బాతి దేవుణు ఉణున్ఇ విజు మొకెజ్ వేలెజాణిజ్ తెరి ఆనె వారబా అయ్య మొకెజ్ లెకెండనె.

14 వరిజ్ డిఃసి సీదు. వారు గుడ్డిదివరిజ్ సరి తోరిస్సి గుడ్డిదికార్. ఒరెన్ గుడ్డిదికాన్ మరి ఒరెన్ గుడ్డి వన్నిజ్ సరి తోరిస్సిజి వారు రిఎర్బా గాంతదు అర్నాన్”, ఇజి వెప్హాన్.

15 అందెజె పేతురు, “యా కత వందిజ్ మజి అర్థం ఆనిలెకెండ వెహ్ఆ”, ఇజి వెప్హాన్.

16 యేసు వరిజ్, “ఏలుబా మీరు మహిపరిలెకెండ మనిదెరా? ఏలుబా నిన్ని మాటెజ్ అర్థం కిదెజ్ మిజి బుద్ధి సిల్లెదా?

17 వెయుదాన్లోఇ సొనిక, పొటాదు సొన్ని మరి అయాక మీరు బయలు బన్నివలె బూమిదు సొన్నినాద్, ఇక మీరు నెన్ఇదెరా?

18 గాని వెయ్దాన్ వెల్లి వాని మాటెజ్ మన్నుదాన్ వాజినె. ఆకెజె లోకుదిజ్ సెఇక కిజినె.

19 సెఇ ఆలోసనమ్కు, సప్పికెజ్, రంకు బూలొనిక, కేలార్బూలొనిక, డొజ కినిక, అబద్దం వెప్పికెజ్, దేవుణుదిజ్ దూసిస్సికెజ్ యాకెజ్ విజు మన్నుదానె వాజినె.

20 యాకెజె ఒరెన్ వన్నిజ్ సెఇక కిజినె. కికు నొర్బావిండ ఉటిజ అక ఒరెన్ వన్నిజ్ సెఇక కివ్.”

కనానియది బోదెలిజ్ మన్ని నమకం

21 యేసు అబ్బెణిజ్ నండొ దూరం సొన్ని ఉండ్రీ గొరొన్ ఎక్కి డిగితాండ్రె తూరు, సీదోను ఇని పట్టుమ్కాజ్ సెందితి ప్రాంతమ్కాజ్ సొహాన్.

22 వాండ్రు అబ్బె అందితిజ్ అబ్బెణిజ్, కానాన దేసమ్ది ఉండ్రీ బోదెలి వాతాదె, “ప్రబువా, దావీదు మరిసి నజి కనికారం తోరిన్అ. నా గాల్సెజ్ దెయం అస్తిజ్ గొప్ప బాద ఆజినాద్”, ఇజి డేల్సి వెప్హాద్.

23 యేసు దనిజ్ ఉండ్రీ మాటబా వెహ్వితాన్. అందెజె వన్ని సిసూర్ వాజి, “ఇది మా వెట గగోల్ ఆజి వాజినాద్, దనిజ్ పోక్అ”, ఇజి బతిమాలతార్.

24 వాండ్రు వరిజ్, “మురుతి మెండగొరైజ్ లెకెండ దేవుణుబానిజ్ దూరం ఆతి ఇస్రాయేలు లోకుర్ డగ్గు నాను పోకె ఆత మన్న”, ఇజి వెహ్తాన్.

25 అది వన్ని ముజాల వాజి ముణుకుజ్ ఊర్జి, “ప్రబువా, నజీ సాయం కిఅ”, ఇజి వెహ్తాన్.

26 వాండ్రు దనిజ్, “కొడొర్ తిండ్రైజ్ మని రొటెజ్ లాగ్గి నుకుడిజ్ సీనిక నాయం ఆవెద్”, ఇజి వెహ్తాన్.

27 అది, “నిజమె ప్రబువా, గాని ఎజమాని తింజిమహిజ్ బల్లదాన్ అర్ని ముక్కెజ్ నుకుడుజ్ తింజినె గదె?”, ఇజి వెహ్తాన్.

28 నస్తివలె యేసు, “బయి, నా మున్ను మని నీ నమకం గొప్ప పెరిక. నీను కోరితి లెకెండనె నిజి ఆపిద్”, ఇజి దనిజ్ వెహ్తాన్. అయ గడియూదనె దని గాల్ని నెగెండ ఆతాద్.

నాల్లి వెయిజ్ లోకాజ్ బోజనం సీనిక

29 యేసు అబెణిజ్ సొన్ని గలీలయ సమ్దారం పడకాదాన్ వాజి అబె ఉండ్రీ గొరోత్ ఎక్తాండ్రె బస్తాన్.

30 సొటావరిజ్, గుడ్డివరిజ్, గుల్లవరిజ్, కికు కాల్కు అర్తివరిజ్ మరి ఆఇ జబ్బుదివరిజ్ నండోడారిజ్ అసి మంద లోకుర్ వన్ని డగ్గు వాతారె వరిజ్ వన్ని కాల్కు అడ్డి ఇట్టార్. వాండ్రు వరిజ్ నెగెండ కిత్తాన్.

31 గుల్లవరిజ్ వర్గిదెజ్ వాతాద్. కికు కాల్కు అర్తికార్ నెగెమడ్ ఆతార్. సొటాదికార్ నడితార్, గుడ్డిదికార్ సుడెదెజ్ అట్టార్. యాకెజ్ సుడెజి లోకుర్ విజెరె బమ్మ ఆతారె ఇస్రాయేలురి దేవుణుదిజ్ పొగిడితార్.

32 యేసు వన్ని సిసూర్జి కూక్తాండ్రె వరిజ్, “యా లోకుర్ నావెట మంజి మూండ్రీ దినమ్కు ఆతె. విరిజ్ తిండ్రైజ్ బా ఇనికబా సిల్లెద్. నజీ వరి మున్ను కనికారం ఆజిన. వరిజ్ బజదావ్ పొక్తెజ్ మజి మన్ను రెవ. వారు కణ్కు త్రివిజి సర్దు అర్నాన్”, ఇజి వెహ్తాన్.

33 సిసూర్ వన్నిజ్, “నిసా మంద లోకురిజ్ తీపిస్తెజ్ బిడిఃమ్బూమి ప్రామతమ్దు ఇనిక దొహ్కనె?”, ఇజి వెహ్తార్.

34 యేసు వరిజ్, “మీ బాన్ ఎసోడు రొటెజ్ మన్నె?”, ఇజి వెన్బాతాన్. వారు, “ఏడు రొటెజ్ ని సెగం ఇజిరి మొయెజ్ మనె”, ఇజి వన్నిజ్ వెహ్తార్.

35 లోకురిజ్ బూమిదు బస్తు ఇజి యేసు వెహ్తాన్.

36 వెనుక అయ ఏడు రొటెజ్ ని మొయెజ్ కీదు అస్తాండ్రె దేవుణుదిజ్ వందనమ్కు వెప్పి అయాకెజ్ రుక్కి వన్ని సిసూర్జి సితాన్. వారు లోకాజ్ సీబాజి సితార్.

37 లోకుర్ విజెరె పొట పంజు తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ వెహ్తార్.

38 బోదెక్ ని కొడొర్ ఆవిండ తిహి మొగకొడొర్ నాల్లివెయిజ్ మహార్.

39 అయ మంద లోకురిజ్ పొక్తి వెనుక యేసు డోణి ఎక్తాండ్రె మగదాన్ ఇని నాటో సాహాన్.

16

1 నస్తివలె పరిసయ్యరుని సదుకయ్యరు యేసుజ్జ డగ్గు పరిక్కు కిదెజ్జ, వన్ని మాటెజాణిజ్జ వన్నిజ్జ ఆస్టెజ్జ ఇజి డగ్గు వాతార్. దేవుణునె వన్నిజ్జ పోక్తాన్ ఇనిదన్నిజ్జ రుజుప్ లెకెండ్ ఆగాసమ్దాన్ ఉండ్రి బమ్మాతి పణి కిజి మజి తోరిన్అ, ఇజి వెహ్తార్.

2 వాండ్రు వరిజ్జ, “పొద్దు ఆనివెలె ఆగసం ఎర్తజ్జ మహిజు నేండ్రు నెగెణ్ మంజినాద్ ఇజి మీరు వెహ్సినిదెర్.

3 మరి, పెందల ఆగసం ఎర్తజ్జ ఆజి మొసొప్ మహిజు, నేండ్రు గాలి పిరు వానాద్, ఇజి మీరు వెహ్సినిదెర్. ఆగసం సుడెజి అయ రోజు ఎలాగ మంజినాద్ ఇజి వెహ్తెజ్జ మీరు నెస్సిదెర్, గాని జర్గినికెజ్జ సుడెజి కాలమ్దిజ్జ గుర్తు అస్టెజ్జ అట్ఇదెర్.

4 యా తరమ్దికార్, సెఇకార్ అతికారె దేవుణు వందిజ్జ వరిజ్జ మన్సు సిల్లెద్ గుర్తు లెకెండ్ ఉండ్రి బమ్మాతి పణి వందిజ్జ వెన్బజినార్, గాని దేవుణు ప్రవక్త అతి ఓనెజ్జ జర్గితిక తప్ప మరి ఇనికబా ఉండ్రి గుర్తు మరి తోర్ఎద్”, ఇజి వెహ్తార్.

5 వెనుక యేసు వరిజ్జ డిసి అబ్బెణిజ్జ సొహన్.

6 వారు డోణి ఎక్తారె నమ్దరం అతాహ పడక సొన్ని మహివలె, వన్ని సిసూర్ రొట్టెజ్జ ఒత్తెజ్జ పోస్త మహార్. నస్తివలె యేసు, “పరిసయ్యరుది మరి సదుకయ్యరుది పులాజ్ కిని దూరువందిజ్జ మీరు గొప్ప జాగర్త మండ్రు”, ఇజి వెహ్తార్.

7 “మాప్ రొట్టెజ్జ తెఇతి వందిజె యా మాట వెహ్తాన్”, ఇజి ఒరెన్ వెట ఒరెన్వర్గిజి మహార్.

8 యేసు అక నెస్తాండ్రి, ఎందానిజ్జ మీరు నమకం తక్కు మనికిదెర్ ఆజినిదెర్! మీ బాన్ రొట్టెజ్జ సిల్లితిజ్జ మీరు ఎందనిజ్ ఒరెన్ మరి ఒరెన్ వెట వర్గిజినిదెర్?

9 ఏలుబా మీరు అర్దం కిజి నెస్టెజ్జ అట్ఇదెరా? అయ్దు రొట్టెజ్జ మహివలె అయ్దు వెయిజ్ లోకాజ్ తీపిస్తిజ్ మిగిలితికెజ్ ఎసోడు గంపెజ్ పెహ్తెదెరో?

10 మరి ఏడు రొట్టెజ్జ మహివలె నాల్లి వెయిజ్ లోకాజ్ తీపిస్తిజ్ మిగిలితికెజ్ ఎసోడు గంపెజ్ పెహ్తెదెరో? వినుకాజ్బా మీరు ఎతు కిఇదెరా?

11 నాను వర్గితిక రొట్టెజ్జ వందిజ్జ ఆవద్ ఇజి ఎందనిజ్ మీరు అర్దం కిజి నెన్ఇదెర్? గాని పరిసయ్యరుని సదుకయ్యరుది పులాని దూరు వందిజ్జ మీరు జాగర్త మండ్రు ఇజి నాను వెహ్తా”, ఇజి వెహ్తాన్.

12 నస్తివలె వాండ్రు జాగర్త మండ్రు ఇజి వెహ్తెక రొటె తయార్ కిని పులాని దురు వందిజ్జ ఆవద్ గాని పరిసయ్యరుని సదుకయ్యరుది పులాని దూరు నని బోద వందిజ్జ జాగర్త ఆజి మండ్రు ఇజి వెహ్తాన్, ఇజి వారు అర్దం కిజి నెస్తార్.

13 యేసు పిలిపుది అతి కయసెరియ పట్టుమ్దిజ్ డగ్గు మన్ని నాహ్కాజ్ వాతిజ్జ “లోకు మరిసి అతి నా వందిజ్, నాను ఎయెన్ ఇజి లోకుర్ వెహె ఆజినార్?”, ఇజి వన్ని సిసూర్జ వెన్బాతాన్.

14 “సెగొండార్ బాప్తినం సీని యోహాను ఇజినార్, సెగొండార్ ఏలియ ఇజినార్, మరి సెగొండార్ యిరిమ్య ఇజినార్, సిల్లె ప్రవక్తెజ్ లోఇ ఒరెన్ ఇజి సెగొండార్ వెహె ఆజినార్”, ఇజి వారు వెహ్తార్.

15 అందెజె యేసు, “గాని నాను ఎయెన్ ఇజి మీరు వెహ్సినిదెర్?”, ఇజి వెన్బాతాన్.

16 పేతురు ఆతి సీమోను, “నీను బత్తిజిని దేవుణు మరిసి ఆతి క్రీస్తు*”, ఇజి వెహ్లాన్.

17 యేసు, వన్నిజ్, “యోన మరిసి ఆతి సీమోను, నీను దేవుణు సీజిని దీవనమ్మకు మంజినికాన్. యాక నిజి తెలియకిత్తిక లోకుర్ ఎయెర్ బా ఆవర్ గాని పరలోకామ్దు మని నా బుబ్బాతి దేవుణునె.

18 గాని నాను నిజి వెహ్లాక ఇనిక ఇహిజ నీను పేతురు, నీ పేరుదిజ్ తర్లం సట్టు ఇజి నాను యా సుటు ముస్కు నా సజమ్దిజ్ తొహ్పా. అయా లోకమ్ది సత్తుజ్ దనిజ్ గెలిస్తాజ్ అట్విద్.

19 దేవుణు ఏలుబడిః కిజిని పరలోకామ్దిజ్ సెందితి ఆతికారం నాను నిజి సీన†, యా లోకమ్దు నీను ఇనిక తొహ్పాదొ, అయాక పరలోకామ్దుబా తొహ్ అనాద్. యా లోకమ్దు నీను ఇనిక కుత్తిదొ, అయాక పరలోకామ్దుబా కుతె ఆనాద్”, ఇజి వెహ్లాన్.

20 వెనుక యేసు, వాండ్రు క్రీస్తు ఆతికాన్ ఇజి ఎయెరిజ్ బా మీరు వెహ్లాజ్ ఆవద్ ఇజి వన్ని సిసూరిజ్ కసితం వెహ్లాన్.

21 అయ వెలెహన్ అసి యేసు, నాను యెరూసలేమ్దు సొండ్రెజ్ వెలె, మరి అబె పెదెలుజ, పెరి పుజెరిజుని యూదురి రూలుజ్ నెస్పిన్ని వరి కిదాన్ నండొ ఇమ్సెజ్ ఓరిస్సాలె, లోకుర్ నజి సప్పార్లె సాతి మూండ్రె రోజుదు దేవుణు నజి మరి మర్జి నిక్కినాలె ఇజి నండొ సజతిజ్ వన్ని సిసూరు వెట వెహ్పి మహాన్.

22 పేతురు యేసుజ్ ఉండ్రె వడఃకాదు కూక్త ఒతండ్రె, “ప్రబువా, నిజి యా లెకెండ్ జర్గిదెజ్ ఆవద్”, ఇజి గటిజ వెహ్లాజ్ మొదొల్స్తాన్.

23 అహిజ, వాండ్రు పేతురు దరిజ్ మర్జి బేసి, “ఓ సయ్తానా! నీను నజి ఉండ్రె అడ్డు లెకెండ్ మని. నీ మన్నుదు మని సజతిజ్ దేవుణుబాణిజ్ వాతిక ఆవద్, లోకుర్ ఒడఃబినికెజె”, ఇజి వెహ్లాన్.

24 నస్తివలె యేసు వన్ని సిసూరిజ్ సుడఃజి, “ఎయెన్ బా నా వెనుక వాదెజ్ ఇహిజ, వాండ్రు వన్ని సొంత ఆసెజ్ విజు డిఃసి సీజి వన్నిజ్ వాజిని కస్టంకు విజు ఓరిస్తెజ్ తయారాజి పిండఃజి నా వెట సాదెజ్ బా తయారాజి నా వెనుక వాదెజ్కలె.

25 ఎయెన్ బా వన్ని పాణమ్దిజ్ వాండ్రె కాపాడఃదెజ్ ఇజి సుడఃతిజ వన్నిజ్ ఎలాకాలం మంజిని బత్కు మన్విద్. నా వందిజ్ ఎయెరిజ్ బా వన్ని పాణం నస్టం ఆతిజ, వాండ్రు ఎలాకాలం మంజిని బత్కుదు సొనాన్లె.

26 ఎయెన్ బా వాండ్రు కొరిజినిక్కెజ్ దొహ్ క్వి యా లోకమ్ది ఆస్తిని సర్ల విజు దొహ్ క్వి వెనుక దేవుణువెట ఎలాకాలం మంజిని బత్కుదు సొన్విండ మహిజ ఇని లబం మనాద్? దేవుణువెట ఎలాకాలం మంజిని బత్కుదిజ్ బదులు మరి ఇనిక సీదెజ్ అట్వాన్?

27 లోకు మరిసి ఆతి నాను, నా బుబ్బాతి దేవుణు గొప్పు జాయ్ దాన్, వన్ని విజు దూతరిజ్ తోడుః అసి రాజు లెకెండ్ వానాలె. వెనుక ఒరెన్ వన్నిజ్ వన్ని పణిదిజ్ తగితి లెకెండ్ పలం సీనాలె.

28 లోకుమరిసి ఆతి నాను రాజు లెకెండ్ ఏలుబడిః కినిక సూణిదాక, ఏలు నిహిమన్ని వరిలో ఇ సెగొండార్ సావర్ ఇజి నాను మిజి నిజం వెహ్లాన్”, ఇజి వెహ్లాన్.

* 16:16 16:16 క్రీస్తు ఇని మాటదిజ్ అర్లం దేవుణు ఏర్పాటు కిత్తి పొక్తికాన్ † 16:19 16:19 పరలోకమ్ది తాలం కిక్కు ఇజి తెలుగుదు రాస్త మనాద్.

17

యేసు, మోసెని ఏలియ

1 ఆరు రోస్కు వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్తాండ్రె వన్నివెట ఒతాన్. వారు నండో ఎత్తుమని ఉండ్రీ గొరోన్ ముస్కు ఎక్త సాహార్.

2 అబ్బె వరి ముందాల వన్ని రూపు మారితాద్. వన్ని మొకో పొద్దు లెకెండ ఆతాద్. వన్ని సొకెజ్ మెర్సిని జాయ్లెకెండ తెలాజ్ ఆతె.

3 ఇదిలో, నస్తవలె అబ్బె మోసెని ఏలియ యేసు వెట వర్గిజి మంజినిక వరిజ్ తోరె ఆతాద్.

4 నస్తవలె పేతురు, “ప్రబువా, మాటు ఇబ్బె మహిజ నెగెద్. నిజి ఇస్తం ఇహిజ, ఇబ్బె నిజి ఉండ్రీ, మోసెజ్ ఉండ్రీ, ఏలియెజ్ ఉండ్రీ, ఆవొ మూండ్రీ గుడుఃనెజ్ తోహ్నా”, ఇజి వెహ్నాన్.

5 వాండ్రు వర్గిజి మహివలె నండో జాయ్మని ఉండ్రీ మొసాప్ వరిజ్ వ్డెగ్తాద్. “ఇదిలోన్ వీండ్రు నజి ఇష్టమాతి నా మరిన్. విన్ని ముస్కు నాను సర్ల ఆత మన్న. విన్ని మాటెజ్ నెగెండ వెండ్రు”, ఇజి ఉండ్రీ జాటు అయ మొసోపుదాన్ వాతాద్.

6 సిసూర్ యా మాట విహారె నండో తియెల్ ఆజి వడఃగ్గి అర్దార.

7 యేసు వరి డగ్రు వాజి వరిజ్ ముట్టి, “నిజ్దు, తియెల్ ఆమాట్”, ఇజి వెహ్నాన్.

8 వారు కణ్ణు పెర్లి బేస్తిజ్ యేసుజ్ తప్ప మరి ఎయెరిజ్బా తోవతార.

9 వారు గొరోన్ డిగ్జి వాజి మహివలె, “లోకు మరిసి ఆతి నాను, సాతి వరిబాణిజ్ మర్జి నిజ్నిదాక, మిజి తోరె ఆతి యా నజతిజ్ వందిజ్ ఎయెరిజ్బా వెహ్నాట్”, ఇజి యేసు వరిజ్ వెహ్నాన్.

10 నస్తవలె వన్ని సిసూర్, “ఏలియ* ముజాల వాదెజ్ ఇజి ఎండనిజ్ యూదురి రూలుజ్ నెస్పిస్సికార్ వెహ్నినార్?”, ఇజి వన్నిజ్ వెన్బాతార.

11 అందెజి వాండ్రు, ఏలియానె ముజాల వాజి మండ్రెజ్, యాక నిజమె. వాండ్రు వాజి విజు నెగెణ్ తయార్ కినాన్.

12 అహిజ ఏలియ ముజాల వాత మహాన్, గాని వారు వన్నిజ్ గుర్తు అస్తెజ్అట్ఎండ వరిజ్ ఇష్టమాతి లెకెండ వన్నిజ్ పడిఃఎండ కితార. లోకుమరిసి ఆతి నానుబా అయాలెకెండ వరి కిదాన్ న్రమెజ్ ఓరిస్సాలె”, ఇజి వరిజ్ వెహ్నాన్.

13 బాప్తిసం సీని యోహాను వందిజ్ వాండ్రు వరివెట వర్గిజినాన్ ఇజి వారు అర్దం కితార.

దెయం అస్తి కొడెడిజ్ నెగెణ్ కిజినాన్

14 వారు మంద లోకుర్డగ్రు వాతివలె ఒరెన్ వన్ని డగ్రు వాజి వన్ని ముందాల ముణ్ణు ఊర్జి,

15 “ప్రబువా నా మరిన్ ముస్కు నీ కనికారం తోరిన్అ వాండ్రు మూర్పు పెప్తిజ్ నండో బాద ఆజినాన్. వాండ్రు ఎనెజ్ ఎనెజ్ సిసుద్ సిలిజి ఏరుదు అర్సి మంజినాన్.

16 నాను నీ సిసూర్ డగ్రు వన్నిజ్ తత్త గాని వారు వన్నిజ్ నెగెండ కిదెజ్ అట్ఎతార”, ఇజి వెహ్నాన్.

* 17:10 17:10 పాడయి ఒప్పుమానమీదు మన్ని మలాకి ప్రవక్త పుస్తకమీదు రస్తిమన్నిలెకెండ ఇహిజ, ఏలియ ముజాల వాదెజ్ ఇజి యూదురు నమ్మిజినార్. మలాకి 3:1, 4:5-6.

17 అందెజె యేసు, “యా తరమ్దికిదెర్ ఆతి మీరు మహికార్ మిజి నెస్పిన్ని తప్ప సరిదాన్ నడిసి మన్నదెర్. మీరు నాముస్కు నమకం సిల్లికిదెర్. నాను ఎస్సా కాలమ్కు దాక నాను మిజి ఓరిసి మండ్రెజ్ వలె వన్నిజ్ నా డగ్గు తగాట్”, ఇజి వెహ్హాన్.

18 నస్తివలె యేసు అయ దెయమ్దిజ్ ఉండ్రీ ఆడ్ర సీతిజ్ అక్క వన్నిజ్ డిస్తతాద్. అయ గడియారునె ఆ ఇజిరికాన్ నెగెండ్ ఆతాన్.

19 దని వెనుక వన్ని సిసూర్వాండ్రు ఒరెండ్రె మహివలె యేసు డగ్గు వాతారె, “మాపు ఎండనిజ్అయ దెయమ్దిజ్ సాన్పిస్తెజ్ అట్వతాప్?”, ఇజి వెన్బాతారె.

20-21 ఉండ్రీ సర్పుగిడె నస్తు నమకం మహిజ యా గొరొన్దిజ్ సుడేజి, “ఇబ్బెణిజ్ అబ్బె సాన్అ’ ఇజి వెహ్హిజ అది అబ్బె సానాద్. మీరు కిదెజ్ అట్ఇక ఇనికబా మన్వద్, ఇజి నాను మిజి నిజం వెహ్హాన్”, ఇజి వెహ్హాన్. మిజి నస్సా నమకం సిల్లెద్, అందెజె మీరు కిదెజ్ అట్ఇదెర్.

22 వారు గలీలయ దేసమ్దు వాతివెలె యేసు, “లోకు మరిసి ఆతి నాను లోకుర్ కియుదు ఒవజెవె ఆనాలె.

23 వారు నజి సప్పార్, మరి మూండ్రీ దినమ్దు నాను మర్జి నిజెఆనాలె”, ఇజి వరిజ్ వెహ్హిజ్ వారు నండో దుకం ఆతారె.

24 యేసుని వన్ని సిసూర్ కపెర్నహముదు వాతివెలె, సెగం సెకల్† లెక్క పన్ను పెర్నికార్ పేతురు, డగ్గు వాతారె, “మిజి బోద కినికాన్ దేవుణు గుడిడి పన్ను సివండ్రా?”, ఇజి వెన్బాతారె.

25 “ఒబ వాండ్రు సీనాన్”, ఇజి వాండ్రు వెహ్హాన్. పేతురు ఇండ్రో వాతిజ్, వాండ్రు వర్లివండ ముజాల యేసు వర్లితాన్. “సీమోను, యా లోకమ్ది రాజుర్ ఎయెర్బాణిజ్ సిస్తని పన్నుజ్ ఒసూలు కిజినార్ వరి సొంత దేసెమ్ది వరిబాణిజ్నా, సిల్లిజ అయదేసెమ్దు మన్ని ఆఇ దేసెమ్దివరి బాణిజ్నా? నీను ఇనిక ఒడేబిజిని?”, ఇజి వన్నిజ్ వెన్బాతాన్.

26 “వారు విద్దెం కిజి గెలిస్తి దేసెమ్దివరిబాణిజ్జె”, ఇజి పేతురు వెహ్హాన్. యేసు వన్నిజ్, “అహిజ సొంత దేసెమ్దికార్ సివండ్ర తప్రె ఆజినార్.

27 మాటు వరిజ్ అడ్డు మంజిని వరిజ్లెకెండ్ మండ్రెజ్ ఆఎద్. నీను సేరుదు సొన్ని గాలం పొక్కి ముందాల దొహ్కాని మొయదిజ్ అసి దని వేయు రెక్కి సుడేజిజి, ఉండ్రీ సెకెల్ కాసు దని వెయ్దు మంజినాద్. అయాక లాగ్గి నీ వందిజ్ని నా వందిజ్ పన్ను సిఅ”, ఇజి వెహ్హాన్.

18

దేవును కిని ఏలుబడిదు పెరికాన్

1 నస్తివలె సిసూర్ యేసు డగ్గు వాజి, “దేవుణు కిని ఏలుబడి కినివలె మాలొఇ ఎయెన్ అబ్బె పెరికాన్ మంజినాన్?”, ఇజి వన్నిజ్ వెన్బాతారె.

2 వాండ్రు ఒరెన్ ఇజిరి కొడోడిజ్ కూక్కి వరి నడిమి నిల్వ్హాన్.

† 17:24 17:24 యెరుసల్లెమ్దు మన్ని దేవుణు గుడిడిజ్ అపసరమ్మాతికెజ్ కిజి నెగెండ్ సుడిడిజ్ ఒరెనొరెన్వన్నిబాణిజ్, సెగం సెకెల్ పన్నులెకెండ్ పెర్జి మహార్. యూదురు ఆతి మొగవారు 20 వయ్యుడాట్టిమహికార్ విజెరె గుడి పన్ను సీదిజ్ ఇజి దేవుణుమాటదు రాస్త మనాద్. అక్క రుండి రొస్కు కూలిదిజ్ నమానం మహాద్. నిర్గమ 30:13-16. 2దిసరు 24:9-14, నెహెవ్యు 10:32.

3 మరి వాండ్లు ఈమా వెహ్లాన్, “మీరు ఇజిరి కొణ్డోర్ లెకెండ మన్ను మరిసి, వరి లెకెండ ఆవెండ మహిజ, మీరు ఎసెజ్బా దేవుణు కిని ఏలుబడిడు సొండ్రెజ్ అల్తెదెర్, ఇజి నాను మిజి నిజం వెహ్లాన్.

4 అందెజె యా ఇజిరి కొణ్డో లెకెండ తగె ఆనికాన్ ఎయెండ్రొ, వాండ్రె దేవుణు కిని ఏలుబడిడు పెరికాన్ ఆనాన్.

5 మరి ఎయెర్బా నా మున్ను మన్ని నమ్మకమ్దు యా ఇజిరి కొణ్డోర్ లెకెండ ఆతికాన్ ఇజి ఒడెబినాండ్రొ ననివన్నిజ్ డగ్రు కినికాన్, నజి డగ్రు కిజినాన్.

6 గాని, నా మున్ను నమకం ఇట్టి మని యా కొణ్డో నన్ని ఒరెన్ వన్నిజ్, ఎయెర్బా పాపం కిబిస్తిజ, వాండ్రు వన్ని మెడదు ఉండ్రె పెరి జత్తవణుకు తోహా ఆజి నమ్దరం అడ్లి ముడుఃగిజి సొనిక వన్నిజ్ ఒద్దె నెగెద్.

7 ఎందానిజ్ ఇహిజ, లోకురిజ్ పాపం కిబిస్తి సజతిజ వందిజ్ యా లోకమ్ది వరిజ్ స్రమెజ్ తవ్ష. యాకెజ్ తవ్షెండ వాదెజెవెలె. గాని యాకెజ్ ఎయెన్వెట వానెనొ వన్నిజ్ వెహ్లాజ్ అల్తె నని కస్టమ్కు మంజినె.

8 నీ కియుబా, నీ కాల్యుబా నిజి పాపం కిబిస్తిజ, దనిజ్కత్తి విసీర్అ. రుండి కికు కాల్యు మంజి ఎలాకాలం మంజిని సిసుబాడిడు అర్పి దనిజ్ ఇంక, కికు కాల్యు సిల్లెండ ఆజి ఎలాకాలం దేవుణు వెట మంజిని బత్తుదు సొనిక నెగెద్.

9 మరి నీ కణక నిజి పాపం కిబిస్తిజ దనిజ్లాగ్జి విసీర్అ. రుండి కణ్యు మంజి ఎలాకాలం మంజిని సిసుబాడిడు అర్పి దనిజ్ ఇంక, ఉండ్రె కణక మంజి ఎలాకాలం దేవుణు వెట మంజిని బత్తుదు సొనిక నెగెద్.

10 యా ఇజిరి వరి లొఇ ఎయెరిజ్బా మీరు ఇజిరి కణక సుడెఃమాట్. ఎందానిజ్ ఇహిజ పరలోకామ్దు నా బుబ్బు డగ్రు మంజిని దూతార్ ఎస్తివలెబా వరిజ్ సుడెఃజి మంజినార్.

మరుతి గొరె కత.

11 గొరెజ్ లెకెండ మురుతి సొహి లోకురిజ్ రెబాజి రక్సిస్టెజ్ ఇజినె లోకుమరిసి* ఆతి నాను ఇబ్బె వాత మన్ను†.

12 ఒరెన్ వన్నిజ్ వంద గొరెజ్ మంజి వన్నాజ్ లొఇ ఉండ్రె మురుతిజ, మహి తొబయ్ తొమ్మిది గొరెజు డిసి, మురుతి గొరెదిజ్ రెబాజి సొన్ఎండ్రా? మీరు ఇనిక ఒడెబిజినిదెర్?

13 దనిజ్ దొహ్కాతిజ, వన్ని మురుఎండ మని తొబయ్ తొమ్మిది గొరెజు మున్ను యా మురుతి ఉండ్రె గొరె వందిజ్ వాండ్రు గొప్ప సర్ద ఆనాన్, ఇజి నాను మిజి నిజం వెహ్లాన్.

14 అయలెకెండెనె యా ఇజిరి వరిలొఇ ఒరెన్బా పాడాఃజి సొండ్రెజ్ దేవుణు మంజిని బాడిడు మని మీ బుబాతి దేవుణుదిజ్ ఇస్టం సిల్లెద్.

* **18:11 18:11** లోకుమరిసి ఇని మాట అరామియ బాసదాన్, “నాను” సిల్లిజ “నజి,నాది”, ఇజి అర్జమానిలెకెండ యూదురు వెహ్లా మహార్. యేసుప్రబుబా వన్ని వందిజ్ వెహ్లాజ్ యాలెకెండ వెహ్లా మహాన్. యాలెకెండ వెహ్లామహివలె నానె క్రీస్తు ఇజి వాండ్రు తినాజ్ వెహ్ఎండ వన్ని వందిజ్ వెహ్లా మహాన్. దానియేలు ప్రవక్త పుస్తకమ్దు రాస్తి మన్ని దన్నిజ్ తగితిలెకెండ, వాండ్రు యా పేరు వన్ని వందిజ్ వెహ్లా మహాన్. దానియేలు 7:13-14. యేసుజ్ పగాతికార్ వాండ్రు మాముల్గ వన్ని వందిజ్ ఆహా వెహ్లానాన్ ఇజి ఒడెబితార్. గాని వన్నిజ్ నమ్మిత్తార్ వాండ్రె క్రీస్తు ఇజి వెహ్లా మహాన్ ఇజి అర్దం కిత్తార్. † **18:11 18:11** గ్రీక్కు బాసాదు రాస్తిమన్ని ముకెలమాతి పుస్తకమ్కాజ్ యా మాట మన్నె గాని సిగం పుస్తకమ్కాజ్ సిల్లెద్

15 మరి నీ తంబెరిజు లొజ ఒరెన్ నిజీ తప్ప పణిజ్ కతిజ, మరి ఎయెర్బా నెన్ ఏండ వాండ్రు నీ ను మనివెలె వాండ్రు కితి తప్ప పణిజ్ తోరిన్ అ. వాండ్రు నీ మాట వెహిజు నీను వన్నిజ్ మర్జి నీ వెట కూడేజి మంజిని వన్నిలెకెండ కిత్తి.

16 గాని వాండ్రు నీ మాట విన్ ఏండ మహిజ, ఒరెన్ వన్నిజ్ నో, రివిరిజ్ నో నీ వెట తోడు; అసి వన్ని డగ్రు సాన్ అ. అహిజ దేవుణు మాటదు మని లెకెండ రివిర్ మువర్ది సాసిరి మాటజవెట విజు సజతిజ్ నిజమాతికెజ్ ఇజి రుజుప్ కిదెజ్ వలె †.

17 వాండ్రు వరి మాటబా విన్ ఏండ మహిజ, అయ సజతి దేవుణు సజమదిజ్ తెలియ కితి. సజమది వరి మాటబా వాండ్రు విన్ ఏండ మహిజ వన్నిజ్ ఆఇ వన్ని ననికాన్, సిల్లిజ పన్ను పెర్నికాన్ ‡ ఇజి సుడే అ.

18 యా బూమి ముస్సు మీరు ఇనిక తోహ్నిదెరో, అయాకెజ్ దేవుణు మంజిని బాడ్డిదుబా తోహె ఆనెలె. మరి యా బూమి ముస్సు మీరు ఇనిక కుత్నిదెరో, ఆయాకెజ్ పరలోకామ్ము దేవుణుబా అడ్డు కినాలె. మరి యా బూమి ముస్సు ఇనిదన్నిజ్ సెలవ సీనిదెరో పరలోకామ్ దాన్ దేవుణుబా దన్నిజ్ సెలవ సీనాలె ఇజి నాను మిజి నిజం వెహ్నిన.

19 మరి ఎయెర్బా రివిర్ కూడేజి, ఉండ్రె మన్ను కల్లిజి ఇనికబా లొస్తిజ్ బా, పరలోకామ్దు మన్ని నా బుబ్బాతి దేవుణు, మీరు కోరిజిని లెకెండ మీ వందిజ్ కినాలె.

20 అహిజ ఎంబె రివిర్ నో, మువర్ నో నా పేరుదాన్ కూడేజి వాజి మహిజ, అబ్బె వరివెట నాను మంజినలె.”

కనికారం తోరిన్ ఇ పణిమనిసి

21 నస్తివలె పేతురు యేసు డగ్రు వాతండ్రె, “నా తబేరి ఒరెన్ నా వెట తప్ప కితిజ నాను ఎసోడు సుట్టు వన్నిజ్ సెమిస్టెజ్? ఎడూ; సుట్టు సెమిస్టెజ్ ఆనాదా?”, ఇజి వెన్ బాతాన్.

22 యేసు వన్నిజ్, “ఏడు సుట్టు ఆవెద్. డబయ్, సుట్టు ఏడు* ఇజి నాను నిజీ వెహ్నిన”, ఇజి వెహ్త్సన్.

23 ఎందానిజ్ ఇహిజ దేవుణు ఏలుబడి; కినిక ఇహిజ, వన్ని పణిమన్గిరెవెట వారు వన్ని బాణిజ్ లొమ్ము అప్పదిజ్ లెక్క సూణి ఒరెన్ రాజుజ్ పోలిత మనాద్.

24 లెక్క సుడేదెజ్ మొదోల్స్తి వలె, వది వెయుజ్ తాలందుజ్ † అప్ప లొస్తిక మర్జి సీదెజ్ మన్ని ఒరెన్ వన్నిజ్, వన్ని డగ్రు తత్తార్.

25 వన్నిజ్ అప్ప తీరిస్టెజ్ అబ్ కతిజ్, వన్నిజ్ ని వన్ని ఆల్నిజ్, కొడోరిజ్, మరి వన్నిజ్ కల్లితి మనికెజ్ విజు పొర్ని అప్ప తీరిన్ అ ఇజి యాజుమాని ఆడ్ర సిత్తాన్.

26 అయ పణిమణిసి వన్ని ఎద్రు ముణుకుజ్ ఊర్జి మాడిస్తాండ్రె, “సజి సెమిన్ అ నజి మరి కండెక్ నమయం సిదా నాను అప్ప విజు మర్జి సీన్ ‡ ఇజి బతిమాల్ తాన్.

27 అయ ఎజుమాని పణిమనిసి ముస్సు కనికారం ఆజి, నీ అప్ప విజు తెవితాద్ ఇజి వన్నిజ్ సాండ్రెజ్ సెలవ సిత్తాన్.

‡ 18:16 18:16 ద్వితి కాండం 19:15 § 18:17 18:17 యూదురు అతికార్ ఇనిదన్ని వందిజ్ బా పన్ను పెర్నివరివెట కూడిజి మన్ ఏర్ * 18:22 18:22 నాల్గి వంద తొబయ్ సుట్టు ఇహిజ ఎస్తివలెబా సెమిన్ మండ్రెజ్ ఇజి అర్థం. † 18:24 18:24 ఉండ్రె వెయి తాలందు ఇహిజ వెయి లక్క రూపాయ్ దిజ్ లాప్ మన్నె

28 గాని అయ పణిమనిసి వెళ్లి వాజి సొన్ని మహివలె, వన్నిజ్ వంద దినారమ్కు[‡] అప్పు మని, వన్నివెట కూడఃజి పణికిజిని ఒరెన్ వన్నిజ్ సుడఃతాన్. వన్నిజ్ అస్తాండ్రె గొతిక వడిసి, “నీను నజీ అప్పు మన్ని డబ్బు మరజి సిదా”, ఇజి బలవంతం కిత్తాన్.

29 వన్నివెట కూడఃజి పణికినికాన్ అతి అయ పణిమనిసి వన్ని ఎద్దు ముణుకుజ్ ఊర్జి, “నజీ సెమిన్ అ, నిజీ మరి కండెక్ సమయం సిదా? నిజీ సీదెజ్ మన్ని అప్పు విజు నాను మరజి సీన”, ఇజి బతిమాల్ తాన్.

30 గాని వాండ్రు అక ఒప్పకొడవండ, అప్పు విజు మరజి సీనిదాక వన్నిజ్ జేలుదు ఇడిస్తాన్.

31 వరివెట కూడఃజి పణికినికార్ సెగొండార్, యా జర్గితిక విజు సుడఃతారె నండో బాద ఆతార్. వారు సొన్ని జర్గితిక విజు ఎజుమానిజ్ వెప్తార్.

32-33 నస్తవలె అయ ఎజుమాని వన్నిజ్ కూక్ పిస్తాండ్రె, “మూర్కం మని పణిమనిసి, నీను నజీ బతిమాల్ తిజ్ నాను కనికారం ఆజి నిజీ సెమిసి, నీ అప్పు విజు తెవితార్ ఇజి నిజీ వెప్తిలెకెండ నీ వెట కూడఃజి పణి కిని వన్నిజ్ నీనుబా సెమిసి వన్ని మున్ను కనికారం తోరిస్తెజ్ గదె?”, ఇజి వెన్ బాతాన్.

34 నస్తవలె అయ ఎజుమాని వన్ని మున్ను కోపం ఆతాండ్రె వాండ్రు అప్పు విజు మరజి సీనిదాక వన్నిజ్ హిమ్ స కినివరిజ్ ఒపజెప్తాండ్రె జెలిదు ఇడిస్తాన్.

35 మీరు మీ మన్నుదాన్ మీ తంబెరిజవెట సెమిన్ వండ మహిజ పరలోకామ్ దు మన్ని నా బుబ్బాతి దేవుణుబా యా లెకెండెనె మీ లొఇ ఒరెన్ వెట కినాన్.

19

అలెసిజ్ డిఃన్ని సీని వందిజ్

1 యా మాటెజ్ వెప్తి వీజితి వెనుక యేసు గలిలయ డిఃసి, యోర్దాన్ గడ్డ అతాహా పడక మని యూదయ నాహ్కజ్ సొహాన్.

2 మంద లోకుర్ వన్ని వెనుక సొహార్. వాండ్రు అబ్బె వరి జబ్బుది వరిజ్ నెగెండ కిత్తాన్.

3 సెగొండార్ పరిసయరు, వన్ని మాటెజాణిజ్ వన్నిజ్ తప్ప అస్తెజ్ ఇజి వన్ని డగ్రు వాతారె, “ఇని తప్పబా తొవండ ఒరెన్ వన్ని ఆల్నిజ్ డిఃసి సీనిక దేవుణు మోసెజ్ సిత్తి రూలుజ్ వజ నాయమ్నా?”, ఇజి వెన్ బాతార్.

4 వాండ్రు వరిజ్, “ముజాహాన్ దేవుణు లోకురిజ్ తయార్ కితివలె వరిజ్ మొగ్గ కొడఃని బోదెలి లెకెండ తయార్ కిత్తాన్*.

5 అందెజె మొగ్గ కొడః వన్ని అయసి అప్పొసిరిజ్ డిఃసి వన్ని ఆల్ని వెట కూడఃజినాన్. వారు రివర్ ఉండ్రె ఒడఃలె ఆనార్.*

6 అందెజె అబ్బెణిజ్ అసి వారు రివర్ ఆవండ ఉండ్రె ఒడఃలె ఆన మంజినార్. అందెజె దేవుణు జత కుడుఃప్తి వరిజ్ లోకుర్ కేట కిదెజ్ ఆవద్ ఇజి దేవుణు మాటదు రాస్తి మన్నిక మీరు ఎసెజ్ బా సద్విఇతిదెరా?”, ఇజి వరిజ్ వెన్ బాతాన్.

7 వారు వన్నిజ్, అక్క అయాలెకెండ మహిజ, ఒరెన్ వన్ని ఆల్నిజ్ డిఃస్తెజ్ ఇహిజ, ఉండ్రె విడ్డిః ఆకు రాసి సీజి దనిజ్ డిఃస్తెజ్ ఆనాద్ ఇజి మోసె ఎండనిజ్ ఆడ్రె సిత్తాన్?”, ఇజి వెన్ బాతార్.

‡ 18:28 18:28 వంద దినారమ్కు ఇహిజ అయ కాలమ్ దు పది రొన్నా పణికిని కూలిదిజ్ సమానం మహాద్.

* 19:4 19:4 ఆది 1:27. * 19:5 19:5 ఆది 2:24.

8 యేసు వరిజ్, “మిజి నస్సా కటినమతి మన్ను మహిజ్, మోసె అయ లెకెండ్ సెలవ సిత్తాన్ గాని ముజుహాన్ అసి అయ లెకెండ్ జర్గితాద్.

9 రంకు బూలాతిజానె తప్పు మరి ఇనిదని వందిజ్బా ఒరెన్ వన్ని ఆల్నిజ్ డిసి మరి ఉండ్రీ దనిజ్ ఇడె ఆతిజ వాండ్రు దనివెట రంకు బూలానికాన్ ఆజినాన్ ఇజి నాను మిజి వెప్పిన్”, ఇజి వెప్టాన్.

10 వన్ని సిసూర్ వన్నిజ్, “ఆల్ని మాసిర్ నడిమి సజతిజ్ యాలెకెండ్ మనాద్ ఇహిజ, పెండ్లి ఆవండ మంజినికాదె నెగెద్”, ఇజి వన్నిజ్ వెప్టాన్.

11 యేసు వరిజ్, “మీరు వెప్టా మాట విజేరె అస్తజ్ అట్విర్, గాని దేవుణు ఎయెరిజ్ అయ లెకెండ్ సితాండ్రో వారె కిదెజ్ అట్నార్.

12 సెగొండార్ ఆండెరెజ్* లెకెండ్నె అయసి పొటాదాన్ పుట్నార్. సెగొండారిజ్ లోకుర్ ఆండెరెజ్ లెకెండ్ కిజినార్. మరి సెగొండార్ దేవుణు ఏలుబడిః వందిజ్ పెండ్లి ఆవండ వరిజ్ వారె ఆండెరెజ్ ఆజి మంజినార్.

13 నస్తవలె యేసు కికు ఇడ్డి పార్దనం కదెజ్ ఇజి సెగొండార్ ఇజిరి కొడెరిజ్ వన్ని డగ్రు తత్తార్. వన్ని సిసూర్ కొడెరిజ్ తత్తి వరిజ్ జటిజ్ ఆజి గోల కిత్తార్.

14 గాని యేసు, “యా ఇజిరి కొడెరిజ్ నా డగ్రు రప్పిర్, వరిజ్ అడ్డు కిమాట్. దేవుణు ఏలుబడిః కినిక నినివరిదినె”, ఇజి వరిజ్ వెప్టాన్.

15 వరి మున్ను కికు ఇడ్డి పార్దనం కితి వెనుక వాండ్రు అబ్బెణిజ్ సాహాన్.

ఆస్తి మని దజడాయెన్.

16 ఇదిలో, ఒరెన్యేసు డగ్రు వాతండ్రె, “ఓ బోదకినికి, దేవుణు వెట ఎలాకాలం మంజిని బత్కుదు నాను మండ్రెజ్ ఇహిజ నాను ఇని నెగ్గి పణిజ్ కిదెజ్”, ఇజి వన్నిజ్ వెన్బాతాన్.

17 యేసు వన్నిజ్, “నెగ్గి పణిజ వందిజ్ ఎందనిజ్ నీను నజి వెన్బాజిని? నెగ్గికాన్ దేవుణు ఒరెండ్రె మనాన్. దేవుణు ఎలాకాలం మంజిని బత్కుదు నీను మండ్రెజ్ ఇహిజ, దేవుణు సీతి ఆడ్రెజ్ లోజిజి మన్అ”, ఇజి వెప్టాన్.

18 వాండ్రు, “ఇని ఆడ్రెజ్?”, ఇజి వన్నిజ్ వెన్బాతిజ్ యేసు వన్నిజ్, “సప్తెజ్ ఆవెద్, రంకు బూలాదెజ్ ఆవెద్, డోజ కిమా, అబద్దమ్దిజ్ సాస్యం వెప్టా.

19 అయసి అప్పొసిరిజ్ గవర్మదాన్ నెగెణ్ సుడెఃఅ.* మరి నీను నిజి ప్రేమిసినిలెకెండ్ మహివరిజ్ ప్రేమిన్అ”*, ఇజి వెప్టాన్.

20 అందెజె అయ దజడాయెన్, “యాకెజ్ విజు నాను కిజినె మంజిన. మరి ఇనిక నజి తకు మనాద్?”, ఇజి వెప్టాన్.

21 యేసు వన్నిజ్, “నీను పూర్తి నెగ్గికి ఆదెజ్ కోరితిజ, నీను సొన్ని నిజి కల్లితి మనికెజ్ విజు పొర్ని, బీదాతివరిజ్ సీబాజి సిఅ. ఆహె కితిజ పరలోకామ్దు నిజి ఆస్తి కల్లిజి మంజినాద్. వెనుక నావెట రఅ”, ఇజి వెప్టాన్.

22 అయ దజడాయెన్ నండ్రో ఆస్తి కల్లిజి మనికాన్ కాక అయ మాట విహండ్రె ఇజిరి మొకొం అతాండ్రె సాహాన్.

23 నస్తవలె వన్ని సిసూర్జ సుడెఃజి, యేసు”, ఆస్తి మన్నికాన్ దేవుణు కిని ఏలు బడిఃదు సొండ్రెజ్ గొప్ప కస్టం ఇజి నాను మిజి నిజం వెప్పిన్.

* 19:12 19:12 అండెర ఇహిజ వాండ్రు కొడెరిజ్ ఇడ్డిజ్ అట్ఇకాన్. ☆ 19:19 19:19 నిర్దమ 20:12-16; ద్వీతి 5:16-20. ☆ 19:19 19:19 లేవి 19:18.

24 మరి నాను మిజి వెప్పొక ఇనిక ఇహిజ, ఆస్తి మనికాన్ దేవుణు ఏలుబడిడు సొని దనిజ్ ఇంక, ఒంట దొహనం బొరొదాన్ డుగ్గనిక సులు ఆనాద్”, ఇజి వెహ్హాన్.

25 సిసూర్ యా మాట విహరె నండొ బమ్మ అతారె, “దేవుణు రక్సిస్తి లెకెండ్ ఎయెన్ మండ్రెజ్ అట్నార్?”, ఇజి వెహ్హాన్.

26 యేసు వరిజ్ సుడేజి, “యాక లోకాజ్ అట్ఇకాదె, గాని దేవుణు విజు కిదెజ్ అట్నాన్”, ఇజి వెహ్హాన్.

27 పేతురు వన్నిజ్ సుడేజి, “ఇదిలో మాపు విజు డిస్తాపె నీ వెట వాజినాప్, మజి ఇనిక దొహ్కాద్దుల?”, ఇజి వెన్బాతాన్.

28 యేసు వరిజ్, “యా లోకం మరి కొత్తాక ఆనివెలె లోకు మరిసి ఆతి నాను గొప్ప జాయ్మని గొప్ప సింహాసనమ్మదు బసి ఇస్తాయేలుది పన్నెండు తెగ్గాతివరిజ్ తీర్పు తీర్సివెలె, నా వెనుక వాతి మీరుబా, నావెట పన్నెండు గొప్ప సింహాసనమ్కాజ్ బసి వరిజ్ తీర్పు కినిదెరెలె.

29 మరి ఎయెర్బా నా వందిజ్ వరి ఇల్లుజొల్లు, అన్నతంబెరిజబ, బీబి తజిసికజ్బా, అయ్సి అప్పొసిరిజ్బా, బూమిపుట, కొడొకొక్కరిజ్బా డిస్తా సితిజ నినివరిజ్ యాకెజ్ వంద వందుజ్ దొహ్కా. దన్నివెట ఎలాకాలం మంజినిబత్కుబా దొహ్కాద్.

30 గాని మొదొహికార్ ఇజి ఒడేబిని నండొండొర్ కడెవెర్దికార్ ఆనార్. కడెవెర్దికార్ ఇజి ఒడేబిని నండొండొర్ మొదొహికార్ ఆనార్లె.

20

ద్రాసటోటాదు పణికినికార్

1 “దేవుణు ఏలుబడి కినిక ఇహిజ, వన్ని ద్రాసటోటాదు పణికిదెజ్ పణికిని వరిజ్ కూక్తెజ్ పెందాల నిజ్జి వెల్లి సొన్ని మహి ఉండ్రె టోట యెజమానిజ్ పోలిత మనాద్.

2 ఉండ్రె రోజు పణిదిజ్ ఉండ్రె దినారం* కూలి సీన ఇజి ఒప్పకొటాండ్రె, వన్ని ద్రాక్కు టోటాదు పణి కిదెజ్వరిజ్ పొక్తాన్.

3 వెనుక అంబెలి వేలాదు వాండ్రు వెల్లి సొహివలె సత్తాదు ఇని పణి సిల్లెండ నిహిమని సెగొండొరిజ్ సుడేతాన్.

4 వాండ్రు వరిజ్, “మీరుబా నా ద్రాక్కుటోటాదు పణిదిజ్ సొండ్రు, మిజి సరియాని కూలి సీన”, ఇజి వెహ్హాన్.

5 వారు సొహార్. మరి వాండ్రు పన్నెండు గంటజ, మూండ్రె గంటజబా ఆహె కితాన్.

6 మరి అయ్దు గంటజ సొహిజ్ మరి సెగొండొర్కాలి నిహిమనివరిజ్సుడేతాన్. వాండ్రు వరిజ్, “యా దినం విజు ఎందనిజ్ మీరు ఇబ్బె సెడ్డిసె నిహిమహిదెర్?”, ఇజి వెన్బాతాన్.

7 వారు వన్నిజ్, “ఎయెర్బా ఇని పణిదిజ్బా మజి కూక్ఏతార్, అందెజ్”, ఇజి వెహ్హాన్. వాండ్రు వరిజ్ “మీరుబా నా ద్రాస టోటాదు పణిదిజ్ సొండ్రు”, ఇజి వెహ్హాన్.

8 పొదు ఆతివెలె అయ ద్రాస టోట ఎజమాని పణి సూణి వన్నిజ్ కూక్తాండ్రె, “పణికినివరిజ్కూక్కి, కడెవేర్ వాతివరిబాణిజ్ మొదొల్ని ముందాల వాతికార్ డాక వరిజ్ కూలి సీన”, ఇజి వెహ్హాన్.

9 పొద్దు డిగ్గివలె పణిదిజ్ వాతివరిజ్ ఒరెన్ ఒరెన్ వన్నిజ్ ఉండ్రె దినారం కూలి దొహ్కాద్.

* 20:2 20:2 అయ కాలమ్మదు ఉండ్రె రోజు పణిదిజ్ కూలి ఉండ్రె దినారం మహాద్.

10 ముందాల వాతికార్ మజి లావ్ దొహ్కె, ఇజి ఒడెబితార్ గాని వరిజ్బా ప్రతి ఒరెన్ వన్నిజ్ ఉండ్రీ దినారమ్నె కూలి దొహ్కెద్.

11 అయాక దొహ్కెవెలె వారు టోట ఎజుమానిజ్ ఎద్దు మొరొ ఆతార్.

12 వారు, “కడెవెరిదు వాతికార్ ఉండ్రీ గంటనె పణి కిత్తార్ గాని వెలార్ కన్టబడెజి విజు పణి కితిమని మజి ఎందనిజ్ నీను వరిజ్ సమానం కితి?”, ఇజి వెన్బాతార్.

13 వాండ్రు వరి లొఇ ఒరెన్ వన్నిజ్, “బయి, నాను మిజి ఇని అనెయం కివిత. ఉండ్రీ దినారమ్దిజ్ పణి కిన ఇజి మీరు ఒపుకొటిదెర్ గదె?”

14 మీ కూలి అసి మీరు సాండ్రు. మిజి సితి లెకెండ్ కడెవెరిదు వాతివన్నిజ్బా సిదెజ్ నజి ఇన్టం ఆతాద్.

15 నా డబుదాన్ నజి ఇన్టమాతి లెకెండ్ కిదెజ్ నజి అక్కు సిలెదా? నాను వరిజ్ ఒదరిసి సితి వందిజ్ నీను గోస ఆజినిదెర్?”, ఇజి వెన్బాతాన్.

16 అయా లెకెండ్నె కడెవెరిదికార్ ఇజి ఒడెబిజినికార్ మొదొహికార్ ఆనార్, ముందాహికార్ ఇజి ఒడెబినికార్ కడెవెరిదికార్ ఆనార్.”

యేసు వన్ని సావు వందిజ్ మరి వెప్పినాన్.

17 యేసు యెరూసలేమ్దు సొన్ని మహివలె, వాండ్రు వన్ని పన్నెండు మణిసిర్ సిసురిజ్ ఉండ్రీ పడెకాదు కూక్ట ఒతాండ్రె వరిజ్ ఈహు వెప్టాన్.

18 ఇదిలో మాటు యెరూసలేమ్దు సొన్నినాట్. అబ్బె లోకుమరిసి ఆతి నాను పెరి పుజెరిజ, యూదురి రూలుజ్ నెస్పిన్ని వరిజ్ ఒపజెపె ఆనాలె. వారు నజి సావుదిజ్ సిక్కు సీనార్లె.

19 మరి వారు నజి వెకస్తి, కొండెజాణిజ్ డెయ్జి, సిలువ పొక్తెజ్ యూదురు ఆఇ వరిజ్ ఒపజెప్పారె. మూండ్రీ రోస్కాజ్ నాను మరజి నిక్వాన్లె.”

20 నస్తివలె జెబెదెయి మరిసిర్ అయ్సి వరి వెట యేసు డగ్రు వాతాదె ముణుకుజ్ ఊరిజి మాడిసి, “సాయం కిఅ”, ఇజి వెప్టాద్.

21 “నీను ఇనిక కొరిజిని?”, ఇజి వాండ్రు వెప్టాన్. అందెజె అది, “నీను రాజు వజి ఏలుబడి కినివెలె, యా నా రిఎర్మరిసిర్ ఒరెన్ నీ ఉణెర్ పడెకాదుని ఒరెన్ నీ డేబ్రు పడెకాదు బసి మండ్రెజ్ ఇజి నాను కొరిజిన్”, ఇజి వెప్టాద్.

22 యేసు, “నీను ఇనిక వెన్బాజినాదొ ఇజి నిజి తెలివీద్”, ఇజి వెప్టాండ్రె వరిజ్, “నాను ఉండెజ్మని గినాదిక ఉండెజ్మీరు అట్నిదెరా?”, ఇజి వెప్టాన్. వారు, “మాప్ ఉండెజ్ అట్వాప్”, ఇజి వెప్టార్.

23 యేసు వరిజ్, “తవ్విండ నాను ఉణి గినాదిక మీరు ఉణిదెర్, గాని నా ఉణెర్ పడెకాదుని డేబ్రు పడెకాదు బసి కిబిస్సిక నా కీదు సిల్లెద్, నా బుబ్బు కియుదాన్ ఎయేరిజ్ తయార్ కిత మనాండ్రొ వరిజ్ అక్కెజ్ దొహ్కె”, ఇజి వెప్టాన్.

24 మహి పది మస్సెర్ సిసూర్ వరి అయ్సి యేసుజ్ లొస్తి అయ మాట విహారె రిఎర్ ముస్కు కోపం ఆతార్.

25 యేసు వరిజ్ విజెరిజ్ కూక్టాండ్రె వరిజ్, “యూదురు ఆఇవరి రాజార్ వరి లోకుర్ ముస్కు అతికారమ్దాన్ మంజినార్. వరి పెరి అదికారిజు వరిజ్ మని అతికారమ్దాన్ లోకురిజ్ అణసు తిగిజినార్ ఇజి మీరు నెస్సిదెర్ గదె?”

26 గాని మీరు వారు లెకెండ్ మండ్రెజ్ ఆవెద్. గాని మీ లొఇ ఎయెర్బా పెరికాన్ ఆదెజ్ ఇహిజ, వాండ్రు మిజి పణిమన్ని ఆదెజ్వెలె.

27 మరి ఎయెన్బా విజేరె ముస్సు పెరికాన్ఆదెజ్ ఇజి కోరిజినికాన్, వాండ్రు మిజీ విజేరిజ్ వెటి పణికి వనిలెకెండ్ర ఆజి మండ్రెజ్.

28 ఎలాగ ఇహిజ లోకు మరిసి ఆతి నాను, విజేరె నజీ పణి కిపిర్ఇజి నాను రెవితా, గాని పణి కిదెజె వాత మన్న. మరి నండొండారిజ్ బత్కిస్తెజ్, వరిజ్ విడుఃదల కిదెజ్ వరి వందిజ్ నా పాణం సీదెజె నాను వాత మన”, ఇజి వెహ్లాన్.

గుడిఃదికార్ నుడఃజినార్

29 యేసుని వన్ని సిసూర్యెరికో పట్టుమ్దాన్సొన్ని మహిజ్, నండొ లోకుర్ వన్ని వెనుక సొహార్.

30 ఇదిలో సరిపడకాదు బస్తిమని రిఎర్ గుడ్డిదికార్, యేసు అయా సరిదాన్ సొన్నినాన్ ఇజి వెహరె, “ప్రబువా, దావీదు మరిసి, మా ముస్సు కనికారం తోరిన్అ”, ఇజి డేల్సి వెహ్లాన్.

31 లోకుర్ వరిజ్” వలక్ మండ్రు’ ఇజి గోల కిత్తార్. గాని వారు, “ప్రబువా, దావీదు మరిసి మా ముస్సు కనికారం ఆఅ”, ఇజి మరి ఒదె డేల్సి వెహ్లాన్.

32 యేసు నిహండ్రె వరిజ్ కూక్తాన్. “నాను మిజీ ఇనిక కిదెజ్ ఇజి మీరు కోరిజినిదెర్?”, ఇజి వరిజ్ వెన్బాతాన్.

33 “ప్రబువా మా కణ్ణు నూణి లెకెండ్రకిఅ”, ఇజి వారు వెహ్లాన్.

34 యేసు వరి ముస్సు కనికారం ఆతాండ్రె వరి కణకాజ్ ముట్టాన్. వెటనె వారు నుడఃదెజ్ అట్టారె వన్ని వెట సొహార్.

21

ఓసన్న

1-2 వారు యెరూసలేము అందిని ముంజాల, ఒలివ మరెక్ మని గోరోన్ ముస్సు మని బెత్సెగె ఇని నాటో వాతార్. వాతిజ్ యేసు వన్ని సిసూర్ రిపిరిజ్ కూక్తాండ్రె ఈహు వెహ్లాన్. “మీ ఎద్దు మని నాటో సొండ్రు. అందితిజ సరి, తొహ్తి మన్ని ఉండ్రె గాడఃదెజ్ని దనివెట మని గాడఃదె పిలాదిజ్బా మీరు నూణిదెర్. వనకాజ్ కుత్తి నా డగ్రు పేర్జి తగాట్.

3 ఎయెన్బా మిజీ ఇనికబా వెన్బాతిజ వన్కాజ్ ప్రబుజ్ కావాలి ఇజి వన్నిజ్ వెహ్లా. వెటనె వాండ్రు వనకాజ్ మీ వెట షొక్నార్.”

4-5 “ఇదిలోన్ గాడఃదె ముస్సు ఎక్సి, సార్లిదాన్ నీ రాజు వాజినాన్. గాడఃదె పిల్ల ఆతి ఇజిరి గాడఃదె ముస్సు ఎక్తాండ్రె, నీ డగ్రు వాజినాన్ ఇజి సీయోను గాల్పి* ఆతి దనిజ్ వెహ్లా”, ఇజి దేవుణు ప్రవక్తవెట† దేవుణు ముజాల వగ్గితి మాటెజ్ పూర్తి ఆదెజ్ యాకెజ్ జర్గితె.

6 యేసు వరిజ్ వెహ్తి వజనె సిసూర్ సొహారె కిత్తార్.

7 వారు గాడఃదెని దని పిలదిజ్ తత్తార్. వన్కాజ్ ముస్సు వరి సాల్వెజ్ పహ్తిజ్, యేసు దని ముస్సు బస్తాన్.

8 నండొండార్ వరి సాల్వెజ్ సరి అందు పహ్లాన్. మరి నండొండార్ మరెకాణి కొమెజ్ కత్తి సరి అందు పహ్లాన్.

* 21:4-5 21:4-5 యెరుసలేం పట్టుమ్దిజ్ సియోను పట్టుం ఇజిబా పేరు మహాద్ ఎందానిజ్ ఇహిజ అయ పట్టుం సియోను గోరోన్ ముస్సు తొహ్తి మహాద్. అమదెజె సియోను గాల్పి ఇజి వెహ్తివలె యెరుసలేం పట్టుమ్ది వరిజ్ గుర్తు కిజి వెహ్సిమహార్ వారు ఇహిజ ఇస్రాయేలు లోకుర్ గుర్తు. * 21:4-5 21:4-5 జేకరి 9:9.

9 మంద లోకుర్ వన్ని ముందాల సొన్ని మహికార్, వన్ని వెనుక వాజి మహికార్, “దావీదు మరిసిజ్ ఓసన్న[†]! ప్రబు సిత్ర్తి ఆతికారమ్దాన్ వాజినికాన్ పొగ్డె ఆనికాన్ పరలోకామ్దు దేవుణుదిజ్ ఓసన”, ఇజి వారు డేల్ని మహార్.

10 యేసు యెరూసలేం పట్టుమ్దు వాతిజ్, లోకుర్ విజెరె “వాండ్రు ఎయెన్?”, ఇజి బమ్మ ఆతారె ఒరెన్ మరి ఒరెన్ వెట వర్గిజి మహార్.

11 “వీండ్రు గలీలయదు మన్ని నజరేతు ఇని నాటోణి ప్రవక్త ఆతి యేసు”, ఇజి వన్ని వెట మహి అయ మంద లోకుర్ వెహ్హార్.

యేసు దేవుణు గుడిఁదు సొన్నినాన్.

12 యేసు దేవుణు గుడిఁ లోఇ సొహండ్రె, అబ్బె గుడిఁ అరబుదు మహి కొణి వరిజ్ పొర్ని వరిజ్ విజేరిజ్ వెల్లి పొక్తాన్. డబ్బు మారిసిని వరి బల్లెజ్ని పావుర పొటిజ పొర్నివరి పీటజ్ మహ్తా విసీర్తాన్.

13 వాండ్రు వరిజ్, “నా ఇలు పార్దనం కిని ఇలు ఇజి కూకె ఆనాద్లె,^{*} ఇజి దేవుణు మాటదు రాస్త మనాద్ గాని మీరు దనిజ్ డొజారిజ సాలం^{*} లెకెండ కితి మనిదెర్”, ఇజి వెహ్హాన్.

14 గుడ్డిదికార్, సొటాదికార్ దేవుణు గుడిఁదు వన్ని డగ్రు వాతిజ్ వాండ్రు వరిజ్ నెగెండ కితాన్.

15 గాని వాండ్రు కితి బమ్మాతి పణిజ సుడఁజి, దేవుణు గుడిఁ అరబుదు మని కొడొర్, “దావీదు మరిసిజ్ ఓసన్న”, ఇజి డేల్నినిక విహరె, పెరి పుజెరిబుని, యూదురి రూలుజ్ నెస్పిస్సికార్ నండొ కోపం ఆతార్.

16 వారు వన్నిజ్, “యా కొడొర్వెప్పినిక ఇనిక ఇజి నీను వెంజినిదా?”, ఇజి వెన్బాతార్. యేసు వరిజ్, “ఓ వెంజిన, కొడొర్ని ఇజిరి కొడొరి వెయుదాన్ నీను పొగ్డిఁజిని మాటజ్ తయార్ కితి మన్ని^{*} ఇజి దేవుణు మాటదు రాస్త మనిక మీరు ఎసెజ్బా సద్విఇతిదెరా?”, ఇజి వెహ్హాన్.

17 వాండ్రు వరిజ్డిఁసి పట్టుమ్దాన్ వెల్లి సొహండ్రె బెతానియ ఇని నాటో సొన్ని అయ రయ్తు అబ్బె మహాన్.

బొడెమరాన్ వప్పినాద్

18 పెందల వాండ్రు మర్జి పట్టుమ్దు సొన్ని మహిజ్ వన్నిజ్ బజ కట్టాద్.

19 సరి పడఁకాదు మని ఉండ్ర్రి బొడెమరాన్ సుడఁజి, మరాన్ డగ్రు వాతండ్రె సుడఁతిజ్ అకుజ్ తప్ప మరి ఇనికెజ్ తోర్ఉతె. వాండ్రు దనిజ్ సుడఁజి, “మరి ఎసెజ్బా నీను కాయెజ్ అన్ఇలె”, ఇజి వెహ్హాన్. వెటనె బొడెమరాన్ వహ్తా సొహాద్.

20 సిసూర్ అక్క సుడఁతారె బమ్మ ఆతారె, “నిస్సా బేగి బొడెమరాన్ ఎలాగ వహ్తా సొహాద్?”, ఇజి వారు వర్గితార్.

21 యేసు వరిజ్, “నాను మిజి నిజం వెప్పిన, మిజి నమకం మంజి, మీ లోఇ అనుమానం సిల్లెండ మహిజ, యా బొడెమరాన్దిజ్ కితికదె ఆఎండ, యా గొరోతిజ్ సుడఁజి”, నీను ఇబ్బెణిజ్ పెరె ఆజి సమ్దారమ్దు సొన్ని అరఅ^{*} ఇజి వెహ్హిజ అయవజనె జర్గినాద్లె.

† 21:9 21:9 అరామియ బాసాదు ఓసన్న ఇని మాటదిజ్ మజి ఎలు రక్కిన్అ ఇజి అర్దం మనాద్. గాని లోకుర్ పొగ్డిఁదిజ్ మరి ఎయెన్బా పెరికాన్ వానివలె వరిజ్ కూక్కి ఒనిలెకెండబా వెప్పిముహార్. * 21:13 21:13 యెనరు 56:7. * 21:13 21:13 యిర్మీయా 7:11. * 21:16 21:16 క్రిస్త 8:2.

22 మిజీ నమకం మహిజ మీరు పార్దనం కిజి ఇనిక లొస్సిదెరో, అయాక మిజీ దొహ్కాద్లె”, ఇజి వెహ్హాన్.

23 యేసు దేవుణు గుడిఁదు సొహొండ్రె గుడిఁ అరబుదు బోదకిజి మహివలె, పెరి పుజెరిజుని లోకుర్ పెద్దెల్జ వన్ని డగ్రు వాతారె, “ఇని అతికారమ్దాన్ నీను యా పణిజ్ కిజిని? ఎయెర్ నిజి యా అతికారం సిత మనార్?”, ఇజి వన్నిజ్ వన్బాతార్.

24 యేసు వరిజ్, “నానుబా మిజీ ఉండ్రె మాట వెన్బాన. అయాక మీరు నజీ వెహ్హిజ ఇని అతికారమ్దాన్ నాను యా పణిజ్ కిజిన ఇజి నానుబా మిజీ వెహ్హాన్.

25 బాప్తినం సీని యోహానుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజ లోకుర్ బాణిజ్నా?”, ఇజి యేసు వరిజ్ వెన్బాతాన్. “దేవుణుబాణిజ్ వాతాద్” ఇజి మాటు వెహ్హిజ, మరి ఎందానిజ్ మీరు వన్నిజ్ నమ్మిఇతిదెర్? ఇజి మజీ వెన్బానాన్.

26 గాని, యోహాను ఒరెన్ దేవుణు ప్రవక్త ఇజి లోకుర్ విజేరె నమిజినార్. అందెజె లోకుర్ బాణిజ్ వాతాద్” ఇజి వెహ్హాజ్ మజి తియెల్నె, ఇజి వరి లొఇ వారె వర్గితార్.

27 అందెజె వారు, “మజి తెలిఏద”, ఇజి యేసుజ్ మర్జి వెహ్హార్. నస్తివలె వాండ్రు, “ఇని అతికారమ్దాన్ యా పణిజ్ కిజిన ఇజి నానుబా మిజీ వెహ్హాన్”, ఇజి వరిజ్ వెహ్హాన్.

రిఎర్ మరిసిర్ కత

28 “దిన్నివందిజ్ మీరు ఇనిక ఒడఁబిజినిదెర్? ఒరెన్వన్నిజ్ రిఎర్ మరిసిర్ మహార్. వాండ్రు పెరివన్ని డగ్రు సొహొండ్రె, “మరిన్, నేండ్రు నీను ద్రాక్కు టోటాదు సొన్ని పణి కిఅ”, ఇజి వెహ్హాన్.

29 వాండ్రు, “నాను సొన్ఎ, ఇజి మర్జి వెహ్హాన్. గాని వెనుక మన్సు మారిస్తాండ్రె సొహ్హాన్.

30 నస్తివలె అప్పొసి, కొగ్రిమరిసి డగ్రు సొహొండ్రె అయా వజనె వెహ్హాన్. వాండ్రు, ఒబా, నాను సొన”, ఇజి వెహ్హాన్ గాని సొన్ఏతాన్.

31 “యా రిఎర్ మరిసిర్ లొఇ అప్పొసి వెహ్హి వజి కితికాన్ ఎయెన్?”, ఇజి యేసు వరిజ్ వెన్బాతాన్. వారు, “పెరికాండ్రె”, ఇజి వెహ్హార్. యేసు వరిజ్ “పన్ను పెర్నికారని సానిదికెజ్ మిజి ఇంక ముజాల దేవుణు కిని ఏలుబడిఁదు సొనారలె ఇజి నాను మిజీ నిజం వెహ్హాన్.

32 ఎందనిజ్ ఇహిజ యోహాను వాతాండ్రె, నీతి నిజాయిద్దాన్ బత్రిదెజ్ ఇజి మిజి సరి తోరిస్తాన్ గాని మీరు వన్నిజ్ నమిఇతిదెర్. పన్ను పెర్నికారని సానిదికెజ్ వన్నిజ్ నమ్మితార్. అయాకెజ్ సుడఁతిజ్బా మీరు మన్సు మరిసి మీరు కితి తపుజ్ ఒప్పకొడిఁజి డిఁసి సీజి వన్నిజ్ నమిఇతిదెర్”, ఇజి వెహ్హాన్.

పాలి సీతి టోట కత

33 “మరి ఉండ్రె కత విండ్రు. బూమి మనికాన్ ఒరెన్ ఉండ్రె ద్రాసటోట ఉణుస్తాన్. దని సుటులం కోట తొహ్హాన్. ద్రాక్కు పట్టు రసం లాగ్దెజ్ ఉండ్రె గానుగు తయార్ కిబిస్తాన్. కాప్కిదెజ్ ఉండ్రె ఎత్తుమని ఇలుబా తయార్ కితాన్. వెనుక అయ ద్రాక్కు టోట సెగొండార్ రయ్తురిజ్ పాలిదిజ్ సితాండ్రె పయనం కిజి మరి ఉండ్రె దేసెం సొహ్హాన్.

34 పట్టు పండ్లి కాలమ్దు వన్ని వంతుజ్ లొస్తాజ్ ఇజి వన్ని పణి మన్నిరిజ్ పాలి అస్తి మని వరి డగ్రు పొక్తాన్.

35 పాలి అస్తిమనికార్ వన్ని పణి మన్నిరిజ్ అస్తారె ఒరెన్ వన్నిజ్ డెయ్తార్, ఒరెన్ వన్నిజ్ సప్తార్, మరి ఒరెన్ వన్నిజ్ పణికాణిజ్ డెయ్తార్.

36 మరి, వాండ్రు ముజాల పోక్తివరిజ్ ఇంక నండొండార్ పణిమన్నిరిజ్ పోక్తాన్. వరిజ్బా పాలి అస్తిమనికార్ అయావజనె కితార్.

37 “నా మరినిజ్ పోక్తిజ వన్నిజ్ వారు గవరం సీనార్లె”, ఇజి వెహ్తాండ్రె కడెవెరిదు వన్ని మరిసిజ్ వరి డగ్రు పోక్తాన్.

38-39 గాని పాలి అస్తిమనికార్ మరిసిజ్ సుడెతారె, “వీండ్రు యా తోటాదిజ్ అకు మనికాన్, రదు, మాటు వినిజ్సప్పి యా టోట మా సొంతదిక కినాట్”, ఇజి వన్నిజ్ అసి ద్రాక్కు తోటదిజ్ వెల్లి విసిరీతారె వన్నిజ్ సప్తార్.

40 అందెజె అయా ద్రాస టోట ఎజుమాని వానివలె అయ పాలి అస్తిమనివరిజ్ ఇనిక కినాన్? ఇజి వెన్బతాన్.

41 “అయా సెఇవరిజ్ నండొ కటినమతి సావుదాన్ సప్పాన్. మరి పట్టు పండ్లి కాలమ్దు వన్నిజ్ సరియాతి వందుజ్ సీని రెయ్దురిజ్ ద్రాస టోట పాలిదిజ్ సీనాన్”, ఇజి వారు వెహ్తార్.

42 యేసు వరిజ్, “ ఇలు తొప్పికార్ నెక్తి పోక్తి పణుకునె, మూలాదిజ్ బుర్ర పణకు ఆత మనాద్. యాక దేవుణు కీదాన్ జర్గితిక. యాక మా కణకెజ బమ్మాతిక’, ఇజి దేవుణు మాటదు రాస్తి మనిక మీరు ఎసెజ్బా నద్విఇతిదెరా?”.

43 అందెజె దేవుణు ఏలుబడిః కినిక మీ నడిఃమిహన్ లాగ్గి దనిజ్ తగితి పట్టు సీని వరిజ్ సీనాన్”, ఇజి నాను మిజి వెహ్సాన.

44 ఎయెన్బా యా పణుకు ముస్కు అర్తిజ వాండ్రు ముకెజ్ ఆనాన్. యా పణుకు ఎయెన్ ముస్కు అర్నాదొ వాండ్రు గుండ ఆనాన్”, ఇజి యేసు కత వెప్పి వీజితాన్.

45 యేసు వెప్తి కతెజ్ విహారె పెరి పుజెరిజుని పరిసయరు, వరి వందిజె వాండ్రు వెప్పి మనాన్ ఇజి అర్లం కితార్.

46 వారు వన్నిజ్ కయ్దు కిడెజ్ ఉండ్రె ఉపాయ్ సుడెతారె గాని లోకుర్ విజేరె వన్నిజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలాతార్.

22

పెండ్లివిందు

1 యేసు మరి కతవజ వరిజ్ వెహ్సాన్

2 “దేవుణు కిని ఏలుబడిః ఇహిజ వన్ని మరిసి పెండ్లిదిజ్ విందు తయార్ కితిమని ఒరెన్ రాజుజ్ పోలిత మనాద్.

3 పెండ్లి విందుదిజ్ రదు ఇజి ముజాల వెప్తి మహివరిజ్ కూక్కి తగాట్ ఇజి వాండ్రు వన్ని పణిమన్నిరిజ్ వరి డగ్రు పోక్తాన్. గాని వాడెజ్ ఒవ్వితార్.

4 నన్తివలె వాండ్రు మరి సెగొండార్ పణిమన్నిరిజ్బా పోక్తాండ్రె, “పెండ్లి విందుదిజ్ రదు”, ఇజి ముజాల వెప్తిమహివరిజ్, “నాను కోడ్డిజ్, బలన్తి పడెజ్ ఒహ్పిసి విజు తయార్ కిత మన. పెండ్లి విందుదిజ్ మీరు రదు ఇజి వరిజ్ వెహ్సాన్”, ఇజి వరిజ్ వెహ్సాన్.

5 వారు పణిమన్నిర్ వెప్తి మాటదిజ్ కండెక్బా లస్యం కివిండ, ఒరెన్ వన్ని మడిఃజ సాహాన్ మరి ఒరెన్ వన్ని బేరమ్దిజ్ సాహాన్.

6 మహికార్ వన్ని పణిమన్నిరిజ్ అస్తారె మర్యాద లాగ్గి సప్తార్.

7 అయి రాజు నండొ కోపం ఆతాండ్రె వన్ని సయనమ్దిజ్ పోక్కి వన్ని పణి మన్నిరిజ్ నస్తివరిజ్ కతిస్తాండ్రె, వరి పట్టమ్దిజ్ సిసుదాన్ ముటిస్తాన్.

8 వెనుక వాండ్రు పెండ్లి విందు తయార్ అత మనాద్, వన్ని పణి మన్నిరిజ్, “గాని ముజాల పెండ్లి విందుదిజ్ కూకెతి మహికార్ విందుదిజ్ వాదెజ్ తగ్గికార్ ఆవర్.

9 మీరు రస్స సహ్కాజ్ సొన్ని మిజి తోరినివరిజ్ విజేరిజ్” విందుదిజ్ రదు’ ఇజి కూక్తు”, ఇజి వెహ్హాన్.

10 అయి పణిమన్నిరి రస్స సహ్కాజ్ సాహారె వరిజ్ తోరితి నెగ్గివరిజ్, సెఇవరిజ్ కుడుప్పి, వరిజ్ తత్తెజ్ అట్టివరిజ్ విజేరిజ్ తత్తార్. పెండ్లి విందు సమ్డ నిండ్రితాద్.

11 నస్తివలె పెండ్లి విందుదిజ్ వాతివరిజ్ సుడెదెజ్ రాజు వాతాన్. పెండ్లిసొక్క తోడుగివిండ పెండ్లి విందుదిజ్ అబ్బె బస్తిమని ఒరెన్ వన్నిజ్ సుడెతాన్.

12 రాజు వన్నిజ్, “ఓ, కూలాయెన్, పెండ్లిసొక్క తోడుగివిండ నీను ఎలాగ లొఇ వాతి?”, ఇజివెన్బాతాన్. వాండ్రు వర్గివిండ అలేత మహాన్.

13 నస్తివలె రాజు, “వినిజ్ కిక్కుకాల్కు తొప్పి వెల్లి దూరమ మన్ని సీకటి బాడిడు విసీర్దు. అబ్బె వాండ్రు ఎలాకాలం అడెబాజి, పల్కు కొహ్కొక్కిక మంజినాన్”, ఇజి వన్ని పణి మన్నిరిజ్ వెహ్హాన్.

14 “కూకె అతికార్ నండొండార్ గాని, ఎరై అతికార్ కొండొరె.”

కయిసరిజ్ పను సీని వందిజ్

15 నస్తివలె పరిసయరు వెల్లి సొన్ని వాండ్రువర్గిని మాటదాన్ యేసుజ్ తప్ప అస్తెజ్ ఇజి కుట్ర ఆజి మహార్.

16 వారు వరి సిసూరిజ్, హేరోదియరు* జటుదివరివెట యేసు డగ్రు పోక్తార్. వారు సొన్ని, “బోద కినికి, నీను, మన్ను కద్దివిండ దేవుణు సరివందిజ్ నిజమ్దాన్ బోదిసిని నెగ్గికి ఇజి మాపు నెస్నాప్. నీను లోకురి ఎలాగ మర్తికార్ ఇజి మొకొం సుడెజి వరిజ్ సర్ల కిబిస్తెజ్ ఇజి వర్గినికి ఆఇ.

17 అహిజ కయ్సరుజ్ పను సీనిక నాయమా? నీను ఇనిక ఒడెబిజిని? మజి వెహ్హా”, ఇజి వన్నిజ్ వెహ్హార్.

18 యేసు వరి సెఇ బుద్దిదిజ్ నెస్తాండ్రె, “వేసం కినికిదేరా! ఎందనిజ్ నాను వహ్హి మాటదాన్ సజి అస్తెజ్ సుడెజినిదెరె?

19 పన్ను సీని ఉండ్రీ కాసు సజి తోరిస్తు”, వారు ఉండ్రీ దినారం వన్ని డగ్రు తత్తార్.

20 “దిని మున్ను మని బొమ్మ ఎయెర్ది? రాస్తిమని రాంత ఎయెర్ది?”, ఇజి వాండ్రు వరిజ్, వెన్బాతాన్.

21 వారు, “కయిసరుది”, ఇజి వెహ్హార్. నస్తివలె వాండ్రు, “కయిసరుది కయ్సరుజ్ సీదు, దేవుణుది దేవుణుదిజ్ సీదు”, ఇజి వరిజ్ వెహ్హాన్.

22 యా మాట వెంజి బమ్మ ఆతారె వారు వన్నిజ్ డెస్త సాహార్.

23 సాతికార్ మర్జి నిజ్నిక సిల్లెద్ ఇజి సదుకయరు వెహ్హినార్. వారు అయా రోజుదునె వన్నిడగ్రు వాజి ఈహు వెన్బాతార్.

24 “బోదకినికి, ఒరెన్ కొడొరె సిల్లెండ సాతిజి వన్ని తంబెరి సాతివన్ని ఆల్పిజ్ పెండ్లి ఆజి సాతివన్ని వందిజ్ కొడొరె పుటిస్తెజ్ వలె ఇజి మోసె రాస్తి సీతి రూలుదు మనాద్.

* 22:16 22:16 హేరోదియరు జటుదికార్ రోమదికార్ యూదురు మున్ను కిని ఏలుబడిదిజ్ ఇస్టం కిత్తి యూదురు ఆతికార్. పరిసయరిజ్ని హేరోదియరిజ్ ఇని పొత్తు సిల్లెద్. గాని లోకుర్ యెసుప్రబుజ్ ఇష్టమానిదన్నిజ్ తియెలాజి మహార్.

25 మా నడిమి ఏడు గురు తంబేర్లు మహా. పెరికాన్పెండ్లి ఆతాండ్రె సాతాన్. వన్నిజ్ కొడొరి సిల్లెర్ కక వన్ని తంబెరి సాతివన్ని ఆల్నిజ్ ఇడె ఆతాన్.

26 నడిమి వాండ్రుని కొగ్రి నడిమి, అయా లెకెండెన్ వీన్కొడొడాక విజేరె దనిజ్పెండ్లి ఆజి సాతార్.

27 కడెవేరిదు అయా బోదెల్బా సాతాద్.

28 అహిజ సాతి వరిబాణిజ్ మర్జి నిజ్ని వెలె యా ఏడుగురు లొఇ ఎయెరిజ్ అది ఆల్ని ఆనాద్లె? ఇనిక ఇహిజ బత్తిజిమహివలె అది ఏడుగురుదిజ్బా ఆల్ని ఆత మహాద్ గదె?", ఇజి వెన్బాతార్.

29 యేసు వరిజ్, "దేవుణు మాట ఇజి, మీరు నెన్ఇదెర్ దేవుణు సత్తు ఎస్సా ఇజి మీరు నెన్ఇదెర్ అందెజె అర్థం కివండ మీరు నండొ తప్పుమాటెజ్ వెప్పినిదెర్.

30 ఎందనిజ్ ఇహిజ, సాతి విరబాణిజ్ మర్జి నిజ్ని వెలె ఎయెర్బా పెండ్లి ఆవిర్, పెండ్లిదిజ్ సివిర్. వారు పరలోకామ్ది దేవుణుదూతెజ్ లెకెండె మంజినార్.

31-32 సాతికార్ మర్జి నిజ్ని వందిజ్ దేవుణు మిజి వెప్పా మనిక మీరు ఎస్జిబా సద్విజితిదెరా? నాను అబ్రాహము దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవిన్, బత్తిజిని వరి దేవుణునె"*, ఇజి వెప్టాన్.

33 అయ మాట విహారె వన్ని బోద వందిజ్ లోకుర్ బమ్మ ఆతార్.

పెరి ఆడ్ర

34 యేసు సదుకయరు వెయ్కు మూక్తాన్ ఇజి విహారె పరిసయరు కూడెజి వాతార్.

35-36 వరి లొఇ ఒరిన్ దేవుణు రూలుజ్ నెగెండె నెస్కాన్, "ఓ బోదకినికి దేవుణు సతి ఆడ్రెజి లొఇ పెరి ఆడ్ర ఇనిక?", ఇజి వన్నిజ్ పరిక్కు కిదెజ్ వెన్బాతాన్.

37 యేసు వన్నిజ్, "నీ పూర్తి మన్నుదాన్, నీ పూర్తి ఆత్మదాన్, నీ పూర్తి పాణిమ్దాన్ నీ ప్రబు ఆతి దేవుణుదిజ్ ప్రేమిస్తెజ్.*

38 యాకాదె గొప్ప ముక్కెలమతికని, మరి మొదోహి ఆడ్ర.

39 రుండి ఆడ్ర ఇనిక ఇహిజ, "నీను నిజి ప్రేమిన్ని లెకెండె మహి వరిజ్బా ప్రేమిన్అ.*

40 దేవుణు సతి రూలుజ్ని ప్రవక్తరు వర్గితి మాటెజి పునాది ఆతిక యా రుండి ఆడ్రెజ్", ఇజి వరిజ్ వెప్టాన్.

41-42 పరిసయరు కూడితి మనివెలె యేసు వరిజ్ సుడెజి, క్రిస్తు వందిజ్ మీరు ఇనిక ఒడెబిజినిదెర్? వాండ్రు ఎయెర్ది కుటుమ్దికాన్ ఆనాన్? ఇజి వెన్బాతాన్. "వాండ్రు దావీదు రాజు తెగ్గదికాండ్రె", ఇజి వారు వెప్టాన్.

43-44 అయాలెకెండె మహిజ మీరు నిజం వెప్పినిదెర్. "నాను నీ పగాతి వరిజ్ నీ పాదమ్క అడిగి ఇడ్విదాక నీను నా ఉణెర్ పడెకాదు బసి మన్అ. ఇజి ప్రబు నా ప్రబు వెట వెప్టాన్.* యా లెకెండె దేవుణు ఆత్మదాన్ దావీదు వర్గితివలె వన్నిజ్ ఎలాగ ప్రబు ఇజి కూక్కినాన్?

45 దావీదు వన్నిజ్ ప్రబు ఇజి కూక్కిజ్, వాండ్రు ఎలాగ వన్ని మరిసి ఆనాన్?", ఇజి వాండ్రు వరిజ్ వెన్బాతాన్.

46 ఎయెర్బా మర్జి ఉండ్రె మాటబా వెప్టాజ్ అట్వితార్. అయా రోజుదాన్ వన్నిజ్ ఇనికబా వెన్బాదెజ్ ఎయెరిజ్బా దయరం సాల్వితాద్.

* 22:31-32 22:31-32 నిర్గమ 3:6. * 22:37 22:37 ద్వితీ 6:5. * 22:39 22:39 లేవి 19:18.

* 22:43-44 22:43-44 కీర్తన 110:1.

23

ఏడు కష్టమకు

1 నన్నీవలె యేసు లోకురిజ్‌ని వన్ని సినూర్‌జ ఈహు వెహ్లాన్.

2 యూదురి రూలుజ్ నెస్పిస్పికార్‌ని పరిసెయరుజ్, ముందాల మోసెజ్ మహి లెకెండ అతికారమదాన్ దేవుణు సితీ రూలుజ్ నెస్పిస్సెజ్ అక్కు మనికార్.

3 అందెజె వారు మిజి వెహ్పి విజు వనకాజ్ లోజిజి అయాలెకెండ కిదెజ్‌వెలె. గాని పరి పణిజ సుడెజి, పరి లెకెండ కిమాట్. ఎందనిజ్ ఇహిజ వారు వెహ్పర్ గాని అయ లెకెండ కివర్.

4 లోకుర్ గుజమదు పిండెదెజ్ అట్‌ఇ నని బరుజ్ తోహ్పి ఇడ్పి లెకెండ మని పెరి పణిజ్ కిదెజ్ ఇజి బలవంతం కినార్ గాని ఉండ్రీ డెస్కుడాన్ కద్దిస్సెజ్ అట్పి సుల్‌కాని బరు లెకెండమన్ని ఇజిరి సాయమ్‌బా వారు కివర్.

5 లోకుర్‌నూణి వందిజె వారు విజు పణిజ్ కిజినార్. దేవుణు మాటెజ్‌రాస్తి ఇట్టి ఇజిరి పెట్టెదిజ్* పెరిక కిజినార్. మరి పరి సొకెజాణి† అన్నుజ్ పెరికెజ్ కిజినార్.

6 విందుదు వారు ముకెలమాతి బాడిజ్ క్కోరిజినార్. యూదురు మీటిజ్ కిని ఇల్కాజ్ బస్సెజ్ ఇజి వారు ముకెలమాతి బాడిజ్ క్కోరిజినార్.

7 నతెజ నడిమి వారు లోకుర్ వెట మాడిసె ఆదెజ్, బోదకినికార్ ఇజి కూకె ఆదెజ్ క్కోరిజినార్.

8 గాని మీరు ఇహిజ, 'బోదకినికి' ఇజి కూకె ఆమాట్. ఎందనిజ్ ఇహిజ దేవుణు ఒరేండ్రె మి బోదకినికాన్ మీరు విజిదెరి అన్నతంబోర్‌జు.

9 బూమి ముస్కు ఎయెరిజ్‌బా బుబ్బు ఇజి పేరు ఇడెమాట్. దేవుణు ఒరేండ్రె మీ బుబ్బు. వాండ్రు పరలోకామదు మనాన్.

10 మీరు ఎయిదెర్‌బా నెస్పిస్పికి ఇజి కూకె ఆమాట్. ఎందనిజ్ ఇహిజ క్క్రీస్తు ఒరేండ్రె మిజినెస్పిస్పికాన్.

11 మీ లోఇ విజేరిజ్ ఇంక పెరికాన్, విజేరిజ్ పణిమన్ని ఆదెజ్‌వెలె.

12 ఎయెర్‌బా వన్నిజ్ వాండ్రె పెరికాన్ కితిజ వాండ్రు ఇజిరికాన్ ఆనాన్. ఎయెన్‌బా వన్నిజ్ వాండ్రె తగి ఆతి మహిజ వాండ్రు పెరికాన్ ఆనాన్.

13 వేసం కినికిదెరాతి పరిసయరుజ్‌ని ఊదురు రూలుజ్ నెస్పిసినికిదెరా! అబయా, మిజి ఎసోనో కష్టమకు వానె. ఎందనిజ్‌ఇహిజ లోకుర్ దేవుణు ఏలుబడిదు సాన్‌ఎండ పరి ఎద్దు సేహ్లాజ్ కెహ్పి పొక్కినిదెర్. మీరి సాన్‌ఇతిదెర్. సాండ్రెజ్ సుడెజి మహి పరిజ్ సరి సిఇతిదెర్.

14 వేసం కినికిదెరాతి పరిసయరుజ్‌ని యూదురు రూలుజ్ నెస్పిసినికిదెరా, అబయా, మిజి ఎసోనో కష్టమకు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెర్ మీరు ఎలాగమర్దికార్ ఇజి నస్సెజ్ ఆవద్ ఇజి మీరు

* **23:5 23:5** యా ఇజిరి పెట్టెజ్ తొలుదాన్ తయార్ కితిక్కెజ్ దన్ని లోఇ వడాయా ఒప్పుమానముదు మన్ని నగం మాటిజ్ రాసి ఇడ్పి మంజినార్. నిర్లమ 13:1-10, 13:11-16. ద్విత్తి 6:4-9, 11:13-21. దేవుణు మాటదు రాస్తి మన్నికెజ్ ద్విత్తి 6:8, 11:18. యా లెకెండ లోజిజి మంజినావ్ ఇజి తోరిస్సెజ్ 12 వయుస్సు డాట్టి మొగ్గకొడోర్ యాపెటి ఉండ్రీ పరి నొద్దుదుని మరి ఉండ్రీ వెటి డేబ్బ కియుదుబా తోహా ఆజి మహార్. ముకెలం పార్దనం కినివలె ఆహె కిజి మహార్. † **23:5 23:5** యూదురు అతికార్ దేవుణు పణికినికార్ ఇజి తోరిఆదెజ్, మరి దేవుణు సితీ ఆడ్రెజ్ ఎత్తు కిదిస్పిలెకెండ ఉండ్రీ నీలి రంగు సొల్కా నన్నిక పొర్నాజి మహార్. యాక పొర్నాదెజ్ ఇజి పరిజ్ ఆడ్రె సిత్ర మహాన్ సంక్య 15:37-41, ద్విత్తి 22:12. గాని యూదురిజ్ రూలుజ్ నెస్పిసినికార్‌ని పరిసయరుజ్ వారు గొప్పు నెగెండ దేవుణుదిజ్ లోజిజినికార్ ఇజి తోరిస్సెజ్ అక్కెజ్ గొప్పు పెరిక పొర్నాజి మహార్.

లోకుర్ ఎద్దు లావ్ నీరిండ్ మన్ని పార్దనం కిజినిదెర్. దన్నివందిజ్ మిజి పెరి సిక్కు వానాద్దె.

15 వేసం కినికిదెరాతి పరిసయ్యరుజ్ని యూదురి రూలుజ్ నెస్పిసినికిదెరా, అబయా! మిజి ఎస్సానొ కస్టమ్కు వానె. ఒరెన్ వన్నిజ్ మీవెట కుడుఃపైజ్ మీరు సమ్దరం డాట్టి బూమి విజు బూలాజినిదెర్. ఒరెన్ మీ వెట కూడిఃతిజ, వన్నిజ్ ఎల్లకాలం సిను మంజిని బాడిఃదు సొండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెర్.

16 యూదురు రూలుజ్ నెస్పిసికిదెర్ ఆతి మీరు లోకురిజ్ నెగ్గిసరి తోరిస్తెజ్ మన్నికిదెర్, గాని మీరు మహివరిజ్ సరి తోరిసిని గుడ్డిదికార్ లెకెండ్ మన్నిదెర్ అబయా! మిజి ఎస్సానొ కస్టమ్కు వానె. ఒరెన్ దేవుణు గుడిః తోడుః ఇజి పర్వణం కితిజ, అయ పర్వణమ్దాన్ వాండ్రు తప్రె ఆదెజ్ ఆనాద్. గాని దేవుణు గుడిః లొఇ మని బజారం తోడుః ఇజి ప్రమాణం కితిజ వాండ్రు అయ ఒప్పుమానమ్దాన్ తప్రె ఆదెజ్ అట్వన్ ఇజి మీరు నెస్పిసినిదెర్.

17 గుడ్డియాతి బుద్ధి సిలికిదెరా! ఎమేణిక పెరిక? దేవుణు గుడిఃదు మని బజారమ్నా, సిలిజ బజారమ్దిజ్ దేవుణు వందిజ్ కేట కిత్తక ఇజి కిజిని దేవుణుగుడిఃనా?

18 మరి ఎయెన్బా సంద సుర్పి మాలి పీట తోడుః ఇజి ప్రమాణం కితిజ, వాండ్రు అయ ప్రమాణమ్దాన్ తప్రె ఆదెజ్ అట్నాన్. గాని దని ముస్కు మని పూజ సితి వనకాజ్ తోడు అసి ప్రమాణం కితిజ వాండ్రు అయ ప్రమాణమ్దాన్ తప్రె ఆదెజ్ అట్వన్ ఇజి మీరు నెస్పిసినిదెర్.

19 యూదురు రూలుజ్ నెస్పిసిని గుడ్డిదికార్ లెకెండ్ మన్నికిదెరా! ఎమేణిక పెరిక? పూజ సితికాదా? సిల్లిజ పూజ సితిదన్నిజ్ దేవుణు వందిజ్ కేట కిత్తిలెకెండ్ కిజిని సంత సుర్పి మాలి పీటనా?

20 అందెజె సంత సుర్పి మాలి పీట తోడుః అసి ప్రమాణం కినికాన్ సంద సుర్పి మాలి పీటదిజ్ మరి దని ముస్కు మన్ని విజు వనకాజ్ తోడు అసి ప్రమాణం కిజినాన్.

21 మరి దేవుణు గుడిః తోడు అసి ప్రమాణం కినికాన్, దేవుణు గుడిఃదిజ్ని దని లొఇ మంజిని విజు వనకాజ్ని బాన్మంజిని దేవుణుదిజ్ తోడు అసి ప్రమాణం కిజినాన్.

22 పరలోకం తోడు ఇజి ప్రమాణం కినికాన్, దేవుణు బన్ని సింహాసనమ్దిజ్ని దని ముస్కు బసి మంజిని దేవుణుదిజ్బా తోడు అసి ప్రమాణం కిజినాన్.

23 వేసం కినికిదెరాతి పరిసయ్యరుజ్ని యూదురి రూలుజ్ నెస్పిస్పికిదెరా, అబయా మిజి ఎస్సానొ కస్టమ్కు వానె. మీరు పొదిన కుసాదాన్, సొప్పుదాన్, జిలకారదాన్ః దేవుణుదిజ్ దనమ్బాగంః సీజినిదెర్. గాని నాయం, కనికారం, దేవుణు ముస్కు మని నమకం నన్ని దేవుణు సిత్తి రూలుదుమన్ని ముకెలమతి మాటెజ్ మీరు నెక్కి పొక్కినిదెర్. రుండిబా ఉండ్రె లెకెండ్ కిజి మంజినిక ఇహిజ ఒదె నెగెండ్ మహాద్ మరి.

24 సరి తోరిస్సి గుడ్డిదికిదెరా! ఉణిదని లొఇ డోమెజ్ అర్తి మహిజ మీరు జాలిస్సిదెర్. గాని ఒంటె ననికెజ్ అర్తిజ అక్కు నెస్తెజ్ సిల్లెద్ ఇజి అయాలెకండ్నె డిఃజ్నికిదెర్ మీరి.

‡ 23:23 23:23 పొదిన, సొప్పు, జిలకార ఇక్కెజ్ విజు కరిదికెజ్ అఉ ఇక్కు తిండిదిజ్ రుసి కూడుఃజ్ ఇజి వంట కినివలె కలప్పికెజ్. § 23:23 23:23 అబ్రహామునె తొలిత దనమ్బాగం సిత్తిలెకెండ్ వడాఃయ ఒప్పుమానమ్దు రాస్త మనాద్. ఆది 14:20. వెనుక ఇస్రాయలు లోకుర్ వరిజ్ దొహ్పాక్కి వనక లొఇ దనంబాగం సిదెజ్ ఇజి దేవుణు ఆడ్ర సిత్తాన్. దనంబాగం ఇహిజ వది లొఇ ఉండ్రె.

25 వేసం కిజినిదెర్ ఆతి, యూదురి రూలుజ్ నెస్పిస్సికిదెరా, పరిసయెరుజాండె, లోకుర్ మున్సుహాన్ మిడిఃస్తి ఇడ్మిగిన్నెజ్ని కుడుకెజ్ లెకెండ్ మన్నికిదెర్. మీరు మీరుబా వెల్లిహాన్ సుడిఃతిజ నెగ్గివరిలెకెండ్ తోరె ఆజినిదెర్. గాని మీ మన్ను నిండ్రు సెజ బుద్దిజ్ని సెజఉదెసమ్కు, మరి నాను గణస్తికెజ్ విజు నజినె ఇజి ఒడఃబిని వరిలెకెండ్నె.

26 గుడ్డి ఆతి పరిసయ వాండ్రు ముజాల మీరు మన్ను నెగ్గెండ్ కిదు, అయావెలె మీరు లోఇని వెల్లి మిడిస్తి మని కుడుకెజ్ని గినెజ్లెకెండ్ ఆనిదెర్.

27 వేసం కినికిదెరాతి, యూదురి రూలుజ్ నెస్పిస్సికిదెరా, పరిసయెరుజాండె, వెల్లిదాన్ సుడిఃతిజ మీరు గొప్పు సోకుమని సున్నం డెయ్తి మని దూకి ననికిదెర్! దూకి లోఇ సాతి వరి డుమ్ము మరి విజు సెజకెజ్ మన్నిలెకెండ్ మీరుబా మన్నిదెర్.

28 అయా లెకెండ్నె మీరు వెల్లి సుడిఃతిజ నాయం మనికిదెర్ ఇజి తోరె ఆజి నిదెర్. గాని లోఇ మీరు బక్తి మనికాప్ ఇజి పొజిజి నికిదెర్, సెజ బుద్దిదాన్ నిండ్రెతి మన్నికిదెర్.

29 వేసం కినికిదెరాతి యూదురి రూలుజ్ నెస్పిస్సికిదెరా, పరిసయెరుజాండె, మిజి ఎసానొ కస్టమ్కు వానె. మీరు దేవుణు ప్రవక్తరు దూకిజ మున్సు సమాది తొప్పి, నీతినిజాయి మన్ని వరి సమాది మున్సు సోకు కిజినిదెర్.

30 అనిగొగొర్ కాలమ్దు మాపు మంజినిక ఇహిజ, వారు దేవుణు ప్రవక్తరిజ్ సప్తి మహివలె వరివెట మాపు కూడఃఎతాప్ మరి ఇజి మీరు వెప్పి మంజినిదెర్.

31 అందెజె దేవుణు ప్రవక్తరిజ్ సప్తి మహి వరి మరిసీర్ ఇజి మీ మాటదానె మిజి మీరె సాసెం వెహె ఆజినిదెర్.

32 అందెజె మీ అనిగొగొర్ కితి పాపమ్దు తకు మనిక మీరు పూర్తి కిదు.

33 సరాస్ ననికిదెరా! సరాస్సు కొడొఃనని మీరు ఎలాగ ఎలాకాలం సిను మంజిని బాడ్డిదాన్ తప్తె ఆనిదెర్.

34 అందెజె నాను, ప్రవక్తరుజ్ని బుద్దిమని వరిజ్, బోద కిని వరిజ్ మీ నడిఃమి పొక్కిన. నెగొండారిజ్ మీరు సప్పిదెర్, మరి నెగొండారిజ్ మీరు సిలువ పొక్కిదెర్, మరి నెగొండారిజ్ యూదురు మీటిజ్ కిని ఇల్కాణిజ్ కొండెజిణిజ్ డెయ్జి ఉండ్రె పట్టుమ్దాన్ మరి ఉండ్రె పట్టుమ్దు ఉల్ప్పిదెర్.

35 నీతి నిజాయి మనికాన్ ఆతి ఏబెలు నలదాన్ మొదోల్సి, దేవుణు గుడిఃదిజ్ని సంత సుర్ని మాలి పీటదిజ్ నడిఃమి మీరు సప్తి మహి బెరాకియ మరిసి ఆతి జెకరియదాక, నీతి నిజాయి మన్నికారాతి విజేరిజ్ సప్పివరి నల బూమి కారిస్తి మన్ని వందిజ్ సిక్కు మీ మున్సునె వానెలె.

36 యా సిక్సెజ్ విజు యా తరమ్ది వరి మున్సునె వానె ఇజి నాను మిజి నిజం వెప్పిన్.

37 ఓ యెరూసలేమా, యెరూసలేమా నీను ప్రవక్తరుజ్ సప్పికి, నీ డగ్రు పొక్తివరిజ్ పణకాణిజ్ డెయ్నికి, ఉండ్రె కొరు దని పిలెకాజ్ కుడుఃప్పి దని రెకెజ అడ్డి ఇడ్మి లెకెండ్, నీ కొడొఃరిజ్ కుడుఃప్తెజ్ ఇజి నాను ఎసాడు సుట్కునో ఆస్స ఆత మన్ను, గాని నిజి ఇస్టం సిల్లెండ మహాద్.

38 ఇదిలో దేవుణు వన్నిగుడిః డిసి సినాన్లె, అందెజె అక్క కాలి మంజినాద్.

39 ప్రబు సిత్తి అతికారమ్దాన్ ఆనికాన్”* ఇజి నీను వెప్పిదాక నజి నీను మరి సుడిఃఇ, ఇజి నాను నిజి నిజం వెప్పిన్.”

* 23:39 23:39 క్రిస్టన 118:26.

24

తరమదిజ్ ఆక్కర్దిజ్ గుర్తు.

1-2 యేసు దేవుణు గుడిఃదాన్ సోతాండ్రై దూరం సొన్ని మహిజ్, సిసూర్ వన్ని డగ్రు వాతారె, దేవుణు గుడిః వందిజ్ కూక్కు.సాప్పి గొప్పుజ వర్గిజి మహార్. వాండ్రు వరిజ్, “మీరు యాకెజ్ విజు సుడఃతిదెర్. గాని ఇక్క ఉండ్రీ పణకు మున్సు. మరి ఉండ్రీ పణకు నిల్పి మన్వండ ఆహె ఆనాద్లె, ఇజి నాను మిజీ నిజం వెహ్సిన”, ఇజి వెహ్సన్.

3 యేసు ఒలివ మరెక్ మని గొరొన్మున్సు బస్తి మహివలె, మరి ఎయెర్ డగ్రుసిల్లెండ మహివలె, సిసూర్ వన్ని డగ్రు వాతారె, “యాకెజ్ ఎనెజ్ జర్గినె? నీను మరజ్ వానిదనిజ్, మరి యా తరమదిజ్ ఆకర్దిజ్ గుర్తుజ్ ఇనికెజ్? మజి వెహెఅ”, ఇజి వెన్బాతార్.

4 యేసు వరిజ్ ఈహు వెహ్సన్. “ఎయెన్బా నిజి మోసం కివండ జాగర్త సుడఃజి మండ్రు.

5 ఎందానిజ్ ఇహిజ నండొండార్ వాజి, నా పేరు ఇడః ఆజి, “నానె క్రిస్తు’ ఇజి వెహ్సా నండొండార్దిజ్ మొసం క్సినార్.

6 మీరు విదెమ్కు వందిజ్ వెనిదెర్లె. మరి విదెమ్కు వానెలె ఇజి సాటిస్సికబా వినిదెర్లె. అయావలె తియెల్ ఆవండ మండ్రు. యాకెజ్ విజు జర్గిదెజ్వెలె. గాని యాక ఆక్కర్ ఆవద్.

7 లోకుర్ మున్సు లోకుర్ని దేసెమ్కాజ్ మున్సు దేసెమ్కు పగ ఆజి మంజినె. అబ్బె ఇబ్బె నండొ నాహ్కాజ్ కరు, బూమి కద్గినికెజ్ వానెలె.

8 యాకెజ్ విజు ఉండ్రీ బోదెలి కీదు అస్తాజ్ ముజాల వాని నొప్పి మొదోల్సి లెకెండె.

9 నస్తివలె లోకుర్ మిజి అసి తొహ్సి హియెజ్ కిజి సప్తాజ్ ఒపజెప్పార్లె. నా మున్సు. నమకం ఇట్టి వందిజ్ లోకామ్దు మన్ని విజు జాతిదికార్ మిజి ఇస్టం కివండ ఆనార్.

10 నండొండార్ వరి నమకం డిన్న సీనార్లె. ఒరెన్ మరి ఒరెన్ వన్నిజ్ మొసం కినాన్. ఒరెన్ మరి ఒరెన్ వన్నివెట పడివండ ఆనాన్.

11 నండొండార్ డొజ ప్రవక్తరు వాజి తప్ప బోదెజ్ నెస్పిని లోకురిజ్ తప్ప సర్దు నడిపిసి, నండొండార్దిజ్ మొసం కినార్.

12 దేసమ్ది రూలుజ్ లొజివండ బత్తిజనికార్. ఆజినిజ్ లోకుర్ ప్రేమ సిల్లికార్ ఆనార్. మహివరిజ్ ప్రేమిస్సి ప్రేమ సిల్లెండొజి మంజినార్.

13 గాని ఆక్కర్దాక కస్టమ్కు ఓరిసిని వన్నిజ్ దేవుణు రక్సిస్సాన్లె.

14 దేవుణు ఏలుబడిః కిని వందిజ్ సువార్త బూమి మున్సు. మని లోకాజ్ విజు ఉండ్రీ సాక్సెం లెకెండె వెహె అనాద్లె. నస్తివలె యా తరమదిజ్ ఆక్కర్ వానాద్.

15 ప్రవక్త ఆతి దానియేలువెట దేవుణు ముజాల వర్గితి మహి లెకెండె, “నాసనం కిని సెఇక ఆతిక’* దేవుణు గుడిఃదు నెగ్గి బాడిఃదు నిల్పి మంజినిక సూణివెలె (యాక సద్వినికాన్ నెసి అర్దం కిదెజ్) అయ గడిఃయ వానాద్లె.

16 నస్తివలె యూదయ దేసమ్దు మంజనికార్ గొరొకాజ్ ఉహ్కెజ్ వలె.

17 మిదె మున్సు. మంజనికాన్ ఇండ్రొణిజ్ ఇనికబా వెల్లి ఒతెజ్ ఇజి డిగ్గెజ్ ఆవద్.

18 మడిఃజ మంజనికాన్ వన్ని సాల్వెజ్ ఒత్తెజ్ ఇజి ఇండ్రొ వాదెజ్ ఆవద్.

19 అయ దినమ్కు కొడొఃరిజ్ పాలు ఉట్టిస్సి అయ్సికాజ్, పొటాదు మన్ని బోదెకాజ్ ఎస్సానొ కస్టమ్కు మన్నికెజె.

* 24:15 24:15 దాని 9:27; 11:31; 12:11.

20-21 అయాకెజ్ ఉండ్రీ పినికాలమ్దునో, రోమ్ని దినమ్దునో రెవీండ ఆపిద్ ఇజి పార్లనం కిజి మండ్రు. ఎందానిజ్ ఇహిజ, లోకం మొదోల్నిస్ బాణిజ్ అసి ఏలుదాక రెజ నని కస్టమ్కు వానె. అందెజె అయా కస్టమ్కాణిజ్ తప్రె ఆదెజ్ ఇజి మీరు ఉహొక్కి సొనిక ఉండ్రీ పినికాలమ్దునో, విస్రాంతిదినమ్దునో* ఆవీండ మండ్రెజ్ ఇజి పార్లనం కిజి మండ్రు.

22 అయా కస్టమ్కు మన్ని దినమ్కు తక్కు కిదెజ్ ఇజి దేవుణు ఒడేబిఎండ మహిజ బూమి ముస్కు మన్సుకాన్ ఎయెన్బా తప్రె ఆదెజ్ అట్ఎన్. గాని దేవుణు ఎర్లిస్తి మన్ని వరి వందిజ్ అయా దినమ్కు తక్కు కిసాన్లె.

23 అయా కాలమ్దు ఎయెన్బా మిజి, “ఇదిలో క్రీస్తు ఇబ్బె మనాన్”, సిల్లిజ, “వాండ్రు అబ్బె మనాన్” ఇజి వెప్తిజ వరి మాటెజ్ అస్మాట్.

24 నస్తివలె డొజక్రీస్తుర్, డొజ ప్రవక్తరు వాజి నండొ బమ్మాతి పణిజ్, ముజాల ఎసెజ్బా తోఇ నని బమ్మాతి పణిజ్ కిజి, అట్టిజ దేవుణు ఎర్లిస్తి మన్నివరిజ్బా మోసం కిదెజ్ సూణార్.

25 జాగర్త మండ్రు! ఏలె అక్కెజ్ ఇనిక్కెజ్బా జర్గినె ముజాలె నాను మిజి వెప్తా మన.

26 అందెజె ఎయెన్బా, “ఇవిలోన్ వాండ్రు అబ్బె బిడిఃమ్బూమిదు ప్రాంతమ్దు మనాన్” ఇజి వెప్తిజ్బా మీరు సొన్మాట్. సిల్లిజ, “ఇవిలోన్ వాండ్రు ఇబ్బె గొనె మనాన్” ఇజి వెప్తిజ్బా నమ్మిమాట్.

27 ఎందానిజ్ ఇహిజ, మిర్చినిక ఎలాగ తూర్పుదాన్ పడమార దాక తోరె ఆజినాదొ, అయలెకెండెన్ లోకు మరిసి ఆతి నాను వానివలెబా మంజినాద్,

28 డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండె యేను వానిదన్నిజ్బా టెటాజ్ తోర్చి గుర్తుజ్ మంజినె.

29 అయా కస్టమ్కు మని దినమ్కు వీజితివెటనె, “పొద్దు సీకటి ఆనాద్, నెల జాయ్ సివీద్, ఆగాసమ్దు మని సుక్కెజ్ రాల్పె. ఆగాసమ్దు మన్నిలావ్కమ్ది సత్తు మన్నికెజ్ కద్దినె.*

30 నస్తివలె లోకుమరిసి ఆతి నాను వానిదనిజ్ గుర్తు ఆగాసమ్దు తోర్నాద్. బూమి ముస్కు మని నండొ తెగ్గెజాణికార్ గుండె కొత్తె ఆజి అడఃబనార్. నస్తివలె లోకుమరిసి ఆతి నాను గొప్పు సత్తుదాన్ దేవుణు జాయ్దాన్ ఆగాసమ్దు మని మొసొపు ముస్కు వానిక వారు సూణార్లె.

31 జోడుబంకెజ జాటుదాన్ నాను నా దూతెజ్ పొక్కు. వారు ఆగాసమ్దు యా కొసాదాన్ అయా కొసాదాక నాలేగి దిక్కుజాణిజ్ దేవుణు ఎర్లిస్తి మన్ని వరిజ్ ఉండ్రెబాన్ కిసార్.

32 ఇదిలో బొడె మరాన్దిజ్ సుడఃజి యాక మీరు నెస్తు. బొడె మరాన్ ఆకు రాల్లి సిగ్రిస్విలె, ఎండ కాలం డగ్రు ఆతాద్ ఇజి మీరు నెసినిదెర్.

33 అయలెకెండెన్ మీరు యాకెజ్ విజు జర్చినిక సూణివెలె, నాను దారబంద్రమ్దునె మన్న ఇజి మీరు నెస్తు.

* 24:20-21 24:20-21 పినికాలమ్దు గొప్పు పెరి పిరు వాజి మహాద్. అందెజె విజుబాన్ గడెజ్ నిండ్రీజి మన్నిజ్ పిన్నిదిజ్ పయనం కిదెజ్ గొప్పు కస్టమాజి మంజినాద్ మండ్రెజ్ బాడ్డి దొహొకెజ్నో, తిండి దొహొకెజ్నో గొప్పు కస్టమాజినాద్ యూదురి రూలుజ్ వజ విస్రాంతిదినమ్దు మూడు నాలేగి మయిలుదిజ్ లావీ దూరం పయనం కిదెజ్ ఆవీద్ ఇజి మహాద్. ✱ 24:29 24:29 యెసయ 13:10; 34:4.

34 యాకెజ్ జర్గినిదాక యా తరమ్దికార్ తవ్విండ బత్తిజినె మంజినార్ ఇజి నాను మిజీ నిజం వెహ్సిన.

35 ఆగాసమ్ని బూమిబా సిల్లెండ ఆనె, గాని నా మాటెజ్ఎసెజ్బా అయాలెకెండ్ర్ సొన్డ.

36 అయ దినం వందిజ్అయ గడియ వందిజ్ ఎయెర్బా నెన్వెర్. పరలోకామదు మన్ని బుబ్బాతి దేవుణు ఆవిండ దేవుణు దూతార్ గాని మరిసిబా నెన్వెన్.

37 నోవాహు కాలమ్దు ఎలాగ మనెనో, అయాలెకెండ్రెనె లోకుమరిసి ఆతి నాను వానికబా మంజినాద్.

38 గడ్డ నిండ్రెని ముజాల నోవాహు ఓడః లోఇ డుఃగితిమహి దినమ్ దాక లోకుర్ ఉణిజి, తింజి, పెండ్లి ఆజి, పెండ్లిదిజ్ సీజి మహార్†.

39 బూమి విజు ముడిఃగ్గిని లెకెండ్ర్ గడ్డ నిండ్రెజి విజేరిజ్ పేర్లి ఒతిదాక, ఇనిక జర్గినాద్లె ఇజి వారు నెన్వెండ్ర్ మహార్. అయా లెకెండ్రెనె లోకుమరిసి ఆతి నాను వానివలెబా మంజినాద్.

40 రిఎర్మడిఃజ మంజినార్. ఒరెన్ వన్నిజ్ డిఃసి ఒరెన్వన్నిజ్ కూక్కు ఒనాన్.

41 రుండి బోదెక్ ఉండ్రె జెత్త పణకుదు నూర్లి మంజినె. ఉండ్రె దనిజ్డిఃసి ఉండ్రె దనిజ్ కూక్కు ఒనాన్.

42 ఎమేణి దినమ్దు మీ ప్రబు వానాండ్రో ఇజి మిజి తెలివద్. అందెజె మీరు జాగర్తదాన్ ఎద్దు సుడఃజి మండ్రు.

43 యాక మీరు అర్దం కిజి నెస్తు. ఎమేణి గడియాదు డొఃజారి వానాన్ఇజి ఇండ్రొణి ఎజుమాని నెస్తిజి, డొఃజారి ఇండ్రొ డుఃగ్దెజ్సరి సివిండ తెలి మంజి సుణాన్.

44 మీరు నా వందిజ్ ఒడఃబిఇ గడియాదు, లోకు మరిసి ఆతి నాను వాన. అందెజె మీరు ఎస్తివలెబా తయార్ ఆజి మండ్రెజ్ వెలె.

45 బుద్దిమని నమిదెజ్ అట్టిమని పణిమన్ని ఎయెన్? ఇండ్రొణి వరిజ్ విజేరిజ్ నెగెణ్ సుడఃజి సరి ఆతి వేలాదు, వరిజ్ సరి ఆతి బోజనం సీదెజ్ ఇజి ఇండ్రొణి ఎజుమాని ఒపజెప్తి లెకెండ్ర్ మన్నికాండ్రె బుద్ది మన్ని పణిమనిసి.

46 అయ ఎజుమాని మరజి వానివలె, వన్నిజ్ ఒపజెప్తి లెకెండ్ర్అయా పణిమన్ని కిజి మంజినిక ఇహొజి అయ ఎజుమాని సుడఃతిజి అయ పణిమన్నిజ్ నెగెద్.

47 అయ ఎజుమాని వన్నిజ్ కల్లితిమని విజు దనిజ్ సూణికాన్ లెకెండ్ర్ అయ పణిమనిసి కినాన్ ఇజి నాను మిజీ నిజం వెహ్సిన.

48-49 “గాని అయ పణిమనిసి సెఇకాన్ ఆజి నా ఎజుమాని వాదెజ్ నండ్రో ఆలస్యం ఆనాద్”, ఇజి అయ సెఇ పణిమన్ని వన్ని మన్నుదు ఆలోసనం కిజి వన్నివెట పణికిని వరిజ్ డెయ్జి, మరి ఉణివరివెట కూడఃజి ఉణిజి తింజి మంజినాన్.

50 వాండ్రు తోఇ దినమ్దు ఒడఃబిఇ గడియాదు వన్ని ఎజుమాని వానాన్.

51 అయ ఎజుమాని వన్నిజ్కత్తి, బక్తి మనికాప్ ఇజి పొజిజిని వరివెట వరివందిజ్ తయార్ కిత్తిమన్ని బాడిఃదు పోక్వాన్. అబ్బె పల్కు కొహ్కొక్కి, అడఃబాజి మంజినార్.

25

పదిమణిసి విడిః బోదెక్

† 24:38 24:38 దేవుణు బూమి విజు ముడుఃగ్గిని సిని లెకెండ్ర్ పేరు రపిసి గడ్డ నిండ్రెని ముజాల ఉండ్రె ఓడ తాయార్ కిదెజ్ ఇజి నోవాహుజ్ వెహ్సన్. అయా ఓడ 300 మూరెక్ సాంపు 50 మూరెక్ వెడల్పు 30 మూరెక్ ఎత్తు మన్నిక. నోవాహుని వన్ని ఇండ్రొణికార్ విజేరె, మరి విజు జంతుజ్ పొట్టిజ్ పొర్లిజ్ అండు పొత్తు జత్తు లెక్క, ఓడాదు డుఃగ్గి ఏడు రోస్సు వెనక పిరు వాదెజ్ మొదొల్లిదాక లోకుర్ వరిజ్ అలవాటుజ్ లెకెండ్ర్ బత్తిజి మహార్.

1 మరి దేవుణు ఏలుబడికి కినిక ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎర్దు సుడఃదెజ్ సొహిమహి పదిమన్ని విడ్డిః బోదెకాజ్ పొలిత మనాద్.

2 వినకాజ్ లొఇ అయ్దుగురు బోదెక్ బుద్ది సిలికెజ్, అయ్దుగురు బోదెక్ బుద్ది మనికెజ్.

3 అయ బుద్ది సిలికెజ్ వనక దీవెజ్ అస్సె గాని నూనెజ్ ఒఱుఱె.

4 బుద్ది మనికెజ్ వనక దీవెజవెట సీనెజ నూనెబా ఒతె.

5 పెండ్లి దజడఃయెన్ వాదెజ్ ఆలస్యం ఆతిజ్ అవిక్ విజు కొహొజ నిద్ర కిజి మహె.

6 మదరెయ్దు, “ఇవిలొన్ పెండ్లి దజడఃయెన్, వన్నిజ్ ఎర్దు సుడఃదెజ్ వాతి బోదెకాండె వెల్లి రదు”, ఇజి ఉండ్రీ గగోలిదాన్ జాటు వాతాద్.

7 నస్తివలె బోదెక్ విజుండెక్ నిజ్ జి వన్కా, నూనెజాణి దీవెజ్ సొడిఃతిజ్ ఎకిసి నెగెండ్ కిత్తె.

8 గాని అయ బుద్ది సిలికెజ్, “మా దీవెజ్ నమ్జి సొన్నినె. అందెజె మీ నూనె లొఇ కండెక్ మజిబా సిదాట్”, ఇజి బుద్ది మని వనకాజ్ లొస్సె.

9 అయావలె బుద్దిమని బోదెజ్, “సిల్లె, సిత్తిజ మజిని మిజి సాల్ ఏండ ఆనాద్. అందెజె మీరు పొర్నివరిబాన్ సొన్ని కొండు”, ఇజి వెహ్తె.

10 అవి నూనె కొండెజ్ సొన్ని మహిజ్ పెండ్లి దజడః వాతాన్. నస్తివలె తయార్ ఆతి మనికెజ్ వన్నివెట పెండ్లి విందుదిజ్ లొఇ సొహె. దని వెనుక సేహాలెజ్ కెహెపె ఆతె.

11 దన్ని వెనుక, మహి బుద్దిసిల్లి బోదెక్ వాజి, “బాబు, బాబు మజి నెహ్లా రెఅ”, ఇజి కూక్తె.

12 వాండ్రు వరిజ్, “నాను మిజి నిజం వెహ్సిన, నాను మిజి నెన్ ఎ”, ఇజి వెహ్సాన్.

13 నాను వాజిని రోజు గాని అయ గడిఃయబా మీరు నెన్ ఇతిదెర్, అందెజె మీరు తెలి ఆజి మండ్రు.

మూఎర్ పణిమణిసిర్

14 మరి దేవుణు ఏలుబడికి కినిక ఇహిజ ఒరెన్ దేసం సొండ్రెజ్ ఇజి వన్ని పణిమన్నిరిజ్ కూక్కి, వన్ని ఆస్తి వరిజ్ ఒపజెప్తి వన్ని లెకెండె మనాద్.

15 వండ్రు ఒరెన్ పణిమన్నిజ్ అయ్దు తాలంతుజ్*. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్రీ తాలంతుజ్ యాలెకెండె ఒరెన్ ఒరెన్ దన్ని వెట పణికిదెజ్ అట్టి లెకెండె వరిజ్ సితాన్. వెనుక వాండ్రు పయనం కిజి దేసం సొహాన్.

16 అయ్దు తాలంతుజ్ లొస్తికాన్ వెటనె సొన్ని వనకవెట బేరం కిజి మరి అయ్దు తాలంతుజ్ గణస్తాన్.

17 రుండి తాలంతుజ్ లొస్తికాన్ బా అయా లెకెండెనె కిజి మరి రుండి గణస్తాన్.

18 గాని ఉండ్రీ తాలంతు లొస్తికాన్ సొహొండ్రె బూమిదు గాంద కారిసి వన్ని ఎజుమాని డబ్బు మూస్తాన్.

19 లావ్ కాలం సొహి వెనుక వరి ఎజుమాని మరీజి వాతండ్రె వరి సిత్తి డబ్బుజాణిజ్ వారు ఇనిక కిత్త మనార్ ఇజి సుడఃతాన్.

20 నస్తివలె అయ్దు తాలంతు లొస్తికాన్, మరి అయ్దు తాలంతుజ్ తతాండ్రె, “బాబు నీను నజి అయ్దు తాలంతుజ్ ఒపజెప్తి గదె, ఇదిలో అకెజె ఆఏండ మరి అయ్దుబా నాను కుడుప్త”, ఇజి వెహ్సాన్.

* 25:15 25:15 ఉండ్రీ తాలంతు ఇహిజ దినారమ్ కు అయాలెకెండె ఇహిజ ఆరు వెయిజ్ రోస్కు, పణికితిజి దొహ్సాక్కి కూలిదిజ్ నరియాలి డబ్బుజ్ నేహి లెక్కదిజ్ సుడఃజి ఇంసు మింసు ఆరు లెక్కెజ్ రూహాయ్ మంజిని.

21 వన్ని ఎజుమాని వన్నిజ్, “నమకం ఇడదెజ్ అట్టి నెగ్గి పణిమన్ని, నీను నెగెండె కిత్తి. యా కండెక్బాన్ నిజి నమిదెజ్ అట్టి నని పణి నీను కిత్తి. అందెజె నండో వనకాజ్ నాను నిజి ఒపజెప్పాలె. నీను వాజి నీ ఎజుమానివెట సర్ల ఆజి మన్అ”, ఇజి వెహ్హాన్.

22 రుండి తాలంతుజ్ లొస్తికాన్ వాతాండ్రె, “ఎజుమాని నీను నజీ రుండి తాలంతుజ్ ఒపజెప్పి గదె, ఇదిలో అకెజె ఆవిండ మరి రుండి తాలందుజ్ గణస్త”, ఇజి వన్నిజ్ వెహ్హాన్.

23 ఎజుమాని వన్నిజ్, “నమకం ఇడదెజ్ అట్టి నెగ్గి పణిమనిసి, నీను నెగెండె కిత్తి. యా కండెక్బాన్ నీను నమిదెజ్ అట్టి నని పణి నీను కిత్తి. అందెజె నిజి నండో వన్కాజ్ ఒపజెప్పి. నీను వాజి నీ ఎజుమాని వెట సర్ల ఆజి మన్అ”, ఇజి వెహ్హాన్.

24 నస్తివలె ఉండ్రె తాలంతు లొస్తికాన్ వాతాండ్రె, “బాబు నీను విత్తణ బాడిదాన్ కొయ్నికి, మరి ఉణున్ణ బాడిదాన్ పంట కొయ్ని మూర్కతం మనికి ఇజి నాను నెస్త.

25 అందెజె నాను తియెల్ ఆజి బూమిదు గాంద కార్డి నీ డబ్బు డాప్త. ఇదిలో నీది, నీను లొన్అ”, ఇజి వెహ్హాన్.

26 అందెజె వన్నిజ్ సుండేజి అయ ఎజుమాని, “బదకమాతి సెణ పణిమన్ని, నాను విత్తణ బాడిదాన్ కొయ్నికాన్, ఉణున్ణ బాడిదాన్ పంట కొయ్నికాన్ ఇజి నీను నెస్తి?

27 అహిజ నా డబ్బు వడ్డి సీని సవ్కారిజబాన్ నీను సీని మంజినిక ఇహిజ నాను వాతివెలె వడ్డి కుడుఃప్పి నా డబ్బు నజీ దొహ్కాద్ మరి.

28 అయ ఉండ్రె తాలంతు వన్నిబాణిజ్ లాగ్జి పది తాలందుజ్ మనివన్నిజ్ సీఅ.

29 నమిదెజ్ అట్టికాన్ ఎయెండ్రె, వన్నిజ్ మరి లావ్ దొహ్కె. వరిజ్ మరి నండో కల్లిజి మంజినె. నమ్మిదెజ్ అట్టణ వన్ని బాణిజ్, వన్నిజ్ కల్లితిమన్ని ఇజిరికబా లాగె ఆనాద్.

30 పణిదిజ్ రెణ యా పణిమన్నిజ్ వెల్లి సీకటుదు విసీర్దు. అబ్బె పల్కు కొహ్కెఅడఃబాజి మంజినాద్.

మెండ గొర్రెజ్ ని ఎలెటి గొర్రెజ్

31 నస్తివలె యేసు ఈహు వెహ్హాన్. “లోకుమరిసి ఆతి నాను నా గొప్ప గవ్ రమ్దాన్, నా విజు దూతెజ తోడుః అసి వన్నివెలె, రాజు వజ ఎలుబడిః కిదెజ్ దేవుణు మంజిని బాడిఃదు మంజిని గొవ జాయ్దాన్, విజు దూతారిజ్ నావెట తోడు అసి వానివలె, రాజువజ ఎలుబడిః కిదెజ్ పరలోకమ్దు మంజిని గొప్ప జాయ్ మన్ని నా సింహాసనమ్దు బసి మంజిన.

32 నస్తివలె బూమి ముస్సు మని లోకుర్ విజెరె నా ఎద్దు కూడఃజి వానార్. గొర్రెజ్ మేప్పి గప్పడుఃయెన్ ఎలిటి గొర్రెజాణిజ్ మెండ గొర్రెజి ఎర్లినిసిలెకెండ నాను లోకాజ్ ఒరెన్ ఒరెన్ వన్నిజ్ ఎర్లిస్తాలె.

33 నాను ఉణెర్ పడఃక మెండ గొర్రెజి, డేబపడఃక ఎలిటి గొర్రెజి నిల్పాలె.

34 రాజు ఆతి నాను నా ఉణెర్ పడఃక మని వరిజ్ సుండేజి, “నా బుబ్బాతి దేవుణు సిజిని దీవనమ్కు మంజి వన్నిజ్ సెందితికిదెరా, లోకం పుట్టి బాణిజ్ అసి దేవుణు మీ వందిజ్ తయార్ కితిమన్ని దేసం మీ సొంత కిజి మండ్రు.

35 ఎందానిజ్ ఇహిజ, నజీ బజ కట్టిజ్ మీరు బోజనుం సితిదెర్, ఏహ్కె కట్టిజ్ ఏరు సితిదెర్, నాను అఇకాన్ ఆతిమహిజ్ నజీ డగ్గు కితిదెర్.

36 నాను డుమ్డ ఆతిమహిజ్ నజీ సొక్కెజ్ సితిదెర్. జబుదాన్ మహిజ్ నజీ నెగెండె సుండేతిదెర్, నాను జెలిదు మహివలె సుండేదెజ్ వాతిదెర్, ఇజి వెహ్హాన్.

37 నస్తివల దేవుణుడిలో జీతిమహి నీతినిజాయిమన్నికార్ ఆతి వారు, “ప్రబువా, ఎస్తివల నిజి బజదాన్ సుడేతిజ్ నిజి బోజనం సితాప్? ఎస్తివల ఎహ్కా కట్టిజ్ మాపు నిజి ఏరు సితాప్?

38 ఎస్తివల ఆకకి ఆతిమహిజ్ సుడేజి నిజి డగ్రు కితాప్? ఎస్తివల డుమ్డ ఆతి మహిక సుడేజి నిజి సొక్కెజ్ సితాప్?

39 ఎస్తివల నీను జబుదాన్ మహిక, జెలిదు మహిక సుడేజి నీ డగ్రు వాతాప్?”, ఇజి వన్నిజ్ వెన్బానారలె.

40 నస్తివల రాజుఆతి నాను, “నా తంబెరిజ ఆతివరి లోఇ ఇజిరికాన్ ఆతి ఒరెన్వన్నిజ్ మీరు ఇనిక కితిదెరొ, అయాక మీరు నజి కిత్తిదెర్, ఇజి నాను నిజి నిజం వెప్పిన”, ఇజి వరిజ్ వెప్పా.

41 నస్తివల వాండ్రు డేబ్ర వడేకాదు మని వరిజ్ సుడేజి, “సయెప్ పొందితికిదెరా, నా డగ్రహాన్ సొండ్రు, సయితానుజ్ని వన్ని దూతర్ వందిజ్ తయార్ కితి మని ఎలాకాలం సిను మంజిని బాడిదు సొండ్రు.

42 ఎందనిజ్ ఇహిజ, నాను బజ సాత, గాని మీరు నజి బోజనం సిఇతిదెర్. ఎహ్కా కట్టిజ్ ఉండెజ్ ఇనిక సిఇతిదెర్.

43 అఇకానాతి మహిజ్ మీరు నజి డగ్రు కిఇతిదెర్. డుమ్డ ఆతిమహిజ్ మీరు నజి సొక్కెజ్ సిఇతిదెర్. జబ్బుదాన్ మహివలె జెలిదు మహివలె మీరు నజి సుడేదెజ్ రెఇతిదెర్”, ఇజి వెప్పా.

44 వారుబా వన్నిజ్, “ప్రబువా ఎస్తివల నీను బజదాన్మహిక, ఎహ్కాదాన్మహిక, ఆకకి ఆతి మహిక, డుమ్డ మహిక, జబుదాన్మహిక, కయ్దు మహిక సుడేజి నిజి సాయం కివితాప్?”, ఇజి వెన్బానార.

45 నస్తివల నాను, “యా ఇజిరి వరి లోఇ ఒరెన్ వన్నిజ్ ఇనిక మీరు కిఇతిదెరొ, అయాక నజిబా మీరు కిఇతిదెర్”, ఇజి వరిజ్ వెప్పా.

46 నస్తివల వారు ఎలాకాలం మంజిని సిక్కాదు సొనారలె, గాని దేవుణుడిలో జీతికార్ ఎల్లకాలం మంజిని బత్కుదు సొనార.”

26

యేసుజ్ పడిఎండ కుట్ట ఆజినార్

1-2 యేసు యాకెజ్ విజు వెప్తా వీజితి వెనుక వన్ని సిసూర్జ సుడేజి, “రుండె రొన్ను వెనుక పన్ను పండోయ్* వాజినాద్ ఇజి మీరు నెస్సిదెర్. నస్తివల లోకు మరిసి ఆతి నాను సిలువ పోకె ఆదెజ్ ఇజి ఒవజెపె ఆనాలె”, ఇజి వరిజ్ వెప్తాన్.

3 నస్తివల పెరి పుజెరిజుని లోకురి పెద్దెల్జ విజెరె, విజెరె విజు పుజెరిజ మున్ను పెరి పుజెరి ఆతి కయప ఇండ్రొ కూడేజి వాతార.

4 యేసుజ్ ఎలాగబా ఉపాయ్ కిజి అసి సప్తెజ్ ఇజి అబ్బె వారు ఉండ్రె ఆలోసనం కితార్.

* 26:1-2 26:1-2 యూదురు వరి అని గొగొరిజ్ దేవుణు అయుగుప్పు దేసమదు వెటివణి కిజి మహిబాణిజ్ నండొ పంటిజ్ ముజాల డిప్పిసి తత్తి దన్నిజ్ ఎత్తు కిజినికాదె పన్ను పండోయ్ పన్ను ఇహిజ డాట్టి సొహిక ఇహిజ సప్పికానాతి దేవుణు దూత, మెండగొరెది నల దారబంద్రమ్కాజ్ రాసి ఆతి మన్ని ఇల్కాజ్ డట్టి సొహి సమయమదిజ్ గుర్దినినాద్. అయ ఇల్కా పుట్టి పెరి వన్నిజ్ దేవుణు దూత సప్వితాన్ గాని మెండ గొరెది నల దారబంద్రమ్కాజ్ రాసి ఇ అయగుప్పు దేసమది వరి విజు ఇల్కాజ్ పుట్టి పెరి వరిజ్ విజెరిజ్ దేవుణు దూత సప్తాన్. యా పండోయ్ విజు సమయమదిజ్ కిసార్ యూదురు విజు దేసమ్కాజ్ పండోయ్ కిడెజ్ ఇజి యెరునల్లెమ్దు కూడేజి వానార్ నిర్గమ 12.

5 “మాపు ఏలు వన్నిజ్ అస్తిజ లోకుర్ వెట గొడఃబ కినార్లె, అందెజె యా పండోయ్దు పోని”, ఇజి వారు వర్గితార్.

ఉండ్రి బోదెలె యేసు బురాదు వాసనం మన్ని నూనె వక్సినాద్.

6-7 యేసు బెతానియ ఇని నాటో ముజాల కుస్తురోగమ్దాన్ మహి సీమోను ఇండ్రో వాతిజ్, అబ్బె వాండ్రు బోజనమ్దిజ్ బస్తాన్. నస్తివలె ఉండ్రి బోదెలి నూన్నాజ్ పణుకుదాన్ తయార్ కిత్తి ఉండ్రి సీసాదు†, నండో విలువమని, నండో వాసనం మని నూనె ఉండ్రి పెరి సీస తత్తాదె వన్ని బుర్ల మున్కు వాక్తాద్.

8-9 సీసూర్ అక్క సుడఃజి కోపం ఆతారె, “ఎందనిజ్ యా ణిదిజ్ రెణ ణి? యాక నండో డబ్బుదిజ్ పోరిసి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెహ్తార్.

10 యేసు అక్క నెస్తాండ్రె, “యా బోదెలి నా వందిజ్ ఉండ్రి నెగ్గి పణి కితాద్ మీరు ఎందనిజ్ దన్నిజ్ అర్ల కిజినిదెర్?”

11 బీదాదికార్ మీవెట ఎస్తివలెబా మంజినార్. గాని నాను ఎలాకాలం మీ వెట మన్ఎ.

12 నజి మూస్సి వందిజ్ తయార్ కిత్తి లెకెండె యా బోదెలి యా నూనె నా ఒడోలె మున్కు వాక్తాద్.

13 యా బూమి మున్కు ఎంబెబా యా దేవుణు ఏలుబడిః కిని వందిజ్ సువార్ల సాటిస్సివెలె అది కితి యా పణి దన్నిజ్ ఎత్తుకిత్తి లెకెండె సాటిసి మంజినాద్లె”, ఇజి వెహ్తాన్.

14-15 నస్తివలె పన్నెండు మణిసిర్ సీసూర్ లోఇ ఒరెన్ ఇస్కరియోతు యూద ఇనికాన్ పెరి పుజెరిజ డగ్రు సాహోండ్రె, “నాను యేసుజ్ మిజి ఒపజెప్పిజ నజి ఇనిక సీనిదెర్?”, ఇజి వెన్బాతాన్. అందెజె వారు ముప్పయ్ వెండి రూపయ్జు తూస్తారె వన్నిజ్ సిత్తార్.

16 అబ్బెణిజ్ అసి యూద యేసుజ్ వరిజ్ ఒపజెప్పెజ్ ఉండ్రి అవ్కాసం సుడఃజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పస్కు పండోయ్ది మొదోహి దినమ్దు వన్ని సీసూర్ యేసు డగ్రు వాతారె, “పస్కు ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజిని?”, ఇజి వన్నిజ్ వెన్బాతార్.

18 వాండ్రు వరిజ్, “మీరు పట్నుమ్దు పలానివన్నిబాన్ సొన్ని, నా సమయం డగ్రు ఆతాద్. నా సీసూర్ వెట కూడఃజి నీ ఇండ్రో పస్కు పండోయ్ కిదెజ్ ఇజి బోదకినికాన్ వెహ్సిసాన్, ఇజి వన్నిజ్ వెహ్తూ”, ఇజి వరిజ్ వెహ్తూన్.

19 వన్ని సీసూర్ సొన్ని యేసు వరిజ్ వెహ్తా లెకెండెనె పస్కు పండోయ్దిజ్ తయార్ కిత్తార్.

20 షొద్దు ఆతివెలె వన్ని పన్నెండు మన్ని సీసూర్ వెట బోజనమ్దిజ్ బస్తాన్.

21 వారు బోజనం కిజి మహివలె వాండ్రు, “మీ లోఇ ఒరెన్ నజి ఆఇవరి కీదు ఒపజెప్పాన్లె, ఇజి నాను మిజి నిజం వెహ్సిసాన్”, ఇజి వెహ్తూన్.

† 26:6-7 26:6-7 యా నూన్నాజ్ పణుకు పేరు అలబాస్టరు ఇజి, యా పణుకు నండోకరీదిక తెల్లాజ్ మంజినాద్ యాక గీసి లోకుర్ పునెజ్ తయార్ కిజినార్

22 వారు విజేరె నండొ దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవి గదె?”, ఇజి వన్నిజ్ వెన్బాతార్.

23 యేసు, “నావెట గినెదు కియు ముడుఃక్వికాన్ ఎయెండ్రొ వాండ్రె నజి ఒపజెప్పికాన్.

24 లోకుమరిసి ఆతి నా వందిజ్ దేవుణు మాటదు రాస్తిమహి లెకెండ్ నాను సొనాలె, గాని లోకు మరిసి ఆతి నజి ఎయెన్ ఒపజెప్పాండ్రొ వన్నిజ్ కస్టమ్సె. వాండ్రు పుట్విండ మంజినిక ఇహిజ వన్నిజ్ ఎస్సానొ బాగ మహాద్ మరి”, ఇజి వెప్తాన్.

25 వన్నిజ్ ఒపజెప్పి యూద, “బోదకినికి నాను ఆవి గదె?”, ఇజి వెన్బాతాన్. యేసు, “ఒఒ నీనె”, ఇజి మర్జి వెప్తాన్.

యేసుజ్ ఒపజెప్పజ్ యూద ఒపు కొడ్డినాన్.

26 వారు బోజనం కిజి మహిజ్ యేసు ఉండ్రొ రొట్టె అస్తాండ్రె దేవుణుదిజ్ వందనమ్కు వెప్పి, అయాక రుక్కి, వన్ని సిస్సూర్జి సితాండ్రె, “మీరు యాక లోసి తిండ్రు, యాక నా ఒడోల్”, ఇజి వరిజ్ వెప్తాన్.

27 మరి వాండ్రు గిన్ను ఆసి దేవుణుదిజ్ వందనమ్కు వెప్పి, అయాక వరిజ్ సీజి, “దిన్ని లోఇ మనిక విజేరె ఉండు.

28 యా గిన్నాదు మన్నిక నా నల, నండొండారిజ్ వరి పాపమ్కు సెమిస్తెజ్ ఇజి కారిసిని నా నల. ఇక్కడె దేవుణు నా నలదాన్ కిజిని ఒపుమానం.

29 నా బుబ్బాతి దేవుణు కిని ఏలుబడిఃదు మరి మీ వెట కొత్తాజ్ ఉణిదాక ద్రాక్కు పట్టు రసం మరి ఎస్జేబా నాను ఉణ్ఎలె, ఇజి నాను మిజి వెప్పాన్”, ఇజి వెప్తాన్

30 మరి, ఉండ్రొ పాటః పార్దారె వారు ఒలివ మరెక్ మని గొరొన్ ముస్సు సొహార్.

పేతురు వన్నిజ్ నెన్ఎ ఇజి వెహ్నాన్లె ఇజి యేసు మూజాల వెప్పానాన్.

31 నస్తివలె యేసు వరిజ్ సుడఃజి, “గొరెజ్ అడినివన్నిజ్ నాను కత్తాలె, గొరెజ్ మంద నెదరినె సొనెలె”, ఇజి దేవుణు మాటదు రాస్తి లెకెండ్, యా పొదొయెనె నా వందిజ్ నిల్దెజ్ అట్విండ మీరు విజిదెరె నజి డిఃసి సొనిదెరెలె.

32 గాని దేవుణు నజి మర్జి బత్తుదు నిక్తి వెనుక, మిజి ఇంక ముజాల గలీలయదు సొనాలె”, ఇజి వెప్తాన్.

33 అందెజె పేతురు, “విజేరె మీ వందిజ్ నిల్దెజ్ అట్విండ డిఃస్తి సొహిజ్బా, నాను ఎస్జేబా నిజి డిఃసి సొన్ఎ”, ఇజి వన్నిజ్ వెప్తాన్.

34 యేసు వన్నిజ్, “యా పొదొయెనె కొర్రు కెరెని ముజాల నీను, నజి నెన్ఎ ఇజి మూండ్రొ సుట్టు నీను వెప్పాలె, ఇజి నాను నిజి నిజం వెప్పాన్”, ఇజి మర్జి వెప్తాన్.

35 పేతురు వన్నిజ్, “నాను నీ వెట సాదెజ్ ఇహిజ్బా గాని నిజి నెన్ఎ ఇజి ఎస్జేబా వెహ్ఎ”, ఇజి వెప్తాన్. మహి సిస్సూర్బా అయాలెకెండె వెప్తార్.

గెత్సెమని టోట

36 నస్తివలె యేసు వన్ని సిస్సూర్వెట గెత్సెమిని ఇని టోటాదు సొహాన్. వాండ్రు వరిజ్, “నాను అబె సొన్ని పార్దనం కిజి మర్జి వానిదాక ఇబ్బె బసి మండ్రు”, ఇజి వెప్తాన్.

‡ 26:30 26:30 మాములుగ కీర్తన 113-114. పన్ను పండొయిదిజ్ బోజనం కిదిజ్ మొదొల్ని వెలె పార్దార్. 115-118 బోజనం కిత్తి వీజితిజ పార్జి మహార్. ✨ 26:31 26:31 జేకరి 13:7.

37 పేతురుని జెబెదయి మరిసిరిజ్ వన్నివెట ఒతాన్. వాండ్రు నండో దుకం ఆజి బాద ఆదెజ్ మొదోల్స్తాన్.

38 వాండ్రు వరిజ్, “నాను సాదెజ్ డగ్రు ఆతిలెకెండ్ మన్ను ఓరిస్తెజ్ అట్త నసా బాద నజి కల్లిజనాద్. మీరు ఇబ్బెనె బని నావెట తెలి మండ్రు”, ఇజి వెహ్తాన్.

39 యేసు అబ్బెణిజ్ కండెక్ దూరం సాహండ్రె ముణుకుజ్ ఊరిజి, “నా బుబ్బు, నీను అట్టిజి యా కస్టమ్కు నా బాణిజ్ లాగ్ అ. గాని నా ఇస్టం వజి ఆవెద్, నీ ఇస్టం వజినె జర్గిపిద్”, ఇజి పార్దనం కితాన్.

40 వెనుక వాండ్రు సిసూర్ డగ్రు మర్జి వాతివెలె వారు నిద్ర కినిక సుడేజి, “ఉండ్రీ గంటబా నా వెట తెలి ఆజి మండ్రెజ్ మీరు అట్తతిదెరా? ఇజి పేత్రుజ్ వెన్బాతాన్.

41 “సయ్యూను మిజి పరిస కిజి తప్పదు సాన్ ఏండ పార్దనం కిజి తెలి మండ్రు. ఆత్మ తయార్ నె గాని ఒడోల్ సత్తు సిల్లెండ ఆజినాద్.”

42 మరి రుండి సుట్కు సొన్ని, “నా బుబ్బు, యా కస్టమ్కు నాబాణిజ్ లాగ్గెజ్ ఆవెద్, నాను ఓరిస్తెజ్ వలె ఇహిజి నీను ఇస్టం ఆతి లెకెండ్, అయావజినె జర్గిపిద్”, ఇజి పార్దనం కితాన్.

43 మరి వాండ్రు మర్జి వాతివెలె, మరి కణక రెపెజ్ బరుదాన్ మూగ్గి మహిజ్ వారు మరి నిద్ర కిజినిక సుడేతాన్.

44 వాండ్రు మర్జి సాహండ్రె మూండ్రీ సుట్కుబ అయా మాటెజ్ నె వెహ్సి పార్దనం కితాన్.

45 వెనుక వాండ్రు వన్ని సిసూర్ డగ్రు వాత్తాండ్రె వరిజ్ సుడేజి, “ఏలుబా మీరు నిద్ర కిజి రోమ్ జనిదెరా? ఇదిలో లోకుమరిసి ఆతి నజి నెఇవరి కియుదు ఒపజెప్పి గడియ డగ్రు ఆతాద్.

46 ఇదిలో నజి ఒపజెప్పికాన్ వాజినాన్, లెదు మాటు వరి వెట దసూల్ ఆదెజ్ సానాట్”, ఇజి వెహ్తాన్.

యేసుజ్ అసి తోనాహ్సినార్

47 వాండ్రు వర్గిజి మహివలె, పన్నెండు మణిసి సిసూర్ లోఇ ఒరెన్ యూద వాతాన్. పెరి పుజెరిజు, లోకురి పెద్దెల్ జి పొక్తిమని మంద లోకుర్ కూడమ్కు, డుడ్కు అస్తారె వన్ని వెట వాతార్.

48 యేసుజ్ ఒపజెప్పికాన్, “నాను ఎయెరిజ్ ముదు కిజిననో, వన్నిజ్ అస్తు”, ఇజి ఉండ్రీ గుర్తు లెకెండ్ ముజాలె వరిజ్ వెహ్తా మహాన్.

49 యూద వెటనె యేసు డగ్రు వాతండ్రె, “బోదకిసికి”, ఇజి వెహ్తాండ్రె పొమ్జి వన్నిజ్ ముదు కితాన్.

50 యేసు వన్నిజ్, “కూలాయెన్, నీను ఇనిక కిడెజ్ వాతిదో అక్క కిత”, ఇజి వెహ్తాన్. నస్తివలె లోకుర్ ముజాల్ వాజి వన్ని మున్ను అర్సి వన్నిజ్ అస్తారె తోహ్తార్.

51 అయావలెనె యేసు వెట మహికాన్ ఒరెన్ వన్ని కియు సాహ్సి కుర్ల లాగిత్తాండ్రె పెరి పుజెరిజ్ పణిమన్ని గిబ్బి తెవు కత్తాన్.

52 యేసు వన్నిజ్, “నీ కూడం మర్జి ఒరాదు ఇడేఅ, కుర్ల అన్నికార్ విజేరె కుర్లదానె సానార్.

53 నాను ఏలు నా బుబ్బెజ్ సాయం లోస్తిజ, నా బుబ్బె వన్నెండు గుంపుజ్ సయనమ్ది వరిజ్ ఇంక లావ్దూతెజ నా వందిజ్ పోక్విండ్రా? మీరు ఇనిక ఒడ్డెబిజినిదెర్?

54 గాని నాను అయలెకెండ్ లోస్తిజ, యాలెకెండ్నె ఇకెజ్ జర్గిదెజ్ ఇజి దేవుణు మాటదు రాస్తి మహిక ఎలాగ పూర్తి ఆనాద్?

55 అయావలె యేసు మంద లోకురిజ్ సుడెజి, “నాను ఒరెన్ డొజ కినికాండ్రా? మీరు కుర్లజాణిజ్, కొణెజాణిజ్ నజి అస్సెజ్ వాతిదెరా? విజు రోస్సు నాను దేవుణు గుడిడు బసి బోదిసి మహగదె. అయావలె మీరు నజి అన్ఇతిదెర్.

56 ఎందనిజ్ ఇహిజ ముజాల దేవుణు వర్గితి మాటెజ్ ప్రవక్తరు రాస్తి మహికెజ్ అయాలెకెండ్ పూర్తి ఆదెజ్ యాకెజ్ విజు జర్గితె”, ఇజి వెప్తాన్. నస్తివలె వన్ని సిసూర్ విజేరె వన్నిజ్ డిస్తారె ఉహ్కా సాహర్.

యేసు యూదురి కొర్టుదు

57 యేసుజ్ అస్తికార్ వన్నిజ్ విజు పుజేరిజ ముస్సు పెరి పుజెరి ఆతి కయవ ఇండ్రో తత్తార్. అబ్బె పెరి పుజేరిజు లోకురి పెదలుజు కూడిత వాత మహార్.

58 దినిజ్ ఆక్కర్ ఇనిక ఆనాదో ఇజి నెస్టెజ్, పేతురు కండెక్ దూరమ్దాన్ వన్ని వెనుక సొన్ని విజు పుజెరిజ ముస్సు పెరి పుజెరి ఇలు అర్జుదు కావ్కిని వరి వెట బస్తాన్.

59 పెరి పుజెరిజు, సన్హెద్రి సజంస్ ఇజి యూదురి కోర్టుదికార్ విజేరె యేసుజ్ సప్తెజ్ తగితి రుజువ్ వందిజ్ వన్ని ఎద్దు అబద్దం సాక్యం వెప్పివరిజ్ రెబాజి మహార్.

60 వన్ని ఎద్దు అబద్దం సాక్యం వెప్పికార్ నండెండార్ వాతార్ గాని వన్నిజ్ సప్తెజ్ తగ్గి ఇనికబా దోహ్కావతాద్.

61 కడెవేరిదు రిఎర్ ముజాల వాజి, “నాను దేవుణు గుడిదిజ్ అర్ప్పి మరి మూండ్రి రోస్కాజ్ లోఇ దనిజ్మర్జి తోహ్తాజ్ అట్టు ఇజి వాండ్రు వెప్తాన్”, ఇజి వారు వెప్తార్.

62 నస్తివలె విజు పుజెరిజ ముస్సు పెరి పుజెరి ఆతికాన్ నిజిత్తాండ్రె యేసుజ్, “నీను ఇనికబా మర్జి వెహ్ఇదా? వీరు మీ ముస్సు వెప్పిని యా మాటెజ్ ఇనికెజ్?”, ఇజి వెప్తాన్.

63 గాని యేసు ఇనికబా వర్గివండ జమ్న మహాన్. అందెజి విజు పుజెరిజ ముస్సు పెరి పుజెరి ఆతికాన్ వన్నిజ్ సుడెజి, “బత్తిజిని దేవుణుదిజ్ తోడు అసి నీ వెట ప్రమాణం కిజి నాను నిజి వెన్బాజిన, “నీను క్రీస్తు నా, దేవుణు మరిసిని? అహిజ నజి వెహ్అ”, ఇజి వెప్తాన్.

64 యేసు వన్నిజ్, “నీను వెప్తిక నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమ్దు దేవుణు ఉణెర్ పడెకాదు బసిమంజి ఆగాసమ్దాన్ మొసోపు ముస్సు వానిక మీరు సూణిదెర్ ఇజి నాను మిజి విజేరిజ్ నిజం వెప్పిన్”, ఇజి వెప్తాన్.

§ 26:59 26:59 సినహద్రిం సజం ఇహిజ 71 లోకుర్ మంజిని యూదురి పెరి కొర్టులెకెండ్ మహాద్ విజేరె పుజేరిజ ముస్సు పెరిపుజెరిఆతికాన్ మరి పెరి పుజెరి ఇనికాన్ ఇజిరి సజతిజ వందిజ్ తీర్పు తీరిసి మహార్. సనహద్రిం సజమ్దు అయ సమయమ్ది పెరి పుజేరి వన్ని ఇండ్రోణి మొగవారు, మహి ముకెలమాతి పుజెరి ఇండ్రోణికార్ దేవుణు గుడి: కాప్ కినివరి నెయ్యి ముజాల పెరి పుజెరిలెకెండ్ మహికార్ మంజినార్. యెరూసల్లెమ్దు మన్ని సనహద్రిం సజమ్దిజ్నె పెరి సజతిజ వందిజ్ తీర్పు తీరినెజ్ అతికారం మనాద్.

65 నస్తివలె విజు పుజెరిజ ముస్కు పెరి పుజెరి ఆతికాన్ నండో కోపం ఆతండ్రె, వన్ని సొక్కెజ్ కిసె ఆజి, “వాండ్రు దేవుణుదిజ్ దూసిసి వర్గితాన్! మరి ఇంక సొక్కెరిజు అవ్నరం సిల్లెద్. ఇదిలో వాండ్రు దేవుణుదిజ్ దూసిసి వర్గితిక మీరె వెహెదెర్.

66 మీరు ఇనిక ఒడెబిజనిదెర్?”, ఇజి వరిజ్ వెహ్హాన్. అందెజె వారు”, వీండ్రు సొపుదిజ్ తగ్గికాన్”, ఇజి వెహ్హాన్.

67-68 నస్తివలె వారు వన్ని మొకొమ్దు పూసి, ముటి అసి గుదితార్. నెగొండార్ కియుదాన్ డెయ్జి, “క్రీస్తు నిజి డెయ్తికాన్ ఎయెండ్రొ ఇజి మజి వెహ్హా, నీను దేవుణు ప్రవక్తగదె?”, ఇజి వెహ్హాన్.

పేతురు యేసుజ్నెన్వ ఇజి మూండ్రె సుటు వెహ్హాన్.

69 అయావలె వెల్లి అరజుదు పేతురు బస్తి మహిజ్ పణిమన్ని ఆతి ఉండ్రె బోదెలి వాతాదె, “నీనుబా గలీలయాదికాన్ యేసు వెట మహికి”, ఇజి వెహ్హాన్.

70 పేతురు, “నీను ఇనిక వర్గిజనిదొ నజి తెలివద్”, ఇజి బాన్మహి విజేరె ఎద్రు వెహ్హాన్.

71 వాండ్రు అబ్బెణిజ్ వెల్లిహి గవుని డగ్రు సొహిజ్, మరి ఉండ్రె పణిమన్ని ఆతి బోదెలి వన్నిజ్ సుడెజి, “వీండ్రు నజరేతుదికాన్ ఆతి యేసు వెట మహాన్”, ఇజి అబె మహివరిజ్ వెహ్హాన్.

72 వాండ్రు నాను వన్నివెట మండ్రెజ్ సిల్లెద్ ఇజి ప్రమాణం కిజి, “నాను వన్నిజ్ నెన్వ”, ఇజి వెహ్హాన్.

73 కండెక్టయం ఆతి వెనుక అబ్బె నిహిమహికార్ పేతురు డగ్రు వాజి, “నిజమె, నీనుబా వన్నివెట మహికి. నీను వర్గిని మాట విహిజానె తెలిజనాద్”, ఇజి వెహ్హాన్.

74 నస్తివలె వన్నిజ్ వాండ్రె నయివ్సిబె ఆజి ప్రమాణం కిజి, “నాను వన్నిజ్ నెన్వ”, ఇజి వరిజ్ వెహ్హాన్. వెటనె కొరు కెరెతాద్.

75 నస్తివలె, “కొరు కెరెని ముజాల నజి నెన్వ ఇజి మూండ్రె సుట్టు నీను వెహ్హాలె”, ఇజి యేసు వన్నిజ్ వెహ్హి మాట ఎతు కితాండ్రె పేతురు వెల్లి సొహాండ్రె గుండె కొతె ఆజి డటం అడెబతాన్.

27

యూద, వన్నిజ్ వాండ్రె ఉరి ఆజినాన్

1 పెందాల, పెరి పుజెరిజుని లోకురి పెద్దెల్జ విజేరె యేసుజ్ సపిస్తెజ్ ఇజి ఉండ్రె నిర్లెం కిబిస్తెజ్ ఇజి ఉండ్రె కుట్ట ఆతార్.

2 వారు వన్నిజ్ తొహ్తరె, రోమఅతికారి ఆతి పీలాతు డగ్రు తత్తారె వన్నిజ్ ఒపజెహ్హార్.

3 నస్తివలె వన్నిజ్ ఒపజెహ్హి యూద, వారు యేసుజ్ సపెజ్ ఇజి తీర్పు కితార్ ఇజి నెస్తాండ్రె, మన్నుదు నండో దుకం ఆజి అయ ముపయ్వెండి రుపయెజు పెరి పుజెరిజుని పెద్దెల్జ ఎద్రు మహ్త తత్తాన్.

4 “ఇని తప్ప సిలివన్నిజ్ ఒపజెహ్హానె నాను పాపం కిత”, ఇజి వాండ్రు వెహ్హాన్. “దనిజ్ నజి ఇని పొతు సిల్లెద్. అయాక నీ బాజిత”, ఇజి వారు వెహ్హాన్.

5 అందెజె యూద అయ వెండి రుపయెజ్ దేవుణుగుడిః లొఇ విసిర్తాండ్రె సొహాన్. వెనుక సొన్ని వన్నిజ్ వాండ్రె ఉరి లాగె ఆతాన్.

6 పెరి పుజెరిజు అయ వెండి రూపయ్జు పెహ్తారె, “ఇకెజ్ ఒరెన్ వన్నిజ్ నమ్మి వందిజ్ సిత్తి డబ్బుజ్, అందెజె సంద పెటెదు అరిప్పిక దేవుణు రూలుదిజ్ పడిఁవిద్”, ఇజి వర్గితార్.

7 వారు అయ డబుదాన్ ఆఇ దేసెమ్ది వరిజ్ మూస్తాజ్, కుమెరివన్ని మడిఁజ్ కొణాట్ ఇజి ఉండ్రి నిర్తెం కితార్.

8 అందెజె ఏలుదాక అయ మడిఁజు, “నల మడిఁజు’ ఇజి కూకె ఆజినాద్.

9-10 “దేవుణు నజి ఆడ్ర సిత్తిలెకెండ్, ఇస్తాయేలు లోకుర్ వన్ని వందిజ్ విలువ లెకెండ్ సిత్తి ముప్పుయ్ వెండి రూపయ్జ్ వారు లాగితారె కుమెరి వన్ని బూమి కొండెజ్ సితార్”*. ఇజి దేవుణు ముజాల ప్రవక్త ఆతి యిరిమ్మ్య వెట వర్గితక యా లెకెండ్ పూర్తి ఆతాద్.

యేసు పీలాతు ఎద్రు నిల్సినాన్

11 యాకెజ్ జరిగిజి మహివలె యేసు పెరి అతికారి ఆతి పిలాతు ఎద్రు నిల్సి మహాన్. నస్తవలె అతికారి ఆతి పిలాతు, “యూదురిజ్ రాజు ఆతికి నీనెనా?”, ఇజి వన్నిజ్ వెన్బాతాన్. “నిజమె, నీను వెహ్తి లెకెండ్నె”, ఇజి యేసు మరజి వెహ్తాన్.

12 పెరి పుజెరిజు, పెద్దెల్జు వన్ని ముస్సు తపుజ్ మోప్పివెలె వాండ్రు ఇనికబా మరజి వెహ్ఎతాన్.

13 నస్తవలె పిలాతు, “వీరు నీ ముస్సు ఎసా తపుజ్ మోప్పినార్, యాకెజ్ విన్ఇతిదా?”, ఇజి వన్నిజ్ వెన్బాతాన్.

14 వాండ్రు వారు వెహ్తి మాటెఁఉండ్రి దనికబా మరజి ఇనికబా వెహ్ఎతాన్. అందెజె అతికారి నండో బమ్మ ఆతాన్.

15 పన్కవండోయ్దిజ్ జెలిదు మన్నివరి లోఇ, లోకుర్ కోరజిని ఒరెన్ వన్నిజ్ విడుదల కిని అలవాటు అతికారిజ్ మనాద్.

16 అయావలె బరాబ ఇని ఒరెన్ మూర్కతం మన్ని అన్నయ వాండ్రుననికాన్ ఒరెన్ జెలిదు మహాన్.

17 అందెజె లోకుర్ విజెరె కూడఁజి వాతివెలె పిలాతు, “నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బానా, సిల్లిజి క్రీస్తు ఇజి కూకె ఆజిని యేసుజా?”, ఇజి వరిజ్ వెన్బాతార్.

18 వారు యేసు ముస్సు గోస ఆతారె వన్నిజ్ ఒవజెప్త మనార్ ఇజి వాండ్రు నెస్త మనాన్.

19 పిలాతు నాయం తీరిన్ని బాడిఁదు బన్సి మహివలె వన్ని ఆల్సి, “ఇని తప్పబా సిల్లి అయా నెగ్గివన్నిజ్ ఇనికబా కిదెజ్ నీను కూడఁదెజ్ ఆవిద్. వన్ని వందిజ్ నేండ్రు ఉండ్రి కలాదు నాను నండో బాద కల్లిత మన”, ఇజి వన్నిజ్ కబ్బురు పొక్తాద్.

20 పెరి పుజెరిజుని పెద్దెల్జు, బరబ్బెజ్ డిఁసి సీజి యేసుజ్ సప్తెజ్ ఇజి అతికారి ఒప్పిలెకెండ్ వెహ్తాజ్ ఇజి లోకురిజ్ రేప్పి మహార్.

21 “యా రివర్ లోఇ ఎయెరిజ్ నాను డిఁస్తెజ్ ఇజి మీరు కోరిజినిదెర్?”, ఇజి అతికారి వరిజ్ వెన్బాతిజ్, “బరబ్బెజ్నె”, ఇజి వారు మరజి వెహ్తార్.

22 “అహిజి క్రీస్తు ఇజి కూకె ఆజిని యేసుజ్ నాను ఇనిక కిదెజ్?”, ఇజి వరిజ్ వెన్బాతిజ్ “వన్నిజ్ సిలువ పొక్అ”, ఇజి విజెరె వెహ్తార్.

23 “ఎందానిజ్ వన్నిజ్ సిలువ పొక్తెజ్, వాండ్రు ఇని తపు పణి కితాన్?”, ఇజి పిలాతు వరిజ్ వెహ్తాజ్, “వన్నిజ్ సిలువ పొక్అ”, ఇజి మరి ఒదె వారు డేల్సి వెహ్తార్.

* 27:9-10 27:9-10 జేకరి 11:12,13; యిర్మీయా 19:1-13; 32:6-9.

24 గగోలినె లావ్ ఆజినిక ఆవండ మరి ఇనికబా కిదెజ్ అట్ ఏవ్ ఇజి నెస్తాండ్రె పిలాతు, లోకుర్ విజెరె ఎద్రు ఏరు లోసి వన్ని కికు నోర్ బజి, “ఇని తప్పసిల్లి వన్ని నలదిజ్ నజి ఇని సమందం సిల్లె, మిజినె సమందం మనాద్”, ఇజి వెప్టోన్.

25 అందెజె లోకుర్ విజెరె, “వన్ని నల మా ముస్కుని మా కొడోర్ ముస్కు మనీద్*”, ఇజి మర్జి వెప్టోర్.

26 నస్తవలె వారు కోరితి లెకెండెనె వాండ్రు బరాబెజ్ వరి వందిజ్ డిస్తె సితాన్. గాని యేసుజ్ కొరడెజాణిజ్ డెయెజి సిలువ పొక్కెజ్ ఒపజెప్టాన్.

నయనమ్దికార్ యేసుజ్ వెక్రిసినార్.

27 నస్తవలె అతికారి నయనమ్దికార్ యేసుజ్ వారు బత్తిజిని ప్రిటోరియం ఇని ఇండ్రో ఒతారె, నయనమ్దికార్ విజెరె వన్ని సుటులం కూడితార్.

28 వారు వన్ని నీరి సొకెజ్ లాగితారె మరి ఉండ్రె ఎరాని నీరి సొక వన్నిజ్ తొడుగిస్తాతార్.

29 వారు సొప్పాణిజ్ అటారె ఉండ్రె టోపి తయార్ కిజి వన్ని బురాదు ఇట్టార్. ఉండ్రె డుడు వన్ని ఉణిర్ కియుదు అస్పిస్తారె వన్ని ఎద్రు మూణుకుజ్ ఉణిర్ జి, “యూదురిజ్ రాజు ఆతికి గెలిన్ అ”, ఇజి వెప్పి వన్నిజ్ వెక్రిస్తార్.

30 వన్ని ముస్కు పూసి, అయ డుడు లాగ్గి వన్ని బురాదు మరి మరి డెయ్ తార్.

31 వన్నిజ్ వెక్రిసి విజితి వెనుక వన్నిజ్ తొడుగిస్తె మహి నీరి సొక్క లాగితారె, వన్ని నీరి సొక్కెజ్ తొడిగిస్తారె సిలువ పొక్కెజ్ వారు వన్నిజ్ ఒత్తార్.

యేసు సిలువ పోకె ఆజినాన్

32 వారు సొన్ని మహివలె కురెనియ ఇని పట్టుమ్దికాన్ సీమోను ఇని ఒరెన్ వన్నిజ్ సుడతారె, సిలువ పిండెడెజ్ వన్నిజ్ బలవంతం కితార్.

33 బుర్ర పెణకి ఇని అర్దం ఆని పేరుమని గోల్ గోత్త ఇని బాడిడు వాతార్.

34 అబె సేందు కలప్తి ద్రాస కడు వన్నిజ్ ఉండెజ్ సీత్తార్ గాని వాండ్రు కెవితాన్,

35 వన్నిజ్ సిలువ పొక్తి వెనుక వన్ని సొక్కెజ్ ఎయెరిజ్ దోహ్ క్షె ఇజి నెస్తెజ్ సీటిజ్ పొక్తారె వన్ని సొక్కెజ్ సీబె ఆతార్.

36 దన్ని వెనుక వారు అబ్బె బసి వన్నిజ్ కాపకిజి మహార్.

37 “వీండ్రు యూదురిజ్ రాజు ఆతి యేసు”, ఇజి వాండ్రు కితి తపు రాసి వన్ని బురాదిజ్ ముస్కు ఇట్టార్.

38 వన్ని ఉణెర్ పడకాదు ఒరెన్ వన్నిజ్, వన్ని డేబ్రు పడకాదు ఒరెన్ వన్నిజ్ రిఎర్ డొజారిజి వన్ని వెట సిలువ పొక్తార్.

39-40 అయ సర్దు సానికార్ విజెరె బుర్ర దుక్కి, “దేవుణు గుడిడిజ్ అర్ ప్పి మూండ్రె దినమ్ కాజ్ మర్జి తొప్పొక్కి, నీను దేవుణు మరిసి ఇహిజి నిజి నీనె రక్సిన్ అ, సిలువదాన్ డిగెజ్ రఅ”, ఇజి వన్నిజ్ పడిఎండ సెఇ మటిజ్ వెప్పి మహార్.

41 అయ లెకెండెనెనె, పెరి పుజెరిజు, లోకురి వెద్దెల్ జి, దేవుణు మోసెజ్ సీతి రూలుజ్ నెస్పిస్సికార్ విజెరె వన్నిజ్ వెక్రిస్తార్.

42 “వీండ్రు మహి వరిజ్ తప్తిస్తాన్, గాని వన్నిజ్ వాండ్రె తప్పె ఆదెజ్ అట్ ఏతాన్. వాండ్రు ఇస్తాయేలుది రాజు ఇహాన్. ఏలు వాండ్రు సిలువ ముస్కుహాన్ డిగితిజి వన్నిజ్ మాపు నమినావ్.

* 27:25 27:25 వన్ని నల మా ముస్కుని మా కొడోర్ ముస్కు రవిద్ - తెలుగు

43 వాండ్రు దేవుణు మున్ను, నమకం ఇట్టాన్. “నాను దేవుణు మరిసి’ ఇజి వెహ్లాన్. అందెజి దేవుణుదిజ్ వన్నిజ్ సీలువదాన్ రక్సిస్సాండ్రా, ఇజి మాటు సూణాట్ దేవుణు వన్నిజ్ తప్పిసీన్ ఇజి వారు వెహ్లాన్.

44 అయా లెకెండెనె వన్నివెట సీలువ షొకె ఆతి మని డోజారిజ్బా వన్నిజ్ వెక్రిస్తార్.

యేసు సీలువాదు సాజినాన్

45 మదెనమ్దాన్ మూండ్రీ గంటెజ్దాక దేసెం విజు సీకటి ఆతాద్.

46 డగ్రు మూండ్రీ గంటెజ్ఆతివెలె యేసు, “ఏలి, ఏలి లమ సబక్తాని”, ఇజి నండో డేల్నివెహ్లాన్. “నా దేవుణు, నా దేవుణు సజి ఎందనిజ్కియు డిసి?”,* ఇజి యా మాటదిజ్ అర్దం.

47 అబ్బె నిహి మహికార్ సెగొండార్ యా మాట విహారె, “వాండ్రు ఏలియెజ్ కూక్సినాన్”, ఇజి వెహ్లాన్.

48 వెటనె వరి లోఇ ఒరెన్ ఉహ్కొక్సి సొన్ని దూది తత్తాండ్రె పులాని రసమ్దు ముడుక్సి యేసుజ్ ఉండెజ్ ఉండ్రీ డుడుదాన్ వన్ని వెయ్దు అందిస్తాన్.

49 మహికార్”, ఇనిక కిమ, ఏలియ వాజి వన్నిజ్ తప్పిస్సాన్సు, సూణాట్”, ఇజి వెహ్లాన్.

50 యేసు మరి డటం డేల్స్తాండ్రె పాణం డిస్తాన్.

51 అయ గడియోదానె దేవుణు గుడిడు మని తెర మున్నుహాన్ అడ్డి దాక కింజితాదె రుండి ముకెజ్ ఆతె. బూమి కద్దితాద్. సటుజ్బదెజ్ ఆతె.

52 ద్రూక్సిజ్ రే ఆతెనె ముజాల సాతి మహి నీతి నిజాయితి మనికార్ నండొండార్ ఒడొల్దాన్ మర్జి నీజీతార్.

53 వారు ద్రూక్సిజాణిజ్ వెల్లి వాజి, యేసు సాతి వరిబాణిజ్ మర్జి నిజీతి వెనుక దేవుణు వన్నివందిజ్ కేట కిత్తి పట్టుమ్దు† సొన్ని నండొండారిజ్ తోరె ఆతార్.

54 సదాతిపతి‡ వెటయేసుజ్ కావ్కిజి మహికార్ బూమి కద్దినిక, మరి జర్గితెకజ్ విజు సుడొజి నండో తియెల్ ఆతార్. “వీండ్రు, నిజమె దేవుణు మరిసినె”, ఇజి వెహ్లాన్.

55 నండొండెక్ బోదెక్ కండెక్ దూరమ్దాన్ సుడొజి మహె. వారు యేసుజ్ అవ్సరం ఆతికెజ్ కిజి గలీలయదాన్ వన్నివెట వాతికెజ్.

56 వన్యా లోఇ మగ్గలెనె మరియాని, యాకోబు, యోసె ఇని వరి అయ్సి ఆతి మరియని జెబెదాయి మరిసిరిజ్ అయ్సి బానె మహార్.

యేసుజ్ మూస్సిక

57-58 యేసుజ్ లోజిజి మనికానాతి అరిమతా ఇని పట్టుమ్దికాన్ యోసేపు ఇని ఒరెన్ ఆస్తి మన్నికాన్. పొద్దు ఆతివెలె, వాండ్రు పిలాతు డగ్రు సొహండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సితాన్.

59 యోసేపు అయ ఒడొల్ లొస్తాండ్రె నెగ్గి తెలాని పాతెజాణిజ్‡ సుటిసి, సటుదిజ్ దొల్పిస్సి, వన్ని వందిజ్ తయార్ కితి మహి కొత్త దూకిదు ఇడొతాన్.

60 ఉండ్రీ గుండ్రాని సెప్ట పణకు సడిపిసి దూకిదిజ్ అడు కితాండ్రె సొహాన్.

61 మగ్గలెనె మరియాని మరి ఉండ్రీ మరియ అబ్బె దూకిదిజ్ ఎద్రు బస్తెమహె.

* 27:46 27:46 క్రిస్ట 22:1. † 27:53 27:53 యెరూసలేం. ‡ 27:54 27:54 సయన్మమిది వంద మణిసిరిజ్ నడిపిసినికాన్. § 27:59 27:59 ఉండ్రీ రకం గొప్పు విలువాతి సునాజ్ మన్ని పాతెజ్.

దూకిదిజ్ కాప్ కిజినార్.

62-63 మర్సనాండిజ్, ఇహిజ విస్త్రాంతిదినం వందిజ్ తయార్ ఆని దినం వెనుక, పెరి పుజెరిజుని, పరిసయరు పిలాతు డగ్రు కూడేజి వాతారె, “బాబు, అయ అబద్దం వెప్పి మొసెం కితికాన్ బత్తితి మహివలె, “మూండ్రి దినమ్కు ఆతి వెనుక నాను మర్జి నీజ్నాలె’ ఇజి వెప్తి మహిక మజి ఎతు మనాద్.

64 అందెజె మూండ్రి దినమ్కుదాక దూకిదిజ్ నెగెండ సుడేదెజ్ ఆడ్ర సిఅ. సిల్లిజి వన్ని సిసూర్ వాజి వన్నిజ్ పెర్జి ఒసి, వాండ్రు సాతి వరి బాణిజ్ మర్జి నిజితాన్, ఇజి లోకురిజ్ వెప్పార్. ఆహా కితిజి కడేవెరిదిక మొదోహిదనిజ్ ఇంక మరి ఒదె మొసెం ఆనాద్”, ఇజి వెప్టార్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిదెజ్అట్టి లెకెండ్ దూకిదిజ్ జాగర్త కాప్కిదు”, ఇజి వరిజ్ వెప్టాన్.

66 వారు సొన్ని అయ దూకిదిజ్సీలు పొక్కిస్తారె, జాగర్త సుడేదెజ్ కాప్ కిని వరిజ్బ ఇడేతారె.

28

యేసు మర్జి నిజిజినాన్

1 విస్త్రాంతిదినం గడస్తి సొహి వెనుక, వారమ్దిజ్ మొదోహి దినమ్దు జాయ్అజి మహివలె, మగ్గలెనె మరియాని మరి ఉండ్రి మరియ దూకిదు సుడేదెజ్ సొహార్.

2 వెటనె బూమి కడ్లితాద్. ఎందనిజ్ ఇహిజ పరలోకమ్దాన్ ఒరెన్ దేవుణు దూత డిగిత వాత్తాండ్రి అడు మహి పణుకు ఎర్లిసి దని ముస్సు బప్త మహాన్.

3 అయ దూత ఒడోల్ మిర్సిని జాయ్లెకెండ్ మహాద్. వన్ని సొక్కెజ్ గాందులెకెండ్ తెలాజ్ మహా.

4 వన్నిజ్ సుడేజి కాప్ కినికార్ తియెల్ ఆతారె వణక్సి వరి పాణం సొహి లెకెండ్ఆత మహార్.

5 దేవుణు దూత అయ బోదెకాజ్ సుడేజి, “మీరు తియెల్ ఆమాట్. సిలువ పొకె ఆతిమన్ని యేసుజ్ మీరు రెబాజనిదెర్ ఇజి నాను నెసిన.

6 వాండ్రు ఇబ్బె సిల్లెన్. వాండ్రు వెప్తి లెకెండ్నె మర్జి నిజితాన్. రదు, వాండ్రు గూర్తిమహి బాడిః సుడేదు.

7 మీరు బేగి సొన్ని వాండ్రు సాతి వరిబాణిజ్ మర్జి నిక్తాన్. వాండ్రు మిజి ఇంక ముజాల గలీలయ సొన్నినాన్. మీరు అబ్బె వన్నిజ్ దనూల్ ఆనిదెర్, ఇజి వన్ని సిసూరిజ్ వెప్టు. ఇదిలో యాక ఏలు నాను మిజి వెప్పిన ఇజి వరిజ్ వెప్టాన్.

8 అందెజె అవిక్ తియెల్ ఆజి గొప్ప సర్దదాన్ వన్ని సిసూర్జి యా మాటేజ్ వెప్టాజ్ ఉహ్కీ సొహె.

9 వెటనె యేసు వన్కా ఎర్దు తోరె ఆతాండ్రి, “మిజి నెగెండ్ మనిద్”, ఇజి వెప్టాన్. అవిక్ వన్ని డగ్రు వాజి పాదమ్కు అసి వన్నిజ్ పడ్గి మాడిఃస్తె.

10 నస్తివలె యేసు, “మీరు తియెల్ ఆమాట్. మీరు సొన్ని నా కూలెజి వెట గలీలయదు సొండ్రు ఇజి వెప్టు. వారు అబె నజి దనూల్ ఆనారె”, ఇజి వనకాజ్ వెప్టాన్.

11 అవిక్ సొన్నిమహిజ్, దూకిదిజ్ కాప్కిజి మహికార్ నెగెండ్ డార్ పట్టుమ్దు సొహారె, జర్రితి సజతిజ్ విజు పెరి పుజెరిజి వెట వెప్టార్.

12-13 అందెజె వారు లోకురి పెద్దెల్జ వెట కూడ్జి వాతారె ఉండ్రీ ఆలోసనం కితార్. వారు అయ సయనమ్ది వరిజ్ నండొ డబ్బుజ్ సితారె, “మాపు నిద్ర కిజి మహివలె వన్ని సిసూర్ మదరెతు వాతారె వన్నిజ్ పెహ్టా ఒతార్ ఇజి మీరు వెహ్టల.

14 యా మాట అతికారి గిబ్బిదు సొహిజ మాపు వన్నివెట వర్గిజి మిజీ ఇనికబా రెవిండ నూణావ్లె”, ఇజి వరిజ్ వెహ్టార్.

15 అందెజె అయ సయనమ్దికార్ డబ్బు అస్తారె వరిజ్ వెహ్టావజనె కితార్. యా డొజకత ఏలుబా యూదురి లొఇ సాటె ఆజినె మంజినాద్.

16 పదకొండు మన్ని సిసూర్ యేసు వరిజ్ వెహ్టా మన్ని గలీలయాది గొరొత్ సాహార్.

17 వారు వన్నిజ్ సుడ్జితిజ్ వన్నిజ్ పొగ్డిజి మాడిస్తార్. గాని సెగొండార్ అనుమానం ఆతార్.

18 నస్తివలె యేసు వరి డగ్గు వాతండ్రె, “పరలోకమ్దుని బూమి ముస్కు విజు అతికారమ్కు దేవుణు నజీ సిత మనాన్.

19 అందెజె మీరు సొన్ని విజు జాతిజాణి వరిజ్ నా సిసూర్ కిదు. బుబ్బు పేరుదాన్, మరిన్ పేరుదాన్, దేవుణు ఆత్మ పేరుదాన్ వరిజ్ బాప్తిసం సిదు.

20 మరి నాను మిజీ ఆగ్గు సితెలెకెండ, నాను మిజీ నెన్పిస్తి విజు వనకాజ్లోజిజి మండ్రెజ్ ఇజి వరిజ్ నెస్పిస్తు. ఇదిలో నాను యా లోకమ్ది ఆక్కర్ దాక ఎలాకాలం తప్విండ మీవెట మంజిన”, ఇజి వరిజ్ వెహ్టాన్.

మార్కు రాస్తి సువార్త

నెల్వ కిబిసినిక

యా పుస్తకం రాస్తికాన్ మార్కు. వీండు బర్నబెజ్ దడుదికాన్. విన్నిజ్ మరి ఉండ్రి పేరు యోహాను ఇజిబా కూక్నార్. బర్నబని పవులు నెల్వదాన్ పేతురువెట కూడఃజి క్రీస్తు సేవపణి కిదెజ్ మార్కుజ్ అవ్కాసం దోహ్కాద్. యా సువార్త రాస్తిజ్ పేతురుబాణిజ్ నెస్టాండ్రె రాస్టాన్ ఇజి అర్దమాజినాద్. రాస్తి కాలం క్రీస్తు యా లోకమ్దు వాజి సాజి మర్రి నిజితివెనుక సెగం పంటజ్ గడఃస్తివెనుక రాస్టాన్. ముకెలమతిక, క్రీస్తు గొప్ప పెరి బమ్మాతి పణిజ్ కిత్తి దేవుణు మరిసి ఇజి, దేవుణుదిజ్ సేవ కితికాన్ ఇజి, మార్కు రాసి తోరిస్టాన్. క్రీస్తు వెప్తి బోదదిజ్ ఇంక క్రీస్తు కిత్తి బమ్మాతి గొప్ప పెరి పణిజి వందిజ్ లావు వెప్పి రాస్త మనాన్. క్రీస్తు కిత్తి గొప్ప పెరి బమ్మాతి పణిజ్ పద్దెనిమితి రాస్త మనాన్. నాలిగినె కతెజ్వజి రాస్టాన్.

యోహాను దేవుణు మాటసాటిసినాన్

1 దేవుణు మరిసి ఆతి యేసు క్రీస్తు* వందిజ్ సువార్త ఇబ్బె మొదోల్సినాద్.

2 పూర్బ దినమ్కాజ్ ముజాల్ దేవుణు వన్ని మరిసిజ్ వెప్తి మాటజ్ యెసయ ప్రవక్త ఈహు రాస్త మహాన్. “ఇదిలో, నాను నా కబ్బు తన్నివన్నిజ్ నీ ముజాల పోక్సిన. లోకు నిజి డ్గరు కిదెజ్ ఇజి వాండ్రు నీ ముందల నీ సరి నెగెండ కినాన్†.

3 బిడిఃమ్బూమిదాన్ వాండ్రు ఈహు డేల్పి వెప్పినాన్ ప్రబుజ్ లోకుడగు వాదెజ్ సరి తయర్కిదు. ప్రబుజ్ లోకుడగు వాదెజ్సరి తినాజ్ కిదు‡”.

4 యెసయ ప్రవక్త వెప్తివజి యోహాను బిడిఃజ్ బూమిదు వాతాన్. “లోకుర్ పాపమ్కు డిఃసిసిజి బాప్తినం లాగె ఆదు. దేవుణు పాపమ్కు సెమిస్సాన్ ఇజి వెప్పి యోహాను బానె లోకాజ్ బాప్తినం సీజి మహాన్.

యేసు బాప్తినం లాగె ఆజినాన్

5 యూదయ దేసెమ్దికార్ విజెరె, యెరూసలేం పట్టుమ్దికార్ విజెరె సోత్తారె యోహాను డగు వాతార్. వారు పాపమ్కు ఒప్ప కొటార్. యోహాను వరిజ్ యొర్దాన్ గడ్డాదు బాప్తినం సితాన్.

6 యోహాను ఒంటె బులుస్కాణిజ్ తయార్ కిత్తి సొక్క పొర్పాజి, నడఃముదు తోలు బెల్లు తొప్తా మహాన్. వాండ్రు మెపిలెక్కి అడిఃవి తేనె తింజి మహాన్.

7 యోహాను లోకాజ్ ఈహు వెప్పి వెప్తాన్, “నా వెనుక ఒరెన్ వానాన్లె. వాండ్రు నజీ మిస్తి నండో పెరికాన్. వన్ని జోడు బెల్టు కూతెజ్బా నాను ఏపటితికాన్ ఆవి.

8 నాను మిజి ఏరుదు బాప్తినం సీజిన. నా వెనుక వానికాన్ దేవుణు ఆత్మదాన్ బాప్తినం సీనాన్లె”.

9 ఆ దినమ్కాజ్ ఒర్నెండు యేసు గలీలయదు మన్ని నజరేతుదాన్ యొర్దాన్ గడ్డాదు వాతాన్. అబ్బె యోహాను యేసుజ్ యొర్దాను గడ్డాదు బాప్తినం సితాన్.

* 1:1 1:1 లోకాజ్ రక్సిస్టెజ్ దేవుణు వీర్పాటు పోక్కికాన్. † 1:2 1:2 మలాకి 3:1. ‡ 1:3 1:3 యెసయ 40:3.

10 గడ్డదాన్ వెల్లి వాజిమహిజ్ ఆగాసం రే ఆతాదె దేవుణు ఆత్మ పావరపొటి లెకెండ్ వన్ని ముస్కు వానిక యేసు సుడఃతాన్.

11 “నీను నాను ప్రేమినిని నా మరిన్. నీ వందిజ్ నాను నండో సర్ద ఆజిన”, ఇజి పరలోకమ్దాన్ ఉండ్రి కంటం వాతాద్.

12 వెటనె దేవుణు ఆత్మ యేసుజ్ బిడిఃమ్ బూమిదు పోక్తాన్.

13 వాండ్రు అబ్బె నలపయ్ రోస్కు రెయుపొగల్ మహాన్. సయ్తూన్ యేసుజ్ తప్ప కిబిస్తైజ్ పరిస కిజి సుడఃతాన్. అబ్బె అడిఃవి జంతుజ్ వెట మహాన్. దేవుణుదూతార్ వన్నిజ్ నెగెండ్ సుడఃతార్.

యేసు సిసూరిజ్ కూక్సినాన్.

14 హేరోదు రాజు యోహానుజ్ జెలిదు ఇడిఃతివెనుక యేసు గలీలయదు సొహాండ్రె దేవుణుసువార్త బోదిస్తాన్.

15 “దేవుణు ముజాల్నె ఏర్పాటు కిత్తి టయం ఏలు వాతాద్. దేవుణు ఏలుబడిః కిని గడిఃయ డగ్రు ఆత మనాద్. మీ పాపమ్కు ఒప్పకొడిఃజి డిఃసిసిదు, నాను వెహ్పి సువార్త నమ్మిదు”, ఇజి యేసు వరిజ్ బోదిస్తాన్.

16 యేసు గలీలయ సమ్దరం ఒడ్డుదాన్ సొన్నిమహిజ్ సీమోనుజ్ని వన్నితంబెర్సియాతి అంద్రెయెజ్ సుడఃతాన్ వారు సమ్దరమ్దు వల పొక్సి మొయేజ్ అసి మహార్. ఎందానిజ్ ఇహిజు వారు జాలెరిజు.

17 “నా వెట రదు. లోకాజ్ ఎలాగ నా సిసూర్ కిదెజ్ ఇజి నెస్పిస్తాలె”, ఇజి యేసు వరిజ్ వెహ్తాన్.

18 వారు వెటనె వలేజ్డిఃసి వన్నివెట సొహార్.

19 యేసు కండెక్ దూరం నడిఃజి సొహిజ్ జెబెదెయ మరిసి యాకోబుని, యాకోబు తంబెర్సి యోహాను, పరిడోణిదు బని వలేజ్ నెగెండ్ కిజి మహిక సుడఃతాన్.

20 యేసు వరిజ్ సుడఃతివెటనె కూక్తాన్. వారు అప్పొసిజ్, వన్నివెట కూడఃజి పణికినివరిజ్ డోణిదు డిఃసి యేసువెట సొహార్.

యేసు దెయమ్దిజ్ ఉల్ప్పినాన్

21 యేసుని వన్నిసిసూర్, కపెర్నూహము ఇని పట్టుమ్దు సొహార్. విస్త్రాంతిదినమ్దు యేసు యూదురి మీటిజ్ ఇండ్రొ సొహాండ్రె నేర్పిస్తైజ్ మొదొల్స్తాన్.

22 యేసు నెస్పిస్తిక విహారె లోకుర్ నండో బమ్మ ఆతార్. ఎందానిజ్ ఇహిజు యూదురి రూలు నెస్పిస్తివరి లెకెండ్ ఆఎండ నండో అతికారమ్దాన్ మన్ని వన్నలెకెండ్ నెన్పిస్తాన్.

23 నస్తివలె వరి మీటిజ్ ఇండ్రొ దెయం అస్తి మహికాన్ ఒరెన్ మహాన్.

24 వాండ్రు “నజరేతుదికి యేసు, మా వెట నిజి ఇని పణి? మా పణి విజు అడు కిదెజ్ వాతిదా? నీను ఎయెండ్రొ ఇజి నాను నెసిన. నీను దేవుణు బాణిజ్ వాతి నెగ్గి వాండ్రు”, ఇజి డటం గగోలాజి వెహ్తాన్.

25 అందెజె యేసు, “అల్లెజి మన్అ. విన్నిజ్ డిఃసి వెల్లి రఅ”, ఇజి ఆ దెయమ్దిజ్ కోపం దాన్ వెహ్తాన్.

26 అయవలె అయ దెయం అది అస్తిమహివన్నిజ్ దూక్సి డట్టం డేల్స్తాదె డిఃస్త సొహాద్.

27 అబ్బె మనికార్ విజేరె ఇక నుడఃతారె నండొ బమ్మ ఆతార్. “ఇక ఇనిక? వీండ్రు కొత్త సజతిజ్ నెర్పిసినాన్. దేవుణు సత్తు దాన్ అతికారమ్దాన్ వీండ్రు సాన్అ ఇజి దెయమ్కాజ్ వెప్పినాన్. అవి డిఃసి సొన్సినె”, ఇజి ఒరెన్ వెట ఒరెన్ వర్గితార్.

28 వన్ని వందిజ్ మాటజ్ అయా గలీలయ ప్రాంతం నుటుల విజు వెటనె సెద్రితె.

యేసు నండొండొరిజ్ నెగెండొ కిజినాన్.

29 వారు మీటిజ్ కిని ఇండ్రొణాజ్ సొన్సి యాకోబు, యోహానువెట, కూడిఃతారె సీమోను, అంద్రెయ ఇని వరి ఇండ్రొ సొహార్.

30 సీమోను మీమ్మి నోబు అస్త మహాద్. వారు వెటనె దని వందిజ్ యేసు వెట వెహ్టార్.

31 యేసు దని డగ్రు వాజి కీదిజ్అసి దనిజ్నిక్తాన్. నస్తవలె నోబు డిఃస్తాద్. నోబు డిఃస్తిజ్ అది వరిజ్ ఉండెజ్ సితాద్.

32 పొద్దు సొహి అతివలె లోకుర్ నండొ నండొ రకమ్కాణిజ్ బాద ఆజి మహివరిజ్ దెయమ్కు అస్తివరిజ్ విజెరిజ్ యేసు డగ్రు తత్తార్.

33 పటనమ్దికార్ విజేరె ఆ ఇల్లు ముజాల్ కూడిఃత మహార్.

34 యేసు నండొ రకమ్కాణి జబ్బుమహి నండొండొరిజ్ నెగెండొ కిత్తాన్. దెయం అస్తివరిబాణిజ్ వన్కాజ్ ఉల్ప్తాన్. వీండ్రు దేవుణు మరిసి ఇజి దెయమ్కు నెస్తె మహె అందెజి వాండ్రు వన్కాజ్ వర్గివండొ కిత్తాన్.

యేసు గలీలయదు సాటిసినాన్

35 మర్చ నాండిజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రెబాడ్డిదు సొహండ్రె పార్గనం కితాన్.

36 సీమోను, వన్ని వెట మహికార్, యేసుజ్రెబాజి మహార్.

37-38 యేసుజ్ నుడఃతారె, “విజేరె నిజి రెబాజినార్”, ఇజి వెప్తిజ్ యేసు, “డగ్రు మని మరి పట్టుమ్కాజ్బా సొనాట్. నాను అబెబా దేవుణు మాటజ్ సాటిస్తెజ్వులె. దన్ని వందిజె నాను వాత మన్న”, ఇజి వెహ్టాన్.

39 యేసు గలీలయ విజు బూలాజి యూదురు మీటిజ్ కిని ఇల్కాజ్ బోదిస్తాన్. దెయం అస్తి వరిబాణిజ్ వన్కాజ్ ఉల్ప్తాన్.

యేసుప కుస్తు రోగం ఆతివన్నిజ్నెగెండొ కిజినాన్.

40 ఒరెన్ కుస్తు రోగం మనికాన్ యేసు డగ్రు వాజి ముణుకుజ్ ఉఃరిజి, “నిజి ఇన్ఱం మహిజు నజి నెగెండొ కిదెజ్ అట్ని”, ఇజి బతిమాలితాన్.

41 యేసు వన్ని ముస్కు కనికారం ఆజి కియు సొప్పి వన్నిజ్ ముట్టి, “నజి ఇన్ఱమ్నె, నీను నగెండొ ఆఅ”, ఇజి వెహ్టాన్.

42 వెటనె వన్నిజ్ మహి జబ్బు డిఃస్తాద్. వాండ్రు నెగెండొ ఆతాన్.

43-44 అయవలె యేసు, “ఎయెవెటబా ఇనికబా వెహ్టా. నీను తినాజ్ సొన్సి నీ ఒడొఃల్యూద పుజేరిజ్ తోరిన్అ. నీను నెగెండొఆతి వందిజ్ మోసె ముజాల్ ఆడ్ర సితివజి దేవుణుదిజ్సంత సిఅ” అహె నీను నెగెండొ ఆతి ఇజి లోకురిజ్ తోరిన్అ”, ఇజి కసితం వెప్పి పోక్తాన్.

45 గాని ఆ నెగెండొఆతికాన్ సొన్సి వాండ్రు నెగెండొఆతిక విజేరిజ్ మరి ఒద్దె వెహ్టాన్. అహిజ్బా విజుబాణిజ్ నండొ లోకుర్ యేసుబాన్ వాతార్.

2

యేసు కిక్కు కాల్కు అర్తివన్నిజ్ నగెండ్ కిజినాన్

1 సెగం రోస్కు ఆతి వెనుక యేసు మరి కపెర్నూహముదు వాతాన్. వాండ్రు ఇండ్రో వాతాన్ ఇని విజెరె వెహార్.

2 నండో లోకుర్ బాన్ కూడిజి వాతార్. అస్సెజ్ అట్ ఇ లోకుర్ వాతార్. అందెజె ఇల్లు లోఇబా అర్ జుదుబా బాడ్డిః సిల్లెండ ఆతాద్, యేసు వరిజ్ దేవుణు మాటెజ్ బోదిస్తాన్.

3 కికు కాల్కు అర్తి వన్నిజ్* నాల్ ఏర్ పిండిత తతారె సెగొండార్ యేసుబాన్ వాతార్.

4 అబ్బె నండో లోకుర్ మహిజ్ వన్నిజ్ యేసు డగ్రు ఒతెజ్ అట్ ఏండ ఆతార్. అందెజె యేసు నిహిమహి జాగముస్కు మెడదిజ్ బోరోకితారె ఆ జబ్బు ఆతివన్నిజ్ సాపదాన్ యేసు నిల్పిమహిబాన్ డిప్టార్†.

5 వన్నిముస్కు మని వరి నమకం సుడఃతాండ్రె, యేసు జబ్బు ఆతివన్నివెట కూలయెజ్ నీ పాపమ్ కు సెమి ఆతె మన్నె”, ఇజి వెహ్తాన్.

6 అబ్బె సెగొండార్ యూదురి రూలు నేర్పిస్సికార్ బస్త మహార్. వారు మనుస్సుదు.

7 వీండ్రు ఎందానిజ్ ఈహు వెప్పినాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసిసినాన్. దేవుణు ఒరేండ్రె పాపమ్ కు సెమిస్సికాన్ గదె”, ఇజి వారు ఒడిజిబితార్.

8 వారు ఈహు ఒడిజిబినిక యేసుజ్ వెటనె తెలితాద్. యేసు వరిజ్ వెహ్తాన్, “ఎందానిజ్ మీరు మీ మనుస్సుదు అహె ఒడిజిబినిదెరె?

9 యా జబ్బుది వన్నిజ్ నీ పాపమ్ కు సెమ ఆతె మన్నె ఇజి వెప్పిక సులునా? నీను నిజ్ జి సాప పెరె నడిఃఅ ఇజి వెప్పిక సులునా?

10-11 లోకు మరిసి ఆతి నజి లోకురి పాపమ్ కు సెమిస్సెజ్ బూమి ముస్కు అతికారం మనాద్. ఇజి మీరు నెస్సెజ్ వలె ఇజి వెహ్తాండ్రె కిక్కు కాల్కు అర్తి వన్నిజ్ “నాను నిజి వెప్పిన, నిజ్ అ, నీ సాప అసి ఇండ్రో సొన్ అ”, ఇజి వెహ్తాన్.

12 వెటనె ఆ కిక్కు కాల్కు అర్తికాన్ నిజ్ జి వన్ని సాప అసి వారు విజెరె సుడఃజి మహిజ్ నడిఃజి సాహాన్. అక్క సుడిఃతారె వారు విజెరె బమ్మ ఆతార్. “నిన్ని పణి మాట్ ఎసెజ్ బా తోవట్” ఇహారె దేవుణుదిజ్ స్తుతి కితార్.

పను పెర్సికాన్ లేవిజ్ యేసు కూక్పినాన్

13 యేసు మరి గలీలయ సమ్ దరం గట్టుదు సాహాన్. లోకుర్ వన్ని డగ్రు వాతిజ్ వరిజ్ దేవుణు మాటెజ్ నెస్సిస్తాన్.

14 యేసు నడిఃజి సొన్ని మహిజ్ అల్ పయ్ ఇని వన్ని మరిసి లేవి‡ ఇని పను పెర్సికాన్ ఒరెన్ వన్ని ఆపిసుదు బస్తమహిక సుడఃతాన్. యేసు వన్నిజ్ “నీను నా సిసుడు ఆఅ. నా వెట రఅ”, ఇజి వెహ్తాన్. లేవి నిజిత్తాండ్రె యేసువెట సాహాన్.

15 వెనుక యేసు లేవి ఇండ్రో బోజెనమ్ దిజ్ బస్తాన్. సెఇ పణి కినికార్ అబ్బె మహార్. పను పెర్సికార్ వారు యూదురు వెప్తి రూలు వజ నడిఃఇకార్. ఎసాండారో లోకుర్ యేసువెట మహార్. వారుబా యేసు, వన్ని సిసూర్ వెట బోజెనమ్ దిజ్ బస్తాన్.

* 2:3 2:3 పక్వవయువు ఇనిజబ్బుదాన్ నడిఃదెజ్ అట్ నాన్ † 2:4 2:4 అయ దేనంతు మేడడెజ్ ఎలాగ తయార్ కినార్ ఇహిజ పటిజ్ పప్పి దన్నిముస్కు డుల్లిదాన్ పణుకుజ్ దాన్ మేడ పొక్కార్. మేడ ముస్కు ఎక్సెజ్ ఇహిజ పాపన్నుజ్ మన్నె ‡ 2:14 2:14 వన్నిజ్ మరి ఉండ్రె పేరు మత్తయి విన్ని పణి పన్నుపెర్సికాది.

16 పరిసయరు లోక మన్ని యూదురి రూలుజ్ నెన్పిన్నికార్ వనిజ్ సుడఃజి “ఎందనిజ్ వీండ్రు పన్నుపెర్నివరివెటని పాపం కినివరివెట ఉణిజినాన్”, ఇజి సిసూరిజ్ వెన్బాతార్.

17 యేసు ఆ మాట వెంజి “నెగెండ్ సిల్లివరిజ్ డాక్టరు కావాలి. నెగెండ్ మన్నివరిజ్ ఎందనిజ్లు మరి డాక్టరు. నీతి నిజమాతి మన్నివరిజ్ అవద్. పాపం కితివరిజ్ కూక్కై నాను వాత మన్ను, ఇహాన్.

ఉపాస్ వందిజ్ యేసుజ్ వెన్బాతార్

18 అయవలె బాప్తీసం సిని యోహాను సిసూరిని, పరిసయరు, యూదురి రూలువజి ఉపాస్కిజి మహార్. సెగెండార్ లోకుర్ వాజి యేసుజ్ వెన్బాతార్, “యోహాను సిసూర్ ఉపాస్కిజినార్, పరిసయరి సిసూర్ ఉపాస్కిజినార్, ఎందనిజ్ నీ సిసూర్ ఉపాస్కివిర్?”.

19 యేసు ఈహు వెప్టాన్, “పెండ్లి కూలెజ్ పెండ్లిదజ్డఃవెట మన్నివెలె ఉపాస్ మండ్రెజ్ అట్టూరా? పెండ్లిదజ్డఃవరివెట మన్నివలె వారు ఉపాస్ మండ్రెజ్ అట్వీర్.

20 పెండ్లిదజ్డఃజ్ వరి నడిఃమిహాన్ ఒని దినం వానాద్లె. అయ రోజు వారు ఉపాస్మంజినార్.

21 యేసు మరి వెప్టాన్: “ఎయెర్బా పాడాయ్ పాతదు కొత్త ముక్క కూడఃప్పి గుత్వీర్. అహె కితిజి అయకొత్త పాత ముక్క వడాయి పాతదిజ్ లాగ్నాద్ బోరో ఒద్దె లావు అనాద్.

22 “ఎయెస్బా పడాయ్ తోలుసన్నిదు కొత్త ద్రాక్కుకలు వాక్వీన్. అహె కిత్తిజి కొత్త ద్రాక్కుకలు షాబు వాజి అయ సన్ని పెడెల్నాద్. ద్రాక్కుకలు విజి వాజ్న సొనాద్. సన్ని పాడునాద్. అందెజి కొత్త ద్రాక్కుకల్లు కొత్త తోలు సన్నిదునె వాక్కైజ్”.

యేసు విజు వన్కాజ్ మున్ను ప్రబు

23 ఉండ్రి విస్త్రాంతి దినమ్దు యేసుని సిసూర్ పంట గుడ్డెదాన్ నడిఃసి సొన్ని మహార్. అయవలె సిసూర్ సెరేక్ తెప్పి మహార్.

24 పరిసయరు అయక సుడఃతారె, “ఇదిలో ఎందనిజ్ వారు విస్త్రాంతి దినమ్దు రూలుదిజ్ తప్పినార్. ఇజి వన్నిజ్ వెప్టార్.

25 అయవలె యేసు వెప్టాన్, “దావీదురాజు, వన్నివెట మహి లోకుర్ బజి కట్టిజ్ వాండ్రు ఇనిక కిత్తాండ్రె ఇజి మీరు ఎసెజ్బా సద్విఇదెరా?

26 అబ్యూతారు ఇనికాన్. విజెరి పుజెరిజి మున్ను పెరి పుజెరి మహివలె దావీదురాజు సమాజి గుడారమ్దు డుఃగితాండ్రె, దేవుణు ఎద్దు ఇడ్డి రొట్టెజ్ లాగితాండ్రె తిహాన్. అక్క పుజెరి తప మరి ఎయరర్బా తిండ్రెజ్ అవద్ గాని తిహాండ్రె వన్నివెట మహివరిజ్బా సిత్తాన్.

27 వెనుక యేసు వరిజ్ వెప్టాన్, “ముజూల్ దేవుణు లోకుదిజ్ విస్త్రాంతిదినం ఏర్పాటు కిత్తాన్. గాని విస్త్రాంతి దినమ్వందిజ్ లోకుదిజ్ ఏర్పాటు కివీన్.

28 లోకుమరిసి ఆతి పిట్టి నజి విజు వన్కాజ్ మున్ను అతికారం మనాద్. మరి, విస్త్రాంతి దినమ్దు ఇనిక కిదెజ్ ఇజి లోకాజ్ వెప్టాజ్బా అతికారం మనాద్.

3

యేసు కియు అర్దివన్నిజ్ నెగెండ్ కిజినాన్

1 మరి యేసు యూదురి మీటిజ్ ఇండ్రో సొహాన్. అబె ఉండ్రీ కియు అర్దికాన్ ఒరెన్ మహాన్.

2 అబ్బె మహికార్ సెగొండార్ యేసు యా జబ్బుదివన్నిజ్ విస్త్రాంతిదినమ్దు నెగెండ్రీ కినాండ్రో ఇజి బాగ సుడిజి మహార్. ఎందనిజ్ ఇహిజి విస్త్రాంతిదినమ్దు ఇని పణిబా కిదెజ్ ఆవిద్ కాక యేసుజ్ ఇని దన్నిజ్బా తప్ప మొప్పైజ్ ఇజి సుడిజి మహార్.

3 యేసు కియు అర్దివన్నిజ్, “విజేరి ముజాల వాజి నిల్అ”, ఇజి వెప్తాన్.

4 నస్త్రవలె యేసు, “దేవుణు మోసెజ్ సితి రూలువజి విస్త్రాంతి దినమ్దు నెగ్గి పణి కిదెజా, సెఇ పణి కిదెజా? పాణం అర్ప్పైజ్నా? ఇజి వరిజ్ వెన్బాతాన్. గాని వారు అలెతార్.

5 పరి మన్సు గ్రాజిమహిజ్ యేసు నండో దుకం ఆతాన్. కోపం దాన్వరిజ్ సుడిజాన్. అయ కియు అర్దివన్నివెట, “నీ కియు సప్అ”, ఇజి వెప్తాన్. వాండ్రు కియు సాప్తిజ్ ఆ కియు నెగెణ్ ఆతాద్.

6 నస్త్రవలె పరిసయరు వెల్లి సొహి వెటనె హెరోది ఇని వరివెట కూడిజి యేసుజ్ ఎలాగ్నప్పైజ్ ఇజి ఆలోసనం కితార్.

యేసువెట మంద లోకుర్ సొన్నినార్

7 అందెజె యేసు వన్ని సిసూర్వెట గలీలయ సమ్దరంబాన్ సొహాన్. మందలోకుర్ గలీలయదాన్ వరివెనుక సొహార్.

8 యేసు కిత్తి గొప్ప పణిజి వెంజి యూదయ దేసెమ్దు మన్ని విజు నాహ్మాణికార్, యెరూసలేందాన్, సమ్దరం పడకాద్ తూరు సీదోసు ఇని పట్టుమి ప్రాంతమ్కాజ్ వాతి నండో లోకుర్ వన్నిబాన్ వాతార్.

9 నండో లోకుర్ వాజి మహిజ్ నిల్పిమండ్రెజ్ ఇహ్కు ఆజి దన్ని మున్సు అఎండ్ర మండ్రెజ్ ఉండ్రీ ఇజి డోణి తసి బానె ఇడదు ఇజి సిసూర్ వెట యేసు వెప్తాన్.

10 ఎందానిజ్ ఇహిజి నండొండారిజ్ యేసు నెగెణ్ కితాన్. అందెజె జబ్బు అతిమహికార్ విజేరె యేసుజ్ ముట్టైజ్ ఇజి నెక్కె ఆజి సొహార్.

11 దెయం అన్సికార్ యేసుజ్ సుడిజివెటనె వన్ని ముజాల్ ముణుకుజ్ ఊర్జి, పడగ్జి మాడిస్తారె “నీను దేవుణు మరిసి”, ఇజి గగోలాతార్.

12 “నాను ఎయెన్ ఇజి ఎయేర్వెట వెహ్మాట్”, ఇజి యేసు వరివెట కసితం ఆడ్ర సిత్తాన్.

యేసు పన్నెండు మణిసిరిజ్ అపొస్తురువజి ఏర్పాటు కిజినాన్.

13 వెనుక యేసు ఉండ్రీ గొరోత్ ఎక్కి సొహాండ్రె వన్నివెట ఒతెజ్ వాండ్రు కోరితివరిజ్ వన్ని డగ్గు కూక్తాన్. వారు వన్నిబాన్ సొహార్.

14 యేసు పన్నెండు మనిసిరిజ్ వన్నిబాన్ మండ్రెజ్ ఇజి, దేవుణు మాట విజేరిజ్ వెప్పివందిజ్ పొక్తైజ్ ఇజి ఏర్పాటు కిత్తాన్. (విరిజె అపొస్తురు ఇజి కూక్తాన్)

15 దెయమ్కాజ్ ఉల్పైజ్ అతికారం వరిజ్ సితాన్.

16-19 యా పన్నెండు మణిసిరి ఎయెర్ ఎయెర్ ఇహిజి సీమోను (యేసు వన్నిజ్ పేతురు ఇని పేరు సితాన్) జెబెదయ మరిసిర్ యాకోబు, వన్ని తంబెరసి యోహాను ఇనికార్ (యేసు వరిజ్ బోయనర్గసున్ ఇని పేరు సితాన్. దన్ని అర్దం ఇనిక ఇహిజి దీడిజినికార్ ఇజి) అంద్రెయ, పిలిప్ప, బర్తోలోమయ, మత్తయి, తోమా, అల్పయ

మరిసి యాకోబు, తద్దయి, యుదయ దేసెంవందిజ్ ఉసారాజిని సీమోను*, యేసుజ్ యూదురు అతికారిజ కీదు ఒపజెప్పికానాతి ఇస్కరియోతు యూద.

యేసు బయల్జెబ్బులు ఇని దెయం సాయందాన్ దెయమ్కాజ్ ఉల్ప్పినాన్ ఇహోర్.

20 యేసు ఉండ్రొ ఇండ్రొ వాతిజ్ మరి నండొ లోకుర్ అబ్బె కూడితార్. అందెజె యేసుజ్ని సిసూరిజ్, బోజనం కిదెజ్బా కాలి సిల్లెతాద్.

21 యేసు ఇండ్రొణికార్ యా సజతి విహారె వన్నిజ్ మత్తి సెద్రితాద్ ఇజి వెప్పి వన్నిజ్ అస్తెజ్ సాహోర్.

22 యెరూసలేమ్దాన్ వాతి యూదురి రూలుజ్ నెస్పిస్పికార్ వెప్టోర్, “దెయమ్కాజ్ నెయ్కి ఆతి బయల్జెబ్బులు† విన్నిజ్ అస్తాన్. వన్ని సత్తుదాన్ వీండ్రు దెయమ్కాజ్ పేర్జినాన్”, ఇజి వెప్టోర్.

23 నస్తివలె యేసు వరిజ్ కూక్కి వరిజ్ అర్దమాదెజ్ కత వజ ఈహు వెప్టాన్, “సయ్తాన్ సయ్తానుజ్ ఎలాగ ఉల్ప్పాన్.

24 ఉండ్రొ దేసమ్దికార్ వరిజ్ వారె జటిజాజి ఎర్లిజి మహిజ ఆయ దేసెం పాడాఃనాద్.

25 ఉండ్రొ ఇండ్రొణికార్ వరిజ్ వారె జటిజాజి ఎర్లిజి మహిజ ఆ కుటం పాడాఃనాద్.

26 సయ్తాన్ వన్ని గుంపుదు మన్నివరివెట జటిజాజి కేట ఆతిజ నండొ కాలం వరిముస్సు ఏలుబడిః కిదెజ్ అట్వీన్.

27 ఒరెన్ సత్తుమన్ని వన్నిజ్ ముజాల తోహావిండ, ఎయెర్బా వన్ని ఇండ్రొ డుగ్గిజి సామనమ్కు ఒత్తెజ్ అట్వీన్. ముజాల వన్నిజ్ తోహిజానె డొజ కిదెజ్ అట్వార్‡.

28 నాను నిజం వెప్పిన, లోకుర్ కినివిజు పాపమ్కాజ్ని, దూసిసిని మాటెజ్ దేవుణు సెమిస్సాన్.

29 గాని దేవుణు ఆత్మదిజ్ దూసిస్తిజ వన్ని పాపం ఎసెజ్బా సెమిన్వీన్. వన్ని పాపం ఎలా కాలం మంజినాద్”.

30 యేసు ఈహు ఎందానిజ్ వెప్టాన్ ఇహిజ సయ్తాన్ సాయమ్దాన్ యేసు దెయమ్కాజ్ ఉల్ప్పినాన్ ఇజి యూదురి రూలుజ్ నేస్పిసినికార్ వెప్టోర్.

యేసు అయ్సి తంబెర్సిర్

31 యేసు అయ్సిని తంబెర్సిర్ వాండ్రు మన్ని ఇల్లుముజాల్ వాతారె యేసుజ్ కూక్కి తగ్గఅ ఇజి ఒరెన్వన్నిజ్ ఇండ్రొ పోక్తార్.

32 ఆయ ఇండ్రొ యేసు సురుల నండొ లోకుర్ బస్త మహోర్. వారు వెప్టోర్, “నీ యాయ తంబెర్సిర్ వెల్లి నిహారె నిజి కూక్కినార్”.

33-34 దనిజ్ యేసు, “నా యాయ? నా తంబెర్సిర్ ఎయెర్ ఇజి నాను వెప్పా”. అబ్బె సురుల బస్తిమనివరిజ్ సుడేఃజి యేసు వెప్టాన్, “ఇదిలో నా యాయని, నా తంబెర్సిర్”.

35 “ఎందనిజ్ ఇహిజ దేవుణుదిజ్ ఇస్టమాతివజ కినికాండ్రె నా తంబెరి, నా తజి, నా యాయ ఇజి వెప్టాన్.

* 3:16-19 3:16-19 రోహాది ఏలుబడిదాన్ యూదుయ దేసమ్దిజ్ విడుదల కిదెజ్ ఉసారాజిన్ సుడేఃజిని యూదురు సజం మనాద్. అయ సజమ్దికాన్ ఒరెన్ సీమోను † 3:22 3:22 యాక సయ్తానుజ్ మరి ఉండ్రొ పేరు ‡ 3:27 3:27 సత్తుమన్నికాన్ ఇజి యేసు సయ్తాన్ వందిజ్ వెప్పినాన్. సయ్తాన్ ముస్సు యేసుజ్ సత్తు మనాద్ ఇజి వెప్పినాన్.

4

విత్తు విత్తివన్ని కత

1 యేసు మరి ఒర్పు గలీలయ సమ్దరం పడకాదు నెన్పిస్తాజ్ మొదోల్స్తాన్. మందలోకుర్ వన్ని డగ్రు వాతిజ్ సమ్దరమ్దు ఉండ్రి డోణిదు ఎక్సి బస్తాన్. లోకుర్ విజెరె సమ్దరం పడకాదు నిహోర్.

2 అయవలె వాండ్రు నండ్ సజతిజ కతవజ వరిజ్ నెస్పిస్తాన్. వాండ్రు ఉండ్రి సజతి కత వజ ఈహు వెహ్హన్.

3 సుడోదు, ఒరెన్ రయు వాండ్రు విత్తు విత్తెజ్ సాహాన్.

4 వాండ్రు విత్తి మహిజ్ సెగం విత్తు సరి పడకాదు అర్తె. ఆ పొటిజ్ వనకాజ్ పెహ్తె తిహ్.

5-6 మరి సెగం విత్తు సటు ముస్సు లావ్ డుల్లి సిల్లిబాన్ అర్తె. డుల్లి లావు సిల్లితిజ్ అవి వెటనె నేర్తెగాని వెల లోఇ సాన్ఇజ్ పొద్దు సాసి ఎండ తాక్తివలె అవి సాతె సాహె.

7 మరి సెగం విత్తు సాప్పు తుపెజ్ లోఇ అర్తె. సాప్పు తుపెజ్ పిరిజి వనకాజ్ తిగితె. అందెజె పంట పండవతాద్.

8 మరి సెగం నెగ్గి బూమిదు అర్తె. అక్కెజ్ నేర్జి పిరితెనె విత్తి విత్తుదిజ్ ముప్పయ్ వంతుజ్ లెక్క పండితె.

9 యేసు మరి వెహ్హన్, “గిబ్బిజ్ ఒడోజి వెంజి అయవజ నడిజి మండ్రు”.

10 యేసు ఒరెండ్తె మహిజ్ వన్యెండు మణిసిర్ సిసూర్ని మరి సెగొండార్, “నీను కత వజ నెన్పిస్తి మాటెజ అర్దం ఇనిక?”, ఇజి వన్నిజ్ వెన్బాతార్.

11-12 అందెజె యేసు, “దేవుణు కిని ఏలుబడిః వందిజ్ డాజితిమహి గొప్ప సజతిజ్ దేవుణు మిజి తెలివి కిత్త మనాన్. గాని మహివరిజ్ విజుబా కతవజ నెన్పిస్తాజ్ ఎందానిజ్ కతవజ వెహ్తె ఇహిజ “వారు సుడిసాన్ గాని తోవర్. వెండ్తెజ్ ఇహిజ వెంజినార్ గాని అర్దం కిదెజ్ అట్వర్. ఎందానిజ్ ఇహిజ వారు అర్దం కిజి వరి పాపమ్కు సెమిస్సాన్*” ఇహాన్.

13 యేసు వరివెట వెహ్హన్, “రయువన్ని వందిజ్ నాను కతవజ వెహ్తెక మిజి అర్దం ఆవిదా? అహిజ నాను కతవజ వెహ్తెకెజ్ విజు మిజి ఎలాగ తెలినాద్?

14 విత్తికాన్ దేవుణు మాట వెహ్హికాన్.

15 సెగొండార్ విత్తు అర్తె సరి పడకనన్నికార్. వారు వెహివెటనె సయ్హాన్ వాజి ఆ మాటెజ్ లాగ్గి ఒసినాన్.

16 మరి సెగొండార్ విత్తు అర్తె సటుపణుకు ముస్సు మన్ని ఇస్కా నన్నికార్. వారు దేవుణుమాట వెహివెటనె సర్దదాన్ మన్నుదు ఇడ్వార్.

17 గానివెల లోఇ సాన్ఇలెకెండ్ దేవుణుమాట వరి మన్ను లోఇ సాన్ఏద్. వారు కండెక్ కాలం నమ్మిజి మంజినార్. దేవుణుమాట నమ్మితి వందిజ్ కస్టమ్కు మాలెజ్, వానెవెలె దేవుణు ముస్సు మన్ని వరి నమకం వెటనె డిన్న సీనార్.

18-19 మరి సెగొండార్ విత్తు అర్తె సాప్పు తుపెజ్ నేర్ని బూమివజ మనార్. గాని ఎలాగ బత్తిదెజ్ ఇని వందిజ్ మన్ని విసారం, డబ్బు గణిసిని వందిజ్ మన్ని ఆస విజు కూడిజి వారు దేవుణుదిజ్ నమ్మిఎండ కిదెజ్ వారు వెహి మాటదిజ్ అణసు తిగ్జినె. పంట పండవండ ఆతిలెకెండ్ వారుబా ఆజినార్.

* 4:11-12 4:11-12 యెసయ 6:9,10.

20 సెగొండార్ అర్థి విత్కునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు ముస్కు నమకం ఇడ్వార్. నెగ్గి బూమిదు అర్థి విత్కు బస్తెణిదిజ్ ముప్పయ్ బస్తెజ్ అర్వయ్ బస్తెజ్ వంద బస్తెజ్ పండ్చివజ వారు మంజినార్.”

దీవ జాయ్ సీనివజ కంతుద్ ఇడ్జెజ్

21 యేసు వరివెట ఈహు వెప్తాన్, “దీవ కసిసి అబల మూక్సినో మన్సం అడిగిసో ఎయెరుబా ఇడ్వర్. జాయ్ సీనివజ దీవ కంతుదు ఇడ్వార్.

22 ఎందానిజ్ ఇహిజ ఏలు డాజితి మన్నికెజ్ విజు ఒర్పెండ్ తోరె ఆనె.

23 మీరు గిబ్బిజ్ ఒడేజి వెంజి అయావజ నడిజి మండ్రు”.

24 యేసు మరి వెప్తాన్, “మీరు వెహిక జాగర్త అర్దం కిదెజ్వలె. మీరు నెగ్గెండ అర్దం కిజిమహిజ, దేవుణు వన్ని మాటెజ్ అర్దం కిబిస్నాన్లె. ఒబ మరి ఒద్దె అర్దం కిబిస్నాన్లె.

25 నాబాణిజ్ వెంజి అర్దం కిజినివన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిబాణిజ్ వాండ్రు అర్దం కిత్తి మన్నికెజ్బా లాగ్నాన్”.

నెర్జి పిరిసిసి విత్కువందిజ్ కత

26 యేసు మరి వెప్తాన్, “దేవుణు ఏలుబడి: ఈహు మనాద్. ఒరెన్ రయ్తు వాండ్రు విత్కు బూమిదు విత్సినాన్.

27 వాండ్రు రెయ్కాజ్నిద్ర కిజి పెందల నిజ్జి మంజినాన్. వన్నిజ్ తెలివిండ ఆ విత్కు నేర్జి పిరిసిసె.

28 ముజాల ఆకు, దన్ని వెనుక సెరెన్, దన్ని వెనుక సెరెన్దు గింజ ఇక విజు బూమినె పుటిసినాద్.

29 పంట పండ్వాద్. కొయ్నికాలం వాతిజ్ వాండ్రు కొడువేలి అసి కొయ్జినాన్”.

సర్కుగింజ వందిజ్ కత

30 మరి యేసు ఈహు వెప్తాన్, “దేవుణు వన్నిలోకురిజ్ కినిఏలుబడి: ఇని దనివెట పోలిస్తెజ్ ఆనాద్? మాటు ఎమేణి కతవజ అయాక నెన్పిస్తెజ్ అట్వాట్?

31 అయాక సర్కు గింజదిజ్ పొలిత మనాద్. అక్క బూమిదు విత్తివలె లోకమ్దు మన్ని విజు విత్కాజ్ లొఇ ఇజిరికాద్.

32 అహిజ్బా అక్క వితివలె నేర్జి పిరిసి విజు కుస మొక్కెజులోఇ పెరిక ఆనాద్. దన్ని కొమెజ్ పెరికెజ్ ఆనె. ఆగసమ్దు ఎగ్రిజిని పొటిజ్ వాజి దన్ని నీడెదు గూడుక్ తొప్పినె”.

33 వారు అర్దం కిదెజ్ అట్సి నసా దేవుణు మాటెజ్ ముజాల్ వెప్తా లెకెండ్ కత వజ యేసు నండ్ వెప్తాన్.

34 కత వజ ఆఎండ యేసు వరిజ్ ఇనికబా నెన్పిన్వితాన్. అహిజ యేసు వన్ని సిసూర్ వెట ఒరెండ్రె మహివలె విజు వన్కాజ్ అర్దం కిజి వెప్తాన్.

యేసు తుపాన్దిజ్ నిల్ప్పినాన్

35 ఆ పొదొయ్సమ్దరం అతాహ వడక సొనాట్ ఇజి యేసు సిసూర్ వెట వెప్తాన్.

36 లోకాజ్ డిసి యేసు మహి డోణిదు ఎక్కి సిసూరు వన్నిజ్ ఒతార్. మరి సెగం డోణిజ్బా వరి వెట మహా.

37 వారు సొన్ని మహిజ్ పెరి తుపాన్ వాతాద్. ఉల్కాణ్ విజు డోణిదు డెయ్తె ఏరుడోణిదు నిండ్రతె.

38 యేసు డోణి వెనుకపడక బుర్రగడిః మున్సు నిద్ర కిజి మహాన్. సిసూరు వన్నిజ్ నిక్కి, “బోదకినికి, మాటు విజు ముడఃగిజినాట్. నిజి విసారం సిలెదా?”, ఇజి వన్నిజ్ వెహ్సోర్.

39 యేసు నిజ్జి గాలిదిజ్ ఉల్కాజ, పల్లక్ ఆదు ఇజి వెహ్సాన్ పెరి గాలి అణస్తాద్ విజు అలెతాద్.

40 నస్తివలె వాండ్రు, “మీరు ఎందనిజ్ తియెల్ఆజినిదెర్? మిజి నా మున్సు నమకం సిలెదా?”, ఇజి సిసూర్ వెట వెహ్సాన్.

41 వారు గొప్పు తియెలాతారె, “పీండ్రు ఎలాగ మహ్తికాండ్రొ గాని, గాలి సమ్దరమ్బా విన్ని మాటదిజ్ లోజితై”, ఇజి ఒరెన్వెట మరి ఒరెన్ వర్గితార్.

5

యేసు దెయం అస్తిమహివన్నిజ్నెగెణ్కిజినాన్

1 యేసుని సిసూర్ సమ్దరం అతాహ పడక గెరసేసు ఇని లోకురి ప్రాంతమ్దు వాతార్.

2 యేసు డోణి డిఃగితి వెటనె దెయం అస్తికాన్ ఒరెన్ దూకిజాణ్ ఎద్రు వాతాన్.

3 వాండ్రు దూకిజాణిజ్ బత్తిజి మహాన్* వన్నిజ్ గొల్కుదాన్బా తొహ్తాజ్ ఎయెర్బా అట్దెర్.

4 నండొ సుట్టు వన్ని కాల్యాజ్ కిక్కాజ్ గొల్స్కాణిజ్ తొహ్తాజ్బా వాండ్రు గొల్స్కు తెప్పి ముక్కెజ్ కితాన్. ఎయెరుబా వన్నిజ్ సాదిస్తెజ్ అట్వతార్.

5 వాండ్రు రెయుబా వెడెకబా దూకిజాణ్ గొరొకాణ్ గగోలాజి వన్నిజ్ వాండ్రె పణుకుజాణ్ డెయె ఆజి మహాన్.

6 వాండ్రు దూరమ్దాన్ యేసుజ్ సుడెఃతాండ్రె ఉహ్కీవాజి ముణుకుజ్ ఊర్జి మాడిస్తాన్.

7 విజు దన్నిజ్ అతికారం ఆతి దేవుణు మరిసియాతి, యేసువా, నా వెట నిజి ఇని పణి? నజి బాద కివి ఇజి దేవుణు పేరు అసి నీను ఒట్టు కిఅ”, ఇజి డెల్ని వెహ్సాన్.

8 ఎందానిజ్ ఇహిజ యేసు, ఓ దెయం, విన్నిజ్ డిఃసి వెల్లి సోన్అ”, ఇజి వెహ్సా మహాన్.

9 యేసు, “నీ పేరు ఇనిక? ఇజి వెన్బాతాన్. వెన్బాతిజ్, నా పేరు సేన, ఇహిజ మాపు నండొండార్ ఇజి వెహ్సాన్.

10 మజి యా దేసెమ్దాన్ ఉల్పూ ఇజి దెయం అస్తికాన్ యేసుజ్ మరి మరి బతిమాలితాన్.

11 అయావలె పండ్రెజ్ మంద గొరొన్ సెల్కుదు మెయ్జి మహె.

12 ఆ దెయమ్కు, మజి పండ్రెజ్ లొఇబా పోక్అ. వనకలొఇ సాండ్రెజ్ మజి సెలువ సిదా”, ఇజి యేసుజ్ బతిమాలితె.

13 అందెజె వాండ్రు వన్కాజ్ సెలవ సిత్రాన్ అయావలె దెయమ్కు వన్నిజ్ డిఃసినె పండ్రెజ్లొఇ సాహె. అయపండ్రెజ్ మంద విజు గొరొతాణ్ ఉహ్కీ వాజి ఒడ్డుదాన్ సమ్దరమ్దు అర్తినె సాతె. అక్కెజ్ డగ్రు రుండి వెయిజ్ పండ్రెజ్ మహె.

* 5:3 5:3 అయ దేసెమ్దికార్, సట్టుబొరొకిజి సాలమ్లెకిండ తయార్ కిజి సాతివరిజ్ సమాది కిజి మహోర్. పినుగు సాలమ్లొఇ ఇడ్డి పణకుదాన్ సాలమ్దిజ్ మూసి మహోర్. యా దెయం అస్తిమహికాన్ బానె మహోన్.

14 పండ్రిజ్ మేష్షికార్ ఉహ్కీ సొన్ని పట్టుమీది వరిజ్ పట్టుమీది వల్నెజి మన్నివరిజ్ జర్తిత్కెజ్ వెహ్టార్. లోకుర్ జర్తిక సుడేదెజ్ సొహార్.

15 వారు యేసు డగ్రు వాతిజ్ నండో దెయమ్కు అస్తిమహికాన్ సొక్కెజ్ తొడిగిజి నెగ్గి బుదిదాన్ అబ్బెబస్తిమహికా సుడేతార్. సుడేతార్ తియెలాతార్.

16 యాక సుడేతికార్ దెయమ్కు అస్తివన్నిజ్ ఇనిక జర్గితాద్, పండ్రిజి ఇనిక జర్గితాద్ ఇజి విజు లోకాజ్ వెహ్టార్.

17 అయవలె లోకుర్ యేసుజ్, “మా ప్రాంతం డిసి సొన్అ”, ఇజి బతిమాలితార్.

18 యేసు డోణి ఎక్కిజ్ దెయమ్కు అస్తిమహికాన్ వన్ని డగ్రు వాతాండ్రె, నీ వెట నానుబా వాన ఇజి బతిమాలితాన్.

19 గానియేసు సరి సివితాన్, నీను ఇండ్రో సొన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ ముస్సు ఎలాగ కనికారం తోరిస్తాన్ ఇనివందిజ్ వరిజ్ వెహ్అ ఇజి వెహ్టాన్.

20 వాండ్రు సొహండ్రె యేసు వన్ని వందిజ్కిత్తి గొప్ప పణిదెకపోలీదు వెహ్టాజ్ మొదొల్స్తాన్. అక్క వెంజి విజేరి బమ్మ ఆతార్.

యేసు సాతి అయ్లిజ్ నిక్కినాన్, జబ్బు ఆతిమహి అయ్లికొడోడిజ్ నెగెండ్ కిజినాన్

21 యేసు డోణిదు ఎక్కి నమ్దరం అతాహ పడక మరి సొహాన్. నస్తివలె నండో లోకుర్ వన్ని డగ్రు వాతార్. యేసు సమ్దరం ఒడ్డుదు నిహ మహాన్.

22-23 నస్తివెలె ఉండ్రీ యూదురి మీటిజ్ ఇండ్రోణి అతికారి యాయీరు ఇని ఒరెన్బానె వాతాన్. వాండ్రు యేసు డగ్రు వాజి వన్ని పాదమ్కాజ్ మాడిస్తాండ్రె, నా ఇజ్జి గాలు సాజినాద్, దయకిజి నీను వాజి అది బత్కిని వజి దని ముస్సు కిక్కు ఇడోజి నెగెణ్ కిఅ, ఇజి బతిమాలితాన్.

24 యేసు వన్నివెట సొహాన్. సేన లోకుర్ నెక్కె ఆజి యేసువెట సొహార్.

25 వరిలోఇ ఉండ్రీ అయ్లి కొడోః మహాద్. అది పన్నెండు పండెజాణ్ వెల్లి ఆని జబ్బుదాన్ బాద ఆజి మహాద్.

26 అది సేన డాక్టరుజాబాన్ నెగెణ్అదెజ్ సొహాద్ గాని ఆ జబ్బు సొన్ ఏతాద్. అకాదె అవండ దనిజ్మని డబ్బు విజు కర్పు ఆతిజ్బా ఆ జబు సొన్ఏండ మరి నండో ఆతాద్.

27-28 అది యేసువందిజ్ వెహ్ మహాద్. యేసు అయ సరిదాన్ వాజినాన్ ఇజి వెంజి యేసు తొడిగితి మన్నినిర్తి సొక్క+ సెంగుదు ముట్టిజసరి నెగెణ్ ఆన ఇజి ఒడోబితాద్. అది లోకుర్ వెట సొన్ని యేసు వెనుక వాతాదె వన్ని నీరిసొక్కది సెంగుదిజ్ ముట్టాద్.

29 వెటనె వెల్లి సొనిక నిహాద్. దనిజ్ మహి జబు డిస్తాద్ ఇజి అది నెస్తాద్.

30 వన్నిలోఇహాన్ దేవుణు సత్తు వెల్లి సొహాద్ ఇజి యేసుజ్ తెలితాద్. వెటనె వాండ్రు లోకురిజ్ మర్జి సుడేజి, ఎయెర్ నా సొక్కదు ముట్టాన్? ఇజి వెన్బాతాన్.

31 దన్ని సిసూర్, సేన లోకుర్నెకె ఆజి నిజీ ముట్టినార్ గదె. ఆహె ఆతిజ్బా నజీ ఎయెరో ముట్టార్ ఇజి ఎందనిజ్ వెహ్సొని? ఇజి యేసుజ్ వెహ్టార్.

32 నజీ ముట్టికాన్ ఎయెండ్రో ఇజి వరివందిజ్ యేసు సురుల సుడేజి మహాన్.

33 అయవలె అయ బోదెలి అది నెగెణ్ ఆతిక నెసి నండో తియెల్ ఆజి వన్నిపాదమ్కుజ్ మూడికుజ్ ఊర్జి వజితాద్. దన్నిజ్ జర్తిక విజు వెహ్టాద్.

† 5:27-28 5:27-28 అయ కాలమ్దు అయ దేసమది మొగవారు నీరి సొక్క తొడిగిజి మహార్. దన్ని అడిగి మాముల్ సొక్కని బెల్లు తొడిగిజి మహార్

34 యేసు దనిజ్, బయి నీను నా ముస్సు, నమకం ఇడ్డి అందెజె నీను నెగెణ్ ఆతి. సమదనమ్దాన్ సొన్అ. నీను నెగెండ్ ఆతి ఇహాన్.

35 యేసు వర్జిజమహిజ్ యాయీరు ఇండ్రోణిజ్ సెగెండార్ వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్లెద్ ఇజి యాయీరుజ్ వెహ్టార్.

36 వారు వెహ్టాక వెన్ఇవజ యేసు అయ అతికారిజ్, తియెల్అమ, నా ముస్సు, నమకం ఉండ్రె ఇడేఅ ఇజి వెహ్టాన్.

37 యేసు పేతురు, యాకోబు, యాకోబు తంబెర్ని యోహాను మరి ఎయెజ్బా వన్నివెట బవతాన్.

38 వారు యూదురి మీటిజ్ ఇల్లు అతికారి ఇండ్రో సాహార్. అయావలె అబ్బె లోకుర్ గగోలాజి అడజబాజి మహిక సుడేతార్.

39 యేసు ఇలు లొఇ సొన్ని వరిజ్ వెహ్టాన్, మీరు ఎందనిజ్ గగోలాజి అడజబాజినిదెర్? యా ఇజ్రికాద్ సావీద్ ఇది నిద్ర కిజినాద్.

40 వారు యేసుజ్ వెక్రసి సికితార్. యేసు అడజబాజి మహి లోకాజ్ విజేరిజ్ వెల్లి పోక్తాన్. వెల్లి పోక్సి, అయ్సి అపోసిరిజ్, వన్నివెట మహి సిసూరిజ్ అసి యేసు ఆ ఇజ్రికాద్ మహి గదిదు సాహాన్.

41 ఆ ఇజ్రిదన్నిజ్ కీదు అస్తాండ్రె, తలీత కుమి ఇజి వెహ్టాన్. అయ మాటదిజ్ అర్దం ఇనిక ఇహిజ ఇజ్రి అయ్లి నిజ్అ ఇజి నాను నీ వెట వెహ్సిన ఇజి,

42 అయ్లి వెటనె నిజ్జి నడితాద్. దనిజ్వన్నెండు పండెజ్వయసు. అబ్బె జర్గితిక సుడేతారె అయ్సి అపోసీరు, సిసూరు బమ్మ ఆతార్.

43 జర్గితిక ఎయెజ్బా వెహ్టాట్ ఇజి యేసు వరిజ్ కసితం ఆడ్ర సితాన్. దన్నిజ్ బోజనం సీదు ఇజి అయ్సి అపోసిరిజ్ వెహ్టాన్.

6

యేసుజ్ సొంతనాటో గవరం సిఎతార్

1 యేసు అబ్బెణాన్ వన్ని సొంత పట్టుమాతి నజరేతు సాహాన్. సిసూర్బా వన్ని వెట సాహార్.

2-3 విస్త్రాంతి దినమ్దు వాండ్రు యూదురి మీటిజ్ ఇండ్రో నేర్పిస్సెజ్ మొదొల్స్తాన్. అక్క వెహికార్ నండొండార్ బమ్మ ఆజి, వీండ్రు ఎమేణిజ్ నెస్తాన్? విన్నిజ్ నిన్ని గెణం ఎమేణిజ్ దొహ్కాద్? వీండ్రు బమ్మాని పణిజ్ కిజినాన్. వీండ్రు మాపు నెసిని కంసెల్ వాండ్రు గదె. వీండ్రు మరియమ్మ మరిసిగదె. యాకోబు, యోసె, యూద, సిమోను, విని తంబెర్నిర్ గదె. విన్ని తజిసిక్ మా వెట మన్నెగదె. ఇజి వెహ్టార్. వారు వన్నిముస్సు కోపమాజి మహార్.

4 దన్నిజ్ యేసు ఇనిక ఇజి వెహ్టాన్ ఇహిజ, ఒరెన్ ప్రవక్తెజ్ సొంత పట్టుమ్దు, సొంత ఇండ్రో, సొంత కుటుమ్దివరిబాన్ గవరం సిల్లెద్. మరి ఎంబె సాహిజ్బా వన్నిజ్ గవరం మనాద్.

5 సెగెండార్ జబ్బు ఆతివరిజ్ కియుదాన్ ముట్టి నెగెణ్ కిత్తాన్ గాని అబ్బె నండొ బమ్మాతి పణికిదెజ్ యేసు అట్వతాన్.

6 వన్నిముస్సు వరిజ్ నమకం సిల్లిదిజ్ వాండ్రు బమ్మ ఆతాన్. యేసు సురుల మన్ని నాహ్కాజ్ బూలాజి నేర్పిస్తాన్.

యేసు పన్నెండు మణిసిర్ సిసూరిజ్ పోక్సినాన్

7 యేసు పన్నెండు మణిసిర్ సిసూరిజ్ వన్ని డగ్రు కూక్తాండ్రె రిఎరిజ్ రిఎరిజ్ పోక్తాన్. వరిజ్ దెయమ్కాజ్ పేర్దెజ్ అతికారం సిత్తాన్.

8-9 మీరు ప్రయనం కినివెలె కియుదు ఉండ్రె డుడ్డుని ఒత్తెజ్. బోజనం గాని సన్ని గాని డబ్బు గాని ఒత్తెజ్ ఆవిద్. సాండ్రెజ్ కాల్యాజ్ జోఙ్కు ఒత్తగాని, పోర్పాదెజ్ రుండి సాక్యెజ్ ఒమాట్”, ఇజి యేసు వెప్తాన్.

10 మీరు ఎయె ఇండ్రె సానిదెరో, అయ పట్టుం డిఃస్సిదాక బానె మండ్రు.

11 ఎంబెబా మిజి లోకుర్ డగ్రు కివిండ మహిజ మీ మాట వెండ్రెజ్ కెఇతిజ, అబ్బెణిజ్ మీరు డిఃసి సానివెలె మీ పాదమ్క డుల్లి దులుపు. వరిముస్కు వారె దేవుణుబాణిజ్ సిక్కి తప్పె ఆజినార్ ఇన్నిదన్నిజ్ గుర్తులెకెండ్ ఆహ డుల్లి దులుపు”.

12 సిసూర్సాన్ని లోకాజ్, పాపమ్కు డిఃస్తు ఇజి బోదిస్తార్.

13 లోకురిజ్ అస్తి నండె దెయమ్కాజ్ పేర్జి, జబ్బు అతి నండెండారిజ్ నూనె రాసి నెగెండె కిత్తార్.

బాప్తినం సీని యోహానుజ్ రాజు సప్తాన్

14 యేసు పేరు విజుబాన్ సారత సాహద్. అందెజె యేసు కిత్తి గొప్ప పణిజవందిజ్ హేరోదురాజు వెహాన్. సెగెండార్ ఇనిక వెప్తార్ ఇహిజ “వీండ్రు సాతివరిబాణిజ్ మర్జి నిజీతి బాప్తినం సీని యోహాను అందెజె యా బమ్మాతి పణిజ్ కిదెజ్ సత్తు వన్నిలోఇ మంజినాద్” ఇహార్.

15 సెగెండార్ వీండ్రు ఏలియ ప్రవక్త ఇహార్. మరి సెగెండార్ వీండ్రు ముజల్ మహి దేవుణు ప్రవక్తలోఇ ఒరెన్ ప్రవక్త వజ మనాన్ ఇజి వెప్తార్.

16 హేరోదురాజు యాక విజు వెంజి నాను బుర డెఃయిస్తి యోహాను నిజ్జి బత్తికాండ్రె యేసు ఇజి వెప్తాన్.

17-18 హేరోదురాజు ఎందానిజ్ ఈహు వెప్తాన్ ఇహిజ, వాండ్రు వన్ని తంబెర్సియాతి పిలిపు ఆల్సి హేరోదియెజ్ తతాన్. యోహాను హేరోదుజ్, నీ తంబెర్సి ఆల్సిజ్ నీవందిజ్ ఇడె ఆతిక దేవుణు మోసిజ్ సిత్తి రూలుదిజ్ పడివిద్ ఇజి వెప్తాన్. అందెజె దన్ని వందిజ్ వాండ్రు యోహానుజ్ అసి తొప్తాండ్రె జెలిదు ఇడిస్తాన్.

19 అందెజె హేరోదియ యోహాను ముస్కు పగదాన్ మహాద్. వన్నిజ్ సపిస్టెజ్ సుండఃతాద్ గాని అట్ఏతాద్.

20 ఎందానిజ్ ఇహిజ హేరోదు యోహానుజ్ తియెలాతాన్. వాండ్రు ఒరెన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హేరోదు రాజు నెస్తాన్. అందెజె జెలిదు ఇడ్డి కాపాడజి మహాన్. యోహాను వెప్తా మాటెజ్ వెహివలె హేరోదురాజు అర్దం కిదెజ్ అట్ఏతాన్ గాని సర్దదాన్ వెంజి మహాన్.

21 అహిజ యోహానుజ్ సపిస్టెజ్ హేరోదియెజ్ ఉండ్రె అవ్కాసం వాతాద్. అక్క ఎలాగ ఇహిజ హేరోదురాజు వాండ్రు పుట్టిరోజు గుర్తు కిదెజ్ అయానాండిజ్ ఉండ్రె పెరి విందు కితాన్. వాండ్రు గవరుమెంటు అదికారిజ, సయ్యుమ్ది వరిలోఇ పెరి అతికారి గలీలయ దేసెమ్ది పెద్దెల్జ విజేరిజ్ విందుదిజ్ కూక్తాన్.

22-23 నస్తివలె హేరోదియ గాల్సి విందుదిజ్ వాతి వరిజ్ సర్ద కిబిస్టెజ్ వరి ముజాల డాట్టి కర్జితాద్. అక్క సుడిఃతారె విజేరె సర్ద ఆతార్. సర్ద ఆతిజ్ హేరోదురాజు, నిజి ఇస్టమాతిక ఇనికబా సజి లోన్అ, అక్క నాను నిజి సీన, ఇజి దనివెట ఒట్టు కితాన్.

24 అది సొన్ని అయ్యేసివెట, నాను రాజుజ్ ఇనిక లొస్తాజ్ ఇజి వెన్బాతాన్. అయ్యేసి, బాప్తిసం సీని యోహాను బుర లోన్అ ఇజి వెప్తాద్.

25 వెటనె అది రాజు డర్సు సొన్ని బాప్తిసం సీని యోహాను బుర కత్తి ఉండ్రీ పల్లెమ్దు ఇడేజి ఏలె నజీ తసిసిదా ఇజి వెప్తాద్.

26 అక్క వెహండ్రె హేరోదురాజు గొప్ప బాద ఆతాన్ గాని, వాండ్రు కిత్తి ఒట్టువందిజ్ వన్నివెట బోజనమ్దిజ్ బస్తిమహి కూలెజి వందిజ్ దన్నివెట కిత్తి మాట తప్తెజ్ కెవితాన్, ఇజి వెప్తాజ్ అట్ఏతాన్.

27-28 వెటనె రాజు యోహాను బుర కత్తి తగ్గఅ ఇజి జమానుజ్ ఆడ్ర సీజి పోక్తాన్. జమాను జెలిదు సొన్ని యోహాను బుర కతాండ్రె ఉండ్రీ పల్లెమ్దు ఇడేజి తత్తాండ్రె అయ్యేలిదిజ్ సిత్తాన్. అది ఆ బుర అయ్యేసిజ్ సిత్తాద్.

29 జర్గితిక వెంజి యోహాను సిసూర్ వాజి ఆ పీనుగుదిజ్ పెర్జి ఒసి సమాది కిత్తార్.

యేసు అయ్యేదు వెయిజ్ మణిసిరిజ్ బోజనం సీజినాన్

30 అప్సొస్తురు మరజివాతాజి వారు కిత్తి పణిజ్ విజు, బోదిస్తి వన్కాజ్ వందిజ్ విజు యేసుజ్ వెప్తార్.

31 నస్తివలె యేసు “ఎయెరు సిల్లిబాన్ మాటె సొన్ని నణెం రోమ్మాట్, ఇజి సిసూర్ వెట వెప్తాన్. ఎందానిజ్ ఇహిజ నండో లోకుర్ వాదెజ్ సొండ్రెజ్ ఆతార్. బోజనం కిదెజ్ బా కాలి సిల్లెండ ఆతాద్.

32 అందెజె వారు ఉండ్రీ డోణి ఎక్కి ఎయెర్ బా మనగ బాడ్డిదు వారె సొహార్.

33 యేసుని, సిసూర్ సొన్ని మహిజ్ నండో లోకుర్ వరిజ్ సుడేతారె వరిజ్ గుర్దు అసి విజు పట్టుమ్కాణ్ ఉహొక్కి వరిజ్ ఇంక ముజాల బాన్ సొహారె అందితార్.

34 యేసు డోణిదాన్ డిగితివలె మహి నండో లోకాజ్ సుడేజి వన్ని పాణం నొత్తాద్. ఎందానిజ్ ఇహిజ వారు గవ్డుయెన్ సిల్లి సెద్రితి గొర్రెజ్ లెకెండ మహార్. అందెజె యేసు వరిజ్ నండో సజతిజ్ నెన్ పిస్తాన్.

35-36 యేసు నెర్పిసి మహిజ్ పొద్దుఆజి మహాద్. సిసూర్ వన్నిడర్గు వాజి యాక ఎయెరు మన్గ బాడ్డి. ఏలె పొద్దు ఆజినాద్. పడకాద్ మన్ని నాహ్కాజ్ వల్ నెజి సొన్ని బోజనం కొండెజ్ విరిజ్ పొకఅ. ఇహార్.

37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు”, ఇజి వెప్తాన్. దన్నిజ్ వారు మాపు సొన్ని రుండి వంద దెనారిదిజ్* రొట్టెజ్ కొడేజి తత్తెజ్ బా నిస్సా లోకురిజ్ సాల్ ఏద్ ఇజి వెప్తార్.

38 మీబాన్ ఎస్సాండు రొట్టెజ్ మన్నె? సొన్ని సుడేదు”, ఇజి యేసు సిసూరిజ్ వెప్తాన్. వారు సొన్ని సుడేతారె అయ్యేదు రొట్టెజ్ రుండి మొయెజ్ మన్నె ఇజి వెప్తార్.

39 విజేరిజ్ పసిగడ్డి మన్నిబాన్ గుంపుజ్ లెకెండ బసెకిదు ఇజి యేసు సిసూరిజ్ వెప్తాన్.

40 లోకుర్ యాపయ్ మనిసిర్, గుంపుజ్ వంద మనిసిర్ గుంపుజ్ బస్తార్.

41 అయవలె యేసు అయ్యేదు రొట్టెజ్, రుండి మొయెజ్ అసి, ఆగనం దరోట్ సుడేజి వనకవందిజ్ దేవుణుదిజ్ వందనమ్కు వెప్తాన్. వెప్తాండ్రె రొట్టెజ్ రుక్కి లోకురిజ్ సీబాజి సీదు ఇజి వెప్పి సిసూర్ జ్ సిత్తాన్. అయ మొయెజ్ బా విజేరిజ్ సీబాజి సీదు ఇజి సిత్తాన్.

* 6:37 6:37 రోమది వరి కాలమ్దు మన్ని డబ్బు ఇక్క అయకాలమ్దు ఉండ్రీ దినారి ఉండ్రీ రోజుది కూలి.

42 వారు విజేరె పొట వంజు తిహార్.

43 మిగిలిత్తి రొట్టె ముక్కెజ్, మరి మొయెజ్ ముక్కెజ్ పన్నెండు గంపెజ్ సిసూర్ కెహ్తార్.

44 రొట్టెజ్ తిహికార్ మొగవారె అయ్దువెయిజ్ లోకుర్ మహార్.

యేసు సమ్దరం ముస్కు నడిజినాన్

45 యేసు లోకాజ్ పొక్కి వెనుక వెటనె సిసూరిజ్ డోణిదు ఎకిసి అతాహపడెక బేత్తుయిద ఇని నాటో వన్నిజ్ ఇంక ముజాల్ సొండ్రు ఇజి వెహ్ని పొక్తాన్.

46 వరిజ్ పొక్కి యేసు పార్దనం కిదెజ్ గొరొత్ ఒరెండ్రె మహాన్.

47 పొద్దు ఆతివలె డోణి సమ్దరం నడిమి మహాద్, యేసు గొరొత్ ఒరెండ్రె మహాన్.

48 గాలి ఎద్రు డెయిజ్ డోణి నడిపిస్తెజ్ సిసూరిజ్ గొప్ప కస్తం ఆత్తాద్. అక్క యేసు నుడెతాన్. కోడిజం ఆజిమహిజ్ యేసు సమ్దరం ముస్కు నడిజి వాతాండ్రె సిసూర్మన్ని డోణి డాట్టిసొండ్రెజ్ నడిసి వాతాన్.

49 యేసు సమ్దరం ముస్కు నడిజినిక సిసూర్నుడెతారె అక ఉండ్రె దూబ ఇజి ఒడిబితార్. వారు డటం గగోల్ ఆతార్.

50 అక్క దూబను ఇజి వారు నండె తియెలాతార్. వెటనె యేసు పరివెట, “సమ్దరమ్దాన్ మండ్రు ఇక్క నానె తియెలామ”, ఇజి వరిజ్ వెహ్తాన్.

51 నస్తవలె యేసు పరివెట డోణిదు ఎక్తాన్. గాలి విజి అణస్తాద్. వారు నండె బమ్మ ఆతార్.

52 యేసు అయ్దు రొట్టెజ్ రుండి మొయెజాణ్ అయ్దువెయిజ్ లోకాజ్ బోజనం సిత్తిక నుడెతిజ్బ యేసు కిత్తి అయా బమ్మాతి పణివందిజ్ అర్దం కివితార్. ఎండానిజ్ ఇహిజి వరి మన్ను గట్టిజ్ మహాద్.

యేసు గెనేసెరెతు ఇనిబాన్ లోకాజ్ నెగెండె కిజినాన్

53 వారు సమ్దరం డాట్టి గెనేసెరెతు ఇనిబాన్వాతారె డోణి అబ్బె తొహ్తార్.

54 వారు డోణి డిగితిజ్ సరి లోకుర్ యేసుజ్ గుర్తు అస్తార్.

55 వెటనె ఆ దేసెమ్ది నాహ్కాణికార్ విజేరె సొన్ని జబ్బు ఆతివరిజ్ యేసు మనాన్ ఇజి వెహి బాడిడు సాపాదు పిండ్లి తత్తెజ్ మొదో లస్తార్.

56 యేసు నాహ్కాజ్ పట్టుమ్కాజ్ ఎంబె సొహిజ్బా లోకుర్ జబ్బు ఆతివరిజ్ యేసు వాని సర్దు తత్త ఇడెతార్. యా జబ్బుఆతికార్ నీ సొక్క సెంగుదుబా ముట్టిజ్ సెల్వు సిదా ఇజి బతిమాలజి యేసుజ్ మరి మరి వెహ్తార్. ఎస్సాండార్ వన్ని సొక్కదిజ్ ముట్టితారో వారు విజేరె నెగెండె ఆతార్.

7

యూదపెదెలుజా రూలుజ్ దేవుణు రూలుదిజ్తేడె వాతాద్

1-2 యెరూసలేమ్దాన్ వాతి పరిసయ్రుని, యూదురి రూలు నెస్పిసినికార్ సెంగొండార్ యేసుబాన్ కూడెజి వాతార్. యేసు సిసూర్ యూదురుజి రూలుదు వెహ్తిలెండె కిక్కు నొరెబవండె బోజనం ఉణిజి మహిక వారు అబ్బె నుడెతారె. అక్క పరిసయ్రు నుడితిజ తప్ప.

3 పరిసయ్రు, యూదురు, విజేరె, పూర్బమ్దికార్ వెహ్తారూలు వజి కిక్కు నొరెబాతి వెన్కనె ఊణార్.

4 వారు సత్తదాన్ వాతిజ, రూలువజ ఏరు లొంజె ఆవిండ ఇనికబా ఉణ్‌వర్. ఇక్కాదె ఆవిండ గిన్నెజ్ కుండెజ్ మరి కంసు బిందెజ్ ఎలాగ మిడిసెజ్ ఇజి నండో రూలుజ్ వరిజ్ మన్నె. ఆ రూలుజ్‌వజ వారు కిజినార్.

5 అందెజె పరిసయరుని, యూదుర్ రూలుజ్ నెన్‌పిసినికార్, “ఎందానిజ్ నీ సిసూర్ పూర్‌బమ్‌దికార్ వెప్తి రూలువజ నడివండాజినార్ ఎందానిజ్ వారు కిక్కు నొర్‌బవిండ బోజనం కిజినార్”, ఇజి యేసుజ్ వెన్‌బాతార్.

6-7 యేసు వరిజ్, “వేసం కినికారాతి మీ వందిజ్ యెసయ ప్రవక్త ఎప్తిక నిజమె. యా లోకుర్ నజి వెయుదాన్ గవరం సీజినార్ గాని వరి మన్ను నాబాణిజ్ దూరం మనాద్. వారు నజి పొగడిజి మాడిసిసినార్ గాని అక్క పణిదిజ్ రెవిద్. ఎందానిజ్ ఇహిజ వారు లోకుర్ వెప్తి రూలు దేవుణు మాట ఇజి లోకాజ్ నెస్పినినార్*.

8 దేవుణు వెప్తి రూలు డిసిసిజి, మీరు పూర్‌బమ్‌దికార్ వెప్తి రూలువజ నడిజినిదెర్”, ఇజి వెప్తాన్.

9 యేసు వరిజ్ మరి వెప్తాన్, “పూర్‌బమ్‌దికార్ వెప్తివజ నడిదెజ్, ఇజి దేవుణు ఆడెజ్ పడకాదు నెక్తెజ్ మిజి బాగ తెలినాద్.

10 ఎలాగ ఇహిజ మీ యాయ బుబ్బురిజ్ గవరం సీజి బాగ నుడదెజ్ ఇజి యాయెజ్ గాని బుబ్బెజ్ గాని దూసిస్తిజ వన్నిజ్ సప్తెజ్ ఇజి దేవుణు మోసెజ్ సత్తి రూలు మనాద్.

11-12 గాని ఒరెన్ వన్ని అయసి అపొసిరిజ్, నాను మిజి ఇనికబా ఉండ్రీ సాయమ్‌లెకెండ కిస ఇజి ఇడ్డిమన్నిక కొర్‌బాన్ ఇజి వెప్తిజ నాండీజ్ అసి వాండ్రు అయసి అప్పొసిరిజ్ ఇనికబా సాయం కిదెజ్ అవసరం సిల్లెద్ ఇజి మీరు నెన్‌పిసినిదెర్. (కొర్‌బాన్ ఇహిజ దేవుణుదిజ్ సీస ఇజి ఒట్టు కినిక ఇజి అర్దం)

13 ఈహు మీ పూర్‌బమ్‌దికార్ వెప్తివజ నడిజి మిరు దేవుణు వెప్తి రూలుదిజ విలువ సిల్లెండ కిజినిదెర్. నిన్ని నజతిజ్ నండో మీరు కిజినిదెర్”.

14 యేసు లోకాజ్ మరి వన్నిడగు కుక్తాండ్రె “నాను వెప్సినిక మీరు విజిదెర్ జాగర్తవెంజి నెగెండ అర్దం కిదు.

15-16 వెయుదాన్ లోఇ సొనికెజ్ ఇనికబా లోకాజ్ మయ్లు కిదెజ్ అట్‌విద్. గాని మన్ను లోఇహాన్ వెల్లి వానికదె లోకాజ్ సెవణ్ కిజినాద్”.

17 యేసు లోకాజ్ డిసి ఇండ్రో వాతివెనుక వన్ని సిసూర్, కతవజ వెప్తి దన్నిజ్ అర్దం వెన్‌బాతార్.

18-19 యేసు వరిజ్ ఈహు వెప్తాన్ “మీరుబా ఆఇవరిలెకెండ అర్దం కిదెజ్ అట్‌ఇదెరా? వెల్లిహాన్ పొటలొఇ సొని ఇని బోజనమ్‌బా లోకాజ్ మయ్లు కివిద్. ఎందనిజ్ ఇహిజ అక్క మన్నుదు సాన్‌విండ వన్ని పొటాదునె సొన్నినాద్. అక్క పొటదాన్ బయలు బస్సివలె వెల్లి సొన్నినాద్. ఇజి మీరు నెన్‌నిదెర్”. (ఇబ్బె నుడెతి ఇని బోజనమ్‌బా ఉండెజ్ ఆనాద్ ఇజి యేసు సెలవ సిత్తాన్)

20 మరి యేసు వెప్తాన్, ఒరెన్ వన్ని మన్నులోఇహాన్ వెల్లి వానికదె వన్నిజ్ మయ్లు కిజినాద్.

21-22 మన్నులోఇహాన్ వానిక ఇనికెజ్ ఇహిజ, సెఇ ఆలోసనమ్‌కు, కెలార్‌బూలానిక, లోకాజ్ నప్పికెజ్, రంకు బూలానిక, ఆఇవరిజ్ మన్నికెజ్ దొహ్‌కెజ్ ఇజి ఆస, సెఇ పణి కినిక, మొసెం కినిక, మన్నుదు అనసె ఆజి మండ్రెజ్ అట్‌ఇక, గోస దూసిసినిక, నానె పెరికాన్ ఇజి గర్త ఆనిక, అర్దం కిఇ మన్ను మన్నిక.

* 7:6-7 7:6-7 యెసయ 29:13

23 యాక్యెజ్ విజు లోకుర్ మన్నులోఇహాన్ వెల్లి వాజి ఒరెన్ వన్నిజ్ మయ్లు కినె.

ఉండ్రీ కనానియది అయ్లి కొడోః యేసు మున్ను ఇడ్డి నమకం

24 యేసు అబెణిజ్ నండో దూరం సొన్ని ఉండ్రీ గొరొన్ ఎక్కి డిఃగితాండ్రె తూరు సీదోను ఇని పట్టుమ్కాజ్ డగ్రు మన్ని ముటెజ సొహాన్. బానెఉండ్రీ ఇండ్రొ సొన్ని ఎయెజ్బా తెలివిండ మంజిన ఇజి మన్నుదు ఒడఃబితాన్. గాని వాండ్రు అటవితాన్.

25-26 యూదురు ఆఇ జాతిదు పుట్టి సురోపెకొనియదికాద్ ఉండ్రీ అయ్లి కొడోః యేసు అబ్బె మనాన్ ఇజి వెంజి వెటనె అబ్బె వాతాదె యేసు పాదమ్కాజ్ అర్తాదె మాడిఃస్తాద్. దన్ని గాల్నిజ్ దెయం అస్త మహాద్. “నా గాలుజ్ అస్తమన్ని దెయమ్దిజ్ ఉల్వఅ”, ఇజి యేసుజ్ బతిమాలితాద్.

27 దన్నిజ్ యేసు, “ముజాల్ కొడోఃరిజ్ పొట పంజు బోజనం తీపిస్తెజ్. కొడోఃర్ తిండ్రెజ్ మన్ని రొట్టెజ్ లాగ్జి నుకుడిజ్ సీనిక తగ్విద్”, ఇజి వెహ్టాన్†.

28 అది, “ప్రబు, నీను వెహ్టికనిజమె. గాని నుకుడిజ్బా కొడోఃర్ ఉణిజి బల్ల అడిఃగి అర్ప్పిక ఉణిజినె గదె ఇజి వెహ్టాద్.

29 యేసు, నీను బాగ వెహ్టి. నీను ఇండ్రొ సొన్అ. ఆ దెయం నీ గాలుజ్ డిఃస్త సొహద్ ఇహాన్.

30 అది ఇండ్రొ సొన్ని సుడఃతిజ్ గాల్ని మన్నం మున్ను గూర్త మహాద్. దెయెం దనిజ్ డిఃస్త సొహద్.

యేసు బొయ్ర నతి ఆతివన్నిజ్ నెగెండ కిజినాన్

31 యేసు తూరు ప్రాంతం డిఃసి, సీదోను, దెకపొలి ప్రాంతమ్దాన్ గలీలయ సమ్దరం డగ్రు వాతాన్.

32 నస్తవలె బొయ్ర నతియాతి ఒరెన్వన్నిజ్ నెగెండార్ యేసుబాన్ తత్తార్. “విన్ని మున్ను కియు ఇడఃజి నెగెండ కిఅ”, ఇజి బతిమాల్జి వెహ్టార్.

33 యేసు లోకుర్బాణిజ్ వన్నిజ్ అజ ఒసి, డెస్సెజ్ వన్ని గిబ్బిదు ఇడ్తాన్. వన్ని సొంత డెస్సెజ్ పూస్తాండ్రె గుల్ల వన్నిజ్ నాలికాదు ముట్టాన్.

34 ముట్టాండ్రె ఆగసం దరోట్ దేవుణుదిజ్ సుడఃజి ఉసుర్ గొటాండ్రె బాదఆజి ఎపాత ఇజి వెహ్టాన్. దని అర్దం ఇనిక ఇహిజ రే ఆదెజ్ ఇజి.

35 వెటనె వన్నిగిబ్బిజ్ వెండ్రెజ్, వన్ని నాలిక వర్దిదెజ్ వాతాద్. వాండ్రు బాగ వర్దిదెజ్ మొదోల్స్తాన్.

36 “ఎయెవెట వెహ్టాట్”, ఇజి యేసువరిజ్ కసితం వెహ్టాన్. నా వందిజ్ వెహ్టాట్ ఇజి నండో వెహ్టిజ్బా అలివిండ వారు యేసువందిజ్ మరి నండో వెహ్టార్.

37 యేసు విజు బాగ కిత్తాన్. బొయ్రవన్నిజ్బా వెనివజ, గుల్లవన్నిజ్బా వర్దినివజ కిజినాన్ ఇజి వారు వెహ్టారె బమ్మ ఆతార్.

8

యేసునాల్లివెయిజ్ మణిసిరిజ్ బోజనం సీజినాన్.

1-2 ఆ దినమ్కాజ్ మరి ఒర్పు నండో లోకుర్ కూడ్డి వాతార్. వరిజ్ ఉండ్రెజ్ బోజనం ఇనికబా సిలిజ్ యేసు వన్ని సిసూరజ కూక్తాండ్రె వెహ్టాన్, నజి యా లోకుర్ నావెట వాజి

† 7:27 7:27 యేసు వెహ్టి దన్ని అర్దం ఇనిక ఇహిజ ముజాల్ వన్నిసొంత లోకురాతి యూదురిజ్ వాండ్రు నెగెండ కిదిజ్వలె వరిజ్ వానికెజ్ ఆఇవరిజ్ సీదెజ్ ఆవిద్ ఇజి

మూండ్రి రోస్కు ఆతె. వరిజ్ తిండ్రెజ్ ఇనికబా సిల్లెద్. అందెజె విరి వందిజ్ నా పాణం నోజిన్.

3 విరిజ్ నాను బోజనం సివీండ ఇల్కాజ్ పోక్తిజ కణుకు తర్వజి సర్దు అర్నార్. ఎందనిజ్ ఇహిజ వరిలోఇ సెగొండార్ నండో దూరమ్దాన్ వాత మనార్”, ఇజి వెప్టాన్.

4 అయవలె వన్ని సిసూర్ వెప్టార్, బిడిఃమ్బూమిదు విరిజ్విజేరిజ్ బోజనం సీదెజ్ ఎమేణిజ్ తతెజ్?

5 మీ బాన్ఎసోడు రొటెజ్ మన్నె? ఇజి యేసు సిసూరిజ్ వెన్బాతాన్. మా బాన్ఎడు మన్నె ఇజి సిసూర్ వెప్టార్.

6 అయవలె యేసు లోకాజ్ బూమిదు బస్తు ఇజి వెప్టాన్. ఆ ఏడు రొట్టెజ్అసి దేవుణుదిజ్ వందనమ్కు కింతాండ్రె. వన్కాజ్ రుక్కి లోకాజ్ సీబాజి సీదెజ్ సిసూరిజ్ సిత్రాన్. వారు లోకాజ్ సీబాజి సిత్రార్.

7 వరిబాన్ సెగం ఇజ్రి మొయిజ్బా మపా. యేసు వన్కాజ్బా వందనమ్కు వెప్పి సీబాజి సీదు ఇజి సిసూరిజ్ సిత్రాన్.

8 లోకుర్ విజెరి పొట పంజు తిహార్. వెనుక సిసూర్ మిగ్లితి రొట్టె ముక్కెజ్ ఏడుః గపెజ్ కెప్టార్.

9-10 డగ్రు నాల్లి వెయిజ్లోకుర్ అబ్బె మహార్. లోకాజ్ విజేరిజ్ పోక్కి యేసు సిసూర్వెట ఉండ్రె డోణి ఎక్తాండ్రె దల్మనుత ఇని ప్రాంతం సాహాన్.

11 సెగొండార్ పరిసయరు వాతారె యేసువెట తర్కిస్తెజ్ మొదొల్స్తార్. దేవుణునె వన్నిజ్ పోక్తాన్ ఇనిదన్నిజ్ రుజువలెకెండ ఆగనమ్దాన్ ఉండ్రె బమ్మాతి పణికిజి మజి తోరిన్అ ఇజి వెప్టార్.

12 యేసు మన్నుదు గొప్ప బాదఅజి ఉసుర్కొటాండ్రె యా లోకుర్ ఎందనిజ్ బమ్మ అని పణి తోరిన్అ ఇజి వెప్పినార్. యా లోకాజ్ గుర్తులెకెండ ఇని బమ్మమాని పణిబా దేవుణు తోరిన్ఎన్ నిజమెఇజి వెప్టాన్.

13 నస్తవలె యేసు వరిజ్ డిఃస్తాండ్రె డోణి ఎక్కి సమ్దరం డాట్టి అతాహ పడఃక సాహాన్.

యేసు పరిసయరువందిజ్ హేరోదువందిజ్ వెప్పినాన్

14 అహిజ సిసూర్ రొట్టెజ్ తతెజ్ పోస్తార్. వరిబాన్ డోణిదు ఉండ్రె రొటె మహాద్.

15 యేసు సిసూరిజ్ వెప్టాన్. పరిసయరుది పులాజ్ కిని దూరు* వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టెజ్తెజతిజ్ యేసు ఈహు వెప్పినాన్, ఇజి వారు ఒరెన్వెట ఒరెన్ వర్గితార్.

17 వారు వెహొసనిక యేసు సెని ఎందానిజ్ మీరు రొట్టెజ్ సిల్లితివందిజ్ వర్గిజినిదెర్? ఏలుబా అర్లం కిజి నెస్తెజ్ అబ్తెదెరా? మీ మన్ను గట్టి ఆత మనాదా?

18 మిజి కణుకు మంజిబ తోఇదెరా? గిబిజ్మంజిబా వెన్ఇదెరా? ఇనికబా ఒడ్ఃబిఇదెరా?

19 అయ్దు రొట్టెజ్ ముక్కెజ్ కిజి అయ్దు వెయిజ్ లోకాజ్ సీబాతి సిత్తిజ్ మిగ్లితిక్కెజ్ ఎసాడుః గంపెజ్ మీరు కెప్టాదెర్? ఇజి యేసు సిసూరిజ్ వెన్బాతాన్. అందెజె సిసూర్ వన్నెండ గంపెజ్ కెప్టావ్ ఇహార్.

* 8:15 8:15 హేరోదురాజు కితి తప్ప పణిజ్ని పరిసయరు నెస్సిన్ తప్ప బోదెజ్ పులాజ్ దూరు పులాజ్ కినిలెకెండ లోకాజ్ సెజ్ కిజినాద్ ఇజి యేసు వెప్పినాన్.

20 యేసు మరి వెన్బాతాన్, ఏడు రొట్టె ముక్కెళ్ళ కిజి నాల్గి వెయిజ్ లోకాజ్ సీతి వెనుక మిగ్గితికెళ్ ఎసోడు గంపెజ్ కెహ్తాదెర్? ఏడు గంపెజ్ ఇజి వారు వెహ్తార్.

21 యేసు సిసూరిజ్ వెహ్తాన్, మీరు ఏలుబా నాను కితి బమ్మాతి పణిజి వందిజ్ అర్దం కిదెజ్ నెన్ఇదెరా?

యేసు బేత్సయ్య పట్నమ్దు ఒరెన్ గుడ్డివన్నిజ్ నెగెండ్ కిజినాన్

22 యేసుని, వన్ని సిసూర్ బేత్సయ్య ఇని నాటో వాతార్. అయవలె నెగెండార్ ఒరెన్ గుడివన్నిజ్ యేసుబాన్ తత్తార్. యేసు, నీను విన్నిజ్ ముట్అ", ఇజి వాండ్రు నెగెండ్ ఆనివందిజ్ బతిమాలితార్.

23 యేసు అయ గుడివన్నిజ్ కిదు అస్తాండ్రె నారు డాటిసి ఒత్తాన్. అయ గుడివన్ని కణుకాజ్ పూసి డెస్సెజాణ్ ముట్టి "నిజి ఇనికబా తోర్జినాదా", ఇజి వెన్బాతాన్.

24 వాండ్రు కణుకు పెర్జి, సెడిబా తోర్జినాద్, గాని లోకు మరెక్ నడిజిని వజ తోర్జినాద్ ఇజి వెహ్తాన్.

25 మరి ఒర్పు యేసు వన్ని కణుకెజి ముట్టాన్. నస్తివలె వన్ని కణుకు నెగెండ్ ఆతిజ్ విజు నెగెండ్ సుడెత్తాన్.

26 యేసు వన్నిజ్ బేత్సయ్య మర్జి సొన్యా ఇజి వెహ్సి వన్ని ఇండ్రో పోక్తాన్.

యేసు ఎయెన్ ఇజి పేతురు వెహ్సినాన్

27 యేసుని, వన్ని సిసూర్ పిలిపుది ఆతి కయసరయ పట్నమ్దిజ్ డగ్రు మన్ని నాహ్కాజ్ వయనం కిజి మహార్. సొన్సి మహిజ్ సర్దు యేసు వరిజ్ వెన్బాతాన్, నాను ఎయెన్? ఇజి లోకుర్ వర్గిజినార్?

28 దన్నిజ్ సిసూర్, నెగెండార్ నీను బాప్తినం సీని యోహాను ఇజినార్. మరి నెగెండార్ నీను పూర్బమ్దాన్మహి ఏలియ ప్రవక్త ఇజినార్. మరి నెగెండార్ నీను పూర్బమ్దుమహి ప్రవక్తలోఇ ఒరెన్ ఇజి వెహ్సినార్, ఇహార్.

29 ఆహిజి మీరు నజి ఎయెన్ ఇజి వెహ్సినాదెర్? ఇజి యేసు సిసూరిజ్ వెన్బాతాన్. నస్తివలె పేతురు, నీను క్రీస్తు ఇహిజి దేవుణు ఏర్పాటు కితిపోక్తాన్", ఇజి వెహ్తాన్.

30 యాక ఎయెర్వెటబా వెహ్కట్ ఇజి కసితంవరిజ్ ఆడ్ర సిత్తాన్.

యేసు వన్ని సావువందిజ్ వెహ్సినాన్

31 యేసు వరిజ్ నెన్పిస్సెజ్ మొదొల్స్తాన్, లోకుమరిసి ఆతి నాను నండొ మాలెజ్ ఓరిస్సెజ్వలె. యూద పెద్దెల్జ, పెరి పుజెరిజు, యూదురి రూలుజ్ నెన్పిస్సికార్ నజి నెక్కుపొక్కార్ లోకుర్ నజి నహ్సార్లె. సాజి మూండ్రె దినమ్కాజ్ దేవుణు నజి మర్జి నిక్కాన్లె.

32 యేసు యాకెళ్ విజు డాఃవ్ఎండ వెహ్కాజ్ పేతురు యేసుజ్ ఉండ్రెపడఃకాదు బని, ప్రబువ నిజి యలెకెండ్ జర్గిదెజ్ ఆవిద్ ఇజి గటిజి వెహ్కాజ్ మొదొల్స్తాన్.

33 యేసు సిసూర్దరోట్ మర్జి సుడఃజి కోపమ్దాన్ పేతురుజ్ వెహ్తాన్. "ఓ సయ్తనా నాబాణిజ్ డిసి సాన్అ. నీ మన్నుదు మన్ని ఆలోసనమ్కు దేవుణుబాణిజ్ వాతికెళ్ ఆఉ. లోకుబాణిజ్ వాతికదె నీను ఆలోసనం కిజిని".

34 నస్తివలె యేసు లోకాజ్ విజెరిజ్, సిసూర్జి వన్నిబాన్ కూక్కి ఈహు వెహ్తాన్. ఎయెన్బా నావెట వాదెజ్ ఇహిజి వాండ్రు వన్ని సొంత ఇస్టమ్కు నజి నమ్మితివందిజ్ వన్నిజ్ వాని ఇని మాలెజ్బా ఓరిస్సెజ్ తయారాజి నావెట వాదెజ్†.

† 8:34 8:34

35 ఎయెరుబా వన్ని పాణదిజ్ కాపాడదెజ్ సుడతిజ వన్నిజ్ ఎలాకాలం దేవుణువెట బత్కిని బత్కు దొహ్కావద్. గాని ఎయెస్బా నా వందిజ్, సువార్త వందిజ్ వన్ని పాణం సితిజ వన్నిజ్ ఎలాకాలం దేవుణువెట బత్కిని బత్కు దొహ్కానాద్.

36 ఒరెన్ వాండ్రు కొరితివజ యా లోకమ్ది ఆస్తిసుకం విజు దొహ్కాఆజి వన్నిజ్ ఎలాకాలం దేవుణువెట బత్కిని బత్కు దొహ్కావ్విండా మహిజ, ఇని లాబం ఇని లాబంబా సిల్లెద్.

37 ఎందానిజ్ ఇహిజ ఎలాకాలం బత్కిని పాణమ్దిజ్ బదులు ఇనికబా సీదెజ్ లోకఅట్విన్.

38 యా తరమ్దికార్ నండొ సెఇకార్ దేవుణువందిజ్ మన్ను సిల్లెండ మన్నికార్. నా బుబ్బు ఆతి దేవుణుజాయ్దాన్ దేవుణు దూతెజ వెట వానివలె, నా వందిజ్ నామాటెజవందిజ్ సిగు ఆనివరివందిజ్ లోకుమారిసియాతి నానుబా సిగు ఆన”.

9

1 యేసు వరిజ్ ఈహు వెహ్సాన్, “నాను నిజం వెహ్సాన. ఇబ్బె నిహిమహి వరిలోఇ సెగొండార్ దేవుణు గొప్పనత్తుదాన్ వన్ని లోకురిజ్ ఏలుబడిః కిజనిక సూణిదాక సావర్”.

యేసుప్రబుజ్ మూర్తి మారిసినాద్.

2 ఆరు రోస్కుసాహివెనుక యేసు పేతురు, యాకోబు, యోహానుజ్ వన్నివెట ఉండ్రీ పెరి గొరొత్ కూక్ బత్తాన్. ఆ నాల్ఎరతప్ప అబ్బె మరి ఎయెర్బా సిల్లెర్. అబ్బె వరిఎద్దు వన్నిమూర్తి మారితాద్.

3 యేసు పొర్పాతి మహి సాక్క జిగిజిగి మెరిసిని తెల్లానిజాయ్ వజ ఆతాద్. యా లోకమ్దు నసా తెల్లాజ్ నొరబానికార్ ఎయెర్ సిల్లెర్.

4 మోసెని, ఏలియ వరిజ్ తొర్ ఆతార్. వారు యేసువెట వర్గిజ మహార్.

5-6 అక్క సుడఃజి సిసూర్ తియెలాతార్. అందెజె పేతురు ఇనిక వెహ్సాజొ నెన్విండ, “ప్రబు, మాటు ఇబ్బె మహిజనెగెద్. అందెజె మూండ్రీ గుడుఃసెజ్ తొహ్పిట్. నిజి ఉండ్రీ, మోసెజ్ ఉండ్రీ, ఎలియెజ్ ఉండ్రీ” ఇహాన్.

7 అయవలె ఉండ్రీ మొసాప్ వరిజ్ పిడఃగితాద్. అయవలె అయ మొసాప్ లొఇహాన్, “వీండ్రు నా ఇష్టమాతి నా మరిన్. విన్నిమాట వెండ్రు”, ఇజి ఉండ్రీ కంటం వాతాద్.

8 వెటనె వారు సురుల సుడఃతిజ్ వరివెట యేసు తప్ప ఎయెర్బా తొర్వితార్.

9 వారు గొరొన్ డిఃగ్జివాజి మహివలె, “లోకుమరిసియాతి నాను సాతివరిబాణిజ్ మర్జి నిజినిదాక మీరు సుడఃతిక మహిక ఎయెజ్బా వెహ్కాట్”, ఇజి యేసు వరిజ్ కసితం వెహ్సాన్.

10 యేసు వెహ్సావజి వారు ఎయెజ్ వెహ్విండ వరిమన్నుదు ఇడఃజి వరిలోఇ వారె వర్గితార్, “సాజి నిజ్నిక ఇహిజ అర్లం ఇనిక?”.

11 నస్తివలె వారు యేసుజ్ వెన్బాతార్, “ఏలియ ముజాల్ వాదెజ్వెలె ఇజి యూదురి రూలు నెన్పిస్సికార్ ఎందానిజ్ వెహ్సానార్?”

12 యేసు ఎలియ ముజాల్ వానాన్ ఇజి వెప్తాక నిజమె. వాండ్రు వాజి విజు కొత్తజ్ కినాన్జె*. గాని లోకుమరిసియాతికాన్ నండొ కస్టమ్కు ఓరిసి మాలెజ్ ఆజి లోకువన్నిజ్ నెక్కిపొక్కార్లె ఇజి రాస్తి దనిజ్ అర్థం మిజి తెలినాదా?

13 గాని నాను మిజి వెప్సిన, ఏలియ వాతాన్. వన్ని వందిజ్ రాస్తి లెకెండ్ వరిజ్ ఇస్టం ఆతి వజ వారు వన్నిజ్ కితార్. ఇజి వెప్తాన్.

దెయం అస్తికొడొడిజ్ యేసు నెగెండ్ కిజినాన్

14 యేసుని, సిసూర్, మహి సిసూర్ మహిబాన్ వాతిజ్ సిసూర్ సురుల నండొ లోకుర్ కూడత్తి మహిక సుడుతార్. యూదురి రూలు నెన్పిన్నికార్ సిసూర్వెట వాదిసి మహార్.

15 అబ్బె మహి లోకుర్ విజెరె యేసుజ్ సుడతారె నండొ బమ్మ ఆజి వెటనె వన్నిబాన్ ఉహ్కాన్కివాజి వన్నిజ్ మాడిస్తార్.

16 నస్తివలె యేసు, “మీరు ఇనిదన్నిజ్ సిసూర్వెట వాదిసి మహిదెర్? ఇజి వెన్బాతాన్.

17 ఆ జనమ్లోఇ ఒరెన్ ఈహు వెప్తాన్, “మేస్టర్, నా మరిసిజ్ నీ డగ్రు తత్త. వన్నిజ్ ఉండ్రె దెయం అస్తాదె వన్నిజ్ వర్తివిండ కితాద్.

18 ఆ దెయం నా మరిన్అన్ని వేడెడు అబ్బెనె వన్నిజ్ అర్ప్పినాద్. నస్తివలె వాండ్రు వెయదాన్ పెంపులు కక్కి పల్కు కొహ్సినాన్. వాండ్రు డుడ్డువజ డజ్ న ఆజినాన్. ఆ దెయమ్దిజ్ ఉల్పు ఇజి నీ సిసూర్ వెట నాను వెప్తా గాని సిసూర్ అట్వెతార్.

19 యేసు వెప్తాన్, “నమకం సిల్లి యా తరమ్దికిదెరా, నాను ఎస్సాకాలం మీవెట మంజిన? మీరు కిజినెకెజ్ ఎస్తా ఓరిస్టెజ్? వన్నిజ్ నా డగ్రు తగ్ అ”.

20 నస్తివలె వారు ఆ కొడొడిజ్ యేసుడగ్రు తత్తార్. ఆ దెయం యేసుజ్ సుడతెజ్సరి వన్నిఒడొల్ విజు వణకిసి బూమిద్ అర్ప్తాద్. అర్ప్తాదె వాండ్రు సుడతెబాజి పొజు కక్తాన్.

21 నస్తివలె యేసు, “వన్నిజ్ దెయం అసి ఎస్సా కాలం ఆతాద్?”, ఇజి అపొసిజ్ వెన్బాతాన్. “ఇజ్జి వెలెహనె”, ఇజి అప్పొసి వెప్తాన్.

22 “ఆ దెయం కొడొడిజ్ సప్తెజ్ ఇజి నండొసుట్టు సిసూర్, సిల్లిజి ఏరుదు అర్ప్పి మహాద్. నీను ఇనికబా కిదెజ్ అట్టి ఇహిజ మా ముస్సు కనికారం ఆజి మజి సాయం కిత”, ఇజి అప్పొసి యేసుజ్ వెప్తాన్.

23 యేసు వెప్తాన్, “నీను ఇనికబా కిదెజ్ అట్టిజ ఇజి మీరు నజి వెప్పొదెరా? ఎయెన్బా దేవుణు ముస్సు నమకం ఇడ్డిజి వన్నిజ్ దేవుణు ఇనికబా కిదెజ్ అట్టాన్”.

24 వెటనె ఆ ఇజ్జి వన్ని అప్పొసి, “నాను నమిజిన. అనుమానం సిల్లెండ నమినివజ నాను నిజి నమ్మిదెజ్ సాయం కిత”, ఇజి డటం వెప్తాన్.

25 అబ్బె లోకుకూడెజి ఉహ్కాన్కి వానిక యేసు సుడతెజి ఆ దెయమ్దిజ్ “ఓ గుల్లబొయ్ ర దెయం, యా కొడొడిజ్ డిసి వెల్లి సొన్ అ ఇజి నాను ఆడ్ర సీజిన. ఎనెజ్బా మర్జి వన్ని లోఇ రమ”, ఇజి డటిసి వెప్తాన్.

26 నస్తివలె ఆ దెయం గగొలాజి వన్నిజ్ గొప్ప వణకిసి డిస్త సాహాద్. ఆ కొడొడిజ్ సుడతెజి సాతివన్నివజ మహాన్. అక్క సుడతెజి నండొండార్ “యా కొడొడి సాత సాహాన్” ఇహార్.

* 9:12 9:12 పడాయ్ ప్రమాణమ్దు మన్ని మలాకి ప్రవక్త రాసి పుస్తకమ్దు రాస్తిమన్నిలెకెండ్ ఇహాజి ఏలియ ముజాల్ వాదెజ్ ఇజి యూదురి నమ్మిజినార్. మలాకి 3:1; 4:5-6.

27 గాని యేసు వన్ని కీదు అసి నిక్కిజ్ వాండ్రు నిహాన్.

28 యేసు ఉండ్రీ ఇండ్రో సాహివెనుక, యేసు అజ మహిజ్ వన్నిసిసూర్, “మాపు ఎందానిజ్ ఆ దెయమ్దిజ్ ఉల్పైజ్ అట్వితాప్? ఇజి వెన్బాతార్.

29 అందెజె యేసు, “యా రకం దెయమ్కు పార్దనం వెలెనె గాని మరి ఇనిదనివెలెబా సాన్ఉ”, ఇజి వెహ్తాన్.

యేసు వన్ని సావువందిజ్ మరి వెహ్సినాన్

30 వారు అబెణిజ్ సాన్ని గలీలయదాన్ సాన్ని మహార్. వారు ఎంబె మంజినారొ ఇజి ఎయెజ్బా తెలిదెజ్ యేసుజ్ఇస్టం సిల్లెతాద్.

31 ఎందానిజ్ ఇహిజ, యేసు వన్ని సిసూర్జి నెన్పిసి మహాన్. ఇనిక ఇహిజ, “లోకుమరిసియాతి నజి లోకాజ్ ఒపజెప్పార్లె. వారు నజి సప్పార్. మూండ్రీ రొస్కాజ్ నాను బత్తిజి నిజ్నాలె.

32 గాని యేసు వెహ్తామాట సిసూర్ అర్దం కివితార్. ఆ మాటెజ వందిజ్ వన్నిజ్ వెన్బాదెజ్ వారు తియెలాతార్.

విజేరిజ్ ముస్కు పెరికాన్ ఎయెన్?

33 వారు కపెర్నూము ఇని పట్టుమ్దు వాతార్. వారు ఇండ్రో వాతిజ్ యేసు మీరు సర్దు ఒరెన్వెట ఒరెన్ ఇనిదని వందిజ్ వాదిసి మహిదెర్. ఇజి వెన్బాతాన్.

34 గాని వారు ఇనిక వర్షింండ అలెతార్. ఎందానిజ్ ఇహిజ వానివలె సర్దు ‘మా లోఇఎయెన్ పెరికాన్’ ఇజి ఒరెన్వన్నివెట మరిఒరెన్ వాదిసి మహార్.

35 నస్తివలె యేసు బస్తాండ్రై పన్నెండు మణిసిర్ సిసూరిజ్ కూక్కి ఈహు వెహ్తాన్, ఎయెన్ మహి వరిముస్కు పెరికాన్ ఆనాండ్రో, వాండ్రు విజెరి ఇంక అగిజి మండ్రెజ్. వాండ్రు విజేరిజ్ సేవ కిదెజ్.

36-37 వెనుక యేసు ఒరెన్ ఇజ్జి కొణొడిదిజ్ తసి వరినడిమి నిల్పాన్. మరి ఆ కొణొడిదిజ్ఎతాండ్రై ఈహు వెహ్తాన్, “ఒరెన్ ఇజ్జి కొణొడిదిజ్ ఎయెర్ నా పేరు అసి వరిఇండ్రో డగ్రు కినారొ వారు నజి డగ్రు కినార్. ఎయెర్ నజి డగ్రుకినారొ నజి ఆఎండ నజి పొక్కివన్నిజ్ డగ్రు కినార్.

మా ముస్కు పగసిల్లికాన్ మా పడకాదు మన్నికాండ్రై

38 యోహాను వెహ్తాన్, “మేస్టర్, ఒరెన్ నీ పేరు అసి దెయమ్కాజ్ ఉల్పైక మాప్సుండెతాప్. వాండ్రు మాలోఇ మనికాన్ ఆవన్. అందెజె మాపు వన్నిజ్ అడ్డు కిత్తాప్.

39 యేసు వెహ్తాన్, “వన్నిజ్ మీరు అడ్డు కిమాట్. నా పేరు అసి యేలు బమ్మాతి పణికినికాన్ వెటనె నా వందిజ్ సెఇక వెహ్తాన్.

40 మా ముస్కు పగ సిల్లికాన్ మా పడకాదు మనికాండ్రై.

41 నాను నిజం వెహ్సిన, ఎయెర్బా మీరు క్రీస్తు వారుఇజి వెహ్సిన, నా పేరు అసి గినాడు ఏరుఉండెజ్ మిజి సితిజ దేవుణు వరిజ్నిజం ఇనాయం సీనాన్.

తప్పకిబిసినివన్నిజ్ నండొ సిక్కి వానాద్

42 నాముస్కు నమ్మకం ఇడ్డి యా ఇజిరి కొణొణన్ని వరిలోఇ ఒరెన్వన్నిజ్ ఎయెర్బా తప్పకిదెజ్, సరి తోరిస్తిజి వాండ్రు మెడకాదు పెరి జతవణుకు తోహె ఆజి నమ్దరమ్దు అడ్డెగి ముడిగి సానొక వన్నిజ్ నెగెద్. ఎందానిజ్ ఇహిజ తప్పకిబిన్నివన్నిజ్ ఒద్దె సిక్కి వాన్ద్.

43 నీ కియు నిజీ తప్ప కిబిస్తీజ దనిజ్ కత్తి విసీర్అ.

44 రుండి కికు మంజి ఎలాకాలం సిసు మంజినిబాన్ సాన్ఏండ ఉండ్రె కియు మంజి ఎలాకాలం బత్తిదెజ్ దేవుణుబాన్ సొనిక నెగెద్.

45-46 నీ కాలు తప్పకిబిస్తీజ దన్నిజ్ కత్తి విసీర్అ. రుండి కాల్కు మంజి ఎలాకాలం సిసు మంజినిబాన్ దేవుణు నిజీ అర్వేండ, సొట వాండ్రు ఆజి ఎల్ల కాలం బత్తిదెజ్ దేవుణు బాన్ సొనిక నెగెద్.

47 నీ కణుక తప్పకిబిస్తీజ దన్నిజ్ లాగ్గి విసీర్అ. రుండి కణుకు మంజి దేవుణు నిజీ నరకమ్దు అర్వేండ ఉండ్రె కణక మంజి దేవుణు ఏలుబడిదు మంజినిక నెగెద్.

48 బానె వరి పిడుకు† సాఉ. సిసు నమ్ఏద్”.

49 సోరుదాన్ ఇడ్చివజ దేవుణుదిజ్ నమ్మిని వన్నిజ్ సిసు నని కష్టందాన్ ఇడ్చాన్.

50 సోరు, నెగ్గికాదె గాని దన్నిజ్మని రుసి సొహిజ ఎలాగ మరి దన్నిజ్ రుసి తపిస్తెజ్ ఆనాద్? మీరుబా సారు రుసి సీనివజ ఒరెన్వెట ఒరెన్ సమనం కల్గిజ మండ్రెజ్”.

10

అల్నిజ్డిఃస్తెజ్నాయమ్నా ఇజి యేసు నెన్పిసినాన్

1 యేసు, వాండ్రు మహిబాణిజ్ డిఃసి యూదయ ప్రాంతమ్దు వాజి యెర్దాన్ గడ్డ డాట్టాన్. మరి వన్నిబాన్ నండో లోకుర్ వాతార్. ఎనెజ్బా నెన్పిసినెలెకెండో యేసు వరిజ్ నెన్పిస్తాన్.

2 నెగొండార్ పరిసయేరు యేసుడగ్గు వాజి వన్నిమాటెజ తప్ప అస్తెజ్ సుడఃతార్. వారు యేసుజ్ వెన్బాతార్, మోసె సీతి రూలువజ ఒరెన్ వన్నిఅల్నిజ్ డిఃస్తెజ్ తగితి రూలుమనాదా?

3 అందెజె యేసు, మోసె ఇని రూలు మిజి సితాన్? ఇజి వరిజ్ వెన్బాతాన్.

4 ఒరెన్ వన్ని అల్నిజ్ డిఃస్తెజ్ ఇహిజ ఉండ్రె ఆక్కు రాసిసీజి దన్నిజ్ డిఃస్తెజ్ ఆనాద్. ఇజి మోసె సీతి రూలుదు మనాద్, వారు వెప్టార్.

5 యేసు వెప్టాన్, మీ మన్నుజ్ నస్సా గర్త ఆతిజ్నె యా ఆడ్ర రాసి సితాన్.

6 గాని దేవుణు లోకాజ్ పుటిస్తెవలె మొగకొడెః అయేలి కొడెఃలెకెండో వరిజ్ పుటిస్తాన్.

7 అందెజె మొగవాండ్రు వన్ని అయేసి అపొసిజ్ డిఃసి వన్ని అల్నివెట కూడఃజి మంజినాన్.

8 రిఎర్ ఉండ్రె ఒడెఃల్వజ ఆజిమంజినార్. అందెజె మరి ఎనెజ్బా వారు రిఎర్ ఆవెండ ఉండ్రె లోకునె.

9 అందెజె దేవుణు జత్తకూడిఃప్తివరిజ్ లోకు అజ కినిక ఆఏద్.

10 వారు ఇండ్రో మహివలె సిసూర్ యా సజతి వందిజ్ యేసుజ్ మరి వెన్బాతార్.

11 యేసు వెప్టాన్, “ఒరెన్ అల్నిజ్ డిఃసి మరిఉండ్రె దనిజ్ ఇడ్డెఆతిజి వాండ్రు రంకు బూలాజినాన్.

12 అయే లెకెండో అయేలికొడెః మాసిజ్డిఃసి మరి ఒరెన్వన్నిజ్ ఇడ్డెఆతిజి అది రంకుబూలాజినాద్”.

యేసు ఇజిరి కొడెఃరిజ్ దీవిసినాన్

13 లోకుర్, వరిఇజిరి కొడెఃరిజ్” వరిముస్కు వన్ని కిక్కు ఇడ్డెదెజ్ ఇజి యేసుబాన్ తత్తార్. అక్కు సుడఃతారె సిసూర్ వరిజ్ జట్టిజ్ ఆతార్.

† 9:48 9:48 సబ్బిసానిదన్నిజ్ లోఇమన్ని పిడుకుజ్

14 గాని యేసు అక్క సుడేతాండ్రై సిసూర్ముస్కు కోపం ఆతాన్. “యా ఇజిరి కొడోరిజ్ నా డగ్గు రపిర్. వరిజ్ అడ్డు కిమాట్. ఎందానిజ్ ఇహిజ యాలెకెండే మన్నికారె దేవుణు ఏలుబడిడు మంజినార్.

15 నాను వెహ్తా కిజమె. ఇజిరి కొడోరిజ్ నమకం ఇడ్పివజ దేవుణుముస్కు నమకం ఇడ్పికారె దేవుణు ఏలుబడిడు మంజినార్. సిల్లికార్ సోన్వోర్”, ఇజి యేసు వెహ్తాన్.

16 నస్తవలె యేసు అయ ఇజిరి కొడోరిజ్ ఎల్పి, వరి ముస్కు కిక్కు ఇడ్జిజ్పోమ్జి దీవిస్తాన్.

ఆస్తి మనికాన్ యేసుడగ్గు వాజినాన్

17 యేసు అబ్బెణాన్ సాండ్రైజ్ సొత్తిజ్ ఒరెన్ ఉహ్కీ వాజి వన్ని ముజాల్ ముణుకుజ్ ఊర్జి మాడిస్తాన్, “ఓ నెగ్గి బోదకినికి, దేవుణువెట ఎలాకాలం మంజిని బత్తుదు మండ్రైజ్ ఇహిజ నాను ఇనిక కిదెజ్”, ఇజి యేసుజ్ వెన్బాతాన్.

18 “నీను ఎందానిజ్ నజీ నెగ్గికి ఇజి వెహ్సిని? దేవుణు ఒరెండ్రై నెగ్గికాన్. మరి ఎయెన్బా నెగ్గికాన్ ఆవీన్.

19 దేవుణు వెహ్తా రూలువిజు నిజీ తెలినాద్. లోకాజ్ నస్తైజ్ ఆవీద్, రంకు బూలాదెజ్ ఆవీద్, డోజి కిమా, అబద్దమ్దిజ్ సాస్య వెహ్తా, ఎయెజ్బా మోసం కినిక ఆవీద్, యాయ బుబ్బురిజ్ గవరమ్దాన్ నెగ్గెండ్ సుడిదెజ్”, ఇజి యేసు వన్నిజ్ వెహ్తాన్.

20 వెహ్తాజ్ “బోదకినికి, ఇజిరి వెలెహన్ అసి యా విజువనకాజ్ లోజీజినె నాను మంజిన”, ఇజి వాండ్రు వెహ్తాన్.

21 యేసు వన్నిజ్ సుడేజి వన్నిజ్ ప్రేమిస్తాన్. “నీను ఉండ్రై కిదెజ్ మనాద్. అక్క ఇనిక ఇహిజ నీను సొన్పి నిజీ కల్లితిమనిక విజు పొర్పి అయ డబ్బుజ్ బీదాతివరిజ్ సిఅ. అయవలె పరలోకమ్దు నిజీ ఆస్తి దోహ్కాద్. వెనుక వాజి నా సిసూ ఆఅ”, ఇజి యేసు వెహ్తాన్.

22 యామాట వెహ్తాండ్రై వాండ్రు మొకొం ఊతాండ్రై మన్నుదు దుకమాజి సోహాన్. ఎందానిజ్ ఇహిజ వాండ్రు నండ్రై ఆస్తి మన్నికాన్.

23 నస్తవలె యేసు సురుల సుడేజి సిసూర్జి వెహ్తాన్. “ఆస్తి మన్నికాన్ దేవుణు ఏలుబడి; అడిగి మండ్రైజ్ ఎస్సానో కన్టం.

24 యేసు వెహ్తా మాటెజ్ సిసూర్ వెహ్తా బమ్మ ఆతార్. యేసు మరి వెహ్తాన్, “కొడోరాండ్రై దేవుణు ఏలుబడి; అడిగి మండ్రైజ్ ఎస్సానో కన్టం.

25 ఆస్తిమన్నికాన్ దేవుణుకిని ఏలుబడి;దిజ్ లోజీజి మండ్రైజ్ ఇహిజ కన్టం. ఉండ్రై ఒంటె బోబానం బోరోదాన్ డుగ్గనిక దన్నిజ్ ఇంక సులునె”.

26 యాక వెంజి సిసూర్ మరి ఒద్దె బమ్మ ఆతార్. అహిజ దేవుణు రక్కిస్తాలెకెండ్రై ఎయెన్ మండ్రైజ్ అట్నాన్? ఇజి వారు ఒరెన్వెట మరి ఒరెన్ వెహ్తాన్.

27 నస్తవలె యేసు వరిజ్ సుడేజి, అయా లోకాజ్ అల్ ఇకాదె గాని దేవుణు విజు కిదెజ్ ట్నాన్”, ఇజి వెహ్తాన్.

28 నస్తవలె పేతురు, మాపు విజు డిస్తాపె నీవెట వాతావ్ ఇజి యేసుజ్ వెహ్తాన్.

29-30 యేసు మరి వెహ్తాన్, నాను వెహ్తాక ఇనిక ఇహిజ, నా వందిజ్, సువార్త వెహ్తా వందిజ్, ఇలుజొల్లు నా దాదతంబేరిజు, తజీబీబికాజ్, కొడోరిజ్, అయ్సిఅపొసిరిజ్, బూమిజ్ డిస్తావన్నిజ్ యా లోకమ్దునె వంద వందుజ్ ఇల్కు, దాదతంబేరిజ్, బీబితజీకు, కొడోరిజ్, అయ్సిఅపొసిర్, బూమి, కల్లినాద్. అక్కాదె ఆవీండ

దేవుణుడిజ్ నమ్మితివరిజ్ యా లోకమ్దు కష్టమ్కుబా వానె. గాని దేవుణు రాజువజ వానివలె వాండ్రు ఎలాకాలం దేవుణువెట బత్సినాన్.

31 అయలెకెండెనె కడెవెర్దికార్ ఇజి ఒడిఃబినికార్ మొదొహికార్ ఆనార్. ముందొహికార్ ఇజి ఒడిఃబినికార్ కడెవెర్దికార్ ఆనార్.

యేసు మరిఉండ్రీ సుటు వన్నిసావు వందిజ్ వెప్పినాన్

32 యేసుని, సిసూర్ యెరూసలేమ్దు సొన్ని మహార్. లోకుర్బా వరివెట సొన్ని మహార్. యేసు వరి ముజాల్నడిఃతాన్. యేసు యెరూసలేమ్దు సొన్నిని వందిజ్ సిసూర్ బమ్మతార్. లోకుర్ తియెలాతార్. యేసు పన్నెండు మణిసిర్ సిసూర్ వన్నిడగు కూక్కి, వన్నిజ్ జర్గినిక వరిజ్ వెప్తాన్.

33 “ఇదిలో మాటు యెరూసలేమ్దు సొన్నినాట్. లోకుమరిసియాతి నాను పెరి పుజెరిజ, యూదురి రూలువెప్పా వరిజ్ ఒవజెప్పార్లె. వారు నజీ సావుదిజ్ సిక్స సీజి యూదురు ఆఇవరిజ్ నజీ ఒవజెప్పార్లె.

34 వారు నజీ వెక్కిసి, నా మున్ను పూసి, కొర్దదాన్ డెయ్జి సప్పార్లె. మూండ్రీ రొస్కొణిజ్ మర్జి నిజ్నాలె”, ఇజి వెప్తాన్.

యాకోబుని యోహాను యేసువెట ఉండ్రీమాట వెహాసినార్

35 నస్తవలె జెబెదయ మరిసిరాతి యాకోబు యోహాను ఇనికార్ యేసుడగు వాతార్, “ఓ బోదకినికి, మాపు ఇనికబా లొస్తిజ అక్క మజీ సీదెజెవలె” ఇహార్.

36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్బాతాన్.

37 వారు, “నీను రాజువజ ఏలుబడిః కినివలె మజీ ఒరెన్వన్నిజ్ నీ ఉణెర్ పడఃకాదు ఒరెన్వన్నిజ్ నీ డేబ్ర పడఃకాదు బనె కిఅ ఇజి కోరిజినాప్”, ఇజి వెప్తాన్.

38-39 యేసు వరిజ్ “మీరు ఇనిక లొసినిదెరొ మీరు నెన్ఇదెర్. నాను ఒరిస్సెజ్ మన్ని నండొ బాదెజ్ మీరు ఒరిస్సెజ్ అట్సిదెరా? నాను పొందిని బాప్తినం పొందిదెజ్ అట్సిదెరా?”, ఇజి వరిజ్ వెన్బాతిజ్ వారు, “మాప్ అట్నాప్ ఇహార్. దనిజ్ యేసు నాను ఒరిస్సి నండొబాదెజ్ మీరు ఒరిస్సిదెర్. నాను పొందిని బాప్తినం మీరు పొందిదెజ్.

40 గాని నా ఉణెర్ పడఃకాద్ డేబ్ర పడఃకాద్ ఎయెర్ బస్తెజ్ ఇజి తీర్మనం కితిక నాను ఆవి. దన్ని వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి పది మన్ని సిసూర్ యా మాట వెహారె యాకోబుని యోహాను మున్ను కోప్పమాతార్.

42 యేసు సిసూరిజ్ విజేరిజ్ కూక్కి ఈహు వెప్తాన్, “యూదురు ఆఇవరిలోఇ ఏలుబడిః కిదెజ్ అతికారం మన్నికార్ వరిమున్ను అతికారం తోరిస్సార్ వరిలోఇ పెరికార్ వరిజ్ మన్ని అతికారమ్దాన్ లోకురిజ్ అణను తిగ్జనార్ ఇజి మీరు నెన్సిదెర్.

43 మీరు వరిలెకెండె మండ్రెజ్ ఆవిద్. గాని మీ లోఇ ఎయెన్బా పెరికానాదెజ్ ఇహిజ వాండ్రు మిజీ పణిమణిసిర్ లెకెండె ఆదెజ్ వలె.

44 మరి ఎయెన్బా మిజీ విజేరె మున్ను నెయ్కి ఆదెజ్ ఇహిజ వాండ్రు మిజీ విజేరిజ్ వెటిపణిమణిసిల్లెకెండె ఆదెజ్ వలె.

45 ఎండ్రానిజ్ ఇహిజ లోకు మరిసిఆతి నానుబా లోకాజ్ సేవ కిదెజ్ వాత గాని సేవ కిబె ఆదెజ్ రెవిత్. మరి నండొండారిజ్ వరి పాపమ్కాణ్ విడుఃదల కిదెజ్ నా పాణం సీదెజ్ వాత మన్ను”.

యేసు గుడ్డిఆతి బర్తిమయిజ్ నెగెండె కిజినాన్

46 యేసుని సిసూర్ యెరికొపట్నమ్దు వాతార్. వారు నండో లోకుర్వెట పట్నమ్దాన్ సొన్ని మహిజ్ తిమాయి మరిసి ఆతి బర్తిమయి ఇని గుడ్డివాండ్రు సరి పడకాదు లొన్పాదెజ్ బస్త మహాన్.

47 సరి దాన్ వాజినికాన్ నజరేతువాండ్రు యేసు ఇజి వెంజి, “ఓ యేసు, దావీదుమరిసి నా ముస్కు కనికరం తోరిన్అ”, ఇజి డటం గగోల్అతాన్.

48 సేన లోకువన్నిజ్ “పలాక్ మండ్రు ఇజి గోల కిత్తార్. గాని వాండ్రు “ఓ “దావీదుమరిసి, నా ముస్కు కనికరం తోరిన్అ”. మరి ఒద్దె డట్టం డేల్స్తాన్.

49 యేసు నిహండ్రె, “వన్నిజ్ కూక్అ”, ఇజి వెప్తాన్. వెప్తిజ్ వారు ఆ గుడ్డివన్నిజ్ కూక్సి, “దయరం మన్అ, యేసు నిజి కూక్సినాన్, నిజ్అ”, ఇజి వెప్తాన్.

50 వెటనె వాండ్రు వన్ని నీరి సొక్క విసిర్తాండ్రె నిజ్జి యేసు బాన్వాతాన్.

51 యేసు వన్నివెట, “నాను నిజి ఇనిక కిడెజ్ఇజి నీను కోరిజిని?”, ఇజి వెన్బాతాన్. నస్తివలె వాండ్రు, “యేసు, నాను బేస్తిజ్ ఆపిద్”, ఇజి వెప్తాన్.

52 యేసు, “నీను నా ముస్కు నమకం ఇడ్డి అందెజె నీను నెగెండ్ ఆతి నీను ఇండ్రొ సొన్అ” ఇహాన్. వెటనె సుడుఁదెజ్ అట్టాన్. వాండ్రు యేసువెట సొహాన్.

11

యేసుజ్ రాజువజ మర్యాద సీజినార్

1-2 యేసుని, వన్నిసిసూర్ యెరూసలేం డగ్రుమన్ని బెత్పాగె బేతానియ ఇని నాహ్కజ్ వాతార్. యా నాహ్క ఒలివ గొరొన్డగ్రు మన్నె. అబ్బె వాతిజ్ యేసు సిసూర్ రివిరిజ్ కూక్సి, “మీరు ఎద్రు మని నాటో సొండ్రు. అబ్బె సొహిజసరి తొప్తి మని ఉండ్రె పెరి గాడఁదె పిల్ల మీరు సూణిదెర్ దని ముస్కు ఎయెర్బా ఎసెజ్బా బన్వీతారె. దనిజ్ కుత్సి నాబాన్ పేర్జి తగాట్”.

3 “మీరు ఎందా కుత్సినిదెర్ ఇజి ఎయెర్బా వెప్తిజు, యాక ప్రబుజ్ కావాలి. మరి వెటనె దన్నిజ్ మర్జి పోక్వాన్ ఇజి వెప్తూ” ఇహాన్.

4-5 వారు సొన్ని ఇల్లుముజాల్ వీదిదు తొప్తి మని ఉండ్రె గాడఁదె పిల్లదిజ్ సుడ్తారె. వారు దనిజ్కుత్సి మహిజ్, అబ్బె మనికార్, “ఎందానిజ్ మీరు యా గాడఁదె పిల్లదిజ్ కుత్సినిదెర్”, ఇజి వెన్బాతారె.

6 యేసు వరిజ్ వెప్తి వజనె సిసూర్ వెప్తార్. అబ్బె మహికార్ వరిజ్ సరిసిత్తార్.

7 వారు గాడఁదె పిల్లదిజ్ యేసుబాన్ తత్తార్. దన్నిముస్కు బస్తెజ్ వరి పాతెజ్ పప్తిజ్ యేసు దన్నిముస్కు ఎక్సి యెరూసలేమ్దు సొండ్రెజ్ సోతాన్.

8 సొహిజ్ సేన లోకు వరి నీరి సొక్కెజ్ సర్దు పప్తార్. మరి నెగెండాంగుడ్డెదు మని మరెకాణి కొమ్మెజ్ తతారె సర్దు పప్తార్. ఆహె కిజి వారు యేసుజ్ మర్యాద కిత్తార్.

9-10 ముజాల్ సొన్ని మహికార్, వెనుక వాజి మహికార్, “ఓనన్న! ప్రబు సిత్తి అతికారమ్దాన్ వాజినికాన్ పొగ్గడెః ఆనికాన్*. వూ అని గొగొఆతి దావీదు రాజువజ ఏలుబడిః కిదెజ్ వాని ప్రబు గొప్ప వాండ్రు పరలోకమ్దు మన్ని దేవుణుదిజ్ ఓసన్న!”, ఇజి డేల్స్తాన్.

11 యేసు యెరూసలేమ్దు వాజి దేవుణు గుడిఁదు సొహాన్. అబ్బె మహి విజుదనిజ్ యేసు సుడ్తాన్. గాని పొద్దు ఆతిజ్ వన్నెండు మణిసిరి సిసూర్వెట బేతానియ నాటో సొహాన్.

* 11:9-10 11:9-10 కీర్తన 118:26.

పట్టు సిల్లి బొడెమరాన్

12 మర్న నాండీక్ యేసు, వన్ని సినూరు బేతానియదాన్ సొన్నిమహిజ్ యేసుజ్ బజ కట్టాద్.

13 యేసు దూరమ్దాన్ ఉండ్రీ బొడెమరాన్ సుడేతాన్. పట్టు కాలం ఆఇజ్బా మరాతు ఆకుజ్ మహా. మరాత్పట్టు మంజినె ఇజి డగ్రు సొహండ్రై సుడేతాన్. గాని ఆకు తప పట్టు సిల్లు.

14 యేసు ఆ మరాతిజ్” నీ పట్టు మరి ఎసెజ్బా లోకుర్తిన్ ఏండ ఆపిర్’ ఇజి వెప్టాన్. వాండ్రు వెప్టాక సినూర్ విహర్.

యేసు యెరూసలేమ్దు మన్ని పెరిదేవుణుగుడిడు సొహాన్

15 యేసుని వన్ని సినూర్ యెరుసలేమ్దు వాతిజ్, యేసు అబ్బెమహి యూదురి దేవుణు గుడిడు సొహాన్. అబ్బెగుడి: అర్జుదు మహి కొణి వరిజ్ పొర్నివరిజ్ విజేరిజ్ వెల్లి పొక్తాన్. డబ్బు మారిన్ని వరి బల్లెజ్ని పావురపొటిజి పొర్నిని వరి పిటెజ్ మప్తా విసీర్తాన్.

16 ఇని సామానమ్బా ఎయెర్బా దేవుణు గుడి: బాడి:దాన్ బరు మోస్తాజ్ యేసు సరి సీవ్తాన్.

17 యేసు వరిజ్ నెన్పిసినివెలె ఈహు వెప్టాన్, “నా గుడి: విజెరి లోకాజ్ పార్దనం కిని గుడి: ఇజి కూకె ఆనాద్లె†, ఇజి దేవుణు మాటదు రాస్త మనాద్. గాని మీరు దన్నిజ్ డోజారిజి సాలం‡ లెకెండ కిత్తి మన్నిదెర్”.

18 యేసు వెప్టాక లోకుర్ విజేరె వెంజి బమ్మ ఆతార్. అబ్బె మహి పెరిపుజెరిజు, యూదురి రూలుజ్ నెన్పిసినికార్ అక్క సుడే:జి తియెలాతార్. యేసుజ్ ఎలాగ సప్తజ్ ఇజి ఆలోసనం కిత్తార్.

19 పొద్దు ఆతివలె యేసుని, వన్ని సినూర్ ఆ పట్టుమ్దాన్ సొహర్.

పట్టు సిల్లి బొడెమరాన్ వందిజ్ యేసు వెహ్నినాన్

20 పెందాల్నై వారు సొన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజు సాతిక వారు సుడే:తాన్.

21 పేతురు యేసు వెప్టాక గుర్తు కిత్తాన్. “ప్రబు నీను నయప్ సిత్తి బొడెమరాన్ సాత మనాద్”, ఇజి వెప్టాన్.

22-23 యేసు వరివెట ఈహు వెప్టాన్, “మీరు దేవుణు మున్ను నమకం ఇడు:దు. నాను నిజం వెహ్నిన. ఎయెర్బా యా గొరోణ్దిజ్” పెర ఆజి సమ్దరమ్దు అర్అ’ ఇజి వన్ని మన్నుదు అనుమానం సిల్లెండ నమిజి వెప్టాజి ఆ వజనె జగ్గినాద్”.

24 అందెజె నాను వెహ్నిన, మీరు పార్దనం కినివెలె మీరు ఇనికెజ్ లోసినిదెరో అక్కెజ్ దోహ్కంఎండ ముజాలె అక్కెజ్ దోహ్కాద్ ఇజి నమ్మిదు. నస్తివలె అక్కెజ్ విజు మిజి కల్లినె.

25 మీరు ఎసెజ్బా పార్దనం కినివెలె ఎయెన్బా మీ మున్ను తప్పకిత్త మనాన్ ఇహిజి వన్నిజ్ సెమిస్తాజ్.

26 నస్తివలె పరలోకమ్దు మన్ని నీ బుబ్బాతి దేవుణు మీ తప్పజ్బా సెమిస్తాన్.

యేసుజ్ ఎయెన్ అతికారం సితాన్ఇజి వెన్బాజినార్

† 11:17 11:17 యెనయ 56:7. ‡ 11:17 11:17 యిర్మీయ 7:11

27 యేసుని, వన్నిసిసూర్, మరి యెరూసలేమ్దు వాతార్. యేసు అబ్బె దేవుణుగుడిః నడిఃజి మహిజ్ పెరిపుజెరిబు యూదురి రూలుజ్ నెన్పిసినికార్ యూదపెద్దెల్జ వన్నిబాన్ వాతార్.

28 వారు యేసుజ్ వెన్బాతార్, “నీను ఇని అతికారమ్దాన్ యా పణిజ్ కిజిని? యాపణిజ్ విజుకిదెజ్ ఎయెన్ నిజి అతికారం సితాన్?”.

29 యేసు వెప్తాన్, “నాను మిజి ఉండ్రిమాట వెన్బాన. నజి జబాబ్ వెప్తు. అయవలె యా పణిజ్ ఎమేణి అతికారమ్దాన్ కిజిన ఇజి నాను మిజి వెప్నా.

30 యోహానుజ్ బాప్తీసం సీదెజ్ అతికారం ఎంబెణిజ్ వాతాద్? దేవుణు బాణిజ్నా, లోకుర్ బాణిజ్నా? నజి వెప్తు.

31-32 యేసు వెప్తామాట వెంజి వరిలోఇ వారె ఒడిఃబితార్. దేవుణుబాణిజ్ వాతాద్ ఇజి వెప్తాజ అయవలె ఎందనిజ్ మీరు వన్నిజ్ నమ్మిఇతిదెర్ ఇజి వెన్బానాన్. లోకుర్ బాణిజ్ వాతాద్ ఇజి వెప్తాజ వారు లోకాజ్ తియెల్ ఆతార్. ఎందానిజ్ ఇహిజ యోహాను దేవుణు మాట వెప్సి ప్రవక్త ఇజి లోకుర్ నమ్మితార్.

33 అందెజె వారు, “మజి తెలిఎద్”, ఇజి మర్జి వెప్తార్. అయవలె యేసు, “అహిజ, యా ఎంమేణి అతికారమ్దాన్ యా పణిజ్ కిజిన ఇజి మిజి నానుబా వెహాఎ”, ఇజి వెప్తాన్.

12

పాలిసిత్తి టోటకత

1 యేసు వరిజ్ కతవజ ఈహు వెప్తాన్. “ఒరెన్వన్నిజ్ కండెక్ బూమి మహాద్. వాండ్రు ఆ బూమిదు ద్రాసమొకెజ్ ఉణుస్తాన్. దన్ని సురుల కోటి తోహిస్తాన్. దన్నిలోఇ ద్రాక్సపట్టురసం పీర్దెజ్ పణుకుదు ఉండ్రి గనుగు తయార్ కిబిస్తాన్. టోట కాప్ కిదెజ్ ఉండ్రి ఎత్తుమన్ని ఇల్లుబా తయార్ కిత్తాన్. వెనుక ద్రాసటోట సెగొండార్ రెయ్యుతురిజ్ పాలిదిజ్ సితాండ్రె పయనం కిజి మరి ఉండ్రి దేసం సాహాన్.

2 పట్టు పంట్ని కాలమ్దు ఆ టోట ఎజమాని వన్నిజ్ వానివంతు లొసి తగ్ల ఇజి ఒరెన్ పణిమన్నిజ్ పాలి అస్తిమన్నివరిడగు పోక్తాన్.

3 గాని పాలి అస్తిమన్నికార్ వన్నిజ్ డెయ్యూరె వహి కీదాన్ మర్జి పోక్తార్.

4 అయవలె ఆ టోట ఎజమాని మరి ఒరెన్ పణిమణిసిజ్ వరిడగు పోక్తాన్. వారు వన్నిజ్ బురారు గాయం ఆనివజ డెయ్యేజి సిగు కిజి పోక్తార్.

5 యజమాని, వెనుక, మరి ఒరెన్వన్నిజ్ వరిబాన్ పోక్తాన్. వన్నిజ్ వారు డెయ్యు సప్తార్. అయవజనె ఎజమాని వన్ని పణిమణిసిర్ సేన లోకురిజ్ పోక్తాన్. సెగొండారిజ్ వారు డెయ్యేతార్. మహివరిజ్ సప్తార్.

6 ఆక్కర్దిజ్ అయ ఎజమానిజ్ వాండ్రు ప్రేమ కిత్తి ఒరెండ్రెమహి మరిసి మిగిలిత్తాన్. అందెజె వన్నిజ్ పోక్తాన్. ఆ పాలి అస్తిమన్నికార్ నా మరిసిజ్ గవరం సీనార్లె ఇజి వరిబాన్ పోక్తాన్.

7 ఆ పాలి అస్తిమన్నికార్ ఎజమాని మరిసిజ్ సుడఃతారె వీండ్రు యా టోటదిజ్ అక్కుమన్నకాన్ రద్దు మాటు విన్నిజ్ సప్పి యా టోట మాది కిసాట్”, ఇజి వారు కూడిఃజి వర్గితార్.

8 అందెజె వారు ముస్సు అర్తాండ్రె వన్నిజ్ సప్తార్. సప్తారె టోట వెల్లి విసిర్తార్.

9 ఆ బోట ఎజుమాని వరిజ్ ఇనిక కినాన్? వాండ్రు వాజి ఆ అస్తిమహివరిజ్ సప్పాండై ఆ బోట ఆఇ రెయ్దురిజ్ పాలిదిజ్ సీనాన్.

10-11 యేసు మరి వెహ్తాన్. “ఇల్లు తోహ్వికార్ నెక్కిప్పొక్కి పణుకునె మూలదిజ్ ములపణుకు ఆతాద్. యాక దేవుణు కియుదాన్ జర్గితిక. యక మా కణుకెజ బమ్మాతిక* ఇజి దేవుణు మాట రాస్తి మన్నిక మీరు సదవిఇదెరా?

12 యేసు యా కతవజ నెస్పిక్కి వెహారె ‘మా వందిజ్ వెహ్తాన్’ ఇజి పెద్దెలుజు నెస్తారె యేసుజ్ అస్తెజ్ ఇజి సుడఃతార్. గాని మందలోకురిజ్ తియెలాతారె వన్నిజ్ డిఃస్తారె సాహార్.

పన్ను సీదెజా పోనినా ఇజి వెన్బాజినార్

13 వెనుక వారు పరిసయరుజ్ని హెరోదురాజు పార్తిలోఇ సెగొండారిజ్ యేసుమాటదు తపు అస్తెజ్ వన్నిబాన్ పోక్తార్.

14 వారు వన్ని డగ్రు వాజి, ఓ బోదకినికి, నీను నిజం వెహ్వికి ఇజి మావ్నెన్నావ్. నీను ఇజిరికార్ ఇజి పెరికార్ ఇజి తేడ తోఇకి వరిజ్ ఇన్లమాతిలెకెండ వర్గినికి ఆఇ దేవుణు సరి వందిజ్ నిజమ్దాన్ నెస్పిసినికి. కయ్సరుజ్ పన్ను సీనిక నాయమ్నా ఆవ్దా?

15 యూదురు ఆతి మాపు అక్కసీదెజా పోనినా? ఇజి యేసుజ్ వెన్బాతార్. వారు వేసం కినికార్ ఇజి నెసి “వీరు నా మాటదు ఎందానిజ్ తపు అస్తెజ్ సుడఃజినిదెరె? ఇజి యేసు వెన్బాతాన్. యేసు మరి వెహ్తాన్, ఉండ్రీ దినారి కాసు తసి నజీ తోరిస్తు”.

16 వారు తసి వన్నిజ్ తోరిస్తార్. నస్తివలె వాండ్రు, దిన్నిముస్సు మన్ని బొమ్మ ఎయెది, దని ముస్సు రాస్తి రాంత ఎయెది? ఇజి వెన్బాతాన్. “కయ్సరుది”, ఇజి వారు వెహ్తార్.

17 అయవలె యేసు కయ్సురుజ్ సెందితికెజ్ కయ్సురుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెహ్తాన్. యేసు వెహ్తాక వారు వెంజి బమ్మ ఆతార్.

సాతి వెనుక బత్కిఎరెఇజి సెగొండార్ వెహ్సినార్

18 నస్తివలె సాతివెనుక మర్జి నిజీనిక సిల్లెద్ ఇజి నెస్పిసిని సదుకయరు ఇనివరి లోఇ సెగొండార్ యేసుడగ్రు వాతార్. వారు యేసుజ్ ఉండ్రీ ప్రన్న వెన్బాతార్.

19 “ఓ బోదకినికి, ఒరెన్ పెండ్లి ఆతి వెనుక కొడోఃర్ సిల్లెండ సాతిజి వన్ని తంబెర్సి ఒన్నిసేజ్ ఇడె ఆజి కొడోఃర్ ఇడిదెజ్. అహె సాతివరి వందిజ్ కొడోఃర్ పుట్టెజ్వలె ఇజి మోసి సత్తి రూలుదు మనాద్.

20 ఏలు సుడఃఅ ఉండ్రీ కాలమ్దు ఏడుగురు తంబెరిజు మహార్. తోల్సుర్దికాన్ ఉండ్రీ బోదెలిదిజ్ పెండ్లి ఆతాన్. కొడోఃర్ సిల్లెండ సాతాన్.

21 సాతిజ్ నడిఃపి వాండ్రు ఒనిసేజ్ పెండ్లి ఆతాన్. వాండ్రుబా కొడోఃర్ సిల్లెండ సాతాన్. వెనుక కొగ్రి నడిఃపి దన్నిజ్ ఇడె ఆతాన్.

22 అహె ఏడుగురుబా దన్నిజ్ పెండ్లి ఆజి కొడోఃర్ సిల్లెండ సాత సాహార్. కడెవెరిదు అయ బోదెలిబా సాతాద్.

23 అహెజి సాతివరిబాణిజ్ మర్జి నిజీనివలె అ బోదెలి అయా ఏడు గురు లోఇ ఎయెజ్ అల్పి ఆనాద్? ఏడుగురుదిజ్బా ఆది ఆల్పి ఆత మహాద్గదె?

* 12:10-11 12:10-11 కీర్తన 118:22,23.

24 యేసు వరిజ్ ఈహు వెహ్లాన్. “దేవుణు మాటెజ్ మీరు నెన్ఇదెర్. దేవుణునత్తు ఎస్సాన్ ఇజి మిజీ నెన్ఇదెర్. అందెజె మీరు తప్ప వెహ్లాన్ దెర్.

25 సాతి వరిబాణిజ్ మర్జి నిజినివలె ఎయెర్బా పెండ్లి ఆవెర్. పెండ్లిదిజ్ సివర్ వారు పరలోకమ్దు మన్ని దేవుణు దూతెజలెకెండ్ మంజినార్.

26 సతి వరిజ్ దేవుణు మర్జి నిక్కివందిజ్ మోసె రాస్తి పుస్తకమ్దు, వెయ్జి మహి తుపెజా డగ్రుహాన్ దేవుణు మోసెజ్ వర్గతి మాట మీరు నద్విఇదెరా? నాను, అబ్రాహాం దేవుణు, ఇస్సాకు దేవుణు, యాకోబురిదేవుణు, ఇజి దేవుణు అయవలె వెహ్లాన్

27 అందెజె వాండ్లు సాతిసాహికార్ మాడిసిని దేవుణు ఆవెన్ బత్కిజి మన్నికార్ మాడిసిని దేవుణునె ఇజిమాటు సుడిజినాట్. సాతికార్ బత్కివెర్ ఇజి మీరు వెహ్లాక గొప్ప తప్ప†.

విజు రూలుదు లోఇ ముకెలమాతి రూలు ఎమేణిక్?

28 యూదురిజ్ రూలు నెన్పిస్సివరి లోఇ ఒరెన్బానె వాజి యేసు నదుకయరుజవెటె వాదిసినిక వెహాన్. వారు మర్జి వెహ్లాజ్ అట్ఇవజి యేసువరిజ్ జబాబ్ సిత్తాన్ ఇజి సుడిజి వాండ్లు వెన్బాతాన్ దేవుణు సిత్తి విజు రూలుజలోఇ ముకెలమాతిక్ ఎమేణిక్?”

29 దస్సిజ్ యేసు వెహ్లాన్, “విజు వన్కాజ్ లోఇ ముకెలమాతిక్ యాకదె, “ఓ ఇస్రాయేలుదికిదెరా, మీరు వెండ్లు. ప్రబువాతి మా దేవుణు ఒరెండ్లె.

30 నీను నీ పూర్తి మన్సుదాన్, పూర్తి పాణమ్దాన్, పూర్తి బుద్ధిదాన్, పూర్తి సత్తుదాన్ ప్రబువాతి దేవుణుదిజ్ ప్రేమిస్సెజ్”.‡

31 దిన్నీ వెనుక ముకెలమాతి రూలు ఇనిక ఇహిజ, “నీను నిజినె ప్రేమిస్సిలెకెండ్ మహివరిజ్ విజెరిజ్ ప్రేమిన్అ”,§ యా రుండి రూలుజ మిస్తిక్ రూలుజ్ మరి ఎమేణిక్బా సిల్లెద్.

32 నస్తివలె అయ మణిసి వెహ్లాన్. ఓ బోదకినికి నీను బాగ వెహ్లా. “దేవుణు ఒరెండ్లె. వాండ్లు తప్ప మరి ఎయెన్ దేవుణు సిలెన్”, ఇజి నీను వెహ్లాక్ నిజమె.

33 నీ పూర్తి పాణమ్దాన్, పూర్తి బుద్ధదాన్ పూర్తి సత్తుదాన్ నీ దేవుణుఆతి ప్రబుజ్ ప్రేమిస్సెజ్, నిజి నీనె ప్రేమిస్సివజి మహివరిజ్ ప్రేమిస్సిక్, దేవుణుదిజ్ సీజిని విజు పూజెజి మున్సు, దేవుణుదిజ్ కిజిని దూపమ్కాజ్ మున్సు నండ్ ముకెలమాతిక్”.

34 యేసు వెహ్లాక్ వాండ్లు నెగ్రెండ్ అర్దం కిజి జబాబ్ వెహ్లాన్ ఇజి సుడిజి యేసు ఈహు వెహ్లాన్. “నీను దేవుణుదిజ్ ఏలుబడిః అడిగి మండ్లెజ్ డగ్రు ఆతి. అబ్బెణాన్ ఎయెన్బా యేసుజ్ ఇనికబా వెన్బాదెజ్ దయరం సిల్లెద్.

35 ఒర్ను యేసు దేవుణుగుడిఃదు నెన్పిసి మహిజ్ ఈహు వెన్బాతాన్. రాజువజి వాని క్రీస్తు పూర్వమ్దు మహి దావీదురాజు కుటుమ్దు పుట్వాన్ ఇజి యూదురిజ్ రూలుజ్ నెన్పినికార్ ఎందనిజ్ వెహ్లానార్?

36 దావీదురాజు దేవుణుఆత్మదాన్ ఈహు వెహ్లాన్: “నాను నీ పగ వరిజ్ నీ పాదం అడ్లి ఇడ్డిదాక నీను నా ఉఱెర్ వడక బసి మన్అ ఇజి ప్రబు నా ప్రబువెటె వెహ్లాన్*.

37 దావీదురాజు క్రీస్తుజ్ ప్రబుఇజి కూక్కినాన్. అహిజి ఎలాగ క్రీస్తు వన్ని మరిసి ఆనాన్?”. యేసు వెహ్లాక్ వెంజి లోకుర్విజెరె నండ్ సర్ద ఆతార్.

† 12:27 12:27 అబ్రహాము, ఇస్సాకు, యాకోబు ఇనికార్ యూదురు పెరి అనిగగెరు వారు నండ్ పంటిజి ముందాల సాతసాహర్. గాని వారు ఏలు దేవుణుబాణిజ్ బత్కిజి వన్నిజ్ మాడిసి మంజినార్. ‡ 12:30 12:30 ద్విత్తి 6:4,5. § 12:31 12:31 లేవి 19:18. * 12:36 12:36 కీర్తన 110:1.

38 యేసు లోకాజ్ నెన్పిసినివెలె ఈహు వెహ్లాన్. “యూదురి రూలుజ్ నెన్పిసినివరి వందిజ్ జాగర్త మండ్రు. వారు నండో దరది నీరి సొక్క† తోడిగిజి బూలాదెజ్ కొరిజినార్. సత్తెజి నడిఃమి పెరికార్ ఇజి మాడిఃసి ఆదెజ్ కొరిజినార్.

39 యూదురి మీటిజ్ ఇండ్రో సొహిజ ముకెలమాతి బాడ్డిదు బస్తెజ్, విందుదు సొహిజ బస్తెజ్ ముకెలమాతి బాడ్డిదు వారు కొర్జినార్.

40 ఇనిక సిల్లి ముండమణిసిజ్ మొసెం కిజి వన్మాజ్ కల్లితిక వారు ఒనార్. లోకుర్ విజేరి విరిజ్సుడఃజి గొప్పు నెగ్గికార్ ఇజి వెహ్లావజి వారు నండో పార్తనం కిజినార్. నిని లోకాజ్ గొప్పు సిక్స వానాద్”.

ముండ మన్ని అర్పి నంద

41 యేసు దేవుణుగుడిఃదు సంత సీనిపెటె ఎర్దుబస్తాన్. దేవుణుగుడిఃదు వాతికార్ సంత పెటెదు డబ్బు అర్పిమహిక వాండ్రు సుడఃజి మహాన్. ఆస్తిమన్నుకార్ నండోడార్ నండో డబ్బుజ్ ఆ పెటెదు అర్పాద్.

42 నస్తివలె ఉండ్రీ బీద ముండ మన్ని వాజి రుండి కాణిజ్ అర్పాద్.

43 యేసు సిసూరిజ్ వన్నిడ్రు కూక్కి, “నాను నిజం వెహ్నిన, దేవుణు సుడఃతిజ్ యా ఇనిక సిల్లి రాండి బోదెలి మహివిజేరిజ్ మున్ను లావు అర్పాద్.

44 ఆస్తిమన్నుకార్ వరిజ్ కల్లితి ఆస్తిబాణిజ్ అర్పాద్. గాని అది దన్నిజ్ సిల్లిబాణిజ్ దన్నిజ్ బత్తిదెజ్ మన్నికెజ్ విజు సంత పెట్టెదు అర్పాద్”, ఇజి వెహ్లాన్.

13

యేసు గుడిఃవందిజ్ వెహ్నినాన్

1 యేసు దేవుణుగుడిఃదాన్ సొన్ని మహిజ్ వన్ని సిసూర్ లోఇ ఒరెన్, “ప్రబు యా పణుకుజ్ ఎస్సా గొప్పవి యా మేడఃజ్ ఎస్సా గొప్పవి”, ఇజి వెహ్లాన్.

2 పన్నిజ్ యేసు వెహ్లాన్, “మీరు ఏలు సుడఃజిని యా గొప్పు నెగెండ్ తోర్జిని మేడఃజ్ ఉండ్రీ పణుకు మున్ను, మరి ఉండ్రీ పణుకు నిల్నిమన్విండ లోకుర్ వనకాజ్ లాగ్గు అర్పారె పూర్తి నాసనం కినార్లె”.

3 యేసు దేవుణుగుడిః ఎర్దు ఒలివ గొరొత్, బస్తి మహిజ్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ఎండ యేసుజ్ వెన్బాతార్.

4 “యాకెజ్ ఎసెజ్ జర్గిలె? ఇక్కెజ్ విజు జర్గిదెజ్ డగ్రు ఆతాద్. ఇజి తొరిసిని గుర్దు ఇనిక? మజి వెహ్లా.

5 యేసు వరిజ్ వెహ్లాన్, “ఎయెర్బా మిజి మొసెం కిఎండ జాగర్త సుడఃదు మండ్రు.

6 నండో లోకుర్ నా పేరు ఇడఃఆజి వానారెలె. “దేవుణు ఏర్పాటు కిత్తి పొక్తి క్రిస్తు నానె”, ఇజి వెహ్ని నండోడారిజ్ మొసెం కినార్లె.

7 మీరు విద్దెమ్కు వందిజ్ వినిదెర్లె. మరి విద్దెమ్కు వానెలె ఇజి సాటిసినిక వెనిదెర్లె. అయవలె తియిలామ. అక్కెజ్ విజు జర్గిదెజ్వెలె. గాని యాక ఆక్కర్ ఆవద్.

8 లోకుర్మున్ను లోకుర్ని దేసమ్కాజ్ మున్ను దేసమ్కు విద్దెం ఆనాలె. అబ్బె ఇబ్బె నండోబాన్ బూమి కద్దినాద్లె. కరు వానాద్లె. యాక్కెజ్ విజు ఉండ్రీ బోదెలి కియుదు అస్సెజ్ ముజల వానినొపిజ్ మొదొల్స్తిలెకెమడ్ ఇక్కెజ్ విజు జర్గిజి మహిజ ఆక్కర్ దినమ్కు వాజినాద్ ఇజి నెస్తెజానాద్.

† 12:38 12:38 యా నండో దరది నీరి సిక్క పెరి లోకు తోడిగిజి మహాన్.

9 మీరు జాగ్రత్త మండ్రెజ్. లోకుర్ మిజి కొర్టుదు ఒపజెప్పార్లె. యూదురి మీటిజ్ ఇల్కాజ్ మిజి కొరడెజాణిజ్ డెయ్నార్లె. రాజర్జ ముందాల అదికారిజ ముందాల, నా ముస్సు నమకం ఇట్టివందిజ్ మిజి నిల్ప్పార్లె. అయావెలె నా వందిజ్ సువార్ల వెప్పిదెర్లె.

10 దేవుణు సువార్ల బూమిముస్సు మని విజెరిజ్ ఆక్కర్ దినమ్కాజ్ ముజల వెహ్లాజ్వలె.

11 వారు మిజి తొప్పి ఒసి కోర్టుదు ఒప్పజెప్పివెలె మీరు అబ్బె ఇనిక వెహ్లాజ్ ఇజి బెజ ఆమాట్. అయవలె దొహ్కెలె. వెప్పికిదెర్ మీరు ఆఇదెర్ దేవుణు ఆత్మ మిజి వెప్పికాదె మీరు వెప్పిదెర్”.

12 యేసు మరి వెహ్లాజ్. “దాద్ది తంబేర్నిజ్ తంబెర్సి దాద్దిజ్ అప్పొసి మరిసిజ్ సప్తెజ్ ఒపజెప్పార్లె. కొడెర్ అయ్సి అపొసిర్ ముస్సు గొడెబఅజి వరిజ్ సప్పార్లె.

13 మీరు నా ముస్సు నమకం ఇట్టివందిజ్ విజెరి మీ ముస్సు పగదాన్ మంజినార్లె. ఆక్కర్దాక ఓరిస్సి వన్నిజ్ దేవుణు రక్కినార్లె.

దేవుణుగుడిః లోఇ నండొతియెల్అనిక ఉండ్రీ వానార్లె

14 దేవుణుగుడిః లోఇ మండ్రెజ్ ఆఇ నాసనం కిని సెఇక ఆతిక ఉండ్రీ* దేవుణు గుడిఃదు నెగ్గి బాడ్డిదు నిల్పి మంజనిక సూణివలె (యాక సద్వినికాన్ అర్లం కిదెజ్వలె) యూదయ దేసెమ్దు మంజనికార్ గొరొకాజ్ ఉహ్లాజ్ వెలె.

15 ఇల్లు ముస్సు మన్నికార్ ఇనికబా సామానం తత్తెజ్ ఇజి మర్జి ఇండ్రొ సొన్కాట్.

16 గుడెదు పణి కిజి మహికార్ వరి పాత తత్తెజ్ ఇజి మర్జి ఇండ్రొ సొనిక ఆవిద్.

17 ఆ దినమ్కాజ్ పోటర్దు మన్ని వన్కాజ్ పాలు ఊట్పిసిని వనకాజ్ గొప్ప కస్టం.

18 ఇక పినికాలమ్దు రెవండ పార్లనం కిదు.

19 ఎందానిజ్ ఇహిజ దేవుణు యా లోకం పుటిస్తిబాణిజ్ అసి ఏలుదాక రెఇనిన్ని గొప్ప కస్టమ్కు వానె. నిన్నికెజ్ మరి ఎసెజ్బా రెజ్.

20 దేవుణు ఆ కస్టం ఆతి రొస్సుతకు కివండ మహిజ ఎయెన్బా తప్తె ఆదెజ్ అఅట్విన్. గాని దేవుణు ఎర్లిస్తివరి వందిజ్ ఆ రొస్సుకు దేవుణు తక్కు కిత్తాన్.

21 ఆ రొస్కాజ్ ఎయెర్బా ఇదిలో క్రీస్తు అబ్బె మనాన్, సిల్లిజి క్రీస్తు ఇబ్బె మనాన్, ఇజి వెహ్లాజి వరి మాట నమ్మిమాట్.

22 ఆ కాలమ్దు నానె క్రీస్తు ఇజి అబద్దం వెప్పికార్, నానె దేవుణు పోక్తి ప్రవక్త ఇజి అబద్దం వెప్పికార్ వానార్. వారు నండొ బమ్మాతి పణిజ్ ముజాల ఎసెజ్బా తొఇ నన్ని బమ్మాతి పణిజ్కిజి మోసం కిదెజ్ సూణార్. అట్టిజి దేవుణు ఎర్లిస్తి మన్ని వరిజ్బా మొసం కిదెజ్ సూణార్.

23 అందెజె మీరు జాగ్రత్త మండ్రెజ్. నాను ముజాలె విజు మిజి వెహ్లా మన్ను.

లోకుమరిసి దేవుణుజాయ్దాన్ వానిరోజు

24-25 ఆ కస్టమాతి రొస్సుసాహి వెనుక పొదు సీకటి ఆనాద్. నెల జాయ్ సివద్. సుక్కెజ్ ఆగసమ్దాన్ రాల్పె. ఆగాసమ్దు మన్నికెజ్ కడ్లిసె.

26 నస్తివలె లోకు మరిసియాతి నండొ సత్తుదాన్ గొప్ప జాయ్దాన్ కూడిఃతి సొకుదాన్ మొసాప్ ముస్సువానిక లోకుర్ సూణార్లె.

* 13:14 13:14 యా సెఇక ఇనికిజి వెహ్లాజ్ సిల్లిద్ ఆఇ దేయమ్క మాలిపిట వందిజ్ నొ క్రీస్తుజ్ ఎర్లిసిని వన్ని వందిసె వెప్పినాన్. దిన్ని వందిజ్ దానియెల్ ప్రవక్త రాస్త మహాన్ 9:27; 11:31; 12:11.

27 నాను నా దూతరిజ్ పోక్వానె యా లోకమ్ది కొసెజదాన్ ఆగనమ్ది కొసెజదాక నాల్లి మూలెజాణిజ్ దేవుణు ఎరలిన్తి వరిజ్ ఉండ్రెబాన్ తప్పిన్.

బొడెమరాన్ది సజతి

28 బొడెమరాన్దిజ్ సుడఃజి యాక మీరు నెస్తు. దన్ని ఆక్కుజ్ రాలజి సిగ్రిసినివలె ఎండకాలం డగ్రు ఆతాద్ ఇజి మీరు నెస్సిదెర్.

29 ఆయలెకెండెన్ మీరు యాక్కెజ్ విజు జర్గిజినిక సుణివలె నాను మర్జి వాదెజ్ డగ్రు ఆతాద్ ఇజి నెన్సినిదెర్లె.

30 యా సజతిజ్ విజు జార్గిని ముందాల య తరమ్దికార్ సావర్ ఇజి నాను మిజి నిజం వెప్పిన్.

31 ఆగనం బూమి సిల్లెండ ఆనె. గాని నా మాటెజ్ ఎలాకాలం మంజినె.

ఎయెన్ నెన్ఇ రోజు, ఎయెన్ నెన్ఇ గడిఃయ

32 నాను మర్జి వాని రోజువమదిజ్, గడిఃయవందిజ్ ఎయెజ్ నెన్వర్. బుబ్బనె ఆవిండ పరలోకమ్దు మన్ని దూతార్బా మరిసిబా నెన్వర్.

33 యేసు మరి వెప్తూన్, “మీరు పార్దనం కిజి జాగర్త మండ్రు. ఆ రోజు ఎనెజ్ వానాదొ మిజి తెలివ్ద్.

34 ఎలాగ ఇహిజ ఒరెన్, ఎజుమాని వన్ని ఇల్లు వన్ని పణిమన్సిరిజ్ ఒపజెప్పి, వరివరిపణిజ్ వరి వరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సాండ్రెజ్ సాహి వజనె.

35 అందెజె మీరు జాగర్త ఎద్రుసుడిఃజి మండ్రు. ఎందనిజ్ ఇహిజ ఇల్లు ఎజుమాని పొద్దు ఆతివెలె వానానొ, మదరెయ్యు వానానొ, కొరు కెరెని వెలె వానానొ, సిల్లిజ జాయ్ ఆతిజ వానానొ మిజి తెలివ్ద్.

36 ఎజుమాని వందిజ్ ఎద్రు సుడిఃఇ గడిఃయదు వెటనె వాతిజ మీరు నిద్ర కిజి మనికవాండ్రు సుడుఃదెజ్ ఆవిద్.

37 నాను మిజి వెప్తొకదె విజేరిజ్ బా వెప్పిన్. జాగర్త కావ్ కిదు”.

14

1 పస్కు పండోయ్ని, పులాజ్ ఆఇ రొట్టెజ్* పండోయ్ వాదెజ్ రుండి రోస్కు మనాద్. పెరిపుజెరిబుని, యూదుర్ రూలు నెన్పిసినికార్ యేసుజ్ ఎలాగబా ఉపాయ్ కిజి అసి నప్తెజ్ సుడిఃజినార్.

2 “పండోయ్ లోఇ వన్నిజ్ తొప్తొజ లోకు గొడఃబ కినార్ అందెజె పండోయచ లోఇ పోని ఇజి వారు వెప్తార్.

ఉండ్రీ అయ్ లికొడొః యేసు బురారు వాసనం నూనె వాక్తాద్

3 యేసు బేతనియ ఇనినాటో సీమోను ఇన్ని వన్ని ఇండ్రొ బోజనమ్దిజ్ బస్తాన్. విండ్రు కుస్తురోగం ఆస్తిమహిజ్ యేసు నెగెండ్ కిత్త మహాన్ నస్తివలె ఉండ్రీ బోదెలి నూనజ్ పణుకుదాన్ తయార్ కిత్తి ఉండ్రీ సీసాదు† నండొ విలువమన్ని జటమామ్మి ఇని నెగ్గి వాసనం మన్ని నూనె తత్తాదె మూతడగ్గు రెక్కి యేసు బురారు వాక్తాద్.

4-5 అబ్బొ మహికార్ నెగొండార్ యాక సుడఃజి కోపమాజి వరిలోఇ వారె వెప్తార్, “ఎందానిజ్ యా నూనె పాడు కిజినాద్? యా నూనె మూండ్రీ వందెజ్ దినారమ్జ్

* 14:1 14:1 వినకవందిజ్ ముకెలమాతి మాటెజ అర్థం వెప్పిని బుకుదు పండోయ్ మాట రాస్తిబాన్ సుడుఃదు

† 14:3 14:3 యా నూనాజ్ పణుకు పేరు అలబాస్థరు ఇజి యా పణుకు నండొ కరీదితిక తెల్లాజ్ మంజినాద్. యక గీసి లోకుర్ పుసెజ్ తయార్ కిజినార్

మున్ను డబ్బుదిజ్ పొర్ని అయ డబ్బు బీదది వరిజ్ సీదెజ్ ఆనాద్ గదె”, ఇజి దన్నిజ్ గోలః కిత్తార్.

6 నస్తవలె యేసు, “దన్నిజ్ ఉండ్రీ డిఃస్తు ఎందనిజ్ దన్నిజ్ అర్ల కిబిసినిదెర్? అది నజీ నెగ్గి పణి కిత్తార్.

7 బీదదికార్ ఎస్తవలెబా మీవెట మంజినార్. వరిజ్ ఎసెజ్ బా మీరు సాయం కిదెజానాద్. గాని నాను ఎలాకాలం మీవెట మన్ద.

8 అది కిదెజ్ అట్టిపణి విజు కిత్తార్. నజీ సమాది కిని ముజుల పీనుగు తయార్ కిని అలవాటువజ నా ఒడొల్ దిజ్ వాసనం నూనె వాక్కి అది నజీ తయార్ కిత్తార్.

9 నాను మీవెట నిజం వెస్సిన, యా బూమి మున్ను ఎంబెబా దేవుణు సువార్ల అది ఏలుబడిః వందిజ్ సువార్ల సాటిసినివలె అది కిత్తి యా నెగ్గిపణి దన్నిజ్ ఎత్తు కినిలెకెండ్ర సాటిసి మంజినాదెలె”.

10 నస్తవలె పన్నెండు మణిసిర్ సిసూర్ లొఇ ఒరెన్ ఇన్సురియోతు యూద ఇనికాన్ యూదురి పెరిపుజెరిజబాన్ సొన్ని యేసుజ్ ఒపజెప్తెజ్ తోడుః కిని ఇజి వెప్తాన్.

11 యూదవెప్తాక వెంజి పెరిపుజెరిజు సర్ల ఆతార్. వన్నిజ్ డబుజ్ సీనాప్ ఇజి వారు ఒట్టు కిత్తార్. అందెజె యేసుజ్ ఒపజెప్తెజ్ యూద ఉండ్రీ అవ్ కాసం సుడొఃజి మహాన్.

యేసు సిసూర్ వెట పన్ను బోజనం ఉణిజినాన్

12 పులాజ్ సిల్లి రొట్టెజ్ తయార్ కిని పన్నుపండొయ్ ది మొదోహి దినం వాతాద్. అయ దినం దేవుణుదిజ్ మెండ గొరె పిల్లాదిజ్ పూజ కినిక యూదురి అలవాట్. యేసు సిసూర్ వన్ని డగ్గు వాజి, పన్ను బోజనం ఉండెజ్ నీవందిజ్ మాపుఎంబె సొన్ని తయార్ కిదెజ్ నీను కొరిజిని? ఇజి వెన్ బత్తార్.

13 యేసు రిపర్ సిసూర్ జి కూక్కి, “మీరు పట్టుమ్ దు సొండ్రు. అబ్బె ఒరెన్, కుండాదు ఏరు పిండెజి మీ ఎద్రు వానాన్. మీరు వన్నివెట సొండ్రు.

14 వాండ్రు సొహి ఇండ్రొణి ఎజుమానిజ్, “నా సిసూర్ వెట పన్ను బోజనం కిదెజ్ ఎంబె గది మనాద్ ఇజి బోదకినికాన్ నిజి వెన్ బాజినాన్”, ఇజి వెప్తూ.

15 నస్తవలె ఆ ఇల్లు ఎజుమాని విజు తయార్ ఆతి మేడమున్ను మని పెరి గది ఉండ్రీ తోరిస్నాన్. అబ్బె మజి పన్ను బోజనం తయార్ కిదు”, ఇజి వెప్తాండ్రె పొక్తాన్.

16 సిసూర్ పట్టుమ్ దు సొహారె యేసు వెప్తాలెకెండ్రెనె విజు సుడొఃతార్. వారు పన్ను బోజనం తయార్ కిత్తార్.

17 పొద్దు ఆతిజ్ యేసు పన్నెండు మంది సిసూర్ వెట అబ్బె వాతాన్.

18 వారు బోజనం కినివెలె యేసు వెప్తాన్, “మీ లొఇ ఒరెన్ నజీ పగాతివరి కియుదు ఒపజెప్తాన్ ఇజి నాను నిజం వెస్సిన”.

19 అక్క వెంజి వారు నండొదుకం ఆజి ఒరెన్ వెనుక ఒరెన్ “నాను ఆవిగదె? ఇజి వన్నిజ్ వెన్ బాతార్.

20 యేసు వెప్తాన్, “మీరు పనెండు మనిసిర్ లొఇ ఒరెన్, నావెట గినెదు రొట్టె ముడొఃక్కికాండ్రె”.

21 లోకుమరిసి నా వందిజ్ దేవుణు మాటదు రాస్తా మహిలెకెండ్రె నాను సొనాన్లె. గాని లోకు మరిసియాతి నజీ ఒపజెప్తి వన్నిజ్ గొప్ప కష్టం. వాండ్రు పుట్ ఏండ మంజినిక ఇహిజు వన్నిజ్ ఎస్సానొ బాగ మహాద్ మరి”.

‡ 14:4-5 14:4-5 అయాకాలమ్ దు ఉండ్రీ దినారి ఉండ్రీ రోజుది కూలి § 14:20 14:20 యేసుని వన్ని సిసూర్ బోజనం కితివెలె ఉండ్రె గినాది పట్టురసమ్మ రొట్టె ముడుక్కారె డగ్గుమన్ని కూలెజ్ నె ఈహు గిన్నాదాన్ తినార్

యేసుజ్ గుర్తుకిని బోజనం

22 వారు బోజనం కిజిమహిజ్ యేసు ఉండ్రొట్టె అస్తాండ్రె దేవుణుదిజ్ వందనమ్కు వెప్పి ముకెజ్ కిజి సిసూరిజ్ సితాన్. “మీరు యక లోసితండ్రు, ఇక నా ఒడోల్”, ఇజి వరిజ్ వెప్టాన్.

23 వెనుక యేసు ద్రాక్కు కల్లు మన్ను గిన అసి దేవుణుదిజ్ వందనమ్కు కిజి వరిజ్ సితాన్. వారు విజేరె ఆ గినదిక ఉటార్.

24 యేసు మరి వెప్టాన్. “ఇక్క నా నల, నండొండొరిజ్ వరి పాపమ్కు సెమిస్తెజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒవుమానం.

25 నాను నిజం వెప్పిన, దేవుణు కినిఎలుబడిఃదు నాను కొతాజ్ ఉణి దినం దాక మరి ఎసెజ్ బా ద్రాక్కు కల్లు ఉణెవ్”.

26 మరి ఉండ్రొ పాట* పార్దారె ఒలివ మరెక్ మన్ని గొరొన్ మున్ను సొతార్.

పేతురు యేసుజ్ నెన్ఎ ఇజి వెహ్నాన్లె ఇజి ముజాల వెప్పినాన్

27 వారు సొనివెలె యేసు వరిజ్ వెప్టాన్. మీరు విజిదెరె నజి డిఃసి సొనిదెర్లె. ఎందనిజ్ ఇహిజ దేవుణు మాటదు యాలెకెండ రాస్త మనాద్. “గొరెజ్ అడినివన్నిజ్ నాను కత్తాలె. గొరెజ్ మంద సెద్రినె సొనెలె”.†

28 గాని దేవుణు నజి మర్జి బత్కుదు నిక్తివెనుక మిజి ఇంక ముజల గలీలయదు సొనాలె. ఇహాన్.

29 నస్తవలె పేతురు, “విజేరె మీ వందిజ్ నిల్లెజ్ అట్ఎండ డిఃసి సొహిజ్ బా నాను నిజి డిఃస్ సొన్వ”.

30 యేసు వెప్టాన్, “ఓ పేతురు, నాను నిజి నిజం వెప్పిన, యా పొదొయ్ కొరు రిజిరెని ముజల నీను నజి నెన్ఎ ఇజి ముసార్ వెప్పాలె”.

31 గాని పేతురు ఒవుకొడొఃఎండ ఒద్దె డట్టం వెప్టాన్, “నాను నీ వెట సొతిజ సాన. నాను నిజి నెన్ఎ ఇజి వెహ్వి”. అయ వజనె వారు విజేరె వెప్టార్.

యేసు గెత్తేమనె టోటదు పార్దనం కిజినాన్

32 నస్తవలె యేసు, వన్నిసిసూర్ వెట గెత్తేమనె ఇని టోటదు సొహార్. యేసు సిసూరిజ్, “నాను సొన్ని పార్దనం కిజి మర్జివాని దాక మీరు ఇబ్బె మండ్రు”, ఇజి వెప్టాన్.

33 యేసు పేత్రుజ్, యాకోబుజ్, యోహానుజ్ వన్ని వెట ఒతాన్. వాండ్రు నండొ దుకం ఆజి బాద ఆదెజ్ మొదొల్స్తాన్.

34 వాండ్రు వరిజ్ వెప్టాన్, “సాదెజ్ డగ్రు ఆతిలెకెండ మన్ను బరిస్తెజ్ అట్ ఇ నసొని బాదనజి కల్లిజనాద్. మీరు ఇబ్బెనె బసి నా వెటె తెల్లి మండ్రు.

35 యేసు అబ్బెణిజ్ సెగం దూరం సొహొండ్రె పడిగిజి అర్తాండ్రె “ఓబా, నిజి ఇస్టమాతివజ యా కస్టమ్కాణ్ నజి తప్పిన్ అ”, ఇజి పార్దనం కితాన్.

36 యేసు దేవుణుదిజ్ ఈహు వెప్టాన్, “ఓ బా నీను విజు కిదెజ్ అట్టి. యా కస్టమ్కు నా బాణిజ్ లాగ్ అ. గాని నా ఇస్టమ్వజ ఆఎద్, నీ ఇస్టంవజనె ఆపిద్”.

37 పార్దనం కితివెనుక యేసు సిసూర్ డగ్రు సొహిజ్ వారు నిద్ర కిజి మహార్, “ఓ సీమోను, నీను నిద్ర కిజినిదా? ఉండ్రొ గంటబా తెలి ఆజి మండ్రెజ్ మీరు అట్ ఇదెరా?”, ఇజి పేతురుజ్ వెన్ బాతాన్.

* 14:26 14:26 కీర్తన 115-118 బోజనం కిత్తి పిజిత్తిజ పార్జి మహార్ † 14:27 14:27 జకరియ 13:7.

38 నయ్యును మిజి పరిస కిజి తప్పుదు అన్ ఏండ ఇహిజ పార్దనం కిజి తెలి ఆజి మండ్రు ఆత్మ తయారనె, గాని ఒడొఁల్ దిజ్ సత్తు సిల్లెండ ఆజినాద్.

39 యేసు మరి ఒర్పు సొన్ని ముజాల్ వెప్పి మాటెజ్ నె వెప్పి పార్దనం కితాన్.

40 యేసు మర్జివాజి సుడొఁతిజ్ సిసూర్ మరి నిద్ర కిజి మహార్. ఎందానిజ్ ఇహిజ పరి కణకు రెప్పెజ్ బరుదాన్ ముగ్జి మహె. నస్తవలె వారు యేసుజ్ ఇనిక వెప్పొజ్ తెలివితాద్.

41 యేసు ముసారి వాజి సిసూర్ నిద్ర కిజి మహిక సుడొఁజి వరిజ్ వెప్పాన్, “ఏలుబ మీరు నిద్ర కిజి రోమ్ జనిదెరా? ఏలు ఆనాద్. ఇదిలో, లోకుమరిసియాతి నజి సెఇవరికియుదు ఒపజెప్పి గడియ డగ్గు వాతాద్.

42 లెదు, ఏలు మాట్ వరివెట. దసూలాదెజ్ సొనాట్ ఇదిలో నజి ఒపజెప్పికాన్ వాజినాన్”.

యేసుజ్ అరెస్టి కిజినార్

43 యేసు యా మాటెజ్ వెప్పిమహిజ్ పన్నెండు మనిసిర్ సిసూర్ లోఇ ఒరెనాతి ఇస్కరి యోతు యూద ఇనికాన్ అబ్బె వాతాన్. పెరిపుజెరిజు లోకురి పెద్దలుజు పొక్తిమన్ని మందలోకుర్ కూర్దెజ్, కోణెజ్ అస్తారె వన్నివెట వాతర్.

44 యేసుజ్ ఒపజెప్పికాన్, “నాను ఎయెరిజ్ ముద్దు కినానో వన్నిజ్ మీరు తోహసి జాగర్ద ఒతు”, ఇజి ముజల వరిజ్ ఉండ్రె గుర్తులెకెండ్ వెప్పా మహాన్.

45 యూద వెటనె యేసుడగ్గు వాతాండ్రె, “ఓ బోదకినికి” ఇజి వెప్పి వన్నిజ్ పొంబితాండ్రె ముదు కిత్రాన్.

46 నస్తవలె వన్నివెట వతిమహిలోకుర్ యేసుజ్ అస్తారె తొప్తార్.

47 వెటనె యేసుడగ్గు మహిసిసూర్ లోఇ ఒరెన్, వన్ని కూర్ద లాగ్గి విజెరి మున్కు పెరిపుజెరిజ మున్కు మన్ని పణిమనిసి ఆతి వని గిబ్బి తెవు కత్తాన్.

48 యేసు వెప్పాన్, “నాను డొజవాండ్రునా? నజి అస్తాజ్ కూర్దెజ్ కోణెజ్ అసి ఎందనిజ్ మీరు వాతిదెర్?

49 రోజు నాను మీ వెటనె మంజి దేవుణుగుడిదు నెన్ పిన్సి గదె. అయవలె మీరు నజి ఎందనిజ్ అన్ ఇతిదెర్? గాని దేవుణు మాటదు రాస్తవజ ఇక విజు ఈహు జగ్గిదెజ్ వెలె”.

50 నస్తవలె వన్ని సిసూర్ విజెరె వన్నిజ్ డిస్తారె ఉహ్కాక్ సాహార్.

51-52 ఒరెన్ దజడాయెన్, యేసు వెనుక, లోకుర్ వెట సొన్ని మహాన్. వాండ్రు సొక్క తొడగివిండ ఉండ్రె పాతనె పిడగిత మహాన్. వారు వన్నిజ్ అన్జిజ్ వాండ్రు పిడిగితిమన్ని పాతడిసి డుమ్డ ఆతాండ్రె ఉహ్కాన్.

యేసుజ్ నన్ హద్రి సజంఇని యూదురి కొర్టునుడిఁమి నిల్ప్తార్.

53 యేసుజ్ తొహి ఒతికార్ వన్నిజ్ విజెరిపుజెరిజ మున్కు పెరిపుజెరిబాన్ తత్తార్. పెరిపుజెరిజ్ విజెరె, పెద్దెల్ జు, యూదురి రూలుజ్ నెన్ పిసినికార్ అబ్బె కూడ్డి వాత మహార్.

54 యేసుజ్ విజెరి మున్కు పెరిపుజెరిజ ఇండ్రె ఒసిమహిజ్, పేతురు వెనుక దూరమ్ దాన్ సొన్ని డేవ దాక వాతాన్. వాండ్రు అబ్బె కాప్ కినివరివెట బస్తాండ్రె సిను కాయ్ జి మహాన్.

55 పెరిపుజెరిజు విజేరె, అబ్బె కూడ్డి వాతి నన్హద్దిం నజం విజు యేసుజ్ నప్తజ్ తగితి రుజువ్ వందిజ్ వన్ని ఎద్దు అబద్దం వెప్పివరిజ్ రెబాజి మహార్. గాని వన్నిజ్ నప్తజ్ అగితి రుజువ్ వెప్పి ఎయెర్బా దొహ్కోవితార్.

56 నండొండార్ వన్నిమున్కు అబద్దం సాసెమ్కు వెహ్తార్. గాని ఒరెన్ వెహ్తాక మరి ఒరెన్ వెహ్తా దనిజ్ తేడః మహాద్.

57 నస్తివలె సెగొండార్ వన్నిమున్కు ఈహు అబద్దం సాసెమ్కు వెహ్తార్.

58 “లోకు తొహ్తా యా దేవుణుగుడిఃదిజ్ నాను అర్ప్పి విసీర్జి, ముండ్రొ రోస్కాజ్ లోకు కీదు పణి ఆఎండ మరి ఉండ్రొ దేవుణుగుడిః తొహ్నా ఇజి వాండ్రు వెహ్తాక మాప్వెహాప్”, ఇజి వారు వెహ్తార్.

59 గాని వారు వెహ్తా సాస్యమ్బా ఒరెన్ వెహ్తాక మరి ఒరెన్ వెహ్తా దనిజ్ తేడః ఆతాద్.

60 నస్తివలె విజెరి మున్కు పెరిపుజెరి నిజితాండ్రె యేసుజ్ వెన్బాతాన్, “నీను ఇనికబా మర్జి వెహ్ ఇదా? వీరు నీ మున్కు వెహ్నిని యా మాటజ్ ఇనికెజ్?”.

61 గాని యేసు ఇనికబా మర్జి వెహ్విండ అలెతాన్. విజేరె పుజెరిజు మున్కు పెరిపుజెరి యేసుజ్ మరి వెన్బాతాన్, “నీను దేవుణు మరినిఆతి క్రీస్తునా?”.

62 యేసు వెహ్తాన్, “నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడఃకాదు బనిమంజినిక, సయణిదెర్ మరి ఆగసమ్దు దాన్ మొసాప్ మున్కు నాను వానిక మీరు నూణిదెల్లె”.

63-64 విజెరి పెరిపుజెరి మున్కు పెరి పుజెరి యేసు వెహ్తాక వెంజి వన్ని సొక వాండ్రె కిసె ఆతాండ్రెః. వెహ్తాన్, “మరి ఇంక సాసిరిజ్ అవ్నరం సిల్లెద్. వాండ్రు వెహ్తాక మీరు వెహిదెర్. వాండ్రు దేవుణు దూసిసి వర్గితిక మీరు వెహిదెర్ దన్నివందిజ్ మీరు ఇనిక వెహ్నినిదెర్? యేసు దేవుణుదిజ్ దూసిస్తి వందిజ్ సిక్కి కిజి నప్తజె ఇజి విజేరె ఒప్పుకోటార్.

65 నస్తివలె సెగొండార్ యేసు మున్కు పూస్తార్. వారు గరండదాన్ వన్ని కణుకేజి తొహ్ని కణుకేజ్ మూక్తార్ వన్నిజ్ గుతార్. నిజి ఎయెర్ గుతార్ ఇజి తొవిండ వెహ్అ”, ఇజి వన్నివెట వెహ్తార్. జమానుబుబా యేసుజ్ కికాణిజ్ డెయ్తారె ఒత్తార్.

యేసుజ్ నానునెన్ఎ ఇజి పేతురు వెహ్నినాన్

66 పేతురు విజెరి మున్కు పెరి పుజెరి అర్బుదు మహివలె అయ ఇండ్రొణి పణి మన్ని ఉండ్రొ అబ్బె వాతాద్.

67 పేతురు సిసు కాయ్జిమహిక సుడఃజి వాండ్రు ఎయెన్ ఇజి నెస్సెజ్ అది నెగ్రెండ సుడిఃతాద్. “నీనుబా నజరేతు వాండ్రు ఆతి యేసువెట మహికి”, ఇజి అది వెహ్తాద్.

68 అందెజె పేతురు, “నీను ఇనిక వర్గిజినిదొ నజి తెలివిద్”, ఇజి వెహ్ని వెల్లి గవునిడగ్రు సొహాన్. నస్తివలె కొరు కెరెతాద్.

69 అయ పణికినికాద్ పేత్తుజ్ గవునిడగ్రు సుడఃజి అబ్బె నిహిమహి వరివెట మరి వెహ్తాద్, “పిండ్రు వరిలోఇమహ్కాన్ ఒరేన్”.

70 గాని పేతురు మరి, “నాను ఆవ ఇజి వెహ్తాన్. సణెం సొహివెనుక పేతురు డగ్రు నిహిమహికార్, “నీను గలీలయదికి, నిజం నీనుబా వరిలోఇ ఒరెన్”, ఇజి వెహ్తార్.

‡ 14:63-64 14:63-64 నండొ కోవం ఆతాద్ ఇజి తొరిస్సెజ్ సొక్క కిస్సార్. గాని విజేరె పుజెరి మున్కు మన్ని పెరి పుజెరి వన్ని సొక్కక్కిస్సెజ్ ఆవిద్ ఇజి లేవి. 21:10 దు రాస్ట మనాద్.

71 నస్తవలె పేతురు, “మీరు వెహ్సినీ వన్నిజ్ నజి నెన్వ ఇజి వెహ్సినీ వన్నిజ్ వాండ్రె సయివ్ సీబెఆజి ఒట్టు కితాన్.

72 వెటన రిజ ఒర్ను కొరు కెరెతాద్. నస్తవలె పేతురు, యేసు వన్నివెట, “కొరు రిజ కెరెని ముజల నీను నజి నెన్వ ఇజి ముసార్ వెహ్సలె”, ఇజి వెహ్సినీమాట ఎత్తు కితాండ్రె నండో దుకమాజి అడఃబతాన్.

15

యేసుజ్ తొహ్సినీపిలాతుజ్ ఒపజెప్పినార్

1 పెందాల నీకటి మన్బునె, పెరిపుజెరిజు, యూదపెదెలుజు, యూదురి రూలుజ్ నెన్వపినీకార్, సన్హద్రిం సజమ్దికార్ విజెరె కూడ్డి యేసుజ్ ఎలాగ సప్తజ్ ఇజి ఆలోసనం కితార్. వారు వన్నిజ్ తొహ్సినీ ఒత్తారె రోమ దేనిమ్ది అతికారిఆతి పిలాతుజ్ ఒపజెప్తార్.

2 “నీను యూదురి రాజునా?”, ఇజి పిలాతు యేసుజ్ వెన్బతాన్. నస్తవలె యేసు, “ఒఒ నీను వెహ్సలెకెండ్రె”, ఇజి వెహ్సాన్.

3 పెరిపుజెరిజు యేసుముస్కు నండో తపుజ్ మొప్తార్.

4 నస్తవలె పిలాతు యేసుజ్ మరి వెన్బతాన్, “నీను మర్జి ఇనికబా వెహ్సినీదా? వీరు నీ ముస్కు ఎస్సా తపుజ్ మొహ్సినార్ గదె”.

5 అహె వెహ్సినీతిజ్బా యేసు ఇని మాటబా మర్జి వెహ్సెతాన్. అక్క సుడఃజి పిలాతు బమ్మ ఆతాన్.

6 ఏంటు ఏంటు కిని పస్కు పండొయ్లిజ్ లోకుర్ కోరిజిని ఒరెన్ కయ్దువన్నిజ్ విడుదల సీదెజ్ పిలాతుజ్ అలవాటు.

7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెట మహికార్, ఏలుబడిః కినివరిజ్ ఎద్రిస్తారె నెడొండారిజ్ సప్త మహాన్. అందెజె వరిజ్జలిదు ఇల్త మహార్.

8 లోకుర్ పిలాతుబాన్ వాజి, “నీను కిని ఆలవాటువజ ఒరెన్వన్నిజ్ డిఃసి సిఅ”, ఇజి వెహ్సార్.

9-10 పెరిపుజెరిజు గోస ఆతారె యేసుజ్ నజి ఒపజెప్తార్ ఇజి పిలాతు నెస్తాన్. అందెజె వాండ్రు “యూదురిరాజుజ్ నాను మిజి డిఃసి సీదెజ్ కొరిజినిదెరా? ఇజి వెన్బతాన్.

11 గాని పెరిపుజెరిజు బరబ్బేజ్ డిఃసి సీజి యేసుజ్ సప్తజ్ ఇజి ఆతికారి ఒప్పిలెకెండ్రె వెహ్సాన్ ఇజి లోకురిజ్ రేప్పి మహార్.

12 నస్తవలె పిలాతు, “యూదురిరాజు ఇని మీరు వెహ్సినీవన్నిజ్ నాను ఇనిక కిదెజ్?”, ఇజి వెన్బతాన్.

13 వారు, “వన్నిజ్ సిలువ పొక్అ”, ఇజి నండో డెల్స్తార్.

14 అందెజె పిలాతు, “ఎందనిజ్ వన్నిజ్ సిలువ పొక్తెజ్? వాండ్రు ఇని తపువణి కివ్”, ఇజి వెహ్సాన్. గాని వారు, “వన్నిజ్ సిలువ డెయ్జి నవ్అ”, ఇజి నండో డెల్స్తార్.

15 పిలాతు లొకాజ్సర్ద కిబిస్తేజ్ బరబ్బేజ్ విడుదల కితాన్, యేసుజ్ కొర్డజాణిజ్ డెయ్బిసి. సిలువ పొక్తెజ్ ఒపజెప్తాన్.

సయ్సమ్దికార్యేసుజ్ వెక్రిస్తార్

16 నస్తవలె సయనమ్దికార్ యేసుజ్ ప్రెటోరియం ఇని పిలాతుని పెరిఇండ్రో ఒతారె అబ్బె మహి సయనమ్ది వరిజ్ విజేరిజ్ కూడువ్తార్.

17 వారు యేసుజ్ ఎరాని రంగుది నీరి సొక్క పొర్నీసి సాప్కాణిజ్ అటారె ఉండ్రీ టోపి తయార్ కిజి బురాదు ఇడెతారె.

18 “యూదురి రాజు గెల్నిఅ? ఇజి వెహ్ని వారు యేసుజ్ వెక్కిస్తార్.

19 వారు మరి మరి డుడుదాన్ వన్ని బురాదు డెయ్యారె వన్నిముస్సు పూస్తార్. వెనుక ముణుకుజ్ ఊరిజి వన్నిజ్ మాడిసి వెక్కిస్తార్.

20 వారు వెక్కిసి విజితి వెనుక వన్నిజ్ తోడిగిసి మహి ఎరాని సొక్క లాగ్గి వన్ని నీరి సొక్క తోడిగిస్తారె సిలువ పొక్తెజ్ వన్నిజ్ ఒత్తార్.

యేసుజ్ సిలువదు డెయ్జినార్

21 కురేనియాదికాన్ సీమోసు ఇని ఒరెన్ ఉండ్రీ నాటోహన్ అయసరి వాజి మహాన్. నస్తవలె యేసువందిజ్ సిలువ పిండెదెజ్ సయనమ్దికార్ సీమోసుజ్ బలవంతం కిత్తార్. సీమోసు, అలెక్సందరుని, రూపుఇని వరి అప్పొసి.

22 వారు గొల్లొతఇని బాడ్డిదు యేసుజ్ తత్తర్. గొల్లొత ఇహిజ బుర్ర పిణికి బాడ్డిఇజి అర్దం.

23 అబె యేసుజ్ ఉండెజ్ ద్రాక్కుకలుదు బోలం* ఇని సేందుమాయం కల్ప్పి సిత్తర్. గాని వాండ్రు కెవితాన్.

24 సయనమ్దికార్ యేసుజ్ సిలువదు డెయ్యారె. వెనుక వన్ని సొక్కెజ్ ఎయెజ్ దోహ్కె ఇజి నెస్సెజ్ సీటిజ్ పొక్తారె వని సొక్కెజ్ సీబె ఆతారె.

25 పెందాల తొమ్మిది గంటెజ్ యేసుజ్ సిలువ డెయ్తారె.

26 “యూదురిజ్ రాజు”, ఇజి యేసుముస్సు మోప్తి నేరం బోర్డుదు రాసి సిలువదు ఇత్తార్.

27-28 యేసువెట రిఎర్ డొజారిజ్ సిలువదు పొక్తార్. ఒరెన్ వన్నిజ్ ఉణెర్ పడెకాదు ఉండ్రీ సిలువదు, మరి ఒరెన్ వన్నిజ్ డేబ్ర పడెకాదు ఉండ్రీ సిలువదు.

29-30 నస్తవలె అయ సరిదాన్ సొన్సిమహికార్ వరి బురదూక్కి యేసుజ్ దూసిస్తార్, “ఒహో దేవుణుగుడిదిజ్ అర్ప్పి విసీరిజి మూండ్రీ రొస్కాజ్ నాను తొప్పాకి నిజి నీనె రక్కిసి. సిలువదాన్ డిగ్జి రఅ” ఇహార్.

31-32 అయవజనె పెరిపుజెరిజుని యూదురి రూలునెస్పిసినికార్, “వీండ్రు మహివరిజ్ రక్కిస్తాన్. గాని వీండ్రు వినిజె రక్కిస్తెజ్ అట్ఎన్. ఇస్తాయేలురాజు ఆతి క్రిస్తు ఏలు సిలువదాన్ డిగ్జి వాతిజ అక్క సూణాపె మాపు నమినావ్”, ఇజి ఒరెన్ వెట ఒరెన్ వెహ్ని వన్నిజ్ వెక్కిస్తార్. యేసువెట సిలువ డెయెఆతి డొజారుజుబా వన్నిజ్ వెక్కిస్తార్.

యేసు సిలువముస్సు పాణం డిస్తాన్

33 వేడె పన్నెండు గంటెజిజ్ మూండ్రీ గంటెజ్దాక దేసం విజు సీకటి ఆతాద్.

34 మూండ్రీ గంటెజ్ యేసు, “ఎలొయ, ఎలొయ లమ సబక్తాని”, ఇజి డటం డేల్ని వెహ్నాన్. దని అర్దం ఇనిక ఇహిజ, “నా దేవుణు, నా దేవుణు నజి ఎందనిజ్ నీను డిస్తె” ఇజి.

35 బానె నిహికార్ నెగొండార్ యామాట వెహారె, “ఇదిలో వీండ్రు ఎలియేజ్ కూక్కినాన్” ఇహార్.

* 15:23 15:23 బోలం కల్పతిజ నొప్పి నెన్ఏండ ఆనాద్

36 ఒరెన్ ఉహ్ క్వి సొన్ని దూతి తత్తాండ్రె సెందు ద్రాక్స కలుదు ముడఁక్కి ఉండ్రీ డుడ్డుదాన్ యేసుజ్ ఉండెజ్ వెర్దుము అందిస్తాన్. “సణెం మండ్రు. ఏలియ వాజి వినిజ్ డిప్పాండ్రొ సిలేనొ సూణాట్”, ఇజి వాండ్రు వెప్తాన్.

37 నస్తవలె యేసు డటం డేల్స్తాండ్రె పాణం డిఁస్తాన్.

38 అయవలె యెరూసలేమ్దు మహి దేవుణు గుడిఁదు మహి తెర ముస్కుహాన్ అడిగిదాక కింజితాదె రుండి ముక్కెజ్ ఆతె.

39 సిలువ డెయ్యిబాన్ నిహిమహి సయనమ్ది మంద మణిసిరిజ్, యేసు ఈహు డేల్స్తాండ్రె పాణం డిఁస్తిక సుడఁజి, “వీండ్రు నిజం దేవుణు మరిసినె”, ఇజి వెప్తాన్.

40 సెగొడెక్ అయ్లికొడొక్ దూరం నిల్చి సుడఁజిమహె. వన్కాజ్ లొఇ మగ్గలేనె మరియు, ఇజిరి యాకోబు, యోసె ఇనివరి అయ్సిఆతి మరియు, సలోమి ఇనికెజ్మహె.

41 యేసు గలీలయదు మహివలె ఇవిక్వన్నివెట సొన్ని వన్నిజ్ అవ్సరమాతికెజ్ కిజిమహె. ఇవిక్ఆండె యెరూసలేమ్దు యేసువెట వాతి నండొ అయ్లికొడొక్పా అబ్బె మహె.

యేసు పినుగు సమాదిదు ఇడ్తార్

42-43 అరిమతయి ఇని పట్టుమ్దిదాన్ యోసేపుఇని ఒరెన్ అబ్బె మహాన్. వాండ్రు సన్హద్రిం సజమ్దు మన్నివరిలొఇ పెరికాన్ ఒరెన్. దేవుణు ఏలుబడిఁ వందిజ్ వాండ్రు ఎద్రు సుడఁజి మహాన్. వీండ్రు సొన్ని, దయ్సమ్దాన్, యేసు పినుగు సిలువ ముస్కుహాన్ జాయ్ మనుబునె డిప్తెజ్ పీలాతుబాన్ సెలవలొస్తాన్. అయ దినం విస్త్రాంతిదినం ముజాల మహి తయార్ కినిదినం. అందెజె అయ తయార్ కినిదినం పొదొయ్నె యోసేపు పీలాతుబాన్ సెలవ లొస్తెజ్ సాహాన్.

44 యేసు ఎస్కాండె సాతాన్ ఇజి వెంజి పీలాతు బమ్మ ఆతాన్. సయనమ్ది వరిఅతికారిజ్ కూక్కి వెన్బాతిజ్ యేసు ఎస్కాండె సాతాన్ ఇజి నెస్తాన్.

45 యేసు సాతాన్ ఇజి సయనమ్ది వరిఅతికారి వెహి మాట పీలాతు వెంజి యోసేపుజ్ యేసుజ్ పినుగు ఒపజెప్తాన్.

46 యోసేపు నెగ్గె తెల్లని పాత కొడఁజితసి, పినుగు సిలువదాన్ డిఁప్పి అయ పాతెజాణ్ పినుగుదిజ్ నుటిసి నటుదిజ్ దొల్స్తె దూకిదు ఇడ్తాన్. ఉండ్రీ గుండ్రని నెప్ట పణుకు సడిపిసి దూకిదిజ్ అడ్డు కిత్తాండ్రె మూక్తాన్.

47 మగ్గలేనె మరియు, యోసె అయ్సిఆతి మరియు యేసు పినుగుదిజ్ ఇడ్తిబాడ్డి సుడఁజె.

16

యేసు మర్రి నిజితాన్

1 విస్త్రాంతిదినం గడిఁసిసాహివెనుక, మగ్గలేని మరియు, యాకోబు అయ్సి మరియు, సలోమి, ఇనికెజ్ యేసు పినుగుదిజ్ రాస్తెజ్ వాసనం నూనె కొడిఁజి తత్తె.

2 వారమ్దిజ్ మొదొహి దినమ్దు పెందాల్ని నిజ్జి పొద్దు సోసి మహివలె అవిక్సమాది డగ్గు సాహె.

3 సమాది డగ్గు సొన్ని మహిజ్ అవిక్ “సమాది మూక్తి పణుకు మా వందిజ్ ఎయెర్ గూర్ప్పార్?”, ఇహె.

4 నస్తవలె అవిక్ సుడఃతిజ్ ఎయెరో అయ పెరివణుకు సమాదిదాన్ గూర్ప్తిలెకెండ్ తోరితాద్. అది ఒద్దె పెరిక

5 నస్తవలె అవిక్అయ సమాది లొఇ వజ్జి సొహిజ్ నీరి తెల్లాని సొక్క పొర్పాజి ఉణెర్ పడఃకాద్ బస్తి మహి ఒరెన్ దజ్డాఃయెనుజ్ సుడఃతె. వన్నిజ్ సుడఃజి అవిక్నండో తియెల్ఆతె.

6 అయ దజ్డాఃయెన్ వరివెట, “తియెల్ ఆమాట్, సిలువ పొకె ఆతి మన్ని నజరేతు వాండ్రు ఆతి యేసుజ్ మీరు రెబాజినిదెరా? వాండ్రు ఇబ్బె సిల్లెన్. వాండ్రు బత్కిజి నిజిత మనాన్. వన్నిజ్ ఇడ్డి బాడ్డి సుడఃదు.

7 వాండ్రు మిజి ఇంక ముజాల గలీలయ మీరు సొన్నినాన్ వాండ్రు మిజి వెప్తివజి మీరు అబ్బెవన్నిజ్ సూణిదెల్ల ఇజి సిసురిజ్ మరి పేతురుజ్ వెప్తు”, ఇజి వెప్తాన్.

8 అక్క వెహెనె అవిక్ వణక్కి బమ్మ ఆజి సమాదిదాన్ వెల్లి వాజి బాణిజ్ ఉహాక్కి సొహె. అవిక్ తియెల్ ఆతెనె ఎయెర్వెటబా ఇనికబా వెహ్ఉతె.

యేసు మగ్దలేని మరియెజ్ తోరె ఆతాన్

9 యేసు ఆదివారం పెందాల్పె సమాదిదాన్ బత్కిజినిజ్జి మగ్దలేనె మరియెజ్ తోరె ఆతాన్. యా మరియ ఎయెర్ ఇహిజి యేసు ఏడు దెయమ్కాజ్ ఉల్పి నెగెండ్ కిత్తి అయ్లీ కొడ్డి.

10 యేసువెట మహికార్ యేసు సొతిజ్ దుకమ్దాన్ ఒడఃబిజి అడఃబాజి మహిజ్, అది సొహాదె విజు సజతిజ్ వరిజ్ వెప్తాద్.

11 యేసు బత్కిజి నిజితాండ్రె నజి తోరె ఆతాన్ ఇజి అది వెప్తి మాట వారు నమ్మివితార్.

యేసు రివిర్ సిసూరిజ్ తోరెఆతాన్

12 వెసుక రివిర్ సిసుర్ ఉండ్రీ నాటొ నడిసి సొన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజ తోరెఆతాన్.

13 వారు సొన్ని, మహి సిసూరిజ్ యా సజతి వెప్తార్. గాని వారు యా రివిర్ మాటేజబా నమ్మివితార్.

యేసు పదకొండు మణిసి సిసూరిజ్ తోరెఆతాన్

14 మరి ఒర్పుపదకొండు మణిసి సిసూర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెసుక వన్నిజ్ సుడఃతివరి మాట నమివిండాతివందిజ్, వరి అనుమానమ్దిజ్ యేసు వరిజ్గటిజ వెప్తాన్.

15 యేసు వరివెట, “మీరు లోకం ముస్సు మని విజు దేసమ్కాజ్ సొన్ని దేవుణు సువార్త విజేరిజ్ వెప్తు.

16 ఎయెర్బా నా ముస్సు నమకం ఇడ్జి బాప్తిసం లాగెఆతిజి వరిజ్ దేవుణు రక్కిస్నాన్. గాని నా ముస్సు నమకం ఇడ్ఇతి వరిజ్ సిక్కి వానాద్.

17 ఎయెర్ నజి నమ్మివారొ వారు యా బమ్మాతి పణిజ్కిదెజ్ అట్నార్. అక్కెజ్ ఇనికెజ్ ఇహిజి నా పేరుదాన్ వారు దెయమ్కాజ్ ఉల్పార్. వారు కొత్తబాసిజ్ వర్గినార్.

18 సారాస్కాజ్ అస్తిజ్బా అవిక్ కట్టిజ్బా సావిర్. ఇనికబా గొప్ప విసమాతిక ఉటిజ్బా సావిర్. జబ్బు ఆతివరి ముస్సు కికు ఇట్టిజి వారు నెగెండ్ ఆనార్”, ఇజి వెప్తాన్.

దేవుణు యేసుజ్ పరలోకమ్దు ఒత్తాన్

19 యేసు యాకెజ్ విజు వెహివెనుక దేవుణు యేసుజ్ పరలోకమ్దు ఒత్తాన్. యేసు అబ్బె దేవుణు ఉణెర్ పడఃకాద్ బస్తాన్.

20 యేసు సిసూర్ విజుబాన్ సొన్ని దేవుణు సువార్త వెహ్తార్. వారు కిత్తి విజు పణిదిజ్ దేవుణు సాయం కితాన్. వారు కిత్తి బమ్మాతి పణిజాణ్ వారువెహ్తి మాట నిజం ఇజి దేవుణు తోరిస్తాన్.

లూక రాస్తి సువార్త

నెల్వ కిబిసినిక

యా సువార్త లూక ఇని ఒరెన్ డాక్టరు, దెయొపిలెజ్ రాస్తికాది. యేసు యా లోకమ్దు బత్తిత్తివలె జర్గితి దన్నివందిజ్ కత వజ రాస్త మనాన్. యేసు పుడుగు వందిజ్ మహి సువార్త ఇంక లావు వెహ్తా మనాన్. మరి యేసు కిత్తి నండో బమ్మాని పణిజ వందిజ్, నండోడార్ జబ్బుదాన్ మహి వరిజ్ నెగెన్ కిత్తిదన్ని వందిజ్ వెహ్సినాన్. యేసు దేవుణు మరిసి ఇహిజ్బా లోకు వజ పుట్టి, లోకురి పాపమ్కాజ్ వందిజ్ సాజి, మరి దేవుణువెట ఎలాకాలం బత్తిని బత్కుదు నడిపిసినాన్ ఇజి యా సువార్తదు వెహ్సినాన్.

1-4 లూక తియెపిలెజ్ రాసినాన్. మా నడిమి జర్గితి సజతిజ వందిజ్ కతవజ రాస్తెజ్ నండోడార్ సుడతార్. మొదోహానె, యా సజతిజ సుడతతి సాసిర్, మరి, సువార్త బోద్సికార్ మజి వెహ్తార్. వారు మజి వెహ్తా వజనె, వీరు రాస్తార్. నాను యా సజతిజ విజు మొదోహానె బాగ నెస్త మహ. అందెజె అయాకెజ్ నీ వందిజ్ వరస రాస్తిజ బాగ మంజినాద్ ఇజి నాను ఒడత. ఎందానిజ్ ఇహిజ, అయావలె నిజి నెన్పెస్తి విజు వన్కాజ్ పూర్తి అర్థం నిజి నెస్తెజానాద్.

బాప్తిసం సీని యోహాను పుడగు వందిజ్ వెహ్సినాన్.

5 హెరోరాజు యూదయ దేసం ఏలుబడికి కిజి మహివలె, జెకరియ ఇని ఒరెన్ పుజెరి మహాన్. వీండ్రు అబియ పుజెరి జట్టుదు మహికాన్. విన్ని అల్పి ఎలిసబెతు. అది అహరోను పుజెరి కుటుమ్దికాద్నె.

6 వీరు రిఎర్బా, నింద సిల్లెండ ప్రబు సితి ఆడ్రెజ, రూలుజ విజు లోజిజి, దేవుణు ముందాల నీతినిజాయితిదాన్ మహార్.

7 ఎలిసబెతు గొడ్డు బోదెలి. అందెజె వరిజ్ కొడోర్ సిల్లెర్. వారు రిఎర్బా నండో డొక్ర ఆతార్.

8 ఉండ్రీ నట్టు జెకరియ జట్టుజ్ పుజేరి పణికిదెజ్ వంతు వాతాద్. అయావలె జెకరియ దేవుణు ముందాల పుజేరి పణి కిజినాన్.

9 పుజేరిజ మన్ని అలవాటు లెకెండ, సీటి పోక్తారె, జెక్రయెజ్ ఏర్పాటు కితార్. దేవుణు గుడిడు సొన్ని దూపం సురుదెజ్ వన్నిజ్ ఏర్పాటు కితార్.

10 దూపం సురుదెజ్ వేల ఆతాద్. నస్తవలె అబ్బె కూడితిమహి మందలోకుర్ విజేరె వెల్లి మంజి పార్దనం కిజి మహార్.

11 నస్తవలె, దేవుణుదిజ్ దూపం సుర్ని మాలి పిటి ఉణెర్పడకాద్ దేవుణు దూత నిహాన్. నిహంద్రె వన్నిజ్ తోరె ఆతాన్.

12 జెకరియ, దేవుణు దూతెజ్ సుడతాండ్రె, గజిబిజ ఆజి నండో తియెల్ ఆతాన్.

13 అయావలె దేవుణు దూత వన్నిజ్, “జెకరియ, నీను తియెల్ ఆమ. నీ పార్దనం దేవుణు వెహాన్. నీ ఆలు ఎలిసబెతు ఒరెన్ కొడోః ఇడ్నాద్దె. వన్నిజ్ యోహాను ఇజి పేరు ఇడ్దెజ్.

14-17 వాండ్రు ప్రబు ఎర్దు పెరికాన్ ఆనాన్. ద్రాక్కు కలుని మరి సోస్తిక ఇనికబా వాండ్రు ఉణ్విన్. అయిసి పొటలోఇ పిండం ఆతి బాణిజ్ మొదోల్పి దేవుణు ఆత్మ

వన్నిజ్ నడిపిస్తానన. ఇస్రాయేలు దేసెమ్ది లోకురిజ్ నండొండారిజ్ వరి దేవుణు ఆతి ప్రబు దరోట్ మప్పా తనాన్. ఏలియ ప్రవక్త లెకెండ నండొ గొప్ప సత్తుదాన్ వాండ్రు ప్రబు ముజాల సొనాన్. ఎందానిజ్ ఇహిజ, అప్పొసి మరిసిరిజ్ కూడుఁపైజ్. నాయం మన్నికార్ బుద్దిదాన్ నడిఁనివజ, విరి సరిదు దేవుణుమాట వెన్ఇవరిజ్, నడిఁపిస్తెజ్ ప్రబు వానివలె, వన్నిజ్ ఎద్దు సుడఁదెజ్ లోకాజ్ తయార్ కినివందిజ్ యా లెకెండ కినాన్లె. అందెజ్ వాండ్రు పుట్టివెలె మిజి గొప్ప సర్ద కినాన్లె. మరి, నండొండారిజ్ సర్ద కిబిస్తాన్లె”, ఇజి వెప్తాన్.

18 నస్తివలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తెజ్? నాను డొక్త. నా బోదెల్బా డొక్తి ఆతాద్”, ఇజి.

19 అందెజ్ దేవుణు దూత, “నాను గబ్రియెలు. దేవుణు పడఁకాద్ నిల్చి మంజినికాన్. నీ వెట వర్గిజి, నిజి యా నెగ్గి కబ్బు వెప్తెజ్ దేవుణు నజి పొక్త మనాన్.

20 గాని నాను వెప్తి మాటెజ్ నీను సమిఇతి. అందెజ్ యాకెజ్ జర్గినిదాక, నీను గుల్ల ఆజి మంజినిలె. నాను వెప్తికెజ్ జర్గిదెజ్ దేవుణు ఏర్పాటు కితి కాలమ్దు, పూర్తి ఆనెలె”, ఇజి వెప్తాన్.

21 నస్తివలె లోకుర్ జెక్రయెజ్ కావ్ కిజి మహార్. వీండ్రు ఎందనిజ్ దేవుణు గుడిఁదు నిసా ఆలేసెం ఆతాన్ ఇజి బమ్మ ఆజి మహార్.

22 వాండ్రు వెల్లి వాతివెలె, వరి వెట వర్గిదెజ్ అట్ఎతాన్. అయావలె దేవుణు గుడిఁదు వినిజ్ దేవుణు ఇనికదో ఉండ్రీ దర్సనం* తోరిస్తాన్ ఇజి నెస్తార్. వెయు రఇతిజ్, వాండ్రు వరిజ్ కియు సయన కితాన్. వాండ్రు గుల్ల ఆజి మహాన్.

23 వన్ని పణి కాలం వీజితిజ్ వాండ్రు వన్ని ఇండ్రొ సొహాన్.

24 సెగం రోస్సు సొహి వెస్కా, వన్ని ఆల్చి ఎలిసబెతు పాత డిఁస్తాద్. అయ్దు నెలదాక అది ఇండ్రొనె మహాద్.

25 “ప్రబునె నా వందిజ్ యాక కితాన్. ఏలు నా ముస్సు కణక పెప్తా బస్తాండ్రె లోకుర్ ఎద్దు నజి మహి సిగుసెట్టు లాగితాన్”, ఇజి వెప్తాన్.

యేసు పుడుఁగు వందిజ్ వెప్పినాన్

26 ఎలిసబెతు పాత డిఁసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజరేతు ఇని పట్టుమ్దు పొక్తాన్.

27 యోసేపు ఇన్ని ఒరెన్ వన్నిజ్ వెన్బాతి ఉండ్రీ విడ్డి బోదెలిబాన్ దేవుణు దూత సొహాన్. అయ విడ్డి బోదెలి పేరు మరియ. యోసేపు దావీదు కుటుమ్దికాన్.

28 దేవుణు దూత లొఇసాహండ్రె, మరియామ్మెజ్ సుడఁజి, “వందనం, ప్రబు నీ వెట మనాన్. నిజి నెగెండ దీవిస్త మనాన్”, ఇజి వెప్తాన్.

29 అయ మాటెజ్ వెహదె, మరియ నండొ బాద ఆతాద్. వన్ని మాటెజిదిజ్ అర్థం ఇనికదో ఇజి దన్ని గర్భమ్దు బమ్మ ఆతాద్.

30 అయావలె దేవుణు దూత దన్నిజ్, “మరియ నీను తియెల్ ఆమ. దేవుణు నీ ముస్సు కనికారం తోరిస్త మనాన్.

31 నీను పాత డిఁసిదె, ఒరెన్ కొడొడిదిజ్ ఇడ్చిలె. వన్నిజ్ యేసు ఇజి పేరు ఇడఁఅ.

* 1:22 1:22 దర్సనం ఇహిజ ఇనికాదో ఉండ్రీ సజతి కల లెకెండ టెబాజ్ తోరి అనికాదె అయాక దేవుణు సత్ఉదాన్ తోరి ఆజినాద్

32 వాండ్రు పెరికాన్ ఆనాన్. విజుదనిజ్ అతికారం మని దేవుణు మరిసి ఇజి కూకె ఆనాన్లె. వన్ని అనిగొగొర్ ఆతి దావీదు రాజు ఆతివజ, దేవుణుఆతి ప్రబు వన్నిజ్ రాజు కినాన్లె.

33 వాండ్రు, యాకోబుజ్ తెగ్గతివరిజ్ ఎలాకాలం ఏలుబడిః కినాన్లె. ఏలుబడిః కిదెజ్ అతికారం వన్నిజ్ ఎలాకాలం మంజినాదలె”, ఇజి వెహ్హాన్.

34 అయావలె అది, “నాను ఎసెజ్బా మొగకొడొః వెట కూడఃఎనె. యాక ఎలాగ జర్గినాద్?”, ఇజి దేవుణు దూతెజ్ వెన్బాతాన్.

35 అందెజె దేవుణు దూత, “దేవుణు ఆత్మ నీ ముస్కు వానాన్లె. మొసావ్ కితిజి నీడ పిడఃక్కాద్. అయలెకెండ, విజు దన్నిజ్ అతికారం మన్ని దేవుణు సత్తు నిజి పిడఃక్కాద్లె. అందెజె పుట్టికాన్ దేవుణు బాణిజ్ వానికాన్. వాండ్రు దేవుణు మరిసి ఇజి కూకె ఆనాన్లె.

36 నీ డగ్గుహి లోకుఆతి ఎలిసబెతు డొక్కి కాలమ్దు ఒరెన్ బయిజ్ పాత డిఃస్త మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్.

37 విజు కిదెజ్ దేవుణు అట్టికాన్”, ఇజి వెహ్హాన్.

38 అయావలె మరియ, “ఇదిలో, నాను దేవుణు పణిమణిసి. నీను వెహ్హి లెకెండనె నజి జర్గిపిద్”, ఇజి వెహ్హాద్. అకవెహొండ్రె దేవుణు దూత దని బాణిజ్ సొహాన్.

మరియ ఎలిసబెతుబాన్ ససాన్సినాద్

39 అయావలెనె, మరియ తయార్ ఆతాద్. ఆతాదె, యూదయ దేసెమ్ది గొరొణ్ ప్రాంతమ్దు మని ఉండ్రె పట్నమ్దు బేగి సొహాద్.

40 అబ్బె మని జెకరియ ఇండ్రొ సొహాదె, ఎలిసబెతుజ్ దసూల్ఆతాదె, నమొస్తె వెహ్హాద్.

41-42 మరియ వెహ్హి వందనం ఎలిసబెతు వెహివెలె, దన్ని పొటాద్ మన్ని పిండం సర్దదాన్ కద్దితాద్. ఎలిసబెతు దేవుణు ఆత్మ దాన్ నిండ్రెజి సర్దద ఆజి ఈహు డటం వెహ్హాద్. “అబ! బోదెకా లొఇ, దేవుణు నిజినె నెగెండ దీవిస్తాన్. నీ పొటాద్ మన్ని కొడొఃదిజ్బా దీవిస్తాన్.

43 నా ప్రబుజ్ అయ్సి నా డగ్గు వాదెజ్ నాను ఏపటిదిక ఆవి.

44 ఇదిలో నీ వందనం నా గిబ్బిదు అర్తిజ్, నా పొటాద్ మన్ని పిండం సర్దదాన్ కద్దితాద్.

45 ప్రబు దనిజ్ వెహ్హి మాటెజ్ జర్గినాద్ ఇజి నమకం ఇట్టికాద్ గొప్పది.

మరియ దేవుణుదిజ్ పొగిడిఃజి పార్జినాద్.

46 అయావలె మరియ ఈహు వెహ్హాద్. “నా పాణం ప్రబు గొప్ప పెరికాన్ ఇజి వెహ్హినాద్.

47-49 వాండ్రు వన్ని పణిమణిసిఆతి నా ఇజ్జి బత్తుదిజ్ సుడఃతాన్. అందెజె నా పాణం నజి రక్కిన్ని దేవుణు బానె సర్దద ఆజినాద్. గొప్ప సత్తు మన్ని దేవుణు నా వందిజ్ గొప్ప పణిజ్ కితాన్. అందెజె ఏలుదాన్ లోకురె విజెరె నా వందిజ్, దేవుణు దీవిస్తికాద్ ఇజి వెహ్హార్లె. వాండ్రె నెగ్గి దేవుణు.

50 వన్నిజ్ తియెల్ అనివరి ముస్కు వన్ని కనికారం తర తరం మంజినాద్.

51 వాండ్రు వన్ని సత్తుదాన్ గొప్ప పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ ఒడఃబిజి గర్ర ఆతి వరిజ్ వాండ్రు సెద్దిస్తాన్.

52 గర్ర మని అతికారిజ, అతికారం దాన్ డిఃహ్లాండ్రె ఇజిరి వరిజ్ పెరికార్ కితాన్.

53 బజాతివరిజ్ నెగ్గి టిండి సీజి సర్ద కిబిస్తాన్. మని వరిజ్ వహి కీదానె పోక్తాన్.

54-55 మా అనిరిజ్ 'కనికారం తోరిస్సు' ఇజి ఒట్టు కితి వజి వాండ్రు కితాన్. వన్నిజ్ సేవ కిని ఇస్తాయేలు లోకాజ్ కనికారం ఆజి సాయం కితాన్. అబహముజ్ వన్ని కుటుమ్ది వరిజ్ విజేరిజ్ ఎలాకాలం కనికారం తోరిస్సు ఇజి ఒట్టు కితాన్. అయాక వాండ్రు ఒడిబితాన్", ఇజి మరియ వెహ్దాన్.

56 అది డగ్రు మూండ్రీ నెలెజ్ దాక ఎలిసబెతు బాన్ మహాదె దని ఇండ్రో మర్జి సాహాద్.

బాప్తీసం సీని యోహాను పుట్టినాన్.

57 నెలెజ్ నిండ్రీతివలె, ఎలిసబెతుజ్ ఒరెన్ కొణ్ణె పుట్టాన్.

58 ప్రబు దన్నిముస్కు కణక పెహ్తా బేస్తాన్ ఇజి పడకాదికారిని కూలెజ్ వెహరె, దన్నివెట నండ్రో సర్ద ఆతార్.

59 కొణ్ణె పుట్టి ఎనిమిది దినమ్దు వన్నిజ్ సునతి కిదెజ్ కూడితార్. కొణ్ణెదిజ్ అప్పొసి పేరు నన్నిక ఇడదెజ్ వారు ఒడిబితార్.

60 నస్తీవలె అయ్సి, "అహు పొని! వన్నిజ్ యోహాను ఇజి పేరు ఇడదెజ్", ఇజి వెహ్దాన్.

61 అందెజె వారు, "మీ కూలెజి లోఇ ఎయెరిజ్బా నిన్ని పేరు సిల్లెద్", ఇజి దనిజ్ వెహ్దాన్.

62 వినిజ్ ఇన్ని పేరు ఇడదెజ్ అప్పొసి కోరిజినాన్ ఇజి నెస్తెజ్ వారు కియు సయ్న కిజి జెక్రయెజ్ వెన్బాతాన్.

63 నస్తీవలె వాండ్రు ఉండ్రీ రాసిని బల్ల లొస్తాండ్రె, "విన్ని పేరు యోహాను", ఇజి రాస్తాన్. వారు విజెరె నండ్రో బమ్మ ఆతార్.

64 వెటనె, వన్నిజ్ వరిగిదెజ్ వెయు వాతాద్. దేవుణుదిజ్ పొగిడిజి వర్గిదెజ్ మొదోల్స్తాన్.

65 పడకాదికారి విజేరె గొప్ప తియెల్ ఆతార్. యూదయ దేసెమ్ది గొరొణ్ ప్రాంతం విజు లోకుర్ విజేరె యా జర్గితి సజతిజి వందిజ్ వర్గిజి మహార్.

66 యాక వెహికార్ విజెరెబా దని వందిజ్ ఒడిబిజి, "యా కొణ్ణె ఎలాగ మహ్తాకాన్ ఆనాన్లెనో", ఇజి వెహ్దాన్. ప్రబు సత్తు వన్నివెట మహాద్ ఇజి వారు నెస్తార్.

జెకరియ పొగిడిజి పార్జినాన్

67 నస్తీవలె వన్ని అప్పొసి జెకరియ, దేవుణు ఆత్మదాన్ నిండ్రీజి, దేవుణు వెహ్తాజ్ మని సజతిజి వందిజ్ ఈహు వెహ్దాన్.

68 "ఇస్తాయేలు లోకురి దేవుణుదిజ్ పొగిడిజినాల్. ఎందనిజ్ ఇహిజ, వాండ్రు వన్ని లోకురిజ్ డిబిస్సి వందిజ్ వాత మనాన్.

69 ఒరెన్ సత్తు మని మజి గొప్పజి రక్సిస్సివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమ్దు మనికాండ్రె.

70-71 సేన దినమ్కాజ్ ముజాలె, దేవుణు వన్ని బాణిజ్ వాతి ప్రవక్తెజెవెట ఒట్టు కిత మనాన్. ఒట్టు ఇనిక ఇహిజ, "మా పగాతివరి బాణిజ్ మజి రక్సిస్సుఇజి. "మజి దూసిస్సి వరిబాణిజ్ రక్సిస్సు", ఇజి. అయా ఒట్టువజనె, మజి రక్సిస్సి వన్నిజ్ సితాన్.

72 మరి వాండ్రు వెహ్దాన్, "మా అనిరిజ్ ఒట్టు కితి వజి కనికారం తోరిస్సు ఇజి. వన్ని వందిజ్ కేట ఆతి ఒపుమానం ఒడిబిన ఇజి.

73-74 మా బుబ్బు ఆతి అబ్రాహాము వెట ఒట్టు కితాన్, మా పగ ఆతివరి బాణిజ్ మజీ తప్సిన్న ఇజి, తియెల్ సిల్లెండ వన్నిజ్ సేవ కిదెజ్ మజీ సాయం కిన ఇజి.

75 మరి, మాటు దేవుణుదిజ్ కేట ఆతి లోకుర్ వజ నీతి నిజాయితిదాన్ మా బత్తు. విజు వన్ని ఎద్దు మండ్రెజ్ మజీ తయార్ కిన ఇజి”, వెహ్తాన్.

76 మరి, నా కొడోః నీను విజు దన్నిజ్ అతికారం మన్ని దేవుణు ప్రవక్త ఇజి కూకెఆనిలె. ఎందానిజ్ ఇహిజు, నీను ముజాలె సాన్ సి ప్రబుజ్ లోకుడగ్గు వాదెజ్ సరి నెగెణ్ కినిలె.

77 నీ వన్ని లోకాజ్ వెహ్తాలె, “దేవుణు వరి పాపముకు సెమిసి వరిజ్ రక్సిస్సాన్ లె”, ఇజి.

78 మా దేవుణు నండొ కనికారం మనికాన్. వాండ్రు దేవుణు మంజిని బాడ్డిదాన్ పొద్దు సాని లెకెండ రక్సిస్సి వన్నిజ్ తపిస్సాన్ లె.

79 ఎందానిజ్ ఇహిజు, నీకటిదు మని వరిజ్ సావు బత్తుదు మని వరిజ్ జాయ్ సీదెజ్. మజీ సమాదనం దాన్ నడిఃపిస్తెజ్. దిని వందిజె వాండ్రు రక్సిస్సి వన్నిజ్ తపిస్సాన్ లె”, ఇజి జెకరియ వెహ్తాన్.

80 కొడోః పిరితాన్. దేవుణు ఆత్మ సత్తు దాన్ పిరితాన్. వాండ్రు ఇస్రాయేలు లోకురిజ్ తోర్పి దాక యెరూసలేమ్ దిజ్ వెల్లి బీడిఃమ్ బూమిదు ఒరేండ్రె బత్తితాన్.

2

1 అయ కాలమ్ దు రోమ గవర్ మెంటు అడిఃగి మన్నివిజు లోకురిజ్ జమబంది లెకెజ్ రాస్టెజ్ ఇజి కయినరు అయుగుస్తు ఉండ్రె ఆడ్ర సితాన్.

2 కురెనియ ఇని ఒరెన్ సిరియ రాస్ట్రొందిజ్ సుడఃజి మహివలె యా మొదోహి జమబంది లెకెజ్ రాస్ట్రార్.

3 విజెరె వరి వరి పట్నమ్ కాజ్ పేర్కు రాసె ఆదెజ్ సాహార్.

4 అయలెకెండ్రె యోసేవు ఇనికాన్ ఒరెన్ బా సాహాన్. వీండ్రు దావీదు కుటుమ్ దికాన్. దావీదు పట్ను బేత్లెహాము. అందెజె వాండ్రు గలిలయ ఇని ప్రాంతమది నజరేతు ఇని పట్ను దాన్, యూదయ ప్రాంతమదు మని బేత్లెహాము ఇని పట్నమ్ దు సాహాన్.

5 వన్నిజ్ వెన్ బాతి మహి మరియ వెట జమబంది రాసె ఆదెజ్ సాహాన్. అయావలె దన్నిజ్ నెలెజ్ నిండ్రెతె మహె.

6 వారు అబె మహివలె దనిజ్ నొపిజ్ వాతె.

7 అది దని తోల్ సుర్ కొడోః దిజ్ ఏరుకాబాతాద్. వరిజ్ మండ్రెజ్ లార్ జి ఇలు దొహ్ కెతాద్. దొహ్కా ఇతిజ్ పుట్టి కొడోః దిజ్ కనలిజాణిజ్ సుటిస్తారె, కొడ్డిఃజు సాలాది డోణిద్ త్రెప్టార్.

గొరెజ్ గవుడుఃజు దేవుణు దూత నెగ్గి కబ్బు వెహ్సినాన్

8 నస్తివలె, అయ ప్రాంతమదు సెగొండార్ గొరెజ్ గవ్ డుఃజ్ వరి గొరెజు, మడిఃజు మంద కితారె రెయ్ తు కాపుకిజి మహార్.

9 అయావలె ఒరెన్ దేవుణు దూత వరిజ్ తోరె ఆతాన్. ప్రబు జాయ్ వరి సుటులం వాతాద్. వారు నండ్రె తియెల్ ఆతార్.

10 అయావలె దూత వరిజ్, “మీరు తియెల్ ఆమాట్. లోకురిజ్ విజెరిజ్ నండ్రె సరద కిబిస్సి నెగ్గి కబ్బు నాను వెహ్నా.

11 నేండ్రు దావీదు పట్నమ్ దు మిజీ రక్సిస్సికాన్ ఒరెన్ పుట్ట మనాన్. వాండ్రు ప్రబు ఆతి క్రిస్తు.

12 యాకదె నాను మీజీ వెప్తొదనిజ్ గుర్తు “ఒరెన్ బయిదిజ్ కసెలిజాణిజ్ సుటిస్తారె, సాలాది డోణిద్ త్రెప్తి మనిక సూణిదెర్”, ఇజి వెప్తొన్.

13-14 వెటనె, దేవుణు మంజిని బాడిది నండొ దూతెజ్ అయ దూతవెట కూడితె. కూడితారె, “విజు దన్నిజ్ అతికారం మన్ని దేవుణుదిజ్ పొగిడిజినాట్. యా లోకమ్దు వాండ్రు ఇన్టం కిని లోకురిజ్ సమాదనం మనీద్’ ఇజి దేవుణుదిజ్ పొగిడిజి మహార్.

15 దూతెజ్ వరిజ్ డి:స్తారె, దేవుణు మంజిని బాడిదు సాహార్. సాహి వెనుక గొర్రెజ్ గవ్డుజ్, “మాటు బేత్తెహేముదు సొన్ని, ప్రబు మజి వెహేపిస్తి యా జర్గితి సజతిజ సూణాట్”, ఇజి ఒరెన్దిజ్ ఒరెన్ వర్గితార్.

16 వారు బేగి సాహారె, మరియామ్మెజ్, యోసేపుజ్, డోణిదు త్రెప్తి మని కొణొదిజ్ సుండెతారె.

17 వారు వన్నిజ్ సుండెతారె, యా కొణొ:వందిజ్ వరిజ్ వెప్తొ మాటెజ్ విజేరిజ్ వెప్తొర్.

18 గొర్రెజ్ గవ్డుజ్ వెప్తొకెజ్ వెహికార్ విజేరె నండొ బమ్మ ఆతారె.

19 గాని మరియు జర్గితి సజతిజ విజు గర్బమ్దు ఇడ్డి దన్నివందిజ్ ఎత్తుకిజి మహార్.

20 గవ్డుజ్ వరిజ్ వెప్తొకెజ్, వారు సుండెతికెజ్ విజు వన్కా వందిజ్ దేవుణుదిజ్ గవరం సీజి వన్నిజ్ నండొ పొగిడిజి మప్తా సాహార్. దేవుణు దూత వరిజ్ వెప్తొ వజనె విజు జర్గితె.

21 పుట్టి ఎనిమిది రోస్కు ఆతిజ్, బయిజ్ సునతి కితార్. అయావలె వారు వన్నిజ్ యేసు ఇజి పేరు ఇట్టార్. పాత డి:న్ఎండ ముజాలె దేవుణు దూత వెప్తొ పేరునె ఇట్టార్.

22 దేవుణు మోసెజ్ సీతి రూలుజ్దు మన్నివజ సుబ్రరమ్వందిజ్ పూజెజ్ కిదెజ్ దినం ఆతాద్. అయావలె యోసేపుని మరియు బయిజ్ దేవుణుదిజ్ ఒవజెప్తెజ్, యెరూసలేమ్దు ఒత్తార్.

23 ఎందానిజ్ ఇహిజ, మోసె రాస్టెజ్ ప్రబు వెప్తొ రూలుదు మనాద్, “విజు తొలిత పుట్టి కొణొదిజ్ దేవుణు వందిజ్ కెట ఇడెదెజ్*.

24 మరి, మోసె రాస్టెజ్ ప్రబు వెప్తొ రూలుదు మని వజ, “జత గువండెజ్నొ రుండి పార పొటి పిలెకుజ్నొ పూజ సీదెజ్†”, ఇజి. అయావజ ఒత్తార్.

25 అయావలె, సుమెయోను ఇనికాన్ ఒరెన్ యెరూసలేమ్దు మహాన్. వీండ్రు నీతి నిజయ్తి మనికాన్. దేవుణుదిజ్ తియెల్ ఆతికాన్. ఇస్రాయేలు లోకాజ్ రక్సిస్సి వన్ని వందిజ్ ఎర్దు సుండెజి మహాన్. దేవుణు ఆత్మ వన్ని వెట మహాన్.

26 ప్రబు ఏర్పాటు కితి పొక్తి క్రిస్తజ్ తొవిండ, నీను సాఇలె’, ఇజి దేవుణు ఆత్మ వన్నిజ్ వెప్తొ మహాన్.

27 దేవుణు వన్నిజ్ నడిపిస్తివజ వీండ్రు దేవుణు గుడిదు సాహాన్. నస్తివలె, దేవుణు మోసెజ్ సీత్తి రూలుదు మని లెకెండ్ కిదెజ్ అయ్సి అపొసిర్ కొణొ: ఆతి యేసుజ్ తత్తార్.

28 అయావలె సుమెయోను కొణొదిజ్ కికాణిజ్ పెప్తొండ్రె దేవుణుదిజ్ పొగిడిజి ఈహు వెప్తొన్.

29 “ప్రబువా, నీను వెప్తొ మాటెజ్ వజ నాను వన్నిజ్ సుండెత. అందెజె నీ పణి మణిసి ఆతి నజి ఏలు సమాదనం దాన్ కూక్సి ఒఅ.

* 2:23 2:23 నిర్గమ 13:2,12. † 2:24 2:24 లేవి 12:8.

30-31 ఎందానిజ్ ఇహిజ, లోకుర్ విజేరె సుడెదెజ్ నీను తయార్ కితి రక్సిన్సివన్నిజ్నా కణకాణిజ్ నాను సుడెత మన్ను.

32 వాండ్రు ఇస్రాయేలు ఆఇ వరిజ్ దేవుణు సరిదు నడపిస్తిజ్ జాయ్లెకెండె ఆనాన్లె. నీ ఇస్రాయేలు లోకాజ్ గొప్ప గవరం వాండ్రు కల్లిస్సాన్లె.

33 అయావలె వాండ్రు కొడెః వందిజ్ వెప్తి మాటెజ్ వెహారె అయ్సి అపొసిర్ నండె బమ్మ ఆతార్.

34-35 సుమెయోసు వరిజ్ దీవిస్తాండ్రె, వన్ని అయ్సి ఆతి మరియెజ్, “ఇస్రాయేలు లోకుర్ నండెండార్ నాసనం ఆనివందిజ్, నండెండార్ బత్సిని వందిజ్ దేవుణు వినిజె ఏర్పాటు కితాన్. వీండ్రు దేవుణు ఏర్పాటు కితి ఉండ్రె గుర్తు. లోకుర్ అయాక నెక్కు పొక్కార్. ఆహె, వారు మన్నుదు విని వందిజ్ ఒడెబితికెజ్ వెల్లి ఆనె. అయాక నీను సూణివెలె కూడం గుత్తి సొహి లెకెండె నీ మన్నుదు దుకం వానాదెల్”, ఇజ వెప్తాన్.

36-37 నస్తివలె పనుయెలు గాడ్సి ఆతి అన్న ఇని ఉండ్రె ప్రవక్త మహాద్. అది ఆసిరు ఇని జాతిదు మనికాద్. అది పెండ్రె ఆజి ఏడు పంటెజ్ మాసి వెట బత్తితాద్. ఎనబయ్నాల్లి పంటెజ్ దాక ముండ మొప్ప మహాద్. అది నండె డొక్త ఆతాద్. దేవుణు గుడిః దాన్ ఎనెజ్బా డెస్ఎండ, రెయు పొగాల్ ఉపాన్దాన్ పార్దనమ్దాన్ దేవుణుదిజ్ పొగిడిఃజి మాడిసి మహాద్.

38 ఆ గడిఃయదునె, అది దేవుణు గుడిఃదు యోసేపు, మరియ, యేసుబాన్ సొహాదె దేవుణుదిజ్ పొగిడిఃతాద్. యెరూసలేమ్ది లోకుర్ రోమ అతికారిజ అడిఃగి మహార్. వారు వరిజ్ డెబిన్సి ఒరెన్ వన్నిజ్ ఎద్దు సుడెఃజి మహార్. ఆహె ఎద్దు సుడెఃజి మహి వరివెట కొడెఃవందిజ్ వెప్తాద్.

39 యోసేపుని మరియ మోసె రాస్టెజ్ ప్రబు వెప్తి రూలుజ్దు కిడెజ్ వెప్తి మనికెజ్ విజు కితార్. కితి వెనుక, మప్తారె గలీలయదు మని నజరేతు ఇని వరి పట్నమ్దు సొహార్.

40 కొడెఃసత్తు దాన్ పిరితాన్. వన్నిజ్ నండె బుద్ది మనాద్. దేవుణు వన్నిజ్ దీవిసినె మహాన్.

యేసు పెద్దలిజవెట వరగిజినాన్.

41 ఏంటు ఏంటు యేసు అయ్సి అపొసిర్ యెరూసలేమ్దు పస్కు[‡] పండెయ్దిజ్ సొస్సి మహార్.

42 వారు ఏంటు సొస్సి మహి అలవాటువజ, యేసుజ్ పన్నెండు పంటెజ్ మహివలె పండెయ్దిజ్ సొహార్.

43 పండెయ్ వీజితిజ్, వారు మర్జి వాజి మహార్. గాని కొడెః ఆతి యేసు యెరూసలేమ్దు నిహాన్. వన్ని అయ్సి అపొసిర్ అయాక నెస్ఎతార్.

44 వీండ్రు మంద లోఱ మనాన్ ఇజి ఒడెబిజి, ఉండ్రె రోజు వారు నడిఃజి వాతార్. వెనుక వారు వరి కూలెజబాన్ నెల్వ ఆతి వరిబాన్ వన్నిజ్ రెబాజినార్.

45 వాండ్రు తోరెఱిజ్, వన్నిజ్ రెబాజి యెరూసలేమ్దు మర్జి వాతార్.

46 మూండ్రె దినమ్కు వెనుక, వాండ్రు, దేవుణు గుడిఃదు బోద్ కినివరి నడిఃమి బస్తిక సుడెఃతార్. వాండ్రు వరి మాటెజ్ వెంజి, వరిజ్ మరి వెన్బాజి మహాన్.

47 వన్ని మాటెజ్ వెహికార్ విజేరె, వాండ్రు మహి వెప్తి మాటెజి వందిజ్, వన్ని బుద్ది వందిజ్ నండె బమ్మ ఆతార్.

‡ 2:41 2:41 పులాజ్ సిల్లి రొట్టతయార్ కిజి తిని పండెయ్నె పస్కు పండెయ్

48 వన్ని అయ్‌సి అఫొసిర్ వన్నిజ్ సుడేతిజ్ నండో బమ్మ ఆతార్. వన్ని అయ్‌సి ఈహు వెహ్లాద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బుని నాను నండో బాద ఆజి నిజి రెబాజి వాతాప్”, ఇజి వెహ్లాద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బు పణిదు మండ్రెజ్‌వలె ఇజి మీరు నెన్‌ఇదెరా?”, ఇజి వెహ్లాన్.

50 గాని వాండ్రు వరిజ్ వెహ్పి మాటెజ్ వారు అర్థం కిఎతార్.

51 వెనుక వాండ్రు వరివెట సోతాండ్రె నజరేతు వాతాన్. అబ్బె వరిజ్ లోజిజి మహాన్. వన్ని అయ్‌సి యా జర్గిజిని విజు సజతిజ్ దని మన్నుదు ఇడ్డి మహాద్.

52 యేసు బుద్దిదు, వయుసుదు పిరితాన్. దేవుణు, లోకుర్ మరి మరి వన్నిజ్ ప్రేమిసి మహార్. వన్ని ముస్కు సర్ద ఆజి మహార్.

3

1 పొంతి పిలాతు ఇనికాన్‌యూదయ రాస్త్రం ఏలుబడిః కిజి మహాన్. హేరోదు గలిలయ రాస్త్రమ్‌దిజ్ అతికారి. హేరోదుజ్ తంబెర్‌సిఆతి పిలుప్పు ఇతూరియని త్రకోసీతి రాస్త్రమ్‌కాజ్ అతికారి. అబిలేనే రాస్త్రమ్‌కాజ్ లుసానియ అతికారి. అయావలె తిబెరియ కయిసరు ఇనికానె విరిజ్ విజేరె ముస్కు రాజు. వాండ్రు పదిహేను పంటెజాణిజ్ విరిజ్ ఏలుబడిః కిజినె వాజినాన్.

2 అయావలె, అన్నని కయప పుజెరిజు ముస్కు పెరి పుజెరి. అయావలె బీడిమ్ బూమిదు, జెకరియ మరిసి ఆతి యోహాను వెట దేవుణు వర్‌గితాన్.

3 అందెజె వాండ్రు, “మీరు పాపమ్‌కు డిఃసి బాప్తిసం లాగె ఆదు. దేవుణు మీ పాపమ్‌కు సెమిస్సాన్”, ఇజి యెర్దాను గడ్డ పడఃకాదు మన్ని ప్రాంతం విజు సాస్సిబోదిసి మహాన్.

4 యెసయ ప్రవక్త రాస్తివెలె విన్నివందిజ్ ఈహు వెహ్పినాన్. “బీడిమ్ బూమిదు ఒరెన్ ఈహు డేల్ని వెహ్పినాన్. “ప్రబుజ్ లోకుడ్రు వాదెజ్ సరినెగెన్ కిఅ. వన్నిజ్ నడిఃదెజ్ సరితినాజ్ కిదు.

5 విజు గాతెజ్ నిండ్రన్‌అ. విజు గొరొకని మెటెజ్ బయలు కిఅ. వెకొ సరిజ్ తినానికెజ్ కిఅ. కరుకు సరిజ్ నున్నజ్‌తికెజ్ కిఅ.

6 అయావలె విజేరె, దేవుణు వరిజ్‌రక్కిన్ని దన్నివందిజ్ సూణార్‌లె*”, ఇజి. ఆహె రాస్తిమహి లెకెండ యోహాను బోదిస్తాన్.

7 యోహాను వన్నిడ్రు బాప్తిసం లాగెఅదెజ్ వాజిని మంద లోకురిజ్ ఈహు వెహ్లాన్ “మీరు వినం మన్నిసరాన్ లెకెండ మన్నికిదెర్, దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కొపమ్‌దాన్ తప్రెఅదెజ్ ఇజి మీరువాతిదెరా? నిజమే అయలెకెండ ఇజి నాను ఒడిఃబిదెజ్ సిల్లెద్.

8 మీ పాపమ్‌కు ఒపుకొడొఃజి డిఃసి సీజి దన్నిజ్ తగితి పణిజ్ కిజి తోరిస్తు. “మాపు అబ్రాహము తెగ్గతికాప్”, ఇజి మీరు మీ మన్నుదు వర్గిమాట్. ఎందానిజ్ ఇహిజు, యా పణుకుజాణిజ్ అబహమ్ముజ్ కొడొఃరిజ్ తయార్ కిదెజ్ దేవుణు అటాన్”, ఇజి నాను మిజి వెహ్పిన.

9 దేవుణు మరెక మొదొల్‌కత్తి విసిర్‌దెజ్ కియుదు గొడెలి అన్తి వన్నిజ్ పొలిత మనాన్. నెగ్గి పట్టు అన్‌ఇ మరెకాజ్ విజు కత్తి సిసుద్ విసిర్‌నాన్”, ఇజి వెహ్లాన్.

* 3:6 3:6 యెసయ 40:3-5.

10 అయావలె లోకుర్ విజెరె, “అహిజ మాపు ఇనిక కిదెజ్?”, ఇజి వెన్బాతార్.

11 యోహాను వెహ్లాన్, “రుండి సొకెజ్ మన్నికాన్ ఉండ్రీ సిలివన్నిజ్ సీదెజ్. అయలెకెండ్ టిండి మన్నికాన్ సిల్లివన్నిజ్ సీదెజ్”, ఇజి.

12 పన్ను పెరనికార్బా బాప్తినం లాగె ఆదెజ్ వాతార్. వారు, “ఓ బోదకినికి, మాపు ఇనిక కిదెజ్?”, ఇజి వెన్బాతార్.

13 దనిజ్ వాండ్రు, “మిజి ఎసొ లొస్తెజ్ ఆడ్ర సిత మనాదొ, నసొ లొస్తు. నండొ లొస్తాట్”, ఇజి వెహ్లాన్.

14 నస్తీవలె సెగొండార్ ఉద్దం కినికార్, “మాపు ఇనిక కిదెజ్?”, ఇజి వెన్బాతార్. అందెజె వాండ్రు, “బెద్రిసి ఎయెబాన్ డబ్బు డిబిస్తాట్. అనయం వెహ్ని డబ్బు లొస్తాట్. మీ జితం దానె సర్దు ఆదు”, ఇజి వెహ్లాన్.

15 వీండ్రు క్రీస్తును ఇజి యోహాను వందిజ్ లోకుర్ విజెరె వరి మన్నుదు ఒడెబితార్. వారు ఆస దాన్ క్రీస్తుజ్ ఎద్రు సుడెజి మహార్.

16 అయావలె యోహాను వరిజ్ విజెరిజ్ వెహ్లాన్, “నాను మిజి ఏరుదాన్ బాప్తినం సీజిన. నజి మిస్తి నండొ పెరికాన్ మరి ఒరెన్ వాజినాన్. వన్ని జోడ్కు బేటటు కుతెజ్ నాను ఏపటికాన్ ఆఎ. వాండ్రు మిజి దేవుణు ఆత్మదాన్ సినుదాన్ బాప్తినం సీనాన్లె.

17 వాండ్రు గాలి ఇడెని సేపా కీదు అస్త మనాద్. వాండ్రు వన్నికలమ్దిజ్ సుబ్బరం కిజి, గింజెజ్ కొటు కిజి గాలి ఇడెజినాన్. గింజెజ్ గాదిద్ ఇడ్వాన్. పొటుదిజ్ నమ్బుఇ సినుదు సుర్నాన్.

18 యా మాటెజ్ అఏండ, మరి నండొ సజతిజ్ వెహ్ని లోకురిజ్ పణిసి వెహ్లాన్. సువార్త బోదిసి వెహ్లాన్.

19 వాండ్రు హేరోదు ఇని అతికారిజ్ వెహ్లాన్, వన్ని కొడెసి హేరోదియవెట హేరోదు పాపం కిత్తాన్ ఇజి. మరి, హేరోదు కితి విజు తప్పుజబా వెహ్లాన్.

20 అందెజె వాండ్రు యోహానుజ్ జెలిదు ఇట్టాన్. ఆహె హేరోదు కిత్తి విజు తప్పుజవెట యోహానుజ్ జెలిదు ఇడిస్తి తపుబా కూడితాద్.

యేసు బాప్తినం లాగెఆజినాన్

21 యోహానుజ్ జెలిదు ఇడ్చి ముజాల, ఉండ్రీ రోజు లోకుర్ విజెరె బాప్తినం లాగె ఆతార్. అయావలె యేసు బా బాప్తినం లాగె ఆతాన్.

22 వాండ్రు పార్దనం కిజి మహివలె, ఆగాసం రెయ్ ఆతాదె దేవుణు ఆత్మ ఉండ్రీ పార పొటిజ్ మూర్తి లెకెండ్ డిగ్జి వన్ని మున్కు వాతాద్. అయావలె, “నీనె నాను ప్రేమిస్తి నా మరిన్. నీ వందిజ్ నాను నండొ సర్ద ఆజిన”, ఇజి పరలోమ్దాన్ ఉండ్రీ జాటు వాతాద్.

23 యేసు వన్ని సేవపణి మొదొల్లివెలె వన్నిజ్ డగ్రుదిజ్ ముప్పుయ్ వంటెజ్ వయ్సు మహాన్. వీండ్రు యోసేపు మరీన్నె ఇజి ఒడిబిజి మహార్. యోసేపు హెలి మరిసి

24 హెలి మత్తతు మరిసి మత్తతు లేవి మరిసి లేవి మెల్కి మరిసి మెల్కి యన్న మరిసి యన్న యోసేపు మరిసి

25 యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్తికి మరిసి ఎస్తికి నగ్గయ మరిసి

26 నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేసెక మరిసి యేసెక యోదా మరిసి

27 యోదా యోహాన మరిసి యోహాన రేపా మరిసి రేపా జెరుబాబెలు మరిసి జెరుబాబెలు సయిలీయెలు మరిసి సయిలీయెలు నేరి మరిసి

28 నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కదాము మరిసి ఎల్కదాము ఏరు మరిసి

29 ఏరు యోహానవ మరిసి యోహానవ ఎలియెజెరు మరిసి ఎలియెజరు యోరియ మరిసి యోరియ మత్తతు మరిసి మత్తతు లేవి మరిసి

30 లేవి సిమొను మరిసి సిమొను యూద మరిసి యూద యోసేపు మరిసి యోసేపు యోనాము మరిసి యోనాము ఎల్యాకిము మరిసి

31 ఎల్యాకిము మెలెయా మరిసి మెలెయా మేన్నా మరిసి మేన్నా మత్తత మరిసి మత్తత నాతాను మరిసి నాతాను దావీదు మరిసి

32 దావీదు, యెసయ మరిసి. యెసయ ఓబెదు మరిసి ఓబెదు బోయసు మరిసి బోయసు సల్కను మరిసి సల్కను నయస్సోను మరిసి

33 నయస్సోను అమ్మినాదబు మరిసి అమ్మినదాబు అరాము మరిసి అరాము ఎస్రోము మరిసి ఎస్రోము పెరెసు మరిసి పెరెసు యూదా మరిసి

34 యూదా యాకోబు మరిసి యాకోబు ఇసాకు మరిసి ఇసాకు అబ్రాహము మరిసి అబ్రాహము తేరహు మరిసి తేరహు నాహోరు మరిసి

35 నాహోరు సేరుగు మరిసి సేరుగు రయూకు మరిసి రయూకు పెలెగు మరిసి పెలెగు హెబెరు మరిసి హెబెరు సేలహు మరిసి

36 సేలహు కెయినాను మరిసి కెయినాను అర్చక్కుదు మరిసి అర్చక్కుదు సేము మరిసి సేము నోవహు మరిసి నోవవు లెమెకు మరిసి

37 లెమెకు మెతుసెలె మరిసి మెతుసెలె హనోకు మరిసి హనోకు యెరుదు మరిసి యెరుదు మహాలెలు మరిసి మహాలెలు కెయినాను మరిసి

38 కెయినాను ఎసోసు మరిసి ఎసోసు సేతు మరిసి సేతు ఆదాము మరిసి ఆదాము దేవుణు మరిసి.

4

యేసుజ్ పరిస కిజినాన్

1 యేసు దేవుణు ఆత్మదాన్ పూర్తి నిండితాండ్రె, యోర్దాన్ గడ్డదాన్ మర్జి వాతాన్.

2 నలపయ్ రోస్కు దేవుణు ఆత్మ వన్నిజ్ బీడిమ్ బూమిదు నడిపిస్తాన్. అబె, నయతాను వన్నిజ్ పరిస కిదెజ్ సుడఃతాన్. వాండ్రు అయా రోస్కాజ్ ఇనికబా ఉణెఎండ మహాన్, కడఃవెరిదు వన్నిజ్ బజ కట్టాద్.

3 అయావలె నయ్తాన్, “నీను దేవుణు మరిసి ఇహిజ, యా పణుకు టిండి ఆని లెకెండ వెహాఅ”, ఇజి వెహ్తాన్.

4 అందెజె యేసు, “లోకు బత్తిజనిక టిండిదానె ఆవిద్*”, ఇజి దేవుణు మాటదు రాస్త మనాద్”, ఇహాన్.

5-6 అయావలె నయ్తాన్ వన్నిజ్ ఎత్తు మని బాన్ ఒతండ్రె, లోకమ్దు మని విజు దేసెమ్కు జామె తోరిస్తాన్. “యా లోకమ్ది అతికారం సంసారం, విజు నాను నిజి సీన. ఎందనిజి ఇహిజ అయాకెజ్ విజు నజీనె దేవుణు ఒపజెప్త మనాన్. నజీ ఇన్దం ఆతి ఎయెరిజ్బా సీదెజ్ నజీ అక్కు మనాద్.

7 అందెజె నీను నజి పొగిడిజి మాడిస్తిజ, యాకెజ్ విజు నీవి ఆనె”, ఇహాన్.

8 నస్సివలె యేసు, “నీను నీ దేవుణు ఆతి ప్రబుజ్నె పొగిడిజి మాడిసి, వన్నిజె సేవకిదెజ్† ఇజి దేవుణు మాటదు రాస్త మనాద్”, ఇజి మర్జి వెహ్తాన్.

* 4:4 4:4 ద్వితీ 8:3. † 4:8 4:8 ద్వితీ 6:13.

9 వెన్నా వన్నిజ్ యెరుసలెమ్దు కూక్త ఒత్తాండ్రె, దేవుణుగుడిః కోసాదు నిల్వ్తాండ్రె, “నీను దేవుణు మరిసి ఇహిజ ఇబ్బెణిజ్ అడిఃగి డాట్అ.

10-11 ఎందానిజ్ ఇహిజ, “నిజి నెగ్రెండ కాపాడఃదెజ్ నీ వందిజ్ వన్ని దూతారిజ్ దేవుణు ఆడ్ర సీనాన్. నీ పాదం పణుకుదు తగ్గిఎండ వారు నిజి వరి కికాణిజ్ పెర్న అస్సార్†, ఇజి దేవుణు మాటదు రాస్త మనాద్”, ఇజి వన్నిజ్ వెప్తాన్

12 అందెజె యేసు, “నీ దేవుణుఆతి ప్రబుజ్, పరిస కిదెజ్ ఆపిద్సి”, ఇజి దేవుణు మాటదు రాస్త మనాద్”, ఇజి మర్జి వెప్తాన్.

13 సయ్తాన్ విజు పరిసెజ్ వీస్తాండ్రె సెగం కాలం వన్నిజ్ డిఃస్తసాహ మహాన్.

యేసు గలీలయదు వన్ని సేవపణి మొదొల్సినాన్

14 యేసు దేవుణు ఆత్మ సత్తుదాన్ గలీలయ ప్రాంతమ్దు మర్జి సాహాన్. అయా ప్రాంతం విజు వన్ని వందిజ్ మాటెజ్ సెద్రితె.

15 వాండ్రు యూదురి మీటిజ్ ఇల్కాజ్ నేర్పిస్తాన్. విజెరె వన్నిజ్ పొగిడిఃతార్.

యేసుజ్ నజరేతుదాన్ పేర్జినార్

16 వెనుక, వాండ్రు పిరితి వన్ని పట్నమ్దు సాహాన్. అయాక నజరెతు. వన్ని అలవాటు వజ విస్తాంతి దినమ్దు యూదురి మీటిజ్ ఇండ్రో సాహాండ్రె దేవుణు మాట సద్విదెజ్ ఇజి నిహాన్.

17 మీటిజ్ ఇండ్రోణి పణిమణిసి వన్నిజ్ యెసయ ప్రవక్త రాస్తి పుస్తకం సితాన్. వాండ్రు అయాక రెక్తిజ్ ఈహు రాస్తి మనికెజ్ వన్నిజ్ దొహ్కాద్.

18-19 “ప్రబు పొక్తి దేవుణు ఆత్మ నావెట మనాన్. అందెజె వాండ్రు బీద ఆతి వరిజ్ సువార్త వెప్తాజ్ నజి ఏర్పాటు కితాన్. తొహా ఆతి వరిజ్, “మిజి విడుఃదల వాతాద్”, ఇజి వెప్తాజ్, గుడ్డి వరిజ్, “మీ కణుకుజ్ తోరనె”, ఇజి వెప్తాజ్, నల్లితి వరిజ్ డిఃసెస్తాజ్, దేవుణు వన్ని లోకురిజ్ రక్సిస్సికాలం వాతాద్ ఇజి వెప్తాజ్ వాండ్రు నజి పొక్త మనాన్*”, ఇజి రాస్తి మనికెజ్ వన్నిజ్ దొహ్కాద్.

20 యాకెజ్ సద్విజి, పుస్తకం మూక్తాండ్రె పణిమణిసిజ్ మహ్తా సితండ్రె బస్తాన్. మీటిజ్ ఇండ్రో మహికార్ విజెరె వన్నిజ్ డిట బేస్తార్.

21 వాండ్రు వరిజ్, “ఏలు నాను సద్వితి దేవుణు మాటెజ్ మీరు వెహివెలెనె అయాక పూర్తి ఆతె”, ఇజి వెప్తాన్.

22 వారు విజెరె వన్ని వందిజ్ నెగ్గికెజ్ వెప్తార్. వన్ని వెయ్దాన్ వాతి నెగ్గి మాటెజి బమ్మ ఆజి, “వీండ్రు యోసేపు మరిసి గదె?”, ఇజి వెప్తార్.

23 యేసు వరిజ్ వెప్తాన్, “ఓ గురు, నిజి నీనె నెగెణ్ కిబ్బె ఆఅ”, ఇని బుద్ది మాట మీరు తవ్ఎండ నజి వెప్పాదెర్. మరి, మీరు నజి, ‘నీను కపర్నహోము ఇని పట్నమ్దు కిత్తి పణిజ్ మాపు వెహావ్. అయా పణిజ్ ఇబ్బె నీ సొంత పట్నమ్దుబా కిత’, ఇజి వెప్పాదెర్.

24 ఎమేణి ప్రవక్తెజ్ బా సొంత పట్నమ్దు లోకుర్ గవ్ఠం సిపెర్, ఇజి నిజం నాను మీ వెట వెప్పిన.

† 4:10-11 4:10-11 కిర్తన 91:11-12. § 4:12 4:12 ద్విత్తి 6:16. * 4:18-19 4:18-19 యెసయ 61:1-2.

25 వెండ్రు, ఏలియ దినమ్కాజ్, ఇస్రాయేలు దేసమ్దు మూండ్రి పంటెజ్ ఆరు నెలెజ్ దాక పిరు రెండె మహాద్. గొప్ప కరు వాతివలె, అబె నండో రాండి బోదెక్ మహె ఇనిక నిజమ్నె.

26 గాని, దేవుణు ఏలియెజ్ వరి ఎయెర్బాన్బా పోక్ఎతాన్. సీదొను ప్రాంతమది సారెపాతు ఇని నాటొణి రాండి బోదెలిబానె పోక్తాన్.

27 అయాలెకెండ, ఏలీసా ప్రవక్త కాలమ్దు, ఇస్రాయేలు దేసమ్దు నండొండార్ పెరికస్టం దాన్ మహార్. గాని వారు ఎయెర్బా నెగెణ్ ఆవతార్. సిరియ దేసమ్దు మని నయమాన్ ఒరెండ్రె నెగెణ్ ఆతాన్”, ఇజి నాను మిజి వెహ్సాన్. ఇజి యేసు వెహ్సాన్.

28 యా మాటెజ్ వెహెవలె, యూదురి మీటిజ్ ఇండ్రొ మహికార్ విజెరె వెరి కోపం ఆతార్

29 వారు నిహరె, పట్టుమ్దాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్టుం అయా మెటుద్నె తయార్ కిత మనాద్. గడియ బుర్ర కిజి వన్నిజ్ అర్పైజె ఇజి ఒతార్.

30 గాని మంది నడిఃమిజానె, వన్నిసరి వాండ్రు సాహాన్.

యేసు దెయమ్దిజ్ పేర్జినాన్

31 వెన్కా వాండ్రు గలిలియతి కపెర్నహుము ఇని పట్టుమ్దు వాతాన్. విస్రాంతి దినమ్దు యూదురి మీటిజ్ ఇండ్రొ బస్రాండ్రె లోకురిజ్ నేర్పిసి మహాన్.

32 వాండ్రు నెన్పిస్తి మాటెజ్ వెహరె, లోకుర్ నండో బమ్మ ఆతార్. ఎండనిజ్ ఇహిజు, నండో అతికారం దాన్ వాండ్రు వెహ్సాన్.

33-34 యూదురి మీటిజ్ ఇండ్రొ, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజి ఇని పణి? మజి నానం కిదెజ్ వాతిదా? నీను ఎయిదొ ఇజి నాను నెన్న. నీను దేవుణు బాణిజ్ వాతి నెగ్గి వాండ్రు”, ఇజి డటం గగోల్ ఆజి వెహ్సాన్.

35 అందెజె యేసు, “అలెజి మన్అ. వినిజ్ డిఃసి వెల్లి రఅ”, ఇజి డటం అయా దెయమ్దిజ్ వెహ్సాన్. నస్తివలె అయా దెయం, అది అస్తి వన్నిజ్, వరి విజెరె నడిఃమి అర్పైదె వన్నిజ్ ఇని నస్టం కిఎండ డిఃస్త సాహాద్.

36 అయావలె లోకుర్ విజెరె నండో బమ్మ ఆతార్. “అబ్బు, యాక ఎసాహి మాట. వీండ్రు దేవుణు సత్తుదాన్, అతికారమ్దాన్ సోన్అ ఇజి దెయమ్కాజ్ వెహ్సానాన్. అవి డిఃసి సాన్నినె”, ఇజి ఒరెన్దిజ్ ఒరెన్ వర్గితార్.

37 వన్ని వందిజ్ మాటెజ్ అయా ప్రాంతమ్దు విజు సెద్రితె.

యేసు నండొండారిజ్ నెగెండ కిజినాన్

38 యేసు యూదురి మీటిజ్ ఇండ్రొణాజ్ నిజితండ్రె, సిమొను వన్ని ఇండ్రొ సాహాన్. అయావలె వన్ని మీమ్సి నండో నోబు దాన్ మహాద్. దనిజ్ నెగెణ్ కిఅ ఇజి వారు బతిమాలతార్.

39 అందెజె వాండ్రు దని డగ్గు సాహండ్రె, “నోబు సాన్అ”, ఇజి డటం వెహ్సాన్. డటం వెహ్సాజ్ నోబు దనిజ్ డిఃస్త సాహాద్. వెటనె అది నిజితాదె, వరిజ్ మర్యాద కితాద్.

40 పొదు అర్చి మహాద్. అయావలె లోకుర్ నండో రకమ్కాణిజ్ బాద ఆజి మహి వరిజ్ విజెరిజ్ వన్ని డగ్గు తతార్. కస్టమ్దాన్ మహి వరి విజెరె ముస్సు కికు ఇడ్డి వరిజ్ నెగెణ్ కితాన్.

41 యాకదె ఆవండ, నండొ దెయమ్కు, నీనె దేవుణు మరిసి, ఇజి గగోల్ ఆజి నండొండారిజ్ డిఃస్త సాహె. వాండ్రు అలెజి మండ్రు ఇజి వన్నాజ్ డటం వెహ్హాన్. వాండ్రు క్రిస్తు ఇజి దెయమ్కు నెస్త మహె. అందెజె వాండ్రు వన్నాజ్ వర్దివండ కిత్తాన్.

42 పెందాల్నె వాండ్రు సోతాండ్రె బీడిఃమ్ బూమిదు సాహాన్. లోకుర్ వన్నాజ్ రెబాజి వాతార్. వన్నాజ్ సుడఃతిజ్ వాండ్రు వరిజ్ డిఃసి సాన్ఎండ, వన్నాజ్ ఆప్ కిదెజ్ సుడఃతార్.

43 గాని వాండ్రు, “నాను మహి పట్టుమ్కాజ్ బా దేవుణు ఏలుబడిః కిని కాలం వందిజ్ సువార్త వెహ్హాజ్వలె. దిని వందిజ్ దేవుణు నజి పోక్తాన్”, ఇజి వరిజ్ వెహ్హాన్.

44 వెన్నా వాండ్రు యూదయ దేనమ్దు మని యూదురి మీటిజ్ ఇల్కాజ్ బోదిసి మహాన్.

5

యేసు సిసూరిజ్ కూక్కినాన్

1 ఉండ్రె రోజు, యేసు గనెనరెతు నెరుడగ్గు నిహమహాన్. నండొ లోకుర్ దేవుణు మాటెజ్ వెండ్రెజ్ నెకెఆజి వన్ని ముస్సు అర్ని మహార్.

2 నస్తెవలె జాలెరిజు నెరు దరిద్ డిఃస్తి మహి రుండి డోణిజ్ వాండ్రు సుడఃతాన్. ఆయా జాలెరిజు వరి వల్లెజ్ నొర్జి మహార్.

3 వాండ్రు దని లోఇ ఉండ్రె డోణిద్ ఎక్తాన్. ఆక సిమెనుతి. ఎక్తాండ్రె దరిదాన్ కండెక్ నెక్తు ఇజి వన్నాజ్ వెహ్హాన్. వాండ్రు డోణిద్ బస్తాండ్రె నండొ లోకాజ్ నెస్సిసి మహాన్.

4 వాండ్రు వెహ్హి వీజితివలె, సిమెనుజ్, “ఏరు నిరి మని బాన్ డోణి నడిఃపిన్అ. మెయెజ్ అస్తెజ్ మీ వల్లెజ్ విసిర్తు”, ఇహాన్.

5 అందెజె సిమెను, “ఓ బోదకినికి, రెయు విజు మాపు అరల ఆతాప్. గాని మజి ఇనికబా దొహ్కుతె. అహిజ్బా నీను వెహ్హిని మాట వజ వల్లెజ్ పొక్నా”, ఇజి వన్నాజ్ వెహ్హాన్.

6 వారు అయాలెకెండ కిత్తార్. నండొ మెయెజ్ అస్తార్. వరివల్లెజ్ కింజిని వజ ఆతె.

7 అయావలె వారు వేరె డోణిద్ మని, వరి జత్త కూడఃజి పణికిని వరిజ్, “వాజి మజి తోడుః కిదు”, ఇజి కియు సయన కిత్తార్. వారు వాతారె, రుండి డోణిజ్ మెయెజ్ నిహ్తార్. డోణిజ్ ముడుగ్గులెకెండ ఆతె.

8 సీమెను ఇని పేతురు యాక సుడఃతాండ్రె, యేసు కాల్యు ఎద్రు ముణుకుజ్ ఊరితండ్రె, “ప్రబువా, నజి డిఃసి సాన్అ, నాను పాపం కితికాన్”, ఇజి వెహ్హాన్.

9 ఎందానిజ్ ఇహిజు, వాండ్రుని వన్నివెట మనికార్ విజెరె వారు అస్తి యా మెయెజ్ కొట్టు సుడఃతారె నండొ బమ్మ ఆతార్.

10 అయలెకెండెన, సీమెనువెట కూడఃజి పణి కిని యాకోబు ని యోహానుబా బమ్మ ఆతార్. వారు జెబదయ మరిసిర్. అందెజె యేసు, “తియెల్ఆమా. నిసా కాలం నీను మెయెజ్ అస్తి పణికితి. ఏలు లోకాజ్ నా సిసూర్కిదెజ్ నెన్పిస్సాలె”, ఇజి సీమెనుజ్ వెహ్హాన్.

11 వారు వరి డోణిజ్ నెరు ఒడ్డుదు తత్తారె, విజు డిఃస్తార్. వన్నివెట సాహార్.

కుస్తురోగం ఆతివన్నిజ్ నెగెండ కిజినాన్

12 యేసు ఉండ్రీ పట్టమీదు మహివలె కష్టురోగం* ఇనిపెరి జబ్బు లావుఆతి ఒరెన్ అబ్బె మహాన్. వాండ్రు యేసుజ్ సుడేతివెలె ముణుకుజ్ ఊరీజి మాడిస్తాండ్రె, “ప్రబువా, నాను నెగెండ్ ఆదెజ్ ఇజి నిజి మన్ను మహిజ నజి నెగెన్ కిదెజ్ అట్టి”, ఇజి బతిమాలతాన్.

13 అందెజె యేసు వన్నికియు సాప్పి వన్నిజ్ ముట్టి, “నజి మన్ను మనాద్, నీను నెగెన్ ఆఅ”, ఇజి వెహ్తాన్. వెటనె వన్నిజ్ మహి అయా కష్టురోగం వన్నిజ్ డిస్తాద్.

14 యేసు వన్నిజ్, “ఎయె వెటబా ఇనికబా వెహ్తా. గాని నీను తినాజ్ సాన్ని నీ ఒడోల్ పుజెరిజ్ తోరిన్అ. నీను నెగెన్ ఆతి వందిజ్ మోసె ముజాలె ఆడ్రనీతి వజ దేవుణుదిజ్ సంత సిఅ. ఆహె నీను నెగెన్ ఆతి ఇజి లోకురిజ్ తోరిన్అ”, ఇజి కనీతం వెహ్తా పోక్తాన్.

15 గాని వన్ని వందిజ్ మాటెజ్ మరి ఒదె, నాహ్కాజ్ విజు సెద్రితె. అందెజె నండో లోకుర్ వన్నిమాటెజ్ వెండ్రెజ్, వరి కష్టమకాణిజ్ నెగెన్ ఆదెజ్ ఇజి వన్నిడగ్రు కూడేజి వాజి మహోర్.

16 గాని వాండ్రు, నడిమి నడిమి పార్దనం కిదెజ్ ఇజి ఎయెర్ సిల్లి బాడిదు సాన్ని మనాన్.

కిక్కు కాల్కు అర్తివన్నిజ్ నెగెండ్ కిజినాన్.

17 ఉండ్రీ నాండిజ్, యేసు ఉండ్రీ ఇండ్రోబసి బోదిసి మహాన్. గలీలయ, యూద దేసమీదు మన్ని విజు నాహ్కాణిజ్, యెరూసలెమ్దాన్ వాతి పరిసయరుని యూదురి రూలు నెస్పిస్పికార్ అబ్బె బసి వెంజి మహోర్. కష్టమీదు మన్నివరిజ్ నెగెన్ కిదెజ్ దేవుణునిత్తి సత్తు వన్నివెట మనాద్.

18 నస్సివలె, కిక్కు కాల్కు అర్తి పక్కువాయు ఇని జబ్బుది వన్నిజ్, సెగొండో ఉండ్రీ సాపాద్ పిండిత తత్తార్. లోఇబసి యేసు ఎద్రు ఇడదెజ్ నండో అర్ల ఆజి మహోర్.

19 అబ్బె మందలోకుర్ మహిజ్, వన్నిజ్ యేసు డగ్రు ఒతెజ్ అట్ఎతార్. అందెజె వారు వన్నిజ్ ఇల్లు మున్ను ఒతార్. ఒతారె, రేకం బోరో కితారె సాపదాన్ మంద నడిమి యేసు ఎద్రు డిప్తార్.

20 యేసు వన్నిమున్ను మన్ని వరి నమకం సుడేతాండ్రె, “కూలాయెన్, నీ పాపమకు నాను సెమిస్త మన్ను”, ఇజి వన్నిజ్ వెహ్తాన్.

21 అయావలె పరిసయరు ని యూదురి రూలుజ్ నెస్పిస్పికార్ వరి లోఇ ఈహు వర్గితార్. “వీండ్రు ఎయెన్? నాను నీ పాపమకు సెమిస్త మన్న ఇజి వెహ్సి దేవుణు వెట సమానం ఆజి దేవుణుదిజ్ దూసిస్సాన్. దేవుణు ఒరెండ్రె పాపమకు సెమిస్పికాన్ గదె”, ఇజి.

22 వారు ఒడేబితిక యేసుజ్ తెలితాద్. వాండ్రు వరిజ్, “ఎందనిజ్ మీరు అహు మీ మన్నుదు ఒడేబిజినిదెర్?

23 యా జబ్బుది వన్నిజ్ నీ పాపమకు నాను సెమిస్త మన్న ఇజి వెహ్సిక సులునా? నీను నిజ్జి నడియ ఇజి వెహ్సిక సులునా?

* 5:12 5:12 కిక్కుజ్ పాదమకాజ్ డెస్కెజ్ తెవ్జి సాని పెరిజబ్బునె ముజాల కుష్టురోగం జబ్బు వాతిబాన్ ముట్టిజ వారు నెన్వేర్ ముజాల కుష్టురోగం మన్నికార్ నాటో మండ్రెజ్ అక్కుసిల్లెద్ వారు పట్టుం వెల్లి మండ్రెజ్ వారు సుబ్బురం ఆఇకార్ మటిల ఆతికార్ఇజిన ఒడిబినార్ అందెజె, వారుపుజెరిజ డగ్రు సాన్నినెగెండ్ ఆతార్ ఇజి పుజెరిబు వెహ్సిజానె నాటో వాదెజ్ ఆనాద్. అయవలె వారు సుబ్బురం అతమనార్ ఇజినె నమకం

24 లోకు మరిసి ఆతి నజీ లోకు పాపమ్కు సెమిస్తైజ్ బూమి ముస్కు అతికారం మనాద్ ఇజి మీరు నెస్తైజ్వలె ఇజి వెప్తాండ్రె, అయా కికు కాల్కు అర్తి పక్వవాయు వన్నిజ్, “నాను నిజీ వెహ్సిన, నిజ్జి సాప అసి ఇండ్రో సాన్అ”, ఇజి వెప్తాన్.

25 వెటనె వాండ్రు విజెరె ముజాలె నిజీతండ్రె, వాండ్రు గూర్తి మని సాప నిక్తాండ్రె దేవుణుదిజ్ పొగిడిజి ఇండ్రో సాహాన్.

26 వారు విజెరె నండో బమ్మ ఆతారె, దేవుణుదిజ్ పొగిడితారె. వారు దేవుణుదిజ్ నండో తియెల్ ఆజి, “అబ్బు! మాటు నేండ్రు నండో బమ్మఆతి వణిజ్ సుడతాట్”, ఇజి వెప్తాన్.

లేవి ఇన్ని ఒరెన్వన్నిజ్ కూక్సినాన్

27 యాక కిత్తి వెన్కా, యేసు సోతాండ్రె, లేవి ఇని ఒరెన్ పన్ను పెర్నివన్నిజ్ సుడతాన్. వాండ్రు పన్ను పెర్ని వరి ఆపిసుదు బస్త మహాన్. యేసు వన్నిజ్, “నీను నా సిసూడు ఆఅ. నా వెట రఅ”, ఇజి వెప్తాన్.

28 లేవి విజు డిస్తాండ్రె, నిజ్జి వన్ని వెట సాహాన్.

29 వెనుక లేవి యేసు వందిజ్ వన్ని ఇండ్రో ఉండ్రీ పెరి విందు కితాన్. పన్ను పెర్నికారని మరి నండోండో వరి వెట ఉండ్రేబస్తారె.

30 అయావలె పరిసయరు ని వరి జటుద్ మని యూదురి రూలుజ్ నెస్పిన్సికార యేసు సిసూరిజ్, “ఎందనిజ్ మీరు పన్నుపెర్నివరివెట, మరి నెజ పరివెట ఉణిజి తింజినిదెర్”, ఇజి మొరొ ఆతారె.

31 అందెజె యేసు వరిజ్, “నెగెండ సిల్లి వరిజె డాక్టరు కావాలి. నెగెండ మన్నివరిజ్ ఎందనిజ్లు మరి డాక్టరు.

32 నాను పాపం కిజిని వరిజ్ కూక్సిన, వరి పాపమ్కు వారు ఒప్పుకోడిజి డిన్పిసిని వందిజ్ వాత మన్న. మాపు నీతినిజాయితి మనికాప్ ఇజి ఒడతబిని వరిజ్ కూక్తజ్ రవ”, ఇజి వెప్తాన్.

ఉపాస్వందిజ్ యేసుజ్ వెన్బాజినార్

33 అయావలె, పరిసయరుని వరి జటుద్మని యూదురి రూలు నెస్పిన్సికార వన్నిజ్, “యోహాను సిసూర్ డిసిడిస్ఎండ ఉపాస్ కిజి పార్లనం కిజినార్. అయలెకెండెనె పరిసయరు సిసూర్బా. గాని నీ సిసూర్ ఉణిజి తింజి మంజినార్”, ఇజి వెప్తాన్.

34 అందెజె యేసు, “పెండ్లి దజడః పెండ్లి కూలెజవెట మన్నివెలె వారు ఉపాస్ కిజినారా?

35 పెండ్లి దజడఃజ్ వరి నడిమిహాన్ ఒని రోస్కు వాలెలె. అయావలె వారు ఉపాస్ అయా రోస్కాజ్ మంజినార్”, ఇజి వెప్తాన్.

36 వాండ్రు వరిజ్ కతవజ ఉండ్రీ నెస్పిస్తాన్. “ఎయెన్బా కొత్త సొక్కడాన్ ఉండ్రీ ముక్క కిసి పడాఃయి దనిజ్ పొక్ఎన్. అయాలెకెండ కితిజ, వాండ్రు కొత్త సొక్క కిన్పిస్తాన్. కింజితి కొత్త ముక్క పడాఃయి దనిజ్ తగ్వద్.

37 మరి, ఎయెన్బా కొత్త ద్రాక్సకల్లు పడాఃయి తోలు సన్నిదు వాక్వన్. అయాలెకెండ వాండ్రు వాక్కిజ కొత్త ద్రాక్సకల్లు పొజువాజి అయా తోలుసన్ని పెడెల్నాద్. ద్రాక్సకల్లు విజు వాజ్న సానాద్. సన్నిపాడానాద్.

38 అందెజె కొత్త ద్రాక్సకల్లు కొత్త తోలు సన్నిదు వాక్తజవెలె.

39 ఎయెస్ బా పడాయి ద్రాక్షకల్లు ఉటివెనుక కొత్తక కోరిఎన్. ఎందానిజ్ ఇహిజ, 'పడాయిక నెగ్గిక', ఇజి వెహ్నాన్".

6

1 ఉండ్రీ విస్త్రాంతి దినమ్ దు యేసుని వన్ని సిసూర్ పంట గుడ్డెదాన్ సొన్ని మహార్. అయావలె వన్ని సిసూర్ సెరెక్ తెప్తారె, వరికీదాన్ నులుసి, తింజి మహార్.

2 నస్తివలె సెగొండార్ పరిసయరు, "ఎందనిజ్ మీరు దేవుణు మోసెజ్ సెతి రూలుజ్ తప్పినివణి విస్త్రాంతి దినమ్ దు కిజినిదెర్?", ఇజి వెన్ బాతార్.

3 అయావలె యేసు, "దావీదురాజుని వన్నివెట మహికార్, బజ కట్టివెలె, ఇనిక కితాండ్రో ఇజి మీరు దేవుణుమాటదు ఎసెజ్ బా సద్ విఇతిదెరా?

4 వాండ్రు ఇనిక కితాన్ ఇహిజ, దేవుణుగుడిదు డుగితాండ్రె దేవుణు ఎద్రు ఇడ్డి రొట్టెజ్ లాగితండ్రె తిహన్. పుజెరిజ్ తప్ప మరి ఎయెర్ బా అయాకెజ్ తిండ్రెజ్ ఆవద్. గాని వాండ్రు తిహండ్రె వన్నివెట మన్నివరిజ్ బా సిత్రాన్.

5 అందెజె లోకుమరిసి ఆతి నజీ విజు వన్కాజ్ మున్కు అతికారం మనాద్. మరి, విస్త్రాంతి దినమ్ దు ఇనిక కిదెజ్ ఇజి లోకాజ్ వెహ్నెజ్ బా అతికారం మనాద్", ఇజి వరిజ్ వెహ్నాన్.

6 ఉండ్రీ నాండిజ్ విస్త్రాంతి దినమ్ దు, యూదురి మీటిజ్ కిని ఇండ్రో సొహండ్రె, నెస్సిసి మహాన్. అబ్బె ఉజెర్ కియు అర్కికాన్ ఒరెన్ మహాన్.

7 పరిసయరు ని యూదురి రూలుజ్ నెస్సిస్సికార్, యేసుజ్ ఇన్ని దనిజ్ బా నేరం మొప్పెజ్ ఇజి సుడేజి మహార్. అందెజె, యేసు యా జుబుది వన్నిజ్ విస్త్రాంతి దినమ్ దు నెగెణ్ కినాండ్రో ఇజి బాగ సుడేజి మహార్.

8 అహిజ, యేసు వారు ఒడేబిజినిక నెస్తాండ్రె, కియు అర్తి వన్నిజ్, "నీను వాజి విజెరె నడిమి నిల్ అ", ఇజి వెహ్నాన్. అయావలె వాండ్రు నిజితండ్రె అబ్బెనిహాన్.

9 అయావలె యేసు వరిజ్", నాను మిజి వెన్ బాజిన, దేవుణు మోసెజ్ సెతి రూలుజ్ వజ, విస్త్రాంతి దినమ్ దు నెగ్గి పణిజ్ కిదెజా, సెఇ పణిజ్ పణి కిదెజా? పాణమ్ దిజ్ నిల్ ప్తెజా, పాణమ్ దిజ్ అర్ ప్తెజా?", ఇజి వెన్ బాతాన్.

10 వెన్ బాతాండ్రె వరిజ్ విజెరిజ్ బస్తాండ్రె, అయా కియు అర్తి వన్నిజ్, "నీ కియు సవ్ అ", ఇజి వెహ్నాన్. వాండ్రు ఆహె కితాన్. వన్ని కియు నెగెణ్ ఆతాద్.

11 అయావలె వారు వెర్రి కోపమ్ దాన్ నిండ్రెతారె, యేసుజ్ ఇనిక కిదెజ్ ఆనాద్ ఇజి ఒరెనిదిజ్ ఒరెన్ వర్గితార్.

పన్నెండు మణిసిర్ సిసూర్

12 ఆ దినమ్ కాజ్ ఉండ్రీ నాండిజ్ యేసు పార్లనం కిదెజ్ ఇజి గొరొత్ సొహాన్. సొహండ్రె ఆ రెయ్తూ విజు దేవుణుదిజ్ పార్లనం కిత్రాన్.

13 పెందాల్ ఆతివెలె వాండ్రు వన్ని సిసూర్ జు కూక్తాండ్రె, వరిలోఇ పన్నెండు మణిరిజ్ ఏర్ పాటు కిత్రాన్. వరిజ్ అప్పొస్తుడు ఇజి కూక్తాన్.

14-16 వీరు ఎయెర్ ఇహిజ, పేతురు ఇజి వాండ్రు పేరు ఇడ్డి సిమొను, వన్ని తంబెర్ని ఆతి ఆంద్రెయ, యాకోబు, యోహాను, పిలిపు, బర్తలోమాయి, మత్తాయి, తోమా, అల్ పాయి మరిసి ఆతి యాకోబు, యూదయ దేసెం వందిజ్ ఉసార్ ఆజిని సిమొను*,

* 6:14-16 6:14-16 రోమది ఏలుబడిదాన్ యూదయ దేసెం దిజ్ విడుదల కిదెజ్ ఉసార్ దాన్ సుడిజిని యూదయ సజం మనాద్. అయాసజమ్ దికాన్ ఒరెనె సిమొను

యాకోబుజ్ మరిసి ఆతి యూద, ఇస్కరియొతు యూద. యా ఇస్కరియొతు యుదనె, వెన్నా యేసుజ్ యూదురు అతికారిజ కీదు ఒపజెప్తికాన్.

17 వాండ్రు యా పన్నెండు మణిసిర్ సిసూర్వెట డిఃగిజి వాతండ్రె, ఉండ్రె బయిలుదు నిహన్. వన్ని సిసూరు నండొండార్, యూదయ దేసమ్దు మని విజు నాహ్మణికార్, యెరూసలెమ్దాన్, సమ్దరం పడఃకాద్మని తూరు, సిదొను పట్టుమ ప్రాంతమ్కాజ్వాతి నండొ లోకుర్ అబె మహార్. వారు వన్ని మాటజ్ వెండ్రెజ్, వరిజ్ మన్ని కస్టమ్కు సొన్పె ఆదెజ్ ఇజి వాతార్.

18 దెయమ్కు అస్తి నండొ బాద ఆజి మహికార్ నెగెణ్ ఆతార్.

19 దేవుణు సత్తు వన్నిబాణిజ్ వాజి విజెరె నెగెణ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆస ఆతార్.

20 అయావలె వాండ్రు వన్ని సిసూర్జ నుడఃతాండ్రె, ఈహు వెప్పొనాన్. “బీదదికార్ ఆతి మీరు గొప్ప వారు. ఎందనిజ్ ఇహిజ, దేవుణు మిజి ఏలుబడిః కిజినాన్.

21 ఏలు బజ సాజిని మీరు గొప్ప వారు. ఎందనిజ్ ఇహిజ, దేవుణు మిజి కావాలస్తెకెజ్ మీ మన్ను నిండ్రు సీనాన్. యేలు అడఃబాజిని మీరు గొప్ప వారు. ఎందనిజ్ ఇహిజ, మీరు సిక్కిదెరై.

22 లోకు మరిసి ఆతి నజి నమ్మితి వందిజ్ లోకుర్ మిజి దూసిసి కేట కినార్. నిందెజ్మొప్పి నీను సెఇక ఇజి వెప్పొ నెక్కు పొక్కార్. అయావలె మీరు గొప్ప వారు.

23 నిన్ని కస్టమ్కు వానివలె సర్ద ఆజి డాట్తు. ఎందనిజ్ ఇహిజ, దేవుణు మంజిని బాడిఃదు మిజి మన్ని పలితమ్కు గొప్ప నండొ మనె. యా లెకెండెనె, మిజి బాద కిజిని విరి అనిసిర్, వరి కాలమ్దు మహి ప్రవక్తెజ బాద్ద కిత్తార్.

24 గాని, ఓ అస్తిమనికిదెరా, అబాయా మిజి ఎసొ గొప్ప బాదెజ్ వానెలె. ఎందనిజ్ ఇహిజ, మిజి విజు నుకం దొహ్క మనాద్.

25 ఏలు పొట పంజు ఉణిజినికిదెరె, అబాయా మిజి ఎసొ గొప్ప బాదెజ్ వానెలె. మీరు బజ సానిదెర్లె. యేలు సిక్కినికిదెరె. అబాయా మిజి ఎసొ గొప్ప బాదెజ్ వానెలె. మీరు ధుకం కిజి అడఃబానిదెర్లె.

26 లోకు విజెరె మీ వందిజ్ నెగ్గికెజ్ వెప్పొ వెలె, అబాయా మిజి ఎసొ గొప్ప బాదెజ్ వానెలె. ఎందనిజ్ అయలెకెండెనె వరి అనిసిర్ అబద్దం వర్గిని ప్రవక్తెజబా కిత్తార్.

ప్రేమ వందిజ్ వెప్పొనాన్

27 నా మాటెజ్ వెంజిని మిజి నాను వెప్పొన, మీ పగాతివరిజ్ ప్రేమిస్తు. మిజి దూసిస్సివరిజ్ నెగ్గికెజ్ కీదు.

28 మిజి సాయెవ్ సీని వరిజ్, “దేవుణు మిజి నెగ్గికెజ్ సిపిన్”, ఇజి దీవిస్తు. మిజి బాదెజ్ కిని వరి వందిజ్ పార్దనం కీదు.

29 ఎయెన్బా మిజి ఉండ్రె లెపాద్ డెఃయితిజ, మరి ఉండ్రె లెప బా తోరిస్తు. ఎయెన్బా మీరు వ్డెఃగితి మని సాల్య ఒతిజ, వన్నిజ్ మీ సొక్కబా సీఅ.

30 మిజి లొస్సివరిజ్ విజెరిజ్ సీదు. మీ సొంతతిక పెర్ది ఒసిని వరిజ్ ఆక మరి లొస్మాట్.

31 లోకుర్ మిజి ఎలాగ కిదెజ్ ఇజి మీరు కోరిజినిదెరొ అయాలెకెండె మీరు వరిజ్ కీదు.

32 మిజి ప్రేమిస్సివరిజె మీరు ప్రేమిస్తిజ, దేవుణు మిజి ఇనాయం సీనాన్ ఇజి ఒడిఃబిజినిదెరా?. పాపం కినికార్బా వరిజ్ ప్రేమిస్సి వరిజ్ ప్రేమిస్సార్.

33 మిజీ నెగ్గికెజ్ కినివరిజె మీరు నెగ్గికెజ్ కితిజ, దేవుణు మిజీ ఇనాయం సీనాన్ ఇజి ఒడిబిజినిదెరా? పాపం కినికార్బా ఆహె కిజినార్.

34 అప్పు మర్జి సీనార్ ఇజి నెస్సివరిజె మీరు సితిజ, దేవుణు మిజీ ఇనాయం సీనాన్ ఇజి ఒడిబిజినిదెరా? పాపం కినికార్బా ఆహె కిజినార్. వారు సితికెజ్ విజు మర్జి సీనార్ ఇజి ఒడిబిజి పాపం కిజిని వరిజ్ సిజినార్.

35 గాని మీరు మీ పగ్ ఆతి వరిజ్ ప్రేమిస్తు. వరిజ్ నెగ్గికెజ్ కిదు. మర్జి సీనార్ ఇజి ఆస సిల్లెండ, అప్పు సీదు. అయావలె మిజీ నండో ఇనాయమ్కు ఆనెలె. మీరు విజు దనిజ్ అతికారం మని దేవుణు మరిసిర్ ఆనిదెర్. ఇహిజ, మీరు వాండ్రు కినిలెకెండ కినిదెర్. ఎందనిజ్ ఇహిజ, దేవుణు మేలుదిజ్ నెన్ఇవరిజ్బా సెఇ పణిజ్ కిని వరిజ్బా దయ తోరిస్సాన్.

36 మీ బుబ్బు ఆతి దేవుణు ఎలాగ కనికారం ఆతికాండ్రో అయావజ మీరుబా మండ్రు.

తీర్పు కిదెజ్ ఆవిద్

37 ఒరెన్ వన్ని ముస్కు వెహ్మాట్. అయ లెకెండ దేవుణు మీ ముస్కు వెహ్ఎన్. లోకు కిని వన్కాజ్ మీరు తీర్పు కిమాట్. అయాలెకెండ మీ ముస్కు దేవుణు తీర్పు కిఎన్. లోకుర్ మిజీ బాదెజ్ కితిజ, మీరు మర్జి కివిండ వరిజ్ డిజిస్తు. అయాలెకెండ దేవుణు మిజీ డి:స్సాన్లె.

38 మహి వరిజ్ సీదు. దేవుణు మిజీ సీనాన్లె. మిజీ నండో సీనాన్లె. తిగ్జి, కుదిలిసి, వజ్జి సాని లెకెండ మీ ఒడిద్ సీనాన్లె. మీరు కొలిజి సితివజనె మిజీ దోహ్కాద్లె.

39 నస్తివలె వాండ్రు కత వజి యాక నెన్పిస్తాన్. అయాక ఇనిక ఇహిజ, “ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్తెజ్ అట్నాండ్రా? తోరిస్తెజి, వారు రిఎర్బా గాతదు అర్నార్గదె?

40 సద్వినికాన్ నెన్పిన్ ని వన్నిముస్కు పెరికాన్ ఆవిన్. గాని నదు పూర్తి నెస్తికాన్ ఎయెన్బా వన్నిజ్ నెన్పిస్తి వన్నివజి మంజినాన్.

41 మీ కణకాదు మన్ని తూలం నన్నిక సుడెవిండ మీ తంబెరిజి కణకాద్ మన్ని కాసరాదిజ్ ఎందానిజ్ బేసిని?

42 నీ కణకాదు మన్ని తూలం నన్నిక లాగ్ఎండ, మీ తంబెరిజ్, ‘ఓ తంబెరి నీ కణకాదు మన్ని కసరాదిజ్ లాగ్న’, ఇజి ఎలాగ వెస్తాజ్ ఆనాద్. వేసం కినికిదెర్, మీ సొంత కణకాదు మన్ని తూలం ననిక ముజాలె లాగ్దు. అయావలె మీ తంబెరిజి కణకాద్ మన్ని ఇజిరి కసరాదిజ్ నెగెండ సుడిజి లాగ్దెజ్ అట్టి.

43 నెగ్గి మరాత్ సెఇ పట్టు అన్ఉ. అయాలెకెండ సెఇ మరాత్ నెగ్గి పట్టు అన్ఉ.

44 విజు మరెకాజ్బా పట్టు సుడెజి నెస్తెజ్ ఆనాద్. ఎయెర్బా బోడె: పట్టు సాప్పు తుపెజాణిజ్కొయిఎర్. అయాలెకెండ ద్రాక్కు పట్టు బా సాప్పు లటదాన్ కొయిఎర్.

45 నెగ్గి మన్ను మన్నివన్నిజ్ కూలిజ్ కొట్టు కిత్తి మన్నిలెకెండ వన్ని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజ్ వానె. సెఇ మన్ను మన్నివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజ్ వానె.

46 నాను వెష్టి మాటెజ్వజి మీరు కివిండ మరి మీరు ఎందనిజ్ ప్రబువా, ప్రబువా ఇజి నజి కూక్కినిదెర్?

47 నా డగ్రువాజి నా మాటెజ్ వెంజి అయావజి కినికాన్ ఎయెరిజ్ పోలిత మనాండ్రో ఇజి నాను నెన్పిసిన.

48 వాండ్రు పునాది నిరీడ్ కార్సి సట్టుముస్కు పునాది కితాండ్రె ఇల్లు తొహ్ని వన్ని లెకెండ్ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్బా అది అరెవతాద్. ఎందనిజ్ ఇహిజు, అది నెగ్రెండ తొహె ఆత మనాద్.

49 గాని నా మాటెజ్ వెంజిబా అయావజు కిఇకాన్, బూమి ముస్కు పునాది పొక్ఎండ ఇల్లు తొహ్ని వన్ని లెకెండ్ మనాన్. పెరిగడ్డ డెయితిజ్ సణమె అయా ఇల్లు అర్తాద్. ఇల్లు పూర్తి పాడాతాద్.

7

1 వాండ్రు వెహైజ్ మన్నిమాటెజ్ విజు లోకురిజ్ వెన్పిసి వీస్తాండ్రె, కపెర్నహుము ఇన్ని పట్టుమదు వాతాన్.

2 అబ్బె రోమ సయినమదిజ్ నదాతిపతి* ఒరెన్ మహాన్. అతికారిజ్ నండో ఇస్తం ఆతి ఒరెన్ వెట్టిపణి కినికాన్ వన్నిజ్ మహాన్. వాండ్రు జబు లావు ఆతాదె నాదెజ్ డగ్రు ఆత మహాన్.

3 అయా అతికారి యేసు వందిజ్ వెహాండ్రె, సెగొండార్ యూదుర్ పెద్దెల్జు వన్ని డగ్రు పోక్తార్. ఎందనిజ్ ఇహిజు, వాండ్రు వాజి వన్ని వెటి పణి కిని వన్నిజ్ నెగెణ్ కిదెజ్ ఇజి.

4-5 వారు వన్ని డగ్రు వాతారె, “యా అతికారి మా లోకాజ్ నండో ప్రేమిస్తాండ్రె మజి మీటిజ్ కిదెజ్ ఇజి ఇల్లు తొహిస్త సితాన్. అందెజె నీను వాజి వన్ని వెటి పణిమణిసిజ్ నెగెణ్ కిదెజ్ వాండ్రు తగ్గికాన్”, ఇజి మరి మరి బతిమాల్తారె.

6 అందెజె యేసు వరివెట సాహాన్. వాండ్రు ఇల్లు డగ్రు వాతాన్. అయావలె నతాదిప కూలెజు, “మీరు యేసు బాన్ సొన్ని ఈహు వెహ్తు, “ప్రబువా, నీను వందమా. నా ఇండ్రో నీను వాదెజ్ నాను ఏపటితికాన్ అవి.

7 గాని నెగెణ్ ఆఅ ఇన్ని నీ మాటదాన్ నా వెట్టిపణి మణిసి నెగెండ్రె ఆనాన్లె, ఇజి నాను నెసిన్.

8 ఎందానిజ్ ఇహిజు, నా ముస్కు అతికారం మనికార్ మనార్. నా అడిగి ఉద్దం కినికార్ మనార్. నాను ఒరెన్ వన్నిజ్ సొన్అ ఇహిజు సొనాన్. మరి ఒరెన్ వన్నిజ్ రఅ ఇహిజు, వానాన్. నా పణిమణిసిజ్ యాక కిఅ ఇహిజు కినాన్”, ఇజి వెహ్తాండ్రె పోక్తాన్.

9 యేసు యా మాటెజ్ వెహాండ్రె, వన్ని వందిజ్ బమ్మ ఆతాన్. వాండ్రు వన్ని వెట వాతిమన్ని లోకుదరిజ్ మహ్తాండ్రె, “అబ్బె, ఇస్రాయేలు లోకుర్ లోఇబా విన్నిజ్ మన్ని నమకం లెకెండ్, నమకం మని ఒరెన్ వన్నిజ్బా నాను సుడెవత ఇజి మీ వెట నాను వెహ్నిన్”, ఇజి వెహ్తాన్.

10 వన్నిబాన్ వాతివరిజ్ యేసు మహ్తా పోక్తాన్. వారు ఇండ్రో సాహరె, నెగెణ్ ఆతి వెటిపణి మణిసిజ్ సుడెతారె.

సాతి వన్నిజ్ బత్తిస్నాన్

11 యాక కితి వెన్కా, యేసు నాయి ఇని పట్టుమదు సొన్ని మహాన్. వన్ని సిసూర్ని మంద లోకు వన్నివెట కూడెజి సొన్ని మహార్.

12 వాండ్రు పట్టుం వెల్గు డగ్రు వాతివెలె సాతికాన్ ఒరెన్ వన్నిజ్ సోప్తారె, సెగొండార్ పిండిజి ఒసి మహార్. సాతికాన్ అయ్సిజ్ ఒరెండ్రె మరిసి. అది ముండ బోదెలి. పట్టుమది మంద లోకుర్ దన్నివెట మహార్.

* 7:2 7:2 వంద విద్దెం కినివరిజ్ నడిపిసినికాన్.

13 ప్రబు ముండ బోదెల్దిజ్ సుడఃతివెలె, వన్ని పాణం నొతాద్. అడఃబామా', ఇజి దన్నిజ్ వెప్తాన్.

14 వాండ్రు డగ్రు వాతండ్రె, జజుద్ ముట్టిజ్, పిండిజి ఒసి మహికార్ నిహార్. యేసు సాతి వన్నిజ్, "ఓ దజడః, నాను నిజి వెహ్సిన, నిజ్అ ఇజి", ఇజి వెప్తాన్.

15 అయావలె సాతికాన్ నిజ్జి బస్తాండ్రె, వర్గిదెజ్ మొదొల్స్తాన్. యేసు, వన్నిజ్ అయ్సిజ్ ఒపజెప్తాన్.

16 వారు విజెరె బమ్మ ఆజి తియెల్ ఆతార్. "ఒరెన్ పెరి ప్రవక్త మా నడిఃమి వాతాన్. వన్ని లోకురిజ్ సాయం కిదెజ్ దేవుణు వాతాన్", ఇజి వెప్తారె దేవుణుదిజ్ పొగిడిఃతార్.

17 యేసు వందిజ్ యా మాటెజ్ యూదయ దేసిం ని డగ్రు మని ప్రాంతమ్కాజ్ విజు సెద్రితె.

యేసుని యోహాను సిసూరు వర్గిజినార్.

18-19 బాప్తినం సీని యోహానుజ్ సిసూర్ యా జర్గితి పణిజి వందిజ్ యోహానుజ్ వెప్తార్. నస్తవలె వాండ్రు వరి లోఇహాన్ రిఎర్ సిసూర్జి కూక్తాండ్రె, "వానికి నీనెనా? సిలిజి, మాపు మరి ఒరెన్ వందిజ్ ఎద్రు సుడఃదెజా?", ఇజి ప్రబుజ్ వెన్బాదెజ్ యేసుడగ్రు పోక్తాన్.

20 వారు యేసుడగ్రు వాతారె, "నీనెనా వాజినికి? సిలిజి మాపు మరి ఒరెన్ వన్నిజ్ ఎద్రు సుడఃదెజా? ఇజి వెన్బాదెజ్ బాప్తినం సీని యోహాను మజి నీ డగ్రు పోక్తాన్", ఇహ్సార్.

21 అయావలెనె, యేసు జబ్బుదివరిజ్ బాదదాన్ మన్ని వరిజ్, దెయమ్కు అస్తి వరిజ్ నండొండారిజ్ నెగెణ్ కితాన్. నండొ గుడ్డిది వరిజ్ సూణిలెకెండొ కిత్రాన్.

22 అందెజె వాండ్రు వన్నిడగ్రు వాతివరిజ్, "గుడ్డిదికార్ సుడః ఆజినార్. సొటదికార్ నడిఃజినార్. కస్టమ్దికార్ ఇని పెరిజబ్బు మన్నికార్ నెగెణ్ ఆజినార్. బొయిరదికార్ వెంజినార్. సాతికార్ నికెఆజినార్. బీదాతివరిజ్ సువార్త వెహెఅజినాద్. ఇజి యాలెకెండొ మీరు సుడఃతికెజ్, వెంజినికెజ్ మర్రి సొన్ని యోహానుజ్ వెప్తా.

23 నా ముస్కు నమకం డిన్ఎండ మంజినికాన్ దేవుణు సీని దీవనమ్కు మంజినికాన్అనాలె", ఇజి వరిజ్ వెప్తాన్.

24 యోహాను సిసూర్ సొహి వెనుక, యేసు యోహాను వందిజ్ మంద లోకు వెట ఈహు వెప్తాజ్ మొదొల్స్తాన్. "ఇనిక సుడఃదెజ్ మీరు బీడిమ్బూమి ప్రాంతమ్దు సొహిదెర్? గాలిదిజ్ కర్లిజిని గడ్డిదిజ్ సుడఃదెజా?

25 సిల్లిజి, మరి ఇనిక సుడఃదెజ్ సొహిదెర్? మెతాని సొక్కెజ్ తొడిఃగితి మని ఒరెన్ వన్నిజ్ సుడఃదెజా? సిల్లె, నండొ దర మన్ని సొక్కెజ్ తొడిఃగిజి, సుకం బత్కినికార్ రాజురి ఇల్కాజ్ మంజినార్.

26 అహిజ, మీరు ఇనిక సుడఃదెజ్ సొహిదెర్? ఒరెన్ ప్రవక్తెజ్నా? ఒబ, ఒరెన్ ప్రవక్త ముస్కు పెరివన్నిజ్ సుడఃదెజ్ సొహిదెర్ ఇజి నాను మిజి వెహ్సిన

27 విన్నివందిజ్ దేవుణు మాటదు ఈహు రాస్త మనాద్, "ఇదిలో, నాను నా కబ్రుతనివన్నిజ్ నీ ముజాల పోక్కిన వాండ్రు నీ ముజాల నీ సరి నెగెణ్ కినాన్†".

28 బోదెకాజ్ పుట్టి వరిలోఇ యోహాను ఇంక పెరికాన్మరి ఎయెన్బా సిలెన్. గాని దేవుణు ఏలుబడిః కిని లోకుర్ లోఇ తగిసి కొటికాన్ యోహాను ముస్కు పెరికాన్ ఇజి నాను మిజి వెహ్సిన".

† 7:27 7:27 మలాకి 3:1.

29 యేసు వెహ్తాకెజ్ వెహరె లోకుర్ విజెరె పన్ను పెర్నికార్బా దేవుణు కిజినిక విజు నాయమ్దానె కిజినాన్ ఇజి లోకుర్ ఎద్రు ఒప్పుకోటార్. ఎందనిజ్ ఇహిజ, వారు యోహాను బాణిజ్ బాప్తినం లాగె ఆత మహార్.

30 గాని పరిసయరుని యూదురి రూలు నెస్పిస్నికార్ యోహాను సీని బాప్తినం లాగె ఆవతార్. వారు వరి వందిజ్ దేవుణు ఎతు కితి సజతి నెక్త పొక్తార్.

31 యా తరమ్ది లోకాజ్ నాను ఇన్ని దని దనటాన్ పోల్సి వెహ్తాజ్? వారు ఇని దనిజ్ పోలిత మనార్?

32 వారు, సతాదు బసి మంజి పెండ్లి ఇండ్రో ని సాతి ఇండ్రో జర్గిజిని దని వందిజ్ ఎత్తు కిజి కర్జిజిని కొడ్డోరిజ్ పోలిత మనాద్. అయా కొడ్డోర్ ఒరెన్ దిజ్ ఒరెన్ కూకె ఆజి ఈహు కర్జిజినార్. “మాపు పేరుడిః ఊహ్వాక్వాప్ గాని మీరు కర్జిఇతిదెర్. మాపు సాతి ఇండ్రోణి పాటెజ్ పార్తాప్ గాని మీరు అడఃబాఇతిదెర్”.

33 ఎందనిజ్ ఇహిజ, బాప్తినం సీని యోహాను మాముల్ బోజనం ఉణిజి, ద్రాక్కు కడు ఉణెఎండ వాతాన్. అందెజె మీరు, “వినిజ్ దెయం అస్తాద్”, ఇజి వెస్పినిదెర్.

34 లోకు మరిసిఆతి నాను ఉణిజి తింజి వాజినాన్. అందెజె మీరు ఇదిలో వీండ్రు టిండి కకుర్తికాన్, సోస్నికాన్, పన్ను పెర్నివరిజ్ పాపం కినివరిజ్ కూలాయెన్ ఇజి వెస్పినిదెర్.

35 గాని దేవుణుబాణిజ్ వాతి గెణం మనికార్ అయా గెణం నిజమాతిక ఇజి వరి విజు నెగ్గి పణిజాణిజ్ రుజుప్ కిజినార్.

పాపం కిత్తి బోదెల్దిజ్ సెమిసినాన్

36 పరిసయరు లోఇ ఒరెన్ వన్నివెట బోజనం కిదెజ్ యేసుజ్ కూక్తాన్. అందెజె యేసు పరిసయరు ఇండ్రో సాహండ్రె, వన్ని వెట బోజెనమ్దిజ్ బస్త మహాన్.

37 ఆ నాటో పాపం కిజి మహి ఉండ్రె బోదెలి మహాద్. యేసు పరిసయరు ఇండ్రో బోజెనమ్దిజ్ బస్త మహాన్ ఇజి నెస్తాదె, నూనాజ్ పణుకుదాన్; తయార్ కితి ఉండ్రె సీసాదు నెగ్గి వాసనం సీని నూనె తత్తాద్.

38 యేసు, కాల్కు వెన్కా మహ్తాండ్రె బస్త మహాన్కాక అది వెనక వన్ని పాదమ్క డగ్గు నిహాద్. నిహది అడఃబాజి మహాద్. అది దన్ని కణెర్దాన్ వన్ని పాదమ్కాజ్ ఊత్తతాదె దని కొపుదాన్ తెల్తాద్. వన్ని పాదమ్కాజ్ ముదు కితాదె వాసనం సీని జటమామ్సి నూనె రాస్తాద్.

39 వన్నిజ్ కూక్తి పరిసయి వాండ్రు యాక సుడఃతాండ్రె, వీండ్రు నిజం ఇక ఒరెన్ ప్రవక్త ఇహిజ, వినిజ్ ముట్టి బోదెలి ఎయిదో ఎలాగ మర్రికాదో ఇజి నెస్తాన్ మరి. ఎందనిజ్ ఇహిజ, ఇది పాపం కినికాద్, ఇజి మన్నుదు ఒడిఃబితాన్.

40 అందెజె యేసు, “ఓ సిమోను నీవెట ఉండ్రె మాట వెహ్తాజ్ మనాద్”, ఇజి వన్ని వెట వెహ్తాజ్, “బోదకినికి వెహ్తా”, ఇహాన్.

41 అయావలె యేసు”, ఒరెన్ అప్పు సితి వన్నిజ్ రిఎర్ అప్పు లోస్నికార్ మహార్. వరి లోఇ ఒరెన్ అయ్దు వందెజ్ వెండి రుపాయిజు మరి ఒరెన్ యాబయి వెండి రుపాయిజు సీదెజ్ మనాద్.

42 అప్పు తిర్నెజ్ వరిజ్ డబ్బు సిల్లెద్. అందెజె వరిజ్ రిఎరిజ్ బా డబ్బు లోన్ ఎండ డిఃస్తాన్. ఏలు, విరి లోఇ ఎయెన్ వన్నిజ్ నండో ప్రేమిస్నాన్? ఇజి వెన్బాతాన్.

‡ 7:37 7:37 యా నూనాజ్ పణుకు పేరు అలబాస్తరు ఇజి యా పణుకు నండో కరీదితిక తెల్లాజ్ మంజినాద్ యాక గీసి లోకుర్ పునెజ్ తయార్ కిజినార్.

43 అందెజె సిమోను, “వాండ్రు ఎయెరిజ్ నండో సితండ్రె, లోన్ఎండ డిఃస్త సితాండ్రో వాండ్రె నండో ప్రేమిస్సాన్, ఇజి నాను ఒండేబిజిన”, ఇహాన్. అందెజె యేసు, “నీను నెగెండ ఎత్తు కితిదె వెప్పి”, ఇహాన్.

44 ఇహండ్రె, ఆ బోదెల్ దరోట్ సుండేజి సిమోనుజ్ ఈహు వెప్తాన్. “యా బోదెల్దిజ్ నీను సుండేజిని గదె. నాను నీ ఇండ్రో వాత. నీను నా పాదమ్కు ఊర్పాదెజ్ ఏరు సిఇతి. గాని ఇది దని కణెర్దాన్ నా పాదమ్కు ఊత్తాదె, దని కొప్పుదాన్ తేలితాద్.

45 నీను నజీ ముదు కిజి డగ్రు కిఇతి. గాని ఇది నాను వాతి బాణిజ్ అని నా పాదమ్కు ముదు కిజినె మనాద్.

46 నీను నా బురాదు నూనె రాసెఇతి. గాని ఇది నా పాదమ్కాజ్వాసనం సీని నూనె రాస్తాద్.

47 అది నండో ప్రేమిస్తాద్. అందెజె దని నండో పాపమ్కు దేవుణు సెమిస్తాన్, ఇజి నాను నీ వెట వెప్పిన. ఎయెరిజ్ దేవుణు తక్కు సెమిస్త మనాండ్రో, వాండ్రు తక్కునె ప్రేమిస్సాన్”.

48 మరి యేసుదనిజ్, “దేవుణు నీ పాపమ్కు సెమిస్త మనాన్”, ఇజి వెప్తాన్.

49 వన్ని వెట ఉండెజ్ బస్తి మహికార్, “పాపమ్కు సెమిస్త మన్ని ఇజి వెప్టాజ్ వీండ్రు ఎయెన్?”, ఇజి ఒరెన్దిజ్ ఒరెన్ వర్గిజి మహార్.

50 అందెజె యేసు, “నీను నా మున్కు నమకం ఇడ్డి. అందెజె నీ పాపమ్కాణిజ్ దేవుణు రక్కిస్తాన్ ఇజి ఆ బోదెల్దిజ్ వెప్టాన్.

8

యేసు విత్తు వందిజ్ వెప్పిని కత

1 సెగం రోన్కు సొహి వెనుక, యేసు, దేవుణు కిని ఏలుబడిః వందిజ్ సువార్ల పట్టుమ్కాజ్ నాహ్కాజ్ బోదిసి వెప్పి వాజి మహాన్.

2-3 వన్నెండు మణిసి సిసూరు వన్ని వెట మహార్. దెయం బాణిజ్, కస్తమ్కాణిజ్ నెగెణ్ ఆతి సెగొండెజ్ బోదెక్బా వన్ని వెట మహె. వన్కా లోఇ ఏడు దెయమ్కాణిజ్ యేసు డిఃస్పిస్తి మగ్దలెనె ఇని మరియ, హెరోద్ ఇండ్రో ఎజమాని పణి కిజి మహి కూజ ఇని వన్ని ఆల్ని యొహన, సుననయ, మరి నండో బోదెక్బా మహె. వన్కాజ్ కల్లితి మన్ని లోఇ అవికు, యేసువన్ని సిసూర్ వందిజ్ కర్కు కిజి మహార్.

4 విజు పట్టుమ్కాణిజ్ లోకుర్ యేసుడగ్రు వాజి మంద ఆతివెలె, వాండ్రు ఉండ్రె కత వజ ఈహు నెన్పిస్తాన్.

5 “ఒరెన్ రయేతు వాండ్రు విత్తు వితెజ్ సొహాన్. వాండ్రు విత్తు విత్తి మహిజ్ సెగం సరి వడకాద్ అర్తె. అర్తి విత్కాజ్ మట్టి సొన్ని మహార్. ఆగాసమది పొటిజ్బా వాతెనె పెప్టా తిహె.

6 మరి సెగం సటు మున్కు మన్ని డులిదు అర్తె. నేరితె గాని తడిః సిల్లెండ ఆతిజ్ సాతె.

7 మరి సెగం సాప్పు తప్పజ్ నడిఃమి అర్తె. సాప్పు తుపెజ్వెట పిరితె గాని వన్కాజ్ తిగితె.

8 మరి సెగం నెగ్గి బూమిదు అర్తె. ఆకెజ్ పిరితెనె పంట నెగెండ పండితాద్. నండో జణి ఆతాద్. విత్తి విత్తుదిజ్వంత వంతుజ్లెకెండ ఆతె. యేసు యా మాటెజ్ వెప్పి, ‘రుండి గిబిజాణిజ్ వెంజి అయావజ నడిఃదు’”, ఇజి వెప్టాన్.

9 వెనుక వన్నిసిసూర్ యా కతవజ నెన్పిస్తి దనిజ్ అర్థం ఇనిక ఇజి వెన్బాతార్.

10 వెన్బాతిజ్ వాండ్రు, “దేవుణు కిని ఏలుబడి: వందిజ్ డాజీతి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెహ్తి లెకెండ, ‘సుడఃజినార్ గాని తోఎర్, వెంజినార్ గాని అర్దం కివర్*’. అందెజె వరిజ్ కతవజ నాను నెన్పిసిన.

11 యా కతవజ నెన్పిస్తి దనిజ్ అర్దం ఇనిక ఇహిజ, విత్తు ఇహిజ దేవుణు మాట.

12 విత్తు అర్దిసరి పడఃకాద్ పోలితికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్సిన్ఎండ మంజిని వందిజ్ సయతాను వాజి వరి మన్నుదు మన్ని దేవుణు మాట పెర్జి ఒనాన్.

13 విత్తు అర్ది సట్టుముస్సు మని డుల్లిదిజ్ పోలితికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుదు ఇడ్పికార్. గాని వెల్ల లోఇ సొని లెకెండ దేవుణు మాట వరి మన్ను లోఇ సొన్ఎద్. వారు సెగం కాలం నమినార్ గాని కస్టం వానివలె డిస్సార్.

14 విత్తు అర్ది సాప్పు తపుజ్ నడిఃమి పోలితికార్ ఎయెర్ ఇహిజ, దేవుణు మాట వెంజి నమకం బా ఇడ్పార్. గాని వారు ఆహె బత్తిజి సొనివలె బత్తువందిజ్ మన్ని విసారం, సంసారం, సుకం వందిజ్ ఒడఃబినార్. యాకెజ్ వరి నమకం తిగ్జి పొక్సినె. వరి బత్తుదాన్ ఇన్ని లాబంబా సిల్లెద్.

15 విత్తు అర్ది నెగ్గి బూమిదిజ్ పోలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్పార్. కస్టమ్కు వాతిజ, వారు అయాకెజ్ ఓరిసి నమకమ్దాన్ పిరినార్.

దీవ వందిజ్ వెహ్సినాన్.

16 ఎయెన్బా దీవ కసిసి వెన్కా తబల మూక్సినో, మంసం అడ్గినో ఇడఎన్. గాని లోఇ వానివరిజ్ జాయి తోర్దెజ్ ఇజి దీవ కంతూదునె ఇడ్పార్.

17 డాజీతిక ఇనికబా వెల్లి ఆనాద్. ముస్తిక ఇనికబా తోరెజి వెల్లితనె.

18 అందెజె మీరు వెంజినికెజ్ అర్దం కిజి మండ్రు. ఎందనిజ్ ఇహిజ, నా బాణిజ్ వెంజి అర్దం కిజిని వన్నిజ్ దేవుణు మరి తెలివి కినాన్. గాని వెంజి అర్దం కిఇవన్నిజ్ వాండ్రు అర్దం కిత మన ఇజి ఒడఃబితికెజ్ బా లాగ్నాన్.

19 నస్తివలె యేసు అయ్సిని తంబెర్సిరి వన్నిజ్ సుడఃదెజ్ వాతార్. గాని లోకుర్ నండొ మహిజ్ వన్ని డగ్రు సొండ్రెజ్ అట్ఎతార్.

20 అయావలె ఒరెన్, “నీ యాయ ని తంబెరిజు నిజి సుడఃదెజ్ కోరిజి వెల్లి నిహ మనార్”, ఇజి వన్నిజ్ వెహ్సాన్.

21 వెహ్తిజ్ యేసు, “దేవుణు మాటెజ్ వెంజి అయావజ నడిఃనికారె నా యాయ నా తంబెరిజు”, ఇజి వెహ్సాన్.

యేసు పెరిగాలి తుపాన్దిజ్ ఆప్కిజినాన్

22 నస్తివలె ఉండ్రీ నాండిజ్ యేసు వన్నిసిసూర్, “గనెసరెతు ఇన్ని సెరు అతాహ పడఃక సొనాట్”, ఇజి వెహ్సాన్. అందెజె వారు ఉండ్రీ డోణిదు ఎక్తారె సొహార్.

23 వారు సొన్ని మహిజ్, యేసు నిద్ర కితాన్. అయావలె పెరి గాలి తుపాన్సెర్దు ముస్సు వాతాదె, డోణిదు ఏరు నిండ్రెజినాద్. వారు పెరి ప్రమాదమ్దు మనార్.

* 8:10 8:10 యెసయ 6:9.

24 అయావలె సిసూరు వన్ని డగ్రు సొహరె, “ప్రబువా, ప్రబువా మాపు సానా సొనావ్లె”, ఇజి వన్నిజ్ నిక్టార్. వాండ్రు నిజీతండ్రె పెరిగాలి ఉల్లాలుజుదిజ్, “పలక్ ఆదు”, ఇజి డటం వెహ్టాన్. పెరిగాలి అణస్తాద్. విజు అలెతె.

25 అయావలె వాండ్రు, “ఎందనిజ్ మిజీ నా మున్కు నమకం సిల్లెద్?” ఇజి వరిజ్ వెన్బాతాన్. వారు బమ్మజిజి తియెల్దాన్, “వీండ్రు గాలిదిజ్ ఏరుదిజ్ అణస్తు ఇజి ఆడ్ర వెహ్టాజ్ అవి లోజిజి. వీండ్రు ఎయెండ్రో”, ఇజి ఒరెన్వెట ఒరెన్ వర్గితార్.

దెయమ్కు అస్తివన్నిజ్ నెగెండ కిజినాన్.

26 వారు గరసినియ ఇని లోకురి ప్రాంతమ్దు వాతార్. అయా ప్రాంతం గలిలయ ప్రాంతమ్దిజ్ ఎద్రు మనాద్.

27 వాండ్రు సెరుగటుద్ డిగితివెలె, ఆ పట్టుమ్దికాన్ ఒరెన్ యేసుడగ్రు వాతాన్. వాండ్రు దెయమ్కు అస్తికాన్. నండ్రో కాలమ్కాణిజ్ సొక్కెజ్ తోడిగిఎండ, ఇండ్రో మన్ఎండ, దూకిజాజ్ మహాన్.

28 వాండ్రు యేసుజ్ సుడతాండ్రె డటం డేల్ని వన్ని పాదమ్క ఎద్రు ముణుకుజ్ ఊరితాన్. ఊరితండ్రె, “విజు దనిజ్ అతికారం మన్ని దేవుణు మరిసి ఆతి యేసు, నా వెట నిజి ఇన్ని పణి, నజి బాద కిమ ఇజి నిజి బతిమాల్లిన్”, ఇజి డేల్ని వెహ్టాన్.

29 ఎందానిజ్ ఇహిజు, యేసు, వినిజ్ డిసి వెల్లి సొన్అ ఇజి ఆ దెయమ్దిజ్ ఆడ్ర సిత మహాన్. అది వన్నిజ్ నండ్రో సుట్కు అసి మహాద్. అందెజె వన్నిజ్ గొలుస్కాణిజ్ కాల్యాజ్ కికాజ్ తొప్పా కాప్ కిని వరిజ్ ఇట్టాద్. గాని వాండ్రు గొలుస్కాజ్ తెప్పి, దెయమ్కు వన్నిజ్ బీడిమ్బూమిదు ఉలుప్పి మహా.

30 యేసు వన్నిజ్, “నీ పేరు ఇనిక?” ఇజి వెన్బాతాన్. నండ్రో దెయమ్కు వన్ని లోఇ మహిజ్ వాండ్రు, “సేన”, ఇజి వెహ్టాన్.

31 మజి దర్లిదు పోక్మా ఇజి మరి మరి బతిమాల్తె.

32 నస్తివలె నండ్రో పండ్రీజ్ మంద గొరొణ్ సెల్కాదు మెయిజి మహా. అందెజె వన్కా లోఇ సొండ్రెజ్ మజి సెల్వ సిదా”, ఇజి వన్నిజ్ బతిమాల్తె. అందెజె వాండ్రు సెల్వ సితాన్.

33 అయావలె దెయమ్కు వన్నిజ్ డిస్సెనె పండ్రీజు లోఇ సొహా. ఆ పండ్రీజ్ మంద గొరొణ్దాన్ ఉహ్కప్పి వాజి సెర్దుదు అరెనె సాతె.

34 పండ్రీజ్మేప్పి మహికార్ జర్గితి దనిజ్ సుడతారె ఉహ్కప్పి సొన్ని ఆ పట్టుమ్ది వరిజ్, పట్టుమ్ది వల్సెజు మని వరిజ్ జర్గితికెజ్ వెహ్టార్.

35 లోకుర్ యా జర్గితికెజ్ సుడదెజ్ సొహార్. వారు యేసు డగ్రు వాతిజ్ దెయమ్కు డిస్సి సొహికాన్ సొక్కెజ్ తోడిగిజి నెగ్గి బుద్దిదాన్ యేసు పాదమ్క అడిగి బస్తి మహి సుడతారె. సుడతారె తియెల్ ఆతార్.

36 యాక సుడతెకార్ దెయం అస్తికాన్ ఎలాగ నెగెణ్ ఆతాన్ ఇజి మరి లోకురిజ్ వెహ్టార్.

37-38 అయావలె గరసినియ లోకురి ప్రాంతమ్దు మన్ని లోకుర్ విజెరె, నండ్రో తియెల్ ఆతార్. అందెజె, “మజి డిసి సొన్అ”, ఇజి యేసుజ్ వెహ్టార్. అందెజె యేసు డోణి ఎక్తాండ్రె మరెజి సొన్ని మహిజ్, దెయమ్కు డిస్సి సొహికాన్, “నాను బా నీ వెట వానా”, ఇజి బతిమాల్తాన్.

† 8:27 8:27 అయ కాలమ్దు మొడః సట్టు పణుకుదు దొలుస్తి సాలమ్దు ఇడెజి పెరి పణుకయదాన్ మూక్కి మహార్.

39 గాని యేసు, “నీను మర్జి ఇండ్రో సాన్అ. దేవుణు నీ వందిళ్ కిత్తి గొప్ప పణి విజు వెహాల”, ఇజి వెహండ్రె పోక్తాన్. వాండ్రు సాహండ్రె యేసు వన్నివందిళ్ కిత్తి గొప్ప పణి పట్టుం విజు వెహాన్.

యేసు సాతి అయిలిళ్ నిక్సినాన్, జబ్బుఆతి మహిబోదెల్దదిళ్ నెగెణ్ కిజినాన్

40 యేసు మర్జి వాతివెలె, నండో లోకుర్ వన్నిళ్ ఎద్రు నుడోజి మహార్. అందెజె వారు వన్నిళ్ డగ్రు కిత్తార్.

41-42 నస్తివలె, యూదురి మీటిళ్ ఇండ్రోణి అతికారి యాయిరు ఇనికాన్ యేసు పాదం ముస్సు అర్తాండ్రె, “నజి ఒరెదె గాలు. అది సాదెజ్ డగ్రు ఆత మనాద్. దనిళ్ డగ్రు పనెండు పంటిళ్. అందెజె నీను నా ఇండ్రో రఅ”, ఇజి బతిమాల్తాన్. వాండ్రు సొన్ని మహిళ్ నండో లోకుర్ వన్ని ముస్సు నెకె ఆజి అర్ని మహార్.

43 అయావలె ఉండ్రె బోదెలి పనెండు పంటిజాణిళ్ వెల్లి ఆని జబుదాన్ బాద ఆజి మహాద్. ఎయెర్బా దనిళ్ నెగెణ్ కిదెజ్ అట్ఎత్తార్.

44 యేసు వెన్నాళ్ వాతాదె, వాండ్రు తోడిఃగితిమన్ని వన్నినిరీ సొక్కది సెంగుదిళ్ ముట్టాద్. ముట్టి వెటనె దనిళ్ వాజి మహి నల అణస్తాద్.

45 యేసు, “నజి ముట్టికాన్ ఎయెన?”, ఇజి వెన్బాతాన్. విజెరె, “మాపు నెన్ఎవ్”, ఇజి వెహ్తార్. అయావలె పేతురు, “బోదకినికిదా, నండో లోకుర్ కూడిఃతారె నీ ముస్సు అర్నినార్ గదె”, ఇజి వెహ్తాన్.

46 గాని యేసు, “నజి ఎయెండ్రో ముట్టాన్. నా లోఇదాన్ దేవుణు సత్తు వెల్లి సోసి సొని లెకెండో నజి తెలిజినాద్”, ఇజి వెహ్తాన్.

47 అయావలె అది యేసుజ్ డాజిజ్ సొండ్రెజ్ అట్ఎ ఇజి నెస్తాదె వణక్సి వాతాదె వన్ని పాదం ఎద్రు ముణుకుజ్ ఊరిజి వజిత్తాద్. నాను ఎందనిళ్ వన్నిళ్ ముట్ట ఎలాగ వెటనె నెగెణ్ ఆత ఇనిక విజెరె ఎద్రు అది వెహ్తాద్.

48 అందెజె యేసు”, గాలు, నీను నా ముస్సు నమకం ఇడ్డి. అందెజె నీను నెగెన్ఆతి. సమాదనమదాన్ సాన్అ”, ఇజి దనిళ్ వెహ్తాన్.

49 యేసువర్గిజి మహివలెనె, యాయెరు ఇండ్రోణికాన్ ఒరెన్ వాతండ్రె, “నీ గాలు సాతాద్. బోదకినివన్నిళ్ మరి వందిన్సు”, ఇజి వన్నిళ్ వెహ్తాన్.

50 యేసు అయా మాట వెహండ్రె, “తియెల్ ఆమ. నా ముస్సు నమకం ఉండ్రె ఇడోఃఅ. అది నెగెణ్ ఆనాద్”, ఇజి యాయిరుజ్ వెహ్తాన్.

51 యాయిరు ఇండ్రో వాతివెలె, పేతురు, యాకోబు, యోహాను ఇని వరిళ్ ని ఇజ్జి దని అయిసి అప్పొసిరిళ్బా లోఇ ఒతాన్. గాని మహివరిళ్ లోఇ సొండ్రెజ్ సరి సిఏతాన్.

52 విజెరె దన్ని వందిళ్ గుండెజి డెయ్ఎ ఆజి, అడోబాజి మహార్. యేసు వరిళ్, “అడోబామాట్, అది నిద్ర కిజినాద్ గాని సాఎద్”, ఇజి వెహ్తాన్.

53 అది సాతాద్ ఇజి వారు నెస్త మహార్. అందెజె యేసుజ్ సెకాల్ కిత్తార్.

54 అహిజ, యేసు దన్నికిదు అస్తాండ్రె, “ఇజ్జి బయి నిళ్అ”, ఇజి వెహ్తాన్.

55 దనిళ్ పాణం మర్జి వాతిళ్ అది నిజిత్తాద్. అయావలె వాండ్రు దనిళ్ బోజనం సీదు ఇజి ఆడ్ర సితాన్.

56 దని అయ్సి అపొసిర్ నండో బమ్మ ఆతార్. గాని వాండ్రు యాక ఎయెరిళ్బా వెహ్తాట్ ఇజి వరిళ్ ఆడ్ర సితాన్.

9

సిసూరిజ్ పణి ఒపజెప్పినాన్

1 యేసు పన్నెండు మణిసి సిసూరిజ్ కూక్కి కుడుఃప్తాండ్రె విజు దెయమ్కాజ్ పేర్దెజ్, కస్టమ్కాజ్ నెగెణ్ కిదెజ్ వరిజ్ సత్తుని అతికారం సిత్రాన్.

2 వాండ్రు, “దేవుణు ఏలుబడిః కినాన్ ఇజి నువార్త బోద్దిజ్, కస్టమ్కాణిజ్ మహి వరిజ్ నెగెణ్ కిదెజ్”, ఇజి వరిజ్ పోక్తాన్.

3 మరి వాండ్రు వెప్తాన్, “మీరు పయాణం వందిజ్ కిదు డుడ్డు గాని, సన్ని గాని రొట్టె గాని, డబ్బు గాని రుండి సొక్కెజ్ గాని ఇనికబా ఒత్తెజ్ ఆవద్.

4 మీరు ఎయె ఇండ్రో సొనిదెరో, అయా పట్ను డిఃస్సిదాక బానె మండ్రు.

5 మిజి ఎయెర్ డగ్గు కివీండ మహిజ ఆ పట్టుమ్దాన్ డిఃసి సొనివలె మీ పాదమ్కాణి డుల్లిబాన్ దుల్ప్పు. దేవుణు మాట వారు నెక్త పొక్తిజ్ దేవుణు వరిజ్ కోపం ఆతాన్ ఇజి తోరిస్తెజ్ ఆహె డుల్లి దులుప్పు”, ఇజి వరిజ్ వెప్తాన్.

6 అందెజె వారు సోతారె, నాహ్కాజ్ విజు బూలాజి, నువార్త బోదిసి, ఎంబెబా కస్టమ్దాన్ మహి వరిజ్ నెగెణ్ కిజి మహార్.

7-8 గ్రలీలయ ముటదిజ్ రాజు ఆతి హేరోదు యేసుని వన్నిసిసూరు కిత్తి పణిజ్ వందిజ్ వెహివెలె అసల అర్థం ఆఎండ మహాన్. ఎందనిజ్ ఇహిజ, సెగొండార్ యోహాను సాతండ్రె మర్జి నిజీతాన్ ఇజి, సెగొండార్ ఏలియ ప్రవక్త తోరె ఆతాన్ ఇజి మరి సెగొండార్ పూర్బా కాలమ్దు మహి ఒరెన్ ప్రవక్త నిజీత వాతాన్ ఇజి యేసు వందిజ్ వర్గిజి మహార్.

9 అయావలె హేరోదు, “నాను యోహాను బుర్ర డెఃయిస్త గదె. మరి ఎయి వందిజ్ యా సజతిజ్ నాను వెంజిన్? వాండ్రు ఎయెన్?”, ఇజి వన్నిజ్ సుడెఃదెజ్ ఆస ఆతాన్.

అయ్దు వేలు లోకాజ్ బజ తిర్పినాన్.

10 అపొస్తుడు మర్జి వాతారె, వారు కితి పణిజ్ విజు యేసుజ్ వెప్తారె. వాండ్రు వరిజ్ వెట కూక్తాండ్రె, బత్సయుద ఇని పట్టుమ్దు కేట సొహార్.

11 గాని మంద లోకుర్ ఆక నెస్తారె, వన్ని వెన్కా వాజి మహార్. వాండ్రు వరిజ్ డగ్గు కితాండ్రె దేవుణు ఏలుబడిః వందిజ్ వరిజ్ వెప్తారె. కస్టమ్దు మహి వరిజ్ నెగెణ్ కిత్రాన్.

12 పొద్దు డిఃగ్జి మహివలె, పన్నెండు మణిసి సిసూర్ వాతారె, “మాటు ఎయెర్ మన్ఇ బాడిఃద్ మనాట్. అందెజె యా లోకురిజ్ మండ్రెజ్ బాడిః, ఉండెజ్ టిండి, దొహ్కీని వజ పడఃకాద్ మన్ని నాహ్కాజ్ వల్సెజ పోక్అ”, ఇహార్.

13 యాక వెహండ్రె, యేసు, “మీరె వరిజ్ తిండ్రెజ్ఇనికబా సీదు”, ఇజి వెప్తాన్. వెప్తిజ్ వారు, “మాబాన్ అయ్దు రొట్టెజ్, రుండి మొయెజ్ మనె. నిసొ మంద లోకుదిజ్ బోజనం కొండెజ్ మాపు అట్నాపా?”, ఇజి వెప్తారె.

14 (వాతి మని లోకుర్ లోఇ మొగకొడెఃర్నె డగ్గు అయ్దు వేలుజ్ మనార్) వాండ్రు, “యాబయి మణిసిర్ యాబయి మణిసిర్ వర్స బసె కిదు”, ఇజి వన్ని సిసూర్జ వెప్తాన్.

15 వారు ఆహె కిజి విజెరిజ్ బసె కిత్రార్.

16 నస్తవలె వాండ్రు అయ్యదు రొట్టెజ్ఞని రుండి మొయెజ్ అస్తాండ్రె, ఆగనం దరోట్ బేసి, వన్కాజ్ వందిజ్ దేవుణుదిజ్ వందనం వెహ్లాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సిసూర్జ సిత్తాన్.

17 వారు విజెరె పొట పంజు తిహార్. తిహి వెనుక మిగిలితి ముకెజ్ పనెండు గంపెజ్ సిసూరు కెహ్లాన్.

18 ఉండ్రె నాండిజ్ యేసు ఒరెండ్రె పార్దనం కిజి మహాన్. వన్ని సిసూర్ వన్ని డగ్రు మహార్. అయావలె వాండ్రు, “నాను ఎయెన్ ఇజి లోకుర్ వర్గిజినార్?”, ఇజి వరిజ్ వెన్బాతాన్.

19 వారు, “బాప్తినం సీని యోహాను ఇజి సెగొండార్ వెహ్లాన్. సెగొండార్ ఏలియ ప్రవక్త ఇజినార్. మరి సెగొండార్ పూర్బా కాలమ్దు సాతి ప్రవక్తెజి లోఇ ఒరెన్ మర్జి నిజితాన్ ఇజి వర్గిజినార్”, ఇజి వన్నిజ్ వెహ్లాన్.

20 “అహిజు, మీరు నాను ఎయెన్ ఇజి వెహ్లానిదెర్?”, ఇజి వరిజ్ వెన్బాతిజ్, పేతురు, “దేవుణు ఏర్పాటు కితి పొక్తి క్రిస్తు”, ఇజి వెహ్లాన్.

21 యాక ఎయెవెట వెహ్లాట్ ఇజి కసితం వరిజ్ ఆడ్ర సిత్తాన్.

22 మరి, “లోకు మరిసి ఆతి నాను నండో కస్టమ్కు ఒరిసైజెవలె. యూద పెద్దెల్జు, పెరి పుజెరిజు, యూదురి రూలు నెస్పిస్సికార్ నజీ వెల్లి కినార్. లోకుర్ నజీ సప్పార్లె. సాజి మూండ్రె దినమ్కాజ్ దేవుణు నజీ నిక్నాన్లె”, ఇజి వెహ్లాన్.

23 మరి వాండ్రు వరిజ్ విజెరిజ్ ఈహు వెహ్లాన్. “ఎయెన్బా నా వెట వాదెజ్ ఇహిజు, వాండ్రు వన్ని సొంత ఇస్టమ్కు డిఃసి, వన్నిజ్ వాని కస్టమ్కు రోజు ఒరిసి సాదెజ్బా తయార్ ఆజి నా వెట వాదెజ్.

24 ఎయెన్బా వన్ని సొంత పాణమ్దిజ్ కాపాడెదెజ్ నుండెతిజు, వన్నిజ్ ఎల్లకాలం దేవుణు వెట బత్కిని బత్కు దొహ్కెవద్. గాని ఎయెన్బా నా వందిజ్ వన్ని పాణం సితిజు, వన్నిజ్ ఎల్లకాలం దేవుణు వెట బత్కిని బత్కు దొహ్కాద్.

25 ఒరెన్ వాండ్రు, వాండ్రు కోరితి విజు, యా లోకమ్ది సంసారం నుకం విజు దొహ్కె ఆజి, వన్నిజ్ ఎలాకాలం దేవుణు వెట బత్కిని బత్కు దొహ్కెండ మహిజు, ఇన్ని లాబం?

26 నా వందిజ్ నా మాట వందిజ్ సిగు ఆని ఎంబె వన్నిజ్బా నాను నెన్ను ఇజి వెహ్లాజ్ లోకు మరిసి ఆతి నానుబా సిగు ఆన. నాను దేవుణు జాయ్దు ఒండెబిదెజ్ అట్ఇ నని సోకుదాన్ వానా. అయావలె నా బుబ్బుదిని, దూతెజది జాయ్ ఒండెబిదెజ్ అట్ఇ సోకుబా నా వెట మంజినాద్. అయావలె నా వందిజ్ నా మాట వందిజ్ సిగు ఆతి వన్ని వందిజ్ నానుబా సిగు ఆన.

27 నాను మిజీ నిజం వెహ్లాన్, “ఇబ్బె నిహి మన్ని వరి లోఇ సెగొండార్, దేవుణు వన్ని లోకురిజ్ ఏలుబడిః కిజినిక సూణిదాక సాఎర్”.

యేసుజ్ మూర్తి మారిసినాద్.

28 యా మాటెజ్ వెహ్లా డగ్రు ఉండ్రె వారం వెన్కా వాండ్రు, పేతురు, యాకోబు, యోహాను ఇన్ని వరిజ్ వెట్టె కూక్తాండ్రె, పార్దనం కిదెజ్ ఉండ్రె గొరొత్ ఎక్తార్.

29 వాండ్రు పార్దనం కిజి మహివలె వన్ని మొకమ్ది మూర్తి మారితాద్. వన్ని సాకెజ్ తెలాజ్ ఆతె, జిగి జిగి మెరిసి మహె.

30-31 అయావలె, దేవుణు మంజిని బాడ్డిదాన్ రిఎర్ వన్ని వెట వర్గిజి మహార్. దేవుణు బాణిజ్ వాతి జాయ్ వరి నుటులం మహాద్. వారు మోసి, ఏలియ ఇనికార్.

యేసు యెరూసలేమ్‌ను సాజి, ఆహా దేవుణు ఎతు కితిక బేగి పూర్తి కిని వందిజ్ వర్గితార్.

32 పేతురు ని వన్ని వెట మహికార్ బాగ నిద్ర కితార్. తెలి ఆతి మహిజ్ వారు యేసుజ్ మని దేవుణు జాయ్‌దిజ్ వన్ని వెట నిహి మని రిఎరిజ్‌బా సుడేతార్.

33 ఆ రిఎర్ వన్ని బణిజ్ సొన్ని మహిజ్, పేతురు యేసుజ్, “బాబు, మాటు ఇబ్బె మనిక గొప్పు నెగెద్. అందెజె నిజీ ఉండ్రె మోసెజ్ ఉండ్రె ఏలియెజ్ ఉండ్రె మండ్రెజ్ మూండ్రె గుడుసెజ్ తోహ్‌నావ్.*

34 వాండ్రు ఆహా వర్గిజి మహిజ్ మొసాప్ వాతాదె వరిజ్ పిడేగ్‌తాద్. వారు మొసాప్ లొఇ సొహివలె సిసూరు తియెల్ ఆతార్.

35 అయావలె, “వీండ్రు నాను ఏర్‌పాటు కితి నా మరిను. విని మాటెజ్ వెండ్రు”, ఇజి ఉండ్రె జాటు మొసాప్‌దాన్ వాతాద్.

36 అయా జాటు వాతి వెనుక యేసుజ్‌నె తోరితాద్. సిసూరు సుడేతి వన్కాజ్ ఉండ్రె దనిజ్‌బా అయా దిసమ్‌కాజ్ మహి ఎయెరిజ్‌బా వెహ్‌ఎండ అల్లెత మహోర్.

దెయం అస్తి ఒరెన్ కొడొడిజ్ నెగెణ్ కిజినాన్

37 మహ్నా నాండిజ్, వారు ఆ గొరోణ్ డిగ్‌జి వాతివలె నండో లోకుర్ వన్నిజ్ ఎద్రు వాతార్.

38 అయావలె ఆ మంద లోకు లొఇ ఒరెన్, “ఓ బోదకినికి, నా మరిసిజ్ కనికారం తోరిన్‌అ ఇజి నాను నిజీ బతిమాల్లిన. వాండ్రు నజీ ఒరెండ్రె మరిసి.

39 ఉండ్రె దెయం వన్నిజ్ అన్నాద్. వెటనె వాండ్రు డెడిసిన్నాన్. వెయ్‌దాన్ పంపుల్ వాజి అది వన్నిజ్ గజగజ వణికిసి అర్‌ప్పాద్. వన్నిజ్ నండో బాద కిజి వందిసిన్ డిసిన్నాద్.

40 దనిజ్ సాన్‌పిన్జెజ్ నీ సిసూర్‌జ బతిమాల్‌త గాని వారు కిదెజ్ అట్‌ఎతార్”, ఇజి మొరో కిత్తాన్.

41 అందెజె యేసు, “యా తరమ్‌దు మనికిదెరా, మీరు తప్పు సరిదు నడవె ఆజినికిదెర్. నమకం సిలికిదెర్. ఎసాడ్ రోస్సు మీవెట మంజిన? మీరు కినికెజ్ ఎసా ఓరిస్సెజ్?”, ఇజి వెప్తాండ్రె, “నీ మరిసిజ్ ఇబ్బె తగ్‌అ”, ఇజి వన్నిజ్ వెప్తాన్.

42 ఆ కొడొడి వాజిమహివలె వన్నిజ్ అసి మహి దెయం వన్నిజ్ అర్‌ప్తాదె గజ గజ వణకిస్తాద్. అయావలె యేసు ఆ దెయమ్‌దిజ్ సాన్‌అ ఇజి డటిసి వెప్తాన్. కొడొడిజ్ నెగెణ్ కితాండ్రె అపొసిజ్ ఒపజెప్తాన్.

43 లోకుర్ యా జర్గితిక సుడేతారె, దేవుణు గొప్పు సత్తు మనికాన్ ఇజి నండో బమ్మ అతార్.

44 యేసు కితి పణి వందిజ్ లోకుర్ విజెరె బమ్మ ఆజి మహివలె, వాండ్రు ఈహు వన్ని సిసూరిజ్ వెప్తాన్. “నాను యేలు వెహ్నిని మాటెజ్ బాగ వెంజి పోన్‌ఎండ మండ్రు. లోకు మరిసి ఆతి నాను లోకు కిదు ఒపజెవె ఆనాలె”, ఇజి.

45 గాని వాండ్రు వెప్తా మాటెజ్ వరిజ్ అర్థం ఆవతాద్. దేవుణు ఆక డాప్తాన్. ఎండనిజ్ ఇపాజ వారు అర్థం కిఎండ మండ్రెజ్. ఆ మాట వందిజ్ వన్నిజ్ వెన్‌బాదెజ్ వారు తియెల్ ఆతార్.

పెరికాన్ ఎయెన్‌ఇజి గొడేబ రేప్పినార్

46 సిసూరు లొఇ ఎయెన్‌ పెరికాండ్రో ఇజి ఉండ్రె ఇజ్రి గొడబ వాతాద్.

* 9:33 9:33 వాండ్రు వెప్తిక ఇనికదొ వన్నిజె తెలివెద్

47 యేసు వరి మన్నుదు మన్ని ఆలోసన నెస్తాండ్రె ఒరెన్ ఇజి కొడోడిదిజ్ అస్తాండ్రె వన్ని పడెకాద్ నిల్వ్తాన్.

48 నిల్వ్తి వెన్కా వాండ్రు వరిజ్, “ఎయెన్బా యా ఇజి కొడోడిదిజ్ నా మున్ను నమకం ఇడ్డికాన్ఇజి ఒడిబిజి డగ్రు కితిజ, నజీ డగ్రు కితి వజ. నజీ డగ్రు కితికాన్ నజీ పొక్తి దేవుణు డగ్రు కితి వజ. మీ లొఇ ఎయెన్ తగిజి మంజి నాండ్రొ వాండ్రె పెరికాన్”, ఇజి వెప్తాన్.

49 అయావలె యోహాను, “బోదకినికి, నీ సత్తుదాన్ దెయమ్కాజ్ పొక్తి మహి ఒరెన్ వన్నిజ్ మాపు సుడెతాప్. వాండ్రు మా వెట మనికాన్ ఆఎన్. అందెజె మాపు వన్నిజ్ అడ్డు కితాప్”, ఇజి వెప్తాన్.

50 అందెజె యేసు, “వన్నిజ్ అడ్డు కిమాట్. ఎందనిజ్ ఇహిజ, మీ మున్ను పగ సిలికాన్ మీ దరిజ్ మనికాన్”, ఇజి వన్నిజ్ వెప్తాన్.

యెరూసలెమ్దు పయాణం కిజినాన్

51 యేసు పరలోకమ్దు సొండ్రెజ్ దినమ్కుడగ్రు ఆతివెలె వాండ్రు మన్ను పూర్తి నమకం కిజి యెరూసలెమ్దు సొండ్రెజ్ సోతాన్.

52 వాండ్రు వన్నిజ్ మండ్రెజ్ బాడ్డి: తయార్ కిదెజ్ ఇజి సెగిండ్రాంజ్ ముజాల్ పోక్తాన్. వారు దని వందిజ్ నమరియ ఇనన్ని దేసెమ్ది ఉండ్రె నాటొ వాతార్.

53 గాని నాటొణికార్ వన్నిజ్ డగ్రు కివెతార్. ఎందనిజ్ ఇహిజ వాండ్రు యెరూసలెమ్దు మన్ని దేవుణు గుడిడు సొని ఒరెన్ యూద వాండ్రు.

54 సిసూర్జ లొఇ యాకోబు, యోహాను ఇనికార్ యాక సుడెతారె, “ప్రబువా, యా లోకురిజ్ నాసనం కిదెజ్ ఆగాసం దాన్ మాపు సిను తపిస్తెజ్ నిజీ ఇస్టమ్నెనా?”, ఇజి వెన్బాతార్.

55 యేసు వరి దరోట్ మప్తాండ్రె వరిజ్ గటిజ వెప్తాన్.

56 నస్తివలె వారు మరి ఉండ్రె నాటొ సాహార్.

57 వారు సరిదాన్ సొన్ని మహివలె, ఒరెన్, “నీను ఎంబె సొహిజ్బా నాను నీ వెట వానా”, ఇజి వన్ని వెట వెప్తాన్.

58 అందెజె యేసు, “నక్కెజ మండ్రెజ్ బొరోజ్మన్నె. ఆగాసమ్ది పొటిజ మండ్రెజ్ గూడుకు మనె. గాని లోకు మరిసి ఆతి నజీ బుర్ర అడ్డు కిదెజ్బాడి సిల్లెద్”, ఇజి మర్జి వెప్తాన్.

59 వాండ్రు మరి ఒరెన్ వన్నిజ్, “నా వెట రఅ”, ఇజి వెప్తాన్. అయావలె అయా వాండ్రు, “ప్రబువా, ముజాల నాను సొన్ని నా బుబ్బెజ్ ముసి వానా”, ఇజి వెప్తాన్.

60 అందెజె యేసు, “సాతికారె వరి సాతివరిజ్ముస్తెజ్. గాని నీను సొన్ని దేవుణు ఏలుబడి: వందిజ్ బోద్స్అ”, ఇజి వెప్తాన్.

61 మరి ఒరెన్, “ప్రబువా, నీ వెట నాను వానా. గాని నాను ముజాల మర్జి సొన్ని నా ఇండ్రెణి వరిజ్ వెప్పి వాన”, ఇజి వెప్తాన్.

62 అందెజె యేసు, “మేడి: మున్ను కియు ఇడ్డి వెన్కా మర్జి బేస్పిక్వాన్ ఎయెన్బా దేవుణు ఏలుబడి: కినివరి లొఇ ఎందనిజ్ పణిదిజ్ రఇకాన్”, ఇజి వెప్తాన్.

10

డబయ్ మణిసి సిసూరిజ్ సువార్త వందిజ్ పొక్తినాన్.

1 యాక జర్గితి వెనుక, ప్రబు మరి డబయ్ మణిసి సిసూరిజ్ ఏర్పాటు కితాన్. వాండ్రు సొని విజు పట్టుమ్కాజ్ విజు బాడిడు వన్ని ముజల రిఎరిజ్ రిఎరిజ్ పోక్తాన్.

2 పోక్సి, వాండ్రు వరిజ్ ఈహు వెహ్తాన్, “కొయ్దెజ్ మన్నిపంట లెకెండ లోకుర్ నండొండార్ మన్నె. గాని తక్కునె కొయ్నికార్ తక్కునె అందెజ్ వన్ని పంట కొయ్నివందిజ్ పణికిని వరిజ్ పోక్త, ఇజి కోత్త ఏజుమానిజ్ బతిమాల్దు ఇజి వెహ్తాన్.

3 మీరు సొండ్రు! ఇదిలో, కార్నుకుడిజు నడిఃమి గొరై పిల్లెకాజ్ పోక్తిలెకెండ నాను మిజి పోక్సిన.

4 మీరు సన్ని గాని, డబ్బుజ్ ఇడ్డి సన్ని గాని, సన్నిదు మరి ఉండ్రీ జత జోడెఃకు గాని ఒతెజ్ ఆఎద్. మీరు సద్దు ఎయెరిజ్ నెగెణ్ మనిదా ఇజి నిల్సి వర్గిజ, సమయం పాడు కిమ.

5 మీరు ఎయె ఇండ్రో బా సొనివలె, “యా ఇండ్రో మంజిని వరిజ్ సమాదనం కల్లిపిద్ ఇజి ముజాల వెహ్తు.

6 సమాదనం కోరిజినికాన్ ఒరెన్ బాన్ మహిజ, మీ సమాదనం వన్ని మున్ను మంజినాద్. సిలిజ, మరజి మీ బానె వానాద్.

7 వారు ఇనిక సితిజిబా ఉణిజి తింజి బానె మండ్రు. ఎందనిజ్ ఇహిజ, పణి కిని వన్నిజ్ వన్నిజ్ కావాలస్తెజ్ దోహ్ కైజ్ తగ్గికాన్. ఇల్లు, ఇల్లు, బూలమాట్.

8 మరి మీరు ఎమేణి పట్టుమ్దు సొనివలె వారు మిజి డగ్రు కిజి ఇనిక సితిజ ఆకదె ఉండు.

9 బాన్ మని కస్టమ్ది వరిజ్ నెగెణ్ కిదు. దేవుణు ఎలుబడిః కిని కాలం మీ డగ్రు వాత మనాద్ ఇజి వరిజ్ వెహ్తు.

10-11 గాని మీరు ఎమేణి పట్టుమ్దుబా సొనివలె వారు మిజి డగ్రు కివండ మహిజ, అయా పట్టుమ్ది వీదిజ సొన్ని, “మా పాదమ్కాజ్ కస్తి మన్ని మీ పట్టుమ్ది డుల్లిబా ఇబ్బె దుల్ప్పె సొనిసినావ్. ఎందనిజ్ ఇహిజ, దేవుణు మీ మున్ను కోపం ఆత మనాన్ ఇజి తోరిస్తెజ్. గాని ఒడెఃబిదు ఎలుబడిః కిని కాలం డగ్రు ఆత మనాద్ ఇజి తవ్వండ నెస్తు”, ఇజి వెహ్తు.

12 నాను మిజి వెహ్సిన, దేవుణు తీర్పు కిని దినమ్దు యా పట్టుమ్ది వరిజ్ సిక్కు మరి నండొ మంజినాద్. సొదొమ పట్టుమ్దు మహి లోకురిజ్ నసా మన్ఎద్.

13 ఓ కొరాజి పట్టుమ్దు మనికిదెరా, అబాయా మిజి ఎసా పెరి కస్టమ్కు వానెలె. ఓ బెత్సెయుద పట్టుమ్దు మనికిదెరా, అబాయా మిజి ఎసా గొప్ప పెరి కస్టమ్కు వానెలె. ఎందనిజ్ ఇహిజ, మీ నడిఃమి కితి బమ్మాతి గొప్ప పణిజ్ తూరు సీదొను ఇని పట్టుమ్కాజ్ కినిక ఇహిజ, వారు పూర్బమ్మదునె బస్త గరండెజ్ తోహె ఆజి, నీరు వాకె అజి, పాపమ్కు డిస్తాప్ ఇజి తోరిస్తార్ మరి.

14 దేవుణు తీర్పు కినివలె మీ పట్టుమ్కాజ్ సిక్కు, తూరు సిదొను పట్టుమ్కాజ్ నండొ మంజినాద్లె.

15 కపర్నూము పట్టుమ్దు మనికిదెరా, ఆగాసం దాక గొప్ప పెరికాప్ ఇజి ఒడిఃబిజినిదెరా? సిల్లె, దేవుణు మిజి వాండ్రు మంజిని బాడిఃదాన్ అర్పాన్లె. ఇహిజ, దేవుణు మిజి నాసనం కినాన్లె.

16 మరి యేసు వన్ని సిసూరిజ్, “మీ మాట వెనికాన్ నా మాట వెనాన్. మీ మాటదిజ్ నెక్కు పోక్సికాన్, నా మాటదిజ్ నెక్కు పోక్సాన్. నా మాటదిజ్ నెక్కు పోక్సికాన్, నజి పోక్తి వన్నిజ్ నెక్కు పోక్సాన్”, ఇజి వెహ్తాన్.

17 డబయ్ మణిసి సినూరు సర్దాన్ మర్జి వాతారె, “ప్రబువా, దెయమ్కుబా, నీ అతికారం దాన్ సొండ్రు ఇజి మాపు ఆడ్ర సీజినవలె మజి లోబడిజినె”, ఇజి వెప్టోన్.

18 నస్తివలె యేసు, “ఒఒ, సయ్తాను మిరిస్తి లెకెండ్ వన్ని అతికారం సిల్లెండ్ అగాసమ్దాన్ అర్థిక నాను సుడేత

19 సారస్కాక్ సోర్కుపిజ మట్టెజ్ మిజి అతికారం సిత మన్ను. సయ్తాను సత్తుదిజ్ గెలిస్టెజ్ మిజి అతికారం సిత మన్ను. సయ్తాను మిజి ఇనికబా కిదెజ్ అట్ఎన్.

20 దెయమ్కు మిజి లోబడిజినె ఇజి సర్ద లాపు ఆమ. గాని దేవుణు మీ పేరు వాండ్రు మంజిని బాడిదు రాస్త మనాన్ ఇజి నండొ సర్ద ఆదు”, ఇజి వెప్టోన్

21 అయావలె యేసు, దేవుణు ఆత్మదాన్ నండొ సర్ద ఆజి, “ఒ బా, నీనె అగాసమ్దిజ్ బూమిదిజ్ ప్రబు. నాను నిజి పొగిడిజిన. ఎందనిజ్ ఇహిజ, గెణం మని వరిజ్, నదు మని వరిజ్, యా నిజమాతి సజతి డాప్పిదె, ఇజ్రి కొడెఱె లెకెండ్ మని వరిజ్ తోరిస్తి. ఒఒ బా, అయ లెకెండ్ కిదెజె నిజి ఇస్టం ఆతాద్.

22 నా బుబ్బు సజి విజు సజతిజ్ నా కీదు ఒవజెప్ట మనాన్. మరిసి ఎయెండ్రి ఇజి అప్పొసినె నెస్సాన్.మరి ఎయెన్బా నెన్ఎన్. అప్పొసి ఎయెండ్రి ఇజి మరిసి ని అప్పొసిజ్ తెలివి కిదెజ్మరిసి ఎర్లితికార్నె నెస్సార్. మరి ఎయెన్బా నెన్ఎన్”, ఇజి వెప్టోన్.

23-24 వాండ్రు సినూర్ దరోట్ మహ్లాండ్రె, “దేవుణు వందిజ్ వాండ్రు కిని ఏలుబడి వందిజ్ మీరు సుడేతి గొప్ప సజతిజ్ సుడేదెజ్ అట్టి మీరు అంతు సిల్లి సర్ద మంజినికార్. ఎందనిజ్ఇహిజ, నండొ ప్రవక్తరు, రాజురుబు మీరు సుడేజినికెజ్, సుడేదెజ్ ఇజి ఆస ఆతార్ గాని సుడేదెజ్ అట్ఎతార్. మీరు వెహికెజ్ వెండ్రెజ్ ఇజి ఆస ఆతార్ గాని అట్ఎతార్”, ఇజి వన్ని సినూరిజ్నె వెప్టోన్.

పడకాదికాన్ ఎయెన్ ఇనివందిజ్ యేసు వెప్పినాన్

25 ఉండ్రె నాండిజ్, యూదురు రూలు నెన్పిస్సాన్ ఒరెన్ నిజ్జె, “ఒ బోదకినికి, ఎలాకాలం దేవుణు వెట బత్కిని బత్కు దోహక నాను ఇనిక కిదెజ్?”, ఇజి యేసుజ్ పరీక్కు కిజి వెన్బాతాన్.

26 అందెజె వాండ్రు, యూదురి రూలుదు ఇనిక రాస్త మనాద్. బాన్ ఇనిక సద్విజిని?”, ఇజి వెప్టోన్.

27 వాండ్రు, “నీ ప్రబుఅతి దేవుణుదిజ్ నీ పూర్తి మన్నుదాన్, నీ పూర్తి పాణమ్దాన్, నీ పూర్తి సత్తుదాన్, నీ పూర్తి బుద్ధిదాన్ ప్రేమిస్తెజ్”. మరి, “నిజి నీను ప్రేమిసిని లెకెండ్ మహివరిజ్ ప్రేమిసె అ ఇజి రాస్త మనాద్”, ఇజి వెప్టోన్.

28 అందెజె యేసు, “నీను నెగెణ్ వెప్టి. ఆహె కిఅ. అయావలె నీను ఎలాకాలం దేవుణు వెట బత్కినిలె”, ఇజి వన్ని వెట వెప్టోన్.

29 అయావలె అయా యూదురి రూలు నెన్పిస్సాన్ నీతి నిజాయితి మనికాన్ నాను ఇజి తోర ఆదెజ్ ఈహు వెన్బాతాన్, “నా పడకాదికాన్ ఎయెన్?”, ఇజి.

30 అందెజె యేసు ఈహు మహ్సి వెప్టోన్. “ఒరెన్ యెరూసలెమ్దాన్ డిగ్జె యెరికొ పట్టుమ్దు సొనివెలె సెగొండార్ డొజారి వన్నిజ్ అస్తార్. అస్తారె, వాండ్రు తోడిగితి మహికెజ్ లాగితార్. వన్నిజ్ ఇజ్రి పాణం ఇట్టారె డెయితారె డిస్త సాహార్.

31 యావలె ఒరెన్ యూదురి పుజెరి ఆ సరిదాన్ సొండ్రెజ్ పణి తాక్తాద్. వాండ్రు వన్నిజ్ సుడేతాండ్రె పడకదాన్ సాహాన్.

32 అయా లెకెండెనె, లేవి* ఒరెన్ ఆ సరిదాన్ నె సొహాన్. గాని వాండ్రుబా నుండేతాండ్రె పడకదాన్ ఎరలిజి సొహాన్.

33-34 అయా సరిదాన్ నె ఒరెన్ సమరియ వాండ్రు పయాణం కిజి మహాన్. వాండ్రు అర్తి మని వన్నిజ్ నుండేతాండ్రె వన్ని పాణం నొతాద్. వన్ని డగ్రు సొహాండ్రె ఒలివ ఇని నూనె, ద్రాక్షకల్లు వాక్తాండ్రె వన్ని గాయమ్కాజ్ తొహ్కాన్. వాండ్రు వన్ని సొంత గాడెదె ముస్కు ఎకిస్తాండ్రె ఉండ్రె లార్జి ఇండ్రె సొహాన్. వన్నిజ్ నెగెణ్ నుండేతాన్.

35 మహ్నా నాండిజ్ వాండ్రు రుండి వెండి రుపాయుజ్ లాగితండ్రె లార్జి నవ్కారిజ్ సితాన్. సితండ్రె, “వినిజ్ నెగ్రెండ నుండేత. వినివందిజ్ మరి కర్పు ఆతి మహిజ నాను మర్జి వానివలె అయా డబ్బు నిజి సీన”, ఇజి వన్ని వెట వెప్తాండ్రె సొహాన్.

36 యా కత వెప్తి వీస్తి వెనుక, యేసు వన్నిజ్, “ఱొజారి అస్తి వన్నిజ్ యా ముఎర్ లొఇ ఎయెన్ పడకాదికాన్ ఆనాన్, ఇజి నీను వెహాఅ”, ఇజి వెన్బాతాన్.

37 యూదురి రూలు నెన్పిస్తాన్, “వన్ని ముస్కు పాణం నొత్తికాండ్రె, వన్ని పడకాదికాన్”, ఇహాన్. అందెజె యేసు, “నీను సొన్సి యా లెకెండెనె కిత”, ఇజి వెప్తాన్.

మార్త మరియ

38 యేసు ని వన్ని సిసురు పయనం కిజి సొన్సి మహార్. ఉండ్రె నాటో సొహార్. అబ్బె మార్త ఇన్ని ఉండ్రె బోదెలి దన్ని ఇండ్రె వన్నిజ్ డగ్రు కిత్రాద్.

39 దనిజ్ మరియ ఇన్ని ఉండ్రె తజిసి మనాద్. అది ప్రబు పాదమ్క డగ్రు బస్తాదె వన్ని బోద వెంజి మహాద్.

40 మార్త విజు పణి వందిజ్ నండో బాద ఆజి వన్ని డగ్రు వాతాద్. వాతాదె, “ప్రబువా, నాను ఒరెనె పణి కిదెజ్ నా తజి డిస్త మనాద్. నిజి బాద సిల్లెదా? నజి తోడుః కిత ఇజి దనిజ్ వెహాఅ”, ఇజి వెప్తాద్.

41-42 అందెజె యేసు, “మార్త, నీను నండో పణిజ వందిజ్ విసారిసి బాద ఆజిని. గాని ముకెలమతిక ఉండ్రె. మరియ అయా నెగ్గి దనిజ్ కోరితాద్. దన్నిబాణిజ్ ఎయెన్బా అయాక లాగ్గి ఒతెజ్ అట్ఎన్”, ఇజి వెప్తాన్.

11

యేసు పార్లనం నెన్పిస్తాన్

1 ఉండ్రె నాండిజ్ యేసు ఉండ్రె బాడిఃదు పార్లనం కిజి మహాన్. వాండ్రు పార్లనం వీస్తి వెన్కా వన్ని సిసూర్ లొఇ ఒరెన్, “ప్రబువా, యోహాను వన్ని సిసూరిజ్ పార్లనం నెన్పిస్తాన్. అయాలెకెండే మజిబా పార్లనం నెస్పిన్అ”, ఇజి వన్నిజ్ వెప్తాన్.

2 అందెజె యేసు వరిజ్, మీరు పార్లనం కినివెలె ఈహు వెప్తు. “ముస్కు మన్ని మా బుబ్బు, లోకుర్ విజెరె నీ పేరు గొప్ప నెగ్గిక ఇజి గవేరం సిపిర్. నీను లోకుర్ విజెరిజ్ ఏలుబడిః కిపిన్.

3 రోజు రోజు కావాలిస్తి టిండి మజి సిదా.

4 మజి పాపమ్కు కితి వరిజ్ మాపు సెమిస్తి వజి నీను మా పాపం సెమిన్అ. తప్ప కిబిస్సిసెఇ అసెజ్ మాలోఇ రెవిండ మజి ఇడేఃఅ”, ఇజి వెప్తాన్.

* 10:32 10:32 దేవుణుగుడిఃదు రోజు సేవ కిని లేవి జాతిదు మన్నికాండ్రె లేవి ఇనికాన్.

5-6 మరి యేసు వరివెట ఈహు వెహ్లాన్. “మీ లోఇ ఒరెన్ వన్నిజ్ ఒరెన్ కూలాయెన్ మనాన్. నీను మదరెయితు వన్నిబాన్ సొన్ని, ‘ఓ కూలవాండ్రు, నజీ మూండ్రీ రొట్టెజ్ బదలు సిదా. ఎందనిజ్ ఇహిజు, మరి ఒరెన్ కూలాయెన్ పయాణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెహ్సాని.

7 అయావలె వాండ్రు లోఇహాన్, “నజీ బాద కిమ. సెహాల కెహ్తా మనాద్. నా ఇజి కొణ్డోర్ నా వెట నిద్ర కిజినార్. నిజ్జి సీదెజ్ నాను అట్ఎ”, ఇజి వెహ్సాండ్రా?

8 నాను మిజీ వెహ్సాన, వన్నిజ్ నిజ్జి సీదెజ్ ఇన్ఠం సిలిజ్బా వాండ్రు నిజ్జి సీనాన్. ఎందనిజ్ ఇహిజు, వాండ్రు కూలాయెన్ ఇజి ఒడిబిజి అహు కివీన్. గాని సిగు డిస్తాండ్రె ఏక ఏక లోసినాన్ ఇజి ఒడిబిజి నిజి కావలస్తిక విజు సీనాన్.

9 అందెజె నాను మిజీ వెహ్సాన, మీరు ఇనిక లోస్సిదెరొ, అక్క దేవుణు మిజీ సీనాన్. ఇనిక మీరు రెబాజినిదెరొ అక దేవుణు మిజీ సీనాన్. కొత్తు, మీ వందిజ్ దేవుణు సేహ్లా రెనాన్.

10 ఎందానిజ్ ఇహిజు, లోస్సి విజెరిజ్ దోహ్కె. రెబాని వన్నిజ్ తోరె ఆజినాద్, కొత్పిని వన్నివందిజ్ సేహ్లా రే ఆనాద్.

11 మీ లోఇ అహ్సాని ఆతికాన్ ఎయెన్బా, వన్ని మరిసి మెయ లోస్తిజు, సరాన్ సీనాండ్రా?

12 కొరు గుడ్డు లోస్తిజు, సొర్కుప్పి సీనాండ్రా?

13 అహిజు, మీరు సెఇకిదెర్ ఆతిజ్బా, మీ కొణ్డోరిజ్ నెగ్గి ఇనాయమ్కు సీదెజ్ నెస్సిదెర్. అహిజు, ముస్సు మన్ని మీ బుబ్బు వన్నిజ్ లోస్సి వరిజ్ ఎసానొ దేవుణు అత్తు సీనాన్”.

యేసు బయిల్జెబెలు

14 యేసు ఒరెన్ వన్ని బాణిజ్ గుల్ల దెయమ్దిజ్ పేర్జి మహాన్. ఆ దెయం డిసి సొహి వెన్కా గుల్ల ఆతి మహికాన్ వర్గితాన్. ఆక సుడతారె లోకుర్ విజెరె బమ్మ ఆతారె.

15 గాని వరి లోఇ సెగొండార్, “దెయమ్కాజ్ నెయ్కి ఆతి బయిల్జెబెలు సత్తుదాన్ వీండ్రు దెయమ్కాజ్ పేర్జినాన్ ఇజి వర్గితార్.

16 మరి సెగొండార్ వన్నిజ్ పరిస కిదెజ్ సుడతారె. దేవుణునె వినిజ్పోక్త మనాన్ ఇజి రుజుప్ కిదెజ్ ఉండ్రీ గుర్తు లెకెండ్ ఉండ్రీ బమ్మ ఆని పణికిజి తోరిస్అ ఇజి వెహ్హార్.

17 వాండ్రు వరి ఆలోసన నెస్తాండ్రె వరి వెట ఈహు వెహ్లాన్, “ఎమేణి దేసెమదికారబా వరిజ్ వారె జటిజ్ ఆజి కేట ఆతిజు పాడానాద్. ఆహా, ఉండ్రీ కుటుమదికారబా వరిజ్ వారె జటిజ్ ఆజి కేటఆతిజు, ఆ కుటుం నిల్వద్.

18 అయాలెకెండ్ సయ్తాను దెయమ్కుబా వరిజ్ వారె జటిజ్ఆజి కేట ఆతిజు, సయ్తాను వరి ముస్సు కిని ఏలుబడి ఎలాగ నిల్నాద్? సయ్తాను సత్తుదాన్ నాను దెయమ్కాజ్ పేర్జిన ఇజి మీరు వెహ్సానిదెర్ గదె.

19 అహిజు, మీ సొంత లోకుర్ ఇన్ని దని దనటాన్ దెయమ్కాజ్ పేర్జినార్. అందెజె మీ సొంత లోకుర్నె మీరు తప్పిదెర్ ఇజి రుజుప్ కిజినార్.

20 నాను దేవుణు సత్తుదాన్ దెయమ్కాజ్ పేర్త మన్నుఇహిజు దేవుణు ఏలుబడి కినిక మీడగ్రు వాతమనాన్ ఇజి రుజుప్ ఆజినాద్.

21 విజు అయదమ్కు తోడిగిజి ఒరెన్ సత్తుమనికాన్ వన్నిఇల్లు అస్తి విజు కావ్ కితిజు, ఇనికబా సొరిసాన్ఎద్.

22 గాని వినిజ్ మిస్తి నండొ సత్తు మనికాన్ ఒరెన్ వినిజ్ అస్తాండ్రె విని మున్సు గెలిస్తీజు, వీండ్రు నమ్మితి అయుదమ్కు విజు వాండ్రు లాగ్గి, విని ఆస్తి సీబాన సీనాన్.

23 నా దరిజ్ మన్ఇకాన్ నజీ పగాతికాన్. నా వెట మంద కిఇకాన్, సెద్రిస్సాన్.

24 ఉండ్రె దెయం ఒరెన్ వన్నిజ్ డిఃస్తి సాహి వెనుక, దనిజ్ మండ్రెజ్ బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దోహ్కఇతిజ్, “నాను డిఃస్తి వాతి నా ఇండ్రొ మర్జి సానాలె”, ఇజి వెప్సాద్.

25 మర్జి వాతిజ్ అది డిఃస్తివాతికాన్ నెగెండ్రె సిపాజి సుబ్బరం కిజి ఇల్లు లెకెండ్రె, నెగెణ్ మనాన్ ఇజి నెస్తాద్.

26 నస్తివలె అది మర్రి సొన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్కు తనాద్, అవిక్ వన్ని లొఇ సొన్ని అబ్బు కిసె. అయవలె వన్ని గతి ముందాహి దన్నిజ్ మున్సు కస్ట్ర్ మానాద్.

27 యేసు యా మాటెజ్ వెహి మహివలె, ఆ మంద లొఇ మన్ని ఉండ్రె బోదెలి, “నిజీ కాస్తి పోకతి నీ యాయ అంతు సిల్లి సర్ద మంజినికాద్”, ఇజి డటం వెప్సాద్.

28 అయావలె వాండ్రు, “నిజమ్నె, గాని దేవుణు మాట వెంజి అయావజ నడిఃని విజెరెబా అంతు సిల్లి సర్ద మంజినికార్”, ఇజి వెప్సాన్.

29 లోకుర్ మరి నండొ కూడితి మహివలె, వాండ్రు ఈహు వెప్సాన్. “యా తరమ్దికార్ నండొ సెఇకార్. వారు ఉండ్రె గుర్తు లెకెండ్రె ఉండ్రె బమ్మ ఆని పణి కిఆ ఇజి వెన్బాజినార్. గాని దేవుణు ప్రవక్త ఆతి ఓనెజ్ జర్గిదిక ఆఎండ, మరి ఇన్ని గుర్తుబా పరిజ్ తోర్ఎద్.

30 నినవె పట్టుమ్దివరిజ్ ఓన ఎలాగ ఉండ్రె గుర్తు మహండ్రొ అయాలెకెండ్రె లోకు మరిసిఆతి నాను యా తరమ్దివరిజ్ ఉండ్రె గుర్తు మనాన్.

31 అక్కరి దినమ్ది తీర్పుదు, దసిణ్ దేసెమ్ది రాణి యా తరమ్ది లోకుర్ వెట నిజ్నాదె వరి మున్సు నేరం మొప్పాద్. ఎందనిజ్ ఇహిజు, సొలోమోను వెహిని గెణం మన్ని మాటెజ్ వెండ్రెజ్ బూమి కొసాదు మన్ని దని దేసెమ్దాన్ అది వాతాద్. ఏలు సొలోమొనుజ్ మిస్తి పెరికాన్ ఇబ్బె మనాన్.

32 కడెవేరి దినమ్ది తీర్పు, నినివె పట్టుమ్ది లోకుర్ యా తరమ్ది లోకుర్ వెట నిల్నారె, వరి మున్సు నేరం మొప్పార్. ఎందనిజ్ ఇహిజు, ఓన వెహి బోద వెహారె, వారు పాపమ్కు డిఃసి ఒప్పుకొటార్. ఏలు ఓనెజ్ మిస్తి పెరికాన్ ఇబ్బె మనాన్.

ఒడొల్ది దీవవందిజ్ వెహినాన్

33 ఎయెర్బా దీవ కసిసి వెనుక డాఃప్పినొ, తూము ముసిసొ ఇడ్ఎర్. గాని లొఇ వానివరిజ్ జాయి తోర్దెజ్ ఇజి దీవ కంతూదుద్నె మున్సునె ఇడ్వార్.

34 నీ ఒడొల్ది దీవ లెకెండ్రె నీ కణుకు. నీ కణుకు నెగ్రెండ్రె మనివలె, నిజీ విజు సుడొదెజ్ ఆనాద్. అయాకెజ్ సెఇకెజ్ ఆతిజు, నిజీ సుడొదెజ్ అట్ఇ.

35 అందెజె సీకటు మన్ఎండ, నాను నెస్పిస్సి నిజమాతి సజతిజ్ ఆతి జాయి మీ మన్సుదు మండ్రెజ్ సుడొదు.

36 అందెజె మన్సు పూర్తి అయా జాయిదాన్ నిడ్రింతి మహిజు, అయాక నాను నెన్పిస్తి వజు, నెగ్రెండ్రె మీరు బత్తిజినిదెర్ ఇజి తోర్వాద్. ఉండ్రె పెరి జాయి నీ మున్సు డెయితిజు ఎలాగ మంజినాదొ, అయాలెకెండ్రె అయా జాయి నాను నెన్పిస్తి వజు మీరు బత్తిజినిదెర్ ఇజి తోర్వాద్.

37 యేసు వర్గజి వీస్తి వెనుక ఒరెన్ పరిసయు వాండ్రు, వన్ని వెట ఉండెజ్ రఅ, ఇజి కూక్తాన్. అందెజె వాండ్రు లోఇ సాహంద్రె ఉండెజ్ బస్తాన్.

38 ఉణి ముజాల వాండ్రు యూదురిజ్ మన్ని అలవాటు వజ కియు నోర్బావితాన్ ఇజి నెస్తాండ్రె, ఆ పరిసయు వాండ్రు బమ్మఅతాన్.

39 అందెజె ప్రబు ఈహు వెప్తాన్, “పరిసయురుజాండె, లోకుర్ ముస్సుహాన్ మిడిసి ఇడ్డి గిన్నెజ్ని సాడువెజ్ లెకెండె మన్నికిదెర్? మీరు మిజిబా వెల్లిహాన్ నుడిజు నెగ్గిపరి లెకెండె తోరె ఆజినిదెర్. గాని మీ మన్ను నెఇ బుద్దిజాణిజ్, కకుర్తిదాన్ కూడితి ఆసదాన్ నిండ్రెతె మన్నె.

40 బుద్ది సిలికిదెరా, ఒడెజ్ తయార్ కిత్తి దేవుణునె మీ మన్నుదు మన్ని ఆలోసనమ్కు నెసినికాన్

41 మీరు కనికారం ఆజి, మిజి కల్గితి మన్ని లోఇహాన్ సిల్లి వరిజ్ దాన సిదు. అయావలె దేవుణు ఎద్దు నెగ్గికిదెర్ ఆనిదెర్.

42 పరిసయురుజాండె, అబాయా, మిజి ఎసానొ కస్టమ్కు వానెలె. ఎందానిజ్ ఇహిజు, పుదిన, సదాప, విజు కునెజ్, విజు దనిజ్బా దనం బాగం సీజినిదెర్. గాని మీరు లోకురిజ్ నాయం కిఇదెర్. దేవుణుదిజ్ ప్రేమిన్ఇదెర్. రుండిబా ఉండ్రెలెకెండె కిజి మంజినిక ఇహిజు ఒద్దె నెగ్గెండె మహద్ మరి.

43 పరిసయురుజాండె, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, యూదురి మీటిజ్ ఇల్కాజ్ ముకెలమాతి బాడిజు బస్తెజ్ మీరు ఆస ఆనిదెర్. సతెజు నడిమి పెరికార్ ఇజి మాడెసె ఆదెజ్ కోరిజినిదెర్.

44 పరిసయురుజాండె, అబాయా, మిజి ఎసానొ కస్టమ్కు వానెలె. ఎందానిజ్ ఇహిజు, మీరు తోర్ఇ దూకిలెకెండె మంజినిదెర్. లోకుర్ దూకి ఇజి నెన్ఎండె వన్నా ముస్సు నడిజినార్.

45 అయావలె యూదురి రూలు నెన్పిస్నాన్ ఒరెన్, “బోదకినికి, నీను యా లెకెండె వెప్పి మజిబా దుసలాడిజిని”, ఇజి వెప్తాన్.

46 అందెజె యేసు, యూదురు రూలు నెస్సిస్సికిదెరా, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, లోకుర్ కిదెజ్ నసా కస్టం మన్ని యూదురి రూలుజ్, అలవాటుజ్ వారు కిదెజ్ ఇజి వెప్పినిదెర్. గాని మీరు వరిజ్ ఉండ్రె డెడెస్సు దాన్బా తోడె కిఇదెర్.

47 యూదురి రూలు నెస్సిస్సికిదెరా, అబాయా మిజి ఎసానొ కస్టమ్కు వానెలె. ఎందానిజ్ ఇహిజు, మీ అనిరిజ్ సప్తి ప్రవక్తరి, దూకిజ్ ముస్సు మీరు గుండమ్కు పెర్జినిదెర్.

48 అయావలె వారు కితిపణివెట మీరు కూడితి మనిదెర్ ఇజి రుజుప్ కిజినిదెర్. సాక్సీరెకెండె మనిదెర్ వారు ప్రవక్తరిజ్ సప్తార్. మీరు వరి గుండమ్కు పెర్జినిదెర్.

49 అందెజె, దేవుణు వన్ని గెణమ్దాన్, నాను వరి నడిమి ప్రవక్తెజు, అపొస్తుడుజు షొక్కు. వరి లోఇ నెగొండారిజ్ వారు సప్తార్లె. మరి నెగొండారిజ్ మాలెజ్ కిసార్లె.

50-51 యా లోకం పుట్టి బాణిజ్ మొదొల్లి లోకుర్ సప్తి విజు ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజు, ఏబేలు నల దాన్ మొదొల్లి జెకరియ నల దాక. జెక్యెజ్ నంద సుర్ని మాలి పీటని దేవుణు వందిజ్ కేటఅతి గది, దినిజ్ నడిమినె సప్తార్. వరిజ్ విజెరిజ్ సప్తికెజ్ విజు యా తరమ్దివరి పణినె ఇజి నాను నిజం మీవెట వెప్పిన.

52 యూదురి రూలు నెస్సిస్సికిదెరా, అబాయా, మిజి ఎసానొ కస్టమ్కు వానెలె.

ఎందానిజ్ ఇహిజ, దేవుణు వందిజ్ మన్ని గెణమ్దు నడిఱిసిని సేహాలది తాలం మీరు అసినిదెర్. మీరు దేవుణుదిజ్ టెటాజ్ నెన్ ఇదెర్. దేవుణుదిజ్ నెన్నెజ్ ఆస మన్ని వరిజ్ మీరు అడ్డు కిజినిదెర్.

53-54 వాండ్రు అబెదాన్ సొహి వెనుక, పరీసయిరు యూదురి రూలు నెస్పిస్పికార్ నండొ కోవమ్దాన్ వన్నిముస్కు నేరం మొప్తార్. వన్ని వెయ్దాన్ వాని మాటెజ లొఇ తపుజ్ అన్నెజ్ ఇజి నండొ సజతిజ వందిజ్ ప్రన్నెజ్ వెనబాజి మహార్.

12

1 నస్తివలె వెయుజ్ వెయుజ్ లోకుర్ కూడఱిజి వాతార్. ఒరెన్దిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదొల్స్తాన్. “మాపు నెగ్గికాప్ ఇజి పరిసయేరు తోరె ఆని వేసం, పులాని దూరు లెకెండ్ మనాద్. అందెజె జాగర్ల మండ్రు.

2 డాఱికి మన్నికెజ్ విజు తోరెఆనెలె. నెన్ ఏండ ముస్కు మన్నికెజ్ విజు నెనె ఆనెలె.

3 అందెజె మీరు సీకటుదు వర్గితికెజ్ జాయిదు వెనార్. ఇహిజ, డాఱిజె వర్గితికెజ్ విజెరె వెనార్లె. మీరు గదిజ, గిబ్బిదు వర్గితికె మెడెజెజ ముస్కు సాట్నార్లె.

4 నా కూలెజాతి మీ వెట వెస్సిన, ఒడొల్దిజ్ సప్తి వెనుక మరి ఇనికబా కిదెజ్ అట్ ఇ వరిజ్ తియెల్ ఆమాట్.

5 గాని మీరు ఎయెరిజ్ తియెల్ ఆదెజ్ ఇజి నాను నెన్ పిస్సు. ఒడొల్దిజ్ సప్తి వెనుక, ఎలాకాలం మంజిని బాడిఱిదు పొక్తెజ్ అతికారం మన్ని వన్నిజ్ తియెల్ ఆదు. నిజమె నాను వెస్సిన, వన్నిజ్ తియెలాదు.

6 అయ్దు పంట పొటిజ రుండి కాసుదిజ్ పొర్నార్ గదె? గాని వన్కాలోఇ ఉండ్రె దనిజ్ బా దేవుణు పోస్ ఎన్.

7 మీ బురాది కొప్పు విజుబా దేవుణు లెకిస్త మనాన్. తియెలామాట్. మీరు నండొ పంట పొటిజ మిస్తి విలువ మన్నికిదెర్.

8 నాను మిజి వెస్సిన, లోకుర్ ముజాలెనజి ఒపుకోణి ఎయెవన్నిజ్ బా లోకుమరిసి ఆతి నాను దేవుణు దూతెజె ఎద్దు ఒప్పుకోణా.

9 గాని లోకుర్ ఎద్దు నజి నెన్ ఎ ఇన్ని వన్నిజ్ దేవుణు దూతెజ్ ఎద్దు నాను బా నెన్ ఎ ఇజి వెహ్నా.

10 లోకుమరిసి ఆతి నా ముస్కు ఎయెన్ బా పడఱిజ మాట వర్గితిజ, దేవుణు వన్నిజ్ సెమిస్నాన్. గాని దేవుణు ఆత్మదిజ్ దూసిస్సి ఎయెరిజ్ బా దేవుణు సెమిస్ ఎన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజ ఎద్దునొ, పెద్దల్లెజ ఎద్దునొ ఒనార్. అయావలె ఎలాగ మర్జి వెప్తాజ్, ఇనిక వెప్తాజ్, ఇనిక వర్గిదెజ్ ఇజి బెజ ఆమాట్.

12 ఎందానిజ్ ఇహిజ, మీరు వర్గిదెజ్ మనిక అయా గడిఱియద్ నె దేవుణు ఆత్మ మిజి నెన్ పిస్నాన్.

ఆస్తివన్ని బుద్దిసిల్లి వన్నివందిజ్ నెన్ పిసిని కత

13 అయావలె ఆ మందలొఇ ఒరెన్, “బోదకినికిదా, నా బుబ్బు గణస్తి దనిజ్ నజి వానివంతు సీబాజి సిఅ ఇజి నా అన్నెజ్ వెహ్ అ”, ఇజి వెప్తాన్.

14 అయావలె యేసు, “ఒరె, మీ ముస్కు తీర్పు కిని వన్ని వజనొ, సీబాజి సీని వన్ని వజనొ నజి ఎయెన్ నిల్ ఫ్రాన్?”, ఇజి వెప్తాన్.

15 మరి వరిజ్ వెహ్లాన్, “జాగర్త మండ్రు. ఇని దనిజ్బా లావుఅసెజ్ ఆమాట్. ఎందనిజ్ ఇహిజ, ఎసా ఆస్తిమన్నికాన్ ఆతిజ్బా, వన్ని ఆస్తిలోఇ వన్ని బత్తు ఆవద్. ఇహిజ ఆస్తివన్నిజ్ నిజమాతి బత్తు సివద్.

16 మరి వాండ్రు వరిజ్ కతవజ ఈహు నెన్పిస్తాన్. “ఒరెన్ ఆస్తి మనివన్నిజ్ బూమిదు నండో పంట పండితాద్.

17 అయావలె వాండ్రు, ‘నా గింజ ఇడదెజ్ నజి బాడ్డి సాల్ఎద్. అందెజె ఇనిక కిదెజ్?’, ఇజి వన్నిమన్నుదు వాండ్రు ఒడిబితాన్.

18 ఒడిబితాండ్రె, ‘నాను ఈహుకిన. నా గాదిజ్ లాగ్గి పెరికెజ్ కిన. అబె నా గింజెజ్, మహి సామానమ్కుజ్ విజు ఇడ్డు’, ఇజి వెహ్లాన్.

19 మరి నాను, నా వెట ఈహు వెహ్లా, ‘నజి నండో పంటజ్ వందిజ్ నండో ఆస్తి కుడుఃప్త మన్ను. సుకం ఆఅ. ఉణఅ, తినఅ, సర్ద ఆజి మన్అ’, ఇజి.

20 గాని దేవుణు వన్నిజ్, ఓ బుద్ది సిలికి, యా రెయునె నీ పాణం లొసిన. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజి

21 సొంత బత్తు వందిజ్ ఆస్తి కుడుఃప్తి ఎయెరిజ్బా యా లెకెండ్ వానాద్. గాని, దేవుణు ఎద్దు, దేవుణుదిజ్ ఇస్టం ఆనివజ వాండ్రు ఆస్తిమనికాన్ ఆవన్”.

ఇని దనిజ్బా విసారిస్మాట్.

22 మరి, యేసు వన్ని సిసూర్వెట ఈహు వెహ్లానాన్, “అందెజె, నాను మిజి వెహ్లాన్, మీరు ఇనిక ఉండెజ్ ఇజి పాణం వందిజ్ విసారిస్మాట్. ఇనిక తొడిగిదెజ్ ఇజి ఒడోల్వందిజ్ విసారిస్మాట్.

23 ఎందానిజ్ ఇహిజ, టిండి మున్ను పాణం ముకెలమతిక. సొక్కెజ్ మున్ను ఒడోల్ ముకెలమతిక.

24 కాకిజవందిజ్ సుడోదు. అవి విత్తె, కొయిఉ, వన్యాజ్ గాదినొ గప్పెజ్నొ సిల్లు. గాని దేవుణు వన్యాజ్ తిండి సీజినాన్. అహిజ పొటిజ మున్ను మీరు ఎసా విలువ మనికిదెర్.

25-26 మీ లొఇ ఎయెన్బా విసారిసి వన్ని బత్తుదిజ్ ఉండ్రె గంటబా కుడుఃప్తి మీ వయసు పిరిఫైజ్ అట్నిదెరా? అట్బదెర్. యా ఇజ్రి వణికిదెజ్ మీరు అట్బదెర్ ఇహిజ మరి ఎందనిజ్ మహి పెరి సజతిజ వందిజ్విసారిస్సిదెర్.

27 పూజదిజ్ సుడోదు. అవి కన్టబడిఃఉ. సొక కిదెజ్ నూలుజ్ తయార్ కిఉ. ఆజ్బ విజు ఆస్తి కలిగితి మన్ని సొలోమొన్రాజు యా ఉండ్రె పూజలెకెండ్ సొకు మన్ని ఉండ్రె సొక్కె తొడిగివితాన్ ఇజి నాను మిజి వెహ్లాన్.

28 నేండ్రు మంజి విగెహిజ్ సిసూదు విసిర్ని మడిఃజ మంజిని గడ్డిదిజ్ యా లెకెండ్ దేవుణు సొకు సితాన్, ఇహిజ ఇజిరి నమకం మన్నికిదెరా మరి ఒద్దె నెగెండ సొకెజ్ మిజిసొక్కెజ్ తొడిగిన్పివెండ్రా?

29 ఇనిక ఉండెజ్, ఇనిక తిండ్రెజ్ ఇన్ని దనిజ్ ఎత్తు కిజి విసారిస్మాట్.

30 ఎందనిజ్ ఇహిజ, దేవుణుదిజ్ నెన్ఇకార్నె వన్కు వందిజ్ రెబాజినార్. మిజి యాకెజ్ కావాలె ఇజి మీ బుబ్బాతి దేవుణు నెస్సాన్.

31 గాని దేవుణు మిజి ఏలుబడిః కినాన్ ఇజి ఆసఆదు. అయావలె దేవుణు మిజి కావాలిస్తికెజ్ విజు సినాన్.

32 ఇజిరిమంద తియెల్ ఆమాట్. దేవుణు, వన్నిబత్తుదు రాజులెకెండ్ ఇట్టి వరిజ్ నెగ్గెకెజ్ సిదెజ్ మీ బుబ్బ ఇస్టంఆత మనాన్.

33 మిజి కల్గితి మనికెజ్ పొర్ని బీదవరిజ్ సీదు. అయావలె మీరు దేవుణు మంజిని బాడిడు మీ వందిజ్ ఆస్తిగణస్సిదెర్. అబ్బె డొజారి రవన్. కరి తిన్ ఏద్. అందెజె మీ ఆస్తితకు ఆవిద్.

34 ఎందనిజ్ ఇహిజు, మీ ఆస్తిఎంబె మనాదొ, అబెనె మీ మన్పుబా మంజినాద్.

35-36 ఎస్తివలెబా పణికిదెజ్ నడుఃము తొహె ఆజి, తయార్ ఆజి మండ్రు. మీ దీవెజ్ ఎస్తివలెబా కసిసి మండ్రు. పెండ్లి విందుదాన్ ఇండ్రొ వాజిని ఎజుమానిజ్ ఎద్రు సుడఃజి మంజిని పణిమణిసిర్ పొలిసి మండ్రు. ఎజుమాని విందుదాన్ వాజి సేప్లా కొత్తివెలె వెటన సేప్లా వాండ్రు రేనాన్. నన్నివరిజ్ పొలిసి మండ్రు.

37 ఎజుమాని వాతివెలె, వన్ని వందిజ్ తెలి మంజి ఎద్రు సుడఃజి మంజిని పణిమణిసిరిజ్ నెగెద్. నిజమె నాను వెహ్సిన, ఎజుమాని, నడుఃము తొహె ఆజి, బోజెనమ్దిజ్ వాతి వరిజ్ బనె కిజి వరిజ్ తిండి సీనాన్.

38 మదరెయతునొ కోడిఃజామ్నొ ఎజుమాని వాతివెలె, వన్నివందిజ్ ఎద్రు సుడఃజి తెలి మంజిని వన్నిజ్ నెగెద్.

39 ఎమేణి గడిఃయదు డొజారి వానాన్ ఇజి ఇండ్రొణి ఏజుమాని నెస్తిజు వాండ్రు తెలిమంజి వన్నిఇల్లు బొరొ కివీండ సుణాన్ ఇజి మీరు నెస్త.

40 మీరు నా వందిజ్ ఎద్రు సుడఃజి గడ్డిఃయాదు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజినె నెన్పిస్సిదా, విజెరిజ్ నెన్పిస్సిదా?”, ఇజి యేసుజ్ వెన్బాతాన్.

42 అందెజె యేసు, “నమకం మని, బుద్దిమని గొత్తి మణిసి ఎయెన్? ఎయెన్ ఇహిజు, ఇండ్రొణి మహి గొత్తియారిజ్ సరిఆతి గడ్డిఃయా సుడఃజి వరి కార్డువజ వరిజ్ దొహ్క మన్ని తిండి సామనమ్కు సీదెజ్ ఇజి ఎజుమాని వరిముస్కు ఏర్పాటు కిత్తికాండ్రె.

43 ఎజుమాని మర్జి వానివలె వెప్తివజ పణికితి వన్నిజ్ నెగెద్.

44 అయ ఎజుమాని వన్నిజ్ కల్గితి మన్ని విజు దనిముస్కు అతికారం మని వన్నిలెకెండ వన్నిజ్ కినాన్, ఇజి నాను నిజం వెహ్సిన.

45-46 గాని, ఉండ్రీ వేల యా గొతియయెన్, ‘నా ఎజుమాని వాదెజ్ ఆల్సెం ఆజినాన్’ ఇజి వన్నిమన్పుదు ఒడిఃబిజి, మహి గొతియారిజ్ గొతియాణికాజ్ డెయిజినాన్. వాండ్రు ఉణిజి, తింజి సొస్త మహాన్. ఆహె మహిజ్, వాండ్రు ఎద్రు సుడఃజి దినమ్దు నెన్ఇ గడియాదు వన్ని ఎజుమాని వానాన్. అయావలె వాండ్రు వన్నిజ్ కత్తి దేవుణుదిజ్ నమ్ఇ వరివెట వరి వందిజ్ తయార్ కిత్తిమన్ని బాడ్డిదు పొక్వాన్.

47 ఎజుమాని ఇస్త్మకు నెసిబా అయావజ కిఎండ తయారాజి మన్ఎండ మన్ని గొతియ వన్నిజ్ నండొ సిక్సినాన్.

48 ఎజుమాని ఇస్త్మకు నెన్ఎండ, సిక్సదిజ్ తగితి పణిజ్ కితి వరిజ్ కండెక్ సిక్సె సీనాన్. ఎయెరిజ్ దేవుణు నండొ సిత్త మనాండ్రొ వన్నిబాణిజ్ నండొ లొస్సాన్. ఎయెన్బాన్ దేవుణు మరి నండొ ఒపజెప్త మనాండ్రొ, వన్నిబాణిజ్ నండొ లొస్సాన్.

49 సిసు లెకెండ మన్ని దేవుణు సీని సిక్స యా లోకమ్దు తత్తెజ్ నాను వాతమన. ఆక విజెరిజ్ సుర్నాద్. ఎలునె సురుదెజ్ మొదొల్స్తిజు బాగ మంజినాద్, ఇజి ఆస ఆజిన.

50 కన్యం ఇని ఉండ్రీ బాప్తిసంబా లాగెఆదెజ్ మనాద్. అక్క పూర్తి కినిదాక నజీ నండో విసారం మంజినాద్లె.

51 యా లోకమ్దు సమాదనం తతెజ్ నాను వాతమన్న ఇజి మీరు ఒడిబిజినిదెరా? సిల్లె, కేటకిదెజ్నె వాత మన్న.

52 ఏలుదాన్ అయ్దుగురు మంజిని ఉండ్రీ కుటుం వరిజ్ వారె కేట ఆనార్లె. మువ్రి ఉండ్రీ పడెకాద్ రివ్రి మరి ఉండ్రీ పడెకాద్.

53 వారు కేట ఆనార్లె. అప్పొసి మరిసిజ్ని, మరిసి అప్పొసి జ్ని, అయిసి గాల్నిజ్ని, గాడ్ని దని అయ్సిజ్ని, మీమ్సి దన్ని కొడెసిజ్ని, కొడెసి దన్ని మీమ్సిజ్ని పడివిండ మంజినాద్లె.

54 అయావలె వాండ్రు మందలోకుదిజ్ ఈహు వెహ్లాన్, “పడెమటదాన్ మొసావ్ వాతిక సుడెతిజి పిర్లు వానాద్లె, ఇజి మీరు వెప్పొదెర్. ఆహె జర్గినాద్.

55 దసిణదాన్ గాలి వాతిజి గొప్పఎండ కినాద్ ఇజి వెప్పొదెర్. ఆహె జర్గినాద్.

56 వేసం కినికిదెరా, మీరు బూమిదు ఆగాసమ్దు జర్గినికెజ్ సుడెజి గుర్తు అస్తెజ్ నెస్సిదెర్. మరి ఎందానిజ్ యా కాలమ్దు జర్గినికెజ్ గుర్తు అస్తెజ్ మీరు అట్విండ మంజినిదెర్?

57 ఎమేణిక నాయం ఇజి మిజి మీరె తర్పు కిదెజ్ అట్ఇదెరా?

58 మీ ముస్కు నేరం మొప్తివన్నివెట లాయిరి కోర్టుదు సొన్ని మహివలె సర్దు వన్ని వెట రాజనం ఆదెజ్ సుడెదు. సిలిజ, వాండ్రు మిజి తీర్పు కిని వన్ని డగ్రు ఈడిసి ఒనాన్. తీర్పు కినికాన్ జమాన్జ ఒపజెప్పాన్. వాండ్రు మిజి జెలిదు ఇడ్మాన్.

59 తీర్పు కినికాన్ లొన్ని డబ్బు విజు సీనిదాక జెలిదాన్ వెల్లి వాదెజ్ అట్ఇదెర్ ఇజి నాను మిజి వెప్పొన.

13

పాపం డిసిసిదు, సిల్లిజ నాసనం వానాద్

1 అయావలె బాన్ మహికార్ సెగొండార్ యేసుజ్, గలీలియాతి సెగొండార్ వరిజ్ వెహ్లాన్. ఇనిక వెహ్లాన్ ఇహిజ, గలీలియాతికార్ పూజ కిజి మహివలె, పిలాతు వరిజ్ సప్పిస్తాన్. అయావలె పూజసిత్తి నలని లోకుర్నల కూడితాద్.

2 అందెజె యేసు వరిజ్, “వరిజ్ సప్తారె యా లెకెండ నండో బాదెజ్కితార్. అందెజె వారు మహి గలీలియాతి వరి విజెరె ఇంక నండో పాపం కితికార్ ఇజి మీరు ఒడిబిజినిదెరా?

3 సిల్లెద్ ఇజి మీవెట వెప్పొన. గాని మీరు పాపమ్కు డిసిసిదు. సిల్లిజ, మీరు విజిదెరెబా అయాలెకెండ నాసనం ఆనిదెర్.

4 మరి సుడెదు, సిలొయొము ఇని పట్టుమ్దు నిరిండ తొప్తిమన్ని గుడిః అర్తిజ్, యెరూసలెమ్దు బత్కిజి మహికార్ పద్వినిమితి మణిసి సాతార్. వారు బత్కిజిని వరి ఇంక నండో సెఇకార్ ఇజి మీరు ఒడిబిజినిదెరా?

5 సిల్లె ఇజి నాను మీ వెట వెప్పొన. గాని మీరు పాపం డిసి సిదు. సిలిజ, మీరుబా అయాలెకెండ నాసనం ఆనిదెర్.

6 మరి వాండ్రు కతవజి ఈహు నెన్పిస్తాన్. ఒరెన్ వన్నిజ్ ద్రాక్కు టోట మనాద్. అబ్బె వాండ్రు బొడెమరాన్ ఉండ్రీ ఉణుస్తాన్. వాండ్రు దన్నిపట్టు రెబాతివెలె ఇనికబా దొహ్కెతాద్.

7 అందెజె వాండ్రు, ‘ఇదిలో నాను మూండ్రి పంటెజాణిజ్ యా మరాతి పట్టుజ్ రెబాజి వాజిన. గాని ఇనిక బా దోహ్కెవతాద్. దినిజ్ కత్తి విసిర్అ. దిన్నిదనాట్ యా బూమి ఎందనిజ్ పాడాఃదెజ్?’, ఇజి టోట కావ్కిని వన్నివెట వెప్తాన్.

8 అందెజె వాండ్రు, “బాబు యా ఉండ్రి ఏంటు మనిద్. నాను సుటులం కార్సి గతం పొక్కి సూణాట్.

9 అక్కపట్టు అన్నిజ నెగెద్, అస్ఇజ కత్తి విసిర్అ”, ఇజి వెప్తాన్.

విస్త్రాంతిదినమ్దు నడుఃము వజితి ఉండ్రి బోదెలిదిజ్నెగెణ్కిజినాన్

10 ఉండ్రి విస్త్రాంతిదినమ్దు, యేసు ఉండ్రి యూదురి మీటిజ్ ఇండ్రో బోద కిజి మహాన్.

11 అబె పద్ఎనిమితి పంటెజాణిజ్ నడుఃము వక్కి దెయం అస్తి ఉండ్రి బోదెలి మహాద్. దన్ని నడుఃము వజితిజ్, అసల నెగెణ్ నిల్దెజ్ అట్ఎద్.

12 యేసు దనిజ్ నుడఃతాండ్రె, “రఅ”, ఇజి డగ్రు కూక్తాన్. మరి, “బీబి, నిజి మన్ని క్ష్మవ్కాణిజ్ నాను డిస్పిన్న”, ఇజి దనిజ్ వెప్తాన్.

13 మరి దనిముస్కు వన్ని కికు ఇట్టాన్. వెటనె అది నెగెణ్ నిపాదె, దేవుణుదిజ్ పొగిడిఃతాద్.

14 విస్త్రాంతి దినమ్దు యేసు నెగెణ్ కితిజ్, యూదురి మీటిజ్ఇండ్రోణి అతికారి నండో కోపం ఆతాన్. ఆతాండ్రె, లోకురిజ్పణి కిదెజ్ ఆరు దినమ్కు మనె. అందెజె మీరు ఆ దినమ్క లోఇ వాజి నెగెణ్ ఆదు. విస్త్రాంతి దినమ్దు రమాట్”, ఇజి వెప్తాన్.

15 అందెజె యేసు, “ఓ వేసం కినికిదెరా, మీ లోఇ విజదెరెబా మీ డాఃనుదిజ్, మీ గాడఃదెదిజ్ విస్త్రాంతి దినమ్దు సాలాదాన్, డిసిసి ఒసి ఏరు సీజనిదెర్ గదె?

16 అహిజ, అబ్రాహముజ్ తెగ్గతి యా బోదెల్దిజ్ పద్ఎనిమితి పంటెజ్ సయ్తాను తొప్తా ఇట్టా మనాన్. విస్త్రాంతి దినమ్దు దనిజ్ తొహ్కీ బాణిజ్ డిస్పిన్తెజ్ కూడఃఎదా?”, ఇజి వరిజ్ వెప్తాన్.

17 వాండ్రు యా మాటెజ్ వెప్తావలె వన్ని పగాతికార్ విజెరె సిగు ఆతారె, మొకొం డిప్తార్. గాని లోకుర్ విజెరె వాండ్రు కితి గొప్ప పెరిపణిజి వందిజ్ సర్ద్ర ఆతార్.

18 మరి యేసు వన్ని లోకురిజ్, “దేవుణు వన్ని లోకురిజ్ కిని ఏలుబడిః ఇన్ని దనిజ్ పోలిత మనాద్. ఇనిదనివెట నాను పోలిన్న?

19 అక్కసర్ను గింజదిజ్ పోలిత మనాద్. ఒరెన్ ఆక ఒతండ్రె వన్ని టోటాదు ఉణుస్తాన్. ఆక పిరిసి మరాన్ ఆతాద్. ఆగాసం ముస్కు ఎగ్రిజిని పొటిజ్ దనికొమెజి ముస్కు గూడుక్ తొహ్కె”, ఇజి వెప్తాన్.

20 మరి వెప్సినాన్, “దేవుణు వన్ని లోకురిజ్ కిని ఏలుబడిః ఇని దని వెట పోలిత మనాద్?

21 అక్క పులాని దూరుదిజ్ పోలిత మనాద్. ఉండ్రి బోదెలి అక్కఒతాదె మరి నండో దూరు వెట కలప్తాద్. వాక్తి దూరుదిజ్బా పులాజ్ కితాద్.

ఇహ్యు సరి

22 యేసు యెరూసలెమ్దు సొండ్రెజ్ ఇజి పయాణం కిజి మహివలె సరి పడఃకాద్ మన్ని నాహ్యజ్ పట్టుమ్కాజ్ బోదిసి మహాన్.

23 అయావలె ఒరెన్, “ప్రబువా, నెగొండారె దేవుణు సిక్సదాన్ తప్తె ఆనారా?”, ఇజి వెన్బాతాన్.

24 అందెజె వాండ్రు వరిజ్, “ఇహ్యూ దార్బందరం దాన్ డుగ్దెజ్ నండో కస్తబడిడు. ఎందనిజ్ ఇహిజ, నండొండార్ సొండ్రెజ్ సుడేజినార్. గాని వారు సొండ్రెజ్ అటవర్ ఇజి మీ వెట వెహ్సిన.

25 ఇండ్రొణి ఎజుమాని నిజ్జి సేహ్లా కెహ్తి వెన్యా మీరు వెల్లినిల్లి, సేహ్లా కొత్తి “బాబు, మజి సేహ్లా రేఅ”, ఇజి వెహ్సినెదర్. అయావలె వాండ్రు, “మీరు ఎమేణికిదెరో నాను మిజి నెన్ఎ”, ఇజి వెహ్సన్.

26 అందెజె మీరు, “ని వెట మాపు ఉణిజి, తింజి మహవ్. నీను మా వీదిజ బోద్దిస్తెగదె”, ఇజి వెహ్సినెదర్.

27 గాని వాండ్రు, “మీరు ఎమేణికిదెరో, మిజి నాను నెన్ఎ. నెఇపణి కిని మీరు విజిదెరో, నా బాణిజ్డిసి సొండ్రు”, ఇజి వెహ్సన్”, ఇజి వెహ్సన్.

28 మరి వాండ్రు, “అబ్రాహము, ఇస్సాకు, యాకొబురిజ్ విజెరె ప్రవక్తరు దేవుణు మంజిని బాడిడు వాండ్రు ఏలుబడి కినివెలె మంజినిక సుడేజినెదర్. గాని వాండ్రు మిజి వెల్లి కిన్. అయావలె, మీరు అడేబాజి, పల్కు కొహ్క్కి ఎలాకాలం సిను మంజిని బాడ్డిదు మంజినెదర్.

29 మరి, దేవుణు మంజిని బాడిడు వాండ్రు ఏలుబడి కినివలె, తూర్పుదాన్ పడేమటదాన్, ఉస్సన్దాన్, దనిణదాన్ నండో యూదురు ఆఇకార్ వాజి వింతుదు బస్సార్.

30 ఇదిలో, పెరికాప్ ఇజి ఒడేబితికార్ ఇజ్జికార్ ఆనార్. తగిజి మహికార్ ముజాల్ ఆనార్”, ఇజి వెహ్సన్.

యేసుయెరుసలేంవందిజ్ దూకమాజినాన్

31 అయావలెనె, సెగొండార్ పరిసయేరు వాతారె, “నీను ఇబ్బెణిజ్ సోసి సాన్అ. హెరోదు నిజి నప్తెజ్ సుడేజినాన్”, ఇజి యేసుజ్ వెహ్సార్.

32 అందెజె వాండ్రు, “మీరు సొన్ని ఆ పాడు కిని నక్కవెట ఈహు వెహ్సు. “నాను నేండ్రు, విగెహిజ్, దెయమ్కాజ్ పేర్జి, కస్తమ్దివరిజ్ నెగెణ్ కిజి, ముఎహి, దినమ్దు పూర్తి కిన.

33 గాని నాను నేండ్రు, విగెహిజ్, ముఎహిజ్ నా సరిదు నాను సొండ్రెజ్వెలె. ఎందానిజ్ ఇహిజ, ప్రవక్త యెరుసలేమదిజ్ వెల్లి సాదెజ్ ఆఎన్.

34 ఓ యెరూసలేమదు మనికిదెరా, మీరు ప్రవక్తరిజ్ సప్తిదెర్. మీ డగ్రు దేవుణు పొక్తి వరిజ్ పణాణిజ్ డెయితిదెర్. కొరు దన్నిపిల్లెకాజ్ దన్నిరెక్కెజ్ అడిగె ఎలాగ ఇడ్నాదో, అయావజ మిజి డగ్రు కిదెజ్ ఎసోడ్ సుట్కు నాను ఆస ఆత, గాని నిజి ఇష్టం సిల్లెండ మహద్.

35 ఇదిలో, దేవుణు వన్ని గుడిడిసి సొనాన్లె. ప్రబు సిత్తి అతికారమ్దాన్ వాతికాన్ పొగ్డెఆనికాన్* ఇజి మీరు వెహ్సాదాక మీరు నజి తొఇదెర్ ఇజి మీ వెట వెహ్సిన.

14

యేసు పరిసయే ఇండ్రొ బోజెనమ్దిజ్ సాన్సినాన్

* 13:35 13:35 క్రిస్తన 118:26.

1 ఉండ్రీ విస్త్రాంతి దినమ్మదు, యేసు పరిసయరు అతికారిజ ఒరెన్ వన్ని ఇండ్రో బోజెనమ్దిజ్ సాహాన్. అయావలె యేసు ఇనిక కిసాండ్రో ఇజి వారు బాగసుడేజి మహార్.

2 నస్తవలె కిక్కుకాల్కు వాస్తికాన్ ఒరెన్ వన్ని ఎద్దు మహాన్.

3 యేసు”, విస్త్రాంతి దినమ్మదు నెగెణ్ కినిక మీ యూదురిజ్ రూలుజ్ తప్పికాదా సిలికాదా?”, ఇజి పరిసయరుజని యూదురి రూలు నెన్పిస్సివరిజ్ వెన్బాతాన్.

4 గాని వారు అలెత మహార్. అందెజె యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె పోక్తాన్.

5 వెనుక వాండ్రు వరిజ్, “మీ లోఇ ఎయెది బా గాడేదె గాని కోడిః గాని విస్త్రాంతి దినమ్మదు గుటాద్అర్దిజ, దన్నిజ్ వెటనె వెల్లి లాగ్ఇదిరా?”, ఇజి వెన్బాతాన్.

6 యా మాటెజ్ వారు మర్జి వెహైజ్ అట్ఎతార్.

7 వాతి కాలెజ్, విందుదు ముకెలమాతి బాడిఃజ్ సుడేజి బాన్ బస్తిక సుడేఃతాన్. సుడేఃతాండ్రె కతవజి ఈహు నెన్పిస్తాన్.

8-9 ఎయెన్బా పెండ్రీ విందుదిజ్ మిజి కూక్కివెలె, పెరికార్బస్సిబాడిదు బస్మాట్. ఉండ్రీ వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రిఎరిజ్ కూక్కికాన్ వాజి నిజి, “ఇదిలో, నీ బాడ్డిః వినిజ్ సీఅ”, ఇజి వెహ్హాన్. నస్తవలె మీరు సిగు ఆజి వెన్కాహి బాడిఃదు బస్సెజ్ సొనిదెర్.

10 అందెజె మిజి ఎయెన్బా కూక్కిజ, మీరు సొన్ని వెన్కాహి బాడిఃదు బస్సు. అయావలె మిజి కూక్కికాన్ వాజి, “కూలాయెన్ నీను పెరికార్బస్సి బాడిఃదు సొన్ని బస్అ”, ఇజి వెహ్హాన్. అయావలె నీ వెట బస్తివరి ఎద్దు నిజి గొప్ప గవరం వానాద్.

11 వన్నిజ్ వాండ్రె పెరికాన్ ఇజి ఒడేఃబిని ఎయె వన్నిజ్బా దేవుణు ఇజ్జికాన్ కినాన్. వన్నిజ్ వాండ్రె ఇజ్జికాన్ ఇజి తగిజి ఒడేఃబిని ఎయె వన్నిజ్బా దేవుణు పెరికాన్ కినాన్.

12 మరి, యేసు వన్నిజ్ విందుదిజ్ కూక్కి వన్నివెట, “నీను విందు కిదెజ్ ఇహిజ, నీ కాలెజనో, నీ అన్నారిజ్నో, నీ నేస్తమ్కాజ్నో, నీ పడేఃకాద్ మన్ని సంసారిజనో కూక్కు. ఎందనిజ్ ఇహిజ, ఉండ్రీ వేలా వారు నిజి మర్జి కూక్కార్. అయావలె నీను కిత్తిదన్నిజ్ వారు మర్జి కిజినార్.

13 అందెజె నీను విందు కినివెలె, బీదాతి వరిజ్, నీరసమ్దివరిజ్, సొటవరిజ్, గుడ్డివరిజ్ కూక్అ.

14 ఎందనిజ్ ఇహిజ, మిజి మర్జి సీదెజ్ వారు అట్ఎర్. అందెజె దేవుణు మిజి దీవిస్సాలె. దేవుణు తీర్పు కిని దినమ్మదు నీతి మన్ని విజు లోకురివెట నీను సాజి మర్జి నిజ్ని వెలె, నీను కితి నెగ్గి పణి వందిజ్ దేవుణు మిజి మర్జి సీనాన్.

పెరివిందు వందిజ్ వెహ్హినాన్

15 వన్ని వెట ఉండ్రేజ్ బస్తిమహి వరిలోఇ ఒరెన్ యాక విహాండ్రె, యేసుజ్, “దేవుణు ఏలుబడిః కినిక టెటాజ్ సూణివెలె, విందుద్ ఉణికాన్ అంతు సిల్లి సర్ద మంజినికాన్ ఆనాన్లె”, ఇజి వెహ్హాన్.

16-17 అందెజె యేసు ఈహు వెహ్హాన్. “ఒరెన్ విందు కిదెజ్ ఇజి వన్ని నండో కాలెజి కబ్బుజ్ పోక్తార్. విందు తయార్ ఆతిజ్, వన్ని పణిమణిసిజ్ కూక్తాండ్రె, “ఉండ్రేజ్ రదు. విజు తయార్ అతె ఇజి కబ్బు కిత్తివరిజ్ సొన్ని వెహ్అ”, ఇజి పోక్తాన్.

18 గాని కూలెజ్ ఉండ్రె లెకెండ్ పణిజ్ వెప్పి తప్పె ఆతార్. మొదోహికాన్, “నాను ఉండ్రె మడిజ్ కొట మన్న. నాను అయక సొన్ని సుడెదెజ్ వెలె, నజీ సెమిన్ అ ఇజి బతిమాల్ జన”, ఇజి వెప్తాన్.

19 మరి ఒరెన్, “నాను అయదు సెర్కు డాను కొట మన్న. ఆకెజ్ నెగెణ్ మనెనొ సిలెనొ ఇజి సుడెదెజ్ సొన్నిన. నజీ సెమిన్ అ, ఇజి బతిమాల్ జన”, ఇజి వెప్తాన్.

20 మరి ఒరెన్, “నాను ఏలు పెండ్లి ఆత మన్న. అందెజ్ వాదెజ్ అట్ మ”, ఇజి వెప్తాన్.

21-22 పణిమణిసి మర్జి వాతండ్రె, యా మాటెజ్ వన్ని ఎజుమానిజ్ వెప్తాన్. అయావలె అయా ఇండ్రొ ఎజుమాని కొపం ఆతండ్రె, “నీను పట్టుమ్ క వీదిజు, సందిజు బేగి సొన్ని బీదాతి వరిజ్, నీర్ సమది వరిజ్, సొటాది వరిజ్, గుడ్డి వరిజ్ కూక్కి తగ్ అ”, ఇజి పణి మణిసిజ్ వెప్తాన్. వాండ్రు, “బాబు నీను వెప్తా లెకెండ్ కిత. గాని మరి నండో బాడ్డి మనాద్”, ఇజి వెప్తాన్.

23 అయావలె ఎజుమాని, “నా ఇల్లు నిండ్రెదెజ్, నీను నాహ్కా వీదిజు సందిజు సొన్ని లోకురిజ్ ఈడిసి తగ్ అ”, ఇజి వన్ని పణిమణిసిజ్ వెప్తాన్.

24 ఎందానిజ్ ఇహిజు, కూక్కి అయా కూలెజు లోఇ ఒరెన్ బా ఆ టిండి రుసి నెన్ ఎన్”, ఇజి మీ వెట వెప్పిన.

సిసుడు ఆనికాన్ ఎలాగ మండ్రెజ్ ఇజి వెప్పినాన్

25 మంద లోకు వన్ని వెట సొన్ని మహివలె వరిదరిజ్ సుడెజి వాండ్రు ఈహు వెప్తాన్.

26 “ఎయెన్ బా నా సిసూడుః ఆదెజ్ ఇహిజు, నజీ ఇంక, వన్ని అయిసి అపొసిజ్ వన్ని ఆలు ని కొడెరిజ్, వన్ని అన్న తంబెరిజ్, వన్ని తజీ బీబిజ్ మరి వన్ని సొంత పాణిమ్ దిజ్ బా నండో ప్రేమిస్తెజ్ ఆవద్. వాండ్రు నండో ప్రేమిస్తెజు, నా సిసూడుః ఆదెజ్ అట్ ఏన్.

27 ఎయెన్ బా కస్టమ్ కు ఓరిసి సాదెజ్ బా ఇస్టం ఆజి నా వెట వాతిజు నె నా సిసూడుః ఆనాన్.

28 మీ లోఇ ఎయెన్ బా ఉండ్రె నిరీ గుడిః తోహ్ తెజ్ ఆస వాతిజు, వాండ్రు ముజాల బసి, దనిజ్ కర్పు ఎసా ఆనాద్ ఇజి లెక్క సుణాన్. పణి పూర్తి కిదెజ్ వన్ని కీదు మనిక ఆనాదొ, సాల్ ఎదొ ఇజి సూణాన్ గదె?

29-30 అయక తోవిండ వాండ్రు పునాది పొక్కి, పూర్తి తోహ్ తెజ్ అట్ ఇతిజు, అక్క సూణికార్ విజెరె, “వీండ్రు తోహ్ తెజ్ మొదొల్ స్తాన్ గాని పూర్తి కిదెజ్ అట్ ఎతాన్”, ఇజి వన్నిజ్ కరాయి ఇనార్.

31 ఒరెన్ రాజు మరి ఒరెన్ రాజు వెట ఉద్దం కిదెజ్ సొండ్రెజ్ ఇహిజు, వాండ్రు ముజాలె బస్తాండ్రె సుణాన్, ఇరువయ్ వేలుజ్ లోకుర్ వెట అయా రాజు వాజినాన్. వన్ని ముస్సు ఉద్దం కిదెజ్ నా పది వెయుజ్ లోకుర్ వెట నాను అట్టానా, సిలెనా ఇజి.

32 అట్ ఇజు, అయా రాజు దూరం మనివెలెనె సల్ వాణిజ్ పొక్కి సమాదనం కిదెజ్ వాండ్రు సుణాన్.

33 అయలెకెండ్ నె, మీ లోఇ ఎయెన్ బా వన్నిజ్ కల్లితికెజ్ డిన్ ఎండ మహిజు, నా సిసూడుః ఆవన్.

34 సొరు నెగ్గెకదె, గాని దనిజ్ మన్ని రుసి సొహిజు, ఎలాగ మరి రుసి తప్పిస్తెజ్ ఆనాద్?

35 అయాక బూమిదిజ్బా గాని గత్తమ్దిజ్బా గాని పణిదిజ్ రవద్. అందెజె అయాక వెల్లి వినీర్నార్. గిబ్బిజ్ ఒడేజి వెండ్రు. అయావజ నడిజి మండ్రు”, ఇజి వెహ్నన్.

15

మురుతి గొరె దొహ్కీనాద్

1 ఉండ్రి నాండిజ్ పన్ను పెర్నికార్ని పాపం కిజినికార్ ఇజి యూదురు సుడేతికార్ విజెరె వన్ని బోద వెండ్రెజ్ వన్ని డగ్రు కూడిత మహార్.

2 పరిసయరు ని యూదురి రూలుజ్ నెస్సిస్సికార్, “వీండ్రు పాపం కిజిని వరిజ్ డగ్రు కిజి వరివెట కూడేజి బోజనం కిజినాన్”, ఇజి సణిజీతార్.

3 అందెజె వాండ్రు వరిజ్ కతవజ నెన్పిస్తాన్.

4 “ఉండ్రి వేల మీ లోఇ ఒరెన్వన్నిజ్ వంద గొరెజ్ మనె. వన్నాలోఇ ఉండ్రి గొరె మురుతిజ, వాండ్రు అయా తొమ్బయి తొమెది గొరెజ, అడివిదు డిసి మురుతి మని గొరెదొహ్కీదాక రెబానాన్గదె?

5-6 అది దొహ్కీవలె సర్ద ఆజి వన్ని గుంజమ్దు పిండిజి ఇండ్రో తనాన్. మరి వన్ని కూలెజ పడకాతి వరిజ్ కూక్కి, “మురుతి మహి నా గొరె దొహ్కై. అందెజె నా వెట సర్ద ఆదు”, ఇజి వెహ్నన్.

7 అయా వజనె, తొమ్బయి తొమెది మణిసిర్ పాపం ఒప్పుకొండెజ్ అవుసరం సిలి సీతి నిజాయితిదికార్ మనార్. వరి వందిజ్ కల్గిని సర్ద ముస్సు పాపమ్కు డిసి సీతి వన్ని వందిజ్ దేవుణు మంజిని బాడిదు నండొ సర్ద కల్గినాద్, ఇజి నాను మీ వెట వెహ్నన్”.

మురుతి రుపయి దొహ్కీనాద్.

8 “మరి, ఉండ్రి బోదెల్దిజ్ పది వెండి రుపాయి మహె. వన్నాలోఇ ఉండ్రి రుపాయి మురుతిజ, అది దివ కసిసి, ఇల్లు సిపాజి, అది దొహ్కీదాక నెగెండ రెబావిదా?

9 అక్కదొహ్కీవెలె దన్ని కూలెజాణిజ్, పడకాతి వన్నాజ్ కూక్కి, “నా మురుతి మహి రుపాయి దొహ్కాద్. అందెజె నా వెట సర్ద ఆదు”, ఇజి వెహ్నన్.

10 అయావజనె పాపమ్కు డిసి సీతి వన్ని వందిజ్ దేవుణు వన్ని దూతెజ ఎద్రు సర్ద ఆజినాన్ఇజి నాను మీ వెట వెహ్నన్”.

తప్పి సొహి మరిసి మర్జి వాజినాన్

11 మరి వాండ్రు ఉండ్రి వెహ్నన్, “ఒరెన్ వన్నిజ్ రిఎర్ మరిసిర్ మహార్.

12 కొగ్రి మరిసి, “ఓ బా, నీను గణస్తి దన్నిలోఇ నజి వానివంతు సిదా”, ఇజి అపొసిజ్ లొస్తాన్. అందెజె అపొసి వన్ని ఆస్తి వరిజ్ సీబాత సిత్తాన్.

13 నెగం రోస్సు సొహి వెనుక, కొగ్రి మరిసి వన్నిజ్ కల్గితికెజ్ విజు కుడుప్పి, నండొ దూరం మన్ని దేసమ్దు సొహాన్. అబ్బె వాండ్రు సెఇ అలవాటుజ ఆతాండ్రె వన్ని ఆస్తివిజు పాడు కిత్తాన్.

14 విజు కర్పు కిత్తివెనుక, ఆ దేసమ్దు గొప్ప కరు వాతాద్. వన్నిజ్ ఇనిక బా దొహ్కీవెత్తాద్.

15 అందెజె వాండ్రు ఆ దేసెమది ఒరెన్ వన్ని డగ్రు పణికిదెజ్ సొహాన్. వాండ్రు పండ్రిజ్ మెహ్తెజ్ వన్ని మడిజు వన్నిజ్ పోక్తాన్.

16 వండ్రీజ్ తిని పొడుగు తింజి బజ సొన్పిస్తాజ్ ఇజి ఆన ఆతాన్. గాని ఎయెర్బా వన్నిజ్ ఇనికబా సివతార్.

17 వన్నిజ్ బుద్ది వాతివెలె వాండ్రు ఈహు ఒడిబితాన్, “నా బుబ్బు డగ్రు ఎసాండాొ పణిమణిసిర్ మనార్. వరిజ్ ఉండెజ్ అట్ఇ నసాని జావ దొహ్కాన్దాద్. ఇబ్బె నాను బజ సాజిన.

18 నాను ఇబ్బె డిసి నా బుబ్బు డగ్రు సాన్ని, ‘ఓ బా, నాను దేవుణుదిజ్ పడెఱ పణి కిత. నీ ఎద్దు పాపం కిత.

19 నీ మురిన్ ఇజి కూకె ఆదెజ్ నాను ఏపటితికాన్ ఆవ. నీ పణిమణిసి ఒరెన్ వన్నిలెకెండే నజీ సుడెఱ, ఇజి నాను వెహ్నా”, ఇజి ఒడిబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పొసి వన్నిజ్ సుడెఱతాన్. వన్ని పాణం నొతాండ్రె ఉహ్కాన్సి సాన్ని పొంబితాండ్రె ముదు కిత్రాన్.

21 నస్తవలె వాండ్రు అప్పొసిజ్, “ఓ బా, నాను దేవుణుదిజ్ పడెఱ పణి కిత. నీ ఎద్దు పాపం కిత. నీ మురిన్ ఇజి కూకె ఆదెజ్ నాను ఏపటితికాన్ ఆవ”, ఇజి వెహ్నాన్.

22 గాని అప్పొసి వన్ని పణిమణిసిర్ కూక్తాండ్రె, “సొక్క బేగి తగ్అ. వినిజ్ తొడిగిస్తు. బొందు ఇడెఱకిస్తు. పాదమ్కాజ్జోడెఱకు తొడిగిస్తు.

23 బలన్తి దూడఱ తసి ఓహ్కాన్. మాటు తింజి సర్గ ఆనాట్.

24 ఎందానిజ్ ఇహిజ, యా నా మురిన్ సాతి లెకెండే మహాన్. మురి ఏలు బత్తితాన్. మురుతి లెకెండే మహాన్. మురి యేలు దొహ్కాన్”, ఇజి వెహ్నాన్. వారు సర్గ ఆజి మహార్.

25 అయావలె పెరిమరిసి మడిఱ సాహ మహాన్. వాండ్రు మడిఱజాణిజ్ వాజి ఇల్లు డగ్రు వాతివెలె, బాజెజ్ డెయిజినిక, కర్జిజినిక వెహ్నాన్.

26 అందెజె వాండ్రు పణిమణిసిర్ లొఇ ఒరెన్ వన్నిజ్ కూక్తాండ్రె, ఇనిక జర్గిజినాద్, ఇజి వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రెండ మర్జి వాతివందిజ్ నీ బుబ్బు బలన్తి దూడఱ ఓహ్కాన్”, ఇజి వెహ్నాన్.

28 పెరి మురిసి కోపం ఆతండ్రె, లొఇ సాండ్రెజ్ కెవతాన్. అందెజె అప్పొసి వెల్లి వాతండ్రె, లొఇ రఅ, ఇజి వన్నిజ్ బతిమూల్తాన్.

29 అయావలె వాండ్రు వన్ని అప్పొసి వెట, “ఇదిలో నిసాడు పంటజాణిజ్ ఒరెన్ గొతియయెన్ లెకెండే పణి కిత. ఎసెజ్బా, నీ మాటెజ్ నాను లొజిఏండ మన్ఏవ. నా కూలెజ్వెట సర్గ ఆదెజ్ నీను నజీ ఉండ్రె గొరె పిల్లబా సిఇతి.

30 గాని సాని బూలాని వరిజ్ సీజి నీ ఆస్తి విజు పాడు కిత్తి యా మురిసి వాతిజ్ బలన్తి దూడఱ ఓహ్కాన్”, ఇజి వెహ్నాన్.

31 అందెజె అప్పొసి, “నా మురిన్, నీను ఎస్తవలెబా నా వెటనె మన్ని. నజీ మనికెజ్ విజు నీవి.

32 మాటు విందు కిజి సర్ద ఆనిక నెగెద్. ఎందానిజ్ ఇహిజ, నీ యా తంబెరి సాతి లెకెండే మహాండ్రె, మర్జి నిజితాన్. మురుతి లెకెండే మహాండ్రె దొహ్కాన్”, ఇజి వన్ని వెట వెహ్నాన్.

16

తెలివి మన్ని పెరిగొత్తియవన్ని కత

1 మరి, యేసు వన్ని సినూర్జ ఈహు వెహ్లాన్. ఒరెన్ సంసారం మన్ని వన్ని ఇండ్రోణి సజతిజ సూణి పెరి గొతియయెన్ ఒరెన్ మహాన్. యా గొతియయెన్ సామనమ్మకు పాడు కిజినాన్ ఇజి నేరం మొప్పిక వెహ్లాన్.

2 అందెజె వన్నిజ్ కూక్పిస్తాండ్రె, “నీ వందిజ్ నాను వెంజిని యా మాట ఇనిక? ఇండ్రోణి పణిజ లెక్క తోరిన్అ. ఎందానిజ్ ఇహిజ, నీను ఏలుదాన్ నా గొతియయెన్ ఆఇ”, ఇజి వన్నిజ్ వెహ్లాన్.

3 యాక వెహ్లాండ్రె వాండ్రు ఈహు ఒడేబితాన్. “నా ఎజుమాని యా పణిదాన్ నజీ లాగ్జినాన్. అందెజె నాను ఇనిక కిదెజ్? కార్తెజ్ అట్ఎ. లోసి ఉండెజ్ సిగు వాజినాన్.

4 యా పణిదాన్ లాగ్గివెలె, లోకుర్ నజీ డగ్రు కినిలెకెండ ఇనిక కిదెజ్ ఇజి నాను నెసిన.

5 అందెజె వాండ్రు వన్ని ఎజుమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూక్పిస్తాన్. “నీను నా ఎజుమాని బాణిజ్ ఎసా ఒతిమన్ని?”, ఇజి మొదోహి వన్నిజ్ వెన్బాతాన్.

6 వాండ్రు, “వంద కాయెజ్ నూనె”, ఇజి వెహ్లాన్. అందెజె వాండ్రు, “ఇదిలో నీ సీటి. బేగి బని యాబలు కాయెజ్ ఇజి రాన్అ”, ఇజి వెహ్లాన్.

7 వెన్కాహివన్నిజ్, “నీను ఎసా ఒతిమన్ని?”, ఇజి వెన్బాతాన్. వాండ్రు, “వంద తూముజ్ గోదము”, ఇజి వెహ్లాన్. అయావలె వాండ్రు, “ఇదిలో నీ సీటి. ఎనబలు తూముజ్ ఇజి రాన్అ”, ఇజి వెహ్లాన్.

8 అనెయం కిత్తి యా పెరి గొత్తియయెన్ తెలివందిజ్ ఎజుమాని పొగిడితాన్. ఎందానిజ్ ఇహిజ, వానికాలమ్ది వన్ని బత్తు వందిజ్ వాండ్రు యా లెకెండ కితాన్. అందెజె యేసు, వెప్పినాన్, “దేవుణుదిజ్ నమిజి వాండ్రు వెహ్లా వజ నడినివరి మున్కు, అయా పెరి గొత్తియయెన్ లెకెండ, యా లోకమ్ది సజతిజ వందిజె ఒడేబినికారె తెలిమనికార్. వారు వరిలెకెండ మన్ని వరివెట కూడేజి పాడిజి మండ్రెజ్ తెలిమనికార్.

9 మీరు యా లోకమ్దు బత్తిజిని మనివలె ఇబ్బె మిజి మనికెజ్ విజు దని వెట మీరు నెగ్రెండ తెలిదాన్ మండ్రెజ్ సుడేదు. ఎందనిజ్ ఇహిజ, మీరు మీ బత్తు ఇబ్బె డిస్సివలె దేవుణు మిజి వాండ్రు మంజిని బాడిదు ఎలాకాలం మండ్రెజ్ డగ్రు కినాన్లె.

10 తక్కు దన్నిమున్కు నమకం మంజినికాన్ లావు దన్నిమున్కుబా నమకమ్దాన్ మంజినాన్. తక్కు దన్నిమున్కు నమకం సిలికాన్, లావు దన్నిమున్కుబా నమకం మన్ఎన్.

11 అందెజె, మిజి మన్ని ఆస్తి నమకమ్దాన్ తోఎండ మహిజ, నిజమాతి ఆస్తి ఎయెర్ మిజి ఒపజెప్పార్.

12 పడకాతి వరి దన్నిమున్కు నమకమ్దాన్ తోఎండ మహిజ, నీ సొంతదిక ఆతి నిజమాతి ఆస్తి ఎయెన్ మిజి సీనాన్.

13 ఎమేణి గొత్తియయెన్బా రిఎర్ యజమానరిజ వందిజ్ఉండ్రె లెకెండపణి కిదెజ్ అట్ఎన్. వాండ్రు ఒరెన్ వన్నిజ్ ఇన్టం కిఎండ మరి ఒరెన్ వన్నిజ్ ప్రేమిస్తాన్. సిలిజ, ఒరెన్ వన్ని మాట వెంజి నమకమ్దాన్ మంజినాన్. మరి ఒరెన్ వన్నిజ్ దుసలాడేనాన్. అయలెకెండె దేవుణుదిజ్ ని డబ్బుదిజ్ ఉండ్రె లెకెండె సేవకిదెజ్ మీరు అట్ఇదెర్”, ఇజి వెహ్లాన్.

14 డబ్బు ఆస మన్ని పరిసయేరు యా మాటెజ్ విజు వెహరె, వన్నిజ్ వెక్కిస్తార్.

15 వాండ్రు వరిజ్ ఈహు వెహ్లాన్, “లోకుర్ ముజాల మీరు నీతి నిజాయితి మనికిదెర్ ఇజి తోరిస్సిదెర్. గాని దేవుణు మీ మన్సుదికెజ్ నెస్నాన్. లోకుర్ ఎద్రు గొప్ప విలువ మనిక దేవుణుదిజ్ ఇష్టం సిల్లికాదె.

16 దేవుణు మోసెజ్ సిత్తి రూలుజ్ని ప్రవక్తరు రాస్తికెజ్ బాప్తినం సీని యోహాను కాలం దాక బోదిసి మహార్. అబెణిజ్ అసి దేవుణు, వన్నిలోకురిజ్ కిని ఏలుబడిః వందిజ్ సువార్త వెహె ఆజి మహాద్. దేవుణు కిని ఏలుబడిఃదు మండ్రెజ్లోకుర్నండొ కస్టబడిఃజినార్.

17 ఆగనం బూమి సిల్లెండ ఆదెజ్నులునె, గాని దేవుణు నీతి రూలుజది ఉండ్రె గీతబా తప్పి సొన్వద్.

18 ఎయెన్బా వన్ని ఆల్నిజ్ డిఃసి మరి ఉండ్రె బోదెల్దిజ్ ఇడ్డెః ఆతిజ, దని వెట వాండ్రు రంకు బూలాజినాన్. మాసిజ్ డిఃస్తి దనిజ్ ఒరిన్ఇడెః ఆతిజ, వాండ్రు రంకు బూలాజినాన్.

ఆస్తిమన్నికాన్ని లోసిఉణి లాజరు

19 ఒరెన్ ఆస్తిమన్నికాన్ మహాన్. వాండ్రు నండొ కరిది సొక్కెజ్ తోడెఃగిజి విజు దినమ్కు సుకం ముస్సు మహాన్.

20 లాజరు ఇని లోసిఉణికాన్ ఒరెన్ మహాన్. వన్ని ఒడొల్కండి విజు పుట్టు మహె. ఆస్తిమన్ని వన్ని ఇండ్రెణి డేవాద్ వన్నిజ్ ఇట్టా మహార్.

21 వన్ని బల్లదాన్ అర్తి జావ పరెజ్ ఉణిజి బజ సొన్పిస్తెజ్ ఆసఆజి మహాన్. నకుడిఃజ్బా వాజి వన్ని పుట్టు నాక్కి మహె.

22 లొస్సి ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడిఃదు అబ్రాహం వడెఃకాదు ఒతాన్. ఆస్తిమన్నికాన్బా సాతాన్. వన్నిజ్ ముస్తార్.

23 వాండ్రు అయా లోకమ్దు బాదఆజినె, బుర్ర పెర్తి ముస్సు బేస్తాన్. దూరం మన్ని అబ్రాహముజ్ని వన్నివడెఃకాద్ మన్ని లాజరుజ్ నుడెఃతాన్.

24 అందెజె వాండ్రు, “బుబ్బ ఆతి అబ్రాహము, నా ముస్సు కనికారం తోరిన్అ. నాను యా సినుదు నండొ బాద ఆజిన. అందెజె లాజరు వాజి వన్ని డెస్సు ఏరుదు ముడుక్కి నా నాలిక సలెజ్ కిదెజ్ వన్నిజ్ పోక్అ”, ఇజి డేల్ని వెహ్లాన్.

25 అందెజె అబ్రాహము, “మరిన్ నీను బత్తితి కాలమ్దు సుకం ముస్సు మహి. గాని లాజరు కస్టమ్దు మహాన్. ఏలు వాండ్రు ఇబ్బె సుకం దాన్ మనాన్. నీను కస్టమ్దు మన్ని.

26 యాకదె ఆవిండ, ఇబ్బెణికార్ అబ్బె వాదెజ్ అట్విండ, అబెణికార్ ఇబ్బె వాదెజ్ అట్విండ మజి నిజి నడిఃమి పెరిజోరె ఇట్టా మనాద్”, ఇజి వెహ్లాన్.

27-28 అయావలె వాండ్రు, “అహిజ, ఓ బా, నజి అయ్దుగురు దాదార్ మనార్. వారు బా యా కస్టమ్కు మన్నిబాడిఃదు రవిండ మండ్రెజ్ నా బుబ్బ ఇండ్రె లాజరుజ్ పోక్అ. వాండ్రు సొన్ని వరిజ్ వెహ్లాన్, ఇజి నాను నిజి బతిమాల్జిన”, ఇహాన్.

29 అందెజె అబ్రాహము, “వరి డగ్గు మోసె రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రెజ్”, ఇజి వన్నిజ్ వెహ్లాన్.

30 వాండ్రు, “బుబ్బాతి అబ్రాహము, ఆహె వారు కిపెర్. సాతికాన్ ఒరెన్ వరి డగ్గు సొన్ని వెహ్లాజినె, వారు పాపమ్కు డిఃసి సీనార్”, ఇజి వెహ్లాన్.

31 అందెజె వాండ్రు, “మోసె రాస్తి మనికెజ్ ప్రవక్తరు రాస్తికెజ్ వారు వెన్ఎండ మహిజ, సాతికాన్ మర్జి నిజ్జి సొన్సి వెహ్టిజ్బా వారు నమ్మివర్”, ఇజి వెహ్టాన్.

17

1 యేసు వన్ని సిసూర్జ ఈహు వెహ్టాన్. “తప్పజ్ కిబిన్ని సజతిజ్ తవ్ఎండ వానెలె. గాని యా సజతిజ్ ఎయెవెట వానెనొ వన్నిజ్ అబాయా, నండొ బాద.

2 ఎయెన్బా నా ముస్కు నమకం ఇడ్డి మన్ని యా కొణొ: నన్ని ఒరెన్వన్నిజ్ తప్పకిబిస్తెజ్ సుడొ:తిజ పెరిసిక్స వానాద్. దిన్నిముస్కు ఇజిరిసిక్సనె వన్ని మెడొ:దు జత్త పణుకు తొప్పొ సందారమ్దు విసిర్నిక. ఆకదె వన్నిజ్ నెగెద్.

3 అందెజె మీ వందిజ్ మీరె జాగర్త మండ్రు. నీ తంబెరినొ, ఎయెన్బా నిజి తప్ప కితిజ, వన్నిజ్ డటం బుద్ది వెహ్అ. వాండ్రు తప్పడిసి ఒప్పకొటిజ వన్నిజ్ సెమిస్అ.

4 ఉండ్రె దినమ్దు ఏడు సుట్కు వాండ్రు నిజి తప్పజ్ కిజి, ఏడు సుట్కు నీ డగ్రు వాజి ‘నాను తప్పడిసి ఒప్పకొడిజిన’, ఇజి వెహ్టిజ నీను వన్నిజ్ సెమిస్అ”.

5 నస్తివలె వన్నెండు మణిసి అపొస్తుడుజ, మజి నండొ నమకం సిదా”, ఇజి ప్రబుజ్ లొస్తార్.

6 అందెజె వాండ్రు, “మిజి సర్కుగింజ నస్తు నమకం మహిజ, యా మలబరి మరాతిజ్ సుడొ:జి, “వెలెజాణిజ్ పెరె ఆజి సందారమ్దు ఉణుని ఆఅ”, ఇజి వెహ్టి వెలె అది మిజి లొజిన్దాద్.

7-8 ఉండ్రె వేల, మీలోఇ ఒరెన్వన్నిజ్ డూదెజ్నొ గొరెజ మేప్తెజ్నొ వెట్టిపణి కినికాన్ ఒరెన్ మనాన్. వాండ్రు మడిజదాన్ వాతిజ, “బేగి రఅ, వాజి ఉణఅ”, ఇజి వెహ్టిదెరా? సిల్లె, గాని, ‘నుబ్బరం ఆజి వర్అ, నజి బాట నీజి ఉణితిని దాక మన్అ. వెనుక నీను ఉణఅ’, ఇజి వెహ్టిదెర్.

9 వన్నిజ్ ఒపజెప్తి పణి కితిజ్ ఎజుమాని వన్నిజ్ వందనమ్కు వెహ్ండ్రా?

10 అందెజె మీరు బా మిజి ఒపజెప్తి పణిజ్ విజా కితి వెనుక, “మాటు పణిమణిసిర్. వందనమ్కు వెహె ఆదెజ్ అవ్సరం సిల్లెద్. మాటు కిదెజ్ మన్ని పణి నె కితాట్”, ఇజి వెహ్టెజ్.

పది మణిసిర్ కుస్తురోగం మన్నికార్ నెగెణ్ ఆజినార్

11 యేసు యెరూసలెమ్దు సొన్సి మహివలె, సమరియ గలిలయ ముట్ట సరిఅద్దుదాన్ సొన్సి మహాన్.

12-13 వాండ్రు ఉండ్రె నాటొ సొన్సి మహివలె పది మణిసి కుస్తురోగం మనికార్ వన్నిజ్ ఎద్రు వాతార్. వారు దూరం నిహరె, “యేసు ఎజుమాని, మా ముస్కు కనికారం తొరిస్అ”, ఇజి డెడి:స్తార్.

14 వాండ్రు వరిజ్ సుడొ:తాండ్రె, “సొన్సి, మీరు నెగెణ్ అతిదెర్ ఇజి పుజెరిజ తొరె ఆదు”, ఇజి వెహ్టాన్. వారు సొన్సి మహిజ్ నెగెణ్ ఆతార్.

15 వరిలోఇ ఒరెన్, నెగెణ్ ఆత ఇజి నెస్తాన్. వాండ్రు డటం దేవుణుదిజ్ పొగిడి:జి మర్జి వాతాన్.

16 వాతాండ్రె యేసుజ్ పాదమ్క ముస్కు ముణుకుజ్ ఉఱ్జి మాడి:స్తాండ్రె, వందనమ్కు వెహ్టాన్. వాండ్రు సమరియదికాన్.

17 అందెజె యేసు, “పది మణిసిర్ నెగెణ్ ఆతార్ గదె. ఆ తొమెది మణిసిర్ ఎంబె మనార్?

18-19 ఎందానిజ్ వీండ్రు ఒరెండ్రె దేవుణుదిజ్ పొగిడిఁదెజ్ మర్జి వాతాన్. వీండ్రు యూదురిజ్ సెండ్ఇకాన్. ఇస్రాయేలుదికార్ ఎండనిజ్ తోరి ఆవెతార్?” , ఇజి వెహ్హాన్. వెహ్హండ్రె, “నీను నిజ్జి సొన్అ. నీను నా ముస్సు నమకం ఇడ్డి అందెజె నెగెణ్ ఆతి” , ఇజి వన్నిజ్ వెహ్హాన్.

దేవుణు రాజువజి వానివందిజ్ వెహ్హినాన్

20 ఒర్నెండు, దేవుణు ఏలుబడిః కినిక లోకుర్ ఎసెజ్ సూణార్ ఇజి పరిసయిరు వన్నిజ్ వెన్బాతార్. అందెజె వాండ్రు, “దేవుణు రాజువజి వాని ముజుల్ తోర్ని గుర్తు ఇనిక సిల్లెద్.

21 దేవుణు మిజి ఏలుబడిః కిజినిక ఇయేలె మొదొల్స్త మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర్ వెహ్హి గుర్తు ఇనిక సిల్లెద్” , ఇజి పరిజ్ వెహ్హాన్.

22 మరి వాండ్రు వన్ని సిసూర్జి వెహ్హాన్, “లోకు మరిసి ఆతి నాను గొప్ప అతికారం దాన్ సోకుదాన్ మంజినిక కండెక్ టయం బా సుడెఁదెజ్ ఇజి మీరు కోరిజిస రోస్సు వానెలె. గాని ఆ రోస్సు లోఇ ఉండ్రి రోజుబా మీరు తోఇదెర్.

23 లోకుర్ మిజి, “ఇదిలో ఇబ్బె మనాన్, అదిలో అబ్బె మనాన్” , ఇజి వెహ్హూర్. గాని పరి వెట సొన్మాట్. పరి మాట అస్మాట్.

24 ఎందానిజ్ ఇహిజ, ఆగసమ్దు మెరిస్సివెలె ఉండ్రి పడెకదాన్ మరి ఉండ్రి పడెకాద్ జాయి తోర్నివజినె లోకు మరిసి ఆతి నాను వానివలె మంజినాద్.

25 గాని ముజుల యా తరమ్దికార్ నజి నెక్కిపొక్కినార్. వాండ్రు నండె ఇమ్సెజ్ ఓరిస్తెజ్వెలె.

26 నోవాహు కాలమ్దు మహిలెకెండెనె లోకు మరిసిఆతి నాను వాని ముజుల మంజినాద్.

27 నోవాహు ఓడెదు సొనిదాక లోకుర్ ఉణిజి తింజి మహార్. పెండ్లి ఆజి పెండ్లిదిజ్ సీజి మహార్. నస్సివలె గడ్డ నిండ్రిజి, పరిజ్ విజెరిజ్ నాసనం కిత్తాద్.

28 లోతు కాలమ్దు మహిలెకెండెనె, నాను వాని ముజుల మంజినాద్. లోకుర్ ఉణిజి, తింజి, కొడుఃజి పొర్ని మహార్. పల వాక్సి, ఉణుసి, ఇల్కు తోహ్సి మహార్.

29 లోతు సొదొమ డిస్సి సొహి నాండిజ్, ఆగసమ్దాన్ సిసు రంజికం పిరు లెకెండ్ వాజి పరిజ్ విజెరిజ్ నాసనం కిత్తాద్.

30 యా లెకెండ్నె, లోకు మరిసి ఆతి నాను వాని దినమ్దు జిర్గిజి మంజినాద్.

31 నాను వాని దినమ్దు, మీద్దె ముస్సు మంజినికాన్ ఇండ్రో మన్ని వన్ని సామనమ్కు ఒతెజ్ డిగ్దెజ్ ఆవెద్. అయలెకెండ్నె మడిఃజ మంజినికాన్ ఇనికబా ఒతెజ్ మర్జి వాదెజ్ ఆవెద్.

32 లోతు ఆల్సెజ్ ఒడెఃబిదు. అది దేవుణు వెహ్హి మాట వెన్ఇతిజ్ సాతాద్.

33 ఎయెన్బా వన్ని సొంత పాణమ్దిజె కాపాడెఁదెజ్ సుడెఁతిజి వన్నిజ్ ఎలాకాలం దేవుణు వెట బత్కిని బత్కు దొహ్కెవెద్. ఎయెన్బా నా వందిజ్ వన్ని పాణం సీతిజి, వాండ్రు ఎలాకాలం దేవుణు వెట బత్కిని బత్కు దొహ్కాద్.

34 నాను మీ వెట వెహ్హిన, అయా పొదొయి రిఎర్ ఉండ్రి మన్సమ్దు గూర్నూర్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్సు సొనాన్.

35 రుండి బోదెక్ కూడెఃజి నూర్జి మంజినె. ఉండ్రి దనిజ్ దేవుణు ఒనాన్. ఉండ్రి దనిజ్ డిస్సు సొనాన్.

36 రిఎర్ మడిఃజ మంజినార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్సు సొనాన్.

37 అయావలె సినూరు, “ప్రబువా, ఎంబె యాక జర్గినాద్?”, ఇజి వెనబాతార్. వెనబాతిజ్ వాండ్రు, “పినుగు ఎంబె మంజినాద్ ఇజి నెస్సెజ్ డేగెజ్ ఉండ్రి గుర్తు అనిలెకెండ్, యేసు వానిక నెస్సెజ్ టటాజ్ గుర్తుజ్ మన్నె.

18

డిఃన్ఎండ వాతి రాండిబోదెలి కత

1 వన్నిసినూర్ డిఃన్ఎండ ఎస్తివలెబా పార్దన కిజి మండ్రెజ్ ఇజి నేర్పిస్సెజ్ యేసు వరిజ్ కతవజి ఈహు నెన్పిస్సాన్.

2 అక్కఱనిక ఇహిజ, ఉండ్రి పట్టుమ్దు ఒరెన్ నాయం కినికాన్ మహాన్. వాండ్రు దేవుణుదిజ్ తియెల్ అఇకాన్. లోకాజ్ లసెం కిఇకాన్.

3 ఆ పట్టుమ్దు ఉండ్రి రాండి బోదెల్ మహాద్. అది వన్ని డగ్రు డిఃన్ఎండ వాజి, “నా మున్ను పగ ఆతికాన్ ఒరెన్ మనాన్. వాండ్రు నజి సీదెజ్ మనిక సీనిలెకెండ్ సీను నాయం తీరిన్అ”, ఇజి బతిమాలజి మహాద్.

4-5 వాండ్రు నెగం కాలం కెవితాన్. వెనుక వాండ్రు, “నాను దేవుణుదిజ్ తియెల్ అఇకాన్. లోకాజ్ లసెం కిఇకాన్. గాని యా ముండ బోదెలి డిఃన్ఎండ వాజి నజి ఏక ఏక లోసినాద్. అందెజె అది మరి మరి వాజి బాద కల్గిన్ఎండ దన్నిజ్ నాయం తీర్న్”, ఇజి వన్నిజ్ వాండ్రె వెప్తాన్.

6 మరి యేసు వెప్తాన్, “విండ్రు, యా నీతి నిజాయితి సీలి నాయం కినికాన్ ఇనిక వెప్తోన్ ఇజి.

7 అహిజ, నీతి నిజాయితి మన్ని దేవుణు, వాండ్రు ఏర్పాటు కితి వన్ని లోకుర్ రెయు షొకాల్ వన్నిజ్ పార్దనం కితిజ, వాండ్రు వరిజ్ నాయం తీర్న్ఎండ మంజినాండ్రా? వాండ్రు ఆల్సెం కిసాండ్రా?

8 నాను మీ వెట వెప్సిన, వాండ్రు బేగి నాయం తీర్స్సాన్. గాని లోకు మరిసి ఆతి నాను మర్జి వానివలె, నా మున్ను నమకం దాన్ మన్ని వరిజ్ సుణానా?

పరిసయుని పన్నుపెర్ని వన్ని కత

9 నెగొండార్ మాపు నీతి మనికాప్ ఇజి వరిజ్ వారె గర్త ఆజి మహివరిజ్ దుసలాడఃతికార్ మహార్. నన్నివరిజ్ వాండ్రు కతవజి నెన్పిస్సాన్.

10 “రిఎర్ లోకుర్ పార్దనం కిదెజ్ ఇజి దేవుణు గుడిఃదు సొహార్. ఒరెన్ పరిసయు వాండ్రు ఒరెన్ పన్ను పెర్నికాన్.

11 పరిసయు వాండ్రు సొహండ్రె, వన్నిలోఇ వాండ్రు ఈహు పార్దనం కితాన్, “ఓ దేవుణు, నాను మహి లోకుర్ లెకెండ్ ఆవ. ఆనగొటుజు లెకెండ్, అనయుం కిని వరిలెకెండ్, రంకు బూలాని వరి లెకెండ్ ఆవ. యా పన్ను పెర్ని వన్ని లెకెండ్బా ఆవ. అందెజె నిజి వందనమ్కు.

12 నాను వారమ్దిజ్ రుండి సుట్టు ఉపాస్ మంజిన. నజి వాజిని విజు దన్నిలోఇబా నిజి దెసం బాగం సీజిన”, ఇజి పార్దనం కితాన్.

13 గాని పన్ను పెర్నికాన్ దూరం నిహాన్. వాండ్రు ఆగాసం దరోట్బా బేన్ఎండ, వన్ని గుండె కొత్తె ఆజి, “ఓ దేవుణు, నాను పాపం కితిక. నజి కనికారం తోరిన్అ”, ఇజి వెప్తోన్.

14 నాను మీ వెట వెహ్సిన, పరీసయు వన్ని ముస్కు విని పాపమ్కునె దేవుణు సెమిస్తాన్. వీండ్లు దేవుణు ముజాల నీతి నిజాయితీ మనికాన్ ఇజి తీర్సె ఆతండ్రె ఇండ్రె సొహాన్. వన్నిజ్ వాండ్రె పెరికాన్ ఇజి ఒండేబినికాన్ ఎయెన్బా ఇజ్జికాన్ ఆనాన్. వన్నిజ్ వాండ్రె తగిజి ఇజ్జికాన్ ఇజి ఒండేబినికాన్ ఎయెన్బా పెరికాన్ ఆనాన్.

ఇజిరికొడొరిజ్ యేసుడగ్గు కిజినాన్

15 సెగొండార్, యేసుడగ్గు ఇజిరి బయిరిజ్బా తసి మహార్. పరిముస్కు వన్నికికు ఇడ్దెజ్ ఇజి తత్తార్. అక్క సుడేతారె సిసూర్ వరిజ్ జటిజ్ ఆతార్.

16 గాని యేసు, కొడొరిజ్ వన్ని డగ్గు కూక్తాన్. కూక్తాండ్రె, “యా ఇజ్జి కొడొరిజ్ నా డగ్గు రపీర్. వరిజ్ అడు కిమాట్. ఎందానిజ్ ఇహిజు, యా కొడొరి లెకెండ్ మనికార్ దేవుణు ఏలుబడి కినివెలె మంజినార్.

17 నిజమె, మీ వెట వెహ్సిన, ఇజ్జి కొడొరి నమ్మిని వజు, దేవుణుదిజ్ నమినికార్ దేవుణు ఏలుబడిదు మజినార్. నమ్మిఇకార్ మండ్రెజ్ అట్ఎర్”.

ఒరెన్ అస్తిమన్నికాన్ యేసువెట వర్గిజినాన్

18 ఒరెన్ అతికారి యేసుజ్ సుడేజి, “ఓ నెగ్గి బోదకినికి, ఎలాకాలం దేవుణువెట బత్తిని బత్తు దొహ్కెదఇహిజు, నాను ఇనిక కిదెజ్?”, ఇజి వెన్బాతాన్.

19 అందెజె యేసు, “నాను నెగ్గికాన్ ఇజి ఎందనిజ్ నీను వెహ్సిన దేవుణు ఒరెండ్రె నెగ్గికాన్. మరి ఎయెన్బా నెగ్గికాన్ ఆఎన్”, ఇజి వెప్తాన్.

20 మరి వన్నిజ్, “రంకు బూలామా. లోకుదిజ్ సవ్మా. డొజి కిమ. అబద సాక్కి వెహ్మా. నీ యాయ బుబ్బెజ్ గవేరమ్దాన్ నెగెండ సుడేఅ* ఇని మోసె సిత్తి ఆడ్రెజ్ నెసినిగదె”, ఇజి వెప్తాన్.

21 వెహ్హిజ్ వాండ్రు, “ఇజ్జివెలెహాన్ అసి యా విజు వన్కాజ్ లోజిజిన వాజిన”, ఇజి వెప్తాన్.

22 యేసు యాక వెహండ్రె వన్నిజ్, “మరి ఉండ్రె బా నీన్ కిదెజ్ మనాద్. నిజీ కల్లితిమనికెజ్ విజు పొర్ని అయా డబ్బుజ్ బీద వరిజ్సెల. అయావలె దేవుణు మంజిని బాడిదు నిజి సంసారం మంజినాద్. మరి, నీను వాజి నా సిసూడుః ఆఅ”, ఇజి వెప్తాన్.

23 యా మాటెజ్ వెహిజ్, వన్ని మొకొం ఇజ్జిక ఆతాద్. ఎందనిజ్ ఇహిజు, వాండ్రు నండొ అస్తిమనికాన్.

24 యేసు వన్నిజ్ సుడేజి, “అస్తిమనికార్ దేవుణు కిని ఏలుబడిదిజ్ అడిఃగి మండ్రెజ్ ఎసొనొ కస్టం.

25 ఒరెన్ సంసారం మనికాన్ దేవుణు కిని ఏలుబడిదిజ్ అడిఃగి మన్నిదని ముస్కు ఉండ్రె ఒంటె దొబానం బొరొదాన్డుఃగ్దెజ్ సూలు ఆనాద్”, ఇజి వెప్తాన్.

26 అయావలె యా మాటెజ్ వెహికార్, “అహిజు, దేవుణు రక్కిస్తి లెకెండ్ ఎయెర్ మండ్రెజ్ అట్వార్?”, ఇజి వెన్బాతార్.

27 అందెజె యేసు, “లోకు కిదెజ్ అట్ఇక దేవుణు కిదెజ్ అట్వార్”, ఇజి వెప్తాన్.

28 నస్తివలె పేతురు, “ఇదిలో, మాపు మజి కల్లితి మనికెజ్ విజు డిఃస్తాపె నీ వెట వాతావ్”, ఇజి వెప్తాన్.

* 18:20 18:20 నిర్గమ 20:12-16, ద్వితి 5:16-20.

29-30 అందెజె యేసు, “ఒరెన్ వన్ని ముస్కు దేవుణు ఏలుబడిః కిదెజ్ ఇజి ఇల్లుదిజ్బా ఆల్నిజ్బా, దాద తంబెరిజ్బా అయిసి అప్పొసిరిజ్బా కొడొకొక్రాదిజ్బా, డిఃస్తికాన్ ఎయెండ్రొ వన్నిజ్ యేలు మరి నండొ కల్లినాద్. వాని కాలమ్దు వన్నిజ్ ఎలాకాలం దేవుణు వెట బత్కిని బత్కుదు బా మంజినాద్, ఇజి కసితం నాను మీ వెట వెప్పొన”, ఇజి వెప్తొన్.

యేసు వన్ని సాపువందిజ్ సిసూరిజ్ వెప్పొనాన్

31 యేసు వన్ని పన్నెండు మణిసిర్ సిసూరిజ్ కూక్కి వరిజ్ ఈహు వెప్తొన్. “ఇదిలో మాటు యెరూసలెమ్దు సొన్సినాట్. లోకు మరిసి ఆతి నా వందిజ్ ప్రవక్తరు రాస్తి విజు మాటెజ్ అబ్బె పూర్తి ఆనాద్.

32-33 యూదురు ఆఇ పరి కీదు నాను ఒపజెపె ఆన. వారు నజి వెక్కిసి సిగు లాగ్గి, నా ముస్కు పూసి కొరడెజాణిజ్ డెఃయిజి నప్పొర్. మూండ్రొ దినమ్కాజ్ నాను మర్జి నిక్పె ఆనాలె.

34 గాని సిసూరిజ్ యా మాటెజ్ లొఇ ఉండ్రొబా అర్దం ఆవితార్. దిన్ని అర్దం వరిజ్ డాఃజితార్. వాండ్రు వెప్తొ సజతిజ్ వారు నెన్వితార్.

గుడ్డి వాండ్రు బేస్తెజ్ అట్సినాన్

35 యేసు యెరికొ పట్టుమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడఃకాద్ బస్సి లొసి మహాన్.

36 సేన లోకుర్ అయా సరిదాన్ సొన్సి మహిక, వెహండ్రె, ఇనిక జర్గిజినాద్ ఇజి వెనబాతాన్.

37 వారు వన్నిజ్, “నజరెతు వాండ్రు ఆతి యేసు, సొన్సినాన్”, ఇజి వెప్తొర్.

38 వాండ్రు, “ఓ దావీదు మరిసి ఆతి యేసువా, నా ముస్కు కనికారం తోరిన్అ”, ఇజి డటం డేల్స్తాన్.

39 ముజాలె సొన్సి మహికార్, “అలెఅ”, ఇజి వన్నిజ్ కసితం వెప్తొర్. గాని వాండ్రు మరి నండొ దావీదు మరిసి, నా ముస్కు కనికారం ఆఅ”, ఇజి మరి ఒదె డటం డేల్స్తాన్.

40-41 యాక వెహండ్రె యేసు అబ్బె నిహాన్. “అయా గుడ్డి వన్నిజ్ నా డగ్రు తగ్అ”, ఇజి వరిజ్ డటం వెప్తొన్. వాండ్రు వాతిజ్, నాను నిజి ఇనిక కిదెజ్ ఇజి కోరిజిని?”, ఇజి వన్నిజ్ వెన్బాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆన ఆజిన”, ఇజి వెప్తొన్.

42 అందెజె యేసు, “ఇదిలో నీను సూణిలె. నీను నా ముస్కు నమకం ఇడ్డి. అందెజె నెగెణ్ ఆతి”, ఇజి వెప్తొన్.

43 వెటనె వాండ్రు బేస్తెజ్ అట్టాన్. వాండ్రు దేవుణుదిజ్ పొగిడిఃజి యేసువెట సాహాన్. యాక సుడఃతిజ్ లోకుర్ విజెరెబా దేవుణుదిజ్ పొగిడిఃతార్.

19

జకయ ఇని పన్ను పెర్ని వన్నిజ్కూక్కినాన్

1 యేసు నడిఃజి యెరికొ పట్టుమ్దు వాతండ్రె అయా సరిదాన్ సొన్సి మహాన్.

2 జెకయ ఇన్ని ఒరెన్ అబ్బె మహాన్. వాండ్రు పన్ను పెర్ని వరిజ్ నెయ్కి. వాండ్రు గొప్ప ఆస్తిమన్నికాన్.

3 యేసుజ్ నుడేదెజ్ ఇజి వాండ్రు కోరితాన్. గాని నండో లోకుర్ మహిజ్ వన్నిజ్ నుడేదెజ్ అటేవతాన్. ఎందనిజ్ ఇహిజు, వాండ్రు కురికాన్.

4 యేసు అయా సరిదాన్ నె వాజి మహిజ్, వాండ్రు ముజుల్ ఉహ్ క్వి సొన్ని ఉండ్రీ బొడ్డె మరాత్ ఎక్తాన్.

5 యేసు మరాన్ అడిగి వాతివెలె, మున్సు బేసి, “జెకయ, బేగి డిగ్ జి రఅ. నేండ్రు నాను నీ ఇండ్రో మండ్రెజ్ వెలె”, ఇజి వన్నిజ్ వెప్తాన్.

6 అందెజె వాండ్రు గజిబిజి డిగితాండ్రె వన్ని ఇండ్రో కూక్ ఒతండ్రె సర్దదాన్ డగ్రు కిత్తాన్.

7 యాక నుడేతారె, లోకుర్ విజెరె సణిజితార్. “వీండ్రు, పాపం కిని వన్ని ఇండ్రో కూల సొహాన్”, ఇజి.

8 అయావలె జెకయ నిజితండ్రె, యేసుజ్ ఈహు వెప్తాన్. “ఇదిలో ప్రబువా, యేలు నా ఆస్తి లోఇ సగం బీదవరిజ్ సీజిన. అనయమ్ దాన్ ఎయె బాన్ బా ఇనిక లొస్తిజు, నాను దని నాల్లి వంతు మరజి సిన”, ఇజి వెప్తాన్.

9 యేసు వన్నిజ్, “నేండ్రు యా ఇండ్రోణి పరి పాపమకు దేవుణు సెమిస్త మనాన్. ఎందానిజ్ ఇహిజు, విన్ని అనిసిఆతి అబ్రాహము దేవుణు మున్సు. నమకం ఇడ్డి వజు, వీండ్రుబా నమకం ఇట్టాన్.

10 లోకు మరిసి ఆతి నాను పాడాజి సొని వరిజ్ రెబాజి రక్పిస్తెజ్ వాత”, ఇజి వెప్తాన్.

పణిమణిసిర్ కత

11 లోకుర్ యాకెజ్ వెంజి మహార్. వాండ్రు యెరూసలెం డగ్రు ఆతాన్. దేవుణు రాజు వజు వెటనె వానాన్ లె ఇజి లోకుర్ బా ఒడేబితార్. అందెజె వాండ్రు కత వజు వరిజ్ ఈహు నెన్ పిస్తాన్.

12 ఒరెన్ రాజు వజు కుటుమ్ దికాన్ వన్ని దేనమ్ దు రాజు ఆదెజ్ ఇజి ఉండ్రీ దూరం మని దేసెం సొహాన్. మరి, మరజి వాదెజ్ ఇజి సొహాన్.

13 సొని ముజుల, వన్ని పణిమణిసిర్ లోఇ పది మణిసిర్ కూక్ ఒరెన్ ఒరెన్ వన్నిజ్ ఉండ్రీ మీనా* సిత్తాన్. సితాండ్రె, “నాను మరజి వాని దాక బేరం కిజి మండ్రు”, ఇజి వరిజ్ వెప్తాన్.

14 గాని వన్ని పట్టమ్ దికార్ వన్నిజ్ ఇస్తం సిలెతాద్. అందెజె వారు, “వీండ్రు మజి ఏలుబడి: కిదెజ్ మజి ఇస్తం సిల్లెద్”, ఇజి వన్ని వెనుక పెరి రాజుజ్ కబ్బు పోక్తార్.

15 అహిజ్ బా, వాండ్రు రాజు ఆతాన్. మరజి వాతివెలె, వాండ్రు డబ్బు సిత్తి మణిసిర్, అయా డబుదాన్ బేరం కిజి ఇనిక గణస్తార్ ఇజి నెస్తెజ్ వరిజ్ కూక్ పిస్తాన్.

16 పరిలోఇ మొదోహికాన్ వన్ని డగ్రు వాజి, “బాబు, నీను సితి యాబయి రుపాయుజాణిజ్, అయ్ దు వందెజ్ రుపయిజు వాతె”, ఇజి వెప్తాన్.

17 వాండ్రు, “నెగ్గి పణిమణిసి నీను నెగెండ కితి. నీను ఇజ్జి పణిదు నమకం దాన్ మహి. అందెజె పది పట్టమ్ క మున్సు అతికారి ఆఅ”, ఇజి వెప్తాన్.

18 అయావలె మరి ఒరెన్ వాజి, “బాబు, నీను సితి యాబయి రుపాయుజాణిజ్ రుండి వందెజ్ యాబయి రుపాయ్ జు వాతె”, ఇజి వెప్తాన్.

19 నీను బా అయ్ దు పట్టమ్ క మున్సు అతికారి ఆఅ”, ఇజి వెప్తాన్.

* 19:13 19:13 ఉండ్రీ మీనా మూండ్రీ నెలెజు పణిదిజ్ కూలి

20-21 అయావలె మరి ఒరెన్ వాజి, “బాబు, ఇదిలో నీ డబ్బు. నీను నీది ఆఇక ఒనికి. నీను విత్ ఇకెక్ కోయ్ జి ఒనికి. నీను గటి పాణం మనికి. అందెజె నిజి తియెల్ ఆజి యా డబ్బు రుమాల్ దు మూట తోహక్ ఇట్టా మహా”, ఇజి వెహ్లాన్.

22-23 అందెజె వాండ్రు వన్నిజ్ వెహ్లాన్, “పణిదిజ్ రజ పణిమణిసి, నీ వెయిది సొంత మాటదిజ్ నె, నాను నిజి తీర్పు తిర్సిన. నాను నాది ఆఇదనిజ్ పెర్ని ఒనికాన్ ఇజి, నాను విత్ ఇకెక్ కోయ్ జి ఒనికాన్ ఇజి నీను నెస్సి గదె. నాను గటి పణం మనికాన్ ఇజి నీను నెస్సి. మరి ఎందనిజ్ నా డబ్బు బెంకుదు ఇడెఇతి? అహు ఇట్టిక ఇహిజ, నాను మర్జి వాతివెలె వడ్డిదాన్ దోహక్లాద్ మరి.

24 విన్నిబాన్ మన్నిడబ్బు లాగ్లి వది పట్టుమ్కాజ్ అతికారి ఆతి మొదోహివన్నిజ్ సీదు”, ఇజి పడెకాద్ నిహి మహి వరిజ్ వెహ్లాన్.

25 వారు, “బాబు, వన్నిజ్ అయ్ దు వందెజ్ రుపాయ్ జు మనె గదె”, ఇజి వెహ్లాన్.

26 వెహ్లాజ్ వాండ్రు, “నమిదెజ్ తగ్గి వన్నిజ్ మరి నండో కల్లినాద్ లె. గాని నమిదెజ్ తగ్గ ఇ వన్నిజ్ కల్లితి మన్ని కండెక్ బా లగాన్, ఇజి నాను మీ వెట వెహ్లాన్.

27 మరి, నాను వరి ముస్కు ఎలుబడికి కిదెజ్ ఇస్టం సిల్లి నా పగ ఆతి వరిజ్ ఇబ్బె తగ్గ అ. వరిజ్ నా ఎద్రు కత్తు”, ఇజి వెహ్లాన్.

28 యేసు యా మాటెజ్ వెహ్లా వెనుక, యెరుసలం సొండెజ్ వరి ముజుల సొన్నినాన్.

29-30 ఒలివ గొరొణ్ డగ్రు మన్ని బెత్ నెగె, బెతానియ ఇని నాహ్లాజ్ డగ్రు వాతాన్. వాతివెలె వన్ని సిసూర్ లొఇ రిఎరిజ్ కూక్కి, “మీ ఎద్రు మన్ని నాటో సొండ్రు. అబె సొహిజ సరి, తోహక్కి మని గాడెదె పిల్ల తోర్నాద్. దన్నిముస్కు ఎనెజ్ బా ఎయెర్ బా బన్ ఎరె. దనిజ్ కుత్తి పేర్జి తగాట్.

31 ఎయెన్ బా, “మీరు ఎందనిజ్ దనిజ్ కుత్ సినిదెర్, ఇజి వెన్ బాతిజ, యాకెజ్ ప్రబుజ్ కావాలి, ఇజి వరిజ్ వెహ్లా”, ఇజి వెహ్లాండ్రె పోక్లాన్.

32 పోక్కి మనికార్ సొన్ని వాండ్రు వరిజ్ వెహ్లా లెకెండెన్ సుడెతార్.

33 వారు ఆ గాడెదె పిల్లదిజ్ కుత్తి మహిజ్, దన్ని ఎజుమానుర్, “మీరు ఎందానిజ్ గాడెదె పిల్లదిజ్ కుత్తిన్ దెర్”, ఇజి వెన్ బాతార్.

34 అందెజె వారు, “యాక ప్రబుజ్ కావాలి”, ఇజి వెహ్లాన్.

35 వారు యేసుడగ్రు తత్తార్. తత్తార్, దన్నిముస్కు వరి పాతెజ్ పహ్లాన్. యేసుజ్ దని ముస్కు ఎకిస్తార్.

36 వాండ్రు సొన్ని మహిజ్, వరి పాతెజ్ సొన్ సిని సర్దు పహ్లాన్.

37 ఒలివ గొరొణ్ డిగ్గి వాని సర్దు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణుదిజ్ పొగిడితార్. వారు సుడెతి విజు గొప్పు పణిజ వందిజ్ సర్దుదాన్ దేవుణుదిజ్ డటం పొగిడితార్. వారు ఈహు పొగిడితార్.

38 “దేవుణు సతి అతికారమ్ దాన్ వాజిని రాజుజ్ పొగ్ డె ఆనికాన్ †. పరలోమ్ దు సమాదనం మనాద్. ముస్కు మన్ని దేవుణు గొప్పు వెరికాన్”,

39 నస్తివలె ఆ మంద లొఇ మన్ని సెగొండార్ పరిసయ్ రుజు, “ఓ బోదకినికి, నీ మంద సిసూర్ విజెరిజ్ అలెజి మండ్రు ఇజి డటం వెహ్లా”, ఇజి వెహ్లాన్.

40 అందెజె వాండ్రు, “వీరు అల్లెత మహిజ, యా పణుకుజ్ డటం డేల్లి పొగిడిజి నె ఇజి నాను మీ వెట వెహ్లాన్”, ఇజి వెహ్లాన్.

† 19:38 19:38 కీర్తన 118:26.

41-42 వాండ్లు యెరూసలెం పట్నం డగ్గు వాతండ్రె, పట్టుమ్దిజ్ సుడేజి అబ్బె మన్ని లోకుర్ వందిజ్ అడేబతాన్. అడేబతాండ్రె ఈహు వెహ్లాన్, “మీరు యా దినమ్దు బా సమాదనం ఆని సజతిజ నెస్తిజ మిజి ఎసానో మేలు మంజినాద్. గాని యేలు యాకెజ్ మీ కణకాజ్ తోరెండ డాజీత మనె.

43-44 దేవుణు మిజి రక్సిస్తాజ్ మీ డగ్గు వాతి కాలం మీరు నెన్ ఇదెర్. అందెజె మీ పగతికార్ మీ సుటులం కోట తోహ్ క్సి వెల్లి సాన్ ఎండ, లావు అడ్డుజ్ కినార్. వారు మిజి, మీ పట్టుమ్దిజ్ పూర్తి నాసనం కినార్. వారు పణుకు ముస్సు, పణుకు మన్ ఏండ పట్నం పూర్తి నాసనం కిని కాలం వానాద్ లె.

యేసు గుడిదాన్ సవ్ కారిజ పేర్ జినాన్

45-46 యాకెజ్ వెహ్లాండ్రె, వాండ్లు దేవుణు గుడిదు సాహాన్. అయావలె అబ్బె సవ్ కారిజు పొర్ని మహార్. వరిజ్, “నా గుడిః పార్దనం కిదెజ్ ఇడ్డి గుడిః# ఇజి దేవుణు మటదు రాస్త మనాద్. గాని మీరు డొజారి మంజిని సాలం⁵ లెకెండ్ దనిజ్ కితిదెర్”, ఇజి వెహ్లాండ్రె వరిజ్ పేర్తాన్.

47 యేసు రోజు, గుడిదు బోదకిజి మహాన్. పెరిపుజెరిజు, యూదురి రూలుజ్ నెస్సిస్సికార్, లోకుర్ లొఇ మన్ని పెద్దెల్ జు వన్నిజ్ సపైజ్ సుడేజి మహార్.

48 గాని లోకుర్ విజెరె వన్ని మాటెజ్ బాగ వెంజి వన్ని సుటులం మహిజ్, వన్నిజ్ సపైజ్ అట్ ఏతార్.

20

యేసు అతికారం వందిజ్ వెన్ బాజినార్

1 అయా దినమ్ కలొఇ ఉండ్రి నాండిజ్, వాండ్లు దేవుణు గుడిదు లోకాజ్ నేరేపిసి, సువార్త బోదిసి మహాన్. అయావలె పెరి పుజెరిజు ని యూదురి రూలుజ్ నెస్సిస్సికార్, పెద్దెల్ జు వెట కూడేజి వన్ని ముస్సు వాతాద్.

2 నీను ఇని అతికారమ్ దాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహ్లా”, ఇజి వన్నిజ్ వెన్ బాతార్.

3 అందెజె వాండ్లు, “నాను బా మిజి ఉండ్రి మాట వెన్ బానా.

4 బాప్తినం సీదెజ్ అతికారం యోహాసుజ్ ఎయె బాణిజ్ వాతాద్ దేవుణు బాణిజ్ నా లోకు బాణిజ్ నా నజి యేలు వెహ్లా? ఇజి వెహ్లాన్.

5 వరిలొఇ వారు ఈహు వర్గితార్. దేవుణు బాణిజ్ వాతాద్ ఇజి మాటు వెహ్లాజు, ఎండనిజ్ మీరు వన్నిజ్ నమ్ ఇతిదెర్ ఇజి వాండ్లు వెన్ బానాన్.

6 లోకురి బాణిజ్ ఇజి మాటు వెహ్లాజు, లోకుర్ విజెరె మజి పణకాణిజ్ డెయినార్. ఎండనిజ్ ఇహిజు, యోహాసు, ఒరెన్ దేవుణు ప్రవక్త ఇజి విజెరె పూర్తి నమ్మిజినార్.

7 అందెజె వారు, “అయాక ఎంబెణిజ్ వాతాదో మజి తెలివెద్”, ఇజి వారు మర్జి వెహ్లార్.

8 అహిజు, ఎంబెణి అతికారమ్ దాన్ నాను యా పణిజ్ కిజిన ఇజి నాను బా వెహ్లా”, ఇజి యేసు వరిజ్ వెహ్లాన్.

రయ్యుజు కత

9 మరి, వాండ్రు ఉండ్రీ కత వజ లోకురిజ్ నెన్పిస్తాన్. “ఒరెన్ లోకు ద్రాక్స టోట ఉణుస్తాన్. ఆ టోట సెగొండార్ రయ్తూజ తనక సితాన్. సితండ్రె నండో కాలం మండ్రెజ్ ఉండ్రీ దూరం దేసెం సాహాన్.

10 పంట కొయ్ని కాలమ్దు వన్నిజ్ వాని పట్టుజ వంతు లోసి తగ్అ ఇజి ఒరెన్ గొతియ వన్నిజ్ రయ్తూజ డగ్రు పోక్తాన్. అయా రయ్తూజ వన్నిజ్ డెయితారె వహి కీదాన్ మరజి పోక్తార్.

11 వాండ్రు మరి ఒరెన్ గొతియవన్నిజ్ పోక్తాన్. వారు వన్నిజ్బా డెయిజి, సిగు కితారె వహి కీదాన్ పోక్తార్.

12 మరి బా, ఒరెన్ వన్నిజ్ పోక్తాన్. వారు వన్నిజ్ గాయమ్కు ఆని లెకెండ్రె డెయితారె వెల్లి విసిర్తార్.

13 అయావలె ద్రాక్స టోట ఎజుమాని, “నాను ఇనిక కిదెజ్? నాను లావు ప్రేమిన్నీ నా సొంత మరిసిజ్ పోక్కు. వారు వన్నిజ్ గవరం సీనార్లెను”, ఇజి ఒండ్రెబితాండ్రె పోక్తాన్.

14 గాని పాలి ఆస్తి మన్నికార్ వన్నిజ్ సుడ్రెతారె, “వీండ్రు యా టోటాదిజ్ అక్కు మనికాన్. యా టోట మాది ఆదెజ్ వన్నిజ్ సప్పాట్. రదు”, ఇజి వరి లోఇ వారు వర్గితార్.

15 అందెజె వారు వన్నిజ్ ద్రాక్స టోటదాన్ వెల్లి పోక్తారె సప్తార్. అహిజ, ద్రాక్స టోట ఎజుమాని వరిజ్ ఇనిక కీనాన్?

16 వాండ్రు వాజి, అయా రయ్తూజ సప్పి మహి వరిజ్ టోట ఒపజెప్పాన్. లోకుర్ యాక వెహారె, “ఆ లెకెండ్రె కిదెజ్ ఆవెద్”, ఇజి వెప్తార్.

17 యేసు వరిజ్ డిటం బేసి ఈహు వెన్బాతాన్, “అహిజ, ఇల్లు తోహ్నికార్ నెక్తి పోక్తి పణుకు మూలదిజ్ మూల పణుకు ఆతాద్* ఇజి దేవుణు మాటదు రాస్తి మన్ని దన్ని అర్దం ఇనిక?

18 అయా పణుకు ముస్కు అర్ని విజెరె ముకెజ్ ఆనార్. అయా పణుకు ఎయెన్ ముస్కు అర్నిజ, వాండ్రు సింద్సింద ఆనాన్”.

19 యూదురి రూలుజ్ నెస్పిన్సికార్, పెరి పుజెరిజు, మా వందిజ్నె వీండ్రు కత వజ వెహాన్ ఇజి నెస్తారె, వెటనె వన్నిజ్ అస్తెజ్ సుడ్రెతారె. గాని లోకురిజ్ తియెల్ ఆతారె, అస్వెతార్.

20 అందెజె వారు వన్నిజ్ బాగ గురి కిజి మహార్. ఎందానిజ్ఇహిజ, వాండ్రు వెహిన్సి మాట లోఇ ఇని దనిజ్బా తపు అసి వన్నిజ్ తోహ్ని అతికారిజి బాన్బపజెప్తెజ్. దిని వందిజ్ వారు నండ్రెండ్రెరిజ్ పోక్సినార్. యా సెగొండార్ మాపు నీతి నిజాయితి మనికాప్ ఇజి వేసం కినికార్. నని వరిజ్ వన్ని డగ్రు పోక్తార్. వీరు సొన్ని వన్ని మాటెజులోఇ తప్ప అస్తెజ్ ఇజి.

21 వారు వాతారె వన్నిజ్, “ఓ బోదకినికి, నీను నిజమతిక వెహ్ని బోదిసిని ఇజి మాపు నెస్సాప్. నీను ఇజ్జికార్ పెరికార్ ఇజి తేడ తోఇకి. దేవుణుదిజ్ ఇస్టం ఆతి నిజమాతి బత్తు వందిజ్ నీను నిజం నెస్పిన్సి ఇజి మాపు నెస్సాప్.

22 మాపు కయ్సరుజ్ పన్ను సీనికెజ్ నాయమ్నా? అనయమ్నా?”, ఇజి వన్నిజ్ వెన్బాతార్.

23-24 వాండ్రు వరి సెఇ బుద్దిదిజ్ నెస్తాండ్రె వరిజ్, “ఉండ్రీ దినారి కాను తోరిస్తు. దిని ముస్కు మన్ని బొమ్మ ఎయెది? రాస్తి మన్ని రాంత ఎయెది?”, ఇజి వెన్బాతాన్. “కయ్సర్వి”, ఇహార్ వారు.

* 20:17 20:17 కీర్తన 118:22.

25 అందెజె వాండ్రు, “కయినరుది, కయినరుజ్ సీదు. దేవుణుది దేవుణుదిజ్ సీదు”, ఇజి వెహ్తాన్.

26 వారు అబ్బె మంద ఎద్రు వాండ్రు వెహ్తా మాటదు తపు అన్నజ్ అట్ఎతార్. వాండ్రు మర్జి వెహ్తా మాటదిజ్ నండో బమ్మ ఆతారె అలెతార్.

27 నస్తివలె సెగొండార్ సదుకయరు యేసు డగ్రు వాతార్. సాతి వెనుక మర్జి నిజ్నిక సిల్లెద్ ఇజి వారు వెహ్సినార్. వారు వాతారె ఈహు వెన్బాతార్.

28 ఓ బోదకినికి, ఒరెన్ కొడోర్ సిల్లెండ సాతిజ. వన్ని తంబెర్ని ఒన్నిజ్ ఇడ్డె ఆజి కొడోర్ ఇడెదెజ్. ఆహె సాతి వన్ని వందిజ్ కుటుం నిల్పెజ్, ఇజి మోసె మజీ రాస్త సిత్తమనాన్.

29-31 యేలు సుడెఅ, ఉండ్రీ కాలమ్దు, దాదతంబెర్సిన్, ఏడు గురు మహార్. తోల్సురదికాన్ ఉండ్రీ బోదెల్దిజ్ పెండ్లి ఆతాన్. కొడోర్ సిల్లెండ సాతాన్. సాతిజ, నడిపి వాండ్రు దనిజ్ ఇడ్డె ఆతాన్. కొడోర్ సిల్లెండ సాతాన్. వెనుక కొగ్రి నడిపి దనిజ్ ఇడ్డె ఆతాన్. కొడోర్ సిల్లెండ వాండ్రుబ సాతాన్. ఆహె ఏడు గురు బా కొడోర్ సిల్లెండ సాతార్.

32 కడివేరిదు ఆ బోదెల్బా సాతాద్.

33 అందెజె సాతి వరిబాణిజ్ మర్జి నిజ్ని వెలె, ఆ బోదెల్ ఎయెరిజ్ అల్ని ఆనాద్? ఆ ఏడు గురుదిజ్బా అది అల్ని ఆత మహాద్ గదె?”, ఇజి వెన్బాతార్.

34 అందెజె యేసు వరిజ్ ఈహు వెహ్తాన్, “యా లోకమ్ది లోకుర్ పెండ్లి ఆజినార్. పెండ్లిదిజ్ సీజినార్.

35 గాని సాతి వరిబాణిజ్ మర్జి నిజ్జి పరలోకమ్దు మండ్రెజ్ తగ్నికార్ పెండ్లి ఆవర్. పెండ్లిదిజ్ సివర్.

36 ఎంఆనిజ్ ఇహిజ, వారు మరి సావర్. వారు దేవుణు దూతెజ పోలితికార్. వారు సాపుదాన్ మర్జి నిజ్నార్. అందెజె వారు దేవుణు కొడోర్.

37-38 సాతికార్ నిజ్నార్ ఇజి మోసె నెగ్రెండ రుజుప్ కిజినాన్. అట కన్నీ బాన్ మోసె సాహాన్. అబ్బె, ‘అబ్రాహము దేవుణు, ఇసానుకు దేవుణు, యాకోబు దేవుణు ఇజి వాండ్రు దేవుణు అతి ప్రబు వందిజ్ వెహ్సినాన్. అయావలె అబ్రాహము, ఇసానుకు, యాకోబు బత్తిజినార్ ఇజి తోర్నాద్. వాండ్రు బత్తితి మన్ని వరిజ్నె దేవుణు. సాతి వరిజ్ దేవుణు ఆఎన్. ఎందనిజ్ ఇహిజ, వన్ని వెట కూడితి మనికార్ విజెరె బత్తిజినార్.

39 సెగొండార్, యూదురి రూలుజ్ నెస్పిస్సికార్, “బోదకినికి, నీను నెగెండ వెహ్తా”, ఇజి వన్నిజ్ వెహ్తార్.

40 వెనుక వారు వన్నిజ్ ఇనికబా వెన్బాదెజ్ ఎయెరిజ్బా దయరం సాల్ఎతార్.

41 యేసు వరివెట ఈహు వెహ్తాన్. “క్రీస్తు దావీదు తెగ్గాతికాన్ ఇజి ఎలాగ వారు వెహ్సినార్?

42-43 ‘నాను నీ పగాతి వరిజ్ నీ పాదమ్క అడిగి ఇడ్లిదాక, నీను నా ఉణెర్ పడెకాదు బన్అ”, ఇజి ప్రబు నా ప్రబు వెట వెహ్తాన్†”, ఇజి కీర్తన పుస్తకమ్దు దావిదునె వెహ్సినాన్.

44 దావిదునె వన్నిజ్, “ప్రబు” ఇజి కూక్సినాన్. అయావలె వాండ్రు ఎలాగ దావీదు మరిసి ఆనాన్.

† 20:42-43 20:42-43 కీర్తన 110:1.

45-46 లోకుర్ విజెరె వెంజి మహివలె, యేసు వన్ని సిసూరిజ్ వెహ్లాన్, “మీరు యూదురి రూలుజ్ నెస్పిస్పివరి వందిజ్ జాగర్త మండ్రు వారు నిరి సొక తొడెగిజి బూలాదెజ్ ఇస్టం ఆతికార్. సత నడిఃమి పెరికార్ ఇజి మాడెః ఆదెజ్ కోరిజినార్. యూదురి మీటిజ్ ఇండ్రొ పెరికార్ బస్సి బాడిఃదు బస్తెజ్, విందుద్ నెగ్గి బాడిఃదు బస్తెజ్ కోరిజినార్.

47 వారు రాండి బోదెక్ ఇల్కాణికెజ్ అనయమ్దాన్ లాగ్జినార్. మహి వరి ఇంక నెగ్గికావ్ ఇజి తోరె ఆదెజ్ నిరి పార్దనం కిజినార్. దేవుణు వరిజ్ నండొ సిక్స సీనాన్”.

21

1 యేసు దేవుణు గుడిఃదు బస్తాండ్రె, సుటులం బేస్తాన్. అయావలె ఆస్తిమన్నికార్ సంత పెట్టెదు పెరి సంత అర్పసినిక సుడెఃతాన్.

2 ఇనిక సిల్లి ఉండ్రొ రాండి బోదెలి సంత అర్పస్సిక బా సుడెఃతాన్. అది రుండి పయిసెజ్ అర్ప్తాద్.

3 వాండ్రు వరిజ్, “నాను నిజం మీ వెట వెహ్సిన, యా ఇనిక సిలి రాండి బోదెలి మహి విజెరె ముస్సు లావు అర్ప్తాద్.

4 వారు విజెరె వరిజ్ కల్గితి మన్ని సంసారం బాణిజ్ అర్ప్తాద్. గాని అది దనిజ్ సిల్లి బాణిజ్ దనిజ్ బత్కిదెజ్ మనికెజ్ అర్ప్తాద్”, ఇజి వెహ్లాన్.

5 అయావలె వన్ని సిసూర్లోఇ సెగొండార్, అయా దేవుణు గుడిః వందిజ్ వర్గిజి మహార్. నెగ్గి పణుకుదాన్ తొహ్కొక యా గుడిః ఇజి వర్గితార్. సంద సిత్తి నెగ్గి ఇనాయమ్కు ఇబ్బె ఇడ్డె మనె. గొప్ప సొకు మనాద్”, ఇజి వర్గితార్.

6 అయావలె యేసు, “మీరు సుడెఃతికెజ్ పణుకు ముస్సు పణుకు మన్ఏండ అరె అని దినమ్కు వానెలె”, ఇజి వెహ్లాన్.

7 అయావలె వారు, “ఓ బోదకినికి, యాకెజ్ ఎసెజ్ జర్గిజినె? యాక జర్గిని కాలం డగ్రు ఆతాద్ ఇజి తోరిస్సి గుర్తు ఇనిక?”, ఇజి వెన్బాతార్.

8 అందెజె వాండ్రు వెహ్లాన్, “మీరు మొసెం కిబె ఆఎండ జాగర్త మండ్రు. ఎండనిజ్ ఇహిజ నండొండార్ నా పేరు అసి వానార్లె. వారు, “నానె దేవుణు పొక్తి క్రిస్తు ఇజి, కాలం డగ్రు ఆతాద్ ఇజి వెహ్సిన వానార్. వరి వెట సొన్మాట్.

9 మీరు విదెమ్కు వందిజ్, జటిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్వెలె. గాని ఆక్కర్ రోజు వెటనె రెఉ.

10 మరి వాండ్రు వరిజ్ వెహ్లాన్, “లోకుర్ ముస్సు లోకుర్, రాజెం ముస్సు రాజెం జటిజ్దిజ్ నిజ్నార్లె.

11 అబ్బె ఇబ్బె బూమి గొప్ప కల్గినికెజ్ వానెలె. నండొ దేసమ్దు కర్తుజ్, నండొ లోకురిజ్ సెద్రిజి అస్సి కస్టమ్కు వానెలె. గొప్ప తియెల్ కల్గిస్సి గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాల, వారు మిజి అస్సారె, ఇమ్సెజ్ కినార్. వారు మిజి యూదురి మీటిజ్ ఇండ్రొని, జెలిదు ఒపజెస్పార్. రాజుజ ముజాల, మహి అతికారిజ ముజాల మిజి తనార్. యాకెజ్ విజు నా ముస్సు నమకం ఇడ్డి వందిజె జర్గినె.

13 అయావలె, యాకదె మీరు నా వందిజ్ సువార్త వెహ్లాజ్ నెగ్గి సమయం.

14 వారు వెన్బానివెలె, వరిజ్ ఎలాగ మరజి వెహ్లాజ్ ఇజి ఒడెఃబిజి ముజాల బాద అవే ఇజి తిరుమానం కిజి మన్అ.

15 ఎందానిజ్ ఇహిజ, మీ పగాతికార్ ఎయెర్బా మిజి ఎద్రిస్ఎండ మంజిని వజ మీరు వెహైజ్మాటెజ్, గెణం నాను మిజి సీన.

16 మిజి మీ అయిసి అఫోసీర్బా దాదతంబెర్సిర్బా కూలెజ్బా అతికారిజబాన్ సిక్కు సిబిస్సెజ్ ఒవజెస్పార్. మీ లోఇ సెగొండారిజ్ వారు సస్పార్.

17 నా ముస్కు నమకం ఇడ్తి వందిజ్ విజెరె మీ ముస్కు పగదాన్మంజినార్.

18 గాని మీరు ఎలాకాలం బత్తినార్.

19 కష్టమకు ఓరిసి మండ్రు. అయావలె మీజి ఎలాకాలం దేవుణు వెట బత్తిని బత్తు దోహ్క్సిదెర్.

20 యెరూసలెం పట్నం సుటులం ఉద్దం కినికార్ కూడేజి మహిక, మీరు సుడేతిజ, దన్ని నాసనం డగ్రు ఆతాద్ ఇజి మీరు నెస్సెజ్వెలె.

21 అయావలె నాసనం ఆవిండ మండ్రెజ్ యూదయ దేసమ్దు మన్నికార్ గొరోకాజ్ ఉహ్కెజ్వెలె. యెరూసలెం పట్నం నడిమి మనికార్ వెల్లి ఉహ్కెజ్వెలె. యెరూసలెం పట్నం వెల్లి మనికార్ లోఇ సొండ్రెజ్ ఆవిద్.

22 ముజాలె రాస్తి మనికెజ్ పూర్తి అదెజె యా సిక్కు దినమ్కు.

23 ఆ దినమ్కాజ్ ఫొటాద్ మన్ని వన్కాజ్, పాలు ఉటపిన్ని వన్కాజ్ గొప్ప కష్టం. ఎందనిజ్ ఇహిజ, యూదయ దేసిం ముస్కు నండొ కష్టమకు వానెలె. దేవుణు కోపం యా లోకుర్ ముస్కు వానాద్లె.

24 వారు కూర్దెజాణిజ్ సానార్లె. సెగొండారిజ్ తోహ్క్సి పయ్ దేసెమ్కాజ్ విజు ఒనార్లె. దేవుణుదిజ్ నెన్ఇకార్ యెరుసలెమ్దిజ్ ఏలుబడిః కినార్లె. వరి ఏలుబడిః అబ్బె పూర్తి ఆని కాలమ్దాక యెరూసలెం వరి అడిఃగి ఆనాద్.

25 ఫొద్దుదు, నెలదు, సుక్కెజదు బమ్మకిని గుర్తుజ్ తోర్నెలె. సమ్దరమ్ది ఉల్కాజ్ గొప్ప గగోల్ కిజి వరిజ్ తియెల్ కల్గిస్సె. ఆహె బూమిద్ మన్నిలోకుర్ విజెరె ఇనిక కిదెజ్ ఇజి అర్దం కివిండ మంజినార్.

26 ఆగసమ్దు మన్ని నండొ రకమ్కాణికెజ్ కద్లినె. అందెజె లోకమ్దు జర్గిని వన్కాజ్ వందిజ్ ఎత్తు కిజి తియెల్ ఆజి లోకుర్ సానార్.

27 అయావలె లోకు మరిసి ఆతి నాను మొసొపుదు వానిక వారు సూణార్. గొప్ప అతికారం దాన్ గొప్ప జాయ్దాన్ కూడిఃతి సొకుదాన్ మొసొప్దు వానిక వారు సూణార్.

28 యాకెజ్ జర్గిదెజ్ మొదొల్స్సివెలె నిల్సి బుర్త పెర్దు. ఎందానిజ్ ఇహిజ, మీ కష్టమ్కాణిజ్ విడుఃదల డగ్రు ఆజినాద్.

29 వాండ్రు వరిజ్ కతవజ నెన్పిస్తాన్. బొడెమరాతిజ్ని విజు మరెకాజ్ సుడేదు.

30 ఆకెజ్ సెగ్రిసినివెలె, జేట కాలం డగ్రు ఆతాద్ ఇజి మీరె సుడేజి నెసినిదెర్.

31 అయా లెకెండెనె, మీరు యా సజతిజ్ జర్గినిక సూణివెలె, దేవుణు యా లోకమ్దిజ్ ఏలుబడిః కిజినిక డగ్రు ఆతాద్ ఇజి నెసినిదెర్.

32 యా సజతిజ్ జర్గినిదాక, యా తరమ్దికార్ సావీర్, ఇజి నాను మీ వెట కసితం వెప్పిన.

33 ఆగాసం బూమి సిల్లెండ ఆనాద్. గాని నా మాటిజ్ ఎసెజ్బా అయాలెకెండ సొన్ఉ.

34 మీరు ఉణిజి తింజి మత్తుదాన్ మన్ ఏండ యా లోకమ్ ది బత్కు వందిజ్ విసారిన్ ఏండ జాగర్త మండ్రు. సిల్లిజ, లోకుమరిసి ఆతి నాను వాని దినం ఉరి వాతి లకెండ్ వెటనె వానాద్. అందెజె జాగర్త మండ్రు.

35 యా లోకమ్ దు బత్కిజిని లోకుర్ విజెరె ముస్కు అయా దినం నెన్ ఏండ వానాద్.

36 యా జర్గిదెజ్ మన్ని విజు వన్కాజ్ ఓరిసి మంజిని సత్తు వందిజ్, లోకు మరిసి ఆతి నా ముజాలె నిల్ ని సత్తు వందిజ్ ఎస్తివలె బా పార్దనం కిజి జగర్త మండ్రు.

37 యేసు రోజు దేవుణు గుడిఁదు వేడెక నెస్సిసి మహాన్. రెయ్క ఒలివ గొరొత్ మండ్రెజ్ సొన్సి మహాన్.

38 లోకుర్ విజెరె పెందాల్ నె, వన్ని మాటెజ్ వెండ్రెజ్ దేవుణు గుడిఁదు వాజి మహార్.

22

యేసుజ్ ఒపజెప్తెజ్ యూద ఒప్పుకోటాన్

1 పన్ను ఇని పులాజ్ సిల్లి రొట్టెజ్ తయార్ కిని పండోయి డగ్రు ఆతాద్.

2 సన్తివలె పెరిపుజెరిజు, యూదురి రూలుజ్ నెస్సిస్సికార్ యేసుజ్ ఎలాగ సప్తెజ్ ఇజి ఉపాయి సుడెజి మహార్. ఎందానిజ్ ఇహిజ, వారు లోకురిజ్ తియెల్ ఆజి మహార్.

3 అయావలె, పన్నెండు మణిసి సిసూర్ లొఇ మన్ని ఇస్కరియొతు ఇని యూదెజ్ సయ్సాను అస్తాన్.

4 వాండ్రు పెరి పుజెరిజు, అతికారిజు బాన్ సొహండ్రె ఎలాగ వన్నిజ్ వరికిదు ఒపజెప్తెజ్, ఇజి వరివెట వర్గితార్.

5 అందెజె వారు సర్ద ఆతారె, వన్నిజ్ డబ్బు సీనాప్ ఇజి ఒప్పుకోటార్.

6 వాండ్రు దనిజ్ ఒప్పుకోటాన్. మంద లోకుర్ సిల్లివెలె వన్నిజ్ వరిజ్ ఒపజెప్తెజ్ తవ్కానం సుడెజి మహాన్.

7 పులాజ్ సిల్లి రొట్టెజ్ తయార్ కిని పండోయి కిని దినం వాతాద్. ఆ దినమ్ దు మెండ గొరె పిల్లెజ్ పూజ సీజి పన్ను బోజనం కిదెజ్.

8 అందెజె యేసు పేతురుజ్, యోహానుజ్, “మీరు సొన్సి, మాటు పన్ను బోజనం ఉండెజ్ తయార్ కిదు”, ఇజి వెప్తాండ్రె వరిజ్ పొక్కినాన్.

9 వారు, “మాపు ఎంబె తయార్ కిదెజ్ ఇజి నీను కోరిజిని?”, ఇజి వన్నిజ్ వెన్ బాతార్.

10-11 అందెజె యేసు వరిజ్ ఈహు వెప్తాన్. “మీరు పట్టమ్ దు సొనివెలె, కుండాదు ఏరు పిణ్ జి ఒరెన్ మీ ఎద్రు వానాన్. వాండ్రు సొని ఇండ్రొ వన్ని వెట సొండ్రు. సొన్సి ఆ ఇండ్రొణి యజమానిజ్, ఈహు వెప్తు, ‘నాను నా సిసూర్ వెట పన్నుబోజనం కిదెజ్ గది ఎంబె మనాద్ ఇజి బోదిస్సికాన్ నిజి వెన్ బాజినాన్’, ఇజి.

12 అయావలె ఆ ఎజమాని విజు తయార్ కితి మేడె ముస్కు మన్ని పెరి గది ఉండ్రె తోరిస్సాన్. అబ్బె మీరు తయార్ కిదు”, ఇజి వెప్తాన్.

13 వారు పట్టమ్ దు సొహారె, యేసు వరిజ్ వెప్తావజ విజు సుడెజెతార్. వారు పన్నుబోజనం తయార్ కితార్.

14 పన్నుబోజనం కిదెజ్ టయం ఆతివెలె, వాండ్రు వన్ని పన్నెండు మణిసిర్ అపొస్తులు వెట బోజెనమ్ దిజ్ బస్తార్.

15 అయావలె వాండ్రు వరిజ్, “నజీ నప్పి ముజాల మీ వెట కూడఁజి యా పన్ను బోజనం ఉండెజ్ నండో ఆస ఆత.

16 ఎందానిజ్ ఇహిజ, యా పన్ను బోజనమ్దిజ్ గుర్తు దేవుణు రాజెమ్దు పూర్తి ఆనిదాక నాను మరి ఎసెజ్బా ఉణెవి.

17 యేసు ద్రాక్కుకల్లు మన్ని గిన్న అసి దేవుణుదిజ్ వందనం కితాన్. కితాండ్రె, “లోసి, మీరు సీబాజి ఉండు.

18 ఎందానిజ్ ఇహిజ, ఏలుదాన్ దేవుణు లోకురిజ్ ఏలుబడిఁ కినిక సూణిదాక నాను మరి ద్రాక్కు పట్టు రసం ఉణెవి ఇజి నాను మీ వెట వెహ్సాన్”, ఇజి వెహ్సాన్.

19 మరి వాండ్రు రొట్టెఅసి దేవుణుదిజ్ వందనం వెహ్సి దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిని నా ఒడొల్దిజ్ గుర్తు. నజీ ఎత్తు కిదెజ్ యాక కిజి మండ్రు”, ఇజి వెహ్సాన్.

20 అయలెకండెన్, బోజనం ఆతి వెన్కా వాండ్రు వరిజ్ ద్రాక్కుకల్లు మన్ని గిన్న సితాన్. ‘యా గినెదు మనికెజ్ మీ పాపమ్క వందిజ్ వాక్సినీ నా నలదిజ్ గుర్తు. యాకదె నా నలదాన్ దేవుణు ఇడ్డి కొత్త ఒపుమానం.

21 గాని నజీ ఒవజెప్పికాన్ నావెట బోజనమ్దిజ్ బస్త మనాన్.

22 దేవుణు ఏర్పాటు కితి వజ, లోకు మరిసి ఆతి నాను సానాలె. గాని నజీ ఒవజెప్పి వన్నిజ్ అబాయా గొప్పు కస్టం”, ఇజి వెహ్సాన్.

23 వారు యా పణిజ్ వరి లొఇ ఎయెన్ కినాన్ ఇజి వరి లొఇ వారె వర్గితార్.

24 మరి, వరిలొఇ ఎయెన్ పెరికాన్ ఇజి ఉండ్రీ ఇజి గొడఁబ వాతాద్.

25 అందెజె యేసు వరిజ్, “దేవుణుదిజ్ నెన్ఇ వరి రాజుర్ వరి మున్ను నండో అతికారం కిజినార్. వరి మున్ను అతికారమ్దు మనికార్, ‘మాపు లోకురిజ్ కూలెజ్’, ఇజి అనుపె ఆజినార్.

26 గాని మీరు అయ లెకెండ మన్మాట్. మీలొఇ పెరికాన్ ఆతికాన్తగిసి ఇజి వన్నిలెకెండ ఆదెజ్. నెయ్కి సేవ కిని వన్ని లెకెండ ఆదెజ్.

27 సుడఁదు, ఎయెన్ పెరికాన్. విందుదు బన్నికాండ్రా, బాట కిజి సీనికాండ్రా? విందుదు బన్నికాండ్రె గదె? గాని నాను మీ నడిఁమి, సేవ కిని వన్ని లెకెండ మన్ను.

28 నా కస్టమ్దు మీరె నా వెట నమ్మకమ్దాన్ నిహి మహికిదెర్.

29 నా బుబ్బి వన్ని లోకురిజ్ ఏలుబడిఁ కిదెజ్ అతికారం నజీ ఒవజెప్పి వజ, నాను మిజీ అయా అతికారం ఒవజెప్పిన.

30 అందెజె నాను ఏలుబడిఁ కినివెలె నా విందుదు నా వెట ఉణిజి తినిదెర్. మీరు రాజుర్ బసి మంజిని సింహసనమ్కాజ్ బసి ఇస్రాయేలురి పన్నెండు తెగ్గాతి వరిజ్ ఏలుబడిఁ కినిదెర్.

పేతురు యేసుజ్ నెన్ఇజి వెహ్సాన్ ఇజి యేసు వెహ్సాన్.

31 “ఒ సిమోన్, సిమోన్, ఇదిలో రయ్తు వాండ్రు గింజెజ బలిన్సి వజ, నీ లొఇ మన్ని నెగ్గెకెజ్ నెస్తెజ్ సయ్తాను నిజి పరిస కినాన్. దిన్నివందిజ్ సెల్వ దొహ్క మనాద్.

32 గాని సిమోన్, నీను నమకం డిన్ఎండ మండ్రెజ్ నాను నీ వందిజ్ పార్దనం కిత మన్ను. నీను మర్జి నా దరిజ్ వానివలె, మహి సిసూరిజ్ వరి నమకం పిరివ్అ”, ఇజి వెహ్సాన్.

33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్బా నాను తయార్నె”, ఇజి వెహ్సాన్.

34 దన్నిజ్ యేసు, “పేతురు నాను వెప్పొన, నేండ్రు కొరు కెరెయెండ ముజాల నీను నజీ నెన్వ ఇజి ముసార్ వెప్పొలె”, ఇజి వెప్తోన్.

35 మరి, వాండ్రు వరిజ్ వెన్బాతాన్, “డబ్బు ఇడ్చి ససి, మరి ఉండ్రీ ససి, జోడ్కు సిల్లెండ నాను మిజి పోక్తివెలె, మిజి ఇనికబా తక్కు ఆతాదా?”, “సిల్లె”, ఇజి వారు వెప్తోర్.

36 “అహిజ, ఏలు, మిజి డబ్బు ఇడ్చి ససి మహిజ, ఆక ఒతెజ్. అయలెకెండనె, మరి ఉండ్రీ ససి బా ఒతెజ్. మిజి ఉండ్రీ కూడం సీలిజ, మీ సొక పొర్చి ఉండ్రీ కూడం కొండెజ్.

37 ఎందానిజ్ ఇహిజ, ‘జెలిదు మన్ని వరి వెట వన్నిజ్ కుడుఃష్టారో*’, ఇజి దేవుణు మాటదు రాస్త మనాద్. నాను వెప్పొన, అయా మాట నావెట పూర్తి ఆదెజ్వెలె. నిజమె నా వందిజ్ రాస్తి మనికెజ్ పూర్తి అజినాద్”, ఇజి వరిజ్ వెప్తోన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమ్కు మనె”, ఇజి వెప్తోన్. దనిజ్ వాండ్రు, “ఆకెజ్ ఆనె”, ఇజి వెప్తోన్.

యేసు ఒలివ గొరొత్ పార్దనం కిజినాన్

39 యేసు పట్టుం డిస్తాండ్రె వన్నిజ్ మన్ని అలవాటు లెకెండ ఒలివ గొరొత్ సొహాన్. వన్ని సిసూర్ వన్ని వెట సొహార్.

40 అబ్బె సొహిజ్, వాండ్రు వరిజ్, “సయ్తాన్ సికుదు అర్పెఎండ పార్దనం కిదు”, ఇజి వెప్తోన్.

41 వాండ్రు వరి బాణిజ్ పణుకు విసిర్చి నసొ దూరం సొహాండ్రె, ముణుకుజ్ ఊర్జి పార్దనం కిజినాన్.

42 “ఓ బా, నిజి ఇస్టం ఆతిజ యా కస్టమ్కు నా బణిజ్ లాగ్ అ. అహిజ్ బా నా ఇస్టం ఆవద్, నీ ఇస్టమ్నె ఆపిద్”, ఇజి.

43 అయావలె దేవుణు మంజిని బాడ్డిః దాన్ ఉండ్రీ దేవుణు దూత వన్నిజ్ తోరె అతండ్రె, వన్నిజ్ ఓదరిస్తాన్.

44 వాండ్రు ఓరిస్తెజ్ అబ్ ఇ గొప్ప దుకమ్దు మహిజ్, మరి నండొ పార్దనం కితాన్. వన్ని రూణు నల బొటుజ్ లెకెండ బూమిదు అరై.

45 వాండ్రు పార్దనం కితి నిజితండ్రె, వెనుక సిసూర్ డగ్రు సొహాన్. సొహిజ్ వారు దుకం దాన్ నిద్ర కిజినిక సుడఃతాన్.

46 అందెజె వాండ్రు వరిజ్, “ఎందనిజ్ మీరు నిద్ర కిజినిదెర్? నిజ్ జి, నయ్తాను మిజి పరిస కిజి తప్పదు అర్పెఎండ పార్దనం కిదు”, ఇజి వెప్తోన్.

యేసుజ్ అరెస్టు కిజినార్

47 యేసు యా మాటెజ్ వెప్పొ మహిజ్, నండొ జెనం వాతాద్. పనెండు సిసూర్ లొఇ మన్ని యూద ఇనికానె వరి ముజాల సొహాన్. వాండ్రు యేసుజ్ ముదు కిదెజ్ వన్ని డగ్రు వాతాన్.

48 అయావలె యేసు, “ఓ యూద, ముదు కిజినె, నీను లోకు మరిసి ఆతి నజి ఒపజెప్పిదా?”, ఇజి వన్నిజ్ వెన్బాతాన్.

49 యేసు వెట మహి సిసూర్ జర్గినికెజ్ సుడఃతిజ్, వారు, “ప్రబువా, మాపు కూర్దాన్ వరిజ్ కత్తెజ్?”, ఇజి వెన్బాతార్.

* 22:37 22:37 యెసయ 53:12.

50 వరి లొక ఒరెన్ విజు పుజెరిజ మున్కు పెరి పుజెరి పణిమణిసిజ్ ఉణెర్ గిబ్బి తెవు కత్తాన్.

51 గాని యేసు, “అలె కిదు”, ఇజి వెప్తాండ్రె, అయా పణిమణిసిజ్ గిబ్బిదిజ్ ముట్టాండ్రె వన్నిజ్ నెగెండ్ కిత్తాన్.

52 యేసు వన్నిజ్ అస్తెజ్ వాతి పెరి పుజెరిజు, దేవుణు గుడిః అతికారిజు పెద్దెల్జ వెట, “నాను డొజ వాండ్రునా? నజి అస్తెజ్ పెరి కూడఃమకు కొణెజ్ అసి మీరు వాతిదెర్?”

53 రొజు నాను మీ వెటనె మంజి గుడిఃదు నేర్పిస్త గదె. అయావలె మీరు నజి తొహఃఇతిదెర్. యాకదె నజి తొహఃకెజ్ దేవుణు మిజి సిత్తి నమయం. ఏలు నయ్యాన్ అతికారమ్దు మనాన్”, ఇజి వరిజ్ వెప్తాన్.

యేసుజ్ నెన్వ ఇజి పేతురు వెప్పినాన్

54 వారు వన్నిజ్ తొహఃకారె, విజు పుజెరిజ మున్కు మన్ని పెరి పుజెరి ఆతి వన్ని ఇండ్రె ఒతాన్. పేతురు దూరం దాన్ వెన్కా సొన్ని మహాన్.

55 వారు డేవ నడిఃమి, సిను ఎర్సి కూడఃజి బసి మహివలె, పేతురు వరి వెట బస్తాన్.

56 అయా ఇండ్రెణి పణిమణిసి ఉండ్రె, పేతురు సిను డగ్ర బస్తిక నుడఃతాద్. వాండ్రు ఎయెన్ ఇజి నెస్తెజ్ వన్నిజ్ డిటాజ్ బేస్తాద్. బేస్తాదె, “వీండ్రు బా వన్ని వెట మహాన్”, ఇజి అది వెప్తాద్.

57 అందెజి పేతురు, “ఓ బీ, నాను వన్నిజ్ నెన్వ”, ఇజి వెప్తాన్.

58 నణెం వెనుక మరి ఒరెన్ వన్నిజ్ నుడఃతాన్. “నీను బా వరి వెట మహికిదె”, ఇజి వెప్తాజ్, “బాబు, నాను వన్నిజ్ నెన్వ”, ఇహాన్.

59 డగ్రు ఉండ్రె గంట వెన్కా మరి ఒరెన్ కసితం వెప్తాన్, “నిజమె, వీండ్రు బా వన్ని వెట మహాన్. ఎండనిజ్ ఇహిజ, వీండ్రు గలిలియదికానె”, ఇజి.

60 దన్నిజ్ పేతురు, “ఓ బాబు, నీను వెప్పిక నజి తెలిఎద్”, ఇజి వెప్తాన్. వాండ్రు వెప్పిమహివలె వెటనె కొరు కెరెతాద్.

61 యేసు వెనుక మప్తాండ్రె పేతురుజ్ డిటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల నీను నజి నెన్వ ఇజి ముసార్ వెప్పాలె ఇజి”, వెప్తా మాట పేతురు ఒడఃబితాన్.

62 వీండ్రు వెల్లి సొహండ్రె నండొ దుకం ఆజి అడఃబతాన్.

కాప్ కినికార్ యేసుజ్ వెక్రిసికార్

63 యేసుజ్ కాప్ కిజి మహికార్ వన్నిజ్ వెక్రిసి డెయిదెజ్ మొదొల్స్తార్.

64 వారు ని కణకెజి కసెల్దాన్ తొహఃకారె, “ఓ ప్రవక్త, వెహఃఅ, ఎయెన్ నిజి డెయితాన్ ఇజి”, ఇజి వెన్బాతార్.

65 వారు వన్నిజ్ దూసిన్ని మరి నండొ మాటెజ్ వన్నిజ్ వెప్తార్.

యేసుజ్ పిలాతుని హెరోదుజ్ ముజాల నిల్స్తార్.

66 పెందాల్ ఆతివెలె, యూదురి పెద్దలుజ్, పెరి పుజెరిజు, యూదురి రూలుజ్ నెస్పిస్పికార్ విజెరె కూడిఃతార్. యేసుజ్ వరి ముజాల నిల్స్తార్.

67-68 వారు వన్నిజ్, “నీను క్రీస్తు నా, మజి వెహాఅ”, ఇజి వెన్బాతార్. అందెజె యేసు వరిజ్, “క్రీస్తు ఇజి నాను వెహ్తాజ, మీరు నమిఇదెర్. నాను మిజి వెన్బాతిజ మీరు మర్జి వెహ్తాఇదెర్.

69 గాని ఏలుదాన్, లోకుమరిసిఆతి నాను గొప్ప అతికారం మని దేవుణు ఉణెర్ పడఃకాదు బన్నలె”, ఇజి వెహ్తాన్.

70 అయావలె వారు విజెరె, “అహిజ, నీను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెహ్తా లెకెండెనె, నానె దేవుణు మరిసి”, ఇజి వెహ్తాన్.

71 అందెజె వారు, “ఎందానిజ్ మజి మరి రుజుప్ వెహ్తాకార్. వన్ని వెయ్దానె మాట వెహట్”, ఇజి వెహ్తార్.

23

1 అయావలె, యూదురు అతికారిజు విజెరె నిహరె, యూదయ దేసెం సుడఃజిని రోమ అతికారి ఆతి పిలాతు బాన్ వన్నిజ్ ఒత్తార్.

2 వారు, “వీండ్రు మా లోకుర్ నడిఃమి గొడబ రేప్పినాన్. రోమ రాజు ఆతి కయ్సరుజ్ వన్ను సీమాట్ ఇజి వెహ్తానాన్. నానె క్రీస్తు అహిజ రాజు ఇజి వెహ్తానాన్”, ఇజి వన్ని ముస్కు నేరం మొహ్తార్.

3 అందెజె పిలాతు యేసుజ్, “నీను యూదురిజ్ రాజునా?”, ఇజి వెన్బాతాన్. వెన్బాతిజ్, “ఒబ, నీను వెహ్తా వజనె”, ఇజి మర్జి వెహ్తాన్.

4 పిలాతు పెరి పుజెరిజ వెట మంద లోకుర్ వెట, “విని ముస్కు నజి, ఇని తప్పు బా తోర్ఎద్”, ఇజి వెహ్తాన్.

5 గాని వారు, “ఏక ఏక వెహ్తార్, “వీండ్రు యూదయ దేసెమ్ది లోకుర్ విజెరిజ్ వన్ని మాట నెస్పిసి గొడబ రేప్పినాన్. యా పణి గలిలయదు మొదొల్ని ఇబ్బె దాక వాతాన్”, ఇజి.

6 యాక వెంజి, “వీండ్రు గలిలయదికాండ్రా”, ఇజి పిలాతు వెన్బాతాన్.

7 యేసు హేరోదు ఏలుబడిః కిని గలిలయ ముటదికాన్ ఇజి పిలాతు నెస్సాన్. అందెజె వాండ్రు వన్నిజ్ హెరోద్బాన్ పోక్తాన్. అయావలె హెరోదు బా యెరూసలెమ్దు మహాన్.

8 హేరోదు యేసుజ్ సుడఃతివెలె నండొ సర్ద ఆతాన్. ఎందనిజ్ ఇహిజ, యేసు వందిజ్ నండొ వెహ మహాన్. నండొ కాలమ్దాన్ వన్నిజ్ సుడఃదెజ్ ఆస ఆజి మహాన్. యేసు కిని బమ్మ ఆని పణిజ సుడఃదెజ్ కోరితాన్.

9 అందెజె వాండ్రు నండొ మాటెజ్ వెన్బాతాన్. గాని యేసు ఇనికబా మర్జి వెహ్తాన్.

10 పెరి పుజెరిజు, యూదురి రూలుజ్ నెస్పిస్సికార్ బాన్ నిల్ని, వన్ని ముస్కు డటిసి నేరం మొప్పి మహార్.

11 హేరోదుని వన్ని సయ్నమ్దికార్ వన్నిజ్ వెక్కిసి సెకాల్ కితార్. నండొ దర మన్ని గొప్ప ఉండ్రె సొక తొడఃగిన్పిస్సాండ్రె పిలాతు డగ్రు మర్జి పోక్తాన్.

12 అయా రోజునె పిలాతుని హేరోదు కూలెజ్ ఆతార్. దిని ముజాలె వారు పగ్దాన్ మహార్.

13-14 అయావలె పిలాతు, పెరి పుజెరిజ, అతికారిజ, లోకాజ్ కూక్పిస్సాండ్రె వరిజ్, “లోకుర్ నడిఃమి గొడబ రేప్పినాన్ ఇజి వెహ్తా వినిజ్ మీరు నా బాన్ తతిదెర్. మీ ఎద్రు నాను వినిజ్ వెన్బాత. గాని మీరు వెహ్తా నేరం ఇనికబా విని లొఇ నజి తోర్ఎత్.

15 అయలెకెండెనె, హెరొదుజ్బా తోర్ఎతాన్. వాండ్రు వినిజ్ మా డగ్రు మర్జి పోక్తాన్. ఇదిలో వీండ్రు సావుదిజ్ తగితి ఇన్ని పణి బా కిఎన్.

16 అందెజె నాను వినిజ్ సిక్కు సీజి డిస్తు సీన”, ఇజి వెహ్తాన్.

17 (ఏంటు ఏంటు కిని పన్కు వండొయిదిజ్ లోకు కోరిపాతి ఒరెన్ జెలిదు మన్ని వన్నిజ్ డిసి సిదెజ్ పిలాతుజ్ అలవాటు).

18 గాని లోకుర్ ఏజెరె, “నవ్అ వన్నిజ్ బరబెజ్ మజి డిసి సిదా”, ఇజి ఉండ్రె లెకెండె డటం డేడిస్సార్.

19 బరబ్బు పట్టుమ్దు గొడబ రేపిస్తాండ్రె, నెగొండారిజ్ నప్తాన్. అందెజె వన్నిజ్ జెలిదు ఇట్టా మహార్.

20 యేసుజ్ డిస్టెజ్ కోరిజి పిలాతు మరి లోకురిజ్ నాను వన్నిజ్ డిస్టెజా? ఇజి వెన్బాజినాన్.

21 గాని వారు, “వినిజ్ సిలువాదు కుటిజాణిజ్ డెయిజి నవ్అ, సిలువాదు కుటిజాణిజ్ డెయిజి నవ్అ”, ఇజి నండొ గగొల్ ఆతార్.

22 ముసార్దిజ్ వాండ్రు వరిజ్, “ఎందానిజ్? ఇన్ని తప్పు వీండ్రు కితాన్? సావుదిజ్ తగితి ఇన్ని తప్పు బా నాను విని లొఇ తొవిత. అందెజె నాను వినిజ్ సిక్కు సీజి డిస్తు సీన”, ఇజి వెహ్తాన్

23 గాని వారు, “వినిజ్ సప్తెజ్వెలె”, ఇజి మరి మరి డటం డేడిస్సార్”. ఆపా వరి గగొల్ గెలిస్తాద్.

24 అందెజె పిలాతు వారు వెహ్తా వజి జర్గిపిద్ ఇజి తీర్పు సిత్తాన్.

25 పిలాతు వారు లొస్తి వన్నిజ్ డిస్టె సితాన్. అయా వాండ్రు పట్టుమ్దు గొడబ రేవ్తి వందిజ్ నెగొండారిజ్ నప్తి వందిజ్ జెలిదు మహాన్. యేసుజ్ వారు కోరితివజి కిదెజ్ వరి కిదు ఒపజెప్తాన్.

యేసుజ్ సిలువాదు కుటిజాణిజ్ డెయిజినార్

26 వారు వన్నిజ్ ఒసి మహార్. అయావలె, మరి ఉండ్రె దేసిమ్ది కురెనియ పట్టుమ్దికాన్ ఆతి సిమోన్ ఇనికాన్ ఒరెన్ యెరూసలెం పట్టుం వెల్లిదాన్ అయా సరి యెరూసలెం పట్టుమ్దు వాజి మహాన్. వారు వన్నిజ్ అస్తారె, యేసువెట, వన్ని వందిజ్ సిలువ పిండిదెజ్ వన్నిజ్ సితార్.

27 మంద లోకుర్ వన్ని వెన్కా వాజి మహార్. వరిలొఇ బోదెక్ వన్ని వందిజ్ గుండె కొత్తె ఆజి అడబాజి వాజి మహా.

28 యేసు వరిదరిజ్ మర్జి, “యెరుసలెమ్ది బీబికండె, మీరు నా వందిజ్ అడబామాట్. మీ వందిజ్ని మీ కొడ్డొర్ వందిజ్ అడబాదు.

29 ఎందానిజ్ ఇహిజి వారు, “గొడ్డు బోదెకాజ్ బా పాలు ఉట్పిన్ ఇ వన్కాజ్ గొప్ప నెగెద్”, ఇజి వెహ్తా దినమ్కు వానెలె.

30 అయావలె వారు, “మా మున్కు అర్అ”, ఇజి గొరొకాజ్ వెట, మజి పడెగ్అ”, ఇజి మెటెజి వెట వెహ్తారెలె.

31 ఎందానిజ్ ఇహిజి, “మరాన్* పసిజ్ మనివెలె నిసా బాదెజ్ కితిజి మరాన్ వహ్తాజి మరి ఎసా బాద కినారొ”, ఇజి వెహ్తాన్.

32 మరి రిఎర్ డొజారిజిబా వన్నివెట సప్తెజ్ ఒసి మహార్.

* 23:31 23:31 యాక యూదురి ఉండ్రె మాట. దిని అర్దం ఇనిక ఇహిజి తప్పుకితి నజి వారు సిక్కు సీజి నండొ నెఇవరిజ్ దేవుణు ఎస్సా సిక్కు సీనాన్.

33 వారు బుర్ర పిణికి ఇజి కూక్కి బాడిడు వాతార్. అబ్బె యేసుజ్ సిలువాదు కుటిజాణిజ్ డెయ్తార్. ఒరెన్ వన్నిజ్ ఉణెర్ పడెకాద్, మహి వన్నిజ్ డేబర పడెకాద్. సిలువ పొక్తార్.

34 అయావలె యేసు, “ఓ బా, వీరు కిజినిక ఇనిక ఇజి విరిజ్ తెలివద్. అందెజె విరిజ్ సెమిన్అ”, ఇజి పార్దనం కితాన్. వారు వన్ని సొక్కెజ్ నీబె ఆదెజ్ సీటిజ్ పొక్తార్.

35 లోకుర్ నిహారె సుడెజి మహివలె, అతికారమ్దు మనికార్, “వీండ్రు మహి వరిజ్ రక్కిస్తాన్. వీండ్రు క్రీస్తు ఇహిజ, వినిజ్ వీండ్రె రక్కిసె ఆపిన్”, ఇజి వెహ్సి వెక్కిస్తాన్.

36-37 సయనమ్దికార్బా వాతారె, వన్నిజ్ సెకాల్ కితాన్. వారు వన్నిజ్ సేందుదిక ఉండ్రి ఉండెజ్ సితారె, “నీను యూదురి రాజు ఇహిజ, నిజి నీనె రక్కిసె ఆఅ”, ఇజి వెహ్సి సెకాల్ కితాన్.

38 “వీండ్రు యూదురిజ్ రాజు’ ఇజి వన్ని ముస్సు మొప్తి నేరం బోర్డుదు రాసి సిలువాదు ఇట్టార్.

39 సిలువాదు డెయితి డొజారిజ లోఇ ఒరెన్, “నీను క్రీస్తుగదె. నిజి నీనె రక్కిసె ఆపిన్. మజి బా రక్కిన్అ”, ఇజి వన్నిజ్ దూసిస్తాన్.

40-41 గాని మహికాన్, “నీను దేవుణుదిజ్ తియెల్ ఆఇదా? వన్నిజ్ దోహ్కక్కి సిక్కునె నిజి బా దోహ్కక్కు మనాద్. నాయం దానె మజి సిక్కిస్తాన్. ఎందనిజ్ ఇహిజ, మాటు కితి మని పణిదిజ్ తగితి సిక్కు సితార్. గాని వీండ్రు ఇని తప్పు బా కిపిన్”, ఇజి వన్నిజ్ గోల కితాన్.

42 మరి, “యేసు, నీను రాజు ఆజి మర్జి వానివలె, నజి ఒడెబిఅ”, ఇజి వెహ్హాన్.

43 అందెజె యేసు, “నిజమె నాను నీ వెట వెహ్సి, నేండ్రు నీను నా వెట పరలోకమ్దు మంజినిలె”, ఇజి వెహ్హాన్.

యేసుసిలువ ముస్సు పాణం డిస్తాన్.

44-45 అయావలె సమయం వేడె పన్నెండు గంటెజ ఆతాద్. మూండ్రు గంటెజదాక లోకం విజు సీకటి వాతాద్. పొదు జాయి సిఅతాద్. యెరూసలెం గుడిః తెర మహి పాత ముస్సుహాన్ అడ్లి దాక నడిమిహాన్ రుండి ముకెజ్ కింజితాద్.

46 యేసు, “ఓ బా, నా పాణం నీ కీదు ఒవజెహ్సిన్”, ఇజి వెహ్హాన్. యా లెకెండ్ వెహ్హండ్రె వాండ్రు పాణం డిస్తాన్.

47 అయావలె సయినమ్దివరి అతికారి, జర్గితిక సుడెఃతండ్రె, “నిజమె వీండ్రు నీతినిజయిదికాండ్రె”, ఇజి వెహ్సి దేవుణుదిజ్ పొగిడిఃతాన్.

48 సుడెఃదెజ్ కూడిఃతి వాతి లోకుర్ విజెరె జర్గితికెజ్ సుడెఃజి, గుండె కొత్తె ఆజి మర్జి ఇండ్రో సాహాన్.

49 గాని వన్నిజ్ నెల్వ ఆతికార్ విజెరె, నెలవాతివరి లోఇ గలిలయదాన్ వన్ని వెట వాతి బోదెకు, దూరం నిల్చి యాకెజ్ సుడెఃజి మహార్.

యేసుజ్ సమాది కిజినార్

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమ్ది అరిమతియ ఇన్ని పట్టమ్దికాన్ వాండ్రు సన్హద్రి సజమ్దు మన్ని వరిలోఇ పెరికాన్ ఒరెన్. వాండ్రు నీతి నిజాయితి మనికాన్. యేసుజ్ సిలువాదు డెయిజి సప్తెజ్ యూద పెద్దల్జ కితి తిరుమానం ఒప్పుకోడెఃవతాన్. దేవుణు ఏలుబడిః తోరె ఆనివందిజ్ వాండ్రు ఎద్దు సుడెఃజి మహాన్.

52 వాండ్లు పిలాతు డగ్రు సొహాండ్రె యేసు పీనుగు లొస్తాన్.

53 వాండ్లు, అయా పీన్గు సిలువ ముస్కుహాన్ డిఃవ్తాండ్రె తెల్లాని పాతదాన్ సుటిసి నటు పణుకుదిజ్ దొల్స్తె దూకిదు ఇట్టాన్. అయా దూకిదు, ముజాలె ఎయెరిజ్ బా ఇడ్వీరె.

54 అయా రోజు, విస్త్రాంతి దినం ముజాల మన్ని తయార్ కిని రోజు. విస్త్రాంతిదినం మొదొల్స్తెజ్ టయం డగ్రు ఆజినాద్.

55 యేసు వెట గలీలయదాన్ వాతి బోదెకు యోసేపు వెట సొహెనె, దూకి ని వన్నిజ్ ఇట్టిక సుడఃతె.

56 వాండ్లు ఇండ్రొ మహరె, పీన్గుదిజ్ రాస్తెజ్ వాసనం నూనె తయార్ కితార్. విస్త్రాంతి దినం మొదొల్స్తెజ్ యూదురి రూలుజ్ నమ్మిజి అవిక్ రొబితార్.

24

యేసు మర్జి నిజ్జినాన్

1 వారమ్దిజ్ మొదొహి రోజు కోడిఃజామ్నె, బోదెకు అవి తయార్ కితి వాసనం నూనెజ్ అస్తెనె దూకిదు సొహె.

2-3 అవిక్ అబ్బె వాతిజ్, దూకి మూక్తి పెరిపణుకు గూర్బాతి మహిక సుడఃతె. అవిక్ లొఇ డుగితిజ్ యేసు పీనుగు తోర్వితాద్.

4 దిన్ని వందిజ్ బమ్మ ఆజి నిహి మహివలె, మిరిస్సివజ తెలాని సొక్కెజ్ తొడఃగితి రిఎర్ మొగవారు వన్కా డగ్రు నిహర్.

5 అవిక్ నండొ తియెల్ ఆజి ముణుకుజ్ ఊర్జి మాడిఃస్తె.

6 అయావలె అయా మొగవారు వన్కాజ్, “ఎందనిజ్ మీరు బత్కితి మన్నివన్నిజ్ సాతివరిబాన్ రెబాజిన్దెర్? వాండ్లు ఇబ్బె సెలెన్. నిజిత మనాన్. మీ వెట గలీలయదు మహివలె వాండ్లు ఇనిక వెప్టాన్ ఇజి ఎత్తు కిదు.

7 ఇనిక వెప్టాన్ ఇహిజ, ‘లోకుమరిసి సెఇవరి కీదు ఒవజెవె ఆదెజ్వెలె. సిలువారు పొకె ఆజి, వాండ్లు సాజి మూండ్రె రోస్కాజ్ నిజ్నాన్లె’, ఇజి”, ఇజి వెప్టార్.

8 అయావలె అవిక్ యేసువెప్టా మాట ఒడఃబితె.

9 దూకిదాన్ మహెనె, అబె సుడఃతికెజ్ విజు పదకొండు మణిసి సిసూరిజ్ని మహి వరిజ్ విజెరిజ్ వెప్టా*.

10 అవిక్ ఎయెక్ ఇహిజ, మగ్గలెనె మరి, యోసన, యాకోబుజ్ అయిసి ఆతి మరియ, వన్కావరివెట మహి మరి సెగొండెక్ బోదెక్ ఇవిక్నె జర్గితికెజ్ అపొస్తుడురిజ్ వెప్టాకెజ్†.

11 గాని వారు బోదెక్ వెప్టా మాటెజ్ నమిఎతార్. ఎందానిజ్ ఇహిజ, ఆకెజ్ వంబర మాటెజ్ లెకెండె వారు ఒడఃబితార్.

12 అహిజ్బా, పేతురు నిజితండ్రె, దూకిదు ఊహ్వాక్సి సొహాన్. వజితి సుడఃతిజ్ పీన్గు సుటిసి తెల్లాని పాతెజ్ అర్తి మహికదె సుడఃతాన్. వాండ్లు జర్గితికెజ్ వందిజ్ బమ్మ ఆజి ఇండ్రొ మర్జి సొహాన్.

* 24:9 24:9 యా పన్నుపెర్నికార్ యూదురి దేసమ్దిజ్ బాదకిజిని రోమ ప్రబుత్వం వందిజ్ పణికినికార్ విరు యూదురిజ్ పడఃకెకార్ అకాదె అవిండ వీరు నండొ పన్ను లొసి యూదురిజ్ బాద కిసార్. ఆహె అనయమ్దాన్బా వారు అస్తి గణిస్సానార్. వారు యూదురి రూలుజ్ లొజివెర్ అందెజి యూదురు వరిజ్ పాపం కినికార్ ఇజి వెప్టార్.

† 24:10 24:10 యాక యూదురి ఉండ్రె మాట దిన్ని అర్దం ఇనిక ఇహిజ తప్పకిఇతి సజి వారు సిక్కిసతిజి నండొ సెఇవరిజ్ దేవుణు ఎస్సా సిక్కి సీనాన్ ఇజి.

యేసు రిఎర్ సిసూరిజ్ తోరె ఆజినాన్

13 అయా రోజునె, సిసూర్లోఇ రిఎర్ ఎమాయుఇని ఉండ్రి నాటో సొన్ని మహార్. ఎమాయు యెరూసలెమ్దాన్ పదకొండు కిలో మీటర్ దూరం మనాద్.

14 వారు రిఎర్ జర్గితి విజు వందిజ్ వర్గిజి మహార్.

15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడతార్, గాని వన్నిజ్ గుర్తు అస్తాజ్ అటవితార్.

17 నస్తివలె యేసు, “మీరు నడిజి వర్గిజిని యా మాటెజ్ ఇనికెజ్”, ఇజి వరిజ్ వెన్బాతాన్. వారు దుకందాన్ మొకొం డిస్తారె, కద్దిఎండ నివార్.

18 వెనుక వరిలోఇ క్లెయొపా ఇనికాన్ ఒరెన్ యేసుజ్, “యెరూసలెమ్దు కూల వాతి వరి లోఇ మంజి, సాహి రోస్కాజ్ జర్గితికెజ్ నెన్ఇతికి నీను ఒరిదె”, ఇజి వెహ్తాన్.

19 “ఇనికెజ్ జర్గితె?”, ఇజి వాండ్రు వెన్బాతాన్. దనిజ్ వారు ఈహు వెహ్తాన్. “నజరెతుదికాన్ యేసుజ్ జర్గితి సజతిజి వందిజ్ వర్గిజినావ్. వాండ్రు ఒరెన్ ప్రవక్త వాండ్రు కితి గొప్ప పణిజాణిజ్ వెహ్తా గొప్ప సజతిజాణిజ్ దేవుణు వన్నిజ్ ఇన్టం ఆతాన్. లోకుర్ విజెరె బా వన్నిజ్ ఇన్టం ఆతారె నమ్మితార్.

20 మా పెరి పుజెరిజు, అతికారిజు, రోమ అతికారి కీదు సావుదిజ్ సిక్య సీదెజ్ వన్నిజ్ ఒపజెహ్తార్. వారు వన్నిజ్ సిలువాదు కుటిజాణిజ్ డెయిజి సహ్తార్.

21 వీండ్రునె ఇస్రాయేలు లోకాజ్ డిన్పిస్సికాన్ ఇజి మాపు ఎద్రు సుడతాజి మహావ్. యాకదె ఆఎండ, యా సజతి జర్గిజి నేహాన్ మూండ్రె దినమ్కు ఆతె.

22-23 మరి. మా లోఇ మన్ని సెగొండెక్ బోదెక్ మజి నండొ బమ్మ కిబిస్సె. ఎలాగ ఇహిజు, కోడిజామెనె దూకిదు సాహి గాని వన్కాజ్ వన్ని పీన్గు తోరెవతాద్. అవీకు మర్జి వాతెనె మజి ఈహు వెహ్తా. దూతార్ వన్కాజ్ తోరె ఆతారె, యేసు బత్రిత మనాన్ ఇజి వెహ్తార్ ఇజి.

24 మా వెట మనికార్ సెగొండార్ దూకిదు సాహారె, బోదెక్ వెహ్తా వజనె సుడతార్. వన్నిజ్ వారు సుడతావితార్.

25-26 అయావలె వాండ్రు వరిజ్, “బుద్ది సిలికిదెర్, ప్రవక్తరు వెహ్తా మాటెజ్ విజు నమిదెజ్ మిజి నండొ కన్టం ఆజినాద్. క్రీస్తు యా లెకెండ మాలెజ్ఓరిసి, దేవుణు మంజిని బాడిెదు వన్నివెట అతికారమ్దు మండ్రెజ్గదె?”, ఇజి వెహ్తాన్.

27 వాండ్రు దేవుణు మాటదు వన్ని వందిజ్ రాస్తి మన్ని దని అర్థం వరిజ్ వెహ్తాన్. మోసె రాస్తి పుస్తకమ్దాన్ మొదొల్ని ప్రవక్తరు విజెరె రాస్తి పుస్తకమ్ దాక మన్ని మటెజి వెహ్తాన్.

28 వారు సొన్నిని నారు డగ్రు ఆతిజ్, వాండ్రు వరిజ్ డిసి మరి దూరం సొన్నిని లెకెండె నడితాన్.

29 గాని వారు, “మా వెట మన్అ. పొద్దుఆజినాద్. సీకాట్ ఆతాద్”, ఇజి వెహ్తాన్ వన్నిజ్ మరి మరి వెహ్తాన్. అందెజి వాండ్రు వరి వెట మండ్రెజ్ సాహాన్.

30 వాండ్రు వరి వెట ఉండెజ్ బస్తివెలె, రొటె అస్తాండ్రె దేవుణుదిజ్ వందనమ్కు వెహ్తా దనిజ్ రుక్కి వరిజ్ సితాన్

31 వెటనె వారు వీండ్రు యేసు ఇజి గుర్తు అస్తార్. గాని వాండ్రు వరిజ్ తోరెవండ ఆతాన్.

32 అయావలె వారు రిఎర్, “వాండ్రు సర్దు, మా వెట వర్గిజి, దేవుణు మాటెజ్ మజి నెన్పిస్తెవెలె, మా మన్నుదు నండొ సర్ద వాతి లెకెండె ఆతాద్ గదె”, ఇజి ఒరెన్ వెట ఒరెన్ వర్గితాన్.

33-34 వెటనె వారు నిజితారె, యెరూసలెమ్దు సాహార్. అబె, వారు పదకొండు మణిసిర్ సిసూర్ని వరి వెట మహికార్ కూడెజి, “నిజమె, యేసు మర్జి నిజితాన్. సిమొనుజ్తోరె ఆతాన్ ఇజి వర్గిజి మహిక సుడెతాన్.

35 అయావలె వారు రిఎర్, సర్దు జర్గితికెజ్ యేసు రొటె రుక్సివెలె వారు ఎలాగ గుర్తు అస్తారొ దన్నివందిజ్ వెప్తార్.

సిసూర్ కూడితివెలె వరిజ్ తోరె ఆజినాన్

36 వారు వర్గిజి మహివలెనె యేసు వాండ్రె వరి నడిమి నిహండ్రె, “సమాదనం కల్గిపిద్”, ఇజి వెప్తాన్.

37 దూబ తోరితాద్ ఇజి ఒడిబిజి వారు నండొ తియెల్ ఆతార్.

38 సస్తివలె వాండ్రు, “ఎందానిజ్ మీరు తియెల్ ఆజిందెర్? ఎండనిజ్ అనుమానమ్కు మీ మన్నుద్ వాజినె?

39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడెదు. ఎందానిజ్ ఇహిజ, నజి మన్ని లెకెండె దూబదిజ్ ఒడిల్ మన్ఉ.

40 యా మటెజ్ వెప్పి వాండ్రు వరిజ్ వన్ని కిక్కు కాల్కు తోరిస్తాన్.

41-43 అహిజ్బా వారు సర్దదాన్ బమ్మదాన్ ఇంక నమ్మిఎండ మహార్. అందెజె వాండ్రు వరిజ్, “తిండ్రెజ్ ఇనికబా మనాదా?”, ఇజి వెన్బాతిజ్, వారు ఉండ్రె సుప్తి మొయ ముకెజ్ సితార్. వాండ్రు లొస్తాండ్రె వరి ఎద్రు తిహాన్.

44 వరి వాండ్రు వరిజ్, “నాను మీ వెట మహివలె యాకెజ్నె మీ వెట వెప్తా. ఇనిక ఇహిజ, మోసె రాస్తి పుస్తకమ్దు, ప్రవక్తరు రాస్తి పుస్తకమ్దు, కీర్తన పుస్తకమ్దు నా వందిజ్ రాస్తి మనికెజ్ విజు పూర్తి ఆదెజ్వెలె”, ఇజి.

45 వాండ్రు దేవుణు మాటెజ్ అర్దం కిదెజ్ వరిజ్ సాయం కిత్తాన్.

46-47 వాండ్రు వరిజ్ ఈహు వెప్తాన్. “యా మాటెజ్ రాస్త మనాద్. అయాక ఇనిక ఇహిజ, క్రీస్తు మాలెజ్ ఓరిసి, సాజి మూండ్రె రొస్కాణిజ్ సావుదాన్ నిజ్నాన్లె. యెరూసలెమ్దు మొదొల్ని లోకాజ్ విజెరిజ్ వన్ని అతికారమ్దాన్ ‘పాపమ్కు ఒప్పుకోడెఅ’, దేవుణు సెమిస్తాన్”, ఇని మాట వెహె ఆనాద్లె.

48 మీరు సుడెతికెజ్ లోకాజ్ వెప్తాజ్.

49 నా బుబ్బ ఒట్టు కితి దేవుణు ఆత్మదిజ్ నాను మిజి పొక్కు. గాని మున్నుహాన్ సత్తు మీ మున్ను వానిదాక మీరు యెరూసలెం పట్టుమ్దునె మండ్రు.

దేవుణు యేసుజ్ పలోకమ్దు ఒసినాన్

50 పట్టుం వెల్లి బెతానియ నారు డగ్గు దాక వాండ్రు వరిజ్ ఒతాన్. వాండ్రు కికు పెహండె, వరిజ్ దీవిస్తాన్.

51 దీవిసి మహివలె వాండ్రు వరిజ్ డిస్తాన్. దేవుణు వన్నిజ్ వాండ్రు మంజిని బాడిదు ఒత్తాన్.

52-53 వారు వన్నిజ్ మాడిస్తారె, నండొ సర్దదాన్ యెరూసలెమ్దు మర్జి వాతార్. వారు డిన్విండ గుడిదు మంజి, దేవుణుదిజ్ పొగిడిజి మహార్.

యోహాను రాస్తి సువార్త

నెల్ల కిబిసినిక

పన్నెండు మణిసిర్ సిసూర్ లొఇ ఒరినాతి యోహాను రాస్తి పుస్తకమ్ నె యాక. యేసు యా లోకమ్ దు బత్తిజి మహివలె జర్గితి దన్నివందిజ్ కతవజి వాండ్రు వహినాన్. యేసు ఎయెన్? వాండ్రు దేవుణు మరిసి, దేవుణు వెట మహికాన్, గాని వాండ్రు దేవుణునె. తయార్ కితిక ఇనికబా వాండ్రు సిల్లెండ కల్గివితాద్. వాండ్రె దేవుణు మాట, లోకురి విజేరి పాపమ్ కు సాన్ పిస్టిజ్ పూజ ఆతి మెండ గొరె పిల్ల లెకెండె వాండ్రు. ఎలాకాలం బత్తిని బత్తు సీని టిండి లెకెండె వాండ్రు. లోకమ్ దిజ్ జాయి లెకెండె మనాన్. నెగ్గి గవుడుఎన్ లెకెండె మనాన్, సాపుదాన్ మరజి నిజిత్తి బత్తు సీనికానె వాండ్రు ఇజి యేసు వందిజ్ యా పుస్తకమ్ దు వెహినాన్. యా సువార్త రాసి మహివలె, రోసు గవర్ మెంటుదు మన్నికార్ దేవుణుదిజ్ నమ్మితి వరిజ్ నండొ మాలెజ్ కిజి మహర్. అందెజె నమ్మితి వరిజ్ దయిరం సీదెజ్ యోహాను రాస్తికాదె యా పుస్తకం.

యేసు క్రీస్తు దేవుణు వాక్యం

1 లోకం పుటిన్ ఏండ ముజాలె, దేవుణు వందిజ్ వెహిని వాక్యం ఇనికాన్ ఒరెన్ మహాన్. వాండ్రు దేవుణు వెట మహాన్. వాండ్రె దేవుణు.

2 వాండ్రు లోకం పుటిన్ ఏండ ముజాలె, దేవుణు వెట మహాన్.

3 విజు వన్నివెట దేవుణు తయార్ కితాన్. కల్గితి మన్నిక ఇనికబా వాండ్రు సిల్లెండ కల్గివితాద్.

4 జీవు వన్నిబాన్ మనాద్. అయా జీవు లోకురిజ్ జాయి ఆత మనాద్.

5 జాయ్ సీకటిదు జాయ్ సీజినాద్. గాని సీకటిదు మన్నికార్ జాయ్ దిజ్ నెన్ ఏతార్.

6 దేవుణు బాణిజ్ పొక్తి ఒరెన్ మణిసి వాతాన్. వన్ని పేరు యోహాను.

7 వాండ్రు అయా జాయ్ వందిజ్ సాస్యం వెప్తాజ్ ఒరెన్ సాసిలెకెండె వాతాన్. ఎందానిజ్ ఇహిజ, విన్నిబొద వెంజి లోకుర్ విజెరి అయా జాయ్ దిజ్ నమ్మిదెజ్ వాతాన్.

8 యోహాను అయా జాయ్ ఆవన్. గాని అయా జాయ్ వందిజ్ సాక్సం వెప్తాజ్ వాతాన్.

9 అయా జాయ్ నె నిజమాతి జాయ్. నిజమాతి జాయ్ లోకమ్ దు వాజి లోకురిజ్ విజెరిజ్ జాయ్ సీజినాన్. వాక్యం నె నిజమాతి జాయ్.

10 వాండ్రు లోకమ్ దు మహాన్. లోకమ్ దు మనికెజ్ విజు వన్నివెటనె దేవుణు తయార్ కితాన్. గాని లోకుర్ వన్నిజ్ పొలిస్తాజ్ అట్ ఏతార్.

11 వాండ్రు వన్ని సొంత దేసమ్ దు సొహాన్. గాని వన్ని సొంత యూదురి లోకుర్ వన్నిజ్ డగ్గు కివితార్.

12 వన్నిజ్ ఎసాండార్ డగ్గు కిత్తారొ, వారి వన్నిముస్కు నమకం ఇట్టికార్. నన్నివరిజ్ వన్నికొణెర్ ఆదెజ్ వాండ్రు అతికారం సితాన్.

13 వారు అప్పొసి వెట పుట్టికార్ ఆవర్. ఒణెల్ ఆసదాన్ పుట్టికార్ ఆవర్. వారు ఎత్తు కితివజి పుట్టికార్ ఆవర్. దేవుణునె వరిజ్ వన్ని కొణెర్ ఇజి ఇట్టాన్.

14 వాక్యం ఇనికాన్ లోకు ఆతాండ్రె మా నడిమి బత్తితాన్. వాండ్రు మా మున్ను వన్నిదయాదర్తం పూర్తి తోరిస్తాన్. వాండ్రు దేవుణు వందిజ్ నిజమాతికెజ్ పూర్తి తోరిస్తాన్. వాండ్రు ఎసా గొప్పపెరికాన్ ఇజి మాపు సుడతావ్. బుబ్బు బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ సుడతావ్.

15 యోహాను వన్నివందిజ్ సాక్సం వెప్పినాన్. వాండ్రు లోకురిజ్, “నా వెన్నా వానికాన్ నజీ మిస్తికాన్. ఎందానిజ్ ఇహిజు, వాండ్రు నాను పుట్వండ ముజాల్ మన్నికాన్ ఇజి నాను వెప్తికాన్ వీండ్రె”, ఇజి డటం డేల్లి వెప్తాన్.

16 వన్ని పూర్తి దయాదర్మందాన్ వాండ్రు మజీ విజెరిజ్ దీవిస్తాన్. కాలమ్కు గడప్పి మహిజ్బా వాండ్రు మజీ దీవినె మంజినాన్.

17 యూదురిజ్, రూలుజ్ మోసెవెట దేవుణు సితాన్. వన్ని దయా దర్తం ని వన్ని వందిజ్ నిజమాతి సజతిజ్ యేసు క్రీస్తు వెట వాతె.

18 ఎయెన్బా ఎసెజ్బా దేవుణుదిజ్తోవన్. గాని అప్పొని పడకాద్ మన్ని, దేవుణు వెట సమానం ఆతి, ఒరెండ్రె మరిసి దేవుణు ఎయెన్ ఇజి మజీ తెలివి కిబిస్తాన్.

యోహాను యేసు వందిజ్ వెప్పిని సాస్యం

19-20 యెరూసలెమ్దాన్ యూదురి పెద్దలిజు, యోహాను డగ్రు పుజెరిజు ని లేవి జాతిదు మన్ని వరిజ్ పోక్తార్. “నీను ఎయెన్ ఇజి వెహె ఆజిని?”, ఇజి వెన్బాదెజ్ వరిజ్ పోక్తార్. నస్తివలె యోహాను ఈహు వరిజ్ సాక్సి వెప్తాన్. “నాను క్రీస్తు ఆవి”, ఇజి నెగ్గెండ్రె వెప్తాన్.

21 అయావలె వారు, మరి నీను ఎయి? నీను ఏలియ ప్రవక్తనా? ఇజి వెన్బాతార్. “ఆవి”, ఇహాన్. “నీను మాపు ఎద్రు సూణి ప్రవక్తనా?”, ఇజి వెన్బాతిజ్, “ఆవి”, ఇహాన్.

22 అందెజె వారు, “నీను ఎయెన్? మజీ పోక్తివరిజ్ మరజి వెప్తాజ్ నీను ఉండ్రె జబాబు సిదా. నీ వందిజ్ నీను ఇన్నిక ఇజి వెహె ఆజిని?”, ఇజి వెన్బాతార్.

23 దన్నిజ్ యోహాను యెసయ ప్రవక్త వెప్తివజ వెప్తాన్. “ప్రబు వందిజ్ సరితినాజ్ కిదు, ఇజి బిడిమ్ బూమిదు డేల్సినివన్ని లెకెండ్* మన్ను నాను”.

24-25 వన్ని డగ్రు వాతికార్ పరిసయరు పోక్తికార్. అయావలె, అయా పరిసయరుజు లోఇ సెగొండార్ వన్నిజ్, “నీను క్రీస్తు ఆఇజు, ఏలియ ప్రవక్త ఆఇజు, మాపు ఎద్రు సూణి ప్రవక్త ఆఇజు, మరి ఎందనిజ్ నీను బాప్తినం సీజిని?”, ఇజి వెన్బాతార్.

26 దన్నిజ్ వాండ్రు, “నాను ఏరుదాన్ బాప్తినం సీజిన. గాని మరి ఒరెన్ మనాన్. వాండ్రు మీ నడిమి మనాన్. వన్నిజ్ మీరు పోలిన్ ఇదెర్.

27 వాండ్రె నా వెన్నా వాజినికాన్. వన్ని జోడెకు బేల్లు కూతెజ్బా నాను ఏపటికాన్ ఆవి”, ఇజి వెప్తాన్.

28 యొర్దాను ఇన్ని గడ్డ అతాహ పడకాద్ మన్ని బెతానియ ఇన్ని పట్నమ్దు యాకెజ్ విజు జగ్గితె. బానె యోహాను బాప్తినం సీజి మహాన్.

29 మర్సనాండిజ్, యేసు వన్నిడగ్రు వాజినిక యోహాను సుడతాన్. సుడతండ్రె వాండ్రు, “ఇదిలో లోకురి పాపమ్కు వందిజ్ పూజ ఆడిజ్దేవుణు పోక్తి వన్ని మెండ గొరె పిల్ల. వాండ్రు లోకురి పాపమ్కు సొన్నిస్తాన్”, ఇజి వెప్తాన్.

* 1:23 1:23 యెసయ 40:3.

30 “నా వెన్నా, ఒరెన్ వాజినాన్, వాండ్రు నజీ ఇంక మిస్తికాన్. ఎందనిజ్ ఇహిజు, వాండ్రు నాను పుట్టెండ ముజుల మన్నికాన్ ఇజి నాను ఎయె వందిజ్ వెహ్తానో వాండ్రె వీండ్రు’.

31 వీండ్రు ఎయెన్ ఇజి నానె నెన్ఎత. గాని ఇస్రాయేలు లోకురిజ్ వీండ్రు ఎయెన్ ఇజి తెలివి కిని వందిజె నాను ఏరుదాన్ బాప్తీసం సీజి వాత”, ఇజి వెహ్తాన్.

32 మరి వాండ్రు నెస్తిక ఈహు సాక్కి వెహ్తాన్: “దేవుణు ఆత్మ ఉండ్రె పారపాటి లెకెండ్ ఆగాసమ్దాన్ డిగ్జి వాజి వన్నిముస్సు మంజినిక నాను సుడేత.

33 నానుబా వన్నిజ్ నెన్ఎండ మహ. గాని ఏరుదాన్ బాప్తీసం సిఅ ఇజి నజీ వెహ్తా పొక్తి దేవుణునె నజీ వెహ్తాన్, ‘దేవుణు ఆత్మ డిగ్జి ఎయెర్ ముస్సు మంజినిక నీను సూణిదో వాండ్రె దేవుణు ఆత్మదాన్ బాప్తీసం సీనాన్’, ఇజి.

34 వెహ్తా లెకెండ్ వినిజ్ జర్గితిక నాను సుడేత. అందెజె నాను వెహ్తాన, ‘వీండ్రె దేవుణు మరిసి ఇజి’.

యేసు మొదోహి సిసూర్

35 మర్ననాండిజ్, మరి, యోహాను వన్ని రిఎర్ సిసూర్ వెట నిహ మహాన్.

36 అయావలె యేసు అయా సరి సొన్ని మహిజ్, వన్నిజ్ డిటం సుడేజి, ‘ఇదిలో, హూజ ఆదెజ్ దేవుణు పొక్తి వన్ని మెండ గొరె పిల్ల’, ఇజి వెహ్తాన్.

37 అయా రిఎర్ సిసూర్ వాండ్రు వెహ్తాక వెహరె, యేసు వెన్నా సాహారె.

38 యేసు మహ్తాండ్రె, వారు వెన్నా వాజినిక సుడేతాన్. సుడేతాండ్రె వరిజ్, “మీరు ఇనిక రెబాజినిదెర్?”, ఇజి వెన్బాతాన్. వారు వన్నిజ్, “రబ్బి, ఇహిజు బోదిస్సికాన్, నీను ఎంబె మంజిని?”, ఇజి వెన్బాతారె.

39 వాండ్రు, “రదు, వాజి సుడేదు”, ఇహాన్. అందెజె వారు సాహారె, వాండ్రు మంజినిబాన్ సుడేతారె. అయా రోజు వారు వన్నివెట మహారె. అయావలె రమారమి పొగల్నాల్లి గంటిజ్ ఆత మహాద్.

40 సిమోన్ పేతురు తంబెర్ని ఆతి ఆంద్రెయ ఇన్నికానె యోహాను వెహ్తాక వెంజి యేసువెట సాహి రిఎర్ లోఇ ఒరెన్.

41 వాండ్రు వెటనె, వన్నిఅన్నసి సిమోనుజ్ రెబాతాండ్రె, “మాపు మెసయెజ్† సుడేతాప్”, ఇజి వెహ్తాన్.

42 వెహ్తాండ్రె వన్నిజ్ యేసు డగ్రు తతాన్. యేసు సిమోనుజ్ సుడేజి, “నీను యోహాను మరిసి ఆతి సిమొను. నీను కేప ఇజి కూకె ఆనిలె”, ఇజి వెహ్తాన్. (గ్రీకు బాసదు అయా మాట పేతురు ఇజి రాస్త మనాద్. దని అర్థం ఇన్నిక ఇహిజు నటు ఇజి).

యేసుపిలిపుజ్ నతనయేలుజ్ కూక్కినాన్

43 మహ్న నాండిజ్, గలీలయ ముటదు సాండ్రెజ్ ఇజి యేసు ఒడేబితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, “నా వెట వాజి నా సిసూడుః ఆఅ”, ఇజి వెహ్తాన్.

44 పిలిపు బెత్నెయ్య ఇని పట్టమ్దికాన్. పిలిపు, ఆంద్రెయ, పేతురు వీరు ఉండ్రె పట్టమ్దికారె.

† 1:41 1:41 మోసయ ఇహిజు దేవుణు వన్ని లోకురిజ్ రక్కిస్తిజ్ ఏర్పాటు కిత్తి పొక్తికాన్. ఇది ఏబ్రి బాస

45 పిలిపు నతనయయేలు ఇని వన్నిజ్ రెబాతాండ్రై వన్నిజ్, “మోసె రాస్తి సీతి రూలుదు వాండ్రు రాస్తి మన్ని వన్నిజ్, ప్రవక్తరు బా రాస్తి మన్ని వన్నిజ్ మాపు దనూల్ ఆతాప్. వాండ్రు నజరెతుదికాన్ ఆతి యేసు. యోసేపు మరిసి”, ఇజి వెప్టాన్.

46 అందెజె నతనియేలు వన్నిజ్, “నెగ్గికెజ్ ఇనికబా నజరేతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడేఆ”, ఇహాన్.

47 యేసు నతనియేలు వన్ని డగ్రు వాజినిక సుడేతండ్రై, “ఇవిలోన్ నిజమాతి ఇస్రాయేలుదికాన్ వాజినాన్. విని లోఇ ఇన్ని సెఇకెజ్బా సిల్లు”, ఇజి వన్ని వందిజ్ వెప్టాన్.

48 అయావలె నతనియేలు వన్నిజ్, “నీను ఎలాగ నజి నెస్సి?”, ఇజి వెన్బాతిజ్ యేసు, “పిలిపు నిజి కూక్విండ ముజాలె, నీను బోడెమరాన్ అడిగి మనిక నాను సుడేత”, ఇహాన్.

49 నతనియేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్.

50 అందెజె యేసు వన్నిజ్, “నీను బోడెమరాన్ అడిగి మంజినిక నాను సుడేత ఇజి నాను వెప్టాజ్ నె నీను నమిజిని. దినిజ్ ఇంక మిస్తి నండో పెరి పణిజ్ నీను సూణిలె”, ఇజి వెప్టాన్.

51 వాండ్రు వన్నిజ్, “నాను నిజం వెప్సిన, ఆగాసం రెయ్ ఆజి దేవుణు దూతెజ్ లోకుమరిసిఆతి నా డగ్రు ఎక్సి సొనిక డిగ్జి వానిక నీను సూణిలె”, ఇజి వెప్టాన్.

2

యేసు కితి మొదోహి బమ్మ ఆతి పణి

1 రుండి దినమ్కు సొహి వెన్కా, గలీలయ ముటది కానా ఇని పట్నమ్దు ఉండ్రై పెండ్రై జర్గితాద్.

2 యేసు అయ్సిబాన్ మహాద్. యేసుజ్ని వన్ని సిసూర్జబా ఆ పెండ్రైదు కూక్టార్.

3 ద్రాక్సకల్లు వీజితివెలె, యేసు అయ్సి వన్నిజ్, “ద్రాక్సకల్లు వీజితాద్”, ఇజి వెప్టాన్.

4 అయావలె యేసు, “ఓ యా, దిని వందిజ్ నీను నజి ఎండనిజ్ పణసిని? నాను ఎయెన్ ఇజి తోరె అదెజ్ దేవుణు నా వందిజ్ ఏర్పాటు కితి వేలా ఇంక రవెదె”, ఇజి వెప్టాన్.

5 యేసు అయ్సి పణికినివరిజ్, “వాండ్రు మిజి ఇన్నిక వెప్టాజ్బా మీరు కిదు”, ఇజి వెప్టాన్.

6 దేవుణుదిజ్ ఇన్టం ఆత్తివజ మండ్రైజ్ యూదురు సుబ్బరం ఆనార్. సుబ్బరం ఆనివందిజ్ వారు నోర్బానార్. అయాక వరి ఉండ్రై ఆనారం. ఆహె నోర్బాని దన్నివందిజ్ పణుకుదాన్ తయార్ కితి గోలమ్కు మహె. డగ్రు తొంబయ్దాన్ సూటి మువయ్ లీటర్ ఏరు అస్సె. నన్ని గోలమ్కు ఆరుబాన్ మహె.

7 యేసు, “అయా గోలెమ్కాజ్ ఏరు నిహేతు”, ఇజి పణికిని వరిజ్ వెప్టాన్. వారు నిండ్రు నిప్టార్.

8 అయావలె వాండ్రు వరిజ్, “ముడుక్సి సవ్దెరి బాన్ ఒతు”, ఇజి వెప్టాన్. వారు అయా లెకెండ్ కితార్.

9 నవ్వదెరి యెలు ద్రాక్కు కడు ఆతి ఏరు రుసి సుడఃతాన్. అయా ద్రాక్కుకల్లు ఎమేణిజ్ వాతాదొ ఇజి ఆ ఏరు ముడుక్తి ఒతి పణికిని వరిజె తెలినా ద్ గాని నవ్వదెరిజ్ తెలివద్. వాండ్రు పెండ్లి మరిసిజ్ కూక్తాన్.

10 కూక్తాండ్రె వన్నిజ్, “విజెరె కూలెజ నెగ్గి ద్రాక్కుకల్లు ముందాలె సీనార్. లాపు ఉటి వెన్కా అడ్డెబెడ్డెదిక సీనార్. గాని నీను ఏలుదాక నెగ్గి ద్రాక్కుకల్లునె ఇడ్డి మన్ని”, ఇజి వెహ్హాన్.

11 యాకాదె యేసు కితి మొదొహి బమ్మ ఆతి పణి. యాక గలీలయ ముటది కానా ఇన్ని పట్నమ్దు జర్గితాద్. అయా లెకెండ కిజి, యేసు వాండ్రు గొప్పపెరికాన్ ఇజి తోరిస్తాన్. వన్ని సిసూర్ వన్ని ముస్కు నమకం ఇట్టార్.

12 దిని వెన్కా వాండ్రు వన్ని అయిసి, తంబెర్సిర్, సిసూర్ వెట కపర్ నహాముదు సాహాన్. అబ్బె సెగం దినమ్కు మహార్.

యేసు దేవుణుగుడిఃదాన్ బేరం కినివరిజ్ వెల్లి పొక్కినాన్

13 యూదురి పస్కు పండొయి కిదెజ్ కాలం డగ్గు ఆతాద్. అందెజె యేసు యెరూసలెమ్దు సాహాన్.

14 బాన్ దేవుణుగుడిఃది అరుజుదు బేరం కిజిని వరిజ్ వాండ్రు సుడఃతాన్. కోడ్డిజ్, గొర్రెజ్, పూజ కిని వందిజ్ పారపొటిజ్ పొర్ని వరిజ్ సుడఃతాన్. పయు దేసెమ్ది డబ్బుజ్ మరిసి యూదురి కాసుజ్ సీజిని బేరం కిని వరిజ్ బా సుడఃతాన్.

15 అయావలె వాండ్రు నాసుదాన్ కొరడ కితాండ్రె, కొడ్డిఃజ, గొర్రెజ వెట వరిజ్ విజెరిజ్ అరుజుదాన్ పేర్తాన్. డబ్బుమరిసి బేరం కినివరి డబ్బు విజి సెద్రిస్తాండ్రె, వరిబల్లెజ్ మహ్హాన్.

16 పార పొటిజ్ పొర్ని వరివెట, “విన్కాజ్ ఇబ్బెణిజ్ ఒతు. నా బుబ్బ ఇల్లు నత్తలెకెండ కిమాట్”, ఇజి వెహ్హాన్.

17 నస్తవలె వన్నిసిసూర్, “ఓ దేవుణు, నీ ఇల్లువందిజ్ నజిమన్ని గొప్ప ఆస, ఉండ్రె సిసులెకెండ నా లొఇ కన్నాద్*”, ఇజి దేవుణు మాటదు రాన్తి మనిక వారు ఒడఃబితార్.

18 అయావలె యూదురు, యా పణిజ్ కిదెజ్ నిజి ఇని అతికారం మనాద్? ఉండ్రె బమ్మ ఆని పణికిజి మజి తోరిసి అయాక రుజాప్ కిత, ఇజి వన్నిజ్ వెహ్హార్.

19 “యా గుడిః డెయిజి అర్పు. మూండ్రె రొస్కాజ్ నాను మరి తొహ్న”, ఇజి యేసు వరిజ్ వెహ్హాన్.

20 దన్నిజ్ యూదురు, “యా గుడిః తొహ్తాజ్ నలపయ్ ఆరు పంటెజ్ ఆతాద్. నీను మూండ్రె రొస్కాణిజ్ తొహ్పిదా?”, ఇహార్.

21 గాని దేవుణుగుడిః వందిజ్ వెహ్తావలె వన్ని ఒడఃల్ వందిజె వెహ్హాన్.

22 వాండ్రు సాతాండ్రె మర్జి నిజితివెనుక, యా లెకెండ మాట వాండ్రు వెహ్హాన్ ఇజి సిసూరు ఒడిఃబితార్. అందెజె దేవుణు మాట వారు నమ్మితార్. యేసు వెహ్తా మాటబా నమ్మితార్.

23 యేసు పస్కుపండొయ్ దిజ్ యెరూసలెమ్దు మహివలె, వాండ్రు కితి బమ్మ ఆతి పణిజ్ సుడఃతారె, నండొండార్ వన్నిజ్ నమ్మితార్.

24 గాని వాండ్రు వరిజ్ వన్నిజె ఒపజెవ్ అతాన్. ఎందనిజ్ ఇహిజ, వాండ్రు విజెరిజ్ నెస్సాన్.

* 2:17 2:17 కిర్తన 69:9.

25 ఎయెర్బా వన్నిజ్ లోకుర్ వందిజ్ వెహ్తాజ్ అవ్నరం సిల్లెద్. ఎందానిజ్ ఇహిజ, వరి మన్నుదు మన్ని ఆలోసనమ్కు వాండ్రు నెసినాన్.

3

యేసు నికొదిముజ్ నెన్పిస్సాన్

1 యుదురిజ్ అతికారి ఆతి నికొదెము ఇనికాన్ ఒరెన్ మహాన్. వాండ్రు పరిసయిరుజు లోఇ ఒరెన్.

2 వాండ్రు ఉండ్రీ పొదొయ్, యేసుడగ్గు వాతాన్. వాతాండ్రె, “ఓ బోదకినికి, నీను దేవుణు పొక్తి ఒరెన్ నెన్పిస్సాన్ ఇజి మాపు నెసినావ్. దేవుణు ఒరెన్ వన్నివెట సిల్లెండ మహిజ, నీను కిజిని బమ్మఅతి పణిజ్ కిదెజ్ ఎయెన్బా అట్ఎన్”, ఇజి వెహ్తాన్.

3 అందెజె యేసు వన్నివెట ఈహు వెహ్తాన్: “నాను నిజమనె వెహ్సిన, ఒరెన్ మరి కొతాజ్ పుట్టిజనె, దేవుణు ఏలుబడిడు మంజినాన్”.

4 అయావలి నికొదెము, “పిరితిలోకు ఒరెన్ ఎలాగ మరి కొత్తాజ్ పుట్టాన్. వాండ్రు అయిసి పొటాద్ సొన్ని మరి ఉండ్రీ నుట్టు. పుట్టెజ్ అట్ఎన్”, ఇజి వెహ్తాన్.

5 యేసు వెహ్తాన్, “నాను నిజనె వెహ్సిన, ఒరెన్ బాప్తినం లాగె ఆఎండ మహిజ, దేవుణు ఆత్మ బాణిజ్ కొత్త బత్తు దోహ్కెండ మహిజ, వాండ్రు దేవుణు ఏలుబడిడు మన్ఎన్.

6 యాయ బుబ్బరెవెటనె కొణ్డోర్ కాసినార్. గాని దేవుణు ఆత్మ వెటనె దేవుణు కొణ్డోర్ ఆనార్.

7 “నీను మరి కొత్తాజ్ పుట్టెజ్వెలె”, ఇజి నాను వెహ్తి మాటదిజ్ నీను బమ్మ ఆమా.

8 “గాలి దన్నిజ్ ఇస్టమాతి బాడిద్ డెయ్వాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సొన్నినాద్, ఇజి నిజి తెలివెద్. అయలెకెండనె, దేవుణు ఆత్మ ఒరెన్ వన్నిజ్ కొత్త బత్తు సీదెజ్ వన్నిజ్ ఇస్టమాతివజ విజు కినాన్. వాండ్రు అయాక ఎలాగ కినాన్ ఇజి తెలివెద్”.

9 “యాక ఎలాగ జర్గినాద్?”, ఇజి నికొదెము యేసుజ్ వెన్బాతాన్.

10 దనిజ్ యేసు, “ఇస్రాయేలుదు మన్ని బోదిసిని వరిలోఇ తగమాతికి ఒరెన్నీను గదె? యాకెజ్ నీను నెన్ఇదా?”

11 నాను నిజం వెహ్సిన, మాపు నెస్తికెజె వెహ్సినావ్, నుండెతికెజె వెహ్సినావ్. గాని మీరు అయాకెజ్ నమ్మిఇదెర్.

12 యా బూమిదు జర్గిని దన్నివందిజ్ నాను మిజి వెహ్తా మన్ను. గాని మీరు నమిఇ. అహిజ, నాను దేవుణు మంజిని బాడిడు మన్ని నజతిజ వందిజ్ వెహ్తాజ, మరి మీరు ఎలాగ నమ్మినిదెర్?

13 ఎయెన్బా ఎనెజ్బా దేవుణు మంజిని బాడిడు సొన్వెతార్. దేవుణు మంజిని బాడ్డి: దాన్ డి:గితి వాతి లోకుమరిసి ఆతి నాను ఆవండ మరి ఎయెన్బా దేవుణు మంజిని బాడిడు సొన్వెతాన్.

14-15 బీడిమ్బూమిదు మోసి కంసుదాన్ తయార్ కితి సరాన్దిజ్ పెహ్తా లెకెండ, లోకు మరిసి ఆతి నాను పెరె ఆనాలె. నా మున్ను నమకం ఇడ్చి వరిజ్ విజెరిజ్ ఎలాకాలం బత్కిని బత్తు దోహ్కెవందిజె నాను పెరె ఆదెజ్వెలె.

16 దేవుణు లోకుర్ విజెరిజ్ ఎసానో ప్రేమిస్తాన్. అందెజె వాండ్రు వన్ని ఒరెండ్రె ఒరెన్ మరిసిజ్ సాదెజ్ సితాన్. వన్నిజ్ నమనికార్ ఎలాకాలం సినుదు మన్ఎండ, ఎలాకాలం దేవుణు వెట మంజిని వందిజ్ వాండ్రు మరిసిజ్ సితాన్.

17 దేవుణు లోకురిజ్ తీర్పు సీజి సిక్స్ సీని వందిజ్ ఆవద్, వాండ్రు వన్ని మరిసిజ్ లోకమ్దు పోక్తిక. గాని వాండ్రు వరిజ్ ఎల్లకాలం మన్ని సిక్సదాన్ గెల్పిస్సివందిజె పోక్తాన్.

18 మరిసిజ్ నమ్మిని ఎయెరిజ్ బా తీర్పు సీజి సిక్స్ సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్స్ సిత మనాద్. ఎందనిజ్ ఇహిజ, దేవుణు ఒరెండ్రె మరిసిజ్ వారు నమ్మివితార్.

19 జాయ్ లోకమ్దు వాతమనాద్. గాని లోకుర్ జాయ్ దిజ్ ప్రెమిన్ ఎండ సీకట్ దిజ్ ప్రెమిస్సార్. ఎందనిజ్ ఇహిజ, వారు సెఇ పణిజ్ కిజినార్. యాక సుడేజినె, లోకురిజ్ దేవుణు తీర్పు సీజి సిక్స్ సీనాన్.

20 సెఇ పణిజ్ కిజినికార్ విజెరె జాయ్ దిజ్ ఇస్టం కివర్. వారు జాయ్దు రెవర్. ఎందనిజ్ ఇహిజ, వరి సెఇ పణిజ్ విజు జాయ్దు తోర్పె ఇజి తియెల్ ఆజినార్.

21 గాని నిజమాతి పణిజ్ కినికాన్ ఎయెన్ బా జాయ్దు వాజినాన్. ఎందానిజ్ ఇహిజ, వారు కిజిని పణిజ్ విజు దేవుణుదిజ్ లోజేజి కిజినార్ ఇజి జాయ్ వెల్లి తోర్పాద్”, ఇజి వెహ్టాన్.

బాప్తిసం సీని యోహాను యేసువందిజ్ సాసి వెప్పినాన్.

22 వెనుక, యేసుని, వన్నిసినూర్ యూదయప్రాతమ్దు సాహార్. బాన్ వాండ్రు వరివెట సగం కాలం గడప్పి, లోకురిజ్ బాప్తిసం సీబిసి మహాన్.

23 సలిముడగ్రు అయినో ఇన్ని బాడిడు యోహాను బాప్తిసం సీజి మహాన్. ఎందనిజ్ ఇహిజ, బాన్ నండో ఏరు మహె. లోకుర్ వన్ని డగ్రు సొన్ని బాప్తిసం లాగెఆజి మహాన్.

24 యాక యోహానుజ్ జెలిదు ఒఇ ముజాల జర్గితాద్.

25 యోహాను సినూర్ ని ఒరెన్ యూద వాండ్రు సుబ్రం అని యూదురు రూలు వందిజ్ వెప్పి గొడేబ ఆతార్.

26 వారు యోహానుడగ్రు వాతారె, “బోదకినికి, యొర్దాను గడ్డ అతాలన్ వెట ఒరెన్ మహాన్ గదె. నీను వన్ని వందిజ్ వెప్తి మన్ని. ఇవిలోన్ వాండ్రు ఏలు బాప్తిసం సీజినాన్. లోకుర్ విజెరె వన్నిడగ్రు సాన్ సినార్”, ఇజి వెహ్టాన్.

27 అందెజె యోహాను వెహ్టాన్, “దేవుణు ఇస్టం కితివజనె ఒరెన్ వన్నిబత్తుదు విజు జర్గిజినాద్.

28 “నాను క్రిస్తు ఆవి. గాని వన్నిజ్ ఇంక ముజాల దేవుణు నజి పోక్తాన్”, ఇజి నాను వెప్తిక మీరు వెహెదెర్.

29 పెండ్లి అని వన్నిదిని పెండ్లి బోదలి. పెండ్లి దజడే: కూలయెన్ వన్నిడగ్రు మంజి వాండ్రు వెప్తికెజ్ వెంజినాన్. వెప్పినికెజ్ వెంజినికాదె కూలయెన్ వన్ని సర్ద. పెండ్లి దజడే: కూలయెన్ పెండ్లి దజడే:వెట సర్ద అని లెకెండ్ నా సర్ద క్రిస్తువెట పూర్తి ఆజినాద్.

30 వాండ్రు పెరికాన్ ఆదెజ్ వలె. నాను ఇజ్రికాన్ ఆదెజ్.

31 పరలోకమ్దాన్ వాజినికాన్ విజెరి ముస్సు పెరికాన్. యా లోకమ్దాన్ వాజినికాన్ యా లోకమ్దికానె. వాండ్రు లోకమ్ది సజతిజ వందిజ్ వెప్పినాన్. పరలోకమ్దాన్ వాజినికాన్ విజెరి ముస్సు పెరికాన్.

32 వాండ్రు సుడే:తి వనకవందిజ్ వెహి వన్కా వందిజ్ వెప్పినాన్. గాని సెగొండారె వాండ్రు వెప్పినికెజ్ డగ్రు కినార్.

33 వన్నిమాట వెంజినికాన్ దేవుణు వెహ్సానికెజ్ నిజం ఇజి ముద్ర పొకె ఆజినాన్.

34 దేవుణు పోక్తాన్ దేవుణు మాటనె వర్గినాన్. ఎందనిజ్ ఇహిజ, దేవుణు వన్ని ఆత్మ అంతు సిల్లెండ వన్నిజ్ సీజినాన్.

35 అప్పాసి మరిసిజ్ ప్రేమిస్నాన్. అందెజె వాండ్రు వన్నిజ్ విజుదనిజ్ అతికారం సిత్త మనాన్.

36 మరిసి ముస్సు నమకం ఇడ్డి మన్నివన్నిజ్ ఎలాకాలం దేవుణువెట బత్కిని బత్కు మనాద్. గాని వన్నిజ్ లోజ్ ఇ వన్నిజ్ ఎలాకాలం బత్కిని బత్కు సిల్లెద్. గాని దేవుణు సిక్ వన్ని ముస్సు ఎలాకాలం మనాద్.

4

యేసు సమరియ దేసెమ్ది బోదెలివెట వర్గినాన్

1-2 యోహాను ఇంక యేసు నండొండారిజ్ వన్ని వెట కుడుఃప్పినాన్, వరిజ్ బాప్తిసం సీజినాన్ ఇజి పరిసయరు వెహర్. (నిజం ఇన్నిక ఇహిజ, యేసు ఎయెరిజ్ బా బాప్తిసం సివితాన్. వన్ని సిసూర్ నె సితార్)

3 ఆహె పరిసయరు వర్గినార్ ఇజి యేసునెస్తాండ్రె, వాండ్రు యూదయ ప్రాంతం డిస్తాండ్రె గలీలయ ముటదు మరి మహ్తా సాహాన్.

4 వాండ్రు సమరియ దేసెమ్దాజె సాండ్రెజ్ సరి మనాద్.

5 అందెజె వాండ్రు సమరియ దేసెమ్దు మన్ని సుకారు ఇన్ని పట్టుమ్దు వాతాన్. అయా పట్టుం, హూర్ బమ్దు బత్కిజి మహి యాకోబు వన్ని మరిసి యెసిపుజ్ సిత్తి మన్ని బూమిడగ్రు మన్నికాద్.

6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగ్రు బస్తాన్. నస్తవలె, మదెనం.

7 అయావలె సమరియాతి బోదెలి ఉండ్రె ఏరు ఒతెజ్ బాన్ వాతాద్. యేసు దని వెట, “ఏహా కట్టినాద్. ఏరు బుకెండ సిదా”, ఇహాన్.

8 (వన్ని సిసూర్ టిండి కొండెజ్ పట్టుమ్దు సాహ మహార్)

9 అయా బోదెలి వన్నిజ్, “నీను యూద వాండ్రు. నాను సమరియ బోదెలి. అబాయా, నీను నజి ఏరు లొస్సిదా”, ఇహాద్. (ఎందనిజ్ ఇహిజ, యూదురు సమరియతి వరి వెట కూడఃజి మన్ ఏర్)

10 అందెజె యేసు, “నీను దేవుణు సీనిక నెస్సి మంజినిక ఇహిజ, నిజి ఏరు లొస్సికాన్ ఎయెన్ ఇజి నెస్సిమంజినికిహిజ, నీను వన్నిజ్ దేవుణు సీనిక వెన్ బాతి మరి. వాండ్రు నిజి ఎలాకాలం బత్కిన్ పిస్సి ఏరు సితాన్ మరి”, ఇజి వెహ్తాన్.

11 అయా బోదెలి వన్నిజ్, “బాబు నూతి నిరిక మనాద్. ఏరు లాగ్ దెజ్ నిజి డొక్కు ఇన్నిక సిల్లెద్. మరి ఎలాగ నీను బత్కిన్ పిస్సి ఏరు లాగ్ గి?

12 మా అనిగొగొ యాకోబు యా నూతి మజి సితాన్. వాండ్రు, వన్ని మరిసిర్, వన్ని కోడ్డిజ్, గొరెజ్ విజు యా నూతిది ఏరు ఉణిజి మహార్. నీను వన్నిజ్ మిస్తికిదా?”, ఇజి వెహ్తాద్.

13-14 అందెజె యేసు, “యా ఏరు ఉణి విజెరిజ్ బా మరి ఏహ్పి కటూద్. గాని నాను సీని ఏరు ఉణివరిజ్ ఎసెజ్ బా ఏహా కట్ ఏద్. నాను సీని ఏరు బూమిదాన్ సోసిని ఉణుట ఏరు లెకెండ వన్ని లొఇ మంజినె. అయాక వన్నిజ్ ఎలాకాలం దేవుణు వెట బత్కిని బత్కు సీజినాద్”, ఇజి వెహ్తాన్.

15 నస్తవలె అది, “బాబు యా ఏరు నజీ సిదా. అయావలె ఎనెజ్బా ఏహ్ కట్వద్. ఇబ్బె వాజి ఏరు లాగ్గి ఒతెజ్ నజీ అవ్సరం సిల్లెద్”, ఇజి వెప్తాద్.

16 యేసు దనిజ్, “సాస్సి నీ మాసిజ్ ఇబ్బె కూక్కి తగ్గి అ”, ఇజి వెప్తాన్.

17 దన్నిజ్ అది, “నజీ మాసి సిలెన్”, ఇహాద్. అందెజె యేసు, “నజీ మాసి సిలెన్ ఇజి నీను వెప్తామాట నిజమనె.

18 నిజీ అయ్యదుగురు మూసీర్ మహార్. ఏలు నీ వెట మంజినికాన్ నీ మాసి ఆవన్. నీను నిజమనె వెప్తా”, ఇహాన్.

19 అయావలె అది వెప్తాద్, “బాబు నీను ఒరెన్ ప్రవక్త ఇజి నాను నెస్సా.

20 మా సమరియది అనిగొగొర్ యా గొరొత్తన దేవుణుదిజ్ పొగిడిజి మాడిస్తార్. గాని యూదురు ఆతి మీరు, దేవుణుదిజ్ పొగిడిజి మాడిస్తెజ్ మన్ని బాడ్డి యెరూసలెం ఇజి వెప్సినిదెర్”.

21 అందెజె యేసు, “బీబి, యెరుసలెమ్దుబా, యా గొరొత్తబా బుబ్బు ఆతి దేవుణుదిజ్ మీరు పొగిడిజి మాడిస్ ఇ ఉండ్రీ కాలం వాజినాద్. నీను నా మాట నమ్మి అ.

22 ఎలాగ మర్తి వన్నిజ్ పొగిడిజి మాడిసిన్దెర్ ఇజి మిజి తెలివద్. గాని యూదురు ఆతి మజి తెలినాద్, ఎలాగ మర్తి వన్నిజ్ మాపు పొగిడిజి మాడిస్తావ్ ఇజి. ఎండానిజ్ ఇహిజ, యూదురు బాణిజె, లోకురిజ్ రక్కిస్సికాన్ వాజినాన్.

23 దేవుణు ఆత్మసత్తుదాన్ లోకుర్ బుబ్బెజ్, వరి మన్ను పూర్తి నిజం పొగిడిజి మాడిసిని ఉండ్రీ కాలం వాజినాద్. అయాక ఏలునె మనాద్. ఆహె పొగిడిజి మాడిసిని వరిజె దేవుణుదిజ్ ఇస్టం.

24 దేవుణు, ఆత్మనె. అందెజె వన్నిజ్ పొగిడిజి మాడిస్సికార్ వన్ని ఆత్మ సత్తుదాన్, నిజం ఇక వన్నిజ్ పొగిడిజి మాడిస్తెజ్వెలె”, ఇజి వెప్తాన్.

25 అయా బోదెల్ వన్నిజ్, “క్రీస్తు ఇజి కూకె ఆని మిసియ వానాన్ ఇజి నాను నెస్సు. వాండ్రు వానివలె మజి విజు వన్కా వందిజ్ టెటాజ్ వెప్సాన్”, ఇజి వెప్తాద్.

26 అయావలె యేసు, “నీవెట వర్గిజిని నాను వాండ్రె”, ఇజి వెప్తాన్.

27 అయావలెనె వన్ని సిసూర్ మరజి వాతార్. వాండ్రు అయా బోదెల్ వెట వర్గిజినిక సుండెతారె నండో బమ్మ ఆతార్. గాని నిజి ఇన్నిక కావాలి ఇజి బా, నీను ఎండనిజ్ దన్నివెట వర్గిజిని ఇజిబా ఎయెర్బా వెన్బావితార్.

28-29 అయా బోదెల్ దని కుండ డిస్తాదె పట్టుం సాహాద్. సాహాదె, బాన్ మహి లోకురిజ్, “నాను కితి విజు వన్కా వందిజ్ నజి వెప్తా ఒరెన్ వన్నిజ్ మీరు వాజి సుండెదు. వీండ్రు క్రీస్తు ఆవండ్రా?”, ఇజి వెప్తాద్.

30 వారు పట్టుమ్దాన్ సోతారె వన్నిడగ్గు వాజి మహార్.

31-32 అయావలె వన్ని సిసూరు, “మెస్టరు ఇనికబా ఉణామె”, ఇజి వన్నిజ్ బతిమాలితార్. ‘మిజి తెలిఇ బోజనం నజి ఉండెజ్ మనాద్”, ఇజి వాండ్రు వరిజ్ వెప్తాన్.

33 “వన్నిజ్ బోజనం ఎయెన్బా తతాండ్రా?”, ఇజి ఒరెన్దిజ్ ఒరెన్ సిసూర్ వర్గితార్.

34 యేసు వరిజ్, “నజి పొక్తాన్ నజి వెప్తా పణి పూర్తి కినికాదె నా బోజనం లెకెండ్ మనాద్.

35 'నాల్గి నెలైజ్ మనాద్ పంట కొయ్ని కాలం', ఇజి మీరు వెహ్విదెర్గదె. నాను మిజి వెహ్విని, మీ కణుకు పెర్తి మడిజు సుడెడు. ఆకెజ్ సోపాతెనె పండితె మన్నె.

36 నా మాటెజ్ వెండ్రెజ్ తయార్ ఆతి మన్ని యా లోకురిజ్ సుడెజు. కొయిదెజ్ సోపాతి మన్ని మడిజు లెకెండె మనార్. వరిజ్ ఎలాకాలం దేవుణు వెట బత్కిని బత్కు దోహ్కాద్ ఇజి నా డగ్గు తని వన్నిజ్ లాబం మనాద్. విత్కికాన్ని కొయినికాన్ రిఎర్ కూడెజి సర్ద ఆని లెకెండె వీండ్రు ని విని ముజాల లోకురిజ్ సువార్త వెహ్వికార్ రిఎర్ కూడెజి సర్ద ఆనార్.

37 'విత్కికాన్ ఒరెన్. కొయినికాన్ మరి ఒరెన్', ఇజి వెహ్విక నిజమనె.

38 మహికార్ కస్టబడిజి పణి కితార్. మీరు కిఇతిదెర్. వారు కస్టపడిజి కితి పణిది లాబం లాగ్దెజ్ నాను మిజి పోక్కిన.

నండొ సమరియదికార్ యేసుజ్ నమిజినార్.

39 "నాను కితి విజు వన్కా వందిజ్ వాండ్రు నజి వెహ్హన్", ఇజి అయా బోదెలి మాట వెహరె, అయా పట్టుమది నండొ సమరియదికార్ యేసుజ్ నమ్మితార్.

40 అందెజె సమరియదికార్ వన్ని డగ్గు వాతారె, "మా డగ్గు మన్అ ఇజి వన్నిజ్ బతిమాలితార్. అందెజె వాండ్రు అబె రుండి రోస్కు మహాన్.

41 వన్ని మాట వెహరె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, "నీను వెహ్వి దనిదాన్ ఆఎద్ మాపు యేలు నమిజనిక. గాని విని మాటెజ్ మాపు వెహవ్. నిజమె, వీండ్రె లోకురిజ్ పావమ్కాజ్ రక్కిస్సికాన్ ఇజి మాపు నెసినావ్. అందెజె మాపు వినిజ్ నమ్మిజినావ్", ఇహార్.

యేసు అతికారి మరిసిజ్ నెగెణ్ కిజినాన్

43 రుండి రోస్కు బాన్ మహి వెన్కా, యేసు సమరియదాన్ గలీలయ ప్రాంతమదు సాహాన్.

44 (యేసునె వెహ్హ మహాన్, "ఒరెన్ ప్రవక్తెజ్ వన్నిసొంత ప్రాంతమదు ఎయెర్బా గవరం సిఎర్", ఇజి)

45 వాండ్రు గలీలయదు వాతివలె, గలీలయదికార్ వన్నిజ్ డగ్గు కితార్. ఎందనిజ్ఇహిజు, వారుబా పస్కు పండొయిదిజ్ యెరూసలెమదు సాహ మహరె, వాండ్రు అబ్బె కితి విజు పణిజ్ సుడెత మహార్.

46 వాండ్రు గలీలయది కానా ఇన్ని పట్టుమదు మరి వాతాన్. బానె వాండ్రు ఏరుదిజ్ ద్రాక్కు కడు కితాన్. అబ్బె ఒరెన్ గవర్మెంటు అతికారి మహాన్. వన్ని మరిసి కపర్నహొముదు కస్టం అర్దు మహాన్.

47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్గు వాతాన్. వాతండ్రె, "నా మరిన్ సాదెజ్ డగ్గు ఆత మనాన్. అందెజె నీను వాజి వన్నిజ్ నెగెణ్ కిఅ", ఇజి వన్నిజ్ బతిమాలితాన్.

48 యేసువన్నిజ్, "నండొ బమ్మాని గుర్తుజ్ సుడెతిజునె మీరు నమినిదెర్", ఇజి వెహ్హన్.

49 అయా అతికారి, "బాబు, నా మరిన్ సాని ముజాల రఅ", ఇజి వెహ్హన్.

50 దన్నిజ్ యేసు వన్నిజ్, "సాన్అ. నీ మరిన్ బత్కినాన్", ఇజి వెహ్హన్. వాండ్రు యేసు వెహ్హమాట నమితాండ్రె సాహాన్.

51 వాండ్రు సొన్సి మహివలె వన్ని ఇండ్రొణి పణి మణిసీర్ వన్ని ఎద్దు వాతారె, "నీ మరిన్ బత్కిత మనాన్", ఇహార్.

52 ఎసాడు గంటెజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు, “ఇఎన్ ఒంటి గంటదిజ్ నోబు డిస్తాద్”, ఇజి వెహ్టార్.

53 నీ మరిన్ బత్మినాన్ ఇజి యేసు వెహ్టా ఆ టయిమ్దునె, వన్నిమరిన్ నెగెణ్ ఆతాన్ ఇజి బుబ్బు నెస్తాన్. అందెజె వాండ్రు వన్ని కుటుమ్దికార్ యేసుజ్ నమ్మితార్.

54 యాకదె యేసు యుదయదాన్ గలీలయదు వాతి వెనుక కిత్తి మరి ఉండ్రి బమ్మాతి పణి.

5

1 వెన్కా యూదుర్జ పండోయ్ ఉండ్రి వాతాద్. అందెజె యేసు యెరూసలెమ్దు సాహ్సాన్.

2 యెరూసలెం సుటులం తోహ్కత్తి కోటదు గొరెజ్ సాని గోర్జె ఉండ్రి మనాద్. దన్నిడగ్రు ఉండ్రి సెరు మనాద్. దన్ని పేరు ఎబ్రి బాసదు బెదెస్త ఇజి. దన్నిజ్ అయదు అరుజుజ్ సురులం మన్నె.

3-4 అయా అరుజుజు మందెజ్ మందెజ్ కస్టమ్కాణికార్ గూర్త మహార్. గుడ్డిదికార్, సొటాదికార్, కిక్కుకాల్కు అర్దికార్ బాన్ మహార్. ఎస్సివలెనో ఉండ్రి సుటు దేవుణు దూత ఒరెన్ అయా సెర్దుడు డిగ్జి ఏరుదిజ్ కద్దిసినాన్. అయావలె ఎయెన్ ముజాల ఏరుదు డిగ్జినాండ్రో, వాండ్రు ఎలాగ మర్తి జబ్బు ఆతికాన్ ఆతిజ్బా నెగెణ్ ఆనాన్. యా కస్టమ్కాణికార్ ఏరు కద్దిని దన్నిజ్ ఎద్దుసుడేజి మహార్.

5 వరి లోఇ ఒరెన్ మహాన్. వాండ్రు ముప్పయెనిమిది పంటెజాణిజ్ కస్టమ్దాన్ మహాన్.

6 యేసు వన్నిజ్ సుడేతాన్. వాండ్రు నండో పంటెజాణిజ్ కస్టమ్దాన్ మనాన్ ఇజి నెస్తాండ్రె, వన్నిజ్, “నీను నెగెణ్ ఆదెజ్ కోరిజినిదా?”, ఇజి వెన్బాతాన్.

7 వెన్బాతిజ్ అయా కస్టమ్దికాన్, “బాబు, ఏరు కద్దినివలె నజి సెరుదు డిపైజ్, ఎయెన్బా నజి సిల్లెన్. నాను డిగ్జిన ఇనిజ్, నజి ఇంక ముజాలా మరి ఒరెన్ డిగ్జినాన్”, ఇజి వెహ్టార్.

8 యేసు వన్నిజ్, “నీను నిజ్జి నీ సాప అసి నడిఅ”, ఇజి వెహ్టార్.

9 వెటెనీ వాండ్రు నెగెణ్ ఆతండ్రె వన్ని సాప నిక్తాండ్రె నడితాన్. యాక విస్త్రాంతి దినమ్దు జర్గితాద్.

10 అందెజె యూదురు నెగెణ్ఆతి వన్నిజ్, “నేండ్రు విస్త్రాంతి దినం గదె. నీను సాపెజ్ నిక్కి ఒతెజ్ ఆవద్. ఎందనిజ్ ఇహొజు, మోసి సితీ రూలుజ్దు వెహ్సినాద్, ఇన్ని పణిబా విస్త్రాంతి దినమ్దు కిదెజ్ ఆవద్ ఇజి”, ఇజి వెహ్టార్.

11 దన్నిజ్ వాండ్రు, “నజి నెగెణ్ కితికాన్, ‘నీ సాప నిక్కి నిడిఅ’, ఇజి నజి వెహ్టార్”, ఇహ్సాన్.

12 అందెజె వారు, “నీ సాపెజ్ నిక్కి నడిఅ ఇజి నిజి వెహ్టాకాన్ ఎయెన్?”, ఇజి వెన్బాతార్.

13 నెగెణ్ కిత్తికాన్ ఎయెన్ ఇజి వన్నిజ్ తెలివతాద్. ఎందనిజ్ ఇహొజు, అబ్బె మందలోకుర్ కూడిత మహార్. యేసు వరి లోఇహాన్ తప్తె ఆతండ్రె సాహాన్.

14 వెనుక యేసు వన్నిజ్ దేవుణు గుడిడు సుడేతాన్. సుడేతండ్రె వన్నిజ్, “సుడేఅ, నీను ఏలు నెగెణ్ ఆతి. ఏలుదాన్ పాపమ్కు కిమ. సిలిజు నిజి మరి బాదెజ్ లావు వానె”, ఇహ్సాన్.

15 వాండ్రు సాహండ్రె వన్నిజ్ నెగెణ్ కితికాన్ యేసు ఇజి యూదురిజ్ వెహ్టార్.

16 అందెజె యా పణిజ్ యేసు విస్త్రాంతిదినమ్దు కితిజ్ యూదురు వన్నిజ్ నండో మాలెజ్ కిత్తార్.

17 గాని యేసు వరిజ్, “నా బుబ్బు ఎస్సివలెబా నెగ్గి పణిజ్ మహి వరి వందిజ్ కిజినె మంజినాన్. నానుబా కిజిన”, ఇజి వెహ్తాన్.

18 యా లెకెండో యేసు వెహ్తాజ్, యూదురు వన్నిజ్ సప్తెజ్ మరి నండో సుడోతార్. ఎందానిజ్ ఇహిజ, వాండ్రు విస్త్రాంతిదినమ్ది రూలుజ్ తప్పికాదె ఆఎండ, దేవుణు వన్ని సొంత బుబ్బు ఇజిబా వెహ్సినాన్. అయాలెకెండో, వాండ్రు దేవుణు వెట సమానం ఆతికాన్ ఇజి వెహె ఆజినాన్. అందెజె యేసుజ్ సప్తెజ్ మరి నండో సుడోతార్.

19 యేసు వరిజ్ ఈహు మరీజి వెహ్తాన్. “నాను మిజి నిజం వెహ్సిన, మరిసి ఆతి నాను ఇనికబా నా సొంత సత్తుదాన్ కిదెజ్ అట్ఎన్. నా బుబ్బు ఇన్ని ఇనికెజ్ కిజినిక సుడోజినానో, అయాలెకెజ్ నాను బా కిజిన. బుబ్బు కిజినికెజ్ మరిసి బా కిజినాన్.

20 ఎందానిజ్ ఇహిజ, అపొసి మరిసిజ్ ప్రేమిస్సాన్. వాండ్రు కిజినికెజ్ విజు మరిసిజ్ తోరిస్సాన్. వాండ్రు వన్నిజ్ దినిజ్ మిస్సి మరి నండో పెరి పణిజ్ తోరిస్సాన్. అయాలెకెజ్ సుడోజి మీరు విజెరె నండో బమ్ము ఆనిదెరె.

21 అప్పొసి ఎలాగ సాతివరిజ్ నిక్కి, వరిజ్ బత్కిసినాండ్రో అయ లెకెండో, మరిసిబా బత్కిసినాన్. వన్నిజ్ ఇస్టం మన్ని వరిజ్ బత్కిస్సాన్.

22-23 అప్పొసి ఎయెరిజ్బా, వారు తీర్పు కిఎన్. గాని విజెరిజ్ తీర్పు కిదెజ్ మరిసిజ్ అతికారం విజు ఒవజెప్త మనాన్. అపొసిజ్ గవరం సీనిలెకెండో విజెరె మరిసిజ్ గవరం సీదెజెన్ యా అతికారం ఒవజెప్త మనాన్. మరిసిజ్ గవరం సిఇకాన్ ఎయెన్బా, వన్నిజ్ పొక్కి అపొసిజ్ గవరం సీవ్న్.

24 నాను మిజి నిజం వెహ్సిన, నా మాట వెంజి, నజి పొక్కి వన్నిజ్ నమ్మిజినవన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసివి. వన్నిజ్ ఎలాకాలం మన్ని సిక్కి సెల్లెద్. గాని వాండ్రు ఎలాకాలం దేవుణు వెట బత్కినాన్.

25 సాతి లెకెండో మనికార్ దేవుణు మరిసి ఆతి నాను వెహ్సినా మాటెజ్ వెని కాలం వాజినాద్. అయాలెకెండో వాత మనాద్. నా మాటెజ్ వెంజి, అయ లెకెండో కినికార్ బత్కినార్, ఇజి నాను మిజి నిజమ్నె వెహ్సిన.

26 ఎందానిజ్ ఇహిజ, నా బుబ్బు బాణిజె బత్కు వనాద్. వాండ్రు విజెరె బత్కిసిని లెకెండో, నాను లోకురిజ్ బత్కిస్సెజ్ నజి అతికారం సిత మనాన్.

27 మరి లోకురిజ్ తీర్పు సీదెజ్ వాండ్రు నజి అతికారం సిత మనాన్. ఎందనిజ్ ఇహిజ, నాను లోకు మరిసి.

28 దిన్నివందిజ్ బమ్ము ఆమాట్. ఎందానిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రీ వాజినాద్.

29 వారు దూకిదాన్ వెల్లి వనార్. నెగ్గి పణిజ్ కితికార్ నిజ్జి మరి ఎల్లకాలం దేవుణు వెట బత్కినార్. సెఇ పణిజ్ కితికార్ నిజ్జి సిక్కి పొందినార్.

30 నా సొంత సత్తుదాన్ ఇనికబా కిదెజ్ నాను అట్ఎన్. దేవుణు వెహ్సిన వజినె నాను తీర్పు సీజిన. అందెజె నాను తీర్పు సీజి సిక్కి సీనిక నాయం ఆత్తిక. ఎందానిజ్ ఇహిజ, నాను నజి ఇస్టం ఆతి వజి కిఎ, నజి పొక్కి వన్నిజ్ ఇస్టం ఆతివజినె కిజిన.

31 నా వందిజ్ నానె వెహ్సెజ, నాను వెహ్సినని వన్యాజ్ పేరు సెల్లెద్.

32 గాని నా వందిజ్ మరి ఒరెన్ సాక్కి వెహ్సినాన్. వాండ్రు నా బుబ్బు. వాండ్రు నా వందిజ్ వెహ్సినని సాక్కి నిజం ఇజి నాను నెసిన.

33 మీరు యోహాను డగ్రు సెగొండారిజ్ పోక్తిదెర్. వాండ్రు నా వందిజ్ నిజమాతి సాక్సి వెహ్టోన్

34 లోకుర్ నా వందిజ్ వెహ్నిని సాక్సి నజీ అవుసరం సిల్లెద్. గాని మీరు యోహాను వెహ్టా మాటెజ్ నమిజి దేవుణు మిజీ రక్సిస్తెజ్, నాను వాండ్రు వెహ్టా దని వందిజ్ వెహ్నిన.

35 ఉండ్రీ దీవ కసి జాయ్ సీజినిలెకెండె యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సరద ఆతిదెర్.

36 నాను కిజిని పణిజ్ యోహాను వెహ్టా సాక్సి ఇంక గొప్పు పెరి సాక్సిని. ఎండనిజ్ ఇహిజ, నాను పూర్తి కిదెజ్ బుబ్బు నజీ ఒపజెప్తికెజె నాను కిజిని పణిజ్. అయా పణిజ్ బుబ్బు నజీ పోక్త మనాన్ ఇజి రుజుప్ కిజిని.

37-38 మరి, నజీ పోక్తి బుబ్బునె నా వందిజ్ నిజమాతికెజ్ వెహ్నినాన్. మీరు వన్నిజ్ ఎసెజ్బా వెన్ఇతిదెర్. వన్ని రూపు ఎసెజ్బా తోఇతిదెర్. వన్ని మాటెజ్ మీ మన్నుదు ఇడ్ఇతిదెర్. ఎండనిజ్ ఇహిజ, వాండ్రు పోక్తి నజీ మీరు నమిఇదెర్.

39-40 మీరు దేవుణు మాట బాగ సద్విజినిదెర్. ఎండనిజ్ ఇహిజ, అయాక మిజీ ఎలాకాలం దేవుణు వెట బత్కిని బత్కు సీనాద్ ఇజి ఒడెబిజినిదెర్. అయా మాటెజ్ నా వందిజి వెహ్నినె. గాని దేవుణు వెట ఎలాకాలం బత్కిని బత్కు వందిజ్ నా డగ్రు రెఇదెర్.

41 లోకుర్ పోగ్డిజినికెజ్ నాను కోరివ్.

42 గాని మీరు ఎలాగ మర్తికిదెర్ ఇజి నాను నెన్ను. మీరు దేవుణుదిజ్ నిజం ప్రేమిన్ఇకిదెర్ ఇజి నాను నెన్ను.

43 నా బుబ్బు సిత్తి అతికారమ్దాన్ నాను వాత మన్ను. గాని మీరు నజీ డగ్రు కిఇదెర్. మరి ఒరెన్, వన్ని సొంత అతికారమ్దాన్ వాతిజ, మీరు వన్నిజ్ డగ్రు కినిదెర్.

44 లోకుర్ పోగ్డిజెదెజ్ ఇజి మీరు కోరిజినిదెర్. ఒరెండ్రె దేవుణు అతికాన్ మిజీ పోగ్డిజెదెజ్ మీరు కోరిఇదెర్. మరి మీరు ఎలాగ నజీ నమ్మినిదెర్?

45 నాను బుబ్బు డగ్రు నేరం మోప్పాన్ ఇజి మీరు ఒడెబిమాట్. మీరు ఆస దాన్ ఎద్రు సుడెతి మోసెనె మీ మున్ను నేరం మోప్పాన్.

46 మీరు మోసెజ్ నమ్మినికిదెర్, నజీబా నమ్మితార్ మరి. ఎందానిజ్ ఇహిజ, మోసె నా వందిజ్ రాస్త మనాన్.

47 మీరు వాండ్రు రాస్తి మనికెజ్ నమ్మిఇదెర్. మరి ఎలాగ నాను వెహ్నినిక నమ్మినిదెర్?”.

6

యేసు అయ్దు వేయు మొగ్గకొణెరిజ్ బోజనం సీజినాన్

1 దన్నివెనుక యేసు గలీలయ సమ్దరం డాట్టి అతాహ ఒడ్డుద్ సోహాన్. తిబెరియ సమ్దరం ఇజిబా ఇనార్.

2 క్లమ్దాన్ మహి పరిజ్ వాండ్రు నెగెణ్ కితి బమ్మ అతి పణిజ లోకుర్ సుడెతార్. అందెజి మంద లోకుర్ వన్ని వెట వాతార్.

3 యేసు అబెణి గొరొణ్ సెల్కాదు ఎక్తాండ్రె వన్ని సిసూర్ వెట బస్త మహాన్.

4 నస్తవలె యూదురు కిని పస్సు ఇని పండోయ్ డగ్రు అత మహాద్.

5 యేసు కణక పెహ్ని బేస్తిజ్, మంద లోకుర్ వన్ని డగ్రు వాజినిక సుడేతాన్. “వీరు ఉండెజ్ బోజనం ఎలాగ కొండెజ్ ఆనాప్?”, ఇజి పిలిపుజ్ వెన్బాతాన్.

6 ఇనిక కిడెజ్ ఇజి యేసు నెస్నాన్ గాని పిలిపుజ్ వన్నిముస్కు నమకం మనాదా ఇజి సుడేదెజె వాండ్రు అయా లెకెండ్ వెన్బాతాన్.

7 అందెజె పిలిపు, “వరి లోఇ ఒరెన్ ఒరెన్ కండెక్ కండెక్ ఉండెజ్బా రుండి వందెజ్ వెండి రుపాయుజాణి బోజనం కొటిజ్బా సాల్ఎద్”, ఇజి వన్నిజ్ వెహ్తాన్.

8 అయావలె వన్ని సిసూర్ లోఇ ఒరెన్ ఆతి అంద్రెయ ఇనికాన్ యేసుజ్ వెహ్తాన్. వీండ్రు సిమోన్ పేతురుజ్ తంబెర్ని.

9 వాండ్రు ఇన్నిక వెహ్తాన్ ఇపాజ, ‘ఇబ్బె ఒరెన్ ఇజి కొడోఃమనాన్. వన్నిబాన్ అయ్దు యావల రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాల్ఉ’, ఇజి వెహ్తాన్.

10 అయావలె యేసు, “యా లోకాజ్ బసె కిదు”, ఇజి వెహ్తాన్. అయా బాడిడు నండొ గడ్డి మనాద్. అందెజె మొగ్గకొడోఃర్ బస్తూర్. వారె డగ్రు అయ్దు వెయుజ్ మహూర్.

11 యేసు అయా రొట్టెజ్ అస్తాండ్రె, దేవుణుదిజ్ వందనమ్కు వెహ్తాండ్రె, బస్తి వరిజ్ సీబాజి సితాన్. అయాలెకెండె మొయెజ్బా. వరిజ్ కావాలస్తి నసా సీబాత సితాన్.

12 వారు పొటపంజు తిహి వెనుక, “ఇన్నిక పాడు ఆవిండ, మిగిలితికెజ్ కొటు కిదు”, ఇజి సిసూర్జ వెహ్తాన్.

13 అందెజె మిగిలితికెజ్ సిసూర్ కెహ్తూర్. లోకుర్ తిహి వెన్కా మన్ని అయ్దు యావల రొట్టెజాణి ముకెజ్ కొటు కితారె, పన్నెండు గప్పెజ్ నిహ్తూర్.

14 యేసు కిత్తి యా బమ్మాతి పణి సుడేతారె, “నిజమె, లోకమదు వాని ప్రవక్త వీండ్రె”, ఇజి వెహ్తూర్.

15 యా లోకుర్ వాజి, కెఇ కెఇ నజి రాజు కినార్ ఇజి యేసు నెస్నాన్. అందెజె వాండ్రు బాణిజ్ డిస్తాండ్రె ఒరెండ్రె మరి గొరొత్ సాహాన్.

యేసు సమ్దరం ముస్కు నడిజినాన్

16-17 పొద్దు ఆతివెలె, వన్నిసిసూర్ డిగితారె, సమ్దరం ఒడ్డుదు వాతూర్. అబ్బె వారు ఉండ్రె డోణిదు ఎక్తారె, సమ్దరం డాట్టి, కపర్నహొముదు సాండ్రెజ్ ఇజి సోతూర్. అయావలె సీకాట్ ఆతాద్. యేసు వరి డగ్రు ఇంక రఎండ మహాన్.

18 నస్తివలె పెరి గాలి ఉండ్రె వాతాద్. సందారమ్దు లాపు ఉల్కెజ్ నిజితె.

19 వారు రమారమి మూండ్రె నాల్లి మయలు నడిపిస్తూర్. అయావలె యేసు సందారం వీరు ముస్కు నడిజి డోణి డగ్రు వాజినిక సుడేతారె. అయాక సుడేతారె, వారు నండొ తియెల్ ఆతూర్.

20 గాని వాండ్రు, “నానె, తియెల్ ఆమాట్”, ఇజి వరిజ్ వెహ్తాన్.

21 అందెజె వారు వన్నిజ్ డోణిదు ఎకిస్తెజ్ ఇస్టం ఆతూర్ గాని వెటనె వారు సాండ్రెజ్ సరి సోతి మన్ని గటుదు అందితూర్.

22 సిసూరు డోణి ఎక్కి సాని ముజాల నిహి మహి సమ్దరం ఒడ్డుదు మంద లోకుర్ మహూర్. మహ్నా నాండిజ్ వారు నెస్తూర్, అబ్బె ఉండ్రె డోణినె మహాద్. యేసు వన్ని సిసూర్ వెట అయా డోణి ఎక్కి సాన్ఎతాన్. సిసూర్నె ఎక్త సాహూర్ ఇజి.

23 నస్తవతి, తిబెరియదాన్ మరి డోణిజ్ వాతె. యేసు రొట్టెజు వందిజ్ దేవుణుదిజ్ వందనమ్కు వెప్తాన్. వెప్తా వెన్కా లోకుర్ అయాక తిహర్. వారు రొటెజ్ తిహి బాడ్డిః డగ్రు అయా డోణిజ్ వాతె.

24 యేసుని వన్ని సిసూర్ బాన్ సిల్లెర్ ఇజి మంద నెస్తారె. ఆహె నెస్తెవెలె, వారు డోణిజ్ ఎక్తారె, వన్నిజ్ రెబాజి కపర్ననహొముదు సాహార్.

25 వారు యేసుజ్ అతాహ ఒడ్డుదు సుడఃతారె, “బోదకినికిదా, నీను ఎస్కాండె ఇబ్బె వాతి?”, ఇజి వన్నిజ్ వెన్బాతారె.

26 దన్నిజ్ యేసు వెప్తాన్, “నాను మీ వెట నిజం వెహ్సిన, మీరు పొట పంజు రొటెజ్ తిహిదెర్. అందెజె మీరు నజి రెబానిదెర్. గాని నాను కితి బమ్మ ఆతి పణి అర్థం నెన్ని వందిజ్ ఆఎద్ రెబాజినిక.

27 పాడాఃజి సాని టిండి వందిజ్ కన్టబడఃమాట్. గాని ఎలాకాలం దేవుణు వెట బత్కిని బత్కు సీని నిజమాతి టిండి వందిజ్ కన్టబడఃదు. లోకు మరిసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బు ఆతి దేవుణు అతికారం సిత మనాన్.

28 వారు వన్నిజ్, “మాపు దేవుణు పణికిదెజ్ ఇహిజ, ఇన్నిక కిదెజ్వెలె?”, ఇజి వెన్బాతారె.

29 యేసు వరిజ్, “దేవుణు పొక్తి వన్నిముస్కు నమకం ఇడఃజి మంజినికాదె దేవుణు సేవ పణి”, ఇజి వెప్తాన్.

30 అందెజె వారు, “అహిజ, నీను ఇని బమ్మాని పణికినిలె? అయాక సుడఃజి నీ ముస్కు నమకం ఇడదెజ్ నీను ఇనిక కినిలె?

31 మోసె వెట మహి మా అనిగొగొర్ బీడిమ్బూమిద్ మన్న ఇని బోజనం ఉటార్. దేవుణు మాటదు రాస్త మనాద్, ‘వారు ఉండెజ్ దేవుణు మంజిని బాడ్డిదాన్ వాండ్రు బోజనం సితాన్ ఇజి’”, ఇజి వెప్తాన్.

32 అందెజె యేసు వరిజ్ వెప్తాన్, “నాను మిజి నిజం వెహ్సిన, దేవుణు మంజిని బాడ్డిదాన్ బోజనం మిజి సితాన్ మోసె ఆఎన్, గాని నా బుబ్బునె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్.

33 దేవుణు సీజిని బోజనం ఇన్నిక ఇహిజ, వాండ్రు మంజిని బాడిదాన్డిఃగితి వాతి, యా లోకమ్ది లోకురిజ్ ఎలాకాలం దేవుణు వెట బత్కిజిని బత్కు సీజినికానె”.

34 అహిజ, ప్రబువా, యా బోజనం ఎలాకాలం మజి సీజి మన్అ”, ఇజి వారు వన్నిజ్ వెప్తారె.

35 అందెజె యేసు వరిజ్ ఈహు వెప్తాన్, “ఎలాకాలం దేవుణు వెట బత్కిదెజ్ లోకురిజ్ బత్కిన్పిన్ని టిండి నానె. నా డగ్రు వాజినికాన్ ఎసెజ్బా బజ సాఎన్, నజి నమ్మినికాన్ ఎసెజ్బా ఏహ్కా సాఎన్.

36 నాను మిజి వెప్తా లెకెండ, మీరు నజి సుడఃతి మనిదెర్, గాని నజి నమిఇదెర్.

37 బుబ్బు నజి ఒపజెప్తి లోకుర్ విజెరె నా డగ్రు వానార్. నా డగ్రు వాని ఎయెరిజ్బా నాను వెల్లి నెక్కి పొక్వ.

38 ఎందానిజ్ఇహిజ, నాను నజి ఇన్టం వాతి లెకెండ కిదెజ్ ఆఎద్, దేవుణు మంజిని బాడ్డిదాన్ డిఃగితి వాతిక. గాని నజి పొక్తి వన్నిజ్ ఇన్టం వాతి లెకెండ కిదెజ్ డిగిత వాత.

39 నజి పొక్తి దేవుణు, నా బాణిజ్ ఇన్నిక కోరిజనాన్ ఇహిజ, వాండ్రు నజి ఒపజెప్తి వరి లోఇ ఎయెరిజ్బా నాను డిఃసెజ్ ఆఎద్. గాని వరిజ్ నాను మరి వాని కడఃవెరి

దినమీదు ఎలాకాలం బత్తిస్తాజె. యాకదె వాండ్రు నా బాణిజ్ కోరిజినాన్.

40 నా బుబ్బు కోరిజినిక ఇన్నిక ఇహిజ, నాను దేవుణు మరిసి ఇజి నెసి నజీ నమ్మిని ఎయెరిజ్బా ఎలాకాలం దేవుణు వెట బత్తిని బత్తు. మండ్రెజ్ ఇజి. మరి నాను మర్జి వానివలె నాను వరిజ్ సావుదాన్ బత్తిస్తాజె ఇజి. యాకదె నా బుబ్బు నా బాణిజ్ కోరిజినాన్.

41 యూదురు యేసువందిజ్ మొరొ ఆతార. దేవుణు మంజిని బాడ్డిదాన్ డిఃగితి వాతి టిండి నానె, ఇజి వాండ్రు వెహ్తాన్. దిని వందిజ్ వారు మొరొ ఆతార.

42 వారు, “వీండ్రు యోసేపు మరిన్ ఆతి యేసు గదె? విని అయిసి అప్పొసిరిజ్ మాటు నెస్నాట్గదె? మరి ‘నాను దేవుణు మంజిని బాడ్డిదాన్ డిఃగిత వాత’, ఇజి వీండ్రు ఎలాగ వెహ్తాన్”, ఇజి వర్గిజినార్.

43 అందెజె యేసు, “మీ లోఇ మీరు మొరొ ఆమాట్.

44 నజీ పొక్తి బుబ్బు ఎయెరిజ్బా నా డగ్రు నడిపిన్ఎండ మహిజ, వారు నా డగ్రు వాదెజ్ అట్ఎర్. నాను వన్నిజ్ కడెవెరి దినమీదు నాను వానివలె సావుదాన్ బత్తిస్తాలె.

45 ప్రవక్తరు దేవుణు మాటదు ముజాలె రాస్త మనాద్, ‘దేవుణునె లోకురిజ్ విజెరిజ్ నెసిపిస్నాన్’, ఇజి. బుబ్బు వెహ్తా మాట వెంజి, అయాకెజ్ వన్ని బాణిజ్ నెస్తికార్ నాడగ్రు వానార్.

46 దేవుణు బాణిజ్ వాతికానె ఆఎండ మరి ఎయెన్బా బుబ్బెజ్ తోవీన్. వాండ్రు ఒరెండ్రె బుబ్బెజ్ నుడఃత మనాన్.

47 నాను మీ వెట నిజమనె వెహ్తాన, నా ముస్కు నమకం ఇడ్చివన్నిజ్ ఎలాకాలం దేవుణు వెట బత్తిని బత్తు. మనాద్.

48 ఎలాకాలం దేవుణు వెట బత్తిదెజ్ లోకురిజ్ బత్తిన్పిన్ని టిండి నానె.

49 మీ అనిరు బీడిమ్బూమిదు మన్న ఇన్ని బోజనం ఉటార్. గాని వారు సాతార్.

50 గాని యా టిండి ఎయెర్ ఉటిజ్బా వారు సాఎర్. సాఇ నని టిండినె దేవుణు మంజిని బాడ్డిదాన్ డిఃగితి వాతిక.

51 నానె దేవుణు మంజిని బాడ్డిదాన్ డిఃగితి వాతి ఎలాకాలం దేవుణు వెట బత్తిని బత్తు. సీని టిండి. ఎయెన్బా యా టిండి తిహిజ, వాండ్రు ఎలాకాలం బత్తినాన్. నా సాంత ఒడెల్నె నాను సీని టిండి. యా లోకమ్దికార్ ఎలాకాలం బత్తిదెజె నాను అయక సీజిన”.

52 యేసు వెహ్తా వెహరె, అయావలె యూదురు వారె వరి లోఇ ఉండ్రె గొడఃబ రేజితాద్. “విని ఒడెల్ ఎలాగ మాటు తిండ్రెజ్ మజి సీనాన్”, ఇజి వర్గితార్.

53 అందెజె యేసు వరిజ్ వెహ్తాన్, “నిజమె నాను మీ వెట వెహ్తాన, లోకుమరిసి ఆతి నా ఒడెల్ మీరు తిన్ఎండ మహిజ, నా నల మీరు ఉణెఎండ మహిజ, మీరు ఎలాకాలం బత్తిఇదెర్.

54 నా ఒడెల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్తిని బత్తు. మనాద్. నాను వన్నిజ్ కడెవెరి దినమీదు నాను వానివలె సావుదాన్ ఎలాకాలం బత్తిస్తాలె.

55 ఎందానిజ్ ఇహిజ, నా ఒడెల్, నా నల యాకెజె తిండ్రెజ్ ఉండెజ్ మనికెజ్. యాకెజె నిజమాతి టిండి.

56 నా ఒడెల్ తినికాన్, నా నల ఉణికాన్, నా వెట కూడఃజి మంజినాన్. నాను వన్ని వెట కూడఃజి మంజిన.

57 లోకుర్ విజెరిజ్ బత్కిదెజ్ పాణం సీజిని బుబ్బు నజీ పోక్త మనాన్. వాండ్రు నజీ బత్కు సీజినాన్. అయాలెకెండె ఎయెన్బా నా ఒడోల్ తిహిజ, నాను వన్నిజ్ ఎలాకాలం దేవుణు వెట బత్కిని బత్కు సీన్.

58 నానె దేవుణు మంజిని బాడ్డిదాన్ డిఃగితి వాతి టిండి. మీ అనిరిజ్ ఉటి మన్న ఇన్ని బోజనంలెకెండె ఆఎద్ యాక. వారు ఉటారె సాతార్. గాని యా టిండి తినికాన్ ఎయెన్బా ఎలాకాలం బత్కినాన్.

59 కపెర్నూముదు మన్ని యూదురి మీటిజ్ ఇండ్రో నేరీపిని మహివలె వాండ్రు యా మాటెజ్ వెహోన్.

60 వన్ని సిసూర్ నండెండార్ యా మాటెజ్ వెహారె, “యా మాటెజ్ గొప్ప కష్టం ఆతికెజ్. ఎయెన్దనిజ్ అర్థం కినాన్?”, ఇజి వర్గితార్.

61 వన్ని మాటెజి వందిజ్ వన్ని సిసూర్ మొరొ ఆజినార్ ఇజి యేసు నెస్తాండ్రె వరిజ్, “యా మాటెజ్ మిజి బాద కిజినెనా?”, ఇజి వెన్బాతాన్.

62 “అహిజ, లోకు మరిసి ఆతి నాను, ముజాల నాను మహి బాడిఃదు ఎక్కి సానిక మీరు సూణివలె, మీరు ఇన్నిక ఒడఃబినిదెరొ?”

63 దేవుణు ఆత్మనె, ఎలాకాలం దేవుణు వెట బత్కిని బత్కు సీజినాన్. లోకుర్ అయాక సీదెజ్ అట్ఎర్. నాను మిజి వెహిని మాటెజ్ వెట, దేవుణు ఆత్మ మీ మున్ను వాజినాన్. దేవుణు ఆత్మ మిజి బత్కు సీజినాన్”, ఇజి వెహోన్.

64 “గాని మీ లొఇ సెగొండార్ నాను వెహి మాటెజ్ నమ్మిఇకార్ మనార్”. సిసూర్ లొఇ ఎయెన్ వాండ్రు వెహి మాటెజ్ నమ్మిఎర్, ఎయెన్ వన్నిజ్ ఒపజెప్పాన్ ఇజి యేసు మొదొహనె నెస్త మహాన్. అందెజె వాండ్రు ఆహె వెహోన్.

65 యేసు మరి వెహినినాన్, “మీ లొఇ సెగొండార్ నమ్మిఇదెర్. అందెజె నాను మీ వెట వెహి మన్న, బుబ్బు సరి సిఎండ మహిజ, ఎయెన్బా నా డగ్గు వాదెజ్ అట్ఎన్”, ఇజి.

66 దిన్ని వెనుక, వన్ని సిసూర్ లొఇ నండెండార్ వన్నిజ్ డిఃస్తారె వన్నివెట మరి సొన్ఎతార్.

67 నస్తీవలె యేసు పన్నెండు మణిసి సిసూరిజ్, “మీరు బా నజీ డిఃసి సొండ్రెజ్ కోరిజినిదెరా?”, ఇజి వెన్బాతాన్.

68 అందెజె సిమోన్ పేతురు, “ప్రబువా, ఎయెర్బాన్ మాపు సొండ్రెజ్? నీ మాటెజ్ నె ఎలాకాలం దేవుణు వెట బత్కిని బత్కు వందిజ్ వెహినినె.

69 మాపు ఏలు నమ్మిజినామ్, మాపు నెస్తాప్, నీనె దేవుణు బాణిజ్ వాతికాన్ ఇజి”, ఇజి వెహోన్.

70 అందెజె యేసు, మిజి పన్నెండు మణిసి సిసూరిజ్ ఏర్పాటు కితిక నానె గదె. గాని మీ లొఇ ఒరెన్, నయ్తానుజ్ మన్ని బుద్ది ననికాన్ మనాన్”, ఇజి వెహోన్.

71 వాండ్రు ఇన్ఫ్రియొతు సిమోన్ మరిసి యూద వందిజ్ వెహోన్. యూద సిసూర్ లొఇ ఒరెన్ ఆతిజ్బా వాండ్రు యేసుజ్ వెన్కా ఒపజెప్పాన్లె.

7

యేసు తంబెరీసీర్ వన్నిజ్ నమ్మిఎర్

1 వెనుక, యేసు గలీలయ దేసమ్దునె మంజి నాహ్కజ్ బూలాజి మహాన్. వాండ్రు యూదయ దేసమ్దు మండ్రేజ్ కెవతాన్. ఎందానిజ్ ఇహిజ, యూదురు వన్నిజ్ సప్తజ్ సుడ్యజి మహార్.

2 నస్తివలె, యూదురి ఉండ్రె పండ్రెయ్ డగ్రు ఆతాద్. అయా పండ్రెయ్ పేరునె గుడుస పండ్రెయ్* ఇజి.

3 పండ్రెయ్ డగ్రు ఆతిజ్, యేసు తంబెర్సిర్ వన్నిజ్, “ఇబ్బెణిజ్ నీను యూదయ దేసమ్దు సొన్అ. ఎందానిజ్ ఇహిజ, నీ సిసూర్ ఆతికార్ నీను కిజిని బమ్మ ఆతి పణిజ్ సుడ్యదెజ్”, ఇజి వెప్తార్.

4 “పెరికాన్ ఆదెజ్ కోరిజినికాన్ ఎయెన్బా డాప్పి వన్ని పణి కిఎన్. విజెరె ఎద్రునె కినాన్. నీను యా బమ్మాని పణిజ్ కిజిని ఇహిజ, నిజి నీనె లోకమ్ది లోకుర్ ఎద్రు తోరె ఆదెజ్ మరి. యా గలీలయదికార్ ఉండ్రె ఆవిండ”, ఇజి వెప్తార్.

5 వన్ని తంబెర్సిర్బా వన్నిజ్ నమిఎతార్.

6 అందెజె యేసు వరిజ్, “నాను పండ్రెయిదిజ్ సొండ్రెజ్ నమయం ఇంక రవిదె. గాని మిజి ఎస్తివలెబా సొండ్రెజ్ ఆనాద్.

7 యా లోకమ్దు మన్ని దేవుణుదిజ్ దూసిన్నికార్ మిజి దూసిన్ఎరె. ఎందానిజ్ ఇహిజ, మీరు బా వరి వెట మనిదెరె. గాని వారు నజి దూసిస్సార్. ఎందానిజ్ ఇహిజ, వారు సెఇకెజ్ కిజినార్ ఇజి నాను వెప్పిన.

8 మీరు పండ్రెయిదిజ్ సొండ్రు. నాను ఏలు సొన్వి. ఎందానిజ్ ఇహిజ, నాను సొండ్రెజ్ నమయం పూర్తి రవిదె”, ఇజి వెప్తాన్.

9 యాక వెప్తాండ్రె వాండ్రు గలీలయదు మహాన్.

యేసు గుడుస పండ్రెయ్దిజ్ సొన్సినాన్

10 వన్ని తంబెర్సిర్ పండ్రెయ్దిజ్ సొహి వెన్కా, వాండ్రు బా సొహాన్. లోకుర్ విజెరె వన్నిజ్ నెన్ఇ లెకెండ్రె వాండ్రు డాజిజ సొహాన్.

11 గాని పండ్రెయ్దు, యూదురు వన్నిజ్ రెబాజి, “అయా వాండ్రు ఒంబోవీన్”, ఇజి వెన్బాజి మహార్.

12 లోకుర్ లోఇ వన్ని వందిజ్ నండ్రె మొరొ ఆతార్. సెగొండార్ వాండ్రు నెగ్గికాన్ ఇజి, మరి సెగొండార్, సిల్లె వాండ్రు లోకురిజ్ మోసెం కిజినికాన్ ఇజి మొరొ ఆతార్.

13 గాని యూదురిజ్ తియెలాజి, ఎయెర్బా వన్ని వందిజ్ డటం వెహివతార్.

యేసు పండ్రెయ్దు నెన్పిస్సాన్

14 పండ్రెయి దిసమ్కు సెగం ఆతాద్. అయావలె వాండ్రు దేవుణు గుడిడి అరుజుదు సొహండ్రె అబె మన్ని లోకురిజ్ నెర్పిసినాన్.

15 అందెజె యూదురు నండ్రె బమ్మ ఆతారె, “వీండ్రు బడిడు సొన్ని నద్విఇతికాన్ గదె? మరి ఎలాగ వీండ్రు నిసొ నెస్త మనాన్?”, ఇజి వర్గితార్.

16 నస్తివలె యేసు వెప్తాన్, “నాను నేర్పిస్సి మాట నా సొంత మాట ఆవెద్. గాని అయాక నజి షొక్తి వన్ని బాణిజ్ వాజినాద్.

17 దేవుణు ఇస్టం కిదెజ్ కోరిజినికాన్ ఎయెన్బా, నాను నేర్పిస్సి మాట దేవుణు బాణిజ్ వాజినాదొ, నా సొంత అతికారం దాన్ నాను నేర్పిసినికాదొ ఇజి నెస్సాన్.

* 7:2 7:2 అయా పండ్రెయ్ కాలమ్దు రొడ్డెజాణిజ్ గుడిస తొప్పారెబానె మంజినార్. వరి అన్నిసిర్ ఇస్టయేలు లోకుర్ నలవయ్ పంటిజ్ పయంం కిజి మహివలె గుడుసాదు మహిదన్నివందిజ్ ఎత్తుకిజి యూదురు యా పండ్రెయ్ కిజినార్.

18 సొంత అతికారమ్దాన్ నెన్పిసినికాన్ ఎయెన్బా వన్నిజ్ గవరం వాదెజె నెన్పిస్సాన్. గాని వన్నిజ్ పోక్తి వన్నిజ్ గవరం వాదెజ్ ఇజి కోరిజినికాన్ నిజామాతికాన్. వన్ని లొఇ ఇనితప్పబా సిల్లెద్.

19 దేవుణు మోసెజ్ సత్తి రూలుజ్ వాండ్రు మిజి సితాన్ గదె? గాని మీ లొఇ ఒరెన్బా ఆ రూలుజు వజ నడెఇదెర్. మీరు ఎందానిజ్ నజి సప్తెజ్ సుడెజినిదెర్?”, ఇజి వెప్టోన్.

20 అయావలె మందలోకుర్, “నిజి దెయం అస్తాద్. ఎయెర్ నిజి సప్తెజ్ సుడెజినార్?”, ఇజి మర్జి వెప్టోన్.

21 యేసు పరిజ్ వెప్టోన్, “నాను బమ్మాతి ఉండ్రీ పణి కిత. మీరు విజిదెరె నండో బమ్మ అతిదెర్.

22 మీరు సునతి కిదెజ్ ఇజి మోసె మిజి రూలు సిత మనాన్. అందెజె మీరు కొడెడిజ్ విస్త్రాంతి దినమ్దు సునతి కిజినిదెర్. సుడెడు, మోసె ఆవిన్ సునతి మొదొల్స్తాన్, మీ అనిరెన్ అయాక మొదొల్స్తార్.

23 విస్త్రాంతిదినమ్దు ఒరెన్ కొడెడిజ్ సునతి కిజినిదెర్. ఎందానిజ్ ఇహిజు, మోసెజ్ దేవుణు సత్తి రూలుజ్ తప్పెజ్ ఆఎద్ఇజి. అహిజు, నాను ఒరెన్ లోకుదిజ్ విస్త్రాంతి దినమ్దు పూర్తి నెగెణ్ కితి వందిజ్ మీరు ఎందానిజ్నా ముస్కు కోపం ఆజినిదెర్?

24 మీరు ముస్కు తోరజిని దన్నివందిజ్ సుడెజి తీర్పు కిమాట్. గాని నిజమాతికెజ్ సుడెజి తీర్పు కిదు.

యేసు నిజం క్రీస్తునా ఇజి వెన్బాజినార్

25 నస్తివలె నెగొండార్ యెరుసలెమ్దికార్, “వినిజె గదె అతికారిజు సప్తెజ్ సుడెజినిదెర్.

26 ఇవిలోన్ వీండ్రు దయరమ్దాన్ విజెరె ఎద్రు వర్గిజినాన్. గాని వారు వన్నిజ్ ఇనికబా ఇన్ఎర్. వీండ్రు క్రీస్తు ఇజి అతికారిజు నిజమె ఒపుకోటారా?

27 క్రీస్తు వానివలె, వాండ్రు ఎమేణికాన్ ఇజి ఎయెర్బా నెన్ఎర్. గాని వీండ్రు ఎంబెణికాన్ ఇజి మాపు నెస్సామ్”, ఇజి వర్గితార్.

28-29 అందెజె యేసు గుడిః అరుజుదు నేరపిసి మహివలె, ఈహు డటం వెప్టోన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సొంత ఇస్టందాన్ వాతికాన్ ఆఎ. గాని నజి పోక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెన్ఇదెర్. గాని నాను వన్నిజ్ నెస్సు. ఎందనిజ్ ఇహిజు, నాను వన్ని బాణిజ్ వాత మన్న. వాండ్రె నజి పోక్తాన్”, ఇజి.

30 యాకెజ్ వెహారె, వారు వన్నిజ్ అస్తెజ్ సుడెజితార్. గాని ఎయెన్బా వన్నిజ్ అన్ఎతార్. ఎందానిజ్ ఇహిజు, వాండ్రు అస్సి ఆదెజ్ దేవుణు ఏర్పాటు కితి సమయం రెప్పెదె.

31 అహిజ్బా లోకుర్ లొఇ నండొండార్ వన్ని ముస్కు నమకం ఇట్టార్. వారు, “వీండ్రు నండో బమ్మాని పణిజ్ కిత్తాన్. లోకురిజ్ రక్సిస్తెజ్ దేవుణు ఏర్పాటు కితి పోక్తి క్రీస్తు వానివలె, విని ముస్కు మరి నండో బమ్మాని పణిజ్ వాండ్రు కినాండ్రా?”, ఇజి వెప్టోన్.

32 లోకుర్ యేసు వందిజ్ అయాకెజ్ మొరొ ఆజినికెజ్ పరీసయరు వెహార్. నస్తివలె పెరి పుజెరిజు ని పరిసయరు వన్నిజ్ తొప్పి ఒతెజ్ దేవుణు గుడిఃది జమాన్జ పోక్తార్.

33 అందెజె యేసు, “నాను మీ వెట సెగం కాలమ్నె మంజినె. వెన్కా నాను నజీ పోక్తి వన్ని డగ్గు సోన్సిన.

34 మీరు నజీ రెబానిదెర్. గాని తోఇదెర్. నాను మన్ని బాన్ మీరు వాదెజ్ అట్ఇదెర్”, ఇజి వెప్టాన్.

35-36 నస్తివలె యూదురు అతికారుజు, ఒరెన్వెట ఒరెన్, “వీండ్రు మజి తోర్ఎండ ఎంబె సొండ్రెజ్ సుడేజినాన్? వాండ్రు, సెగొండార్ యూదురు మా బాణిజ్ సెద్రిజి బత్తిజిని గ్రీకు పట్టుమాక్ సొనాండ్రా? వాండ్రు యూదురు ఆఇ వరిజ్ నేర్పిస్సాండ్రా? వాండ్రు వెప్పినాన్, “మీరు నజీ రెబానిదెర్. గాని తోఇదెర్. నాను మన్ని బాన్ మీరు వాదెజ్ అట్ఇదెర్’ ఇజి. ఎందానిజ్ వాండ్రు ఆపా వెప్పినాన్?”, ఇజి వర్గితార్.

37 పుండ్రోయ్ కడెవెరి రోజు వాతాద్. కడెవెరి రోజునె ముకెలమాతి ద్రినం. అయా నాండిజి యేసు నిహండ్రె ఈహు డటం వెప్టాన్. “వీమ్కా కట్టికాన్ ఎయెనబా నా డగ్గు రఅ. నాను వన్నిజ్ ఉండెజ్ సీన.

38 దేవుణు మాటదు వెప్టావజ, “నా ముస్కు నమకం ఇడ్డి ఎయెర్ గర్పం దాన్బా, నిజమాతి బత్తు సీని ఏరు సోసి సొనెలె. అయాక ఉండ్రె ఉట సోసి సొని లెకెండె సొనెలె.

39 ఇబ్బె యేసు నిజమాతి బత్తు సీని ఏరు ఇజి వెప్టాక దేవుణు ఆత్మ వందిజె. యా దేవుణు ఆత్మ, యేసు ముస్కు నమకం ఇడ్డి వరిజ్, యేసుజ్ దేవుణు మంజిని బాడిడు ఒతి వెన్కా దోహ్కాన్లె. గాని యేసు యాక వెప్టావలె, దేవుణు వన్ని ఆత్మ వన్నిజ్ నమ్మితి వరిజ్ సివండ్రె. ఎందానిజ్ ఇహిజ, దేవుణు యేసుజ్ వన్ని వెట వన్ని గొప్ప జాయ్దు మండ్రెజ్ దేవుణు మంజిని బాడిడు ఒవిండ్రె.

40 వన్ని మాటెజ్ వెహరె, లోకుర్ లోఇ సెగొండార్, “నిజమె, వీండ్రె మాపు ఎద్రు సుడేజి మహి ప్రవక్త”, ఇజి వెప్టార్.

41 మరి సెగొండార్, “సిల్లె వీండ్రె క్రిస్తు”, ఇహార్. గాని సెగొండార్, “క్రిస్తు ఎలాగ గలీలయదాన్ వానాన్?

42 క్రిస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెల్లెహమ్దాన్ వానాన్, ఇజి దేవుణు మాటదు మనాద్ గదె”, ఇహార్.

43 ఆపా వన్ని వందిజ్ లోకుర్ ఎర్లితార్.

44 సెగొండార్ వన్నిజ్ అస్టెజ్ కోరితార్. గాని ఎయెర్బా వన్నిజ్ అన్వితార్.

45 అందెజె యేసుజ్ అస్టెజ్ వాతి దేవుణు గుడిది జమానుజు మర్జి పెరి పుజెరిజి ని పరిసయురుజ బాన్ సొహార్. వారు జమాన్జ, “మీరు ఎందానిజ్ వన్నిజ్ అసి తెఇదెర్?”, ఇజి వెన్బాతార్.

46 దన్నిజ్ వారు, “వీండ్రు వెప్టా మాటెజ్ లెకెండె ఎయెర్బా ఎసెజ్బా వెహ్విర్”, ఇహార్.

47 పరిసయ్రుజు, “మీరు బా మొసం ఆత్తిదెరా?

48 అతికారిజ లోఇనో పరిసయ్రుజు లోఇనో ఎయెన్బా వన్నిజ్ నమితాండ్రా?

49 గాని యా మంద లోకుర్ దేవుణు మోసెజ్ సిత్తి రూలుజ్ నెన్ఎర్. అందెజె వరిజ్ దేవుణు సాయెవ్ సీనాన్”, ఇజి వెప్టార్.

50 నికొదిమొస్ ఇనికాన్ ఒరెన్ ముజాలె యేసు డగ్గు సొహ మహాన్. వాండ్రు పరిసయ్రుజు లోఇ మన్నికాన్.

51 నస్తవలె నికొదెము, “మా యూదురి రూలుజ వజ, ఒరెన్ వాండ్రు వెప్పినికెజ్ మాపు ముజాల వెంజి, వాండ్రు కితికెజ్ నెస్తి వెన్కనె వన్ని ముస్సు తీర్పు కిడిజ్ ఆనాద్”, ఇజి వెప్తాన్.

52 అందెజె వారు, “నీను బా గలీలయదాన్ వాతికాండ్రా? నీను దేవుణు మాట బాగ నద్విఅ. ఒరెన్ ప్రవక్తబా గలీలయదాన్ సోవీన్, ఇజి నీను నస్తవలె నెస్తిలె”, ఇజి వెప్తాన్.

53 వెనుక వారు విజెరె వరివరి ఇల్కాజ్ సాహార్.

8

రంకు బూలాజి మహి బోదెల్దిజ్ యేసుడర్పు తసినార్

1 గాని యేసు ఒలివ గొరొత్* సాహాన్.

2 జాయ్ ఆతివెలె మరి వాండ్రు దేవుణు గుడిడిది అరుజుదు వాతాన్. లోకుర్ విజెరె వాజి వన్నిడర్పు కూడితార్. వాండ్రు బస్తాండ్రె వరిజ్ నెన్పిసినాన్.

3-4 నస్తవలె పరిసయరుని యూదురి రూలుజ్ నెస్తిస్సికార్ ఉండ్రె బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎర్దు నిల్వ్రారె యేసుజ్, “బోదెకినికిదా, యా బోదెల్ రంకు బూలాజి మహివలె, మాపు అస్తాప్.

5 మోసె మజి రూలు సితవెలె మజి ఆడ్ర వెప్తాన్, “అహె బూలాని వన్కాజ్ పణకాణిజ్ డెయిజి సప్తెజ్’ ఇజి. గాని నీను ఇనిక వెప్పిని”, ఇజి వెన్బాతార్.

6 వన్ని ముస్సు నేరం మోప్తెజ్ ఇజి వన్నిజ్ సీకుదు అర్పెజ్ అహు వెన్బాతార్. గాని యేసువజితాండ్రె బూమిదు వన్ని డెస్కుదాన్ రాసి మహాన్.

7 వారు మరిమరి వెన్బాజి మహిజ్, వాండ్రు బుర్పెప్తాండ్రె వరిజ్, “మీ లోఇ పాపం కిఇకాన్ ముజాల దన్నిజ్ పణకుదాన్ డెయ్దు”, ఇజి వెప్తాన్.

8 వెప్తాండ్రె వాండ్రు మరి వజ్జి, బూమిదు రాసి మహాన్.

9 గాని వారు యా మాటిజ్ వెహారె, ఒరెన్ వెన్కా ఒరెన్ డిస్త్ సాహార్. ముజాలె పెరికార్ సాహార్. వెన్కా ఇజ్జికార్. అహె విజెరె సాహార్. యేసుని అయా బోదెల్ని బాన్ మహార్. అది నిహిమహిబానె మహాద్.

10 యేసు బుర్పెప్తాండ్రె, దనిజ్, “వారు ఎంబె మనార్? ఎయెర్బా, నిజి తీర్పు సీజి సిక్స సిఎరా?”, ఇజి వెన్బాతాన్.

11 “సిల్లె బాబు”, ఇహాద్ అది. అందెజె యేసు, “అహిజ, నానుబా, నిజి తీర్పు సీజి సిక్స సిఎ. సాన్అ. ఏలుదాన్ మరి పాపం కిమా”, ఇహాన్.

యేసు లోకమ్ది లోకురిజ్ జాయ్

12 మరి, యేసు లోకురిజ్ వెప్పిని, “నానె లోకమ్ది లోకురిజ్ జాయ్. నా సిసూ ఆనికాన్ ఎయెన్బా సీకటుదు మన్ఎన్. గాని వన్నిజ్ బత్కు సీని జాయ్ మంజినాద్’.

13 నస్తవలె పరిసయరు వన్నిజ్, “నీనె నీ వందిజ్ సాక్సి వెప్పిని, మరి ఎయెర్బా అయాక నిజం ఇజి వెహాండ. అందెజె నీ సాక్సమ్దిజ్ నిజం సిల్లెద్”, ఇజి వెప్తాన్.

14 అందెజె యేసు వెప్తాన్, “నానె నా వందిజ్ సాక్సి వెప్పిని. అహిజ్బా నాను వెప్తా సాక్సి నిజమ్నె. ఎందానిజ్ ఇహిజ, నాను ఎమెణాజ్ వాత, ఎంబె సాన్సిన ఇజి నాను నెస్త్. గాని మీరు నెన్ఇదెర్ నాను ఎమెణాజ్ వాత ఎంబె సాన్సిన ఇజి.

* 8:1 8:1 అయా గొరొత్ ఒలివ మరెక్ నండొ మన్నె అందెజె ఒలివ గొరొన్ ఇనార్

15 మీరు లోకుర్ సుడఃజనికెక్ సుడఃజి తీర్పు సీజనిదెర్. గాని నాను అయాలెకెండ్ ఎయెరిజ్బా తీర్పు సివీ.

16 నాను తీర్పు సీతిజ్బా నాను సిత్తి తీర్పు నిజమ్నె. ఎండానిజ్ ఇహిజ, నాను ఒరెనె ఆవి తీర్పు సీజన. నజీ పోక్తి బుబ్బు నా వెట మనాన్.

17 దేవుణు మోసెజ్ సిత్తి మీ రూలుజ్దు రాస్త మనాద్, 'రివీర్ వెహ్నిని సాసి ఉండ్రె లెకెండ్ మహిజ, అయాక నిజం ఇజి'.

18 నానె నా వందిజ్ సాక్కి వెహ్నిన. మరి నజీ పోక్తి నా బుబ్బు బా నా వందిజ్ సాసి వెహ్నినాన్".

19 నస్తివలె వారు వన్నిజ్, "ఎంబె నీ బుబ్బు మనాన్?", ఇజి వెన్బాతార్. దన్నిజ్ యేసు", మీరు నజీ నెన్ఇదెర్. నా బుబ్బెజ్ నెన్ఇదెర్. మీరు నజీ నెస్సికిహిజ, నా బుబ్బెజ్బా నెస్తిదెర్ మరి", ఇజి వెహ్నాన్.

20 వాండ్రు యా మాటెజ్ దేవుణు గుడిఃదు సంత అర్ప్పి పెటెజ్ ఇడ్డిబాన్ మంజి నెన్పిసి మహివలె వెహ్నాన్. గాని ఎయెన్బా వన్నిజ్ అన్వితార్. ఎండానిజ్ ఇహిజ, వన్నిజ్ అస్తెజ్ దేవుణు ఎత్తు కిత్తి సమయం రెవిదె.

21 మరి యేసు వరిజ్, "నాను సొనాలె. మీరు నజీ రెబానిదెర్. మీరు పాపమ్కు కిజి మంజినె సానిదెర్. నాను సాని బాడిఃదు మీరు వాదెజ్ అట్ఇదెర్", ఇజి వెహ్నాన్.

22 అందెజె యూదురు ఒరెన్ వెట ఒరెన్, "వన్నిజ్ వాండ్రె సపె ఆనాండ్రా? వాండ్రు వెహ్నినాన్ గదె నాను సాని బాడిఃదు మీరు వాదెజ్ అట్ఇదెర్ ఇజి', ఇజి వర్గితార్.

23 యేసు వరిజ్ ఈహు వెహ్నాన్: "మీరు ఇబ్బె యా లోకమ్దికిదెర్. గాని నాను మున్కు దేవుణు మంజిని బాడిదికాన్. మీరు యా లోకమ్దికిదెర్. నాను ఇబ్బెణికాన్ ఆవె.

24 నాను మిజి వెహ్నా మన్ను మీరు పాపం కిజి మంజినె సానిదెర్ ఇజి. నాను ఎయెన్ ఇజి వెహ్నినానొ, నానె వాండ్రు ఇజి మీరు నమ్మిఎండ మహిజ, మీరు నిజమ్నె పాపమ్దు మంజినె సానిదెర్".

25 వారు వన్నిజ్, "నీను ఎయెన్?", ఇజి వెన్బాతార్. 'నాను ఎయెన్ ఇజి మొదోహానె వెహ్నా మనానో, నానె వాండ్రు', ఇహాన్.

26 యేసు మరి వెహ్నాన్ "మీ వందిజ్ నండొ వెహ్నెజ్ నజీ మనాద్. మీ మున్కు నండొ తీర్పుజ్బా మనాద్. గాని నజీ పోక్తాన్ నిజామాతికాన్. వాండ్రు నజీ వెహ్ని నజతిజ్నె నాను లోకమ్ది లోకురిజ్ వెహ్నిన.

27 వాండ్రు దేవుణు మంజిని బాడిఃదు మన్ని వన్ని బుబ్బు వందిజె వరిజ్ వెహ్నినాన్ ఇజి వారు అర్థం కివితార్.

28 అందెజె యేసు వరిజ్, "మీరు లోకు మరిసి ఆతి నజీ నిలువాదు సప్పివెలె, మీరు నస్తిదెర్, నాను ఎయెన్ ఇజి. మరి, నాను నా సొంత అతికారం దాన్ ఇనికబా కివె. గాని నా బుబ్బు నజీ నెన్పిస్తివజినె నాను వెహ్నిన, ఇజి మీరు నెస్తిదెర్.

29 నజీ పోక్తాన్ నజీ తోడుః మంజినాన్. వాండ్రు నజీ ఒరెన్ వన్నిజ్ డిఃన్వితాన్. ఎండానిజ్ ఇహిజ వన్నిజ్ ఇస్టం వాతికెజె నాను ఎస్తివలెబా కిజిన", ఇజి వెహ్నాన్.

30 వాండ్రు యా మాటెజ్ వెహ్నివలె నండొండార్ వన్ని మున్కు నమకం ఇడ్డార్.

అబ్రాహాము కొడొర్

31 వన్ని మున్కు నమకం ఇడ్డి యూదురిజ్ వాండ్రు వెహ్నాన్, "నాను వెహ్ని మాటెజ్ లోజిజి మహిజ, మీరు నిజమ్నె నా సిసూర్ ఆనిదెర్.

32 నస్తవలె మీరు దేవుణు వందిజ్ నిజమాతికెజ్ నెస్సిదెర్. అయాక మిజి పాపమ్కాణిజ్ డిఃన్పిస్సాద్”.

33 వారు వన్నిజ్, “మాపు అబ్రాహము తెగ్గదు పుట్టికావ్. మాపు ఎసెజ్బా ఎయె అడిఃగి వెట్టివణి మణిసిర్ లెకెండ్ మన్ఎవె. నస్తవలె ‘మీరు డిఃబె ఆనిదెర్’, ఇజి ఎలాగ వెహ్సాని”, ఇజి వెహ్సార్.

34 అందెజె యేసు, “ఒరెన్ వెట్టివణి కినికాన్, ఎలాగ తోహా ఆతి మన్ని వజ ఎజమాని అడిఃగి మంజి నాండ్రో, అయాలెకెండ్ పాపం కిని విజెరె పాపమ్దిజ్ అడిఃగి తోహా ఆతి లెకెండ్ మంజినాన్.

35 ఒరెన్ వెట్టివణి కినికాన్ అక్కు మన్ని వన్ని లెకెండ్ ఎలాకాలం అయా ఇండ్రో మండ్రెజ్ అట్ఎన్. గాని అయా ఇండ్రోణి మరిసిజ్ ఎలాకాలం అయా ఇండ్రో అక్కు మంజినాద్.

36 అందెజె దేవుణు మరిసి మిజి తోహా ఆతి బాణిజ్ డిఃన్పిస్తిజ, మీరు నిజమ్నె డిఃబెఆనిదెర్.

37 నాను నెస్సు మీరు అబ్రాహము తెగ్గాతికిదెర్ ఇజి. గాని మీరు నజి సప్తెజ్ సుండఃజినిదెర్. ఎందానిజ్ ఇహిజ నాను వెహ్సాని మాటెజ్ మిజి పడిఃఉ.

38 నా బుబ్బు నజి తోరిస్తికెజ్ నాను వెహ్సాన. గాని మీరు మీ బుబ్బు వెహ్సానికెజ్ కిజినిదెర్”, ఇజి వెహ్సాన్.

39 నస్తవలె వారు, “అబ్రాహమునె మా బుబ్బు”, ఇజి వెహ్సార్.

40 “మీరు అబ్రాహము కొడోఃర్ ఇహిజ, మీరు అబ్రాహము కితి పణిజ్నె కితిదెర్ మరి. దేవుణు బాణిజ్ నాను వెహికెజె మిజి వెహ్సాజ్ నాను ఎసెజ్బా సుండఃత. గాని మీరు నజి సప్తెజ్ సుండఃజినిదెర్. అబ్రాహము యా లెకెండ్ ఇనికబా కిఎన్.

41 మీ బుబ్బు కిజినికెజె మీరు బా కిజినిదెర్”, ఇజి వెహ్సాన్. అయావలె వారు, “మాపు అప్పొసి వెటె పుట్టికావె. దేవుణు ఒరెండ్రె మా బుబ్బు”, ఇహార్.

42 అందెజె యేసు వరిజ్ ఈహు వెహ్సాన్: “దేవుణునె మీ బుబ్బు ఇహిజ, మీరు నజి ప్రేమిస్తిదెర్ మరి. ఎందానిజ్ ఇహిజ, నాను దేవుణు బాణిజ్ వాత. నాను యేలు ఇబ్బు మన్ను. నాను నా సొంత ఇస్టమ్దాన్ రెవిత. గాని వాండ్రు నజి పోక్తాన్.

43 ఎందానిజ్ నాను వెహ్సాని మాటెజ్ మీరు అర్థం కిఇదెర్? ఎందానిజ్ ఇహిజ, నాను వెహ్సాని మాటెజ్ వెండ్రెజ్ మీరు కెఇదెర్.

44 మీ బుబ్బు నయ్తానె. మీరు వన్ని కొడోఃర్. మీరు వన్నిజ్ ఇస్టం ఆతికెజ్ కిదెజ్ కోరిజినిదెర్. మొదోహాన్ అసి వాండ్రు సప్పికాన్. వాండ్రు నిజమాతి బాడిఃదు నిల్ఎన్. ఎందానిజ్ ఇహిజ, వన్ని లోఇ నిజమాతికెజ్ సిల్లు. వాండ్రు అబద్దం వర్గినివలె, వన్ని సొంత బుద్దిదాజె వర్గిజినాన్. ఎందానిజ్ ఇహిజ, వాండ్రు అబద్దం వర్గినికాన్. అబద్దం వర్గిని వరి అపొసి.

45 గాని నాను దేవుణు వందిజ్ నిజమాతికెజ్ వెహ్సాన. అందెజె మీరు నజి నెన్ఇదెర్.

46 మీ లోఇ ఎయెన్బా నాను తపు కితికాన్ ఇజి రుజువ్ కిదెజ్ అట్నాండ్రా? నాను నిజమాతికెజ్ వెహ్సాజ, ఎందానిజ్ మీరు నజి నమిఇదెర్.

47 దేవుణు కొడోఃర్ ఆతికార్ వన్ని మాటెజ్ వెనార్. మీరు దేవుణు కొడోఃర్ ఆఇదెర్. అందెజె నా మాటెజ్ వెన్ఇదెర్”.

48 నస్తవలె యూదురు వన్నిజ్, “నీను సమరియదికి, నిజి దెయం అస్తాద్ ఇజి మాపు వెహ్సాని మాటదు తపు ఇనికబా మనాదా?”, ఇహార్.

49 నజీ దెయం అన్వద్. నాను నా బుబ్బెజ్ గవరం సీజిన. గాని మీరు నజీ కరాయి ఇజినెదెర్.

50 నాను నా వందిజ్ గవరం అన్పె ఆదెజ్ సుడేఱె. గాని అయాకెజ్ సుడేఱెనాన్ ఒరెన్ మనాన్. వాండ్రె నా వందిజ్ నాయమ్దాన్ తీర్పు సీజినెకాన్.

51 నా మాటెజవజ బత్తినెకాన్ ఎయెన్బా సావన్, ఇజి నాను నిజం మీ వెట వెప్పిన”, ఇజి మర్జి వెప్టాన్.

52 అయావలె యూదురు, “ఏలు మాపు నెస్సాప్ నీను దెయం అస్తికి ఇజి. అబ్రాహము సాతాన్. అయా లెకెండ్ ప్రవక్తరుబా సాతార్. గాని నీను వెప్పినె, ‘నా మాటెజ వజ బత్తినెకాన్ ఎయెన్బా సావన్’, ఇజి.

53 నీను మా బుబ్బె ఆతి అబ్రాహము ఇంక పెరికిదా? వాండ్రు సాతాన్. అయా లెకెండ్ ప్రవక్తరు బా సాతార్. నీను ఎయెన్ ఇజి నీను ఒడేఱెబిజినె?”, ఇజి వెప్టాన్.

54 అందెజె యేసు, “నానె నజీ పొగ్డిఱెతిజ దనిజ్ ఏలువ సిల్లెద్. గాని నజీ పొగ్డిఱెనికాన్నా బుబ్బెనె. వన్నిజె మీరు, మా దేవుణు ఇజి వెప్పినెదెర్.

55 మీరు వన్నిజ్ నెన్ఇదెర్. గాని నాను వన్నిజ్ నెన్ను. నాను వన్నిజ్ నెన్వ ఇజి వెప్పెజ, మీ లెకెండ్ ఒరెన్ అబద్దం వర్గినెకాన్ ఆత మరి. గాని నాను వన్నిజ్ నెన్ను. వన్నిమాటెజ వజ బత్తినె.

56 మీ బుబ్బెతి అబ్రాహము, నాను వాని దినం సుడేఱెజ్ అట్టు ఇజి సర్ద ఆతాన్. వాండ్రు అయా దినం సుడేఱెతాండ్రె సర్ద ఆతాన్”, ఇజి వెప్టాన్.

57 నిజీ ఏలు యాబయ్ పంటెజ్బా సిల్లు. నీను అబహమ్ముజ్ సుడేఱెతిదా?”, ఇజి యూదురు వన్నిజ్ వెప్టాన్.

58 అందెజె యేసు, “అబ్రాహము పుట్టెండ్ ముజాలె నాను మన్ను ఇజి నిజం మీ వెట వెప్పిన”, ఇజి వెప్టాన్.

59 యాక వెప్పెజ్, వారు వన్నిజ్ డెయ్దెజ్ పణుకు పెప్టాన్. గాని వాండ్రు డాఱెతాండ్రె గుడిఱెదాన్ సాహాన్.

9

పుట్టెవలెహాన్ అసి గుడ్డి ఆతివన్నిజ్ నెగెండ్ కిజినాన్

1 యేసు సొన్ని మహివలె, పుట్టిబాణిజ్ అసి గుడ్డి ఆతి ఒరెన్వన్నిజ్ సుడేఱెతాన్.

2 నస్తెవలె వన్నిసినూర్ వన్నిజ్, “బోదకినికి, ఎయెర్ పాపం కితిజ్ వీండ్రు గుడ్డిదాన్ పుట్టాన్? వీండ్రునా విన్ని అయ్సి అప్పొసిర్నా?”, ఇజి వెన్బాతార్.

3 అందెజె యేసు, “వీండ్రు పాపం కితిజ్ ఆవద్, విన్ని అయ్సి అప్పొసిర్ పాపం కితిజ్ ఆవద్. గాని దేవుణు ఒరెండ్రె కిదిజ్ అట్టి పణి వినిలోఇ సుడేఱెజె వీండ్రు గుడ్డి ఆతాండ్రె పుట్టాన్.

4 వేడె మనివలె, మాటు నజీ పొక్తివన్ని పణి కిదెజ్వలె. సీకట్ బేగి ఆనాద్. అయావలె ఎయెర్బా ఇనికబా కిదెజ్ అట్వెర్.

5 నాను యా లోకమ్దు మనివలె, యా లోకమ్దివరిజ్ జాయ్లెకెండ్ మన”, ఇజి వెప్టాన్.

6 వెప్టాండ్రె, వాండ్రు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ద గుడిఱె వన్ని కణకెజ మున్ను రాస్తాన్.

7 రాస్తాండ్రె, “నీను సొన్ని సిలోయొము ఇన్ని గుమ్మిదు కణుకు నొరె ఆఅ”, ఇజి వెహ్లాన్. (సిలోయొము ఇన్ని మాటదెజ్ పోక్తికాన్ ఇజినె అర్లం) వాండ్రు సొహాండ్రె నొరె ఆతాన్. వన్ని కణుకు నెగెణ్ఆతె. వాండ్రు మరజి వాతాన్.

8 అయావలె వన్ని పడకాదికారని వాండ్రు ముజాలె లొన్పానిక సుడిఱితి మహికార్ వెన్బాతార్, “వీండ్రు అబ్బె బసి లొసి మహికాన్గదె”, ఇజి.

9 సెగొండార్, “వీండ్రె”, ఇజి. మరి సెగొండార్, “సిలె, వినిలెకెండె మన్ని మరి ఒరెనె”, ఇహార్. గాని వాండ్రు, “నానె లొన్పాజి మహికాన్”, ఇజి వెహ్లాన్.

10 అయావలె వారు, “నీ కణుకు ఎలాగ రెకె ఆతె?”, ఇజి వెన్బాతార్.

11 అందెజె వాండ్రు, “యేసు ఇజి కూక్కి ఒరెన్బుర్ద కితాండ్రె నా కణకెజి ముస్సు రాస్తాన్. సిలోయొము ఇన్ని గుమ్మిదు సొన్ని నొరె ఆఅ, ఇహాన్. అందెజె నాను సొన్ని నొరె ఆత్తిజ్నాను సుడిఱెజ్ అట్ట”, ఇహాన్.

12 “ఎంబె మనాన్ అయా వాండ్రు”, ఇజి వారు వెన్బాతార్. “ఏమొ నాను నెన్ఏ”, ఇహాన్ వాండ్రు.

13 ముజాల గుడ్డిదాన్ మహివన్నిజ్ వారు పరిసయరుజు డగ్రు తత్తార్.

14 ఉండ్రె విస్తాంతి నాండిజె, యేసు బుర్ద కితాండ్రె అయా వన్ని కణుకు నెగెణ్ కితాన్.

15 పరిసయరు బా నీను ఎలాగ బేస్తెజ్ అట్టి ఇజి వెన్బాతార్. వాండ్రు, “అయా వాండ్రు నా కణుకు ముస్సు బుర్ద రాస్తాన్. నాను నొరెబాత. ఏలు నాను బేసిన”, ఇహాన్.

16 అందెజె సెగొండార్ పరిసయరు, “యా వాండ్రు దేవుణు బాణిజ్వాతికాన్ఆఎన్. ఎండానిజ్ ఇహిజ, విస్తాంతిదినమ్దు అహు కిజి వాండ్రు రూలుజ్ తప్పినాన్”, ఇహార్. గాని మరి సెగొండార్, “ఒరెన్పాపం కిజినికాన్ ఎలాగ నిసా బమ్మాని పణిజ్ కిదెజ్ అట్టాన్”, ఇహార్. ఆహె వారు కేటిజ్ ఆతార్.

17 అందెజె పరిసయరు మరి అయా గుడిదాన్ మహి వన్నిజ్, “వాండ్రు నీ కణుకునె రేక్తాన్. అందెజె నీను వన్ని వందెజ్ ఇన్నిక వెహ్లాని”, ఇజి వెన్బాతార్. దనిజ్ వాండ్రు, “వాండ్రు ఒరెన్ ప్రవక్త”, ఇహాన్.

18 యా యూదురు అదికారిజు, వీండ్రు గుడిదాన్ మహాన్. వీండ్రు ఏలు రెకె ఆతండ్రె బేసినాన్ ఇజి నమ్మివితార్. అందెజె వారు వన్ని అయిసి అపొనిజ్ రపిస్తార్.

19 రపిస్తారె వరిజ్, “వీండ్రు మీ మరీనా? వీండ్రునా గుడిదాన్పుట్టాన్ఇజి మీరు వెహ్లానిదెర్. అహిజ, ఏలు వాండ్రు ఎలాగ బేసినాన్?”, ఇజి వరిజ్ వెన్బాతార్. అహు వెన్బాని దాక, వాండ్రు గుడిదాన్ మహాన్. వాండ్రు నెగెణ్ఆతాండ్రె బేసినాన్ ఇజి నమ్మివితార్.

20 వన్ని అయిసి అపొనిర్ వెహ్లార్, “వీండ్రు మా మర్రిన్, ఇజి మాపు నెస్సాప్. వీండ్రు గుడిఱి దాన్పుట్టాన్ఇజి బా నెస్సాప్.

21 గాని ఏలు వాండ్రు ఎలాగ బేసినాన్ ఎయెన్వన్ని కణుకు రెక్తాన్ఇన్నిక మాపు నెన్ఎవ్. వాండ్రు బుద్ధి వాతికాన్గదె. వన్నిజ్వెన్బాదు. వాండ్రు వన్నిజ్జర్లిక వెహ్లాన్”, ఇజి వెహ్లార్.

22 వన్ని అయిసి అపొనిర్ ఆహె వెహ్లార్. ఎండానిజ్ ఇహిజ వారు యూదురి అదికారిజు తియెల్ ఆతార్. యా యూదురు ఉండ్రె తిరుమానం కిత మహార్. ఎయెన్బా యేసు క్రీస్తు ఇజి ఒప్పుకొటిజి వన్నిజ్యుదురి మీటిజ్ ఇండ్రెదాన్ వెల్లి కిదెజ్ ఇజి.

23 అందెజె వన్ని అయ్సి అప్పొసిర్, వాండ్రు బుద్ది వాతికాన్గదె, వన్నిజ్ వెన్బాదు”, ఇజి వెహ్టార్.

24 అందెజె యూదురు అతికారిబు మరిబా గుడిదాన్మహి వన్నిజ్ కుక్పిస్తారె. కుక్పిస్తారె, “నీను దేవుణుదిజ్ పొగిడిజి వెహ్అ. నిజి నెగెణ్ కితాన్ ఇజి నీను వెహ్సిని యా వాండ్రు పాపం కిజినికాన్ ఇజి మాపు నెసినాప్”, ఇహార్.

25 నస్తవలె వాండ్రు, “వాండ్రు పాపం కిజినికానొ సిలెనొ ఇజి నాను నెన్ఏ. ఉండ్రీ నాను నెన్ను. నాను గుడిదాన్ మహా. ఏలు నాను బేసిన”, ఇజి వెహ్టార్.

26 వారు వన్నిజ్, “వాండ్రు నిజి ఇనిక కితాన్? వాండ్రు ఎలాగ నీ కణుకు రెక్తాన్?”, ఇజి వెన్బాతార్.

27 అందెజె వాండ్రు, నాను ముజాలె మిజి వెహ్టా మన. గాని మీరు విన్ఇదెర్. ఎందానిజ్ మీరు మరిబా విండ్రెజ్? మీరుబా వన్ని సిసూర్ఆదెజ్ కోరిజినిదెరా?”, ఇజి వెహ్టార్.

28 “నీను బా వన్ని సిసూనె. మాపు మోసె సిసూర్జ.

29 దేవుణు మోసెవెటె వర్గితాన్ ఇజి మాపు నెసినాప్. గాని అయా వాండ్రు ఎమేణికాన్ ఇజి మాపు నెన్ఏప్”, ఇజి వారు వన్నిజ్నండొ దూసిస్తారె.

30 అందెజె వాండ్రు ఈహు వెహ్టాన్, “అబ్బు గొప్ప పణి యాక! వాండ్రు ఎమేణికాన్ ఇజి మీరు నెన్ఇదెర్ గాని వాండ్రు నా కణుకు రెక్తాన్.

31 దేవుణు పాపం కినివరి మొరొ విన్ఏప్ ఇజి మాటు నెస్సాట్. వన్నిజ్ గవరం సీజి వన్నిజ్ ఇస్తం ఆతి పణిజ్ కిని వరి మొరొ వాండ్రు వినాన్.

32 యాయ పొటలొఇహానె గుడిదాన్ మహివన్ని కణుకు ఎయెన్బా ఎసెజ్బా రెక్తిక విన్ఏప్.

33 నా కణుకు రేక్తి యా వాండ్రు దేవుణు బాణిజ్వాతికాన్ ఆవ్ఇహిజి నజీ నెగెణ్కిదెజ్అట్వితాన్మరి”.

34 దన్నిజ్ వారు, “నీను పాపమ్దానె పుట్టికి. ఏలు మజీ నెన్ఏస్టెజ్ వాజినిదా?”, ఇజి వెహ్టారె వన్నిజ్వెల్లి కితార్.

35 అయా గుడ్డిదాన్ మహివన్నిజ్ పరిసయ్రు వెల్లి కితార్ ఇజి యేసు విహాన్. వాండ్రు వన్నిజ్ సుడెతివెలె, “నీను లోకు మరిసిజ్ నమిజినిదా?”, ఇజి వెన్బాతాన్.

36 వెన్బాతిజ్ వాండ్రు, “బాబు నాను వన్నిజ్ నమిదెజ్ వాండ్రు ఎయెన్ ఇజి నజీ వెహ్అ”, ఇహాన్.

37 అయావలె ఏలు, “నీను యేలు వన్నిజ్సుడెతి మన్ని. వాండ్రె నీ వెటె వర్గిజినికాన్”, ఇజి వెహ్టాన్.

38 నస్తవలె వాండ్రు, “ప్రబువా, నాను నిజి నమిజిని”, ఇహండ్రె యేసు పాదమ్కాజ్ ముణుకుజ్ ఊర్జి మాడిస్తాన్.

39 అందెజె యేసు, “నాను లోకురిజ్కెటె కిదెజె వాత మన. గుడివారు బేస్టెజ్ బేస్సికార్ గుడి: ఆదెజ్ నాను వాత మన”, ఇహాన్.

40 నస్తవలె వన్నిజ్గురు నిహి మహి సెగెండార్ పరిసయ్రు వాండ్రు వెహ్సినిక విహార్. విహారె, “ఇనిక? మాపు బా గుడిదికాపా?”, ఇజి వెన్బాతార్.

41 అందెజె యేసు, “మీరు గుడి:దికిదెర్ ఇహిజి, దేవుణు మీ పాపమ్కు లెక్క కివితాన్ మరి. గాని ‘మాపు సుడెజినివాప్’ ఇజి మీరు వెహ్సినిదెర్. అందెజె మీ లొఇ పాపమ్కు నిహె మనె”, ఇజి వెహ్టాన్.

10

1 “గొర్రెజు సాలదు, సరిదాన్ డుగ్గవండ, ఆజు సరిదాన్ డుగ్గికాన్ డొజారి కజరి ఆత మనాన్.

2 గాని సరిదాన్ డుగ్గికాన్ గొర్రెజ్ గవుడుయెన్.

3 సాలదిజ్ రెయ్ కావ్ కినికాన్, వన్నివందిజ్ సేప్లా రేనాన్. గొర్రెజ్ వన్నికంటం వెన్నె. వాండ్రు వన్నిసొంత గొర్రెజు పేరు అసి కూక్కి వన్కాజ్ వెల్లి సోప్పాన్.

4 వన్ని సొంతవనకాజ్ విజు వెల్లి సోప్తి వెనుక, గొర్రెజు ముజాల వాండ్రు నడిసాన్. గొర్రెజ్ వన్ని కంటం నెన్నె. అందెజె అవి వన్నివెట సానె.

5 గాని నెన్ ఇవన్ని కంటం అవి నెన్ ఉ. అందెజె వన్నివెట సాన్ వండ, అవి వన్నిబాణిజ్ ఉహ్ క్చె, ఇజు నాను నిజం మీవెట వెప్పిన్.

6 యేసు అబ్బె నిహిమహివరిజ్ కతవజు యాక నెన్ పిస్తాన్. గాని వారు వాండ్రు వెప్పినిదనిజ్ అర్దం కివితార్.

7 అందెజె వాండ్రు మరి వరివెట ఈహు వెప్తాన్: “నాను నిజం మీవెట వెప్పిన్, నానె గొర్రెజ్ సరిలెకెండ్ మన్ను.

8 నా ముజాల వాతికార్ విజెరెబా డొజారి కజరి ఆత మనార్. గాని గొర్రెజ్ వరిజ్ విన్ ఉతె.

9 నాను దేవుణుడగు సొండ్రెజ్ సరిలెకెండ్ మన్ను. నా వెట డుగ్గికాన్ ఎయెన్ బా నెగ్రెండ మంజినాన్. వాండ్రు లోఇ సొన్ని వెల్లి వాజు మేత మేజు మంజినాన్.

10 డొజారి డొజు కిదెజ్ నో, సప్తెజ్ నో పాడు కిదెజ్ నో వానాన్. మరి ఇన్నిదనిజ్ బా రెవన్. నాను నజి వెనివరిజ్ దేవుణువెట ఎలాకాలం బత్కిని బత్కు సీని వందిజె వాత మన్ను. అయాక పూర్తి సీని వందిజె వాత మన్.

11 నాను గొర్రెజు నెగ్గి గవుడుయెన్. నెగ్గి గవుడుయెన్ గొర్రెజు వందిజ్ వన్ని పాణం సీనాన్.

12 జీతం వందిజ్ గొర్రెజ్ అడిజునికాన్ గవుడుయెన్ ఆవన్. అక్కెజ్ వన్ని సొంతగొర్రెజ్ ఆఉ. అందెజె దుమార్ గొండి వాజునిక సుడెజు గొర్రెజుడిసి ఉహ్ కాన్. అయావలె దుమార్ గొండి వన్కాజ్ అసి నెద్దిస్తాద్.

13 వాండ్రు జీతం వందిజ్ అడిజునాన్. గొర్రెజు ముస్కు వన్నిజ్ బాజుత సిల్లెద్. అందెజె వాండ్రు డిఃన్న ఉహ్ కాన్.

14-15 నాను గొర్రెజు నెగ్గి గవుడుయెన్. బుబ్బు నజి ఎలాగ నెసినాండ్రొ, నాను బుబ్బెజ్ ఎలాగ నెసినానో, అయావజు నాను గొర్రెజు నెసిన. నా గొర్రెజ్ నజి నెసినె. నాను గొర్రెజువందిజ్ నా పాణం సీజున.

16 యా మందదు మనికెజ్ ఆవండ, మరి సెగం గొర్రెజు నజి మన్నె. వన్కాజ్ బా నాను పేర్ జు తత్తెజ్ వెలె. అవి నా కంటం వినె. అయావలె మంద ఉండ్రె ఆనాద్. గవుడుయెన్ ఒరెన్ ఆనాన్.

17 నాను మర్ జు బత్కినివందిజె, నా పాణం సీజున. అందెజె నా బుబ్బు నజి ప్రేమిస్తాన్.

18 ఎయెన్ బా నా పాణం నా బాణిజ్ లాగ్ వన్. నా సొంత ఇస్టమ్ దానె నా పాణం సీజున. నా పాణం సీదెజ్ నజి అతికారం మనాద్. మర్ జు లాగె ఆదెజ్ బా నజి అతికారం మనాద్. యా లెకెండ్ కిదెజ్ ఇజునె నా బుబ్బు నజి ఆడ్రు సిత్రమనాన్”.

19 వాండ్రు వెప్తి యా మాటెజువందిజె, యూదురు లోఇ ఉండ్రె ఇజు గొడెబు పుట్టాద్

20 వరి లోక నండ్రిండార్, “వీండ్రు దెయం అస్తికాన్, వెరి వాండ్రు, విన్నిమాట ఎందానిజ్ వెంజినిదెర్”, ఇజి వెప్టార్.

21 మరి సెగొండార్, “దెయం అస్తికాన్ ఒరెన్ యాలెకెండ్ వర్లివన్. దెయం గుడిఃదివరిజ్ నెగెండ్ కిదెజ్ అట్నాదా?”, ఇజి వెప్టార్.

యూదురు యేసుజ్ నమ్మివర్.

22 అయావలె పిన్నికాలం. యెరూసలెమ్దు యూదురు దేవుణుగుడిఃదు బసి ఆతి దినంవందిజ్ ఎత్తుకిని పండొయ్ కిజినార్*.

23 నస్తివలె యేసు, దేవుణుగుడిఃదు మన్ని సాలొమోను అరుజు ఇజి కూకె ఆని అరుజుదు బూలాజి మహాన్.

24 అయావలె యూదురు వన్ని సుటులం ఆతారె, “ఎసోడ్ రోస్కు నీను మజి టెటాజ్ వెహ్విండ, అనుమానమ్కు ఇడజిని? నీను క్రీస్తు ఇహిజ, మజి తినాజ్ వెహ్అ”, ఇహార్.

25 అందెజె యేసు, నాను మీవెట వెప్టా. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సాసి వెహ్సిని.

26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ ఆఇదెర్.

27 నా గొర్రెజ్ నా కంటం వెంజిని. నాను వన్కాజ్ నెసిని. అవి నావెట వాజిని.

28 నాను వన్కాజ్ ఎలాకాలం దేవుణువెట బత్తిజిని బత్తు సీజిని. అవి ఎసెజ్బా నాసనం ఆఱ. వన్కాజ్ ఎయెన్బా నా కీదాన్ ఒత్తెజ్ అట్వన్.

29 వనకాజ్ నజి సీత్తి నా బుబ్బు విజెరిజ్ ఇంక పెరికాన్. అందెజె ఎయెన్బా వనకాజ్ బుబ్బుకీదాన్ డోజి కిజి ఒత్తెజ్ అట్వన్.

30 నానుని నా బుబ్బు, ఉండ్రె ఆత మనాప్”, ఇజి వెప్టాన్.

31 నస్తివలె, యూదురు వన్నిజ్ మరి డెఃయిదెజ్ ఇజి పణుకు పెప్టార్.

32 గాని యేసు వరిజ్, “నా బుబ్బు సత్తుదాన్ నండొ బమ్మ ఆని పణిజ్కిజి మిజి తోరిస్త మన్ను. వనకలోక ఎమేణి పణి వందిజ్ నజి మీరు పణుకుజాణిజ్ డెఃయినిదెర్?”, ఇజి వెప్టాన్.

33 అందెజె యూదురు, “మాపు పణుకుజాణిజ్ డెఃయిజినిక నీను కిత్తి ఇని నెగ్గి పణిజ్వందిజ్ ఆవద్. గాని నీను ఒరెన్ లోకుఆజి మంజి, నాను దేవుణు ఇజి వెహ్ ఆజి దేవుణుదిజ్ దూసిస్సివందిజ్ మాపు పణుకుజాణిజ్ డెఃయినాప్”, ఇజి వెప్టార్.

34 అందెజె వాండ్రు వరిజ్ ఈహు వెప్టాన్, “మీరు దేవుణుజు’ ఇజి దేవుణునె వెప్టాన్†, ఇజి దేవుణు మాటదు రాస్త మనాద్ గదె?

35 దేవుణు మాటదు వెహ్సినికెజ్ ఎసెజ్బా తప్ఉ. దేవుణు మాట సీత్తి లోకురిజ్, ‘దేవుణుజు’, ఇజి దేవుణు కూక్సినాన్.

36 బుబ్బాతి దేవుణునె నజి వన్ని వందిజ్ కేట కితాండ్రె యా లోకమ్దు పొక్తాన్. అహిజ, ‘నానె దేవుణుమరిసి’ ఇజి నాను వెహ్సివలె దేవుణుదిజ్ దూసిస్సాన్ ఇజి మీరు ఎలాగ వెహ్సినిదెర్.

37 నాను నా బుబ్బు వెప్టా పణికివిండ మహిజ, నజి నమ్మిమాట్.

* 10:22 10:22 యెరునల్లెం గుడిః ముజాల నాసనం కిత్తార్ అయాక మరి తొప్టారె గుడిఃదు పార్దనం కిదెజ్ పూజెజ్ కిదెజ్ మొదొల్స్తారె. అయాకాలం ఒడఃబిజి యూదురు కిని పండొయెన్ యా గుడిఃదు బసి ఆతి దినం వందిజ్ ఎత్తుకిని పండొయెన్. † 10:34 10:34 క్రీస్తన 82:6.

38 గాని నాను కిత్తి అయా పణిజ నమ్మిదు. నజీ నమ్ ఇజ్ బా అయా పణిజ నమ్మిదు. ఎందానిజ్ ఇహిజ, బుబ్బు నావెట కూడేజి మంజినాన్. నాను బుబ్బువెట కూడేజి మంజిన, ఇజి మీరు నెసి అర్థం కిజి మండ్రేజ్”.

39 యాకెజ్ విహారె, మరి వారు వన్నిజ్ అస్తెజ్ సుడేతార. గాని వాండ్రు వరి కీదాన్ తప్రె ఆతాండ్రె సాహాన్.

40 వాండ్రు యొర్దాను గడ్డ అతాహ పడకాద్ మన్ని ఉండ్రె బాడిదు మరిబా సాహాన్. బానె యోహాను బాప్తినం సీజి మహాన్. వాండ్రు బాన్ మహాన్.

41 నండోడార్ వన్నిడగ్రు వాతార్. వారు, “యోహాను ఇని బమ్మాని పణిబాన్ కివితాన్. గాని విని వందిజ్ యోహాను వెప్తా సజతిజ్ విజు నిజమెన”, ఇజి వెప్తార్.

42 అబ్బె నండోడార్ యేసుముస్సు నమకం ఇడ్తార్.

11

సాతి లాజరుజ్ నెక్కినాన్

1-3 బెతానియ ఇన్ని నాటో లాజరు ఇన్నికాన్ ఒరెన్ మనాన్. వన్ని బీబిక్ నె మార్ల మరియ ఇనికెజ్. యా మరియనె యేసు పాదమ్ కాజ్ అతరు ఇన్ని వాసన నూనె వాక్తాదె, దన్నికొప్పదాన్ తెల్తాద్. ఉండ్రె నాండిజ్ లాజరుజ్ జబ్బు వాతాద్. నీరసం లావు ఆతిజ్, వన్ని బీబిక్ యేసుడగ్రు కబ్బు పోక్తె, ‘ప్రబువా, నీను లావు ప్రేమ కిజిని నీకూలాయెన్ నీరసం ఆత మనాన్’, ఇజి.

4 యేసు యా కబ్బు విహండ్రె, “వాండ్రు సావీన్. సానివందిజ్ వాతిక ఆవిద్ యా నీరసం. గాని దేవుణు గొప్ప పెరికాన్ ఇజి లోకురిజ్ తోరిస్తెజ్. ఎందానిజ్ ఇహిజ, దిన్నిదటాన్ దేవుణు మరిసి గొప్పపెరికాన్ ఇజి తోరి ఆదెజ్”, ఇజి వెప్తాన్.

5 యేసు మార్తెజ్, దన్నితజిసి మరియెజ్, లాజరుజ్ లావు ప్రేమిస్తాన్.

6 గాని లాజరు నీరసం లావు ఆతాన్ ఇజి కబ్బు విహిజ్ బా వాండ్రు బేగి సాన్ ఏతాన్. వాండ్రు మహి బాన్ మరి రుండి రోస్సుబా మహాన్.

7 వెనుక వాండ్రు వన్ని సిసూరజ, “రదు, మాటు యూదయ దేసమ్ దు మర్జి సానాట్”, ఇజి వెప్తాన్.

8 అయావలె వారు, “బోదకినికి, యూదురు నిజి పణకాణిజ్ డెయ్ దెజ్ నెగం రోస్సు ముజాల సుడేతార గదె. మరిబా నీను అబ్బె సాండ్రెజ్ సుడేజినిదా?”, ఇహార్.

9 అందెజె యేసు, “వేడకాజ్ పన్నెండు గంటజ్ మనె. సిలె? అందెజె ఒరెన్ వేడె బూలాతిజ, వాండ్రు తోరో ఇడేజి అర్న్. ఎందానిజ్ ఇహిజ, వాండ్రు యా లోకమ్ ది జాయి సుడేజినాన్.

10 గాని వాండ్రు రెయితు బూలాతిజ, వాండ్రు తోరో ఇడేజి అర్నాన్. ఎందనిజ్ ఇహిజ, వన్ని లోఇ జాయి సిల్లెద్”, ఇజి వెప్తాన్.

11 యాక వెప్తాండ్రె, మరి సిసూరిజ్ వెహ్పినాన్, “మా కూలాయెన్ ఆతి లాజరు నిద్రకిజినాన్. వన్నిజ్ నికెజ్ నాను బాన్ సాస్పిన.

12 వన్ని సిసూరు, “ప్రబువా, వాండ్రు నిద్రకిజినాన్ ఇహిజ, వాండ్రు నెగెణ్ ఆనాన్లె”, ఇహార్.

13 లాజరు సాత మనాన్ ఇజి యేసు వెప్తాన్. గాని వన్నిసిసూర్ మాముల్ నిద్రవందిజె వాండ్రు వెహ్పినాన్ ఇజి ఒడిబితార్.

14-15 అందెజె వాండ్రు వరిజ్ తినాజ్ వెహ్లాన్, “లాజరు సాతాన్. అయావలె నాను వన్నివెట మన్విత. అందెజె నాను మీ వందిజ్ సర్ల ఆజిన. ఎందానిజ్ ఇహిజ, మీరు నజీ నమ్మినిదెరె. అందెజె రదు, వన్ని బాన్సానాట్”, ఇజి వెహ్లాన్.

16 నస్తవలె దిదుము ఇజి కూకె ఆని తోమా మహి సినూరిజ్, “రదు మాటు బా సానాట్. వన్నివెట సాదెజ్సానాట్”, ఇహ్లాన్.

17 యేసు వాతివలె, లాజరుజ్ సమాది కిజి నాల్లి దినమ్కు ఆతె ఇజి నెస్తాన్.

18-19 బెతానియ యెరూసలెమ్దాన్ ఎంజు ఇంస్తుమింసు రుండి మయ్లుజ్ దూరం మన్నె. నండొండార్ మార్తెజ్ మరియెజ్ ఓదిస్తెజ్ వాత మహార్. వరి తంబెర్ని సాతి వందిజ్, వారు ఓదిస్తెజ్ వాతార్.

20 యేసువాజినాన్ ఇజి వెహ్లా మాట విహాదె, మార్త ఎద్రు సాహాద్. వన్నిజ్ సుడేదెజ్ అది సాహాద్. గాని మరియు ఇండ్రో బస్త మహాద్.

21 నస్తవలె మార్త యేసుజ్, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్మరి.

22 గాని ఏలుబా నీను దేవుణుదిజ్ ఇనిక లొస్తిజ్బా వాండ్రు నిజీ సీనాన్ ఇజి నాను నెన్న”, ఇజి వెహ్లాద్.

23 అందెజె యేసు, “నీ తంబెర్ని మర్జి నిజ్నాన్లె”, ఇజి వెహ్లాన్.

24 అయావలె అది, “యా లోకమ్దిజ్ కడవెరి దినమ్దు, వాండ్రు మరి బత్తినాన్లె ఇజి నాను నెన్న”, ఇహ్లాద్.

25-26 అందెజె యేసు దనిజ్ ఈహు వెహ్లాన్, “నానె సాతి వరిజ్ నిక్కికాన్. వరిజ్ మరి బత్కు సీనికాన్ నానె. నజీ నమ్మినికాన్ ఎయెన్బా వాండ్రు సాతిజ్బా మరి బత్తికాన్. నజీ నమ్మిజి బత్తిజిని ఎయెన్బా ఎసెజ్బా సావన్. నీను యాకెజ్ నమ్మినిదా?”.

27 అయావలె అది, “ఒబ, నాను నమిజిన, నీనె దేవుణు మరిసి ఆతి క్రిస్తు ఇజి. నీనె యా లోకమ్దు వాదెజ్మన్నికాన్ఇజి దేవుణు వెహ్లాకి”, ఇజి వెహ్లాద్.

28 యాకెజ్ వెహ్లాదె, అది మర్జి సాహాదె, దన్నితజి మరియెజ్కూక్తాదె, “బోద్నిక్సాన్ఇబ్బె మనాన్. నిజీ కూక్సినాన్”, ఇజి గిబ్బి డగ్రు వెహ్లాద్.

29 మరియు యాక విహిజ్, అది గజిబిజి నిజేతాదె, వన్ని డగ్రు సాహాద్.

30 అయావలె యేసు ఇంక ఆ నాటో రెఎండ్రె. మార్త వన్నిజ్ దసూల్ఆత్తి బాడిద్నె మహాన్.

31 మార్తెజ్ ఓదరిసి దనివెట ఇండ్రో మహి యూదురు అది గజిబిజి నిజ్జి సాన్నినిక సుడేతివలె, అది అడేబదెజ్ దూకిదు సాన్నినాన్సు ఇజి దన్నివెనుక సాహార్.

32 యేసు మన్ని బాడిడు మరియు వాతాదె, వన్నిజ్సుడేతాదె, వన్ని పాదమ్కాజ్ అర్తాద్. అర్తాదె, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్మరి”, ఇహ్లాద్.

33 అది అడేబాజినిక యేసు సుడేతాన్. దని వెట వాతి యూదురు బా అడేబాజినిక సుడేతాన్. అయావలె వాండ్రు మన్నుదు బాద ఆతాండ్రె మొకొం డిష్టాన్.

34 “వన్నిజ్ఎంబె ఇడ్డి మన్నిదెర్?”, ఇజి వరిజ్ వెన్బాతాన్. “వాజి సుడేఅ ప్రబువా”, ఇహ్లాద్ వారు.

35 యేసు కనీర్డిష్టాన్

36 అయావలె యూదురు, “సుడేదు వాండ్రు ఎసా వన్నిజ్ప్రేమిస్తాన్”, ఇజి వెహ్లాద్.

37 గాని వరి లోక సెగొండార్, “వీండ్లు గుడిః వరిజ్ నెగెణ్ కితాన్. మరి ఎందనిజ్ లాజరు సావిండ కిదెజ్ అబ్ ఎతాన్”, ఇజి వర్గితార్.

38 అయావలె యేసు నండో బాద ఆతాండ్రె దూకిదు వాతాన్. అయాక ఉండ్రె సాలం. దన్నిముజాల ఉండ్రె పెరి పణుకు ఇడ్డ మహార్.

39 యేసు, “అయా పణుకు లాగ్దు”, ఇజి వెప్టాన్. నస్తవలె సాతివన్ని బీబ్సి మార్త వన్నిజ్, “ప్రబువా, వినిజ్ ముసి నాల్లి రోస్కు ఆజినాద్. అందెజె గొప్ప కంపు ఏలు మంజినాద్లె”, ఇజి వెప్టాన్

40 అందెజె యేసు దనిజ్, “నీను నమ్మితిజు, దేవుణు గొప్ప పెరికాన్ ఇజి నీను నూణిలె ఇజి నాను నిజి వెప్టా గదె?”, ఇజి వెప్టాన్.

41 అందెజె వారు పణుకు లాగితార్. యేసు కణుకు ముస్కు బస్తాండ్రె, “ఓ బా నీను నా పార్లనం వెంజినిజ్ నిజి వందనమ్ కు.

42 నీను ఎస్తవలె బా నజి వెంజినిలె ఇజి నాను నెన్ను. గాని ఇబ్బె నిల్లి మంజిని యా లోకుర్ వందిజ్ నాను నిజి వందనమ్ కు వెప్టా మన. ఎందానిజ్ ఇహిజు, నీనె నజి పొక్తి మన్నికాన్ ఇజి వారు నమిదెజ్”, ఇజి పార్లనం కితాన్.

43 పార్లనం కితాండ్రె, వాండ్రు, “లాజరు వెల్లి రల”, ఇజి డేల్లి డటం వెప్టాన్.

44 అయావలె లాజరు వెల్లి వాతాన్. వన్ని కికు కాల్కు పాతెజాణిజ్ సుటిస్త మహార్. వన్ని మొకొం రూమాలదాన్ తొహ్కాత మహాద్. యేసు వరిజ్, “వన్నిజ్ సుటిస్తి మన్నికెజ్ లాగ్దు. వన్నిజ్ నడినిలెకెండ కిదు”, ఇహాన్.

యేసుజ్ సప్తెజ్ సుడఃజినార్

45 అందెజె మరియెజ్ సుడఃదెజ్ వాతి యూదురు లోక నండొండార్, యేసు కితిక సుడఃతారె, వన్ని ముస్కు నమకం ఇట్టార్.

46 గాని వరి లోక సెగొండార్ వరిసయురుజు డగ్రు సొన్ని, యేసు కితిక వరిజ్ వెప్టాన్.

47 నస్తవలె పెరి పుజెరిజు నీ పరిసయురు, పెద్దల్ జు కూక్ పిస్తారె, “వాండ్రు గొప్ప బమ్మ అని పణిజ్ కిజినాన్? అందెజె మాటు ఇన్నిక కిదెజ్?

48 మాటు వన్నిజ్ యా లెకెండ పణి కిదెజ్ సరి సితిజు, లోకుర్ విజెరె వన్నిజ్ నమినార్. రోమాదికార్ వానారె, మా గుడిః, యూదురు ఆతి మజి విజు నాసనం కినార్”, ఇజి వర్గితార్.

49-50 నస్తవలె వరి లోక కయపా ఇన్నికాన్ ఒరెన్ మహాన్. వాండ్రు అయా ఏంటు విజు పుజెరిజు ముస్కు పెరి పుజెరి. వాండ్రు వరిజ్, “మీరు ఇనికబా నెన్ ఇతిదెర్. రోమాదికార్ మా గుడిః, యూదురు ఆతి మజి పూర్తి నాసనం కినిదని ముస్కు లోకుర్ వందిజ్ ఒరెన్ వాండ్రు సానికాదె మిజి నెగెద్ ఇజి మీరు నెన్ ఇదెరా?”, ఇహాన్.

51-52 వాండ్రు వెప్పిని దని అర్లం వాండ్రె నెన్ ఎతాన్. గాని వాండ్రు ఆ ఏంటు విజు పుజెరిజు ముస్కు పెరి పుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవిండ, సెద్రితి మన్ని దేవుణు కొడొరిజ్ కుడుఃప్పి తసి వరిజ్ ఉండ్రె లోకుర్ కిదెజ్. దినివందిజ్ యేసు సానాన్లె ఇజి వాండ్రు ఎతు కిజి జర్గి ఇ ముజాలె వెప్టాన్.

53 అందెజె అయా నాండిజ్ అసి వన్నిజ్ సప్తెజ్ వారు సుడఃజి మహార్.

54 అందెజె యేసు విజెరె వన్నిజ్ నెన్సిలెకెండ్ బూలావతాన్. గాని వాండ్రు ఎయెర్ మన్ ఇ బాడిః డగ్రు మన్ని ఉండ్రి ప్రాంతమ్దు సోహాన్. అయా ప్రాంతమ్దు మన్ని ఎప్రయెం ఇన్ని ఉండ్రి పట్టుమ్దు వన్ని సిసూర్ వెట వాండ్రు మహాన్.

55 యూదురి పస్కవండోయ్ డగ్రు వాతివలె, నండో ప్రాంతమ్కాణిజ్ నండోండార్ యెరూసలెమ్దు సోహార్. వండోయ్ ముజాల విజెరె సుబ్బరం మనిక ఉండ్రి ఆసారం. అందెజె, వారు సుబ్బరం మన్నివందిజ్ వారు యెరూసలెమ్దు వాతార్.

56 వారు యేసుజ్ రెబాజినె మహార్. వారు దేవుణు గుడిః అరుజుదు నిహి మహివలె, ఒరెన్ వెట ఒరెన్, “ఇన్నిక ఒడ్ఃబిజని? వాండ్రు వండోయ్దిజ్ వానాండ్రా, సెలెనా?”, ఇజి వర్గితార్.

57 గాని పెరి పుజెరిజు ని పరిసయురు ఉండ్రి ఆడ్ర సిత మనార్. ఎయెన్బా యేసు ఎంబె మనాన్ ఇజి నెస్తిజ, వాండ్రు వరిజ్వెహ్తాజ్. ఎండానిజ్ ఇహిజ, వన్నిజ్ అరెస్టు కిడెజ్.

12

1 పస్కవండోయ్ మొదొల్స్తాజ్ ఆరు దినమ్కు మనె. అయావలె, యేసు లాజరు మన్ని బెతానియ ఇని పట్టుమ్దు సోహాన్. యా లాజరుజ్నె యేసుసావుదాన్ బత్కిస్తాన్.

2 అబ్బె వారు యేసువందిజ్ ఉండ్రి వింతు తయార్ కిత్తార్. మార్తన్ వింతుదు నవ్దరణి. బోజనమ్దిజ్ బస్తి మహివరివెట లాజరుబా యేసువెట బస్తాన్.

3 నస్తివలె, మరియు ఉండ్రి సీసాదు మన్ని వాసన నూనె లాగితాదె, యేసు పాదమ్కాజ్ వాక్తాదె దనికొప్పుదాన్ వన్ని పాదమ్కు తెలితాద్. యా వాసన నూనె, నండో కరిద్తిక. యాక జటమాంసి ఇని ఉండ్రి మొకదానె, తయార్ కితిక. అది వాసన నూనె వాక్తివెలె, అయా ఇల్లు విజు నెగ్గి వాసనందాన్ నిండ్రితాద్.

4-5 అయావలె వన్ని సిసూర్ లొఇ ఒరెన్ఆతి ఇస్కరియొతు యూద, “ఎండానిజ్ యా వాసనం నూనె మూండ్రీ వందిజ్ వెండి రుపాయ్జు పొర్ని అయా డబ్బు బీదాతి వరిజ్ సిఇతి?”, ఇజి వెహ్తాన్. యా ఇస్కరియొతు యుదనె, వెన్కా యేసుజ్ యుదురి అదికారిజ కీదు ఒవజెప్పికాన్.

6 ఏలు వాండ్రు యా లెకెండ్ వెహ్తాక, బీదాతివరిజ్ నెగెండ సుడ్ఃజిని ఇజి ఆవిద్ గాని వాండ్రు డోజ వాండ్రు. వరి సేవపణి వందిజ్ లోకుర్ సీజిని డబ్బు ఇడ్డి సన్ని వీండ్రె అస్త మనాన్. వాండ్రు వన్కాలోఇహాన్ వన్ని సొంత కర్పు వందిజ్ డోజ కిజి మహాన్. అందెజె వాండ్రు ఆహె వెహ్తాన్.

7 అందెజె యేసు, “దనిజ్బాద కిమాట్. నజి నమాది కిని దినమ్దాక అయాక దని బాన్మన్నిద్.

8 బీదదికార్ ఎస్తివలెబా మీ వెట మంజినార్. గాని నాను ఎలాకాలం మీ వెట మన్ఎ”, ఇజి వెహ్తాన్.

9 అహిజ, యూదుర్జ లొఇ మంద లోకుర్, యేసు బెతానియదు మనాన్ ఇజి నెస్తారె అబె వాతార్. వారు యేసుజ్ సుడ్ఃదెజ్ఇజినె ఆవిండ, వాండ్రు సావుదాన్బత్కిస్తి లాజరుజ్ సుడ్ఃదెజ్బా వాతార్.

10-11 అందెజె పెరి పుజెరిజు, లాజరుజ్బా సప్తెజ్ ఇజి ఆలోసనం కిత్తార్. ఎండానిజ్ ఇహిజ, వన్నిజ్ జర్గితి దనివందిజ్ సుడ్ఃజి యూదురు నండోండార్, వరి పెద్దల్జ డిఃసి యేసుముస్సు నమకం ఇడ్ఃజి మహార్.

12 మర్ననాండీజ్, పస్కు పండోయ్ దిజ్ యెరుసలెం పట్టుమీదు వాతి మందలోకుర్ యేసు యెరూసలెమ్ దు వాజినాన్ ఇజి వెహార్.

13 అందెజె వారు ఈత మటెజ్ అస్తారె, పట్టుమీదాన్ వెల్లి సాహార్. వన్నిజ్ ఎద్రు సొన్ని, “ఓసన్న ప్రబు సిత్తి అతికారమ్ దాన్ వాజిని వన్నిజ్ పొగిడిపిద్. ఇస్త్రాయేలు లోకురిజ్ ఏలుబడిః కినిరాజుజ్ పొగిడిపిద్”, ఇజి డటం డేల్ని వెహార్.

14-15 “ఓ సియోను గాల్సి*, తియెలామాట్. ఇవిలోన్ మీ రాజు గాడఃదె పిల్ల ముస్కు ఎక్ట బస్తాండ్రె వాజినాన్†”, ఇజి దేవుణు మాటదు రాస్తి మన్నిలెకెండె, యేసు ఉండ్రె గాడఃదె పిల్లదిజ్ సుడఃతాండ్రె దనిముస్కు బస్తాండ్రె వాజినాన్.

16 అయావలె వన్నిసిసూర్ యా జర్గితి వన్కాజ్ అర్దం కివితార్. గాని వెనుకయేసు సాజి, మరి బత్కిజి, దేవుణు మంజిని బాడిఃదు వన్ని వెట గొప్ప జాయ్ దు మండ్రెజ్ దేవుణు వన్నిజ్ ఒతివెలెనె, యా జర్గితి నజతిజ్ వన్నివందిజ్ దేవుణు మాటదు ముజాలె రాస్త మనాద్ ఇజి అయాక వన్నిజ్ జర్గితాద్ ఇజి వారు అర్దం కితార్.

17 అహిజ, యేసు లాజరుజ్ దూకిదాన్ కూక్కి సాపుదాన్ మరి బత్కిస్తివలె వన్ని వెట మహి లోకురెనె, లాజరుజ్ జర్గితిక సాటిసినార్.

18 యా లోకుర్ వెహ్తా మాట విహారె, మంద లోకుర్ వన్నిజ్ ఎద్రు సొన్సినార్. ఎందానిజ్ ఇహిజ, వాండ్రు బమ్మాతి గొప్ప పణిజ్ కిత్రాన్ ఇజి వెహార్.

19 అయావలె పరిసయరుజు వరిజ్ వారె, “ఇదిలో, నండో లోకుర్ వన్ని వెన్కా సొన్సినార్. మాటు కిజినికెజ్ ఇనికబా, వన్ని వెట సొన్ఎండ వరిజ్ ఆప్ కిడ”, ఇజి వర్గితార్.

యేసు వన్నిసాపు వందిజ్ వర్గిజినాన్

20 నస్తివలె, పస్కు పండోయ్ కినివలె దేవుణుదిజ్ పొగిడిఃజి మాడిఃస్తిజ్ యెరూసలెమ్ దు వాతి వరి లోక సెగొండార్ యూదురు ఆఇకార్ మహార్.

21 వారు గలీలయ ప్రాంతమ్ ది బెత్ నయిద పట్టుమీది పిలిపు డగ్రు వాతారె, “బాబు మాపు యేసుజ్ సుడఃదెజ్ ఆస ఆజినాప్”, ఇజి వెహార్.

22 పిలిపుజ్ వెహ్తాజ్, వాండ్రు ఆంద్రెయెజ్ వెహ్తాన్. వీరు రివిర్ కూడ్డి యేసుజ్ వరి ఆస వెహ్తార్.

23-24 అందెజె యేసు వరివెట ఈహు వెహ్తినాన్. “లోకు మరిసి ఆతి నజి దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిఃదు ఒని దిసమ్ కు డగ్రు ఆతె మనె. నాను నిజం వెహ్తిన ‘ఉండ్రె గోదము గిడ బూమిదు అర్ని సాఎండ మహిజ, అది అయ్ లెకెండ్రె మంజినాద్. గాని ఆ గిడ సాతిజ నండో గిడెజ్ ఆనె.

25 ఎయెన్ బా వన్ని సొంత పాణమ్ దిజ్ లాపు ప్రేమిస్తిజ, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ ఎండ అయాక పాడు కిజినాన్. గాని ఎయెన్ బా యా లోకమ్ దు బత్కినివలె, వన్ని సొంత పాణమ్ దిజ్ లాపు ప్రేమిన్ ఎండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిఃజినాన్.

26 ఎయెన్ బా నజి సేవ కితిజ, వాండ్రు నా సిసూ ఆదెజ్ వలె. నాను ఎంబె మంజినానో, అబె నజి సేవ కినికాన్ బా మంజినాన్. నజి సేవ కిని వన్నిజ్ నా బుబ్బు గవరం సీనాన్”.

* 12:14-15 12:14-15 జీకరి 9:9 † 12:14-15 12:14-15 సియెను గాల్సి ఇజి ఇబ్బు వెహ్తినానిక యెరుసలెమ్ దు మన్ని వరిజె.

27 మరిబా వాండ్రు వెప్పినాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజీ వాని కస్టమ్దాన్ నజీ తప్పినా, ఇజి వెహ్తాజా? సిలె. ఎందానిజ్ ఇహిజ, యా కస్టమ్కు ఓరిన్ని వందిజె నాను వాత మన.

28 ఓ బా, నీను గొప్పు పెరికి ఇజి లోకురిజ్ తోరె ఆల”, ఇజి వెహ్తాన్. అయావలె ఆగాసమ్దాన్ ఉండ్రె జాటు వాతాద్. “నాను గొప్పు పెరికాన్ ఇజి నీను కితి పణిజాణిజ్ తోరె ఆత మన. నీను సాజి మరి బత్తినివలె నాను మరి అయాక తోరె ఆన్”, ఇజి జాటుదు దేవుణు వర్గితాన్.

29 నస్తవలె అబె నిహి మహి లోకుర్ అయాక విహారె, అయా జాటు ఆగాసమ్దు దీడితిక ఇజి వెహ్తార్. గాని మరి సెగొండార్, “దేవుణు మంజిని బాడిదాన్ దేవుణు దూత ఒరెన్ వన్ని వెట వర్గితాన్”, ఇహార్.

30 అందెజె యేసు, “ఏలు మీరు జాటుదాన్ విహి మాటెజ్ నజీ దేవుణు పోక్తాన్ ఇజి మీరు నెస్తెజ్ మీ వందిజె వాతె. నా వందిజ్ ఆవద్.

31 ఇయేలె, దేవుణు యా లోకమ్ది లోకురిజ్ తీర్పు సీని సమయం. ఇయేలె లోకమ్ది అతికారి ఆతి సయ్యానుజ్ వన్ని అతికారమ్దాన్ దేవుణు వెల్లి నెక్కి సమయం.

32 నజీ బూమి మున్సుహాన్ సిలువాదు ఎకిస్సివలె, విజు దేసెమ్కాణి లోకురిజ్, నాను నా డగ్రు తప్పిస్తాలె”, ఇజి వెహ్తాన్.

33 వన్నిజ్ ఎలాగ సప్పార్లె ఇజి లోకురిజ్ తోరిస్తెజ్ వాండ్రు యా మాటెజ్ జర్గిని ముజాలె వెహ్తాన్.

34 అయావలె మంద లోకుర్ వన్నిజ్, “దేవుణు మాటదు మాపు నద్ విజినామ్ గదె క్రిస్తు ఎలాకాలం బత్తినాన్లె ఇజి. మరి నీను ఎలాగ వెప్పిని, లోకు మరిసి ఆతి నిజీ సిలువాదు ఎకిస్టెజ్ వలె ఇజి. అహిజ, నీను వెప్పిని లోకు మరిసి ఎలాగ మర్తికాన్.

35 అందెజె యేసు, “వాండ్రె జాయి ఇజి వన్ని వందిజె వరిజ్ ఈహు వెప్పినాన్: “జాయి ఆతి నాను మీ వెట సెగం కాలమ్ నె మంజినలె. అందెజె సీకట్ వాని ముజాల, జాయ్ ఆతి నాను మనివలె మీరు నజీ ఇస్టం ఆని వజ నడిఁదు. సీకటుదు నడిఁనికాన్ వాండ్రు ఎంబె సొన్ సినాండ్రొ ఇజి వాండ్రు నెన్ ఎవ్.

36 అందెజె మీరు జాయ్ దు బత్తిజిని నా కొడోఁర ఆదెజ్, జాయి ఆతి నాను మీ వెట మనివలె నజీ నమ్మిదు. వాండ్రు యా మాటెజ్ వెహ్తాండ్రె వరిబాణిజ్ సొహండ్రె వరిజ్ తోర్ ఏండ డాజ్ జి మహాన్.

37 వాండ్రు నిసా గొప్పు బమ్మాతి పణిజ్ వరిఎద్రు కితిజ్ బా యూదురు లోఇ నండొ లోకుర్ వన్నిజ్ నమిఎతార్.

38 ‘ప్రబువా మాపు వెహ్తా మాటెజ్ ఎయెర్ నమ్మితార్? ఎయెరిజ్ దేవుణు వన్నినత్తు తోరిస్తాన్?’, ఇజి యెసయ ప్రవక్త వెహ్తా మాట పూర్తిఆని వందిజె వారు నమ్మిఎతార్.

39-40 యెసయ ప్రవక్త మరి ఈహు వెహ్తా మనాన్, ‘వారు వరి కణకాణిజ్ తొవిండ మండ్రెజ్ దేవుణు వరి కణకు గుడిఁ కితాన్. వారు వరిదాన్ అర్లం కిఎండ మండ్రెజ్ దేవుణు వరి మన్సును గటి కితాన్. వరిజ్ నెగెణ్ కిదెజ్ వారు నా డగ్రు రెఎండ మండ్రెజ్ నాను అయా లెకెండ కిత”, ఇజి. అందెజె వారు యేసుజ్ నమ్మిదెజ్ అట్ ఏండ ఆతార్.

41 యేసయ ఎందానిజ్ యా లెకెండ్ వెహ్తాన్ ఇహిజ, యేసు గొప్ప పెరికాన్ ఇజి వాండ్రు సుడత మహాన్. వాండ్రు వెహ్తా మాటెజ్ యేసు వందిజె వెహ్సినె.

42 గాని యూదురు అదికారిజలోఇ నండొండార్ యేసు ముస్సు, నమకం ఇట్టార్. గాని పరిసయరు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాప్ ఇజి లోకుర్ ఎద్దు వెహ్ఎతార్. వరిజ్ యూదురి మీటిజ్ ఇండ్రొణిజ్ వెల్లి కినార్ ఇజి తియెల్ ఆతార్.

43 ఎందానిజ్ ఇహిజ, వారు దేవుణు వరిజ్ పొగిడిః దని ముస్సు, లోకుర్ వరిజ్ పొగిడిఃదెజ్ ఇజి నండొ కోరితార్.

44 మరి యేసు ఈహు డటం వెహ్సినాన్, “నా ముస్సు, నమకం ఇడ్డికాన్ ఎయెన్బా నజినె ఆఎండ, నజి పొక్తివన్నిజ్బా నమిజినాన్.

45 నజి సుడఃజినికాన్ ఎయెన్బా నజి పొక్తి వన్నిజ్బా సుడఃజినాన్.

46 నజి నమ్మినికాన్ ఎయెన్బా సీకట్దు బత్తిఎండ మంజిని వందిజ్ నాను జాయి లెకెండ్ లోకమ్దు వాత మన్ను.

47 నా మాటెజ్ వెంజి అయావజ కిఇవన్నిజ్, తీర్పు సీజినాను సిక్స సివి. ఎందానిజ్ ఇహిజ, ఆహె తీర్పు సీజి సిక్స సీదెజ్ ఆవద్ నాను అయా లోకమ్దాన్ వాతిక. గాని లోకురిజ్ రక్సిస్సి వందిజె వాత.

48 నజి నెక్సి పొక్సి నా మాటెజ్ వజ కిఇవన్నిజ్, వాండ్రు కిఇకాదె వన్నిజ్ ఎలాకాలం మన్ని సిక్స సీనాద్. నాను వెహ్తా మాటెజ్నె ఆకార్ దినమ్దు నాను మర్జి వానివలె వన్నిజ్ తీర్పు సీనాద్.

49 ఎందనిజ్ ఇహిజ, నాను నా సొంత అతికారమ్దాన్ వెహ్తాక ఆవద్. గాని నజి పొక్తి నా బుబ్బనె, నాను ఇన్నిక వెహ్తాజ్, ఎలాగ వెహ్తాజ్ ఇజి ఆడ్ర సిత మనాన్.

50 వాండ్రు వెహ్తా ఆడ్రెజ్ లోజిజినికాన్ ఎలాకాలం బత్తినాన్. అందెజె నా బుబ్బ నజి వెహ్అ ఇజి వెహ్తాకెజ్నె నాను వెహ్సిన.

13

యేసు వన్నిసినూరిజ్ పాదమ్కు నొర్జినాన్

1 నస్తవలె, వస్సు వండొయ్ కిని ముజాహి దినం. యా లోకం డిఃసి బుబ్బ డగ్రు సొండ్రెజ్ టయం ఆతాద్ ఇజి యేసు నెస్తాన్. వాండ్రు ఎస్తవలెబా వన్ని ముస్సు, నమకం ఇడ్డివరిజ్ ప్రేమిసి మహాన్. వాండ్రు సానిదాక ప్రేమిసినె మహాన్.

2 యేసుని వన్ని సినూరు పొదొయ్ బోజనమ్దిజ్ బస్త మహార్. సిమొను మరిసి ఆతి ఇస్కరియొతు యూద మన్నుదు సయ్తాను ముజాలె ఉండ్రె ఆలోసన పుట్టిస్త మహాన్, యేసుజ్ సెఇవరి కీదు ఒవజెహ్తెజ్ ఇజి.

3 బుబ్బ వన్నిజ్ విజు దనిముస్సు అతికారం ఒవజెహ్తె మహాన్, ఇజి యేసు నెస్తాన్. వాండ్రు దేవుణుబాణిజ్ వాత మహాన్, దేవుణుడగ్రు సొన్నినాన్ ఇజిబా నెస్తాన్.

4 అందెజె వాండ్రు బీజనమ్దిజ్ బస్తి మహిబాణిజ్ నిజింతాండ్రె, వాండ్రు పిడఃగితి మన్ని సాల్వ లాగితాండ్రె ఉండ్రె తువాలు నడుముదు తోహె ఆతాన్.

5 తోహ్తాండ్రె, ఉండ్రె పల్లెమ్దు ఏరు వాక్తాండ్రె వన్ని సినూర్ పాదమ్కు నొర్జి వన్ని నడుముదు తోహ్తి మహి తువాల్దాన్ వరి పాదమ్కు తేల్జినాన్.

6 ఆహె, వాండ్రు సిమొను పెతురుడగ్రు వాతివలె, వాండ్రు, “ప్రబువా, నీను నా పాదమ్కు నొర్దెజ్ సుడఃజినిదా?”, ఇజి వెన్బాతాన్.

7 అందెజె యేసు, “నాను ఇనిక కిజిన ఇజి ఏలు నీను నెన్ ఇ గాని వెనుక నీను అర్థం నెస్సిలె”, ఇజి వన్నిజ్ వెప్టాన్.

8 అయావలె పేతురు, “సిల్లె, నీను నా పాదమ్కు ఎసెజ్ బా నోరదెజ్ ఆవద్”, ఇజి వెప్టాన్. దనిజ్ యేసు, “నాను నీ పాదమ్కు నోరేవండమహిజ, నీను నా సిసూడు అజ”, ఇజి వెప్టాన్.

9 అయావలె సిమోన్ పేతురు, “అహిజ ప్రబువా, నా పాదమ్కునె ఆవండ నా కికు, నా బుర్రబా నోరఅ”, ఇజి వెప్టాన్.

10 అందెజె యేసు, “ఏరుకబతి వన్నిజ్ వన్నిఒడోల్ విజు నోరదెజ్ అవ్సరం సిల్లెద్. వన్ని పాదమ్కునె నోరదెజ్. ఎందానిజ్ ఇహిజ, పాదమ్కునె వెటనె డుల్లిఅనె. నా సిసూర్ ఆత్తి మీరు విజిదెరె సుబ్రం ఆతిదెరె. గాని ఒరెన్ ఆవన్”, ఇజి వెప్టాన్.

11 వన్నిజ్ నెఇవరి కీదు ఒపజెప్పికాన్ ఎయెన్ ఇజి వాండ్రు నెసి మహాన్. అందెజె ‘మీరు విజెరె సుబ్రం ఆత్తికిదెరె ఆఇదెరె’, ఇజి వాండ్రు వెప్టాన్.

12 వరి పాదమ్కు నోరజి వీస్తి వెన్కా, వాండ్రు లాగితి ఇడ్డి వన్ని సాల్వ వ్డోగితాండ్రె, బోజనమ్దిజ్ బన్దిమహి బాడిడు సాహాన్. సాహాండ్రె వాండ్రు వరిజ్ వెన్ బాజినాన్, “నాను ఏలు మిజి కితిపణిది అర్థం మిజి తెలినాదా?”

13 మీరు నజి కూక్కివలె, ‘ఓ బోదకినికి’ ఇజినో, ‘ఓ ప్రబువా’ ఇజినో కూక్కినిదెరె. నాను బోదకినికానె. ప్రబునె. అందెజె మీరు కూక్కినిక తప్ప సిల్లెద్.

14 ఏలు మీ ప్రబు ఆతి, బోదకినికి ఆతి నాను నీ పాదమ్కు నోరత మన్ను. అందెజె మీరుబా ఒరెన్ మరి ఒరెన్ వన్ని పాదమ్కు నోరదెజ్.

15 నాను మిజి కితిలెకెండ మీరు బా కిని వందిజ్, అయా పణి ఎలాగ కిదెజ్ ఇజి నాను మిజి తోరిస్త మన్ను.

16 నాను నిజం వెహ్సిన, ఎమేణి పణి మన్నిసి బా వన్ని ఎజామాని మున్ను పెరికాన్ ఆవన్. అయ లెకెండ ఎమేణి కబ్బు తనికాన్ బా వన్నిజ్ పోక్తి వన్ని మున్ను పెరికాన్ ఆవన్.

17 మీరు ఏలు యా నిజమాతి నజతిజ్ నెస్తిదెరె. అందెజె మీరు అయా లెకెండ కితిజ మీరు గొప్ప వారు”.

యేసు వన్నిజ్ నెఇవరికీదు ఒపజెప్పి దనివందిజ్ జర్గినిముజాలె వెహ్సినాన్

18 “మీరు పాపమ్కాణిజ్ నోరె ఆత్తిదెరె ఇజి నాను వెహ్సినక మీ విజెరె వందిజ్ ఆవద్. నాను ఏరపాటు కితికార్ ఎలాగ మర్తికార్ ఇజి నాను నెన్ను. గాని, ‘నా వెట బోజనం ఉణిజి మహికాన్ నజి వ్డోఇకాన్ ఆతాన్’, ఇజి దేవుణు మాటదు రాస్తీ మన్ని మాట పూర్తి ఆదెజ్ నాను యా లెకెండ కిత్త.

19 అయాక జర్గినివలె, నానె మెనయ ఇజి మీరు నమినివందిజె, అయాక జర్గిని ముజాల, యెలె నాను వెహ్సిన.

20 నాను నిజం వెహ్సిన, ఎయెన్ బా నాను పోక్తి వన్నిజ్ డగ్రు కితిజ, వాండ్రు నజి డగ్రు కితి లెకెండ. ఎయెన్ బా నజి డగ్రు కితిజ, నజి పోక్తి వన్నిజ్ డగ్రు కితి లెకెండ”, ఇహాన్.

21 యేసు యాక వెహ్సినవలె వన్ని మన్నుదు బాద ఆతండ్రె, “నాను నిజం వెహ్సిన, మీ లోక ఒరెన్ నజి నెఇవరి కీదు ఒపజెప్పాన్లె”, ఇజి వెప్టాన్.

22 అయావలె వన్ని సిసూర్ ఎయెన్ వందిజ్ వాండ్రు ఈహు వెప్టాన్ ఇజి అర్థం అఇతిజ్ ఒరెన్ మొకొ ఒరెన్ సుడో ఆజినార్.

23 బోజనమందిళ్ బస్తి మహివలె, సిసూర్ లోఇ యేసు నండొ ప్రేమిస్తి సిసూ వన్ని డగ్రునె బోజనమందిళ్ బస్తి మహాన్.

24 సిమోన్ పేతురు వన్నిజ్ నయన కిజి, “ఎయెన్ వందిళ్ వాండ్రు వర్గిజినాన్ఇజి వన్నిజ్ వెన్బాఅ”, ఇజి వెహ్హాన్.

25 అందెజె అయా సిసూడుః యేసుజ్ రోస్పె ఆజి, “ప్రబువా, వాండ్రు ఎయెన్?”, ఇజి వెన్బాతాన్.

26 అందెజె యేసు, “నాను యా రొటె ముక పులాదు ముడుక్కి ఎయెన్సీనానొ వాండ్రె నజీ ఒపజెప్పికాన్”, ఇజి వెహ్హాన్. వెహ్హాండ్రె ముక పులాదు ముడుక్కి సిమొను మరిసి ఆతి ఇస్కరియొతు యుదెజ్ సీత్తాన్.

27 యూద అయా రొట్టెముక్కు తిహి వెటనె నయతాను వన్ని లోఇ డుగితాండ్రె వన్ని ముస్కు అతికారం కితాన్. అయావలె యేసు, “నీను కిడెజ్ ఒడఃబిజినిక బేగి కిత”, ఇజి వెహ్హాన్.

28 గాని బోజనమందిళ్ బస్తివరి లోఇ ఎయెరిజ్బా ఎందానిజ్ యేసు ఆహె వెహ్హాన్ ఇజి అర్లం ఆవితాద్.

29 వరి కర్నువందిళ్ మన్ని డబ్బు విజు యూద కీదునె మనె. అందెజె పండొయ్దిజ్ కావాలిస్తికెజ్, సొన్ని కొలత ఇజిను, నీలిజ బీదాతివరిజ్ డబ్బు నీఅ ఇజి వెహ్హినాన్ నను ఇజి సిసూర్ సెగొండార్ ఒడిబితార్.

30 యూద ఆ రొట్టెముక్కు తిహివెటనె వెల్లి సాహాన్. అక్క రెయు.

31 వాండ్రు సొహి వెన్కా యేసు ఈహు వెహ్హాన్, “లోకు మరిసి ఆతి నాను ఎసా గొప్ప పెరికాన్ ఇజి లోకుర్ ఏలునూణార్లె. దేవుణు ఎసా గొప్ప పెరికాన్ ఇజి నా వెట నూణార్లె.

32 దేవుణు గొప్ప పెరికాన్ ఇజి లోకు మరిసి వెట తోరె ఆతిజి, లోకు మరిసి గొప్ప పెరికాన్ ఇజి దేవుణునె తోరిస్సాన్. అయాక వెటనె తోరిస్సాన్.

33 నాను ప్రేమిస్తికిదిరా, కండెక్ సమయమనె నాను మీ వెట మంజిన. మీరు నజీ రెబానిదెర్, గాని యూదురు అదికారిజ నాను వెహ్హి లెకెండ, “నాను సొని బాడిడు మీరు వాదెజ్ అట్ఇదెర్’ ఇజి ఏలు మీవెట వెహ్హిన.

34 నాను కొత్త ఆడ్ర మిజీ సీజిన. మీరు ఒరెన్ మరి ఒరెన్ వన్ని వెట ప్రేమిన్అ, ఇజి. నాను మిజీ ప్రేమిస్తిలెకెండ మీరు బా ఒరెన్ వన్ని వెట ఒరెన్ ప్రేమిస్టెజ్వలె.

35 మీరు ఒరెన్ వన్ని వెట ఒరెన్ ప్రేమిస్తిజి, మీరు నా సిసూర్ ఇజి లోకుర్ విజెరె నెస్సార్.

36 అయావలె సిమోన్ పేతురు, “ప్రబువా, నీను ఎంబె సొన్సని?”, ఇజి వెన్బాతాన్. వెన్బాతిజ్ యేసు, “నాను ఏలు సొని బాడిడు నీను ఏలు వాదెజ్అట్ఇ. గాని వెన్కా వాలె”, ఇజి వెహ్హాన్

37 అందెజె పేతురు, “ప్రబువా, ఎందానిజ్ నాను ఏలు మీ వెట వాదెజ్ అట్ఇ. నీ వందిజ్ సాదెజ్బా నాను తయార్నె”, ఇజి వెహ్హాన్.

38 అందెజె యేసు, “నా వందిజ్ సాదెజ్బా నీను నిజం తయార్నెనా? కొరు కెరెని ముజాలె, ‘నీను నజీ నెన్వ’ ఇజి ముసార్ వెహ్హిలె”, ఇజి వెహ్హాన్.

14

యేసు వన్ని సిసూరిజ్ దయరం సీజినాన్

1 యేసు మరిబా వన్ని సిసూరిజ్ వెప్పినాన్, “మీ మన్నుదు తియెల్ ఆజి బాద ఆమాట్. దేవుణు ముస్కు నమకం ఇడ్డిదెర్. నా ముస్కుబా నమకం ఇడ్డేదు.

2 పరలోకమదు నా బుబ్బ ఇండ్రో నండో గదిజ్మనె. అయ లెకెండ సిల్లెండ మహిజ, నాను మిజీ వెప్తా మరి. మిజీ ఉండ్రీ బాడిః తయార్ కిదెజ్ నాను అబ్బె సొన్నిన.

3 నాను సొన్ని మిజీ ఉండ్రీ బాడ్డి తయార్ కితి వెనుక, నాను మర్జివాజి నావెట నాను మంజినిబాన్ మీరుబా మండ్రెజ్, కూక్కు ఒనాలె.

4 నాను సొన్నిని బాడిఃదు సొండ్రెజ్ సరి మీరు నెస్సిదెర్”, ఇజి వెప్తాన్.

బుబ్బడగు సొండ్రెజ్ నానెసరి ఇజి వెప్పినాన్

5 అయావలె తోమా వన్నిజ్, “ప్రబువా, నీను ఎంబె సొన్నిని ఇజి మాపు నెన్ ఏవ్. అందెజె సరి మాపు ఎలాగ నెస్సెజ్ ఆనావ్?”, ఇజి వెప్తాన్.

6 అందెజె యేసు వన్నిజ్, “నానె బుబ్బ డగు సొండ్రెజ్ సరి. నానె బుబ్బ వందిజ్ నిజమాతికెజ్ తోరిసి నెన్ పిస్సాన్. నానె ఎలాకాలం దేవుణు వెట బత్కిని బత్కు సీనికాన్. నా వెటనె లోకుర్ విజెరె బుబ్బడగు సొనార్.

7 నాను ఎయెన్ ఇజి మీరు నెస్తి మహిదెర్ ఇహిజ, నా బుబ్బ ఎయెన్ ఇజిబా మీరు నెస్తిదెర్ మరి. ఏలదాన్ మీరు వన్నిజ్ నెస్తి మనిదెర్, సుడిఃతి మనిదెర్”, ఇజి వెప్తాన్.

8 నస్తివలె పిలిపు, “ప్రబువా, బుబ్బెజ్ మజీ తోరిన్ అ. ఆకాదె మజీ సాలు”, ఇజి వన్నిజ్ వెప్తాన్.

9 అందెజె యేసు వన్నిజ్, నాను నిసా కాలం మీ వెట మహ. మహిజ్ బా నీను నజీ నెన్ ఇదా పిలిపు? నజీ సుడిఃతికాన్ ఎయెన్ బా నా బుబ్బెజ్ సుడిఃత మనాన్. అయావలె బుబ్బెజ్ మజీ తోరిన్ అ ఇజి ఎలాగ నీను వెప్తాజ్ అట్ సీని?

10 నాను నా బుబ్బ వెట కూడిఃత మన. బుబ్బ నా వెట కూడిఃత మనాన్ ఇజి నీను నమ్ ఇదా? నాను మీ వెట వెప్పిని మాటెజ్ నా సొంత మాటెజ్ ఆఱ. గాని నా వెట కూడిఃతి మన్ని బుబ్బ బాణిజ్ మాతికెజె అయాకెజ్. వాండ్రు వన్ని పణిజ్ నావెట కిబిసినాన్.

11 నాను నా బుబ్బ వెట కూడిఃత మన, బుబ్బ నా వెట కూడిఃత మనాన్ ఇజి నాను వెప్పినిక మీరు నమ్మిదు. సిలిజ, నాను కిజిని విజు బమ్మ ఆని పణిజ సుడిఃజి అయాక నమ్మిదు.

12 నాను నా బుబ్బ డగు సొన్నిన. అందెజె నజీ నిజం నమ్మితికాన్, నాను కిజిని బమ్మ ఆని పణిజ్ వాండ్రు బా కినాన్. ఒబ, దనిజ్ ఇంక లావు పణిజ్ వాండ్రు కినాన్ ఇజి మీ వెట నిజం ఇక వెప్పిన.

13 నా ఇస్టమ్ దిజ్ కూడిఃతి మన్ని ఇనికబా మీరు లొస్తిజ, నాను అయాక కిన. బుబ్బ గొప్ప పెరికాన్ ఇజి లోకురిజ్ తోరిస్సెజె, మరిసి ఆతి నాను అయాక కిన.

14 నా ఇస్టమ్ దిజ్ కూడిఃతి మన్ని ఇనికబా మీరు లొస్తిజ, నాను అయాక కిన.

15 మీరు నజీ ప్రేమిస్తిజ, నా ఆడ్రెజ్ మీరు వెనిదెర్.

16 నాను బుబ్బెజ్ లొస్సు. మీ వెట ఎలాకాలం మండ్రెజ్ మరి ఒరెన్ తోడుః మంజిని వన్నిజ్ బుబ్బ మిజీ సీనాన్.

17 వాండ్రు దేవుణు బాణిజ్ నిజమాతికెజ్ వెప్పిని దేవుణు ఆత్మ. క్రీస్తుజ్ నమ్మిఇకార్ ఒరెన్ తోడుః మంజిని వన్ని వజ వన్నిజ్ డగు కిదెజ్ అట్ ఏర్. ఎండనిజ్

ఇహిజ, వారు వన్నిజ్ రెబావీర్. వన్నిజ్ నెస్ఎర్. గాని మీరు వన్నిజ్ నెస్సిదెర్. ఎందానిజ్ ఇహిజ, వాండ్రు మీ వెట మంజినాన్. మీ లోఇ మంజినాన్.

18 నాను మిజి డిసి సొనివలె, మిజి దిక్కు సిలి వరి లెకెండడిస్ఎ. నాను మర్జి మీ డగ్రు వానాలె.

19 సెగం కాలం వెన్కా, నజి నమ్మిఇకార్ నజి మరి తోఎర్లె. గాని మీరు నజి సూణిదెర్. నాను బత్తిజిన. అందెజె మీరుబా బత్తినిదెర్.

20 నాను నా బుబ్బువెట కూడిత మన్ను, మీరు నా వెట కూడితి మనిదెర్. నాను మీ వెట కూడిత మన ఇజి దేవుణు ఆత్మ మీ నడిమి మండ్రెజ్వాని దినమ్దు మీరు నెస్సిదెర్లె.

21 నా ఆడ్రెజ్ వెంజి అయావజ కినికానె నజి ప్రేమిస్సికాన్. నజి ప్రేమిస్సి వన్నిజ్ నా బుబ్బు ప్రేమిస్సాన్. నాను వన్నిజ్ ప్రేమిసి వన్నిజ్ తోర్ ఆన”, ఇజి యేసువెహ్సాన్.

22 నస్తివలె ఇన్కరియెతు యూద ఆఇ మరి ఒరెన్యుద, “ప్రబువా నీను లోకురిజ్ విజెరిజ్ తోర్ఆవీండ, ఎలాగ నీను మజి తోర్ ఆనిలె?”, ఇజి వెన్బాతాన్.

23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెజ్ వినాన్. అయావలె నా బుబ్బు వన్నిజ్ ప్రేమిస్సాన్. నా బుబ్బుని నాను వన్నిడగ్రు వాజి వన్నివెట మంజినావ్.

24 నజి ప్రేమిస్ఇకాన్, నా మాటెజ్ వినవీన్. మీరు వెంజిని యా మాటెజ్ నా సొంత మాటెజ్ ఆఉ. నజి పోక్తి నా బుబ్బువినె.

25 నాను మీవెట మంజినె యా మాటెజ్ వెహ్తా మన్ను.

26 నా బుబ్బు, నా బదులు తోడుః మంజిని వన్నిజ్ ఇహిజ, దేవుణు ఆత్మదిజ్ పోక్తివెలె, వాండ్రు మిజి దేవుణు వందిజ్ విజు సజతిజ్ నెస్పిస్సాన్. నాను మిజి వెహ్తా విజు వన్కాజ్ ఎత్తు కిబిసి మంజినాన్.

27 నాను మిజి డిసి సొన్సిన. గాని మీరు సమాధనమ్మడాన్ మంజినిదెర్లె. అయా సమాధనం నా బాణిజ్ వాజినాద్. నజి నమ్మిఇ లోకురిజ్ మన్ని సమాధనం ననికాద్ ఆవీద్నా బాణిజ్ వాజినికాద్. మీ మన్నుదు విసారిసి బాద ఆమాట్. మీరు తియెల్ ఆమాట్.

28 ‘నాను సొన్సిన. మర్జి మీ డగ్రు వానాలె’, ఇజి నాను వెహ్తా మాట మీరు విహిదెర్. నా బుబ్బు నజి ఇంక పెరికాన్. అందెజె మీరు నజి నిజం ప్రేమిస్తిజ, వీండ్రు బుబ్బు డగ్రు సొన్సినాన్ఇజి సర్ద ఆజినిదెర్.

29 యాకెజ్ జర్గినివలె, నాను వెహ్తాకెజ్ నిజం ఇజి మీరు నమ్మిని వందిజె, అయాకెజ్ జర్గిని ముజాల, ఇయేలె నాను మిజి వెహ్తా మన్ను.

30 మరి నండొ సమయం మీ వెట వర్గిదెజ్నాను అట్వలె. ఎందానిజ్ఇహిజ, యా లోకమ్ది అతికారి ఆతి సర్తూను వాజినాన్. నా మున్ను వన్నిజ్ఇన్ని అతికారం సిల్లెద్.

31 గాని, నాను నా బుబ్బెజ్ ప్రేమిస్సు. అందెజె వాండ్రు వెహ్సినికెజ్ విజు అయావజ నాను కిజిన ఇజి లోకమ్దికార్ నెస్టెజ్వలె. రదు, ఇబ్బెణిజ్ సొనాట్”, ఇజి వెహ్సాన్.

15

1 నాను నిజమాతి ద్రాక్కుబడ్డుదిజ్ మొదోల్. నా బుబ్బు పణికినికాన్.

2 నా వెట కూడితి మన్ని పట్టు అన్ఇ విజు కొనెజ్ వాండ్రు కత్నాన్. పట్టుఅన్ని విజు కొనెజ్, మరి నండొ పట్టు అస్సివందిజ్ తెహ్సాన్.

3 నాను మీవెట వెప్తా మాటెజ్, మీ పాపమ్కాణిజ్ నుబ్బరం కిత్తె మనె.

4 నాను మీ వెట కూడఃజి మంజినిలెకెండ్ మీరు నా వెట కూడఃజినె మండ్రు. ఇన్ని కొనెజ్బా బడ్డుదు మన్ఏండ మహిజ, అవి పట్టు అన్ఉ. పట్టు అస్తైజ్ఇహిజ, అవి బడ్డుదు మండ్రైజ్వలె. అయాలెకెండ్, నావెట కూడిఃతి మహిజనె, మీరు పట్టు అస్సిదెర్.

5 నాను ద్రాక్కుబడ్డుఉదిజ్ మొదొల్. మీరు కొనెజ్. ఎయెన్బా నా వెట కూడఃజి మంజి, నాను వన్ని వెట కూడిఃతి మహిజ, వాండ్రు నండొ పట్టు అస్సాన్. నాను సిల్లెండ, నజి ఇన్లం ఆతి నెగ్గికెజ్ ఇనికెజ్బా మీరు కిదెజ్ అట్ఇదెర్.

6 వెల్లి విసీర్తి ఉండ్రొ కొన వప్తా లెకెండ్, నా వెట కూడఃజి మన్ఇకాన్మనాన్. వాండ్రు వెల్లి ఆజి వహ్సాన్. నన్ని కొనెజ, లోకుర్ కుంబ కిజి సుర్నార్. ఆకెజ్ వెయ్నె.

7 మీరు నావెట కూడఃజినె మంజి నాను వెప్తాక మీ లొఇ మహిజ, ఇనికబా మీరు దేవుణుదిజ్ లొస్తు. వాండ్రు అయాక మిజి సీనాన్.

8 మీరు నండొ పట్టు అసి ఆహె నా సిసూర్ఇజి తోరె ఆతిజ, నా బుబ్బ గొప్ప పెరికాన్ ఇజి లోకురిజ్ తోరిసినిదెర్.

9 నా బుబ్బ నజి ప్రేమిన్ని లెకెండ్, నాను మిజి ప్రేమిన్ను. నాను మిజి ప్రేమిన్ని వందిజ్, నా వెట కూడఃజినె మండ్రు.

10 నాను నా బుబ్బ వెప్తా ఆడ్రైజ్లోజిత మన. వాండ్రు నజి ప్రేమిస్సాన్. అయాలెకెండ్ మీరు నాను వెప్తా ఆడ్రైజ్లోజితిజ, నాను మిజి ప్రేమినినె మంజిన.

11 నజి మన్ని సర్ద మిజి బా మండ్రైజ్, మీ సర్ద పూర్తి ఆదెజ్, ముజాలె వెప్తా యా మటెజ్నాను మిజి వెప్తా మన్ను.

12 నాను మిజి ప్రేమిసివజ, మీరు ఒరెన్ వన్ని వెట ఒరెన్ ప్రేమిసి మండ్రు ఇజినె నా ఆడ్ర.

13 ఒరెన్ వన్ని కూలెజి వందిజ్ వన్ని సొంత పాణం సీనికాదె నండొ ప్రేమ. దిని ఇంక మిస్సి మరి ప్రేమ సిల్లెద్.

14 నాను ఆడ్ర సితిక మీరు కితిజ, మీరు నా కూలెజె.

15 ఒరెన్ పణికినికాన్, వన్ని ఎజిమాని కిని పణిజ్ నెన్ఎన్. అందెజె నాను మరి ఎసెజ్ మిజి పణికినికార్ ఇజి కూకవి, గాని కూలెజ్ ఇజి కూక్త మన. ఎందనిజ్ ఇహిజ, నాను నా బుబ్బ బాణిజ్ విహికెజ్ విజు మిజి వెప్తా మన్ను.

16 మీరు నజి ఏర్పాటు కిఇదెర్. గాని నాను మిజి ఏర్పాటు కిత్త. పట్టు అస్సివజ, మీరు సొన్ని లోకురిజ్ సువార్త వెహ్సి దేవుణు దరోల్ మహ్సి తని వందిజె నాను మిజి ఏర్పాటు కితానె పొక్కిన. మీరు అస్తి పట్టు ఎలాకాలం మంజినాద్. అయావలె మీరు నా ఇన్లమదిజ్ కూడిఃతి మన్ని ఇనికబా బుబ్బైజ్ లొస్తిజ, వాండ్రు సీనాన్.

17 మీరు ఒరెన్ వన్నివెట ఒరెన్ ప్రేమిస్తిజ్ ఇజినె నాను సీజిని ఆడ్ర.

18 యా లోకమ్దు మన్ని దేవుణుదిజ్ దూసిస్సికార్, మిజి దూసిస్తిజ, మీరు ఒడిఃబిదు వారు మిజి దూసిస్సి ముజాలె నజి దూసిస్టార్ ఇజి.

19 మీరు యా లోకమ్దు మన్ని దేవుణుదిజ్ దూసిస్సి వరిలోఇ మన్నికిదెర్ ఇహిజ, వరి సొంత లోకుర్వజి వారు మిజి ప్రేమిస్టార్ మరి. గాని నాను వరి లెకెండ్ మీరు మన్ఎండ, మిజి ఎర్లిస్త. అయావలె, మీరు వరి లొఇ మన్నికిదెర్ ఆఇదెర్. అందెజె వారు మిజి దూసిసినార్.

20 ఎమేణి పణిమణిసిబా వన్ని ఎజుమాని ముస్సు పెరికాన్ ఆవీన్*’, ఇజి నాను వెప్తా మాట మీరు ఎత్తు కిదు. వారు నజీ హియ్యోజ్ కితార్ ఇహిజ, మిజి బా హియ్యోజ్ కినార్. వారు నా మాటజ్ లోజితార్ ఇహిజ, మీ మాటజ్ బా లోజినార్.

21 మీరు నజీ నమ్మితి వందిజ్ వారు యా లెకెండ్ విజు మిజి కినార్. ఎందానిజ్ ఇహిజ, వారు నజీ పోక్తి వన్నిజ్ నెస్వర్.

22 నాను వాజి దేవుణు వందిజ్ నిజమాతికెజ్ వరిజ్ వెహోవిండ మంజినిక ఇహిజ, వారు పాపమ్కు కితార్ ఇజి దేవుణు వరిజ్ సుడఃఏతాన్ మరి. అహిజ, ఏలు వారు వరి పాపమ్కాణిజ్ తప్తె ఆదెజ్ అట్వర్. ఎందానిజ్ ఇహిజ, నాను వరిజ్ వెప్తా మన్న.

23 నజీ దూసిస్సికాన్నా బుబ్బెజ్ దూసిసినాన్.

24 ఎయెన్బా కిజ బమ్మాని పణిజ్ నాను వరి నడిఃమి కివిండ మంజినిక ఇహిజ, వారు పాపమ్కు కితార్ ఇజి దేవుణు వరిజ్ సుడఃఏతాన్ మరి. గాని ఏలు వారు యా బమ్మ ఆని పణిజ్ సుడఃత మనార్. అహిజ్ బా, నజీ ని నా బుబ్బెజ్ వారు దూసిస్త మనార్.

25 ‘ఇని కారణంబా సిల్లెండ వారు నజీ దూసిస్తార్’, ఇజి దేవుణు మాటదు రాస్తి మన్ని మాట పూర్తి అదెజె యా లెకెండ్ వారు కిజినార్.

26 నాను మీ డగ్రు తోడుః మంజిని వన్నిజ్ ఇహిజ, దేవుణుబాణిజ్ నిజమాతికెజ్ వెప్పి తోరిస్సి దేవుణు ఆత్మెజ్ పోక్కు. వాండ్రు బుబ్బ బాణిజ్ మీ డగ్రు వానాన్. అయావలె నా వందిజ్ విజు వాండ్రు వెహ్నాన్.

27 నాను సేవ మొదొలెస్సి బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెప్తాజ్వలె.

16

1 “మిజి ఇమ్సెజ్ కినివలె, మీరు నమకం దాన్డిఃన్విండ మంజిని వందిజె, మిజి దూసిస్సికార్ కిని సజతిజ వందిజ్ నాను వెప్తా.

2 వారు మిజి యూదురి మీటిజ్ ఇల్కాణిజ్ వెల్లి కినార్. మిజి సమ్మికాన్ ఎయెన్బా, వాండ్రు దేవుణుదిజ్ సర్ల కిజిన ఇజి ఒడిఃబిని కాలం వాజినె.

3 వారు నన్నికెజ్ కినార్. ఎందనిజ్ ఇహిజ, బుబ్బెజ్ నో నజినో నెస్వర్.

4 అయ కాలం వానివలె, నాను దినివందిజ్ వెప్తా మన ఇజి మీరు ఎత్తుకిని వందిజ్ నాను యాక మీ వెట వెప్తా మన. నాను యాకెజ్ ముజాలె మిజి వెప్తాజ్ సెలె. ఎందానిజ్ ఇహిజ, నాను మీవెట మహా”.

దేవుణు ఆత్మ కిని పణిజ్

5 “ఏలు నాను నజి పోక్తి వన్ని డగ్రు సొస్సిన. గాని మీ లోఇ ఎయెన్బా, ‘నీను ఎంబె సొస్సిన?’, ఇజి నజి వెన్బాఇదెర్”.

6 నాను యా సజతిజ్ మిజి వెప్తా మనిజ్, మీ మన్నును దుకమ్దాన్ నిండ్రిత మనాద్.

7 గాని నాను నిజం మీ వెట వెప్పిన, మిజి మేలు వాని వందిజె నాను సొస్సిన. నాను సొన్విండ మహిజ, తోడుః మంజినికాన్ మీ డగ్రు రెవీన్. గాని నాను సొహిజ, నాను వన్నిజ్ మీ డగ్రు పోక్కు.

* 15:20 15:20 13:16 సుడఃదు

8 వాండ్రు వాజి, దేవుణుదిజ్ నమ్మిఇవరిజ్ పాపం ఇహిజ ఇన్నిక ఇజి, నాను నీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్ ఇన్నిక ఇజి కసితం వెప్పి తోరిస్సాన్.

9 వారు పాపం కిత్తమనార్ ఇజి వాండ్రు కసితం వెప్పి తోరిస్సాన్. ఎందానిజ్ ఇహిజ, వారు నజి నమ్మివర్.

10 నాను నీతి నిజాయితి మన్నికాన్ ఇజి వాండ్రు కసితం వెప్పి తోరిస్సాన్. ఎందనిజ్ ఇహిజ, నాను నా బుబ్బు డగ్రు సొన్సిన. మీరు నజి మరి తోఇదెర్.

11 దేవుణు సీని ఎలాకాలం మన్ని సిక్ ఇన్నిక ఇజి వరిజ్ కసితం వెప్పి తోరిస్సాన్. ఎందానిజ్ ఇహిజ, దేవుణుదిజ్ నమిఇ వరి ముస్సు అతికారం కిని సయ్తానుజ్, దేవుణు ఎలాకాలం మన్ని సిక్ సిత్తమనాన్.

12 'నజి మరి నండో మిజి వెప్తాజ్ మనాద్, గాని ఏలు మీరు నసా అర్థం కిదెజ్ అట్ ఇదెర్.

13 గాని దేవుణు వందిజ్ నిజమాతికెజ్ నెన్పిస్సి దేవుణు అత్తు వానివలె, వాండ్రు దేవుణు బాణిజ్ వాజిని విజు నిజమాతికెజ్ మీరు నెస్తెజ్ మిజి నడిపిసినాన్. వాండ్రు వన్ని సొంతదిక ఇనికబా వెహ్ ఎన్. గాని బుబ్బు వెప్పినికెజ్ వెంజి మిజి వెహ్ నాన్. వాండ్రు జర్గిని వన్కాజ్ వందిజ్ మిజి వెహ్ నాన్.

14 నాను వెప్పిని నిజమాతికెజ్ వెంజి, అయాక మిజి వెహ్ నాన్. అయ లెకెండే నాను గొప్పు పెరికాన్ ఇజి మిజి తోరిస్సాన్.

15 బుబ్బెజ్ మన్నికెజ్ విజు నాదినె. అందెజె నాను వెహ్, నాను వెప్పిని నిజమాతికెజ్ వాండ్రు వెంజి, అయాక మిజి వెహ్ నాన్ ఇజి.

16 సెగం రోస్సు వెన్కా, నాను సొన. మీరు నజి మరి తోఇదెర్. మరి సెగం రోస్సు వెన్కా, మీరు నజి సూణిదెర్”.

17 వన్ని సిసూర్ లొఇ సెగెండార్ ఒరెన్ వెట ఒరెన్ ఈహు వెహ్ నాన్, “సెగం కాలం వెన్కా మీరు నజి తోఇదెర్. మరి సెగం కాలం వెన్కా మీరు నజి సూణిదెర్. నాను నా బుబ్బు డగ్రు సొన్సిన. అందెజె మీరు నజి తోఇదెర్”, ఇజి వాండ్రు వెప్పిని తర్దం అర్థం ఇనిక? ఇజి.

18 “ ‘సెగం కాలం’ ఇజి వాండ్రు వెప్పిని దని అర్థం ఇన్నిక? వాండ్రు వెప్పిని దనిజ్ మజి అర్థం రెవిండ ఆజినాద్”, ఇజి మరి వర్గిజెనె మహార్.

19 దినివందిజ్ వారు వన్నిజ్ వెన్బాదెజ్ కోరిజినార్ ఇజి యేసు నెస్తాండ్రె, ఈహు వరిజ్ వెప్పిసాన్, “ ‘సెగం కాలం వెన్కా మీరు నజి తోఇదెర్. మరి సెగం కాలం వెన్కా మీరు నజి సూణిదెర్’, ఇజి నాను వెహ్ దని అర్థం ఇన్నిక ఇజినా మీరు ఒరెన్ దిజ్ ఒరెన్ వెన్బాజినిదెర్?

20 మీరు దుకం కిజి అడజబానిదెర్ గాని దేవుణుదిజ్ దూసిస్సికార్ సర్ద ఆనార్. మీరు దుకం కినిదెర్ గాని మీ దుకం వెసుక సర్దమనాద్ ఇజి నాను మీ వెట నిజం వెప్పిసాన్.

21 ఉండ్రె బోదెలి ఏరుఈబదెజ్ నొపిదిజ్ అడజబానాద్. ఎందానిజ్ ఇహిజ, దనిజెనెగెండ ఆదెజ్ కాలం ఆతాద్. గాని దన్నికొణ్ణె పుట్టిజ, లోకమ్ దు ఒరెన్ పుట్టాన్ ఇజి సర్దదాన్ అయా బాదెజ్ అది ఎత్తు కివిద్.

22 అయాలెకెండే మిజి బా. మీరు ఏలు దుకం ఆనిదెర్. గాని నాను మర్జి వానివలె మిజి మరి సూణ. అయావలె మీరు సర్ద ఆనిదెర్. అయా సర్ద ఎయెన్ బా మీ బాణిజ్ లాగ్ దెజ్ అట్ ఎన్.

23 నాను నిజీతి సాహి వెన్కా, మీరు ఇనికబా నెస్తైజ్ నజీ వెన్ బాఇదెర్. ఎందానిజ్ ఇహిజ, దేవుణు అత్త మిజీ నెన్ పిస్నాన్. నా ఇస్టమ్ దిజ్ కూడితి మన్నికెజ్ ఇన్నికబా మీరు బుబ్బెజ్ లొస్తైజ, వాండ్రు అయాక సీనాన్, ఇజి నాను నిజం మీ వెట వెహ్సిన.

24 ఏలుదాక నా ఇస్టమ్ దిజ్ కూడితి మన్నికెజ్ ఇన్నికబా లొన్ ఇతిదెర్. మీ సర్ ద పూర్తి ఆని వందిజ్ లొస్తు. మిజీ దొహ్కానాద్.

25 నాను మిజీ కతవజ యా సజతిజ్ నెన్ పిస్త్ మన. గాని కతవజ నెన్ పిన్ ఏండ, బుబ్బ వందిజ్ మిజీ టెట అర్లం ఆనిలెకెండ్ వెహ్సా కాలం వాజినాద్.

26 అయా కాలమ్ దు, నా ఇస్టమ్ దిజ్ కూడితి మన్నికెజ్ మీరు లొస్సిదెర్. మీరు లొస్తికెజ్ వరిజ్ సిఅ ఇజి బుబ్బెజ్ వెహ్సా ఇజి నాను వెహ్ ఏ.

27 ఎందానిజ్ ఇహిజ, బుబ్బె న మిజీ నండొ ప్రేమిస్నాన్. మీరు నజీ ప్రేమిస్సిదెర్. నాను బుబ్బ బాణిజ్ వాత ఇజి మీరు నమిజినిదెర్. అందెజె వాండ్రు మిజీ నండొ ప్రేమిస్నాన్.

28 నాను బుబ్బ బాణిజె యా లోకమ్ దు వాత. ఏలు నాను యా లోకం డిసి మర్జి బుబ్బ డగ్రు సొస్సిన”.

29 నస్తివలె వన్ని సినూర్, “ఇదిలో, వానివలె నీను కత లెకెండ్ ఆఏండ, అర్లం ఆని లెకెండ్ వెహ్సాని.

30 నీను విజు నెస్తికి ఇజి ఏలు మాపు నెసినావ్. ఎయెర్ బా నిజీ వెన్ బాఎండ ముజాలె, వారు ఒడెబిజినికెజ్ నీను నెనిని ఇజి మాపు నెసినావ్. అందెజె నీను దేవుణు బాణిజ్ వాతికి ఇజి మాపు నమ్మిజినావ్”, ఇజి వెహ్టోర్.

31 అందెజె యేసు, “మీరు ఏలు నమిజినిదెరా?

32 ఇదిలో, మీరు మీ ఇల్కాజ్ నెద్దిజి సొని కాలం వాజినాద్. అయాక ఏలె వాత మనాద్. మీరు నజీ డిసి సొనిదెర్లె. నాను ఒరెనె ఆన. గాని నాను ఒరెనె ఆవ. నా బుబ్బ నావెట మనాన్.

33 మీరు నా వెట కూడితి మన్నిదెర్. అందెజె మీరు సమాదనం దాన్ మండ్రెజ్ నాను యా సజతిజ్ మిజీ వెహ్టా మన. యా లోకమ్ దు మిజీ కస్టమ్ కు బాదెజ్ మనె. గాని దయ్ రమ్ దాన్ మండ్రు. నాను యా లోకమ్ దు మన్ని దేవుణుదిజ్ దూసిస్సివరిజ్ గెలస్త మన్న.

17

యేసు వన్నివందిజ్ పార్లనం కిజినాన్

1 యా మాటెజ్ వెహ్సా వీస్టాండ్రె, యేసు ముస్సు పరలోకం దరోట్ బేసి ఈహు పార్లనం కిజినాన్. “ఓ బా, నాను సాదెజ్ నీను ఏర్ పాటుకెతి కాలండగ్రు ఆత మనాద్. నీను గొప్పపెరికి ఇజి నీ మరిన్ ఆత్తి నాను తోరిస్సి వందిజ్ ని మరిన్ ఆత్తి నాను గొప్పపెరికాన్ ఇజి నీను తోరిన్ ఆ.

2 నీను నజీ సితిలోకుర్ విజెరిజ్ ఎలాకాలం దేవుణువెట బత్తినిబత్తు నాను సీనివందిజ్, నీను లోకుర్ విజెరె ముస్సు నజీ అతికారం సిత్తి.

3 ఒరెండ్రె నిజమాతి దేవుణుఆతి నిజిని, నీను యా లోకమ్ దు పొక్తి యేసు క్రీస్తుజ్ నెస్తిజెనె ఎలాకాలం దేవుణువెట బత్తినిబత్తు మనాద్.

4 నాను కిదెజ్ ఇజి నీను నజీ సిత్తి పణివిజు నాను పూర్తి కిజి నీను గొప్పపెరికి ఇజి బామిముస్సు నాను తోరిస్త.

5 ఏలు ఓ బా, లోకం నీను పుటిస్ని ముజాల నివెట నాను మహివలె నజీ గవరం కితిలెకెండ, ఏలు నీ ఎద్దు నజీ గవరం కితి.

యేసు సిసూర్వందిజ్ పార్దనం కిజినాన్.

6 నీను నజీ సితివరిజ్ నాను నీ వందిజ్ వెహ్పి తోరిసి నెస్సిస్త. వీరు దేవుణుదిజ్ దూసిస్ని ననికార్ ఆవర్. వీరు నీ వారు. నీను వరిజ్ నజీ సితి. నీ మాటెజి వారు లోజీతార్.

7 నీను నజీ సితి విజు నీబాణిజె వాతెమనె ఇజి ఏలు వారు నెస్తార్.

8 ఎందానిజ్ ఇహిజ, నీను నజీ సితి మాటెజ్నాను వరిజ్సిత. వారు అయకెజ్ నమ్మితార్. నాను నీ బాణిజ్వాతికాన్ ఇజి వారు అనుమానం సిల్లెండ నెస్తార్. నీనె నజీపోక్తి ఇజి వారు నమ్మిత మనార్.

9 నాను యా సిసూర్వందిజ్ పార్దనం కిజిన. యా లోకమ్ది లోకుర్ విజెరెవందిజ్ నాను పార్దనం కివి. గాని నీను నజీ సితి విరివందిజ్ పార్దనం కిజిన. ఎందానిజ్ఇహిజ, వీరు నీ వారు.

10 నా వారు విజెరె నీ వారు. నీ వారువిజెరె నా వారు. అయలెకెండ వారు బత్కినారె, నాను గొప్పపెరికాన్ ఇజి వారు తోరిసినార్.

11 ఏలు నాను నీ డగ్రు వాజిన. నాను మరి యా లోకమ్దు మన్వ. గాని వీరు ఇబ్బె మంజినార్. ఓ నెగ్గి బుబ్బు, మాటు ఉండ్రె ఆతి లెకెండ వీరుబా ఉండ్రె ఆదెజ్, నీను నజీ సితి సత్తుదాన్ వరిజ్ కాపాడెఱ.

12 నాను యా లోకమ్దు వరి వెట మహివలె, నీను నజీ సితి సత్తుదాన్ వరిజ్ కాపాడెఱ. నాను వరిజ్ నెగ్గెండ తప్పిసి మహ. వరి లొఇ ఎలాకాలం నాననం ఆదెజ్ మన్నికాన్ ఆవండ, మహికార్ విజెరె ఎలాకాలం నాననం ఆవెతార్. దేవుణు మాటదు రాస్తి మనికెజ్ పూర్తి ఆదెజ్ యాకెజ్ విజు జర్గిదెజ్ వలె.

13 నాను ఏలు నీ డగ్రు వాజిన. నజీ మన్ని సర్ద వరి మన్నుదుబా నిండ్రు మంజిని వందిజె, నాను యా లోకమ్దు మన్నివలెనె యా సజితిజ్ వెహ్పిన.

14 నాను వరిజ్నీ మాటెజ్ సిత మన్ను. యా లోకమ్దు మన్ని దేవుణుదిజ్ దూసిస్నికార్ వరిజ్ దూసిస్తార్. ఎందానిజ్ఇహిజ, నాను లోకమ్దికాన్ ఇజలెకెండ, వారు బా లోకమ్దికార్ ఆవర్.

15 నీను వరిజ్యా లోకమ్దాన్ ఒఅ ఇజి నాను పార్దనం కివి గాని సయ్తూను బాణిజ్ వరిజ్ కాపాడెఱ ఇజినె పార్దనం కిజిన.

16 నాను లోకమ్దికాన్ఇజలెకెండ, వారు బా లోకమ్దికార్ఆవర్.

17 నీ నిజమాతి మాటెజ్నెన్పిసి, వారు దేవుణువందిజ్ కేట ఆతిలెకెండ వరిజ్ ఇడెఱ. నీ మాటెజ్నిజమాతి మాటెజ్.

18 నీను నజీ యా లోకమ్దు పోక్తి లెకెండ, నాను వరిజ్లోకమ్దు పోక్తిన.

19 నిజమాతి మాట నెసి వారు వరిజె నీ కీదు ఒపజెప్పిని వందిజ్, నాను వరి వందిజ్ని కీదు ఒపజెపె ఆజిన.

యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజిని పార్దనం వరి వందిజె ఆవి. వరి మాటెజ్ వెంజి నమ్మిదెజ్మన్ని వరిజ్విజెరె వందిజ్ నాను పార్దనం కిజిన. ఎందానిజ్ఇహిజ, నీను నా వెట కూడెజి మంజిని లెకెండ, నాను నీ వెట కూడెజి మంజిని లెకెండ వారు విజెరె ఉండ్రె ఆదెజ్. నీను నజీ పోక్తి మన్ని ఇజి లోకమ్ది లోకుర్ విజెరె నమ్మినివందిజ్ వారు మావెట కూడెజి మనీర్.

22 నాను పెరికాన్ ఇజ నీను నజీ గవరం నాను వరిజ్ సిత మన. మాటు ఉండ్రె ఆతి లెకెండ్ వారుబా ఒండ్రె అదెజె నాను సిత్ర.

23 వారు పూర్తి ఉండ్రె ఆనివందిజ్ నాను వరివెట కూడిత మన. నీను నా వెట కూడితి మన్ని. నీను నజీ పోక్తి ఇజ, నీను నజీ ప్రేమిన్ని లెకెండ్వరిజ్బా ప్రేమిన్ని ఇజ లోకుర్విజరె నెస్సి వందిజ్ వారు ఉండ్రె ఆదెజ్.

24 ఓ బా, నీను వరిజ్నజీ సీతి. అందెజె నాను మంజిని బాన్వారుబా మండ్రెజ్ ఇజ నాను కోరిజన. ఎందానిజ్ఇహిజ, నాను గొప్ప పెరికాన్ ఇజ నీను నజీ సీతి గవరం వారు సుండెదెజె. లోకం పుటిన్విండ ముజాల, నీను నజీ ప్రేమిన్తి. అందెజె నీను నజీ అయా గవరం సీత్తి.

25 సీతి నిజాయితీ మన్ని బుబ్బు, లోకమ్ది లోకుర్ నిజి నెన్ఎర్. గాని నాను నెన్ను. నీను నజీ పోక్తి ఇజ వీరు నెసినార్.

26 నాను వరి వెట కూడెజి మంజిని వందిజ్, నీను నజీ ప్రేమిన్తి లెకెండ్, వారు బా మహివరిజ్ ప్రేమిన్తివందిజ్ నాను నీ వందిజ్ వరిజ్ నెన్పిన్త మన. నెన్పిసినె మంజిన.

18

యేసుజ్ అరెస్టు కిజినార్

1 యేసు పార్దనం వీన్తి వెన్కా, వన్ని సిసూర్వెట సోతాండ్రె, కెర్రోన్ఇని జోరెడాట్టి సాహాన్. అబ్బె ఉండ్రె టోట మహాద్. వాండ్రుని వన్నిసిసూర్ అయా టోటాదు సాహార్.

2 నండో నుట్టు. యేసుని వన్నిసిసూర్ అబ్బె కూడెజి మహార్. అందెజె యేసు అయా టోటాదు మంజినాన్లె ఇజ యూద నెస్సాన్. వీండ్రె యేసుజ్యుదురి అదికారిజ కీదు ఒవజెప్పికాన్.

3 అందెజె యూద అబె వాతాన్. పెరి పుజెరిజు పరిసయ్యరు పోక్తి సెగొండార్ దేవుణు గుడిది జమాజ్ణు, మరి రోమ సయనమ్ది సెగొండారిజ్బా వన్ని వెట కూక్త తత్తాన్. వారు సిసు బొద్దు, లాండెరిజు, కూణమ్కు అన్త మహార్.

4 యేసు వన్ని మున్కు వానికెజ్విజు నెసినె, వాండ్రు సోతాండ్రె వరిజ్, “మీరు ఎయెరిజ్ రెబానిదెర్?” , ఇజ వెన్బాతాన్.

5 దన్నెజ్ వారు, “నజరేతుది యేసుజ్”, ఇహార్. అందెజె వాండ్రు, “వాండ్రు నానె”, ఇజ వెప్తాన్. అయావలె యేసుజ్ ఒవజెప్తి యూద వరి వెట నిహ మహాన్.

6 ‘వాండ్రు నానె’, ఇజ యేసు వరిజ్ వెప్తివలె, వారు వెన్కా గుసె ఆజి బూమిదు అర్దార్.

7 మరి వాండ్రు వరిజ్ వెన్బాతాన్, “మీరు ఎయెరిజ్ రెబానిదెర్?”, ఇజ. “నజరేతుది యేసుజ్”, ఇహార్ వారు.

8 అందెజె యేసు, “నాను మిజి వెప్తాగదె, వాండ్రు నానె ఇజ. మీరు నజీ రెబానిదెర్ ఇహిజ, నా సిసూర్ ఆత్తి విరిజ్ పోక్తు”, ఇజ వెప్తాన్.

9 వారు సిసూరిజ్ పోక్తిజ్, ‘నీను నజీ సీతి వరి లోఇ ఒరెన్ వన్నిజ్బా నాను పాడుకివ’ ఇజ వాండ్రు ముజాలె వెప్తి మాటెజ్ పూర్తి ఆతె.

10 సిమోన్ పేతురు డగ్రు ఉండ్రె కూడం మహాద్. నన్తివలె వాండ్రు అయాక లాగితండ్రె, విజు పుజెరిజు మున్కు పెరిపుజెరి పణిమన్నిసీజ్ ఉణెరిగిబి కత్తాన్. అయా పణిమన్నిసి పేరు మల్కు.

11 యేసు పేతురుజ్జ్, “నీ కూడం దన్నిఒరదు ఇడ్డెఅ. నాను ఓరిస్తైజ్నా బుబ్బు ఏర్పాటుకితి ప్రవేజ్ నాను ఓరిస్తైజ్నాఅవెద్ఇజి నీను ఒడ్డెబిజినిదా?”, ఇజి వెప్తాన్.

యేసుజ్జ్అన్న ముజాల ఒసిసార్

12-13 నస్త్రవలె రోమ సయ్నమ్దికార్, వరి అతికారి, జమాసుర్ యేసుజ్జ్ అస్తారె తోహ్కాతార్. వారు వన్నిజ్జ్ తోహ్కాతారె, ముజాల, అన్న ఇని వన్నిడగ్గు ఒతార్. వాండ్రు అయా ఏంటు విజు పుజెరిజ ముస్సు పెరి పుజెరి ఆతి కయపెజ్ మామ్సి.

14 యా కయపనె, ‘లోకుర్విజెరె వందిజ్ ఒరెన్ సానికాదె నెగెద్’ ఇజి యూదురి అతికారిజ్ బుద్ది వెప్తా మహాన్.

పేతురు యేసుజ్జ్ నెన్వ ఇజివెప్పినాన్

15 సిమోన్ పేతురు ని మరి ఒరెన్సినూ యేసు వెన్కా సాహార్. అయా సినూ, విజు పుజెరిజ ముస్సు పెరిపుజెరిజ్ నెల్వ ఆతికాన్. అందెజె వాండ్రు యేసువెట పెరిపుజెరి ఇండ్రోణి డేవారు సాహాన్.

16 పేతురు గవుని వెల్లి నిహమహాన్. పెరిపుజెరిజ్ నెల్వ ఆతి అయా సినూ మర్జి వాతండ్రె, గవ్నిడగ్గు నిల్లి మంజిని అయ్లిదిజ్ వెప్తాండ్రె, పేతురుజ్జ్ లోఇ కూక్ ఒతాన్.

17 అయావలె అయా అయ్లి పేతురువెట, “నీనుబా వన్ని సినూర్లోఇ ఒరిగదె?”, ఇజి వెన్బాతాన్. దన్నిజ్వాండ్రు, “నాను ఆవ?”, ఇహాన్.

18 అయావలె గొప్పు పిని మహాద్. అందెజె అతికారిజుని పణిమన్నిసిర్సినూ ఎర్సి దన్ని నుటులం నిల్లికాయ్జి మహార్. పేతురుబా వరివెట నిహండ్రె, సినూ కాయ్జి మహాన్.

పెరి పుజెరి యేసుజ్జ్వెన్బాజినాన్

19 అయావలె, విజు పుజెరిజ ముస్సు మన్ని పెరిపుజెరి యేసుజ్జ్ వన్నిసినూర్ వందిజ్ వాండ్రు నెన్పిస్తి బోద వందిజ్ వెన్బాజి మహాన్.

20 అందెజె యేసు, “నాను లోకుర్ విజెరె ఎద్దునె వెప్తామన. యూదురు విజెరె కూడ్డి వాజి మంజిని, యూదురి మీటిజ్ ఇల్కాజ్ని దేవుణుగుడిడు ఎస్తివలెబా నేర్పిసి మహా. నాను ఇనికబా డేజసాటు వెహ్విత్.

21 మరి ఎండ్రానిజ్ నజి వెన్బాజిని? నా మాట విహివరిజ్వెన్బాఅ. నాను వెప్తాకెజ్వర్గితికెజ్వారు నెస్సార్”, ఇజి వెప్తాన్.

22 యేసు యాకెజ్ వెప్తాజ్, అబ్బె నిహిమహి అతికారిజ లోఇ ఒరెన్ యేసుజ్జ్ ఉండ్రె లెపడెయితాండ్రె, “యాలెకెండ విజు పుజెరిజ ముస్సు మన్ని పెరిపుజెరిజ్ మర్జి వెప్పిని?”, ఇజి వెప్తాన్.

23 అయావలె యేసు, “నాను తపు ఇన్నిక వెప్తాజ, అయాక నజి వెహ్అ. గాని నాను నిజం వెప్తాజ, ఎందనిజ్ నజి డెయిజిని?”, ఇజి వెప్తాన్.

24 అందెజె అన్న వన్నిజ్జ్ తోహ్కా డెసనె విజు పుజెరిజ ముస్సు పెరిపుజెరి కయపడగ్గు పోక్తాన్.

యేసుజ్జ్ నెన్వ ఇజి పేతురు మరివెప్పినాన్

25 పేతురు సినూ కాయిజి నిహ మహాన్. అయావలె మహికార్వన్నిజ్, “నీనుబా వన్ని సినూర్లోఇ ఒరిగదె?”, ఇజి వెన్బాతాన్. గాని పేతురు, “నాను ఆవ”, ఇజి కెవతాన్.

26 నస్త్రీవలె పేతురు గిబ్బి తెవ్కతి పణిమన్నిసి బంతుకులు ఒరెన్ అబ్బె మహాన్. వాండ్రు విజు పుజెరిజ ముస్కు మన్ని పెరి పెరి పుజెరి పణిమన్నిసిలోణ ఒరెన్. వాండ్రు, “నిజి వన్నివెట టోటాదు నాను నుడఃతగదె?”, ఇహాన్.

27 మరిబా, “నాను నెన్వ”, ఇజి వెహ్హాన్. వెటనె కొరు కెరెతాద్.

యేసుజ్పిలాతు ముజాల ఒసినార్

28 వెన్యా యూదురు యేసుజ్ కయప బాణిజ్రోమా గవర్నరు మన్ని పెరి ఇండ్రొ ఒతార్. అయావలె పెందాల్ఆతాద్. యూదురు ఆఇ వన్ని ఇండ్రొ డుగ్గజి మయ్ల ఆనావ్ఇజి ఒడిఃబిజి వారు గవర్నరు మన్ని ఇండ్రొ డుగ్గివితార్. ఎందానిజ్ఇహిజ, వారు పస్కు బోజనం ఉండెజ్నుబమ్మక మండ్రెజ్వలె. అయాక ఉండ్రె ఆసారం.

29 అందెజె గవర్నరు ఆతి పిలాతు, వెల్లి వరిడగ్రు వాతండ్రె, విని ముస్కు ఇనిఇని నేరమ్కు మొప్పినిదెర్?”, ఇజి వెన్బాతాన్.

30 అయావలె వారు, “పిండ్రు తపు కిఇకాన్ ఇహిజ, నీ బాన్తెవితావ్మరి”, ఇజి మర్జి వెహ్హాన్.

31 పిలాతు వరిజ్, “మీరె వన్నిజ్ఒసి, మీ యూదురి రూలుదు మన్ని వజ తీర్పు సీదు”, ఇహాన్. దనిజ్వారు, “ఎయెరిజ్బా నప్తెజ్మజి అక్కుసిల్లెద్”, ఇహాన్.

32 యేసుఎలాగ మర్తి సావు సానాన్ఇజి వాండ్రు వెహ్హి మాటెజ్ పూర్తి అదెజ్ యాక జగ్గితాద్.

33 పిలాతు వన్ని ఇండ్రొ మర్జి సాహండ్రె, యేసుజ్ కూక్కిస్తాండ్రె వన్నిజ్, “నీను యుదురిజ్రాజునా?”, ఇజి వెన్బాతాన్.

34 అందెజె యేసు, “నీలోఇహాన్ వాతి మాటనా, మహికార్నా వందిజ్నిజి వెహ్హారా?”, ఇజి వెన్బాతాన్.

35 అయావలె పిలాతు, “నాను యూద వాండ్రనా? నీ సొంత లోకుర్ని నీ సొంత పెరిపుజెరిజు నిజి నాబాన్ ఒవజెప్తార్. నీను ఇన్నిక కితి?”, ఇజి వెహ్హాన్.

36 అందెజె యేసు, “నా అతికారం యా లోకమ్ది రాజురిజ్ మన్ని అతికారం లెకెండ మన్నిక ఆవిద్. నన్నిఅతికారం నజి మహిజ, యూదురు నజి అరెస్టు కివిండ నా సిసూర్ అడ్డు కిత్తార్ మరి. గాని నాను యా లోకమ్ది రాజు ఆవి”, ఇజి వెహ్హాన్.

37 “అహిజ, నీను ఒరెన్రాజునా?”, ఇజి పిలాతు వెహ్హాన్. అందెజె యేసు, “నాను రాజు ఇజి నీను వెహ్హిని. నిజమాతి మాటెజ్వెహ్హి వందిజె నాను పుట్టానె యా లోకమ్దు వాత. నిజమాతికెజ్ కోరిజినికాన్ నాను వెహ్హిని మాటెజ్ వినాన్”, ఇజి వెహ్హాన్.

38 అయావలె పిలాతు, “నిజమాతి మాటెజ్ఇన్నికెజ్?”, ఇజి వెన్బాతాన్. వెన్బాతాండ్రె వాండ్రు వెల్లి యూదురు బాన్సాహండ్రె, “వినిజ్తిర్పు సీదెజ్విని లోఇ ఇన్ని నేరంబా తోర్విద్.

39 గాని మీ అలవాటులెకెండ, ఏంటుఏంటు పస్కు పండోయ్ కాలమ్దు, “కయ్దు మన్ని ఒరెన్వన్నిజ్మజి డిఃసి పోకొఆ”, ఇజి మీరు లొస్సిదెర్. అందెజె యుదురిజ్రాజుజ్ నాను డిఃసి సీదెజ్ మీరు కోరిజినిదెరా?”, ఇజి వెన్బాతాన్.

40 అయావలె వారు, “పోని! వినిజ్పోని. బరబెజ్డిఃసి సిదా మజి”, ఇజి డేల్వి మర్జి వెహ్హాన్. యా బరబ్బు ఒరెన్ కజారి.

19

1 అందెజె పిలాతు, “యేసుజ్ ఒని కొరడెజాణిజ్ డెయ్దు”, ఇజి సయ్నమ్దివరిజ్ వెహ్న్.

2-3 సయ్నమ్దికార్ సాప్పాణిజ్ టోపి తయార్ కితారె వన్ని బురాదు తొడిగిస్తార్. వారు వన్నిజ్నండె ఎరాని నరీ సొక్క తొడ్గిస్తారె, వన్నిడగ్రు సొన్ని, “యూదురిజ్ రాజు నిజి జెయము”, ఇజి వెక్కిసి వెహ్న్. వారు వన్ని లెపాదు డెయ్యార్.

4 మరి ఉండ్రీసుటుబా, పిలాతు వన్ని ఇండ్రొణిజ్ వెల్లి వాతాండ్రె, మంద యూదురిజ్” ఇదిలో, వన్ని లొఇ ఇనితప్పబా నజి తోర్వద్ ఇజి మీరు నెస్తెజ్నాను వన్నిజ్ వెల్లి మీ డగ్రు తప్పిన్”, ఇజి వెహ్న్.

5 అందెజె యేసుజ్ సాప్పాణి టోపి ని ఎరాని సొక్క తొడ్గిస్తారె వెల్లి తతార్. అయావలె పిలాతు వరిజ్, “ఇవిలోన్వాండ్రు”, ఇజి వెహ్న్.

6 పెరిపుజెరిబుని దేవుణు గుడిడి జమాజ్ణు వన్నిజ్ సుడితారె, “వన్నిజ్ సిలువాదు కుటిజాణిజ్ డెయిజి నవ్త, సిలువాదు కుటిజాణిజ్ డెయిజి నవ్త”, ఇజి డెడిస్తార్. గాని పిలాతు, “విని లొఇ నజి ఇన్ని తపు బా తోర్వద్. అందెజె మీరె వన్నిజ్ ఒసి, సిలువాదు డెయిజి సప్ప”, ఇహ్న్.

7 అయావలె వారు, “మజి మా యూదురి రూలుజ్ మనాద్. అయా రూలుజ్ వజి వీండ్రు సాదెజ్ వలె. ఎందానిజ్ ఇహిజ, వీండ్రు, “నానె దేవుణు మరిసి ఇజి వెహ్న్”, ఇహ్న్.

8 పిలాతు యా మాటెజ్ విహిజ్ మరి ఒదె తియెల్ ఆతాన్.

9 వాండ్రు మరి వన్ని ఇండ్రొ డుగితాండ్రె యేసుజ్, నీను ఎంబెణిజ్ వాతికి? ఇజి వెన్ బాతాన్. గాని యేసు మర్జి ఇనికబా వెహ్న్ తాన్.

10 అందెజె పిలాతు, “నీను నా వెట వర్గిదా? నిజి సిలువాదు కుటిజాణిజ్ డెయ్జి సప్పెజ్ బా నజి అతికారం మనాద్. విడుదల కిదెజ్ బా అతికారం మనాద్ ఇజి నీను నెన్ ఇదా?”, ఇహ్న్.

11 అందెజె యేసు, “నా ముస్సు దేవుణు నిజి అతికారం సితిజ్ నె, నిజి అతికారం మనాద్. అందెజె నజి నీ బాన్ ఒవజెప్పికాన్ నిజి ఇంక లావు పాపం కిత్తాన్”, ఇజి వెహ్న్.

12 యా మాట విహండ్రె పిలాతు యేసుజ్ విడుదల కిదెజ్ నుడతాన్. గాని యూదురు, “నీను వినిజ్ డెసి సితిజ, నీను కయ్ సరు రాజుజ్ కులవాండ్రు ఆఇ. రాజు ఇజి వన్నిజ్ వాండ్రె వెహ్ ఆనికాన్ ఎయెన్ బా కయ్ సరుజ్ పగ ఆతికాన్”, ఇజి మరి డటం డెల్ స్తార్.

13 పిలాతు యా మాటెజ్ విహివెలె, వాండ్రు యేసుజ్ వెల్లి తతాన్. తతాండ్రె నాయం తిర్న్సికాన్ బన్ని కుర్సిదు బస్తాండ్రె యేసుజ్ సిలువాదు డెయ్ అ ఇజి తీర్పు సితాన్. అయా కుర్సి పణాణిజ్ తయార్ కితి బాడిః ఇజి కూక్సి బాడిఃదు మనాద్. అయా బాడిఃజ్ ఎబ్బి బాసదు గబత ఇనార్.

14 నస్తివలె పన్నుపండొయ్ నడిమి మన్ని విస్తాంతిది నం ముజాల మన్ని తయార్ ఆని రోజు. పెందాల్ ఆరు గంటెజ్ ఆతాద్. అయావలె పిలాతు, “ఇవిలోన్ మీ రాజు”, ఇజి యుదురిజ్ వెహ్న్.

15 అందెజె వారు, “నవ్త వన్నిజ్, నవ్త వన్నిజ్, సిలువాదు వన్నిజ్ కుటిజాణిజ్ డెయ్జి నవ్త”, ఇజి డెడిస్తార్. “నాను మీ రాజుజ్ సిలువాదు కుటిజాణిజ్ డెయిజి సప్పెజ్?”, ఇజి పిలాతు వెన్ బాతాన్. అయావలె పెరి పుజెరబు, “కయ్ సరు ఒరెండ్రె మా రాజు. మరి ఎమేణి రాజు మజి సిల్లెన్”, ఇజి వెహ్న్.

16 అందెజె పిలాతు యేసుజ్ సిలువాదు డెయ్జి సప్తెజ్ వరిజ్ ఒపజెప్తాన్. వారు వన్నిజ్ ఒతార్.

యేసుజ్ సిలువాదు పొక్కినార్

17 యేసు వన్ని సొంత సిలువ పిండిజి, పట్టుం వెల్లి వాతండ్రె బుర్ పిణికి ఇజి కూకె ఆని బాడిడు వాతాన్. ఎల్లి బాసదు దన్నిజ్ గోల్గోత ఇనార్.

18 అబ్బె సయనమ్దికార్ వన్నిజ్ సిలువాదు కుటిజాణిజ్ డెయ్తార్. వారు రివిర్ లోకురిజ్బా వన్నివెట సిలువాదు కుటిజాణిజ్ డెయ్తార్. యేసుజ్ నడిమి ఇట్టాన్. ఒరెన్ వన్నిజ్ ఉణెర్ పడకాద్. ఒరెన్ డెబర పడకాద్. ఆహె సిలువాదు డెయ్తార్.

19 పిలాతుబా ఉండ్రె బోర్డు తయార్ కిబిస్తాండ్రె, సిలువాదు తొహ్కత ఇట్టాన్. అయా బోర్డుదు, 'నజరెతుదికాన్ ఆతి యేసు. యూదురిజ్ రాజు', ఇజి రాసి ఇట్టాన్.

20 ఎల్లి, గ్రీకు, రోమ యా మూండ్రె బాసెజాణిజ్ బోర్డుదు ఆహెరాస్త మహార్. యేసు ప్రబుజ్ సిలువాదు డెయితి బాడ్డిః పట్టుం డగ్రు మనాద్. అందెజె సంఠెండార్ యూదురు అయాక సద్విత్తార్.

21 నస్తివలె యూదుర్జ పెరి పుజెరిజు పిలాతుజ్, "యూదురిజ్ రాజు ఇజి రాస్సు. గాని 'నానె యూదురిజ్ రాజు', ఇజి వీండ్రు వెప్తాన్ ఇజి రాస్అ", ఇహార్.

22 అందెజె పిలాతు, "నాను రాస్తి మన్నికదె మన్నిద్. మరి మారిస్వ", ఇహార్.

23 సయనమ్దికార్ యేసుజ్ సిలువాదు కుటిజాణిజ్ డెయితివలె వన్ని సొక్కెజ్ లాగితార్. వాండ్రు వ్డగితి మహి సాల్వదిజ్నాల్లి ముకెజ్కిస్తారె, ఉండ్రె ముక ఒరెన్ వన్నిజ్ ఆహె సీబె ఆతార్. పాదమ్దాక మంజిని ఉండ్రె నిరి సొక్కబ మహాద్. అయాక కుటు సిలిక. ముస్కుహాన్ అడ్డి దాక కుటు సిల్లెండ ఉండ్రె లెకెండగుత మహాద్.

24 ఒరెన్ మరి ఒరెన్ వెట, "అయాక కిస్మాట్. ఎయెరిజ్ అయాక వానాద్ ఇజి సీటి పొక్కి సూణాట్", ఇజి వర్గితార్. 'నా సాల్వు వారు సీబె ఆతార్. నా నిరి సొక వరిజ్ సీటి పొక్కార్*', ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జర్గితాద్. సయనమ్దికార్ అయాలెకెండ్ కిత్తార్.

25 నస్తివలె, యేసుజ్ డెయ్తి సిలువ డగ్రు వన్ని అయిసి, వన్ని కొగ్రి అయ్సి, క్లొపా ఇన్ని వన్ని ఆల్సి మరియు, మగ్దలెనె మరియు ఇనికెజ్ నిహె మహె.

26 యేసువన్ని అయ్సిని వాండ్రు నండో ప్రేయిస్తి సిసూ, డగ్రునిహి మహిక సుడెతాండ్రె అయ్సిజ్, "ఓ యా, నేండ్రుహాన్ వీండ్రె నీ మరిన్ లెకెండ మంజినాన్లె", ఇజి వెప్తాన్.

27 మరి సిసూడుజ్, "ఇదిలో నీ యాయ", ఇజి వెప్తాన్. నాండిహాన్అయా సిసూ దనిజ్వన్ని ఇండ్రొ కూక్ ఒతాన్.

యేసు సాజినాన్

28 వెన్కా, బుబ్బ ఒపజెప్తి పణిజ్ విజు ఏలు పూర్తిఆతె, ఇజి ఏలు నెస్తాన్. నెస్తాండ్రె, కీర్తన పుస్తకమదు రాస్తి మన్ని మాటెజ్ పూర్తి ఆని వందిజ్ 'నజి ఏహ్క కట్సినాద్', ఇజి వెప్తాన్.

29 అయావలె అబె నండో సేందు ద్రాక్స కడు మన్ని ఉండ్రె డొకు మహాద్. సయ్యుమ్దికార్ ఉండ్రె దూది ననిక అయా సేందు ద్రాక్సకల్లుదు ముడుక్తారె, అయాక ఇసొపు మరాతి కొమాదు తొవ్తారె, వన్ని వెయ్దు సిత్తార్.

* 19:24 19:24 కీర్తన 22:18.

30 వాండ్రు అయాక ఉటాండ్రె, “నా పణిజ్ పూర్తి ఆతాద్”, ఇజి వెహ్తాండ్రె, బుర్ర వక్కి పాణం డిఃస్తాన్.

31 నస్తివలె, అయా రోజు విస్త్రాంతిదినం ముజాల మన్ని తయార్ ఆని రోజు. మహ్సా నాండిజ్ విస్త్రాంతి దినం. యా దినం ముకెలమాతిక. ఎందానిజ్ ఇహిజు, యూదురి పస్సు పండోయి అయనాండిజె మొదోలసినాద్. నాండిజ్ మొడ సిలువాదు మండ్రెజ్ వరిజ్ ఇస్టం సిల్లెద్. అందెజె యూదురు పిలాతుజ్, సిలువాదు పొక్తి వరి కాల్కు రుజు డెయ్ జి వరిజ్ బేగి సపిసి, వరి పీనుగు సిలువెజాణిజ్ డిఃపైజ్ సెల్వ లొస్తార్.

32 పిలాతు సెలవ సిత్తిజ్, సయ్ నమ్ దికార్ వాతారె, యేసువెట సిలువాదు డెయిజి మొదోహి వన్ని కాల్కు రుజు డెయ్ తార్. వెన్కా మహి వన్ని కాల్కు బా రుజు డెయ్ తార్.

33 గాని యేసుడగ్రు వాతిజ్, వాండ్రు ముజాలె సాతాన్ ఇజి వారు నెస్తార్. అందెజె వారు వన్ని కాల్కు రుజు డెయ్ ఏతార్.

34 గాని సయ్ నమ్ దివరి లోఇ ఒరెన్ బలెందాన్ ఉండ్రె పడఃకాదు గుతాన్. గుతిజ్ వెటనె, ఏరు నల సోతె.

35 మీరుబా నమినివందిజ్, యాక జర్గితివలె సుడఃతికాన్ దనివందిజ్ వెహ్తాన్. వాండ్రు వెహ్తాక నిజమనె. వాండ్రు నిజం వెహ్సినాన్ ఇజి వాండ్రు నెస్తాన్.

36-37 ‘వన్ని డుముక లోఇ ఉండ్రె బా రుజ్ ఏద్’*, ఇజి, మరి, ‘వారు గుతివన్నిజ్ వారు సూణార్’†, ఇజి రాస్తి మన్ని దేవుణు మాటెజ్ పూర్తి ఆని వందిజె యా సజతిజ్ జర్గితె.

యేసుజ్ సమాది కిజినార్

38 యోసిపు ఇనికాన్ ఒరెన్ మహాన్. వాండ్రు అరిమతియ ఇని పట్టమ్ దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్ బా వెహ్ ఏతాన్. ఎందానిజ్ ఇహిజు, వాండ్రు యూదురిజ్ తియెల్ ఆతార్. వెన్కా వాండ్రు యేసు పీనుగు సిలువదాన్ డిఃప్పి సమాది కిదెజ్ పిలాతుజ్ సెల్ వ లొస్తాన్. సెల్వ సితిజ్ వాండ్రు వాతండ్రె మొడః ఒతాన్.

39 నికోదిమొ ఇన్నికాన్ ఒరెన్ బా వన్ని వెట సోహాన్. యా నికోదిమొనె, ముజాలె, యేసుజ్ రెయ్ తు సొన్సి సుడఃతికాన్. వాండ్రు డగ్రు ముప్పుయ్ నాల్గి కె. జి, బోలము కలప్తి అగరు ఇన్ని మొడః సబ్ ఎండ ఇడ్డి మాయమ్ కు తత్తాన్

40 వారు రివెర్, యేసు పీనుగు ఒతారె, మాయమ్ కు రాసి తెలాని పాతెజాణ్ సుటిస్తార్. యూదురు సమాది కిని ముజాల, పీనుగు తయార్ కిని అలవాటు లెకెండ్రె ఈహు కిత్తార్.

41 యేసుజ్ సిలువాదు డెయ్ తి బాడిఃదు ఉండ్రె టోట మనాద్. అబ్బె పణుకుదు దొలిస్తి ఉండ్రె కొత్తదూకి మహాద్. అబ్బె ఎయెరిజ్ బా ఎనెజ్ బా ఇడఃవిరె.

42 అయా రోజు యూదురి విస్త్రాంతిదినం ముజాల మన్ని తయార్ ఆని రోజు. మరి, అయా దూకిడగ్రు మహాద్. అందెజె వారు యేసుజ్ అబ్బె ఇట్టార్.

20

1 వారమ్ దిజ్ మొదోహి రోజు పెందాల్, సీకట్ మన్ బునె మగ్గలెనె మరియు పీనుగు నూనెజ్ రాస్టెజ్ దూకిదు సోహాద్. అది వాతిజ్, పీనుగు ఇడ్డి సమాదిదిజ్ మూక్తి పణుకు

లాగితిక సుడతాద్.

² అందెజె అది ఉహ్కాజి సొన్ని, యేసు నండో ప్రేమిస్తి సిసూ బాన్, సిమోన్ పేతురుబాన్ వాతాదె వరిజ్, “ప్రబుజ్ సమాదిదాన్ వారు ఒతార్. వన్నిజ్ ఎంబె ఇడ్తారో ఇజి మాపు నెన్ ఏవ్”, ఇజి వెహ్తాద్. (మరియవెట మరి సెగొండెక్ బోదెక్ బా మపా)

³ అందెజె పేతురుని, అయా సిసూ సోతారె సమాదిదు సొహార్.

⁴ వారు రివర్ ఉహ్కాజి సొన్ సి మహార్. గాని అయా సిసూ పేతురుజ్ ఇంక బేగి ఉహ్కాతాండ్రె సమాది ముజూల్ వాతాన్.

⁵ వాండ్రు వజ్జి సుడతిజ్, తెలాని పాతెజ్ అబె అర్త మహిక సుడతాన్. వాండ్రు లొఇ డుగ్ ఏతాన్.

⁶⁻⁷ నస్తివలె సిమోన్ పేతురు వన్ని వెన్కా వాతండ్రె లొఇ డుగితాన్. వాండ్రు తెలాని పతెజ్ అర్తి మహిక సుడతాన్. యేసు బుర్త సుటిస్తి మహి పన్ సెబా అబ్బె అర్త మహిక సుడతాన్. అయా పన్ సె, తెలాని పాతవెట కూడెవిండ నుటిస్తి డెసనె వేరె మహాద్.

⁸ వెనుక ముజాల సమాదిదు వాతి సిసూబా డుగితాన్. వాండ్రు పాతెజ్ అర్తి మహిక సుడతాండ్రె, యేసు మర్జి నిజితాన్ ఇజి నమ్మితాన్.

⁹ యేసు సాతి వరిబాణిజ్ తవ్ ఏండ మర్జి నిజ్ నాన్ లె ఇజి దేవుణు మాటదు రాస్తి మన్ని మాటదిజ్ వారు ఇంక అర్తం కిఎరె.

¹⁰ సిసూర్ వరి ఇల్కాజ్ మర్జి సొహార్.

యేసు మగ్గలెనె మరియెజ్ తోరె అజినాన్

¹¹ మరియ మరి సమాదిదు వాత మహాద్. అది వెల్లినిహదె, అడెబాజి మహాద్. అడెబాజినె అది వజ్జి సమాది లొఇ సుడతాద్.

¹² అయావలె, తెలాని పాతెజ్ పొరపాతి రిఎరె దేవుణు దూతెజి అది సుడతాద్. యేసు పీనుగుమహి బాడిడు బస్త మహార్. పాదమక దరిజ్ ఒరెన్ బస్త మహాన్. బుర్త గాడిద్ ఒరెన్ బస్త మహాన్.

¹³ వారు మరియెజ్, “ఓ బీ ఎందానిజ్ నీను అడెబాజిని?”, ఇజి వెన్ బాతార్. అందెజె అది, “నా ప్రబు మొడె ఎయెరొ పెహ్తా ఒతార్. ఎంబె ఇడ్తారో నజి తెలిఎద్”, ఇజి వెహ్తాద్.

¹⁴ యా మాటెజ్ వెహ్తాదె, వెన్కా మర్జి బేస్తాద్. బేస్తెజ్ యేసు అబ్బె నిహి మహిక సుడతాద్. గాని వన్నిజ్ గుర్తు అన్ ఏతాద్.

¹⁵ అయావలె యేసు, “ఓ బీ, ఎందానిజ్ నీను అడెబాజిని? ఎయెరిజ్ రెబాజిని?”, ఇజి వెన్ బాతాన్. వీండ్రు అయా టోటాదు పణి కినికాన్ సు ఇజి ఒడిబిజి, “బాబు, నీను వన్ని పీనుగుపిండితి ఒతి మహిజ, ఎంబె ఇడ్తి మన్నిదొ నజి వెహ్ అ. నాను సొన్ని వన్నిజ్ పెర్పు ఒనాలె”, ఇజి వెహ్తాద్.

¹⁶ నస్తివలె యేసు దన్నిజ్, “మరియ”, ఇజి కూక్తాద్. వెటనె అది మర్జి వన్ని దరిజ్ మహ్తాద్. వాండ్రు యేసు ఇజి గుర్తు అస్తాదె ఎల్లి బాసదు, “రబుని”, ఇజి కూక్తాద్. దని అర్తం బోదిస్సికాన్ ఇజి.

¹⁷ అయావలె యేసు, “నాను నా బుబ్బుడగ్రు ఇంక మర్జి సొన్ ఏనె. అందెజె నజి అసి మన్ మా. గాని నీను నా సిసూర్ డగ్రు సొన్ని వరిజ్, “నాను నా బుబ్బుడగ్రు మర్జి సొన్ సిసన. వాండ్రునె నా బుబ్బు మీ బుబ్బు. వాండ్రె నా దేవుణు మీ దేవుణు”, ఇజి వెహ్ అ”, ఇజి వెహ్తాన్.

¹⁸ అందెజె మగ్గలెనె మరియ సిసూర్ డగ్రు వాతాదె, “ప్రబుజ్ సుడత”, ఇజి వెహ్తాద్. మరి ప్రబు దన్నిజ్ వెహ్తాకెజ్ బా వెహ్తాద్.

యేసు వన్ని సిసూరిజ్ తోరె ఆజినాన్

19 అయా ఆదివారమ్నె, పొదొయ్ సిసూర్కూడితారె, సేప్లా కెప్పి బస్త మహార్. ఎందానిజ్ ఇహిజ, వారు యుదురిజ్ తియెల్ఆతార్. యూదురు వరిజ్అదికారుజ ఒపజెప్పార్ ఇజి. నస్తవలె యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెప్తాన్.

20 యాక వెప్తాండ్రె, సిలువాదు డెయ్ఎ అతివెలె వన్ని కికాజ్, వన్ని పడకాద్ వాతి గాయమ్కు వాండ్రు వరిజ్ తోరిస్తాన్. ప్రబుజ్సుడతారె సిసూర్ నండో సర్ద ఆతార్.

21-22 మరి బా యేసువరిజ్, “మిజి సమాదనం కల్లిపిద్. నా బుబ్బు వన్ని మాట బోదెస్తెజ్ నజి యా లోకమ్దు పోక్తి వజ నాను మిజి పోక్సిన్”, ఇజి వెప్తాండ్రె, వరి ముస్కు తూబితాన్. తూబితాండ్రె, వరిజ్, “దేవుణు ఆత్మదిజ్ మీ మన్నుదు ఇడోదు.

23 మీరు ఎయిపాపమ్కు సెమిస్సిదెరో, వరి పాపమ్కు సెమిస్త మనె. ఎయిపాపమ్కు మీరు సెమిస్ఇదెరో, అయకెజ్ సెమిసి మన్ఉ”, ఇజి వెప్తాన్.

యేసుతోమెజ్తోరె ఆజినాన్

24 యేసు సిసూరిజ్ తోరె ఆతివలె, పన్నెండు మన్నిసీర్ సిసూర్లోఇ మన్ని దిదుము ఇన్ని తోమా సిల్లెండ మహాన్.

25 అందెజె మహి సిసూర్, “మాపు ప్రబుజ్సుడతామ్ ఇజి వెప్తాజ్, వాండ్రు, “నాను వన్ని కికాజ్ కుంటిజాణిజ్ డెయ్తి గాయమ్ది మసదిజ్తొవిండ, అయా మసదు ముట్విండ, వన్ని పడకాదు నాను కియు ఇడోవిండ, వాండ్రు నిజిత మనాన్ ఇజి నమిఎ”, ఇహాన్.

26 ఉండ్రె వారం వెన్కా వన్ని సిసూర్విజెరి మరిబా కూడితారె, ఉండ్రె ఇండ్రె మహార్. తోమాబా వరివెట మహాన్. సేప్లా కెహె ఆత మహాద్. గాని యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెప్తాన్.

27 మరి తోమెజ్, “నీ డెస్కు ఇబ్బె ఇడోఅ. నా కికాజ్ సుడోఅ. నీ కియు సాప్పి నా పడకాద్ మన్ని గాయమ్దు ఇడోఅ. అనుమానం సిల్లెండ నమిఅ”, ఇజి వెప్తాన్.

28 అయావలె తోమా, “నీనె నా ప్రబు. నీనె నా దేవుణు”, ఇజి వెప్తాన్.

29 అందెజె యేసు వన్నిజ్, “నీను నజి సుడోతిజ్ నిజితమనాన్ ఇజి నమ్మితి. నజి తోవిండ నమ్మితికార్ గొప్ప వారు”, ఇజి వెప్తాన్.

30 యేసు వన్నిసిసూర్జ నడిమి, మరి నండో బమ్మాని పణిజ్ కితాన్. అయకెజ్ యా పుస్తకమ్దు రాన్ఉ.

31 గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని ముస్కు మన్ని మీ నమకమ్దాన్ మిజి ఎలాకాలం దేవుణువెట బత్కిని బత్కు దొప్పివందిజ్ యాకెజ్ రాస్త మన్నె.

21

1 దిని వెనుక, యేసు తిబెరియ నమ్దరం డర్గు మరి వన్ని సిసూర్జ తోరె ఆజినాన్. వాండ్రు ఈహు తోరె ఆతాన్.

2 సిమోన్ పేతురు, దిదిమ ఇజి కుకెఆని తోమా, గలీలయ ప్రాంతమ్ది కానా ఇన్ని పట్టుమ్ది నతనయేలు, జెబెదయ మరిసిర్ఆతి యాకోబు యోహాను, మరి రివీర్ సిసూర్ కూడిత మహార్.

3 సిమోన్ పేతురు, “నాను మొయోజ్ అస్తైజ్ సాన్ సిన”, ఇజి వరిజ్ వెప్తాన్. అయావలె వారు, “మాపు బా నీ వెట వానాప్”, ఇహార్. అందెజె వారు సాహార్, ఉండ్రీ డోణి ఎక్టారె సాహార్. గాని ఆ రెయితు ఇనికబా అన్ ఏతార్.

4 పొద్దు సోసి మహివలె, యేసు నమ్ దరం దరీదు నిహన్. గాని వన్ని సిసూర్ యేసు ఇజి గుర్తు అన్ ఏతార్.

5 అందెజె వాండ్రు వరిజ్, “తంబెరిజాండె, మొయోజ్ ఇన్నికబా అస్తి దెరా?”, ఇజి వెన్ బాతాన్. వారు, “సిల్లెద్”, ఇజి వన్నిజ్ వెప్తాన్.

6 నస్తివలె వాండ్రు, “డోణి ఉణెర్ పడెకాదు మీ వలెజ్ పొక్తు. మిజి దోహ్కానె”, ఇజి వెప్తాన్. వారు అయ లెకెండ కిత్తార్. మొయోజ్ నండె అర్తె. వల లాగ్ దెజ్ అట్ ఏతార్.

7 అయావలె, యేసు నండె ప్రేమిస్తి సిసూ, “వాండ్రు ప్రబు”, ఇజి పేతురుజ్ వెప్తాన్. “వాండ్రు ప్రబు”, ఇజి అయా సిసూ వెప్తా మాట విహి వెటనె, సిమోన్ పేతురు వాండ్రు లాగితి ఇడ్డి సాల్వ వడ్ గితాండ్రె, నమ్ దరమ్ దు డాట్టాన్.

8 వారు గటుధాన్ ఎంజు మెంసు నూర్లు మూరెజ్ నె దూరం మనార్. అందెజె మహి సిసూర్ మొయోజ్ మన్ని వల లాగ్ జినె డోణిదు వాతార్.

9 వారు డిగ్ జి వాతిజ్ గటుదు, సిసూ డిప్పుజ్ దనిముస్కు మొయోజ్ రోటెజ్ తోరితె.

10 యేసు వరిజ్, “మీరు ఏలు అస్తి మహి సెగం మొయోజ్ అగాట్”, ఇజి వెప్తాన్.

11 సిమోన్ పేతురు డోణి ఎక్టాండ్రె వల గటుదు లాగితాన్. అబె నూటి యాబయి మూండ్రీ పెరి మొయోజ్ వలదు నిండ్రీతె మహె. గాని నిసా మహిజ్ బా వల కింజ్ ఏతాద్.

12 యేసు వరిజ్, “రదు తిండ్రు”, ఇజి వెప్తాన్. వాండ్రు ప్రబు ఇజి వరిజ్ తెలితార్. అందెజె, నీను ఎయి ఇజి వన్నిజ్ వెన్ బాదెజ్ సిసూర్ లొ ఇ ఎయెన్ వన్నిజ్ బా దయ్ రం సిల్లెతాద్.

13 యేసు వాతాండ్రె, రొట్టెజ్ లాగితాండ్రె వరిజ్ సీబాత సితాన్. అయ లెకెండ్రె మొయోజ్ బా సిత్తాన్.

14 యేసు సాతి వరిబాణిజ్ బత్కితి వెన్కా, దినివెట ఏలు ముసార్ సిసూర్ జ తోరి ఆత్తాన్.

15 వారు తిహి వెన్కా, యేసు సిమెన్ పేతురుజ్, “యోహాను మరిసి ఆతి సిమెను, నీను మహి సిసూర్ జ ఇంక నీను నండె నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్ను ఇజి నీను నెస్సి”, ఇజి వాండ్రు వెప్తాన్. అందెజె యేసు, “నా గొరె పిలెకాజ్ మేప్ అ”, ఇజి వెప్తాన్.

16 మరిబా యేసు వన్నిజ్, “యోహాను మరిసి ఆతి సిమెను, నీను నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్ను ఇజి నీను నెస్సి”, ఇజి రిజ వెప్తాన్. అందెజె యేసు, “నా గొరెజ్ అడిః అ”, ఇజి వెప్తాన్.

17 “యోహాను మరిసి ఆతి సిమెను, నజి ప్రేమిస్తిదా?”, ఇజి ముసార్ వెన్ బాతాన్. నీను నజి ప్రేమిస్తిదా ఇజి ముసార్ దిజ్ వెన్ బాతిజ్, పేతురు బాద ఆతాన్. “ప్రబు నీను విజు నెస్సికి. నాను నిజి ప్రేమిస్ను ఇజి నీను నెస్సి”, ఇజి పేతురు వెప్తాన్. అందెజె యేసు, “నా గొరెజ్ మేప్ అ”, ఇజి వెప్తాన్.

18 “నాను నిజం నీవెట వెహ్నిన, నీను దజడః మనివలె, నీను తయార్ ఆజి నీ ఇన్ఠం ఆతి బాడిఃదు సాహి. గాని నీను డొక్ర ఆనివెలె, నీకికు నీను సాప్పి. మరి ఎయెన్ బా నిజి తోహ్ని నిజి ఇన్ఠం సిల్లి బాడిఃదు పిండిజి ఒనాన్”, ఇజి వెప్తాన్.

19 పేతురు ఎలాగమర్తి సావు సాజి దేవుణు గొప్పపెరికాన్ ఇజి తోరిస్నాండ్రో, దనివందిజ్ వాండ్రు యా మాటజ్ వెహ్లాన్. వెన్కా వన్నిజ్, “నా సిసూ ఆజి రఅ”, ఇజి వెహ్లాన్.

20 పేతురు వెనుక మహ్తాండ్రె, యేసు నండో ప్రేమిస్తి సిసూ, వరి వెన్కా వాజినిక సుడతాన్. (యా సిసూనె పస్కు బోజనం తిహివలె యేసు గుంజమ్దు ఒరిగితాండ్రె, “ప్రబువా, నిజి అదికారిజ కీదు ఒవజెప్పికాన్ ఎయెన్”, ఇజి వెన్బాతికాన్).

21 పేతురు వన్నిజ్ సుడతాండ్రె, “ప్రబువా, వినిజ్ ఇన్నిక జర్గినాద్?”, ఇజి వెన్బాతాన్.

22 అందెజె యేసు, “నాను మర్జి వానిదాక వాండ్రు బత్కిదెజ్ నజి ఇస్టం ఆతిజ, నిజి ఇన్నిక? నీను నా సిసూ ఆజి వెన్కా వాదెజ్ వలె”, ఇజి వెహ్లాన్.

23 యేసు అయలెకెండ వెహ్లాజ్, యా సిసూ సావీన్ ఇజి ఉండ్రీ మాట మహి వరి నడిమి సెద్రిస్తాద్. గాని వాండ్రు సావీన్ ఇజి యేసు వెహవితాన్. నాను వానిదాక వాండ్రు బత్కిదెజ్ నజి ఇస్టం ఆతిజ, నిజి ఇన్నిక?”, ఇజినె వాండ్రు వెహ్లాన్.

24 యా సజతిజ వందిజ్ వెహ్లాకాన్ యా సిసూనె. వీండ్రె ఆయాకెజ్ రాస్త ఇట్టాన్. వాండ్రు వెహ్లాకెజ్ నిజం ఇజి మాపు నెసినావ్.

25 యేసు మరి నండో సజతిజ్ కిత్తాన్. అయాకెజ్ విజు రాసి ఇడదెజ్ ఇహిజ, రాసిని పుస్తకమ్కు అస్తెజ్ యా లోకమ్దు మన్ని బాడ్డి సాల్వీద్ ఇజి నాను ఒడకీస్తు ఇజి.

అపొస్తురు కిత్తి పణిజ్

నెల్వ కిబిసినిక

లూక నువార్త రాస్తిమహి లూకనె యా పుస్తకం రాస్తాన్. లూక ఒరెన్ డాక్టరు. క్రీస్తు సకం 60-63 నడిమి యాక రాస్త మనాద్ ఇజి వెహ్సినార్. క్రీస్తు సాజి నిజీతి వెన్కా మొదోహి 30 వంటిజ్ లోక జర్గితకిజ్ ఇబ్బె రాస్తా మన్నె. లూక నువార్తదు యేసుక్రీస్తు కిత్తి గొప్ప పణిజి వందిజ్ లూక రాస్తాన్. వెనుక, యేసుక్రీస్తు పరలోకమ్దు సాహి వెనుక దేవుణు ఆత్మ వాతండ్రె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసమ్దాన్ అంతియొకయాదు, బాణిజ్ రోమపట్ను దాక యేసుక్రీస్తు వందిజ్ నువార్త సాటిస్తారె అపొస్తురు అయ కాలమ్దు కిత్తి పణిజి వందిజ్ ఇబ్బె రాస్త మనాద్.

దేవుణు యేసుజ్ పరలోకమ్దు ఒత్తాన్

1-2 నా ప్రియమాతి దెయొపిలా, నాను ముందాల్ రాస్తి పుస్తకమ్దు, దేవుణు యేసుజ్ పరలోకమ్దు ఒనెండ యేసు కిత్తి విజు పణిజి వందిజ్, యేసు నెన్పిస్తి విజు మాటెజివందిజ్ రాస్త మనాద్. దేవుణు యేసుజ్ పరలోకమ్దు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు ఆత్మ సత్తుదాన్ ఆడ్ర సిత్తాన్.

3 యేసు కష్టమ్కు ఓరిసి సాతి వెనుక నిజితండ్రె, నాను బత్కిత్త ఇజి అపొస్తురు అనుమానం సిల్లెండ నమ్మిదెజ్ యేసు వరిజ్ తోరె ఆత్తాన్. నలపయ్ రోస్కాజ్ నండో సుట్కు యేసు అపొస్తురుజ్ తోరె ఆతండ్రె దేవుణు ఏలుబడి: వందిజ్ వర్గితాన్.

4 వారు కూడేజి వాతివలె యేసు ఈహు ఆడ్ర సిత్తాన్, “యెరూసలేం పట్ను డి:సి సొన్యాట్. నా బుబ్బు మిజీ సీనా ఇజి ఒట్టు కిత్తి వన్ని ఆత్మ ఇని ఇనాయమ్వందిజ్ నాను ముందాల్నె వెహ్గాదె. దన్నివందిజ్ కాప్ కిజి మండ్రు.

5 యోహాను ఏరుదాన్ బాప్తినం సిత్తాన్. గాని సెగం రోస్కు సాహిజి దేవుణు మిజీ వన్ని ఆత్మదాన్ బాప్తినం సీనాన్”, ఇహాన్.

6 అపొస్తురు యేసు వెట కూడేజి వాతారె వెన్బాతారె, “ప్రబువా, ఏలునె మా ఇస్రాయేలు లోకాజ్ మా దేసెమ్ది ఏలుబడి: మర్జి సీనిలెనా?”.*

7 యేసు వెహ్సాన్, “కాలం వందిజ్ నా బుబ్బానె ఏర్పాటు కిత్తాన్. అక్కెజ్ విజు నా బుబ్బాతి దేవుణు అతికారమ్దు మనాద్. యాకెజ్ విజు ఎనెజ్ జర్గినాద్ ఇజి మీరు నెస్రెజ్ అవ్సరం సిల్లెద్.

8 అహిజ, దేవుణు ఆత్మ మీ ముస్కు వానివలె మీరు సత్తు ఆనిదెర్. అయావలె మీరు యెరూసలేమ్దు, యూదయ దేసెం విజు, సమరియ దేసెం విజు, లోకం విజుబాన్ నా వందిజ్ వెహ్సా నా సాసిర్ ఆనిదెర్”.

9 యా మాటెజ్ వెహ్సాండ్రె వారు నుడేజిమహిజ్ దేవుణు యేసుజ్ పరలోకమ్దు ఒత్తాన్. అయావలె ఉండ్రి మొసాప్ వాతాదె అడ్డు కిత్తిజ్ వారు యేసుజ్ తోర్ఏండ ఆత్తారె.

* 1:6 1:6 అయ కాలమ్దు ఇస్రాయేలు లోకురి దేసెం రోమాదికార్ ఏలుబడి: కిజి మహోర్.

10 యేసు ఆగాసం మున్ను సొన్ని మహిజ్ వారు ఆగాసం దరోట్నె డిటం బేసి మహార్. అయావలె వెటనె తెల్లాని పాతెజ్ పొర్పాతిమహి రిఎర్ దూతార్ పరి డగ్రు నిహార్.

11 “ఓ గలీలయాదికిదెరా, మీరు ఎండనిజ్ ఆగాసం దరోట్ సుడేజనిదెర్? మీ డగ్రుహాన్ దేవుణు పరలోకమ్దు యేసుజ్ ఒతాన్. ఎలాగ సాహండ్రో అయావజనె మర్జి వానాన్లె”, ఇజి వారు పరిజ్ వెహ్టార్.

త్తియెజ్ అపొస్తురు వెట కూడేపైజ్ వీర్పాటు కిత్తార్

12 వెనుక అపొస్తురు ఒలివ మరెక్ మన్ని గొరోతాణ్ యెరూసలేం పట్టుమ్దు మహ్తా సాహార్. (ఒలివ మరెక్ మన్ని గొరోన్ యెరూసలేం పట్టుం డగ్రునె. ఉండ్రీ కిలో మీటర్ దూరం మనాద్)

13 వారు యెరూసలేమ్దు సాహారె వారు మహి మేడః గదిదు ఎక్టార్. వారు ఎయెర్ ఎయెర్ ఇహిజు, పేతురు, యోహాను, యాకోబు, అంద్రెయ, పిలిపు, తోమా, బర్తోలోమయి, మత్తయి, అల్పయ్ మరిసి ఆతి యాకోబు, జలోతె† ఇని మరి ఉండ్రీ పేరు మహి సీమోను, యాకోబు మరిసి ఆతి యూద ఇనికార్.

14 వారు విజేరె కూడితారె ఉండ్రె మన్నుదాన్ డిన్విండ పార్లనం కిజి మహార్. పరివెట సెగొండెక్ అయ్లికిడోక్కెబా వాతె మహె. యేసు యాయ ఆతి మరియ, వన్ని తంబెర్సిర్బా అబ్బె మహార్.

15 సెగం రొన్ను సాహి వెనుక డగ్రు డగ్రు నూట ఇర్వయ్ మణిసిర్ యేసుజ్ నమ్మితికార్ కూడిత మహార్. పేతురు పరినడిమి నిహండ్రె ఈహు వెహ్టాన్,

16 “తంబెరిజాండె, దేవుణు మాటదు రాస్తి మహిక తవ్విండ జర్గితాద్. దేవుణు ఆత్మ సత్తుదాన్ దావీదు రాజు యూద వందిజ్ ముందాల్నె వెహ్టికాద్ జర్గితాద్. యా యూద యేసుజ్ అస్తెజ్ వాతివరిజ్ సరి తోరిస్తాన్.

17 వాండ్రు మా లొఇ ఒరెన్. ఎండనిజ్ ఇహిజు మాపు అపొస్తురు వెట కూడేజి పణి కిదెజ్ యేసు వన్నిజ్ వీర్పాటు కిత్తాన్”.

18 (యా యూద మొసెం పణిదాన్ సంపాదిస్తి డబ్బుజాణ్ బూమి కొటాన్. అబ్బె గడియబుర కితాండ్రె అర్తాండ్రె సాతాన్. అయావలె పొట బదెజ్ ఆజి వన్నిజ్ విజా వెల్లి సోతె.

19 యెరూసలేమ్దికార్ విజేరె యా సజతిజ్ వెహారె నెస్తార్. అందెజె యూద అర్తినాతి యా బూమిదిజ్ పరి బాసాదు అక్కెల్లెమ ఇజి వెహ్టార్. దన్ని అర్లం ఇనిక ఇహిజు, ‘ఒరెన్ లోకుదిజ్ సప్తి వందిజ్ దొహ్తి డబ్బుదాన్ కొటి బూమి’ ఇజి అర్లం).

20 పేతురు మరి వెహ్టాన్, “కిర్లనం పుస్తకమ్దు ముందాల్నె ఈహు రాస్త మనాద్: వన్ని ఇల్లు ఎయెన్బా మన్విండ ఆపిన్, దన్ని లొఇ ఎయెన్బా బత్తిఎండ ఆపిన్”. ఈహుబా రాస్త మనాద్: అపొస్తుడు‡ వజ వాండ్రు కిత్తి పణి మరి ఒరెన్ లాగె ఆపిన్.

21-22 అందెజె మాపు పదకొండు మణిసిర్ అపొస్తురు వెట కూడేజి మండ్రెజ్ మరి ఒరెన్ వన్నిజ్ వీర్పాటు కిదెజ్వలె. యోహాను యేసుప్రబుజ్ బాప్తినం సిత్తి బాణిజ్ అసి యేసుప్రబు పరలోకమ్దు సొనిదాక మా నడిమినె కూడేజిపాడేజి మా వెట మహికాన్ ఒరెన్ వన్నిజ్ అవ్సరం. ఎండనిజ్ ఇహిజు యేసు సాతి పరిబాణిజ్ మర్జి బత్తితాన్ ఇజి వాండ్రుబా మా వెట సాసి మండ్రెజ్.

† 1:13 1:13 జలోతె ఇహిజు పటుదల మన్నికాన్ ఇజి అర్లం ‡ 1:20 1:20 అపొస్తురు. సజమ్దిజ్ సుడేజి నడిపిస్తెజ్ వీర్పాటు ఆజి పొకె ఆతికార్

23 అందెజె కూడఁజి వాతి మహికార్ రిఎరి పేర్కు వెహ్టార్. ఒరెన్ యోసేపు (వన్నిజ్ యుస్తు, బర్నబ ఇని పేర్కుబా మహె) మరి ఒరెన్ మత్తియ.

24-25 అయావలె వారు ఈహు పార్లనం కిత్తార్, “ప్రబువా, విజెరి మన్నుదు మన్ని విజు ఆలోసనమ్కు నీను నెసిని. యూద, వన్నిజ్ తగితి బాడ్డిదు సాహాన్. వాండ్రు డిసిసాహి పణి, ఇహిజ సజమ్దిజ్ నడఁపిసి సేవకిని పణి సీదెజ్ వన్నిజ్ బదలు యా రిఎర్ లొఇ ఎయెజ్ నీను ఏర్పాటు కిత్తి ఇజి మజి తోరోన్అ”.

26 వెనుక వారు సీటిజ్ పొక్టార్. అయావలె మత్తియ ఇని పేరుదాన్ సీటి వాతాద్. అందెజె మత్తియెజ్బా పదకొండు మణిసిర్ అపొస్తురు వెట లెక్క కల్పార్.

2

పెంతెకొస్తు పండోయ్ నాండిజ్ దేవుణు ఆత్మ వాజినాద్

1 పెంతెకొస్తు ఇని పండోయ్ నాండిజ్ యేసుజ్ నమ్మితికార్ విజెరికూడఁజి ఉండ్రె ఇండ్రె మహార్.

2 వెటనె ఆగానమ్దాన్ ఉండ్రె జాటు వాతాద్. అయ జాటు, పెరి గాలి వానివజ జాటుదాన్ వాతాదె వారు బస్తిమహి ఇండ్రె నిండ్రెతాద్.

3 వారు నుడఁజిజ్ సిసుబొద్దు లెకెండ్ తోర్నిక ఉండ్రె వాతాదె ఒరెన్ ఒరెన్ మున్ను ఉండ్రె ఉండ్రె కొనెజ్ డిఁగితె.

4 విజెరె మున్ను దేవుణు ఆత్మ సత్తు వాతిజ్ వారు, వరిజ్ నెన్ఇ బాసెజ్ వర్గిదెజ్ మొదోల్స్తార్. దేవుణు ఆత్మనె నెన్ఇ బాసె వర్గిదెజ్ వరిజ్ సత్తు సితాన్.

5 అయావలె విజు దేసమ్కాణిజ్ వాతిమహి బక్తిమన్ని యూదురు యెరూసలేం పట్టుమ్దు మహార్.

6 యూదురు మంద లోకుర్ యా జాటు వాతిబాన్ కూడఁజాత్. వారు వర్గినిక వీరు వన్ని వన్ని సొంత బాసెజాణిజ్ వెహారె యా కూడఁజి వాతి మహి యూదురు బమ్మ ఆతార్. “వీరు మాటు వర్గిని బాసెజ్ వర్గిజనార్ కొట”, ఇజి వెహ్టార్.

7 అయావలె వాతి మహికార్ విజెరె ఒదె బమ్మ ఆతారె ఒరెన్ వెట ఒరెన్ వెహ్టార్, “యాక ఎలాగ? వీరు విజెరె గలీలయాదికార్ అవీరా?”

8 గాని మాపు పుట్టిమహి నాహ్కాణి ఆఇ ఆఇ బాసెజ్ యా గలీలయాదికార్ వర్గిజనార్. యాక మాపు వెంజినాప్.

9-11 పార్తియికు, మదియికు, ఎలామియుకు, మెసాపొతేమియ, యూదయ, కపదోకియ, పొంతు, ఆసియ, పుగియ, పంపులియ, అయ్గుప్పు, కురెనె డగ్రు మన్ని లిబియ, రోమ దేసెమ్దాన్ కూల వాతికార్ (యూదురు, యూదమతం నమ్మితి యూదురు ఆఇకార్) క్రేతియురు, అరెబియురు, దేవుణు కిత్తి గొప్పు పణిజ్ మాటు విజెటి పుట్టి బాసాదు వెహ్నిక వెంజినాట్.

12 ఒడిఁబిత్తిజ మన్ను కూడఁవిద్. యాక ఇనిక ఆనాద్లెనొ”, ఇజి వారు విజెరె పంబ్ర ఆతారె ఒరెన్ వెట ఒరెన్ వర్గితార్.

13 సెగొండార్ వీరు తియాజ్ ద్రాక్స రసం ఉటారె సొస్త మనార్ ఇజి వరిజ్ సెకాల్ కిత్తార్.

పేతురు కూడఁజి వాతి లోకుర్ వెట వెహ్నినాన్.

14 అయావలె పదకొండు మణిసిర్ అపొస్తురు వెట మహి పేతురు నిజితండ్రె అబ్బె కూడఁజి వాతి లోకుర్ వెట డటం వెహ్టాన్, “యెరూసలేమ్దు బత్రిజిని మా సొంత

లోకుర్ ఆతి యూదయ లోకాండె, నాను వెహ్విక నెగ్రెండ వెండ్రు. వీరు విరిజ్ నెన్ ఇ బాసెజ్ వర్గితిక మీరు వెహిదెర్.

15 మీరు ఒడిజిని లెకెండ వీరు సోస్తికార్ ఆవెర్. పొద్దు సోసి ఏలు అంబెలి వేడఃబా ఆవ్ద.*

16 గాని దేవుణు మాటెజ్ వెహ్వి యోవెల్ ప్రవక్త ముజాలె వెహ్వికదె మీరు సుడఃజినిదెర్.

17 యోవెల్ ప్రవక్త ఇనిక వెహ్విన్ ఇహిజ ఆకార్ దినమ్కాజ్ నాను ఇనిక కిన ఇజి దేవుణు వెహ్వినాన్. విజు లోకాజ్ నా ఆత్మదిజ్ సిన. మీ మరిసిర్, మీ గాడ్సిక్, ప్రవక్తరు లెకెండ దేవుణు మాటెజ్ వరగినారె. మీ దజ్డెజ్ దేవుణు బాణిజ్ వాని దర్సనమ్కు† నూణార్. మీ డొక్రార్బా దేవుణు బాణిజ్ వాని కలెజ్ నూణారె.

18 అయ ఆకార్ దినమ్కాజ్ నా ముస్కు నమకం ఇడఃతి పణి మణిసిరిజ్ బా విజేరిజ్, అయ్లి కొడెకాజ్, మొగ్గ కొడెకాజ్ నా ఆత్మ సినా. వారు విజేరి దేవుణు మాటెజ్ వెహ్విరె.

19 ఆగాసం ముస్కు విజేరి నూణి వజ నాను గొప్ప బమ్మాతి పణిజ్ తోరిస్సు. యా బూమి ముస్కు ఎయెర్బా తొణ పణి నాను కిన. నల, సిను, కర్నిగోయి బూమి ముస్కు వానెలె.

20 ప్రబు మర్జి వాని అయ గొప్ప బమ్మాని దినం వాని ముజాల పొద్దు సీకటి ఆనాద్లె. నెల నల లెకెండ ఎరాజ్ ఆనాద్లె.

21 అయావలె ఎయెర్బా దేవుణు పేరు అసి వన్ని ముస్కు. నమకం ఇట్టిజ వరిజ్ విజేరిజ్, దేవుణు, తీర్పుదాన్ గెల్పిస్సాన్లె.

22 పేతురు మరి వెహ్విన్, “ఇస్రాయేలు లోకాండె, నెగ్రెండ వెండ్రు. నజరేతు వాండ్రు ఆతి యేసు అతికారం దేవుణు బాణిజ్ వాతిక ఇజి దేవుణు రుజువ్ కిత్తాన్. ఎలాగ ఇహిజ, యేసు వెట మీ లోణ కిత్తి గొప్ప పణిజాజ్, ఎయెర్ కిదెజ్ అట్ ఇ బమ్మాతి పణిజాణ్ రుజువ్ కిత్తాన్. యాక విజు మీరు నెసినిదెర్.

23 యా యేసుజ్, ఒరెన్ మణిసి మీ డగ్రు ఒపజెప్తాన్. యా సజతి దేవుణు ముందాల్నె నెస్తాన్. యాక దేవుణు ముందాల్నె ఏర్పాటు కిత్తి సజతి. మీరు యేసుజ్ నెఇవరి దర్పుదాన్ అస్తిదెరి సిలువ ముస్కు డెయేజి సప్తిదెర్.

24 గాని దేవుణు యేసుజ్ సావుదాన్ తప్పిసి బత్తిస్తాన్. నండొ మాలెజ్ ఆజి సాతాన్ గాని దేవుణు వన్నిజ్ సావుదు డిన్ ఏతాన్. యేసుజ్ ఎలాకాలం తొహ్ని ఇడఃదెజ్ సావుదిజ్ అట్ ఏండ ఆతాద్.

25 యేసు మాటెజ్ దావీదురాజు ముందాల్నె ఈహు వెహ్విన్ నాను దేవుణుదిజ్ ఎల్లకాలం నా డగ్రు సుడఃజి మహా. దేవుణు నా ఉణెర్ పడఃక మనాన్. అందెజె నాను మన్సుదు మాలెజ్ ఆవి.

26 అందెజె నా మన్సుదు నాను గొప్ప సర్ద ఆజిన. నాను సర్ద ఆజి వర్గిజిన. నాను నా ఒడెల్ దేవుణుదిజ్ ఒపజెప్ప. ఎందనిజ్ ఇహిజ ఒడెల్ సాతి వెనుక మరి బత్తిస ఇజి నాను నెసిన్.

27 ఎందనిజ్ ఇహిజ సిను నా పాణమ్దిజ్ డిన్ ఇ. నమ్మిదెజ్ తగ్వికాన్ ఆతి నీ నేవ కినివన్ని పీనుగు సబ్జె సొండ్రెజ్ సరి సిఇ.

* 2:15 2:15 యూదురు పండెయ్ వేడఃదు పెందాల్నె ఉణ్ ఎర్. పార్సం వీజితి వెనుక తొమ్మిది గంట వెనుకానె ఉణార్ † 2:17 2:17 దర్సనమ్కు. దేవుణుబాణిజ్ వాని మాటెజ్ ని బొమ్మెజ్ కలాదు సుడఃతి లెకెండ తెలివి మహివలె నూణిక

28 నీను నజీ ఎలాకాలం బత్కిని సరి తోరిస్తి. నీను నా వెట మహిజ్ నాను గొప్ప సర్ద ఆజిన”.

29 “నా తంబెరిజాండె, నాను దయ్ రమ్ దాన్ వెహ్సిన, మా అనిగొగొ ఆతి దావీదురాజు సాతండ్రె వన్నిజ్ ముస్తార్. వన్నిజ్ ముస్తా బాడ్డి ఎంబె మనాద్ ఇజి ఏలుబా మాటు నెసినాట్.

30 గాని దావీదురాజు దేవుణు ప్రవక్త. దేవుణు వన్ని పేరు అసి వాండ్రె దావీదురాజు వెట ఒట్టు పొక్తాన్. అక్క ఇనిక ఇహిజ, దావీదురాజు కుటుమ్ దాన్ ఒరెన్ వన్నిజ్ దావీదురాజు లెకెండ్ రాజు కిన ఇజి. యాక దావీదురాజు నెస్త మహాన్.

31 దేవుణు యేసుక్రీస్తుజ్ సాతి వరి బాణిజ్ డిస్ ఏవ్ ఇజి, యేసుక్రీస్తు పీనుగు సబ్జి సాన్ ఏవ్ ఇజి దావీదురాజు ముందాల్పా నెస్తాన్. ముందాల్పా నెస్తాండ్రె, యేసు సాతి వెనుక మరి మరజి నిజ్ నాలె ఇజి ముందాల్పా దావీదురాజు వెహ్సాన్.

32 యా యేసుజ్ దేవుణు మరజి బత్కిస్తాన్. దన్నిజ్ మాపు విజెపె సాసీర్.

33 అహిజ దేవుణు యేసుజ్ వన్ని ఉణెర్ పడకాద్ బన్ పిసి వన్నిజ్ ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడెజినికెజ్ వెంజినికెజ్ యేసు మజి సీనా ఇజి వెహ్సా దేవుణు ఆత్మనె.

34-35 దావీదురాజు వెహ్సాక వన్ని వందిజె ఆవిద్. దావీదురాజు పరలోకమ్ దు సాన్ ఏవ్. గాని వాండ్రు ఈహు వెహ్సాన్, నాను నిజి పడకా వరిజ్ నీ పాదమ్ కాజ్ ముణుకుజ్ ఉణెరి మాడిస్ పిస్సిదాక నీను నా ఉణెర్ పడకాదు బసి మన్ అ ఇజి దేవుణు నా ప్రబు వెట వెహ్సాన్.

36 పేతురు మరి వెహ్సాన్, “ఇస్తాయేలు కుటుమ్ దికార్ ఆతి మాటు విజెటి యాక అనుమానం సిల్లెండ నెస్తాజ్ వలె. మీరు సిలువాద్ సప్తి యేసుజ్ దేవుణు ప్రబువజ, క్రీస్తువజ ఏర్ పాటు కిత్తాన్”.

37 యాక వెహ్సా లోకుర్ వరి మన్సుదు నండొ బాద ఆజి పేతురుజ్ మరి అపొస్తరుజ్ వెన్ బాతార్, “దాదారండె, ఏలు మాపు ఇనిక కిదెజ్ అట్టాప్?”.

38 అయావలె పేతురు వెహ్సాన్, “మీ పాపమ్ కు విజు ఒప్పుకోడెజి డిసిసీజి, దేవుణుదిజ్ లోజిజినాప్ ఇజి విజెరిజ్ తోరిస్తెజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్తెజ్ బాప్తినం లాగె ఆదు. అయావలె మీ పాపమ్ కు నొరి ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దోహ్ క్వాద్లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొడెరిజ్, దూరమ్ ది వరిజ్ విజెరిజ్ దేవుణు సీనాన్. వన్ని ముస్కు నమ్మిదెజ్ దేవుణు కూక్కి వరిజ్ విజెరిజ్ దేవుణు ఆత్మ సీనాన్”.

40 మరి నండొ నండొ మాటెజాణ్ పేతురు వరిజ్ గటిజ వెహ్సాన్. దేవుణుదిజ్ డిసి సాని యా సెజ లోకాజ్ వాని తీర్పుదాన్ మీరు గెల్పి సాండ్రెజ్ ఇజి పేతురు వరిజ్ మరి మరి వెహ్సాన్.

41 పేతురు వెహ్సా మాటెజ్ నమ్మితికార్ బాప్తినం లాగె ఆతార్. అయా రోజు రమరమి మూండ్రె వేలు లోకుర్ యేసుజ్ నమ్మిత్తి వరివెట కూడితార్.

42 వారు అపొస్తురు నెన్పిస్తి మాటెజ్ డిన్విండ మహార్. వారు యేసుజ్ నమ్మిత్తికార్ కూడెజి మంజిని బాన్ డిన్విండ కూడెజి వాతారె ప్రబు వీర్పాటు కిత్తి బోజనం కిజి మహార్. డిన్విండ పార్లనం కిజి మహార్.

43 అపొస్తురు దేవుణు సత్తుదాన్ నండో బమ్మాని పణిజ్ బమ్మాని గుర్తుజ్ కిత్తార్. అయావలె విజేరె నండో బమ్మ ఆతార్.

44 యేసుజ్ నమ్మిత్తికార్ విజేరె ఉండ్రె మన్సు మంజి వరిజ్ కల్లితి మహికవిజు విజేరి వందిజ్ కర్సు కిత్తార్.

45 అక్కాదె ఆవిండ వారు వరి ఆస్తిజ్ పొర్ని ఎయెజ్ ఎయెజ్ అవ్సరం మనాదొ వరిజ్ సిత్తార్.

46 రోజు తవ్విండ వారు యెరూసలేమ్దు మన్ని దేవుణు గుడిది డేవాదు కూడెజి వాజి మహార్. వారు విజేరె ఇల్లుదిజ్ తవ్విండ కూడెజి వాతారె సర్ల ఆజి బోజనం కిజి మహార్. ఎయెజ్బా అవ్సరం మన్ని వరిజ్ వారు సర్లదాన్ సీజి మహార్.

47 వారు దేవుణుదిజ్ స్తుతి కిజి మహార్. బాన్ మహికార్ విజేరె యా యేసుజ్ నమ్మిత్తి వరి వందిజ్ 'వీరు ఎసానొ నెగ్గికార్' ఇజి వెహ్తార్. రోజురోజు యేసుప్రబు మున్సు నమకం ఇడెతి వరి లెక్క వాండ్రు నండో కిత్తాన్.

3

నడిదెజ్ అల్లెసాట వన్నిజ్ పేతురు నెగెండ కిత్తాన్.

1 ఒర్నెండు వేలె మూండ్రి గంటెజ్ టయమ్దు, లోకుర్ దేవుణు గుడిదు పార్లనం కిని టయమ్దు పేతురు, యోహాను, రిఎర్ కూడెజి దేవుణు గుడిదు సొన్సి మహార్.

2 పుట్టి బాణిజ్ అసి నడిదెజ్ అల్లెసాట ఒరెన్ సాట వాండ్రు అబ్బె దేవుణు గుడి లొఇ సొని సరిపడెకాద్ డబ్బు లొసి మహాన్. దేవుణు గుడిది డేవాదు సొని అయ సరి పేరు సుందరం ఇహార్. అయ సాట వన్నిజ్ వన్ని లోకుర్ రోజు పిండిజి తసి అయ పడెకాద్ ఇడెజి మహార్.

3 పేతురు యోహాను దేవుణు గుడిదు సొని సరి డగ్రు వాతిజ్ అయ సాట వాండ్రు డబ్బుజ్ లొస్తాన్.

4 లొస్తిజ్, పేతురు వన్నిజ్ డిటం బేస్తాన్. యోహానుబా వన్నిజ్నె డిటం బేస్తాన్. పేతురు వన్నివెట, "నీను మా దరోట్నె బేన్అ" ఇహాన్.

5 అందెజి సాట వాండ్రు, వీరు ఇనికబా సీనార్ ఇజి ఒడిబిజి వరి దరోట్నె బేస్తాన్.

6 గాని పేతురు, "నిజి సీదెజ్ నా బాన్ డబ్బుజ్ సిల్లు. గాని నా బాన్ మనిక నాను నిజి సీనా. నజరేతుదికాన్ యేసుక్రీస్తు అతికారమ్దాన్ నీను నడిఅ", ఇహాన్.

7 పేతురు అయ సాట వన్నిజ్ ఉణికిదు అస్తాండ్రె నిక్తాన్. వెటెనె వన్ని పాదమ్కు కణ్క కాల్కు సత్తు ఆతె.

8 వాండ్రు లిట్నె నిజెండ్రె నడితాన్. పేతురు యోహాను వెట దేవుణు గుడి డేవాదు నడిజి సాహండ్రె డాట్టి దేవుణుదిజ్ స్తుతి కిత్తాన్.

9 విండ్రు నడిసినిక, దేవుణుదిజ్ స్తుతి కినిక విజేరె నుడెతార్.

10 దేవుణు గుడిఁదు సొని నుందరం ఇని సరిడగ్రు బసి డబ్బు లొసి మహి అయ సొట వాండ్రు వీండ్రె ఇజి వారు గుర్తు అస్తార్. వన్నిజ్ జర్గితిక నుడఁజి వారు విజేరె గొప్ప బమ్మ ఆతార్.

దేవుణు గుడిఁదు మన్ని లోకుర్ వెట పేతురు వర్గిజనాన్

11 పేతురు, యోహానుని అయ నెగెండ ఆతికాన్ దేవుణు గుడిఁదు మన్ని సొలోమోను ఇని అరబుదు మహార్. ఆ నెగెండ ఆతికాన్ పేతురుజ్ యోహానుజ్ గటిజ కిక్యాజ్ అసి మహాన్. అబ్బె మహికార్ జర్గితిక నుడఁజి గొప్ప బమ్మ ఆతారె పేతురు యోహానుని నెగెండ ఆతి సొట వాండ్రు మహిబాన్ ఉహ్మాన్ వాతార్.

12 లోకుర్ విజేరె కూడఁజి వానిక నుడఁతండ్రె పేతురు వరిజ్ వెన్బాతాన్, “ఇస్తాయేలు లోకాండె, ఇబ్బె జర్గితిక నుడఁజి మీరు ఎందనిజ్ బమ్మ ఆజినిదెర్? మీరు ఎందనిజ్ మజి బేసినిదెర్? మా సొంత సత్తుదాన్, మా బక్తిదాన్ వీండ్రు నడిఁదెజ్ కిత్తావ ఇజి మీరు ఒడిఁబిజినిదెరా?”

13 మా అనిగొగొర్ ఆతి అబ్రాహాం, ఇస్సాకు, యాకోబు పార్దనం కిత్తి దేవుణు, యా సొట వన్నిజ్ నెగెండ కిజి వన్ని సేవ కినికాన్ ఆతి యేసుజ్ నండొ మర్కొద సిత్తాన్. గాని మీరు యా యేసుజ్ సప్తెజ్ ఒపజెప్తిదెర్. పిలాతు యేసుజ్ డిఁసిసీదెజ్ ఒడిఁబిత్తిజ్ బా మీరు పోని ఇహిదెర్.

14 పాపం సిల్లి నీతినిజయ్యిమన్ని వన్నిజ్ మీరు పోని ఇజి వెప్తిదెర్. లోకాజ్ సప్పి ఒరెన్ వన్నిజ్ మీరు డిఁసిసీదు ఇజి వెప్తిదెర్.

15 విజు దన్నిజ్ బత్తు సిత్తి వన్నిజ్ మీరు సప్తిదెర్. గాని దేవుణు వన్నిజ్ మర్జి నిక్రాన్. యా సజతి వందిజ్ మాపు విజెపె సాసిర్.

16 యేసు సత్తుదాన్ నె యా సొట వాండ్రు సత్తుఆతాన్. మీరు విజిదెరె ఏలు నుడఁజినిక యేసు పేరుదు ఇడ్డి నమకమ్దానె వాతాద్. యేసు ముస్కు ఇడ్డి నమకమ్దానె విన్నిజ్ సత్తు వాతాద్”.

17 “ఏలు నా తంబెరెజాండె, మీరుని, మీ పెద్దెలుజ్, యేసుజ్ కిత్తిక మీరు ఇనిక కిజినిదెరొ ఇజి నెన్వండ కిత్తిదెర్ ఇజి నాను నెస్సు.

18 దేవుణు నండొ పంటజ్ ముందాల్నా విజేరె ప్రవక్తర్ వెట ‘వన్ని క్రీస్తు కస్టమ్కు ఓరిస్నాలె’ ఇజి వెప్తా మహాన్. దేవుణు ముందాల్నా వెప్తివజనె ఈహు జర్గితాద్.

19-20 దేవుణు మీ పాపమ్కు సెమిస్సి వందిజ్ మీరు మీ పాపమ్కు ఒప్పుకొడఁజి డిఁసిసీజి దేవుణు డగ్రు మర్జి రదు. దేవుణు మీ ఆత్మదిజ్ నెగ్గి పాణం సీని వందిజ్, దేవుణు మీ వందిజ్ ఏర్పాటు కిత్తి క్రీస్తు ఆతి యేసుజ్ మీ డగ్రు పొక్కి వందిజ్ దేవుణు డగ్రు మర్జి రదు.

21 దేవుణు ముందాల్నా వాండ్రు పొక్తి ప్రవక్తర్ వెట వెప్తివజ దేవుణు విజు దన్నిజ్ కొత్తాక లెకెండ్ కినిదాక యేసు పరలోకమ్దు మండ్రెజ్ వలె.

22 దేవుణు - ప్రవక్తరు లోఇ ఒరెన్ మోసె ఇనికాన్ ఈహు వెప్తాన్: “ప్రబు ఆతి మీ దేవుణు, నా లెకెండ్ ఒరెన్ ప్రవక్తెజ్ మీ లోకుర్ లోఇహాన్ పుటిస్నాలె. వాండ్రు వెప్పిక విజు మీరు నెగ్గెండ వెంజి లోజిదెజ్ వలె.

23 ఎయెర్బా ఆ ప్రవక్త వెప్పిక వెంజి లోజివండ మహిజ వాండ్రు దేవుణు లోకుర్ వెట మన్వండ పూర్తి పాడాఁనా సొనాన్.

24 సముయేలు ప్రవక్త, వన్ని వెనుక వాతి ప్రవక్తరు విజేరె యా దినమ్కాజ్ వందిజ్ దేవుణు సీత్తి మాటెజ్ ముందాల్నె వెహ్తా మహార్.

25 దేవుణు ప్రవక్తర్ వెట కిత్తి ఒట్టు మీ వందిజె. దేవుణు మీ అనిగోగోరు వెట కిత్తి ఒట్టు మీ వందిజె. మీ అనిగోగో ఆతి అబ్రాహాం వెట దేవుణు కిత్తి ఒట్టు ఇనిక ఇహిజు, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిస్సు.

26 అందెజె దేవుణు వన్ని సేవ కిని క్రీస్తుజ్ ఏర్పాటు కితాండ్రె ముందాల మీబానె పోక్తాన్. ఎందనిజ్ పోక్తాన్ ఇహిజు మీ సెఇ పణిజాణ్ మజి డిబిసి దేవుణుబాన్ మర్జి తసి మిజి దీవిస్సెజ్ వన్నిజ్ పోక్తాన్”, ఇజి పేతురు వెహ్తాన్.

4

పేతురుజ్ యోహానుజ్ అస్తార్

1 పేతురు యోహాను లోకుర్ వెట వర్గిజి మహిజ్ పుజేరిజు, సదుకెయరు, దేవుణు గుడిడు మన్ని జమాన్జ అతికారి పేతురు యోహాను బాన్ వాతార్.

2 అపొస్తరు నెస్పిసినిక వెహారె వారు కోపం ఆతార్. ఎందనిజ్ ఇహిజు యేసు సాజి మర్జి బత్తితాన్ ఇజి వెస్సా సాతికార్ మరి బత్తినార్ ఇజి వారు రుజుప్ కిత్తార్.

3 వారు పేతురుజ్ యోహానుజ్ తోహ్తా ఒతారె మహ్నా నాండిజ్ పెందాల్ దాక జెలిదు ఇట్టార్. ఎందనిజ్ ఇహిజు అయావలె పొదోయ్ ఆత మహాద్.

4 గాని వారు నెస్పిసినిక వెహికార్ నండో లోకుర్ యేసుజ్ నమ్మితార్. యేసుజ్ నమ్మిత్తి వరి లెక్క ఏలు రమరమి అయ్దు వేలు ఆతాద్.

5 మహ్నా నాండిజ్ యూద అతికారిజ్, యూద పెద్దెలుజు, యూదురి రూలు నెస్పిసినికార్ వీరు విజేరె యెరూసలేమ్దు కూడిత వాతార్.

6 విజేరె పుజేరిజు ముస్సు పెరి పుజేరి ఆతి అనయు, కయవయు, పెరి పుజేరి కుటుమ్దికార్ యోహాను, అలెక్సందరు ఇనికార్, మరి సెగెండార్ మొగకోడోర్ బాన్ కూడిత వాతార్.

7 వారు పేతురుజ్ యోహానుజ్ వరి ముందాల నిల్పారె వెన్బాతార్, “మీరు ఎమేణి సత్తుదాన్, ఎయె పేరుదాన్ ఇక కిత్తిదెర్?”.

8-9 అయావలె దేవుణు ఆత్మ సత్తు పేతురు ముస్సు వాతాద్. అయ సత్తుదాన్ నె పేతురు వెహ్తాన్: “లోకాజ్ అతికారిజాండె, పెద్దెలుజాండె, యా సొట వన్నిజ్ కిత్తి నెగ్గి పణి వందిజ్ వాండ్రు ఎయె సత్తుదాన్ నెగెండ్ ఆతాన్ ఇజి మీరు మజి నేండ్రు కరాయి ఇజినిదెర్.

10 దిన్ని వందిజ్ మాపు వెహ్తాజ్ ఇహిజు, మీరు విజిదెరి, ఇస్రాయేలు లోకుర్ విజేరె యాక నెస్సెజ్ వలె. మీరు సిలువాదు డెయ్జి సప్తి యేసుక్రీస్తుజ్ దేవుణు మర్జి బత్తిస్తాన్. సాతి బత్తితి నజరేతు వాండ్రు ఆతి యేసుక్రీస్తు సత్తుదాన్ నె వీండ్రు పూర్తి నెగెండ ఆజి మీ నడిమిదు మనాన్.

11 యా యేసుక్రీస్తు వందిజ్ ఈహు రాస్త మనాద్. అక్క ఇనిక ఇహిజు, ఇల్లు తోహ్ని మీరు నెక్తిపాక్తి పణుకునె మూలదిజ్ మూలపణుకు ఆతాద్.

12 యేసునె మిజి వాజిని సిక్కుదాన్ గెల్పెస్సెజ్ అట్నాన్. ఎందనిజ్ ఇహిజు యా లోకమ్దు లోకాజ్ వాని సిక్కుదాన్ వరిజ్ గెల్పెస్సెజ్ మరి ఎయెరి పేరుబా దేవుణు సివితాన్. యేసు పేరునె సితాన్.

13 పేతురు యోహాను తియోల్ ఆవిండ నెగ్గెండ వర్గిజని మాటెజ్ వెంజి నన్హద్రిం సజమ్దికార్ బమ్మ అతార్. 'వీరు ఇనికబా నెన్ఇకార్, పెరి సదువు సద్విఇకార్' ఇజి నెస్తారె బమ్మ అతార్. పేతురు యోహాను యేసు వెట కూడేజి మహికార్ ఇజి వారు నెస్తార్.

14 గాని ఆ నెగెండ ఆతికాన్ పేతురు యోహాను వెట నిల్ని మహిజ్ ఇనికబా మర్జి వెహ్తాజ్ నన్హద్రిం సజమ్దికార్ అట్వెతార్.

15 అందెజె వారు పేతురుజ్ యోహానుజ్ నెగెండ ఆతి వన్నిజ్ సజమ్ లోఇహాన్ వెల్లి పోక్తారె వరి లోఇ వారె వర్గితార్.

16 "విరిజ్ ఇనిక కిదెజ్? వీరు కిత్తి బమ్మాని పణి వందిజ్ యెరూసలేమ్దికార్ విజేరె నెసిన్దార్. అక్క జర్గివెతాద్ ఇజి మాటు వెహ్తాజ్ అట్వెట్.

17 యేసు పేరు అసి ఎయెన్ వెటబా ఎనెజ్బా ఇనికబా వెహ్తాజ్ ఇజి మాటు విరిజ్ గటిజ వెహ్తాజ్. యా సజతి మహికార్బా నెన్విండ మండ్రెజ్" ఇహార్.

18 అయావలె వారు పేతురుజ్ యోహానుజ్ లోఇ కూక్తారె, "ఎనెజ్బా యేసు పేరు అసి వెహ్తాజ్. యేసు పేరు అసి బోదిస్తాట్", ఇజి ఆడ్ర సితార్.

19 గాని పేతురు యోహాను ఈహు వెహ్తార్, "ఏలు మీరె వెహ్తు, దేవుణుదిజ్ లోబడేదెజా మిజి లోజిదెజా? దేవుణు సుడేతిజి ఎమేణిక సరియాతిక?

20 మాపు ఇహిజ, మాపు సుడేతి దన్ని - వందిజ్ మాపు వెహి దన్ని వందిజ్ వెహ్ - విండ మండ్రెజ్ అట్వెట్".

21 పేతురుజ్ని యోహానుజ్ ఎలాగ సిక్కు సీదెజ్ ఇజి వారు నెన్వితార్. ఎందనిజ్ ఇహిజ దేవుణు కిత్తి గొప్పు పణి వందిజ్ లోకుర్ విజేరె దేవుణుదిజ్ స్తుతి కిజి మహార్. అందెజె సజమ్దికార్ పేతురుజ్ యోహానుజ్ 'యేసు పేరు అసి వెహ్తాజ్ ఆవిద్' ఇజి గటిజ మరి బెద్రిసి వెహ్తారె డిస్తార్.

22 దేవుణు వన్ని సత్తుదాన్ బమ్మాతి పణి కిజి నెగెండ కిత్తి యా సొట వన్నిజ్ వయ్సు నలవయ్ పంటిజ్ ఎక్కునె మహద్.

నమ్మితి వరి పార్దనం

23 పేతురు యోహాను డిబె ఆతి వెటనె నమ్మిత్తి వరి డగ్రు సొహార్. సొహారె పెరి పుజేరిబు, పెద్దెలుబు వరి వెట వెహ్తాక విజు వెహ్తార్.

24 పేతురు యోహాను వెహ్తాక వెహారె వారు విజేరె కూడితారె ఉండ్రె మన్నుదాన్ దేవుణుదిజ్ ఈహు పార్దనం కిత్తార్, "విజు దన్నిజ్ ప్రబు ఆతి దేవుణు, నీనె ఆగాసం, బూమి, సమ్దరం, వనక లోఇ మన్ని విజు దన్నిజ్ పుట్టిన్.

25 దేవుణు, నీ సేవ కినికాన్ ఆతి మా అనిగొగొ దావీదురాజు వెహ్తాక నీ ఆత్మ సత్తుదాన్ నీనె వెహ్పిన్తి. అక్క ఇనిక ఇహిజ, యా యూదురు ఆఇకార్ ఎందనిజ్ కోపం ఆజినార్. యా లోకుర్ ఎందనిజ్ ఇని దన్నిజ్ పణిదిజ్ రెవ్కెజ్ ఒడిబిజినార్?

26 బూ లోకమ్ది రాజుర్, అతికారి లోకుర్, ప్రబు ఆతి దేవుణు వెట, దేవుణు ఏర్పాటు కిత్తి క్రీస్తు వెట ఎద్రిస్తెజ్ కూడేజి వాజినార్.

27 ఆహె హేరోదు, షొంతి పిలాతు, యూదురు, యూదురు ఆఇ లోకుర్ వెట యా పట్నమ్దు కూడిత మహార్. వారు నీను ఏర్పాటు కిత్తి పాపం సిల్లి నీ సేవ కినికాన్ ఆతి యేసుజ్ సప్తెజ్ ఒడిబిజి మహార్.

28 దేవుణు, నీ సత్తుదాన్, నీ ఇస్టమ్దాన్ ఇనిక జర్గినాద్లె ఇజి ముందాల్నై నీను ఏర్పాటు కిత్తిదో అయాలెకెండె వారు కిత్తార్.

29 ఏలు ప్రబువా, వారు మజీ బద్దిసిని దన్నిజ్ సుడేఅ. మీ సేవ కినికార్ ఆతి మాపు నండో దయరమ్దాన్ నీ మాటెజ్ బోదిస్తెజ్ మజీ సత్తు సిదా.

30 కస్టమ్కు మన్ని వరిజ్ నెగెండ్ కిజి మీ సత్తు తోరిన్అ. మీ బాణిజ్ వాతి నమ్మిదెజ్ తగ్గికాన్ ఆతి మీ సేవ కినికాన్ ఆతి యేసు పేరుదాన్ గొప్ప బమ్మాతి పణిజ్ బమ్మాతి గుర్తుజ్ కిఅ”.

31 వారు పార్దనం కిత్తి వెనుక వారు కూడేజి మహి బాడ్డి కద్దితాద్. అయావలె దేవుణు ఆత్మ సత్తు వరి మున్సు వాతాద్. వారు దయరమ్దాన్ దేవుణు మాటెజ్ వెహోర్.

నమ్మితికార్ వరి ఆస్తి అపొస్తరుబాన్ తతార్

32 నమ్మితికార్ విజేరె ఉండై మన్ను ఆజి ఎయెన్బా సరినె వన్నిజ్ మన్నిదన్ని - బాణిజ్ ఇనికబా నాదిసె ఇజి ఆవద్ ఇజి వరిజ్ మన్నిక విజెరె వందిజ్ కర్పు కిత్తార్.

33 దేవుణు సత్తుదాన్ బమ్మాతి పణిజ్ కిజి అపొస్తరు ప్రబు ఆతి యేసు, సాతివరి - బాణిజ్ మరీజి బత్తితాన్ ఇజి సాసి వెప్పి మహోర్. దేవుణు దయాదర్మం వరి మున్సు నండో మహోర్.

34-35 బూమిజ్ ఇల్కు కల్గితి మహికార్ విజేరె అక్కెజ్ పొర్ని కల్గితి డబ్బు అపొస్తరు డగ్గు తతార్. విజేరిజ్ వరివరి అవ్సరం సుడేజి సీబాజి సితార్. అందెజె వరి లొఇ ఎయెన్బా సరి అవ్సరం వాతిజ తక్కు సిల్లెండ ఆతాద్.

36 కుప్ర దేసమ్దు పుట్టి లేవి కుటుమ్దికాన్ ఆతి యోసేపు ఇని ఒరెన్ మహోర్. వన్నిజ్ అపొస్తరు బర్నబ ఇజి కూక్కి మహోర్. (వన్ని పేరు అర్దం ఇనిక ఇహిజ సాయం కినికాన్ ఇజి)

37 వాండ్రు వన్నిజ్ మహి బూమి ఉండ్రై పొర్ని అయ డబ్బు అపొస్తరు డగ్గు తతాన్.

5

అననియ, సపీర

1 అయావలె అననియ ఇని ఒరెన్ మహోర్. వన్ని ఆల్ని పేరు సపీర. వారుబా ఉండ్రై బూమి పొర్తార్.

2 పొర్తారె మాసి సెగం ఇట్టాండ్రై మిగ్గితి డబ్బు అపొస్తరు డగ్గు ఒతాన్. యాక విజు ఆల్నిబా నెస్తాద్.

3 అయావలె పేతురు అననియెజ్, “నీ బూమి పొర్ని డబ్బుజాణి సెగం డాఃప్తి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం పణి కిదెజ్ నీను ఎందనిజ్ నీ మన్నుదిజ్ సర్వూనుజ్ ఒపజెప్తి?

4 బూమి నీ బాన్ మహివలె నీదినెగదె. అక్క పొర్తివలెబా ఆ డబ్బు నీ సొంతనె గదె. నిన్ని పణి కిదెజ్ ఎందనిజ్ నీ మన్నుదు ఒడిఃబిత్తి? నీను లోకు వెట ఆవద్, దేవుణు వెటనె అబద్దం వర్గితి”, ఇజి వెహోన్.

5 అననియ యా మాటెజ్ వెహివెటనె అర్తాండ్రై పాణం డిఃస్తాన్. యాక వెహికార్ విజేరె త్రియెల్ ఆతార్.

6 దజ్డాయెర్ వాతారె పీనుగుదిజ్ పాతెజ్ సుట్టిస్తారె, పిండిజి ఒతారె ముస్తారె.

7 రమరమి మూండ్రై గంటెజ్ వెన్కా వన్ని ఆల్ని జర్గితిక నెన్విండ లొఇ వాతాద్.

8 పేతురు దన్ని వెట, “మీరు యా బూమి నిస్సా డబ్బుదిజె పొర్తిదెరా, వెహాఅ”, ఇహాన్. వెన్బాతిజ్ అది, “నిస్సాదిజె పొర్తాప్”, ఇహాద్.

9 పేతురు దన్ని వెట, “మీరు రిజదెర్ కూడఃజి దేవుణు ఆత్మదిజ్ తప్పు వెహ్తాదెర్. దేవుణు ఆత్మదిజ్ తప్పు వెహ్సి మొసెం కిదెజ్ మీరు ఎందనిజ్ ఒడిఃబిత్తిదెర్? ఇదిలో నీ మాసిజ్ ముస్తికార్ ఇబ్బె మనార్. వారు నిజిబా పిండిజి ఒనార్”, ఇహాన్.

10 వెటనె అది పేతురు పాదం డగ్రు అర్తాదె పాణం డిఃస్తాద్. అయ దజ్డాఃయెర్ లోఇ వాతారె అది సాతాద్ ఇజి సుడఃతారె దన్నిజ్ పిండిత ఒతార్. ఒతారె మాసి డగ్రు ముస్తార్.

11 దేవుణు సజమ్దు మహికార్ విజెరె, యా మాటిజ్ వెహికార్ విజెరె గొప్ప తియెల్ ఆతార్.

అపొస్తరు నండో లోకాజ్ నెగెండ కిత్తార్

12 అపొస్తరు లోకుర్ నడిఃమి నండో బమ్మాతి పణిజ్ బమ్మాతి గుర్తుజ్ కిత్తార్. నమ్మిత్తికార్ విజెరె ఉండ్రె మన్ను ఆజి దేవుణు గుడిఃదు మన్ని సొలోమోను అరుజు ఇని బాడ్డిదు కూడఃజి వాజి మహార్.

13 ‘యా నమ్మిత్తికార్ ఎస్సానొ నెగ్గికార్’ ఇజి లోకుర్ వెహ్తార్. అహిజ్బా మరి ఎయెర్బా నమ్మిత్తికార్ వెట కూడఃదెజ్ తియెల్ ఆతార్.

14 గాని నండో లోకుర్, మొగ్గకొడొర్, అయ్లికొడొక్ యేనుజ్ నమ్మిత్తారె నమ్మిత్తి వరివెట కూడిఃతార్.

15 అందెజె అపొస్తరు కిత్తి గొప్ప పణిజ్ సుడఃతారె కస్టం మన్ని వరిజ్ సాప మున్ను మన్నుమ్ మున్ను పేతురు నడిఃజి వాని సరిపడఃకాదు తతార్. ఎందనిజ్ ఇహిజి పేతురు అయ సరి వానివలె వన్ని నీడఃబా తాక్తిజి నెగెండ ఆనార్ ఇజి.

16 యెరూసలేమ్దు సురుల మన్ని నాహ్లాణిజ్బా నండో లోకుర్ బాన్ వాతార్. వరి లోఇ కస్టమ్కు ఆతివరిజ్, దెయమ్ కాణిజ్ మాలెజ్ ఆతివరిజ్ అబె తసి మహార్. విజెరె నెగెండ ఆతార్.

యూదురి అతికారిజు అపొస్తరుజ్ మాలెజ్ కిత్తార్

17 నస్తవలె విజెరె పుజెరిజి మున్ను పెరి పుజెరి, వన్ని వెట కూడిఃతి మహికార్ విజెరె, ఇహిజి, సదుకెయరు ఇని పార్లి లోఇ సెగెండార్ అపొస్తరు వెట గొప్ప గోస ఆతార్.

18 వారు అపొస్తరుజ్ అస్తారె పట్టుమ్దు మన్ని జెలిదు ఇట్టార్.

19 గాని దేవుణు దూత పొదొయ్ వాతండ్రె జెలిది సేప్లాజ్ రేతాండ్రె వరిజ్ వెల్లి తతాన్.

20 వెల్లి తతాండ్రె దూత, “మీరు దేవుణు గుడిః డేవాదు సొన్ని లోకాజ్ విజెరిజ్ యా కొత్త బత్తువందిజ్ పూర్తి వెహ్తు” ఇహాన్.

21 వారు జాయ్ ఆని డగ్రు దేవుణు గుడిః డేవాదు సొహారె దూత వెహ్తా వజి లోకాజ్ బోదిస్తాజ్ మొదొల్స్తార్. వెనుక, విజెరె పుజెరిజి మున్ను పెరి పుజెరి, వన్నివెట మహికార్ వాతారె సన్హాద్రి సజమ్దు మహి యూదపెద్దెలుజి విజెరిజ్ కూక్సి మీటిజ్ కిత్తార్. మీటిజ్దు కూడిఃతారె జెలిదు మన్ని అపొస్తరుజ్ వరిబాన్ తత్తెజ్ జమాన్జి పొక్తార్.

22-23 గాని వారు జెలిదు సొన్ని సుడఃతిజ్ పేతురుని యోహూను లోఇ సిల్లెర్. వారు మహ్తా వాతారె వెహ్తార్, “మాపు సొన్ని సుడఃతిజ్ జెలిదు సేప్లాజ్ తాలం అర్పె మహి,

కాప్ కినికార్ సేప్లాజ ముందాల్నె నిహ మహార్. గాని మాప్ సొన్ని సేప్లాజ్ రేనివలె లోఇ వారు సిల్లెర్”.

24 వీరు వెప్టిక వెహరె పెరి పుజేరిబు, దేవుణు గుడిఃది జమాన్జ అతికారి గొప్పు బమ్ము ఆతారె, ‘ఇక ఇనిక ఆనాద్లెనొ’ ఇజి ఒడిఃబితార్.

25 అయావలె ఒరెన్ వాతండ్రె, “ఇదిలో మీరు జెలిదు ఇడ్డిమహి లోకుర్ ఏలు దేవుణు గుడిఃదు నిహరె లోకాజ్ బోదిసినార్”, ఇజి వెప్టాన్.

26 వెప్టిజ్, అతికారి జమానుజ వెట సొహండ్రె అపొస్తురుజ్ కూక్త తతార్. ‘లోకు మజి పణుకుజాణిజ్ డెయ్నార్లెను’ ఇజి తియెల్ ఆతారె అపొస్తురుజ్ ఒపిసి కూక్త తతార్.

27 వరిజ్ కూక్త తతారె సన్హద్రిం సజం నడిఃమి నిల్వ్తార్. నిల్వ్తారె విజేరె పుజేరిజ ముస్సు పెరి పుజేరి వరివెట వెన్బాతాన్:

28 “యా యేను పేరు అసి బోదిన్మాట్’ ఇజి మాపు మిజి డటం బెద్రిసి వెప్టాప్గదె. గాని మీరు యెరూసలేమ్దు విజు మీ బోద సొట్టిదెర్. సొతి వన్ని వందిజ్ మాప్ వన్నిజ్ సప్టాప్ ఇజి మీరు మా ముస్సు తప్పు ఇడెదెజ్ సుడఃజినిదెర్”, ఇహాన్.

29 దన్నిజ్ పేతురు మరి అపొస్తురు, “లోకాజ్ ఆవిద్, దేవుణుదిజి మాపు లోజిదెజ్ గదె?

30 మీరు యేసుజ్ సిలువాదు డెయ్జి సప్తిదెర్. గాని మా అనిగొగొరి వలెహాన్ అసి మన్ని దేవుణు, వన్నిజ్ సొతి వరి బాణిజ్ నిక్తాన్.

31 యా యేసుజ్ రాజు మరిసి వజ, విజెరిజ్ రక్సిసిని వన్ని వజ దేవుణు గొప్పు మర్యాద సితండ్రె వన్ని ఉణెర్ పడఃకాదు బన్పిస్తాన్. ఎందనిజ్ ఇహిజ ఇస్తాయేలు లోకుర్ వరి పాపమ్కు డిసి దేవుణుదిజ్ లోజిదెజ్. వరి పాపమ్కు నొరె ఆదెజ్ సరి సీదెజ్ ఇజి దేవుణు వన్ని ఉణెర్ పడఃకాదు యేసుజ్ బన్పిస్తాన్.

32 యా సజతిజ వందిజ్ మాపు సాసిర్. దేవుణుదిజ్ లోజిని వరిజ్ దేవుణు సీని వన్ని ఆత్మబా యా సజతిజ వందిజ్ సాసి”, ఇజి వెప్టాన్.

33 అపొస్తురు వెప్టిక వెంజి విజేరె పుజేరిజ ముస్సు పెరి పుజేరి, వన్నివెట మహికార్ కోపం ఆతారె ‘వరిజ్ సప్పాప్’ ఇజి ఒడిఃబితార్.

34 అయావలె సజమ్దు మహి ఫ్రిసయ్యరు లోఇ ఒరెన్ గమాలియేలు ఇన్నికాన్ సన్హద్రిం సజమ్దు నిహండ్రె వెప్టాన్, “వీరు సణెం సజమ్దాన్ వెల్లినె మనీర్”. గమాలియేలు ఎయెన్ ఇహిజ యూదురి రూలుజ్ నెస్పిసిని వరిలోఇ ఒరెన్. లోకుర్ విజేరె వన్నిజ్ మర్యాద సీజి మహార్.

35 అపొస్తురుజ్ వెల్లి షొక్తారె గమాలియేలు సజమ్ది లోకాజ్ ఈహు వెప్టాన్, “ఇస్తాయేలు లోకాండ్, యా లోకాజ్ మీరు ఇనిక కిదెజ్ ఇజి ఒడిఃబిజినిదెరో జాగర్త మండ్రు.

36 నెగం పంటిజ్ ముందాల దూద ఇనికాన్ ఒరెన్ నిజితండ్రె నాసు గొప్పువాండ్రు ఇజి వెప్టాన్. రమరమి నాల్లి వందెజ్ లోకుర్ వన్నివెట కూడిఃతార్. ఎయెరో వన్నిజ్ సప్టార్. వన్నివెట కూడిఃతి మహికార్ విజేరె సెద్రితారె వరి పణి ఇని దన్నిజ్ రెవిండాతా సొహాద్.

37 వెనుక, లోకుర్ లెక్క సుడఃని జనాబా దినమ్కాజ్ గలీలయ వాండ్రు ఆతి యూద ఇనికాన్ ఒరెన్ నిజిత్తాన్. మంద లోకుర్ వన్నివెట కూడిఃతారె వారు ఏలుబడిః కినివరి ముస్సు ఎద్రిస్తార్. వన్నిజ్బా ఎయెరో సప్టార్. వన్నివెట కూడిఃతి మహికార్ విజేరె సెద్రిత సొహార్.

38 అందెజె, నాను ఇనిక వెప్పొన ఇహిజ, విరిజ్ ఇనికబా కిమాట్. విరిజ్ డిసిసిఅ. ఎందనిజ్ ఇహిజ విరి ఆలోసనమ్కు, విరి పణిజు లోకువలెహాన్ వాతిక ఇహిజ అది ఇనిదన్ని పణిదిజ్ రెవ్ండాన సొనాద్.

39 గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అట్ఇదెర్. అక్కాదె ఆవండ మీరు దేవుణు వెట టంటెజ్ ఆతికార్ ఇజి మిజి తెలినాద్”.

40 నజమ్దికార్ గమాలియేలు వెప్పొ మాటదిజ్ ఒప్పుకొటార్. వారు అపొస్తురుజ్ కూక్పిసి వరిజ్ కొరడెడాన్ డెయ్బిసి యేసు పేరు అసి ఎసెజ్బా బోదిస్మాట్ ఇజి డటం వెప్పొ వరిజ్ డిస్టార్.

41 యేసు పేరు వందిజ్ మాలెజ్ ఒరిస్సెజ్ తగితికార్ ఆతి వందిజ్ అపొస్తురు డెయ్తి దెబ్బ తిహిజ్బా సర్ద ఆజి అబెణిజ్ సాహర్.

42 రోజు అపొస్తురు దేవుణు గుడిః డేవాదు, లోకురి ఇల్కాజ్ బోదిసి మహర్. యేసు దేవుణు పోక్తి క్రిస్తునె ఇజి నెగ్గిమాట వారు తప్వండ బోదిసి మహర్.

6

అపొస్తురు ఏడుగురు మొగ వరిజ్ ఏర్పాటు కిత్తార్

1 యేసుప్రబుజ్ నమ్మితికార్ ఆ కాలమ్దు నండో లోకుర్ ఆజి వాతార్. అయావలె ముండ మణిసిరిజ్ బోజనం సిని దన్నిలోఇ, మా ముండ మణిసిరిజ్ బోజనం సిఏర్ ఇజి గ్రీకు బాస వర్గిని యూదురు ఏబ్బి బాస వర్గిని యూదురు మున్కు మొరో ఆతార్.

2 అయావలె వన్నెండు మణిసిర్ అపొస్తురు నమ్మితి వరిజ్ విజెరిజ్ కూక్తరె వెహ్టార్, “మాపు బోజనం సీబాజి సిని వందిజ్ దేవుణు మాట నెస్పిస్సెజ్ డిసి సినిక తగివద్.

3 తంబెరిజాండె, అందెజె ఏడుగురు మొగ వరిజ్ ఏర్పాటు కిదు. మీ లోఇ దేవుణు ఆత్మ నిండ్రీతి మన్ని, గెణం నిండ్రీతి మన్ని విజెరె ఒప్పుకొటి మని ఏడుగురు మొగ్గ వరిజ్ ఏర్పాటు కిదు, మాపు వరిజ్ యా పణి ఒపజెప్పాప్.

4 అహిజ మాపు పార్దనం కిదెజ్, దేవుణు - మాట నెస్పిస్సెజ్ కేట మంజినాప్”, ఇహ్సార్.

5-6 అపొస్తురి మాటెజ్ అబ్బె కూడిఃతి మహి లోకాజ్ విజెరిజ్ ఇప్టం ఆతాద్. అందెజె దేవుణు మున్కు పూర్తి నమకం ఇడఃజి దేవుణు ఆత్మ సత్తు పూర్తి నిండ్రీతి మహి సైపాను, పిలిపు, ప్రొకొరు, నికనొరు, తిమొను, పర్మనసు, యూద మతమ్దు కూడిఃతి అంతియొకియ దేసెమ్దికాన్ నికొలాసు ఇని ఏడుగురు మొగవరిజ్, నమ్మితికార్ అపొస్తురి ముందాల తతార్. అపొస్తురు పార్దనం కితారె వరి మున్కు కిక్కు ఇడఃజి వరిజ్ అయా పణి కిదెజ్ అతికార్ం సితార్.

7 అందెజె మరి నండో లోకుర్ దేవుణు మాటెజ్ నమ్మితార్. యెరూసలేమ్దు మన్ని నమ్మితి వరి లెక్క నండో ఆజి వాతాద్. నండోండార్ పుజెరిజు యేసుప్రబు మున్కు నమకం ఇట్టార్.

లోకుర్ సైపానుజ్ అస్తార్

8 వరి లోఇ ఒరెన్, సైపాను ఇనికాన్, దేవుణు దయదర్మదాన్ దేవుణు ఆత్మ సత్తుదాన్ నిండ్రీతాండె లోకుర్ నడిఃమి గొప్ప బమ్మాని పణిజ్ బమ్మాని గుర్తుజ్ కిజి మహాన్.

9 గాని, కురెనియ పట్నమ్దికార్ యూదురు, అలెక్సంత్రియ పట్నమ్దికార్ యూదురు, (వీరు లిబెర్తి ఇని యూదురు మీటిజ్ ఇండ్రోణి గుంపుదికార్) మరి కిలికియ

దేసమదాన్ వాతి యూదురు, ఆసియ దేసమదాన్ వాతి యూదురు వాతారె సైపాను వెట తర్కిస్తార్.

10 గాని వాండ్రు వెహ్తా మాటెజ ఎద్రిస్తెజ్ వారు అట్ఎండతార. ఎందనిజ్ ఇహిజ దేవుణు బాణిజ్ వాతి గెణమదాన్, దేవుణు ఆత్మ సత్తుదాన్ సైపాను వరివెట వర్గితాన్.

11 అయావలె వారు, 'వీండ్రు మోసె ముస్కు, దేవుణు ముస్కు దూసిసిని మాటెజ్ వర్గినిక మాప్ వెహాప్' ఇజి వెహ్తాజ్ సెగొండార్ లోకాజ్ ఎయెర్ నెన్ఏండ సుత్రిస్తారె కూడుఃస్తార్.

12 కూడుఃస్తారె, లోకాజ్, పెద్దెల్జ, యూదురి రూలు నెస్పిసినికార్ విజెరిజ్ రేప్తారె వన్ని ముస్కు వాతార. వాతారె సైపానుజ్ అస్తారె యూద పెద్దెల్జ సన్హద్రిం ఇని పెరి సజమదు తతార. బానె అబద్దం సాసి వెహ్తా వరిజ్ నిల్వతార.

13 వారు ఈహు వెహ్తార్, "వీండ్రు ఎస్తివలెబా దేవుణుదిజ్ కేట కిత్తి యా దేవుణు గుడిడిజ్, మోసె సిత్తి రూలుజ వెత్తేకం వర్గిజినాన్.

14 యా సజరేతు వాండ్రు ఆతి యేసు యా దేవుణు గుడిః పాడు కినాన్, మాటు ఎలాగ నడిదెజ్ ఇజి మోసె మా అనిగొగొరిజ్ సిత్తి మాటెజ్ మారిస్తాన్ ఇజి వీండ్రు వెహ్తాక మాపు వెహాప్".

15 సన్హద్రిం సజమదికార్ సైపాను మొకొం డిటం నుడఃజి మహిజ్ వన్ని మొకొం దేవుణు దూత మొకొం లెకెండ జాయ్ తోర్పిక వారు నుడఃతార.

7

సైపాను సన్హద్రిం సజమదు మన్ని వరివెట వర్గిజినాన్

1 అయావలె విజేరె పుజేరిజ ముస్కు పెరి పుజేరి సైపానుజ్ వెన్బాతాన్, "యా మాటెజ్ నిజమా? వీరు వెహ్తా లెకెండ నీను వెహ్తాదా సిల్లదా?".

2 దన్నిజ్ సైపాను వెహ్తాక ఇనిక ఇహిజ, "తంబెరిజాండె, బుబ్బురాండె, వెండ్రు, మా అనిగొగొ ఆతి అబ్రాహాం ఆరోసు ఇని పట్టుమదు బత్కిఎండ ముందాల, మెసాఫొతెమియ ఇని దేసమదు బత్కిజి మహాన్. అయావలె నండొ జాయ్ మన్ని దేవుణు వన్నిజ్ తోరె ఆతాన్.

3 దేవుణు అబ్రాహాం వెట ఈహు వెహ్తాన్, 'నీను నీ దేసెం డిసి, నీ సొంత లోకాజ్ డిసి నాను నిజి తోరిసిని దేసెం సొన్అ'.

4 అయావలె వాండ్రు కల్లియుజ్ బత్కితి మహి మెసాఫొతెమియ దేసెం డిసి ఆరోసు పట్టుమదు సొన్ని బత్కితాన్. వన్ని బుబ్బు సాతి వెనుక అబెణిజ్ మీరు ఏలు బత్కిజిని యా దేసమదు బత్కిదెజ్ దేవుణు వన్నిజ్ కూక్త తతాన్.

5 అయావలె దేవుణు వన్నిజ్ ఉండ్రీ ముక బూమిబా అక్కు సివితాన్, యా దేసమదు. గాని అయావలె అబ్రాహాముజ్ కొడొర్ సిల్లిజిజ్బా దేవుణు వన్ని వెట ఉండ్రీ మాట సిత్తాన్. అక్కు ఇనిక ఇహిజ, 'నిజి, నీ పొటెజాణి వరిజ్ విజెరిజ్ యా బూమి అనాద్'.

6 దేవుణు వన్ని వెట, 'నీ పొటెజాణికార్ ఆఇ దేసమదు సొనారె బానె ఆఇకార్ లెకెండ మనార్. అయ దేసమదికార్ నీ లోకాజ్ నాల్లి వందెజ్ వంటిజ్ వెట్టివణి కిజిని వరిలెకెండ పణి కిబిసి వరిజ్ లోజిజి మంజిని వజ ఇడఃజి మాలెజ్ కినార్'.

7 గాని వారు ఎమేణి దేసమ్దు పణి కిజినారో అయ దేసెమ్ది వరిజ్ నాను తీర్పు తీరిసి సిన సీనాలె. వెనుక వారు ఆ దేసెం డిసి వాజి యా బాడ్డిదు మంజి నజీ పొగ్గడిజి మాడిఃస్సార్లె ఇజి వెప్తా మహాన్.

8 దేవుణు అబ్రాహాం వెట 'విజెరి కుటుమ్కాజ్ పుట్టి మొగ్గ కొణ్ణెరిజ్ సునతి కిదెజ్ వలె', ఇజి వెప్తాన్. అందెజి అబ్రాహాం, వన్ని మరిసి ఇస్సాకు పుట్టి ఏడు రోస్సు వెనుక మహ్సా నాండిజ్, ఇహిజు, ఎనిమిది రోస్సాజ్ సునతి కిత్తాన్. ఇస్సాకు, వన్ని మరిసి యాకోబుజ్ సునతి కిత్తాన్. యాకోబు వన్ని పన్నెండు మంది మరిసిరిజ్ సునతి కిత్తాన్. యా పనెండు మందినె ఇస్సాయేలుది పనెండు కుటుమ్ది అనిగొగొర్ ఆతార్.

9-10 యా పన్నెండు మంది అనిగొగొర్ వరి లోఇ తంబెరి ఆతి యోసేపు ముస్సుగోస ఆతారె వన్నిజ్ గొత్తి పణి కిదెజ్ పొర్తార్. ఆహె యోసేపు అయ్గుప్తు దేసమ్దు గొత్తి పణి కిత్తాన్. గాని దేవుణు వన్ని వెట మహండ్రె వన్నిజ్ వాతి విజు మాలెజాణిజ్ తప్పిస్తాన్. దేవుణు వన్నిజ్ గెణం సిత్తిజ్ అయ్గుప్తు రాజు ఆతి పరో యోసేపు ముస్సుగదయ తోరిస్తాన్. పరో రాజు యోసేపుజ్ అయ్గుప్తు దేసెమ్దిజ్ నడిఃపిసిని వన్నిలెకెండ్ నిల్స్తాన్. పరో రాజుజ్ కల్లితి మహి విజు వనకాజ్ ముస్సుగ నడిఃపిసిని వన్నిలెకెండ్ కిత్తాన్.

11 అయావలె అయ్గుప్తు దేసమ్దు విజు, మా అనిగొగొర్ బత్తిజి మహి కనాను దేసమ్దు విజు పెరి కరు వాతాద్. కరు వాతిజ్ నండో మాలెజ్ వాతె. మా అనిగొగొర్ ఆతి వరిజ్ తిండి దోహ్కావిండ ఆతాద్.

12 అయావలె, అయ్గుప్తు దేసమ్దు తిండి మనాద్ ఇజి యాకోబు వెహాన్. వెహండ్రె వన్ని మరిసిరిజ్, ఇహిజు, మా అనిగొగొరిజ్ ముందాల్నె ఉండ్రె సుటు బాన్ పోక్తాన్.

13 వారు మరి ఉండ్రె సుటు సొహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్వ కిబె ఆతాన్. అయావలె యోసేపు కుటుమ్ది వరి వందిజ్ పరో రాజు నెస్తాన్.

14 వెనుక యోసేపు వన్ని బుబ్బు ఆతి యాకోబుజ్ వన్ని సొంత లోకాజ్ విజేరిజ్ అయ్గుప్తు దేసమ్దు రదు ఇజి కబ్బు పోక్తాన్. వారు మొత్తం డబయ్ అయ్దుగురు మహార్.

15 అయావలె యాకోబు, వన్నివెట మహికార్ విజేరి అయ్గుప్తు దేసెం సొహార్. వారు అబ్బె బత్తిత్తార్. వెనుక యాకోబు, మహి అనిగొగొరు బానె సాతార్.

16 వెనుక వరి డుముక్ సెకెం ఇని పట్టుమ్దు మరజి తత్తారె, ముందాల అబ్రాహాం హామోరు మరిసిర్ బాణిజ్ కొటి దూకి లోఇ ముస్తార్*.

17 దేవుణు అబ్రాహాముజ్ ముందాల్నె సిత్తి మాట వజ జర్గిదెజ్ డగ్గు ఆజి వాతాద్. అయావలె మా లోకు అయ్గుప్తు దేసమ్దు నండో లోకు ఆజి వాతార్.

18 అయావలె, యోసేపు ఎయెన్ ఇజి నెన్ఇ ఒరెన్ రాజు అయ్గుప్తు దేసెమ్దిజ్ ఏలుబడిః కిదెజ్ మొదొల్స్తాన్.

19 యా రాజు మా లోకాజ్ మాయ మాటెజ్ వెప్పి మొసెం కిత్తాన్. గొప్ప మాలెజ్ కిత్తాన్. మొగ్గకొణ్ణెర్ పుట్టిజు వరిజ్ సప్తెజ్ వెటనె గడ్డదు విసిర్దెజ్ వలె ఇజి యా రాజు ఆడ్ర సిత్తాన్. ఎందనిజ్ ఇహిజు వారు సాజి సొండ్రెజ్.

* 7:16 7:16 అయ కాలమ్దు అయ్గుప్తు దేసెమ్దికార్ పీసుగుదిజ్ నూనె రాసి పాత లోఇ ఇడ్వార్, నబ్విండ మండ్రెజ్

20 ఆ కాలమ్మదు మోసె ఇనికాన్ ఒరెన్ పుట్టాన్. వాండ్రు సుడేదెజ్ గొప్పు నెగ్గికాన్. వాండ్రు మూండ్రీ నెలెజ్ దాక వన్ని బుబ్బు ఇండ్రో పిరితాన్.

21 మూండ్రీ నెలెజ్ వెనుక వన్నిజ్ ఇండ్రో వెల్లి సోప్పి గడ్డ ఒడ్డుదు ఇట్టార్. అయావలె పరో రాజు గాల్సి వాతాదె కొడోడిజ్ లాగితాదె దన్ని మరిసి లెకెండ పోస కిబ్లిస్తాద్.

22 మోసెజ్ అయ్గుప్పు వరి విజు తెలివి నెన్పిస్తాన్. వాండ్రు, వర్గిని మాటెజ లోఇ బాగ వర్గిదెజ్ అట్టాన్. కిని పణిజ లోఇ నెగ్రెండ కిదెజ్ అట్టాన్.

23 మోసెజ్ నలవయ్ పంటెజ్ ఆతివలె నా సొంత లోకుర్ ఆతి ఇస్రాయేలుర్ బానె సొన ఇజి బుద్ది పుట్టాద్.

24 వాండ్రు సోహిజ్ అయ్గుప్పుదికాన్ ఒరెన్, ఒరెన్ ఇస్రాయేలు వన్నిజ్ మాలెజ్ కిజి మహిజ్ సుడేతాన్. సుడేతండ్రె, ఇస్రాయేలు వన్నిజ్ గెల్పిస్తెజ్ ఇజి అయ్గుప్పు వన్నిజ్ నస్తాన్. ఆహె నాయం తీరిస్తాన్.

25 ఇస్రాయేలు లోకాజ్ వరి బాదెజాణిజ్ డిబిస్తెజ్ దేవుణు నజి పోక్తాన్ ఇజి మోసె ఒడిబితాన్. గాని వారు అర్థం కివితార్.

26 ముహ్సా నాండిజ్ మోసె ఇస్రాయేలు లోకాజ్ సుడేజి సోహాన్. రిఎర్ ఇస్రాయేలు లోకుర్ టంటెజ్ ఆజి మహిజ్ మోసె వరిజ్ సుడేతండ్రె, 'ఒరె ఒరె బాబు, మీరు తంబెరి రిజెర్గెదె? మీరు ఎందనిజ్ ఒరెన్ వన్ని ముస్కు ఒరెన్ టంటెజ్ ఆజినిదెర్' ఇజి వెప్తండ్రె వారు రిఎర్జిజ్ కూడుఃపైజ్ ఇజి సుడేతాన్.

27-28 గాని ఆజి వన్ని ముస్కు అనయం కినికాన్ వెప్తాన్, 'మా ముస్కు అతికారి వజ మండ్రెజ్, తీర్పు తీర్పి వన్నివజ మండ్రెజ్ నిజి ఎయెన్ ఏర్పాటు కిత్తాన్? నీను ఇఎన్ అయా అయ్గుప్పు వన్నిజ్ సప్తిలెకెండ నజిబా నప్తెజ్ ఇజి సుడేజినిదా ఇజి వెప్తండ్రె మోసెజ్ నెక్తపాక్తాన్.

29 యాక వెహండ్రె మోసె తియెల్ ఆతాన్. వెటనె అయ్గుప్పు దేసిం డిసి సోహాన్. మిద్యాను ఇని దేసమ్మదు సోహండ్రె ఆఇకాన్ లెకెండ బత్తిత్తాన్. బానె పెండ్రె ఆతండ్రె రిఎర్ కొడోరిజ్ ఇట్టాన్.

30 నలవయ్ పంటెజ్ వెనుక, సినాయి ఇని పెరి గొరొన్ డగ్రు మన్ని బిడిఃమ్ బూమిదు మహిజ్, ఒరెన్ దేవుణు దూత మోసెజ్ తోరె ఆతాన్. యా దూత వెయ్జి మహి తుప్పెజ నడిఃమి ఉండ్రీ సిసు కొణ లోఇ తోరె ఆతాన్.

31 మోసె అక్క సుడేతిజ్ బమ్మ ఆతాన్. బమ్మ ఆతండ్రె నెగ్రెండ సుడేదెజ్ తుప్ప డగ్రు సోహాన్. డగ్రు సోహిజ్ దేవుణు మాట ఈహు వెహాన్,

32 'నాను నీ అనిగొగొర్ ఆతి అబ్రాహాం, ఇస్సాకు, యాకోబు ఇని వరి దేవుణు'. యాక వెహండ్రె మోసె తియెల్ ఆజి వణక్తాన్. సుడేదెజ్ బా అట్వితాన్.

33 దేవుణు మరి వెప్తాన్, 'నీ జోడ్కు కుత్తి ఇడఃఅ. నీను నిహిమన్ని బాడ్డి దేవుణుదిజ్ కేట ఆతి బాడ్డి'.

34 అయ్గుప్పు దేసమ్మదు మన్ని నా లోకాజ్ మాలెజ్ నాను నెగ్రెండ సుడేత. వారు అడఃబానిక వెహ. అందెజె నాను వరిజ్ డిబిస్తెజ్ డిఃగిత వాత. ఏలు రఅ నిజి నాను అయ్గుప్పు దేసిం పోక్కు ఇజి వన్నివెట వెప్తాన్.

35 'మా ముస్కు అతికారి వజ మండ్రెజ్ తగ్గు తెప్పికాన్ వజ మండ్రెజ్ నిజి ఎయెర్ ఏర్పాటు కిత్తాన్' ఇజి వెప్పి ఇస్రాయేలు లోకుర్, ముందాల నెక్కి పొక్తి యా మోసెజ్ నె,

దేవుణు అతికారి వజ, తప్రిసినికాన్ వజ వరిబాన్ పోక్తాన్. వెయ్జి మహి తుప్ప లోఇ తోరె ఆతి దేవుణు దూత సాయమ్దాన్ మోసెజ్ దేవుణునె పోక్తాన్.

36 అయ్గుప్పు దేసమ్దు బమ్మ పణిజ్ కిజి మోసె ఇస్రాయేలురిజ్ తప్రిస్త తతాన్. ఎర్రజ్ సమ్దరంబానె, మరి వారు నలపయ్ పంటిజ్ నడిజి సాహిమహి బిడిజిమ్ బూమిదుబా మోసె బమ్మాని పణిజ్ బమ్మాని గుర్తుజ్ కిత్తాన్.

37 యా మోసెనె ఇస్రాయేలురు వెట, 'దేవుణు నజి పోక్తి లెకెండ మీబాణిజె ఒరెన్ ప్రవక్తెజ్ మీబాన్ పోక్సాన్', ఇహాన్.

38 బిడిజిమ్ బూమిదు నజం కూడితి మహి ఇస్రాయేలు లోకుర్ వెట మహికాన్ యా మోసెనె. మా అనిగొగొర్ వెట మహికాన్ వీండ్రె. సీనాయి గొరొతు దేవుణు దూత విన్నివెటనె వర్గితాన్. మజి సీదెజ్ దేవుణు బాణిజ్ ఎల్లకాలం బత్తిని మాటెజ్ తత్తికాన్ వీండ్రె.

39 గాని యా మోసెజ్ మా అనిగొగొర్ లోజిజి మన్ఏండ నెక్తపొక్తార్. మర్జి అయ్గుప్పు దేసమ్దు సాహిజ నెగ్గెద్ ఇజి వారు కోరితార్.

40 అయ్గుప్పు దేసెమ్దాన్ మజి కూక్తి తత్తి యా మోసె ఇనిక అతాండ్రొ మజి తెలివద్. అందెజె మర్జి అయ్గుప్పు దేసమ్దు సాండ్రెజ్ మజి ముందాల నడిదెజ్ దెయమ్కు తయార్ కిజి సిదా ఇజి మోసె అన్నసి ఆతి ఆరోసు వెట వెప్తార్.

41 అయావలె వారు ఉండ్రె దూడె లెకెండ బొమ్మ తయార్ కిత్తరె పూజ కిత్తార్. వరి కిక్కాణిజ్ తయార్ కిత్తి దన్నిమున్ను వారు నండొ నర్ల ఆతార్.

42 గాని దేవుణు కోపం ఆతండ్రె మొకొం వెనుక మహ్తాన్. ఆగానమ్దు మన్నికెజ్ సుడెదెజ్, నెల పొద్దు సుక్కెజ్ విజు దన్నిజ్ పూజ కిదెజ్ వరిజ్ డిస్త సిత్తాన్. ప్రవక్తరు ముందాల్ని రాస్తిమహిక దిని వందిజె. అక్క ఇనిక ఇహిజ "ఇస్రాయేలు లోకాండె, మీరు బిడిజిమ్ బూమిదు నల్పయ్ పంటిజ్ నడిసి సాన్ని మహివలె పూజ కిత్తిక నజినె ఆవద్.

43 మీరు పూజ కినాట్ ఇజి తయార్ కిత్తి మొలూకు రొంపయు ఇని సుక్కెజాణి దెయమ్కాజె గూడాఃరమ్దు పిండిజి ఒసి మహిదెర్. వనకాజె పూజ కిత్తిదెర్. అందెజె బబులోను దేసెం అతాల్ మిజి తొప్పి ఒతెజ్ నాను సరి సీనాలె.

44 మా అనిగొగొర్ బిడిజిమ్ బూమిదు సాన్ని మహివలె సాసి గూడారం వరివెట మహాద్. దేవుణు మోసెజ్ తోరిస్తి లెకెండె మోసె యా సాసి గూడారం †తయార్ కిత్తాన్.

45 మరి లావు పంటిజ్ వెనుక యెహోసువ ఇనికాన్ అయ టయమ్దు యా సాసి గూడారం పిండిత ఒతండ్రె మా అనిగొగొరిజ్ నడిపిస్తాన్. అయావలె ఇస్రాయేలు లోకాజ్ సీనా ఇజి దేవుణు వెప్తి దేసమ్దు వారు సాహార్. దేవుణు వరివెట మహిజ్ బానె మహి యూదురు ఆఇ లోకుర్ వెట ఉద్దం కితారె, గెల్స్తారె ఆ దేసెం సొంతం కిత్తార్. బానెబా మా అనిగొగొర్ యా సాసి గూడారం పిండిత ఒతార్. దావీదురాజు వరిజ్ ఏలుబడి కిత్తి కాలమ్దాక యా సాసి గూడారం బానె మహాద్.

46 దావీదురాజు ఇహిజ దేవుణు వెప్తి వజ నడితికాన్. దేవుణు దయ వన్ని మున్ను లావు మహాద్. అహిజ్బా మా అనిగొగొ ఆతి యాకోబు పార్లనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తొప్తాజ్ దావీదు రాజు వెన్బాతిజ్బా దేవుణు సరి సివితాన్.

† 7:44 7:44 సాసి గూడారం. దేవుణు ఇబ్బె మనాన్ ఇజి లోకాజ్ వెప్పి మహి గూడారం

47 గాని దావీదురాజు మరిసి ఆతి సొలోమొనుజ్ నె దేవుణు గుడిః తొవ్తాజ్ సరి సిత్రాన్.

48 అహాజ్ బా విజెరిజ్ ఇంక గొప్ప పెరి దేవుణు, లోకు కిక్కాణిజ్ తయార్ కిత్తి బాడ్డిదు మన్ ఏన్.

49 దేవుణు మాటెజ్ ప్రవక్త ఈహు వెప్పినాన్: “పరలోకం నాను బసిని సిమసనం †. బూమి నా పాదమకు ఇడ్డిపీట. నాను మండ్రెజ్ ఉండ్రె గుడిః తొవ్తాజ్ మీరు అభిగదెర్.

50 ఎందనిజ్ ఇహాజు, పరలోకం, బూమి, దన్ని లోఇ మన్నికెజ్ విజు నానె పుటిస్త”.

51 మూర్గం బుద్ది మన్నికిదెరా, దేవుణు మాటెజ్ ఒప్పుకొటాప్ ఇజి మీరు సునతి కిత్తిదెర్ గాని దేవుణు మాటెజ్ గిబ్బిజాణి వెంజిబా సరినె వెన్ ఇ లెకెండ్ మంజినిదెర్. వెహిజ్ బా సరినె మన్నుదు ఇడెంవండ లోజెఇదెర్. మీ అనిగొగొర్ లెకెండ్ మీరుబా ఎసెజ్ బా సరినె దేవుణు ఆత్మదిజ్ నెక్కిపొక్కినిదెర్.

52 మీ అనిగొగొర్ ప్రవక్తరిజ్ విజెరిజ్ గొప్ప మాలెజ్ కిత్తార్. దేవుణు పొక్కు ఇజి వెప్తి ఆ నీతి వాండ్రు వందిజ్ ముందాల్పా వెప్తి ప్రవక్తరిజ్ బా మీ అనిగొగొర్ సప్తార్. ఏలు ఆ నీతి వన్నిజ్ మీరు ఒపజెప్తిదెర్. వన్నిజ్ సప్తిదెర్.

53 దేవుణు వన్ని దూతవెట మిజి సీత్తి రూలుజ్ మిజి దొహ్ కె గాని మీరు దన్నిజ్ లోజెఇతిదెర్”.

స్తైపానుజ్ పణుకుజాణిజ్ డెయ్ జినార్

54 యా మాటెజ్ వెహారె వారు గొప్ప కోపం ఆతారె స్తైపానుజ్ సుడెఃజి పల్కు కొహ్ కార్.

55 గాని స్తైపాను దేవుణు ఆత్మ సత్తు పూర్తి నిండ్రెజి ఆగాసం దరోట్ సుడెఃతాన్. సుడెఃతిజ్ దేవుణు గొప్ప జాయ్ సుడెఃతాన్. యేసుప్రబు దేవుణు ఉణెర్ పడెక నిహి మహిక సుడెఃతాన్.

56 “సుడెఃఅ, ఆగాసం రే ఆతి మహిక, లోకు మరిసి ఆతి యేసు దేవుణు ఉణెర్ పడెక నిహిమహిక నాను సుడెఃజిన”, ఇజి స్తైపాను వెప్తాన్.

57 గాని యా మాటెజ్ వెహారె వెటనె వారు గిబ్బిజ్ మూకె ఆతారె డటం గగోలాజి విజెరె ఉండ్రె ఆజి వన్ని మున్ను వాతార్.

58 పట్టుమదాన్ వెల్లి లాగిత ఒతారె వన్నిజ్ పణుకుజాణి డెయ్ జి సప్తెజ్ మొదొల్స్తార్. పణుకుజ్ విసిరీని సాసి లోకుర్ వరి సొక్కెజ్ ముందాల సవులు ఇని ఒరెన్ దజుడాయెన్ పాదమ్ కాజ్ డగ్రు తత్తారె ఇట్టార్.

59 వారు స్తైపానుజ్ పణుకుజాణిజ్ డెయ్ జి మహిజ్ స్తైపాను, “యేసుప్రబువా నా పాణమ్ దిజ్ ఏలు నీ డగ్రు కూడుంవఅ”, ఇజి పార్దనం కిత్తాన్.

60 వెనుక స్తైపాను ముణుకుజ్ ఊర్ జి, “ప్రబువా, వీరు కిజిని యా పాపం విరి మున్ను మోపు”, ఇజి డటం డెల్స్తాన్. యా మాట వెప్తాండ్రె వాండ్రు పాణం డిస్తాన్. స్తైపానుజ్ సప్తిక సవులు ఒప్పుకొటాన్.

8

దేవుణుదిజ్ నమ్మితి వరిజ్ సవులు పాడుః కిజినాన్

† 7:49 7:49 సిమసనం. తీర్పు కిదెజ్ రాజుర్ బసిని కుర్చి

1 ఆ దినమకాజ్ యెరూసలేమ్దు మహి దేవుణు సజమ్దిజ్ గొప్ప మాలెజ్ ఆజి మహాద్. అపొస్తరు ఆవిండ మహి నమ్మితికార్ విజేరి యూదయ సమరియ దేసమ్కాజ్ సెద్రిత సాహార్.

2 బక్తి కల్గితి నమ్మిత్తి లోకుర్ సైపానుజ్ సమాది కితారె వన్ని వందిజ్ గొప్ప దుకం ఆజి అడఃబాతార్.

3 నస్తవలె సవులు ఇనికాన్ యేసుప్రబు మున్కు నమకం ఇడ్డిమహి వరి నమకం పాడుః కిదెజ్ సుడఃతాన్. ఇల్కాజ్ ఇల్కాజ్ డుఃగ్జి మొగ్గకొడఃరిజ్ అయ్లికొడఃకాజ్ ఈడిసిసి ఒసి జెలిదు ఇడఃజి, వాండ్రు సజమ్దిజ్ పాడుః కిదెజ్ మొదోల్స్తాన్.

సమరియ దేసమ్దు సువార్త సాటిస్తార్

4 అయావలె సెద్రితి సాహి సజమ్దికార్ సువార్త సాటిసి విజు బాడ్డిజ విజెరిజ్ వెన్పిసి బూలాతార్.

5 అయావలె అపొస్తరు ఏర్పాటు కిత్తివరి లోఇ ఒరెన్ పిలిపు ఇనికాన్ సమరియ పట్టుమ్దు సాహాన్. అబ్బె యేసు, క్రీస్తు* ఇజి బోదిస్తాన్.

6 పిలిపు వెప్తి మాటెజ్ లోకుర్ విజేరి నెగ్రిండ వెహారి వాండ్రు కిత్తి బమ్మాని గుర్తుజ్ సుడఃతాన్.

7 కిక్కు కాల్కు సాతికార్, సాటవారు నండొండార్ అబ్బె వాతారె నెగెండ ఆతార్. నండొండార్ లోకుర్ దెయం అస్తి మహికార్ అబ్బె మహార్. దెయమ్కు నండొ గగోలాజి వరిజ్ డిస్సె సాహె.

8 అందెజె సమరియ పట్టుమ్దు నండొ సర్ద కల్గితాద్.

గార్ది పణి కిని సిమోను

9 సమరియ పట్టుమ్దు సిమోను ఇని ఒరెన్ మహాన్. సిమోను ఆ పట్టుమ్దు సెగం పంటెజ్ గార్ది విదె కిజి నాను ఒరెన్ గొప్ప వాండ్రు ఇజి వెహి మహాన్. అబ్బె మహి లోకాజ్ సిమోను బమ్మ కిబిసి మహాన్.

10 అయ పట్టుమ్దు మహికార్ ఇజిరికార్ పెరికార్ విజేరి వీండ్రు 'దేవుణు గొప్ప సత్తు ఇనికాన్' ఇజి వెహి వన్ని మున్కు నమకం ఇడఃతాన్.

11 నండొ కాలం సిమోను గార్ది పణి కిజి లోకాజ్ బమ్మ కిబిసి మహాన్. అందెజె వారు సిమోనుజ్ నమ్మితార్.

12 గాని దేవుణు ఏలుబడిః వందిజ్, యేసుక్రీస్తు వందిజ్ పిలిపు పట్టుమ్ది లోకాజ్ సాటిస్తిజ్ యా సువార్త వెహికార్. నమ్మితారె మొగ్గకొడఃరి, అయ్లికొడఃక్ బాప్తిసం లాగె ఆతార్.

13 అయావలె సిమోనుబా నమ్మిజి బాప్తిసం పొందితాండ్రె పిలిపుజ్ డిఃన్ఏండ వన్నివెటనె మహాన్. పిలిపు కిని బమ్మాని గుర్తుజ్, బమ్మాని పణిజ్ సుడఃజి సిమోను గొప్ప బమ్మ ఆతాన్.

14 యేసు ప్రబు వందిజ్ వెప్తి సువార్త సమరియ దేసమ్దికార్ ఒప్పకొటార్ ఇజి యెరూసలేమ్దు మన్ని అపొస్తరు వెహార్. వెహారి పేతురుజ్ యోహానుజ్ వరి డగ్రు పోక్టార్

15 వీరు వాతారె సమరియ పట్టుమ్దు నమ్మితి వరి మున్కు దేవుణు ఆత్మ సత్తు వాదెజ్ ఇజి పార్దనం కితార్.

* 8:5 8:5 క్రీస్తు (మెనయ) ఇహిజ దేవుణు ఏర్పాటు కిత్తి పోక్టాన్ ఇజి అర్దం

16 ఎందనిజ్ ఇహిజ అబ్బెణి దాక దేవుణు అత్తు సత్తు వరి ఎయేరి మున్సుబా రెవండ మహాద్. వారు ప్రబువాతి యేసు పేరుదాన్ బాప్తిసం ఉండ్రెనె లాగె ఆజి మహార్.

17 అయావలె పేతురు, యోహాను వరి మున్సు కిక్కు ఇడ్డిజ్ దేవుణు అత్తు సత్తు వరి మున్సు వాతాద్.

18-19 అపొస్తురు లోకుర్ మున్సు కిక్కు ఇట్టి వలె వారు దేవుణు అత్తుదాన్ నిండ్రెజినార్ ఇజి సిమోను సుడతాన్. సుడతండ్రె, “నాను ఎయేన్ మున్సు కిక్కు ఇడ్డానో, వాండ్రు దేవుణు అత్తు సత్తుదాన్ నిండ్రెని వజి యా అతికారం నజిబా సిదా”, ఇజి వెప్పి వరి ముందాల డబ్బు ఇట్టాన్.

20 అయావలె పేతురు, “నీను డబ్బు సీజి దేవుణు వరం సంపాదనం కిన ఇజి ఒడిబిత్తిదా? నీ డబ్బు నీ వెట నాసనం ఆవిద్.

21 నీ ఆలోసనం దేవుణు సుడతెజ్ సరి ఆతిక ఆవిద్. అందెజె మాపు కిని పణిదు నిజి ఇని వంతు సిల్లెద్.

22 అందెజె యా సెఇ ఆలోసనమ్కు డిసిసిజి దేవుణు డగ్రు వాజి పార్లనం కిదు. నీను ఒడిబిత్తి ఆలోసనమ్ వందిజ్ దేవుణు నిజి సెమిస్సాన్సు.

23 నీ మన్సుదు నండ్రె గోస నిండ్రెత మనాద్ ఇజి నాను నెస్సా. అక్కాదె ఆవిండ్రె నీ పాపమ్కు నిజి తోహై మన్నె ఇజి నాను నెస్సా”, ఇజి పేతురు వెప్టాన్.

24 దన్నిజ్ సిమోను, “నీను వెప్టికెజ్ ఇనికబా నా మున్సు రెవిండ్రె మీరు నావందిజ్ యేసుప్రబుజ్ పార్లనం కిదు”, ఇజి పేతురుజ్ యోహానుజ్ వెప్టాన్.

25 వెనక పేతురు, యోహాను సాసి వెప్పి, యేసుప్రబు సువార్ల సాటిసి, యెరూసలేమ్దు మప్టా వాతార్. వాని సరి సమరియదు మహి నండ్రె నాహ్కాజ్ సువార్ల సాటిసి వాతార్.

పిలిపు అయ్యుయెపియది వన్నిజ్ బాప్తిసం సిత్రాన్

26 అయావలె, ఒరెన్ దేవుణు దూత పిలిపుజ్ వెప్టాన్, “నీను దసిణం దరోట్ సొన్ని యెరూసలేమ్దాన్ గాజి ఇని పట్ను సొని బిడిమ్ బూమిదు సొన్అ”, ఇజి వెప్టాన్.

27-28 అందెజె పిలిపు సోతాండ్రె సోహాన్. సొన్ని మహిజ్ ఒరెన్ అయ్యుయెపియదికాన్ రదం[†] మున్సు సొన్నినాన్. వాండ్రు అయ్యుయెపియ దేసెమ్ది రాణి కందెజెబాన్ ముకెలమతి పణి కినికాన్ ఒరెన్. ఇని పణి ఇహిజ దేసెమ్ది డబ్బు నడిపిసిని దన్ని మున్సు వీండ్రు మంత్రి. వీండ్రు యెరూసలేమ్దు పార్లనం కిదెజ్ సోహాండ్రె మర్జి సొన్నినాన్. సొన్ని మహిజ్ వీండ్రు రదమ్దు బసి యెసయ ప్రవక్త రాస్తి పుస్తకం సద్విజినాన్.

29 అయావలె దేవుణు అత్తు పిలిపుజ్, “నీను రదం డగ్రు సొన్ని దన్ని వెట నడిజి సొన్అ”, ఇజి వెప్టాన్.

30 పిలిపు రదం డగ్రు ఉహ్కొక్కి సోహిజ్ అయా అయ్యుయెపియదికాన్ యెసయ ప్రవక్త రాస్తి పుస్తకం సద్విజినాన్. పిలిపు అక్క వెహాన్. వెహాండ్రె, “నీను సద్విజినిక అర్లం కిజినిదా?”, ఇజి వెన్బాతాన్.

[†] 8:27-28 8:27-28 రదం ఇహిజ గుర్తమ్కాజ్ ఉండ్రె బంటి పూట్టూర్

31 వెన్ బాతిజ్, “ఎలాగ అర్థం కిన్? ఎయెన్ బా నజి అర్థం వెహ్ ఏండ మహిజ ఎలాగ అర్థం కిన్? రదమ్ ముస్సు ఎక్కి నా వెట బస్ అ. దిన్ని అర్థం వెహ్ సిదా” ఇహాన్, అయ అయ్యుయొపియదికాన్. అందెజె పిలిపు రదం ఎక్కి వన్ని డగ్రు బస్తాన్.

32 అయ అయ్యుయొపియదికాన్ సద్ విజి మహి మాటెజ్ ఇనికెజ్ ఇహిజ “సప్తెజ్ ఒని గొరె వజ వన్నిజ్ ఒతార్. బుడుఃస్కుజ్ కత్రిసినివలె అలెజి మంజిని మెండగొరెపిల్ల వజ అలెత మహాన్. వాండ్రు ఇనికబా ఇన్ ఎతాన్.

33 వారు వన్నిజ్ సిగు కిత్తార్. వన్నిజ్ నాయం దోహ్ క్ ఏండత సాహాద్. వన్ని పొటెజాణి వరి వందిజ్ ఎయెర్ బా వెహ్ ఏండ ఆనార్. ఎందనిజ్ ఇహిజ, వన్ని పాణమ్ దిజ్ బూమి ముస్సుహాన్ లాగితార్”.

34 అయ అయ్యుయొపియదికాన్ ఈహు వెన్ బాతాన్, “ప్రవక్త ఎయె వందిజ్ ఈహు వెహ్ సిదా? వన్ని వందిజెనా, మరి ఒరెన్ వందిజె? దయ కిజి వెహ్ అ”.

35 అందెజె పిలిపు అయ అయ్యుయొపియదికాన్ సద్ విజి మహి యెసయ ప్రవక్త రాస్తి పుస్తకమ్ దు మహి మాటదాన్ మొదొల్లి యేసు ప్రబు వందిజ్ సువార్త వెహ్ నాన్.

36 ఆహె వారు సొన్ని మహిజ్ ఏరు మహి ఉండ్రె బాడ్డిదు వాతార్. అయ అయ్యుయొపియదికాన్ వెహ్ నాన్, “ఇబ్బె ఏరు మన్నె. నాను బాప్తిసం లాగె ఆదెజ్ ఇనికబా అడ్డు మనాదా?”.

37 దన్నిజ్ పిలిపు, “నీను మన్ను పూర్తి యేసు ప్రబుజ్ నమ్మిత్తిజ బాప్తిసం లాగె ఆదెజ్ ఇని అడ్డుబా సిల్లెద్”, ఇహాన్. అందెజె వాండ్రు, “ఒఒ, యేసు క్రిస్తు దేవుణు మరిసి ఇజి నాను నమ్మిజిన”, ఇహాన్.

38 అయావలె, “రదం నిల్ వ్ అ”, ఇజి అయ్యుయొపియదికాన్ ఆడ్ర సిత్తాన్. రదం నిల్ వ్ తాండ్రె వాండ్రు, పిలిపు, రిఎర్ డిగ్ జి ఏరుదు డిగె తార్. పిలిపు అయ్యుయొపియది వన్నిజ్ బాప్తిసం సిత్తాన్.

39 వారు ఏరు లొఇహాన్ వెల్లి వాతిజ్ వెటనె దేవుణు ఆత్మ పిలిపుజ్ కూక్ ఒతాన్. అయ్యుయొపియదికాన్ పిలిపుజ్ మరి సుడె ఏతాన్. గాని వాండ్రు సర్ద ఆజి వన్ని సరినె సాహాన్.

40 పిలిపు సుడె తిజ్ అజొతు పట్నమ్ దు మన్న ఇజి నెస్తాన్. అబ్బెణిజ్ సొసి వాండ్రు సొహి సరిదు మహి విజు పట్నమ్ కాజ్ యేసు ప్రబు వందిజ్ సువార్త వెహ్ కయ్ సరియ ఇని పట్నమ్ దాక వాతాన్.

9

సవులు యేసు ప్రబుజ్ నమ్మిత్తాన్

1-2 అయావలె సవులు ఇనికాన్ యేసు ప్రబు ముస్సు నమ్మితి వరిజ్ బెద్రిసి మహాన్. వరిజ్ మాలెజ్ కిజి మహాన్. వాండ్రు విజేరె పుజేరిజ ముస్సు పెరి పుజేరిబాన్ సాహాండ్రె దమస్సు పట్నమ్ దు మన్ని యూదురి మీటిజ్ ఇల్కాణి పెద్దెల్ జ సీదెజ్ ఉత్తమ్ కు లొస్తాన్. ఇని ఉత్తమ్ కు ఇహిజ, దమస్సు పట్నమ్ దు యేసు ప్రబు ముస్సు నమకం ఇడ్డికార్ ఎయెర్ బా మహిజ, మొగ్గకొడొర్ గాని అయ్ లికొడొక్ గాని వరిజ్ తొహ్సి ఒసి యెరూసలేం పట్నమ్ దు తతెజ్ సవులుజ్ అతికారం మనాద్ ఇజి వెహ్ సిని ఉత్తమ్ కు.

3 విజేరె పుజేరిజ ముస్సు పెరి పుజేరి సిత్తి ఉత్తమ్ కు అస్తాండ్రె సవులు దమస్సు పట్నమ్ దు సాండ్రెజ్ సొత్తాన్. దమస్సు పట్నం డగ్రు వాజి మహిజ్ గదెం ఆగసమ్ దాన్ ఉండ్రె గొప్ప జాయ్ వన్ని సురులం డెయ్ తాద్.

4 అయావలె సవులు బూమిదు అర్తాన్. అర్తిజ్, “సవులు, సవులు, నీను ఎందనిజ్ నజీ మాలెజ్ కిజిని”, ఇజి వన్ని వెట వెప్పొ ఉండ్రీ మాట వెహాన్.

5 “ప్రబు, నీను ఎయి”, ఇజి సవులు వెన్బాతాన్. “నీను మాలెజ్ కిజిని యేసునె నాను.

6 ఏలు నిజ్జి పట్టుమ్దు సొన్అ. నీను ఇనిక కిదెజ్ ఇజి ఒరెన్ నిజి వెప్పొనాన్లె”, ఇజి మాట వెహ్తాన్.

7 సవులు వెట సొన్ని మహికార్ జాటు వెహార్ గాని ఎయెరిజ్బా తోర్వితార్. వారు అల్లెత నిహ మహార్.

8 సవులు బూమిదాన్ నిజిత్తాండ్రె బేస్తాన్ గాని కణుకు తోర్విండ ఆతె. అందెజె వారు వన్నిజ్ కికాజ్ అస్తారె దమస్కు పట్టుమ్దు నడిపిసి ఒతార్.

9 వాండ్రు మూండ్రీ రొస్కు కణుకు తోర్విండ మహాన్. ఇనికబా తిన్విండ ఉణెఎండ మహాన్.

10 దమస్కు పట్టుమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్సనమ్దు తోరె ఆతండ్రె, “అననియ”, ఇజి కూక్తాన్. కూక్తిజ్ అననియ, “ప్రబువా నాను ఇబ్బె మన్న”, ఇహాన్.

11 యేసుప్రబు వన్నివెట, “నీను తినాజ్ ఇజి కూక్తి సరిదు సొన్అ. బానె యూద ఇని వన్ని ఇండ్రో సొన్ని తార్పు పట్టుమ్దికాన్ సవులు ఇని వన్ని వందిజ్ వెన్బాఅ. సవులు పార్దనం కిజి మంజినాన్. ఉండ్రీ దర్సనమ్దు సవులు ఇనిక సుడెఃతాన్ ఇహిజ,

12 అననియ ఇనికాన్ ఒరెన్ వాతండ్రె వన్ని కణెకెజ్ నెగెండ కిజి మరి సూణి లెకెండ ఆదెజ్ వన్ని బురాదు కిక్కు ఇడ్డివజ సుడెఃతాన్”, ఇజి వెహ్తాన్.

13 దన్నిజ్ అననియ వెహ్తాన్, “ప్రబు వీండ్రు యెరూసలేమ్దు నిజి కేట ఆతి వరిజ్ ఎసొనొ మాలెజ్ కిత్తాన్ ఇజి వన్ని వందిజ్ నాను నండొ వెహ మహా.

14 ఇబ్బె యా పట్టుమ్దు నీ ముస్కు నమకం ఇడ్డి వరిజ్ తొప్పొ ఒసి యెరూసలేమ్దు ఒతెజ్ వన్నిజ్ అతికారం సీని ఉత్తమ్కు పెరి పుజేరిజ బాణిజ్ అస్తాండ్రె వాత మహాన్”.

15 యేసుప్రబు అననియ వెట, “నీను సొన్అ. యూదురు ఆఇ లోకుర్ నడిఃమి, రాజురిజ నడిఃమి, ఇస్తాయేలు లోకాజ్ నడఃమి నా వందిజ్ వెహ్తాజ్ నాను వన్నిజ్ ఏర్పాటు కిత మన్న.

16 నా వందిజ్ వాండ్రు ఎసొనొ మాలెజ్ ఆనాన్ ఇజి నాను వన్నిజ్ తోర్స్స”, ఇహాన్.

17 అందెజె అననియ అయ ఇండ్రో సొహండ్రె సవులు ముస్కు కిక్కు ఇట్టాన్. “సవులునా, నీను వాతి సరిదు నిజి తోరె ఆతి ప్రబు ఆతి యేసు నజి పొక్త మనాన్. నీను మరి సూణి వందిజ్ దేవుణు ఆత్మ సత్తు నీ ముస్కు వాని వందిజ్ నజి పొక్త మనాన్”, ఇజి సవులు వెట వెహ్తాన్.

18 అయావలె వన్ని కణకాణిజ్ పొరోజ్ నన్నికెజ్ రాల్తిజ్ సుడెఃదెజ్ అట్టాన్. సవులు నిజితండ్రె బాప్తినం లాగె ఆతాన్.

19 వెనుక బోజనం కితాండ్రె సత్తు ఆతాన్.

సవులు దమస్కు పట్టుమ్దు, యెరూసలేం పట్టుమ్దు యేసుప్రబు వందిజ్ వెప్పొనాన్.

సవులు దమస్కు పట్టణము మహి యేసుప్రబు సిసూర్ వెట సెగం దినమ్మకు మహాన్.

20 యూదురి మీటిజ్ ఇల్వాజ్ తిన్నాజ్ సొహాండ్రె యేసునె దేవుణు మరిసి ఇజి యేసుప్రబు వందిజ్ బోదిస్తాన్ మొదొల్స్తాన్.

21 అక్క వెహికార్ విజేరె నండొ బమ్మ ఆతార్. యెరూసలేమ్దు యేసుప్రబుజ్ నమ్మితి వరిజ్ పాడు: కిజి మహికాన్ వీండ్రెగదె. యేసుప్రబుజ్ నమ్మితి వరిజ్ తోహి పెరి పుజేరిర్ డగ్గు కూక్కి ఒతెజ్ ఇబ్బెబా వీండ్రు వాత మనాన్ ఇజి వెహార్.

22 అహిజ్ బావవులు మరి నండొ సత్తుదాన్ బోదిసి మహాన్. యేసునె దేవుణు పొక్కి క్రిస్తు ఇజి రుజుప్ కిత్తాండ్రె దమస్కు పట్టణము మహి యూదురుజ్ గాబు కిత్తాన్.

23 నండొ రొస్కు సొహి వెనుక సవులుజ్ సప్తెజ్ ఇజి యూదురు ఆలోసనం కిత్తార్.

24 గాని వరి ఆలోసనం సవులుజ్ తెలితాద్. వన్నిజ్ సప్తెజ్ వారు రెయువేల పూర్తి పట్టుం వెల్లి సొని సేప్లా* బాన్ సుడె:జి కాత మహార్.

25 గాని వన్ని సిసూర్ రయ్యు వన్నిజ్ ఒతారె ఉండ్రె గంపదు బసె కితారె పట్టుం సురుల మన్ని గోడె:దు మన్ని ఉండ్రె కిటికి బోరొదాన్ వన్నిజ్ అడి:గి డి:ప్తార్.

26 సవులు యెరూసలేమ్దు సొహిజ్ సిసూర్ వెట కూడె:దెజ్ సుడె:తాన్. గాని వాండ్రు సిసూర్ లొఇ ఒరెన్ ఆప్న్ ఇజి వారు ఒడి:బిత్తారె వన్నిజ్ వరివెట కూడు:ప్తెజ్ తియెల్ ఆతార్.

27 గాని బరబ్బ ఇనికాన్ వన్నిజ్ అపొస్తరుబాన్ కూక్కి ఒతాన్. సవులు దమస్కు పట్టణము సొహి సరిదు ఎలాగ యేసుప్రబు వన్నిజ్ తోరె ఆతాన్ ఇజి, ఎలాగ యేసుప్రబు వన్నివెట వర్గితాన్ ఇజి, వెనుక సవులు ఎలాగ దమస్కు పట్టణము తియెల్ సిల్లెండ యేసుప్రబు వందిజ్ బోదిస్తాన్ ఇజి బరబ్బ అపొస్తరు వెట వెహార్.

28 అయావలె అపొస్తరు సవులుజ్ కూడు:ప్తెజ్ వాండ్రు వరివెట కూడి:త మహాన్. వరివెట కూడి:తాండ్రె యెరూసలేమ్దు విజు బాడ్డిదు సొన్ని తియెల్ సిల్లెండ యేసుప్రబు వందిజ్ బోదిస్తాన్ మొదొల్స్తాన్.

29 గ్రీకు బాన వర్గిని యూదురు వెట వర్గితాండ్రె తర్కిస్తాన్. అందెజె వారు సవులుజ్ సప్తెజ్ సుడె:తార్.

30 యాక తెలితారె సిసూర్ వన్నిజ్ డిగు మన్ని కయ్సరియాదు ఒతారె తార్పు పట్టుం పోహార్.

31 అయ కాలమ్దు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహార్. సజం దేవుణుదిజ్ లొజిజి దేవుణు ఆత్మ సాయమ్దాన్ సత్తు ఆజి వాతె. నమ్మితికార్ నండొండార్ ఆజి వాతార్.

పేతురు లుదదు యోపాదు బమ్మాతి పణిజ్ కిత్తాన్

32 అయావలె పేతురు నాహ్కు,నాహ్కు, పట్టణముకుపట్టణముకు సొన్ని లుద ఇని నాటొ దేవుణుదిజ్ కేట ఆతి వరిజ్ సుడి: సొహాన్.

33 బానె ఒరెన్ అయ్నెయ ఇనికాన్ ఎనిమ్మిది పంటెజాణ్ అసి నిజ్దెజ్ అట్ఇ వన్నిజ్ సుడె:తాన్. వాండ్రు కిక్కు కాల్యు అర్తికాన్.

34 పేతురు వన్నిజ్ సుడె:జి, “అయ్నెయ, యేసుక్రిస్తు నిజి నెగెండ కిజినాన్. నిజ్జి, నీ మంసం నీనె పెర్జి ఉండ్రె పడె:కాద్ ఇడె:అ” ఇహాన్.

* 9:24 9:24 సేప్లా. దమస్కు పట్టుం సురుల పెరి గోడె: తొహ్త మహాద్. గోడా:దు పట్టుం వెల్లి సొని సేప్లాజ్ మహా. బానె పట్టుం కాప్ కినికార్ కాప్ కిజి మహార్

35 వెటనె అయనెయ నిజిత్తాన్. లుదా నాటోదు, సారోసు దేసమ్దు మహికార్ విజేరె, వన్నిజ్ జర్గితిక నుడతారె యేసుప్రబుజ్ నమ్మిత్తార్.

36 అయావలె యోప ఇని పట్టుమ్దు తబిత ఇని ఉండ్రీ అయ్లి కొణ్ణో మహాద్. అదిబా యేసుప్రబు సిసూ. గ్రీకు బాసాదు దన్ని పేరు దొర్క. దొర్క ఇహిజ డుపి ఇజి అర్లం. అది ఎసెజ్బా నెగ్గి వణి కిజి మహాద్. సిల్లి వరిజ్ సాయం కిజి మహాద్.

37 గాని అది అయావలె ఉండ్రీ కస్టం అస్తాదె సాతాద్. వారు పీనుగుదిజ్ ఏరు వడిస్తారె మేడః మున్సు మన్ని గదిదు తెర్పారె.

38 లుద పట్టుం యోప పట్టుం డగ్రు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహారె రిఎర్ మణిసిరిజ్ పోక్కి, “దయ కిజి వెటనె రఅ”, ఇజి కబ్బు పోక్టార్.

39 పేతురు నిజితండ్రె వరివెట యోపాదు సాహాన్. వారు వన్నిజ్ మేడఃగది లోఇ ఒత్తార్. అబ్బె ముండ మణిసిక్ అడఃబాజి, దొర్క వరివెట మహివలె గుతిన్తి సొక్కెజ్ పాతెజ్ తోరిసి వన్ని సురుల నిహె.

40 పేతురు విజేరిజ్ వెల్లి పోక్టాండ్రె ముణుకుజ్ ఊర్జి పార్దనం కిత్తాన్. పీనుగుదిజ్ నుడఃజి, “తబిత, నిజ్అ” ఇహాన్. అయావలె అది బేస్తాదె పేతురుజ్ నుడఃజి నిజిత బస్తాద్.

41 పేతురు దన్నిజ్ కిక్కాజ్ అస్తాండ్రె నిక్టాన్. నమ్మితి వరిజ్, ముండ మణిసికాజ్ కూక్కి అది బత్తిత్తాద్ ఇజి వరిజ్ ఒపజెప్తాన్.

42 యాక యోపాదు మనికార్ విజేరె నెస్తారె నండొండార్ యేసుప్రబు మున్సు నమకం ఇట్టార్.

43 పేతురు యోపాదు సీమోసు ఇని ఒరెన్ తోల్కు పొర్ని వన్నిబాన్ యోప పట్టుమ్దు నండొ దినమ్కు బత్తితాన్.

10

పేతురు కొర్నెలియెజ్ సువార్త వెహినాన్

1 అయావలె కయసరియ ఇని పట్టుమ్దు, ఉద్దం కినివరి లోఇ కొర్నెలి ఇని ఒరెన్ సదాతివతి* మహాన్. వాండ్రు, వన్ని అడ్డి మహి ఉద్దం కినికార్ ఇటలి దేసెమ్దాన్ వాతి మహి గుంపుదికార్ ఇజి కూకె ఆతమహాల్.

2 కొర్నెలి, వన్ని ఇండ్రొణికార్, బక్తి మనికార్. వారు దేవుణుదిజ్ తియెల్ ఆతికార్. వాండ్రు సిల్లి వరిజ్ వన్నిజ్ మనిక సెడ్డినె సీజి మహాన్. దేవుణుదిజ్ ఎస్తివలెబా పార్దనం కినికాన్.

3 ఒర్నెండు మదెనం రమరమి మూండ్రీ గంటిజ, దేవుణు బాణిజ్ వాతి ఒరెన్ దూత వన్నిబాన్ నిహండ్రె, “కొర్నెలి”, ఇజి కూక్టాన్. కూక్తిజ్ యా దూతెజ్ టెటాజ్ నుడతాన్.

4 కొర్నెలి గొప్ప తియెల్ ఆతండ్రె, “ప్రబు, ఇనిక?” ఇహాన్. దూత వెప్టాన్, “నీను దేవుణుదిజ్ కిత్తి పార్దనమ్కు, సిల్లి వరిజ్ నీని దానం విజు దేవుణు నుడతండ్రె నీ వందిజ్ ఒడిబిజినాన్.

5 ఏలు యోప ఇని పట్టుమ్దు లోకాజ్ పోక్కి పేతురు ఇజి కూకె ఆని సీమోసు ఇని వన్నిజ్ కూక్కిన్అ.

* 10:1 10:1 వంద మంది విదెం కినివరిజ్ నడిప్పి రోమ అతికారి.

6 వాండ్రు సమ్దరం డగ్రు మన్ని సీమోను ఇని తోల్కు తయార్ కినికాన్ ఒరెన్ వన్ని ఇండ్రో బత్తిజినాన్”.

7 యాక వెప్పి దూత సొహిజ్, కొర్నెలి వన్ని పణి మణిసిర్ రివరిజ్ కూక్పిస్తాన్. ఎస్తివలెబా వన్నివెట కూడజి మంజిని బక్తి మన్ని ఒరెన్ ఉద్దం కిని వన్నిజ్బా కూక్పిస్తాన్.

8 జర్గితక విజు వరివెట వెప్తాండ్రె వరిజ్ యోప పట్టుమదు పోక్తాన్.

పేతురు సుడఃతి దర్సనం

9 మర్సనాండిజ్ వారు సొన్సి యోప పట్టుం డగ్రు ఆతార్. అయావలె మదెనం ఆతాద్. పేతురు పార్దనం కిదెజ్ మేడః† ముస్కు ఎక్తాన్.

10 పేతురు గొప్ప బజ కట్టిజ్ ఇనికబా ఉండెజ్ కోర్తాన్. బోజనం తయారాజి మహిజ్ వాండ్రు ఉండ్రె దర్సనం సుడఃతాన్.

11 అక్క ఇనిక ఇహిజ ఆగాసం రే ఆజి నాల్లి సెంగుజ అసిమహి పెరి దుపాటి ననిక ఉండ్రె బూమిదు డిపె ఆతిలెకెండ సుడఃతాన్.

12 దన్ని లోఇ బూమి ముస్కు మన్ని నాల్లి కాల్కు మన్ని విజు రకం జంతుజ్, బూమి ముస్కు ఊజి బూలానికెజ్, ఆగసమ్ ముస్కు ఎగ్రిని పొటిజ్ మహి.

13 అయావలె, “పేతురు, నిజ్అ, సప్పి తిన్అ”, ఇజి, ఉండ్రె మాట పేతురు వెహాన్.

14 దన్నిజ్ పేతురు, “సిల్లె ప్రబువా, తిండ్రెజ్ ఆఇకెజ్ ఎసిజ్బా నాను తిన్వ”, ఇజి వెప్తాన్‡.

15 వెప్తాజ్, మాట మరి వాతాద్, “దేవుణు నెగ్గిక ఇజి ఇడ్డికెజ్ నీను సెవద్ ఇజి ఎర్లిన్”.

16 ఈహు మూండ్రె సుట్కు జర్గితాద్. వెటనె ఆ దుపాటినన్నిక ఆగాసమ్దు మర్జి పెరె ఆతాద్.

17 దర్సనమ్దు సుడఃతి దన్ని అర్దం ఇనికాదో ఇజి పేతురు గొప్పజ ఒడిఃబిజి మహాన్. అయావలె కొర్నెలి పోక్తి లోకుర్ సీమోను ఇల్లు ఎమేణిక ఇజి వెన్బాజి నెస్తారె వన్ని ఇల్లు ముందాల వాతార్.

18 “పేతురు ఇజి కూకె ఆని సీమోను ఇబ్బె మనాండ్రా, సిల్లెండ్రా”, ఇజి పేరు అస్తారె డేడిఃస్తార్.

19 పేతురు దర్సనమ్దు సుడఃతి దన్ని వందిజ్ ఒడిఃబిజి మహివలెనె దేవుణు ఆత్మ వన్నివెట వెప్తాన్, “సీమోను, మువెర్ లోకుర్ నిజి రెబాజినార్.

20 నీను నిజ్జి అడ్డి డిఃగిజి సొన్అ. అనుమానం ఆవండ పరివెట సొన్అ. ఎందనిజ్ ఇహిజ నానె వరిజ్ పోక్త”.

21 పేతురు డిఃగిజి సొహండ్రె, “మీరు నజినె రెబాజినిదెర్. ఎందనిజ్ వాతిదెర్?”, ఇహాన్.

22 దన్నిజ్ వారు, “నదాతిపతి ఆతి కొర్నెలి మజి పోక్తాన్. వాండ్రు నీతి నిజాయితి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజేరె వెప్పినార్. ఒరెన్ దేవుణు దూత వన్నిజ్ తోరె ఆతండ్రె, ‘పేతురుజ్ నీ ఇండ్రో కూక్కి తసి వన్ని మాటెజ్ వెన్అ’ ఇహాన్”, ఇజి వెప్తాన్.

23 అయావలె పేతురు వరిజ్ ఇండ్రో తతాండ్రె, “నేండ్రు మా బాన్ మండ్రు”, ఇహాన్.

† 10:9 10:9 మేడ ముస్కు బాన్ మహి ఇల్కాజ్ ముస్కు మేడెజ్ మన్నె. ఎక్కి సొన్సి బస్తెజ్ ఆనాద్ ‡ 10:14 10:14 యూదురుజ్ తిండ్రెజ్ ఆఇకెజ్ సెగం మన్నె, అక్కిజ్ తిన్వర్

పేతురు కొర్రెలి ఇండ్రో సొన్నినాన్.

మహ్నా నాండిజ్ పేతురు నిజితండ్రె వరివెట పయనం ఆతాన్. యోపాదికార్ నెగొండార్ యేసుప్రబుజ్ నమ్మితికార్ వరివెట సొహార్.

24 ఉండ్రె రోజు పయనం ఆతారె మహ్నా నాండిజ్ వారు కయనరియాదు అందితార్. కొర్రెలి వన్ని కుటుమ్ది వరిజ్ వన్ని డగ్రుహి కూడెజు ఇండ్రో కూడుఘాండ్రె పేతురు వందిజ్ కాప్ కిజి మహాన్.

25 పేతురు ఇండ్రో వాతిజ్ కొర్రెలి సొహాండ్రె వన్ని పాదమ్కాజ్ ఆర్తాండ్రె వన్నిజ్ మాడిస్తాన్.

26 గాని పేతురు వన్నిజ్ నిక్తాండ్రె, “నిజ్అ, నానుబా నీ నన్ని లోకునె” ఇహాన్.

27 కొర్రెలి వెట వర్గిజి పేతురు లోఇ సొహిజ్ మంద లోకుర్ బాన్ కూడెజుమహిక సుండ్రెతాన్.

28 పేతురు వరి వెట వెప్తాన్. “మా యూదురి రూలు వజ ఇహిజు యూదురు ఆఇ లోకుర్ వెట కూడెనిక ఆవద్. వరివెట మంజినిక ఆవద్. ఇక్క మీరు నెసినిదెర్గదె. గాని లోకాజ్ ఎయెరిజ్బా తక్కుదికార్ ఇజి ఇండ్రెజ్ ఆవద్ ఇజి దేవుణు నజి తోరిస్త మనాన్.

29 అందెజె నజి కూక్పిస్తిజ్ నాను అడ్డు వెహావండ వాత. నజి ఎందనిజ్ కూక్పిస్తిదెర్. ఏలు వెహాఅ”, ఇహాన్.

30 అయావలె కొర్రెలి వెప్తాన్, “నాల్లి దినమ్కు ముండాల యా గడియూదునె నాను మదెనం మూండ్రె గంటిజు ఇండ్రో పార్దనం కిజి మహ. వెటనె మెర్నిని నన్ని పాతెజ్ పొర్పాతి మన్ని ఒరెన్ నా ఎద్దు నిహాన్.

31 “కొర్రెలి, దేవుణు నీ పార్దనమ్కు వెహాన్. సిల్లి వరిజ్ సెడ్డిని సెత్తికెజ్ దేవుణు సుండ్రెతాన్.

32 యోపాదు కబ్బు పోక్కి పేతురు ఇజి కూకె ఆని సీమోనుజ్ కూక్పిన్అ. వాండ్రు నమ్దరం డగ్రు తోల్కు తయార్ కినికాన్ ఒరెన్ సీమోను ఇని వన్ని ఇండ్రో బత్తిజునాన్.

33 అందెజె వెటనె నిజి కబ్బు పోక్త. నీను వాతికాదె నెగెద్. ఏలు మాపు విజెపె దేవుణు డగ్రు వాతావ. మా వెట వెప్తాజ్ దేవుణు నిజి ఆడ్రె సెత్తి విజు మాటెజ్ వెండ్రెజ్ మాపు వాతావ.

34 దన్నిజ్ పేతురు వెప్తాన్, “దేవుణు విజెరిజ్ ఉండ్రె లెకెండ్రె సుండ్రెజునాన్, ఇజి ఏలు నాను నిజమ్నె నెస్సా.

35 ఎమేణి జాతి ఇహిజ్బా దేవుణుదిజ్ తియెలాజి, నీతి నిజాతిదాన్ నడిఃతిజు దేవుణు వన్నిజ్ ఒప్పుకొణాన్.

36 యేసు క్రీస్తు విజెరిజ్ ప్రబు. దేవుణు వెట లోకాజ్ కూల తోహిస్సెజ్ వాండ్రు యేసుజ్ పోక్తాన్. యేసువలెహాన్ ఇస్రాయేలు లోకాజ్ సమదనం వాతాద్ ఇజి దేవుణు సువార్ద పోక్తాన్.

37 యోహాను దేవుణు మాటెజ్ బోదిసి బాప్తిసం సెత్తి వెనుక గలీలయాదాన్ మొదొల్లి యూదయ దేనమ్దు విజు ఇనిక జర్గితాద్ ఇజి మీరు నెసినిదెర్.

38 యాక ఇనిక ఇహిజు, దేవుణు, నజరేతు వాండ్రు ఆతి యేసుజ్ దేవుణు ఆత్మ సత్తు సీజి ఏర్పాటు కిత్తాన్. వాండ్రు సొన్ని నెగ్గి పణిజ్ కిత్తాండ్రె నయ్నాన్ లోకురిజ్ కిజిని బాదెజాణిజ్ డిఃబిస్తాన్. దేవుణు వన్నివెట మహిజానె వాండ్రు అక్కెజ్ విజు కిదెజ్ అట్టాన్.

39 వాండ్రు యూదురి దేసమ్దుని, యెరూసలేమ్దుని, కిత్తి విజు వనకాజ్ మాపు సాసిర్. యూదురు వన్నిజ్ సీలువాదు డెయ్యూరె సప్తార్.

40 గాని మూండ్రి రోస్కాజ్ దేవుణు వన్నిజ్ సాతి వరిబాణిజ్ నిక్తాండ్రె మజి తోరిస్తాన్.

41 విజెరె లోకాజ్ వాండ్రు తోరె ఆవతాన్. దేవుణు ముజాలె ఏర్పాటు కిత్తి సాసిర్, ఇహిజు, మజినె వాండ్రు తోరె ఆతాన్. సాతి వరిబాణిజ్ నిజితి వెన్కా మాపె వన్నివెట తింజి ఉణిజి మహోవ్.

42 సాతి వరిజ్, బత్రిజుని వరిజ్ తీర్పు సీదెజ్ దేవుణు యేసుజె ఏర్పాటు కిత్తాన్ ఇజి సాసి వెప్పి సువార్త సాటిస్తాజ్ యేసుప్రబు మజి ఆడ్ర సీత్తాన్.

43 ప్రవక్తరు విజెరె వన్ని వందిజ్ ఇని సాసి వెప్తార్ ఇహిజు, వన్ని ముస్కు నమకం ఇడ్చి విజెరి పాపం దేవుణు వన్ని వందిజ్ సెమిస్సానై ఇజి.

యూదురు ఆఇ వరిజ్ దేవుణు ఆత్మ సత్తు, దోహోక్సినాద్.

44 పేతురు యా మాటెజ్ వెప్పి మహిజ్నె, వన్ని మాటెజ్ వెంజి మహివరి ముస్కు దేవుణు ఆత్మ వాతాద్.

45 పేతురు వెట వాతి మహి నమ్మిత్తికార్ యూదురు, యాక సుడెతారె బమ్మ ఆతార్. “యూదురు ఆఇ వరిజ్బా దేవుణు ఆత్మ సత్తు ఇని ఇనాయం దేవుణు సీజినాన్”, ఇజి బమ్మ ఆతార్.

46 ఎందనిజ్ ఇహిజు దేవుణు ఆత్మ సత్తు వరి ముస్కు వాతిజ్ వారు ఆఇ బాసెజ్ వరిజి దేవుణు ఎసానో పెరికాన్ ఇజి స్తుతి కినిక వీరు వెహార్.

అయావలె పేతురు వెప్తాన్,

47 “మజి దేవుణు ఆత్మ దోహోక్తి లెకెండ్ విరిజ్బా దోహోక్తాద్. ఏలు వీరు ఏరుదు బాప్తినం లాగె ఆదెజ్ ఇహిజు ఎయెర్బా అడ్డు కిదెజ్ అట్నారా?”.

48 అందెజె యేసుక్రీస్తు పేరు అసి ఏరుదు బాప్తినం లాగె ఆదెజ్ పేతురు వరిజ్ ఆడ్ర సీత్తాన్. వెనుక, సెగం రోస్కు మా వెట మన్అ ఇజి వారు పేతురుజ్ వెప్తార్.

11

పేతురు జర్గితికెజ్ వెప్పినాన్.

1 యూదురు ఆఇ లోకుర్బా దేవుణు - మాటెజ్ నమ్మిత్తార్ ఇజి యూదయ దేసమ్దు మన్ని నమ్మిత్తికార్ని, అపొస్తలురు వెహార్.

2-3 అందెజె పేతురు ఎక్కు యెరూసలేమ్దు సాహివలె బానె మహి సునతి కిదె ఆతి యూదురు, వన్నివెట తర్కిస్తార్. “నీను సునతి కిజ లోకుర్ వెట కూడితి మహి, వరివెట ఉణిజి మహి”, ఇజి వన్ని ముస్కు తర్కిస్తార్.

4 అయావలె పేతురు, జర్గితికెజ్ విజు మొదోహాన్ అసి వరివెట వెప్తాన్.

5 “నాను యోప పట్టమ్దు మహివలె ఒర్నెండ్ పార్లనం కిజి మహిజ్ ఉండ్రి దర్లనం సుడెత. ఇనిక సుడెత ఇహిజు, ఆగాసం రే ఆజి నాల్లి సెంగుజు అసిమహి పెరి దుపాటి ననిక ఉండ్రి బూమిదు డీపె ఆతిలెకెండ్ నా డ్రగు డీగ్జి వాతాద్.

6 అక్క నెగ్రెండ సుడెతిజ్ దన్ని లోఇ నాల్లి కాల్కు మన్ని జంతుజ్, అడివి జంతుజ్, బూమి ముస్కు ఉణిజి బూలానికెజ్, ఆగాసం ముస్కు ఎగ్రిని పొటిజ్ నజి తోరితె.

7 అయావలె, ‘పేతురు నిజ్అ. సప్పి తిన్అ’, ఇజి ఉండ్రి మాట వెహా.

8 దన్నిజ్ నాను, 'సిల్లె ప్రబు, సెవిద్ ఇజి ఇడ్డికెజ్ ఇనికెజ్ బా నాను ఎసెజ్ బా తిన్ వ' ఇహా.

9 ఆగాసమ్ దాన్ మాట మరి వాతాద్, 'దేవుణు నెగ్గిక ఇజి వెహ్తైకెజ్ నీను ఏరిన్మ'.

10 ఈహు మూండ్రి సుల్లు వాతాద్. ఆక్కర్దిజ్ అక్కెజ్ విజు ఆగసమ్ దు మర్జి పెరె ఆతై.

11 యాక జర్గితి వెటనె కయ్యురియదాన్ కొర్నెలి పొక్తి ముఎర్ లోకుర్ నజీ రెబాజి నాను మహి ఇల్లు డగ్గు వాతాద్.

12 అయావలె దేవుణు ఆత్మ, 'నీను ఇని అనుమానం సిల్లెండ వరివెట సొన్ అ' ఇహాన్. వీరు ఆరుగురు నమ్మిత్తికార్ బా నావెట వాతాద్. వాతారె మాపు కొర్నెలి ఇండ్రో సొహావ్.

13-14 కొర్నెలి ఇండ్రో సొహిజ్, దేవుణు దూత వన్నివెట వెహ్తైకెజ్ విజు వెహ్తాన్. 'నీను యోపాదు లోకాజ్ పొక్తి పేతురు ఇజి కూకె ఆని సీమోనుజ్ కూక్పిన్ అ. వాండ్రు వానాండ్రె నీను, నీ కుటుమ్ దికార్ విజేరె పాపం కిత్తి దన్ని సిక్కుదాన్ ఎలాగ గెలిస్తెజ్ ఆనాద్ ఇజి వెహ్నాన్ లె' ఇజి వెహ్తైకెజ్ విజు కొర్నెలి మజి వెహ్తాన్.

15 నాను వరివెట వర్గిదెజ్ మొదోల్స్తిజ్, మా మున్కు దేవుణు ఆత్మ తొలిత ఎలాగ వాతాదో అయావజనె వరి మున్కుబా వాతాద్.

16 అయావలె నజీ ప్రబు మాటెజ్ గుర్తు వాతాద్. ఇనిక ఇహిజు, 'యోహాను ఏరుదాన్ బాప్తిసం సిత్తాన్. గాని మీరు దేవుణు ఆత్మదాన్ బాప్తిసం లాగె ఆనిదెర్ లె' ఇజి.

17 అహిజు మాపు ప్రబు ఆతి యేసుక్రీస్తు మున్కు నమకం ఇట్టి వలె దేవుణు మజి సిత్తి ఇనాయమ్ నె వరిజ్ బా సిత్తాన్. దేవుణుదిజ్ అడ్డు కిదెజ్ నాను ఎపటిదికానా?"

18 యాక వెహారె వారు మరి ఇని అడ్డుబా వెహోవతార్. "నిజమెనె, యూదురు ఆఇ వరిజ్ బా వరి పాపమకు డిసిసిజి దేవుణుదిజ్ లోజిజి ఎలాకాలం బత్తిదెజ్ దేవుణు సరి సీజినాన్", ఇజి వెహ్ని వారు దేవుణుదిజ్ స్తుతి కిత్తార్.

అంతియోకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 స్తైపానుజ్ సప్తివెనుక యేసుప్రబు మున్కు నమ్మితి వరిజ్ లావు మాలెజ్ వాతిజ్ వారు సెద్రిత సొహార్. సెద్రితికార్ సెగొండార్ పెనికె, కుప్ర, అంతియొకియ ఇని దేసమ్ దాక సొహారె యూదురిజ్ ఉండ్రెనె దేవుణు మాటెజ్ వెహ్తార్.

20 గాని వరి లోఇ సెగొండార్ కుప్రదికార్, కురేనియదికార్ మహార్. వారు సొన్ని అంతియోకయాదు మన్ని గ్రీకు బాస వర్గిని వరిజ్ బా యేసు ప్రబు వందిజ్ సువార్త వెహ్తార్.

21 ప్రబు సత్తు వరివెట మహాద్. అందెజె మంద లోకు దేవుణు మాట నమ్మిత్తారె ప్రబు మున్కు నమకం ఇట్టార్.

22 యెరూసలేమ్ దు మన్ని నజమ్ దికార్ యాక వెహారె బర్నబెజ్ అంతియోకయాదు పొక్తార్.

23 బర్నబు వాతండ్రె దేవుణు దయ వరి మున్కు వాతాద్ ఇజి సుడెతాండ్రె సర్ల ఆతాన్. దేవుణు మున్కు ఉండ్రె మన్కుదాన్ నమ్మిదు ఇజి వాండ్రు వరిజ్ దయేరం వెహ్తాన్.

24 బర్నబు దేవుణు ఆత్మ సత్తుదాన్, నమకమ్ దాన్ నిండితికాన్, నెగ్గికాన్. వాండ్రు దేవుణు మాటెజ్ బోద్దిస్తిజ్ మంద లోకుర్ యేసుప్రబు మున్కు నమకం ఇట్టార్.

25 వెనుక బర్నబు సవులుజ్ రెబాజి తారు పట్నం సొహాన్.

26 సవులుజ్ రెబాజి దొహ్క్తిజ్ వన్నిజ్ అంతియొకయాదు తతాన్. వారు రిఎర్ ఉండ్రీ ఏండు బానె మహి సజమ్దికార్ వెట కూడితారె మంద లోకాజ్ దేవుణు మాటెజ్ బోదిస్తార్. అంతియొకయాదునె, నమ్మితి వరిజ్ క్రిస్తు లోకు ఇజి పేరు తొలిత ఇడె: ఆత మహాద్.

27 యా కాలమ్దు ప్రవక్తరు సెగొండార్ యెరూసలేమ్దాన్ అంతియొకయాదు వాతార్.

28 వరి లొఇ అగబ ఇనికాన్ ఒరెన్ దేవుణు ఆత్మదాన్ నిండ్రీతాండ్రె రోమరాజు ఏలుబడి: కిని దేసమ్కాజ్ విజు ఉండ్రీ పెరి కరు వానాద్ లె ఇజి వెహ్తాన్. (క్లవుదియ ఇని రాజు ఏలుబడి: కిత్తి కాలమ్దు యా కరు వాతాద్)

29 అయావలె నమ్మితికార్ విజేరె యూదయదు బత్కిని నమ్మిని వరిజ్ సాయం పొక్తెజ్ ఒడి:బితార్. మాపు ఎసా సీనాపొ నసా సీనాప్ ఇజి వారు ఒడి:బితార్.

30 వరి సాయమ్కు వారు బర్నబుని, సవులు వెట పెద్దెలుజబాన్ పొక్తార్.

12

పేతురు జెలిదాన్ గెలిస్తాన్.

1 అయ కాలమ్దు హేరోదు రాజు సజమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్.

2 యోహానుజ్ దాద ఆతి యాకోబుజ్ కుర్దదాన్ నపిస్తాన్.

3 యా సజతి యూదురిజ్ ఇన్టం ఆతాద్ ఇజి నెస్తాండ్రె హేరోదు రాజు పేతురుజ్బా తొప్పి ఇడె:దెజ్ ఆడ్రసిత్తాన్. యూదురి పులాజ్ ఆఇ రొటెజ్ తిని పండొయ్ దిసమ్కాజ్ యాక జర్గితాద్.

4 పేతురుజ్ అరెస్టు కితారె వన్నిజ్ జేలిదు ఇట్టార్. జేలిదు ఇట్టారె వన్నిజ్ కాప్ కిజి మండ్రెజ్ పదహారు మణిసిరి జమానుజ ఒపజెహ్తాన్. ఉండ్రె సుటు నాల్ఎర్ మణిసిరి కాపు మంజినార్. పస్కు పండొయ్ వెన్కా లోకాజ్ నడి:మి తసి పేతురుజ్ తీర్పు తీరిస్తెజ్ హేరోదు రాజు ఒడి:తాన్.

5 ఆహె పేతురు జెలిదు మహాన్. గాని సజమ్దికార్ వన్ని వందిజ్ గటిజ దేవుణుదిజ్ పార్దనం కిజి మహార్.

6 మరననాండిజ్ పేతురుజ్ తీర్పు తీరిస్తెజ్ వెల్లి తన ఇజి హేరోదు రాజు ఒడి:బిత మహాన్. అయ పొదొయ్ పేతురు రిఎర్ జమానుజ నడి:మి రుండి గొల్స్కానిజ్ తొహె ఆజి నిద్ర కిజి మహాన్. రిఎర్ జమానుజ్ వెల్లి కాపు మహార్.

7 అయావలె వెటనె ఒరెన్ దేవుణు దూత తోరె ఆతాన్. ఆ గది లొఇ జాయ్ నన్ని వెల్లర్ వాతాద్. దూత పేతురుజ్ పడె:కాదు డెయ్జి బేగి నిజ్అ ఇజి వెప్పి నిక్తాన్. వన్ని కిక్కానిజ్ గొల్స్కు ఊడె:జి అరె.

8 దూత వన్నివెట, “నీను నడుముదు తొహె ఆజి జోడ్కు తొడె:గిఅ”, ఇహాన్. పేతురు అక్కిజ్ తొహ్తిజ్ దూత, “నీ పాత పిడి:గ్గి నా వెనుక రఅ”, ఇహాన్.

9 పేతురు దూత వెనుక సొహండ్రె జెలిదాన్ వెల్లి వాతాన్. గాని జర్గినిక నిజెమొ ఆవ్దొ ఇజి పేతురు నెన్వెతాన్. యాక విజు దర్ననమ్దు సుడె:జిన ఇజి ఒడి:బితాన్.

10 వారు ముందాల కాప్ కిని వరిజ్ డాట్నీ వెనుకాది వరిజ్ బా డాట్నీ పట్ను సొని ఇనుము గవుని డగ్రు వాతార్. వాతిజ్ అదినె రే ఆతాద్. వారు సోసి వాజి ఉండ్రీ వీది డాట్నీ సొహి వెటనె దూత వన్నిజ్ డిస్త సొహాన్.

11 అయావలె, జర్గితికెజ్ విజు నిజమె ఇజి పేతురు తెలి ఆతాన్. దేవుణు వన్ని దూతెజ్ పొక్తాండ్రె నజీ హేరోదు రాజు బాణిజ్ డిబిస్తాన్. యూదురు నజీ ఇనిక కిడెజ్ ఒడిఃబిత్రారో దన్ని లొఇహాన్ బా డిబిస్తాన్ ఇజి ఏలు నాను నిజం నెన్నా ఇజి ఒడిఃబిత్రాన్.

12 యాక నెస్తాండ్రె పేతురు, మార్కు ఇజి కూకె ఆని యోహానుజ్ అయ్సి ఆతి మరియు ఇండ్రో సొహాన్. బాన్ మంద లోకుర్ కూడిత మహారె పార్లనం కిజి మహార్.

13 పేతురు వెల్లి మహి సేప్లాదు కొత్తాన్. ఎయెన్ ఇజి వెండ్రెజ్ రోద ఇని పణి మణిసిబాన్ సొహాద్.

14 అది పేతురు కంటం గుర్తు అస్తాదె గొప్ప సర్ల ఆతాద్. సేప్లా రేవండ ఉహ్ కి సొహాదె, “పేతురు సేప్లా డగ్రు నిహ మనాన్”, ఇజి మహి వరిజ్ వెప్టాద్.

15 వారు, “నిజి వెరి మనాద్” ఇహార్. గాని అది మరి మరి వెప్టాజ్ వారు, “అహిజ వన్ని దూత వాతాద్” ఇహార్.

16 గాని పేతురు సేప్లాదిజ్ కొత్తి మహాన్. వారు సొన్ని సేప్లా రేతిజ్ పేతురుజ్ సుడఃతారె గొప్ప బమ్మ ఆతార్.

17 మీరు జమ్న మండ్రు ఇజి పేతురు వరిజ్ కియు సయ్న కితాండ్రె, దేవుణు వన్నిజ్ ఎలాగ జెలి లొఇహాన్ వెల్లి తత్తాన్ ఇజి వరిజ్ విజు వెప్టాన్. యాక యాకోబుజ్ ని మహి నమ్మితి వరిజ్ వెప్టా ఇహండ్రె మరి ఉండ్రీ బాడ్డిదు సొహాన్.

18 పెందాహిజ్ జేలిదు మహి జమాజ్ణు గొప్ప గాబ్ర ఆతార్. పేతురు ఇనిక అతాండ్రె ఎంబె సొహండ్రె ఇజి వారు గొప్ప గాబ్ర ఆతార్.

19 పేతురుజ్ రెబాజి దొహ్ కిస్తెజ్ హేరోదు రాజు ఆడ్ర సిత్తాన్. గాని వారు ఎసొ రెబాజిజ్ బా తోర్ ఏత్తాన్. అందెజ్ హేరోదు రాజు కాప్ కిజి మహి జమాన్ జు మరి మరి యా సజతి వందిజ్ వెన్ బాజి పేతురు గెలస్త సొహాన్ కాక వరి మున్ను తీర్పు కితాండ్రె వరిజ్ సప్టెజ్ ఆడ్ర సిత్తాన్.

హేరోదు రాజు సాతాన్.

హేరోదు రాజు యూదయదాన్ కయ్ సరియాదు సొహండ్రె బాన్ సెగం కాలం బత్తితాన్.

20 హేరోదు రాజు తూరు పట్నమ్ది వరి మున్ను, సీదోసు పట్నమ్ది వరి మున్ను గొప్ప కోపం కల్లిజి మహాన్. అందెజ్ వారు ఉండ్రె మన్నుదాన్ వాతారె రాజు ఇండ్రోణి అతికారి ఆతి ఒరెన్ బ్లాస్తు ఇని వన్నిజ్ వరి పడఃకాదు కూడుఃప్తార్, రాజు వరి మున్ను సమదనం ఆదెజ్ ఇజి. ఎందనిజ్ ఇహిజు రాజు దేసమ్దానె వరిజ్ పంట దొహ్ కి మహాద్.

21 ఏర్పాటు కిత్తి రోజు, హేరోదు రాజు, రాజుర్ తొడఃగిని సొక్కెజ్ పొర్పాతాండ్రె రాజు కుర్నిదు బస్తాండ్రె వాతివరివెట మీటిజ్దు వర్గితాన్.

22 అక్క వెహారె లోకుర్, వీండ్రు ఒరెన్ దేవుణు లెకెండ్ వెస్సినాన్, లోకు లెకెండ్ అవెన్ ఇజి గగోల్ కిత్రాన్.

23 రాజు యాక వెహిజ్ దేవుణుదిజ్ స్తుతి కివితాన్. వెటనె దేవుణు దూత వన్నిజ్ ఉండ్రీ కస్తం పుటిస్తెజ్ వాండ్రు పిడుఃకు ఆజి సాతాన్.

24 గాని దేవుణు సువార్త మరి మంద లోకు వెహార్కాక దేవుణు ముస్సు నమకం ఇట్టార్.

25 బర్నబని సవులు యెరూసలేమ్దు సొన్ని వరి పణిజ్ వీస్తారె మార్కు ఇజి కూకె ఆని యెహూనుజ్ కూడుఃవ్తారె యెరూసలేమ్దాన్ మర్జి వాతార్.

13

బర్నబెజ్ని సవులుజ్ సువార్త సాటిస్తెజ్ దేవుణు సజమ్దికార్ ఏర్పాటు కిత్తార్.

1 అంతియొకయాదు మహి సజమ్దు, సెగొండార్ ప్రవక్తరు, మరి సెగొండార్ దేవుణు మాటెజ్ బోదిసినికార్ మహార్. వారు ఎయెర్ ఇహిజ, బర్నబు, నిగెర్ ఇజి కూకె ఆని సిమెయోను, కురేనదికాన్ లూకియ, హేరోదు అంతిపాన్*.

2 వీరు దేవుణుదిజ్ పార్దనం కిజి ఉపాస్ కిజి మహివలె దేవుణు ఆత్మ వెహ్హన్, “బర్నబెజ్ని సవులుజ్ నాను కూక్తి పణి వందిజ్ మీరు ఏర్పాటు కిదు”.

3 వెహ్హజ్, సజం ఉపాస్ మంజి పార్దనం కితారె వరి ముస్సు కిక్కు ఇట్టారె, దేవుణు వెహ్హి పణి వందిజ్ పోక్తార్.

బర్నబని సవులు కుప్త ఇని ద్వీపుదు సొహార్.

4 దేవుణు ఆత్మ పోక్తిజ్ బర్నబని సవులు డిఃగు సమ్దరం డగ్గు మన్ని సెలూకిన ఇని పట్టుం సొహారె ఓడఃదు ఎక్తారె కుప్త ఇని ద్వీపుదు† సొహార్.

5 వారు సలామి ఇని పట్నమ్దు సొహారె బాన్ మహి యూదురి మీటిజ్ కిని ఇల్కాజ్ సొహారె దేవుణు మాటెజ్ సాటిసి మహార్. మార్కు ఇజి కూకె ఆని యెహూను వరివెట పరిజ్ తోడుః లెకెండ మహార్.

6 వారు అయ ద్వీపు విజు పయనం కితారె పాపు ఇని పట్నమ్దు వాతార్. బానె వారు బర్యేసు ఇజి కూకె ఆని ఒరెన్ యూద వన్నిజ్ సుడఃతార్. వాండ్రు ఒరెన్ సెట్టికాన్. వాండ్రు అబద్దం మాటెజ్ వెహ్హి ప్రవక్త. దేవుణు మాటెజ్ వెహ్హి ప్రవక్త ఇజి నాటిసి నాన్ గాని ఆవన్.

7 వాండ్రు రోమ గవర్నరు ఆతి సెర్గిపవులు వెట మహికాన్. అయ రోమ గవర్నరు ఇహిజ వాండ్రు తెలివి మన్నికాన్. వాండ్రు దేవుణు మాటెజ్ వెనా ఇజి బర్నబెజ్ని సవులుజ్ కూక్పిస్తాన్.

8 గాని అయ సెట్టికాన్ పరిజ్ అడ్డు కిత్తాన్. (గ్రీకు బాసదు వన్ని పేరు ఎలీమ) రోమ గవర్నరు ఆతి సెర్గిపవులు యేసుప్రబు ముస్సు నమకం ఇడఃవిండాదెజ్ సుడఃతాన్, యా గార్ది విదె కినికాన్.

9-10 అయావలె సవులు (వన్నిజ్ పవులు ఇని పేరుబా మహద్) దేవుణు ఆత్మదాన్ నిండ్రితాండ్రె ఎలీమేజ్ తి నాజ్ సుడఃజి వెహ్హన్, “నీను సయ్యూన్ పొటాదికాన్, నీతి నిజాయితీ ఆతి విజు దన్నిజ్ పడఃఇకి. నీను పూర్తి సెఇకి, గొప్ప మొసెం కినికి. నిజమాతి దేవుణు మాటెజ్ నిజం ఆఇకెజ్ ఇజి తోరిసిని.

11 ఇదిలో, దేవుణు ఏలు నిజి తీర్పు సీజి సిక్కు సీజినాన్. నీను సెగం కాలం గుడ్డి ఆజి పొద్దుదిజ్ సుడఃదెజ్ అట్విండ ఆనిలె” వెటనె వాండ్రు గుడ్డి ఆతాన్. గోయ్ నన్ని

* 13:1 13:1 హేరోదు అంతిపాన్. మార్కు సువార్తదు బాప్తీసం సీని యెహూనుజ్ జెలిదు ఇడ్డి వెనుక వన్నిజ్ సప్తెజ్ ఆడ్ర సీత్తి హేరోదు రాజు వీండ్రె. (మార్కు 6:14-28) రాజు వెట కూడఃజి పిరితి మనయేను, సవులు ఇనికార్

† 13:4 13:4 ద్వీపు. సురుల సమ్దరం మన్ని ఇజిరి దేసెం

గాందుదాన్ వన్ని కళెకెజ్ సీకటి ఆతె. ఎయెర్బా కికాజ్ అసి బుల్లెయ్ కిబిస్సారా ఇజి అతాల్ ఇతాల్ బూలాజి ముహాన్.

12 అయ రోమ గవర్నరు జర్లిక సుడెతివలె యేసుప్రబు ముస్సు నమకం ఇత్తాన్. ఎందనిజ్ ఇహిజ యేసుప్రబు - వందిజ్ బోద వెంజి బమ్మ ఆతాన్.

పవులుని బర్బబ పిసిదియ దేనమ్దు మన్ని అంతియోకయాదు సువార్ద వెహ్నినార్

13 వెనుక పవులుని వన్నివెట మహికార్ ఓడె: ఎక్టారె పాపుదాన్ పంపులియాదు మన్ని పెర్గ ఇని పట్నం సాహర్. బానె యోహాను వరిజ్ డి:స్తారె యెరూసలేమ్దు మర్జి సాహాన్.

14 వారు పెర్గు పట్టుమ్దాన్ సోత్తారె పిసిదియ దేనమ్దు మన్ని అంతియోకయాదు సాహర్. బానె వారు విస్తాంతి దినమ్దు యూదురి మీటిజ్ ఇండ్రో సాహరె బస్తార్.

15 మోసె సిత్తి రూలుదాన్, ప్రవక్తరు రాస్తి మాటెజదాన్ సెగం సద్వితి వెనుక మీటిజ్ ఇండ్రోణి అతికారిజు పవులుని బర్బబ వెట. “దాదారండె, లోకాజ్ బోదిస్తెజ్ ఇని మాటెజ్బా మహిజ వెప్తు” ఇహార్.

16 అయావలె పవులు నిజితండ్రె విజేరె అలెజి మండ్రు ఇజి కియు సయన కితాండ్రె వరివెట వెహ్నాన్, “ఇస్తాయేలు లోకాండె, దేవుణుదిజ్ తియెల్ ఆని యూదురు ఆఇ లోకాండె, నా మాట వెండ్రు.

17 మా ఇస్తాయేలు లోకు పార్లనం కిని దేవుణు, మా అనిగొరిజ్, వన్ని లోకుర్ ఇజి మండ్రెజ్ ఏర్పాటు కితాన్. వారు అయగుప్తు దేనమ్దు ఆఇదేనమ్దివరిలెకెండె మహివలె వరిజ్ నండ్రె లోకు ఎల్పిస్తాన్. వెనుక గొప్పసత్తుదాన్ వరిజ్ అబ్బెణాన్ గెల్పిసి తత్తాన్.

18 రమారమి నలపయ్ పంటెజ్ వారు బిడి:మ్ బూమిదు సొన్ని మహివలె దేవుణు వరిజ్ ఓరిసి మహాన్.

19 కనాను దేనమ్దు మహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేసెం వన్ని లోకాజ్ అక్కు లెకెండె సిత్తాన్.

20 యాకెజ్ విజు నాల్లి వందెజ్ యబాయ్ పంటెజాణ్ జర్లితె.

వెనుక సముయేలు ఇని ప్రవక్త వాతి కాలమ్దాక వరిజ్ ఏలుబడి: కిదెజ్ తీర్పు తీరిస్సి నెయ్యి లోకాజ్ దేవుణు ఏర్పాటు కితాన్.

21 దన్ని వెనుక ఇస్తాయేలు లోకుర్ ‘మజి ఉండ్రె రాజుజ్ ఏర్పాటు కిత’ ఇజి వెహ్నిజ్ దేవుణు వరిజ్ బెన్యమిను కుటుమ్దికాన్ కీను మరిసి ఆతి సవులుజ్ నలపయ్ పంటెజ్ ఏలుబడి: కిదెజ్ ఏర్పాటు కితాన్.

22 వెనుక సవులుజ్ లాగితాండ్రె దావీదుజ్ రాజువజ దేవుణు ఏర్పాటు కితాన్. దావీదు వందిజ్ దేవుణు ఇని సాసి వెహ్నాన్ ఇహిజ, ‘యెసెయి మరిసి ఆతి దావీదు ఇహిజ నాను ఒడి:బిని లెకెండె ఒడి:బిజినాన్. నాను ఇన్టం ఆనికెజ్ వాండ్రు ఇన్టం ఆజినాన్. వాండ్రు ఇనిక కిదెజ్ ఇజి నాను కోరిజినానో అక్కెజ్ వాండ్రు కినాన్’.

23 యా దావీదు పొటెజాణిజె మా అనిగొరి వెట దేవుణు ఒట్టుకిత్తి లెకెండె ఇస్తాయేలు లోకాజ్ తప్రిస్సికాన్ ఆతి యేసుజ్ పుటిస్తాన్.

24 యేసు వాని ముందాల యోహాను ఇస్తాయేలు లోకాజ్ బోదిస్తాన్. ఇనిక ఇహిజ ‘విజేరె పాపమ్కు ఒప్పుకోడె:జి డి:సిసిజి బాప్తీసం లాగె ఆదెజ్’ ఇజి.

25 యోహాను వన్ని పణి వీన్నివలె లోకాజ్ వెహ్తాన్, 'నాను ఎయెన్ ఇజ మీరు ఒడిబిజినిదెర్? మీరు ఒడిబిజినికాన్ ఆవన్ నాను. మీరు ఎద్దు సుడేజి మహికాన్ వెన్యా వాజినాన్. వన్ని జోడ్కుబెల్లు కూతెజబా నాను ఏపటిదిక ఆవ'.

26 తంబెరిజాండె, అబ్రాహాం కుటుమ్దికిదెరా, దేవుణుదిజ్ తియెల్ ఆనికిదెరా, దేవుణు లోకాజ్ ఎలాగ గెల్పిస్సాన్లె ఇజి కబ్బు దేవుణు మజి విజేరిజె పోక్తాన్.

27 ఎందనిజ్ ఇహిజ యెరూసలేమ్దు మహికార్, వరి అతికారి లోకుర్, యేసు, దేవుణు పోక్తాన్ ఇజి గుర్తు అవ్వతార్. విజు విస్తాంతి దినమ్దు వారు ప్రవక్తరు రాస్తి మాటెజ్ సద్వివితార్ గాని అర్దం కివితార్. గాని ప్రవక్తరు ముందాల్పె వెహ్తి అయ మాటెజ్ వజ జర్పిస్తార్. ఎలాగ ఇహిజ యేసుజ్ సప్తెజ్ వారు తీర్పు కిత్తార్.

28 యేసుజ్ తీర్పు కిని వన్నిడగు తసి సావుదిజ్ తగితి తప్పు ఇనికబా కివితాన్ ఇజి సుడేతిజ్బా గాని విన్నిజ్ సిలువ డెయేజి సప్పు ఇజి వారు పిలాతుజ్ బతిమాలితార్.

29 యేసుజ్ యూదురు ఇనికెజ్ ఇనికెజ్ కినారొ ఇజి ప్రవక్తరు రాస్తి మహికెజ్ విజు వారు కిత్తి వెనుక వన్ని సిసూర్ వన్ని పీనుగుదిజ్ సిలువదాన్ డిప్తారె సట్టువణుకుదు దొలిస్తి సాలమ్ లొఇ ఇత్తార్.

30 గాని దేవుణు యేసుజ్ సాతి వరిబాణిజ్ నిక్తాన్.

31 గలీలయదాన్ యెరూసలేమ్దు వన్నివెట సొన్సి మహి వరిజ్ యేసు నండొ రొస్కు తోరె ఆతాన్. వారు ఏలు మాటు ఇస్తాయేలు లోకాజ్ సడేమి యేసుజ్ సాసిర్.

32-33 ఏలు మాపు మిజి సువార్త వెహ్సినావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగొగొర్ వెట దేవుణు కిత్తి ఒట్టు. వరిజ్ కిత్తి ఒట్టు వరి పొటెజాణికార్ ఆతి మా వందిజ్ ఏలు జర్గితాద్. "నీను నా మరిన్, నేండ్రు నాను నీ బుబ్బు ఆత మన్న", ఇజి కిర్తన రుండిదు రాస్తి మనిక దిన్నివందిజె.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్బిద్ ఇజి వన్నివందిజ్ దేవుణు మాటాదు ఈహు రాస్త మనాద్. "దావీదుజ్ సీనా ఇజి ఒట్టు కిత్తి నెగ్గి దీవెనమ్కు నాను మిజి తవ్విండ సీనా".

35 కిర్తన పుస్తకమ్దు మరి రాస్త మనాద్. అక్క ఇనిక ఇహిజ "నీను పోక్తివన్ని పీనుగు సబ్బెజి సొండ్రెజ్ నీను సరి సిఇ".

36 అహిజ దావీదురాజు దేవుణు ఏర్పాటు కిత్తి వజి వన్ని తరమ్ది వరిజ్ సేవ కిజి వీస్తాండ్రె సాత సాహాన్. వన్ని అనిగొగొర్బాన్ వన్నిజ్బా ముస్తార్. వన్ని పీనుగు సబ్బెజి సాహాద్.

37 గాని సాతి వరిబాణిజ్ దేవుణు నిక్తి యా యేసు పీనుగు సబ్బెజి సొన్వితాద్.

38 అందెజె తంబెరిజాండె, మిజి వెహ్సినా సువార్త యాకాదె. పాపమ్కు సెమిస్తెజ్ యేసు అట్నాన్. యాక మీరు నెగ్రెండ నెస్తెజ్ ఇజి నాను ఆస ఆజిన.

39 మోసా సిత్తి రూలుజ్ ఒరెన్ వన్నిజ్ వన్ని పాపమ్కాణ్ డిబిస్తెజ్ అట్ఉ. గాని యేసు ముస్కు నమకం ఇడ్ని వరిజ్ వరి పాపమ్కాణ్ యేసు పూర్తి డిబిస్తాన్.

40 ప్రవక్తరు వెహ్తివజి మిజి రెవిండ సుడేదు. వారు ఇనిక వెహ్తార్ ఇహిజ.

41 "సుడేదు, వెక్కిసినికిదెరా, మీరు బమ్మ నిదెర్లె గాని పాడాజి సొనిదెర్లె. ఎందనిజ్ ఇహిజ మీ కాలమ్దు నాను ఉండ్రె బమ్మాని పణి కిన. గాని అయ పణి వందిజ్ ఎయెర్బా వెహ్తిజ్బా మీరు నమ్ఇదెర్".

42 పవులుని బర్నబ యూదురి మీటిజ్ ఇండ్రోనిజ్ సోత్తిజ్, “వాని విస్త్రాంతి దినమ్దు వాజి యా మాటెజ్ మజి మరి వెప్పొ సిదాట్”, ఇజి బాని కూడితి మహికార్ వరిజ్ బతిమాలితార్.

43 మీటిజ్ ఆతి వెనుక నండొండార్ యూదురు, నండొండార్ యూద మతమ్దు కూడితి యూదురు ఆఇ బక్తి మన్నికార్ పవులుని బర్నబ వెట సోహార్. పవులు, బర్నబ వరివెట వర్గితార్. దేవుణు మిజి తోరిన్ని దయాదర్మమిదిజ్ డిన్విండ ఎలాకాలం నడిఃదు ఇజి పవులుని బర్నబ వరిజ్ ఉసార్ కిబిస్తార్.

44 మరి వాతి విస్త్రాంతి దినమ్దు పట్టుమిదికార్ విజేరె సోహి లెకెండ మంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రో కూడిజి వాతార్.

45 పవులు వెప్పొ మాటెజ్ వెండ్రెజ్ మంద లోకుర్ కూడిజినార్ ఇజి సుడెతారె యూదురు గోస ఆతార్. వారు పవులు వెప్తి మాటదిజ్ మర్జి వెప్తారె వన్నిజ్ దూసలాడితార్.

46 అయావలె పవులు, బర్నబ తియెల్ ఆవిండ వెప్తార్, “దేవుణు మాట ముందాల మిజి వెప్తాజ్వలె. అందెజె మాపు ముందాల మిజి వెప్తావ్. గాని మీరు, ఎలాకాలం బత్తిని బత్తు దొహ్క్వివ్ ఆవివ్ ఇజి మిజి మీరె నెక్కి పొక్కిదెరె తీర్పు కిజినిదెరె కక మాపు మిజి డిసి యూదురు ఆఇ లోకుర్ బాన్ సొన్నినావ్.

47 దేవుణు మిజి సిత్తి ఆడ్ర ఇనిక ఇహిజ, ‘యూదురు ఆఇ వరిజ్ ఉండ్రీ జాయ్ వజ మిజి ఇట్టా మన్ను. ఎందనిజ్ ఇహిజ యా లోకమ్దు మన్ని విజు లోకాజ్, వరి పాపమకాణ్ వాని సిక్నదాన్ గెల్పిస్తెజ్’ ఇజి వెప్తా మనాన్.

48 యూదురు ఆఇ లోకుర్ విజేరె యా మాటెజ్ వెహారె సర్ల ఆతార్. దేవుణు మాటెజ్ ఎస్సానొ నెగ్గెకెజ్ ఇజి వారు వెప్తార్. ఎలాకాలం బత్తిని బత్తుదిజ్ ఏర్పాటు ఆతికార్ విజేరె దేవుణు మాటెజ్ నమ్మితార్.

49 దేవుణు మాట అయ దేసమ్దు విజు సాటె ఆతాద్.

50 గాని యూదురు ఆ పట్టుమిదు బక్తి మన్ని పల్కుబడిః మనికెజ్ ఆతి అయ్లి కొడొక వెట, పెరికార్ ఆతి మొగవరి వెట వర్గిజి కోపం రేప్తారె పవులు మున్ను, బర్నబ మున్ను మాలెజ్ కితారె వరిజ్ అయా పట్టుమిదాన్ నెక్త పొక్తార్.

51 అందెజె పవులుని బర్నబ, వరి కాల్యాణి దూల్లి అయ పట్టుమిది వరి ఎద్రు దుల్పారె. ఎందనిజ్ ఇహిజ వారు దేవుణు మాట నెక్కిపొక్కిజ్ వరిజ్ వాని సిక్న వారె తప్పిస్తార్ ఇజి సాసి లెకెండ మండ్రెజ్ ఇజి. వెనుక వారు ఇకోనియ ఇని పట్టుమిదు సోహార్.

52 అంతియొకయాదు మన్ని సిసూర్ ఎసానొ సర్ల ఆతార్. దేవుణు ఆత్మ వరి మున్ను పూర్తి వాతాద్.

14

పవులు, బర్నబ ఇకోనియాదు సువార్త వెప్పొనార్

1 పవులుని బర్నబ కూడిజి ఇకోనియాదు సోహారె అంతియొకయాదు కిత్తిలెకెండ యూదురు మీటిజ్ కిని ఇండ్రో సోహార్. వారు నెగ్గెండ బోద వెప్తిజ్ నండొండార్ యూదురు, నండొండార్ యూదురు ఆఇకార్బా నమ్మితార్.

2 గాని నమ్మిఇకార్ యూదురు, యూదురు ఆఇ వరిజ్ రేప్తారె అపొస్తరుజ మున్ను కోపం పుటిస్తార్.

3 గాని పవులు, బర్నబ నండో రోస్కు బానె మహోర్. యేసువందిజ్ దయరమ్దాన్ వర్గితార్. వారు ప్రబు దయాదర్మమ్ వందిజ్ వెప్తి మాటజ్ నిజం ఇజి ప్రబు విజెరిజ్ తోరిస్తాన్. ఎలాగ ఇహిజ బమ్మాతి పణిజ్ బమ్మాతి గుర్తుజ్ కిదెజ్ పవులుజ్ బర్నబెజ్ సత్తు సితాన్.

4 అయ పట్టుమ్దు మహి లోకుర్ రుండి గుంపుజ్ ఆతార్. సెగొండార్ యూదురు పడఃకాద్, మరి సెగొండార్ అపొస్తరి పడఃకాద్.

5 అయావలె సెగొండార్ యూదురు ఆఇకార్, మరి సెగొండార్ యూదురు, యూదురి అతికారిబు వెట కూడఃజి అపొస్తరుజ్ అసి వరిజ్ సిగు కిజి పణుకుజాణిజ్ డెయేజి సప్తెజవలె ఇజి ఒడిఃబిజి మహోర్.

6-7 అపొస్తరు అయ సజతి నెస్తారె లుకయొనియాదు మహి లున్త్ర, దెర్బ ఇని పట్టుమ్కాణ్, వన్కా సురుల మన్ని దేసమ్కాజ్ ఉహ్కాసి సొహరె అబ్బె సువార్త సాటిస్తార్.

లున్త్ర దెర్బ ఇని పట్టుమ్కాజ్ సొన్సినార్

8 లున్త్ర ఇని పట్టుమ్దు, నడిఃదెజ్ అట్ఇ సాట వాండ్రు ఒరెన్ మహోన్. వాండ్రు పుట్టిబాణిజ్ మొదొల్ని సాటాదికాన్ ఆతండ్రె ఎసెజ్బా నడిఃదెజ్ అట్ఏండ బసినె మంజినాన్.

9 పవులు బోదిసి మహిజ్ వాండ్రు వెంజి మహోన్. పవులు వన్నిజె సుడఃతిజ్ నెగెండ ఆన ఇజి వన్నిజ్ నమకం పుట్టినాద్ ఇజి నెస్తాన్.

10 అయావలె పవులు వన్నిజ్, “నిజ్అ, నీ పాదమ్కు బూమిదు మొప్పి నిల్అ”, ఇజి డటం వెప్తిజ్ అయ సాటాదికాన్ లిట్టె నిజేతండ్రె డాట్టెజ్ మొదొల్తాన్.

11 పవులు కిత్తి బమ్మాతి పణి సుడఃతారె బాన్ మహి లోకుర్ లుకోనియ బాసాదు గగోలాతార్. “దెయమ్కు లోకు లెకెండ ఆతెనె మాడగ్రు డిఃగ్జి వాతె”, ఇజి డటం గగోలాతార్.

12 బర్నబెజ్ బ్రుహస్పతి ఇజి పేరు ఇట్టార్. నండో బోద వెప్తి వందిజ్ పవులు హెర్మ ఇజి పేరు ఇట్టార్.

13 పట్టుం వెల్లి మహి బ్రుహస్పతి గుడిఃది పుజేరి వాతండ్రె డాఃకుజ్, పూబుదండెజ్ అస్తాండ్రె పట్టుం వెల్లి మహి సేప్లా డగ్రు తత్తాన్. మంద లోకు కూడఃజి వాతారె పూజ కినాట్ ఇజి అయ పుజేరిని, కూడిఃతి మహి లోకుర్ ఒడఃబితార్.

14 బర్నబని పవులు యాక నెస్తారె వారు కిని పణిదిజ్ ఒప్పుకొడఃఎవ్ ఇజి తోరిసిని వందిజ్ వరి సొక్కెజ్ పాతెజ్ కిస్తారె లోకురి నడిఃమిదు ఉహ్కాక్కి సొహరె డటం వెప్టార్.

15 “తంబెరిజాండె, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెఇకెజ్ డిఃసిసిజి ఆగాసం, బూమి, సమ్దరం, బాన్ మన్ని విజు వనకాజ్ పుట్టిస్తి బత్తిజి మంజిని దేవుణుదిజ్ నమ్మిదు ఇజి మిజి సువార్త వెప్పినామ్.

16 గడ్డిఃస్సి కాలమ్దు విజు జాతిజ్ వరిజ్ వరిజ్ ఇష్టమాతి వన్కాజ్ పొగిడిఃజి మాడిఃస్సెజ్ దేవుణు డిఃస్త సితాన్.

17 అహిజ్బా దేవుణు ఆగాసమ్దాన్ మిజి పేరు, ఎమేణివేల పంట అయావలె కనికారం ఆజి సీజినాన్. తక్కు సిల్లెండ బోజనం సీజినాన్. మీ మన్సుదిజ్ సర్ల కిదిసి పోస కిజినాన్. ఈహు వాండ్రు ఎలాగ మప్తి దేవుణు ఇజి లోకాజ్ తోరిస్తాన్”.

18 అపొస్తరు యాలెకెండ వెప్తిజ్బా వారు విరిజ్ పూజ కిఏండ ఆదెజ్ ఇజి లోకురిజ్ అడ్డు కిదెజ్ గొప్ప కస్టం ఆతాద్.

19 అయావలె అంతియొకయదాన్, ఇకొనియదాన్ సెగొండార్ యూదురు వాతారె వరి మాటెజాణిజ్ నండో లోకాజ్ వరి పడఃకాదు కూడుఃవ్తారె. కూడుఃవ్తారె, పవులు ముస్కు పణుకుజ్ డెఃవ్తారె. వాండ్రు సాతాన్ ఇజి ఒడిఃబితారె పట్టుం వెల్లి వన్నిజ్ ఈడ్డిస్తారె బానె డిఃస్తారె.

20 గాని సిసూర్ వన్ని సురుల కూడిఃతి మహివలె పవులు నిజితండ్రె పట్టుమ్ లోఇ మర్జి సాహాన్. మహ్నా నాండిజ్ పవులు, బర్నబ కూడిఃతారె దెర్బ ఇని పట్టుమ్దు సాహాన్.

పవులుని బర్నబ సిరియాదు మన్ని అంతియొకయాదు మర్జి సాహాన్

21 పవులుని బర్నబ దెర్బ ఇని పట్టుమ్దు సువార్త బోదిస్తారె. నండో లోకుర్ యేసుప్రబుజ్ నమ్మితారె. వెనుక పవులుని బర్నబ, లున్త్ర, ఇకొనియ, అంతియొకయాదు మర్జి వాతారె.

22 వాతారె, ఎమేణి పట్టుమ్ది వరిజ్ బానె సిసూరిజ్ ఉసార్ కిబిస్తారె. “మీ నమకం డిఃన్విండ మండ్రు. మాటు నండో మాలెజ్ ఒరిసి దేవుణు రాజెమ్దు సాండ్రెజ్ వలె”, ఇజి మరి మరి పణిసి వెవ్తారె.

23 పవులు, బర్నబ విజు సజమ్కాజ్ పెద్దెల్జి ఏర్పాటు కితారె ఉపాన్ మంజి పార్లనం కిజి, వారు నమ్మితి దేవుణుదిజ్ వరిజ్ ఒపజెవ్తారె.

24 వెనుక పిసిదియ దేసెం డాట్టారె పంపులియాదు వాతారె.

25 పెర్ల ఇనిబాన్ దేవుణు మాటెజ్ బోదిసి వెనుక అతలియ పట్టుమ్దు డిఃగ్జి సాహాన్.

26 అబ్బెణిజ్ ఓడః ఎక్తారె వారు మొదోహి సోత్తి సాహి అంతియొకయాదు మర్జి వాతారె. యా అంతియొకయాదునె దేవుణు పణివందిజ్, వన్ని దయాదర్మమ్దిజ్ ఒపజెవె ఆతారె. అయ పణి వీస్తారె ఏలు బానె మర్జి వాతారె.

27 మర్జి వాతారె సజమ్ది వరిజ్ విజెరిజ్ కూడుఃవ్తారె, దేవుణు వరి వెటనె కిత్తి పణిజ్ విజు వెవ్తారె. యూదురు ఆఇకార్ దేవుణుదిజ్ నమ్మిదెజ్ వాండ్రు ఎలాగ సరి సిత్రాన్ ఇజి వెవ్తారె.

28 వారు నండో కాలం బానె మంజి సిసూరి వెట బత్తిత్తారె.

15

అపొస్తురు, పెద్దెలుజు ఆలోననం కిదెజ్ యెరూసలేమ్దు కూడఃజి వాతారె

1 సెగొండార్ యూదయ దేసెమ్దికార్ అంతియొకయాదు వాతారె. వారు అబ్బె మన్ని లోకాజ్ ఈహు నెస్పిస్తెజ్ మొదోల్స్తారె. ఇనిక ఇహిజు మోసె సీత్తి రూలు వజ సునతి కిబె ఆవిండ మహిజు మీరు సిక్చదాన్ గెలిస్తెజ్ అట్ఇదెర్ ఇజి నెన్పిస్తారె.

2 పవులుని బర్నబ యా సజతి వందిజ్ కూడిఃతారె యూదయ దేసెమ్ది వరివెట నండో వర్గిజి ఆహె తర్కిస్తారె. అందెజె యా మాటెజు వందిజ్ పవులు, బర్నబ, వరివెట అంతియొకయ దేసెమ్దు మన్ని మరి సెగొండార్ ఎక్కు యెరూసలేమ్దు సాన్ని అబ్బె మన్ని అపొస్తురుజు, పెద్దెల్జి డర్సు సాండ్రెజ్ వలె ఇజి తీర్మానం ఆతారె.

3 ఆహె అయ సజమ్ది లోకుర్ వరిజ్ పోక్తారె. వారు పిసెకె, సమరియ ఇని దేసమ్క సరి సాహారె బానె మహి వరివెట యూదురు ఆఇకార్ దేవుణు దరోట్ మహ్నా వాతారె దేవుణుదిజ్ నమ్మిజినార్ ఇజి విజు వెవ్తారె సాహాన్. అబ్బె మహి నమ్మితికార్ యాక వెహారె గొప్ప సర్ద ఆతారె.

4 వారు యెరూసలేమ్‌ను వాతివలె సజమ్‌దికార్, పెద్దెలుజు, అపొస్తురు విజేరె వరిజ్ గవరం సీజి బసె కిత్తార్. దేవుణు వరివెట కిత్తి పణిజ వందిజ్ విజు వారు వెహ్తార్.

5 గాని బాన్ పరిసయరు ఇని జటుదు మహి నమ్మితికార్ సెగొండార్ నిజీజి వెహ్తార్, “నమ్మిత్తి వరి లోఇ యూదురు ఆఇ లోకుర్ సునతి కిబె ఆదెజ్ వలె. మోసె సీత్తి రూలుదు మన్ని ఆదెజ్ విజు వారు ఒప్పుకొడేజి ఆహె కిదెజ్‌వలె ఇజి మాటు వరిజ్ వెహ్తాజ్‌వలె”, ఇజి వెహ్తార్.

6 అయావలె అపొస్తురు, పెద్దెలుజు యా సజతి వందిజ్ ఆలోసనం కిదెజ్ కూడేజి వాత్తార్.

7 నండొ తర్కిసి వెనుక పేతురు నిజీతండ్రె వరివెట ఈహు వెహ్తాన్. “తంబెరిజాండ్రె, సెగం కాలమ్‌కాజ్ ముందాల్నా* యూదురు ఆఇ లోకాజ్ సువార్త వెహ్తాజ్ మీ నడిమిహానె దేవుణు నజీ ఏర్పాటు కిత్తాన్ ఇజి మీరు నెసినిదెర్. ఎందనిజ్ ఇహిజ వారుబా దేవుణు మాట వెంజి దేవుణుదిజ్ నమ్మిదెజ్.

8 లోకు ఒడిబినికెజ్ విజు నెసిని దేవుణు, దేవుణుదిజ్ నమ్మితి యూదురు ఆఇ లోకాజ్‌బా వన్నిబాన్ కూడుఃప్పాన్ ఇజి తోరిస్తాన్. ఎలాగ తోరిస్తాన్ ఇహిజ మజీ సీత్తివజనె యూదురు ఆఇ లోకాజ్‌బా దేవుణు వన్ని ఆత్మ సీత్తాన్.

9 యూదురు ఆతి మజీని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజనె కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పాపమ్‌కు విజు లాగితండ్రె సుబరం కిత్తాన్.

10 అహిజ, మాపు గాని, మా అనిగొగొర్ గాని పిండిదెజ్ అట్‌ఇ బరుదిజ్ ఎందనిజ్ యా నమ్మితి వరి ముస్సు మొప్పినిదెర్? ఆహె మీరు కిత్తిజ మీరు దేవుణుదిజ్ కోపం రేప్పినిదెర్.

11 గాని ప్రబు ఆతి యేసు దయాదర్‌మమ్‌దానె మాటు గెలిస్తమనాట్ ఇజి మాటు నమ్మిజినాట్. అయావజనె వారుబా గెలస్త మనార్”, ఇహాన్.

12 ఆఇ జాతి లోకుర్ నడిమి దేవుణు వరివెట కిత్తి గొప్ప బమ్మాతి పణిజ వందిజ్ గొప్ప బమ్మాతి గుర్తుజ వందిజ్ పవులు, బర్బుబ వెహ్తాజ్, అబ్బె మహి లోకుర్ విజేరె జమ్‌న అలెత్తారె వెహ్తార్.

13 వారు వెహ్తా వీస్తి వెనుక యాకోబు ఈహు వెహ్తాన్. “తంబెరిజాండ్రె, నా మాట నెగ్రెండ వెండ్రు.

14 ఆఇ జాతి లోకుర్ వెట దేవుణు ముందాల్నా దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సొంత లోకు వజి ఏర్పాటు కిదెజ్ దేవుణు వరిజ్ దయ తోరిస్తాన్. అక్క విజు పేతురు యెలె వెహ్తా మనాన్.

15 ప్రవక్తరు ముందాల్నా వెహ్తాకెజ్ యాకదె. ఇని తేడ సిల్లెద్. వారు ముందాల్నా వెహ్తా మాట ఇనిక ఇహిజ.

16 “దిన్ని వెనుక నాను మర్జి వాజి దావీదురాజుది అర్తి సొహి ఇల్లు తొహ్నా. లాగ్టి విసీర్‌జి దన్నిజ్ నాను మర్జి తొహ్ని దన్నిజ్ నాను ముందాల్ మహిలెకెండ్రె కిన్.

17-18 అయావలె ఆఇ జాతి లోకుర్ విజేరె నజీ రెబానార్‌లె. ఆఇ జాతి లోకుర్ బాణిజ్ నా పేరు అస్తాజ్ నాను ఏర్పాటు కిత్తికార్ విజేరె నజీ రెబానార్‌లె ఇజి దేవుణునె వెహ్తానాన్”, “యాక నండొ కాలమ్‌కాజ్ ముందాల్నా దేవుణు వెహ్తా మనాన్”.

* 15:7 15:7 యూదురు ఆఇవరివెట సొన్ని సువార్త వెహ్తాజ్ దేవుణు పేతురువెట వెహ్తా కతవందిజ్ అపొస్తురు కిత్తి పణిజ్ 10:1-1; 1:18. దు నదవిదు.

19 యాకోబు మరి వెహ్తాన్, “నా మన్నుదు ఇనిక ఇహిజ, దేవుణు దరోట్ మహ్తి వాతి ఆఇ జాతి లోకురిజ్ మాటు మాలెజ్ కినిక ఆవ్ద.

20 మాటు వరిజ్ ఉండ్రీ ఉత్రం రాసి పోక్తెజ్. అబ్బె ఇనిక రాస్తెజ్ ఇహిజ, బొమ్మెజ పూజ సిత్తి కండ తినిక ఆవ్ద. అక్క సెఇక. సాని బూలానిక ఆవ్ద. గొత్తిక పిడికిన్ సప్తిక తినిక ఆవ్ద. నల తినిక ఆవ్ద. యాక విజు డిసిసిదెజ్. అక్కెజె. మరి ఇనిక సిల్దె.

21 ఎందనిజ్ ఇహిజ యాక విజు రాస్తిమని మోసె సిత్తి రూలుజ్ ప్రతి విస్త్రాంతి దినమదు, నండో కాలమ్కాణిజ్† యూదురు మీటిజ్ కిని ఇల్కాజ్ సదివిజి మంజినాద్. మోసె వెహ్తి మాటెజ్ విజు పట్టుమదు బోదిసి మంజినాద్, అందెజె వన్నాజ్ విజు వారు లోబడెదెజ్”, ఇజి వెహ్తాన్.

అపొస్తురు ఉండ్రీ ఉత్రం రాస్త పోక్తార్

22 అయావలె అపొస్తురు, పెద్దెలుజు, సజమ్దికార్ విజేరె కూడితారె నమ్మిత్తి వరిలోఇహాన్ సెగొండారిజ్ వీరపాటు కిజి పవులుని బర్నబవెట అంతియొకయాదు పోక్తెజ్ ఇజి తెగిస్తార్. వారు బర్నబ ఇని మరి ఉండ్రీ పేరు మన్ని యూద వన్నిజ్, సీలెజ్ వీరపాటు కిత్తార్. యూదని, సీల రిఎర్. అయ సజమ్దు ముకెలమతికార్.

23 వరివెట సజమ్దికార్ ఉండ్రీ ఉత్రం రాస్త పోక్తార్. అబ్బె ఇనిక రాస్త మనాద్ ఇహిజ, ‘మీ దాదీసిర్ ఆతి అపొస్తురు, పెద్దెలుజు, అంతియొకయాదు, సిరియాదు, కిలికియాదు మన్ని దేవుణుదిజ్ నమ్మిత్తి యూదురు ఆఇ జాతిజ విజేరిజ్ వందనమ్కు పోక్కినార్.

24 సెగొండార్ మా డగ్రుహాన్ సాహరె వరి బోదదాన్ మజి మాలెజ్ కిత్తార్, మీ మన్నుజ విజు బాద కిత్తార్ ఇజి మాపు నెస్తాప్. గాని వరిజ్ మాపు పోక్వితాప్, ఇని అతికారంబా సివితాప్.

25-26 అందెజె, మా యేసు ప్రబు వందిజ్ పాణం సావుదిజ్ ఒపజెప్తి మా ప్రియమాతి బర్నబ, పవులు ఇని వరివెట మా డగ్రుహాన్ సెగొండారిజ్ మీ బాన్ పోక్వాప్ ఇజి మాపు ఉండ్రె మన్ను ఆత మనాప్.

27 అందెజె మాపు యూద, సీల ఇని రిఎరిజ్ పోక్కినాప్. వారు వాజి మాపు రాస్తి మాటనె వెహ్సార్.

28-29 మిజి అవ్సరం ఆతి ఆడ్రెజ్ ఇనికెజ్ ఇహిజ, దెయమ్కాజ్ పూజ కిత్తికెజ్ తిన్కాట్. నల తిన్కాట్. గొత్తిక పిడికిన్ సప్తివనకాజ్ తిన్కాట్. సాని బూలాదెజ్ ఆవ్ద. యా ప్రణిజ్ కివండ మీరు దూరం మహిజు మిజినె నెగెద్. మిజి అవ్సరం ఆతి యా ఆడ్రెజ్ ఆవండ మరి నండో ఆడ్రెజ్ వెహ్సి మీ మున్ను. బరు ఇడ్డిక ఆవ్ద ఇజి దేవుణు ఆత్మని, మాపు ఉండ్రె మన్ను ఆజినాప్. మిజి మా వందనమ్కు.

30 అయావలె సజమ్దికార్ సెల్వ సిత్తిజ్ వారు సోత్తారె డిగు అంతియొకయాదు వాతార్. బానె నమ్మిత్తి వరిజ్ విజేరిజ్ కూడుస్తారె ఉత్రం సితార్.

31 వారు అయ ఉత్రం సద్వితారె డటం సర్ద ఆతార్. ఎందనిజ్ ఇహిజ అయ ఉత్రం వరిజ్ దయరం కిత్తార్.

32 యూద, సీల రిఎర్ దేవుణు మాటెజ్ వెహ్సికార్. అందెజె వారు దేవుణు మాటెజ్ నండో వెహ్సి అబ్బె మహి దాద్నిరిజ్ తంబెర్సిరిజ్ దయరం వెహ్సి ఇడ్డార్. అక్క వెంజి వరి మన్నుదు బలం ఆతార్.

† 15:21 15:21 నండో కాలం ఇహిజ, రమరమి 200 పంటిజాణిజ్ 300 పంటిజ్ దాక.

33-34 వారు అబ్బె సెగం రోస్కు గడఃప్తార్. వెనుక, బానె మహి నమ్మితికార్ వరిజ్ యెరూసలేమ్దు వరిజ్ పోక్తి వరిబాన్ మర్జి పోక్తార్. “దేవుణు సమదనం మీబాన్ మనీద్”, ఇహారె పోక్తార్.

35 గాని పవులుని బర్నబ అంతియొకయాదు మహారె మరి నండో లోకుర్ వెట దేవుణు మాటెజ్ బోదిసి సువార్త వెప్పి మహారె.

మార్కు వందిజ్ పవులుని బర్నబ గొడఃబ ఆతారె

36 సెగం రోస్కు ఆతి వెనుక పవులు బర్నబెజ్, “ఏలు సొనాటె మాటు దేవుణు మాట వెప్పి విజు పట్టుమ్కాజ్ మన్ని తంబెరిజు విజేరె ఎలాగ మనారో ఇజి సూణ సొనాట్ ఇజి వెప్తాన్.

37 అయావలె మార్కు ఇజి ఆఇ పేరు మన్ని యోహానుజ్ వరివెట కూక్కి ఒతెజ్ బర్నబ ఇన్టం ఆతాన్.

38 గాని మార్కుజ్ వరివెట ఒతెజ్ ఆవద్ ఇజి పవులు వెప్తాన్. ఎందనిజ్ ఇహిజు మార్కు ముందాల వరివెట పణిదిజ్ సొహిజ్ పూర్తి టయం మన్విండ పంపులియదు వరిజ్ డిఃస్త సొహాన్.

39 మార్కు వందిజ్ పవులుని బర్నబ నండో గొడఃబ ఆతారె రియాజు సొహారె. బర్నబ మార్కుజ్ వెట ఒతండ్రె ఓడః ఎక్కి కూప్త ఇని ద్విప్పుదు సొహారె.

40 గాని పవులు సీలెజ్ కూక్కి ఒతాన్. బాన్ మహి తంబెరిజు వారు రిఎరిజ్ దేవుణు దయాదర్మమ్దిజ్ ఒపజెప్తారె వరిజ్ పోక్తార్.

41 వారు సొత్తారె సిరియ కిలికియ పట్టుమ్కాజ్ మన్ని సజమ్కాజ్ సొహారె. బానె దేవుణు ముస్కు నమకం ఇడ్డివరి నమకం సత్తు కిబిస్తారె.

16

పవులుని సీల వెట తిమోతి కూడఃజినాన్

1 పవులు, సీల వెట దెర్బ, లున్త్ర ఇని పట్టుమ్కాజ్ వాతాన్. అబ్బె తిమోతి ఇనికాన్ ఒరెన్ యేసుప్రబుజ్ నమ్మిత్తికాన్ మహాన్. వన్ని అయ్సిబా నమకం ఇట్టా మహాద్. అది యూద జాతిదికాద్. వన్ని బుబ్బు ఆఇ జాతిదికాన్. వాండ్రు గ్రీసు దేసెమ్దికాన్.

2 తిమోతి వందిజ్ లున్త్రదు, ఇకొనియాదు నమ్మితికార్ వాండ్రు గొప్పు పేరు మన్నికాన్, ఇజి పొగ్డితారె.

3 తిమోతిజ్ వన్నివెట ఒతెజ్ ఇజి పవులు ఆస ఆతండ్రె వన్నిజ్ సునతి కిబిస్తాన్. ఎందనిజ్ ఇహిజు వన్ని బుబ్బు ఆఇ జాతిదికాన్ ఇజి అబ్బె మహి యూదురు విజేరె నెస్త మహారె.

4 వారు పట్టుమ్కాణిజ్ సొన్సి మహిజ్, యేసుప్రబుజ్ నమ్మితికార్ ఎలాగ నడిదెజ్ ఇజి యెరూసలేమ్దు మన్ని అపొస్తరు, పెద్దెలుజు ఏర్పాటు కిత్తి ఆడ్రెజ్ బోదిస్తారె అక్యెజ్ లోజిదెజ్ ఇజి వెప్తాన్.

5 ఆహె సజమ్దు మన్నివరి నమకం లావు పిరితాద్. వరి లెక్క రోజు రోజు లావు ఆజి మహాద్.

పవులు మసిదోనియ దేసెమ్ది వన్నిజ్ దర్ననమ్దు సుడఃజినాన్

6 ఆనియ ప్రాంతమ్దు దేవుణు మాటెజ్ వెప్పిక ఆవద్ ఇజి దేవుణు ఆత్మ వరిజ్ అడ్డు కిత్తిజ్ వారు పుగియ, గలతీయ దేసెమ్కాణిజ్ సొహారె.

7 అయావలె ముసియ బెతనియ డగ్రు వాతారె బెతనియ సొండ్రెజ్ ఇజి సుడేతార్. గాని బాన్ సొండ్రెజ్ యేసుప్రబు ఆత్మ వరిజ్ సరి సివితాన్.

8 అందెజె వారు ముసియ ప్రాంతం డాట్టారె డిగు సమ్దరం డగ్రు మని త్రోయ ఇని పట్టుమ్దు సొహార్.

9 అయ పొదోయ్ పవులు, బాన్ మహిజ్, ఉండ్రీ దర్సనం సుడేతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్సి, “నీను మసిదోనియాదు వాజి మజీ సాయం కిఆ”, ఇజి బతిమాలితి వజ దర్సనం సుడేతాన్.

10 పవులు అయా దర్సనం వాతిజ్, మాపు వెటనె మసిదోనియ సొండ్రెజ్ తయార్ ఆతాప్. ఎందనిజ్ ఇహిజ, మసిదోనియాది వరిజ్ దేవుణు సువార్త వెహ్ని వందిజ్ దేవుణు మజీ కూక్త మనాన్ ఇజి మాపు నెస్తాప్.

లుదియ యేసుప్రబుజ్ నమ్మిజినాద్

11 మాపు త్రోయ పట్టుమ్దాన్ ఒడః ఎక్కాపె తినాజ్ సమొత్త ఇని ద్వీపుదు సొహాప్. మహ్నా నాండిజ్ నెయపోలి ఇని పట్టుమ్దు అందితాప్.

12 అబ్బెణిజ్ పిలిప్పి ఇని పట్టుం వాతాప్. మసిదోనియ దేసెమ్దు పిలిప్పి పట్టుం ఉండ్రీ ముకెలమాతి పట్టుం. అక్క నండొండార్ రోమాదికార్ బత్తిజి మహి పట్టుం. మాపు నెగం రోస్కు ఆ పట్టుమ్దు మహాప్.

13 విస్త్రాంతి దినమ్దు మాపు పట్టుం వెల్లి వాతాపె గడ్డ ఒడ్డు దరోట్ యూదురు పార్దనం కిని బాడ్డి మనాద్సు ఇజి వాతాప్. వాతిజ్, బాన్ బస్తాపె కూడఃజి వాతి మహి అయలి కొడొకవెట పర్దిజ్ మొదొల్స్తాప్.

14 అయావలె లుదియ ఇని ఉండ్రీ అయలి కొడొక వెంజి మహాద్. అది తుయతయర పట్టుమ్దికాద్. అది లావు దరది ఊద రంగుది పాతెజ్ పొర్నికాద్. అది దేవుణుదిజ్ పార్దనం కినికాద్. దేవుణు మాటెజ్ అర్దం కిదెజ్ దేవుణు బుద్ది సిత్తిజ్ అది పవులు వెహ్ని మాటెజ్ మన్నుదు ఇడఃతాది అయావజనె నడితాద్.

15 అది, దన్ని ఇండ్రొణికార్, విజేరె బాప్తీసం లాగె ఆతార్. వెనుక అది, “నాను దేవుణుదిజ్ పూర్తి నమ్మిజిన ఇజి మీరు ఒప్పుకొటిజ నా ఇండ్రొ వాజి మండ్రు”, ఇజి మజీ బతిమాలితాద్.

పవులుజ్ సీలెజ్ జెలిలోఇ ఇడ్డార్

16 ఒర్రెండు మాపు పార్దనం కిని బాడ్డిదు సొన్ని మహిజ్ ఉండ్రీ వెట్టిపణి కిని ఇజిరి అయలి మా ఎద్రు వాతాద్. దన్నిజ్ పుతోన్* ఇని దెయం అస్త మహాద్. అది జాతకం వెహ్ని దన్ని ఎజుమానురిజ్ నండొ డబ్బు గణపిస్తాద్.

17 అది పవులుని మజీ వెనుక వాజి డటం గగోల్ ఆజి వెహ్నాద్, “యా లోకుర్, విజెరిజ్ ఇంక పెరి దేవుణుదిజ్ సేవ కినికార్. దేవుణు ఎలాగ మిజి గెల్పిస్తాన్లై ఇజి వీరు వెహ్నొరై” ఇహాద్.

18 నండొ రోస్కు అది ఆహె కిజి మహిజ్, పవులు మన్నుదు గొప్ప బాద ఆతండ్రె అయ దెయమ్దిజ్ “నీను యా ఇజిరి దన్నిజ్ డిసి సొన్అ ఇజి యేసుక్రీస్తు అతికారమ్దాన్ వెహసిన”, ఇజి వెహ్నాన్. వెటనె అయ దెయం అయలిదిజ్ డిస్త సొహాద్.

* 16:16 16:16 పుతోన్ ఇని దెయం యా అయలిదిజ్ వాని కాలమ్దు జర్గిని సజతిజవందిజ్ నెస్సిని మహాద్. అక్క వెహ్నిజ్ లోకుర్ దన్నిజ్ డబ్బు సీజి మహాద్

19 గాని దన్ని ఎజుమానిరు వరిజ్ వాని డబ్బు విజు సాహె ఇజి సుడేతారె పవులు సీలెజ్ పట్టుం నడిమి, అతికారిజ డగ్గు ఈడిసి తతారె.

20-21 కోర్టు నడిపిసిని వరిబాన్ తతారె, “వీరు యూదురు. వీరు బోదిసిని అలవాటుజ్ మజి పడేఇకెజ్. మాటు రోమాదికాట్. మాటు అక్కెజ్ ఒపుకొణిక ఆవిద్, అయావజనె నడినిక ఆవిద్. మా పట్టుమదు వీరు గొప్ప కలిబిలి కిజినార్”, ఇజి వెహ్టార్.

22 అయావలె బాన్ కూడితి మహి లోకుర్ విజేరె పవులుజ్ని, సీలెజ్ ఎద్దు వాతారె నింద మొహ్తారె గగోల్ ఆతారె. వరి సొక్కెజ్ లాగ్జి వరిజ్ డెయ్యు ఇజి కోర్టు నడిపిసినికార్ ఆడ్ర సితారె.

23 వారు లావు దెబ్బెజ్ డెయ్యారె పవులు సీలెజ్ జెలి లోఇ ఇడ్రార్. “వరిజ్ జాగర్ల సుడేదు”, ఇజి జేలి ఎజుమానిజ్ ఆడ్ర సితారె.

24 అయ ఆడ్ర వాతిజ్ జెలి ఎజుమాని వరిజ్ జేలిదు లోఇ మన్ని గదిదు వరి కాల్యాజ్ డుకేజి లోఇ తోహ్టాండ్రె ఇట్టాన్.

25 రమారమి మదరెయ్తు పవులుని సీల దేవుణుదిజ్ పార్దనం కిజి పాటెజ్ పార్ది మహార్. వీరు పారెజి మహిజ్ జెలిదు తోహె ఆతి మహికార్ విజేరె వెంజి మహార్.

26 అయావలె వెటనె బూమి విజు డటం కద్దితాదె అయ జేలి పునాదిజ్ విజు కద్దితె. వెటనె సేఫ్లాజ్ విజు రే ఆతె. జెలిదు మహివరి విజెరి కట్టు ఊడితె.

27 అయ జేలి ఎజుమాని తెలి ఆతండ్రె జెలిది సేఫ్లాజ్ విజు రే ఆతిమనిక సుడేతాన్. సుడేతండ్రె జెలిదు మహికార్ ఉహ్కాక్ సాహార్ ఇజి ఒడిబిజి కుర్ల లాగితండ్రె వన్నిజ్ వాండ్రె గుత్తె ఆజి సాదెజ్ తయార్ ఆతాన్.

28 అయావలె పవులు, “నీను ఇని కూనిబా కిబె అమ. మాప్ విజెపె ఇబ్బెనె మనాప్”, ఇజి డటం గగోల్ ఆజి వెహ్టాన్.

29 అయ జేలి ఎజుమాని, దీవ తగ్అ ఇజి వెహ్సి లోఇ ఉహ్కాక్ వాతాండ్రె వణక్కి పవులు సీలారి పాదమ్కాజ్ డగ్గు అర్దాన్.

30 వాండ్రు పవులుజ్ని సీలెజ్ వెల్లి తతాండ్రె వెన్బాతాన్, “బాబురాండె, నాను తప్రె ఆదెజ్ ఇహిజి ఏలు ఇనిక కిడెజ్?”.

31 “యేసుప్రబు ముస్కు నమకం ఇట్టిజ, అయావలె నీను నీ ఇండ్రోణికార్ విజెరె తప్రె ఆనిదెరె”, ఇజి పవులు సీల వెహ్టార్.

32 పవులుని సీల వన్నిజ్, వన్ని ఇండ్రోణి వరిజ్ యేసుప్రబు వందిజ్ సువార్ల వెహ్టార్.

33 ఆ పొదొయ్ అయా గడియాదునె వాండ్రు పవులుని సీలెజ్ ఒతాండ్రె వరి దెబ్బెజ్ నొహ్టాన్. వెటనె వాండ్రు, వన్ని ఇండ్రోణికార్ విజేరె బాప్తినం లాగె ఆతారె.

34 వాండ్రు పవులుజ్ని సీలెజ్ వన్ని ఇండ్రో కూక్కి తసి బోజనం సితాన్. దేవుణు ముస్కు నమకం ఇట్టి వందిజ్ వాండ్రు వన్ని ఇండ్రోణికార్ విజేరె నండ్రె సర్ల ఆతారె.

35 పెందల కోర్టు నడిపిసినికార్, “అయ లోకాజ్ డిస్తు”, ఇజి ఆడ్ర సితారె జమాన్జి జెలి ఎజుమానిబాన్ పోక్టార్.

36 జేలి ఎజుమాని అయ మాటెజ్ పవులు వెహ్టాన్. “మిజి డిస్తు ఇజి కోర్టు నడిపిసినికార్ ఆడ్ర పోక్ట మనార్. మీరు ఏలు జమ్నె సాండ్రు”, ఇజి వెహ్టాన్.

37 గాని పవులు, “మాపు వర్గిదెజ్ అవకాసం సివిండ వారు తీర్పు కిజి విజేరె ముందాల డెయ్యార్. మాపు రోమాదిజ్ అక్కు మనికాప్ ఇహిజ్బా మజి జెలిదు

ఇట్టార్. ఏలు మజీ ఎయెర్బా నెన్ ఏండ పోక్తేజ్ నుడేజినార్. మాపు ఒప్ ఏవ్. వారె వాజి మజీ వెల్లి తసి పోక్తేజ్”, ఇజి జమానుజ్ వెహ్హాన్.

38 యా మాటేజ్ అయ జమానుజ్ కోర్టు నడేపిసిని వరిజ్ వెహ్హాన్. పవులుని సీల రోమాదిజ్ అక్కు మనికార్ ఇజి వెహారె వారు తియెల్ ఆతార్.

39 అయ కోర్టు నడేపిసినికార్ వాతారె పవులుజ్, సీలెజ్ సెమ లొస్తారె జెలిదాన్ వెల్లి కూక్కి తత్తారె ‘పట్టుం డిసిని సొండ్రు’ ఇజి వరిజ్ వెహ్హి పోక్తార్.

40 వారు జెలిదాన్ వెల్లి వాతారె లుదియబాన్ సొహార్. అబ్బె నమ్మిత్తివరి వెట వర్రిజి వరిజ్ ఆదరిస్తారె వరి నమకందిజ్ సత్తు కిబిసి దయరమ్ ముస్కు మండ్రు ఇజి వెహ్హాన్. వెనుక వారు బాణిజ్ సొత్త సొహార్.

17

పవులు తెసలొనికదు సొహాన్

1 అయావలె పవులుని సీల పిలిప్పి పట్టుమ్దాన్ సొత్తారె అంపిపొలి, అపొలోనియ పట్టుమ్కు డాట్టి దెసలొనిక* ఇని పట్టుమ్దు వాతార్. అబ్బె యూదురు మీటిజ్ కిని ఇల్లు ఉండ్రీ మహాద్.

2 పవులు, వాండ్రు ఒజి ఆతి లెకెండ్ యూదురి మీటిజ్ కిని ఇండ్రొ సొహాన్. సొహాండ్రె, బానె మహి వరివెట మూండ్రీ విస్త్రాంతి దినమ్కు దేవుణు మాట వెహ్హిమహాన్. ఇనిక ఇహిజి,

3 “క్రీస్తు ఇనికాన్ మాలెజ్ ఆజి సానాన్లె. సాజి మర్జి నిజ్ నాన్లె’ ఇజి ప్రవక్తరు రాస్తిక దేవుణు మాటాదు మనాద్. అయ లెకెండ్ జర్గిదెజె. నాను మీ వెట సాటిసి వెహ్హి యా యేసుప్రబునె క్రీస్తు”. యా మాటేజాణిజ్ సదివిజి వెహ్హి సిత్తాన్.

4 యూదురు - లొఇహాన్ సెగొండార్ పవులు వెహ్హి మాటేజ్ ఒవుకోటారె పవులుని సీల వెట కూడితార్. బక్తి మన్ని గ్రీకు జాతిదికార్ నండొండార్, ముకెలమాతి అయ్ లికోడొక్ నండొండెక్ బా వరివెట కూడితార్.

5 అహిజి యూదురు గోస ఆతార్. గోస ఆతారె ఇని పణి సిల్లెండ తిరిగిని సెఇ లోకాజ్ సర్దుహాన్ కూడుస్తారె మందెజ్ ఆజి పట్టుమ్దు కలిబిలి కిజి యాసొను ఇని వన్ని ఇండ్రొ సొహార్. ఇండ్రొణి సేప్లాదిజ్ డెయ్ త పొక్తారె పవులుని సీలెజ్ లోకుర్ నడిమి అసి తనాట్ ఇజి లొఇ డుగితార్.

6 గాని పవులుజ్ని సీలెజ్ తోర్ ఏతార్ కాక యాసొనుజ్ మరి నమ్మిత్తి వరిజ్ సెగొండారిజ్ పట్టుం అతికారిజి డగ్రు లాగిత తతార్. “వీరు, యా లోకం విజు కలిబిలి కినికార్, ఇబ్బెబా వాత మనార్.

7 విరిజ్ యా యాసొను వన్ని ఇండ్రొ ఇట్టా మహాన్. వీరు విజేరె యేసు ఇజి మరి ఒరెన్ రాజు మనాన్ ఇజి వెహ్హి కయ్ సరు రూలుజి లొజి ఏండ నడిసినార్”, ఇజి డటం గగోలాజి వెహ్హాన్.

8 యాక వెహారె లోకుర్, పట్టుం అతికారిజు గొప్ప కలిబిలి ఆతార్.

9 అతికారిజు యాసొను బాణిజ్, అయ నమ్మిత్తి వరి బాణిజ్ డబ్బు తొహ్హిస్తారె వరిజ్ డిస్స సితార్.

* 17:1 17:1 దెసలొనిక పట్టుం మసిదొనియ దేసమ్దు మహాద్. రోమదేసమ్దిజ్ రాజదాని ఆతాద్ యా పట్టుం. నండొ ఆస్తి మహాద్ బాన్. నండొండార్ రోమ లోకుర్ని యూదురు బాన్ బత్తిజి మహాద్

పవులు బెరెయాదు సొహాన్

10 సీకటి ఆతిజ్ వెటనె నమ్మితికార్ పవులుజ్, సీలెజ్ బెరెయ ఇని బాడ్డిదు పోక్తార్. వారు బానె వాతారె యూదురు మీటిజ్ కిని ఇండ్రో సొహార్.

11 బెరెయాదు మహికార్ తెసలొనికదు మహి వరిలెకెండ్ ఆవర్. వారు గొప్ప ఆసదాన్ దేవుణు మాటెజ్ వెహారె వనక వందిజ్ ఒడిబిజి మహార్. పవులుని సీల వెప్పి మహి సజతిజ్ నిజమనెనొ ఆవ్దొ ఇజి వారు రోజు దేవుణు మాటాదు సుడెజి నదివిజి మహార్.

12 అందెజె వరి లొఇ నండొండార్ యూదురు నమ్మితార్. నండొండార్ గ్రీసు జాతిది వరి లొఇ పల్కుబడిః మన్ని అయ్లి కొడొకెన్ మొగకొడొకె నమ్మితార్.

13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెసలొనికదు మన్ని యూదురు నెస్తారె బాణిజ్ వాతారె బెరెయా లొకాజ్ కోపం పుటిస్తారె కలిబిలి కిత్తార్.

14 అయావలె నమ్మితికార్ పవులుజ్ వెటనె నమ్దరం డగ్రు సొన్అ ఇజి పోక్తార్. గాని సీలని, తిమోతి బెరెయాదునె నిహ మహార్.

15 పవులుజ్ పోక్తజ్ సొహికార్ ఏదెన్ను† పట్టుమ్దాకానె ఒత్తార్. సీల, తిమోతి వెటనె నా బాన్ రద్దు ఇజి కబ్బు సితండ్రె పవులు వరిజ్ మప్పి పోక్తాన్.

పవులు ఏదెన్ను పట్టుమ్దు సొహాన్

16 పవులు ఏదెన్ను పట్టుమ్దు సీలెజ్ తిమోతిజ్ ఎద్రు సుడెజి మహాన్. మహిజ్ అయ పట్టుమ్దు వారు మాడిస్తి మహి దెయమ్కాణి బొమ్మెజ్ ‡ండ్రె మహిజ్ అక్కెజ్ సుడెజి మన్నుదు నండ్రె బాద ఆతాన్.

17 అయావలె యూదురు మీటిజ్ కిని ఇండ్రో సొహండ్రె యూదురు వెట, బక్తి మన్ని యూదురు ఆఇ వరివెట పవులు వాదిస్తాన్. రోజు రోజు సత సహ్క కూడిజి వాతి వరివెట వాదిసి మహాన్.

18 అబ్బె లావు నద్వితి మన్నికార్ ఎపికూరియ జటుదికార్ సెగొండార్§ స్ట్రొయికుల లోకుర్ లొఇ సెగొండార్ మహార్. వారు పవులు వెట వాదిస్తార్. సెగొండార్, యా బడాకి ఇనిక వెప్పినాన్ ఇజి వెప్తార్. యేసుప్రబు వందిజ్, సాతికార్ మర్జి నిజ్ని వందిజ్ పవులు నెస్పిన్తిజ్ అబ్బె మరి సెగొండార్ వీండ్రు ఆఇ దెయమ్కాజ్ వందిజ్ వెప్పినాన్ ఇజి వెప్తార్.

19 వారు పవులు అరెయెపగు ఇని సద్రుదు లాగిత తత్తారె, “సీను వెప్పిని యా కొత్త మాట ఎలాగ మర్తికాదొ, మాపుబా నెస్టెజ్ ఆనాదా?

20 సీను సెగం కొత్త మాటెజ్ వెప్పిని. అక్కెజ్ మాపు ఎసెజ్బా వెన్ఇకెజ్. వన్నా అర్లం ఇనికాదొ ఇజి నెస్టెజ్ మాపు కోరిజినాప్”, ఇజి వెప్తార్.

21 ఆ ఏదెన్ను పట్టుమ్దికార్ విజెరె, అబ్బె బత్తిజి మహి ఏదెన్ను పట్టుమ్దికార్ ఆఇకార్బా ఇనికాదొ ఉండ్రీ కొత్త మాట విని వందిజ్, వర్గిని వందిజ్ లావు ఇన్జమాజి వరి సమయం విజు బానె గడెప్పి మహార్.

† 17:15 17:15 ఏలు ఏదెన్ను పట్టుం గ్రీకు దేసెమది ముకెలమాతి పట్టుం ‡ 17:16 17:16 యా

బొమ్మెజ్ అయ పట్టుమ్దికార్ మాడిస్తిమహి దెయమ్కలెకెండ్ తోరెత § 17:18 17:18 ఎపికూరియ లోకుర్, స్ట్రొయికుల లోకుర్. వీరు గ్రీకుజాతిలొఇ ఎక్కు నద్వితి లోకుర్. ఎపికూరియ లోకుర్ ఎపికురు ఇని ఒరెన్వన్ని బోదెజ్ వజ నడిసెనికార్. వన్ని బోద ఇనిక ఇహొజ, ఒడొలెదిజ్ మన్నుదిజ్ సర్ద కిబిసి బత్తిదెజె ఇజి మా బత్తుది ఉదెసం ఇజి. స్ట్రొయికుల లోకుర్ ఇహొజ జెనొ ఇనివన్ని బోదెజ్ వజ నడిసెనికార్. బత్తుదు ఇనిక ఇర్గితిజ్బా జర్గిపిద్ ఇజి వాండ్రు బోదిస్తాన్. బాగ ఆలోసనం కిజినె వారు విజు సూణార్

22 అయావలె పవులు అరెయొపగు సర్దుదు నిహంత్రె ఈహు వెహ్తాన్, “ఏదెన్ను పట్టుమ్దికిదెరా, మీరు విజు పణిజ లొఇ గొప్ప బక్తి మన్నికిదెర్ ఇజి నజీ తొరిజినాద్.

23 ఎందనిజ్ ఇహిజ నాను బూలాజి బూలాజి మీ బొమ్మెజు నెగ్రెండ సుడఃజి మహిజ్ ఉండ్రీ మాలి పీట సుడఃత. దన్ని ముస్సు ‘నెన్ఇ దెయ్మదిజ్’ ఇజి రాస్త మనాద్. అందెజె మీరు నెన్ఏండ ఇని దన్నిజ్ మాడిసినిదెరో దన్ని వందిజ్ నాను మిజీ బొదీసిన”, ఇజి వెహ్తాన్.

24 పవులు మరి వెహ్తాన్, “యా బూ లొకమ్దిజ్, దన్ని లొఇ మన్ని విజువ నకాజ్, దేవుణునె పుటిస్తాన్. అయ దేవుణునె పరలొకమ్దిజ్, బూమిదిజ్ ప్రబు ఆత మనాన్. అయ దేవుణు లొకు తొహ్తి గుడిఃదు బత్కిఎన్.

25 దేవుణునె విజు లొకాజ్ బత్కు, పాణం, విజు సీజినాన్. దేవుణుదిజ్ ఇనికబా తక్కు ఆవిండ మన్ఎద్. అందెజె లొకు వన్నిజ్ ఇనికబా సిదెజ్ అవ్సరం సిల్లెద్.

26 దేవుణు ఒరెన్ వన్ని వెట విజు జాతి లొకాజ్ పుటిస్తాన్. ఎందనిజ్ ఇహిజ యా బూలొకం ముస్సు విజుబాన్ బత్కిని వందిజ్ పుటిస్తాన్. వారు ఎంబె బత్కిదెజ్ ఇజి, ఎమేణి కాలమ్దు బత్కిదెజ్ ఇజి దేవుణు ముందాల్పి ఏర్పాటు కిత మనాన్.

27 ఎందనిజ్ ఇహిజ ఉండ్రీ వేలా వారు నజీ రెబాజి వానార్పు ఇజి ఇక్కెజ్ విజు దేవుణు ఏర్పాటు కిత్తాన్. దేవుణు మా డగ్రుహాన్ దూరం మంజినికాన్ ఆవన్.

28 మాటు దేవుణు వెటనె బత్కినాట్, దేవుణు వెటనె నడిఃసినాట్, దేవుణు వెటనె మంజినాట్. మీ లొఇ పాటెజ్ రాస్సికార్ వెహ్తివజ ‘మాటు దేవుణు కొడొరె’.

29 అందెజె మాటు దేవుణు కొడొరె ఆతిజ్, లొకు, వరి మన్నుదు మన్ని ఆలొసనం వజ, వారు నెస్తిమన్ని పణి వజ బజారమ్దాన్, వెండిదాన్, పణుకుజాణ్ తయార్ కిత్త బొమ్మెజు వజ దేవుణు మనాన్ ఇజి ఒడిఃబిదెజ్ ఆవద్.

30 నస్తివలె మాటు నెన్ఏండ మహివలె దేవుణు అక్క సుడఃతిజ్బా సుడఃఇ లెకెండ డిఃస్తాన్. ఏలు ఇహిజ ఎంబెబా సరినె, విజేరె లొకుర వరి పాపమ్కు డిఃసిసిజి దేవుణుబాన్ రద్దు ఇజి దేవుణు ఆడ్ర సీజినాన్.

31 ఎందనిజ్ ఇహిజ, దేవుణు విజేరె లొకాజ్ నీతినిజయ్దిదాన్ తీర్పు కిదెజ్ ఉండ్రీ రొజు ఏర్పాటు కిత మనాన్. అయా రొజు దేవుణు ఏర్పాటు కిత్తి ఒరెన్ లొకువెట తీర్పు తీరిస్తాన్. దేవుణు ఆ లొకుదిజ్ సాపుదాన్ మర్జి నిక్త మనాన్. ఎందనిజ్ నిక్తాన్ ఇహిజ ఆ లొకుదిజ్ తీర్పు కిదెజ్ అతికారం మనాద్ ఇజి విజేరిజ్ రుజువ్ కిదెజ్”.

32 లొకు సాజి మర్జి నిజ్ని వందిజ్ వెహారె వరి లొఇ సెగొండార్ కరాయిత్తార్. గాని మరి సెగొండార్ “దన్ని వందిజ్ మరి వెహా, వెనాప్”, ఇజి పవులుజ్ వెహ్తార్.

33 ఆహె మహిజ్ పవులు వరిబాణిజ్ సాహాన్.

34 అహిజ సెగొండార్ పవులు వెహ్తి మాటెజ్ నమ్మిత్తారె వన్ని వెట కూడిఃతార్. పవులు వెట కూడిఃతి మహి వరి లొఇ అరెయొపగు సర్దుదికాన్ ఒరెన్ దియొనుసియు, దమరి ఇని ఉండ్రీ అయ్లి కొడొ, మరి సెగొండార్ మహాన్.

18

పవులు కొరింతు పట్టుమ్దు సువార్త వెప్పినాన్

1 వెనుక, పవులు ఏదెన్ను పట్టుమ్దాన్ సోతాండ్రె కొరింతు ఇని పట్టుం సాహాన్. అయ కొరింతు పట్టుమ్దు సాహిజ్ బానె పొంతు దేసెమ్దికాన్ అక్కుల ఇని ఒరెన్ యూదు వన్నిజ్నేని వన్ని ఆల్ని ఆతి ప్రిస్కిలదిజ్ సుడేతాన్.

2 యూదురు విజేరె రోమ పట్టుం డిసి సాండ్రెజ్వలె ఇజి క్లవుదియ ఇని రోమ పెరిరాజు ఆడ్ర సిత్తాన్. ఆడ్ర సిత్తిజ్ యా ఆల్ని మాసెర్ ఇటలి దేసెం డిస్తారె కొరింతు పట్టుమ్దు కొత్తాజ్ వాతార్. పవులు వరిజ్ సుడేదెజ్ సాహాన్.

3 పవులు వరివెట బత్కిజి వరివెట కూడేజి పణి కిత్తాన్. ఎందనిజ్ ఇహిజ వారుని పవులు టంబుజ్ గుత్తికార్.

4 ప్రతి విస్తాంతి దినమ్దు పవులు యూదురు మీటిజ్ కిని ఇండ్రె సాహాండ్రె, యూదురు వెట, గ్రీసు వరివెట తర్కిసి వెహి వాండ్రు వెహ్తికెజ్ నిజం ఇజి ఒపిసి మహాన్.

5 సీలని తిమోతి మసిదోనియదాన్ వాతారె పవులు వెట కూడితార్. అయావలె పవులు పూర్తి టయం దేవుణు మాటెజ్ బోదిసి మహాన్. యేసునె క్రీస్తు ఇజి యూదురుజ డటిసి సాసి వెహ్ని మహాన్.

6 పవులు వెహ్తి మాటెజ్ యూదురు నెక్తపొక్తారె పవులుజ్ దుసలాడితార్. అయావలె పవులు, “దేవుణు మిజి సిక్ససిత్తిజి అక్కు మీరె మీ ముస్కు తపిసినిదెర్. దిన్ని వందిజ్ నా బాన్ తప్పు సిల్లెద్. ఇబ్బెహాన్ నాను యూదురు ఆజి వరిబాన్ సానానె దేవుణు మాటెజ్ నెస్పిస్తాలె”, ఇజి వెహ్తాండ్రె, సొక్కిజి దూల్లి దుల్ప్తాన్.

7 పవులు యూదురు మీటిజ్ కిని ఇండ్రెహాన్ సోతాండ్రె పడేకాద్ మహి తీతియు యూస్తు ఇని వన్ని ఇండ్రె సాహాన్. తీతియు దేవుణుదిజ్ పార్లనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహాద్.

8 యూదురి మీటిజ్ ఇల్లు నడిపిసినికాన్ ఆతి క్రీస్తును, వన్ని ఇండ్రెణికార్ విజేరె యేసుప్రబుజ్ నమ్మితార్. మరి కొరింతు పట్టుమ్దికార్ నండొండొరబా దేవుణు మాట వెహారె నమ్మితారె బాప్తినం లాగె ఆతార్.

9 ఒరనెండ్రె పొదోయ్, దర్సనమ్దు యేసుప్రబు, “నీను తియెల్ ఆవండ వర్గిత. అలెజి మన్అ.

10 ఎందనిజ్ ఇహిజ నాను నీవెటనె మంజిన. నిజి పాడు కిదెజ్ నీ ముస్కు ఎయెన్బా రెవన్. ఎందనిజ్ ఇహిజ యా పట్టుమ్దు నాలోకుర్ నండొండొర మనార్”, ఇజి పవులుజ్ వెహ్హాన్.

11 అందెజె పవులు దేవుణు మాటెజ్ నెస్పిసి వరి నడిమి ఉండ్రె ఏండుని ఆరు నెలెజ్ దాక మహాన్.

12 గాని గలియోసు ఇనికాన్ అయ అకాయ దేసెమ్దిజ్ ఏలుబడికి కినికాన్ ఆతివలె యూదురు ఉండ్రె జటు ఆతారె పవులు ముస్కు వాతార్. పవులుజ్ అస్తారె కోర్టుదు ఒతార్.

13 వారు పవులు ముస్కు పిరాద్ కిత్తార్. ఇనిక ఇహిజ, “దేవుణుదిజ్ ఎలాగ పార్లనం కిదెజ్ ఇజి మజి మన్ని రూలుదిజ్ ఎదిరిసివెహ్ని వీండ్రు ఒపిసి మారిస్పిలెకెండ్రె వెహ్నినాన్”

14 పవులు వర్గిదెజ్ సుడేతాన్. అయావలె గలియోసు యూదురిజ్ ఈహు వెహ్హాన్, “యూదురాండ్రె, ఇక్కు ఉండ్రె తప్పు పణి వందిజ్ ఇహిజ, ఉండ్రె సెఇ పణి వందిజ్ ఇహిజ నాను మీమాటెజ్ నెగ్రెండ్రె వెండ్రెజ్ ఆనాద్.

15 గాని ఇక్క ఇనికాదొ ఉండ్రీ మాటవందిజ్, పేర్కువందిజ్, మీ రూలుజ్ వందిజ్ తర్కిస్తైజ్ ఇహిజ మీరె పన్నిజ్ నుండెదు. నిన్ని సజతిజ వందిజ్ తీర్పు తీరిస్తైజ్ నజి ఇస్తం సిల్లెద్”, ఇజి యూదురు వెట వెప్తాన్.

16 ఈహు వెప్తాండ్రై వరిజ్ కోర్టుదాన్ పేర్తాన్.

17 అయావలె విజేరె కూడితారె యూదురి మీటిజ్ ఇల్లు నడిపిసినికాన్ ఆతి సోస్తానేసు ఇనివన్నిజ్ అస్తారె కోర్టు డగ్గు తత్తారె డెయ్యూర్. అహిజ్ బా గలియోను యా సజతిజ వందిజ్ ఇనికబా ఇన్ఎతాన్.

ప్రిస్కిలని అక్కుల

18 పవులు దేవుణువెట మొకిత మహాన్కాక అక్క వీస్తివలె బుర్ర కత్తె ఆతాన్. కొరింతు పట్టుమ్దు మరి నండో రోస్కు మంజి వెనుక నమ్మిత్తివరిబాణిజ్ సెలవ లొస్తాండ్రై సాహాన్. కెంకెయూదు సాహారె బుర్ర కత్తె ఆతాన్. బాణిజ్ ఓడః ఎక్తాండ్రై సిరియ ఇని దేసెమ్దిజ్ ప్రిస్కిల, అక్కుల వెట సాహాన్.

19 వారు ఎపెసు పట్టుమ్దు వాతార్. ప్రిస్కిల అకులరిజ్ డిసి పవులు సొనివలె వీరు యా పట్టుమ్దునె మంజినార్. పవులు ఇహిజ ఒరెండ్రై బానె మహి యూదురి మీటిజ్ ఇండ్రై సాహాన్. సాహాండ్రై యూదురు వెట తర్కిసి వర్గిజి మహాన్.

20 సెగం రోస్కు మా వెట మన్అ ఇజి యూదురు పవులు వెన్బాతిజ్ పవులు కెప్పతాన్.

21 వరిజ్ డిసి సాహివలె, “దేవుణు ఇస్తం ఇహిజ మీ డగ్గు మర్జి వాన”, ఇజి వెప్తాండ్రై సోత్తాన్. ఓడః ఎక్తాండ్రై ఎపెసుదాన్ సాహాన్.

22 కయ్సరియాదు అందితాండ్రై పవులు యెరూసలేం పట్టుమ్దు ఎక్తసాహాన్. బానె మహి సజమ్దివరిజ్ సుడిః సాహాన్. వెనుక అంతియోకయాదు సాహాన్.

23 బానె సెగం కాలం మహి వెనుక సోతాండ్రై గలతియ ప్రగియ ఇని దేసమ్కాణిజ్ వర్స బూలాతాండ్రై నమ్మితి వరిజ్ నెస్పిస్తాన్. దేవుణుదిజ్ డిన్విండ నెగ్రెండ మండ్రు ఇజి వెప్పి వరిజ్ దయ్రం సిత్తాన్.

అపొలో ఇనికాన్

24 అయావలె అలక్సత్రియదికాన్ అపొలో ఇని ఒరెన్ యూదవాండ్రు ఎపెసు పట్టుమ్దు వాతాన్. వాండ్రు గొప్ప నద్వితికాన్. దేవుణు మాటదు రాస్తిమన్నికెజ్ విజు బాగ నెస్తిమనికాన్. దేవుణు మాట నెగ్రెండ వర్గిదెజ్ వాండ్రు అట్టాన్.

25 వాండ్రు యేసు ప్రబువందిజ్ నెగ్రెండ సుర్కుదాన్ నెన్పిస్తాన్. ఎలాగ బత్కిదెజ్ ఇజి యేసుప్రబు నెన్పిస్తి మాటెజ్ వాండ్రు నెస్తాన్. గాని యోహాను లోకాజ్ సిత్తి బాప్తిసం వందిజె వాండ్రు నెస్త మహాన్.

26 యూదురు మీటిజ్ కిని ఇండ్రై దయ్రమ్దాన్ దేవుణు మాటెజ్ వర్గితాన్. ప్రిస్కిల అక్కుల విన్ని మాటెజ్ వెహారె విన్నిజ్ వరి ఇండ్రై కూక్త ఒత్తార్. ఒత్తారె దేవుణు వరిజ్ సిత్తి సువార్త వందిజ్ వీండ్రు నెన్ఇ వనకవందిజ్ వన్నిజ్ నెన్పిస్తార్.

27 వెనుక అపొలో అకాయ దేసమ్దు సాండ్రెజ్ సుడఃతిజ్, ఎపెసుదు మన్ని నమ్మితికార్, నీను సాన్అ ఇజి వెప్పి, అక్కాయాదు మహి నమ్మితివరిజ్, ‘విన్నిజ్ మీ వెట కూడుఃప్తు’ ఇజి ఉత్తం రాస్తార్. వాండ్రు అబ్బె సాహాండ్రై దేవుణు దయాదర్మమ్దాన్ నమ్మితి వరిజ్ నండో సాయం కిత్తాన్.

28 విజేరె కూడితి మహి బాడ్డిదు అపొలో యూదురువెట వాదిస్తాండ్రె వరి వాదం తప్పు ఇజి గటిజ వెహ్లాన్. యేసునె క్రీస్తు ఇజి దేవుణు మాటదు రాస్తికెజ్ వెహ్ని రుజువ్ కిత్తాన్.

19

పవులు ఎపెసు పట్టుమ్దు యేసువందిజ్ వెహ్నినాన్

1 అపొలో కొరింతు పట్టుమ్దు మహివలె పవులు, ముస్కుమన్ని దేసెమ్ది నాహ్కాణిజ్ బూలాజి సువార్త వెహ్ని ఎపెసు పట్టుమ్దు వాతాన్. బాన్ సెగొండార్ సిసూరిజ్ సుడెతాన్.

2 “మీరు సమ్మిత్తివలె దేవుణు ఆత్మ సత్తు మీ ముస్కు వాతాదా సిల్లెదా?”, ఇజి వరిజ్ వెన్బాతాన్. వెన్బాతిజ్ సిల్లెద్, దేవుణు ఆత్మ మనాద్ ఇజి మాప్ ఎసెజ్ బా నెస్విప్”, ఇజి వారు వెహ్లాన్.

3 దన్నిజ్ పవులు, “మీరు ఎమేణి బాప్తిసం లాగె ఆతిదెర్”, ఇజి వెన్బాతిజ్, “మాపు యోహాను సిత్తిసన్ని బాప్తిసం లాగె ఆతాప్” ఇహార్.

4 పవులు మరి వెహ్లాన్, “పాపమ్కు ఒప్పుకోడెజి డిస్సివరిజె యోహాను బాప్తిసం సిత్తాన్. నా వెనుక వాని యేసు ముస్కు నమకం ఇడమ్”, ఇజి వెహ్లాండ్రె బాప్తిసం సిత్తాన్.

5 యాక వెహారె వారు యేసుప్రబు పేరు అస్తారె బాప్తిసం లాగె ఆతార్.

6 పవులు వరి ముస్కు కికు ఇడ్డిజ్ దేవుణు ఆత్మ వరి ముస్కు వాతాద్. వాతిజ్, వారు వరిజ్ నెస్ఇ ఆఇ బాసిజ్ వర్గితార్. దేవుణుబాణిజ్ వాతి మాటిజ్ వెహ్లాజ్ మొదొల్స్తార్.

7 వారు డగ్రుడగ్రు పన్నెండు మణిసిర్ మొగకొణ్డొర్ మహార్.

8 పవులు అయ ఎపెసు పట్టుమ్దు మన్ని యూదురి మీటిజ్ ఇండ్రొ సొహాండ్రె దేవుణు ఏలుబడిః వందిజ్ తర్కిసి వర్గిజి వరిజ్ ఒప్పుకోడిసి దయరమ్దాన్ వర్గితాన్. ఆహె మూండ్రె నెలెజ్ బానె మహాన్.

9 గాని సెగొండార్ గర్త ఆజి అసల నమ్మివితార్. వారు పవులు వెహ్ని సువార్త వందిజ్ విజెరి ముందాల దుసలాడిఃజి వర్గితార్. అందెజె పవులు వరిజ్ డిఃసి నమ్మితి వరిజ్ వన్నివెట ఒతండ్రె రోజు రోజు తురాను ఇని ఒరెన్ వన్ని బడిః ఇండ్రొ నెస్సిస్త మహాన్.

10 రుండి పంటెజ్ దాక పవులు యాలెకెండ్ వెహ్నిసిత్తిమహిజ్ అయ ఆసియ ప్రాంతమ్దు బత్తిజిని యూదురు, యూదురు ఆఇకార్, విజేరె దేవుణు మాట వెహార్.

11 దేవుణు పవులువెట ఒద్దె గొప్ప బమ్మాతి పణిజ్ జర్గిస్తాన్.

12 వన్ని తువాలిజ్, నడుఃముదు తొహ్ని కటు జబ్బు మన్నివరి డగ్రు తత్తిజ్ వారు నెగెండ ఆతార్. దెయమ్కు విజు డిఃస్సె సొహె.

13 అయావలె యూదురు లొఇ సెగొండార్ మోటిగురుజ్ బూలాజి దెయమ్కాజ్ పేర్జి మహార్. దెయమ్కాజ్ పేర్జెజ్ నెస్తికార్ వారు. వారు యేసుప్రబు పేరు అసి దెయమ్కాజ్ పేర్జెజ్ సుడెతాన్. “పవులు వెహ్ని యేసు సత్తుదాన్ వెహ్నిన, నీను విన్నిజ్ డిఃసిని సొన్అ ఇజి నాను ఆడ్ర సీజిన”, ఇజి వారు దెయమ్కాజ్ అస్తి వరిజ్ వెహ్ని మహార్.

14 స్కెవ ఇని ఒరెన్ యూదపెరిపుజేరి మరిసిర్ ఏడుగురు యా లెకెండ్ దెయమ్కాజ్ పేర్దెజ్ సుడెఃజి మహార్.

15 గాని ఆ దెయం వరివెట, “నాను యేసుజ్ నెస్సా, పవులు నెసిన, గాని మీరు ఎయిదెర్?” , ఇజి వెన్బాతాన్.

16 అయ దెయం అస్తిమహికాన్ వరిముస్కు ఎగ్రితాండ్రె విజెరిజ్ అడిఃగి అర్ప్తాండ్రె గెలిస్తాన్. వరి పాతెజ్ కిస్త విసిర్తాండ్రె గొప్ప దెబ్బెజ్ డెయ్తాన్. అందెజె వారు ఏడుగురు లోకుర్ డుమ్డ ఆతారె దెబ్బెజ్ తాక్తిజ్ అయ ఇండ్రోణిజ్ సోత్తారె ఉహ్కార్.

17 అయ ఎపెసు పట్టుమ్దు మహి విజెరె యూదురు, యూదురు ఆఇ జాతిదికార్ యాక వెహారె గొప్ప తియెలాతార. యేసుప్రబు పేరుదిజ్ గొప్ప గవరం సిత్తార.

18 కొత్తజ్ నమ్మితికార్ నండొండార్ వాతారె వారు కిత్తి సెఇ పణిజ్ విజు విజెరి ముందాల వెహారె ఒప్పుకోటార్.

19 కొత్తజ్ నమ్మితి సెట్టిపణికినికార్ నండొండార్ మంత్రమ్కు రాస్తిమని వరి పుస్తకమ్కు తత్తారె విజెరి ముందాల అక్కెజ్ సుర్దార్. వారు లెక్క సుడఃతిజ్ వనక దర యబాయ్ వెయిజ్ వెండిరుపాయిజ్ *వాతె.

20 ఈహా దెవుణు - మాట విజుబాన్ సాటె ఆతాదె నండొండార్ నమ్మితికార్ ఆతార.

21 ఇక్కెజ్ విజు జర్గితి వెనుక పవులు మసిదోనియ అకాయ ఇని దేసమ్కాజ్ సొన్ని దెవుణు సజమ్కాజ్ సుడిః సొన్ని వెనుక బాణిజ్ యెరూసలేం పట్టుమ్దుబా సొండ్రెజ్వలె ఇజి ఒడిఃఒడిఃబితాన్. వెనుక రోమ పట్టుమ్దుబా సొండ్రెజ్వలె ఇజి ఒడిఃబితాన్.

22 వన్నివెట కూడఃజి పణి కిజిమహి తిమోతి, ఎరాస్తు ఇనివరిజ్ మసిదోనియాదు పోక్తాండ్రె పవులు సెగం కాలం ఆసియ ప్రాంతమ్దు బత్తితాన్.

ఎపెసు పట్టుమ్దు గొడఃబ జర్గితాద్

23 అయ కాలమ్దు యేసుప్రబు ముస్కు లోకుర్ నమకం ఇట్టి వందిజ్ ఉండ్రె గొప్ప గొడఃబ వాతాద్.

24 ఇక్కె ఎలాగ ఇహిజు, దెమెత్రి ఇని ఒరెన్ సరాబు మహాన్. వాండ్రు వెండిదాన్ అరైమి ఇని దెయమ్దిజ్ ఇండ్రో ఇట్టి ఇజిరి గుడిఃజ్ తయార్ కినికాన్. యా దెమెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండొ లాబం దోహ్కొ మహాద్.

25 యా దెమెత్రి యా పణికినివరిజ్ని, వరిలెకెండ్రె ఆఇపణిజ్ కిని వరిజ్బా కూడుఃప్తాండ్రె ఈహు వెహ్తాన్, “బాబురాండె, యా పణిదానె ఎక్కు అస్తి మజి వానాద్ ఇజి మీరు నెసినిదెర్గదె.

26 గాని కికాణిజ్ తయార్ కినికెజ్ దెయమ్కు ఆఉ ఇజి యా పవులు వెహ్పి, ఎపెసు పట్టుమ్దు ఉండ్రె ఆవిద్, ఆసియ ప్రాంతమ్దు విజుబాణిలెకెండ్రె నండొండొరిజ్ నమ్మిసి మహాన్. ఇక మీరు సుడఃజినిదెర్. వెంజినిదెర్.

27 ఏలు గొప్ప ప్రమాదం ఆజినాద్. మా పణి వందిజ్ మన్ని నెగ్గి పేరు పాడాఃనాద్లె. అక్కాదె ఆవండ పేరి దెయమాతి యా అరైమి దెయమ్ది గుడిఃబా ఎయెరిజ్బా అవ్సరం సిల్లెండ్రె ఆనాద్. ఆసియ దేసెమ్దికార్ విజెరె, బూలోకం విజు పూజ కిని యా అరైమి దెయమ్ది గొప్ప పేరు సిల్లెండ్రె ఆనాద్లె”, ఇజి యా దెమెత్రి వరివెట వెహ్తాన్.

28 యాక వెహారె వారు గొప్ప కోపం ఆతారె, “ఎపెసుదికార్ పూజకిని అరైమి దెయం గొప్ప పేరి దెయం”, ఇజి గొప్ప గగోల్ ఆతార.

* 19:19 19:19 ఉండ్రె వెండి రుపాయి ఉండ్రె రోజుది కూలి † 19:24 19:24 ఇజిరి గుడిజ్ ఇహిజు అరైమి దెయమ్ది గుడిఃది ఇజిరి బొమ్మెజ్

29 అయ పట్టమీదు గొప్పు కలిబిలి ఆతాద్. వారు ఉండ్రె మన్ను ఆతారె పవులువెట బులాజి మహి మసిదోని - యాదికార్ గాయి, అరిస్తర్కు ఇని రివీరిజ్ అస్తారె అయ పట్టమీదు మన్ని పెరి సద్దుదు[‡] లాగిత ఒతార్.

30 మంద కూడితి మహి అయ సద్దుదు సొండ్రెజ్ ఇజి పవులు ఒడిఃఒడిఃబితాన్. గాని నమ్మితికార్ వన్నిజ్ సరి సివితార్.

31 పవులు కాలయెర్ ఆతి అయ ఆసియ ప్రాంతమది అతికారి లోకుర్ సెగొండార్ బా లోకుర్ కూడఃజివాతిమహిబాన్ సొన్మా ఇజి కబ్బు పొక్తారె బతిమాలితార్.

32 అయ సద్దుదు గొప్పు కలిబిలి జర్గితాద్. సెగొండార్ అహు వెప్పి, మరి సెగొండార్ ఈహు వెప్పి గగోల్ ఆతార్. గాని వారు ఇని దన్నిజ్ కూడిత మనారొ ఇజి నండొ లోకుర్ నెన్వితార్.

33 యూదురు అలెక్జెండర్ ఇనివన్నిజ్, విజెరె వందిజ్ నీనె వరగిఅ ఇజి లోకుర్ నడిఃమిహాన్ ముందాల నిల్వారె. అలెజి మండ్రు ఇజి వాండ్రు కియు సొప్తాండ్రె ఉండ్రె మాట కీవెహ్న ఇజి సుడఃజి మహాన్.

34 గాని వాండ్రు యూద వాండ్రు ఇజి నెస్తారె వారు రుండి గంటెజ్ దాక, 'ఎపెసువరి అరైమి దెయం గొప్పు దెయం' ఇజి ఉండ్రెలెకెండ గగోల్ ఆతార్.

35 అయావలె అయ పట్టుం కర్టం * వాతాండ్రె లోకాజ్ విజెరిజ్ గగోల్ ఆవండ్రు మండ్రు ఇజి వెప్టాన్. "ఎపెసు పట్టమీదికిదెరా, మాపు అరైమి పెరి దెయమది గుడిఃదిజ్ కాప్ కినికాప్ ఇజి విజెరె నెసినార్గదె. ఆగాసమ్దాన్ అర్తి అరైమి దెయమది పణకుదిజ్ బా కాపు కినికార్ మాపె ఇజి విజెరె నెసినార్గదె.

36 యా సజతిజ విజి ఎద్రిసినిక ఆవద్. అహిజ మీరు ఏలు అలెజి మండ్రెజ్ వలె. ఇనికబా గజిబిజి ఆజి కిదెజ్ ఆవద్.

37 మీరు యా లోకాజ్ లాగితి తత్తిదెర్. గాని మీరు గుడిఃజి డొజ కినికార్ ఆవర్. మా దెయమదిజ్ ధుసలాడఃవర్.

38 దెమెత్తిజ్, వన్నివెట కూడితి మహి పణిమణిసిరిజ్ ఎయెన్ ముస్కుబా నేరం మొప్తెజ్ ఇహిజ, కోర్టుజ్ నడిఃసినె, అతికారి లోకుర్ మనార్. బానె సొన్ని వారు ఒరెన్ముస్కు మరి ఒరెన్ నేరమ్కు సిదెజ్.

39 గాని మరి ఇనివందిజ్ ఇనికబా తగ్గు మహిజ అక్క రోజు జర్గిని సద్దుదు వర్గిజి తీర్పు తీరిస్తెజ్.

40 నేండ్రు జర్గితి గొడఃబవందిజ్ రోమ అతికారిజు మా ముస్కు కేసు పొక్కారొ ఇజి నాను తియెలాజిన. జర్గితి గొడఃబవందిజ్ వెప్టాజ్ ఇని మాటబా సిల్లెద్. ఎందానిజ్ ఇహిజ యావజ కూడిజి గగోలాజి వర్గినిదన్నిజ్ వెప్టాజ్ అసల కారణం సిల్లెద్", ఇజి వరివెట వెప్టాన్[†].

41 వాండ్రు ఈహు వెప్పి కూడితి మహి వరిజ్ విజెరిజ్ సొండ్రు ఇజి పొక్తాన్.

20

పవులు మసిదోనియ గ్రీసు దేసెమ్కాజ్ సొహాన్

‡ 19:29 19:29 సద్దు ఇహిజ స్ట్రీడియం లెకెండ్రు మహాద్. బానె లోకు కూడఃనారె బేసు కర్గినార్. లోకు సురుల బస్సార్. ఇరువయెఅరువెయె లోకుర్ బస్సెజ్ ఆనాద్ అయ సద్దుదు. కొడఃవేలి నని గుండ్రాజ్ మనాద్ అయ సద్దు.

గాని మేడః సిల్లెద్. ఎపెసు పట్టుం నడిఃమిద్ మహాద్ యా సద్దు. § 19:33 19:33 గొడఃబ కినికార్ మాపు

యూదురు ఆవిప్, పవులుని వన్నివెట మన్నికారె ఇజి వెప్టాజ్ సుడఃతాన్ * 19:35 19:35 ముకెలమాతి

ఒరెన్ అతికారి † 19:40 19:40 ఎపెసు పట్టమీదు మన్ని లోకుర్వందిజ్ యా ముకెలమాతి అతికారి, రోమ అతికారిజు వెట వర్గినికాన్. లోకు గొడఃబ పుటిస్తిజి వరిజ్ వాని అవుకాసమ్కు సిల్లెండ్ర ఆనె

1 అయ గోడెబ అణస్తి వెనుక పవులు నమ్మిత్తివరిజ్ కూక్పిస్తాండ్రె వరి నమకమ్దిజ్ సత్తు కిబిస్తాన్. దయరమ్ముమ్ము మండ్రు ఇజి వెప్పిన్ సెల్వ లొస్తాండ్రె మసిదోనియదు సాండ్రెజ్ సోత్తాన్.

2 పవులు ఆ దేసెం విజు బూలాజి నమ్మితి వరిజ్ సుడెజి సాహాన్. వరి నమకమ్దిజ్ సత్తు కిబిస్తాన్. వెనుక అకాయ ఇజి కూక్కి గ్రీసు దేసమ్దు వాతాన్

3 పవులు అబ్బె మూండ్రె నెలెజ్ మహాన్. ఓడె ఎక్కి సిరియాదు సాన ఇజి మహిజ్ యూదురు వన్నిజ్ సప్తెజ్ కుట్ర ఆజి మహార్ ఇజి వెహాన్. అక్క నెస్తాండ్రె మసిదోనియదాన్ నడిజి సాన్ని అబ్బెణాన్ ఓడె ఎక్కి సాండ్రెజ్ ఒడిబిత్తాన్.

4 పురు మరిసి ఆతి బెరెయ పట్టుమ్దికాన్ సాపత్తు ఇనికాన్, దెసలోనియదికార్ అరిస్తర్కు, సెకుందు ఇనికార్, దెర్బ పట్టుమ్దికాన్ గాయి ఇనికాన్, మరి తిమోతి, ఆసియ దేసమ్దికార్ ఆతి తుకికు, త్రోపిము ఇనికార్ పవులు వెట సాహార్.

5 వీరు ముందాలై సాహరె త్రోయ ఇని పట్టుం మా వందిజ్ సుడెజి మహార్*.

6 పులాజ్ ఆఇ రొట్టెజ పండోయ్ ఆతి వెనుక మాపు పిలిప్పి పట్టుం డిసిసి ఓడె ఎక్కి అయ్దు రోన్కాణ్ త్రోయ† పట్టుం వాతాప్. అబ్బె ముందాల సాహిమహివరివెట ఏడు రొస్సు మహాప్.

పవులు సాతివన్నిజ్ నిక్తాన్

7 వారమ్ది మొదోహి రోజు †ప్రబు ఏర్పాటు కిత్తి బోజనం తిండ్రెజ్ మాపు కూడిత వాతాప్. అయావలె పవులు మర్న నాండ్రెజ్ సానాలె ఇజి వరిజ్ నెస్పిస్తాన్. మదరెయ - దాక నండ్రె మాటెజ్ వర్గిజి మహాన్.

8 మాపు కూడితి మహి మేడె గదిదు నండ్రె దివెజ్ మహె.

9 అయావలె అయ్యుకు ఇని ఒరెన్ దజ్డాఱెయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లావు సుట్కు నెస్పిస్తా మహిజ్ యా దజ్డాఱెయెన్ నిద్ర లావాత్తిజ్ జోజితాండ్రె మూండ్రె అంత్రంకాణిజ్ అడిగి అర్తాన్. పెప్తా సుడెతిజ్ సాత మహాన్.

10 గాని పవులు అడ్డి డిగితాండ్రె వన్ని ముమ్ము అర్ని వన్నిజ్ పొంబిజి అస్తాన్. "మీరు బాద ఆమాట్. వన్ని పాణం వన్నిలోఇనె మనాద్", ఇజి వరివెట వెప్తాన్.

11 పవులు మరి మేడెముమ్ము సాహండ్రె రొటె రుక్కి వరివెట బోజనం కిత్తాన్. జాయానిదాక నండ్రె మాటెజ్ వర్గిజి సోతాండ్రె సాహాన్.

12 వారు బత్తితి మహి అయ దజ్డాఱెజ్ ఇండ్రె తతార్ గొప్ప సర్గ ఆతార్.

పవులు ఎపెసు పట్టుమ్ది పెద్దెలుజువెట సెలవ లొస్తాండ్రె యెరూసలేమ్దు సాహాన్.

13 పవులు అసోసు ఇనిబాన్ నడిజి సాండ్రెజాతిజ్ మాపు వన్నిముందాల ఓడె ఎక్కి అసోసు సాహాప్. పవులుజ్ బానె ఓడెదు ఎక్నాప్ ఇజి మాపు ఒడిబిత్తాప్.

14 అసోసుదు పవులు మా వెట కూడితివలె మాపు వన్నిజ్ ఓడెదు ఎక్కిస్తాపె మితులె ఇని బాడ్డిదు వాతాప్.

* 20:5 20:5 యా పుస్తకం రాస్తిమహి లూక పవులువెట పయనం కిదెజ్ మర్తి వాతాన్ † 20:6 20:6 మసిదోనియ దేసమ్దు మన్ని పిలిప్పి ఇనిబాణిజ్ ఓడె ఎక్నార్. గాలి వరి ఎర్దు డెయ్తిజ్ త్రోయ అందిదెజ్ అయ్దు రొస్సు ఆతె. సాహివలె రుండి రొస్సునె ఆతె మహె. 16:11 † 20:7 20:7 యూదురి దినమ్కు లెక్క కినిక ఎలాగ ఇహిజ ననివారం పొదోయ్ ఆరు గంటెజ్ కొత్త వారం మొదొల్లినాద్. లూక యా పుస్తకం రాస్తివలె యాలెకిండె లెక్క కిత్తాన్ ఇజి బయబిల్వందిజ్ ఎక్కు నదు కిత్తికార్ నండ్రెండ్రె వెప్పిసార్

15 బాణిజ్ సోసి మహ్నా నాండిజ్ కియోసు ఇని బాడ్డిజ ఎద్రు వాతావ్. మహ్నా నాండిజ్ సమోసు ఇనిబాన్ సోహాపె బాణిజ్ మహ్నా నాండిజ్ మెలితె ఇని బాడ్డిదు వాతావ్.

16 పెంతెకోస్తు ఇని పండోయ్ నాండిజ్ యెరూసలేమ్దు అందిదెజ్ వలె ఇజి పవులు తొత్త ఆతాన్. ఆసియదు సోహిజ అలన్యం ఆనాద్ ఇజి ఎపెసు పట్టుమ్దు సోన్ ఎండ తినాజ్ సొండ్రెజ్ ఒడిఃఒడిఃబితాన్.

17 అందెజె పవులు మిలెతుదు అందితివలె ఎపెసు పట్టుమ్దు మన్ని సజమ్ది పెద్దెల్జ వన్నిబాన్ కూక్పిస్తాన్.

18 వారు వన్ని డగ్రు వాతిజ్ పవులు వరివెట ఈహు వెహ్సాన్, “నాను ఆసియదు వాతి మొదొల్ దినమ్ కాజ్ ఎలాకాలం మీ నడిఃమి ఎలాగ బత్కిజి మహానో ఇజి మీరె నెస్సిదెర్ గదె.

19 యూదురు నజి సప్తెజ్ కుట్ర కిజి నజి మాలెజ్ కిత్తార్ గాని నాను గొప్ప వాండ్రు ఇజి ఒడిఃబింద కణెరు వాక్సి దేవుణు పణి కిజి ఎలాగ మహానో ఇజి నిజెనె తెలినాద్.

20 సిక్సదాన్ ఎలాగ గెలిస్తెజ్ ఇని వందిజ్ అవ్ నరమాతిక ఇనికబా సరినె మీలోకుర్ నడిఃమి విజేరె కూడిఃతి మహి బాడ్డిదు నాను సాటిస్త. మీ ఇల్కాజ్ బా వాతానె మిజె నెస్సిస్త.

21 పాపమ్ కు ఒప్పుకోడిఃజి డిఃసిసీజి, దేవుణుదిజ్ లోజిజి, మా ప్రబు ఆతి యేసుక్రీస్తు మున్సు, నమకం ఇడదు ఇజి నాను యూదురిజ్ యూదురు ఆఇ వరిజ్ సాసి వెహ్సా.

22 ఇదిలో, నాను దేవుణు ఆత్మదిజ్ లోజితానె యెరూసలేమ్దు సొన్నిన. అబ్బె నజి ఇనిక జర్గినాద్లెనో నజి తెలివద్.

23 గాని విజు పట్టుమ్ కాజ్ బా, నజి మాలెజ్ వాజినె ఇజి, యెరూసలేమ్దు నజి జెలిదు ఇడ్వార్లె ఇజి, దేవుణు ఆత్మ నజి వెహ్సినాన్.

24 గాని నా పాణమ్ దిజ్ నాను కండెక్ బా విలువ సి ఏ. ఎందానిజ్ ఇహిజ ప్రబు ఆతి యేసు నజి సిత్తి పణి పూర్తి కిదెజె. అయ పణి ఇనిక ఇహిజ దేవుణు దయాదర్ మమ్ వందిజ్ మన్ని సువార్త వందిజ్ నాను సాసి వెహ్సాజ్.

25 నాను బూలాజి దేవుణు ఏలుబడిః వందిజ్ మీ నడిఃమి వెహ్సా గాని మీలోఇ ఎయిదెర్ బా మరి నజి తొఇదెర్లె ఇజి నాను ఏలు నెస్సా.

26 గాని మీలోఇ ఎయిదెర్ బా పాడాఃజి సోహిజ నా పూసి తెవితాద్ ఇజి నేండ్రు మీరె సాసిర్ ఆనిదెర్ లె.

27 దేవుణు ఇస్టం పూర్తి నాను మిజె నెస్సిస్త. ఇనికబా డావ్ ఏత.

28 దేవుణు వన్ని సొంత మరిసి నల సితండ్రె సజమ్ దిజ్ సమ్ పాద్దిస్తాన్. అయ సజమ్ దిజ్ మీరు బాగ కావ్ కిదెజె. దేవుణు ఆత్మ మిజె సజమ్ దిజ్ సుడఃదెజ్ ఒపజెప్తాన్. అయ పణిలోఇ నెగ్రెండ సుడఃదు. మీవందిజ్ బా మీరు జాగర్త సుడఃదు.

29 నాను సోహి వెనుక క్రూరమాతి కార్ నుకుడిఃజ్ నన్ని లోకుర్ మీలోఇ డుఃగ్నార్లె ఇజి నాను నెస్సా. వారు నమ్మితి వరి మున్సు కనికారం తోరిన్ ఏర్. సజమ్ దిజ్ పాడు కిన్ దా.

30 మీలోఇహానె నెగొండార్, నమ్మితి వరిజ్ వెకొరి మాటెజ్ వెహ్సినె గ్గి సరిదాన్ లాగ్గి సెఇ సరిదు నడిఃపిసి, వరివెట కూక్సి ఒతెజ్ సూణార్లె.

31 అహిజ జాగర్త మండ్రు. నాను మూండ్రి పంటిజ్ దాక రెయుపొగలు కణెరు వాక్కి నమకమ్వందిజ్ విజెరిజ్, ఒరెన్ ఒరెన్ వన్నిజ్ డిఃసివండ వెహ్తా మన్న. అక్క మీరు ఒడిఃబిజి జాగర్త మండ్రు.

32 దేవుణుదిజ్ని వన్ని దయాదర్తం తోరిన్ని మాటదిజ్ మిజి ఒపజెప్పిన. మీ నమకం నండొ కిదెజ్ అట్టి దేవుణు - మాటదిజ్ మిజి ఒపజెప్పిన. దేవుణుదిజ్ కేట అతి వరివెట మిజి అక్కు సీదెజ్ అట్టి దేవుణుమాటదిజ్ మిజి ఒపజెప్పిన.

33 నాను ఎయె డబ్బుదిజ్, బజరమ్దిజ్, సొక్కెజ్ పాతెజ్ వందిజ్ ఆస ఆవత

34 నా అవ్సరమ్వందిజ్ గాని నావెట మహివరి అవ్సరమ్కు వందిజ్ గాని నా కికాజణిజె పణి కిజి బత్తిత్త ఇజి మీరు నెసినిదెర్.

35 నాను కిత్తి విజి పణిజాజ్ మిజి నెన్పిస్తిక ఇనిక ఇహిజ మీరు డటం పణి కిజి సిల్లి వరిజ్ సాయం కిదెజ్. దిన్ని వందిజ్ యేసుప్రబు నెన్పిస్తి మాట గుర్తు కిదెజ్. అక్క ఇనిక ఇహిజ సీనివన్ని సర్త లొస్సివన్ని సర్త ఇంక వెరిక.

36 పవులు ఈహు వెహ్తాండ్రె ముణుకుజ్ ఊర్జి వారు విజెరె వెట పార్దనం కిత్తాన్.

37 వారు విజెరె పవులుజ్ పొంబితారె వన్నిజ్ ముద్దు కిజి లావు అడఃబాతార్.

38 ఎందానిజ్ ఇహిజ, మీరు ఇబ్బెహాన్ నజి సుడఃఇదెర్లె ఇజి పవులు వెహ్తా అయి మాటవందిజె గొప్ప దుకం ఆతార్. వారు ఓడః ఎక్కి అందు పవులు ఇట్టా వాతార్.

21

పవులు యెరూసలేం సొన్నినాన్

1 మాపు వరిజ్ డిఃసిసొత్తి వెనుక ఓడః ఎక్తాపె తినాజ్ సొన్ని కోసు ఇనిబాన్ వాతావ్. మహ్నా నాండిజ్ రోదు ఇనిబాన్ వాతాపె బాణిజ్ పతరు ఇనిబాన్ వాతావ్.

2 బానె వెనికెదిజ్ సొని ఉండ్రె ఓడః సుడఃతాపె, ఎక్తాపె సొహావ్.

3 సాహావె కుప్త ఇని ద్వీపు మా డేబ్ర పడఃకాద్ సుడఃతావ్ గాని దన్ని డేబ్ర పడఃకదాన్ తినాజ్ సిరియ దరోట్ సొహాపె, తూరు ఇనిబాన్ డిఃగితావ్. బాన్ డిఃప్టెజ్ ఓడఃదు సామనమ్కు మహా.

4 బాన్ సీసూరిజ్ రెబాజి సుడఃతిజ్ వరివెట కూడిఃతాపె ఏడు రోస్సు బానె మహావ్.

‘నీను యెరూసలేమ్దు సొన్యా’, ఇజి దేవుణు ఆత్మ వెహ్తా లెకెండ పవులు వెహ్తార్

5-6 గాని బాణిజ్ సొండ్రెజ్ టయం ఆతివలె మాపు సొత్తాపె పయనం కిత్తావ్. నమ్మితికార్ విజెరె, అయ్లికొడొక్, కొడొర్, మా వెట పట్టుం వెల్లిదాక ఇడ్డిః వాతార్. మాపు విజెపె సమ్దరం ఒడ్డుదు ముణుకుజ్ ఊర్జి పార్దనం కిత్తాపె ఒరెన్ వెట ఒరెన్ సెలవ లొస్తాపె ఓడః ఎక్తావ్. వారు వరి ఇండ్రె మర్జి సొహార్.

7 మాపు తూరుదాన్ సొత్తాపె తొలెమాయి ఇని పట్టుమ్దు వాతావ్. బాన్ నమ్మితి తంబెర్సిరిజ్ సుడిః సొహాపె వరివెట ఉండ్రె రోజు మహావ్.

8 మహ్నా నాండిజ్ సొత్తాపె కయసరియాదు వాతావ్. బానె సువార్త వెహ్తాకాన్ పిలిపు ఇండ్రె సొహాపె వన్ని ఇండ్రె మహావ్. పిలిపు యెరూసలేమ్దు మన్ని సజమ్దు ఏర్పాటు కిత్తి ఏడుగురు లొఇ ఒరెన్.

9 అయా పిలిపుజ్ నాల్గరు విడ్డిః అయ్లిక్ మహా. అవిక్ దేవుణుబాణిజ్ వాని మాటెజ్ వెహ్తాకెజ్.

10 మాపు సెగం రోస్సు బానె మహివలె అగబు ఇని ఒరెన్ ప్రవక్త యూదయ ప్రాంతమ్దాన్ బానె వాతావ్.

11 అగబు మాపు మన్నిబాన్ వాతాండ్రె పవులు నడుముదు తొవ్హి మన్ని కటు కుతాన్. కుతాండ్రె, వన్ని కికాజ్ కాల్యాజ్ అగబు తొహె ఆతాన్. తొహె ఆతండ్రె, యా కటు ఎయెరది ఇహిజ వన్నిజ్ యెరూసలేమ్దు మన్ని యూదురు తొప్పి ఆఇ లోకాజ్ ఒపజిపొర్లె ఇజి దేవుణు ఆత్మ వెప్పినాన్ ఇజి యా అగబు వెహ్హాన్.

12 యాక మాపు వెహాపె మాపు, బానె మహి నమ్మితికార్, పవులు వెట, “యెరూ - సలేమ్దు సొన్యా”, ఇజి బతిమాలితాప్.

13 దన్నిజ్ పవులు, “మీరు ఎందనిజ్ అడఃబాజి నజి దుకం కిబిసినిదెర్? నా ప్రబు ఆతి యేసువందిజ్ తొహె అదెజి ఆవద్, వన్ని వందిజ్ యెరూసలేమ్దు సాదెజ్ బా నాను ఒప్పుకొడఃజిన”, ఇహాన్.

14 పవులు మా మాటెజ్ ఒప్పుకొడఃఇతిజ్ మాపు అలెతాప్. దేవుణుదిజ్ ఇస్లమాతి వజ జర్గిపిద్ ఇహాప్.

15 అయ పట్టమ్దు సెగం రోన్కు మహి వెనుక మాపు సామనమ్కు విజు అస్తాపె ఎక్కు యెరూసలేం పట్టమ్దు సొండ్రెజ్ సొత్తాప్.

16 కయ్సరియదాన్ సెగిండార్ సిసూర్ మా వెట వాతారె మాపు మండ్రెజ్ ఇజి ఒడిఃబిత్తి మ్మాసోను ఇండ్రొ మజి తతార్. మ్మాసోను కుప్రదికాన్. మొదోహాన్ అసి యేసుప్రబు సిసూడః ఆతికాన్.

పవులు యెరూసలేమ్దు అందితాన్

17 మాపు యెరూసలేమ్దు వాతిజ్ నమ్మిత్తి తంబెరసిర్ మజి సర్దదాన్ మర్యాద కిత్తార్.

18 మర్న నాండిజ్ పవులు మా వెట యాకోబు డగ్రు సొహాన్. నజం పెద్దెలుబు విజేరె బానె మహార్.

19 పవులు వరిజ్ మాడిఃస్లాన్. వెనుక యూదురు ఆఇవరిలోఇ పవులు కిత్తి సువార్ద పణిదాన్ దేవుణు జర్గిస్తికెజ్ విజు పూర్తి వెహ్హాన్.

20 వారు ఇక్కెజ్ వెహారె దేవుణుదిజ్ స్తుతి కిత్తార్. పవులు వెట వారు ఈహు వెహ్హార్, “పవులునా, యూదురు లోఇ నమ్మితికార్ నండో వెయుజ్ లోకుర్ మనార్ ఇజి నీను నుడఃజినిగదె. వారు విజేరె దేవుణు మోసెజ్ సిత్తి రూలుజ్ వందిజ్ నండో పటుదల మనికార్.

21 ఇబ్బె మన్ని యూదురు విజేరె నీవందిజ్ ఉండ్రీ బోగట్ వెహ మనార్. అక్క ఇనిక ఇహిజ, మోసె వెహికెజ్ విజు డిఃస్టెజ్ ఇజి నీను యూదురు ఆఇవరి లోఇ బత్కిని యూదురిజ్ నెస్పిసిని ఇజి. వరి ఇజిరి కొడఃరిజ్ సునతి కినిక ఆవద్ ఇజి నీను నెస్పిసిని ఇజి. మరి, యూదురు ఎలాగ నడిఃదెజ్ ఇజి మహి పదతిజ్ వజ నడిఃనిక ఆవద్ ఇజి నీను నెస్పిసిని ఇజి. వినకవందిజ్ బోగట్ వెహ మహాప్”, ఇహార్.

22 “అపొజి మాటు ఇనిక కిదెజ్? నీను వాతివందిజ్ విజేరె తప్వండ వెనార్.

23 అందెజె మాపు వెప్పివజ నీను కితి. ఇనిక ఇహిజ మొకు నిల్పి మన్ని నాలేవెర్ మొగావారు ఇబ్బెనె మనార్.

24 నీను వరిజ్ వెట కూక్కి ఒసి వారు మొకుబడిః సొన్నిస్తెజ్ వరివెట దేవుణు గుడిఃదు సొన్అ. వారు పూజ సీజి బుర్ర బోడి కిదెజ్ మన్ని కర్ను నీనె సిఅ. అహిజ నీవందిజ్ లోకుర్ వెహిమన్ని బోగట్ నిజం ఆవద్ ఇజి విజేరె నెస్పార్. నీను మోసె సిత్తి రూలుజ లోజిజి నడిఃజినాన్ ఇజి విజేరె నెస్పార్.

25 అహిజ యూదురు ఆఇ నమ్మితి వరిజ్ మాపు ఇనిక తీర్మానం కిజి రాస్త మనాద్ ఇహిజ, బొమ్మెజ పూజ కిత్తి వన్కాజ్ తినిక ఆవిద్ ఇజి, నల తినిక ఆవిద్ ఇజి, మెడః పిడికిన్ సప్తి వనకాజ్ తినిక ఆవిద్ ఇజి. రంకు బూలానిక ఆవిద్ ఇజి". ఈహు సజమీది పెద్దెలుజు పవులు వెహ్తార్.

26 అందెజె పవులు, మహ్సా నాండిజ్ అయ నాల్ఎరిజ్ వెట కూక్కి ఒతండ్రె వరివెట సుబ్బరం ఆతాన్. వారు సుబ్బరం ఆజి మంజిని కాలం ఎసెజ్ అందినాద్, పరి లొఇ విజేరివందిజ్ ఎసెజ్ పూజ కిదెజ్, ఇక్కెజ్ వెప్పివందిజ్ పవులు దేవుణు గుడిఃదు యూదురు లొఇ మొగవారు మండ్రెజ్ మన్ని బాడ్డిదు సోహాన్.*

పవులు యూదురు అస్తార్

27 సుబ్బరం ఆజిమంజిని ఏడు రోస్కు డగ్రు ఆతాద్. అయావలె ఆసియదాన్ వాతిమహి సెగొండార్ యూదురు, దేవుణు గుడిఃదు యూద మొగవరిజ్ మన్ని బాడ్డిఃదు పవులు సుడఃతారె, బానె మహి లోకాజ్ విజేరిజ్ కలిబిలి కితారె వన్నిజ్ అస్తార్.

28 "ఇస్రాయేలు లోకాండె, తోడుః కిదెజ్ రద్దు. మా లోకాజ్ పడఃఇకెజ్, మోసె సిత్తి రూలుజు పడఃఇకెజ్, యా దేవుణు గుడిఃదిజ్ పడఃఇకెజ్ విజు బాడ్డిజు సొన్ని లోకాజ్ విజేరిజ్ నెన్పిసినికాన్ వీండ్రె. అక్కాదె ఆవిండ, వీండ్రు యూదురు ఆఇ వరిజ్ దేవుణు గుడిఃదు కూక్త తతాండ్రె దేవుణుదిజ్ కేట కిత్తి యా బాడ్డి మయ్లు కిత్తాన్", ఇజి నండొ గగోలాతార్.

29 ఎందానిజ్ ఇహిజ, పట్టుమీదు పవులు వెట యూదురు ఆఇ ఎపెసుదికాన్ త్రోపిముసు ఇని ఒరెన్ వన్నిజ్ ముందాల్సా వారు సుడఃత మహార్. వన్నిజ్ పవులు దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిఃదు తతాన్ ఇజి వారు ఒడిఃబితార్†.

30 పట్టుమీదు మహి లోకుర్ విజేరె కలిబిలి ఆతార్. విజుబాణిజ్ లోకుర్ మందెజ్ మందెజ్ ఆజి ఉహ్కొక్కి వాతారె పవులుజ్ అస్తారె దేవుణు గుడిఃదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లె లాగితార్. వెటనె యూదురి మొగ్గ వరిజ్ మండ్రెజ్ మన్ని బాడ్డిదు సొని సేప్లాజ్ కెహె ఆతె.

31 పవులుజ్ వారు సప్తెజ్ ఇజి సుడఃజిమహిజ్ యెరూసలేం పట్టుం విజు కలిబిలి ఆతాద్ ఇజి అబ్బె మహి రోమ సయనమ్ది పెరి అతికారిజ్ కబ్బు వాతాద్.

32 వెటనె అయ పెరి అతికారి సయనమ్దివరిజ్, సదాతిపతివరిజ్ వెట ఒతండ్రె కూడిఃతి మహి లోకుర్ డగ్రు ఉహ్కొక్కి వాతాన్. లోకుర్ అయ పెరి అతికారిజ్, వన్నివెట వాతి సయనమ్ది వరిజ్ సుడఃతిజ్ పవులుజ్ డెయ్డెజ్ డిఃస్తార్.

33 అయ పెరి అతికారి డగ్రు వాతండ్రె పవులు అస్తాన్. 'రుండి గొలుస్కాణిజ్ వన్నిజ్ తొహ్స' ఇజి ఆడ్ర సిత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్.

34 వెన్బాతిజ్ లోకుర్ సెగొండార్ ఈహు ఇజి, సెగొండార్ అహు ఇజి వెప్పి డేల్ని మహిజ్ గగోల్ లావాత్తిజ్ నిజం ఇనికాదొ ఇజి నెన్ఏండ ఆతండ్రె 'బారి గొడఃలొఇ వన్నిజ్ ఒతు' ఇజి ఆడ్ర సిత్తాన్.

* 21:26 21:26 యా బాడ్డిదు మొగవారి మంజినార్. అయలికొడొక బాన్ సొండ్రెజ్ ఆవిద్ † 21:29 21:29 యూదురు ఆఇకార్ దేవుణు గుడిః డేవాదు సొండ్రెజ్ ఆవిద్. బాన్ యూద మొగకొడొకెరి సొండ్రెజ్ ఆనాద్ ఇజి రూలు మనాద్

35 పవులు పావు అన్ను మున్ను వాతివలె లోకుర్ ఒదె కోపమాజి లాగ్దెజ్ నెక్తెజ్ కిత్తిజ్ సయ్నమ్దికార్ పవులుజ్ పిండితార ఒతార్.

36 ఎందానిజ్ ఇహిజ, వన్నిజ్ నవ్అ ఇజి లోకుర్ విజేరె డటం గగోలాజి వెటసాహార్.

పవులు లోకుర్ వెట వర్గిజినాన్

37 మొదోహి పావు అన్నుదాన్ ఎక్కి సొన్ని ఆకరి పావు అన్ను దాక వారు సాహార్. సయ్నమ్దికార్ పవులుజ్ బారిగోడెలోఇ ఒతెజ్ సుడెజి మహిజ్ పవులు అయ పెరి అతికారి వెట, నీ వెట ఉండ్రీ మాట వెప్తాజ్ ఆనాదా ఇజి వెన్బాతాన్. అందెజె అయ అతికారి, “గ్రీకు బాస నీను నెసినిదా?”, ఇజి వెన్బాతాన్.

38 “యా దినమ్కాజ్ ముందాల్నై అతికారిజ ఎద్రువెప్పి లోకాజ్ సమ్మి నాల్లి వెయి లోకాజ్ బిడిజ్బూమిదు వెట కూక్కి ఒసి మహి అయ్గుప్పు దేసెమ్దికి నీను ఆఇదా?”, ఇజి పవులుజ్ వెన్బాతాన్.

39 దన్నిజ్ పవులు, “నాను కిలికియాదు మన్ని తార్పు పట్టుమ్దికాన్ యూద వాండ్రు. నాను అయ గొప్ప పట్టుమ్ది లోకు. లోకుర్ వెట వర్గిదెజ్ నజీ సెల్వ సిదా”, ఇజి బతిమాలితాన్.

40 పవులు సెలవ లోస్తిజ్ పెరి అతికారి సరి సిత్రాన్. అయావలె పవులు పావు అన్ను మున్ను నిహండ్రె లోకాజ్ అలెజి మండ్రు ఇజి కియు సయ్న కిత్తాన్. వారు అలెతి మహివలె పవులు యూదురి బాసాదు ఈహు వెప్తాన్.‡

22

1 “తంబెరిజాండె, బుబ్బరాండె, నా లోఇ ఇని తప్పుబా సిల్లెద్ ఇజి మీరు నెసినివందిజ్ నాను వెప్పిని మాటెజ్ వెండ్రు”.

2 పవులు వరి సొంత బాసాదు వర్గినిక వెహారె వారు జమ్న అల్లెత మహార్. అయావలె పవులు ఈహు వెప్తాన్.

3 “నాను కిలికియాదు మన్ని తార్పు పట్టుమ్దికాన్ యూద వాండ్రు. అహిజ యా పట్టుమ్దు గొప్ప పేరు పొందితి మేస్టర్ గమాలియెలు బాన్ మోసె మా అనిగొగొరిజ్ సిత్తి రూలుజ ఎలాగ లోబడెదెజ్ ఇజి నెగ్రెండ నెస్తానె పిరితా. మీరు విజెరె నేండ్రు ఎలాగ పటుదలదాన్ మన్నిదెరో అయ వజనె నానుబా యా రూలుజ్ వందిజ్ పటుదలదాన్ మహా.

4 నాను యేసుప్రబు మున్ను నమ్మితి వరిజ్ మొగ్గకొడెరిజ్, అయ్లి కొడెకాజ్ అసి తొప్పి జెలిదు ఇడెజి సానేండ మాలెజ్ కిత.

5 దిన్ని వందిజ్, విజేరె పుజేరిజ మున్ను పెరి పుజేరి, పెద్దెలుజు విజేరె నజీ సాసి ఆత మనార్. దమన్ను పట్టుమ్దు మహి మా సొంత లోకురాతి యూదురు లోఇ మహి నమ్మిత్తి వరిజ్బా అసి తొప్పి మాలెజ్ కిదెజ్ యెరూసలేమ్దు తతెజ్ ఇజి పుజేరిజ బాణిజ్ ఉత్తమ్ము లొస్త ఒతానె దమన్ను పట్టుమ్దు మహి యూదురుబాన్ సాహా.

6 నాను వయ్నం కిజి దమన్ను పట్టుం డగ్రు సొన్ని మహిజ్, మదెనం వేడెదు, ఆగాసమ్దాన్ వెటనె గొప్ప జాయ్ నా సుటులం డెయ్తాద్.

7 అయావలె నాను బూమి మున్ను అర్తానె, ‘సవులు, సవులు, నీను ఎందానిజ్ నజీ మాలెజ్ కిజిని’, ఇజి నావెట ఉండ్రీ జాటు వాతిక వెహా.

‡ 21:40 21:40 యూదవరి బాస ఏబ్రి బాస. యూద పుజేరిజు నద్వితి మహి దేవుణు మాటెజ్ ఏబ్రి బాసాదునె రాస్త మహాద్. వారు వర్గితి మాట అరామియ బాస

8 'ప్రబు, నీను ఎయి' ఇజి నాను వెన్బాత. వెన్బాతిజ్ వాండ్రు 'నీను మాలెజ్ కిజిని నజరేతుదికాన్ ఆతి యేసునె నాను', ఇజి నావెట వెహ్లాన్.

9 నావెట సొన్ని మహికార్ అయ జాయ్ సుడేతార్ గాని నావెట వర్గితిమహివన్ని జాటు నెన్వితార్.

10 అయావలె నాను, 'ప్రబు నాను ఇనిక కిదెజ్' ఇజి వెన్బాతిజ్, 'నీను నిజ్జి దమస్కు పట్టుం సొన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజి నిజి ఒరెన్ వెహ్లానాన్లె' ఇజి నావెట ప్రబు వెహ్లాన్.

11 అయ సుడేదెజ్ అట్ఇ నన్ని పెరి జాయ్ మహిజ్ నాను కణుకు తోర్దెజ్ అట్ఎండెత. నావెట మహికార్ నా కికు అసి నడిపిసి దమస్కు పట్టుమ్దు కూక్త తతార్.

12 అయావలె మోసె సిత్తి రూలుజ్ లోజిజి, బక్తి మన్నికాన్ అననియ ఇనికాన్ ఒరెన్ బాన్ మహాన్. అబ్బె మహి యూదురు విజేరి యా అననియ, ఒరెన్ పల్కుబిజి: మన్నికాన్ ఇజి వెహ్లా మహార్. వాండ్రు నా డగ్రు వాతాన్.

13 డగ్రు వాతండ్రె నా డగ్రు నిహండ్రె, 'సవులునా, బేన్అ', ఇజి వెహ్లాజ్ వెటనె నాను బేస్తానె వన్నిజ్ సుడేత.

14 అయావలె అయ అననియ వెహ్లాన్, 'మా అనిగొగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కిత్తాండ్రె అక్కు నీను నెస్తెజ్. అందెజె నీను సుడేతిమహి, వెహిమహి నీతి నిజాయితి మన్నికాన్ నిజి ఏర్పాటు కిత్తాన్.

15 ఎందనిజ్ ఇహిజ, నీను సుడేతికెజ్, నీను వెహికెజ్, విజు లోకాజ్ సొన్ని వెహ్లాజ్, వన్నివందిజ్ ఉండ్రె సాసివజి నీను మంజిని.

16 ఏలు ఎందనిజ్ ఆలస్యమాజిని? నిజ్జి బాప్తీసం లాగె ఆఅ. యేసు పేరు అసి, పార్లనం కిజి నీ పాపమ్కాణ్ నొరె ఆఅ', ఇజి వెహ్లాన్.

17 నాను యెరూసలేమ్దు మర్జి వాతానె దేవుణు గుడిడు పార్లనం కిజి మహా. పార్లనం కిజి మహిజ్ ఎద్రునె ఉండ్రె దర్లనం సుడేత.

18 అయ దర్లనమ్దు నావెట, 'నీను యెరూసలేం డిసి గజిబిజి సొన్అ. ఎందానిజ్ ఇహిజ నావందిజ్ నీను వెహ్లా సాసి వీరు ఒప్పుకోడేవర్', ఇజి వెహ్లా మహికా నాను సుడేత.

19 ప్రబు అయ మాట వెహ్లాజ్ నాను, 'నాను యూదురి మీటిజ్ ఇల్కాజ్ వరస సొన్ని మీ ముస్కు నమకం ఇట్టి వరిజ్ డెయ్జి జెలిదు ఇట్టా ఇజి వారు విజేరి బాగ నెసినార్.

20 అక్కాడె ఆవండ, నీవందిజ్ సాసి వెహ్లా సైపానుజ్ సప్తివలె, నానుబా అక్కు ఒప్పుకోటానె వన్నిజ్ సప్తివరి సాల్వెజ్ కాప్కిజి మహాగదె', ఇజి ప్రబు వెట వెహ్లా.

21 గాని ప్రబు, 'నీను సొన్అ, దూరం మన్ని దేసమ్దు బత్కిని యూదురు ఆఇవరిబాన్ నాను నిజి పోక్కు' ఇజి నావెట వెహ్లాన్'.

పవులు రోమదిజ్ అక్కు ఆతికాన్

22 యా మాటదాక లోకుర్ పవులు వెంజి మహార్. గాని యాక వెహ్లాజ్, "నిన్ని వన్నిజ్ ఇడ్కాట్. విన్నిజ్ సప్తు. వీండ్రు బత్కిదెజ్ ఆవిద్", ఇజి వారు విజేరి డటం గగోలాత్తార్.

23 ఈహా వారు గగోలాజి వరి సాల్వెజ్ కిసి విసీర్తారె దూల్లి అసి ఎగ్రిస్తార్.

24 అయావలె 'పవులుజ్ బారిగోడః లొఇ తగ్అ' ఇజి రోమ సయ్నమ్ది పెరి అతికారి ఆడ్ర సిత్తాన్. లోకు పవులు ముస్కు ఎందానిజ్ ఈహు కోపం ఆతారె గగోల్ ఆతార్ ఇజి నెన్ని వందిజ్ పవులుజ్ కొర్దదాన్ డెయ్దెజ్ అయ అతికారి ఆడ్ర సిత్తాన్.

25 గాని పవులు డెయ్దెజ్ తొహ్తాజ్ పవులు వన్ని డగ్రు మహి సదాతిపతివెట ఈహు వెన్బాతాన్, "రోమదిజ్ అక్కు మన్నికాన్ ఆతి ఒరెన్ వన్నిజ్ తీరపు సివీండనె కొరెడెదాన్ డెయ్దెజ్ రోమ రూలుజ్ వజ మిజి అతికారం మనాదా?".

26 అయ సతాతిపతి యాక వెహొండ్రె రోమ సయ్నమ్ది పెరి అతికారిబాన్ సాహొండ్రె ఈహు వెహ్సాన్. "నీను ఇనిక కిదెజ్ సుడెజిని? వీండ్రు రోమదిజ్ అక్కు మన్నికాన్", ఇజి వెహ్సాన్.

27 అయావలె అయ పెరి అతికారి పవులుబాన్ వాతండ్రె, "నీను రోమదిజ్ అక్కు మన్నికిదెనా?", ఇజి వెన్బాతాన్. "ఒఒ", పవులు ఇహాన్.

28 దన్నిజ్ అయ పెరి అతికారి, "లావు డబ్బు సిత్తానె యా రోమది అక్కు నాను పొందిత", ఇహిజ్ పవులు, "నాను ఇహిజ పుట్టివలెహానె రోమదిజ్ అక్కు మన్నికాన్" ఇహాన్.

29 అందెజె పవులు వెట డటిసి వెహ్తాజ్ వాతికార్ వెటనె వన్నిజ్ డిస్త సితార్. రోమదిజ్ అక్కు మన్ని వన్నిజ్ గొలుస్కాణిజ్ తొహ్పిస్త మహ ఇజి నెసి అయ రోమ సయ్నమ్ది పెరి అతికారి తియెలాతాన్.

పవులు యూద పెద్దెల్జ నడిమి వర్గిజనాన్

30 మహ్సా నాండిజ్, పవులు ముస్కు యూదురు ఇని నేరం మొప్పారొ ఇజి నెస్తెజ్ అయ రోమ పెరి అతికారి ఆస ఆతాన్. అందెజె పవులు డిబిస్తాన్. పెరి పుజేరిజ్ని సంహద్రి సజమ్దిజ్ కూకపిస్తాండ్రె 'మీటిజ్ కినాట్' ఇజి ఆడ్ర సిత్తాన్. వారు కూడెజి వాతివలె పవులుజ్ వరి ముందాల నిల్వ్తాన్.

23

1 పవులు సంహద్రి సజమ్దివరిజ్ తినాజ్ సుడెజి ఈహు వెహ్సాన్, "తంబెరిజాండ్రె, గడిసి సాహి దినమ్కు విజు నాను దేవుణు ఎద్రు నా గర్బం గదిన్విండ మహ".

2 అయావలె విజేరి పుజేరిజ ముస్కు పెరి పుజేరి ఆతి అననియ పవులు డగ్రు నిల్పిమహివరివెట, "వన్ని వెర్లు డెయ్అ", ఇజి ఆడ్ర సిత్తాన్.

3 దన్నిజ్ పవులు, "నీను తెలాజ్ దూల్లి రాస్తి గొడ్డె* నన్నికి. దేవుణు నిజి డెయ్నానె. మోసె సిత్తి రూలుజ్ తగితివజ నజి తీరపు కిదెజ్ నీను బస్తిమన్ని. గాని మోసె సిత్తి రూలుదిజ్ తగ్విండ నజి డెయ్దెజ్ ఆడ్ర సీజనిదా?", ఇహాన్.

4 పవులుడగ్రు నిహికార్, "నీను దేవుణు పెరి పుజేరిదిజ్ దుసలాడిజినిదా?", ఇహాన్.

5 దన్నిజ్ పవులు, "తంబెరిజాండ్రె, వాండ్రు విజేరి పుజేరిజ ముస్కు పెరి పుజేరి ఇజి నాను నెన్విత. మీ లోకాజ్ ఏలుబడి కినివరిజ్ దుసలాడిజినిక ఆవిద్ ఇజి దేవుణు మాటదు రాస్త మనాద్ గదె", ఇహాన్.

6 యూద పెద్దెల్జ పెరి సజమ్లొఇ సెగొండార్ పరిసయరు, సెగొండార్ సదుకయరు ఇజి పవులు నెస్తాన్. నెస్తాండ్రె వెనుక పవులు డటం వెహ్సాన్, "తంబెరిజాండ్రె, నానుబా పరిసయ వాండ్రునె, పరిసయవన్నిజ్ పుట్టికాన్. దేవుణు సాతివరిజ్ నిక్సాన్ ఇజి

* 23:3 23:3 పవులు కోపమాజి వెహ్తా మాటెజ్

నాను నమ్మిజిన. అక్క నాను ఎద్రు నుడఃజి మంజిన. దన్నివందిజ్ నాముస్సు తప్పు మొప్పి తీర్పు కిజినార్”.

7 పవులు యాక వెహ్తావలె పరిసయురుజ సదుకయరుజ నడిఃమి గొడఃబ పుట్టాద్. గొడఃబ పుట్టాదె వారు రుండి జఱుజ్ ఆతార్.

8 (ఎందానిజ్ ఇహిజ సాతికార్ మర్జి బత్కిఎర్, దూతార్ సిల్లు, దెయమ్కు సిలు ఇజి సదుకయరు వెహ్సినార్. పరిసయరు ఇహిజ అక్కెజ్ విజు మన్నె ఇజి వెహ్సినార్).

9 అయావలె అబ్బె గొప్ప గగోల్ ఆతాద్. పరిసయరులోఇ సెగొండార్ దేవుణు మోసెజ్ సిత్తి రూలుజ్ నెస్సిసినికార్ నిజీత్తారె, “మాపు నుడఃతిజ్, యా లోకు ముస్సు ఇని తప్పుబా తోరెఎద్. ఒరెన్ దూత గాని ఉండ్రీ తోర్దెజ్ అట్ఇకాద్ గాని వన్నివెట వర్గితాద్ను, ఇజి గొడఃబెజ్ ఆతార్.

10 వరి లోఇ గొడఃబ లాపత్తిజ్ వారు పవులు కిన్న విసీర్వార్దెను ఇజి తియెలాతాండ్రె అయ రోమ సయనమ్ది పెరి అతికారి సయనమ్ది వరిజ్ పొక్తాండ్రె పవులుజ్ వరి నడిఃమిహన్ లాగ్గి బారిగొడః లోఇ తత్తెజ్ ఆడ్ర సిత్తాన్.

11 ఆ పొదొయ్ ప్రబు పవులు తోరె ఆతండ్రె, “దయరం ముస్సు మన్అ. నీను యెరూసలేమ్దు నావందిజ్ ఎలాగ సాసి వెహ్తాదొ అయావజనె రోమ పట్టుమ్దుబా సాసి వెహ్అ”, ఇజి వెహ్సాన్.

పవులు సప్తెజ్ యూదురు కుట్ట కిత్తార్

12 మర్న నాండిజ్ పెందల సెగొండార్ యూదురు కూడిఃతారె, ‘మాటు పవులు సప్వేండ ఉండ్రెజ్ తిండ్రెజ్ ఆవద్’ ఇజి ఒట్టు కిత్తారె పవులు సప్తెజ్ ఇజి పూర్తి తెగిస్తార్.

13 పవులుజ్ సప్తెజ్ ఆలోసనం కిత్తికార్ నల్వయ్ ముస్సు మొగావారు మహార్.

14 వారు పెరి పుజేరిజబాన్ పెద్దెలుజబాన్ సొహారె వెహ్తార్, “మాపు పవులుజ్ సప్వేండ ఇనికబా తిన్వేవ్ ఉణ్ఎవ్, ఇజి గటిజ ఒట్టు కిత మహావ్.

15 అందెజె మీరు, సంహద్రి సజమ్దికార్ విజేరి కూడఃజి రోమ సయనమ్ది పెరి అతికారి వన్నిజ్ కబ్బు పొక్అ. అక్క ఇనిక ఇహిజ, పవులు మరి మాబాన్ రపెన్ ఇండ్రు. వన్నివెట మరి వర్గిజి వన్ని వందిజ్ మాపు విజు నెస్సెజ్ ఇజి నాటిస్నాట్. వాండ్రు ఇబ్బె అందివేండనె మాపు వన్నిజ్ సప్తెజ్ తయారాజి మనావ్”.

16 గాని పవులుజ్ బణిజ ఆతికాన్ యాక నెస్తాండ్రె నెల్వ లోస్తాండ్రె బారిగొడః లోఇ సొస్సి పవులుజ్ వెహ్సాన్.

17 అయావలె పవులు సదాతిపతిర్లోఇ ఒరెన్ వన్నిజ్ కూక్తాండ్రె, “యా దజ్డెజ్ రోమ సయనమ్ది పెరి అతికారిబాన్ ఒఅ. పెరి అతికారి వెట విన్నిజ్ ఉండ్రీ మాట వెహ్తెజ్ మనాద్” ఇహాన్.

18 వెహ్తెజ్ అయ సతాతిపతి అయ దజ్డెజ్ పెరి అతికారిబాన్ ఒతాన్. ఒతండ్రె, “జెలిదు మన్ని పవులు నజి కూక్తాండ్రె యా దజ్డెజ్ మీబాన్ ఒతెజ్ ఇజి వెహ్సాన్. యా దజ్డెజ్ మీ వెట ఇనికాదొ వెహ్సాన్”, ఇజి వెహ్సాన్.

19 అయ పెరి అతికారి అయ దజ్డెజ్ కీదు అస్తాండ్రె ఉండ్రీ వడఃకాద్ ఒతాన్. “నా వెట వెహ్తెజ్ ఇని మాట మనాద్?”, ఇజి వన్నిజ్ వెన్బాతాన్.

20 వెన్బాతిజ్ అయా దజ్డెజ్ యెన్, “విగెహిజ్ పవులుజ్ సంహద్రి సజం నడిఃమి తసి వన్ని వందిజ్ మరి నెస్సెజ్ ఇజి నాటిసి వన్నివెట మరి వర్గిదెజ్ నీబాన్ నెలవ లొస్సెజ్ ఇజి యూదురు ఒపుకొట మనార్.

21 గాని నీను వరిజ్ సరి సీమ. ఎందానిజ్ ఇహిజ నలపయ్ మణిసిరిజ్ మున్సు. మొగావారు, పవులు సవ్విండ మాటు ఉండెజ్ తిండ్రెజ్ అవిద్ ఇజి ఒట్టు కితారె వన్ని వందిజ్ సరిదు సుడొజినార్. వారు వన్నిజ్ సప్తెజ్ తయారాత మనార్. మీమాటదిజ్ కాప్ కిజినార్” ఇహాన్.

22 యాక వెహండ్రె అయ పెరి అతికారి, “నీను నజి యాక వెప్తొ ఇజి ఎయెజ్ బా వెహ్య”, ఇజి గటిజ వెప్తొండ్రె అయ దజడాఱయెనుజ్ పొక్తాన్.

23 వెనుక అయ పెరి అతికారి సదాతిపతిర్ లొఇ రిఎరిజ్ కూక్తాండ్రె, “యా పొదొయ్ తొమ్మిది గంటెజ కయ్ సరియ దాక సొండ్రెజ్ తయారె ఆదు. రుండి వందెజ్ సయ్యుమ్ దికార్, డబయ్ మణిసిర్ గుర్రమ్ దాన్ సొని సయ్ నమ్ దికార్, రుండి వందెజ్ బల్లెమ్ కు అస్తికార్ సొండ్రెజ్ వలె.

24 పవులుజ్ ఎకిసి ఒతెజ్ గుర్రమ్ కు సీదు. వన్నిజ్ గవర్నరు ఆతి పేలిక్కుబాన్ ఇని ప్రమాదం రెవిండ ఒతెజ్”, ఇజి వెప్తొన్.

25 అయ పెరి అతికారి ఈహె ఉండ్రె ఉత్తం రాస్తాన్,

26 “క్లవుదియ లూసియ ఆతి నాను గొప్ప పేరు మన్ని పేలిక్కు గవర్నరిజ్ వందనమ్ కు వెహిసన.

27 విన్నిజ్ యూదురు అస్తారె సప్తెజ్ సుడొతిజ్ నాను నా సయ్ నమ్ దివరివెట వాతానె విన్నిజ్ గెల్పిస్త. ఎందనిజ్ ఇహిజ వీండ్రు రోమదిజ్ అక్కుమన్నికాన్ ఇజి నాను నెస్త.

28 విని మున్సు యూదురు ఎందనిజ్ నేరం మొప్పినార్ ఇజి నెస్తెజ్ నాను విన్నిజ్ యూదురి సంహద్రి సజమి నడిమి ఒత.

29 ఒతిజ్, యూదురి రూలుజలొఇ మన్ని ఇనికెజ్ వందిజ్ వారు విన్నిజ్ నేరం మొప్తారె గాని, సప్తెజ్ నొ, జెలిదు పొక్తెజ్ నొ తగితి తవుజ్ తొరొఉతె.

30 విన్నిజ్ సప్తెజ్ ఇజి యూదురు కుట్ర కిజినార్ ఇజి నాను నెస్తానె వెటనె విన్నిజ్ నీబాన్ పొక్కిన. విని మున్సు నేరం మొప్తికారెబా నీబాన్ వాజి వన్ని మున్సు మన్ని నేరమ్ కు విజు వెహైజ్ నాను వరిజ్ ఆడ్ర సిత్త”.

31 అయ రోమ సయ్ నమ్ ది పెరి అతికారి ఆడ్ర సిత్తిలెకెండ్రె సయ్ నమ్ దికార్ పవులు ఆ పొదొయ్ నె అంతిపత్రి ఇని పట్టుమ్ దాక కూక్త ఒతార్.

32 మహ్సా నాండిజ్ వారు పవులు గుర్రమ్ కు అస్తి సయ్ నమ్ ది - పరివెట పొక్తారె మహికార్ మర్జి వాతార్.

33 వారు కయ్ సరియదు అందితిజ్ అతికారి పొక్తి ఉత్తం గవర్నరిజ్ సితార్. పవులుజ్ బా గవర్నరుబాన్ ఒపజెప్తారె.

34-35 గవర్నరు అయ ఉత్తం సద్వితాండ్రె పవులు వెట, “నీను ఎమేణి ప్రాంతమ్ దికి”, ఇజి వెన్ బాతాన్. “కిలికియ దికాన్”, ఇజి వెప్తొజ్, “నీ మున్సు నేరం మొప్తికార్ వానివలె నీ సజతి సూణ ఇజి వెప్తొన్. పవులు హేరోదు రాజు పెరి ఇండ్రొ ఇడొజి కాప్ కిజి మండ్రెజ్ ఆడ్ర సిత్తాన్.

24

పేలిక్కు గవర్నరుబాన్ పవులు నిల్పినాన్

1 అయ్ దు రోస్సు సొహిజ్ విజేరె పుజేరిజ మున్సు పెరి పుజేరి ఆతి అననియ, వన్నివెట సెగొండార్ యూద పెద్దెలుజు, తెర్తుల ఇని ఒరెన్ తగ్గు వర్గినికాన్, డిఱగు

మన్ని కయ్ సరియాదు వాతార్. వాతారె పేలిక్కు గవర్నరుబాన్, పవులు వందిజ్ మొప్పి నేరమ్ కు వెహ్తార్.

2-3 పవులుజ్ కూక్కిసి కోర్టుదు నిల్వ్తాన్. అయావలె తెర్తుల ఇని తగ్గు వర్గినికాన్ పవులు వందిజ్ ఈహె నేరం మొప్పైజ్ మొదొల్స్తాన్, “పెరి పేరు మన్ని గవర్నరు ఆతి పేలిక్కు, నీను నండొ కాలం ఏలుబడిః కిజినిజ్ మాపు సమదానమ్ దాన్ మంజి - నాప్. మా జాతివందిజ్ మీరు బాగ కిత్తిజ్ మజి నెగ్రెండ బత్తిదెజ్ అవ్ నరం ఆతికెజ్ విజు మన్నె. మాపు విజెపె మీరు కిత్తి యా నెగ్గి పణిదిజ్ ఒప్పుకోడెఃజి నిజి వందనమ్ కు వెహ్సినాప్.

4 గాని నాను నీ పణిదిజ్ అడ్డు కివండ, మాపు ఎందానిజ్ మీబాన్ వాతాపొ అయ సజతి వందిజ్ వర్గిన. దయ కిజి వెన్ అ.

5 యా పవులు గొప్ప గొడఃబ కినికాన్. లోకం విజు యూదురి నడిఃమి గొడఃబెజ్ రేప్పికాన్. వీండ్రు నజరేతుది జటుదిజ్ నెయ్యి. యాక విజు మాపు నెసినాప్.

6-7 విండ్రు యెరూసలేమ్ దు మన్ని దేవుణు గుడిఃదిజ్ మయ్లు కిదెజ్ బా సుడఃతాన్. అందెజె మాపు విన్నిజ్ అస్తాప్. గాని రోమ సయ్ నమ్ ది పెరి అతికారి లూసియ వాతండ్రె మాబాణిజ్ విన్నిజ్ లాగితాన్.

8 నీను విన్నిజ్ వెన్ బా అ. మాపు విన్నివందిజ్ వెహ్పికెజ్ విజు నిజమె ఇజి నిజి నెస్తెజ్ ఆనాద్”.

9 తెర్తుల వెహ్పి మాటెజ్ విజు నిజం ఇజి బానె వాతిమహి యూదురుబా ఒప్పుకోటార్.

10 పవులు వర్గిదెజ్ గవర్నరు సయ్ న కిత్తిజ్ పవులు వర్గిదెజ్ మొదొల్స్తాన్, “గవర్నర్ ఆతి పేలిక్కు, నీను నండొ పంటెజ్ యా యూదురి లోకాజ్ నెగ్రెండ ఏలుబడిః కిజిమహి. అందెజె నాను దయ్ రమ్ దాన్ వెహ్సిన.

11 నాను యెరూసలేమ్ దు దేవుణు గుడిఃదు పార్దనం కిదెజ్ సొహిజ్ ఏలు పనెండు రోస్సునె ఆతె ఇజి విరిజ్ వెన్ బాతిజ నీను నెన్నె.

12 దేవుణు గుడిః లొఇబా, యూదురి మీటిజ్ ఇండ్రొబా, పట్టుమ్ దుబా నాను ఎయెన్ వెటబా లోకురిజ్ నెక్తి పొక్తిక, జటు కిజి రేప్పిక, ఇనికబా యూదురు సుడఃవేతార్.

13 ఏలు నావందిజ్ వీరు వెహ్పికెజ్ నిజం ఇజి రుజుప్ కిదెజ్ వీరు అట్ ఏర్.

14 గాని నాను ఉండ్రె నిజం మాట వెహ్పా. అక్క ఇనిక ఇహిజ. నిజం ఆవద్ ఇజి వీరు వెహ్సినె బోదవజ నాను నడిఃజిన. ఆహె నడిఃజి దేవుణు మోసెజ్ సిత్తి రూలుజ్ వజ విజు, ప్రవక్తరు రాన్సికెజ్ విజు నాను నమ్మిజి మా అనిగొగ్గెర్ పొగ్గడిఃజి మాడిఃస్తి దేవుణుదిజ్ పార్దనం కిజిన.

15 వీరు నమ్మినెవజ నెగ్గికార్, సెఇకార్ విజేరె సాతి వరిబాణిజ్ మర్జి నిజ్ నార్ ఇజి నానుబా దేవుణుదిజ్ నమ్మిజి ఆనదాన్ ఎద్రు సుడఃజిన.

16 అందెజె నాను, దేవుణు ఎద్రుగాని, లోకుర్ ఎద్రుగాని నా గర్బం గదిన్ ఏండ మండ్రెజ్ సుడఃజిన.

17 సెగం పంటెజ్ సొహి వెనుక ఏలు నాను నా సొంత జాతిజ్ సాయం కిదెజ్, దేవుణు గుడిఃదు పూజ కిదెజ్ యెరూసలేమ్ దు వాత.

18-19 దిన్ని వందిజ్ నాను దేవుణు గుడిఃదు సొహిమహిజ్, సుబ్బరం ఆతి వెనుకానె యూదురు నజి బాన్ సుడఃతార్. అయావలె నావెట మంద లోకుర్ ఎయెర్ సిల్లెతార్.

ఇని గొడబ జర్గివితాద్. గాని నాను బాన్ మహివలె ఆసియ దేసిమ్దాన్ వాతిమహి సెగొండార్ యూదురు, బాన్ మహారె నా ముస్కు గొడబ ఆతార్. నా ముస్కు వరిజ్ ఇని నేరం మహిజ వారె వాజి నీ వెట వర్గదెజ్.

20 సిలిజ నాను సంహద్రి సజమ్దు వర్గిజి మహిజ్ ఇని తప్పు వర్గిత ఇజి వీరు వెహిర్.

21 గాని ఉండ్రీ మాట నాను వెహ్టా. అక్క ఇనిక ఇహిజ, సాతి లోకుర్ మర్జి బత్కినార్ ఇజి నమ్మినివందిజ్ మీరు నేండ్రు నజీ తీర్పు కిజినిదెర్ ఇజి నాను బానె డటం వెహ్టా మహా”.

22 పవులు వెహ్టి బోదవందిజ్ గవర్నరాతి పేలిక్కు నెగ్రెండ్ర నెస్త మహాన్. అందెజె వాండ్రు, “రోమ సయ్నమ్ది పెరి అతికారి ఆతి లూసియ వానివలె తీర్మానం కిస”, ఇజి వెహ్టాండ్రె అయ సద్దు మీటిజ్ ముగిస్తాన్.

23 వెనుక పవులు జేలిదు ఇడజి వన్నిజ్ కాపు ఇడదెజ్ సదాతిపతిజ్ ఆడ్ర సిత్తాన్. వన్ని లోకుర్ వాజి వన్నిజ్ సుడజి వన్నిజ్ సాయం కిదెజ్ అడ్రు కిమాట్ ఇజి ఆడ్ర సిత్తాండ్రె వన్నిజ్ కండెక్ సరి సిత్తాన్.

24 సెగం రోస్కు సాహిజ్ పేలిక్కు వన్ని ఆల్ని ఆతి ద్రుసిలవెట వాతాన్. అది యూదురి అయ్లి కొడోః. పేలిక్కు పవులుజ్ కూక్పిస్తాన్. యేసు క్రీస్తు ముస్కు మన్ని నమకంవందిజ్ పవులు వెహ్టికెజ్ వెంజి మహాన్.

25 గాని పవులు సరియాతి పణి కిని వందిజ్, మన్సుదిజ్ అణసె ఆజి ఇడ్డివందిజ్, దేవుణు, లోకుర్ ముస్కు కిని తీర్పువందిజ్ గటిజ వర్గితిజ్ పేలిక్కు తియెలాతాండ్రె, “ఆనె, ఏలు సాన్అ. మరి ఒర్పు టయం మహివలె కూక్పిన్న”, ఇజి వెహ్టాండ్రె పోక్తాన్.

26 పవులు నజీ డబ్బు సీనాస్సు ఇజిబా పేలిక్కు ఒడిఃఒడిఃబిత్తాన్. అందెజె పవులు మాట మాటదిజ్ కూక్పిస్తాండ్రె వన్నివెట వర్గితాన్.

27 రుండి పంటెజ్ సాహిజ్, పేలిక్కు వెనుక పోర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్గ కిబిస్తెజ్ పవులుజ్ జెలిదునె ఇట్టాన్.

25

పవులు పెస్తు ఎద్రు నిల్పినాన్.

1 పోర్కియు పెస్తు అయ ప్రాంతమ్దిజ్ గవర్నరు ఆజి మూండ్రీ రోస్కు సాహిజ్ వాండ్రు కయ్సరియాదాన్ ఎక్కి యెరూసలేమ్దు సాహాన్.

2 బానె పెరి పుజేరిజు యూదురి పెద్దెలుజు పవులు ముస్కు మహి తప్పుజవందిజ్ గవర్నరుజ్ వెహ్టార్.

3 “దయ కిజి పవులు యెరూసలేమ్దు పోక్అ”, ఇజి వారు గవర్నరుబాన్ నండో సుట్కు బతిమాలితార్. ఎందానిజ్ ఇహిజ పవులుజ్ సర్దు సప్పాప్ ఇజి వారు కుట్ట కిజి మహార్.

4 గాని గవర్నరు, “పవులు కయ్సరియాదు కాప్ ఇట్టా మనాద్. నాను వెటనె బానె సాన్పిన.

5 అందెజె మీలొఇ మన్ని పెరిలోకుర్ నావెట బానె సాండ్రెజ్. పవులు ముస్కు ఇని తప్పుబా మహిజ వీరు కోర్డుదు నేరమ్కు తోరిస్తెజ్ ఆనాద్” ఇహాన్.

6 గవర్నరు వరివెట ఎనిమిదినో పది రోస్కునో మహి వెనుక, డిఃగు కయ్సరియాదు సొహాన్. మహ్నా నాండిజ్ కోర్డుదు సొహాండ్తే తీర్పు కిదెజ్ ఇజి, తీర్పు కినిబాన్ బస్తాన్. 'పవులు కోర్డుదు తగాట్' ఇజి ఆడ్ర సిత్తాన్.

7 పవులు వాతిజ్ యెరూసలేమ్దాన్ డిఃగు వాతి యూదురు వన్ని నుటులం నిహరె వన్ని ముస్కు నండొ రకమ్ది బల్మి ఆతి తప్పుజ్ మొష్టార్ గాని అక్కెజ్ నిజం ఇజి రుజుప్ కిదెజ్ వారు అట్ఎతార్.

8 పవులు, "నాను యూదురు రూలుజ్ వందిజ్ గాని, యెరూసలేమ్దు మన్ని దేవుణు - గుడివందిజ్ గాని, రోమ దేసెమ్దిజ్ ఏలుబడిః కిని కయ్సరువందిజ్ గాని ఇని తప్పుబా కివిత", ఇజి వన్ని వందిజ్ వాండ్తే వెష్టాన్.

9 నాను నెగ్గికాన్ ఇజి యూదురు ఒడిఃబిదెజ్ ఇజి గవర్నరు నుడఃతాన్. అందెజె వాండ్తు పవులు వెట వెన్బాతాన్, "యెరూసలేమ్దు సొన్ని బానె నీ వందిజ్ వీరు వెప్పికెజ్ నిజమ్నో అబద్దమ్నో ఇజి నాను తీర్పు కిదెజ్ నీను ఒప్పుకోడఃజినిదా?".

10 దన్నిజ్ పవులు, "రోమ రాజు ఆతి కయ్సరుది కోర్డుదు నిల్సిన. యా కోర్డుదునె నజీ తీర్పు కిదెజ్. యూదురిజ్ ఇని తప్పుబా నాను కివిత. అక్క నీను నెగ్రిండ నెస్సిగదె.

11 నాను ఇని రూలుదిజ్బా తప్తిజ, సావుదిజ్ తగితి పణి కిత ఇహిజ, సిక్సదాన్ తప్తె ఆదెజ్ నాను నుడఃవి. గాని నా ముస్కు వీరు వెప్పికెజ్ నిజం ఆఉ ఇహిజ నజీ వరిజ్ ఒపజెప్తెజ్ ఎయెరిజ్బా అక్కు సిల్లెద్. నాను రోమ పెరి రాజు ఆతి కయ్సరుబాన్ సొండ్తెజ్ ఆజిన", ఇహాన్.

12 అయావలె గవర్నరు వన్నివెటమహి లోకుర్ వెట వర్గితాండ్తె పవులుజ్, "నీను కయ్సరుబాన్ సొన్ని వెష్టాజ్ ఇజి వెష్టా. అందెజె కయ్సరుబానె సొన్అ", ఇహాన్.

పెస్తు అగ్రిప రాజు వెట పవులువందిజ్ వెప్పినాన్

13 నెగం రోస్కు సొహి వెనుక రాజు ఆతి అగ్రిప *వన్ని తజిసి ఆతి బెర్సికయువెట కొత్త గవర్నరు ఆతి పొర్కియు పెస్తుజ్ మాడిఃస్టెజ్ కయ్సరియాదు వాతార్

14 వారు పెస్తువెట నండొ రోస్కు మహార్. మహిజ్ పెస్తు పవులు వందిజ్ రాజు వెట వర్గితాన్, "గవర్నరు ఆతి వేలిక్కు పవులు ఇని ఒరెన్ వన్నిజ్ జెలిదు ఇడిఃస్తాన్.

15 నాను యెరూసలేమ్దు సొహివలె, యూదురి పెరి పుజేరిజు, పెద్దెలుజు విని ముస్కు నేరమ్కు మొష్టారె సిక్సనిఅ ఇహార్.

16 దన్నిజ్ నాను వరివెట వెష్టా, 'రోమ అలవాటు ఇహిజ, నిందెజ్ మొప్పికార్ ఎయెన్ ముస్కు తప్పు మొష్టారొ, వాండ్తు వాజి వరి నడిఃమి వన్ని వందిజ్ వర్గిదెజ్ అవకాసం సివండ ముందాల్సె తీర్పు కిదెజ్ ఆవెద్' ఇజి.

17 అందెజె వారు నావెట ఇబ్బె వాతివలె నాను ఆల్సెం ఆవండ మర్సనాండిజ్నె సద్దు కూడఃష్టానె పవులు నాముందాల తపిస్త.

18 నేరమ్కు మొష్టికార్ నిహివలె నాను ఒడిఃబిత్తిలెకెండ్ వారు నేరమ్కు లొఇ ఉండ్రీ నేరంబా వన్ని ముస్కు మొవ్పెతార్.

19 ఇహిజ, వరి మతంవందిజ్, సాతి సొహి యేసు ఇని ఒరెన్వందిజ్ పవులు వెట గొడఃబ ఆతికాదె తోరితాద్. పవులు ఇహిజ యేసు బత్రిజినాన్ ఇజి వెప్పినాన్.

* 25:13 25:13 యూదయదేసెమ్దిజ్ ఎక్కు మన్ని ప్రాంతమ్కాజ్ వీండ్తు రాజు

20 యా సజతివందిజ్ మరి ఇనిక కిదెజ్ ఇజి నెన్విండాతానె నాను పవులు వెట, 'నీను యెరూసలేమ్దు సొన్ని బానె దిన్ని వందిజ్ తీర్పు తీరిసె ఆదెజ్ మన్ను ఆజినిదా?', ఇజి వెన్బాత.

21 గాని పవులు, 'రోమ రాజు ఆతి కయసరు నజీ తీర్పు కిదెజ్' ఇజి వెప్తిజ్ నాను వన్నిజ్ కయసరుబాన్ పొక్నేండ ఇబ్బె జెలిదునె ఇడ్దెజ్ ఆడ్ర సిత్త'.

22 అగ్రిప రాజు పెస్తువెట, "అయ పవులు వెప్తికెజ్ వెండ్రెజ్ నాను ఇస్టమాజిన" ఇహిజ్, "విగెహిజ్ నీను వెండ్రెజ్ ఆనాద్", ఇహాన్.

పవులు అగ్రిప రాజు ఎద్దు నిల్సినాన్

23 మహ్నా నాండిజ్ అగ్రిప రాజుని, వన్ని తజీసి ఆతి బెర్నికయ రాజు వర్గిని ఆతికారం ఇండ్రో వాతార్. వారు ఎసొ గొప్పు పెరికార్ ఇజి తోరిసి కర్పు ఆతి రాజురి సొక్కెజ్ ఇట్కిజి, బజారం, వెండి ఇడ్కిజి రోమ సయనమ్ది పెరి ఆతికారి లోకుర్ వెట, పట్టుమ్ది ముకెలమతివరివెట వాతార్. వాతారె పవులుజ్ తగ్గ ఆతి పెస్తు ఆడ్ర సిత్తిజ్ జమానుజ్ సొహారె పవులుజ్ వరి నడిమి తతార్.

24 అయావలె పెస్తు వెప్తాన్, "అగ్రిప రాజు, మాబాన్ కూడేజి వాతిమహి విజు లోకాండె, మీరు యా పవులు సుడేజినిదెర్. యెరూసలేమ్దు మరి ఇబ్బెబా యూదురు విజేరె వీండ్రు బత్కినిక ఆవిద్ ఇజి గగోలాతారె నావెట పిరాడ్ కిత్తార్.

25 గాని సావుదిజ్ తగితిక ఇనికబా వీండ్రు కివెతాన్ ఇజి నాను నెస్తానె రోమ రాజుబాన్ సొండ్రెజ్ వీండ్రు వెప్తిజ్ రోమ రాజుబాన్ సొన్ని తీర్పు ఆవిద్ ఇజి నాను తీర్మానం కిత.

26 గాని నాను రోమ రాజుజ్ విన్నివందిజ్ ఇనిక రాస్తి పొక్తెజ్ ఇజి తోర్విత. తీర్పు కిదెజ్ తగితిక ఇనికబా విని మున్ను సిల్లెద్. అందెజె మీరు విజెరి నడిమిని, అగ్రిప రాజు, నీ నడిమిబా విన్నిజ్ తత్త మన్ను. మాపు విన్నివెట వర్గితివెనుక ఇనికబా రాస్తెజ్ నెస్సాను.

27 తోహ్ని అసి తీర్పు కిదెజ్ పొక్తివన్నిమున్ను ఇని నింద మోప్త మనాద్ ఇజి వెహ్విండ వన్నిజ్ కయసరుబాన్ పొక్తెజ్ ఆవిద్ ఇజి నాను నెస్సా'.

26

1 అగ్రిప రాజు పవులుజ్ సుడేజి, "వీలు నీ వందిజ్ వర్గిదెజ్ నాను సరి సీజిన", ఇజి వెహ్న్. అయావలె పవులు కియు సొప్తాండ్రె వన్ని వందిజ్ వాండ్రె ముదాయి ఇజి మొదోల్స్తాన్,

2 "అగ్రిప రాజు, యూదురు నా మున్ను మొప్తి నేరమ్కు నిజం ఆవిద్ ఇజి నావందిజ్ నీ ఎద్దు వర్గిదెజ్ నాను గొప్పు సర్ల ఆజిన.

3 ఎందానిజ్ ఇహిజు యూదురి అలవాటుజ్ విజు వరి గొడేబెజ్ విజు నీను బాగ నెసినికి. అందెజె దయ కిజి నా మాట ఓరిసి వెండ్రు.

4 ఇజిరివలహాన్ అసి నాను ఎలాగ మహ ఇజి, నా సొంత లోకుర్ నడిమి, నా సొంత దేసమ్దు, యెరూసలేమ్దుబా, ఎలాగ బత్కిజి మహ ఇజి, యూదురు విజేరె బాగ్ నెసినార్.

5 మా మతమ్దు పరిసయ్రి జటుదికార్ ఉండ్రె రూలుబా తవ్విండ నీతి నిజాతిదాన్ నడినార్. వరి లోఇ ఒరెన్వజ నాను బత్కిజి మహ ఇజి వారు నావందిజ్ సాసి వెప్తాజ్ ఇహిజు, సాసి వెప్తాజ్ అట్నార్. ఎందనిజ్ ఇహిజు, వారు మొదోహాన్ అసి నజీ నెసినార్.

6 ఏలు ఇహిజు, దేవుణు మా అనిగొగొర్ వెట, నీనా ఇజి కిత్తి ఒట్టుదిజ్ ఎద్రుసుడొజి మహిదన్నివందిజ్ నజి తీర్పు కిజినార్.

7 మా పన్నెండు తెగ్గదికార్ యా ఒట్టువందిజె ఎద్రు సుడొజి దేవుణుదిజ్ రెయు పొగల్ డొన్ఎండ పార్దనం కిజి మంజినార్. ఓ రాజు, నానుబా ఆసదాన్ ఎద్రు సుడొజి మంజినిదన్నివందిజె యూదురు నా ముస్సు నేరం మొప్పినార్.

8 సాతివరిజ్ దేవుణు నిక్కాన్ ఇజి నమ్మిదిజ్ మాపు అట్ఎప్ ఇజి మీరు ఎండనిజ్ వెప్పినిదెర్?

9 నజరేతుదికాన్ యేసువందిజ్ వెప్తిమని విజు దన్నిజ్ నెక్కిపొక్కెజ్ నాను అట్టి పణి విజు కిదెజ్వలె ఇజి నానుబా ముంద్రాల ఒడిబిజి మహా.

10 అయావజనె నాను యెరూసలేమ్దు కిత. పెరి పుజేరిజ్ నజి అతికారం సిత్తిజ్ నాను దేవుణుదిజ్ కేట ఆతి నండొండొరిజ్ జెలిదు ఇట్టా. అక్కాదె ఆవండ, వరిజ్ సప్తెజ్ తీర్మానం ఆతిజ్ 'నానుబా ఒప్పుకొడొజిన', ఇజి వెప్తా.

11 నాను నండొ సుట్కు యూదురి మీటిజ్ ఇల్కాజ్ ఇల్కాజ్ సొన్ని నమ్మితి వరిజ్ గొప్పు మాలెజ్ కిత. యేసు ముస్సు నమకం ఇడ్ఎప్ ఇజి వారు వెప్పిదాక నాను బలవంతం కిత. అక్కాదె ఆవండ వరి ముస్సు ఒదె కోపం ఆతానె, ఆజ పట్నమ్కాజ్ బా సాహనె బాన్బా మాలెజ్ కిత”.

పవులు ఎలాగ యేసుప్రబుజ్ నమ్మితికాన్ ఆతాన్ ఇజి వెప్పినాన్

12 “అపొ నాను ఒర్పు, పెరి పుజేరిజు సిత్తి అతికారమ్దాన్ ఆడ్రదాన్ దమస్సు పట్నమ్దు సొన్ని మహా.

13 ఓ రాజు, మదెనె ఆతివలె సర్దు సొన్ని మహివలె, ఆగాసమ్దాన్ వాతి పెరి జాయ్ సుడొత. అయ జాయ్ పొద్దు జాయ్ ఇంక పెరి జాయ్. అక్క నజి సుటులం, నావెట మహివరి సుటులం డెయ్తాద్.

14 మాపు విజెపె బూమిదు అర్తాప్. అయావలె, ‘సవులు, సవులు, నీను నజి ఎండొనిజ్ మాలెజ్ కిజిని? ముల్లు డుడ్డుదాన్ గుతివలె మరీజ వెనుక గునె ఆతిజ నండొ కస్టం తప్పిన్సి’, ఇజి అరామియ బాసాదు వెప్తి మాట నాను వెహా.

15 ‘నీను ఎయి, ప్రబు’, ఇజి నాను వెన్బాతిజ్, ‘నీను మాలెజ్ కిజిని యేసు నాన్’ ఇజి ప్రబు నావెట వెప్తాన్.

16 ‘ఏలు నిజ్జి నిల్అ. నాను ఎండొనిజ్ నిజి తోరె ఆత ఇహిజు, నావందిజ్ పణి కిదెజ్, నావందిజ్ నేండ్రు సుడొతికెజ్ విజెరిజ్ వెప్పి, వాని కాలమ్దు నాను నిజి తోరిస్సికెజ్ విజెరిజ్ వెప్పి నజి ఉండ్రీ సాసివజ మండ్రెజ్ నిజి నాను ఏర్పాటు కిజిన.

17 ఇస్రాయేలు లోకాణిజ్ నిజి నాను గెల్పిస్సు. యూదురు ఆజ లోకాణిజ్ గెల్పిస్సు. యూదురు ఆజవరినడిమి నాను నిజి పొక్క.

18 ఎండొనిజ్ నిజి పొక్కిన ఇహిజు, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయ్తాన్ సత్తుహాన్ దేవుణు దరోట్ మప్తాజ్. నా ముస్సు నమకం ఇడొజి, వరి పాపమ్కు నొరె ఆదెజ్. నావందిజ్ కేట ఆతి వరివెట కూడొజి మండ్రెజ్. దిన్నివందిజె నిజి వరి నడిమి పొక్కిన’ ఇజి ప్రబు నావెట వెప్తాన్.

19 అందెజె ఓ అగ్రిప రాజు, నాను ఆగాసమ్దాన్ వాతి అయ మాటెజ్ లోజిత్త.

20 లోజిత్తానె తొలిత దమస్సు పట్నమ్దు, వెనుక యెరూసలేం పట్నమ్దు, మరి యూదయ ప్రాంతం విజు, యూదురు ఆజ వరిజ్బా నెస్సిస్త. ఇనిక నెస్సిస్త ఇహిజు,

విజేరె, పాపమ్ కు డి:సి దేవుణు దరోట్ మర్దు ఇజి. పాపమ్ కు డి:స్తిసిత్తిదన్నిజ్ తగితిలెకెండ్ నెగ్గి పణిజ్ కిదు ఇజి.

21 నాను ఈహా నెన్ పిస్తి దన్నివందిజె యూదురు నజి యెరూసలేమ్ దు మన్ని దేవుణు గుడి:దు సుడ:తారె నజి అస్తారె సప్తెజ్ సుడ:తారె.

22 గాని గడ:స్తి సొహి కాలం విజు దేవుణు నజి తోడు: మహాన్. అందెజె నాను ఏలు ఇబ్బె నిల్లి తక్కువరివెట, పెరివరివెట నిజం వెహ్సిన. వాని కాలమ్ దు ఇనికెజ్ జర్గిసెలె ఇజి ప్రవక్తరుని, మోసె వెహ్సెకెజె నానుబా వెహ్సిన.

23 అక్కెజ్ ఇనికెజ్ ఇహిజ, క్రీస్తు నండొ మాలెజ్ ఆజి సాతాన్. సాతి వరిబాణిజ్ తొలిత నిజ్ నాన్. నిజెజ, యూదురిజ్, యూదురు ఆఇవరిజ్ దేవుణు - దరోట్ సాండ్రెజ్ జాయ్ తోరిస్సాన్”.

24 పవులు ఈహా, వన్ని వందిజ్ వర్గిజి మహిజ్ పెస్తు, “పవులు, నీను వెరి వాండ్రు. నండొ నదు కిత్తిజ్ అక్క నిజి వెరి కిబిసినాద్”, ఇజి డటం వెహ్సన్.

25 దన్నిజ్ పవులు, “గొప్పు పెరికాన్ ఆతి పెస్తు, నాను వెరి వాండ్రు ఆవి. నాను నెగ్గిబుద్దిదానె నిజం వెహ్సిన”, ఇహాన్.

26 “రాజు యా సజతిజ వందిజ్ నెసినాన్. అందెజె వన్నివెట దిన్ని వందిజ్ నాను అడ్డు సిల్లెండ వర్గిజిన. దిన్ని వందిజ్ ఇనికబా వన్నిజ్ డాజ్ జి మనిక సిల్లెద్. ఎందనిజ్ ఇహిజ, జర్గితికెజ్ విజు ఉండ్రీ మూల పడ:కాద్ జర్గివతాద్.

27 ఓ రాజు, ప్రవక్తరిమాటెజ్ నీను నమ్మిజిని ఇజి నాను నెస్సాన్”.

28 దన్నిజ్ రాజు, “నిస్సా సులువుదాన్ నజి క్రీస్తు లోకు కిదెజ్ ఇజి నీను నజి ఒపిసినిదా?”

29 “సులువుదానొ ఆలన్యమ్ దానొ నీను ఒరిదె ఆవి, నేండ్రు నజి వెంజినికార్ విజేరె నా వజ ఆదెజ్ ఇజి నాను దేవుణుదిజ్ పార్దనం కిజిన. గాని నా వజ గొల్ స్కా:ణిజ్ తొహా ఆదెజ్ పార్దనం కివ”, ఇజి పవులు వెహ్సన్.

30 అయావలె రాజు, గవర్నరు, బెర్నిక, వరివెట బస్తి మహికార్ విజేరె నిజిత్తార్.

31 వారు వెల్లి వాతారె, “వీండ్రు సావుదిజ్ గాని, తొహా ఆదెజ్ గాని తగితి పణి ఇనికబా కివతాన్”, ఇజి ఒరెన్ వెట ఒరెన్ వర్గితాన్.

32 “వీండ్రు ‘కయ్ సరు రాజుబాన్ సాన’, ఇజి వెహ్ వండ మహాన్ ఇహిజ విన్నిజ్ డి:స్తిసిత్తిక మరి”, ఇజి అగ్రిప రాజు పెస్తుజ్ వెహ్సన్.

27

పవులు ఓడ: ఎక్కి రోమ పట్నం సొన్నినాన్

1 మాపు ఓడ: ఎక్కి ఇటలి దేసెం సాండ్రెజ్ ఇజి ఆడ్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని సదాతిపతిజ్ ఒవజెప్తార్. వాండ్రు రోమ సయ్ నమ్ లోఇ ఉండ్రీ గుంపు ఆతి అవ్ గుస్తు ఇని గుంపుదికాన్.

2 మాపు అద్రమత్తియదాన్ వాతి ఉండ్రీ ఓడ: ఎక్కాపె పయ్ నం ఆతావ్. యా ఓడ: ఆసియ ప్రాంతమ్ దు సమ్ దరం డగ్రు మహి పట్నమ్ కాజ్ సానిక. దెసలోనిక పట్నమ్ దాన్ ఒరెన్ మసిదోని దేసమ్ దికాన్ అరిస్తర్ కు ఇనికాన్ మావెట మహాన్.

3 మహ్నా నాండిజ్ సీదోను ఇనిబాన్ వాతావ్. సతాతిపతి ఆతి యూలి పవులు మున్సు దయ తోరిస్తాండ్రె పవులు వన్ని కులబాబుర్ బాన్ సొన్ని వారు వన్నిజ్ నెగ్గెండ సుడ:దెజ్ సెల్వ సిత్తాన్.

4 వెనుక బాణిజ్ సోతాపె కుప్ర ఇని ద్వీపు ఓరమ్దాన్ గాలి తక్కు మహి బాడ్డిదు పయనం ఆతావ్. ఎందానిజ్ ఇహిజ ద్వీపుదాన్ గొప్ప గాలి సమ్దరం దరోట్ డెయ్జి మహాద్.

5 వెనుక మాపు కిలికియ, పంపులియ ఇని ప్రాంతమ్కాజ్ డగ్రు మహి సమ్దరం డాట్టాపె లుకియాదు మన్ని మూర ఇని పట్టుమ్దు వాతావ్.

6 బానె అలెక్సాంత్రియదాన్ వాతి ఉండ్రీ ఓడః ఇటలి పట్నం సాండ్రెజ్ తయారాత మనాద్ ఇజి రోమ సతాతిపతి సుడెఃతాన్. సుడెఃతండ్రె మజి అయ ఓడఃదు ఎకిస్తాన్.

7 మాపు నండో రోస్సు మెలేక పయనం కిత్తాపె గాలివందిజ్ మాలెజ్ ఆతాపె క్షీదు ఇని ద్వీపుదిజ్ ఎద్దు వాతావ్. గాలి మజి ఎద్దు డెయ్జిజ్ అయా సరి మరి సాండ్రెజ్ అట్ఎతావ్. అందెజె మాపు గాలి తక్కు డెయ్జిమహి బాడ్డిదాన్ సాహపె సల్మీను ఇని బాడ్డి డాట్టి క్రేతు ద్వీపు ఓరదాన్ పయనం కిత్తావ్.

8 గాలి డెయ్జిజ్ మాలెజ్ ఆజి, ఓరదాన్ పయనం కిత్తాపె నెగ్గిబాడ్డి ఇని కూక్కి జాగదు వాతావ్. దన్ని డగ్రు లుసెయ పట్నం మహాద్.

9 పయనం కిజినిజ్ నండో రోస్సు ఆతె. యూదురి పండోయ్ ఆతి ఉపాసి రోజుబా గడఃస్త సాహాద్. సమ్దరమ్దు ఓడఃదు సాండ్రెజ్ ప్రమాదమాని కాలం ఆత మహాద్. అందెజె పవులు వరిజ్ బుద్ది వెప్టాన్.

10 “బాబురాండె, మాటు ఏలు సొన్ని మహిజ ఓడఃదిజ్ని ఇబ్బై మన్ని సామానమ్కాజ్, ప్పు నష్టమ్కు, మరి మా పాణమ్కాజ్బా నష్టమ్కు వానాద్, ఇజి నాను నెస్సా”.

11 గాని అయ రోమ సతాతిపతి పవులు వెప్టా మాట అన్ఎండ, అయ ఓడః నడిపిసినివన్ని మాటెజ్ని అయ ఓడః ఎజుమాని మాటెజ్ అస్తాన్.

12 పిన్ని కాలమ్దు మండ్రెజ్ అయా బాడ్డి నెగ్గికాద్ ఆవిద్ ఇపాజ్ బాణిజ్ డిసి సోతెజ్ నండోండార్ వెప్టార్. క్రేతదు మన్ని పీనిక్కు ఇనిబాన్ అందిజి బానె పిన్ని కాలం గడఃప్పాట్ ఇజి వారు విజేరె ఒడిఃబితార్. యా పీనిక్కు పట్నం దనిణ పడఃమర, ఉస్సన్ పడఃమర దరోట్ మొకొం మప్టా మహాద్.

సమ్దరమ్దు ముసూర్ డెయ్జినాద్

13 దనిణ దరోటాణ్ ఉండ్రీ ఇజిరి గాలి డెయ్జిజ్ వారు సాండ్రెజ్ ఒడిఃబిత్తిలెకెండ సానాట్ ఇజి ఒడిఃబితారె, ఓడఃది లంగరు* లాగితారె సోత్తార్. క్రేతు ఓర దానె సొన్ని మహార్.

14 గాని సణెం వెనుక ఉస్సన్ తూర్పు దరోటాణ్ ఊరకులోన్† ఇని పెరి గాలి ద్వీపుదాన్ గొప్పజ్ డెయ్జాద్.

15 పెరి గాలి ఓడఃదిజ్ డెయ్జిజ్ గాలి ఎద్దు సాండ్రెజ్ అట్ఎండతాద్. అందెజె మాపు గాలి ఎద్దు సాండ్రెజ్ అట్ఎండతానె గాలి డెయ్జి మహి దరోట్టి ఓడః మప్టాపె సాహావ్.

16 వెనుక కంద ఇని ఉండ్రీ ఇజిరి ద్వీపు ఓరదాన్ సాహివలె అయ గాలి మా ముస్సు డెయ్జివండ అయ ద్వీపు మజి ముస్తాద్. నండో కస్టబాడిఃతాపె ఇజిరి ఓడఃదిజ్ ముస్సు లాగితావ్.

* 27:13 27:13 బరుమన్ని పణుకుదాన్ తయార్ కిత్తిక. గొలుస్కాణ్ తొప్పి ఓడఃదు ఇడ్వార్. సమ్దరమ్దు డిష్టిజి ఓడః బానె నిల్వై, సాన్విద్ † 27:14 27:14 ఊరకులోన్ ఇని తుపాన్ గాలి డెయ్జిజి ఓడః సాండ్రెజ్ గొప్ప కస్టమానాద్. అయ గాలి ఉస్సన్ తూర్పు దరోటాణ్ డెయ్జినాద్

17 మున్ను లాగితాపె నెగ్రెండ తొవ్తా ఇడ్తావ్. వెనుక పెరి ఓడఃదిజ్ పెరి నాసుదాన్ సుటులం గటిజ తొవ్తార్. మరి సుర్తిసు ఇని ఇన్ను మెటు మున్ను ఓడః డెయ్నాదీసు ఇజి తియెలాతారె ఓడః మెలేక సానీద్ ఇజి ఓడఃది సాపః డిఃవ్తారె గాలి డెయ్నిదరోట్ సానీద్ ఇజి డిఃస్తార్.

18 అయ ముసూర్ డిఃన్వీండ డెయ్జి మహిజ్ మహ్నా నాండిజ్ వారు ఓడఃదు మహి బరుజ్ నమ్దరమ్దు విసిర్దెజ్ మొదోల్స్తార్.

19 దన్ని మహ్నా నాండిజ్ వారు ఓడః నడపిసిని సెగం సామనమ్కు వరి సాంత కికాణిజ్ నమ్దరమ్దు విసిర్దార్.

20 నండో రోన్ను షొద్దు గాని సుక్కెజ్ గాని తోవీండ మహె. గాలి గొప్పజ డెయ్జి మహాద్. మా పాణమ్దిజ్ ఎలాగ గెల్పిస్తెజ్, మాపు సానాప్లెసు ఇజి తియెలాతావ్.

21 వారు నండో రోన్ను బోజనం కివీండ మహిజ్ పవులు వరి నడిఃమి నిహండ్రె వెప్తాన్, “బాబురాండె, మీరు నామాట వెంజిమంజినిక ఇహిజ నెగ్రెండ మహాద్ మరి. క్రేతుదాన్ సోవీండ మహిదెర్ మరి. సోవీండ మంజినిక ఇహిజ, యా నస్టమ్కు కస్టమ్కు జర్గివీండతాద్ మరి.

22 ఏలు ఇహిజ దయ్దరమ్దాన్ మండ్రు ఇజి నాను గటిజ వెహ్సిన. ఎందానిజ్ ఇహిజ మీలోఇ ఎయెన్బా సాజి సాన్ఇదెర్. గాని ఓడః ఉండ్రెనె పాడాఃన సానాద్.

23-24 ఎందానిజ్ ఇహిజ, షొదోయ్ నాను, ఎయె వాండ్రునో, ఎమేణి దేవుణుదిజ్ పార్లనం కిజిననో, అయ దేవుణు దూత నాబాన్ వాతండ్రె, ‘పవులు, తియెల్ అమ. నీను కయ్సరు రాజు ఎద్రు నిల్లెజ్వలె. దేవుణు కనికారమాతికాన్. నీవందిజ్ ఇదిలో నీ వెట మన్నివరి పాణమ్కు దేవుణు గెల్పిస్తాన్లై’ ఇజి వెప్తాన్.

25 అందెజె బాబురాండె, దయ్దరమ్దాన్ మండ్రు. ఎండనిజ్ ఇహిజ దూత నావెట వెప్తావజ జర్గినాద్ ఇజి నాను దేవుణు మాట నమ్మిజిన.

26 గాని మా ఓడః గాలిదు సాన్ని ఎంబెబా ఉండ్రె ద్వీపుదు పాడానాద్”, ఇజి పవులు వరివెట వెప్తాన్.

27 పదినాల్లి రోన్ను అద్రియ ఇని సమ్దరమ్దు మాపు ముసూర్దిజ్ అబె ఇబ్బె బూలాజి మహావ్. మదరయ్తు ఆతిజ్ ఎంబెనో ఉండ్రె దేసమ్ డగ్రు వాజినావ్ ఇజి ఓడః నడిఃపిసినివరిజ్ ఉదెసమ్దు వాతాద్.

28 అందెజె వారు ఇజిరి బరుదిజ్ తాడు తొహ్ని డిఃవ్తారె ఎసా లోతు మనాద్ ఇజి సుడఃతార్. నూట ఇర్వయ్ అడుఃగుజ్ లోతు మనాద్ ఇజి నెస్తార్. సెగం వెనుక మరి డిఃవ్తారె తొంబయ్ అడుఃగుజ్ లోతు మనాద్ ఇజి నెస్తార్.

29 మా ఓడః ఓరదు మన్ని పణుకుమున్ను తర్గినాదో ఇజి తియెలాతారె వారు ఓడః వెనుకపడఃకదాన్ నాల్లి లంగరుజ్ డిఃవ్తారె జాయ్ ఆనెండ పార్లనం కిజి మహార్.

30 ఇహిజ్, ఓడః నడిఃప్పికార్ ఓడః డిఃసి సాండ్రెజ్ సుడఃతార్. వారు ఓడః ముందాల్పడఃక మన్ని లంగరుజ్ డిఃప్పెజ్ ఇజి నాటిసి ఓడఃదు మన్ని ఇజిరి ఓడః సమ్దరమ్దు డిఃవ్తార్. ఇజిరి ఓడఃదు ఎక్సిసాండ్రెజ్ ఆలోసనం కిత్తార్.

31 పవులు అక్క నెస్తాండ్రె సదాతిపతివెట, “సయ్నమ్దివరివెట, యా ఓడః నడిఃపిసినికార్ ఓడః డిఃసి సానార్ ఇహిజ, మీరు తప్రె ఆదెజ్ అట్ఇదెర్”, ఇహాన్.

32 అందెజె సయ్నమ్దికార్ ఇజిరి ఓడః తొహ్నిమహి నాను కుతారె సమ్దరమ్దు డిఃస్త సితార్.

33 కోడిజామ్దు పవులు విజెరె వెట వెహ్లాన్, “ఏలు బోజనం కిదు, మీరు బోజనం కివండాజి పదినాల్లి రోస్కు ఆతె. నిస్సా రోస్కు మీరు మన్ను బాద ఆజి ఇనికబా ఉణెఎండ మహిదెర్.

34 అందెజె నాను బతిమాల్లిన, బోజనం కిదు. ఎందనిజ్ ఇహిజ మీరు సావంండ మండ్రెజ్ వలె ఇహిజ బోజనం కిదెజ్వలె. తియెలామాట్. మీలోఇ ఎయె బుర్రదాన్ బా ఉండ్రె కొప్పుబా రాలజి సాన్వద్ ఇహాన్.

35 ఈహు వెహ్లా వెనుక పవులు రొట్టె అస్తాండ్రె వారు సుడేజి మహివలె దేవుణుదిజ్ వందనమ్కు వెహ్లాండ్రె రొట్టె ముకెజ్ కితాండ్రె తిండ్రెజ్ మొదొల్స్తాన్.

36 వారు విజేరె దయరం ఆతారె బోజనం కిత్రార్.

37 అయ ఓడేదు మాపు మొత్తం రుండివందెజ్ డబయ్ ఆరు - మంది మణిసిర్ మహాప్.

38 వారు పొటవంజు ఉటి వీన్తి వెనుక గోదుముజ్ సమ్దరమ్దు విసిర్తారె ఓడే సుల్కాజ్ కిత్రార్.

ఓడే బదెజ్ ఆజినాద్

39 పొద్దు సొత్తిజ్ వారు అందితి దేసెం ఎంబెణి దేసెం ఇజి నెన్ ఏతార్ గాని ఓడే ఉండ్రె ఇన్కు మన్ని పడేకాద్ ఒతెజ్ తగితి ఉండ్రె నెగ్గి పడక సుడేతారె బాన్ ఒనాట్ ఇజి ఒడిబితార్.

40 అందెజె ఓడే నడిపిసినికార్ లంగరుజ్ తొహ్తామహి నాస్కుజ్ కుతారె సమ్దరమ్దు డిస్తార్. ఓడే నడిప్పి సుకానుజ్ కట్టుజ్ కుతార్. ముందాల్ పడేకాదు మహి సాప ఎకిస్తారె గాలి నెక్కి ఒనిలెకెండ్ ఒరదు నడేపిస్తార్.

41 గాని ఓడే ఏరులోఇ మన్ని ఉండ్రె ఇన్కు మెటుదు డేసె ఆతాదె ఓడే ముందాహిక ఇస్కాదు నాడితాద్. వెనుక పడేకాదు పెరి ఉల్కెజ్ డెయ్ తిజ్ ఓడే బదెజ్ బదెజ్ ఆత సాహాద్.

42 జెలిదాన్ ఒసి మహి లోకుర్ సమ్దరమ్దు ఈత డెయ్ జి తప్తె ఆజి సానార్ ఇజి తియెలాతారె వరిజ్ సప్తెజ్ సయ్ నమ్దికార్ ఆలోసనం కిత్రార్*.

43 గాని సతాతిపతి పవులు గిల్వెస్టెజ్ ఒడేబిజి సయ్ నమ్ది వరి ఆలోసనమ్దిజ్ సరి సివితాన్. ఈత డెయ్ జి నెస్సెవారు ముందాల సమ్దరమ్దు డిగ్జి గదె డాట్టి ఈత డెయ్ జి ఒరదు సొండ్రు ఇజి ఆడ్ర సిత్తాన్.

44 మహివరిజ్ బల్లెజ్ సెక్కెజ్ ఒడేది ముక్కెజ్ అసి ఒడ్డుదు సొండ్రెజ్ ఆడ్ర సిత్తాన్. ఈహా మాపు విజెపె గెల్స్తాపె ఒడ్డుదు అందితాప్.

28

మెలిత ద్వీపుదు అందిజినార్

1 మాపు తప్తె ఆతి వెనుక అయా ద్వీపు పేరు మెలిత ఇజి నెస్తాప్.

2 అయ ద్వీపుదికార్ మజి కిత్తి సాయం నిస్సా సనా ఆవద్. వారు సిసు ఎర్తారె మజి విజేరిజ్ కూడేస్తార్. ఎందానిజ్ ఇహిజ పిరు డెయ్ జి మొదొల్స్తిజ్ పిన్ని కితాద్.

3 పవులు ఉండ్రె కట రివెజ్ పెహ్లా తతాండ్రె దోస్తాన్. అక్క సిసుముస్కు అర్పివలె గొప్ప విసం మన్ని ఉండ్రె సరాన్ వేడిదిజ్ వెహ్కాణ్ వెల్లి వాతాదె పవులు కీదు కట్టాద్.

§ 27:40 27:40 ఓడే తిర్ప్పి ఇజిరి మర * 27:42 27:42 కర్మువారు తప్తె ఆతిజి వరిజ్ కాప్ కిని సయ్ నమ్ది వరిజ్ వరి అతికారి లోకుర్ సప్తెజ్ ఇజి రోమ రూలు మహాద్

4 పవులు కీదు సరాన్ దూజ్జిమహిక అయ ద్వీపుదికార్ సుడఃతిజ్ వారు ఒరెన్ వెట ఒరెన్ వర్గితార్, “నిజమ్నె, వీండ్రు లోకాజ్ నమ్మికాండ్రె, ఏలు సుడఃఅ, సమ్దరమ్దాన్ గెలిసి వాతాన్ గాని నాయం సీని దేవుణు విన్నిజ్ బత్కిదెజ్ సరి సిఎన్.

5 గాని పవులు అయ సరాన్దిజ్ సిసుమున్కు సుడఃతిజ్ అది సిసుద్ అర్తాద్. పవులుజ్ ఇనికబా ఆవతాద్.

6 ఆ ద్వీపుదు మనికార్ పవులు ఉబినాన్, సిలిజ వెటసె సానాన్ ఇజి ఒడిఃబిజి సుడఃజి మహార్. గాని వారు సుడఃజిమహిజ్ పవులు ఇనికబా ఆవతాద్. అందెజె వారు వరి మన్సు మారిస్తారె, ‘వీండ్రు ఒరెన్ దేవుణులెకెండ మన్నికాన్’ ఇజి వెహ్తార్.

7 అయ ద్వీపుది నెయ్కు ఆతి పొప్లి ఇనివన్నిజ్ బానె డగ్రునె బూమిజ్ మహె. వాండ్రు మజి వన్ని కూలెజి వజి మర్వాద్ సితండ్రె మూండ్రె రోన్కు వన్ని ఇండ్రె కూడుఃప్తాన్.

8 అయ నెయ్కు అపొసి నోబుదిజ్, మరి నెత్తెరెపొటదాన్ బాద ఆజి మహాన్. పవులు, వాండ్రు మహి గదిలోఇ సాహండ్రె పార్లనం కితాండ్రె వన్ని మున్కు కికు ఇడఃజి వన్నిజ్ నెగెండ్రె కితాన్.

9 ఇక జర్గితజ్ అయా ద్వీపుదు కన్డం అస్తిమహికార్ విజెరె బానె వాతారె నెగెండ్రె ఆతాన్.

10 వారు మజి నండ్రె ఇనాయమ్కు సితారె నెగ్గిక కితారె. వెనుక మాపు పయనమాతివలె మజి అవనరం మనికెజ్ విజు ఓడఃదు తత్తారె ఇత్తార్.

పవులు మెలిత ద్వీపుదాన్ రోమ పట్నం సొన్నినాన్

11 ముండ్రె నెలెజ్ ఆతి వెనుక అలెక్కంత్రియదాన్ వాతి ఉండ్రె ఓడః ఎక్రాపె పయనమాతావ్. అయ ఓడః పిన్ని కాలమ్దు మెలిత ద్వీపుదు మహాద్. కాస్తరు, పోలుక్కు ఇని జవల దెయమ్కాణి బోమ్మెజ్ ఆ ఓడః ముందాహిబాన్ మహాద్.

12 మాపు సురకూన్ ఇనిబాన్ వాతాపె బానె మూండ్రె రోన్కు మహావ్.

13 బాణిజ్ పయనమాతాపె సుటులం తిర్వజి రేగియు ఇనిబాన్ వాతావ్. ఉండ్రె రోజు వెనుక దసిణ దరోట్దాన్ గాలి డెయ్తిజ్ మహ్నా నాండిజ్ పొతియెలి ఇనిబాన్ వాతావ్.

14 బానె నమ్మితి వరిజ్ సెగెండ్రె సుడఃతావ్. ‘మాబాన్ వారం రోన్కు మండ్రు’ ఇజి వారు మజి బతిమాలితార్. దన్నివెనుక మాపు రోమ పట్నమ్దు వాతావ్.

15 రోమాదు మహి నమ్మితికార్ మాపు రోమాదు వాజినావ్ ఇజి కబ్బు వెహారె సెగెండ్రె రోమ పట్నమ్దాన్ అపియాదు* మహి సత దాక, మరి సెగెండ్రె మూండ్రె సత్రమ్కు† మహి బాడ్డిదాక మజి కూక్కి ఒతెజ్ వాతార్. పవులు వరిజ్ సుడఃతిజ్ దేవుణుదిజ్ స్తుతి కితాన్. వన్నిజ్ దయరం వాతాద్.

16 రోమ పట్నమ్దు అందితిజ్ పవులుజ్, వన్నిజ్ కావ్కిని జమానివెట ఉండ్రె ఆదు ఇండ్రె కేట మండ్రెజ్ సెలవ దోహ్కాద్.

పవులు రోమదు మన్ని యూదురిజ్ దేవుణు మాట వెప్పిన్నాన్

17 మూండ్రె రోన్కు సాహి వెనుక పవులు బానె మహి యూద పెద్దెల్జి వన్నిబాన్ కూక్పిస్తాన్. వారు కూడఃజి వాతివలె పవులు వరివెట వెహ్తాన్, “తంబెరిజాండ్రె, మా

* 28:15 28:15 అపియాదు మహి సత రోమ పట్నమ్దాన్ అరువయ్తొమ్మిది కిలో మీటర్ దూరం మహె

† 28:15 28:15 పయనం కినికార్ నిద్రదిజ్ సాని గదిజ్. మూండ్రె సత్రమ్కు మహి బాడ్డి రోమ పట్నమ్దాన్ యాబయ్ మూండ్రె కిలో మీటర్ దూరం మహె

లోకాజ్ వడెఱకెజ్ గాని, మా అనిగొగొరి అలవాటుజు వడెఱకెజ్ గాని ఇనికబా నాను కివిత. ఇహిజ్ బా, నజీ యెరూసలేమ్ దు అస్తారె రోమవరిజ్ ఒవజెష్టార్.

18 వారు నజీ గవర్నరుబాన్ తత్తారె నండొ ప్రస్నెజ్ వెన్ బాజి సుడెఱతివలె సావుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజీ డిఱెస్టెజ్ సుడెఱతార్.

19 గాని నజీ డిఱెస్టెజ్ యూదురు ఒప్పుకొడెఱవతార్. అందెజె నా సొంత లోకుమున్ను నజీ ఇని మొరొ సిల్లిజ్ బా కయ్ సరుబాన్ సొన్ని నావందిజ్ వెష్టాజ్ ఆత.

20 అందెజె నాను మిజీ సుడెఱదెజ్ మీ వెట వర్గిదెజ్ మిజీ కూక్ పిస్త. ఎందానిజ్ ఇహిజు ఇస్తాయేలు లోకు ఎయెవన్నివందిజ్ ఎద్రు సుడెఱజి మంజినారొ వన్నివందిజె నాను ఏలు యా గొలుస్కాణ్ తోహా ఆత మన్ను”, ఇజి వరివెట వెష్టాన్.

21 దన్నిజ్ యూదురు, “యూదయ ప్రాంతమ్ దు మన్ని మా లోకాణిజ్ మీవందిజ్ మజీ ఇని ఉత్తమ్ బారె వితాద్. ఇబ్బె వాతి మా లోకు ఎయెర్ బా మీ వందిజ్ ఇని సెఇ మాటబా వెహ్ వితార్. నీను ఇనికాదొ తప్పు కిత్తి ఇజి మాపు వెన్ వితామ్.

22 గాని యా సజతివందిజ్ మీ ఆలోసనం ఇనిక ఇజి వెండ్రెజ్ మాపు ఆస ఆజినామ్. ఎందానిజ్ ఇహిజు నీను కూడిఱి మహి యా జటువందిజ్ విజెరె లోకుర్ పగదాన్ వెస్పిన్ నార్ ఇజి మాపు నెసినామ్”, ఇహార్.

23 అందెజె వారు పవులు వెట పలాన్ రోజు కూడెఱదెజ్ ఏర్ పాటు కితారె పవులు బత్కినిబాన్ మంద ఆజి వాతార్. పవులు పెందాహాన్ అసి పొదొయ్ దాక నెగ్గెండ వరిజ్ వెస్పి దేవుణు ఏలుబడిఱి వందిజ్ వరివెట వెష్టాన్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తోరిసి, వాండ్రు వెస్పికెజ్ నిజమె ఇజి వెస్పి తోరిస్తాన్. వరిజ్ ఒవుకొడిఱెస్టెజ్ సుడెఱతాన్.

24 పవులు వెష్టా మాటెజ్ నెగొండార్ నమ్మితార్, మహికార్ నమ్మివితార్.

25 వారు ఒరెన్ వెట మరి ఒరెన్ వర్గిజి నెక్త పొక్తారె ఉండ్రె మన్ను ఆదెజ్ అట్ ఎండ్రెతారె మర్జి సాహార్. వారు మర్జి సొని ముందాల పవులు వరివెట ఉండ్రె మాట వెష్టాన్, “దేవుణు ఆత్మ యెసయ ప్రవక్త దాన్ మీ అనిగొగొరి వెట వెష్టా మాట నిజమె.

26 అక్క ఇనిక ఇహిజు, “నీను సొన్ని యా లోకాజ్ వెష్టు. ‘మీరు బాగ వెంజినెదెర్ గాని అర్దం కిదెజ్ అట్ ఇదెర్. బాగ సుడెఱజినెదెర్ గాని తోఇదెర్’.

27 ఎందానిజ్ ఇహిజు యా లోకురి మన్ను బేగి అర్దం కివెద్. వారు కణుకెజ్ గిబ్బిజ్ మూక్త మనార్. సిల్లిజ్ వారు కణకాణ్ సుడెఱతార్ మరి. మన్నుదు అర్దం కిత్రార్ మరి. నా దరోట్ మష్టాజు నాను వరిజ్ నెగెండ కిన”, ఇజి దేవుణు వెష్టాన్.

28 అందెజె దేవుణు రక్కుణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెస్టెజ్ వలె”.

29-30 రుండి పంటెజ్ పూర్తి పవులు ఉండ్రె ఇల్లు అదె లొస్తాండ్రె బత్కితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్రాన్.

31 దేవుణు ఏలుబడిఱి వందిజ్, ప్రబు ఆతి యేసుక్రీస్తు వందిజ్ దయ్ రమ్ దాన్, ఇని అడ్డు సిల్లెండ, నెస్పిస్తాన్.

అపొస్తుడు ఆతి పవులు రోమ పట్నమ్దు మన్ని దేవుణు సజమ్దివరిజ్ రాస్తి ఉత్రం.

నెల్వ కిబిసిని

యా ఉత్రం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మిత్తివరిజ్ యా ఉత్రం రాస్తికాన్. రాస్తి కాలం క్రీస్తుయేసు యా లోకమ్దు వాజి సిలువాదు సాజి, మర్రి నిజ్జి పరలోకమ్దు సాహివెనుక 56 సమస్తం నడిఃమి (ఏ.డి 55-56) రాస్ను మంజిన. యా ఉత్రమ్దు ముకెలమాతిక ఇనిక ఇహిజ, క్రీస్తువందిజ్ వెహ్ని సువార్త. సువార్త ఇహిజ ఇనిక, సువార్త నమ్మిత్తివరిజ్ ఇనికెజ్ జర్గినె, వినకవందిజ్ రాసినాన్. మరి, దేవుణు లోకురిజ్ నీతినిజయ్తి మన్నికార్ ఇజి ఎలాగ ఇడ్డినాన్, ప్రబు ఆతి యేసుక్రీస్తువలెహాన్ ఎలాగ విడుదల వానాద్ నన్ని సజతిజ వందిజ్ రాసినాన్.

1 క్రీస్తుయేసుజ్ పణి కినికానాతి పవులు ఇని నాను యా ఉత్రం రాసిన. సువార్త వెహ్లాజ్ దేవుణు నజి అపొస్తుడుజ వజ నిల్హాన్.

2 సీన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మహివలెనె, దేవుణు మాటెజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెహ్ని ఇజి ఒవందం కిత్త మహాన్.

3 దేవుణు మరిసి వందిజె యా సువార్త. వీండ్రు లోకు వజ దావీదు రాజు తెగాదు పుట్టికాన్.

4 వీండ్రు దేవుణు వజ ఇహిజ, దేవుణు మరిసి ఇజి గొప్ప సత్తుదాన్ తోరె ఆతాన్. ఎలాగ ఇహిజ, వాండ్రు సాతి వరిబాణిజ్ మరజి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్మమ్దాన్ అపొస్తుడు వజ దేవుణు నజి కూక్తాన్. ఎందానిజ్ ఇహిజ, విజు జాతిదికార్ క్రీస్తుముస్కు నమకం ఇడ్డి, వన్నిజ్ మాడిసి, వన్నిజ్ లోజిజి మండ్రెజ్ ఇజి.

6 రోమ పట్నమ్దు యేసు క్రీస్తుజ్ నమ్మిత్తికార్ ఆతి మీరుబా దేవుణు కూక్తి వరి లోఇ మన్నిదెర్.

7 దేవుణు ప్రేమ కిజి, వన్నిజ్ కేట ఆతి మిజి విజేరిజ్ నాను యా ఉత్రం రాసిన. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమ్ని నిపాతి మిజి మనీద్ ఇజి నాను పార్దనం కిజిన.

రోమ పట్నమ్దు మన్ని నమ్మిత్తివరిజ్ సాన్ని సుడెదెజ్ పవులు కోరిజినాన్

8 యా ఉత్రమ్దు తొలిత నాను మీరు విజిదెరె వందిజ్ దేవుణుదిజ్ వందనమ్కు వెహ్నిన. యేసు ప్రబువలెహాన్ నమ్మిత్తి దన్నివందిజ్ రోమ దేనమ్దికార్ ఏలుబడిః కిని విజు బాడ్డిదు మన్ని లోకుర్ వెహ్నినార్.

9-10 నాను ఎస్తివలెబా పార్దనం కినివెలె మీ వందిజ్ వెహ్నిని సువార్త పూర్తి మన్నుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెదెజ్ దేవుణు సిత్రం ఆదెజ్ ఇజి పార్దనం కిజిన.

11 ఎందానిజ్ ఇహిజ, మిజీ వాజి సుడఃజి దేవుణు వందిజ్ బత్కిని బత్కుదు మిజీ దయరం కిబిస్తైజ్ ఇజి ఆస ఆజిన.

12 ఎలాగ దయరం కిబిస్తైజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెహైజ్ వెలె.

13 నమ్మితి తంబెరిజాండె, నాను నండొ సుట్కు మిజీ సుడః వాదెజ్ ఇజి ఆలోసనం కిత్త ఇజి మీరు నెస్తైజ్ వెలె. గాని అట్ఎండ ఆత. ఎందానిజ్ ఇహిజ, నండొ అడ్డుజ్ వాతె. మీ బాన్ వాజి మిజీ సుడఃతిజ మీ బాణిజ్ మజీ గొప్పు లాబం వాని లెకెండె. ఎందానిజ్ ఇహిజ మీ నన్ని నండొ జాతిజ నడిఃమి నాను సొని లెకెండె మీ నడిఃమిబా నాను వాజి సువార్త వెహైజె ఇజి. సువార్త వెంజి నమ్మిజి దేవుణు కొణ్ణోర్ ఆనార్.

14 యూదురు ఆఇ వరిజ్ విజేరిజ్ సువార్త వెహైజ్ నాను ఉండ్రీ అప్పు మన్నికాన్. గ్రీకు బాస నెస్తి వరిజ్ బా, నెన్ ఇ వరిజ్ బా, పెరి సదువు మన్ని వరిజ్ బా, సదువు సిల్లి వరిజ్ బా వెహ్పి సీదెజ్ ఇజి నజీ ఉండ్రీ అప్పు మనాద్.

15 అందెజె, రోమ పట్టుమదు మన్ని మిజీబా యా సువార్త వెహైజ్ ఇజి నాను గొప్పు ఆస ఆత మన.

16 ఎందానిజ్ ఇహిజ, నాను సువార్త వెహైజ్ సిగు ఆవి. యేసుక్రీస్తు ముస్కు నమకం ఇడ్డి విజేరిజ్ వరి పాపమ్ కాణిజ్ రక్సిస్తైజ్ యా సువార్తదిజ్ దేవుణుబాణిజ్ ఒద్దె సత్తు మనాద్. యా సువార్త తొలిత యూదురిజ్ వెనుక ఆఇ జాతిజ సాటి ఆజినాద్.

17 యా సువార్తదు దేవుణు ఇనిక వెహ్పినాన్ ఇహిజ, లోకు కిత్తి తప్పు పణిజ వందిజ్ వారు సిక్కి పొందిదెజ్ అక్కర్ సిల్లెద్ ఇజినె. వారు యేసుప్రబు ముస్కు నమకం ఇడ్డి వందిజె సిక్కిదాన్ తప్పె ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండెనె. “ఎయెర్ నీతినిజయ్తికాన్ ఇజి నాను ఇడ్డ మనానో, వాండ్రు నా ముస్కు నమకం ఇడ్డి వందిజ్ ఎలాకాలం బత్కినాన్”.

దేవుణు లోకుర్ ముస్కు నండొ కోపం ఆజినాన్

18 దేవుణువందిజ్ మన్సు సిల్లి లోకాజ్ విజేరిజ్ సెఇపణి కిని విజేరిజ్ దేవుణు సిక్కి సినాన్ ఇజి పరలోకమ్దాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజ్ నెస్తిమన్ని నిజమాతికెజ్ విజా వారు అడ్డు కిజినార్.

19 దేవుణు వందిజ్ నిజమాతికెజ్ అర్లం కిదెజ్ వారు అట్వార్. ఎందానిజ్ ఇహిజ, దేవుణు ఎలాగమర్తికాన్ ఇజి వాండ్రు విజేరిజ్ తోరిస్త మనాన్.

20 మాపు దేవుణుదిజ్ నెన్ ఏవ్ ఇజి ఎయెన్ బా వెహైజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్తికాన్ ఇజి మాటు సుడఃదెజ్ సిల్లె, గాని వాండ్రు లోకం తయార్ కిత్తిబాణిజ్ అసి లోకమ్దు తయార్ కిత్తి వనకబాణిజ్ వాండ్రు ఎలాగ మర్తికాన్ ఇజి ఎలాకాలం మన్ని వన్ని పెరిసత్తు ఎలాగమర్తిక ఇజి మాటు సుడఃజినాట్. అందెజె దేవుణుదిజ్ నెన్ ఏవ్ ఇజి ఎయెన్ బా వెహైజ్ వీలు సిల్లెద్.

21 యూదురు ఆఇకార్, దేవుణు ఎలాగ మర్తికాన్ ఇజి నెస్తిజ్ బా దేవుణు ఇజి మాడిఃస్ ఎర్, వాండ్రు కిత్తి దన్నివందిజ్ వందనమ్కు వెహ్ ఎర్. నస్తివలె వారు దేవుణు వందిజ్ అర్లం కిదెజ్ అట్ఎండ ఆతారె. వరి ఆలోసనమ్కు సెఇకెజ్ ఆతె.

22 వారు బుద్ది మన్నికార్ ఇజి వెహె ఆజి బుద్ది సిల్లి పణిజ్ కిత్తార్.

23 ఎలాకాలం మంజిని దేవుణుడిజ్ పొగడిజిజనగవరం సివిండ బొమ్మెజు పొగడిజి గవరం సిత్తార. సబ్బిసాని లోకులెకెండ, పొటిజ్ లెకెండ, జమతుజ్ లెకెండ, మరి బూమి ముస్సు ఊజి బూలాని వనకాజ్ లెకెండ తోర్ని బొమ్మెజు తయార కిత్తారె వనకాజ్ పొగడిజి గవరం సిత్తార.

24 అందెజె వారు, కిదెజ్ ఆజ ఆసిజ్ వరి మన్నుదు పుట్టి లెకెండ కిదెజ్, దేవుణు వరిజ్ సరి సిత్తాన్. ఇనిక ఇహిజు వారు వరిజె సుగు ఆతి సెఇ పణిజ్ కిత్తార.

25 ఎందానిజ్ ఇహిజు, నిజమాతి దేవుణు వందిజ్, నిజమదిజ్ డిస్తారె నిజం ఆజ దన్నిజ్ ఇత్తార. విజు దన్నిజ్ పుటిస్తికాన్ ఆతి ఒరెండె దేవుణుదిజ్, మాడిసి వన్నిజ్ లోజిఎండ, దేవుణు పుటిస్తి వనకాజ్ మాడిస్తార, వనకాజ్ లోజిత్తార. గాని పుటిస్తికెజ్ విజు అయ దేవుణుదిజె ఎస్తివలెబా మాడిస్తెజ్ వెలె.

26 అందెజె సిగు ఆతి ఒడోల్ ఆసెజు వందిజ్ దేవుణు వరిజ్ ఒపజెస్తాన్. అందెజె వరిలోఇ అయ్లికొడోక్ మాసిరిజ్ సాన్విండ అయ్లికొడోకాజ్ దరోట్ ఒడోల్ ఆస ఆజి మస్తా.

27 అయావజనె యూదురు ఆఇవరి లోఇ మొగకొడోర్ అల్లికాజ్ ఇడవిండ మొగకొడోర్ దరోట్ ఏక ఉత్పుత్ ఆజి మస్తార. వారు మొగకొడోర్ వెట సిగు ఆతి పణిజ్ కిత్తార. అయ ఒద్దె తప్పు ఆతి పణిజ్ వరిజ్ తగితి సక్స ఆజి వరిముస్సు వాతాద్.

28 వారు దేవుణుదిజ్ నెకపాకారె వన్ని వందిజ్ నెస్తిమన్ని నిజమాతికెజ్ విజు డిస్తసిత్తార. నస్తివలె వరి సెఇ బుద్దిదు నడిదెజ్ ఇజి దేవుణు వరిజ్ డిస్తసిత్తార. అందెజె సరి ఆజ పణిజ్ కిదెజ్ వరి బుద్ది మస్తాద్.

29 విజు రకమ్కాణి సెఇ పణిజ్ కిదెజ్ వారు ఏక ఒడోబినార. ఇనికెజ్ ఇహిజు, మహి వరిజ్ సెడ్డ కిదెజ్, మహివరిజ్ మన్నికెజ్ మజి దొహ్కెజ్ ఇజి సెఇ ఆస ఆదెజ్, ఎలాగబా మహివరిజ్ సెఇక కిదెజ్, మహివరి వెట గోస ఆదెజ్, సప్తెజ్, గొడోబ కిబిస్తిజ్, మొసెం కిదెజ్, మహివరివందిజ్ సెఇకెజ్ వెప్తెజ్, సాండి వెప్తెజ్.

30 నండో లోకుర్ మహివరివందిజ్ తప్పుజ్ వెహిసనార. నండోండార్ దేవుణు ఎద్దు వెత్తేకం కిజినార, ఆఇవరిజ్ సిగు కిబిస్తార, గర్త ఆజినార, పొజిజనికార్ ఆజినార, మరి రెకరకమది కొత్త సెఇపణిజ్ ఎలాగ కిదెజ్ ఇజి సుడోజినార, వరి కొడోర్ అయ్సి అప్పొసిరిజ్ లోజివర్.

31 వారు అర్థం కిదెజ్ అట్వర్. ఒపందం కిత్తిలెకెండ కివర్. నండోండార్ వరి సాంత ఇండ్రోణివరిజ్ నెగెండ తోవర్. నండోండార్ కనికారం సిల్లికార్ ఆజినార.

32 నిన్ని పణిజ్ కనివరిజ్ సప్తెజ్ వలె ఇజి దేవుణు వెప్తా మనాన్ ఇజి నెస్తిజ్బా వారు నిన్ని సెఇ పణిజ్నె కిజి మంజినార. అక్కాదె ఎవిండ నిన్ని సెఇ పణిజ్ కనివరిజ్ వారు డగ్గు కిజినార.

2

దేవుణు సరియాతి తీర్పు తీరిస్తాన్

1 మహికార్ తప్పు కినికార్ ఇజి మీరు వెహిస వరిముస్సు తీర్పు తీరిసినిదెరా? ఆహె వెప్తాజ మీరు మిజీనె తప్పు కినికెదెర్ ఇజి వెహిసనిదెర్. మాపు తప్పు కిఇకాప్, ఇజి వెప్తాజ్ మీరు అట్ఇదెర్. ఎందానిజ్ ఇహిజు, మీరుబా వరిలెకెండ తప్పు కినికెదెర్.

2 తప్పు కిని యూదురు ఆఇవరిజ్ దేవుణు తీర్పు తీరిస్సివలె వరిజ్ సరియాతి తీర్పు తీరిస్సాన్ ఇజి మాటు నెసినాట్.

3 అందెజె ఆఇ లోకుర్ పాపం కినికార్ ఇజి వెప్పిని మీరు అయ పాపమ్కునె కిజి మహిజ దేవుణు తీర్పుదాన్ తప్పె ఆఇదెర్ ఇజి నెస్టెజ్వెలె.

4 దేవుణు మీవెట వన్ని గొప్ప విలువాతి దయ, కనికారం తోరిసినాన్. అక్క మీరు ఇజిరి కణకదాన్ సుడఃజినిదెరా? దేవుణు మీవెట తోరిసిన కనికారం మీరు పాపమ్కు బప్పుకొడఃజి డిఃసినీని వందిజ్నె ఇజి మీరు నెన్ఇదెరా?

5 గాని మీరు మీ మన్నుదు గొప్ప గర్త ఆజి పాపమ్కు బప్పుకొడఃజి డిఃసినీనిండ మహిజ దేవుణు తీర్పు కిని రోజుదు మీ ముస్సు, సిక్స నండొ కుంబ కిజినిదెర్. దేవుణు విజు లోకురిజ్ ఉండ్రె లెకెండ తీర్పు కిని దినమ్దు మిజిబా తీర్పు కినాన్.

6 దేవుణు ఒరెన్ ఒరెన్ వన్నిజ్ వారు కిత్తి పణిజ తగితిక మర్ది సినాన్లె*

7 దేవుణుబాణిజ్ జాయ్ని గవరం, సావు సిల్లి బత్తు దొహ్కెజ్ ఇజి డిఃసినీనిండ నెగ్గి పణిజ్ కిజి మహివరిజ్ దేవుణు ఎలాకాలం బత్తిని బత్తు సినాన్.

8 గాని నజి నానె నెగెండ మండ్రెజ్ ఇజి సుడఃజిని వరిజ్, దేవుణు వెప్పిని నిజమాతి మాటదిజ్ డగ్గు కివిండ ఒద్దె నెఇపణిజ్ కినివరిజ్, దేవుణుబాణిజ్ గొప్ప కోపం వానాద్.

9 పాపం కిజి నె మంజిని ఒరెన్ ఒరెన్ వన్నిజ్ బాదెజ్ వానె. కష్టమ్కు వానె. నన్ని కష్టమ్కు యూదురుజ్ మొదొల్లినె. వెనుక యూదురు ఆఇ వరిజ్ వానె.

10 గాని నెగ్గి పణిజె కినివరిజ్ దేవుణు వన్ని గొప్ప జాయ్ని గవరం, సాంతి సినాన్. ముందాల యూదురిజ్ని వెనుక యూదురు ఆఇ వరిజ్ సినాన్.

11 ఎందానిజ్ ఇహిజ, దేవుణు లోకాజ్ తీర్పు కినివలె తేడ తొవిండ తీర్పు కినాన్లె.

12 విజెరె లోకుర్ పాపం కిత్తిజ్ విజెరిజ్ సక్స వానాద్. దేవుణు మోసెజ్ సిత్తి రూలుజ్ వందిజ్ యూదురు ఆఇకార్ నెన్ఏతార్. అందెజె “మీరు ఎందానిజ్ రూలుజ్ లోజిఇతిదెర్?”, ఇజి వరివెట వెహ్ఏన్. దేవుణు మోసెజ్ సిత్తి రూలుజ్ నెస్సి యూదురుజ్ సిక్సినీదెజ్ దేవుణు తీర్పు కినాన్. ఎందానిజ్ ఇహిజ వారు రూలుజ్ లోజిఏతార్.

13 సీతినిజయ్త్వాన్* ఎయెన్ ఇహిజ, దేవుణు రూలుజ్ వెహికాన్ ఆవన్, అయ రూలుజ్ లోజిత్తికాండ్రె.

14 దేవుణు యూదురిజ్ సిత్తి రూలుజ్ యూదురు ఆఇవరిజ్ సివితాన్. అహిజ్బా వారు అయ రూలుజ్ వజ బత్తిత్తిజ్, అయ రూలుజ్ వారు నెస్తమనార్ ఇజి మాటు నెసినాట్. అయ రూలుజ్ వరిజ్ సిల్లు గాని మన్సిలెకెండ వారు నడిఃజినార్.

15 అయ రూలుజ్ వరి మన్నుదు ఇడె ఆతె మన్నె ఇజి వరి పణిజాణ్ తోరిసినార్. ఒరెన్ నెగ్గి పణిజ్ కిత్తిజ్బా సెఇ పణిజ్ కిత్తిజ్బా అక్కెజ్ నెగ్గికెజ్, సెఇకెజ్ ఇజి వన్ని మన్నుదు నెసినాన్. అహె దేవుణు సిత్తి రూలుజ్ వన్ని బుద్దిదు మన్నె.

16 లోకుర్ వరి మన్నుదు ఎయెరిజ్ నెన్ఏండ ఇడ్డిమన్ని ఆలోసనమ్కు వందిజ్బా, దేవుణు తీర్పు కిని రోజుదు తీర్పు సినాన్. యేసు క్రీస్తు వెట యాకెజ్ విజు జర్గిజినె ఇజి నాను వెప్పిని సువార్తదు మనాద్.

దేవుణు మోసెజ్ సిత్తి రూలుజ్ వజ నడిఃనికాప్ ఇజి వెప్పిని యూదురువందిజ్

* 2:6 2:6 కీర్తన 62:12; సామెత 24:12.

* 2:13 2:13 దేవుణు ముస్సు, నమకు ఇడ్డి మన్ని పాపమ్కు

దేవుణు మాయిప్తాన్.

17 ఏలు యూదురు ఆతి మిజీ ఉండ్డి మాట నాను వెహ్ను. మాపు యూదుర్ ఇజి మీరు వెహ్నినిదెర్. దేవుణు మోసెజ్ సిత్తి రూలుజ్ వజ నడిఃజినికావ్, అందెజె దేవుణు తిర్పుదాన్ తప్రు ఆదెజ్ ఆనావ్, ఇజి మీరు ఒడిఃబిజినిదెర్. దేవుణు కొడొర్ ఇజి పొగ్డిః ఆజినిదెర్.

18 దేవుణుదిజ్ ఇస్టమాతిక ఇనిక ఇజి మీరు నెస్సిదెర్. దేవుణు రూలుజు వందిజ్ నెగెండ నెస్తిజ్, డగ్రు కిదెజ్ విజు దన్నిజ్ మిస్సి విలువాతికెజ్ ఇనికెజ్ ఇజి మీరు నెస్సిదెర్.

19 గుడ్డివరిజ్ సరి తోరిసి నడిఃపిసిని వరిలెకెండ, యూదురు ఆఇవరిజ్ సరియాతి సరి వెహ్ని నడిఃపిస్తెజ్ అట్నూప్ ఇజి మీరు వెహ్నినిదెర్. సీకటిదు నడిఃపిసి వరిజ్ జాయ్ తోరిసిని వరిలెకెండ మీ మాటెజాణిజ్ యూదురు ఆఇవరిజ్ దేవుణు సరి తోరిసినిదెర్ ఇజి వెహ్నినిదెర్.

20 బుద్ది సిల్లివరిజ్, యూదురు ఆఇవరిజ్ నెస్సిస్తెజ్ అట్నూప్ ఇజి మీరు ఒడిఃబిజినిదెర్. కొడొర్ లెకెండ మన్నివరిజ్, ఇహిజు దేవుణు వందిజ్ నిజమాతికెజ్ నెన్ఇ వరిజ్ నెస్సిస్తెజ్ అట్టికావ్ ఇజి ఒడిఃబిజినిదెర్. ఎందానిజ్ ఇహిజు, రాస్తిమన్ని దేవుణు మాటదు మన్ని విజు వనకాజ్ ఇంక ఒద్దె విలువాతి గెణం మరి నిజమాతి మాట మీబాన్ మనాద్గదె.

21 మహివరిజ్ నెస్సిసిని మీరు, మిజి మీరె నేర్పె ఆఇదెరా? డొజ కిమాట్ ఇజి గటిజు వెహ్నిని మీరు డొజ పణి కిజినిదెరా?

22 రంకు బూలాదెజ్ ఆవద్ ఇజి వెహ్నిని మీరు రంకు బూలాజినిదెరా? దెయమ్కాజ్ డిఃస్తి సిత్తి మీరు దెయమ్క గుడిఃదికెజ్ డొజ కిజినిదెరా?

23 దేవుణు రూలుజ్ మాబాన్ మన్నె ఇజి వెహ్ని మీరు అయా రూలుజు లోజిఎండ దేవుణుదిజ్ సిగు తపిసినిదెర్.

24 “మీరు ఈహు కిత్తిజ్ దేవుణు పేరు యూదురు ఆఇకార్ దూసినినార్”, ఇజి దేవుణు మాటదు రాస్తి మన్నిక, మీ వందిజ్బా రాస్తి లెకెండెనె.

25 దేవుణు మోసెజ్ సిత్తి రూలుజ్ వజ మీరు నడిఃజినిదెర్ ఇహిజు మీరు సునతి ఆతి వందిజ్ మిజి లాబం మనాద్. గాని దేవుణు సిత్తి రూలుజు మీరు లోజిఇతిజు మీరు దేవుణు లోకుర్ ఇజి తోరిస్తెజ్ సునతి కిబె ఆఇ యూదురు ఆఇవరిలెకెండ మీరు.

26 అయావజునె, సునతి కిబె ఆఇతిజుబా దేవుణు సిత్తి రూలుజు వజ నడిఃని యూదురు ఆఇకార్ వన్ని సొంతలోకుర్ లెకెండ వాండ్రు ఇడ్నాన్గదె.

27 సునతి కిబె ఆఇకార్ గాని దేవుణు రూలుజు లోజిని మిజి తీర్పు కినార్. ఎలాగ ఇహిజు, మిజి రూలుజు విజు రాస్తి మహిజ్బా, సునతి కిబె ఆతిజ్బా అయా రూలుజు లోజిఇతిజ్ యూదురు ఆఇకార్ మిజి తీర్పు కినార్.

28 దేవుణు లోకుర్ ఇజి తోరిస్తెజ్ ఇనికాదొ అలవాటుజ్ లెకెండ కినికాన్, నిజమాతి యూద వాండ్రు ఆవన్. దేవుణు లోకుర్ ఇజి తోరిస్తెజ్ మీ ఒడిఃలదిజ్ ఇనికాదొ కిత్తిజు దేవుణు ఒపుకొణాన్ ఇజి ఒడిఃబిమాట్.

29 గాని, నిజమాతి యూద వాండ్రు ఎయెన్ ఇహిజు, మన్ను మారిస్తికాండ్రె నిజమాతి యూద వాండ్రు. దేవుణు ఆత్మదాన్ మన్ను మారిస్తికారె దేవుణు లోకుర్. దేవుణు లోకుర్ ఆదెజ్ ఇజి మరి ఇనికబా కిదెజ్ ఆవద్. నన్ని వరిజ్ లోకుర్ పొగ్డిఃఇతిజ్ గాని దేవుణు వరిజ్ పొగ్డిఃనాన్.

3

దేవుణు నమ్మిదెజ్ తగ్గికాన్.

1 అహిజ, యూద వాండ్రు ఇజి ఇని లాబం మనాద్? సునతి కిబె ఆతికాన్ ఇజి ఇని లాబం మనాద్ ఇజి మీరు వెప్పొదెరెను?

2 దన్నిజ్ నాను వెప్పొని విజు సజతిజలోఇబా గొప్ప లాబమనె! ఎలాగ ఇహిజ, దేవుణు వాండ్రు కిత్తిమన్ని ఒవందమ్కు మన్ని వన్ని మాటెజ్, ముజుల మా అనిగొగొరుజ్ నె సిత్రాన్.

3 అహిజ, యూదురు నండొండార్ దేవుణుదిజ్ నమ్మిదెజ్ తగ్గికార్ ఆవితార్. వారు నమ్మిదెజ్ తగ్గికార్ ఆజతిజ్, దేవుణు వాండ్రు వెప్తాలెకెండ కివీన్ ఇజి వెప్పొనిదెరా?

4 నాను వెప్పొ, ఆహె ఇండ్రెజ్ ఆవిద్. దేవుణు వెప్తాలెకెండ వాండ్రు కినాన్. లోకుర్ దేవుణు వెట వెప్తాలెకెండ కిఎండ అబద్దం వెప్తొకార్ ఆతిజ్బా, దేవుణు నిజమనె వెప్పొన్. దావీదు రాజు దన్నివందిజ్ కీర్తన పుస్తకమ్దు ఈహు రాస్త్ర మనాన్. దేవుణు ఈహు వెప్తొన్, “నీను వర్తినివలె నీ మాటెజ్ నిజమాతికెజ్ ఇజి లోకుర్ వెప్పొన్. లోకు నీ ముస్సు నేరం మొప్పెజ్ సుడఃజినివలె వారు గెలిస్తెజ్ అట్వండానార్లే*.

5 మాటు తప్పు కినివలె దేవుణు మా పాపమ్కు సెమిసి వాండ్రు నీతినిజయ్లు మన్నికాన్ ఇజి ఒద్దె తోరిసినాన్. అందెజె మాటు తప్పుజ్ కిత్తివందిజ్, మజి సిక్కు సిత్తిజ దేవుణు నాయం కినికాన్ ఆవీన్ ఇజి వెప్పొకార్ మనార్.

6 ఆహె ఇండ్రెజ్ ఆవిద్. ఎందానిజ్ ఇహిజ దేవుణు నాయం కినికాన్ ఆవీన్ ఇహిజ, విజేరె లోకాజ్ తీర్పు కిదెజ్ మన్ని అతికారం ఎలాగ మంజినాద్.

7 ఎయెన్బా, “నాను తప్పు వెప్తా”, ఇజి వెప్పొన్సు. గాని నాను తప్పు వెప్తా ఇహిజ దేవుణు నిజమనె వెప్పొనాన్ ఇజి తోర్జినాద్. అందెజె లోకుర్ దేవుణుదిజ్ పొడడిఃనార్. అహిజ దేవుణుదిజ్ పొగ్డు వానివలె నాను తప్పు కిత్తిదన్నిజ్ దేవుణు నజి తీర్పు సీజి సిక్కు సీదెజ్ ఆవిద్ ఇజి మీరు వెప్పొదెరెను.

8 అయాలెకెండ వెప్పొక నిజం ఇహిజ, దేవుణు పొగ్డః ఆపిన్ ఇజి మాటు పాపం కిజి మండ్రెజ్నా? నానుబా ఈహు వెప్పొన్ ఇజి సెగొండార్ తప్పు మొప్పినార్. ఈహు వెప్పొవరిజ్ దేవుణు తీర్పు తీరిసి తగితి సిక్కు సీనాన్.

దేవుణు ఎద్దు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెప్పొట్? మాటు యూదురు, యూదురు ఆఇవరిజ్ ఇంక పెరికాటా? ఆవట్. యూదురిజ్ని యూదురు ఆఇవరిజ్ విజేరిజ్ దేవుణు తీర్పు కినాన్ ఇజి నాను వెప్తాగదె. ఎందానిజ్ ఇహిజ, పాపం విజేరిజ్ అడిగి ఇడ్డినాద్.

10 దేవుణు మాటదుబా దిన్ని వందిజ్ రాస్త్రమనాద్. ఇనిక ఇహిజ, “ఎయెన్బా నీతి మన్నికాన్ ఆవీన్, నీతిమన్నికాన్ ఒరెన్బా సిల్లెన్”.

11 సరియాతి ఇనిక ఇజి అర్దం కినికాన్ ఒరెన్బా సిల్లెన్. దేవుణుదిజ్ నెస్తెజ్ ఇజి రెబానికాన్బా సిల్లెన్.

12 విజేరె ఉండ్రెలెకెండ సెఇపణిజ్ కినికార్ ఆతారె దేవుణుబాణిజ్ ముప్తా సొహార్. సరియాతి పణి కినికార్ ఎయెర్బా సిల్లెర్. ఒరెన్బా సిల్లెన్*,”

* 3:4 3:4 కీర్తన 51:4. * 3:12 3:12 కీర్తన 14:1-3; 53:1-3.

13 “లోకుర్ మాటెజ్ ఎలాగ మన్నె ఇహిజ, పీనుగుదిజ్ మూస్తి వెనుక మర్రి లాగితిజ ఎలాగ కంపు డెయ్నాదొ, అయాలెకెండెనె. మాటెజాణిజె మొసం కిజినార్[☆]. సరాస్తి ఏసం లోకాజ్ ఎలాగ పాడె: కినాదొ అయాలెకెండెనె వారు మాటెజాణిజ్ పాడె: కినార్[☆].”

14 “వారు ఆఇవరిజ్ స్యివ్ కిజినె మంజినార్. ఆఇవరిజ్ దూసిసినార్.”[☆]

15 లోకాజ్ సప్తెజ్ వరిజ్ సులునె వానాద్.

16 వారు సొనిబాన్ విజు నాసనం కిజినార్, లోకాజ్ గొప్ప కస్టమ్కు తపిసినార్.

17 ఆఇవరి వెట సమాదనమ్దాన్ బత్కిదెజ్ ఎసిజ్బా నెన్వర్.”[☆]

18 వరి మన్నుదు దేవుణు ఇహిజ ఇని తియెల్ సిల్లికార్.

19 దేవుణు మాటాదు రాస్తిమున్నికెజ్ విజు దేవుణు ఎయెరిజ్ వన్ని రూలుజ్ సిత్తాండ్రొ వరివందిజె ఇజి మాటు నెసినాట్. అందెజె యూదురు గాని యూదురు ఆఇకార్ గాని మా పాపమ్క వందిజ్ దేవుణు ఎద్రు ఇనికబా వెహ్విండ మంజినాట్. విజెరె తప్పుకిత్తికార్ ఇజి దేవుణు వెహ్సినాన్.

20 దేవుణు మోసెజ్ సిత్తి రూలుజ్ వజ కిత్తిదన్నివందిజ్ దేవుణు ఎయెరిజ్బా నీతినిజయ్తికాన్ ఇజి వెహ్ఎన్. ఎందానిజ్ ఇహిజ దేవుణు రూలుజ్ నెస్తిమహిజ్బా మాటు ఎస్సానొ తప్పుజ్ కిత్తికాట్ ఇజి నెస్త మనాట్.

క్రీస్తుముస్కు నమకం ఇడ్డికాండ్రె నీతిమన్నికాన్ ఆనాన్.

21 గాని లోకుర్ దేవుణు ఎద్రు ఎలాగ నీతినిజయ్తికార్ ఆదెజ్ అట్నార్ ఇజి దేవుణు ఏలు మరి ఉండ్రె సుటు తోరిస్త మనాన్. మోసెజ్ సిత్తి రూలుజ లొజిత్తివలెహ్ఎన్ ఆవద్. గాని దిన్నివందిజ్ మోసెజ్ సిత్తి రూలుదు మరి ఒరెన్ దేవుణు ప్రవక్తరు రాస్తి మాటెజ లొఇబా తోరిస్త మహాద్.

22 యేసుక్రీస్తు ముస్కు నమకం ఇడ్డివరి పాపమ్కు విజు దేవుణు మాయిప్తాన్. దేవుణు సుడె:తిజ యూదురుని యూదురు ఆఇకార్ ఇజి తెడె: ఇనిక సిల్లెద్. ఎయెర్ నమ్మిజినారొ దేవుణు వరి పాపమ్కు విజు మాయిప్తాన్. వారు నీతి నిజయ్తి మన్నికారె.

23 ఎందానిజ్ ఇహిజ, విజెరె పాపం కిత్తారె దేవుణు తయార్ కితిమన్ని గొప్ప జాయ్ పొందిదెజ్ అట్వీండ్రాత్.

24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పాపమ్కు వందిజ్ వాని సిక్కుదాన్ దేవుణు మజి డిబిస్తాన్. ఎలాగ ఇహిజ, తప్పు కిత్తికార్ ఇహిజ్బా, అయ తప్పుజ్ నాను సెమిస్త మన్న ఇజి దయాదర్మమ్దాన్ ఉండ్రె ఇనాయం లెకెండె సెడినె సీజినాన్.

25 లోకురి పాపమ్క వందిజ్ వాని సిక్కు వన్ని ముస్కు తపిసి, వన్ని సావుదాన్ లోకురి పాపమ్కు వరి నమకమ్దాన్ దేవుణు సెమిసిని వందిజె యేసుక్రీస్తుజ్ పోక్తాన్. ఎందానిజ్ ఈహు కిత్తాన్ ఇహిజ, దేవుణు నీతినిజయ్తి మన్నికాన్ ఇజి తోరిస్తెజె. ఎందానిజ్ ఇహిజ యేసు వాని ముందాల లోకుర్ పాపం కిత్తిమహివలె దేవుణు అక్కెజ్ ఓరిసి మహాన్. పాపం కిత్తివలె సిక్కు సివితాన్.

26 గాని దేవుణు అయ పాపమ్కు పోన్వన్. యేసు అక్కెజ్ విజు వన్నిముస్కు ఒత్తాండ్రె వరివందిజ్ సాతాన్. దేవుణు నీతిమన్నికాన్ ఇజి ఈహు తోరిస్తాన్. యేసు ముస్కు నమకం ఇడ్డికార్ నీతినిజయ్తికార్ ఇజి ఇడ్డార్.

☆ 3:13 3:13 కీర్తన 5:9. ☆ 3:13 3:13 కీర్తన 140:3. ☆ 3:14 3:14 కీర్తన 10:7. ☆ 3:17 3:17 యెసయ 59:7,8.

27 అందెజె ఏలు, మోసె సిత్తి రూలుజు లోజీత్తిజ్ నీతిమన్నికాట్ ఆతాట్ ఇజి పొగిడిందెజ్ అట్ ఏట్, యేసుక్రీస్తుజ్ నమ్మితిజానె మాటు కిత్తి పాపమ్ కు విజు దేవుణు మాయిస్తాన్ ఇజి దేవుణు వహ్నాన్. అయావజనె మాటు నీతి మన్నికాట్ ఆనాట్.

28 రూలుజు లోజీత్తిజు ఆవద్, యేసుక్రీస్తుజ్ నమ్మితిజానె పాపమ్ కు విజు మాయిపె ఆజి నీతి మన్నికార్ ఆతార్ ఇజి దేవుణు వెహ్నాన్. యాక మాటు నెసినాట్.

29 దేవుణు, వహి యూదురిజ్ నె దేవుణు ఆవన్ గదె, మహి జాతిది పరిజ్ బా దేవుణు గదె. ఒఒ మహి జాతిది పరిజ్ బా దేవుణు నె.

30 ఒరెండ్రె దేవుణు నె మనాన్. వాండ్రు యూదురిజ్ ని యూదురు ఆఇ పరిజ్ ని విజేరిజ్ పరి నమకం వందిజ్ పాపమ్ కు విజు మాయిప్పి, నీతి మన్నికార్ ఆతార్ ఇజి వెహ్నాన్.

31 అహిజు క్రీస్తు ముస్సు నమకం ఇడ్డిజ్ దేవుణు ఎద్రు నీతి మన్నికార్ ఇజి దేవుణు వెహ్నిజు, రూలుజు విలువ సిల్లెద్ ఇజి ఒడోబినిదెర్ ను. సిల్లె, రూలుజు విలువ సిల్లెకెజ్ ఆఉ. యేసుక్రీస్తు ముస్సు నమకం ఇడ్డి మహిజ్ అయ రూలుజ్ మరి మరి లోజిదెజె.

4

నమకమ్ దాన్ అబ్రహాం నీతి నిజాయి మన్నికాన్ ఆతాన్

1 అహిజు గొప్ప పేరు మన్ని మా అనిగొగొ ఆతి అబ్రాహాము నీతిమన్నికాన్ ఇజి దేవుణు వెహ్ని వందిజ్ ఇనిక వెహ్నిజ్?

2 వాండ్రు కిత్తి నెగ్గి పణిజు వందిజ్ దేవుణు వన్నిజ్ నీతి నిజాయికాన్ ఇజి ఇడ్డిజు దన్నివందిజ్ లోకురు వెట పొగిడిందెజ్ అట్నాన్ గాని దేవుణుబాన్ పొగిడె: ఆదెజ్ అట్ ఏన్.

3 ఎందానిజ్ ఇహిజు దేవుణు మాటాదు ఇనిక రాస్త మనాద్ ఇహిజు, “దేవుణు అబ్రాహాము వెట కిత్తి ఒవందం వాండ్రు నమ్మిత్తాన్. అందెజె వాండ్రు నీతినిజాయికాన్ ఇజి దేవుణు ఒప్పుకోటాన్”☆.

4 ఒరెన్ పణి కిత్తిదన్నిజ్ కూలి దోహ్ కిజు అయాక ఇనాయం ఆవద్ గదె. అక్క వన్ని కూలి నె. నీతినిజాయికాన్ ఆదెజ్ ఇహిజుబా అయాలెకెండ్యె.

5 గాని, తప్పు కిత్తివన్ని తప్పుజ్ దేవుణు మాయిప్పి నీతినిజాయి మన్నికాన్ ఇజి ఇడ్నాన్. నమ్మిని వన్ని నమకమ్ దాన్, వాండ్రు నీతినిజాయికాన్ ఇజి దేవుణు ఇడ్నాన్. గాని, వన్ని పణిజాణిజ్ నీతినిజాయికాన్ ఆవన్.

6 దిన్నివందిజ్ దావీదురాజుబా కీర్తన పుస్తకమ్ దు రాస్త మనాన్. ఇనిక ఇహిజు, నమకం ఇడ్డివందిజ్ నీతినిజాయికార్ ఇజి దేవుణు ఇడ్డికార్ గొప్ప సర్ద ఆతికార్. పరి పణివందిజ్ ఆవద్, నమకం వందిజె.

7 పాపం కిత్తిదన్నిజ్ దోహ్ కి నెమ వందిజ్ వారు సర్ద ఆనికార్. ఎందానిజ్ ఇహిజు, పరి తప్పుజ్ మరి ఎత్తు కి ఇజి దేవుణు తీర్మనం కిత్తాన్.

8 ఎయెర్ది పాపమ్ కాజ్ దేవుణు లెక్క తొవండ్రె వాండ్రు సర్ద ఆతికాన్.☆

9 పాపమ్ కాజ్ దేవుణు నెమిస్తి దన్నివందిజ్ మన్ని సర్ద సునతి ఆతి యూదురిజ్ నె ఆవద్. సునతి కిదెఆఇ యూదురు ఆఇ పరిజ్ బా మనాద్. అబ్రహాం దేవుణు దేవుణుదిజ్ నమ్మిత్తాన్. అందెజె వాండ్రు నీతినిజాయి మన్నికాన్ ఇజి దేవుణు ఒప్పుకోటాన్ ఇజి మాటు నెసినాట్ గదె.

☆ 4:3 4:3 ఆది 15:6. ☆ 4:8 4:8 కీర్తన 32:1,2.

10 ఎన్నివలె దేవుణు అబ్రహాం వందిజ్ యాలెకెండ్ వెహ్లాన్? సునతి కిబె ఆవిండ ముజుల్నా? సునతి కిబె ఆతి వెనుకానా? అబ్రహాం నీతిమన్నికాన్ ఇజి ఎన్నివలె దేవుణు వెహ్లాన్ ఇహిజ, సునతి కిబె ఆని ముందాల్నె అబ్రహాం నీతిమన్నికాన్ ఇజి దేవుణు వెహ్లాన్.

11 వెనుక అబ్రహాం సునతి కిబె ఆతాన్. ఎందానిజ్ ఇహిజ దేవుణు ముస్సు నమకం ఇడ్డి వందిజ్ వాండ్రు నీతి మన్నికాన్ ఆతాన్ ఇజి గుర్తు వందిజె. సునతి కిబె ఆవిండ మహివలె దేవుణుదిజ్ నమ్మిత్తివరి పాపం దేవుణు మాయిహ్లాన్. నన్నివరిజ్ బుబ్బులెకెండ్ దేవుణు అబ్రాహముజ్ ఇడ్డాన్.

12 అయావజనె నమకం ఇడ్డి సునతి కిబె ఆతివరిజ్బా అబ్రహాం బుబ్బు లెకెండ్నె. సునతి కిబె ఆవిండ మహివలె నమకం ఇడ్డి బుబ్బుత్తి అబ్రహాం లెకెండ్ వారు. వారుబా అయా నమకమ్నె ఇడ్డార్.

13 దేవుణు అబ్రహాం వెట ఉండ్రి ఒట్టు కిత్తాన్. ఇనిక ఇహిజ, అబ్రహామ్జ్ని వన్ని కొడొ: కొక్రారిజ్ యా లోకమ్దిజ్ సీన ఇజి. యా ఒట్టు అబ్రాహముజ్ ఎలాగ దొహ్కాద్ ఇహిజ దేవుణు సిత్తి విజు రూలుజ్ వాండ్రు లోజిత్తి వందిజ్ ఆవిద్. దేవుణు ముస్సు నమకం ఇట్టివెలె నీతినిజయ్తాన్ ఆతాన్ కాక యా ఒట్టు దేవుణు బాణిజ్ దొహ్కాద్.

14 రూలుజు లోజిత్తి వరిజె, దేవుణు సిత్తి ఒట్టు దొహ్కాద్ ఇహిజ, దేవుణు ముస్సు ఇడ్డి నమకమ్దిజ్ ఇని విలువ సిల్లెద్. ఆహె ఆతిజ దేవుణు సిత్తి అయ ఒట్టుబా విలువ సిల్లెండ మనాద్.

15 రూలుజ్ మన్నె ఇహిజ లోకు వనకాజ్ లోజివిండ సిక్కు తపిసినార్. ఎంబె రూలుజ్ మహిజ్బా లోకుర్ వనకాజ్ లోజివిర్.

16 నమకం ఇడ్డి రూలుజు లోజిత్తి యూదురునె ఆవిద్ అబ్రహాలెకెండ్ దేవుణు ముస్సు నమకం ఇడ్డివరిజ్ విజెరిజ్ యా ఒట్టు దొహ్కాద్. దేవుణు ముస్సు నమకం ఇడ్డివరిజ్ అబ్రహాం ఒరెన్ బుబ్బువజనె.

17 “నాను నిజి నండొ జతిజు బుబ్బు లెకెండ్ ఏర్పాటు కిత్త మన్ను”, ఇజి దేవుణు అబ్రహాం వెట కిత్తి ఒట్టు దేవుణు మాటాదు రాస్త మనాద్. సాతివరిజ్ బత్తు సీజినాన్. వన్ని మాటదాన్ సిల్లివనకాజ్ మన్నిలెకెండ్ కూక్కినాన్, యా దేవుణు. వన్నిజె అబ్రహాం నమ్మిత్తాన్. దేవుణు ఎద్రు, యా ఒట్టువలెహాన్ మజి విజెరిజ్ అబ్రహాం బుబ్బులెకెండ్ ఆతాన్.

18 దేవుణు అబ్రాహముజ్ వెహ్లా మాటెజ్ జర్గిదెజ్ కన్ఠమాతికెజ్ గాని అక్కెజ్ జర్గినె ఇజినె నమ్మిజి ఎద్రుసుడొ:జి మహాన్. అందెజె నండొ జాతిజు బుబ్బువజ ఆని ఇజి దేవుణు వెహ్లా మాటెజ్లెకెండ్ వాండ్రు ఆతాన్. నీ కొడొ:ర్ ఆగనమ్దు మన్ని లెక్క కిదెజ్ అట్ఇ నస్సా సుక్కెజ్లెకెండ్ నండొండ్డార్ ఆనార్లె ఇజి దేవుణు వెహ్లా మాటెకెండ్ జర్గితాద్.

19 అబ్రాహముజ్ డగ్రు డగ్రు వంద పంటెజ్ ఆత మహాద్. “నాను నిస్సా డొక్ర ఆత. నా ఆల్ని సారాయిబా కొడొ:ర్ ఇడ్డెజ్ అట్విద్”, ఇజి ఒడొ:బీజి మహాన్. అహిజ్బా దేవుణు వెహ్లా మాటెజ్ అబ్రహాం ఇని అనుమానం సిల్లెండ నమ్మిత్తాన్.

20 వన్ని నమకం డి:స్వితాన్. దేవుణు కిత్తి ఒట్టు వందిజ్ అనుమానం ఆవితాన్. దేవుణు వెహ్లాలెకెండ్ జర్గినాద్లె ఇజి నమ్మిత్తాండ్రె దేవుణుదిజ్ పొగ్డితాన్.

21 దేవుణు ఒపందం కిత్తిలెకెండ్ కిదెజ్ అట్సాన్ ఇజి పూర్తి నమ్మిత్తాన్.

22 అందెజె దేవుణు మాటదు రాస్త మనాద్, “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్ మన్నికాన్ ఇజి ఇడ్తాన్”, ఇజి

23 నీతినిజయ్కాన్ ఇజి ఇడె ఆతాన్”, ఇజి దేవుణు మాటాదు రాస్తి మన్నిక అబ్రహాం ఒరెన్ వందిజె ఆవద్.

24 మా వందిజ్ బా నీతినిజయ్ మన్నకార్ ఇజి దేవుణు ఇడ్త మనాన్ ఇజి రాస్త మనాద్. సాతివరిబాణిజ్ యేసుక్రీస్తుజ్ నిక్తి దేవుణు ముస్కు నమకం ఇడ్తి మా వందిజ్ బా నీతినిజయ్కార్ ఇజి రాసె ఆతమనాద్.

25 మా నెజ వణిజ వందిజె యేసు క్రీస్తుజ్ సప్తార్. సాతివరిబాణిజ్ దేవుణు వన్నిజ్ నిక్తిజ్, మా పాపమ్ కు విజు సెమిస్తాండ్రె మజి దేవుణు వెట కూడిఃత్తికార్ ఇజి ఇడ్తాన్.

5

దేవుణు వెట మజి సాంతి సమదనమ్ ని సర్ల ఆజినాట్

1 మా ప్రబు ఆతి క్రీస్తు మావందిజ్ సాతాన్ ఇజి మాటు నమ్మిత్తిజ్, మాటు దేవుణు వెట కూడిఃజి మంజినాట్. అందెజె దేవుణు వెట సాంతి సమదనం వాత మనాద్.

2 యేసుక్రీస్తు మా వందిజ్ సాతిజ్ ఏలు దేవుణు మజి తోరిస్తి దయాదర్థం మాటు నెస్త మనాట్. దేవుణు ఎసానొ గొప్పవాండ్రు ఇజి నెస్తాట్ వన్ని గొప్ప జాయ్ ము మాటుబా మంజినాట్ ఇజి ఎద్దుసుడఃజి మంజినిలో ఇ సర్ల ఆజినాట్.

3 అక్కాదె ఆవండ, క్రీస్తుముస్కు నమకం ఇడ్తి వందిజ్ వాని కష్టమ్ కలో ఇ సర్లదాన్ మంజినాట్. ఎందానిజ్ ఇహిజ, అయ కష్టమ్ కు వాతిజ్ అక్కెజ్ ఎలాగ బరిస్తిజ్ ఇజి మాటు నెస్తెజ్ ఆనాద్.

4 కష్టమ్ కు వానివలె అక్కెజ్ బరిస్తిజ మాటు నెగ్గి గుణమ్ కు మన్నికార్ ఇజి దేవుణు మా వందిజ్ ఒపు కొడఃజినాన్. నెగ్గి గుణమ్ కు మన్నికార్ ఇజి ఒప్పుకొటిజ మాటు ఆసదాన్ ఎద్దుసుడఃజి మంజినాట్.

5 దిన్ని వందిజ్ మాటు ఎద్దు సుడఃజి మన్నిజ్ అక్క నిజమ్ నె జర్గినాద్ ఇజి సుడఃజినాట్. ఎందానిజ్ ఇహిజ దేవుణు మజి ప్రేమిసినాన్ ఇజి మా మన్నుదు మాటు నెగెండ నెస్తాట్. మజి సీత్తి మన్ని దేవుణు ఆత్మదానె దేవుణు మా ముస్కు మన్ని ప్రేమ వందిజ్ నెసినాట్.

6 ఎలాగ ఇహిజ, మాటు ఇనికబా కిదెజ్ అట్ ఏండ మహివలె దేవుణు ఏర్పాటు కిత్తి కాలమ్ దు, దేవుణు వందిజ్ బక్తిసిల్లి వరివందిజ్ క్రీస్తు సాతాన్.

7 నీతినిజయ్ మన్ని వన్నివందిజ్ ఒరెన్ సాదెజ్ ఇహిజ కష్టం. నెగ్గికాన్ ఆతివన్నివందిజ్ ఒరెన్ సానాన్ సు.

8 గాని దేవుణు మజి ఎసానొ ప్రేమిసినాన్ ఇజి తోరిస్తాన్. ఎలాగ ఇహిజ మాటు దేవుణు వెట వెత్తేకమ్ దాన్ ఆఇసరి నడిఃసి మహివలె నె క్రీస్తు మా వందిజ్ సాతాన్.

9 అందెజె, క్రీస్తు మా వందిజ్ సాతిజ్ మాటు నీతిమన్నికాట్ ఇజి దేవుణు ఇడ్తిమన్నిక నిజమె. అహిజ, ఎలాకాలం మంజిని సిక్చదాన్ మాటు క్రీస్తువెట తప్రె ఆనాట్ ఇజి మన్నిక ఒద్దె నిజమాతిక.

10 ఎందానిజ్ ఇహిజ, మాటు దేవుణు వెట పగ అస్తి మహివలె దేవుణు మరిసి మా వందిజ్ సాతాండ్రె మజి దేవుణు వెట కూడుఃప్తాన్. అహిజ ఏలు దేవుణు వెట మాటు కూడిఃతాట్ ఇహిజ, మరి నండె మజి గెల్పిస్తెజ్ క్రీస్తు అట్వాన్ ఇజి మాటు నెసినాట్. వాండ్రు మర్జి నిజిత్తిజ్ నె యా గెలుపు మజి వాతాద్.

11 అక్కాదె ఆవిద, మా ప్రబు ఆతి యేసుక్రీస్తు మా వందిజ్ సాతి వందిజ్ ని మా వందిజ్ కిత్తి పణి వందిజ్ సర్ల ఆజినాట్. యేసుక్రీస్తు బాణిజ్ మాటు దేవుణువెలె సమదనం మన్నికాట్ ఆతాట్.

ఆదాముని క్రీస్తు

12 ఏలు నాను ఉండ్రీ వెహ్పా, ఒరెన్ లోకు, ఇహిజ ఆదాం పాపం కిత్తిజ్ పాపం యా లోకమ్దు డూగితాద్. పాపం కిత్తిజ్ ఆదాం సాతాన్. అందెజె యా లోకమ్దు విజేరె సాజినార్. విజేరె పాపం కిత్తిజ్ విజేరె సాజినార్.

13 దేవుణు మోసెవెలె రూలుజ్ సివీండ మహివలె లోకుర్ పాపం కిజి మహార్. గాని వారు కిత్తి తప్పుజ లెక్క సుడఃవతాన్. ఎందానిజ్ ఇహిజ రూలుజ్ సిల్లెండ మహాద్కాక రూలుజ్ తప్పార్ ఇజి ఇన్వన్.

14 గాని ఆదాం బత్తితి మహి కాలమ్దాన్ మోసె కాలమ్దాక బత్తిజి మహికార్ సాతార్. ఎందానిజ్ ఇహిజ ఆదాం కిత్తి పాపం లెకెండ వారు కివితార్ గాని వారుబా పాపం కిత్తార్. ఆదామ్ ని వెనుక వాతి క్రీస్తు ఉండ్రెలెకెండ్రె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజేరిజ్ కూడిత వాతాద్.

15 గాని రిఎర్బా ఉండ్రె లెకెండ్రె ఆవర్. దేవుణు సెడినె సిత్తి ఇనాయం తతాన్. మరి ఒరెన్ విజేరిజ్ సావు తతాన్. గాని యేసు క్రీస్తు వన్ని దయాదర్మమ్దాన్ తత్తి ఇనాయం ఒద్దె పెరికాదె. దేవుణు విజేరిజ్ సెడినె సిత్తి వన్ని దయాదర్మమ్నె అయ ఇనాయం.

16 ఆదాం కిత్తి పాపమ్దాన్ వతిదన్నిజ్ క్రీస్తు సెడినె సిత్తి ఇనాయమ్దిజ్ లోఇ మరి ఉండ్రీ తేడ మనాద్. ఇనిక ఇహిజ, ఆదాం ఉండ్రీ పాపం కితిజ్ దేవుణుబాణిజ్ తీర్పు తతాన్. గాని క్రీస్తు దేవుణుబాణిజ్ తత్తి ఇనాయం అయాలెకెండ్రె ఆవిద. సెడినె దొహ్క్తి అయ ఇనాయం ఇనిక ఇహిజ దేవుణు లోకురిజ్ నీతినిజయ్యికార్ ఇజి ఇడ్డికదె. నీతినిజయ్యికార్ ఇజి దేవుణు లోకురిజ్ ఇడ్డిని అయ ఇనాయం వాతిజ్, లోకుర్ కిత్తి విజు పాపమ్క వందిజ్ “మీ పాపమ్కు విజు నాను మాయిప్ప”, ఇజి దేవుణు వెహండ్రె వరిజ్ నీతినిజయ్యికార్ ఇజి ఇడ్డాన్.

17 ఒరెన్ లోకు తప్పు కిత్తిజ్ లోకుర్ విజేరె సాజినారె, సావు లోకురిజ్ ఏలుబడిః కిజినాద్. గాని మరి ఉండ్రీ ఒద్దె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవుణు బాణిజ్ గొప్ప దయాదర్మమ్ని సెడినె దొహ్క్తి నీతినిజయ్యి ఇనికెజ్ వాతిజ్ అక్కా మా బత్కుదు ఏలుబడిః కిజినె.

18 ఆహె ఒరెన్ వన్ని తప్పదాన్ దేవుణు బాణిజ్ తీర్పు వాతి లెకెండ్రె, మరి ఒరెన్ వన్ని నీతి పణిదాన్ విజేరె తీర్పుదాన్ తప్పె ఆదెజ్ అట్నార్. యా నీతి పణి, వరిజ్ ఎలాకాలం బత్తిని బత్కు తతాద్.

19 ఎలాగ ఇహిజ ఒరెన్ లోకు దేవుణుదిజ్ లోజీవీండ మహివలె ఎలాగ లోకుర్ విజేరె తప్ప కిత్తికార్ ఆతారొ, అయాలెకెండ్రెనె మరి ఒరెన్ లోకు దేవుణుదిజ్ లోజీతిజ్ దేవుణు లోకురిజ్ నీతినిజయ్యి మన్నికార్ ఇజి ఇడ్డాన్.

20 దేవుణు రూలుజ్ లోకురిజ్ వాతివెలె తప్పజ్ నండొ కిజినామ్ ఇజి లోకర్ నెస్తార్. గాని తప్పజ్ నండొ ఆతివెలె దేవుణుది గొప్ప దయాదర్మమ్బా దన్నిజ్ ఇంక నండొ పిరిజి వాతాద్.

21 పాపం నండొ ఆజి వాతివలె లోకుర్ సావుదిజ్ తగిజి వాతార్. గాని ఏలు దేవుణు లోకురిజ్ నీతినిజయ్యి మన్నికార్ ఇజి ఇడ్డిజ్ గొప్ప దయాదర్మం లోకుర్ మున్ను.

ఏలుబడికి కిజినాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఏలాకాలం బత్కిని బత్కు వాదెజ్ ఇజి.

6

పాపం వందిజ్ సాతికాట్గాని క్రిస్తవెట బత్కినికాట్.

1 అహిజ, ఏలు ఇనిక వెహ్లాట్? మాటు పాపం కిత్తివెలె దేవుణు గొప్ప దయాదర్శం తోరిస్తాన్ ఇహిజ ఏలు మరి నండొ దయాదర్శం తోరిస్తెజ్ ఇజి మరి నండొ పాపమ్కు కిజినె మండ్రెజ్నా?

2 ఆవద్, మాటు పాపం కిజినె మండ్రెజ్ ఆవద్. ఎందానిజ్ ఇహిజ, పాపం కిదెజ్ ఆస మాటు డిస్తాట్. నన్ని ఆసెజ్ డిస్తెజ్ పాపం కిజినె మండ్రెజ్ అట్వట్లె.

3 యేసు క్రీస్తు వెట కూడెదెజ్ ఇజి బాప్తినం పొందినివలె మాటుబా వన్నివెట సాతాట్ ఇజి విజేరిజ్ వెహ్నినాట్. ఇక్క మీరు నెస్తెజ్ వలె.

4 అందెజె క్రీస్తు సాతి వెనుక బూమి లోఇ వన్ని పీనుగు ఎలాగ మూసె ఆతాదొ, అయాలెకెండెనె బాప్తినం పొందితివెలె మాటుబా వన్నివెట మూసె ఆతి లెకెండె ఆతాట్. ఎలాగ ఇహిజ, పాపం కిదెజ్ మన్ని ఆసవందిజ్ బత్కిదెజ్ అట్వండె ఆజినాట్. బుబ్బాత్తి దేవుణుది గొప్ప జాయ్ మన్ని సత్తుదాన్ యేసుప్రబు ఎలాగ సావుదాన్ మర్రి నీజితాండ్రొ అయాలెకెండె మాటుబా ఉండ్రొ కొత్త బత్కుదు మండ్రెజ్ అట్వాట్.

5 మాటు మా పడాఁయ్ బత్కు డిసిసీజి యేసుక్రీస్తు వెట వన్ని సావుదు కూడితాట్ ఇహిజ యేసుక్రీస్తు సావుదాన్ మర్రి నీజెత్తి లెకెండె మాటుబా తవ్వండె ఉండ్రొ కొత్త బత్కుదు వన్నివెట కూడెజి మంజినాట్.

6 ఒరెన్ ఎజమాని అడిగి పణికినికాన్ లోజిజి మంజినిలెకెండె, మాటు పాపం కిదెజ్ మన్ని ఆసదిజ్ లోజిజి మండ్రెజ్ అవద్. అందెజె యేసుక్రీస్తు సిలువాదు సాతివెలె పాపం కిదెజ్ మన్ని మా ఆసెజబా అయ సిలువాదు సప్తి లెకెండెనె. యాక మాటు గుర్తు కినాట్.

7 సాతిసాహికాన్ పాపం కిదెజ్ మన్ని ఆసెజాణిజ్ డిబె ఆతికాన్గదె. అయాలెకెండె మాటుబా డిబె ఆతాట్.

8 అహిజ, మాటు క్రీస్తు వెట సాతి లెకెండె ఇహిజ, క్రీస్తు వెట బత్కిత్తి లెకెండె మాటుబా వన్నివెట బత్కినాట్ ఇజి నమ్మిజినాట్.

9 క్రీస్తు సాతిజ్ దేవుణు క్రీస్తుజ్ సాతి పరిబాణిజ్ మర్రి నిక్రాన్. వాండ్రు మరి సావన్. అందెజె సావు వన్ని ముస్కు అతికారం కిదెజ్ అట్వద్ ఇజి మాటు నెసినాట్.

10 క్రీస్తు సాతివెలె లోకురి పాపమ్కు వందిజ్ ఉండ్రె సుటునె సాతాన్. గాని మర్రి బత్కిత్తివెలె దేవుణు వందిజ్ బత్కిజినాన్.

11 అయాలెకెండె మీరుబా పాపం కిదెజ్ మన్ని ఆసదిజ్ సాతికార్ ఇజి మిజి ఇడ్డు. మరి యేసుక్రీస్తు వెట కూడితి మహిజ్ దేవుణుదిజ్ ఇస్టమాతి బత్కు బత్కిజినిదెర్ ఇజి ఇడ్డు.

12 అందెజె, పాపం కిదెజ్ మన్ని ఆసెజ్, సాజి సాని మీ ఒడొల్దు ఏలుబడికి కిదెజ్ ఆవద్. ఎందానిజ్ ఇహిజ, పాపం కిదెజ్ మన్ని ఆసెజ్ వజ కిబిస్తెజె అక్క నుండెజినాద్.

13 పాపం మీ ముస్కు ఏలుబడికి కిజి సెఇ పణిజ్ కిదెజ్ వాడుకొని ఆయుదమ్కులెకెండె మీ ఒడొల్ది బాగమ్కాజ్ వాడుకొండెమాట్. గాని సావుదాన్ బత్కుదు వాతివరిలెకెండె మీ ఒడొల్దిజ్ దేవుణుదిజ్ ఒప్పజెప్పెజ్. నస్తివలె మీ

ఒడొణ్ణి బాగమ్కు నీతినిజయ్లు మన్ని పణిజ్ కిదెజ్ వాడుకొని ఆయుదమ్కులెకెండ్ ఆనె.

14 పాపం కిదెజ్ ఇజి ఆస మీ మున్కు ఏలుబడిః కిదెజ్ ఆవద్. ఎందానిజ్ ఇహిజ దేవుణు తీర్పుదాన్ తప్త ఆదెజ్ ఏలు మోసె సిత్తి రూలుజ లోజీదెజ్ అవ్సరం సిల్లెద్. గాని పాపం కివీండ మండ్రెజ్ ఏలు దేవుణు దయాదర్తం మీ మున్కు ఏలుబడిః కిజినాద్.

నీతినిజయ్లు మన్ని బత్కు బత్కిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లోజీజి మంజినిదెర్

15 ఏలు మాటు దేవుణు మోసెజ్ సిత్తి రూలుజ అడిగి మంజినిజ్, పాపం కిజి మండ్రెజా? ఆవద్, ఎసెజబా ఆవద్.

16 ఇనిక ఇహిజ యాక నిజం ఇజి మీరు నెసినిదెర్. ఎయెన్బా వెటిపణి కినివన్ని లెకెండ్ ఒరెన్ ఎజుమానిజ్ లోజీజి మండ్రెజ్ సూణివలె, అయ ఎజుమానిజ్ వెటిపణి కినికాన్ ఆజినాన్గదె. పాపమ్దిజ్ లోజీత్తిజ సావు తపిసినిదెర్. దేవుణుదిజ్ లోజీదెజ్ ఒప్పుకొటిజ దేవుణు మిజి నీతినిజయ్లుకార్ ఇజి ఇడ్సాన్.

17 ముందాల్ మీరు ఇన్టం ఆతి వజ పాపం కిజి, పాపం కిదెజ్ మన్ని ఆస ఇని ఎజుమానిజ్ వెటిపణి కినికార్ లెకెండ్ మహిదెర్. గాని వెనుక మిజి దేవుణు వందిజ్ నెస్సిన్తి దన్నివందిజ్ మీరు పూర్తి మన్కుదాన్ నెస్తిదన్నిజ్ లోజీత్తి మన్నిదెర్. దిన్నివందిజ్ నాను దేవుణుదిజ్ వందనమ్కు వెస్సిన.

18 పాపం కిదెజ్ మన్ని ఆసెజాణిజ్ దేవుణు మిజి డిఃబిన్తి దన్నిజ్ నాను దేవుణుదిజ్ వందనమ్కు వెస్సిన. దేవుణు ఎర్దు నీతినిజయ్లు మన్ని బత్కు బత్కిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లోజీజి మన్ని దన్నిజ్బా నాను దేవుణుదిజ్ వందనమ్కు వెస్సిన.

19 దేవుణు వందిజ్ నిజమాతికెజ్ అర్దం కిబిస్తిజ్ ఇజి నాను అర్దం కిబిసిని మాటెజ్ వెస్సిన. ఏలుదాక మీరు వెటిపణి కినివరి లెకెండ్ మీ ఒడొణ్ణి బాగమ్కు నెఇపణిజ్ కిదెజ్ మరి ఒద్దె సెఇకెజ్ కిజి, పాపం కిదెజ్ మన్ని ఆసెజ్ లోజీత్తి మహిదెర్. ఏలు దేవుణుదిజ్ కేట ఆతివరిలెకెండ్ నీతినిజయ్లు పణిజ్ కిజి దేవుణుదిజ్ వెటిపణి కినికార్ లెకెండ్ మీ ఒడొణ్ణిదెజ్ నడిఃపిస్తు.

20 మిజి ఇన్టం ఆతివజ బత్కిజి పాపం కిదెజ్ మన్ని ఆసెజ లోజీజి మహివలె మీరు నీతినిజయ్లుదాన్ బత్కిదెజ్ ఇజి ఎయెర్బా మిజి డటం వెవ్వెత్తార్.

21 గాని ఏలు మిజి సిగు తపిసిని నన్ని బత్కు మిజి ఇని లాబం తెవ్తాద్. అయ బత్కుదాన్ దేవుణుబాణిజ్ దూరం మండ్రెజ్నె ఆతాద్. నన్ని బత్కు దేవుణు ఇనిక తనాద్ ఇహిజ సావునె తనాద్.

22 గాని ఏలు పాపం కిదెజ్ మన్ని ఆస మీ మున్కు ఏలుబడిః కివీండ మీరు దన్ని మున్కు గెలిస్తిదెర్. దేవుణుదిజ్ వెటిపణి కినికార్ లెకెండ్ ఆతిదెర్. నన్ని బత్కుదాన్ వాతి ఉండ్రీ పండులెకెండ్ మీరు దేవుణుదిజ్ కేట ఆతి లోకుర్ ఆతిదెర్. నస్తివలె ఎలాకాలం బత్కిని బత్కు దోహ్క్కాద్.

23 పాపమ్దిజ్ లోజీజి మహివరిజ్ దోహ్క్కా కులి ఎలాకాలం మన్ని సావు. గాని మా ప్రబు ఆతి క్రీస్తుజ్ నమ్మితివరిజ ఎలాకాలం బత్కిని బత్కు దేవుణు నెడినె సీనాన్.

7

అలు మాసిర్ నడిమి మన్ని రూలుజ్

1 యేసుప్రబుజ్ నమ్మితి మా తంబెరిజాండె, రూలుజ వందిజ్ నెసినివరి వెట నాను యాక వెహ్సిన. ఇనిక ఇహిజ ఒరెన్ లోకు బత్తిజి మహివలె ఉండ్రెనె రూలుజ లోజిజి మండ్రెజ్గదె.

2 ఎలాగ ఇహిజ, పెండ్లి ఆతివందిజ్ మన్ని రూలుజ సుడోతిజ, ఉండ్రీ అయ్లి కొడో: దన్ని మాసివెట మంజినాద్గదె. గాని మాసి సాతసాహాన్ ఇహిజ అది వన్నిజ్ పెండ్లి ఆతిలెకెండె మండ్రెజ్ అవ్సరం సిల్లెద్గదె. అది మాసివెట మండ్రెజ్ ఇజి మన్ని రూలుజబాణిజ్ డిబె ఆతాద్.

3 రూలువజ సుడోతిజ, మాసి బత్తిజి మహివలె మరి ఒరెన్ వెట అది సాహిజ, అది రంకు బూలానికాద్ ఇనార్. గాని మాసి సాతిజ పెండ్లి ఆతి మన్ని రూలుదిజ్ లోజిజి మండ్రెజ్ అవ్సరం సిల్లెద్. వెనుక మరి ఒరెన్ వన్నిజ్ పెండ్లి ఆతిజ అది రంకు బూలానికాద్ ఇజి ఇన్వర్.

4 అయాలెకెండెనె మా తంబెరిజాండె, యేసుప్రబు వెట మీరుబా సాతిలెకెండె ఆతిదెర్. అందెజి దేవుణు మోసెజ్ సిత్తి రూలుజ్ లోజినిబాణిజ్ మీరు డి:బె ఆతిదెర్. మాసి సాతికాద్ మరి ఒరెన్ వన్నిజ్ పెండ్లి ఆతిలెకెండె ఏలు మీరు, సాతివరిబాణిజ్ దేవుణు నిక్కిక్రిస్తువెట కూడితిదెర్. ఎందానిజ్ ఇహిజ, మా బత్తుదాన్ దేవుణువందిజ్ నెగ్గి పట్టు పండెదెజ్ ఇజి.

5 ఒడోల్ది నెఇ ఆసెజ్ వజ కిదెజ్ ఆస ఆని మన్సు మజి అడిజిమహివలె పాపం కిబిస్తెజ్ తగితి ఆసెజ్ మా ఒడోల్ది బాగమ్కాజ్ ఏలుబడి: కిజి మహె. దేవుణు మోసెజ్ సిత్తి రూలుజ్ మాటు నెస్తివలె యా ఆసెజ్ పిరితిజ్ పాపం కిజి మాటు సావు తపిసిని పట్టు పండిస్తాట్.

6 గాని ఏలు యేసుప్రబు వెట సాతిలెకెండె మహిజ రూలుజ వెటివణి కినిదన్నిదటాన్ డి:బె ఆతాట్. రాస్తిమహి అయ రూలుజ ఏలు మాటు వెటివణి కినికార్ ఆవట్. ఏలు మాటు దేవుణు ఆత్మదిజ్ వెటివణి కినివరివజ ఉండ్రీ కొత్త బత్తిజినాట్.

దేవుణు మోసెజ్ సిత్తి రూలుజ్

7 ఏలు మాటు ఇనిక వెహ్సెట్? దేవుణు మోసెజ్ సిత్తి రూలుజ్ పాపం కిదెజ్ మన్ని ఆసెజ్ పుటిసినాద్. అందెజి అయ రూలుజ్ నెఇకెజ్ ఇజి వెహ్సెటా? అట్వట్, ఆహు వెహ్సెజ్ ఆవిద్. గాని పాపం కిజిన ఇజి నాను ఎలాగ నెస్త ఇహిజ, దేవుణు మోసెజ్ సిత్తి రూలుజాణిజ్ నెస్తమన్న. ఎలాగ ఇహిజ, ఆఇవరిజ్ మన్ని వనకాజ్ వందిజ్ ఆస ఆమాట్ ఇజి మోసె సిత్తి రూలుదు వెహ్విండె మంజినిక ఇహిజ, అక్క దేవుణు ఎర్దు పాపమ్కు ఇజి నెన్వెతా మరి.

8 ఆఇ వరిజ్ మన్ని వనకాజ్ వందిజ్ ఆస ఆమాట్ ఇజి రూలు మహిజ్నె, నన్ని ఆసెజ్ పుట్టిజ్ నాను వనకవందిజ్ ఆస ఆత. పాపం కిమాట్ ఇజి రూలుజ్ సిల్లెండె మంజినిక ఇహిజ పాపం కిదెజ్ మన్ని ఆస మా మున్సు ఏలుబడి: కివిద్.

9 రూలుజ్ నెన్విండె మహివలె నాను ఇని బాద సిల్లెండె బత్తిజి మహా గాని రూలుజ్ నెస్తి వెనుక నాను తప్త ఇజి నెస్త. దేవుణుబాణిజ్ దూరం ఆత ఇజి నెస్త.

10 రూలుజ్ లోజితిజ ఎలాకాలం బత్తిని బత్తు వానాద్ ఇజి నాను ఒడోబిత్త గాని అయ రూలుజాణిజ్ నా సావుదిజ్ తీర్పు వాత ఇజి నెస్త మన్న.

11 ఎలాకాలం బత్కిని బత్కు వానాద్ ఇజి నాను మొసెం కిబె ఆత. అయ రూలుజ్ నాను తప్తానె సావుదిజ్ తీర్పు తత్త.

12 అందెజె దేవుణు మోసెజ్ సిత్తి రూలుజ్ దేవుణుబాణిజ్ వాతికెజ్. లోకుర్ ఎలాగ నడిదెజ్ ఇజి మన్ని ఆత్తెజ్ నీతినిజయ్తికెజ్, నెగ్గికెజ్.

13 అహిజ, దేవుణు మోసెజ్ సిత్తి రూలుజ్ నెగ్గికెజ్ గాని నజీ సావుదిజ్ తీర్పు తత్త ఇజి వెప్తాజా? ఆవద్, ఆహు ఆవద్. రూలుజ్ నెగ్గికెజ్నె గాని పాపం కిదెజ్ నజీ మన్ని ఆస యా రూలుజాణిజ్ ఒద్దె పెరిక ఆజి తోరె ఆతాదె నాను దేవుణుబాణిజ్ దూరం ఆత. రూలుజ్ ఎందానిజ్ సిత్తాన్ ఇహిజ పాపం కిదెజె మన్ని మా మన్ను తోరిస్తెజె. రూలుజ వజ బత్కిదెజ్ అట్టిండ, మాటు పాపం కినికాట్ ఇజి తోరిస్తెజె ఇక్కెజ్ పణిదిజ్ వాతె.ఆహె మాటు ఎస్సానో పాపం కినికాట్ ఇజి నెస్తెజె యా రూలుజ్ పణిదిజ్ వాతె.

14 దేవుణు మోసెజ్ సిత్తి రూలుజ్ దేవుణు ఆత్తుదాన్ వాతికెజ్ ఇజి మాటు విజేటె నెసినాట్. గాని నాను ఇహిజ నావందిజె ఎత్తు కిజిని మన్నుదాన్ మన్ను. పాపం కిదెజ్ మన్ని ఆసదిజ్ ఒరెన్ వెటిపణి కినివన్నిలెకెండ్ లోజిజి మంజిన.

15 ఎలాగ ఇహిజ, నాను కినికెజ్ ఎందానిజ్ ఆహె కిజిన ఇజి నాను అర్దం కివీ. కిన ఇజి నండొ సుట్టు. ఒండొబినికెజ్ కివిండ ఆజిన. కిదెజ్ ఇస్తం సిల్లికెజ్ నండొ సుట్టు. కిజిన.

16 కిదెజ్ ఇస్తం సిల్లి సెఇకెజ్ నాను కినివెలె ఉండ్రి నెసిన. ఇనిక ఇహిజ దేవుణు రూలుజ్ నెగ్గికెజ్నె ఇజి నెసిన.

17 అందెజె, కిదెజ్ ఇస్తం సిల్లి సెఇకెజ్ నాను కినివెలె, అక్క నాను ఆవ, నా లోఇ మన్ని పాపమ్నె అక్కెజ్ కిబిసినె.

18 ఒండొల్ది సెఇ ఆసెజ్ వందిజ్ ఎత్తు కిని నా మన్నులోఇ నెగ్గికెజ్ ఇనికెజ్ సిల్లి ఇజి నాను నెసిన. ఎలాగ ఇహిజ, నెగ్గికెజ్ కిదెజ్ ఇస్తం మనాద్ గాని కిదెజ్ ఆట్టివ.

19 కిన ఇజి ఒండొబిత్తి నెగ్గి పణిజ్ నాను కివీ. కిదెజ్ ఆవద్ ఇజి ఒండొబిత్తి సెఇ పణిజ్నె కిజిన. కిత్తిజ

20 కిదెజ్ ఆవద్ ఇజి ఒండొబిత్తి సెఇ పణిజ్ కిత్తిజ అక్క కినిక నాను ఆవ. నా లోఇ మన్ని పాపమ్నె అక్కెజ్ కిబిసినె.

21 అహిజ, ఇనిక జర్గిజినాద్ ఇహిజ నాను ఇనికాదొ ఉండ్రి నెగ్గిక కిదెజ్ ఇజి సుండొతిజ సెఇకెదె కిజిన.

22 ఎందానిజ్ ఇహిజ దేవుణు రూలుజ వందిజ్ నాలోఇ గొప్ప సర్ద ఆజిన.

23 గాని మరి ఉండ్రి సత్తు నా లోఇ ఏలుబడిః కినిక నాను సుండొజిన. నాను కిన ఇజి సుండొజిని దన్నిజ్ అయ సత్తు నావెట కాట్లాడజినాద్. పాపం కిదెజ్ నా ఒండొల్లి బాగమ్క లోఇ మన్ని ఆసెజి అడిగి నజీ ఇడ్డెజ్ అయ సత్తు సుండొజి మంజినాద్. అందెజె గెలిస్తెజ్ అట్టిండొజిన.

24 ఒబ, ఒబ దిన్నివందిజ్ మన్నుదు గొప్ప కస్టమాతి మణిసి నాను. సావుదిజ్ తీర్పు వాతి యా ఒండొల్దాన్ నజీ డిఃబిస్సికాన్ ఎయెన్బా మంజనిక ఇహిజ బాగ మహాద్మరి.

25 మా ప్రబు ఆతి యేసు క్రీస్తు వెటెనె మజి అయ విడుఃదల వానాద్. దిన్నివందిజ్ నాను దేవుణుదిజ్ వందనమ్కు వెప్పిన. అహిజ దేవుణు సిత్తి రూలుజ లోజిదెజ్ సుండొజిన. గాని ఒండొల్ది సెఇ ఆసెజ్ కిదెజ్ ఆస ఆని నా మన్ను నజి అడిజి దన్ని

అడిగి నజీ ఇడ్డినాద్. అందెజె నాను ఏలుబా పాపమ్దిజ్ వెటిపణి కినికాన్ లెకెండె.

8

దేవుణు ఆత్మ నడిపిసిని బత్తు.

1 అందెజె ఏలు యేసుక్రీస్తు మున్కు నమకం ఇడ్డి దేవుణు ఎద్దు నీతినిజయ్కార్ అతివరిజ్ సిక్కు సిల్లెద్.

2 ఎందానిజ్ ఇహిజ, యేసుక్రీస్తుదాన్ వాతి కొత్త బత్తు బత్కిదెజ్ దేవుణు వన్ని ఆత్మ మజి సిత్త మనాన్. అయ ఆత్మ సత్తుదాన్ పాపం కిదెజ్ మన్ని ఆసదాన్ మాటు డిఃబె ఆత మనాట్. ఆహె సావుని సిక్కు తపిసిని పాపం కిదెజ్ మన్ని ఆసెజాణిజ్ నాను డిఃబె ఆత మన్న.

3 మాటు ఒడోల్ది సెఇ అసెజాణిజ్ మహిజ్ పాపమ్దాన్ గెల్పిస్తెజ్ దేవుణు సిత్తి రూలుజ్ అట్ఏండ మహద్. ఎందానిజ్ ఇహిజ, ఒడోల్ది సెఇ అసెజ్ అడ్డు కిత్తాద్. గాని దేవుణు మజి డిఃబిస్తాన్. ఎలాగ ఇహిజ, మా పాపమ్కాజ్ వందిజ్ వన్ని సొంత మరిసిజ్ యా లోకమ్దు పోక్రాండ్రె, ఒడోల్ది సెఇ ఆసెజ్ మా మున్కు ఏలుబడిః కినిదన్నెదటాన్ మజి డిఃబిస్తాన్. వన్ని మరిసి మా లెకెండె ఒడోల్దాన్ పుట్టాండ్రె మా పాపమ్కాజ్ వందిజ్ సాతాన్.

4 అందెజె ఏలు దేవుణు సత్తుదాన్ దేవుణు రూలుజ లోజిదెజ్ అట్నూట్. ఒడోల్ది సెఇ ఆసెజ లోజిదెజ్ అక్కర్ సిల్లెద్. ఏలు దేవుణు ఆత్మదిజ్ ఇస్టం ఆతి లెకెండె బత్కిదెజ్ అట్నూట్.

5 ఒడోల్ది సెఇ ఆసెజ లోజిజ బత్కినికార్ దన్ని వందిజె ఎత్తు కిజి మంజినార్. గాని దేవుణు ఆత్మదిజ్ లోజిజ నడిఃనికార్ దేవుణు అత్మదిజ్ తగిత్తికెజ్ ఒడఃబినార్.

6 పాపం కిదెజ్ ఒడోల్లు మన్ని సెఇ ఆసెజ ఏలుబడిః కిని మన్ను మన్నికార్ దేవుణుబాణిజ్ దూరం ఆనారె సానార్. గాని దేవుణు ఆత్మదిజ్ ఇస్టం అతిలెకెండె బత్కినికార్ దేవుణువెట బత్కినార్ వరిలోఇ సొంతి సమదనం మంజినాద్.

7 ఒడోల్ది సెఇ ఆసెజ్ ఏలుబడిః కిని మన్ను మన్నికార్ దేవుణువెట కుట్ట మన్నికార్. వారు దేవుణు రూలుజ లోజిఇకార్. లోజిదెజ్ అట్ఏర్.

8 అందెజె ఒడోల్ది సెఇ ఆసెజ్ ఏలుబడిః కిని మన్ను మన్నికార్ దేవుణుదిజ్ ఇస్టం ఆతివజ నడిఃదెజ్ అట్ఏర్.

9 దేవుణు ఆత్మ మీ లోఇ మహిజ అయ ఆత్మదిజ్ లోజిజ మండ్రెజ్ అట్టిదెర్. ఒడోల్ది సెఇ ఆసెజ్ వందిజ్ లోజిజ మండ్రెజ్ ఎత్తు కిని మన్నుదిజ్ లోజిజ మండ్రెజ్ అక్కర్ సిల్లెద్. క్రీస్తుబాణిజ్ వాజని ఆత్మ సిల్లికాన్, క్రీస్తుజ్ సెందితికాన్ ఆఏన్.

10 గాని మీ లోఇ క్రీస్తుబాణిజ్ వాజని ఆత్మ మహిజ మీ ఒడోల్ పాపమ్దాన్ సానాద్ గాని మీ ఆత్మ బత్కినాద్. ఎందానిజ్ ఇహిజ దేవుణు మీ పాపమ్కు విజు మాయిప్తాండ్రె నీతి మన్నికార్ ఇజి ఇడ్డ మనాన్.

11 సాతివరిబాణిజ్ యేసుజ్ మరి బత్కిన్తి దేవుణు ఆత్మ మీలోఇ బత్కజిమహిజ, సాతివరిబాణిజ్ క్రీస్తుజ్ మరి బత్కిన్తి దేవుణు సాజిసాని మీ ఒడోల్దిజ్ బా బత్కిస్సాన్. మీలోఇ మన్ని దేవుణు ఆత్మదాన్ యాక కినాన్.

12 అందెజె తంబెరిజాండె, మాటు ఉండ్రె దన్నిజ్ లోజిజ మండ్రెజ్ బాజిత మన్నికాట్ గాని అక్క ఒడోల్ది సెఇ ఆసెజ్ లోజినిక ఆఏద్.

13 ఎందానిజ్ ఇహిజ, మీ ఒడొలేది సెజ ఆసెజాణిజ్ ఏలుబడిః కిబె ఆని మన్ను వెహ్తిలెకెండ్ నడిఃతిజ మీరు సాన సొనార్. గాని దేవుణు ఆత్మదాన్ మీ మన్నుదు మన్ని సెజ ఆసెజ లాగ్లిపొక్తిజ ఎలాకాలం బత్కినిదెర్.

14 దేవుణు ఆత్మ నడిఃపిసిని వజ నడిఃనికార్ దేవుణు కొడొరె.

15 ఎందానిజ్ ఇహిజ, దేవుణు మజీ సిత్తి ఆత్మ మజీ తియెల్ తపిసి వెటి పణిమణిసిర్ లెకెండ్ ముందాల్ మహివజ సిక్స వానాద్ ఇజి తియెలాజి మండ్రెజ్ ఇడ్వన్. గాని మజీ దేవుణు కొడొర్ ఇజి ఇడ్డ మనాన్. అందెజ మాటు ఏలు దేవుణుదిజ్ అబ్బు ఇజి కూక్తెజ్ ఆనాద్.

16 మాటు దేవుణు కొడొర్నె ఇజి దేవుణు ఆత్మ మా ఆత్మవెట కూడిఃతాండ్రె నిజం వెహ్నినాన్ ఇజి మాటు నెసినాట్.

17 మాటు దేవుణు కొడొర్ కాక దేవుణు వన్ని కొడొరిజ్ ఇడ్డిమన్ని ఆస్తిదిజ్ అక్కు మజీ వానాద్. దేవుణు క్రీస్తుజ్ ఇడ్డిమన్ని అక్కుజ్బా క్రీస్తువెట మజీ దొహ్కె. ఎలాగ ఇహిజ మాటు క్రీస్తువెట వన్ని గొప్ప గవరం దొహ్కెజ్ ఇహిజ వన్నివెట కస్టమ్కుబా బరిస్తెజ్వలె.

వాని కాలమ్దు తోర్ని సోకు

18 యా కాలమ్దు మజీ వాని కస్టమ్కు సుడతిజ అక్కెజ్ ఏవటిదిక్కెజ్ ఆఉ ఇజి నాను ఒడొబిజిన. గాని వాని కాలమ్దు దేవుణు మజీ తోరిసిని సోకు దిన్నిజ్ ఇంక ఎస్సా గొప్ప పెరిక.

19 దేవుణు కొడొర్ ఎయెర్ ఇజి దేవుణు తోరిస్ని కాలం వందిజ్ దేవుణు తయార్ కిత్తికెజ్ విజు ఆసదాన్ ఎద్దుసుడొఃజి మంజినె.

20 ఎందానిజ్ ఇహిజ దేవుణు తయార్ కిత్తికెజ్ విజు పణిదిజ్ రెవిండ సిక్స సీజి ఇడ్డాన్. ఎలాగ ఇహిజ అక్కెజ్ కిత్తిక ఆవద్. ఉండ్రీ దన్ని వందిజ్ వారు ఎద్దుసుడొఃజి మండ్రెజ్ ఇజి దేవుణునె అక్క జర్పిస్తాన్.

21 ఇనిక ఎద్దుసుడొఃజి మంజినె ఇహిజ, దేవుణు తయార్ కిత్తికెజ్ విజు ఏలు పాడాఃజి సొని దన్నిజ్ అడిగి ఆతె మన్నె గాని దన్నిబాణిజ్ని దేవుణు డొబిస్ని దన్నిజ్ ఎద్దుసుడొఃజి మంజినె. వన్ని కొడొరిజ్ తగితి లెకెండ్ గొప్ప జాయ్ కల్గితి మన్ని విడుఃదల సీనాన్ ఇజి ఎద్దుసుడొఃజినె.

22 ఏలుదాక, ఏరుకాబాని ఆయ్లికొడొః నొప్పిదాన్ అడొబానిలెకెండ్, దేవుణు తయార్ కిత్తికెజ్ విజు ఉండ్రెలెకెండ్ మొరొ ఆజి మంజినె.

23 దేవుణు తయార్ కిత్తికెజ్ విజునె ఆఉ, దేవుణు ఆత్మ దొహ్కెమాటుబా అడొబాజి మంజినాట్. మా లొఇ మన్ని దేవుణు ఆత్మ ఇహిజ తొలిత దొహ్కె ఉండ్రీ ఇనాయం లెకెండ్. వెనుక వాని పూర్తి ఇనాయమ్దిజ్, ఇహిజ దేవుణు వన్ని కొడొరిజ్ ఇడ్డిమన్ని గొప్ప అక్కువందిజ్ మాటు ఎద్దుసుడొఃజి మంజినాట్. నస్తివలె మా ఒడొలే కస్టమ్దాన్ డొబె ఆనాద్లె.

24 దేవుణు మజీ రక్సిస్తిబాణిజ్ అసి మాటు మజీ వాని జాయ్ కల్గితిమన్ని విడుఃదలవందిజ్ ఎద్దు సుడొఃజి మంజినాట్. ఎద్దుసుడొఃజి మంజినిక సుడొఃతాన్ ఇహిజ ఒరెన్ దన్నివందిజ్ ఎద్దుసుడొఃజి మండ్రెజ్ ఆక్కర్ సిల్లెద్గదె. ఎందానిజ్ ఇహిజ సుడొఃతి వెనుక దన్నివందిజ్ మరి ఎద్దుసుడొఃజి మన్వన్గదె.

25 గాని మాటు సుడఃఇ దన్నివందిజ్ ఎద్రుసుడఃజి మహిజ్, దన్నివందిజ్ ఓరిసి మంజినాట్.

26 అయావజనె మా లోఇమన్ని ఆత్మ వందితిమన్నివలె దేవుణుఆత్మ మజీ సత్తు సీజినాన్. ఎలాగ పార్దనం కిదెజ్ ఇజి నెన్విండ మాటజాణిజ్ వెప్తాజ్ అట్ఇనన్ని గుపె ఆనివలె దేవుణు ఆత్మనె మా వందిజ్ పార్దనం కిజినాన్.

27 మా మన్నుదు ఇనిక ఇజి దేవుణు సూణాండై, దేవుణు ఆత్మ వెప్పిక అర్దం కిజినాన్. అక్క ఇనిక ఇహిజ దేవుణు ఆత్మ దేవుణు వెట ఎలాగ పార్దనం కిదెజ్ ఇజి దేవుణు ఆస ఆజినాండ్రొ అయావజ దేవుణు ఆత్మ వరివందిజ్ పార్దనం కిజినాన్.

విజువనకాజ్ ముస్కు గొప్పుజ గెలిస్తాట్

28 దేవుణుదిజ్ ప్రేమిసినివరిజ్ వాండ్రు ఏర్పాటు కిత్తిదన్నిజ్ ఎర్లిస్తవరిజ్, విజు నెగెండ్ జర్పిసినాన్ ఇజి మాటు నెసినాట్.

29 దేవుణు ముందాలన్ వన్నిజ్ నమ్మిని వరిజ్ నెస్తాండ్రె వరిజ్ ఎర్లిస్తాన్. వన్ని మరిసెలెకెండ్ ఆనార్ ఇజి దేవుణు వరిజ్ కేట ఇడ్తాన్. ఆహె కిత్తిజ్ క్రిస్తు దేవుణుదిజ్ పెరిమరిసి లెకెండ్ ఆనాన్. దేవుణు కొడఃరాతి మాటు యేసుజ్ తంబెరుజు లెకెండ్ ఆనాట్.

30 ఎయెర్ దేవుణుదిజ్ నమ్మినార్ ఇజి దేవుణు ముందాలన్ నెస్తాన్. వరిజ్ దేవుణు కూక్తాన్. దేవుణు కూక్తిజ్ వన్నిడగ్గు సోహివరిజ్ వరి పాపమ్కు విజు నెమిస్తాండ్రె దేవుణు వెట కూడికెత్తికార్ ఇజి ఇడ్తాన్. కూడుఃప్తి వరిజ్ వన్ని గొప్పు జాయ్ సిత్రాన్.

దేవుణు ప్రేమ

31 ఏలు దన్నివందిజ్ మాటు ఇనిక వెహ్లాట్. దేవుణు మా దరిజ్ మహిజ మా ఎద్రు ఎయెర్బా నిల్వీర్ ఇజినె వెహ్లాజ్.

32 దేవుణు వన్ని సొంత మరిసిజ్ సివిండ ఆవితాన్. గాని గొప్పు కన్ఠమాతి సావుదిజ్ ఒపజెప్తాన్. క్రిస్తుజ్ మజి సెత్తి దేవుణు, మాటు వన్ని వందిజ్ బత్కిదెజ్ మజి కావాలిస్తెకెజ్ విజు సివిండ్రా? నిజం సీనాన్.

33 దేవుణు ఎర్లిస్తవరి ముస్కు తప్పుజ్ మొప్పి వరి ముస్కు గెలిస్తెజ్ ఎయెర్బా అట్విర్. ఎందానిజ్ ఇహిజ, దేవుణునె మా పాపమ్కు నెమిసి మజి వన్ని వెట కూడుఃప్త మనాన్.

34 మజి సిక్స సీదెజ్ ఇజి ఎయెన్బా తీర్పు తీరిస్తెజ్ అట్విన్. మజి సిక్స సీదెజ్ ఇజి యేసు తీర్పు సీనాండ్రా? సిల్లెన్. ఎందానిజ్ ఇహిజ, మా వందిజ్ సాతి యేసుజ్ దేవుణు వన్ని ఉణెర్ పడఃకాదు బనయి కితాండ్రె గొప్పు గవీరం సిత్రాన్. ఏలు క్రిస్తునె మా వందిజ్ దేవుణుబాన్ బతిమాల్జినాన్

35 క్రిస్తుజ్ మా ముస్కు మన్ని ప్రేమదిజ్ అడ్డు కిదెజ్ ఇనిదన్నిజ్బా అట్విద్. స్రమెజ్ వాతిజ్బా గాని, కన్ఠమ్కు వాతిజ్బా గాని, మాలెజ్ వాతిజ్బా గాని, కరు వాతిజ్బా గాని, పొర్పాదెజ్ సొక్కెజ్ సెలితిజ్బా గాని, ఇని ప్రమాదమ్కు వాతిజ్బా గాని, మజి సప్తిజ్బా గాని క్రిస్తు ప్రేమ ఎసెజ్బా డిఃన్ఎండ మంజినాద్.

36 యాకెజ్ విజు దావీదు రాజు రాస్తి లెకెండ్ మన్నె. “మాపు మీ లోకుర్ ఆత్సా కాక ఆఇకార్ ఎసెజ్బా మజి సప్తెజ్ ఇజి సుడఃజినార్. గొర్రెజ్ కత్పికార్ వనకాజ్ కొయ్దెజ్ సుడఃనిలెకెండ్ మజి సప్తెజ్ సుడఃజినార్”.

* 8:36 8:36 కీర్తన 44:22.

37 యాకెజ్ విజు జర్గితిజ్బా మాటు క్రీస్తు ప్రేమదాన్ విజు వనకాజ్ మున్సు గొప్పజ గెలిసినాట్.

38-39 యాక నాను గటిజ నమ్మిజిన. ఇనిక ఇహిజ, సావు ఆతిజ్బా గాని, బత్సు ఆతిజ్బా గాని, దేవుణు దూతార్ ఆతిజ్బా గాని, దెయమ్క సత్తుజ్ ఆతిజ్బా గాని, ఏలు జర్గినికెజ్ ఆతిజ్బా గాని, వాని కాలమ్దు జర్గినికెజ్ ఆతిజ్బా గాని, ఏలుబడిః కినికార్ ఆతిజ్బా గాని, పెరి ఎత్తుదు మన్నికెజ్ ఆతిజ్బా గాని, పెరి జోరెదు మన్నికెజ్ ఆతిజ్బా గాని, మరి ఇనికబా గాని దేవుణుదిజ్ మా మున్సు మన్ని ప్రేమదిజ్ అడ్డు కిదెజ్ వనకాజ్ అట్ఉ మా ప్రబు ఆతి యేసుక్రీస్తు మా వందిజ్ కిత్తి గొప్ప పెరి పణిజాణిజ్ దేవుణు వన్ని ప్రేమ తోరిస్తాన్.

9

యూదురు వందిజ్ పవులు విసారిసినాన్

1-2 ఏలు నాను ఉండ్రీ వెహ్పు, అక్క నిజమ్నె. అబద్దం ఆవిద్. నాను వెహ్పిక నిజమె ఇజి క్రీస్తు నెసినాన్. నాను వెహ్పిక అబద్దం ఆవిద్. నా సొంత జాతి ఆతి యూదురు వందిజ్ నా మన్సుదు గొప్ప బాద ఆజిన. డిన్ఏండ దుకం ఆజిన. నాను వెహ్పిక నిజమ్నె ఇజి నా మన్సుని దేవుణు ఆత్మ సాసి వెహ్పినార్.

3 నా సొంత జాతి ఆతి యూదురు, క్రీస్తుజ్ నమ్మిదెజ్ ఇజి నాను ఆస ఆజిన. అక్క జర్గిదెజ్ దేవుణు బాణిజ్ నా మున్సు సయిప్ వాతిజ్బా, క్రీస్తుబాణిజ్ నజి ఎర్గిస్తిజ్బా పరవ సిల్లెద్ ఇజి ఒడఃబిజిన.

4 వారు ఇస్రాయేలుదికార్, వన్ని సొంత లోకుర్ ఇజి దేవుణు ఇడ్డికార్. దేవుణు వన్ని గొప్ప గుణమ్దాన్ ఎయెర్ సిల్లి బాడ్డిదు నడిఃపిస్తికార్. దేవుణు వరి వెటనె ఒపుమానమ్కు కిత్తాన్. దేవుణుదిజ్ ఎలాగ మాడిఃస్టెజ్ ఇజి వరిజె వెహ్హాన్. వరిజె దేవుణు సిన ఇజి ఒపుమానమ్కు కిత్త మనాన్.

5 వరి అనిగొగిరు ఆతి అబ్రహాం, ఇస్సాకు, యాకోబు ఇనికార్ ఇస్రాయేలు లోకుర్ లొఇ గొప్ప పేరు పొందితికార్. దేవుణు పొక్కు ఇజి ఒపుమానమ్కు కిత్తి రాజు యా యూదు జాతిలోఇనె లోకు వజ పుట్టాన్. విజేరిమున్సు ఏలుబడిః కిని దేవుణు ఎసెజ్బా పొగిడః ఆజి మనీన్.

6 అహిజ, దేవుణు ఇస్రాయేలు లోకురిజ్ వెహ్పికెజ్ జర్గివెతాద్ ఇజి ఇండ్రెజ్ ఆవిద్. ఎందానిజ్ ఇహిజ, ఇస్రాయేలు లోకుర్ ఇజి వెహె అనికార్ విజేరి దేవుణుదిజ్ సరియాతి సొంత లోకుర్ ఆవిర్.

7 అబ్రాహాం పొటాదికార్ విజేరి వన్ని తెగాదు పుట్టికార్ ఇజి దేవుణు ఇడ్ఏవన్. ఎందానిజ్ ఇహిజ “నీ కొడొః ఆతి ఇస్సాకువెలెహాన్ వానికారి నీ జాతి ఆనార్”*, ఇజి దేవుణు అబ్రహాం వెట వెహ్హ మనాన్.

8 ఎలాగ ఇహిజ, అబ్రహాం తెగాదు పుట్టికార్ విజేరి దేవుణు కొడొః ఆవిర్. గాని దేవుణు అబ్రహాముజ్ సిత్తి ఒపుమానం నమ్మితిజ్ దేవుణు కొడొః అబ్రాహాముజ్ సరియాతి తెగాదికార్ ఇజి దేవుణు ఇడ్వాన్.

9 దేవుణు అబ్రహాం వెట కిత్తి ఒపుమానం ఇక్కాదె. “కాలెహిజ్ యా సమయమ్దు నాను వాన. నస్తవలె నీ అల్ని ఒరెన్ కొడొః ఇడ్వాదెల్”*.

10 అక్కాదె ఆవిద్, రిబెక పొటాదివరిజ్ ఒరెండ్రె అప్పొసి, ఎయెన్ ఇహిజు మా అనిగొగొ ఆతి ఇన్నాకు.

11-13 ఇన్నాకు ఆల్ని రిబెక పాత డిఃస్తి మహివలె, దేవుణు దన్నివెట వెప్తాన్. జవ్ల మరిసిర్ పుట్వండ మహివలెనె, వారు తప్పు గాని నెగ్గిక గాని కివండ మహివలెనె దేవుణు దన్నిజ్ వెప్తాన్, “పెరికాన్ ఇజిరి వన్నిజ్ అడిగి మంజినాన్లె”,* ఇజి దేవుణు యాక వెప్తా నండొ పంటిజ్ వెనుక ఒరెన్ దేవుణు ప్రవక్త దేవుణు వెప్తా మాట వెప్తాన్. “యాకోబుజ్ నాను ప్రేమిసిన, ఏసావు నజి పడిఃఇకాన్”*. ఇజి. ఎందానిజ్ ఇహిజు, వన్ని లోకుర్ వందిజ్ దేవుణుదిజ్ ఉండ్రె ఉదెసం మహద్. అయాలెకెండ వాండ్రు నడఃపిన్నాన్. లోకుర్ కిని పణిజాణిజ్ ఆవిద్. దేవుణు ఏర్పాటుదానె విజు జర్గిజినె. దేవుణు ఏర్పాటు కినికెజ్ లోకుర్ ఒడఃబినిలెకెండ్రె ఆవిద్.

14 అహిజు, దేవుణు కొడొఃర్ ఎయెర్ ఇజి దేవుణు ఏర్పాటు కిత్తిదన్ని లోఇ దేవుణు తేడ సూణికాన్ ఇజి ఒడఃబినిదెరసు. సిల్లె, దేవుణు అనెయం కినికాన్ ఆవిన్.

15 ఎలాగ ఇహిజు, దేవుణు మోసావెట ఈహు వెప్తాన్. “ఎయెన్ మున్సు దయ తోరిస్తెజ్ నాను ఇస్టం ఆజినానొ వన్నిమున్సు దయ తోరిన్ను. ఎయెన్ మున్సు కనికారమాదెజ్ ఇజి ఇస్టం ఆజినానొ వన్ని మున్సు కనికారం ఆజిన”*.

16 అందెజె, యాక లోకు ఆసదానె గాని వన్నిపణిజాణిజ్ గాని దొహ్కెక ఆవిద్. దేవుణు దయదానె యాక జర్గిజినాద్.

17 దేవుణు మాటదు ఈహు మనాద్. దేవుణు పరోరాజు వెట ఇనిక వెప్తాన్ ఇహిజు, నాను ఎస్సానొ సత్తు మన్నికాన్ ఇజి నీ వెలెహాన్ విజుబాణి లోకుర్ వెండ్రెజ్ నె నిజి రాజువజ ఇడ్డ మన్న”* ఇజి.

18 అహిజు ఎయెన్ మున్సు దయ తోరిస్తెజ్ దేవుణు ఇస్టం ఆనాండ్రొ వన్ని మున్సు దయ తోరిన్నాన్. ఎయె మున్సు గర్త కిబిస్తెజ్ ఇస్టం ఆనాండ్రొ వన్ని మున్సు గర్త కిబిన్నాన్.

దేవుణు విజు జర్పిసినాన్

19 ఏలు మీరు మరి వెప్పాదెర్పు. దేవుణు ఇస్టమదిజ్ ఎయెన్బా ఎద్రిస్తెజ్ అట్వన్గదె. మరి దేవుణు ఇస్టం వజ లోకుర్ కిడెజ్ ఇజి విజు జర్పిన్నవలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెహైజానాన్?

20 గాని దేవుణు ఎద్రు వర్గిడెజ్ లోకు నీను ఎయి?. “తయార్ కిత్తి వన్నివెట, తయార్ కిబె ఆతికెజ్ ఎందానిజ్ నజి ఈహు తయార్ కిత్తి ఇజి వెన్బాదెజ్ ఆనాదా?

21 కుండెజ్ తయార్ కినివన్నిజ్ ఉండ్రె ముదదాన్ రుండి రకమ్ది కుండెజ్ తయార్ కిడెజ్ అక్కు మనాద్గదె?. ఉండ్రె కుండ లోకుర్ సుడఃజి ఇక్క ఎస్సా నెగ్గిక ఇజి వప్పివందిజె మరి ఉండ్రె కుండ మాముల్ పణిదిజ్ ఇడ్పి వందిజ్.

22 దేవుణుదిజ్బా లోకుర్వెట ఇస్టమాతి వజ కిడెజ్ అక్కు మనాద్. పాపం కిని వరి వెట వన్ని నండొ కోపమాదాన్ వాని గొప్ప సత్తు తోరిస్తెజ్ ఆస ఆజినాన్. గాని వరివెట దేవుణు వెటనె కోపం ఆవిండ మహిజు, నాసనం వందిజ్ ఇడె ఆతి మన్ని వరి వెట కోపం ఆవిండ ఓర్పుదాన్ మంజినాన్.

* 9:11-13 9:11-13 అది 25:23. * 9:11-13 9:11-13 మలా 1:2,3. * 9:15 9:15 నిర్ఘమ 33:19. * 9:17 9:17 నిర్ఘమ 9:16.

23 ఎందానిజ్ ఇహిజ, వన్ని గొప్ప దయ దొహ్కొక్కి మజి, వన్ని గొప్ప జాయ్ వందిజ్ తయార్ కిత్తివరిజ్ దేవుణు వన్ని గొప్ప జాయ్ తోరిస్తెజ్ ఆహొ కిత్తాన్ ఇహిజ మాటు ఇనిక వెహ్సాట్?

24 ఏర్పాటు కిబె ఆతి మాటు ఎయెర్ ఇహిజ, యూదురిని యూదురు ఆఇజాతికార్బా.

25 యూదురు ఆఇ జాతిదివరిజ్ ఎర్లిసినివందిజ్ హుసెయ ప్రవక్త వెట దేవుణు ఈహు వెహ్సాన్. “నా లోకు ఆఇ వరిజ్ ఏలు నా లోకుర్ ఇజి కూక్కు. నాను ముందాల ప్రేమ తోరిస్ ఇ వరిజ్ నాను ప్రేమిసినికార్ ఇజి కూక్కు”.

26 దేవుణు ఆఇ జాతిదివరి వందిజ్ వెహ్సా మాటజ్ హుసెయ మరి వెహ్సాన్. “మీరు మా లోకుర్ ఆఇదెర్ ఇజి నాను వెహ్సాబాన్, బత్తిని దేవుణు కొడొర్ ఇజి మీరు పేరు ఇడె ఆనిదెర్”.

27 యెసయ ప్రవక్త ఇస్రాయేలు లోకుర్ వందిజ్ ఇనిక వెహ్సాన్ ఇహిజ, “ఇస్రాయేలు సమ్దరం ఒడ్డుదు మన్ని ఇస్కు లెకెండ, లెక్క కిదెజ్ అట్ ఇ నస్సా లోకుర్ ఆతిజ్బా, వరిలో ఇ ఉండ్రీ ఇజిరి గుంపుదిజ్ నె దేవుణు రక్కిస్సాన్.

28 ఎందానిజ్ ఇహిజ దేవుణు అల్పుయం ఆవండ యా లోకం ముస్కు తీర్పు కినాండ్రై వన్ని పణి వెటనె పూర్తి కినాన్లె”.

29 దేవుణు కనికారం తోరిస్ ఇజ్ ఎయెన్ బా సిక్నడాన్ తప్రె ఆవన్. యెసయ ప్రవక్త ముందాల వెహ్సాలెకెండ, “విజు దన్నిజ్ అతికారం మన్ని దేవుణు మా కొడొకొక్కారిజ్ ఇడవండ పూర్తి సప్తాన్ ఇహిజ, మాటుబా సొదోము గొమొర పట్టుమది వరిలెకెండ పూర్తి పాడాత మహాట్సు”.

యూదురు గెలిస్తెజ్ అట్వండ ఆజినార్

30 అహిజ, ఏలు ఇనిక వెహ్సాజ్? దేవుణు వరిజ్ నీతినిజయ్ మన్నికార్ ఇజి ఇడ్డెజ్ యూదురు ఆఇకార్ సుడవితార్ గాని దేవుణు వరిజ్ నీతినిజయ్ మన్నికార్ ఇజి ఇడ్డాన్. క్రీస్తు ముస్కు నమకం ఇడ్డిజ్ నీతినిజయ్ మన్నికార్ ఇజి ఇడ్డాన్.

31 గాని ఇస్రాయేలు లోకుర్ ఇహిజ దేవుణు మోసెజ్ సిత్తి రూలుజ్ లోజీతిజ్ నీతి మన్నికార్ ఆనార్ ఇజి నండొ సుడతార్ గాని అట్వండ ఆతార్.

32 ఎందానిజ్ ఇహిజ వారు దేవుణు ముస్కు నమకం ఇడవితార్. గాని వరి పనిజాణిజ్ నీతినిజయ్కార్ ఆనార్ ఇజి నంబ సుడతార్. అందెజె దేవుణు క్రీస్తు ఇజి ఎర్లిసి వన్ని ముస్కు అడ్డు ఆతి పణుకు ముస్కు అర్నిలెకెండ వారు తొరో ఒడిజి అర్దార్.

33 యాక ప్రవక్త రాస్తి లెకెండ మనాద్. “సుడెదు, నాను సియెన్దు ఉండ్రీ పణకు నిల్పిన. అక్క అడ్డు ఆనాదె లోకాజ్ తొరో ఒడిజి అర్పాద్. గాని వన్ని ముస్కు నమకం ఇడ్డికాన్ సిగు ఆవన్”.

10

1 తంబెరిజాండె, నా సొంత జాతి అతి యూదురిజ్ దేవుణు రక్కిస్తెజ్ ఇజి నాను గొప్ప ఆస ఆజి పార్లనం కిజిన.

☆ 9:25 9:25 హోసయ 2:23. ☆ 9:26 9:26 హోసయ 1:10. ☆ 9:28 9:28 యెసయ 10:22,23. ☆ 9:29 9:29 యెసయ 1:9. ☆ 9:33 9:33 యెసయ 8:14; 28:16.

2 వారు దేవుణు వందిజ్ గొప్ప ఉసార్దాన్ మన్నికార్ గాని దేవుణుదిజ్ పూర్తి నెన్వీర్ ఇజి వరివందిజ్ నాను వెహ్సిన.

3 ఎందానిజ్ ఇహిజ, దేవుణు లోకురిజ్ ఎలాగ నీతినిజయ్కార్ ఇజి ఇడ్వాన్ ఇజి వారు అర్థం కివీర్. నీతినిజయ్కార్ ఇజి దేవుణు ఇడ్వివందిజ్ లోకు ఎలాగ నడిదెజ్ ఇజి దేవుణు తోరిన్తి సర్లు నడిఃవిండ నీతినిజయ్కార్ ఆదెజ్ ఇజి వారు వరి సొంత రూలుజ్ ఇడ్వార్.

4 క్రీస్తు వాతిజ్ ఏలు దేవుణు మోసెజ్ సిత్తి రూలుజ్ లోకాజ్ దేవుణుబాన్ కూడుఃప్పాన్. క్రీస్తుముస్కు నమకం ఇడ్వికార్ విజేరిజ్ దేవుణు వన్నిబాన్ కూడుఃప్పాన్.

విజేరి వందిజ్ ఉండ్రీ కొత సరి

5 దేవుణు మోసెజ్ సిత్తి రూలుజాణిజ్ నీతినిజయ్కార్ మన్నికార్ ఆదెజ్ సుడఃజిని వన్ని వందిజ్ మోసెబా రాస్త మనాన్. ఇనిక ఇహిజ “రూలుజ వజ నడిదెజ్ ఆస ఆనికాన్ వనకదటాన్ బత్తిదెజ్వలె”

6 గాని నమకం ఇడ్వివందిజ్ నీతినిజయ్కార్ మన్నికార్ ఇజి దేవుణు ఇడ్విదన్ని వందిజ్ మన్నిమాటాదు మాటు ఇని ఇనికెజ్ ఆవిద్ ఇజి వెహ్తా మనాద్. ఇనికెజ్ ఇహిజ “రక్కణ దొహ్క్కాద్ ఇజి పరలోకమ్దు ఎక్కి క్రీస్తుజ్ అడిగి తత్తెజ్ ఎయెన్ సొనాన్ ఇజి మీ మన్గుదు వెహ్తెజ్ ఆవిద్”.

7 అయాలెకెండె సాతివరిబాన్ అయాలోకమ్దు సొన్ని క్రీస్తుజ్ బాణిజ్ తత్తెజ్ ఎయెన్ సొనాన్ ఇజి మీ మన్గుదు వెహ్తెజ్ ఆవిద్.

8 గాని అయ మాట ఇనిక వెహ్సినాద్? ఇనిక వెహ్సినాద్ ఇహిజ, “దేవుణు మాట డగ్గునె మనాద్. అయ మాటెజ్ మీ వెయుదునె మన్నె, వెహ్తెజ్ ఆనిదెర్. మీ మన్గుదు మన్నె, ఒడ్కుబిదెజ్ ఆనిదెర్”^{*} మాటు సాటిసిని యా మాట క్రీస్తు ముస్కు నమకం ఇడ్డు ఇజినె.

9 అయ మాట ఇనిక ఇహిజ, యేసునె ప్రబు ఇజి ఎయెన్బా లోకుర్ ముందాల వెహ్తెజ, అక్కాదె ఆవిద్, యేసుజ్ సాతివరిబాణిజ్ దేవుణు నిక్తాన్ ఇజి ఎయెన్బా వన్ని గర్బమ్దు నమ్మిత్తిజ దేవుణు వన్నిజ్ రక్కిస్సాన్.

10 ఇనిక ఇహిజ, మీ మన్గుదు నమ్మిత్తిజ దేవును మిజి వన్నిబాన్ కూడుఃప్పాన్. అక్కాదె ఆవిద్, యేసు నీ ప్రబు ఇజి లోకుర్ ముందాల వెహ్తెజ దేవుణు నిజి రక్కిస్సాన్లె.

11 దేవుణు మాటదు ఇనిక రాస్త మనాద్ ఇహిజ, క్రీస్తు ముస్కు నమకం ఇడ్వికార్ ఎయెన్బా సిగు ఆవిన్.

12 యూదురుజ్ గాని ఆఇజాతిది వరిజ్ గాని దేవుణు ఉండ్రెలెకెండె సూణాన్. వాండ్రు ఒరెండ్రె విజేరిజ్ ప్రబు ఆతిజ్, వన్నిజ్ లొస్సివరిజ్ విజేరిజ్ వాండ్రు నండ్రె దీవిస్సాన్.

13 యాక ఒరెన్ ప్రవక్త వెహ్తెలెకెండె, “నజి రక్కిన్అ ఇజి దేవుణు వెట వెహ్వివరిజ్ విజేరిజ్ దేవుణు రక్కిస్సాన్”^{*}.

14 గాని యూదురు వందిజ్ సెగొండార్ వెహ్సినార్సు. క్రీస్తుముస్కు నమకం సిల్లిజ “నజి రక్కిన్అ”, ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్

^{*} 10:5 10:5 లేవి 18:5. ^{*} 10:8 10:8 ద్విత్తి 30:14. ^{*} 10:13 10:13 యోవేలు 2:32.

ఎలాగ వన్నిజ్ నమ్మినారే? ఎయెరిజ్ బా క్రీస్తు వందిజ్ నెస్పిన్ ఏండ మహిజ వారు ఎలాగ వెనార్?

15 ఎయెరిజ్ బా దేవుణు దేవుణు పోక్ ఏండ మహిజ సాటిస్పికార్ ఎలాగ సొనార్. దన్ని వందిజె దేవుణు మాటాదు ఈహు రాస్త మనాద్. “దేవుణు సువార్త వెప్టాజ్ సొస్పినిక ఎస్సా గొప్ప నెగ్గిక”*.

16 దన్నిజ్ నాను వెస్సిన. క్రీస్తు వందిజ్ వెప్టాజ్ దేవుణు లోకాజ్ పోక్టాన్ గాని విజేరె సువార్త దిజ్ లొజి ఏతార్. దిన్ని వందిజ్ యెసయ ప్రవక్త ఇనిక వెప్టాన్ ఇహిజ, “ప్రబు, మాపు వెప్టొ మాటెజ్ ఎయెరిబా వెన్ ఏతార్”*, ఇజి.

17 అహిజ క్రీస్తు వందిజ్ విప్టిజానె నమకం ఇడ్వార్. ఎయెరిబా సువార్త సాటిస్పిజానె క్రీస్తు వందిజ్ వెండ్రెజ్ ఆనాద్.

18 గాని నాను వెన్ బాజిన, “యూదురు సువార్త వెన్ ఏరా?”, “నిజ మె వెహోర్”, ఇజి వెహ్న. కీర్తనదు రాస్తి మన్ని లెకెండ, దేవుణు వందిజ్ వారు వెప్టిక లోకమ్ దు విజు బాడ్డిజ మన్నికార్ వెహోర్. అందిదెజ్ అట్ ఇ బాడ్డిదుబా దేవుణు వందిజ్ మాటెజ్ అందితె మన్నె*.

19 మరి ఉండ్రీ ప్రస్తు వెన్ బాన, “సువార్త వందిజ్ యూదురు అర్థం కితారా? సెగొండార్ అర్థం కితార్ గదె. దేవుణు ఇస్రాయేలు లోకాజ్ దిన్ని వందిజ్ వెప్టిక మోసె వెప్టాన్, “యూదురు ఆఇజాతిది వరివెట మిజి గోస కిబిన్నాలె. అర్థం కిదిజ్ అట్ ఇ వరిజ్ నాను దీవిన్నాలె”*.

20 యెసయ ప్రవక్త బా దిన్ని వందిజ్ గటిజ రాస్త మనాన్, “నజి రెబాఇవరిజ్ నాను దొహ్ క్కు. నజి వెన్ బాఇవరిజ్ నాను తోరె ఆన”*.

21 గాని ఇస్రాయేలు లోకుర్ వందిజ్ దేవుణు ఇనిక వెప్టాన్ ఇజి యెసయ రాస్తాన్, “నా మాటదిజ్ లోజి ఏండ నా వెట ఎద్రిసిని నా లోకు వందిజ్, వారు మర్జి వానిదాక నాను ఎద్రుసుడ్డెజి మంజిన”*.

11

యూదురిజ్ దేవుణు దయ తోరిస్పాన్.

1 అహిజ నాను వెన్ బాజిన, దేవుణు వన్ని సొంత లోకుర్ ఆతి యూదురిజ్ డి:స్ట సిత్రాండ్రా? సిల్లెన్, ఎస్సెజ్ బా డి:స్ ఏన్. ఎలాగ ఇహిజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమ్ దు పుట్ట మన్ను. గాని దేవుణు నజి డి:స్ ఏన్ తాన్.

2 సిల్లె దేవుణు ముందాలెనె కూక్కి వన్ని లోకుర్ ఇజి కేటకిత్తి వరిజ్ నెక్కిపోక్ ఏతాన్. ఏలియ ప్రవక్త దేవుణువెట మొరొ అతాన్ ఇజి దేవుణు మాటాదు రాస్తి మన్నిక గుర్తు కిజినిదెరగదె. వాండ్రు ఇస్రాయేలు లోకుర్ వందిజ్ ఇనిక వెప్టాన్ ఇహిజ,

3 “ప్రబువా నిజి మహి ప్రవక్తరిజ్ విజేరిజ్ వారు సప్టార్. నిజి సంత సుర్జి సీని మాలి పీటెజ్ వారు డె:య్ పోక్టార్. నిజి నమ్మిని వరి లోఇ నాను ఒరెనె మిగిలిత మన్ను. ఏలు నజిబా సప్టెజ్ సుడ్డెజి నార్”*.

* 10:15 10:15 యెసయ 52:7. * 10:16 10:16 యెసయ 53:1. * 10:18 10:18 కీర్తన 19:4.

* 10:19 10:19 ద్వితీ 32:21. * 10:20 10:20 యెసయ 65:1. * 10:21 10:21 యెసయ 65:2.

* 11:3 11:3 1రాజు 19:10,14.

4 గాని దేవుణు వన్నిజ్ ఇనిక వెహ్తాన్ ఇజి గుర్తు మన్నిదెరా?. “నీను ఒరిదె ఆఇ బయాలూ ఇని దెయమ్దిజ్ మాడినిన్ ఇ ఏడు వెయిజ్ లోకురిజ్ నావందిజ్ నాను కేట ఇడ్డ మన్ను”.

5 అయాలెకెండె యా కాలమ్దుబా దేవుణు యూదురి లోఇ ఉండ్రీ ఇజిరి గుంపుదిజ్ కేట ఇడ్డాన్. వన్ని దయాదర్మమ్దానె వరిజ్ కేట ఇడ్డాన్.

6 లోకుర్, వారు కిత్తి నెగ్గి పణిజ వందిజ్ ఆవిద్ గాని, దేవుణు దయాదర్మమ్దానె వన్నిముస్సు నమకం ఇడ్డెజ్ అట్టార్. ఎందానిజ్ ఇహిజ వారు కిత్తి నెగ్గి పణిజ్ వందిజ్ దేవుణు వరిజ్ ఎర్లిస్తాన్ ఇహిజ, వన్ని గొప్ప దయ సెడినె దోహ్క్కిక ఆవిద్గదె.

7 అందెజె ఇనిక జర్గితాద్ ఇహిజ, ఇస్రాయేలులోకుర్ నండొండార్ నండొ ఆసదాన్ రెబాతిక వరిజ్ దోహ్క్కావతాద్. దేవుణు ఎర్లిస్తి ఇడ్డి ఇజిరి గుంపుదివరిజె అక్క దోహ్క్కాద్. మిగిలిత్తికార్ దేవుణు వందిజ్ ఇనికబా నెస్తెజ్ అల్ ఇ లెకెండె దేవుణు కిత్తాన్.

8 దిన్నివందిజ్ దేవుణు మాటాదు రాస్త మనాద్. ఇనిక ఇహిజ, దేవుణు వరిమన్ను నిద్ర కినివరి మన్నువజ కిత్తాన్. వరిజ్ కణుకెజ్ మహె గాని సుడెనిదన్నిజ్ అర్దం కివిర్. వరిజ్ గిబ్బిజ్ మహె గాని వెహిదన్నిజ్ అర్దం కివిర్”*

9-10 దిన్నివందిజ్ దావీదు రాజుబా వెహ్తా మనాన్. వన్ని ముస్సు పగాతి వరివందిజ్ ఈహు వెహ్తాన్ “వారు సర్ద ఆనివలె కిని పణిజ్ వరిజ్ ఉరి లెకెండె ఆవిద్. నెగెండె మంజిసావ్ ఇజి ఒడెబినివలె వెటనె వరి ముస్సు నానసం రపిద్. దేవుణు వందిజ్ నిజమాతిక నెసవెండె ఆనివందిజ్ వరి మన్ను సీకటి ఆజి సానీద్. వారు గొప్ప బరుదాన్ వజ్నెలెకెండె ఆవిద్”.*

టోటాదు పిరిజిని ఒలివ మరాతు అడివిది కొమెజ్ అంతు తోహ్తాన్.

11 అహిజ, నాను వెన్బాజిన, యూదురు క్రీస్తుజ్ నెక్తిపొక్తిజ్ దేవుణు బాణిజ్ తెగు సాహూర్ ఇజి వెహ్తాజ్నా? ఆవిద్ ఎస్సెజ్బా ఆవిద్. గాని వారు క్రీస్తు ముస్సు నమకం ఇడెఇతిజ్, క్రీస్తుజ్ నమ్మితిజ్ వాని అయ రక్కణ దేవుణు యూదురు ఆఇవరిజ్ సిత్తాన్. మజి వానిక వరిజ్ దోహ్క్కాదా ఇజి యూదురు గోస ఆదెజ్వలె ఇజి యాక జర్గితాదా?

12 యూదురు క్రీస్తుజ్ నెక్తి పొక్తివలె యూదురు ఆఇజాతిదివరిజ్ దీవన దోహ్క్కాద్ ఇహిజ, వరిజ్ వాతి నస్తం ఆఇవరిజ్ లాబం ఆతాద్ ఇహిజ, దేవుణు ఎర్లిస్తి ఇడ్డి యూదురు దేవుణుబాన్ మర్లి వానివలె, యా లోకమ్ది విజు జాతిదివరిజ్ మరి ఎస్సానో గొప్ప లాబమ్కు వానె!

13 ఏలు యూదురు ఆఇ మిజి నాను వెహ్సిన. యూదురు ఆఇవరిజ్ అపొస్తుడు వజ దేవుణు నజి ఇడ్డిజ్ దన్నివందిజ్ గొప్పజ గవ్ రం దోహ్క్క మన్ను.

14 దేవుణు నజి ఒపజెప్పి యా పణి కిజి ఎలాగబా నా సొంత జాతి ఆతి యుదురిజ్ గోస పుటిస్తెజ్ ఇజి నాను సుడెజిన. ఎందానిజ్ ఇహిజ మిజి దేవుణు దీవిస్తిలెకెండె వరిజ్ దోహ్క్కెజ్ ఇజి వారుబా ఆస ఆతిజ దేవుణు వరిలోఇ నెగెండొరిజ్బా రక్సిస్సాన్.

15 దేవుణు మా సొంత లోకుర్ ఆతి యూదురు నండొండొరి నెక్తి పొక్తివలె యా లోకమ్దు మన్ని ఆఇజాతిది వరిజ్ నండొండొరిజ్ వన్నిబాన్ కూడుఃప్తాన్, అహిజ

* 11:4 11:4 1రాజు 19:18. * 11:8 11:8 ద్వితీ 29:4; యెసయ 29:10. * 11:9-10 11:9-10 క్రీస్తున 69:22,23.

దేవుణులు యూదురుజ్ వన్నిబాన్ కూడుఃప్పివలె ఇనిక వానాద్? సావుదాన్ బత్కునె వానాద్.

16 ఉండ్రి దూరు ముదదాన్ తొలిత సుప్తాక దేవుణుదిజ్ సీనిక ఇహిజ అయ ముద విజు దేవుణుదిజ్ సిత్తి లెకెండె. అయవజనె యూదురు దేవుణు లోకురె. ఎందానిజ్ ఇహిజ, వరి అనిగొగొరుబా దేవుణు లోకురె. ఉండ్రి మరాతి వెల నెగ్గక ఇహిజ అయ మరాతి కొమెజ్బా నెగ్గకెజ్నె. అయావజనె, యూదురి అనిగొగొరు దేవుణు లోకుర్కాక వరి కొణ్ణొ కొక్రాదికార్బా దేవుణు లోకురె.

17 టోటాదు మన్ని నెగ్గి ఒలివ మరాతి కొమెజ్ సెగం రుక్కిపొక్కిలెకెండె దేవుణు యూదురి సెగొండారిజ్ నెక్త పొక్తాన్. అడివిది ఒలివ మరాతి ఉండ్రి కొమలెకెండె యూదురు ఆఇ మిజ్ బోటాదు మన్ని నెగ్గి ఒలివ మరాతు కూడుఃప్తాన్. అయ నెగ్గి ఒలివ మరాతు కూడుఃప్తిజ్ కొమెజ్, అయ మరాతి వెలెజాణిజ్ కన లాగ్గి సత్తు ఆనివజ మిజ్బా యూదురుజ్ దేవుణు సిత్తి దీవన దొహ్క మనాద్.

18 మరాతాన్ కొమెజ్ కొయ్జి విసీర్పిలెకెండె దేవుణు యూదురిజ్ నెక్త పొక్తాన్ గాని యూదురు ఆఇ మీరు గర్త అనిక ఆవద్. మాపు వరిజ్ ఇంక పెరికాప్ ఇజి మీరు గర్త అతిజ యాక గుర్తు కిదెజ్. ఇనిక ఇహిజ వెలెజ్ బత్కినిక కొమెజాణిజ్ ఆవద్. వెలెజ్దానె మీరు బత్కిజనిదెర్.

19 మజి కూడుఃప్తెజ్నె దేవుణు యూదురిజ్ నెక్త పొక్తాన్ ఇజి మీలోఇ ఒరెన్ వెప్పొన్సు.

20 యాక నిజమె గాని, ఉండ్రి వెహ్న. యూదురు క్రీస్తు ముస్కు నమకం ఇడొఇ వందిజె దేవుణు వరిజ్ నెక్త పొక్తాన్. మీరు క్రీస్తుముస్కు నమకం ఇడ్తి వందిజ్నె గటిజ నిల్పినిదెర్. అందెజె గర్త ఆమాట్. జాగర్త మండ్రు.

21 ఎందానిజ్ ఇహిజ మరాతి కొమెజ్ ఇహిజ యూదురిజ్ దేవుణు నెక్కిపొక్కి లెకెండె, మీరు నిల్వెండ మహిజ మిజ్బా తవ్వెండ నెక్కు పొక్తాన్.

22 యాక గుర్తు కిదు. దేవుణు కనికారమ్దాన్ మనాన్. వాండ్రు కొపమ్దాన్బా మనాన్. వన్నిజ్ నెక్తి పొక్తి యూదురువెట దేవుణు కోపమ్దాన్ మనాన్. గాని యూదురు ఆఇ మిజ్ దేవుణు కనికారం తోరిసినాన్. గాని దేవుణు తోరిసి కనికారం మీరు నమ్మిత్తిజ్నె మిజ్ కనికారం తోరిసినాన్. సిల్లిజ మిజ్బా కత్తు విసీర్నాన్.

23 యూదురు క్రీస్తుముస్కు నమకం ఇట్టిజ మరాతు కొమెజ్ మరి అంతు తొప్పిలెకెండె దేవుణు వరిజ్ మరి వన్నిబాన్ కూడుఃప్తాన్. ఎందానిజ్ ఇహిజ వరిజ్ కూడుఃప్తెజ్ అట్నాన్.

24 యూదుర ఆఇ మీరు అడఃవిదాన్ తత్తి ఉండ్రి ఒలివ మరాతి కొమ లెకెండె. బోటాదు పిరిజిని ఒలివ మరాతు యా అడఃవిది కొమెజ్ దేవుణు అంతు తొప్తాన్. యాక మాముల్ జగ్గిదెజ్ కష్టం. అహిజ కత్తివిసీర్తి టోటమొక్కాది కొమెజ్ మరి అయ మరాతు అంతు తొప్తాజ్ ఎస్సానొ సులు. అయా లెకెండె నెక్తి పొక్తి యూదురిజ్ మరి వన్నిబాన్ కూడుఃప్తెజ్ దేవుణుదిజ్ ఇని అడ్డు సిల్లెద్.

దేవుణు యూదురుజ్ రక్కిస్సాన్

25 నాను ప్రేమిసిని తంబెరిజాండె, ఏలు ఉండ్రి డాఃజితి మన్ని గొప్ప సజతి మీరు నెస్టెజ్ ఇజి నాను వెప్పొన. నాను ఎందానిజ్ వెప్పొన ఇహిజ దేవుణు మిజ్ కూడుఃప్తివందిజ్ యూదురిజ్ ఇంక తెలిమన్నికాప్ ఇజి మీరు గర్త ఆవిండ మండ్రెజ్

ఇజినె. ఇనిక ఇహిజ యూదురు ఆఇ జాతిదివరి లోఇహాన్ దేవుణుబాన్ వాదెజ్ ఇజి వాండ్రు కేట కిత్తి నసొండార్ వన్నిబాన్ కూడుఃవె అనిపాక యూదురు దేవుణుదిజ్ నమ్మివండ వరిలోఇ నండొండారి మన్సు వాండ్రు గటి కినాన్.

26-27 యూదురు ఆఇవరి లెక్క పూర్తి ఆతి వెనుక, దేవుణు యూదురుజ్ రక్సిస్సాన్. దేవుణు ప్రవక్త ఒరెన్ రాస్తిలెకెండ్ అక్క జర్గినాద్. ఎలాగ ఇహిజ, “లోకురిజ్ రక్సిస్సికాన్, దేవుణు లోకుర్ బాణిజ్ వానాన్. నస్తివలె వాండ్రు మా లోకాజ్ వరి పాపం కిత్తి వందిజ్ ఎత్తుకిని బాణిజ్ డిఃబిస్సాన్. నాను ఒవుమానం కిత్తిలెకెండ్ వరి పాపమ్కు నాను లాగ్ను”^{*}.

28 యూదురు సువార్త నెక్తి పోక్తిజ్ దేవుణు వరిజ్, వన్నిజ్ పడిఃఇవరివజ ఇడ్తార్. గాని, వారు దేవుణు ఎర్లిస్తి లోకుర్ కాక దేవుణు వరిజ్ ప్రేమిసినె మనాన్. ఎందానిజ్ ఇహిజ వన్ని అనిగొర్ వెట వాండ్రు ఒట్టు కత్తి దన్నివందిజె,

29 దేవుణు యూదురిజ్ ఏలుబా ప్రేమిసినాన్. ఎందానిజ్ ఇహిజ దేవుణు ఎస్సెజ్బా వెప్తిలెకెండ్ కినాన్. వన్ని లోకుర్ ఇజి కూక్తి వరిజ్ ఎస్తివలెబా ప్రేమిస్సాన్. వరిజ్ ఎస్సెజ్బా దీవిస్సాన్.

30 యూదురు ఆఇ మీరు ముందాల దేవుణుదిజ్ లోజివండ మహిదెర్. గాని యూదురు దేవుణుదిజ్ లోజివండ ఆతిజ్ దేవుణు కనికారం మిజి వాతాద్.

31 అయావజనె, యూదురు దేవుణుదిజ్ లోజివండ ఆతిజ్ మిజి ఏలు కనికారం తోరిస్తిలెకెండ్ వరిజ్బా దేవుణు మరి కనికారం తోరిస్సాన్.

32 విజేరెవెట కనికారం తోరిస్సెజ్ ఇజి దేవుణు విజేరిజ్ వారు లోజివండ ఆతి మన్నిదన్ని లోఇనె డిఃస్త సీత్తాన్.

33 దేవుణు బుద్ది, గెణం ఎస్సానో గొప్ప పెరిక కొటె. వాండ్రు తీర్మనం కిత్తికెజ్ ఎయెన్బా అర్దం కిదెజ్ అట్వన్. వాండ్రు కిని పణి వందిజ్ ఎయెన్బా అర్దం వెప్తాజ్ అట్వన్.

34-35 ప్రవక్త దేవుణు మాటదు రాస్తిలెకెండ్ మనాద్ యాక. ఎలాగ ఇహిజ, “దేవుణు ఒడఃబినికెజ్ ఎయెజ్బా తెలివద్. దేవుణు ఇని ఇనికెజ్ కిదెజ్ ఇజి వన్నిజ్ బుద్ది వెప్తాజ్ ఎయెజ్బా అట్వన్^{*}. “ఎయెన్బా దేవుణుదిజ్ ఇనికబా సిదెజ్ సిల్లెద్. అందెజె దేవుణు ఎయెరిజ్బా మర్ది సిదెజ్ అక్కర్ సిల్లెద్^{*}”.

36 యాక నిజం ఇజి మాటు నెసినాట్. ఎందానిజ్ ఇహిజ, దేవుణు విజు తయార్ కిత్తాన్. అక్కాజ్ విజు మన్నె. వాండ్రు సీత్తి సత్తుదాన్ అక్కాజ్ బత్తిజినె. దేవుణుదిజ్ పొగ్డిఃదెజ్నె అక్కాజ్ మన్నె. విజెరె లోకుర్ దేవుణుదిజ్ ఎస్తివలెబా గొప్ప గవరం సీజి మనీద్. ఆమెన్.

12

కొత్త బత్తు

1 అందెజె మా తంబెరిజాండె, నాను మీవెట బతి మాల్లిన, దేవుణు మిజి నిస్సా దయ తోరిస్తివందిజ్ మీరు మిజినె దేవుణుదిజ్ పూజ లెకెండ్ సీదు. అయ పూజ బత్తిజి మంజిని వజ మండ్రెజ్వలె, దేవుణుదిజ్ కేట ఆతివజ దేవుణుదిజ్ ఇస్టం ఆతివజ మండ్రెజ్వలె. దేవుణుదిజ్ సిదెజ్ తగితి పొగ్డిఃజి మాడిఃసినిక ఇక్కాదె

^{*} 11:26-27 11:26-27 యెసయ 59:20,21; 27:9; యిర్మీయా 31:33,34. ^{*} 11:34-35 11:34-35

యెసయ 40:13. ^{*} 11:34-35 11:34-35 యోబు 41:11.

2 యా లోకమందికార్ బత్తిని వజ దేవుణుదిజ్ పడిఁవిండ బత్తిదెజ్ ఆవిద్. గాని మీ బత్తు అనివందిజ్, మీ మన్ను పూర్తి కొత్తాజ్ కిదెజ్ దేవుణుదిజ్ సరి సీదు. ఆహొ కిత్తిజ మీరు ఇనిక కిదెజ్ ఇజి దేవుణు కొరిజినాండ్రొ అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కొరిజనిక నెగ్గికాదె, వన్నిజ్ ఇస్టం ఆతికాదె, ఇని తక్కు సిల్లికాదె.

3 దేవుణు నజీ, వన్ని గొప్ప దయదాన్ నజీ అపొస్తుడు వజ ఇడ్తాన్. అందెజె నాను మిజి విజిదెరిజ్ వెప్పిన. నాను ఎలాగ మర్రికాన్ ఇజి ఒరెన్ ఒరెన్ ఒడఁబినివలె మీరు మన్నిదన్నిజ్ ఇంక నండొ మనాద్ ఇజి మీ వందిజ్ ఒడఁబిమాట్. గాని దేవుణు మిజి సిత్తి నమకమ్దిజ్ తగితివజ మిజి మీరె సరిఆతి వజ కొల్త కిదు.

4 ఉండ్రొ ఒడొల్దు కాల్కు కిక్కు ఇజి రక రకమ్ది బాగమ్కు మనె, వనక వనక పణిజ్ వేరె వేరె మన్నె.

5 అయవజనె, మాటుబా నండొండార్ గాని క్రిస్తు వెట కూల తొప్తాజ్ మాటు ఉండ్రె లెకండ్ మనాట్. మాటు ఉండ్రె ఒడొల్దిజ్ నెందితికాట్. ఒరెన్ మరి ఒరెన్ వన్నివందిజ్ మనాన్.

6 దేవుణు వన్ని గొప్ప దయ మజి సిత్తిజ్ నండొ రకమ్ది వరమ్కు* సిత్తాన్. యా వరమ్కు మాటు నెగెండ వాడుఁకొండెజ్. దేవుణు సిత్తి మాటెజ్ వెప్తాజ్ అట్టు ఇహిజ అక దేవుణు నీవెట వెప్తాన్ ఇజి నీను నమ్మిత్తి వజ వెప్తాజ్.

7 మహివరిజ్ అవ్సరం ఆతికెజ్ కిజి సీదెజ్నా మీ వరం ఇహిజ, అక్క కిదెజ్ దేవుణు మాటెజ్ నెస్సిసి సిదెజ్నా మీ వరం ఇహిజ నెస్సిసి సిదెజ్.

8 మహివరిజ్ దయరం వెప్తాజ్నా మీ వరం ఇహిజ దయరం వెప్తాజ్. సీబాజి సినిక మీ వరం ఇహిజ అక్క కల్లి సిల్లి మన్నుదాన్ సీదెజ్. సజమ్దిజ్ నడిఁపిసినికాన్ బాగ నడిఁపిస్తెజ్వెలె. బాద ఆతివరిజ్ కనికారం తోరిస్సికాన్, సర్దదాన్ కనికారం తోరిస్తెజ్వెలె.

ఎలాగ ప్రేమకిదెజ్

9 మీరు మహివరిజ్ కల్లి సిల్లెండ పేమిస్తెజ్. దేవుణుదిజ్ పడిఁఇ వనకబాణిజ్ దూరం మండ్రెజ్. అక్కెజ్ ఒద్ది డిఁసెజ్. దేవుణుదిజ్ ఇస్టం ఆతి వనకాజ్ డగ్గు కిదు.

10 సొంత ఇండ్రొణివరి లెకెండ్ ఒరెన్ మరి ఒరెన్ వన్నిజ్ నండొ ప్రేమిస్తెజ్. మర్యాద సీని దన్నిలోఇ ఒరెన్, మరి ఒరెన్ వన్నిజ్ వాండ్రు నజీ ఇంక పెరికాన్ ఇజి మర్యాద సీజి మండ్రెజ్.

11 దేవుణుది నెందితి సజతిజ లోఇ ఉసార్ ఆజి మండ్రు. బండెజ్ ఆమాట్. ప్రబు పణి లోఇ దేవుణు ఆత్మదాన్ ఉసార్ ఆజి పణికిదు.

12 దేవుణు మీ వందిజ్ గొప్ప సజతిజ్ కినాన్ ఇజి ఎద్రు సుడఁజి సర్దదాన్ మండ్రు. కస్టం వానివలె ఓరిసి మండ్రు. పార్దనం కిదెజ్ మన్ని సజతిజ వందిజ్ డిఁసెండ్ పార్దనం కిదు.

13 దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్సరం ఆతిజ వరిజ్ కావాలిస్తెజ్ సీదెజ్. దూరమ్దాన్ వాజిని వరిజ్ ఇండ్రొ కూక్కి మిజి మన్నిబాణిజ్ సీజి మర్యాద కిదు.

* 12:6 12:6 వరమ్కు ఇహిజ ఉండ్రొ పణికిదెజ్ దేవుణు సీని ఇనాయం

14 మిజీ బాద కినివరి మున్ను కనికారం తోరిన్త ఇజి దేవుణుదిజ్ పార్దనం కిదెజ్. ఒబ వరిజ్ దీవిస్తెజ్ ఇజి దేవుణుదిజ్ వెహ్తు వరిజ్ సయిప్ సిఅ ఇజి వెహ్మాజ్.

15 నర్ల ఆని వరివెట నర్ల ఆజి మండ్రు. దుకం ఆతి వరివెట వరి దుకమ్దు కూడేజి మండ్రు.

16 ఒరెన్ మరి ఒరెన్వెట ఉండ్రె మన్ను ఆజి మండ్రు. గర్ల ఆమాట్. తకుదివరి వెట కూడేజి మండ్రెజ్ మన్ను ఆదు. నానె గొప్ప బుద్ది మన్నికాన్ ఇజి ఒడేబిమాట్.

17 మిజీ సెఇక కినివరిజ్ మర్ది సెఇకెజ్ కిమాట్. నెగ్గిక ఇజి విజేరె ఒప్పుకొడేని పణిజ్నె కిదెజ్.

18 విజేరి వెట సమదనమ్దాన్ మండ్రెజ్ ఒద్దె నెగెండ సుడేదు.

19 నాను ప్రేమిసిని కూలెజాండె, మిజీ ఎయెన్బా సెఇక కిత్తిజ వన్నిజ్ మర్ది సెఇక కిమాట్. గాని దేవుణు వన్నిజ్ సిక్స సీదెజ్ డిసిసీదు. దేవుణు మాటదు దన్నివందిజ్ రాస్త మనాద్. ఇనిక ఇహిజ, “లోకు కిత్తి సెఇ పణి వందిజ్ నీను కోపం తీరిస్య. అక్కు నానె తీరిస్సు. నిజి సెఇక కిత్తివన్నిజ్ నాను సిక్స సీన”, ఇజి దేవుణు వెహ్సినాన్*.

20 గాని మరి మీరు ఇనిక కిదెజ్ ఇహిజ; నిజి పగాతి వన్నిజ్ బజ కట్టిజ వన్నిజ్ ఉండెజ్ సిఅ. వన్నిజ్ ఎమ్మా కట్టిజ, ఏరు సిఅ. నస్తవలె వాండ్రు సిగు ఆనాండ్రె వన్ని కోపం డిస్సాన్”,* ఇజి రాస్త మనాద్.

21 మరి ఒరెన్ కిత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గిపణిజాణిజ్ వరి సెఇ పణిదిజ్ గెలిస్తెజ్.

13

ఏలుబడి: కినివరిజ్ లోజిదు.

1 విజేరి ఏలుబడి: కినివరిజ్ లోజిజి మండ్రెజ్వలె. ఎందానిజ్ ఇహిజ, ఏలుబడి: కినివరిజ్ అతికారం దేవుణునె సీజినాన్. వరిజ్ ఏర్పాటు కిత్తికాన్ దేవుణునె.

2 అందెజె ఏలుబడి: కినివరిజ్ లోజిఇకార్ దేవుణు ఏర్పాటు కిత్తిదన్నిజ్ ఎద్రిసినార్. వరిజ్ తగితి తీర్పుదోహ్కాద్.

3 నెగ్గి పణిజ్ కినివరిజ్ ఆవద్, సెఇ పణిజ్ కినివరిజె ఏలుబడి: కినికార్ తియెల్ తపిస్సార్. అందెజె ఎయెన్బా ఏలుబడి: కినివరిజ్ తియెల్ సిల్లెండ మండ్రెజ్ ఇహిజ, నెగ్గి పణిజ్ కిజి మండ్రెజ్. నస్తవలె ఏలుబడి: కినికార్ మీ వందిజ్ నెగ్గికెజ్ వెహ్సార్.

4 ఎందానిజ్ ఇహిజ మీ నడి:మి విజు నెగెండ జర్దిదెజ్ ఇజి పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లోఇ ఎయెన్బా తప్పు కిత్తిజ వాండ్రు తియెల్ ఆదెజె. ఎందానిజ్ ఇహిజ తప్పు కిత్తివరిజ్ సిక్స సీదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికారె లెకెండ, వారు తప్పు కినివరిజ్ సిక్స సీనార్.

5 అందెజె అతికారి లోకాజ్ లోజిజి మండ్రెజ్ వలె. సిక్కుదాన్ తప్రె ఆదెజ్ ఉండ్రె ఆవద్, లోజిజి మంజినిక సరి ఆతికదె ఇజి నెస్తిబా లోజిదెజ్ వలె.

6 ఏలుబడి: కినికారె దేవుణుదిజ్ పణికిజినార్. వారు అయ ఏలుబడి: కినిపణి వందిజె కాలం విజు గడేస్సినార్. అందెజె మీరు వరి వందిజ్ పన్నుబా తోస్సినాదెర్.

* 12:19 12:19 ద్విత్తి 32:35. * 12:20 12:20 సామెత 25:21,22.

7 ఎయెరిజ్ బా ఇనికబా సీదెజ్ ఇహిజ అక్కెజ్ సీదెజ్. ఎంబెబా పన్ను తొవ్తాజ్ మహిజ బాన్ పన్ను తొవ్తాజ్. ఎయెరిజ్ మర్యాద సీదెజ్ ఇహిజ వరిజ్ మర్యాద సీదెజ్. ఎయెరిజ్ గవరం సీదెజ్ ఇహిజ వరిజ్ గవరం సీదెజ్.

ప్రబు మర్రి వాజిని కాలం డగ్గు ఆత మనాద్

8 ఎయెర్ బాన్ బా అప్పు తీరిస్ ఎండ ఇడ్ మాట్. ఎసెజ్ బా ఒరెన్ మరి ఒరెన్ వెట ప్రేమిస్సికాదె అప్పు లెకెండ్ మనీద్. మహివరిజ్ ప్రేమిస్సికాన్ దేవుణు రూలుజ పూర్తి లోజీనాన్.

9 దేవుణు రూలుజ లోఇ రకరకమ్ వి రూలుజ్ మనె. వనకలోఇ సెగం ఇనికెజ్ ఇహిజ, “రంకు బులాదెజ్ ఆవద్. లోకాజ్ సప్తెజ్ ఆవద్. డోజ కిదెజ్ ఆవద్. ఆఇవరిజ్ మన్నికెజ్ నజీ కావాలి ఇజి సెఇ ఆస ఆదెజ్ ఆవద్” గాని యా రూలుజ్ విజు కూడుఃప్తిజ, యాకాదె, “నీను నిజీ ప్రేమిస్ అ”, ఇజినె.

10 మహి వరిజ్ ప్రేమిస్తిజ వరిజ్ ఇని తప్పుబా నీను కిజ గదె. అందెజె మహివరిజ్ ప్రేమిసినికాన్ దేవుణు రూలుజ విజు వనకాజ్ పూర్తి లోజీజినాన్.

11 నాను వెప్తిలెకెండ్ మీరు కిజి మండ్రెజ్ వలె. ఎందానిజ్ ఇహిజ, మాటు బత్తిని యా కాలం నండో ముకెలమాతి కాలం ఇజి మీరు నెసినిదెర్. ప్రబు మర్రి వాజి మజీ రక్సిసిని కాలం డగ్గు ఆత మనాద్ కాక నిద్రదాన్ నిజ్ జి తెలి ఆతివరి వజ జాగర్త మండ్రు. తొలిత మాటు నమ్మిత్తి మహి కాలమ్ దిజ్ ఇంక అయ సమయం డగ్గు ఆత మనాద్.

12 రెయు అందిజి వాజినిలెకెండ్ మా బత్తుబా అందిజి వాజినాద్. క్రీస్తు మర్రి వాని కాలం డగ్గు ఆత మనాద్. అందెజె సికటిదు కిని సెఇ పణిజ్ విజు డిసి సీదెజ్. వేడెక విదెమ్ దిజ్ సానికాన్ దన్నిజ్ కావాలిస్సికెజ్ తొడుఃగిజి విదెమ్ దిజ్ తయార్ ఆనిలెకెండ్, సెఇ వనకాజ్ ఎద్రిస్తెజ్ తయార్ ఆజి మండ్రు.

13 సికటుదు కిని సెఇ పణిజ్ డిసి సీజి మాటు జాయ్ దు నడిసి మండ్రెజ్. కల్లు విందుజ సాన్ని ఉణిజి సాస్తెజ్ ఆవద్. మొగ కొడోర్ గాని అయ్ లె కొడోక్ గాని రంకు బులాదెజ్ ఆవద్, టంటెజ్ ఆదెజ్ ఆవద్, గోస ఆదెజ్ ఆవద్.

14 మరి ఎలాగ మండ్రెజ్ ఇహిజ, మహి లోకురిజ్ తోర్పివజ మీరు ప్రబు ఆతి యేసుక్రీస్తు లెకెండ్ మండ్రు. మీ ఒడోల్లి సెఇ ఆసెజ వజ కిజి సర్ద ఆదెజ్ ఇజ ఒడోబిజి మంజిని మన్నుదాన్ మన్యాట్.

14

అనుమానం ఆని నమ్మితికార్ వందిజ్

1 ఇని ఇనికెజ్ కిదెజ్ దేవుణు సరి సీనాండ్రో ఇజి అనుమానం ఆని నమ్మితికార్ మనార్. వారు నమ్మిత్తి దిన్నివందిజ్ పూర్తి అర్థం కిఇకార్ గాని వరిజ్ డగ్గు కిదు. గాని నమ్మితికార్ ఇని ఇనికెజ్ కిదెజ్ ఆనాద్ ఇజి ఒడోబిని దన్నిలోఇ తేడ వానివలె వరివెట వాదిస్సాట్.

2 విజు తిండ్రెజ్ ఆనాద్ ఇజి ఒరెన్ నమ్మిజినాన్. మరి ఒరెన్ కుసెజ్ నె తింజినాన్. ఎందానిజ్ ఇహిజ, వారు నమ్మిత్తి దిన్నివందిజ్ పూర్తి అర్థం ఇంక కివన్.

* 13:9 13:9 నిర్గమ 20:13-15,17.

3 విజు తినికాన్, విజు తిన్ ఇ వన్నిజ్ తక్కుదికాన్ ఇజి సుడదెజ్ ఆవద్. విజు తిండ్రెజ్ ఆవద్ ఇజి ఒడఃబినికాన్ విజు తినికార్ తప్పు కిజినార్ ఇజి వెహైజ్ ఆవద్. ఎందానిజ్ ఇహిజ దేవుణు వరిజ్ డగ్గు కిత్త మనాన్.

4 మరి ఒరెన్ ఎజమానిజ్ వన్ని పణిమణిసి కినికెజ్ సరియాతికెజ్నో, అఇకెజ్నో ఇజి వెహైజ్ తగితికార్ మీరు ఆఇదెర్. వాండ్రు కిని పణిజ్ నెగ్గికెజ్నో సెఇకెజ్నో ఇజి వన్ని ఎజమానిసె వెహ్నో. అయావజనె నమ్మితికాన్ కినిపణిజ వందిజ్ దేవుణునె తీర్పు కిజి సరిఅతికదో ఆవ్దో ఇజి వెహ్నో. ఎందానిజ్ ఇహిజ సరిఅతిక కిదెజ్ దేవుణు వన్నిజ్ సత్తు సినాన్లె.

5 సెగొండార్, ఉండ్రీ రోజు మహి రోస్కాజ్ ఇంక నెగ్గి రోజు ఇజి ఒడఃబిజినార్. మరి ఒరెన్ విజు రోస్కు ఉండ్రె లెకెండ సుడఃజినాన్. ఒరెన్ ఒరెన్ వన్నిజ్ వాండ్రె వన్ని మన్నుదు ఒడఃబినిక ఎందానిజ్ ఆహు ఒడఃబిజినాన్ ఇజి టోటాజ్ నెసి తీర్మానం కిదెజ్వెలె.

6 ఉండ్రీ రోజు నెగ్గి రోజు ఇజి ఇడ్మికాన్ అక్క ప్రబు వందిజ్ ఇడ్మికాన్. విజు తినికాన్ ప్రబుజ్ వమదనమ్కు వెహ్ని ప్రబుజ్ గవరం సీదెజ్ ఇజి తింజినాన్. విజు తిన్ ఇకాన్ తిని వనక వందిజ్ ప్రబుజ్ వందనమ్కు వెహ్ని ప్రబుజ్ గవరం సీదెజ్ ఇజి విజు తిన్ ఎండ మంజినాన్.

7 మా లోఇ ఎయెన్ బా వన్నిజె సర్ల కిబిసైజ్ ఇజి బత్రిఎన్. వన్ని వందిజె సర్ల కిబిసైజ్ ఇజి సాఎన్.

8 ఎందానిజ్ ఇహిజ మాటు బత్రినివెలె ప్రబుజ్ ఇస్టం కిబిన్ని లెకెండ బత్రిదెజ్. సానివల ప్రబుజ్ ఇస్టం కిబిన్ని లెకెండ సాదెజ్వలె. అందెజె మాటు బత్రితిజ్ బా సాతిజ్ బా ప్రబుజ్ సెందితికాటె.

9 దినివందిజె సాతి వరిజ్ ని బత్రిని వరిజ్ విజేరిజ్ ప్రబు లెకెండ మండ్రెజ్ క్రిస్తు సాజి మర్రి బత్రితాన్.

10 అహిజ, ఎయెర్ బా మరి ఒరెన్ వన్నిజ్ తీర్పు తీరిసైజ్ ఆవద్. ఎయెర్ బా తకుదికాన్ ఇజి సుడఃదెజ్ ఆవద్. ఎందానిజ్ ఇహిజ మాటు విజేటె తప్పు కితికాటో, సరి అతిక కితికాటో ఇజి దేవుణు తీర్పు కిదెజ్ వన్ని ఎద్దు నిల్వాట్.

11 దినివందిజ్ మాటు ఎలాగ నెసినాట్ ఇహిజ, ప్రబు వెహ్ని మాటెజ్ ఈహు రాస్త మనాద్. ఇనిక ఇహిజ, “నాను ఒద్దె నిజం వెహ్నిన, నానె దేవుణు ఇజి లోకుర్ విజేరి నా ఎద్దు ముణుకుజ్ ఊర్వార్. నానె దేవుణు ఇజి లోకుర్ విజేరి ఎద్దు వెహ్నార్”.

12 అహిజ, ఒరెన్ ఒరెన్ కిత్తి దన్నివందిజ్ దేవుణు ఎద్దు లెక్క ఒపజెప్టాజ్ వలె. దేవుణు తీర్పు తీరిస్కాన్.

13 అందెజె ఆఇవరిజ్ తీర్పు తీరిసినిక డిఃసిసినాట్. అక్కాదె ఆఎండ, మరి ఒరెన్ నమ్మిత్తి వన్నిజ్ తప్పు సరిదు నడిఃపిసిని ఇనికబా కిదెజ్ ఆవద్ ఇజి మీ మన్నుదు ఒప్పుకొండు.

14 నాను యేసుప్రబు వెట కూడితిజ్ ఉండ్రీ నిజం నెసిన. ఇనిక ఇహిజ, తిండ్రెజ్ ఆవద్ ఇజి దేవుణు వెహ్ని తిండి ఇనికబా సిల్దెద్. గాని ఇనికాదో ఉండ్రీ తినిక ఆవద్ ఇజి ఎయెన్ బా ఒడఃబిత్తిజ అక్క వాండ్రు తినిక తప్పు.

15 నీను ఇనికదో ఉండ్రీ తిని దన్నిదాన్ మరి ఒరెన్ నమ్మితికాన్ మన్నుదు బాద ఆతిజ నీను వన్ని ముస్కు ప్రేమ తోరిన్ ఇ. నీను తినిదన్నిదటాన్ మరి ఒరెన్ నమ్మిత్తి వన్ని నమకమదిజ్ పాడు కిమా.

16 నెగ్గెకెజ్ ఇజి ఒడొబిజి నీను కినికెజ్, మరి ఒరెన్ నమ్మితి వన్నిజ్ పాపం కిబిస్తెజ్ తగితికెజ్ ఇహిజ అక్కెజ్ సెఇకెజ్ ఇజి వారు వెహ్నార్. అందెజె నెగ్గెక ఇహిజ్ బా కిమా.

17 దేవుణు ఏలుబడిః కినిదన్నిజ్ లొజిజి మండ్రెజ్ ఇహిజ, ఇనికెజ్ తిండ్రెజ్ ఉండెజ్ ఇజి రూలుజ్ ఆఉ. గాని దేవుణు ఏలుబడిఃదిజ్ ఎలాగ లొజిదెజ్ ఇహిజ, ఆత్మ సత్తుదాన్ దేవుణుదిజ్ ఇన్ఱం ఆతి వజ కిదెజ్, లొకుర్ వెట సమదనమ్దాన్ మండ్రెజ్, మన్ను లొఇ సర్ల నిండ్రెజి మండ్రెజ్.

18 యా లెకెండ్ క్రీస్తుజ్ లొజినికాన్ దేవుణుదిజ్ ఇన్ఱం కిబిస్నాన్. లొకుర్ వన్నిజ్ నెగ్గెకాన్ ఇజి వెహ్నార్.

19 అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడొదెజ్ వెలె. మాటు ఒరెన్ మరి ఒరెన్ వన్నిజ్ నమకమ్దు సత్తు కిబిస్తెజ్ సుడొదెజ్ వెలె.

20 ఇని తిండిబా తిండ్రెజ్ ఆనాద్ ఇజి ఒడొబిజి, దేవుణు కిత్తి పణిజ్ పాడొ కిమా దేవుణు సుడొతిజ్ విజి రకమ్ది బొజనమ్కుబా తిండ్రెజ్ ఆనికెజ్ గాని, నీను తినిక, తిండ్రెజ్ ఆఇకెజ్ ఇజి మరిఒరెన్ వన్నిజ్ తప్పు కిబిస్తెజి అక్క తినిక తప్పునె.

21 కండ తింజి గాని ద్రాక్క కల్లు ఉణిజి గాని, మరి నన్నిపణిజ్ ఇనికెజ్ గాని కిత్తిజి అక్క మరి ఒరెన్ నమ్మితి వన్నిజ్ తప్పు కిబిస్తెజ్ కూడితిజి అక్కెజ్ డిఃస్సికాద్ నెగ్గెక.

22 నిన్ని సజతిజి వందిజ్ నీను నమినికెజ్ నీను ఆఇవరిజ్ వెహ్నాజ్ పొని. నిన్ని సజతిజ్ నీనుని దేవుణు నెస్తిజి ఆనె. ఉండ్రె పణికిత్తి వెనుక, సరి ఆతిక కితానొ, సిలిజి తప్పు కితానొ ఇజి అనుమానం ఆవిండ మహిజ నీను దేవుణుబాణిజ్ సర్ల తసిని.

23 గాని ఉండ్రె తినిక దేవుణు ఎద్దు సరిఆతికదొ ఆవిదొ ఇజి అనుమానం ఆనికాన్, అక్క తిహిజ తప్పు కితాన్ ఇజి తిర్పు వానాద్. ఎందానిజ్ ఇహిజ, తిండ్రెజ్ ఆఇక ఇజి ఇడ్డిక వాండ్రు తిహాన్. మాటు ఇనిక కిత్తిజ్ బా దేవుణు ఎద్దు సరి ఆతిక కిత ఇజి నమకం సిల్లిజి అక తప్పునె.

15

1 ఇనిఇనికెజ్ సరిఆతికెజ్ కిదెజ్ ఆనె ఇజి మన్నుదు బాగ నెసిని నమ్మిత్తికాట్ ఆతి మాటు మజి ఇన్ఱం ఆతికెజ్ ఉండ్రెనె కిజి మండ్రెజ్ ఆవిద్. గాని అనుమానం ఆతివరిజ్ మాటు బరిస్తెజ్ వలె.

2 మరి ఒరెన్ నమకమ్దు పిరినివందిజ్ మా లొఇ ఒరెన్ ఒరెన్ వన్నిజ్ నెగ్గెకెజ్ కిజి సర్ల కిబిస్తెజ్.

3 క్రీస్తు కిత్తి లెకెండ్ మాటు కినాట్. క్రీస్తు వన్ని సర్ల ఉండ్రె వందిజ్ నె తొఎండ దేవుణుదిజ్ ఇన్ఱం ఆతిలెకెండ్ కితాన్. కిర్తన పుస్తకమ్దు రాస్తి లెకెండ్, “లొకుర్ నిజి నింద కిత్తివెలె, అయ నింద నజి వెహ్ని లెకెండ్”, ఇజి క్రీస్తు దేవుణుదిజ్ వెహ్నాన్.

4 దేవుణు మాటదు ముందాల్ రాస్తి మన్నికెజ్ విజు మజి నెస్సిస్తెజె రాసి ఆత మనాద్. ఎందానిజ్ ఇహిజ, మాటు ఓర్పుదాన్ మంజి దేవుణు మాటెజ్ మజి ఉసార్ కిబిసి, మాటు ఆసదాన్ ఎద్దు సుడొబిజి మండ్రెజ్ వలె.

5-6 మజి ఓర్పుని ఉసార్ కిబిస్సిక దేవుణు ఉండ్రె మన్ను ఆజి మండ్రెజ్ సాయం కిపిన్. ఇహిజ యెసు క్రీస్తు వజ మండ్రు. నస్తివలె మా ప్రబు అతి యెసు క్రీస్తుజ్ బుబ్బు ఆతి దేవుణుదిజ్ ఉండ్రె మన్ను ఆజి ఉండ్రె లెకెండ్ పొగొడిదెజ్ ఆనిదెర్.

* 15:3 15:3 కీర్తన 69:9.

7 అహిజ క్రీస్తు మిజి డగ్రు కిత్తి లెకెండ్ మీరు ఒరెన్ మరి ఒరెన్ వన్నిజ్ డగ్రు కిదు. ఎదానిజ్ ఇహిజ అహు కిత్తిజ లోకుర్ దేవుణుదిజ్ పొగడినార.

8 నాను ఇనిక వెప్పిన ఇహిజ, దేవుణు నమ్మిదెజ్ తగ్గికాన్ ఇజి, ఇహిజ వాండ్రు, మాటు యూదురి అనిగొగొరిజ్ కిత్తి ఒటు లెకెండ్ నిజం కినాన్ ఇజి తోరిస్తెజ్ ఇజి క్రీస్తు యూదురిజ్ పణి మణిసి ఆత మహాన్.

9 అక్కాదె ఆవిదు, యూదురు ఆఇజాతిదికార్ దేవుణు తోరిస్తి గొప్ప కనికారం వందిజ్ దేవుణుదిజ్ పొగడిదెజ్ ఇజిబా క్రీస్తు యూదురిజ్ పణిమణిసి ఆతమహాన్. ఎలాగ ఇహిజ, “అందెజె నాను యూదురు ఆఇ లోకుర్ నడిమి నిజి పొగడిజి. నిజి పొగడిజి పాటెజ్ పార్ను”, ఇజి రాస్తె మన్నె.

10-11 ఈహుబా రాస్త మనాద్, “యూదురు ఆఇజాతిదికార్ అతికిదెరా మీరు దేవుణు లోకుర్ వెట సర్ల ఆదు”*. మరి ఉండ్రెబాన్ ఈహు రాస్త మనాద్. “యూదురు ఆఇజాతికార్ అతికిదెరా, మీరు ప్రబుజ్ పొగడిదు. విజెరి లోకుర్ వన్నిజ్ పొగడిదు”*

12 మరి యెసయ ప్రవక్త ఈహె వెప్పినాన్, “యెస్సయి తెగాదికాన్ ఒరెన్ వానాన్లె. యూదురు ఆఇవరిజ్ ఏలుబడిః కినికాన్ వానాన్. వన్నిజె వారు ఆసదాన్ ఎద్రు సుడేజి మంజినార్”*.

13 ఎద్రు సుడేజి మండ్రెజ్ మిజి అటిసిని దేవుణుదిజ్, మీరు నమ్మిజి మంజినిదెర్ కాక మీ లొఇ సర్లని సమదనం నిండ్రెపిన్. ఎదానిజ్ ఇహిజ, అసదాన్ ఎద్రు సుడేజి మంజిని లొఇ దేవుణు ఆత్మ సత్తు మిజి మరి నండొ పిరిస్తెజ్ ఇజి.

దేవుణు సువార్ల యూదురు ఆఇకార్బా వెంజినార్

14 నమ్మితి తంబెరిజాండె, మీరు ఒరెన్ మరి ఒరెన్ వెట నెగెండ మంజినిదెర్ ఇజి నాను నెసిన్. మీరు బాగ నెస్తెజ్ ఇజి దేవుణు సుడేజినికెజ్ విజు మీరు నెస్సిదెర్ ఇజి నాను నెసిన్. ఒరెన్ మరి ఒరెన్ వన్నిజ్ బుద్ది వెప్పి నెస్సిస్తెజ్ అట్టిదెర్ ఇజి నాను మీ వందిజ్ నిజం నెసిన్.

15-16 గాని నాను యా ఉత్రమ్దు నెగం సజతిజ వందిజ్ మిజి ఎతు కిబిస్సివలె దయరమ్దాన్ వెప్తా. ఎదానిజ్ ఇహిజ, యేసుక్రీస్తుజ్ ఉండ్రె పణిమన్ని లెకెండ్ యూదురు ఆఇ జాతిది వరి నడిమి మండ్రెజ్ ఇజినె దేవుణు వన్ని గొప్ప దయాదర్మం నా ముస్సు తోరిస్తాన్. దేవుణు ఆత్మ వరిజ్ కేటకిజి దేవుణుదిజ్ సీదెజ్ తగితి ఉండ్రె పూజ లెకెండ్ వరిజ్ తయార్ కినికాదె నా పణి. దన్నివందిజె ఒరెన్ పుజెరి లెకెండ్ నాను వరిజ్ సువార్ల వెప్పిన.

17 అందెజె, నాను క్రీస్తుయేసు వెట కూడేజి మన్నిజ్, దేవుణుదిజ్ కిని సేవ పణివందిజ్ పొగడిజిన్.

18 యూదురు ఆఇకార్ దేవుణుదిజ్ లొజిని వందిజ్ క్రీస్తు నా వెట కిత్తి పణిజ్ ఉండ్రె వందిజె నాను దయరమ్దాన్ వెప్పిన. నాను నా మాటెజాణిజ్, నా పణిజాణిజ్ దేవుణుదిజ్ లొజిదెజ్ వరిజ్ నడపిస్త.

19 బమ్మాతి పణిజాణిజ్ని దేవుణు ఆత్మ సత్తుదాన్ నడపిస్త. ఆహె యెరూసలేం పట్నం మొదొల్ని అయ సుట్టు పడక మన్ని పట్నమ్కు విజు ఇలారికు ఇని పట్నం దాక విజు బాడ్డిజ సొన్ని నాను క్రీస్తు వందిజ్ సువార్ల పూర్తి సాటిస్త మన్ను.

* 15:9 15:9 2నము 22:50; కీర్తన 18:49. * 15:10-11 15:10-11 ద్విత్తి 32:43. * 15:10-11 15:10-11 కీర్తన 117:1. * 15:12 15:12 యెసయ 11:10.

20 క్రీస్తు వందిజ్ సాటె ఆఇ బానె నువార్త సాటిస్తోజ్ ఇజినె నజి ఉండ్రీ ఆస. ఎందానిజ్ ఇహిజ, మరి ఒరెన్ నువార్త కినిబాన్ సొన్ని వన్ని పణి లార్గెజ్ ఆవిద్ ఇజినె నా మన్ను.

21 గాని నాను ఇనిక కిత్త ఇహిజ, దేవుణు మాటదు రాస్తిమన్ని లెకెండ్ కిత్త, “వన్నివందిజ్ ఎసెజ్ బా వెహె ఆఇకార్ వన్నివందిజ్ నిజం ఆతిక సూణార్. వన్నివందిజ్ ఎసెజ్ బా వెహె ఆఇకార్ వన్నివందిజ్ అర్థం కిన్”[☆].

22 యా పణికిజి మహిజ్ నాను మీబాన్ వాదెజ్ నండో అడ్డు ఆత మహాద్.

పవులు రోమపట్టణం సొండ్రెజ్ ఒడెబిజినాన్

23-24 గాని ఏలు యా ప్రాంతమ్కాజ్ మన్ని పణిజ్ వీజితె. నండో పంటెజ్ అస్సిబా మీబాన్ వాజి మిజి సుడెడెజ్ ఆస ఆతిజ్ బా, ఏలు వాదెజ్ ఎద్దు సుడెజిన. నాను స్సెయిను దేసెం సొని సరిదాన్, మిజి వాజి సుడెజి సణెం మీ వెట మంజి సర్ల ఆదెజ్ ఆస ఆజిన. బాణిజ్ సొనివెలె మీబాణిజ్ సాయం దొహ్కెజ్ ఇజి సుడెజిన.

25 గాని, ఏలు యెరూసలేమ్దు మన్ని దేవుణుదిజ్ నమ్మిత్తి వరిజ్ డబ్బు ఒత్తెజ్ యెరూసలేమ్దు సొన్నిన.

26 ఎలాగ ఇహిజ యెరూసలేమ్దు మన్ని నమ్మిత్తి వరి లొఇ డబ్బు సిల్లివరిజ్ నంద సిదెజ్ మాసిదోనియ ప్రాంతమ్దు మన్ని నమ్మిత్తికార్ని అకాయ ప్రాంతమ్దు మన్ని నమ్మిత్తికార్ వారె ఆజి ఇస్టం ఆతార్.

27 ఒబ, వారు సిదెజ్ ఇస్టం ఆతారె సీజినార్. నిజమె, యూదురు ఆఇకార్ యెరూసలేమ్దు మన్ని దేవుణు లోకురిజ్ సాయం కిదెజ్ నె. ఎందానిజ్ ఇహిజ, యూదురు ఆఇవరిజ్ ఉండ్రీ అప్పు మనాద్. ఎలాగ ఇహిజ, దేవుణు యూదురిజ్ సిత్తి దీవనమ్కు ఆఇ జాతిదివరిజ్ బాట వాతాద్. అందెజె యూదురిజ్ తక్కు ఆతిక యూదురు అఇకార్ వరిజ్ మన్నివనక లొఇహాన్ బాట కిజి సిదెజె.

28 యా పణి వీజిత ఇహిజ, వరిజ్ సిదెజ్ మన్ని డబ్బు పూర్తి వరిజ్ తప్ ఎండ సిత్తి వెనుక నాను యెరూసలేం పట్టుమ్దాన్ స్సెయిను సొని సరిదు మీబాన్ వానా.

29 నాను మీబాన్ వానివలె క్రీస్తుబాణిజ్ మజి విజెరిజ్ గొప్ప పెరి దీవనమ్కు దొహ్కె ఇజి నాను నెసిన.

30 ఏలు తంబెరిజాండె, ప్రబు ఆతి యేసుక్రీస్తు మున్ను మన్ని నమ్మకం మన్నిదన్నివందిజ్, దేవుణు ఆత్మ మిజి సిత్తి దన్నివందిజ్, మీరు నా వందిజ్ గట్టిజ పార్లనం కిదు ఇజి నాను బతిమాల్లిన.

31 యూదయ దేసమ్దు యేసుప్రబుజ్ నమ్మిఇ యూదురు బాణిజ్ నజి ఇని ప్రమాదం రెఎండ మండ్రెజ్ పార్లనం కిదు.

32 మరి దేవుణు సిత్తం ఆతిజ నాను సర్లదాన్ వాజి మీబాన్ రోమ్దెజ్ ఇజిబా పార్లనం కిదు.

33 మజి సమదనం సీని దేవుణు మిజి తోడు మనీన్.

16

రోమ పట్టుమ్దు సెగొండార్ నమ్మిత్తి వరిజ్ పవులు వందనమ్కు వెహ్సినాన్.

1 కెంకెయూదు మన్ని దేవుణు సజమ్దు సేవ కిదెజ్ ఏర్పాటు ఆతి పిబె ఇని మా బీబి వందిజ్ నాను వెహ్సిన. అది గొప్ప నెగ్గికాద్.

2 దేవుణుని దేవుని నమ్మితి దన్నిజ్, నమ్మితికార్ కిదెజ్ తగితి లెకెండ్ డగ్రు కిదు. దన్నిజ్ కావాసిక ఇనికబా మీబాన్ మహిజ, మీబాణిజ్ సీజి మండ్రు. ఎందానిజ్ ఇహిజ, అది నండొండొరిజ్ మరి నజిబా సాయం కిజి మహాద్.

3 క్రీస్తు వందిజ్ మా వెట కూడొజి పణికిత్తి మహి ప్రిస్కిలాదిజ్ని దన్ని మాసి అకులాదిజ్బా మా వందనమ్కు వెప్తు.

4 వారు నా పాణం వందిజ్ వరి పాణమ్కు సిదెజ్ తయార్ ఆతికార్. నాను ఒరెనె ఆవి, యూదురు ఆఇవరి సజమ్కు విజు వారు కిత్తి దన్ని వందిజ్ వందనమ్కు వెప్సిన్.

5 మరి వరి ఇండ్రో మన్ని నమ్మిత్తివరిజ్బా వందనమ్కు వెప్తు ఆసియ ప్రాంతమ్దు తొలిత క్రీస్తు ముస్కు నమకం ఇడ్డి, నాను ప్రేమిసిని ఎపాయినెటుజ్ వందనమ్కు వెప్తు.

6 మీ వందిజ్ నండొ కన్ఠబాడొజి పణి కిత్తి మరియెజ్ వందనమ్కు.

7 నావెట జేలిదు మహి, నా సొంత లోకుర్ యూదురు ఆతి అండ్రోనికుని, యూనియాకు వందనమ్కు వెప్సిన్. వారు అపొస్తరు నడిమి పెరికార్ ఇజి విజేరె నెసిన్. నజి ఇంక ముందాల్ వారు క్రీస్తు లోకు ఆతికార్.

8 ప్రబు వందిజ్ నాను నండొ ప్రేమిసిని అంప్లియతుజ్ వందనమ్కు.

9 క్రీస్తు వందిజ్ మా వెట పణి కిత్తి ఉర్బానుజ్ వందనమ్కు. నాను నండొ ప్రేమిసిని స్టాకుజ్ వందనమ్కు.

10 క్రీస్తు ముస్కు నిజమాతి నమకం ఇడ్డాన్ ఇజి రుజుప్ కిత్తి మన్ని అపెలుజ్ వందనమ్కు. అరిస్టాబులు ఇండ్రోణి వరిజ్ వందనమ్కు.

11 నా సొంత లోకు యూద వాండ్రు ఆతి హెరొదియొనుజ్ వందనమ్కు.

నర్కిను ఇండ్రోణి వరి లోఇ ప్రబు ఆతి క్రీస్తుజ్ నెందితి వరిజ్ వందనమ్కు.

12 క్రీస్తు వందిజ్ కన్ఠబాడొజి పణికినికెజ్ ఆతి త్రుపయానుజ్ని త్రపొసానుజ్ వందనమ్కు.

నాను నండొ ప్రేమిసిని పెర్సినుజ్ వందనమ్కు. అది ప్రబు వందిజ్ నండొ కన్ఠబాడొజి పణి కితామహాద్.

13 ప్రబు వందిజ్ గొప్ప నెగ్గెకాన్ ఇజి కేట ఆతి రుపనుజ్ వందనమ్కు. వన్ని అయ్సిజ్ వందనమ్కు. అది నజిబా యాయ వజనె.

14 అసున్క్రీస్తుజ్, ఫ్లెగొముజ్, హెర్మెకునుజ్, పత్రోబుజ్, హెర్మెకునుజ్, వరి వెట మన్ని నమ్మితి వరిజ్ వందనమ్కు.

15 పిలోగునుజ్, యూలియాకుజ్, నెర్యాతునుజ్, వన్ని తజిసిజ్, ఒలంపాకుజ్ వరివెట మన్ని నమ్మితి వరిజ్ వందనమ్కు.

16 నమ్మిత్తి వరిజ్ తగితి లెకెండ్ ఒరెన్ మరి ఒరెన్ వన్నిజ్ ముదు కిజి వందనమ్కు వెప్తు. యా బాడ్డిదు క్రీస్తుజ్ నమ్మితి సజమ్కాణికార్ మిజి వందనమ్కు వెప్సిన్.

17 నమ్మితి తంబెరిజాండె, మీరు నెస్తి మన్ని బోదదిజ్ డిస్సిసి దన్నిజ్ వెత్తేకం ఆతి బోద నెస్సిసి ఆఇ గుంపుజ్ కిదెజ్ ఇజి వెప్సిన్ మనార్. వరి వందిజ్ జాగర్త మండ్రు. నన్ని వరి బాణిజ్ దూరం మండ్రు ఇజి నాను బతిమాల్లి వెప్సిన్.

18 నన్నికార్ మా ప్రబు ఆతి క్రీస్తుజ్ పణి కినికార్ ఆవర్. గాని వారు వరిజ్ ఇస్తుం ఆతి దన్నివందిజె బత్తిజినార్. నెగ్గి మాటెజ్ వెప్పివజ బడాఱాయి మాటెజ్ వెప్పి వీరు మొసెం కిజినార్. వారు సెఇలోకు ఇజి నెన్ఇకార్ వరి మాటెజ్ మొసెం కిబె ఆనార్.
 19 మీరు దేవుణు మాటదిజ్ లోజిత్తి మన్నికార్ ఇజి విజెరె నెస్సార్. అందెజె మీ వందిజ్ నాను సర్ల ఆజిన. గాని మీరు నెగ్గిక ఇనిక ఇజి నెస్సి దన్నిలోఇ బుద్ది కల్లిజి మండ్రు. సెఇ వనకవెట కూడఱేవిండ దన్నివందిజ్ కల్లిసిల్లెండ మండ్రు ఇజి నాను ఆస ఆజిన.

- 20 సమదనం సీని దేవుణు, సయ్తూను సత్తు పాడుఱిజి వనిజ్ మీ కాల్యాజ్ అడగి బేగినె సిదులు మటిస్సాండ్రె ఇడ్నాన్. ప్రబు ఆతి యేసుబాణిజ్ దయాదర్మం మిజి తోడు మనిద్.
- 21 మా వెట కూడఱిజి పణికిని తిమోతి మిజి వందనమ్కు వెప్పినాన్. నా సొంత లోకుర్ యూదురు ఆతి లూకియ, యాసోను, సొసి పత్తు ఇనికార్ వందనమ్కు వెప్పినార్.
- 22 పవులు వెప్పి సిత్తిజ్ యా ఉత్తం రాసిని తెర్తియు ఇని నాను ప్రబు వందిజ్ వందనమ్కు వెప్పిన.
- 23 నజమ్దు కూడఱిజిని వరిజ్ విజెరిజ్ని నజిని నెగెండ సూణి గాయియు మిజి వందనమ్కు వెప్పినాన్. యా పట్టమ్దు పెర్ని డబ్బుజ్ లెక్క సుడఱిజి అన్నికాన్ ఎరస్తు, నమ్మిత్తికాన్ ఆతి క్వార్తును మిజి వందనమ్కు వెప్పినార్.
- 24 మా ప్రబు ఆతి యేసు క్రీస్తుబాణిజ్ వన్ని దయాదర్మం మీబాన్ మనిద్.
- 25-26 మీ నమకమ్దు మిజి గటిజ నిల్పెజ్ దేవుణు అటాన్. నాను యేసుప్రబు వందిజ్ సువార్త సాటిసినివలె యాకదె వెప్పిన. నండో కాలం దేవుణు డాప్తి ఇడ్డి మహి నిజమాతి మాట ఏలు దేవుణు వెప్తా మనాన్. ఏలు అయ నిజమాతి సువార్త మాటు సాటిస్తిజ్ ప్రవక్తరు రాస్తి మాటదానె క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్నదాన్ యా సువార్త విజు లోకాజ్ నెస్పినాన్. ఎందానిజ్ ఇహిజ విజెరె లోకుర్ నమ్మిజి లోజిదెజ్ ఇజి.
- 27 విజు వనకాజ్ నెసిని ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పొగడిఱిజి మనిర్. ఆమెన్.

అపొస్తుడు ఆతి పవులు కొరింతి పట్నమ్దు మని నమ్మితి వరి సజమ్దిజ్ రాస్తి మొదోహి ఉత్రం

నెల్వ కిబిసినిక

ఇక్క అపొస్తుడు ఆతి పవులు కొరింతి పట్నమ్దు మన్ని దేవుణు సజమ్దిజ్ రాస్తి మొదోహి ఉత్రం. పవులునె ఇక్క రాస్తికాన్ ఇజి యా ఉత్రమ్నె రుజుప్ సీజినాద్. 1:1,16,21. దేవుణు సజమ్దు మన్ని విజు సజతిజ్ వందిజ్, నమ్మితి వరి నడిమి మన్ని గొడబెజ్ వందిజ్, దేవుణుదిజ్ పొగ్డిజి మాడిస్సి వందిజ్, దేవుణు పణి వందిజ్ సీని వందిజ్, నమ్మితికార్ జటు ఆజిని వందిజ్, సజమ్దు మన్ని బోదెక్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ్ మన్ని నండో సజతిజ్ వందిజ్ ఎలాగ కిదెజ్ ఇజి యా ఉత్రమ్దాన్ పవులు కొరింతి సజమ్ది వరిజ్ వెహ్సినాన్. యా ఉత్రమ్దు రాస్తిమన్ని సజతిజ్ వందిజ్ సుడఃతిజ్ అయా కాలమ్దు మని సజమ్దిజ్నె ఆవిండ యా కాలమ్దు మన్ని సజమ్కాజ్బా యాక ముకెలమాతి ఉండ్రె ఉత్రం. అక్కడె ఆవిండ నమ్మితి వన్నిజ్ మన్ని ప్రేమ వందిజ్, సాత్తికార్ మరజి నిజ్ని వందిజ్ రాస్తి సజతిజ్ ఎలాకాలమ్దు మన్ని నమ్మితి వరి వందిజ్ రాస్తిక్కాదె. యా ఉత్రం యేసుక్రీస్తు సాజి మరజి నిజితి వనుక యాబ్బయ్ ఏడునో యాబ్బయ్ ఆరునో పంటిజ్ వెనుక రాసె ఆత్త మనాద్ ఇజి విజెరె నమ్మిజినార్. పవులుని వన్ని జటుదికార్ వారు రుండి సుట్టు సువార్త సాటిస్తెజ్ సొన్ని మహివలె (A.D. 50) కొరింతి పట్నమ్దు అందితార్. డగ్రు 18 నెల్లెజ్ మంజి సువార్త పణి కిజి మహిజ్ బాన్ దేవుణు సజం తయారాతాద్. (అపొస్తురు కిత్తి పణిజ్ 18:1-8). పవులు ఎవెసు పట్నమ్దు మహివలె, బాణిజ్ యా ఉత్రం రాస్తపోక్తాన్. యా ఉత్రం నెగెండ్ సద్విజి నెసి మహిజ్ దేవుణు సజం ఎలాగ మండ్రెజ్ ఇజి సజమ్దిజ్ నడిపిసిని వరిజ్, నమ్మితి వరిజ్ నెగెండ్ అర్దమానాద్.

మొదోల్

1 దేవుణు ఇస్తమాతి వజ, క్రీస్తుయేసుజ్ అపొస్తుడు లెకెండ్, వాండ్రు కూక్తి మని పవులు ఇని నాను కొరింతి పట్నమ్దు మని దేవుణు సజమ్దిజ్ రాసిని ఉత్రం. మా తంబెరి ఆతి సొస్తానెను నా వెట మనాన్.

2 మీరు లోకమ్దు విజుబాన్ మని వరిజ్ని మజి ప్రబు ఆతి యేసుక్రీస్తు పేరు అసి పొగ్డిజి మాడిస్సి వరి వెట మీరుబా కూడ్లి మంజినిదెర్. అందెజె మీరు ప్రబు ఆతి యేసుక్రీస్తు వేట కూడిజి దేవుణు వందిజ్ కేట ఆతికిదెర్ని దేవుణుదిజ్ సెందితికిదెర్ ఆజి మండ్రెజ్ ఇజి కూకె ఆతి మనిదెర్.

3 మా బుబ్బాతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతి మండ్రెజ్ సాయం కిపిన్.

4 క్రీస్తుయేసుదాన్ మిజి దేవుణు సితమని వన్ని దయా దర్మం వందిజ్ నాను ఎస్తివలెబా మీ వందిజ్ దేవుణుదిజ్ వందనమ్కు వెహ్సిన.

5 అహిజ, మీరు విజు నజతిజ వందిజ్, ఇహిజ, మీరు వర్గిజని విజు మాటెజ లోఇ, మిజి మని గెణమ్దు, క్రీస్తు వెట మని సంమదమ్దు మీరు దేవుణు సీజిని మేలుజ్ విజు కలితి మని కిదెర్ ఆజినిదెర్.

6 ఎందనిజ్ ఇహిజ క్రీస్తు వందిజ్ మాపు వెహ్తా మని సాస్యం వందిజ్ ఇని అనుమానమ్బా సిల్లెండ మీ మన్సుజ మీరు గటిజ గుర్తు అస్తిదెర్.

7 అందెజె, దేవుణు ఆత్మ సీజిని వరమ్కాజ్ లోఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తోరె అని దినం వందిజ్ గొప్ప ఆనదాన్ ఎర్దు సుడెజి మంజినిదెర్.

8 మా ప్రబు ఆతి క్రీస్తు యేసు తీర్పు సీని దినమ్దు మీరు ఇని తపు సెలెండ మనికిదెర్ ఇజ తోరె అదెజ్ దేవుణు మిజి సత్తు సీజి ఆకార్దాక కాప్ కిసాన్లె.

9 వన్ని మరిన్ ఆతి, మా ప్రబువతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గికాన్.

దేవుణు నజమ్దు నమ్మిత్తికార్ కేట ఆజిని వందిజ్

10 తంబెరిజాండె, అందెజె మీ లోఇ ఇని కేట ఆవిండ మండ్రెజ్ ఇజి, మీరు విజిదెరె, ఒరెన్ మరి ఒరెన్ వెట ఉండ్రె మన్సు ఆజి మండ్రెజ్. మరి మీరు విజిదెరె ఒడెబినిబాన్, మీ మన్సుదు పూర్తి ఉండ్రె ఆజి మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దోహ్కాతి అతికారమ్దాన్ నాను మిజి బతిమాల్లిన.

11 ఎందనిజ్ ఇహిజ మా తంబెరిజాండె, మీ లోఇ గొడెబెజ్ మన్నె ఇజి క్లోయె ఇండ్రోణికార్ సెగొండార్ నజి కబ్బు తత మనార్.

12 నాను వెస్పానిక ఇనిక ఇహిజ, ఒరెన్, “నాను పవులుజ్ సెందితికాన్”, ఇజిసాన్గె, మరి ఒరెన్, “నాను అపొలుజ్ సెందితికన్”, ఇజిసాన్గె. మరి ఒరెన్, “నాను కేపెజ్ సెందితికాన్”, ఇజిసాన్గె, మరి ఒరెన్, “నాను క్రీస్తుజ్ సెందితికాన్”, ఇజి వెహ్తా ఆజినిదెర్గె.

13 క్రీస్తు ఎయెర్ వందిజ్బా బాటెజ్ ఆవితాన్. పవులు ఇని నాను మీ వందిజ్ సిలువాదు సావత. మీరు పవులు ఇని నా పేరుదాన్ బాప్తిసం లాగె ఆజితిదెర్.

14 క్రీస్తునుని గాయియుకు, వారు రిఎర్ ఆవిండ మరి ఎయెరిజ్బా నాను బాప్తిసం సివిత. దన్ని వందిజ్ నాను దేవుణుదిజ్ వందనమ్దు వెహ్సిన.

15 అందెజె నా పేరుదాన్ మీరు బాప్తిసం లాగె ఆతిదెర్ ఇజి వెహ్తాజ్ ఎయెరిజ్బా అక్కు సిల్లెద్.

16 స్తైపాను ఇండ్రోణి వరిజ్బా నాను బాప్తిసం సితమన. అక్కాదె ఆవిండ మరి ఎయెరిజ్బా బాప్తిసం సెత్తిక నజి ఎత్తు సిల్లెద్.

17 ఎందనిజ్ ఇహిజ, సువార్త వెహ్తాజ్ క్రీస్తు నజి పోక్తాన్. గాని బాప్తిసం సీదెజ్ ఇజి నజి పోక్వితాన్. అందెజె క్రీస్తు సిలువాదు సాతి సాపుది సత్తు తకు అదెజ్ ఆవిద్ ఇజి నాను సువార్త సాటిస్సిక యా లోకమ్ది లోకురి గెణమ్దాన్ కూడితి మాటెజాణిజ్ ఆవిద్.

దేవుణు గెణమ్ని సత్తు ఆతిమన్ని క్రీస్తు

18 నాసనమాజి సాని వరిజ్ క్రీస్తు సిలువాదు సాతి వందిజ్ వెహ్సిన సువార్త బుద్ధి సిల్లి పణి కిత్తి వందిజ్ వెహ్సిన మాటెజ్ లెకెండ తోరిజనె గాని దేవుణు రక్కిస్తి మని మజి యాక దేవుణు సత్తు.

19 అందెజె, “వారు గెణం మనికార్గె! వరి గెణం నాను పాడేకినాలె. వారు బుద్ది మనికార్గె! వరి బుద్ది నాను పణిదిజ్ రెండె కినాలె”, ఇజి దేవుణు మాటదు రాస్త మనాద్.

20 బుద్ది మన్నికాన్ ఇజి ఒడిబితి మని వన్ని బుద్ది ఇనిక ఆత మనాద్? గొప్ప సదువు మనికాన్ ఇజి ఒడిబితి మని వన్ని సదువు ఇనిక ఆత మనాద్? యా లోకమ్ది పండిత్ ఇజి ఒడిబితి మన్నికాన్ ఇనిక ఆత మనాన్? యా లోకమ్ది విజు గెణం దేవుణు బుద్ది సిలి పణి లెకెండె పణిదిజ్ రెజ లెకెండె కివతాండ్రా?

21 దేవుణు సీతి గెణమ్దాన్, లోకమ్దిజ్ సెందితి వరిజ్, వరి గెణమ్దాన్ దేవుణుదిజ్ నెస్తజ్ అట్ఎండె మహిజ్, లోకమ్దిజ్ సెందితి వరిజ్ బుద్ది సిల్లి పణి ఇజి తోరె ఆతి సువార్త సాటిసి, నమ్మిజిని వరిజ్ రక్సిస్తజ్ దేవుణు ఇష్టం ఆతాన్.

22 యూదురు ఆతికార్ బమ్మాతి పణిజ్ కొరిజినార్. గ్రిసు దేసెమ్దికార్ గెణమ్దిజ్ రెబాజినార్.

23 గాని మాపు క్రిస్తు మా పాపమ్క వందిజ్ సిలువాదు సాతి సాపు వందిజ్ సువార్త సాటిసినాప్. ఇక్క యూదురిజ్ అడ్డు లెకెండె తోరిజినె. మరి యూదురు ఆఇ వరిజ్ బుద్ది సిలి పణి లెకెండె తోరిజినె.

24 గాని యూదురిజ్ని యూదురు ఆఇ వరిజ్, అహిజ రక్సిస్తజ్ ఇజి దేవుణు కూక్తి మని విజెరిజ్, క్రిస్తు, దేవుణు సత్తు ఆత మనాన్. క్రిస్తు, దేవుణు గెణం ఆత మనాన్.

25 ఎండనిజ్ ఇహిజ, దేవుణు బుద్ది సిలి పణి ఇజి లోకుర్ ఒడిబినిక లోకురి బుద్దిదిజ్ ఇంక బుద్ది మనిక. దేవుణు సత్తు సిల్లి పణి ఇజి లోకుర్ ఒడిబినిక లోకురి సత్తుదిజ్ ఇంక బలం మనిక.

26 తంబెరిజాండె, దేవుణు మిజి కూక్తి మహివలె మీరు ఎలాగ కూకె ఆతి మనిదెర్ ఇజి ఒడిబిదు. లోకమ్దు మన్నికార్ ఒడిబిని లెకెండె ఇహిజ, మీ లొఇ బుద్ది మనికార్ లాపు నండొండార్ సిల్లెర్, గొప్ప వారు లాపు నండొండార్ సిల్లెర్, పెరి కుటుమ్దికార్ లాపు నండొండార్ సిల్లెర్.

27 వారు బుద్ది సిలికార్గె! గాని లోకమ్దు మని బుద్దిమని వరిజ్ సిగు కిదెజ్, దేవుణు బుద్ది సిలి వన్నాజ్ ఎర్లిస్తాన్. వారు సత్తు సిలికార్గె! గాని లోకమ్దు మని సత్తుమని వరిజ్ సిగు కిదెజ్ దేవుణు సత్తు సిలివనకాజ్ ఎర్లిస్తాన్.

28 యా లోకమ్దు ఇనికాదొ ఆతిమని వన్నాజ్, అక్కెజ్ ఇనికెజ్ ఆఉ ఇజి తోరిస్తజ్ ఇజి ఏకం అడిగి మని వనకాజ్ని ఇష్టం కిఇ వన్నాజ్, ఇనికబా ఆఇ వన్నాజ్ దేవుణు ఎర్లిస్తాన్.

29 అందెజె ఎయెన్బా దేవుణు ఎర్దు ఇనిదని వందిజ్బా పొగ్గడె ఆదెజ్ ఆట్ఎన్.

30 వన్ని వెటనె మీరు మా వందిజ్ దేవుణు బాణిజ్ వాతి మని గెణమాతి మన్ని క్రిస్తుయెసు వెట కూడిజి మంజినిదెర్. అహిజ, వన్ని వెటనె మాటు నీతి నిజాయితి మనికాట్ ఆతాట్, దేవుణు వందిజ్ కేట ఆతికాట్ ఆతాట్, విడుఃదల పొందితికాట్ ఆతాట్.

31 అందెజె దేవుణు మాటదు రాస్త మని లెకెండె. “పొగ్గడె ఆనికాన్ ప్రబు కిత్తి వన్నా వందిజ్ పొగ్గడె ఆదెజ్ వలె”.

2

1 తంబెరిజాండె దేవుణు వందిజ్ సాస్యం మీ నడఃమి సాటిస్తజ్ ఇజి మీ డగ్రు నాను వాతివలె నెగెండె వర్గిదెజ్ అట్టి వన్ని లెకెండెనో, గొప్ప పెరి బుద్ది మని వన్ని లెకెండెనో

మీ డగ్గు రెవత.

2 అందెజె నాను మీ నడిమి మహివెల, యేసుక్రీస్తు వందిజ్ఞని వాండ్రు సిలువాదు సాతి సాపు వందిజ్ఞనె ఆవిండ మరి ఇనికబా నెన్ఇ వన్ని లెకెండ మండ్రెజ్ ఇజి నాను నిర్లం కిత.

3 నాను మీ నడిమి వాతివలె నా సత్తు ముస్కు ఆదారం ఆవిండ, సత్తు సిల్లిసవన్ని లెకెండ తియెల్దాన్, ఎసోనో వణక్సి వాత.

4 నాను మీ వెట వర్గితి మాట వెహ్తిమని సువార్త, లోకు బుద్ధిదాన్ కూడితి మని తియాని మాటెజాణిజ్ ఆవతాద్. గాని మిజి తోరె ఆదెజ్ ఇజి దేవుణు ఆత్మ సత్తుదాన్ కిజిని పణిజాణిజె తోరిస్త మనాద్.

5 ఎందనిజ్ ఇహిజ, దేవుణు ముస్కు మిజి మని సమకం లోకు బుద్ధి ముస్కు ఆదారం ఆవిండ, దేవుణు సత్తు ముస్కునె ఆదారం ఆదెజ్ ఇజి.

దేవుణు ఆత్మ బాణిజ్ దొహ్క్సి గెణం.

6 దేవుణు ముస్కు మని సమకమ్దు పిరితివరి నడిమి బుద్ధిదాన్ కూడితి మని మాటెజాణిజ్ వర్గిజినావ్. గాని అక్క యా లోకమ్దు మని యా తరమ్ది వరి బుద్ధి ఆవెద్. మరి సిల్లెండ ఆజి సొన్నిని యా లోకమ్ది అతికారిజ బుద్ధి ననికబా ఆవెద్.

7 ఆక్కాదె ఆవిండ, దేవుణుదిజ్ డాజితి మని గెణం వందిజ్ వర్గిజినావ్. డాజె ఆతి మహి యా గెణం, మాటుబా వన్నిజ్ మని గొప్ప గవరమ్దు కూడిజి మండ్రెజ్ ఇజి లోకం పుట్విండ ముందాల్నె దేవుణు మా వందిజ్ కేట కిత్తి ఇడ్డి మహిక.

8 యా తరమ్ది అతికారిజ ఎయెరిజ్బ యాక అర్థం కిదెజ్ అట్విండతార. ఎందనిజ్ ఇహిజ, వారు అర్థం కిజి నెసి మంజినిక ఇహిజ గొప్ప గవరమ్దిజ్ ప్రబు ఆతి వన్నిజ్ సిలువాదు డెయ్జి సవ్ఎతారమరి.

9 అందెజె దేవుణు మాటదు రాస్తి మన్ని లెకెండ, “దేవుణు వన్నిజ్ ప్రేమిసిని వరి వందిజ్ ఇనికెజ్ తయార్ కిత ఇట్టామనాండ్రొ ఇజి ఎయెర్బా వరి కణకెజాణిజ్ సుండెదెజ్ సిల్లెద్, ఎయెర్బా వరి గిబిజాణిజ్ వెండ్రెజ్ సిల్లెద్. ఎయెర్బా వరి మన్నుదు ఎసెజ్బా ఒండెబిదెజ్ సిల్లెద్”.

10 గాని దేవుణు వన్ని ఆత్మదాన్ అయాకెజ్ మజి తెలియ కిత మనాన్. దేవుణు ఆత్మ విజు దనిజ్ రెబాజినాన్. దేవుణు లోఇ మని డాజితి మని సజతిజ్బా రెబాజి తోరిసినాన్

11 ఒరెన్ వన్ని మన్నుదు ఒండెబినికెజ్ విజు వన్ని లోఇ మని వన్ని ఆత్మనె ఆవిండ మరి ఎయెర్బా నెన్ఎర్. అయా లెకెండె దేవుణు మన్నుదు మనికెజ్ వన్ని ఆత్మదిజ్నె ఆవిండ మరి ఎయెరిజ్బా తెలివెద్.

12 దేవుణు బాణిజ్ మజి సెడ్డినె సీతిమని వన్కాజ్ అర్థం కిజి నెస్తెజ్, మజి దొహ్క్తి మని ఆత్మ లోకమ్ది వరి లెకెండ ఒండెబిని నని ఆత్మ ఆవెద్. దేవుణు బాణిజ్ వాతిమని దేవుణు ఆత్మనె మజి దొహ్క్తి మనాద్.

13 మాపు వర్గిజిని యా మాటెజ్ లోకు బుద్ధిదాన్ నెన్పిస్తి మాటెజ్ ఆఱ. గాని దేవుణు ఆత్మ నెన్పిస్తి మాటెజాణిజ్, దేవుణు ఆత్మదిజ్ సెందితి నిజమాతి సజతిజ్, దేవుణు ఆత్మదిజ్ సెందితి మాటెజాణిజ్ మాపు వర్గిజినావ్.

14 దేవుణు ఆత్మ సిలికాన్ దేవుణు ఆత్మబాణిజ్ వాని సజతిజ్ డగ్గు కిఎన్. ఎందనిజ్ ఇహిజ అయాకెజ్ వన్నిజ్ బుద్ధి సిల్లి పణిజ్ లెకెండ తోరిజినె. వన్కాజ్ అర్థం

కిదెజ్ ఇహిజ దేవుణు అత్తుదానె అర్థం కిబె ఆదెజ్. దేవుణు అత్తు వన్ని లోఇ సిల్లితిజ్, వన్యూజ్ అర్థం కిదెజ్ వాండ్రు అట్వన్.

15 దేవుణు అత్తు లోఇ మనికాన్ విజు వన్యూజ్ అక్కెజ్ ఎలాగ మర్రికెజ్ ఇజి నెస్తెజ్ అట్వాన్. గాని వన్ని లోఇ ఇనికెజ్ మన్నె ఇజి ఎయెర్బా నెస్తెజ్ అట్వర్.

16 దేవుణు మాటదు రాసె ఆతి మని లెకెండ, “ప్రబుజ్ బుద్ది వెస్తెజ్ ఇజి వన్ని మన్నుదు మనికెజ్ నెస్తిమనికాన్ ఎయెన్ మనాన్?”. గాని మజీ క్రీస్తుజ్ మని నని మన్ను మన్నె.

3

సజమ్దు నమ్మిత్తికార్ కేట ఆజిని వందెజ్

1 తంబెరిజాండె, క్రీస్తుజ్ లోజిజి నడిజిని వరి వెట వర్గిని లెకెండ నాను మీ వెట వర్గెదెజ్ అట్వత. గాని ఒడోలేది ఆసెజ్ లోజిజి నడిజిని వరివెట వర్గిని లెకెండె నాను మీ వెట వర్గిత. ఎందనిజ్ ఇహిజ, మీరు క్రీస్తు వెట కూడితి మహిదెర్ గాని క్రీస్తుజ్ సెందితి సజతిజ్ లోజిజిని దని లోఇ ఏలుబా మీరు లేత కొడోర్ లెకెండె మనిదెర్.

2 లేత కొడోరిజ్ పాలు సీని లెకెండ ఇజిరి సజతిజ్ నాను మిజి నెస్సిన్. పెరికార్ ఉణి మాముల్ బోజనం నని గటిమని ఇనికబా నాను మిజి నెస్సిన్వత. నిజమె ఏలుబా మీరు దనిజ్ తగ్గికిదెర్ ఆవర్, మీరు లేత కొడోర్ లెకెండె మనిదెర్.

3 ఏలుబా మీరు యేసుక్రీస్తుజ్ లోజిజి నడిజిని వరి లెకెండ ఆఇదెర్. ఎందనిజ్ ఇహిజ మీ నడిమి గోస ఆనికెజ్, గొడబెజ్ మహిజ్ మీరు యేసుక్రీస్తుజ్ లోజిజి నడిజిని వరి లెకెండ ఆఇదెర్. క్రీస్తు మున్ను నమకం మన్ఇవరి లెకెండె మీరు విజు సజతిజ్ కిజినిదెర్.

4 ఎందనిజ్ ఇహిజ ఒరెన్, “నాను పవులుజ్ సెందితికాన్”, ఇజి, మరి ఒరెన్, “నాను అపొలుజ్ సెందితికాన్”, ఇజి మరి ఒరెన్, యాలెకెండ వెహినివలె మీరు క్రీస్తు మున్ను నమకం ఇడోఇ మాముల్ లోకుర్ లెకెండ ఆఇదెరా?

5 అపొలు ఎయెన్? పవులు ఎయెన్? వహి పణి కినికారెగదె? ఒరెన్ ఒరెన్ వన్నిజ్ ప్రబు ఒవసెప్తి లెకెండ వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్.

6 నాను గింజ ఉణుస్త, అపొలు దనిజ్ ఏరు వడిస్తాన్, గాని దనిజ్ పిరిప్తికాన్ దేవుణునె.

7 అందెజె ఉణుస్తికాన్ గాని ఏరు వడిస్తికాన్ గాని ఇనిక ఆవర్. గాని దనిజ్ పిరిప్తికాన్ దేవుణు ఒరెండ్రె.

8 ఉణుస్తి వన్నిజ్ని ఏరు వడిస్తి వన్నిజ్ ఉండ్రె ఉదెసమ్నె మహాద్. ఒరెన్ ఒరెన్ వన్నిజ్, వరి సొంత పణిదిజ్ తగితి జితం దోహ్కాన్.

9 మాపు దేవుణు వెట కూడోజి పణి కినికాప్. మీరు దేవుణు మడిజ్ లెకెండ ఆతి మనిదెర్. దేవుణు ఇల్లు లెకెండ ఆతి మనిదెర్.

10 దేవుణు నా మున్ను తోరిస్తి మన్ని దయా దర్మమ్దాన్, నెగిండ ఇల్లు తొప్తెజ్ నెస్తివన్ని లెకెండ నాను పునాది పొక్త మన. మరి ఒరెన్ దని మున్ను ఇల్లు తొహ్నిని వన్ని లెకెండ తొహ్నినాన్. ఒరెన్ ఒరెన్ ఎలాగ దని మున్ను తొహ్నినాండ్రె ఇజి వాండ్రు జాగర్ల సుడోదెజ్ వలె.

11 అహిజ పొక్తిమని పునాది ఆవండ మరి ఉండ్రె పునాది పొక్తెజ్ ఎయెన్బా అట్వన్.

12 ఒరెన్ యా పునాది ముస్సు తొప్పావలె బజారమ్దాన్ తొప్పాన్సు, సిల్లిజ వెండిదాన్ తొప్పాన్సు, సిల్లిజ నండొ కరితి రంగు పణకాణిజ్ తొప్పాన్సు, సిల్లిజ మరాన్దాన్ తొప్పాన్సు, సిల్లిజ గడిఃదాన్ తొప్పాన్సు, సిల్లిజ ఆకుజాణిజ్ తొప్పాన్సు.

13 ఒరెన్ ఒరెన్ కిత్తి పణిజ్ ఎలాగ మర్తిక ఇజి యేసుక్రీస్తు తీర్పు తీరిస్సి దినమ్దు తోరె ఆనె. అయ పణిజ్ డాజ్ఎండ తోర్పె. అయా పణిజ్ సిసు వెటనె తోరె ఆనె. ఒరెన్ ఒరెన్ కిత్తి మని పణి ఎలాగ మర్తికాదొ ఇజి సిసునె పరిస కినాద్.

14 ఒరెన్ అయ పునాది ముస్సు తొప్పా మని పణి సిసుదిజ్ గెలిసి నిల్పి మహిజ వాండ్రు జీతం లొసె ఆనాన్.

15 ఒరెన్ కిత్తి పణి సిసుదాన్ వెతిజ వన్నిజ్ నస్తం వానాద్. గాని వాండ్రు తప్పె ఆనాన్. గాని సిసుకొనెజ నడిఃమిహాన్ తప్పె ఆతి లెకెండ తప్పె ఆనాన్లె.

16 మీరు దేవుణు గుడిః అతికిదెర్ ఇజి మీరు నెన్ఇదెరా?. మరి దేవుణు ఆత్మ మీ లొఇ బత్తిజినాన్ ఇజి మీరు నెన్ఇదెరా?

17 ఎయెన్బా దేవుణు గుడిఃదిజ్ పాడఃకిత్తిజ దేవుణు వన్నిజ్ పాడఃకినాన్. ఎండనిజ్ ఇహిజ అయ గుడిః దేవుణుదిజ్ సెందితిక. అయ గుడిః ఆతి మనికిదెర్ మీరె.

18 మిజి మీరె మొసెం కిబె ఆదెజ్ ఆవెద్. మీ లొఇ ఎయెన్బా యా తరమ్దిజ్ తగ్గి గెణం మనికాన్ వాండ్రె ఇజి ఒడిఃబిజి మహిజ, గెణం మనికాన్ ఆదెజ్ ఇజి వన్నిజ్ వాండ్రె యా లోకమ్ది వజ బుద్ది సిలి వన్ని లెకెండ ఆపిన్.

19 ఎండనిజ్ ఇహిజ యా లోకమ్ది గెణం దేవుణు ఎద్దు పణిదిజ్ రెఇకాదె. ఎండనిజ్ ఇహిజ, “గెణం మనికార్ ఇజి ఒడిఃబిని వరిజ్ దేవుణు వరి గెణమ్దాన్ ఓడిఃస్సాన్”, ఇజి దేవుణు మాటదు రాస్త మనాద్.

20 మరి, “బుద్ది మని వరి ఆలోసనమ్కు పణిదిజ్ రెఇకెజ్ ఇజి ప్రబు నెసినాన్”, ఇజి దేవుణు మాటదు రాస్త మనాద్.

21 అందెజె ఎయెర్బా లోకు పేరు అసి నాను వన్నిజ్ సెందితికాన్ ఇజి పొజిదెజ్ ఆవెద్. మీరు నెగెండ మండ్రెజ్ ఇజి విజు సజతిజ్ దేవుణు మిజి సిత మనాన్.

22 పవులు ఆతిజ్బా, అపాలు ఆతిజ్బా, కేప ఆతిజ్బా మీరు నెగెండ మండ్రెజ్ ఇజి దేవుణు ఏర్పాటు కిత్తికాప్. లోకమ్దు మనికెజ్ విజు, పాణం ఆతిజ్బా, సావు ఆతిజ్బా, యా కాలమ్దు జర్గినికెజ్ ఆతిజ్బా, వాని కాలమ్దు జర్గిదెజ్ మనికెజ్ ఆతిజ్బా విజు మీరు నెగెండ మండ్రెజ్ ఇజి దేవుణు సితెకెజ్.

23 మీరు క్రీస్తుజ్ సెందితికిదెర్. క్రీస్తు దేవుణుదిజ్ సెందితికాన్.

4

క్రీస్తుజ్ అపొస్తురు ఆతికార్

1 అందెజె క్రీస్తుజ్ పణి కినికార్ ఇజి లోకుర్ మజి నుడఃదెజ్ వలె. దేవుణుది డాజితి మని సజతిజ్ లోకురిజ్ నెస్సిస్టెజ్ ఒపజెపె ఆతికార్ ఇజి వారు మజి నుడఃదెజ్ వలె.

2 అక్కాదె ఆవండ ఉండ్రె పణిదిజ్ ఒపజెపె ఆతి మనికాన్ అయ పణిదు నమ్మకమాతికాన్ ఇజి తోరె ఆదెజ్ వలె.

3 మీరు గాని లోకురి కొర్బుబగాని నజి ఒపెజెపె ఆతి మని పణి నాను నెగెండ కిజిననొ సెలెనొ ఇజి నుడఃజిని దనిజ్ నాను లస్యం కివె. నజి నానెబా అయ లెకెండ నా పణిదిజ్ నుడఃదెజ్ సిల్లె.

4 నా గర్భం నజీ గదిన్ ఎండ బాగనె మనాద్. అయ లెకెండ్ మహిజ్ బ నాను ఇని తప్పు సిలికాన్ ఇజ వెహె ఆదెజ్ అట్ ఎ. నజీ తీర్పు సినికాన్ ప్రబునె.

5 అందెజె ఏర్పాటు కిత్తి మని గడియ రెండె ఇనిదనిజ్ బా తీర్పు తీరిస్తెజ్ ఆవెద్. ప్రబు వాని దాక కాప్ కిదెజ్. సీకటుదు డాజితి మని విజు తప్పు పణిజ్ వాండ్లు వెల్లి జాయ్ దు తనాన్ లె. లోకురి మన్నుదు మహి విజు ఉదెనమ్ కాజ్ వెల్లి తనాన్ లె. అయావలె ఒరెన్ ఒరెన్ వన్నిజ్ వాండ్లు కిత్తి పణిదిజ్, తగ్గి లెకెండ్ దేవుణు బాణిజ్ పొగ్ డె: ఆనాన్ లె.

6 తంబెరిజాండె, “రాస్తి మహి దనిజ్ జవ డాట్టి సాండ్రెజ్ ఆవెద్”, ఇజి రాస్తి మని మాటదిజ్ అర్థం మీరు మజి సుడె:జి నెస్తెజ్ వలె. యాలెకెండ్ నె నా వందిజ్ ని అపొలొ వందిజ్ నాను మిజ వెహె మహ. అయాలెకెండ్ మీరు ఒరెన్ వన్ని పేరు అసి పొజెదెజ్ ఆవెద్.

7 మహి వరిజ్ ఇంక మిజి గొప్ప పెరికార్ కిత్తికాన్ ఎయెన్? మిజి కలిగితి మని బుద్ధిని గెంం లొఇ దేవుణు బాణిజ్ దొహ్ క్తికెజ్ నె ఆవెండ మరి ఇనికెజ్ మన్నె? అక్కెజ్ మిజి దేవుణు బాణిజ్ దొహ్ క్తి వెనుక, అక్కెజ్ దొహ్ క్తికెజ్ ఆఉ, అక్కెజ్ మీరు గణస్తి మని లెకెండ్ పొజెజినిదెర్.

8 ఏలు మీరు ఇనికబా తకు సిల్లెండ మిజి కావాలిస్తికెజ్ విజు మనికిదెర్ అతిదెర్ గె! ఏలు మీరు ఆస్తి మనికిదెర్ అతిదెర్ గె! మజి డి:స్తి సెతిదెర్ మీరు దేవుణు వెట ఏలుబడి: కినికిదెర్ అతిదెర్ గె! మపుబా మీ వెట దేవుణు వెట ఏలుబడి: కినికాప్ ఆని లెకెండ్ మీరు నిజమె మీరు ఆజిమంజినిక ఇహిజ ఎసానొ నెగెద్ ఇజి నాను ఎసానొ కోరిజన.

9 మజి అయా లెకెండ్ సిల్లెద్. జంతుజ వెట విద్దెం కిజి సుడె:జి మంజిని వరి ముందాల సాదెజ్ ఇజి సావుదిజ్ తగితి సిక్స దొహ్ క్తి మని వరి లెకెండ్ దేవుణు మజి అపొస్తురు లొఇ కడె:వేరిదికార్ లెకెండ్ కిత మనాన్ ఇజి నజీ తోరిజనాద్. లోకమ్ దు మనికార్ విజెరె, మరి దేవుణు దూతెజ్ విజు కణ్కు నమ్ ఎండ బేసిని లెకెండ్ మాపు ఇడె: ఆత మనాప్ ఇజి నజీ తోరిజనాద్.

10 మాపు క్రిస్తు వందిజ్ బుద్ధి సిలికాప్ గె గాని మీరు క్రిస్తు లొఇ బుద్ధి మనికిదెర్ గె! మాపు నీర్ నమ్ దికాప్ గె మీరు సత్తు మనికిదెర్ గె! మీరు తగమాతికిదెర్ గె మపు సిగు లాగె అతికాప్ గె!

11 ఏలు యా గడియారుబా బజ ఏహ్ కిదికాప్. గుడెజ్ తొహె అతికాప్. ముటిజాణిజ్ గుదె అతికాప్. మండ్రెజ్ ఇల్లుబా సిలికాప్.

12 మా సాంత కికాణిజ్ కన్నబాడె:జి పణి కినికాప్. మజి సయిప్ సీని వరిజ్ మిజి నెగెండ మనిద్ ఇజి వెహ్ పినాప్. మజి హిమ్నెజ్ కినివలె అక్కెజ్ ఓరిసిసాప్.

13 దూసె అనివలె సార్లిదాన్ వర్గిజనాప్. ఏలు యా గడియారుబా మాపు యా లోకమ్ దిజ్ కనర లెకెండ్ మనాప్. విజెరె ఎర్దు పెంటు లెకెండ్ మనాప్.

14 నాను ప్రేమిసిని నా కొడె:ర్ ఇజి మిజి సారిసి సరిసి వెహ్ లెకెండ్ నె యా మాటెజ్ రాసిన, గాని మిజి సిగు కిదెజ్ ఇజి ఆవెద్.

15 క్రిస్తు వందిజ్ మిజి సూణికార్ పదివెయుజ్ లోకుర్ మహిజ్ బా, మిజి అపొసిర్ నంండె:ర్ సిల్లెర్. ఎందనిజ్ ఇహిజ క్రిస్తుయేసు వందిజ్ నాను వెహ్ సువార్తదాన్ నానె మిజి కాస్త.

16 అందెజె నజీ పొలిసి యేసుక్రిస్తుజ్ లొజిజి నడిదెజ్ ఇజి మిజి బతిమాల్లిన.

17 దిని వందిజ్ ప్రబు ఎద్రు నమ్మకమాతికాన్ ఆతి, నాను ప్రేమిసిని నా మరన్ ఆతి తిమోతిజ్ మీ డగ్రు పోక్కిన. విజు బాడ్డిజ విజు దేవుణు నజమ్కాజ్ నాను నెన్పిన్తి దనిజ్ తగితి లెకెండ్ క్రిస్తుయేసుజ్ నాను ఎలాగ లోజిజి నడిజిన ఇజి వాండ్రు మిజి ఎత్తు కిబిన్నాన్లె.

18 మీ లోఇ సెగిండార్ నాను మీ డగ్రు రెవ్ ఇజి ఉబె ఆత మనార్.

19 ప్రబు సితం ఇహిజు నాను మీ డగ్రు బేగి వాన. అయావలె ఉబె ఆతిమని వరి మాటెజ్నె ఆవండ, వరిజ్ ఎసో సత్తు మనాద్ ఇజిబా నాను సూణ.

20 ఇనిక ఇహిజు, దేవుణు ఏలుబడిః ఇహిజు వర్గిని మాటెజాణిజ్నె ఆవెద్, సత్తుదాన్ మనాద్.

21 మీరు ఇనిక కోరిజినిదెర్? నాను మీ డగ్రు వానివలె మిజి దిదిదెజ్ డుడ్డు అసి వాదెజా, సిల్లిజు ప్రేమ తోరిసిని వన్ని లెకెండ్ వాదెజ్?

5

రంకు బూలాని వన్నిజ్ మీ బాణిజ్ వెల్లి పోక్తు

1 రంకు బూలానిక మీ లోఇ మనాద్ ఇజి నజి నిజమె కల్లు వాతాద్. మీ లోఇ ఒరెన్, వన్ని కొగ్రి అయ్సిజ్ ఇడెః ఆతాన్గె. ననిక నమ్మిఇ వరి లోఇబా జర్గిఇక.

2 మరి, యాక మీ నడిఃమి మంజి మీరు పోజిజినిదెర్! గాని అయాలెకెండ్ ఆవండ, మీరు ఎసానో దుకం ఆజి నన్ని పణి కిత్తి వన్నిజ్ మీ నడిఃమిహాన్ వెల్లి పోక్కి మండ్రెజ్, అయాలెకెండ్ మండ్రెజ్ గదె?

3 నాను ఒడెఃల్ వందిజ్ మీ బాణిజ్ దూరం మన్ను, గాని ఆత్మదాన్ నాను మీ వెటనె మన్ను. నాను మీ వెట మన్ని లెకెండ్నె నిన్ని పణి కిత్తి వన్ని మున్ను. తీర్పు తీరస్త మన్ను.

4 మా ప్రబు ఆతి యేసు పేరుదాన్ మీరు కూడఃజి వానివలె, మా ప్రబు ఆతి యేసుక్రిస్తు సత్తు మీ నడిఃమి మంజినాద్. నానుబా మీ వెట మన్ను ఇజి మీరు ఒడిఃబిదు.

5 అయావలె మీరు యా లెకెండ్ కిదు. సయ్యానుజ్ లోజిజి మన్ని వరి వెట మండ్రెజ్ ఇజి వన్నిజ్ మీ నడిఃమిహాన్ వెల్లి పోక్తు. అబ్బె వన్ని ఒడెఃల్ కస్టమ్దిజ్ ఒపజెవె ఆనాద్లె. అయావలె వాండ్రు పాపం ఒప్పుకోడఃజి డిఃసిసిజి, యేసుప్రబు యా లోకమ్దిజ్ తీర్పు తీరిసిని దినమ్దు వన్ని ఆత్మ తప్రె ఆనాద్లె.

6 మీరు పోజిజినిక బాగ సిల్లెద్. పులాని దూరు కండెక్ ఆతిజ్బా పులాజ్ సిల్లి దూరుదు కలప్తిజు, దూరు విజు పులాజ్ ఆనాద్ ఇజి మీరు నెసినిదెర్. సెఇకెజ్ మీ నడిఃమి మహిజు అయాలెకెండ్నె మన్ ఏదా?

7 అందెజె నిజమె పులాని దూరు లెకెండ్ మన్ని వన్నిజ్ మీ నడిఃమిహాన్ దూరం కిదు ఇజి నాను మిజి గటిజు వెప్పిన. అయావలె మీరు పులాజ్ సిల్లి నెగ్గి దూరు లెకెండ్ మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజు పస్కు పండెయ్దిజ్ సప్పి గొరెప్పిల్ల లెకెండ్ యేసుప్రబు మా వందిజ్ పూజ ఆత మనాన్.

8 అందెజె పులాజ్ మన్ని పడాఃయి దూరుదాన్ పిటం సుర్ది మాటు పండెయ్ కిమాట్. ఇహిజు, ముజాల మహి సెఇ అలవాటుజ్, ముజాల కిజి మహి సెఇ పణిజాణిజ్ మాటు పండెయ్ కిమాట్. నాను వెప్పినిక ఇనిక ఇహిజు, మాటు నిజం మన్నికాట్ని నమ్మిదెజ్ తగ్గికాట్ ఆజి మంజినాట్. అయాలెకెండ్ మాటు పండెయ్ కినాట్.

9 రంకు బూలాని వరి వెట కూడఃజి మన్మాట్ ఇజి మిజి రాస్తి ఉత్తమ్దు రాస్త మన్ను.

10 యా లోకమ్మదు మన్ని రంకు బూలాని వరివెటనో, లోబం కిని వరివెటనో, డోజ కిని వరివెటనో, బొమ్మోజ మాడిసిని వరివెటనో మీరు ఎసెజ్బా కూడేదెజ్ ఆవద్ ఇజి దన్నిజ్ అర్థం సిల్లెద్. అయాలెకెండ్ మండ్రెజ్ ఇహిజ మీరు యా లోకం డిసి సాండ్రెజ్ గదె?

11 నాను మిజి రాస్తి మన్ని దన్నిజ్ అర్థం ఇనిక ఇహిజ, నమ్మితికాన్ ఇజి కూకె ఆతికాన్ ఎయెన్బా రంకు బూలానికాన్ ఆతిజనో, లోబం కినికాన్ ఆతిజనో, బొమ్మోజ్ మాడిసినికాన్ ఆతిజనో, సెజ మాటెజ్ వర్గినికాన్ ఆతిజనో, కడు ఉణికాన్ ఆతిజనో, ఇల్లు డెయ్జి డోజ కినికాన్ ఆతిజనో, నన్ని వన్ని వెట కూడేజి మండ్రెజ్ ఆవద్. వన్ని వెట బోజనమ్బా కిదెజ్ ఆవద్.

12 దేవుణు సజమ్దిజ్ వెల్లి మన్ని నమ్మిఇకార్ ఆతి వరి మున్కు తీర్పు తీరిసినిక, నా పణి ఆవద్. సజమ్దు మన్ని వరి మున్కు మీరు తీర్పు కిఇదెరా?

13 సజమ్దిజ్ వెల్లి మన్ని వరిజ్ దేవుణునె తీర్పు తీరిస్సికాన్. అందెజె, “అయ సెజ వన్నిజ్ మీ నడిమిహాన్ వెల్లి పొక్కు”.

6

నమ్మిత్తి వరి నడిమి గొడబెజ్ మహిజ

1 మీ లోఇ ఒరెన్ మరి ఒరెన్ వన్ని వెట గొడబె మహిజ, దేవుణుదిజ్ సెందితివరి ఎద్దు రెంండ, వాండ్రు ఎందనిజ్ నమ్మిఇ వరి ఎద్దు తీర్పు వందిజ్ సొన్సికాన్?

2 దేవుణుదిజ్ సెందితికార్ యా లోకమ్దిజ్ తీర్పు తిరిసిన్దాలె ఇజి మీరు నెన్ఇదెరా? మీరు యా లోకమ్దిజ్ తీర్పు తీరిసినికిదెర్ ఆతిదెర్. అయ లెకెండ్ మహివలె మీ లోఇ మని గొడబెజ్ వందిజ్ తీర్పు తీరిస్సెజ్ మీరు అట్ఇతిదెరా?

3 మాటు దేవుణు దూతరిజ్ తీర్పు తీరిసినికాట్ ఇజి మీరు నెన్ఇదెరా? ఆహిజ యా లోకమ్దిజ్ సెందితి సజతిజ వందిజ్, మరి తీరిస్సెజ్ అట్టికాట్.

4 అందెజె నని గొడబెజ్ మీ నడిమి మహిజ, వనకాజ్ తీర్పు తీరిస్సెజ్ ఎందనిజ్ మీరు సజమ్దు ఇనికబా ఆఇవరి ఎద్దు తీర్పు వందిజ్ బస్సిదెర్?

5 మీరు సిగు ఆదెజ్ ఇజినె ఇక్క నాను వెస్సిన. దేవుణుదిజ్ నమ్మిత్తి వరి లోఇ మని గొడబెజ్ తీరిస్సెజ్ అట్టికాన్ ఎయెన్బా మీ నడిమి సిల్లెండ్రా?

6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెట గొడబెజ్ ఆజి కోర్టుదు సొన్సినిదెర్. అక్కాదె ఆవండ తీర్పు వందిజ్ నమ్మిఇ వరి ఎద్దు తగుదిజ్ బనయి కిజనిదెర్.

7 మీ నడిమి ఎయెరిజ్బా ఒరెన్ వెట కోర్టు కిత్తి మని గొడబెజ్ మన్నె ఇహిజ మీరు పూర్తి అడిగి అర్తి మనిదెర్. కోర్టు కిని దనిజ్ ఇంక మీ వెట కిత్తి తప్ప బరిసినికాదె నెగెద్. కోర్టు కిని దనిజ్ ఇంక డోజ కిజి ఒతిక డిసినికకాదె నెగెద్.

8 గాని మీరె మొసెం కిజనిదెర్, తప్ప కిజనిదెర్. యాక నమ్మిత్తి కూలెజ వెటనె మీరు కిజనిదెర్.

9 సెజ పణిజ్ కినికార్ దేవుణు ఏలుబడిదు మండ్రెజ్ అట్వెర్ ఇజి మీరు నెన్ఇదెరా? మీరు ఒడేబినిబాన్ తప్ప కిమాట్. రంకు బూలానికార్, బొమ్మోజ మాడిసినికార్, సాని బూలానికార్, మొగవరి వెట కూడ్డి మొగ్గకొడోర్,

10 డొబ్బ కినికార్, లోబం కినికార్, ఎస్తివలెబా కడు ఉణిజి సోసి మంజినికార్, దూసలాడిజినికార్, ఇల్లు డెయిజి డొబ్బ కినికార్, నినికార్ ఎయెర్బా దేవుణు ఏలుబడిఁదు మండ్రెజ్ అక్కు మనికార్ ఆవర్.

11 మీ లొణ సెగొండార్ యా లెకెండెనె మహిదెర్. గాని మీ పాపమ్కాణిజ్ నొర ఆజి సుబరం ఆతికిదెర్. మా ప్రబు ఆతి యేసుక్రీస్తు పేరుదాన్ని, మా దేవుణు ఆత్మదాన్ నీతినిజాయ్దుమనికార్ ఆతికిదెర్. మరి ఏలు దేవుణు వందిజ్ కేట ఆతికిదెర్.

రంకు బూలానిక

12 “ఇనిక కిదెజ్బా మజీ అక్కు మనాద్, ఇని అడ్డు సిల్లెద్”, ఇజ మీరు వెప్పినిదెర్. గాని విజు పణిదిజ్ వానికెజ్ ఆఉ ఇజి నాను వెప్పిన, “ఇనిక కిదెజ్బా నజీ అక్కు మనాద్, ఇని అడ్డు సిల్లెద్”. అహిజ్బా నాను కిని దని లొణ ఇనికబా నజీ ఉండ్రీ అలవాటు లెకెండె మండ్రెజ్ నాను సరి సి. ఎందనిజ్ ఇహిజ అయక సిల్లెండ బత్తిదెజ్ ఇజి ఉండ్రీ అలవాటుదిజ్ అణజిజి మన్.

13 “తిండి పొటదిజ్ సర్ల వందిజ్ని పొట తిండి ఊణి వందిజ్నె తయార్ కిత మనాద్”, ఇజి మీ లొణ సెగొండార్ వెప్పినిదెర్. గాని వాని కాలమ్దు పొట గాని తిండి గాని అక్కర్ సిల్లెద్. అందెజె దేవుణు రుండి వనకాజ్ సిల్లెండ కినాన్లె”, ఇజి నాను వెప్పిన. ఒడోల్ రంకు బూలాని వందిజ్ ఆవద్ ఇజి నాను గటిజ వెప్పిన. గాని మా ఒడోల్ ప్రబు వందిజ్ పణి కిదెజ్నె. ఒడోల్ వందిజ్ సూణికాన్ ప్రబునె.

14 దేవుణు వాని కాలమ్దు మా ఒడోలుజు సాతి వరిబాణిజ్ వన్ని సత్తుదాన్ నిక్పాన్లె. అయావలె సాతి వరిబాణిజ్ ప్రబుజ్ నిక్తి లెకెండె మజిబా నిక్పాన్.

15 మీ ఒడోల్ క్రీస్తు ఒడోల్ ఆతి దేవుణు సజమ్దు మని నమ్మిత్తి వరి వెట కూడితి మనికెజ్ ఇజి మీరు నెన్ఇదెరా? అయాలెకెండె మహిజ ఎయెర్బా క్రీస్తు వెట కూడితి మని వన్ని ఒడోల్ ఉండ్రీ సాని దనివెట కుడుప్పిజ అయాక తగ్నాదా? ఆవద్, వాండ్రు ఎసెజ్బా అయక కిదెజ్ ఆవద్.

16 సాని దనివెట కూడెనికాన్ దని వెట కూడెజి ఉండ్రె ఒడోల్ ఆతి లెకెండె మనాద్, ఇజి మీరు నెన్ఇదెరా?. “వారు రిఎర్ ఉండ్రె ఒడోల్ ఆన మంజినార్”, ఇజి దేవుణు మాటదు రాస్త మనాద్.

17 గాని వన్నిజ్ వాండ్రె ప్రబు వెట కుడుప్పె ఆతి మనికాన్, వాండ్రు ఒడిబిని దని లొణ ప్రబు ఆత్మ వెట ఉండ్రె ఆజి మంజినాన్.

18 రంకు బూలాండె దని బాణిజ్ దూరం ఉహ్కీ మండ్రు. లోకుర్ కిజిని విజు పాపమ్కు ఒడోల్దిజ్ వెల్లి మనికెజ్నె. గాని రంకు బూలానికాన్ వన్ని సొంత ఒడోల్దిజ్ వెత్తెకం కిజినాన్.

19 దేవుణు బాణిజ్ మీజీ దొహ్కీ మని మీ లొణ మని దేవుణు ఆత్మ మంజిని గుడిఁనె మీ ఒడోల్ ఇజి మీరు నెన్ఇదెరా? అందెజె మీరు మీ సొంత ఆజుదెర్.

20 మీరు గొప్ప కరిదాన్ కొలె ఆతి మహికిదెర్. అందెజె మీ ఒడోల్దాన్ దేవుణుదిజ్ గవరం సీదు.

7

పెండ్లి వందిజ్ వెప్పిక

1 మీరు రాస్తిమని సజతిజ వందిజ్ ఏలు నాను వెప్పిన. పెండ్లి ఆవండ మంజినిక మొగ్గు కొడెదిజ్ నెగెద్.

2 గాని రంకు బూలానిక లావ్ మనిజ్ ఒరెన్ ఒరెన్ వన్నిజ్ సొంత బోదెలి మండ్రెజ్. విజు బోదెకాజ్ వరి సొంత మాసి మండ్రెజ్ వలె.

3 మాసి ఆల్ని వందిజ్ కిదెజ్ మనికెజ్ విజు కిజి మండ్రెజ్ వలె. ఆల్నిబా మాసి వందిజ్ అయాలెకెండెనె మండ్రెజ్ వలె.

4 ఆల్ని ఒడొల్ దనిజె సొంతం ఆవండ దని మాసిజ్బా సెందితిక. అయాలెకెండెనె మాసి ఒడొల్ వన్నిజె సొంతం ఆవండ వన్ని ఆల్నిజ్బా సెందితిక.

5 పార్లనం కిని వందిజ్ మిజి సమయం దొహ్కీ వందిజ్నె ఆవండ, రిఎర్ కూడొజి ఒప్వండ మీరు కేట కేట మండ్రెజ్ ఆవెద. గాని మీ ఆనిజ అణస్సి ఆజి మండ్రెజ్ అట్వండ మనిజ్, సయ్తాను మిజి తవు కిబిసి అర్పైజ్ సరి సివండ ఉండ్రెబానె కూడొజి మండ్రు.

6 మిజి యాలెకెండె కిదెజ్ ఆనాద్ ఇజి యాక నాను వెప్పిన, గాని ఉండ్రె ఆడ్ర లెకండ్ ఆవెద.

7 విజెరె నాను మని లెకెండె పెండ్లి ఆవండ మహిజు బాగ మనాద్ ఇజి ఆస ఆజిన. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దొహ్క మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

8 ఏలు పెండ్లి ఆజి వరి వెటని రాండి బోదెకాజ్ నాను వెప్పనిక ఇనిక ఇహిజు, నాను మంజిని లెకెండె పెండ్లి ఆవండ మంజినికాదె వరిజ్ నెగెద.

9 గాని వరి ఆనిజ అణస్సి ఆజి మండ్రెజ్ అట్వెర్ ఇహిజు వారు పెండ్లి ఆదెజ్ వలె. ఎందనిజ్ ఇహిజు మన్నుదు ఉత్పుత్ ఆజి సినుదాన్ వెయ్ని లెకెండె మనిదనిజ్ ఇంక పెండ్లి అనిక నెగెద.

10 పెండ్లి ఆతి వరిజ్ నాను సీజిని ఆడ్ర, నానె ఆవద్ దేవుణు సిజిని ఆడ్ర ఇనిక ఇహిజు, ఆల్ని, దని మాసిజ్ డిసి సొండ్రెజ్ ఆవెద.

11 అది మాసిజ్ డిసి సొహిజు మరి ఉండ్రె పెండ్లి ఆదెజ్ ఆవెద. మరి పెండ్లి ఆవండ మండ్రెజ్ ఇన్లం సిల్లెద్ ఇహిజు, దని మాసి వెట రాజినం ఆజి సమాదనం ఆజి మండ్రెజ్ వలె. మరి ఒరెన్ మాసి వన్ని ఆల్నిజ్ డిసి సిదెజ్ ఆవద్ ఇజిబా వన్ని ఆడ్ర మనాద్.

12 మహి వరిజ్ నాను వెప్పనిక ఇనిక ఇహిజు, ప్రబు ఆవెన్ నానె, నమ్మితికాన్ ఆతి ఒరెన్ వన్ని ఆల్ని నమ్మిఇకాద్ ఇహిజ్బా, అది వన్ని వెటనె బత్కినాద్ ఇహిజు వాండ్రు దనిజ్డిసి సిదెజ్ ఆవెద.

13 మరి, ఉండ్రె నమ్మిత్తికాద్ ఆతి బోదెల్దిజ్, మాసి నమ్మిఇకాన్ ఇహిజ్బా దని వెటనె వాండ్రు బత్కినాన్ ఇహిజు అది వన్నిజ్ డిసి సిదెజ్ ఆవెద.

14 ఎందనిజ్ ఇహిజు నమ్మిఇకాన్ ఆతి మాసి నమ్మిత్తికాద్ ఆతి వన్ని ఆల్ని వెట దేవుణు వందిజ్ కేట ఆతికాన్ కిబె ఆత మనాన్. అయా లెకెండెనె నమ్మిఇకాద్ ఆతి ఆల్ని నమ్మితికాన్ ఆతి దని మాసి వెట దేవుణు వందిజ్ కేట ఆతికాద్ కిబె ఆత మనాద్. యా లెకెండె సిల్లెండ మహిజు మీ పొటాద్ పుట్టి కొడొబ్, దేవుణుదిజ్ నమ్మిఇ వరి కొడొబ్ లెకెండె మంజినార్, గాని ఏలు దేవుణు వందిజ్ ఆతికారె.

15 గాని ఆల్ని మాసిర్ లొఇ నమ్మిఇకాన్ ఆతి మాసి గాని నమ్మిఇకాద్ ఆతి ఆల్ని గాని డిసి సిదెజ్ ఇజి ఆస ఆతిజు ఆహె కిపెర్. అయాలెకెండె జర్గినివలె, నమ్మితికాన్ నమ్మిఇ దనిజ్ గాని నమ్మిత్తికాద్ నమ్మిఇ వన్నిజ్ గాని కూడొజి మన్అ ఇజి బలవంతం కిదెజ్ ఆవెద. సమాదనమ్దాన్ బత్కిదెజ్ ఇజినె దేవుణు మిజి కూక్ మనాన్.

16 ఓ, బోదెలి నీ మాసిజ్ దేవుణు రక్సిన్ని లెకెండ్ కిదెజ్ అట్టిదో సిల్లెదో ఇజి నీను ఎలాగ నెస్సి? ఓ, మొగకొడోః నీ ఆల్పిజ్ దేవుణు రక్సిన్సి లెకెండ్ కిదెజ్ అట్టిదో సిల్లెదో ఇజి నీను ఎలాగ నెస్సి?

17 ఒరెన్ ఒరెన్ ఎలాగ బత్కిదెజ్ ఇజి దేవుణు ఒపసెప్త మనాండ్రో అయాలెకెండ్ మండ్రెజ్ వలె. ఎలాగ మండ్రెజ్ ఇజి దేవుణు కూక్త మనాండ్రో దనిజ్ తగితి లెకెండ్ వారు మండ్రెజ్ వలె. ఇక్కడె విజు సజమ్కాజ్ నాను సీతి మని రూలు.

18 ఎయెన్బా దేవుణు వన్నిజ్ కూక్తివలె సునతి కిబె ఆతికాన్ ఇహిజు వాండ్రు సునతి కిబె ఆతి లెకెండ్నె మండ్రెజ్ వలె. అయొక మారిస్టెజ్ సుడోడెజ్ ఆవెద్. మరి ఒరెన్ దేవుణు వన్నిజ్ కూక్తి వలె సునతి కిబె ఆతికాన్ ఇహిజు వాండ్రు సునతి కిబె ఆదెజ్ సుడోడెజ్ ఆవెద్.

19 సునతి కిబె ఆతిజ్బా ఇనిక సిల్లెద్. సునతి కిబె ఆతిజ్బా ఇనిక సిల్లెద్. దేవుణు ఆగ్నెజ్ లోజిజి నడిఃనికాదె ముకెలమతిక.

20 ఒరెన్ వన్నిజ్ ఎలాగ మహివలె దేవుణు వన్నిజ్ కూక్త మనాండ్రో అయాలెకెండ్నె వాండ్రు మండ్రెజ్ వలె.

21 నీను వెట్టిపణి కిజి మహిజ్ కూకె ఆతిజు దని వందిజ్ బాద ఆమ. అబెణిజ్ విడుఃదల ఆదెజ్ నిజి అక్కు మనాద్ ఇహిజు ఆహె కితి.

22 ఒరెన్ వెట్టిపణి కినికాన్ ఆతి మహిజ్ దేవుణు ముస్సు నమకం ఇట్టాన్ ఇహిజు వాండ్రు దేవుణుదిజ్ సెందితికాన్ నీ పాపమ్కాజ్ విడుఃదల ఆతి లెకెండ్ ఆజినాన్. అయాలెకెండ్నె అక్కు మనికాన్ దేవుణు ముస్సు నమకం ఇట్టాన్ ఇహిజు వాండ్రు క్రీస్తు వందిజ్ వెట్టిపణి కినికాన్ లెకెండ్ ఆజినాన్.

23 నండో ఏలువదాన్ కొలె ఆతికార్ మీరు, అందెజె లోకురి బుద్దిదిజ్ వెట్టిపణి కినివరి లెకెండ్ ఆమాజ్.

24 నమ్మిత్తికిదెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజి దేవుణు ఇట్ట మనాండ్రో అయాలెకెండ్ మండ్రెజ్ వలె. ఎలాగ మహివలె దేవుణు కూక్త మనాండ్రో అయాలెకెండ్నె దేవుణు వందిజ్ బత్కిదెజ్ వలె.

25 ఏలు విడ్డి అయలిక వందిజ్ నజి ప్రబు బాణిజ్ ఇని ఆడ్ర సిల్లెద్. గాని దేవుణు కనికారమ్దాన్ నమ్మిదెజ్ తగ్గికాన్ ఇజి నజి ఒడోబిజిని వందిజ్ నాను ఒడోబినికెజ్ వెస్సిన.

26 యా లోకమ్దు ఏలుమని కస్టమ్కు సుడోతిజు ఎయెన్బా వాండ్రు మని లెకెండ్నె మహిజు నెగెద్ ఇజి నాను ఒడోబిజి.

27 నీను పెండ్లి ఆతి మనిదా? అహిజు డిఃసి సీదెజ్ సుడోమా. పెండ్లి ఆవండ మహిజు పెండ్లి ఆదెజ్ సుడోమా.

28 నీను పెండ్లి ఆతిజు పాపం ఆవెద్. విడిఃఅయలి పెండ్లి ఆతిజు పాపం ఆవెద్. గాని పెండ్లి ఆతి వరిజ్ యా బత్కుదు నండో కస్టమ్కు మంజినె. అయొకెజ్ మిజి రెంండ మండ్రెజ్ ఇజినె నాను కోరిజిన.

29 తంబెరిజాండె, నాను వెస్సానిక ఇనిక ఇహిజు ఏర్పాటు కిత్తిమని సమయం ఆదెజ్ కాలం కండెక్నె మనాద్. ఆల్పిక్ మనికార్ ఏలుదాన్ ఆల్పిక్ సీలివరి లెకెండ్ బత్కిదెజ్.

30 అడోబనికార్ అడోబజు వరి లెకెండ్ మండ్రెజ్ వలె, సర్ద ఆనికార్ సర్ద ఆకాగార్ లెకెండ్ మండ్రెజ్ వలె, కొణికార్ మాపు కొటిక మా వందిజ్ ఇడో ఆనికాప్ ఆవెప్ ఇజి మండ్రెజ్ వలె.

31 యీ లోకమీదు మనికెజ్ వాడేజనికార్ వనక వందిజ్ మని ఆసదాన్ మన్ను నిండ్రిజి మండ్రెజ్ ఆవెద. యీ లోకం ఏలు మని లెకెండె ఎస్తివలెబా మన్ఎండ, సిల్లెండ ఆనాద్లె.

32 మీరు విసారిసి మంజిని వరి లెకెండె మండ్రెజ్ ఆవెద్ ఇజి నాను కోరిజిన. పెండ్లి ఆఇకాన్ ఎలాగ ప్రబుజ్ సర్ద కిదెజ్ అట్టు ఇజి ప్రబుజ్ సెందితి సజతిజ్ వందిజ్ ఒడిబిజి మంజినాన్.

33 పెండ్లి ఆతికాన్ ఎలాగ ఆల్నిజ్ సర్ద కిదెజ్ అట్టు ఇజి యీ లోకమీదిజ్ సెందితి సజతిజి వందిజ్ ఒడిబిజి మంజినాన్.

34 వాండ్రు రుండి దరొటు లాగె ఆజినాన్. అయాలెకెండెనె పెండ్లి ఆఇ బోదెలి గాని ఉండ్రీ విడ్డిజ్ అయలి గాని దేవుణుదిజ్ సెందితి సజతిజి వందిజ్ ఎత్తు కిజి మంజినాద్. పూర్తి ఆత్మదాన్ పూర్తి ఒడోల్దాన్ దేవుణు వందిజ్ కేట మండ్రెజ్ ఇజి అది ఒడిబిజినాద్. గాని పెండ్లి ఆతికాద్ మాసిజ్ ఎలాగ సర్ద కిదెజ్ అట్టు ఇజి యీ లోకమీదిజ్ సెందితి వన్కా వందిజ్ ఒడిబిజి మంజినాద్.

35 మీరు నెగెండె మండ్రెజ్ ఇజినె నాను వెప్పిన, మిజి అడ్డు కిదెజ్ ఇజి సిల్లెద్. మీరు ఇతల్ అతాల్ ఆవెండ దేవుణు దరొట్ నెగెండె మంజి బతకెదిజ్ ఇజి వెప్పిన.

36 ఎయెన్బా, వన్ని వందిజ్ పేరు కిత్తి అయలిదిజ్ పెండ్లి కిఎండ మంజి, దనిజ్ సిగు కిబిస్నాన్ ఇజి వన్నిజ్ తోరితిజ, దనిజ్ వయసు డాబ్బినాద్ ఇజి ఒడిబిజి దనివెట పెండ్లి ఆదెజ్ వలె ఇజి ఒడిబితిజి వాండ్రు కోరిజిన లెకెండె కిదెజ్ వలె. వాండ్రు కినిక పాపం ఆవెద్. వారు పెండ్లి ఆదెజ్ వలె.

37 ఎయెన్బా పెండ్లి ఆదెజ్ ఇని బలవంతం సిల్లెండ, వన్నిజ్ వాండ్రె వన్ని గర్బం గదినెండ పూర్తి అణనె ఆదెజ్ అట్టాన్ ఇజి అయ అయలి వెట నాను పెండ్లి ఆవె ఇజి, అయీ సజతి వందిజ్ వన్ని మన్నుదు గటిజ తీర్చనం కిత్తాన్ ఇహిజ, వాండ్రు కిని తీర్చనమబా నెగ్గికాదె.

38 అందెజి వన్నిజ్ పేరు కిత్తి అయలిదిజ్ పెండ్లి కినికాన్ నెగ్గిక కిజినాన్. అయాలెకెండె పెండ్లి ఆఇకాన్ మరి ఒదె నెగ్గిక కిజినాన్.

39 మాసి బత్తితి మనిదాక ఆల్ని వన్ని వెట మండ్రెజ్ వలె. వాండ్రు సాతిజి దనిజ్ ఇస్టమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె.

40 అది రాండిణి లెకెండెనె మహిజ ఒదె సర్దదాన్ మండ్రెజ్ ఆనాద్ ఇజి నాను ఒడిబిజిన, నజిబా దేవుణు ఆత్మ మంజి నాను ఒడిబిని దని లోఇ నజి నడిపిస్నాన్ ఇజి నాను ఒడిబిజిన.

8

బొమ్మెజి పూజి సీతిమని బోజనం వందిజ్

1 ఏలు బొమ్మెజి పూజి సీతి బోజనం వందిజ్ వెప్పిన. మాటు విజెటి గెణం మనికాట్ ఇజి నెసిసాట్. గాని అయీ లెకెండె మని గెణం పొజిస్సిసినాద్. గాని మా లిఇ ఒరెన్ వన్నిజ్ మరి ఒరెన్ వెట ప్రేమ మహిజ దేవుణు మున్ను మని నమకమీదు పిరిప్తెజ్ అట్టాట్.

2 ఎయెన్బా, నాను ఇనికాదొ నెస్సికాన్ ఇజి ఒడిబితిజ, వాండ్రు నెస్తిజ్ మని లెకెండె ఇనికబా నెస్సికాన్ ఆవెన్.

3 గాని దేవుణుడికే ప్రేమినిని వన్నికే దేవుణుడికే సెందితి వన్ని లెకెండ్ వాండ్రు సుణాన్.

4 అందెజె బొమ్మెజ పూజ సెతికెకే తిని వందికే వెహ్సిన. ఉండ్రె బొమ్మె ఇహిజ యా లోకమ్దు ఇనికబా ఆక ఇజ మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సెల్లెన్ ఇజ మాటు నెస్త మనాట్.

5 దేవుణు ఇజ కూకె ఆనికెకే ఇజ నండొ మహిజ్బా, నిజమె ప్రబుని దేవుణు ఇజ కూకె ఆనికెకే నండొ మన్నె. ఆగాసమ్దు గాని బూమి మున్ను గాని దేవుణు ఇజ పేరు కూకె ఆనికెకే నండొ మన్నె.

6 గాని మజీ ఒరెండ్రె దేవుణు మనాన్, వాండ్రు మా బుబ్బు. వన్ని బాణిజె మనికెకే విజు కల్లెతె. వన్ని వందికే మాటు బత్తిజినాట్. మజీ యేసు క్రీస్తు ఒరెండ్రె మా ప్రబు ఆతికాన్. మనికెకే విజు వన్ని వెటనె తయార్ ఆతె. వన్ని వెటనె మాటు బత్తిజినాట్.

7 గాని యాక విజెరె నెన్ఎర్. దేవుణుడికే నమ్మిత్తికార్ సెగొండార్ ఏలుబా బొమ్మెకే నిజమె దేవుణు ఇజ ఒడెబిజినార్. అందెజె వారు నని బోజనం కినివలె, నిజమె ఆక బొమ్మెకే పూజ సెతికెకే ఇజ ఒడెబిజినార్. యాలెకెండ్ ఒడెబిజినె వారు ఉణార్. అందెజె వారు నని బోజనం కిత్తార్ ఇహిజ, వారు పాపం కిత్తార్ ఇజ వరి గర్బం గదిసి మంజినాద్.

8 గాని ఉణి బోజనమ్దాన్ మాటు దేవుణుడికే డగ్గు ఆదెకే అట్ఎట్. మాటు ఉణెఎండ మహిజ ఇనికాదొ గొప్ప విలువాతిక మజీ నస్తం ఆవెద్. మాటు ఉటిజ ఇనికాదొ గొప్ప విలువాతిక మజీ లాబమ్బా మన్ఎద్.

9 అహిజ ఇనికబా కిదెకే నిజి మని అక్కుదాన్, మన్నుదు దయరం సెల్లి వరికే తొరొ ఇట్టి లెకెండ్ మండ్రెకే ఆవెద్.

10 ఎందనికే ఇహిజ, యా గెణం మని నీను, బొమ్మెజ మని గుడిఁదు బోజనం కిజి మంజనిక, మన్నుదు దయరం సెలికాన్ ఒరెన్ సుడెతిజ, బొమ్మెజ పూజ సెతికెకే తిండ్రెకే వాండ్రు దయరం తపె ఆనాన్. అయాలెకెండ్ కిజి వన్ని గర్బం వన్నికే గదిసి మంజినాద్.

11 ఎందనికే ఇహిజ, యా మన్నుదు దయరం సెలి వన్ని వందికేబా క్రీస్తు సాత మనాన్. గాని, “నజి గెణం మనాద్”, ఇజ తొరొ ఆజిని నీను కిజిని పణిజాణికే నీను వన్నికే పాపం కిబిస్సి, మరి వన్నికే పాడె కిజిని.

12 యా లెకెండ్ మీరు, గర్బం గదిసిని, దయరం సెల్లి తంబెరిజ పడిఁఎండ పాపం కిజినిదెర్. ఎందనికే ఇహిజ, నీను కిజిని పణికే సుడెజి తపు ఇజ ఒడెబినికెకే, వన్ని గర్బం గదిసినికెకే వాండ్రుబా కిజి మంజినాన్. యా లెకెండ్ మీరు క్రీస్తుకే పడిఁఇ పాపం కిజినిదెర్.

13 అందెజె నాను ఉణిజిని దనిదటాకే నా తంబెరి ఒరెన్ తప్పి సొన్నినాన్ ఇహిజ, నా తంబెరి తప్పి సొన్ఎండ మండ్రెకే ఇజ నాను ఎసెజ్బా నన్ని కండ తిన్వి.

9

అపొస్తుడు ఆతి వన్నికే మన్ని అక్కుకే

1 నాను అక్కు మనికాన్ ఆవినా? నాను అపొస్తుడు ఆవినా? మా ప్రబు ఆతి యేసుకే తొవినా? మీరు, ప్రబు వందికే నాను కిత్తి పణిదికే పంట ఆఇదెరా?

2 నాను అపొస్తుడు ఇజ మహికార్ ఒడెబిఎండ మహిజ్బా, నిజమె మీ వందికే నాను అపొస్తుడునె. నాను ప్రబు వందికే అపొస్తుడు ఇని దనికే రుజుప్ మీరె.

3 నా ముస్కు తీర్పు కిని వరిజ్ ఎద్దు నాను నా వందిజ్ వెప్పినిక యాక.

4 మాపు దేవుణు మాటెజ్ నెన్పిస్తి వరిబాన్ లొసి ఉండెజ్ తిండ్రెజ్ మజి అక్కు సిల్లెదా?

5 మహి అపొస్తరుజ్ లెకెండని, ప్రబు తంబెరిజు ఆతివరి లెకెండని, పేతురు లెకెండ నమ్మిత్తికాద్ ఆతి అల్ని వెట బుల్లెయ్ కిదెజ్ మజి అక్కు సిల్లెదా?

6 దేవుణు పణి కిజిని మహివరి లెకెండ, మాపు దేవుణు పణి కినివలె నజిని బర్నబెజ్ తిండి వందిజ్ పణి కిఎండ ఉణిజి తిండ్రెజ్ అక్కు మనాద్.

7 వన్ని సొంత డబ్బు కర్పు కిజి ఎయెన్బా సయనమ్దు పణి కినాండ్రా? ద్రాక్కు టోట ఉణుసి దని పట్టు తిన్ఇకాన్ ఎయెన్బా మనాండ్రా? గొర్రెజు పొస కిజి వన్యా పాలు ఉణిఇకాన్ ఎయెన్బా మనాండ్రా? ఎయెర్బా మన్ఎర్.

8 యా మాటెజ్ నాను లోకమ్దిజ్ సెందితి వరి వజనె వెహ్ఎ. దేవుణు సిత్తి రూలుదుబా యా లెకెండెనె వెప్పినాద్.

9 “కలమ్దు మటిసిని డాఁసు మూతుదు కిమా తోహ్మాట్”, ఇజి మోసి వెట దేవుణు సిత్తి రూలుదు రాస్త మనాద్. దేవుణు డాఁకు వందిజ్నె విసారిస్సాండ్రా?

10 నిజమె, యాక మా వందిజ్బా వెహ్ఎతాండ్రా? మా వందిజ్ వెప్తికెజి. ఎండనిజ్ ఇహిజు, పంట పంటితిజు, ఉండెజ్ ఆనాద్ ఇజి ఉండ్రె ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినాన్.

11 మీ వందిజ్ అత్మదిజ్ సెందితికెజ్ మాపు మీ నడిఁమి వితాప్ ఇహిజు, అందెజి మీ బాణిజ్ మా ఒడొల్దిజ్ కావాలిస్తికెజ్ మాపు లొసె ఆతిజు ఆక పెరి సజతినా?

12 మీ బాణిజ్ సాయం లొసె ఆదెజ్ మహి వరిజ్ అతికారం మనాద్ ఇహిజు, మజి వరిజ్ ఇంక ఒద్దె అక్కు సిల్లెదా? గాని మాపు యా అతికారమ్దిజ్ వాడొదెజ్ సిల్లెద్ది. అక్కాదె అఎండ క్రీస్తు సువార్తదిజ్ ఇని అడ్డుబా రెఎండ మండ్రెజ్ ఇజి విజు వన్యాజ్ బరిస్తాప్.

13 దేవుణు గుడిఁదు పణి కిజిని వరిజ్ దేవుణు గుడిఁదాన్ బోజనం దొహ్కాద్. పూజ సీని మాల్లి పీటదు పణి కిజిని వరిజ్ పూజ సిత్తి వన్యా లొఇహాన్ వంతు మనాద్ ఇజి మీరు నెన్ఇదెరా?

14 అయా లెకెండెనె సువార్త వెప్పిని వరిజ్ బత్తుదిజ్ కావిలిస్తికెజ్ సువార్తదానె దొహ్కెకెజ్ ఇజి ప్రబు ఆడ్ర సిత్తా మనాన్.

15 గాని నాను ఇహిజు యా అతికారం లొఇ ఇనికబా వాడొఁవత. మీరు యా లెకెండ నజి కినిదెర్లె ఇని ఆసదాన్ ఇక రాన్ఁవత. నాను పొగడెఁ ఆజి వెప్తి యా మాటెజ్ ఎయెన్బా ఇని అర్థం సిల్లెండ కిని దనిజ్ ఇంక నాను సాతిజునె నెగెద్.

16 అహిజు, నాను సువార్త సాటిసిన ఇజి పొగడెఁ ఆదెజ్ నజి అక్కు సిల్లెద్ది. ఎండనిజ్ ఇహిజు సువార్త సాటిస్తిజ్ ఇజి ఉండ్రె బలవంతం నా లొఇ మనాద్. సువార్త సాటిన్ఁవండ మహిజు నజి బాద్.

17 నా సొంత ఇస్టమ్దాన్ నాను సువార్త సాటిస్తిజు నజి జీతం దొహ్కాద్. నా సొంత ఇస్టమ్దాన్ ఆవండ కిత్తిజు, నాను కిదెజ్ ఇజి నజి ఒప్పుజెపె ఆతి పణి కిజిన ఇజి ఆజినాద్.

18 అహిజు నజి దొహ్కెజి జీతం ఇనిక? సువార్త సాటిసినివలె, నాను సువార్త సాటిసిని వరిజ్ మని అతికారమ్దాన్ ఇనికబా నా వందిజ్ గణస్తెజ్ సుడొఁవండ, నెడ్డినె కిదెజ్ వలె. అక్కాదె నజి దొహ్కె ఇనాయం.

19 నాను ఎయెరిజ్బా అడిఁగి మనికాన్ ఆవండ విజు దనిజ్ అక్కు మనికాన్. గాని,

నజీ అట్టి నసాండారిజ్ దేవుణు దరిజ్ కలపైజ్ ఇజి నానె నజీ విజెరె వందిజ్ వెట్టిపణి కిని వన్ని లెకెండ్ కిబె ఆత.

20 యూదురిజ్ దేవుణు దరిజ్ కలపైజ్ ఇజి నాను వరి వందిజ్ యూదురు లోకు లెకెండ్ ఆత. నాను మోసె రాస్తి రూలుజ అడిగి మనీకాన్ ఆతిజ్బా మోసె రాస్తి రూలుజ్ లోజిని వరిజ్ దేవుణు దరిజ్ కలపైజ్ ఇజి వరివందిజ్ మోసె రాస్తి రూలుజ్ లోజితి వన్ని లెకెండ్ ఆత మన.

21 దేవుణు మోసె సీతి రూలుజ్ లోజిజి వరిజ్ దేవుణు దరోట్ కుడుఃపైజ్ ఇజి నాను వరి లెకెండ్ ఆత. దేవుణు మోసె వెట సీతి రూలుజ్ నాను లోజిఎ ఇజి నాను వెహ్ఎ, గాని క్రీస్తు సీతి రూలుజ్ లోజిజి మంజిన.

22 సత్తు సీలి వరిజ్ దేవుణు దరిజ్ కుడుఃపైజ్ ఇజి నాను సత్తు సీలి వన్ని లెకెండ్ ఆత. ఎలాగ ఆతిజ్బా సెగొండారిజ్ దేవుణు రక్సిన్తి లెకెండ్ కిదెజ్ ఇజి నాను విజెరె వందిజ్ ననివరి లెకెండ్ ఆత మన.

23 ఎందనిజ్ ఇహిజ దేవుణు బాణిజ్ వాజిని దినమ్క వందిజ్ సువార్త సాటిసిని నజీబా వంతు మండ్రెజ్ ఇజి యాకెజ్ విజు నాను సువార్త వందిజ్ కిజిన.

24 పందెం పోటిదు ఉహ్కీ పందెమ్దు ఉహ్కీనార్ విజెరె ఉహ్కీనార్ గాని ఒరెన్ వన్నిజె ఇనాయం దోహ్కీ ఇజి మీరు నెన్ఇదెరా? అందెజె ఇనాయం దోహ్కీ ఇజినె మీరు పందెమ్దు ఉహ్కీ.

25 పందెమ్దు పోటి అనికార్ విజెరె దనివందిజ్ ఒజి ఆజి తయార్ ఆజినార్. సాణెం మంజి పాడెః ఆజి సాన్సిని టోపి దోహ్కీ వందిజ్ యాకెజ్ విజు కిజినార్. గాని మజీ ఎలాకాలం మంజిని టోపినె దోహ్కీ.

26 అందెజె నాను గురి సుడెఃఎండ ఉహ్కీకాన్ ఆవ. నాను ముటి అసి గాలిదిజ్ డెయ్ని నని వన్ని లెకెండ్ ఆవ.

27 గాని మహి వరిజ్ సువార్త సాటిసి వెనుక, ఇనాయం దోహ్కీజి వన్ని లెకెండ్ నజీ నానె కిఎండ మండ్రెజ్ ఇజి నా ఒడొఃల్దిజ్ నెగెండ అడ్డిఃజి, నజీ వెట్టిపణి కిని వన్ని లెకెండ్ కిజిన.

10

ఇస్రాయేలు లోకురిజ్ సుడెఃజి నెస్తెజ్ మన్నికెజ్.

1 తంబెరిజాండె, మా అని గొగోర్ ఆతి యూదురు విజెరె మోసె వెట మహివలె ఇనిక జర్లిత మనాద్ మీరు నెగెండ నెసి మండ్రెజ్ ఇజి నాను ఆన ఆజిన. దేవుణు వరివెట మనాన్ ఇజి ఉండ్రి గుర్తు లెకెండ్ దేవుణు వరి ముస్సు ఇడ్డి మని మొసాప్ అడిగి వారు నడిఃత మహార్. ఎరాని సమ్దారం ఇని సమ్దారం నడిఃమిహాన్ వారు విజెరె వస్త్రా బూమిదాన్ అతాహ పడక నడిఃత సాహార్.

2 వారు విజెరె మోసె వెట మొసాప్ అడిగి మంజి సమ్దారం నడిఃమిహాన్ వస్త్రా బూమిదాన్ నడిఃజి మహిజ్, మోసె వెట బాప్తీసం లాగె ఆతి లెకెండ్ అతార్. ఎందనిజ్ ఇహిజ వారు మోసెజ్ వరిజ్ నెయ్యి లెకెండ్ వారు ఒప్పుకోటార్.

3 విజెరె దేవుణు సీతి ఉండ్రె బోజనమ్నె ఉటార్.

4 వారు విజెరె సట్టుదాన్ దేవుణు రప్పి ఉండ్రె ఏరునె ఉటార్. అయ సటు క్రీస్తుజ్ గుర్తు లెకెండ్నె మనాద్. ఎందనిజ్ ఇహిజ వాండ్రు ఇనికబా తకు సిల్లెండ వరిజ్ కావాలిన్తిజ్ విజు సీజి నిజమె వరి వెట నడిఃజి మహాన్.

5 అయా లెకెండ్ మహిజ్ బా, వరి లొఇ నండోడారిజ్ దేవుణు ఇన్ఱం ఆవండ ఆతాన్. అందెజె ఎయెర్ బా మన్ ఇ అయా అడివిదు వరిజ్ సప్ విసిర్ తాన్.

6 ఇక్కెజ్ విజు మాటు నెస్టెజ్ ఇజి మజి ఉండ్రీ గుర్తు లెకెండ్ వరిజ్ జర్గితె మన్నె, వారు సెఇ వనకాజ్ వందిజ్ ఆస ఆతి లెకెండ్ మాపు ఆస ఆవండ జాగర్త మండ్రెజ్ ఇజి.

7 వరి లొఇ సెగొండార్ లెకెండ్ బొమ్మెజు మాడిసినికార్ ఆమాట్. “లోకుర్ తిండ్రెజ్ ఉండెజ్ బస్తార్, కర్దిదెజ్ నీజెతార్”, ఇజి వరి వందిజ్ దేవుణు మాటదు రాస్స మనాద్.

8 వరి లొఇ సెగొండార్ కిత్తి మహి లెకెండ్ మాటు రంకు బూలమాట్. ఉండ్రె రోజుదు ననికార్ ఇరువయ్ మూండ్రీ వెయుజ్ లోకుర్ సాతార్.

9 వరి లొఇ సెగొండార్ కిత్తి మహి లెకెండ్ మాటు ప్రబుజ్ పరిన కిదెజ్ ఆవద్. ననికార్ సరాస్ వెట సాతార్.

10 వరి లొఇ సెగొండార్ దేవుణు ముస్కు సణిజెతార్. వారు నాసనం కినికాన్ ఆతి దేవుణు దూత వెట సాతార్. మాటు దేవుణు ముస్కు సణిజెదెజ్ ఆవద్.

11 మహివరిజ్ తోర్దెజ్ ఉండ్రీ గుర్తు లెకెండ్ యాకెజ్ వరిజ్ జర్గితె. యా తరమ్ది ఆకర్ దినమ్దు బత్తిజిని మజి బుద్ది వాదెజ్ ఇజి గెపతం కిత్తి మని లెకెండ్ రాసి ఇడెః ఆత మనాద్.

12 అందెజె ఎయెర్ బా దేవుణు ముస్కు మని నమకమ్దు నాను గటిజు నిల్చిన ఇజి ఒడెఃబితిజు, వాండ్రు వెటనె పాపమ్దు అర్ఎండ జాగర్త మండ్రెజ్ వలె.

13 మాములుక లోకురిజ్ వాజిని పరిక్కెజ్ నె ఆవండ మరి పెరికెజ్ ఇనికెజ్ బా మిజి రవుతె. దేవుణు నమ్మకమాతికాన్. అందెజె ఓరిస్టెజ్ అట్టి దనిజ్ ఇంక పెరిక ఇనికబా మిజి వాదెజ్ వాండ్రు ఒప్ ఏన్. అక్కాదె ఆవండ వాజిని పరిక్కదిజ్ నిల్చి మండ్రెజ్ పరిక్క వెట తప్రె ఆదెజ్ ఉండ్రీ సరిబా తోరిస్నాన్ లె.

దెయమ్క పండోయ్ ని ప్రబు ఏర్పాటు కిత్తి బోజనం

14 అందెజె నజి ఇన్ఱమాతి తంబెరిజాండె, బొమ్మెజు మాడిసిని బాణిజ్ దూరం ఉహ్ క్చి మండ్రు.

15 మీరు నెగ్గి బుద్ది మనికిదెర్ ఇజిని నాను వర్గిజన. నాను వెహ్నిని సజతిజు మీరె అర్లం కిజి సుడెఃదు.

16 మాటు విజెటె కూడెఃజి వానివలె, మాటు దేవుణు ఏర్పాటు కిత్తి బోజనం ఉణువలె, దేవుణుదిజ్ వందనమ్కు వెహ్ని గినాదిక ఉణిజి, మాటు ఉండ్రె రొటె రుక్చి తినివలె క్రిస్తు నలదాన్ మజి వాజిని నెగ్గి వన్కాజ్ కూడెఃజి మంజినికాట్ ఆజినాట్.

17 రొటె ఉండ్రెనె, అయ ఉండ్రె రొటెదునె మాటు విజెటె కూడెఃజి తింజినాట్. అందెజె నండోండార్ ఆతి మాటు ఉండ్రె ఒడెఃల్ ఆత మనాద్.

18 ఇస్రాయేలు లోకురిజ్ సుడెఃదు, దేవుణుదిజ్ నంద సుర్చి బాడ్డిదు నంద సీని వన్కాజ్ తినికార్, దనివెట కూడెఃజి మంజినికార్ ఆవరా?

19 అందెజె బొమ్మెజు పూజు సీతి వనకాజ్ లొఇ ఇనికబా మనాద్ ఇజినో, బొమ్మెజు లొఇ ఇనికబా మనాద్ ఇజినో నాను వెహ్నినానా?

20 సిల్లెద్. గాని దేవుణు లోకుర్ ఆఇకార్ పూజెజ్ సీనివలె దేవుణుదిజ్ పూజు సీనినార్ ఇజి వారు ఒడెఃబిజినార్. గాని నిజమె వారు దెయమ్కాజ్ నె పూజు సీజినార్. అందెజె మీరు దెయమ్క వెట కూడెఃజి మంజినిక నజి ఇన్ఱం సిల్లెద్.

21 మీరు ప్రబు గినాదాన్ ఉణిజి మరి దెయమ్క గినదాన్బా ఉండెజ్ అట్ఇదెర్. ప్రబు ఏర్పాటు కిత్తి బోజమమ్దుని దెయమ్క బోజనమ్దుబా ఒర్పె కూడెజి మండ్రెజ్ అట్ఇదెర్.

22 దేవుణుదిజ్ సెందితి గవరం తగ్గి లెకెండె వన్నిజ్ సీదెజ్ వలె. అయా లెకెండె కిఎండ ప్రబు కోపం రేపిస్తెజ్ మాటు వణి కిజినాటా? మాటు వన్నిజ్ ఇంక సత్తు మనికాటా? నమ్మిత్తి వన్నిజ్ మని అక్కుజ్

23 “విజు వన్నా వందిజ్ నజి అక్కు మనాద్”, గాని విజు పణిదిజ్ వానికెజ్ ఆఉ. “విజు వనక వందిజ్ నజి అక్కు మనాద్”, గాని విజు నెగెండె పిరిప్పికెజ్ ఆఉ.

24 ఎయెన్బా నజి నానె నెగెండె మండ్రెజ్ ఇజి తొఎండ మహికార్బా నెగెండె మండ్రెజ్ ఇజి నుడెదెజ్వలె.

25 మీ గర్బం మిజి గదిన్ఎండ మహిజ సతాదు పొర్ని ఇని కండబా తిండ్రు.

26 ఎందనిజ్ ఇహిజ, “యా బూమి ప్రబుదిసె, దని మున్కు మనికెజ్ విజు వన్నివెసె”, ఇజి దేవుణు మాటదు రాస్త మనాద్.

27 ఒరెన్ నమ్మిఇకాన్ మిజి విందుదిజ్ కూక్కి తనివలె, మిజి ఆన మహిజ సొండ్రు. గాని గర్బం గదిన్ఎండ, మి ఎద్రు ఇడ్డికెజ్ ఇనికబా వెన్బాఎండ తిండ్రు.

28 గాని ఎయెన్బా, “యాక బొమ్మెజ పూజ సితీ దనిబాణిక”, ఇజి వెహ్హిజ, వెహ్హి వన్ని వందిజ్ని మీ గర్బం గదిసిని వందిజ్ అక తిన్నాట్.

29 గర్బం గదిసిని వందిజ్ ఇజి వెహ్హి వలె అక్కు నీది ఆఎద్, వెహ్హివన్ని వందిజ్నె వెహ్హిసె. విజు వన్నా వందిజ్ మజి మని అక్కుదిజ్ మరి ఒరెన్ వన్ని గర్బమ్దు మని ఆలోసనమ్దాన్ ఎందనిజ్ మాపు తీర్పు కిబె ఆదెజ్?

30 నాను అయా బోజనం వందిజ్ దేవుణుదిజ్ వందనమ్కు వెహ్హి ఉటిజ, దేవుణుదిజ్ వందనమ్కు వెహ్హి ఉటి బోజనం వందిజ్ ఎందనిజ్ నాను దూసె ఆదెజ్ వలె.

31 అందెజె మీరు ఉటిజ్బా, తిహిజ్బా, ఇనిక కిత్తిజ్బా విజు దేవుణుదిజ్ గొప్ప పేరు వాని లెకెండెనె కిదు.

32 యూదురిజ్ గాని, యూదురు ఆఇవ వరిజ్ గాని, దేవుణు నజమది వరిజ్ గాని తొరోడ్డి లెకెండె ఇనికబా కిఎండ మండ్రు.

33 నండొండారిజ్ దేవుణు రక్సిస్తెజ్ ఇజి, నాను నజి నానె నెగెండె మండ్రెజ్ ఇజి తొఎ. గాని మహికార్బా నెగెన్ మండ్రెజ్ ఇజి విజు వన్నా లొఇ విజెరిజ్ సర్ద కిబిన్ని లెకెండె నాను మంజిన. మీరుబా నాను కిజిని లెకెండె కిజి మండ్రు.

11

దేవుణుదిజ్ పొగిడిజి మాడిస్సిక

1 నాను క్రీస్తుజ్ పొలిసి నడిసెని లెకెండె మీరు నజి పొలిసి నడిసెదు.

2 నాను మిజి నెన్పిస్సి బోదదిజ్ డిన్ఎండ లొజిజి నడిజినిదెర్ ఇజి, మరి విజు నజతిజ వందిజ్ నజి ఎత్తు కిజిని వందిజ్ నాను మిజి పొగిడిజిన.

3 ఏలు మీరు ఇక్కెజ్ నిజం నెస్తెజ్ ఇజి కోరిజిన. ఒరెన్ వన్నిజ్ బుర్ర క్రీస్తు, ఉండ్రీ బోదెలిదిజ్ బుర్ర మొగకొడె. క్రీస్తుజ్ బుర్ర దేవుణు ఇజి మీరు నెని మండ్రెజ్.

4 ఎమేణి మొగకొడెబా పార్దనం కినివలెనొ, దేవుణు ప్రవక్త లెకెండె వర్గిని వలెనొ వన్ని బురాదు టుకుర్ ఇడ్డి మహిజ వాండ్రు వన్ని నెయ్యి క్రీస్తుజ్ గవరం సొన్నిస్సాన్.

5 మరి ఎమేణి బోదెల్బా పార్లనం కనివలెనో, దేవుణు ప్రవక్త లెకెండ్ వెహ్వివలెనో బురాదు టుకుర్ ఇండేఎండ మహివలె అది దని బుర్ర బోడిః కిబె ఆతి లెకెండ్ సిగు లాగె ఆజినాద్.

6 ఉండ్రీ బోదెలి బురాదు టుకుర్ ఇండేఎండ మహిజ అది దని బుర్రది కొపు కత్రిస్తైజ్ వలె. కొపు కత్రిస్తైజ్నో బోడి బుర్ర ఆదెజ్నో సిగు ఆతిజ అది బురాదు టుకుర్ ఇండేదెజ్వలె.

7 మొగకొడోః బురాదు టుకుర్ ఇండేదెజ్ అక్కర్ సిల్లెద్. ఎందనిజ్ ఇహిజ దేవుణు, వన్ని గవరం తొరిస్తైజ్ ఇజ మొగవన్నిజ్ వన్ని మూర్తి లెకెండ్ తయార్ కిత మనాన్. గాని బోదెలి బురాదు టుకుర్ ఇండేదెజ్ వలె. ఎందనిజ్ ఇహిజ బోదెలి దని మాసిజ్ గవరం తొరిసినాద్.

8 ఎందనిజ్ ఇహిజ బోదెలి మొగకొడోః బాణిజ్ తయార్ కిబె ఆత మనాద్, గాని మొగకొడోః బోదెలి బాణిజ్ తయార్ కిబె ఆవతాన్.

9 అక్కాదె ఆవండ, దేవుణు బోదెలి వందిజ్ మొగకొడోఃదిజ్ తయార్ కివెతాన్, గాని మొగకొడోః వందిజ్నె బోదెలిదిజ్ తయార్ కిత్తాన్.

10 అందెజె యా సజతి వందిజ్నె దేవుణు దూతార్ వందిజ్ అతికారమ్దిజ్ అడిఃగి మని దనిజ్ గుర్తు లెకెండ్ బోదెలి బురాదు టుకుర్ ఇండేదెజ్ వలె.

11 గాని ప్రబు వెట కూడిఃతి మని బత్కుదు బోదెలి మొగకొడోః వెట సమందం సిల్లెండ మన్ఎద్. మొగకొడోః బోదెలి వెట సమందం సిల్లెండ మన్ఎన్.

12 మొగకొడోః బాణిజ్ బోదెలి వాతి లెకెండ్నె బోదెలి బాణిజ్ మొగకొడోః పుట్టినాన్. గాని విజు దేవుణు బాణిజ్నె వాజినె.

13 ఉండ్రీ బోదెలి బురాదు టుకుర్ ఇండేఎండ దేవుణుదిజ్ పార్లనం కిదెజ్ తగ్నాదా? మీరె ఒడిఃబిదు.

14 మొగ్గ కొడోః వన్ని బుర్రది కొపు పిరిప్తి మహిజ అక్క వన్నిజ్ సిగు ఇజ ఎయెర్బా వెహ్ఎండ మిజి మీరె నెస్సిదెర్ గదె.

15 గాని ఉండ్రీ బోదెలిదిజ్ బుర్రాది కొపు పిరితి మహిజ అక్క దనిజ్ ఉండ్రీ పేరు మని లెకెండ్నె, ఉండ్రీ పాత సెంగు లెకెండ్నె.

16 దిన్ని వందిజ్ ఎయెస్బా గొడఃబ రెప్టిజ ఇక్కాదె ఆవండ మా లోఇ వేరె అలవాటు ఇనికబా సిల్లెద్. దేవుణు సజమ్దుబా సిల్లెద్.

ప్రబు ఏర్పాటు కిత్తి బోజనం వందిజ్.

17 మరి ఏలు నాను వెహ్పిని మాటదు మీరు నెగ్గికార్ ఇజ నాను మిజి పొగ్డిఃవ. ఇనిక ఇహిజ మీరు నెగ్గిదని వందిజ్నె కూడఃజి వాజినిదెర్ గాని నెగ్గి దన్నిజ్ ఇంక అక్క నెఇక కిజినాద్.

18 మొదోహి సజతి ఇనిక ఇహిజ దేవుణు సజం లెకెండ్ మీరు కూడఃజి వానివలె మీ లోఇ గుంపుజ్ మన్నె ఇజ నాను వెహమన. యాక కండెక్ నిజమ్నె ఇజ నాను నమ్మిజన.

19 దేవుణు ఎర్దు నెగ్గికార్ ఎయెర్ ఇజ తోరె ఆదెజ్ మీ లోఇ బేదమ్కు తవ్వెండ మంజినె.

20 మీరు విజిదెరె కూడఃజి వానివలె మీరు ఉణిక ప్రబు ఏర్పాటు కిత్తి బోజనం ఆవద్.

21 ఎందనిజ్ ఇహిజ, బోజనం కినివలె ఎయెర్ వందిజ్బా కావ్కిఎండ ఒరెన్ ఒరెన్ ముజుల బోజనం కిజినాన్. ఒరెన్ బజ సానాన్ మరి ఒరెన్ సాసి మంజినాన్.

22 అహో ఉండెజ్ తిండ్రెజ్ మిజి ఇల్కు సిలునా? మరి దేవుణు సజమ్దిజ్ ఇజిరి కణక సుడెజి ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెహైజ్? దిన్ని వందిజ్ నాను మిజి పొగ్డిడెజెనా? కనితం నాను పొగ్డిడి.

23-24 ప్రబు బాణిజ్ నజి దొహ్కొక నాను మిజి ఒపజెప్పిక ఇనిక ఇహిజ, ప్రబువాతి యేసు వాండ్రు ఒపజెపె ఆతి పొదొయ్, ఉండ్రీ రొటె పెర్రి దేవుణుదిజ్ వందనమ్కు వెహి దనిజ్ ముక్కెజ్ కిజి, “ఇక్క మీ వందిజ్ సీజిని నా ఒడొల్. నజి ఎత్తు కిజి యా లెకెండ్ కిజి మండ్రు”, ఇజి వెహైన్.

25 అయా లెకెండ్నె బోజనం కిత్తి వెనుక వాండ్రు ద్రాసకాలు మని గిన్ను పెర్రి, “యా గిన్ను నా నలదాన్ కిజిని కొత్త ఒపుమానం, మీరు యా గిన్నుదిక ఉణి ఎస్తివలెబా నజి ఎత్తు కిజి యా లెకెండ్ కిజి మండ్రు”, ఇజి వెహైన్.

26 అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మర్జి వానిదాక వన్ని సావుదిజ్ సాటిసినిదెర్.

27 అందెజె ఎయెన్బా తగ్గికాన్ ఆవండ ప్రబు ఏర్పాటు కిత్తి బోజనమ్దు రొట్టె తింజి గినాదిక ఉటిజ, వాండ్రు ప్రబు ఒడొల్దిజ్ వన్ని నలదిజ్ పడిఎండ పాపం కినికాన్ ఆజినాన్.

28 అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిజ్ వాండ్రె నాను తగ్గికాండ్రా ఇజి సుడె: ఆదిజ్ వలె.

29 గాని ఎయెన్బా యాక ప్రబు ఒడొల్ ఇజి నిజం నెన్ఎండ ఉణి తినికాన్ వన్ని ముస్సు వాండ్రె సిక్స తపె ఆని వందిజ్ ఉణిజి తింజినాన్.

30 అందెజె మీ లొఇ నండొండార్ సత్తు సిల్లికార్ని జబుజ్ మనికార్ ఆతార్. నండొండార్ సాత సాహార్.

31 గాని మజి మాటె నెగెన్సుడె: ఆతాట్ ఇహిజ దేవుణు తీర్పుదు రెఎండ తపె ఆతాట్మరి.

32 మాటు ప్రబు బాణిజ్ తీర్పు తీర్పె ఆతాట్ ఇహిజ, యా లొకమ్ది వరిజ్ సీని సిక్సాదు రెఎండ ప్రబు మజి బుద్ది వెహి సిక్సాదాన్ దిదిజినాన్.

33 అందెజె నా తంబెరిజాండె, మీరు కూడెజి వాజి బోజనం కినివలె మహివరి వందిజ్ కాప్ కిద్దు.

34 మీరు కూడెజి వాజినిక సిక్సదిజ్ గురి ఆవండ మండ్రెజ్ ఇజి ఎయెరిజ్బా బజి కట్టిజి వాండ్రు వన్ని ఇండ్రెనె బోజనం కిదెజ్వలె. నాను వానివలె మరి మని సజతిజి వందిజ్ వెహైలె.

12

దేవుణు ఆత్మ సీని వరమ్కు.

1 తంబెరిజాండె, దేవుణు ఆత్మ సీజిని వరమ్కాజ్ వందిజ్ మీరు నెగెండ నెసి మండ్రెజ్ ఇజి నాను కోరిజిన్.

2 దేవుణుదిజ్ నమ్మిఎండ మహివలె, ఇనికాదొ ఉండ్రీ సత్తుదాన్ ఎయెండ్రొ మిజి నడిపిన్ మహి లెకెండ్ మీరు సొన్ని వర్గి ఇ బొమ్మెజి మాడిసి మహిదెర్ ఇజి మీరు నెస్సిదెర్.

3 అందెజె, నాను మిజి వెహినిక ఇనిక ఇహిజ, దేవుణు ఆత్మదాన్ వర్గినికాన్ ఎయెన్బా, “యేసు సయమ్ పొందితికాన్”, ఇజి వెహైజ్నొ, దేవుణు ఆత్మదాన్ ఆవండ “యేసు, ప్రబు ఆత మనాన్”, ఇజి వెహైజ్నొ అట్ఎన్.

4 దేవుణు ఆత్మ సిజిని వరమ్కు నండొ రకమ్కు మన్నె. గాని అయా ఉండ్రె దేవుణు ఆత్మనె విజు వరమ్కు సీజినాన్.

5 మరి దేవుణు వందిజ్ కిదెజ్ అట్టి పణిజ్ నండొ రకమ్కు మన్నె, గాని ఒరెండ్రె ప్రబు వందిజ్ మాటు విజెటి పణి కిజినాట్.

6 జర్గిని సజతిజ్ నండొ రకమ్దికెజ్ మన్నె. గాని విజు వన్నా లొఇ, మరి విజెరి లొఇ పణి కినికాన్ ఒరెండ్రె దేవుణునె.

7 విజెరిజ్ పణిదిజ్ వాని వందిజ్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిజ్ తొరె ఆజినె.

8 ఎలాగ ఇహిజు, ఒరెన్ వన్నిజ్ దేవుణు ఆత్మదాన్ బుద్ధి మని మాటెజ్ వెహైజ్ వరం సీజినాన్. మరి ఒరెన్ వన్నిజ్ గెణం మని మాటెజ్ వర్గిదెజ్ అయా దేవుణు ఆత్మనె వరం సీజినాన్.

9 మరి ఒరెన్ వన్నిజ్ అయా ఆత్మనె దేవుణు మున్ను నమకం సీజినాన్. మరి ఒరెన్ వన్నిజ్ అయా దేవుణు ఆత్మనె జబుజాణి వరిజ్ నెగెండ్రె కిదెజ్ వరం సీజినాన్.

10 మరి ఒరెన్ వన్నిజ్ బమ్మాతి పణిజ్ సత్తుని, మరి ఒరెన్ వన్నిజ్ దేవుణు బాణిజ్ వాజిని మాటెజ్ వన్ని ప్రవక్త లెకెండ్రె వెహైజ్, మరి ఒరెన్ వన్నిజ్ ఆత్మెజ్ ఎలాగ మర్రికెజ్ ఇజి నెస్తెజ్, మరి ఒరెన్ వన్నిజ్ ఆఇ ఆఇ బాసెజ్ వర్గిదెజ్, మరి ఒరెన్ వన్నిజ్ బాసెజు అర్లం కిజి నెస్తెజ్ దేవుణు ఆత్మ వరమ్కు సీజినాన్.

11 అయ ఉండ్రె దేవుణు ఆత్మనె వన్నిజ్ ఇష్టమాతి వజ ఒరెన్ ఒరెన్ వన్నిజ్ వరమ్కు సీబాజి సీజి యా పణిజ్ విజు కిజినాన్.

ఉండ్రె ఒడొల్ని నండొ బాగమ్కు.

12 ఒడొల్ ఉండ్రెనె, గాని నండొ బాగమ్కు కూడొజి తయార్ ఆత మనాద్. నండొ బాగమ్కు కూడితికాదె గాని అవి కూడొజి ఉండ్రె ఒడొల్ ఆతి లెకెండ్రెనె క్రిస్తుబా మనాన్.

13 ఎలాగ ఇహిజు, యూదురు ఆతిజ్బా, యూదురు ఆఇకార్ ఆతిజ్బా, వెటి పణి కినికాన్ ఆతిజ్బా, అక్కు మనికాన్ ఆతిజ్బా మాటు విజెటి ఉండ్రె ఒడొల్దు ఉండ్రె ఆత్మదానె బాప్తీసం లాగె ఆతాట్. అయ ఉండ్రె దేవుణు ఆత్మదానె మా మన్నుజు దేవుణు మజి సిత మనాన్.

14 ఒడొల్ ఇహిజు నండొ బాగమ్కాణిజ్ తయార్ ఆతిక. ఉండ్రె బాగమ్దాన్ తయార్ ఆతిక ఆవిద్.

15 అందెజె, “నాను కియు ఆఎ, అందెజె నాను ఒడొల్దు మనిక ఆఎ”, ఇజి పాదం వెహైజు, అక్కు ఒడొల్దు మంజినిక ఆవిండ్రె ఆజినాదా?

16 మరి, “నాను కణక ఆఎ, అందెజె నాను ఒడొల్దు మనిక ఆఎ”, ఇజి గిబ్బి వెహైజు, అక్కు ఒడొల్దు మంజినిక ఆవిండ్రె ఆజినాదా?

17 ఒడొల్ విజు ఉండ్రె కణకానె ఆతిజు, ఎలాగ విండ్రెజ్ అనాద్? ఒడొల్ విజు గిబ్బి ఉండ్రె ఆతిజు, వాసనం సూణిక ఎంబె మంజినాద్?

18 గాని ఉండ్రె ఉండ్రె బాగం ఎలాగ మండ్రెజ్నొ, అయా లెకెండ్రె దేవుణు వన్నిజ్ ఇష్టమాతి లెకెండ్రె ఒడొల్దు ఇట్టా మనాన్.

19 ఆకెజ్ విజు ఉండ్రె బాగం ఆతిజు ఒడొల్ ఎంబె?

20 ఆకెజ్ మని లెకెండ్రె నండొ బాగమ్కు మన్నె గాని ఒడొల్ ఉండ్రె.

21 అందెజె, కణక కియుదిజ్, “నీను సజి అక్కర్ సిల్లెద్”, ఇజి వెహైజ్ అట్ఎద్. బుర్ర పాదమ్కాజ్, “మీరు సజి అక్కర్ సిల్లెద్”, ఇజి వెహైజ్ అట్ఎద్.

22 అక్కాదె అవిండ, ఒడొల్దు కూడితి మని సత్తు తకు ఆతి బాగమ్కాజ్, అక్కెజ్ మండ్రెజ్ అక్కర్ సిల్లెద్ ఇజి డి:స్పిస్తెజ్ అట్ఎద్.

23 ఒడొల్దు ఎమేణి బాగమ్కాజ్ గవరం సిల్లికెజ్ ఇజి మాటు ఒడొబిజి నాటో వన్కాజ్ మరి నండొ గవరం మని లెకెండ తయారొ కిజినాట్. సుడొదెజ్ సొకు తోరిజ బాగమ్కాజ్ ఒద్దె అందం వాని లెకండొ కిజినాట్.

24 ఒడొల్దు మని అందం మని బాగమ్కాజ్ మరి నెగెండొ సుడొదెజ్ అక్కర్ సిల్లెద్. గాని దేవుణు విజు బాగమ్కాజ్ కుడుఃప్పి ఒడొల్దు ఇట్టివలె, మర్యాద తకు మని వనకాజ్ లావ్ మర్యాద సితాన్.

25 అందెజె ఒడొల్దు గొడొబెజ్ మన్ఎండొ విజు బాగమ్కు ఉండ్రీ మరి ఉండ్రీ బాగం వందిజ్ నెగెండొ సుడొ:జి మంజినె.

26 ఉండ్రీ బాగమ్దు కస్తం వాతిజ, బాగమ్కు విజు కూడొ:జి దని వెట కస్తమ్దు మంజినె. ఉండ్రీ బాగమ్దిజ్ గవరం దొహొక్కి వలె, బాగమ్కు విజు దనివెట కూడొ:జి సర్ల ఆనె.

27 ఏలు, మీరు క్రిస్తు ఒడొల్ ఆతి మనిదెర్. ఒరెన్ ఒరెన్ ఉండ్రీ బాగం ఆత మనాద్.

28 మరి దేవుణు సజమ్దు ముజాల సెగొండొరిజ్ అపొస్తురు ఇజి, వెనుక మరి సెగొండొరిజ్ దేవుణు ప్రవక్తరు ఇజి, దని వెనుక సెగొండొరిజ్ దేవుణు మాటెజ్ నెస్పిసినికార్ ఇజి, దని వెనుక సెగొండొరిజ్ బమ్మాతి పణిజ్ కినికార్ ఇజి, దని వెనుక మనికార్ ఇజి, సెగొండొరిజ్ మహి వరిజ్ సాయం కినికార్ ఇజి, మరి సెగొండొరిజ్ నడి:పిస్సికార్ ఇజి, మరి సెగొండొరిజ్ ఆజ ఆజ బాసెజ్ వర్గినికార్ ఇజి ఏర్పాటు కిత మనాన్.

29 విజెరె అపొస్తురునా? విజెరె దేవుణు ప్రవక్తరునా? విజెరె దేవుణు మాటెజ్ నెస్పిసినికార్నా? విజెరె బమ్మాతి పణిజ్ కినికారా?

30 విజెరె జబుజాణి వరిజ్ నెగెండొ కిదెజ్ వరం మనికారా? విజెరె ఆజ బాసెజాణిజ్ వర్గినికారా? విజెరె అయ బాసెజ అర్లం కిజి వెప్పినారా?

31 గాని వరమ్క లొణ గొప్ప పెరి వన్కా వందిజ్ ఆస ఆజి మండ్రు. ఏలు నాను మిజి గొప్ప నెగ్గి సరి తోరిసినాలె.

13

విజు దనిజ్ పెరిక ప్రేమ

1 నాను లోకుర్ వర్గిజని విజు బాసెజాణిజ్ వర్గితిజ్బా, దేవుణు దూతార వర్గిని బాసెజాణిజ్ వర్గితిజ్బా, నాను ప్రేమ సిల్లికాన్ ఇహొజ పణిదిజ్ రెజ కంసు, సిల్లిజ టిజ్టిజ్ పలక్కి తాలిబిలెజ్ లెకెండొనె.

2 నాను దేవుణు ప్రవక్త లెకెండొ వరం మనికాన్ ఆతిజ్బా, డాజితి మని విజు సజతిజ్ నెస్తెజ్ అట్టికాన్ ఆతిజ్బా, విజు గెణం మనికాన్ ఆతిజ్బా, గొరొకాజ్ బస్సిసిని నమకం మనికాన్ ఆతిజ్బా ప్రేమ సిలికాన్ ఇహొజ నాను పణిదిజ్ రెజక.

3 నజి కల్లితి మనికెజ్ విజు బీద వరిజ్ సిత్తిజ్బా, సినుదు సుర్దెజ్ నా ఒడొల్ ఒపజెప్పిజ్బా, ప్రేమ సిల్లికాన్ ఇహొజ నాను కినిక పణిదిజ్ రెజక.

4 ప్రేమ మనికాన్ నండొ ఓరిసినాన్. వాండ్రు మహి వరి మున్కు దయ మనికాన్ ఆనాన్. వాండ్రు గొస ఆవన్. వాండ్రు పొజిజనికాన్ ఆవన్. వాండ్రు గర్ల ఆవన్.

5 ప్రేమ మనికాన్ మర్యాద సిల్లెండ మనికాన్ ఆవన్. వాండ్రు నజీ నానె నెగెండ మండ్రెజ్ ఇజి ఒండేబినికాన్ ఆవన్. వాండ్రు బేగి కోపం ఆవన్. వాండ్రు వన్ని వెట కిత్తిమని సెఇ వన్కా వందిజ్ మన్నుదు ఇండేజి మన్వన్.

6 ప్రేమ మనికాన్ సెఇ వన్కా వందిజ్ సర్ద ఆవండ, నిజమాతి వన్కా వందిజ్ సర్ద ఆజినాన్.

7 ప్రేమ మనికాన్ ఎస్తివలెబా సణిజీఎండ విజు సెమిస్నాన్. వాండ్రు ఎస్తివలెబా మహివరి వందిజ్ నెగ్గికెజ్ నమ్మిజి మంజినాన్. వాండ్రు ఎస్తివలెబా ఆసదాన్ ఎద్దు సుండేజి మంజినాన్. వాండ్రు ఎస్తివలెబా డిస్ఎండ ఓరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండ వెహ్లాజ్ మని వరం ఎలాకాలం మన్వద్. ఆఇ ఆఇ బాసెజ్బా వర్గినికబా ఎలాకాలం మన్ఉలె. గెణమ్బా సిల్లెండ ఆనాద్.

9 ఎందనిజ్ ఇహిజి ఏలు మాటు సెగమ్నె నెస్త మనాట్. సెగమ్నె దేవుణు ప్రవక్త లెకెండ వెహ్లాజ్.

10 గాని పూర్తి ఆతిక వానివలె పూర్తి ఆఇక నిల్లెండ ఆనాద్.

11 నాను ఇజిరికాన్ మహివలె ఇజిరి వన్ని లెకెండ వర్గిత. ఇజిరి వన్ని లెకెండ ఒండేబిత. ఇజిరి వన్ని లెకెండ ఆలొనసం కిత. పెరికాన్ ఆతివలె ఇజిరికాన్ మహివలె మని పణిజ్ డిస్స సిత్త.

12 ఏలు అద్దమ్దు సుడేతి లెకెండ ఉండ్రీ బొమ్మనె సుండేజినాట్. నస్తివలె మొకొం నిండ్రు సూణాట్. ఏలు సెగమ్నె నెస్నాట్, నస్తివలె దేవుణు నజి ఏలు నెస్తిమని లెకెండ పూర్తి నెస్నాట్లె.

13 అహిజి దేవుణు ముస్కు మని నమకం, ఆసదాన్ ఎద్దు సుండేజి మంజినిక, ప్రేమ యా మూండ్రీబా నిల్పి మంజినె. గాని వినుక లొఇ గొప్ప నెగ్గిక ప్రేమనె.

14

దేవుణు ఆత్మ సీని వరమ్కు.

1 మీ బత్తుదు ప్రేమనె ముజాల మనిద్. దేవుణు ఆత్మ సీజిని వరమ్కాజ్ వందిజ్ ఆస ఆజి మండ్రు. దేవుణు ప్రవక్తరు ఆదెజ్ ఆస ఆదు.

2 ఎందనిజ్ ఇహిజి, ఆఇ బాసెజి వర్గినికాన్ లోకుర వెట ఆవండ దేవుణు వెటనె వర్గిజినాన్. నిజమె లోకు ఎయెన్బా వాండ్రు వర్గినికెజ్ అర్దం కిదెజ్ అట్వెన్. గాని వాండ్రు వన్ని ఆత్మదాన్ దేవుణుదిజ్ సెందితి డాజితి మని సజతిజ్ వర్గిజినాన్.

3 గాని, దేవుణు ప్రవక్తరు లెకెండ వర్గినికాన్ లోకుర వెటనె వర్గిజినాన్. లోకుర మన్నుదు సత్తు మనికార్ ఆదెజ్, వరిజ్ దయరం వెహ్లాజ్, మరి ఓదరిస్సెజ్ ఇజి.

4 ఆఇ బాసెజ్ వర్గిజినికాన్ వన్నిజ్ వాండ్రె దయరం కిబె ఆజినాన్. గాని దేవుణు ప్రవక్తరు లెకెండ వర్గినికాన్ సజమ్దు మని వరిజ్ ఉసార్ కిజినాన్.

5 మీరు విజెదెరె ఆఇ బాసెజాణిజ్ వర్గినికిదెరె ఆదెజ్ ఇజి నాను కోరిజిన. గాని దేవుణు ప్రవక్తరు లెకెండ ఆదెజ్ ఇజి లావ్ ఆస ఆజిన. ఆఇ బాసెజాణిజ్ వర్గినికాన్, సజమ్దిజ్ దయరం వెహ్లాజ్ ఇజి ఆఇ బాసెజాణిజ్ వర్గిని మాటెజి అర్దం కిబె వెహ్లాజ్ మహిజి, దేవుణు ప్రవక్తనె వన్నిజ్ ఇంక పెరికాన్ ఆజినాన్.

6 తంబెరిజాండె, నాను మీ డగ్గు వాజి, దేవుణుది డాజితి మని సజతిజ్ దేవుణు తోరిస్తికెనో, గెణం మాటెజ్నో, దేవుణు ప్రవక్త లెకెండ దేవుణు సిత్తి మాటెజ్నో మీ వెట వర్గిఎండ, ఆజ బాసెజాణిజ్ వర్గిజి మహిజ నా వెట మిజి ఇని లాబం వానాద్?

7 అయా లెకెండెనె, పలక్కివలె సెవుడుః వాజిని పాణం సిల్లి వస్తుజ్ ఆతి, టోయల గాని పిరుడిః గాని పలక్కివలె ఇని తేడ సిల్లెండ ఉండ్రె లెకెండ పలక్కి మహిజ, ఊక్తి మనిక ఇనిక, పలక్తి మనిక ఇనిక ఇజి ఎలాగ నెస్తెజ్ ఆనాద్?

8 విదెమ్దిజ్ సొండ్రెజ్ ఇజి సయనమ్ది వరిజ్ కూక్తెజ్ జోడు బాంగ పలక్కివలె వరిజ్ అర్థమానిలెకెండ నెగెండ జాటు సిఎండ మహిజ, విదెమ్దిజ్ సొండ్రెజ్ సయనమ్దికార్ తయార్ ఆనారా?

9 అయాలెకెండెనె మీరుబా వెయుదాన్ నెగెండ వర్గిఎండ మహిజ, మీరు ఇనిక వర్గిజినిదెర్ ఇజి వినికార్ ఎలాగ అర్థం కిదెజ్ అట్నార్? మీరు గాలి వెటనె వర్గినికిదెర్ ఆజినిదెర్.

10 యా లోకమ్దు నండో బాసెజ్ మన్నె ఇని దనిజ్ ఇని అనుమానం సిల్లెద్. గాని వన్కా లోజ ఉండ్రెబా అర్థం సిల్లిక ఆవద్.

11 ఒరెన్ వర్గిని మాటెజ నాను అర్థం కిదెజ్ అట్ఎండ మహిజ, నాను వర్గిని వన్నిజ్ ఆజ దేసెమ్ది వన్ని లెకెండ ఆనాలె. వర్గినికాన్ నజిబా ఆజ దేసెమ్ది వన్ని లెకెండ మంజినాన్.

12 మిజిబా అయాలెకెండెనె మంజినాద్. మీరు దేవుణు ఆత్మ సీజిని వరమ్కాజ్ వందిజ్ నండో ఆస ఆజి మంజినికిదెర్. అందెజె సజమ్దిజ్ పిరిప్పి వందిజ్ అయా వరమ్కాజ్ నండో పణి కిదు.

13 అందెజె దిన్ని వందిజ్, ఆజ బాసదాన్ వర్గినికాన్, బాసెజ అర్థం కిజి వెప్తెజ్ అట్టి లెకెండ పార్దనం కిదెజ్ వలె.

14 అహిజ, నాను ఆజ బాసదాన్ పార్దనం కిజి మహిజ, నా ఆత్మ పార్దనం కిజినాద్. గాని నా గర్భం కాలి మంజినాద్.

15 అందెజె నాను ఇనిక కిదెజ్ వలె? నాను నా ఆత్మదాన్ పార్దనం కిస. గాని నా మన్నుదాన్బా నాను పార్దనం కినాలె. నాను నా ఆత్మదాన్ పాటెజ్ పార్పు. గాని నా మన్నుదాన్బా పాటెజ్ పార్పాలె.

16 మీరు మీ ఆత్మదాన్ దేవుణుదిజ్ పొగ్డిఃజి మహిజ, మీరు దేవుణుదిజ్ వందనమ్కు వెప్పినిదెర్. మీరు వర్గిని మాటెజ అర్థం కిదెజ్ అట్ఇకాన్ ఒరెన్, మీరు వెప్పిని వందనమ్దిజ్, ఎలాగ మీ వెట కూడ్ఃజి, “అమెన్” వెప్తెజ్ అట్నాన్.

17 మీరు ఇహిజ ఒద్దె నెగెండ దేవుణుదిజ్ వందనమ్కు వెప్పినిదెర్. గాని ఇకాన్ దయరం కిబె ఆదెజ్ అట్ఎన్.

18 నాను మిజి విజెరిజ్ ఇంక నెగెండ ఆజ బాసెజాణిజ్ వర్గిజిని వందిజ్ దేవుణుదిజ్ వందనమ్కు వెప్పిన.

19 గాని సజమ్దు ఆజ బాసెజాణిజ్ పది వెయుజ్ మాటెజ్ వర్గిని దనిజ్ ఇంక మహివరిజ్ నెస్పిన్సి లెకెండ బుద్దిదాన్ కూడితి అయదు మాటెజ్నె నాను వెప్పా.

20 తంబెరిజాండె, మీరు ఇజిరి కొడోఃర్ ఒడ్ఃబిని లెకెండ ఒడ్ఃబిజి మంజినిక డిఃసి సిదు. సెజ వన్కా వందిజ్ లేత కొడోఃర్ లెకెండ మండ్రు. గాని ఒడ్ఃబినిబాన్ పెరికిదెర్ ఆదు.

21 “ఆజ బాసెజ్ వర్గిజని ఆజ దేసెమ్ది లోకుర్ నా వందిజ్ విరి వెట వర్గిజిజ్ బా వారు గిబిజ్ ఒడేజి నా మటెజ్ వినవర్”, ఇజి ప్రబు వెస్సానాన్ ఇజి దేవుణు మాటుదు రస్త మనాద్.

22 అందెజె ఆజ బాసెజ్ వర్గినిక, నమ్మిజ వరిజ్ దేవుణు సత్తుదిజ్ ఉండ్రీ గుర్తు లెకెండెనె మనాద్ ఇజి మాటు దేవుణు మాటదాన్ నెస్సాట్. నమ్మిత్తి వరిజ్ ఆవద్. గాని దేవుణు ప్రవక్తరు వెస్సాని మాటెజ్, నమ్మిత్తి వరి వందిజ్ రుజుప్ ఆజినె గాని నమ్మిజ వరివందిజ్ ఆవద్.

23 అందెజె సజమ్దు మనికార్ విజెరె కూడేజి వానివలె విజెరె ఆజ బాసెజాణిజ్ వర్గిజ మహిజ, యాక అర్థం కిదెజ్ అట్ ఇకానో, నమ్మిఇకానో లోఇ వాతిజా, మీరు బుద్ది నెగెండ సిల్లెండ ఆజి వర్గిజనిదెర్ ఇజి వారు వెహ్ ఏరా?

24 గాని ఒరెన్ నమ్మిఇకాన్ గాని దిన్ని వందిజ్ నెన్ ఇకాన్ గాని లోఇ వాతిజ, విజెదెరె దేవుణు ప్రవక్తరు లెకెండ వెస్సి మహిజ, వెని మాటెజాణిజ్ వాండ్రు కిత్తి మని తప్పుజ వందిజ్ ఎత్తు కిజి వన్ని మన్నుదు ఒడిబిజి ఒవుకొణాన్. మీరు వెస్సాని మాటెజాణిజ్ వన్నిజ్ వాండ్రె తీర్పు కిబె ఆనాల్.

25 మరి వన్ని మన్నుదు డాజెతి మనికెజ్ విజు వెల్లి తోర్పె. అయావలె, “నిజమె దేవుణు మీ వెట మనాన్”, ఇజి బమ్మ ఆజి వాండ్రు ముణుకుజ్ ఊర్జి దేవుణుదిజ్ పొగడిజి మాడిస్సాన్.

దేవుణుదిజ్ పొగడిజి మాడిస్సిక ఎలాగ మండ్రెజ్.

26 అహిజ తంబెరిజాండె, మాటు ఇనిక వెహ్ జె? మీరు కూడేజి వానివలె, ఒరెన్, ఉండ్రీ పాటెజ్ పార్దెజ్ వలె ఇజినాన్. మరి ఒరెన్ బుద్ది మాటెజ్ నెస్సిస్తెజ్ వలె ఇజినాన్. మరి ఒరెన్ డాజెతి మనిక దేవుణు తోరిస్తెకెజ్ వెహ్ జె వలె ఇజినాన్, మరి ఒరెన్ ఆజ బాసెజాణిజ్ వర్గిదెజ్ వలె ఇజినాన్, మరి ఒరెన్ బాసదిజ్ అర్థం వెహ్ జె వలె ఇజినాన్, యాకెజ్ విజు సజమ్దు మని వరిజ్ దయరం వాని వందిజ్ కిదెజ్ వలె.

27 ఆజ బాసెజి వర్గినికార్ ఒరెనో రిఎర్నో వర్గిదెజ్ వలె. రిఎర్జి మిస్తిజ ముఎర్ వర్గిదెజ్ వలె. గాని విజెరె ఒర్పె వర్గిఎండ, ఒరెన్ ఒరెన్ వర్గిదెజ్ వలె. ఎయెర్బా దనిజ్ అర్థం వెహ్ జె వలె.

28 ఆజ బాసెజి వర్గిని దనిజ్ అర్థం కిజి వెహ్ జె సెల్లెండ మహిజ, ఆజ బాసెజాణిజ్ వర్గినికాన్ సజమ్దు పల్లక్ మండ్రెజ్. వాండ్రు వన్ని మన్నుదు వర్గిజి దేవుణు వెట వర్గిదెజ్ వలె.

29 దేవుణు ప్రవక్తరు లెకెండ వర్గినికార్బా రిఎర్నో, ముఎర్నో వర్గిదెజ్ ఆనాద్. మహికార్ వెస్సి దనిజ్ నెగెండ వెంజి, ఇనిక వెస్సానార్ ఇజి జాగర్త సుడేదెజ్ వలె.

30 డగ్గు బస్తిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరె ఆతిజ, ముజాల వర్గిజి మంజినికాన్ పల్క్ మండ్రెజ్ వలె.

31 విజెరిజ్ నెస్సిసిని వందిజ్, విజెరిజ్ దయరం వెహ్ జె వందిజ్, మీరు విజెదెరె ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు ఆత్మ సడిసిన్సి లెకెండ వర్గిదెజ్ ఆనాద్.

32 ప్రవక్తరు లోఇ మని వరి ఆత్మ ప్రవక్తరిజ్ లోజిజి మంజినాద్.

33 ఎందనిజ్ ఇహిజ దేవుణు సమాదానమ్దిజ్ దేవుణునె గాని గగోలిదిజ్ దేవుణు ఆవెన్.

34 విజు దేవుణు సజమ్కాజ్ మని లెకెండ్, సజమ్దు పొగ్డిజి మాడిస్సివలె, బోదక్ గగోల్ ఆజి వర్గజి మండ్రెజ్ ఆవద్, పలక్ మండ్రెజ్ వలె. సజమ్దు అవిక్ వర్గదెజ్ ఆవద్. గాని మోసె రాస్తి రూలుదు వెహ్తి మని లెకెండ్ అవిక్ అణిజిజి మండ్రెజ్.

35 వరిజ్ ఇనికబా నెస్తెజ్ ఇహిజ, ఇండ్రో వన్కా వన్కా మాసిరిజ్ వెన్బాదెజ్ వలె. సజమ్దు బోదెలి వర్గజి మంజనిక దనిజ్ సిగు.

36 మీరు ఇనిక ఒడెబిజినిదెరె? దేవుణు మాటెజ్ మీరె రాస్తి తయార్ కిత్తిదెరా? అక్క మిజినె అక్క దొహ్క మనాదా?

37 ఎయెన్బా వాండ్రు దేవుణు ప్రవక్త ఇజి ఒడెబిజి నాన్ ఇహిజ, దేవుణు ఆత్మ సిత్తి వరమ్కు మనికాన్ ఇజి ఒడెబిజి మహిజ్బా, వాండ్రు నాను మిజి రాస్తి మనికెజ్ ప్రబుబాణిజ్ వాతి ఆడ్రెజ్ ఇజి తవ్ఎండ ఒప్పుకొండెజ్ వలె.

38 ఎయెన్బా యాక నెక్కి పొక్తిజ, వన్నిజ్ వాండ్రె నెక్కి పొకె ఆనాన్లె.

39 అందెజె నా తంబెరిజాండె, దేవుణు ప్రవక్తరు ఆదెజ్ ఆన ఆజి మండ్రు. గాని ఆజ బాసెబాణిజ్ వర్గిని వరిజ్ అడ్డు కిమాట్.

40 గాని విజుబా నెగెండ మర్యాదదాన్ తగ్గి లెకెండ్ కిదెజ్ వలె.

15

క్రీస్తు సాతి వరిబాణిజ్ మర్రి నిజితి వందిజ్.

1 తంబెరిజాండె, నాను మీ నడిమి సాటిస్తి సువార్త వందిజ్ మరి మిజి ఎత్తు కిబిస్తిజ్ ఇజి నాను కోరిజన. మీరు డగ్రు కిజి నమ్మిత్తి అయ సువార్త, దన్నిజ్ తగితి లెకెండ్ మండ్రెజ్ ఇజి నిరణెం కిత్తిదెర్.

2 నాను మిజి వెహ్తి మని అయా సువార్తదానె దేవుణు మిజి రక్కిస్త మనాన్. అందెజె నాను వెహ్తి మని మాటెజ్, మీరు నెగెండ అసి అయాలెకెండ్నె మండ్రెజ్. సిల్లెండ మహిజ మీరు దేవుణు మున్కు ఇట్టి నమకం నిజం ఆవిండ మంజినాద్.

3 దేవుణు బాణిజ్ నజి దొహ్క మన్నిక, నాను మిజి ఒప్పుజెప్తి మని వన్కా లొఇ గొప్పు ముకెలమతిక ఇనిక ఇహిజ, ముజాల దేవుణు మాటదు రాస్తి మహిక పూర్తి కిత్తి లెకెండ్, క్రీస్తు మా పాపమక వందిజ్ సాతాన్.

4 ముజాల దేవుణు మాటదు రాస్తి మహిక పూర్తి కిత్తి లెకెండ్నె మూసె ఆతండ్రె మూండ్రె రొస్కాణిజ్ మర్రి నీకె ఆతాన్.

5 ముజాల పేత్రిజ్ని* వెనుక వన్ని సిసుర్ ఆతి పనెండు మన్సిరిజ్ తోరె ఆతాన్.

6 దన్ని వెనుక అయ్దు వందెజ మిస్తి నమ్మిత్తి తంబెరిజ ఒర్నె తోరె ఆతాన్. వరి లొఇ నెగెండార్ సాత సాహార్ ఇహిజ్బా నండెండార్ ఏలుబా బత్కిజినార్.

7 వెనుక వాండ్రు యాకోబుజ్ని అపొస్తురుజ్ విజెరిజ్ తోరె ఆతాన్.

8 విజెరిజ్ తోరె ఆతి వెనుక, కడెవేరిదు, నెగెండ పుట్ఇకానాతి నజిబా తోరె ఆతాన్.

9 అపొస్తురు లొఇ విజెరిజ్ ఇంక వీన్కొడెః నానె. అపొస్తుడు ఇజి కూకె ఆదెజ్బా నాను తగితిక ఆవి. ఎందనిజ్ ఇహిజ నాను దేవుణు సజమ్ది వరిజ్ హిమ్సెజ్ కిత మన్న.

10 ఏలు నాను ఇనిక ఆత మనానో, అక్క దేవుణు నజి తోరిస్తి దయాదర్మదానె ఆత మన్న. అహిజ వాండ్రు నా మున్కు దయా దర్మం తోరిస్తిక దర్మమదిజ్ సిత్తి లెకెండ్

* 15:5 15:5 పేతురుజ్ కేప ఇజిబా పేరు మనాద్.

అవతాద్. విజెరిజ్ ఇంక నండో కష్టబాడోజి నాను పణి కిత మన. గాని కష్టబాడోతిక నాను ఆవి, నజి తోడుః మహి దేవుణు దయాదర్శమనె.

11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిస్త మనావ్.

సాతికార్ మర్జి నీజ్ని వందిజ్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటి ఆతి మహిజ్, సాతి వరి బాణిజ్ మర్జి నిజ్నిక సిల్లెద్ ఇజి మీ లోక సెగొండార్ ఎలాగ వెహ్నినార్?

13 సాతి వరిబాణిజ్ మర్జి నిజ్నిక సిల్లెద్ ఇహిజి క్రీస్తుబా మర్జి నిజ్ఎతాన్.

14 క్రీస్తు సాతి వరిబాణిజ్ మర్జి నిజ్ఎతాన్ ఇహిజి మాపు సాటిసిని సువార్త పణిదిజ్ రెఇక. మీరు దేవుణుదిజ్ నమ్మిత్తికబా పణిదిజ్ రెఇక.

15 అక్కాదె ఆవిండ, మాపు దేవుణు వందిజ్ అబద్ధం వెహ్ని సాసిర్ ఇజి తోరె అజినాద్. ఎందనిజ్ ఇహిజి దేవుణు సాతి వరిబాణిజ్ క్రీస్తుజ్ నిక్క మనాన్ ఇజి మాపు దేవుణు వందిజ్ సాసి వెహ్తా మనావ్. సాతికార్ మర్జి నిజె ఆవిర్ ఇహిజి, దేవుణు క్రీస్తుజ్బా నిజ్ఎతాన్.

16 దేవుణు సాతి వరిజ్ మర్జి బత్కిన్ఎన్ ఇహిజి అయాలెకెండెనె దేవుణు క్రీస్తుజ్బా మర్జి బత్కిన్ఎతాన్.

17 క్రీస్తు మర్జి నిజె ఆవతాన్ ఇహిజి మీరు నమకం ఇడోతిక పణిదిజ్ రెఇక. మీరు ఏలుబా మీ పాపమ్క వందిజ్ దేవుణు సిని సిక్కుదిజ్ తగ్గికిదిరె.

18 అక్కాదె ఆవిండ క్రీస్తుజ్ నమ్మిజి సాతికార్బా నానసం ఆత సాహర్.

19 యా బత్కుదునె వాండ్రు మజి సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు ముస్కు ఆనదాన్ ఎద్రు సుడోజి మంజినికాట్ ఇహిజి, మా బత్కు విజెరిజ్ ఇంక హినమాతి బత్కు బత్కిజినాట్.

20 గాని, సాతి వరిబాణిజ్ తొలిత పండితి పంట లెకెండ, క్రీస్తు నిజమె సాతి వరిబాణిజ్ మర్జి నిజిత మనాన్.

21 ఇనిక ఇహిజి ఒరెన్ లోకు వెటనె సావు వాతాద్. అయాలెకెండెనె సాతి వరిబాణిజ్ మర్జి నిజె ఆనికబా ఒరెన్ వన్ని వెటనె వాతాద్.

22 ఆదము వెట విజెరె ఎలాగ సాజినారొ, అయాలెకెండెనె క్రీస్తు వెట విజెరె పాణం మనికార్ ఆనార్లె.

23 గాని ఒరెన్ ఒరెన్ వన్ని వర్నాదునె పాణం మనికాన్ ఆనాన్. తొలిత పండితి పంట క్రీస్తు. వెనుక క్రీస్తు వానివలె వన్నిజ్ సెందితికార్ పాణం మనికార్ ఆనార్.

24 దని వెనుక వాండ్రు యా లోకమ్దు మని విజు సెఇ సత్తుజ్ని, విజు అతికారమ్కాజ్, విజు సత్తుజు మాయిప్పి పోక్కి, వన్ని బుబ్బాతి దేవుణు ఏలుబడిః కిని వందిజ్ విజు ఒపజెప్పాన్లె. నస్తవలె విజు దన్నిజ్ ఆక్కర్ ఆనాద్లె.

25 ఎందనిజ్ ఇహిజి వన్నిజ్ పగాతి విజెరిజ్, వన్ని పాదమ్కు అడిఃగి దేవుణు ఇడోనిదాక క్రీస్తు ఏలుబడిః కిజి మండ్రెజ్ వలె.

26 లోకురిజ్ విజెరిజ్ పగాతి సావుదిజ్, కడెవేరిదు వాండ్రు నాసనం కినాన్లె.

27 దేవుణు, “విజు వనకాజ్ వన్ని పాదమ్కు అడ్డి ఇట్టాన్”, ఇజి దేవుణు మాటదు రాస్త మనాద్. “విజు వన్కాజ్”, క్రీస్తు పాదమ్క అడిఃగి ఇట్టా మనాన్ ఇజి వెహ్నివలె, విజు వనకాజ్ విని పాదమ్కు అడిఃగి ఇడ్డి మనికాన్ ఆతి దేవుణు అయ విజు వనకాజ్ వెట వన్నిజ్ వాండ్రె క్రీస్తు పాదమ్క అడిఃగి ఇడెః ఆఎన్ ఇజి టేట తోరెజినాద్.

28 వాండ్రు యా లెకెండ్ కిత్తి వెనుక, మరిన్ విజు వనకాజ్ వన్ని పాదమ్కు అడిఃగి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజిజి మంజినాన్లె. ఎందనిజ్ ఇహిజ దేవుణు ఒరెండ్రె అయ విజు వన్కాజ్ మున్సు అతికారం మనికాన్ ఆదెజ్వలె.

29 సాతికార్ మర్రి నిజ్నిక సిల్లెద్ ఇహిజ, సెగొండార్ కిని లెకెండ్ సాతి వరి వందిజ్ బాప్తినం లాగె ఆని దనిజ్ ఇని అర్లం మనాద్? సాతికార్ నిజె ఆఎర్ ఇహిజ ఎందనిజ్ లోకుర్ వరి వందిజ్ బాప్తినం లాగె ఆదెజ్?

30 మరి సాతికార్ మర్రి నిజ్నార్ ఇజి మాపు నమ్మివ్ ఇహిజ ఎందనిజ్ సావు తప్పిన్సి ప్రమాదమ్కాజ్ మాపు గురి ఆదెజ్.

31 తంబెరిజాండె, ప్రబు ఆతి క్రిస్తు యేసుక్రిస్తు వెట మీరు కూడిఃతి వందిజ్ నాను నిజం ఎసొ సర్ల అజినానొ అయాలెకెండ్నె ఎస్తివలెబా నాను సపె ఆదెజ్బా అక్కు మనద్ ఇజి నాను మిజి నిజం వెప్పిన.

32 యా లోకమ్దిజ్ సెందితి సజతిజ్ వందిజ్నె నాను ఎపెసి పట్టుమ్దు అడిఃవి జంతుజ వెట విద్ది కితానా? సాతికార్ మర్రి నిజె ఆఎర్ ఇహిజ నజి ఇని లాబం మనాద్? సాతికార్ మర్రి నిజ్ఎర్ ఇహిజ, “విగెహిజ్ సానాట్, అందెజె ఉణాట్ తినాట్”, ఇజి ఆఇకార్ వెప్తిలెకెండ్నె మాటుబా కిదెజ్ వలె.

33 మీరు మొసెం కిబె ఆజి తవు సరిదు సాన్కాట్. “సెఇ వరివెట కూడిఃజి మనిజ్, నెగ్గి అలవాటుజ్ మనికార్బా పాడః ఆజినార్”.

34 నెగ్గి బుద్ది మనికిదెర్ లెకెండ్ మీరు మప్పి సొన్సి పాపం కిఎండ నీతినిజాయ్దుదాన్ మండ్రు. ఎందనిజ్ ఇహిజ మీ లోఇ సెగొండార్ దేవుణు వందిజ్ నెన్ఎర్. మిజి సిగు కిదెజ్ ఇజినె ఇక్క నాను వెప్పిన.

సాతికార్ మర్రి నిజ్నివలె మంజిని ఒడొఃల్

35 సెగొండార్ యా లెకెండ్ వెన్బానార్లెను, “సాతికార్ ఎలాగ మర్రి నికె ఆనార్? ఎలాగ మర్రి ఒడొఃల్దాన్ వారు వానార్?”.

36 బుద్ది సిలికిదెరా మీరు విత్తు విత్తివలె, అయ విత్తి విత్తు సబితిజానె దని బాణిజ్ మొక నేర్రినాద్.

37 నీను వితిక కూలిజ్గాని, మరి ఎమేణి విత్తుబగాని వహి విత్కునె విత్తిని. విత్తిక విత్తునె గాని నేర్రిని మొక్క ఒడొఃల్ ఆవద్గదె.

38 గాని దేవుణు వాండ్రు నిర్ణెం కిత్తి లెకెండ్ దనిజ్ ఉండ్రె ఒడొఃల్సిజినాన్. విత్తిమన్ని విజు రకమ్ది విత్తుజ వనక వనక ఒడొఃల్ సీజినాన్.

39 కంట విజు ఉండ్రె ననిక ఆవద్. లోకు కంట ఉండ్రె రకం మనాద్. జంతు కంట మరి ఉండ్రె రకం, పొటి కంట మరి ఉండ్రె రకం, మొయ కంట ఉండ్రె రకం.

40 అయాలెకెండ్నె ఆగాసమ్ది వనకాజ్ని, బూమిదు మని వన్కాజ్ తేడ మంజినాద్, ఉండ్రె ననికెజ్ ఆఉ. విజు అంతం మనికెజ్ గాని వనక అంతం ఉండ్రె లెకెండ్ మన్వద్.

41 ఎలాగ ఇహిజ, పొద్దుది అందం ఉండ్రె రకం, నెలాది అందం మరి ఉండ్రె రకం, సుక్కెజ అందం మరి ఉండ్రె రకం. ఉండ్రె సుక్కాది అందం మరి ఉండ్రె సుక్కాది అందమ్దిజ్ తేడ మనాద్.

42 అందెజె సాతికార్ మర్రి నిజె ఆనివలె అయాలెకెండ్నె మంజినాద్. బూమిదు మూసె ఆతి మని పీనుగు సబ్జి సానిక. గాని సబ్జి సాన్ఇ ఉండ్రె ఒడొఃల్దాన్ వారు నికె ఆనార్లె.

43 మూసె ఆతి పీనుగు నుడెదెజ్ బాగ సిల్లక. సత్తు సిల్లక. గాని నికె ఆజిని ఒడెల్ అంతమేని సత్తు మంజినిక ఆనాద్.

44 మూసె ఆజిని పీనుగు యా లోకమ్దు బత్తిదెజ్ నె తగ్గాద్. గాని నికె ఆజిని ఒడెల్ దేవుణు మంజిని బాడిడు బత్తిదెజ్ తగ్గిక. యా లోకమ్దు బత్తిదెజ్ తగ్గి ఉండ్రీ ఒడెల్ మనాద్ ఇహిజ దేవుణు మంజిని బాడిడు బత్తిదెజ్ తగ్గి ఉండ్రీ ఒడెల్ బా మంజినాద్.

45 అందెజె, “తొలిత లోకు ఆతి ఆదము బత్తిజిని జీవు ఆతాద్”, ఇజి దేవుణు మాటుదు రాస్త మనాద్. కడెవేరి ఆదము ఆతి క్రీస్తు పాణం సీజిని ఆత్మ ఆతాన్.

46 పరలోకమ్దు బత్తిదెజ్ తగితి ఒడెల్ ముజాల రెపతాద్. యా లోకమ్దు బత్తిదెజ్ తగితి ఒడెల్ నె ముజాల వాతాద్. వెనుక పరలోకమ్దు బత్తిదెజ్ తగితి ఒడెల్ వానాద్.

47 తొలిత ఆదాము యా బూమి దూలిదాన్ తయార్ ఆత మనాన్. వెనుకాహి ఆదాము ఆతి క్రీస్తు దేవుణు మంజిని బాడిడాన్ వాతాన్.

48 బూమిది దూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెండెనె మంజినాట్. దేవుణు మంజిని బాడిడాన్ వాతి వన్ని వెట కూడితికార్ దేవుణు మంజిని బాడిడు బత్తిదెజ్ తగ్గికార్ ఆనార్లె.

49 ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెండ మనాట్, అయా లెకెండెనె దేవుణు మంజిని బాడిడాన్ వాతి వన్ని క్రీస్తు మూర్తి లెకెండ తయార్ ఆనార్లె.

50 తంబెరిజాండె, కండాని నలదాన్ తయార్ ఆతిమని యా ఒడెల్ దాన్ మాటు దేవుణు కిజిని ఏలుబడిడు సొన్ని మండ్రెజ్ అట్ ఎట్ ఇజి నాను మిజి కనితం వెహిన్. ఎందనిజ్ ఇహిజ సావు మని యా ఒడెల్ కు సావు మన్ ఇ బాడిడు మండ్రెజ్ అట్ ఎద్. అక్కెజ్ కొత్తాకెజ్ కిబె ఆదెజ్ వలె.

51 గిబ్బిజ్ ఒడెజి విండ్రు, నాను దేవుణుది డాజెతి మని ఉండ్రీ సజతి మిజి తెలియ కిజిన. మాటు విజెటి సాఎట్. మాటు విజెటి మార్నాట్.

52 సణెమ్దు, అహిజ ఉండ్రీ కణక రెప డెయిజి పెర్ని ముజాలె, కడెవేరిది పెరి జోడుబంగ పలక్కిజ సరి అక్క జర్గినాద్. జోడు బంగ పలక్కివలె సాతికార్ సావు మన్ ఇ ఒడెల్ దాన్ నికె ఆనార్. ఏలుదాక బత్తిజిని మాపు కొత్తాజ్ కిబె ఆతి ఒడెల్ దాన్ మార్నాట్లె.

53 సబ్జి సొన్నిని మా యా ఒడెలుజు ఎసెజ్ బా సబ్జి సొన్ ఇ ఒడెలుజ్ లెకెండ మార్నెలె. నిజమె, సావు వాజిని యా మా ఒడెలుజ్, సావు సిలి ఒడెలుజ్ లెకెండ కొత్తాజ్ మార్నెలె.

54 సబ్జి సొని మా ఒడెలుజ్, ఎసెజ్ బా సబ్జి సొన్ ఇ ఒడెలుజ్ లెకెండ మార్నెజ్ వలె. సావు వాజిని మా యా ఒడెలుజ్, సావు సిల్లి ఒడెల్ లెకెండ మార్నెజ్ వలె. నస్తవలె దేవుణు మాటుదు రాస్త యా మాటెజ్ నిజం అనాద్, “సావు ముస్కు పూర్తి గెలిస్తె వందిజ్, సావు మరి మన్ ఎద్. సావు డిజె ఆతి లెకెండ వీజెతాద్”.

55 “సావు మా ముస్కు మరి గెలిస్తెజ్ అట్నాదా? మజి గుత్తెజ్ ఇజి సావుదిజ్ మరి సాప్పు మనాదా?”, ఇజి దిన్ని వందిజ్ దేవుణు మాటుదు రాస్త మనిక, నస్తవలె పూర్తి ఆనాద్.

56 సావు తపినిని సొంపు పాపం. మాటు దేవుణు రూలుజ లోజెఎండ మంజినిక, మజి ఒడెస్టెజ్ పాపమ్దిజ్ సత్తు ఆజినాద్.

57 మా ప్రభువాతి యేసుక్రీస్తుడాన్ మజి పాపమ్దిజ్ని సావు మున్సు గెల్పిన్తి మన్ని దేవుణుదిజ్ వందనమ్కు.

58 అందెజె, నాను ప్రేమిసిని తంబెరిజాండె, ఇనికబా మిజి కద్దినెండ గటిజ నిల్పి మండ్రు. ఎస్తివలెబా దేవుణు వందిజ్ కన్టబాడేజి పణి కిదు. ఎందనిజ్ ఇహిజ ప్రబు వేట కూడేజి మీరు కన్టబాడేజి కిజిని పణిజ్, ఎసెజ్బా పణిదిజ్ రెఎండ్రాజి మన్ఉ ఇజి నెసి ఎస్తివలెబా పణి కిజి మండ్రు.

16

నమ్మిత్తి వరి వందిజ్ డబ్బు కుడుప్పిని వందిజ్ వెప్పినిక.

1 దేవుణుదిజ్ నమ్మిత్తి వరి వందిజ్ డబ్బు కుడుప్పిని వందిజ్ ఇహిజ నాను గలాతియదు మని దేవుణు సజమ్కాజ్ వెప్తి మని లెకెండ మీరుబా కిదు.

2 నాను వానివలె, అయావలెనె కుడుప్పెజ్ తొఎండ, విజు ఆదివారమ్కాజ్ మీ లొఇ ఒరెన్ ఒరెన్ వన్నిజ్ దొహ్కీని దని బాణిజ్ ఉండ్రీ వంతు కేట ఇడేజి వన్నిబాన్ కుడుప్పి మండ్రెజ్ వలె.

3 అహిజ నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరొ, వరిజ్ ఉత్రమ్కు రాసి సీజి మీరు కుడుప్పిని డబ్బు వరి కిదు యెరూనలెమ్దు పొక్కాట్.

4 నానుబా సొహిజ బాగ మంజినాద్ ఇజి తోరె ఆతిజ వారు నా వెట వానార్లె.

5 అహిజ ఏలు నాను మాసిదోనియాదు సొన్ని అబ్బె మని దేవుణుదిజ్ నమ్మిత్తి వరిజ్ నెస్సిసి మండ్రెజ్ ఇజి ఒడిఃబిజిన. మాసిదోనియాదు సొహి వెనుక నాను మీ డగ్రు వాన.

6 నస్తివలె మీ డగ్రు సెగం రొన్సు మండ్రెజ్ ఆనాద్ ఇజి, సిల్లిజ పణి కాలం విజు మీ బానె గడెప్పా. ఎందనిజ్ ఇహిజ, అయావలె నాను ఎమేణి దరిజ్ సొండ్రెజ్నొ, అయా పయనమ్దు నజి సాయం కిదెజ్ మీరు అట్టిదెర్.

7 ఏలు పయనమ్దు మీ డగ్రు వాజి మిజి దసూల్ ఆజి సొండ్రెజ్ నజి ఇన్టం సిల్లెద్. ప్రబుజ్ ఇన్టం ఇహిజ మీ డగ్రు సెగం కాలం మండ్రెజ్ ఇజి ఆస ఆజిన.

8 గాని పెంతుకొన్టు* పండ్రెయ్దాక ఇబ్బె ఎపెసి పట్టుమ్దునె నాను మంజినలె.

9 ఎందనిజ్ ఇహిజ, ఇబ్బె నెగెండ సువార్త పణి జర్గిని లెకెండ, తగ్గి నెగ్గి అవ్కాసం నజి దొహ్క మనాద్. నజి ఎద్రిసినికార్బా మనార్.

10 తిమోతి మీ డగ్రు వాతిజ, ఇని దనిజ్బా తియెల్అవండ మీ వెట మంజిని లెకెండ వన్నిజ్ సుడేజి మండ్రు. ఎందనిజ్ ఇహిజ, నాను కిజిని లెకెండనె వాండ్రుబా ప్రబు పణి కిజినాన్.

11 ఎయెన్బా వన్నిజ్ ఇజిరి కణక సుడేదెజ్ అఎద్. వాండ్రు మర్ది నా డగ్రు వాదెజ్ వన్ని మన్సురు సార్లిదాన్ వన్నిజ్ పొక్తు. మహి తంబెరిజ వెట వాండ్రు వానాల్లె ఇజి నాను ఎద్రు సుడేజిన.

* **16:8 16:8** పడాయి ప్రమాణమ్దు ఇక్క వారమ్క పండ్రెయ్, మరి పంట కొంబు పండ్రెయ్ ఇజి వెహొ ఆజినాద్. (నిర్గమ 34:22, 23:16) వెజెర్ వెట కూడేజి యా పండ్రెయ్ కిదెజ్ ఇజి ఇస్రాయేలు లోకుర్ యెరుసలేమ్దు మంద వాజి మహార్. పెంతెకొన్టు ఇహిజ యాబయ్ ఇజి అర్దం. యాక పస్కు పండ్రెయ్ ఆతి వెనుక యాబయ్ రొన్సు ఆనివలె ఆజినాద్.

12 ఏలు తంబెరి ఆతి అపొలో వందిజ్ వెహ్పిక ఇమిక ఇహిజ, మహి తంబెరిజ వెట మీ డగ్రు సొండ్రెజ్ ఇజి నాను వన్నిజ్ బతిమాలిత గాని ఏలు వాదెజ్ వన్నిజ్ ఇస్సం సిల్లెతాద్. గాని మరి ఎసెజ్బా వాండ్రు అవ్కాసం దొహ్కొవలె మీ డగ్రు వానానె.

13 మీరు జాగర్త మండ్రు. దేవుణు మున్ను మని నమకమ్దు గటిజ మండ్రు. దయ్ రమ్దాన్ మండ్రు. సత్తుదాన్ మండ్రు.

14 మీరు కిజిని పణిజ్ విజు ప్రేమదాన్ కిదు.

15-16 అక్కాయ ప్రాంతమ్దు తొలిత దేవుణుదిజ్ నమ్మిత్తికార్ సైపాను ఇండ్రొణికార్ ఇజి మీరు నెస్సిదెర్ గదె? దేవుణుదిజ్ నమ్మిత్తి వరి వందిజ్ పణి సాయం కిదెజ్ వరిజ్ వారి ఒవజెపె ఆత మనార్ ఇజిబా మీరు నెసినిదెర్. అందెజె తంబెరిజాండె, మీరు నిని వరిజ్ అణిజిజి మండ్రు. అక్కాదె అవిండ పణిదిజ్ కూడెజి వాని వరిజ్ ని కస్టబాడెజి పణి కిజిని వరిజ్ బా అణిజిజి మండ్రెజ్ ఇజి నాను మిజి బతిమాలిన.

17 మీరు వాదెజ్ అట్ ఎండ మహిజ్ బా, సైపానుని పొర్మానాతు, అక్కాయికు ఇనికార్ వాతివలె నాను సర్ద ఆత. ఎందనిజ్ ఇహిజ, మీ బాన్ నజి సీదెజ్ సిల్లితికెజ్ వీరు సజి సితార్.

18 నా మన్నుదిజ్, మీ మన్నుదిజ్ వారు సర్ద కిత్తార్. ననికార్ గవ్ రమ్దిజ్ తగ్గికార్.

19 ఆసియాదు మన్ని సజమ్కాణికార్ మీరు నెగెండ మనిదెరా ఇజి వెన్ బాజినర్. అక్కూల, ప్రెస్కిల ఇనకార్ ని వరి ఇండ్రొ కూడెజి వాజిని నమ్మిత్తి వరి సజమ్బా ప్రబు పేరుదాన్ మీరు నెగెండ మనిదెరా ఇజి వెన్ బాజినార్.

20 నమ్మిత్తి తంబెరిజ్ విజెరె మీరు నెగెండ మనిదెరా ఇజినార్. దేవుణు వెట కూడితి మన్ని వరిజ్ మీ ప్రేమ తొరిస్తు. నెగ్గి మన్నుదాన్ ఒరెన్ మరి ఒరెన్ వన్నిజ్ పొంబిజి వందనమ్కు వెప్టు.

21 పవులు ఇని నాను నా కియుదానె యా వందనమ్కు రాసిన.

22 ఎయెన్ బా ప్రబుజ్ ప్రేమిన్ ఎండ మహిజ సయివ్ వన్ని మున్ను రపిద్. యేసు ప్రబు వాజినాన్. రఅ ప్రబువా.

23 ప్రబువాతి యేసుక్రీస్తు దయదర్మం మిజి తోడు; ఆజి మనీద్.

24 క్రీస్తుయేసు వెట కూడితి మన్ని మీరు విజిదెరె వెట నా ప్రేమ మనీద్. ఆమెన్.

అపొస్తుడు ఆతి పవులు కొరింతి పట్నమ్దు మని దేవుణు సజమ్ది వరిజ్ రాస్తి రుండి ఉత్రం

నెల్వ కిబిసినిక

ఇక్క అపొస్తుడు ఆతి పవులు కొరింతి సజమ్ది వరిజ్ రాస్తిమన్ని రుండి ఉత్రం. యా ఉత్రమ్దు పవులు వన్ని వందిజ్, మరి వాండ్రు ఎలాగ సువార్త పణి కిత్రాన్, మరి అయావలె వన్నిజ్ ఇని ఇనికెజ్ జర్గితె ఇజి యా ఉత్రమ్దు లావ్ వెప్పినాన్. కొరింతి పట్నమ్దు మన్ని దేవుణు సజమ్దికార్ సెగొండార్, ఆఇవరి బోద వెంజి పవులు అపొస్తుడు ఆవన్ ఇజి వెహ్టార్. దన్ని వందిజ్ జవాబ్ వెప్పాలెకెండ్ యా ఉత్రమ్దు నండో సజతిజ్ రాస్త మనాద్. దేవుణు ఇస్టమాతి వజ యేసుప్రబునె వన్నిజ్ అపొస్తుడు లెకెండ్ ఇడ్రాన్ ఇజి రుజువ్ కిజినాన్. వాండ్రు కిత్తి పణిదునో, వెహ్టా మాటదునో, వన్ని బత్తుదునో, ఇనికబా తప్పు మహిజ తోరిస్తు ఇజి వరిజ్ వెన్బాజినాన్. నన్ని వరి వెట మొకొ సుడేజి వర్గిదెజ్ తయారాజి వాజినాన్ ఇజి వెప్పి ఉత్రం ముగిసినాన్.

యేసుక్రీస్తు సాజి మర్జి నిజీతి వెనుక యాబ్బయ్ ఆరునో యాబ్బయ్ ఏడునో పంటెజ్ వెనుక యా ఉత్రం రాస్తాన్ ఇజి దిన్ని వందిజ్ నెస్తికార్ నమ్మిజినార్. పవులు మాసిదోనియదు మహివలె బాణిజ్ యా ఉత్రం రాస్త పొక్తాన్ ఇజిబా వారు నమ్మిజినార్.

1 దేవుణు ఇస్టమాతి వజ యేసు క్రీస్తుజ్ అపొస్తుడు ఆతి పవులుని మా తంబెరి ఆతి మోతితి కొరింతి పట్నమ్దు మని దేవుణు సజమ్ది వరిజ్ని అక్కాయ ప్రాంతమ్దు మని దేవుణుదిజ్ నమ్మితి వరిజ్ విజెరిజ్ రాసిని ఉత్రం.

2 మా బుబ్బాతి దేవుణు బాణిజ్ని ప్రబువాతి యేసుక్రీస్తు బాణిజ్ దయాదర్మమ్ని సమాదనం మిజి మనీద్.

ఓదరిసిని దేవుణు

3 ఎస్తివలెబా మా ముస్కు కనికారం మనికాన్ ఆతి బుబ్బ, ఎస్తివలెబా మజి ఓదరిసిని దేవుణు ఆతి, మా ప్రబు ఆతి యేసుక్రీస్తుజ్ బుబ్బ ఆతి దేవుణు పొగిడేః ఆప్పిన్.

4 ఎందనిజ్ ఇహిజ, విజు కస్టమ్కాజ్ దేవుణు మజి ఓదరిసిని ఓదర్పుదాన్ ఎలాగ మర్తి కస్టమ్దు మని వరిజ్బా ఓదరిస్తెజ్ మాపు సత్తుమనికావ్ ఆదెజ్ ఇజి వాండ్రు మా విజు కస్టమ్కాజ్ మజి ఓదరిసినాన్.

5 క్రీస్తు వెట కస్టమ్కు మా బత్తుదు ఎలాగ లావ్ ఆజినెనో, అయాలెకెండ్నె క్రీస్తు వెట ఓదర్పుబా మా బత్తుదు నిండ్రెజి పొజిజి వాజినాద్.

6 మాపు కస్టమ్దు మనావ్ ఇహిజ అక్క మిజి దేవుణు బాణిజ్ ఒదర్పు దోహ్కెజ్ ఇజిని దేవుణు మిజి రక్సిస్తెజ్ ఇజిని మాపు కస్టమ్దు మనావ్. దేవుణు మజి ఓదరిస్తి మనిక మిజి ఓదర్పు దోహ్కెజ్ ఇజినె. ఎందనిజ్ ఇహిజ, మజి వాతిమని లెకెండ్ కస్టమ్కు మిజి వానివలె, అయాకెజ్ మీరు డిన్ ఏండ ఓరిసినివలె అయ ఓదర్పు ఎలాగ మర్తిక ఇజి మీరు నెసినిదెర్.

7 మజి వాతిమని కష్టమ్కాజ్ మీరు ఎలాగ మా వెట కూడఃజి మంజినిదెరొ, అయలెకెండెన మా వెట ఓదర్పుదుబా కూడఃజి మంజినిదెర్ ఇజి మాపు నెసినావ్. అందెజి మీ వందిజ్ మాపు ఆసదాన్ ఎర్దు సూణిక్ కద్దిఎండ మంజినాద్.

8 తంబెరిజొండె, ఆసియ ప్రాంతమ్దు మాపు ఓరిస్తిమని కష్టమ్కు మీరు నెన్ఎండ మండ్రెజ్ ఆవద్ ఇజి మాపు కొరిజినావ్. మాపు సానావ్ఫెను ఇజి ఒడిఃబితావ్. మజి ఓరిస్తిజ్ అట్ఠ నని నసా కష్టమ్కు మజి వాతె.

9 నిజమె సాపుదిజ్ సిక్స మజి దొహ్క మనాద్ ఇజి మాపు ఒడిఃబితావ్. గాని మాపు, మా ముస్కునె ఆదారం ఆవండ, సాతి వరిజ్ నిక్సి దేవుణు ముస్కునె ఆదారం ఆదెజ్ ఇజిని ఇక్కెజ్ విజు మజి జర్గితె.

10-11 మీరుబా మా వెట కూడఃజి పార్లనం కిజి సాయం కిత్తిజ్, దేవుణు గొప్ప పెరి సాపు నని కష్టం కాణిజ్ మజి తప్తిస్తాన్. మరి వాని కాలమ్దుబా తప్తిసినాన్లె. వాండ్రు మరి ఎస్తివలెబా మజి తప్తిసి మంజినాన్లె ఇజి వన్ని వందిజెన్ మాపు ఆసదాన్ ఎర్దు సుడఃజి మంజినావ్. నండొండార్ పార్లనం కిత్తిజ్, దేవుణు బాణిజ్ అయ పార్లనమ్క వందిజ్ మజి కనికారం దొహ్క వందిజ్, నండొండార్ మా వందిజ్ దేవుణుదిజ్ వందనమ్కు వెహ్లాల్లె.

12 మా గర్బం వెహ్సిని సాస్యం ఇనిక ఇహిజ, యా లోకమ్దు మని బత్తుదుబా, మరి మీవెట మన్ని విజు సజతిజ లోఇబా గర్బం గదిన్ఎండ దేవుణు సిత్తిమని నెగ్గి మన్సుదాన్, లోకమ్దు మన్ని పరి బుద్దిదాన్ ఆవండ దేవుణు దయాదర్మమ్ది సత్తుదాన్ బత్తితావ్. దిన్ని వందిజ్ మాపు పొగడిఃజినావ్.

13 నద్విదెజెనొ, పూర్తి అర్దం కిదెజ్ అట్ఠ మాటెజెన్ మాపు మిజి రాస్తెజ్ సిల్లె.

14 ఏలు మీరు మజి సెగం నెస్తి మనిదెర్. గాని ప్రబు ఆతి యేసు మర్జి వాని దినమ్దు మాపు మీ వందిజ్ పొగడిఃజి వెహ్నావ్లె. అయాలెకెండ మా వందిజ్ పొగడిఃజి వెహ్లాజ్ అట్టిలెకెండ మీరుబా సజి పూర్తి నెస్తిదెర్లె ఇజి మాపు ఆసదాన్ ఎర్దు సుడఃజి మంజినావ్.

15 యాలెకెండ మా మన్సుదు నమకం తవ్వెండ మన్నిజ్, మిజి రుండి వంతుజ్ లాబం మండ్రెజ్ ఇజి ముజాల మీ డగ్రు వాదెజ్ ఇజి సజి ఉండ్రె ఉదెనం మహాద్.

16 ముజాల మీ డగ్రు వాజి మాసిదొనియ సొండ్రెజ్ ఇజి, మరి మాసిదొనియదాన్ మర్జి మీ డగ్రు వాజి, మీరె యూదయ దేసెం సొండ్రెజ్ మజి పొక్సిదెర్ ఇజి నాను ఒడిఃబిత.

17 యాలెకెండ కిదెజ్ ఇజి నాను ఒడిఃబితివలె, యాక ఇజిరి సజతి ఇజి నాను ఒడిఃబితానా?. “ఒబ” ఇజి వెహ్సి వెటనె “ఆవద్, ఆవద్” ఇజి వెహ్లాజ్ యాకెజ్ నాను లోకమ్దిజ్ నెందితి లెకెండ కిజినానా?

18 దేవుణు నమ్మిదెజ్ తగ్గికాన్ ఇజి మన్ని లెకెండెనె, మాపు మిజి వెహ్లా మని మాటెజ్ ఎస్తివలెబా ‘ఒబ’ ఇజినె మంజినె, “ఆవద్” ఇజి వెహ్లాకెజ్ ఆఉ.

19 ఎందనిజ్ ఇహిజ, నావెట, సిలువాను వెట, తిమోతి వెట మీ నడిఃమి సాటె ఆతి మని దేవుణు మరిసి ఆతి యేసుక్రీస్తు ‘ఒబ’ ఇజినె ‘ఆవద్’ ఇజినె ఆవతాన్. గాని వన్ని వెట అక్క ఎస్తివలెబా ‘ఒబ’ ఇజినె మంజినాద్.

20 దేవుణు సతి ప్రమాణమ్కు ఎస్సాడు ఆతిజ్బా, అక్కెజ్ విజు క్రీస్తు వెట ‘ఒబ’ ఇజినె మన్నె. అందెజి దేవుణు గొప్ప పెరికాన్ ఇజి తోరె ఆదెజ్ ఇజి క్రీస్తు వెట ‘ఆమెన్’ ఇజి మాటు వెహ్సినాట్.

21-22 మీ వెట మజిబా క్రీస్తు వెట కూడఁజి గటిజ నిల్పి మంజినికాన్ దేవుణునె. బుర్రదాన్ నూనె వాక్కి కేట కిత్తి లెకెండ్ ఏర్పాటు కిత్తికాన్ దేవుణునె. వన్ని సొంతం ఇజి మా ముస్సు ముద్ద పోక్కి, వెనుక మజి దొహ్కెజ్ మని మేలుజ వందిజ్ రుజుప్ లెకెండ్ వన్ని ఆత్మ ఇని బయాన్ మా మన్సుజ మజి సిత మనాన్.

23 మీ ముస్సు కనికారం మనిజెనె నాను మరి కొరింతి పట్టుమ్దు రెవత, ఇని దనిజ్ దేవుణునె సాక్కి.

24 అందెజె మీరు దేవుణు ముస్సు నమకం ఇడ్డి దనిజ్ మీ ముస్సు అతికారం మనికాప్ ఇజి ఆవిప్ గాని సర్ద వందిజ్ మీ వెట కూడఁజి పణికినికాప్ లెకెండ్. ఎందనిజ్ ఇహిజ దేవుణు ముస్సు మని నమకమ్దాన్ మీరు గటిజ నిల్పి మంజినిదెర్.

2

1 అందెజె మరి ఉండ్రి సుటు దుకమ్దాన్ మీ డగ్గు రెవ ఇజి నా మన్సుదు నానె నిర్ణెం కిత.

2 ఎందనిజ్ ఇహిజ, నాను మిజి దుకం తప్పి ఇహిజ, నా వెట దుకం అతికారాతి మీరు ఆవిండ ఎయెర్ నజి సర్ద కిబిస్సార్?.

3 ఎందనిజ్ యా సజతిజ్ నాను మిజి రాస్త ఇహిజ, నాను వానివలె, నజి సర్ద కిబిస్సెజ్ మని వరివెట నజి దుకం రెవిండ మండ్రెజ్ వలె ఇజి రాస్త. మరి నజి మని సర్దాదు మీరుబా నావెట సర్ద ఆనిదెర్లె ఇజి మీ వందిజ్ నా మన్సుదు నమకం ఇట్టా మన్.

4 మీరు దుకం అందెజె ఇజి ఆవిద్, గాని మిజి నాను ఎసానొ ప్రేమిసిన ఇజి మీరు నెస్సెజ్ ఇజినె, నండొ దుకమ్దాన్ మన్సుదు బాద ఆజి, ఎసానొ కణెరు వాక్కి మిజి రాస్త మన్.

తప్పు కిత్తి వరిజ్ సెమిస్సి వందిజ్

5 ఎయెన్బా దుకం కిబిస్సాన్ ఇహిజ, నజినె లాప్ ఆవిండ, వాండ్రు మిజి విజెరిజ్ కండెక్ దుకం కిబిస్త మనాన్. అందెజె నజి దుకం కిబిస్తి వందిజ్ నాను గటిజ వెహైజ్ ఆవిద్గదె?

6 వన్నిజ్ మీ లొఇ నండొండొర్ వెట సతి సిక్కు సరి ఆనాద్.

7 అందెజె మీరు వన్నిజ్ సెమిసి ఓదరిస్సెజ్ వలె. ఎందనిజ్ ఇహిజ వాండ్రు మరి నండొ దుకమ్దు మడుజిగ్జ మని లెకెండ్ మండ్రెజ్ ఆవిద్ ఇజి.

8 అందెజె వన్నిజ్ మీరు ప్రేమిసినిదెర్ ఇజి మరి వన్నిజ్ మీరు తోరిస్సెజ్ వలె ఇజి నాను బతిమాల్లిన.

9 మీరు విజు దనిజ్ లొజిజ తగ్గికిదెర్ లెకెండ్ మంజినిదెరా ఇజి నెస్సెజ్ నాను మిజి రాస్త మన్.

10 మీరు ఎయెరిజ్బా సెమిస్తిజ నానుబా వన్నిజ్ సెమిసిన. మరి ఇనిదని వందిజ్బా సెమిస్సెజ్ ఇహిజ, మీ వందిజ్ అక్కబా క్రీస్తు ఎద్దు నాను సెమిస్త మన్.

11 ఎందనిజ్ ఇహిజ, సయ్యూను మా ముస్సు గెలిస్సెజ్ ఆవిద్ ఇజి నాను సెమిస్త మన్. మరి వన్ని సెఇ పణిజ వందిజ్ మాటు నెన్ఇకాట్ ఆఎట్గదె?

కొత్త ఒప్పుమానం వందిజ్ సాటిస్సికార్.

12 క్రీస్తు సువార్త సాటిస్సెజ్ నాను త్రోయ పట్టుమ్దు వాతివలె అబ్బె నెగ్గి అమ్కాసం దేవుణు నజి సితాన్.

13 గాని నా తంబెరి ఆతి తీతుజ్ తోఎండ నా మన్నుదు నిపాతి సిల్లెండ ఆతిజ్, వరిజ్ నాను సొన్నిన ఇజి వెహ్ని అబ్బెణిజ్ మాసిదోనియ సొండ్రెజ్ సోత.

14 గాని మాపు దేవుణుదిజ్ వందనమ్కు వెహ్నినావ్. ఎందనిజ్ ఇహిజ, క్రీస్తు వెట కూడితి మజి దేవుణు ఎప్పివలెబా గెలిన్తి వరి సర్దదాన్ నడిపిసినాన్. ఉండ్రె నెగ్గి వాసనం లెకెండ విజుబాన్ మాపు సాటిన్సి సువార్తదాన్ క్రీస్తు వందిజ్ విజెరె నెన్తిలెకెండ వాండ్రు కిబిస్సాన్.

15 దేవుణు రక్కిన్తి వరి నడిఃమి, పాడాఃజి సొన్నిని వరి నడిఃమి మాపు దేవుణుదిజ్ క్రీస్తుది నెగ్గి వాసనం లెకెండ ఆత మనావ్.

16 పాడాఃజి సొన్నిని వరిజ్ మాపు సాతి ఒడొల్ది కంపు లెకెండ మనావ్. దేవుణు రక్కిన్తి వరిజ్ బత్తు సీజిని నెగ్గి వాసనం లెకెండ మనావ్. నిని పణిదిజ్ తగ్గికాన్ ఎయెన్ మనాన్?

17 మహి సంఠెండార్ లెకెండ, లాబం రపిద్ ఇజి దేవుణు మాటదిజ్ బేరం కినికాప ఆఎవ్. దేవుణు బాణిజ్ పొకె ఆతివరి లెకెండ క్రీస్తు వెట కూడఃజి నీతినిజాయ్త్తిదాన్ దేవుణు ఎద్రు మాపు వర్రిజినావ్.

3

1 మరి మజి మాపె మర్జి పొగడిఃజి వెహ్తెజ్ మొదొల్నినాపా? సెగొండొరిజ్ అవ్సరం మని లెకెండ మీబాణిజ్నో, మిజి తోరిన్తెజ్ ఇజినో, కీదు పొక్కిని నెల్వ కిబిన్సి ఉత్రమ్కు మజి మండ్రెజ్నా?

2 మా మన్నుజు రాసె ఆతిమని లోకుర్ విజెరె నెసి నద్విజిని ఉత్రమ్కు మీరె.

3 పణకుదాన్ తయార్ కిత్తి బల్లెజ మున్ను గిన్తి మనిక ఆవిద్, మరి సిరదాన్ రాస్తిక ఆవిద్, గాని లోకురి మన్ను ఇని మెతాని బల్లెజ మున్ను, మాపు కిత్తి సువార్త పణిదాన్ బత్తిజిని దేవుణు ఆత్మదాన్, రాసె ఆతిమని క్రీస్తుబాణిజ్ వాతి మని ఉండ్రె ఉత్రమ్నె మీరు ఇజి మీరె తోరిసినిదెర్.

4 క్రీస్తు వెట దేవుణు ఎద్రు మా మన్నుదు నస్సొ నమకం మనాద్.

5 మాపు కిజిని పణిజ్ విజు మా సత్తుదాన్ మాపె కిజినావ్, ఇజి ఒడొబిదెజ్ మా లొక ఇనికబా సిల్లెద్. యాకెజ్ కిదెజ్ మని సత్తు దేవుణు బాణిజ్నె వాతాద్.

6 వాండ్రె మజి కొత్త ఒప్పుమానమ్దిజ్ నెగెండ పణికినికార్ ఇజి ఇట్ట మనాన్. కొత్త ఒప్పుమానం ఇహిజ అనరమ్దాన్ రాస్తిక ఆవిద్, బత్తిజిని దేవుణు ఆత్మదాన్ వాతిక. ఎందనిజ్ ఇహిజ అనరమ్దాన్ రాసె ఆతి ప్రమాణం సాపు తపిసినాద్. ఆత్మదాన్ వాతి ప్రమాణం పాణం సీజినాద్.

కొత్త ఒప్పుమానం ఇని గొప్ప పెరి సజతి.

7 పణకు బల్లెజ మున్ను అనరమ్దాన్ రాసె ఆతిమని సాపు తపిన్తి ప్రమాణం నస్సొ గొప్ప పెరిక మహద్.

8 ఇహిజ, మోసె మొకొ తగిజి సొన్నిని జాయ్దాన్ మహిజ్బా, ఇస్రాయేలు లోకుర్ వన్ని మొకొమ్దు తినాజ్ బెన్తెజ్ అల్తెక లెకెండ గొప్ప పెరి జాయ్దాన్ మహాన్. అక్క అయాలెకెండ పెరిక మహద్ ఇహిజ, దేవుణు ఆత్మదాన్ మని పణిజ్ దన్నిజ్ ఇంక ఎస్సొనో గొప్ప పెరిక ఆవిదా?

9 లోకురిజ్ తీర్పు తీరిసి సిక్స సీని పణి నస్సొ గొప్ప పెరిక మహద్ ఇహిజ, లోకురిజ్ నీతి నిజాయ్తిదికార్ కిజిని యా పణి, దనిజ్ ఇంక ఒద్దె పెరిక మంజినాద్.

10 ఏలు మనిక ఒదె గొప్ప పెరిక ఆతిక ఆతిజ్, దినిజ్ పోలిసి సుడఃతిజ, ముజాల గొప్ప పెరిక మహి దనిజ్ ఏలు ఇనిక సిల్లెండ ఆతాద్.

11 అసరమ్దాన్ రాసె ఆతి, కండెక్ కాలం మహి యా ప్రమాణం యాలెకండ గొప్ప పెరిక వాతాద్ ఇహిజ, ఎస్తివలెబా మంజిని యా కొత్త ప్రమాణం మరి ఒదె గొప్ప పెరిక మంజినాద్.

12 మాపు యాలెకండ అసదాన్ ఎద్దు సుడఃజి మంజినాట్. అందెజె మా మన్నుదు దయ్యరమ్దాన్ మనావ్.

13 మాపు మోసె లెకెండ ఆవివ్. ఎందనిజ్ ఇహిజ ఇస్రాయేలు లోకుర్ వన్ని మొకొమ్దు మని తగిజి సొని జాయ్దిజ్ బేస్ఎండ మోసె వన్ని మొకొమ్దు టుకుర్ ఇట్టాన్.

14 గాని వరి మన్ను గుడిః ఆత మహాద్. అందెజె ఏలుబా వారు పడాఃయి ఒపుమానం సద్విజినివలె వరి మన్నుజ మున్ను అయా టుకుర్ ఏలుబా లాగె ఆవిండ అయా లెకెండె మనాద్. ఎందనిజ్ ఇహిజ క్రిస్తు వెటనె అక్క లాగె ఆజినాద్.

15 ఏలుదాక మోసె రాస్తి మనికెజ్ వారు సద్విజిని వలె వరి మన్నుజ మున్ను ఉండీ టుకుర్ మని లెకెండె మనాద్.

16 గాని ఎయెన్బా ఎస్తివలెబా ప్రబువాతి యేసుక్రిస్తు దరిజ్ మహ్తిజ వన్ని బాణిజ్ టుకుర్ లాగె ఆజినాద్.

17 ప్రబు ఇహిజ దేవుణు ఆత్మనె. ప్రబు ఆత్మ మజి విడుఃతల కిజినాద్.

18 మాటు విజెటె టుకుర్ మన్ఇ మొకొమ్దాన్, అదమ్దాన్ జాయ్ తోరితి లెకెండ, ప్రబు జాయ్ తోరిసినాట్. ఆత్మ ఆతి ప్రబుబాణిజ్ వాని జాయ్దాన్ మరి ఒద్దె జాయ్ ఆజి వన్ని మూర్తి లెకెండ ఆజి మంజినాట్లె.

4

ఒడోల్ ఇని ఇస్కా కుండ లొఇ మన్ని ఆస్తి

1 దేవుణు కనికారమ్దానె మాపు దేవుణు పణిదు మనావ్. అందెజె మాపు మన్నుదు దయ్యరం సిల్లెండ ఆవివ్.

2 మాపు సిగు లాగ్జిని డాఃజిజి కిజిమహి పణిజ్ డిఃస్త సిత్తావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మని లెకెండ దనిజ్ మారిన్ఎండ వెస్పిన్నావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మన్ని లెకెండ మారిన్ఎండ వెస్పిన్నావ్. అక్కాదె ఆవిండ నిజమాతికెజ్ విజెరిజ్ నెసిని లెకెండ వరి గర్భమ్దిజ్ ఎద్దు మజి మాపె నెగెండ దేవుణు ఎద్దు బత్తిజినావ్.

3 మాపు వెస్పిన్ని సువార్త డాఃజె ఆతి మహిజ, అక్క పాడాఃజి సొన్నిని వరిజె డాఃజె ఆత మనాద్.

4 దేవుణు మూర్తి ఆతిమని క్రిస్తు జాయ్ ఆతి సువార్తదిజ్ జాయ్, వరిజ్ తోర్ఎండ మంజిని వందిజ్ యా తరమ్దిజ్ అతికారి ఆతి నెతూసు నమకం సిల్లికార్ ఆతివరి మన్నుది కణకెజ్ గుడ్డి కిబిస్తాన్.

5-6 “సీకటిదాన్ జాయ్ ఆపిద్”, ఇజి నెహ్తి దేవుణునె, క్రిస్తు మొకొమ్దు మని జాయ్ దేవుణు గెణమ్ది జాయ్ మజి మండ్రెజ్ ఇజి వన్ని జాయ్ మా మన్నుజ జాయ్ సీని లెకెండ మజి సిత్త మనాన్. అందెజె మజి మాపె ఆజి సువార్త సాటిన్ఎవ్. గాని యేసుక్రిస్తు ప్రబు ఇజి ఒడిఃబిజి, మాపు యేసు వందిజ్ మిజి పణి కినికావ్ ఇజి సువార్త సాటిసినావ్.

7 అహిజ విజు దన్నిజ్ మిస్తి యా సత్తు మాది ఆవిద్, గాని దేవుణు బాణిజ్ వాతిక ఇజి తోరె ఆదెజ్ ఇజి యా నెగ్గి ఆస్తి మా ఒడోల్ ఇని ఇస్కా కుండెజ లోఇ మజి దోహ్క మనాద్.

8 విజు దరిజాణిజ్ గ్రటిజ సీపె ఆజనికాప్ గాని పెడెహికాప్ ఆవిప్. ఇనిక కిదెజ్ నొ ఇజి తెల్లివండ ఆతికాప్ గాని ఇన్ని ఆస సిల్లికాప్ ఆవిప్.

9 హిమ్ సెజ్ కిబె ఆజినాప్ గాని డిసి సిబె ఆతికాప్ ఆవిప్. డెయె ఆజి అడిగి అర్తికాప్ గాని నాసనం ఆజనికాప్ ఆవిప్.

10 మాపు ఎస్తివలెబా మా ఒడోల్ దు యేసు సాపుదిజ్ బరిసినాప్, ఎందనిజ్ ఇహిజ యేసు బత్కుబా మా ఒడోల్ దాన్ తోరె ఆదెజ్ వలె ఇజి.

11 ఏలు బత్కిజనికాప్ ఆతి మాపు ఎస్తివలెబా యేసు వందిజ్ సాపుదిజ్ ఒపజెపె ఆజినాప్. ఎందనిజ్ ఇహిజ నాసనం అజి సొని మా ఒడోల్ దు యేసు బత్కు తోరె ఆదెజ్ వలె.

12 అందెజె సాపు మా లోఇ పణి కిజినాద్ గాని మీ లోఇ పాణం పణి కిజినాద్.

13 “నాను నమ్మిత మన్న. అందెజె నాను వర్గిత మన్న”, ఇజి దేవుణు మాటదు రాస్త మనాద్. అయాలెకెండ్ మన్ని మన్నదాన్ మాపుబా నమ్మిత మనాప్, అందెజె వర్గిజినాప్.

14 ఇనిక ఇహిజ, ప్రబు ఆతి యేసుజ్ సాతి వరిబాణిజ్ నిక్కికాన్, యేసు వెట మజిబా నిక్కి మీవెట వన్ని ఎద్దు నిల్ ప్యాన్ ఇజి మాటు నెసినాట్.

15 దేవుణు దయా దర్మం మరి ఒద్దె నండొండారిజ్ అందిజి సార్నివలె, నండొ పార్లనమ్ కు కిజి, మరి వందనమ్ కు వెప్పి వారు దేవుణుదిజ్ గవరం సినార్ లె. యాకెజ్ విజు మీ వందిజ్ నె.

16 అందెజె మాపు మన్నదు దయరం సిల్లికాప్ ఆవిప్. వెల్లి తోరె ఆజిని మా ఒడోల్ పాడాజి సొన్నినాద్ గాని మా మన్నదు మాపు రోజు రోజుదిజ్ కొత్త సత్తు మనికాప్ ఆజినాప్.

17 మాపు ఓరిసిని యా సాణెం మంజిని ఇజిరి కస్టమ్ కు, మజి వనకాజ్ విజు మిస్తిక ఆతి ఎలాకాలం మంజిని గవరం దోహ్ క్కినె.

18 అందెజె మాపు తోరిజిని వనక ముస్సు మన్న ఇడోవండ, తోరె ఇ వనక వందిజ్ నె ఎద్దు సుడోజినాప్. ఎందనిజ్ ఇహిజ తోర్నికెజ్ సెగం కాలమ్ నె మంజినె, తోరె ఇకెజ్ ఎలాకాలం మంజినికెజ్.

5

1 యా బూమి ముస్సు మాపు బత్కిజిని గుడారం* లెకెండ్ మని మా ఒడోల్ ఎస్తివలె నాసనం ఆతి సొహిజ్ బా, మా వందిజ్ దేవుణు మంజిని బాడిడు లోకు కిక్కాణిజ్ తొప్పిక ఆవండ, దేవుణు తయార్ కిత్తి మన్ని ఎలాకాలం మంజిని ఉండ్రీ ఇల్లు మంజినాద్ ఇజి మాపు నెస్నాప్.

2 పరలోకమ్ దు మన్ని ఇల్లు లెకెండ్ మన్ని ఒడోల్ దు మండ్రెజ్ ఇజి ఆసదాన్ యా గుడారం ఆతి ఒడోల్ దు మాపు ములుజిజినె మంజినాప్.

3 మాపు అబ్బె ఒడోల్ మన్ని వరి లెకెండ్ మన్నిజ్ మా ఆత్మ డుమ్ డ లెకెండ్ తోర్ ఏప్.

4 గుడారమాతి యా ఒడోల్ దాన్ మన్నివలె మాటు ములుజిజి బరు పిండజిని వరిలెకెండ్ మంజినాప్. యా ఒడోల్ డిసి సిదెజ్ ఇజి సిల్లెద్. గాని దేవుణు మంజిని

* 5:1 5:1 ఇల్లు, గుడుస ఇజిబా ఒడోబిదెజ్ ఆనాద్

బాడిడు మని ఒడొల్దు మండ్రెజ్ ఇజ ఆస ఆజినావ్. అందెజె సాపు మన్ని యా ఒడొల్ ఎనెజ్బా సాపు సిల్లి పాణం మని ఒడొల్ లెకెండే మార్నాద్లె.

5 వన్ని ఆత్మదిజ్ బయాన్ లెకెండే మజి సితమనికాన్ ఆతి దేవుణునె దిన్ని వందిజ్ మజి తయార్ కిత్త మనాన్.

6 అందెజె మాపు ఎస్తివలెబా మన్నుదు దయరం మనికావ్. మాపు యా ఒడొల్దు ఇబ్బె బత్తిజిని దాక ప్రబు బాణిజ్ దూరం మనావ్ ఇజ నెసినావ్.

7 మాపు దేవుణు మున్ను మని నమకమ్దానె బత్తిజినావ్. కణకెజ తోర్జిని వన్నిక దటాజ్ ఆవిద్.

8 యా ఒడొల్దు బత్తిని దన్నిజ్ ఇంక, యాక డిసి సిజి ప్రబు వెట మంజినికాదె మజి ఒదె ఇన్టం, దిన్ని వందిజ్ మజి మన్నుదు దయరం మనాద్, ఇజి నాను వెహ్సాన్.

9 అందెజె, మా ఒడొల్దు ఇబ్బె బత్తిజి మహిజ్బా, యాక డిసి సిజి ప్రబు వెట మహిజ్బా వన్నిజ్ ఇన్టమాతి లెకెండే మండ్రెజ్ ఇజి మాపు గురి సుడొజినావ్.

10 ఎందనిజ్ ఇహిజ ఒరెన్ ఒరెన్ యా ఒడొల్దాన్ మహివలె కిత్తి పణిజ వందిజ్, అయాకెజ్ నెగ్గికెజ్ ఆతిజ్బా, నెఇకెజ్ ఆతిజ్బా దన్నిజ్ తగితి లెకెండే దొహ్పాని వందిజ్ మాటు విజెటి క్రీస్తు నాయం తీరిన్ని బాడిడు తోరె ఆదెజ్ వలె.

మహి వరిజ్ దేవుణు వెట కూల తోహ్పిన్ని పణి

11 అందెజె దేవుణుదిజ్ ఎస్సానో తియెలాజి మండ్రెజ్ ఇజి నెసినె, మహి వరిజ్ అయాలెకెండే మండ్రు ఇజి బుద్ది వెహ్సినావ్. మాపు ఎలాగ మర్తికావ్ ఇజి దేవుణు నెసినాన్. మీ గర్బం ఎద్దు మీరుబా మజి నెసినెదెర్ ఇజి మాపు ఆస ఆజినావ్.

12 మరి మాపు మీ ఎద్దు మా వందిజ్ పొగడిజి వెహ్తాజ్ ఇజి సుడొవివ్, గాని మా వందిజ్ పొగడిదెజ్ మిజి ఉండ్రె అవ్కాసం సీజినావ్. ఎందనిజ్ ఇహిజ మన్నుదు మనికెజ్ నెన్విండ, వెల్లి తొర్నికెజ్ సుడొజి పొగడిజి వర్గిజిని వరివెట మర్తి వెహ్తాజ్ మీరు అట్టికిదెర్ ఆదెజ్ ఇజినె.

13 మాపు వెరిదికావ్ లెకెండే మనావ్ ఇహిజ అక్క దేవుణు వందిజ్నె. నెగ్గి బుద్ది మనికావ్ ఇహిజ అక్క మీ వందిజ్నె.

14 క్రీస్తు ప్రేమ మజి బలవంతం కిజి నడిపెసినాద్. ఎందనిజ్ ఇహిజ విజెరె వందిజ్ ఒరెన్ సాతాన్ అందెజె విజెరె సాతార్ ఇజి ఇని అనుమానం సిల్లెండ నెసినావ్.

15 మరి, వాండ్రు విజెరె వందిజ్ సాతాన్ ఇజి బత్తిజినికార్ ఏలుదాన్ వరి వందిజ్నె బత్తివిండ వరి వందిజ్ సాజి మర్తి నిజితి వన్ని వందిజ్నె బత్తిదెజ్ ఇజి నెసినావ్.

16 అందెజె ఏలుదాన్ మాపు ఎయెర్ వందిజ్బా యా లోకమ్దు మనికార్ ఒడొబిని లెకెండే ఒడొబివివ్. క్రీస్తుజ్ వందిజ్బా ముజాల యా లెకెండేనె ఒడొబితావ్ గాని ఏలుదాన్ వన్ని వందిజ్ అయాలెకెండే ఒడొబివివ్.

17 అందెజె, ఎయెన్బా క్రీస్తు వెట కూడితిజ, వాండ్రు కొత్తాజ్ తయార్ ఆజినాన్. పడాఱికెజ్ విజు సాహె, ఇదిలో విజు కొత్తాకెజ్ ఆతె.

18 యాకెజ్ విజు దేవుణు బాణిజ్నె ఆతె. దేవుణు వెట పగాతికాట్ మజి క్రీస్తు వెట, దేవుణు మజి వన్నిజ్ కూలెజ్ లెకెండే కిత్తాన్. మరి మహికార్ దేవుణు వెట వన్నిజ్ కూలెజ్ లెకెండే తయార్ కిని పణిబా మజి ఒపజెప్తాన్.

19 అహిజ, దేవుణు లోకురి పాపముకు విజు వరి ముస్కునె మొవ్విండ, లోకముదు మని వరిజ్ క్రీస్తు వెట వన్నిజ్ కూలెజ్ లెకెండ కిజ్తాన్. మహి వరిజ్ దేవుణు వెట కూలెజ్ లెకెండ కిబిస్సి అయ మటెజ్ మజి ఒపజెప్తాన్.

20 అందెజె మాపు క్రీస్తుజ్ బోగటు వెహ్నికావ్. దేవుణు మా వెట మిజి బతిమాలజని లెకెండ వర్గిజినాన్. మీరు దేవుణు వెట పగాతికిదెర్ లెకెండ మన్విండ వన్నివెట రాజినమాజి వన్నిజ్ కూలెజ్ లెకెండ మండ్రు ఇజి మాపు క్రీస్తు వందిజ్ మిజి బతిమాలజినావ్.

21 మాటు క్రీస్తు వెట దేవుణు ఎద్దు నీతినిజాయి మనికాట్ అదెజ్ ఇజి దేవుణు ఇని పాపం సిల్లికాన్ ఆతి క్రీస్తుజ్ మా వందిజ్ పాపం అదెజ్ ఇట్టాన్.

6

1 దేవుణు వెట జత కూడెజి పణికినికావ్ ఇజి మపు మిజి బతిమాల్లినిక ఇనిక ఇహిజ, దేవుణుబాణిజ్ మిజి దోహక్తి మన్ని వన్ని దయా దర్థం పణిదిజ్ రెజదని లెకెండ మీరు క్రిదెజ్ ఆవెద్.

2 “నీను మొరొ ఆతిక తగితి సమ్యమ్దు నాను వెహమన్ను. రక్సిస్తెజ్ మన్ని రోజుదు నాను మిజి సాయం కిత మన్న ఇజి వాండ్రు వెహ్నినాన్”, ఇజి దేవుణు మాటదు రాస్త మనాద్. అందెజె నాను వెహ్నిన, ఇక్కాదె దేవుణుది తగితి సమయం. ఇక్కాదె దేవుణు రెసిసిని రోజు.

పవులుజ్ వాతి కస్టమ్కు

3 ఎయెరిజ్ బ ఇని తొరొ ఇడెఎండ మపు కిజిని విజు పణిదు ఎలాగ మర్తి నిందబా రెండ మాపు సుడెజినావ్.

4 విజు వన్కా లొఇ దేవుణు వందిజ్ పణి కినికావ్ ఇజి మజి మాపె తోరిసినావ్. ఎలగ ఇహిజ కస్టమ్కు విజు గొప్పజ ఓరిసినిబాన్, స్రమెజ లొఇ బాద ఆనిబాన్, దుకమ్దు,

5 డెయె ఆనిబాన్, జెలిదు మన్నిబాన్, మహికార్ గొడెబ ఆనిబాన్, కస్టబాడెజి పణి కినిబాన్, నిద్ర సిల్లి రెయ్కాజ్, బజ ఆతివలె, దేవుణు వందిజ్ పణికినికావ్ ఇజి మజి మాపె తోరిసినావ్.

6 మాపు ఇని తప్పుబా సిల్లెండ మహావ్. అర్థం కిజి నెసినిబాన్, ఓరిసినిబాన్, దయ ఆనిబాన్, దేవుణు ఆత్మ వెట, కల్లి సిల్లి ప్రేమదాన్,

7 నిజమాతి మాటెజ్ వర్గిని దన్ని లొఇ, దేవుణు సత్తు లొఇ, ఉణిర్ డెబ్రు కిక్కాణిజ్ నీతి నిజాయితి ఇని ఆయుదమ్కు అస్సిబాన్,

8 మర్యాద సిత్తిబాన్, సిగు ఆతిబాన్, పొగ్డె ఆనిబాన్, సెఇ మటెజ్ వెహె ఆనిబాన్ దేవుణు వందిజ్ పణికినికావ్ ఇజి మజి మాపె తోరిసినావ్. నిజమాతికెజ్ మావ్ వర్గిజినావ్ గాని అబద్దం వర్గినికావ్ ఇజి లోకుర్ మజి ఒడెబిజినార్.

9 విజెరె బాగ నెస్తికార్ గాని ఎయెర్బా నెన్ఇ వరిలెకెండ మనావ్. సాజిని వరిలెకెండ మహిజ్ బా మాపు బత్తిజినావ్. డెయె ఆజినావ్ గాని సపె ఆవ్.

10 దుకమ్దాన్ మన్నికావ్ గని ఎస్తివలెబా సర్ద మన్నికావ్. బీదాదికావ్ గాని నండెండారిజ్ ఆస్తి మన్నికార్ కిజినావ్. ఇనికబా సిల్లికావ్ గాని విజు మన్నికావ్.

11 కొరింతి పట్టుమదికిదెరా, ఇనికబా డావ్ఎండ మా మన్నుదు మన్నికెజ్ విజు మీవెట మాపు వర్గిత మనావ్.

12 మాపు మీ వందిళ్ ప్రేమదాన్ కిక్కు సాప్పినావ్. మీరు మూక్తి కిక్కుబా మా వందిళ్ సాప్ ఇదెర్.

13 మీరు నా కొడోర్ ఇజి మిజి యా లెకెండ్ వెస్సిన. మాపు మీ వందిళ్ కిత్తి లెకెండ్ మీరుబా మా వందిళ్ కిదు. మా వందిళ్ మీ ప్రేమ తోర్స్తు.

నమ్మిఇ వరి వెట జత్త కూడెదెజ్ ఆవద్.

14 నమ్మిఇ వరివెట మీరు జత్త కూడెజి మన్నాట్. నీతి నిజాతిమనికార్ని సెఇకార్ ఎలాగ కుడెజి మండ్రెజ్ అట్టు? జాయ్ని సీకటి ఎలాగ ఉండ్రెబాన్ కుడెజి మండ్రెజ్ అట్టు?

15 క్రీస్తుజ్ పగాతికాన్ ఆతి బెలియాలుదిజ్* క్రీస్తు వెట ఇని పొత్తు మనాద్. నమ్మితి వరిజ్ నమ్మిఇ వరిజ్ ఇని పొత్తు మనాద్?

16 దేవుణు గుడిదిజ్ బొమ్మెజు వెట ఇని పొత్తు మనాద్? మాపు బత్తిజిని దేవుణుది గుడి ఆత మనాప్. అహిజ దేవుణు వెస్తి లెకెండ్నె, “నాను వరివెట బత్తిజి వరివెట నడిన. నాను వరిజ్ దేవుణు ఆజి మంజినాన్లె. వారు నా లోకర్ ఆన మంజినాన్”.

17 “అందెజి వరి బాణిజ్ వెల్లి వాజి కేట మండ్రు”, ఇజి ప్రబు వెస్సినాన్. “నుబారం సిల్లి ఇని దనిజ్బా ముట్మాట్, నాను మిజి డగ్రు కిన”,

18 “నాను మిజి బుబ్బు ఆన మంజిన, మరి మీరు నజి మరిసిర్ గాల్పిక్ ఆనిదెర్లె”, ఇజి విజు సత్తుజ్ మనికాన్ ఆతి ప్రబు వెస్సినాన్”.

7

1 నజి ఇస్టమాతి తంబెరిజాండె, దేవుణు మజి యాలెకెండ్ ప్రమాణమ్కు సిత్త మనాన్. అందెజి ఒడోల్దిజ్ని ఆత్మదిజ్ సెఇకెజి కిజిని విజు వనక బాణిజ్ దూరం మంజి మజి మాటె నుబారం కిజి, దేవుణుదిజ్ గొప్ప మర్యాద సీజి, పూర్తి నెగ్గికాట్ ఆజి మంజినాట్.

2 మీ మన్నుజు మజి బాడ్డి సిదాట్. మాపు ఎయెరిజ్బా ఇని తపుబా కిఎతాప్. ఎయెరిజ్బా పాడె: కిఎతాప్. ఎయెరిజ్బా ఇనికబా మోసెం కిజి లాగ్గె ఆఎతాప్.

3 మీరు తపు కిత్తిదెర్ ఇజి మీ మున్ను తపు మోప్తెజ్ ఇజి నాను ఇక వెహేవి. ఎందనిజ్ ఇహిజ, నాను ముజాల వెస్తి మన్ని లెకెండ్ మీరు మజి నండో డగ్రుహికిదెర్. అందెజి మాపు బత్తితిజ్బా మీ వెటనె, సాతిజ్బా మీ వెటనె ఎస్తివలెబా మంజినాప్.

4 మీ వందిళ్ నా మన్నుదు నండో దయరం మనాద్. మీ వందిళ్ నాను గొప్ప పొగ్డిజిన. నాను ఓదర్పుదాన్ నిండ్రిత మన్ను. నజి నండో కస్టమ్కు వాతె గాని నాను గొప్ప ఓదర్పుదాన్ మన్ను.

5 మాపు మాసిదోనియాదు వాతి వెననుకబా కండెక్బా రోమ్దెజ్ అట్వెతాప్. విజు దరిజాణిజ్ మజి కస్టమ్కునె మహె. వెల్లిహాన్ గొడెబెజ్, మా లోఇ ఇహిజ తియెల్దాన్ మహాప్.

6 గాని ఇని ఆన సిల్లెండ అడిగి అర్తి వరిజ్ ఓదరిసిని దేవుణు, తీతు వాతిజ్ వన్నివెట మజి ఓదరిస్తాన్.

7 వాండ్రు వాతి దని వెటనె ఆవిండ, మీరు వన్నిజ్ ఓదరిస్తి దనివెటా దేవుణు మజి ఓదరిస్తాన్. నా వందిళ్ మీ మన్నుదు మని ప్రేమ వందిళ్, మీరు నా వందిళ్ నండో

* 6:15 6:15 బెలుయాల్ ఇహిజ సయ్హాను

దుకం ఆతి వందిజ్, మరి నా వందిజ్ మీ మన్నుదు ఎస్సా ఆస మనాద్ ఇజి వాండ్రు నజీ వెస్టాన్. అందెజె నాను మరి ఒదె గొప్పు సర్ల ఆత.

8 నాను మిజి రాస్తి ఉత్తమ్దాన్ మీరు దుకం ఆతిజ్బా, నజీ దని వందిజ్ విసారం సిల్లెద్. అయ ఉత్తం మిజి సెగం రొస్కు దుకం కిబిస్తాద్ ఇజి నెస్తానె విసారం అస్త.

9 గాని నాను ఏలు దని వందిజ్ సర్లదాన్ మన. మీరు దుకం ఆతి వందిజ్ ఆవిద్, గాని మీరు అయ దుకమ్దాన్ దేవుణు ఎద్రు మీ తప్పజ్ ఒప్పకొడెజి మారు మన్ను పొందితిదెర్ ఇజి నాను సర్లదాన్ మన. దేవుణు ఇస్టమాతి వజనె మీరు దుకం ఆతిదెర్, అందెజె దనివెట మిజి ఇనికబా నస్టం రెవెత.

10 దేవుణు ఇస్టమాతి వజ వాజిని దుకమ్దాన్, దేవుణు మిజి రక్కిస్సి లెకెండ్ మీ లొఇ మారు మన్ను పుటిసినాద్. అయ మరు మన్ను దుకం పుటిసివిద్. లొకమ్దిజ్ సెందితి దుకం సాపు తపిసినాద్.

11 దేవుణు ఇస్టమాతి వజ వాతి యా దుకమ్దాన్ మీరు ఎసానొ జాగర్ల మనికిదెర్ ఆతిదెర్. మరి మీరు కల్తి సిలికిదెర్ ఇజి తొరిస్టెజ్ ఎసానొ ఆస, తప్పు పణి వందిజ్ ఎసానొ కోపం రెపిస్తాద్. మరి, దేవుణు వందిజ్ ఎసానొ తియెల్, దేవుణు వందిజ్ ఎసానొ ప్రేమ, దేవుణు వందిజ్ పణి కిదెజ్ మన్నుదు ఎసానొ ఆస, నయం జర్గిజి మండ్రెజ్ ఇజి ఎసానొ ఆస, మీ లొఇ పుటిస్తాద్. యా విజు సజతిజి వందిజ్ మీరు నెగ్గికిదెర్ ఇజి రుజుప్ కిబె ఆతె.

12 అందెజె, నాను మిజి ఉత్తం రాస్తిక అయ సెఇ పణి కిత్తి వన్ని వందిజ్ ఆవిద్. వాండ్రు కిత్తి పణిదాన్ దుకం ఆతి వన్ని వందిజ్బా ఆవిద్. గాని మా వందిజ్ మీ మన్నుదు ఎసానొ ఆస ఆజినిదెర్ ఇజి దేవుణు ఎద్రు మీరు నిజం నెస్టెజ్ ఇజినె నాను రాస్త.

13 యా విజు వన్కా వందిజ్ మాపు ఉసార్ కిబె ఆతాప్. అక్కాదె ఆవిండ, మీరు తీతు మన్ను సలాజ్ కిత్తి వందిజ్ వాండ్రు సర్లదాన్ మనికబా సుడెజి మాపు మరి ఒద్దె సర్ల ఆతాప్.

14 నాను మీ వందిజ్ తీతు ఎద్రు పొగ్డిజి వెహ్తా వందిజ్ మీరు నజీ సిగు కిఇతిదెర్. మాపు మిజి వెహ్తా విజు మాటెజ్ అలాగ నిజమాతికెజ్నొ, అయాలెకెండ్నె మీ వందిజ్ తీతు వెట పొగ్డిజి వెహ్తాకెజ్బా నిజం ఇజి తొరె ఆతె.

15 మీరు విజిదెరె వన్నిజ్ లొజిజి, ఎసానొ తియెలాజి ఆజి, వణకుదాన్ వన్నిజ్ డగ్గు కిత్తిదెర్. అక్క ఎత్తు కినివలె మీ వందిజ్ వన్ని మన్నుదు మని ప్రేమ మరి ఒద్దె పిరిజినాద్.

16 మరి మీ వందిజ్ మన్నుదు పూర్తి దయ్ రమ్దాన్ మండ్రెజ్ ఆనాద్ ఇజి నాను సర్ల మన్ను.

8

దేవుణుదిజ్ సంత సిని వందిజ్

1 తంబెరిజాండె, మాసిదొనియాదు మన్ని దేవుణు సజమ్కాజ్ దేవుణు తొరిస్తి మన్ని వన్ని దయా దర్మం వందిజ్ మీరు నెసి మండ్రెజ్ ఇజి మాపు కోరిజినాప్.

2 వరిజ్ వాతి గొప్పు పెరి కస్టమ్కాణిజ్ వారు పరిస కిబె ఆతార్ గాని ఒద్దె సర్ల ఆజి మహార్. వారు గొప్పు బీదదికార్ ఆతి మహిజ్బా దేవుణు వందిజ్ నండొ సీదెజ్ అక్క వరిజ్ అడ్డు కివితాద్.

3 నాను వరి వందిజ్ వెప్పిని సాస్యం ఇనిక ఇహిజ, వరిజ్ ఎసా సీదెజ్ అట్నారో అయాలెకండనె వారు సిత్తార్, నిజమె వరిజ్ సీదెజ్ అట్టి దనిజ్ ఇంక లావ్నె సిత్తార్. వరి సొంత ఇష్టమదాన్ సిత్తార్.

4 నమ్మిత్తి వరి వందిజ్ కిజిని యా సాయమ్దు వరి వంతుజ్ కూడుఃపైజె ఇజి వరిజ్ అవ్కాసం సీదెజ్ వారు మజి నండో బత్తిమాలిత్తార్.

5 వారు కిత్తిక మాపు ఒడిఃబితి లెకెండబా అవితాద్. ముజాల వరిజ్ వారె ప్రబుదిజ్ సిత్తార్. వెనుక దేవుణు ఇష్టమాతి వజ వరిజ్ వారె మజిబా సిత్తార్.

6 అందెజె తీతు మీ లోఇ మొదొల్స్తి లెకెండ, కనికారమ్దాన్ కిజిని యా పణి పూర్తి కిదెజ్ ఇజి మాపు వన్నిజ్ ఉసార్ కిబిస్తావ్.

7 మీరు విజు వన్కా లోఇ ముజాల మనికిదెర్. అహిజ దేవుణు మున్కు మని నమకమ్దు, మాటెజ వర్తిని దని లోఇ, గెణమ్దు, మహివరిజ్ సాయం కిదెజ్ మన్ని ఆసాదు, మా వందిజ్ మన్ని ప్రేమాదు ముజాల మన్ని లెకెండ నమ్మిత్తి వరి వందిజ్ సీని కనికారమ్దాన్ కిజిని యా పణిదుబా మీరు ముజాల మండ్రెజ్ వలె.

8 ఇక్క నాను మిజి ఉండ్రె ఆద్ర సిత్తి లెకెండ వెహ్వి, గాని సీదెజ్ ఇజి మహివరిజ్ మన్ని ఆసదిజ్ పొలిసి సుడఃతిజ, మీ మన్నుదు మని ప్రేమ ఎస్సా నిజమాతిక ఇజి నెస్టెజ్ ఇజి నాను వెప్తా.

9 మీరు మా ప్రబు ఆతి యేసుక్రీస్తు దయాదర్శమ్దిజ్ నెస్సిదెర్గదె? వాండ్రు గొప్ప అస్తి మన్నికాన్ గాని వాండ్రు మీ వందిజ్ బీదవాండ్రు ఆతాన్. ఎందనిజ్ ఇహిజ, మీరు అస్తి మన్నికిదెర్ అదెజ్ ఇజి వన్నిజ్ వాండ్రె బీదవాండ్రు కిబె ఆతాన్.

10 యా సజతిజ వందిజ్ మీరు యా లెకెండ కిత్తిజ బాగ మనాద్ ఇజి నాను ఒడిఃబిజిన. నీరోండు, యా లెకెండ కిదెజ్ ఆస మనికిదెరె అవండ, సీదెజ్బా మీరె ముజాహికిదెర్.

11 అందెజె, మీరు సీదెజ్ ఎలాగ ఆస అజినిదెరె, దనిజ్ తగితి లెకెండ, ఇహిజ మిజి కల్లితి మనిదనిజ్ తగితి లెకెండ సీజి యా పణి పూర్తి కిదు.

12 ఒరెన్ వన్నిజ్ సీదెజ్ ఇజి మన్ను మహిజ, అట్టి దన్నిజ్ ఇంక మిస్తి అవద్, గాని వన్నిజ్ మని దన్నిజ్ తగితి లెకెండ సిత్తిజ, అక్క దేవుణుదిజ్ ఇష్టమాతిక అజినాద్.

13 మహి వరిజ్ సులు అజిమంజి మిజి లావ్బరు మండ్రెజ్ ఇజి అవద్ గాని విజెరిజ్ ఉండ్రె లెకెండ బరు మన్నిద్ ఇజిని మాపు కోరిజినావ్.

14 ఏలు మిజి లావ్మనిక వరిజ్ అవ్సరమ్క వందిజ్ సిత్తిజ, వరిజ్ లావ్మన్నివలె మీ అవ్సరం వందిజ్ మర్తి సీనార్లె. అయాలెకండనె విజెరిజ్ ఉండ్రె లెకెండ మంజినాద్.

15 "లావ్ పెప్తా వన్నిజ్ ఇనిక మిగిల్లివితాద్. తక్కు పెప్తా వన్నిజ్ సాల్వండ అవితాద్".* ఇజి దేవుణు మాటదు రాస్తి మన్ని లెకెండనె.

16 మీ వందిజ్ మా మన్నుదు మన్ని ఆస లెకెండనె, దేవుణు తీతు మన్నుదుబా ఆస సిత్తి వందిజ్ నాను దేవుణుదిజ్ వందనమ్కు వెప్పినె.

* 8:15 8:15 నిర్ణయకాండం 16:8 ఇస్రాయేలు లోకుర్ అయ్యెగుప్తు దేసమ్దాన్ కనాను దేసం సాస్తి మహివలె, వారు బిడిఃజబామిదు 40 వంటిజ్ మహివలె మన్నునె వరిజ్ ముకెలమతి తిండి అత మహాద్. బిడిఃజ్ బూమిదు మహివలె వరిజ్ సరిఅతి తిండి సిల్వెద్ ఇజి వారు దేవుణు వెట సణజితార్. దేవుణు అగసమ్దాన్ వరిజ్ మన్ను సిత్తాన్. రోజు పెందల మన్ను వారు మన్నిబాన్, ఇజిరి బెల్లమలెకెండ బూమిదు అర్ని మహాద్. రోజు రోజుదిజ్ సరి అతిక అయ రోజుదునె దేవుణు వరిజ్ సీజి మహాన్. వారు కనాను దేసం అందిజ బాణక తిండి తినిదాక దేవుణు వరిజ్ మన్ను సీజి మహాన్. (యెహోసువ 5:12)

17 తీతు మాపు వెప్తాక విహాన్. అక్కాదె ఆవిండ వన్నిజ్ వాండ్రె ఆజి గొప్ప సర్దదాన్ మీ డగ్గు వాజినాన్.

18 సువార్త పణిదు విజు సజమ్కాజ్ వన్ని పణి వందిజ్ పేరు మనికాన్ ఆతి మరి ఒరెన్ తంబెరిబా వన్ని వెట పొక్కినావ్.

19 అక్కాదె ఆవిండ, ప్రబుజ్ పేరు వాదెజ్ ఇజిని మహి వరిజ్ సాయం కిదెజ్ మా మన్నుదు మన్ని ఆస తోరిస్తెజ్ ఇజినె మాపు కనికారమ్దాన్ కిజిని యా పణి కిజినావ్. యా సంత అసి మాపు సొనివలె, మా వెట వాదెజ్ ఇజి విజు సజమ్కు కూడేజి యా తంబెరిజ్ నె ఎర్లిస్త మనార్.

20 విజు సజమ్కు కూడేజి లోబం కివిండ సిత్తి యా సందదాన్ మాపు పణి కిత్తి వందిజ్ ఎయెరిబా మా మున్ను ఇని తపుబా వెహ్విండ గొప్ప జాగర్తదాన్ మనావ్.

21 అందెజె ప్రబు ఎద్దునె ఆవిండ లోకురి విజెరి ఎద్దుబా సరి ఆతికెజ్ కిదెజ్ జాగర్త మనావ్.

22 అక్కాదె ఆవిండ, వరివెట మరి ఒరెన్ తంబెరిజ్ బా పొక్కినావ్. నండో పణిజాణిజ్ నండో సుట్కు వన్నిజ్ పరిస కిజి వన్ని మన్నుది ఆస నెస్త మనావ్. ఏలు మీ వందిజ్ వన్ని మన్నుదు మని గొప్ప దయ్ రమ్దాన్ ఆస ఒద్దె పిరిజినాద్ ఇజి మరి నెసినావ్.

23 తీతు ఇహిజు, నా వెట మహికాన్, మీ నడిమి నా వెట జత కూడ్డి పణి కిత్తికాన్. వన్ని వెట వాజిని యా కూలెజ్ ఇహిజు, ఉండ్రె ఉండ్రె సజమ్కాణిజ్ వాతికార్. క్రీస్తుజ్ నెగ్గి పేరు తపిసినికార్.

24 అందెజె విజు సజమ్క ఎద్దు తోర్ని లెకెండ, విరిజ్ మీ ప్రేమ, మరి మీ వందిజ్ మాపు పొగిడిజిని దని వందిజ్ రుజువ్ కిజి తోర్నిస్తు.

9

1 నమ్మిత్తి వరి వందిజ్ కిజిని యా పణి వందిజ్ నాను మిజి రాస్తెజ్ అక్కర్ సిల్లెద్.

2 సాయం కిదెజ్ మీ మన్నుదు మని ఆస నాను నెసిన. అందెజె అక్కాయదికార్ ఆతి మీరు దేవుణు వందిజ్ సిదెజ్ ఇజి నీరుండ్రాన్ తయార్దాన్ మనిదెర్ ఇజి మీ వందిజ్ మాసిదోనియాది వరివెట పొగిడిజి వెప్పి మహావ్. మీ మన్నుదు మని ఆసదిజ్ నెస్తారె వరి లొఇ నండ్రెండ్రాన్ సిదెజ్ ఇజి ఉసార్ ఆజినార్.

3 మాపు మీ వందిజ్ పొగిడిజి వెప్తికెజ్ అర్థం సిల్లికెజ్ ఆదెజ్ ఆవిద్ ఇజి ఏలు యా తంబెరిజ పొక్కిన. నాను వెప్తా వజ సాయం సీజి పొక్తెజ్ తయార్ ఆజి మండ్రు.

4 ఉండ్రె వేలా మాసిదోనియాదికాన్ ఒరెన్ మా వెట వాతిజు, మీరు తయార్ అవిండ మనిక సుడేతిజు, మీ మున్ను మజి మని యా నమకం వందిజ్ అయావలె మజి సిగు వానాద్, మీరుబా సిగు ఆనిదెర్.

5 అందెజె, మీరు సీనావ్ ఇజి వెప్తా మనిక లోబం కివిండ ముజాలె తయార్ కిజి మండ్రెజ్ ఇజి యా తంబెరిజ మూజాల్ నె మీ డగ్గు సొండ్రు ఇజి వెప్పి పొక్తెజ్ ఇజి నాను ఒడిబిత. అహిజు మీరు సీనా ఇజి వెప్తా మనిక లోబమ్దాన్ సీని లెకెండ మన్విండ పూర్తి మన్నుదాన్ సీని సంత లెకెండ మంజినాద్.

దేవుణుదిజ్ లోబం కివిండ సర్దదాన్ సిదెజ్ ఇజి వెప్పినాన్.

6 తక్కు విత్తికాన్ తక్కునె పంట కొయ్యాన్. నండో విత్తికాన్ నండో పంట కొయ్యాన్. ఇజి గెపతం కిజి మండ్రు.

7 ఒరెన్ ఒరెన్, ఎస్సా సీన ఇజి వన్ని మన్నుదు నిర్ణెం కిత్తిలెకెండెనె సీదెజ్. అక్క-
నణజీఎండ, బలవంతమ్దాన్ ఆవండె సీదెజ్ వలె. ఎందనిజ్ ఇహిజ సర్దదాన్ సీని
వరిజ్ దేవుణు ప్రేమిసినాన్.

8 ఎస్తివలెబా మిజీ కావాలిస్తి దన్నిజ్ ఇంక లావ్ మండ్రెజ్ని, మరి విజు నెగ్గి పణిజ
వందిజ్ లావ్ సీదెజ్ మిజీ మండ్రెజ్, వన్ని దయాదర్మమ్దాన్ సీజిని దేవుణు ఇంక మరి
ఒద్దె మిజీ సీదెజ్ అట్టికాన్.

9 దిన్ని వందిజ్ దేవుణు మాటదు యాలెకెండె రాస్త మనాద్. “వాండ్రు దోసదాన్
కెప్పి విరివిత్తి ఇనాయమ్కు బీదాది వరిజ్ సీజినాన్. వన్ని నీతి నిజాయితి ఎలాకాలం
మంజినిక”.

10 విత్తి వన్నిజ్ విత్తుని ఉండెజ్ తిండి సీని దేవుణు సీజినాన్. మిజీ మా వాండ్రు
విత్తెజ్ విత్తు నీజి, మీరు విత్తికెజ్ నెగెండె పిరిప్పి లావ్ కిజి, మీరు కిజిని నీతి
నిజాయితి పణిజ్బా లావ్ కిబిస్సాన్.

11 విజు సజతిజి లొఇ మీరు లావ్ మన్నికిదెర్ కిబె ఆనిదెర్లె. అందెజె ఎస్తివలెబా
మహి వరి వందిజ్ లావ్ సీదెజ్ మీరు అట్టిదెర్. మీరు మిజీ సీజిని దనిదటాజ్ మాపు
మహివరిజ్ సీనివలె మా వెట దేవుణుదిజ్ వందనమ్కు వెహె ఆనాదెలె.

12 యా పణివెట నమ్మిత్తి వరి అవ్సరమ్కు తీరిసినికాదె ఆవండె దేవుణు వందిజ్
వెప్పిని వందనమ్కు మరి ఒద్దె లావ్ ఆజిన్.

13 యా పణిజాణిజ్ మీరు తగ్గికిదెర్ ఇజి రుజుప్ కిజినిదెర్. అందెజె మీరు
క్రీస్తు సువార్దదిజ్ ఒప్పుకోటి లొజిత్తి వందిజ్, మిజీ కల్గితి మన్నికెజ్ వరిజ్ని మహి
వరిజ్ విజెరిజ్ లోబం కిఎండె సీదెజ్ తయార్ ఆతి వందిజ్ వారు విజెరె దేవుణుదిజ్
పోగ్డిఃనార్లె.

14 వరిజ్ సాయం కిదెజ్ దేవుణు మీ మున్ను తోరిస్తి విజు దనిజ్ మిస్తి వన్ని దయా
దర్మం వందిజ్, మీ వందిజ్ పార్దనం కినివలె, మిజీ నుడెఃదెజ్ మన్నుదు ఆసదాన్
మంజినార్.

15 వెహెజ్ అట్ఇ నన్ని వరం సిత్తి దేవుణుదిజ్ వందనమ్కు!

10

1 ఏలు పవులు ఇని నాను బతిమాల్లిన. మీ వెట మనివలె నిపాతి మనికాన్ లెకెండె
గాని మీ బాణిజ్ దూరం మనివలె గటిజ మనికాన్ ఇజి మీరు ఒడెఃబిజిని నాను, క్రీస్తుజ్
మని సార్లిదాన్ని సాంతిదాన్ మిజీ బతిమాల్లిన.

2 మాపు లోకమ్దిజ్ సెందితి వరి లెకెండె నడిఃసినావ్ ఇజి మీ లొఇ నెగెండార్ మా
వందిజ్ వెప్పినిదెర్. ననివరి వెట నాను ఒడెఃబిని లెకెండె తెగిజి నండె గటిజ వర్గిదెజ్
అట్టు. గాని నాను వానివలె గటిజ వర్గిఎండె మంజిని లెకెండె మీరు మండ్రు ఇజి నాను
మిజీ బతిమాల్లిన.

3 యా లోకమ్దునె మపు బత్తిజినావ్ గాని లోకమ్ది వరి లెకెండె విదెం కినికావ్
ఆవ్పె.

4 మాపు విదెం కిని ఆయుదమ్కు యా లోకమ్దిజ్ సెందితి ననికెజ్ ఆఱ. గాని
సెఇ వన్నా పెరి ఎత్తుమని కోటెజ అర్పెజ్ దేవుణు బాణిజ్ వాతిమని సత్తుమని
ఆయుదమ్కు అక్కెజ్.

5 మాపు, దేవుణు వందిజ్ నెన్ ఎండ మండ్రెజ్ అడ్డు కినిలెకెండ మన్నుదాన్ రేజ్ జి వాజిని విజు వన్యాజ్ అడ్డిజి అరిప్పి, విజు ఆలోసనమ్మాజ్ అసి క్రీస్తుజ్ లోజిని లెకెండ కిజినావ్.

6 మీరు పూర్తి లోజిజి మంజినికిదెర్ ఆనిదాక, లోజివిండ మన్ని విజు వన్యా వందిజ్ మిజి సిక్కు సిదెజ్ తయార్ ఆత మనావ్.

7 మీరు వెల్లె మన్ని వనకాజ్ నె నుండేజినిదెర్. ఎయెన్ బా వాండ్రు క్రీస్తుజ్ సెందితికాన్ ఇజి ఒండేబిజి మహిజ, వాండ్రు ఎలాగ క్రీస్తుజ్ సెందితికాన్ ఆజి మంజినాండ్రో, అయాలెకెండనె మాపుబా క్రీస్తుజ్ సెందితికావ్ ఇజి వాండ్రు ఒండేబిదెజ్ వలె.

8 మీ బత్తు. నాసనం కిదెజ్ ఇజి సిల్లెద్ గాని దన్నిజ్ నెగెండ పిరిప్పెజ్ ఇజి ప్రబు మజి అతికారం సిత్త మనాన్. అయ అతికారం వందిజ్ నండో పొగ్డిజి వెప్పాజ్ బా నాను సిగు ఆవ్.

9 నాను మిజి రాసిని ఉత్తమ్దాన్ మిజి తియెల్నిని వన్ని లెకెండ మండ్రెజ్ ఆవద్ ఇజి కోరిజిన.

10 “వన్ని ఉత్తమ్కు గొప్ప అర్థం మన్ని మాటెజ్ మన్నికెజ్, సత్తుదాన్ కూడితికెజ్ గాని వాండ్రు మా నడిమి మనివలె సత్తు సిల్లి వన్ని లెకెండ మనాన్. వర్గిజిని మాటెజ్ ఇని అర్థం సిల్లికెజ్ మన్నె”, ఇజి ఎయెరో వెప్పిన్ నార్ గి.

11 యాలెకెండ వెప్పినికార్ యాక నెస్తెజ్. ఇనిక ఇహిజ మాపు దూరం మనివలె రాసిని ఉత్తమ్దు మన్ని మాటెజ్ ఎలాగ మర్రికెజ్ నో, అయాలెకెండనె మీ నడిమి మాపు మన్నివలె మాపు కిని పణిజ్ బా మంజినె.

12 వరిజ్ వారె పొగ్డిజి ఆజిని సెగొండార్ లెకెండ మాపుబా మనావ్ ఇజినో, మాపు వరిజ్ సమానం ఆతికావ్ ఇజినో వెప్పాజ్. ఎందనిజ్ ఇహిజ, వారు మహి వరి వెట విజు సజతిజ లోఇ సమానం మనానా ఇజి పోలిసి నుండేజినార్. అయాక బుద్ది సిల్లి పణినె.

13 గాని మజి అక్కు మనిదనిజ్ ఇంక మాపు పగ్డిజి ఆవప్. దేవుణు మా వందిజ్ కేట కిత్తి మన్ని పణిదిజ్ జవ డాట్ విండ దన్ని లోఇనె పొగ్డిజినావ్. మాపు మీ నడిమి కిజిని పణిబా దన్ని లోఇ మనాద్.

14 మాపు క్రీస్తు వందిజ్ సువార్త సాటిసి మీ డగ్రు వాతివలె దేవుణు మజి ఒపజెప్పి మన్ని దనిజ్ జవ డాట్టి సానికావ్ ఆవతావ్. ఎందనిజ్ ఇహిజ మీరు దన్ని లోఇనె మన్నిదెర్. మాపె క్రీస్తు సువార్త ముజాల మీ నడిమి సాటిస్తావ్.

15 మహికార్ కన్టబాండేజి కిత్తి దన్ని లోఇ వంతు మనికావ్ ఇజి మాపు పొగ్డిజివప్. గాని దేవుణు మున్ను మన్ని మీ నమకం పిరిజి వానివలె మీ నడిమి మాపు కిజిని సువార్త పణి మరి ఒద్దె పెరిక ఆజి సర్నాద్ ఇజి మాపు ఆస ఆజినావ్.

16 మీ అతాల మని నాహ్మాజ్ బా సువార్త సాటిస్తెజ్ ఇహిజ అట్నావ్. అయాలెకెండ కిజి ఒరెన్ వన్నిజ్ ఒపజెవె ఆతిమని ప్రాంతమ్దు కిబె ఆతి పణి వందిజ్ మజి మాపె పొగ్డిజి ఆవప్.

17 గాని దేవుణు మాటదు రాస్తి మన్ని లెకెండ, “పొగ్డిజి ఆజినికాన్ ప్రబు కిత్తి వనకాజ్ వందిజ్ నె పొగ్డిజి ఆదెజ్ వలె”

18 వన్నిజ్ వాండ్రె పొగ్డిజి ఆనికాన్ తగ్గికాన్ ఆవెన్, తగ్గికాన్ ఇజి దేవుణు వెప్పికాండ్రె తగ్గికాన్ ఆజినాన్.

11

1 నా బుద్ది సిల్లి పణిజ్ మీరు కండెక్ ఓరిసినిదెర్ ఇజి నాను ఆస ఆజిన, నిజమె

ఏలుబా మీరు ఓరిసినిదెర్.

² మీ వందిజ్ దేవుణు మన్నుదు మన్ని ఆస వజనె నానుబా మీ వందిజ్ అయాలెకెండెన నత్తు మన్ని ఆసదాన్ మంజిన. ఎందనిజ్ ఇహిజ, ఒరెన్ దజడః వందిజ్ నాను మిజి ప్రదానం కిత్త మన్ను. అహిజ, క్రీస్తు వందిజ్ నాను మిజి ఇని కల్తిసిల్లి ఉండ్రీ విడిఃబోదెలి లెకెండె వన్నిజ్ ఒపజెప్త మన్ను.

³ గాని సరాస్ వన్ని సెఇ ఆలోసనమ్దాన్ అవ్వెజ్ మోసెం కిత్తి లెకెండె, మీ మన్నుబా తపు బోదెజాణిజ్ మోసెం కిబె ఆజి, మీరు క్రీస్తు మున్ను మిజి మన్ని ఇని కల్తిసిల్లి ప్రేమ డిఃసి సీజి, వన్ని బాణిజ్ దూరం ఆనిదెర్లె, ఇజి నాను తియెల్ ఆజిన.

⁴ ఎందనిజ్ ఇహిజ, ఎయెన్బా మీ డగ్రు వాజి మాపు సాటిన్తి యేనుజ్ ఆవండె మరి ఒరెన్ యేనుజ్ సాటన్తిజ, మరి మా వెట మీరు పొందితి మని దేవుణు ఆత్మ ఆవండె మరి ఉండ్రీ ఆత్మ పొందితిజ, అక్కాదె ఆవండె మాపు వెహ్టా సువార్త ఆవండె మరి ఉండ్రీ సువార్త డగ్రు కిత్తిజ, సులుగ మీరు వన్నాజ్ లోజిజి వరిజ్ ఒరిసినిదెర్.

⁵ అయ గొప్పు పేరు పొందితికార్ ఆతి అపొస్తురు ఇంక నాను ఒద్దె తక్కుదికాన్ ఆవి ఇజి నాను ఒడఃబిజిన.

⁶ నాను నెగెణ్ వర్గిదెజ్ నెన్ఇకాన్ ఆతిజ్బా, గాని నాను గెణం సిల్లిక ఆవి. మిజి విజేరిజ్ విజు పణిజాణిజ్, విజు మాటెజాణిజ్ మాపు అయ గెణం వందిజ్ రుజుప్ కిజి తోరిస్త మనావ్.

⁷ మీ బాణిజ్ ఇనికబా లోన్వండె దేవుణు సువార్త మీ నడిఃమి సాటిసి, మీరు పెరికిదెర్ ఆదెజ్ ఇజి నజి నానె తగె ఆతివలె నాను పాపం కిత్తానా?

⁸ మీ నడిఃమి దేవుణు పణికిదెజ్ మహి సజమ్కాణిజ్ వరి డబ్బుజ్ డొజ కిత్తి లెకెండె వరి బాణిజ్ కూల్లి లొసె ఆత.

⁹ నాను మీ నడిఃమి మహివలె, ఇనికబా అవ్సరం ఆతిజ్బా, నాను ఎయెరిజ్బా ఇనికబా లోన్విత. మాసిదోనియదాన్ వాతి తంబెరిజ్ నా అవ్సరమ్కాజ్ వందిజ్ సిత్తార్. మీ బాణిజ్ ఇనికబా లోన్వండె, నాను మిజి ఉండ్రీ బరు లెకెండె మన్వండె జాగర్దదాన్ మహి లెకెండెనె వాని కాలమ్దుబా మంజిన.

¹⁰ క్రీస్తుజ్ మని నిజం నా లోఇ మన్నిజ్ అక్కాయ ప్రాంతమ్దు మనికార్ ఎయెర్బా నాను యా లెకెండె పొగడిఃజి వెహ్టాని దనిజ్ అడ్డు కిదెజ్ అట్వర్.

¹¹ ఎందనిజ్ నాను అయాలెకెండె మహ ఇహిజ, మిజి ప్రేమిన్ఇ వందిజ్ ఆవిద్. నాను మిజి ఎస్సొ ప్రేమిసిన ఇజి దేవుణు నెసినావ్.

¹² గాని ఏలు కిజిని లెకెండెనె నాను దేవుణు పణి కిజి మంజిన, అందెజె మాపు కిజిని లెకెండెనె వారుబా దేవుణు పణి కిజినార్ ఇజి వెహ్టాజ్ ఇజి ఆస ఆజిని వరిజ్ మా వెట పొగడిః ఆదెజ్ అక్కు సిల్లెండె మన్వద్ ఇజి.

¹³ వారు నన్నికార్, క్రీస్తుజ్ అపొస్తురు లెకెండె వేసం పొకె ఆజి తోరె ఆతిమని మోసెం పణిజ్ కిజిని మిజి మోసెం కిత్తి డొజ అపొస్తురు.

¹⁴ దన్ని వందిజ్ బమ్మ ఆదెజ్ అక్కర్ సిల్లెద్. సయ్యానుబా జాయ్ మని దూత లెకెండె వేసం పొకె ఆనాన్.

¹⁵ అందెజె సయ్యాను వందిజ్ పణి కినికార్, వారు వరిజ్ వారె నీతి నిజాయితి పణిజ్ కినివరి లెకెండె వేసం పొకె ఆతిజ అక్కు పెరిక ఆవిద్. వారు కిజిని పణిజ తగితి లెకెండెనె ఆకార్దిజ్ వరిజ్ జర్గినాద్లె.

పవులు వన్నిజ్ వాతి కస్టమ్కాజ్ వందిజ్ పొగడిఃజినావ్.

16 నాను బుద్ధి సిల్లికాన్ ఇజి ఎయెన్బా ఒండేబిదెజ్ అవిద్ ఇజి నాను మరి మిజీ వెప్పిన. నాను బుద్ధి సిల్లికాన్ ఇజి మీరు ఒండేబిత్తిజ ఆహా ఒండేబిదు. అందెజె నానుబా కండెక్ పొగ్గడె: ఆదెజ్ అట్టు.

17 యాలెకెండె నా మన్నుదు దయరం ఆజి పొగ్గడె:జినివలె, అక్క ప్రబు మాటెజ్ వర్గితి లెకెండె అవి, ఉండ్రీ బుద్ధి సిల్లివన్ని లెకెండె వర్గిజన.

18 సంఠెండార్ యా లోకమ్దిజ్ సెందితి వరి లెకెండె పొజీజినార్, అందెజె నానుబా అయా లెకెండెనె పొజీజిన.

19 మీరు గొప్ప బుద్ధి మన్నికిదెర్గె. మీరు బుద్ధి సిల్లివరిజ్ నర్దదాన్ డగ్రు కిజినిదెర్.

20 ఒరెన్ మిజీ వెట్టిపణి కిని వన్ని లెకెండె కిత్తిజబా, ఒరెన్ మోసం కిజి మిజీ మన్నికెజ్ విజి లోసె ఆతిజబా, ఒరెన్ మిజీ మోసం కిజి వన్నిజ్ లాబం తప్పిస్తీజబా, మీ మొకొమ్దు డెయ్లిజబా మీరు వన్నిజ్ ఓరిసినిదెర్.

21 అయా లెకెండె వారు కిత్తి లెకెండె కిదెజ్ మాపు సత్తు మనికాప్ అవిప్ ఇజి నాను సిగు ఆజి వెప్పిన. గాని ఎయెన్బా ఇనిదన్ని వందిజబా పొగ్గడె: ఆదెజ్ అక్క మనాద్ ఇహిజ, నజీబా అయాలెకెండె పొగ్గడె: ఆదెజ్ అక్క మనాద్. నాను ఒరెన్ బుద్ధి సిల్లి వన్ని లెకెండెనె వర్గిజన.

22 వారు ఎబ్రివారునా? నానుబా ఎబ్రి వాండ్రునె. వారు ఇస్రాయేలుదికారా? నానుబా ఇస్రాయేలుదికానె. వారు అబ్రాహము కుటుమ్దికార్రా? నానుబా నన్నికాండ్రె.

23 వారు క్రిస్తు వందిజ్ పణి కినికారా? నాను వెరి వన్ని లెకెండె వర్గిజన. నాను క్రిస్తు వందిజ్ మరి ఒద్దె పణి కిత్త మన్ను. నాను నండో కస్టబాడె:జి పణి కిత్తమన్ను. నండో సుట్టు జెలిదు మహా. కొండె:జాణిజ్ నండో సుట్టు గొప్ప డెయె ఆత. నండో సుట్టు సావుదిజ్ డగ్రు ఆత.

24 యూదురు లోకుర్ బాణిజ్ అయ్దు సుట్టు, ఉండ్రీ తక్కు నలపయ్ దెబ్బెజ్ తిహా.

25 మూండ్రీ సుట్టు డుడ్డుదాన్ డెయె ఆత. ఉండ్రీ సుటు పణకాణిజ్ డెయె ఆత. మూండ్రీ సుట్టు సందరమ్దు పయనం కిజి మహిజ్ ఒండెజ్ పెండె:హిజ్ బాద ఆత. ఉండ్రీ రెయు పొగ్గెల్ సందరమ్దు ఏరుదు మహా

26 ఎస్తివలెబా నాను పయనం కిజి మహిజ్ నండో సుట్టు పయనమ్దు పెరి గడ్డెజాణిజ్ ప్రమాదమ్కు వాతె. డొజారిజు వెట ప్రమాదమ్కు వాతె. మా సొంత జాతిదికారాతి యూదురి వెట ప్రమాదమ్కు వాతె. పట్టుమ్దు ప్రమాదమ్కు వాతె. అడి:విదు ప్రమాదమ్కు వాతె. సందరమ్దు ప్రమాదమ్కు వాతె. డొజ తంబెరిజ వెట ప్రమాదమ్కు వాతె.

27 నాను నండో కస్టమ్దాన్ స్రమెజాణిజ్ పణిజ్ కిజి, రెయ్యు నిద్ర సిల్లెండె మహా. ఏక, ఏక తిండి సిల్లెండె బజి ఎప్పిదాన్ మహా. ఒండోల్దు సొక్కెజ్ సిల్లెండె పిన్నిదు నిగసాణె మహా.

28 యాకెజె ఆవిండ విజు దేవుణు సజమ్కాజ్ వందిజ్ ఎలాగ ఆనెనో ఇజి రోజు మన్నుదు ఒండేబిజి మహా.

29 సత్తు సిల్లికాన్ ఎయెన్ మనాన్? నానుబా సత్తు సిల్లికాన్ అవినా? ఎయెన్ పాపమ్దు తొరొడె ఆజినానా? నజీ మన్నుదుబా కోపం రెజె అవిదా?

30 నాను పొగ్గడె: ఆదెజ్వలె ఇహిజ నజీ మన్ని సత్తు సిల్లి వన్నా వందిజెనె నాను పొగ్గడె:నాలె.

31 నాను వర్గజనిక అబద్ధం ఆవిద్ ఇనిదన్నిజ్ ఎస్తివలెబా పొగిడెః ఆజని మా ప్రబువాతి యేసుజ్ బుబ్బాతి దేవుణునె నెసినాన్.

32 దమస్కు పట్టుమ్దు నాను మహివలె, రాజు ఆతి అరెత అడిఃగి మన్నికానాతి అదికారి నజీ అస్తజ్ ఇజి దమస్కు పట్టుం విజు కాపు ఇడ్తాన్.

33 నస్తివలె పట్టుమ్ది కోట గోడాఃదు మన్ని కిటికి బొరొదాన్, గంపదు డిఃపె ఆతానె వన్ని కియుదాన్ తప్రె ఆత.

12

1 పొగిడిఃజి వర్గిదెజ్ ఇహిజ మరి నండొ మన్నె. వహ్ని దన్నిజ్ ఇని లాబం సిల్లిజ్బా దేవుణు బాణిజ్ తోరె ఆతి కలెజు వందిజ్, డాఃజితి మన్నికెజ్ దేవుణు తోరిస్తి వందిజ్ నాను వెహ్న.

2 క్రీస్తుజ్ సెందితికాన్ ఒరెన్ వన్నిజ్ నాను నెసిన. పదనాల్లి పంటిజ్ ముజాల వాండ్రు మూండ్రీ ఆగాసం దాక పెరె ఆతాన్. ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెన్వి. అక్క దేవుణునె నెసినాన్.

3 పరదీసు ఇని దేవుణు మంజిని బాడిఃదాక పెరె ఆతి ఒరెన్ వన్నిజ్ నాను నెసిన. వాండ్రు ఒడొల్దాన్ పెరె అతాండ్రొ, ఒడొల్ సిల్లెండ పెరె అతాండ్రొ ఇజి నాను నెన్వి. అయాక దేవుణు నెస్నాన్.

4 అబ్బె వర్గిదెజ్ అట్ఇ నన్ని సజతిజ్ వెహ్న్. లోకు ఎయెన్బా వన్ని వెయుదాన్ అయ మాటిజ్ వర్గిదెజ్ అక్కు సిల్లెద్.

5 నని ఒరెన్ వన్నిజ్ పొగిడిఃజి నాను వర్గిన గాని నజీ నానె పొగిడెః ఆవి. నాను పొగిడెః ఆదెజ్ ఇహిజ నజీ మన్ని సత్తు సిల్లి వన్కా వందిజ్నె పొగిడెః ఆన.

6 నాను పొగిడిఃదెజ్ ఇజి ఒడొఃబిత్తిజు, నిజం మనికెన్నె వెహ్న. అందెజె నాను బుద్ది సిల్లికాన్ ఆవి. ఎందనిజ్ ఇహిజ నాను కిత్తికెజ్ సుడొఃజినొ, నాను వర్గినికెజ్ వెంజినొ, నాను మన్ని దనిజ్ ఇంక ఒద్దె పెరికాన్ ఇజి నా వందిజ్ ఎయెన్బా ఒడొఃబివిండ మండ్రెజ్ ఇజి నాను పొగిడిఃవి.

7 దేవుణుది డాఃజితి మన్ని గొప్ప పెరి సజతిజ్ నజీ తోరె ఆతి వందిజ్, నజీ నానె పెరిక ఇజి ఉవి ఆవిండ మండ్రెజ్ ఇజి నజీ బాద కిదెజ్ ఇజి నా ఒడొల్దు ఉండ్రీ సాంపు ఇడ్డెః ఆతి లెకెండ ఒరెన్ సయ్నాను దూత నా డగ్రు పొకె ఆత మనాన్.

8 అయాక నా ఒడొల్దాన్ లగిజి విసిరెఅ ఇజి నాను ప్రబు వెట మూండ్రీ సుట్కు బత్తిమాలిత.

9 గాని వాండ్రు నజీ, “నా దయా దర్మం నిజీ ఆనాద్, సత్తు సిల్లిబాన్ నా సత్తు పూర్తి సత్తు మనిక ఆజినాద్”, ఇజి వెహ్నాన్. అయావలె నజీ సత్తు సిల్లి వన్కా వందిజ్ మరి ఒద్దె సర్దదాన్ పొగిడిఃనాలె అందెజె క్రీస్తు సత్తు నా ముస్కు నిల్లి మంజినాద్.

10 ఎస్తివలె నాను సత్తు సిల్లికానొ, నస్తివలె నాను సత్తుదికాన్ ఆజినాన్. అందెజె క్రీస్తు వందిజ్ నజీ మన్ని సత్తుసిల్లి వనక వందిజ్, నిందెజు వందిజ్, కస్టమ్కు వాతి వందిజ్, హిమ్సెజు వందిజ్, స్రమెజు వందిజ్ నాను సర్ద ఆజిన.

11 నాను బుద్దిసిల్లి వన్నిలెకెండ మన, అయా లెకెండ మండ్రెజ్ ఇజి మీరె నజీ బలవంతం కిత్తిదెర్. నాను తగ్గికాన్ ఇజి మీ బాణిజ్ వెహె ఆదెజ్ నజీ అక్కు మనాద్. ఎందనిజ్ ఇహిజ, నాను ఎపటిదికాన్ ఆఇజ్బా, మీ గొప్ప పేరు పొందితి అపొస్తురు ఇంక తక్కుదికాన్ ఆవి.

12 నాను ఎస్సానో ఓర్బుదాన్ మీ నడిమి తోరిస్తే మన్ని బమ్మాతి పణిజ్, ఎసెజ్బా తోఇ పణిజ్, బమ్మాని గొప్ప పణిజ్ నాను అపొస్తుడు ఇని దన్నిజ్ రుజుప్ కిజినె.

13 ఇనిదన్ని వందిజ్బా నాను మీ ముస్సు ఆదారం ఆవత. ఇక్కదె ఆవిండ మరి ఇని సజతిదుబా మీరు మహి సజమక ఎద్దు తక్కుదికిదెర్ ఆఇతిదెర్. నాను కిత్తి యా తపు మీరు నెమిస్తు.

14 ఏలు మూండ్రి సుట్టు మీ డగ్గు వాదెజ్ ఇజి తయారాజిన. నాను వాతివలె ఇనిదన్ని వందిజ్బా నాను మీ ముస్సు ఆదారం ఆవి. ఎందనిజ్ ఇహిజ మిజి కల్లితి మన్నికెజ్ ఇనికబా నజి అవ్సరం సిల్లెద్, గాని మీరె నజి కావాలి. కొడోర్ అయ్సి అపొస్సిర్ వందిజ్ ఆవిద్, గాని అయ్సి అపొస్సిరెనె కొడోర్ వందిజ్ ఆస్తి గణస్తెజ్గదె.

15 అందెజె నాను నజి కల్లితి మన్నికెజ్ విజు మీ వందిజ్ కర్పు కిన. మరి నజి నానె మీ వందిజ్ కర్పు కిబె ఆన. నాను మిజి లావు ప్రేమిస్తిజ మీరు నజి తక్కు ప్రేమిసినిదెరా?

16 నాను ఇనిదన్ని వందిజ్బా మీ ముస్సు ఆదారం ఆవి, అక్క నిజమె. గాని ఇనికాదో ఉండ్రి ఉపాయ్కిజి మిజి మొసెం కిజి లొసె ఆనాలె ఇజి ఎయెర్బా వెహ్నాలె.

17 నాను మీ డగ్గు పొక్తి ఎయెర్ వెటబా మిజి మొసెం కిజి ఇనికబా లొసె ఆత మనానా?

18 మీ డగ్గు సొండ్రెజ్ ఇజి తీతుజ్ నాను బతిమాలిత. వన్నివెట మా తంబెరి ఒరెన్ వన్నిజ్బా పొక్త. తీతు మిజి మొసెం కిజి ఇనికబా లొసె ఆతాండ్రా? మాపు ఉండ్రె మన్సుదాన్, ఉండ్రె లెకెండెనె నడివతాపా?

19 మాపు నెగ్గికాప్ ఇజి మీ ఎద్దు తోరిస్తెజ్ ఇక్కెజ్ విజు మీవెట వర్గిజినాప్ ఇజి మీరు ఒడోబిజినిదెరా? క్రిస్తుజ్ సెందితికిదెర్ ఇజి దేవుణు ఎద్దునె మాపు వర్గిజినాప్. మా తంబెరిజాండె, మీరు మీ మన్సుదు నెగెండ్ దేవుణు సత్తుదాన్ మండ్రెజ్ ఇజినె యాకెజ్ విజు మాపు కిత్తాప్.

20 నాను వానివలె మీరు నజి ఇస్టమాతికిదెర్ లెకెండ మన్ఇదెర్ను, మరి మిజి ఇస్టమాతి లెకెండ నానుబా మన్ఎను ఇజి నాను తియెలాజిన. మరి మీ నడిమి జటిజ్, గోస ఆనికెజ్, కోపం ఆజి మంజినిక, గుంపుజ్ గుంపుజ్ ఆనికెజ్, దుసలాడోనికెజ్, గుసగుస వర్గినిక, పొజిజి ఉబె ఆనిక, గగోలి ఆనిక విజు మంజినెను ఇజి నాను ఒడోబిజిన.

21 మరి నాను మీ డగ్గు వానివలె మీ ఎద్దు దేవుణు నా బుర్ర డిప్పిని లెకెండ కినాస్టెను ఇజి నాను తియెలాజిన. మరి ముజుల వరిజ్ అలవాటు మహిలెకెండ సెఇ పణిజ్ కిజి, కేలార్ బూలాజి, రంకు బూలాజి విజెరె ముందాల సిగు ఆజి మంజిని వందిజ్ మరి వారు దుకమాజి పాపమకు ఒప్పుకొడోజి డిసిసివిండ మన్ని వందిజ్ నాను దుకం ఆనాలె ఇజి తియెలాజిన.

13

1 ఏలు నాను మీ డగ్గు వానివలె ఇక కూడుప్పి మూండ్రి సుట్టు ఆనె. దేవుణు మాటదు రాస్తిమని లెకెండ, "రిఎర్, ముఎర్ సాసిరి మాటెజ వెట విజు సజతిజ్ నిజమాతికెజ్ ఇజి రుజుప్ కిదెజ్వలె".

2 రుండి సుట్టు నాను వాతిజ్ మీవెట మహివలె నాను మిజి బుద్ధి వెప్తి లెకెండెనె వెహ్తా మన. ఏలు మీబాణిజ్ దూరం మంజిబ వెప్పిన. నాను మర్జి వానివలె

ముందాహాన్ తపు కిత్తి వరిజ్బా నాను డిఃన్ ఎ, వెనుక తపు కిత్తి విజెరిజ్ ఎయెరిజ్ బా డిఃన్ ఏ.

³ ఎందనిజ్ ఇహిజ క్రీస్తు నావెట వర్గజినాన్ ఇని దనిజ్ రుజుప్ కిఅ ఇజి మీరు వెప్పినిదెర్ గదె? వాండ్రు మీ వెట సత్తు సిల్లికాన్ ఆవన్, గాని మీ నడిఃమి గొప్ప సత్తుమన్నికాన్.

⁴ క్రీస్తు యా బూమి ముస్సు మహివలె సత్తు సిల్లివన్ని లెకెండ్ సిలువ పొకె ఆతాన్, యాక నిజమనె. గాని దేవుణు సత్తుదాన్ ఏలు బత్తిజినాన్. అయాలెకెండ్ నె వన్నివెట కూడఃజి మాపుబా సత్తు సిల్లికాప్ గాని దేవుణు సత్తుదాన్ మీ వందిజ్ దేవుణు పణి కిదెజ్ క్రీస్తు వెట కూడఃజి బత్తిజినాప్.

⁵ మీరు దేవుణు ముస్సు నమకం మనికిదెరో ఇజి మిజి మీరె పరిస కిబె ఆదు. యేసుక్రీస్తు మీ లొఇ మనాన్ ఇజి మీరు నెన్ ఇదెరా? యేసుక్రీస్తు మీ లొఇ మనాన్ ఇజి నెన్ ఇదెర్ ఇహిజ, నిజమె మీరు అర్తిమనికిదెర్.

⁶ మాపు అయాలెకెండ్ అర్తికాప్ ఆవన్ ఇజి మీరు నిజం నెప్పిదెర్ ఇజి నా మన్నుదు నజి నమకం మనాద్.

⁷ మీరు ఇని సెఇ పణిజ్ కిఎండ మండ్రెజ్ వలె ఇజి దేవుణుదిజ్ పార్దనం కిజినాప్. మాపు పరిసెజ నిల్సి మంజినికాప్ ఇజి లోకుర్ ఎద్దు తొరె ఆదెజ్ ఇజి సిల్లెద్. గాని మాపు వీజితికాప్ ఇజి తొరె ఆతిజ్ బా మీరు నిజమాతికెజ్ కిజి మండ్రెజ్ ఇజి కోరిజినాప్.

⁸ నిజమాతికెజ్ నె ఆవండ, నిజమాతి దనిజ్ పడిఃఎండ ఇనికబా కిదెజ్ మాపు అట్టవన్.

⁹ మాపు సత్తు సిలికాప్ మనివలె, మీరు సత్తు మనికదెర్ ఇజి మాపు సర్దదాన్ మనాప్. అక్కాదె ఆవండ మీరు దేవుణు ఎద్దు ఇనికబా తకు సిల్లెండ విజు నెగెణ్ మనికిదెర్ ఆదెజ్ ఇజి మాపు పార్దనం కిజినాప్.

¹⁰ మిజి దేవుణు ముస్సు మని నమకమ్ దు పిరిప్పెజ్ నె ప్రబు నజి అతికారం సితాన్ గాని మిజి అర్పెజ్ ఇజి సిల్లెద్. అందెజె నాను మీ డగ్రు వానివలె ప్రబు నజి సతిమని అతికారమ్ దాన్ కోపమ్ దాన్ గటిజ ఇనికబా కిఎండ మండ్రెజ్ ఇజినె మీ బాణిజ్ దూరం మంజి యా ఉత్తం రాసిన.

¹¹ కడఃవెరిదు, తంబెరిజాండె, మీరు సర్దదాన్ మండ్రు. మీరు మరి ఒద్దె నెగెణ్ మనికిదెర్ ఆదెజ్ ఇజి దేవుణుదిజ్ సర్ద కిదెజ్ మిజి అట్టి లెకెండ్ విజు సజతిజ్ కిదు. ఓదర్పుదాన్ మండ్రు. మా మాటెజ్ మీ మన్నుదు నాటిసి మండ్రు. విజిదెరె ఉండ్రె మన్నుదాన్ మండ్రు. సమాదానమ్ దాన్ బత్తిదు. ప్రేమని సమాదనం మనికానాతి దేవుణు మీవెట మంజినాన్.

¹² నెగ్గి మన్నుదాన్ ఒరెన్ మరి ఒరెన్ వన్నిజ్ పొంపిజి మాడిఃసి మండ్రు.

¹³ ఇబ్బెణికార్ నమ్మిత్తికార్ విజెరె మీరు బాగ మనిదెరా ఇజి వెన్ బాజినార్.

¹⁴ ప్రబువాతి యేసుక్రీస్తు దయా దర్మం, దేవుణు ప్రేమ, దేవుణు ఆత్మ మీవెట కూడఃజి మంజినిక, మీ విజిదెరె వెట మనీద్.

అపొస్తుడు ఆతి పవులు గలాతీయ ముటాదు మని దేవుణు సజమ్కాజ్ రాస్తి ఉత్తం

నెల్వ కిబిసినిక

అపొస్తుడు ఆతి పవులు గలాతీయ ముటాదు మని దేవుణు సజమ్కాజ్ రాసిని ఉత్తరమ్నె యాక. గలాతీయ ముటాదు పవులునె సువార్త వెహ్తాన్. మీరు నెగ్రెండనె క్రీస్తుజ్ నమ్మిజి వాజి మహార్. నస్తివలె నెగ్రెండార్ నమ్మితి యూదురు, క్రీస్తు మున్ను మని నమకమ్నె ఆవిండ, యూదురి రూలుజ్ లోజిజి, సునతిబా కిబె ఆదెజ్ వలె ఇజి తప్ప బోద వరిజ్ వెహ్తార్. యా మాట వెహరె, విరి మన్ను అయా బోద దరోట్ మహ్తార్. దినిజ్ దిదిజి పవులు రాసిని ఉత్తమ్నె యాక. ఒరెన్ సునతి కిబె ఆతిజ, దేవుణు ఎద్రు నీతి నిజాయితి మనికాన్ ఆవెన్. గాని యేసుప్రబు మున్ను నమకం ఇట్టిజనె దేవుణు ఎద్రు నీతి నిజాయితి మనికాన్ ఆనాన్ ఇజి వెహ్సినాన్. మరి, మాటు క్రీస్తుజ్ నమ్మితివలె డిబె ఆతి మని వరి లెకెండె మనాట్, అక్కు మని వరి లెకెండె మనాట్. రూలుజ అడిగి మన్ఎట్ ఇజి వెహ్సినాన్. మరి, ఒడోల్ది సెఇ ఆనెజ్ కిబిస్సి పణిజ్ ఇని ఇనికెజ్, దేవుణు ఆత్మ నడిః పిసిని వజ నడిఃనికాన్ ఎలాగ మంజినాన్ ఇజి బా వెహ్సినాన్.

1-2 అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాజ్ రాసిని ఉత్తం. నెగ్రెండార్ నజి అపొస్తుడు ఇజి ఏర్పాటు కిత్తిజ్ నాను అపొస్తుడు ఆవిత. ఒరెన్ లోకు నజి అపొస్తుడు ఇజి పోక్తిజ్ నాను అపొస్తుడు ఆవిత. గాని యేసు క్రీస్తుని బుబ్బాతి దేవుణు నజి అపొస్తుడు ఇజి ఏర్పాటు కిత్తి పోక్తిజ్నె నాను అపొస్తుడు ఆత. వాండ్రె యేసుక్రీస్తుజ్ సావుదాన్ మర్జి బత్కిస్తాన్. నానుని నా వెట ఇబ్బె మని దేవుణుదిజ్ నమ్మితి తంబెరిబు, అబ్బె మని సజమ్కాణి విజెరిజ్ వెన్బాతి లెకెండె వెహ్సినార్.

3 మా బుబ్బ ఆతి దేవుణుని ప్రబు ఆతి యేసుక్రీస్తు దయ దర్మమ్దాన్, మీరు నిపాతిదాన్ మండ్రెజ్ సాయం కిపిర్.

4 మాటు కిత్తి తప్ప పణిజ్ మజి తప్సిన్జె, యా లోకమ్దు మని సెఇ బాణిజ్ డిస్సిన్జెజ్ క్రీస్తు మా పాపమ్క వందిజ్ వన్నిజ్ వాండ్రె ఒపజెవె ఆతండ్రె సాతాన్. మా బుబ్బ ఆతి దేవుణు ఎత్తు కిత్తి వజనె వాండ్రు యా లెకెండె మా వందిజ్ సాతాన్.

5 దేవుణుదిజ్ అంతు సిల్లెండ ఎలాకాలం గవరం మనీద్. ఆమెన్.

సువార్త ఉండ్రె. మరి ఉండ్రె సిల్లెద్.

6 నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిఃసి సీజినిదెర్ ఇజి నాను నండో బమ్మ ఆజిన. క్రీస్తు దయ దర్మమ్దాన్ మిజి సీజిని కొత్త బత్కుదిజ్నె, దేవుణు మిజి కూక్తాన్. వన్నిజ్ డిఃస్తిదెరె, సువార్త ఇజి పేరు వెహె ఆజిని తప్ప బోదదు మన్ను ఇడఃజినిదెర్ ఇజి నాను నండో బమ్మ ఆజిన.

7 నాను నిజం వెహ్సిన, అయాక క్రీస్తు వందిజ్ తోరిసి నెస్సినిని సువార్త ఆవెద్. గాని నెగ్రెండార్ మిజి పంర కిబిసి, అయా సువార్త మారిస్టెజ్ సుడఃజినార్.

8 గాని అపొస్తలులు ఆతి మాపునో, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెప్తి సువార్త ఆవిండ, దినిజ్ వెత్తెకం ఆతి సువార్త మిజి వెప్తిజ, దేవుణు సాయిపు వన్ని ముస్సు ఎలాకాలం మనీద్.

9 మాపు ముజాలె మిజి వెప్తి లెకెండ, ఏలు నాను మరి ఉండ్రీ సుటుబా వెప్పిన. మా బాణిజ్ మీరు వెంజి, నమ్మితి సువార్త ఆవిండ, దినిజ్ వెత్తెకం ఆతి సువార్త మిజి ఎయెన్బా వెప్తిజ, దేవుణు సాయిపు వన్ని ముస్సు మనీద్.

10 నాను యా లెకెండ వెప్పి లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదెజ్ సుడేజినానా? లోకురిజ్ సర్ద కిదిస్తెజ్ నాను సుడేజినె మహిజ, నాను క్రీస్తుజ్ సేవ కినికాన్ ఆవిండ మన.

దేవుణునె పవులుజ్ అపొస్తలుడు ఇజి కూక్తాన్.

11 తంబెరిజాండె, నాను మిజి వెప్తి సువార్త లోకు బాణిజ్ వాతిక ఆవిద్ ఇజి నాను మిజి వెప్పిన.

12 అయాక లోకు బాణిజ్ నజీ దోహ్కెక ఆవిద్. ఎయెన్బా నజీ నెన్పిస్తిక ఆవిద్. గాని యేసు క్రీస్తునె యా సువార్త నజీ తోరిసి నెన్పిస్తాన్.

13 ఒరెన్ యూద వాండ్రు కిజిని లెకెండ యూదురి మతమ్ది రూలుజ్ విజు లోజిజ పటుదలదాన్ అయాకెజ్ కిజి నాను ఎలాగ బత్తిజి మహా ఇజి మీరు వెహి మనిదెర్. అయాలెకెండ దేవుణు సజమ్కాజ్ కనికారం సిల్లెండ నాను ఎసానో హిమ్మెజ్ కిజి, వరిజ్ నాసనం కిదెజ్ సుడేత ఇజి మీరు వెహి మనిదెర్.

14 నా జతదు మని మహి యూదురిజ్ ఇంక యూద మతమ్ది రూలుజ్ విజు నాను తప్ఎండ కిత. నా అనిసిర్ నెన్పిస్తి ఆసారమ్కు పటుదలదాన్ కిదెజ్ నండ్రో సుడేత.

15-16 గాని నాను నా యాయ పొటాదు పిండెం ఆతి మహివలె, దేవుణు నజీ వన్ని వందిజ్ ఎర్లిస్తాన్. వన్ని దయ దర్మమ్దాన్ వన్నిజ్ సేవ కిదెజ్ నజీ ఏర్పాటు కిత్తాన్. నాను యూదురు ఆఇ పరి నడిమి యేసు వందిజ్ సువార్త వెప్పి వందిజ్ వన్ని మరిసిజ్ నజీ తోరిసి నెస్సిస్తెజ్ ఇజి వాండ్రు తిర్మామానం కిత్తాన్. ఆహె తిర్మానం కిత్తివలె నాను ఎయె వెటబా ఆలోసనం వెన్బావత.

17 నాను అపొస్తలుడు ఆని ముజాల అపొస్తలుడు ఆతి వరిజ్ సుడేదెజ్ యెరూసలెమ్దుబ సాన్వత. గాని వెటనె నాను అరిబియ ముటదు సాహ. వెనుక నాను దమస్సు పట్టమ్దు మరిజ వాత.

18 దేవుణు వన్ని మరిసిజ్ నజీ తోరిసి, మూండ్రీ పంటెజ్ వెనుక, కేపా ఇజి కూకె ఆని పేతురు వెట నెల్వ ఆదెజ్ యెరూసలెమ్దు సాహ. అబ్బె వన్ని వెట రుండి వారమ్కు మహా.

19 మరి, ప్రబుజ్ ఎయెరిజబ సుడేవత. ప్రబుజ్ తంబెరి ఆతి యాకోబుజ్నె సుడేత.

20 నాను రాసినికెజ్ నిజమ్నె. అబద్దం ఆఉ. దిన్ని వందిజ్ దేవుణు నెసినాన్.

21 పేతురు వెట యెరూసలెమ్దు మహి వెనుక నాను సిరియ, కిలికియ ఇని ముటెజ సాహ.

22 నస్తివలె యూదయ ప్రాంతమ్దు మని దేవుణు సజమ్కాణికార్ నజీ తోవెండ మహార్.

23 గాని మహికార్ నా వందిజ్ వెప్తి మనికెజ్నె వెహ మనార్. “మిజి ముజాలె హిమ్మెజ్ కిజి మహికాన్, ఉండ్రీ కాలమ్దు వాండ్రు నాసనం కిదెజ్ సుడేతి మని సువార్త ఏలు వెప్పినాన్”, ఇజి వెప్తి మనికెజ్నె వెహ మనార్.

24 అందెజె నా వందిజ్ వారు దేవుణుదిజ్ పొగిడితార్.

2

మహి అపొస్తరు వరి జతదు పవులుజ్ కుడుఃప్పినార్.

1 పతిన్నాల్లి పంటిజ్ గడఃప్పి వెనుక, నాను యెరూసలెమ్దు మరి సొహ. బర్లుబ నా వెట వాతాన్. తితుజ్బా మాపు వెట కూక్ట ఒతావ్.

2 నాను సొండ్రెజ్ వలె ఇజి దేవుణు నజి తోరిసి వెప్టాజ్నె నాను సొహ. అబ్బె పల్కుబడిః మని పెద్దలిజ కూడుప్టానె, యూదురు ఆఇ వరిజ్ నాను వెప్పిని సువార్త ఇనిక ఇజి వరిజ్ వెప్టా. ఎందన్నిజ్ ఇహిజ నాను వెప్పినికెజ్ నిజం ఇజి వారు నెసిమండ్రెజ్. సిల్లిజ నాను ఏలు కిజిని సువార్త పణి, పణిదిజ్ రెవిండ ఆనాద్. యాలెకెండ్ వర్గిదెజ్ పల్కుబడిః మని పెద్దెల్జనె కుడుఃప్ట. మరి ఎయెరిజ్బ కూడుఃవత.

3 నా వెట వాతి తీతు యూద వాండ్రు ఆవెన్. వాండ్రు గ్రీకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె ఆదెజ్వలె ఇజి వారు కసితం వెహ్ఎతార్.

4 గాని నమ్మితికావ్ ఇజి వెహె ఆని సెగొండార్ తీతు సునతి కిబె ఆదెజ్ వలె ఇజి వెప్టార్. వీరు గుట్టు నెస్టెజ్ ఇజి మా నడిఃమి డుగితారె, క్రీస్తుయేసు వెట కూడిఃతి మని దన్నిదటాన్ మజి వాతి విడుఃదలదిజ్ నుడఃతార్. మాటు యూదురి రూలుజ్ లోజిదెజ్ వలె ఇజి వెప్పివతార్.

5 వారు వెప్టిదన్నిజ్ నణెంబా లోజివతావ్. ఎందనిజ్ ఇహిజ నిజమాతి సువార్త మీ నడిఃమి నిల్లి మండ్రెజ్ ఇజి కోరితావ్.

6 గాని పల్కుబడిః మని పెద్దెల్జు, నాను వెప్పిని సువార్త మారిస్టెజ్ ఇజినో, కండెకీబా దనివెట కుడుఃప్టెజ్ ఇజినో వెహ్ఎతార్. నజి వారు పలుకు బడిః మనికార్ ఆతిజ్బ ఆఇతిజ్బ నాను లెక్కు కివెత. దేవుణు ఇజ్జికార్ పెరికార్ ఇజి తెడః తోవెన్.

7 గాని యూదురిజ్ సుహార్త వెప్టాజ్ దేవుణు పేతురుజ్ ఒపజెప్పి వజ, యూదురు ఆఇ వరిజ్ సువార్త వెప్టాజ్ నజి ఒపజెప్ట మనాన్ ఇజి వారు నెస్టార్.

8 ఇహిజ యూదురు నడిఃమి అపొస్తుడు ఆజి సేవ కిదెజ్ పేతురుజ్ సత్తు సీతి దేవుణునె యూదురు ఆఇవరి నడిఃమి అపొస్తుడు ఆజి సేవ కిదెజ్ నజి సత్తు సీతాన్.

9 నిటకొహి లెకెండ్ మని పెరి పెద్దెల్జు ఆతి యాకోబు, పేతురు, యోహాను ఇనికార్ దేవుణు నజి యా పెరి పణి ఒపజెప్ట మనాన్ ఇజి నెస్తివలె బర్లుబెజ్ని నజి వరి వెట జత కూడఃజి పణి కినికార్ ఇజి ఉండ్రీ గుర్తు లెకెండ్ మా కికు వరి వెట కలప్టార్. మాపు యూదురు ఆఇ వరి నడిఃమి సువార్త వెప్టాజ్ ఇజి వారు యూదురు నడిఃమి సువార్త వెప్టాజ్ ఒప్పుకోటార్.

10 వరి నడిఃమి యెరూసలెమ్దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజినె వారు మా బాణిజ్ కోరితార్. నాను కిదెజ్ ఇజి నండో ఆస ఆతికాదె అయా సజతి.

పవులు పేతురుజ్ జటిజ్ ఆజినాన్.

11 కేపా ఇని పేతురు అంతియొకయ ఇని పట్టుమ్దు వాతివలె, ఎద్రునె నాను వన్నిజ్ జటిజ్ ఆత. ఎందనిజ్ ఇహిజ వాండ్రు కిత్తి పణి తవు.

12 యాకోబు వెట కూడిఃతి మని సెగొండార్ నమ్మితి యూదురుజు అబ్బె వాని ముజాల వాండ్రు యూదురు ఆఇ నమ్మితి వరి వెట కూడఃజి బోజనం కిజి మహాన్. గాని వారు వాతిజ్, వీండ్రు యూదురు ఆఇ నమ్మితి వరివెట బోజనం కివెండ వరి బాణిజ్

దూరం ఆతాన్. వాండ్రు యా లెకెండ్ కిత్తాన్. ఎందనిజ్ ఇహిజ మోసి సీతి రూలుజ్ లోజిదెజ్వలె ఇజి డట్టం వెహ్నిమహి యూదురి గుంపుదిజ్ తియెల్ ఆతాన్.

13 అంతియొకయదు మని మహి నమ్మితి యూదురు పేతురు వెట వాండ్రు ఆతి వేసమదు కూడితార్. వారు కిత్తిక నుడేజి, బర్నబ మొసెం ఆతండ్రె, వారు కిత్తి లెకెండ్ వాండ్రుబా కిత్తాన్.

14 నిజమాతి సువార్దదు వెహ్ని వజి వారు నడిఱక నుడేతానె, అబ్బె మని నమ్మితి విజెరి ఎద్రు పేతురుజ్ జటిజ్ ఆత. నాను ఈహు వన్నిజ్ వెహ్ని, “ఓ పేతురు, నీను యూద వాండ్రు ఆజిబా, వరి లెకెండ్ బత్తి. యూదురు ఆఇవరి లెకెండ్ బత్తిజిని. మరి యూదురు ఆఇకార్ యూదురు లెకెండ్ మండ్రెజ్ వలె ఇజి ఎలాగ నీను డటం వెహ్నిజ్ అట్సిని”.

15 నాను మరి వరి విజెరిజ్ వెహ్నిన. మాటు యూదురు జాతిదు పుట్టికాట్. దేవుణు రూలుజ్ నెన్ఇకాట్ అవెట్.

16 గాని దేవుణు మోసిజ్ సీతి రూలుజ్ లోజిజి ఒరెన్ దేవుణు ఎద్రు సీతి నిజాయితి మనికాన్ అవెన్. గాని యేసుక్రీస్తు ముస్సు నమకం ఇట్టిజనె సీతి నిజాయితి మనికాన్ ఆనాన్ ఇజి నెస్త మనాట్. అందెజె యూదురు ఆఇకార్నె అవెండ, మాటుబా క్రీస్తు యేసుజ్ నమ్మితాట్. రూలుజ్ లోజిజి దేవుణు ఎద్రు సీతి నిజాయితి మనికాట్ అవెండ, క్రీస్తుజ్ నమ్మిజెనె దేవుణు ఎద్రు సీతి నిజాయితి మనికాట్ ఆని వందిజె మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజిజి ఎయెన్బా దేవుణు ఎద్రు సీతి నిజాయితి మనికాన్ అవెన్ఇ జి మాటు నెసినాట్.

17 క్రీస్తు యేసు వెట కూడితి మని దనితాన్ మాటు దేవుణు ఎద్రు సీతి నిజాయితి మనికాట్ ఆదెజ్ కోరినాట్. గాని మాటు యా లెకెండ్ ఆదెజ్ నూణివలె, యూదురు ఆఇవరి లెకెండ్ పాపమదు మనాట్. అయావలె క్రీస్తునా మజి తపు కిబిసినికాన్? అవెన్.

18 రూలుజ్ లోజిజి ఒరెన్ దేవుణు ఎద్రు సీతి నిజాయితి మనికాన్ అవెన్ ఇజి నాను ముజలె తొరిస్త. నాను నెక్తిహాక్తి దన్ని దరోట్ మరి మహ్తిజ రూలుజ్ తప్పి వన్ని లెకెండ్ నాను మన్న ఇజి రుజుప్ కిజిన.

19 యూదురి రూలుజ్ లోజిజి మహివలె, అయాకెజ్ కిజి, దేవుణు ఎద్రు సీతి నిజాయితి మనికాన్ ఆదెజ్ అట్ఎన్ ఇజి నాను నెస్త. అందెజె దేవుణు వందిజ్ బత్తిదెజ్ యూదురి రూలుజ్ బాణిజ్ డిబె ఆత.

20 నాను క్రీస్తు వెట సిలువాదు కుటిజాణిజ్ డెయె ఆతి లెకెండ మన. నాను బత్తి.జి మహి లెకెండ్ మరి బత్తి.ఎ. క్రీస్తునె నా మన్నుదు బత్తి.జినాన్. ఏలు నాను ఆవె నా ముస్సు అతికారం కిజినాన్. గాని క్రీస్తు నా లోఇ మంజి నా ముస్సు అతికారం కిజినాన్. నాను యా లోకమ్దు బత్తి.జిని బత్తు. దేవుణు మరిసిజ్ నమ్మి.జి బత్తి.జిన. వాండ్రు నజి ప్రేమిసి నా వందిజ్ వన్ని పాణం సితాన్.

21 దేవుణు దయ దర్థం నాను నెక్కి పొక్ఎ. యూదురి రూలుజ్ లోజిజి ఒరెన్ సీతి నిజాయితి మనికాన్ ఆనాన్ ఇహిజ క్రీస్తు సాతి సావు అనవనరమ్నె.

3

యూదురి రూలుజ్నా క్రీస్తు ముస్సు మని నమకమ్నా నిజమాతిక?

1 గలాతియ ముటాదు మని దేవుణుడితో నమ్మితికిదెరా, ఎందనితో మీరు బుద్ధి సలివరి లెకెండ్ మనిదెర్? ఎయెర్ మిజి మొసెం కిత్తార్? యేసు క్రీస్తు మీ వందితో సలువాదు సాతిదని వందితో నాను మీ కణకెతో నిండ్రు తోరిసి వెహ్తా మన గదె?

2 “యూదురి రూలుతో లోజిజినితో దేవుణు ఆత్మ మిజి దోహ్క మనాదా? మాపు మిజి వెహ్తా సువార్త వెంజి నమ్మిత్తితో గదె మిజి దోహ్క మనాదా?”. యా ఉండ్రె నజుతి నె వెహ్తా.

3 మీరు నిసా బుద్ధి సలికిదెరా? మీరు మీ కొత్త బత్తు మొదోల్స్తవలె దేవుణు ఆత్మ సత్తుదాన్ మొదోల్స్తదెర్. మరి ఏలు మీ సొంత సత్తుదాన్ మీ బత్తు పూర్తి కిదెతో సుడోజినిదెరా?

4 మీరు దేవుణుడితో నమ్మితి వెనుక, నండో ఒరిస్తదెర్. మీరు ఒరిస్తకెతో పణిదితో రెకెతో ఆతెనా? మిజి జరిగితికెతో పణిదితో రెంండ ఆఉతె ఇజి నాను ఆస ఆజిన.

5 అందెజె దేవుణు ఆత్మ మిజి నండో సీజి గొప్ప సత్తు మని పెరి పణితో మీ నడోమి కిజినిక, మీరు మోసె సీతి రూలుతో లోజిజినితోనా? అదె. గాని మీరు సువార్త వెంజి నమ్మిజినితోనె వాండ్రు మిజి వన్ని ఆత్మ సీజినాన్.

6 అబ్రాహము వందితో దేవుణు మాటదు రాస్తి మనిక నెస్తు, “వాండ్రు దేవుణుడితో నమ్మితాన్. అందెజె దేవుణు వన్నితో సీతి నిజాయితి మనికాన్ ఇజి ఒప్పుకోటాన్”, ఇజి రాస్త మనాద్.

7 అందెజె దేవుణు ముస్కు నమకం ఇట్టికారె, నిజమాతి అబ్రాహము కొడోర్ ఇజి నెస్తు.

8 సేన దినమ్కాతో ముజాలె దేవుణు మాటదు రాస్తమనాద్, యూదురు ఆఇకార్ దేవుణు ముస్కు నమకం ఇట్టిజ, వాండ్రు పరితో సీతి నిజాయితి మనికార్ ఇజి డగ్రు కినాన్. వాండ్రు అబ్రాహముతో, “లోకమది లోకుర్ విజెరెతో నీ వెట నాను దీవిన్న”, ఇజి అయాక జర్గి ఇ ముజాలె సువార్త వెహ్తాన్.

9 అందెజె దేవుణు ముస్కు నమకం ఇట్టి విజెరితో అబ్రాహము వెట కూడుప్పి దీవిసినాన్.

10 దేవుణు మోసెతో సీతి రూలుతో లోజిజి వన్ని ఎద్రు సీతి నిజాయితి మనికార్ అదెజె సుడోజిని విజెరె, దేవుణు సీతి సాయిపు అడోగి మంజినార్. ఎందనితో ఇహిజ, దేవుణు మాటదు రాస్త మనాద్, “మోసె రాస్తి పుస్తకమ్కాతో మని రూలుతో విజు ఎస్తివలెబా కి ఇ ఎయెన్బా దేవుణు సీతి సాయిపు అడోగి మంజినాన్”,

11 గాని నిజమె, ఒర్సె విజు రూలుతో లోజిజితోబా దేవుణు ఎద్రు సీతి నిజాయితి మనికాన్ అవెన్. ఎందనితో ఇహిజ, “ఎయెతో సీతి నిజాయితి మనికాన్ ఇజి నాను ఇట్టమననో వాండ్రు నా ముస్కు నమ్మకం ఇట్టి వందితో ఎలా కాలం బత్కినాన్”, ఇజి దేవుణు వెహ్తామనాన్ ఇజి దేవుణు మాటదు మనాద్.

12 గాని దేవుణు సీతి రూలుజ లో ఇ అయాలెకెండ్ అవెద్. ఎందనితో ఇహిజ నమ్మకం మండ్రెతో వలె ఇజి రూలుతో వెహ్క. దేవుణు మాటదు వెహ్క ఇనిక ఇహిజ, ‘రూలుతో నడోపినిని వజ బత్కిదెతో కొరిజినికాన్ అయాకెతో ఎస్తివలెబా లోజిదెతో వలె’,

13 మోసె సీతి విజు రూలుతో లోజిజి వరి ముస్కు వాజిని సయిపుదాన్ క్రీస్తు మజి డిన్పిస్తాన్. ఎందనితో ఇహిజ దేవుణు మాటదు రాస్త మనాద్, “కొహిదు డెల్పె ఆజి సాని ఎయెన్బా దేవుణు సాయిపు మనికాండ్రె”.

14 క్రీస్తు యా లెకెండ్ ఆతండ్రె మజి డిన్పిస్తాన్. ఎందనితో ఇహిజ, దేవుణు అబ్రాహముతో ఒట్టు కిత్తి దీవెనమ్కు యూదురు ఆఇ పరితో క్రీస్తు యేసు వెట దోహ్కె.

మరి క్రీస్తు మున్ను మజీ మని నమ్మకమేదాన్, దేవుణు సీన ఇజి ఒట్టు కిత్తి వన్ని ఆత్మ మజీ దోహాక్కి వందిజ్ క్రీస్తు యా లెకెండ్ సాయిపు మొపె ఆతండ్రె మజీ సాయివుదాన్ డిఃనపిస్తాన్.

15 తంబెరిజాండె, మాటు రోజు బత్తిజని బత్తుదాన్ ఉండ్రె మాట లాగ్ని వెహ్న. రిఎర్ ఉండ్రె సజతి వందిజ్ ఉండ్రె ఆజి ఉండ్రె ఒపుమానం కిత్తి మహిజ, ఎయెన్బా అయాక తప్పెజ్నో, దనివెట ఇనికబా కుడుఃపైజ్నో అక్కు సిల్లెద్. అయాలెకెండ్, దేవుణు మా వెట కిత్తి యా ఒపుమానమ్బా నిల్ని మంజినాద్.

16 దేవుణు అబ్రహాము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. 'తెగ్గదు పుట్టి వరిజ్ ఇహిజ నండో లోకురిజ్', ఇజి దేవుణు మాటదు వెహ్ఎద్. గాని 'నీ తెగ్గదు పుట్టి వన్నిజ్' ఇజి వెప్పినాద్. ఇహిజ అయాక ఒరెన్ వనిజ్నె. వాండ్రె క్రీస్తు.

17 నాను వెప్పి వాజినక ఇనిక ఇహిజ, దేవుణు ముజాలె అబ్రహాము వెట ఒట్టు కిత్తాండ్రె అయాక కిదెజ్ ఇజి తీర్మానం కిత ఇట్టాన్. అందెజె నాల్లి వందిజ్ ముపాయ్ (430) పంటెజ్ వెనుక దేవుణు మోసెజ్ సితి రూలుజ్ అబ్రాహాము వెట కిత్తి ఒపుమానమిదిజ్ తప్పిసి నస్తివలె కిత్తి తిరుమానమిదిజ్ సిల్లెండ కిదెజ్ అట్ఉ.

18 దేవుణు సీన ఇజి ఒట్టు కిత్తి అక్కు, మాటు రూలుజ లోజీతిజనె దోహ్కాద్. ఇహిజ వాండ్రు కిత్తి ఒట్టుదాన్ మజీ అయా అక్కు దోహ్కెద్. గాని దేవుణు అబ్రాహాముజ్ సీన ఇజి ఒట్టు కిత్తిజ్ వాండ్రు వన్ని దయా దర్మమదాన్ సితాన్.

19 అందెజె మరి ఎందనిజ్ దేవుణు మోసె వెట రూలుజ్ సితాన్? ఎందనిజ్ ఇహిజ తప్పజ్ ఇని ఇనికెజ్ ఇజి తోరిస్తెజె రూలుజ్ సితాన్. యా రూలుజ్ అబ్రాహాము తెగ్గదు పుట్టికాన్ వానిదాక లోకురిజ్ నడిపిస్తెజె సితాన్. ఒట్టుదు ఎయె వందిజ్ వెహ్త మనానో వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సితాన్. మోసె అయాక లోకురిజ్ సితాన్. మోసెనె, దేవుణు లోకుర్ నడిమి ఒపిసిని వన్ని లెకెండ్ నిహ మనాన్.

20 రిఎర్ నడిమి నిల్పికాండ్రె ఒరెన్ ఒపిన్నికాన్. గాని ఒపిన్నికాన్ సిల్లెండనె దేవుణు అబ్రాహాముజ్ ఒట్టు కిత్తాన్. ఎందనిజ్ ఇహిజ ఒరెండ్రె ఒట్టు కిత్తాన్ వాండ్రె దేవుణు.

21 అహిజ, దేవుణు అబ్రాహాముజ్ ఒట్టు కిత్తి వెనుక, మోసెజ్ రూలుజ్ సితివలె వాండ్రు కిత్తి ఒట్టుదిజ్ వెత్తెకమిదికెన్ రూలుజ్? సిల్లె ఆహె ఆవద్. రూలుజ్ లోకురిజ్ ఎల్లకాలం బత్తిదెజ్ బత్తిని బత్తు నీదెజ్ అట్వి ఇహిజ, యా రూలుజ్ లోజీజి దేవుణు ఎద్దు నీతి నిజాయితి మనికార్ ఆతార్ మరి.

22 గాని దేవుణు మాట వెప్పినాద్, యా లోకమదు మని లోకుర్ విజెరె తోహె ఆతి వరిలెకెండ్ పాపం అడిఃగి మనార్ ఇజి. అందెజె దేవుణు ఒట్టు కిత్తికెజ్ దోహ్కెజ్ ఇహిజ యేసుక్రీస్తు మున్ను నమ్మకం ఇడదెజ్. నమ్మకం ఇట్టిజనె దోహ్కె.

23 క్రీస్తు రెండం మహి ముజాల, యా నమకం రెండం మహాద్. నస్తివలె మోసె సితి రూలుజ్, ఒరెన్ జమాను కావ్ కిని లెకెండ్, యూదురు ఆతి మజీ తోప్పి ఇడఃజి కావ్ కిజి మహె. ఇహిజ యా రూలుజ్నె మా మున్ను అతికారం కిజి మహె. యాక, లోకుర్ క్రీస్తుజ్ నమ్మిదెజ్ ఆనాద్ ఇజి దేవుణు తోరిసిని కాలమదాన్నె మహాద్.

24 అందెజె క్రీస్తు రెంపెండ మహివలె, యా యూదురి రూలుజ్నె, మజీ సుడొజి నడిపిసితె. ఎందనిజ్ ఇహొజ, క్రీస్తు వాతి వెనుక వన్నిజ్ నమ్మిజి దేవుణు ఎద్రు నీతి నీజాయితి అదెజ్ ఇజి వెహ్సాన్.

25 గాని ఏలు క్రీస్తుజ్ నమ్మిదెజ్ అట్టాట్. అందెజె రూలుజ్ మా ముస్సు అతికారం కిదెజె అట్ఉ.

దేవుణు కొడొఱ్

26 క్రీస్తు యేసు ముస్సు నమకం ఇట్టిదెర్. అందెజె మీరు విజిదెరె దేవుణు కొడొఱ్.

27 మీ లొఇ మని బాప్సిం లాగె అతికార్ విజెరె క్రీస్తు వెట కూడిఱి మనిదెర్. అందెజె క్రీస్తు గుణమ్కు మిజిబా మంజినె.

28 అందెజె యూదురు ఇజినొ, యూదురు అఇకార్ ఇజినొ, వెట్టిపణి కినికార్ ఇజినొ, కిఇకార్ ఇజినొ, మొకకొడొఱ్ ఇజినొ, అయ్లికొడొఱ్ ఇజినొ ఆవద్ ముకెలం మీరు విజెదెరె ఉండ్రె లొకుర్. ఎందనిజ్ ఇహొజ, మీరు క్రీస్తు యేసు వెట కూడిఱి మనిదెర్.

29 మీరు క్రీస్తు వెట కూడిఱి మనికిదెర్ ఇహొజ, అబ్రాహము తెగ్గదు పుట్టికిదెర్. ఎందనిజ్ ఇహొజ క్రీస్తు అబ్రాహము తెగ్గదు పుట్టికాన్. మీరు దేవుణు అబ్రాహము వెట ఒట్టు కిత్తి దన్నిజ్ అక్కు మనికిదెర్.

4

1 నాను వెహ్సానిక ఇనిక ఇహొజ, ఒరెన్ వన్ని ఆస్తిదిజ్ అక్కు మనికాన్ వన్ని కొడొఱె. గాని అయా కొడొఱె ఇజ్రికాన్ మనివలె, వాండ్రు ఒరెన్ వెట్టిపణి కినివన్ని లెకెండ్ ఇనిదని ముస్సుబా అతికారం సిల్లెండ మనాన్. అయా కొడొఱె అప్పొసి ఆస్తిదిజ్ అక్కు మనికాన్ అతిజ్బా ఇనిదని ముస్సు అతికారం సిల్లెండ మనాన్.

2 వన్ని అప్పొసి ఎత్తుకిత్తి వయుసు వానిదాక, వాండ్రు వన్నిజ్ కోప కినివరి అడిఱిగి, వన్ని ఆస్తి సూణి పణి మణిసిర్ అడిఱిగి మంజినాన్.

3 అయాలెకెండె మాటుబా క్రీస్తు యా లొకమ్దు వాని ముజాల, మాటుబా యా లొకమ్ది అలవాటుబ అడిఱిగి మహాట్.

4 గాని దేవుణు ఎత్తుకిత్తి తగితి సమయం వాతివలె వాండ్రు వన్ని మరిసిజ్ పొక్తాన్. వాండ్రు ఉండ్రె బొదెలి పొటా లొఇహాన్ పుట్టాన్. వాండ్రు యూదురి రూలుజ్ విజు లొజిజి బత్తితాన్.

5 యూదురి రూలుజ్ లొజిజి దని అడిఱిగి మహి మజీ, దని బాణిజ్ డిఱి డిఱిన్పిన్ని వందిజ్, దేవుణు వన్ని మరిసిజ్ పొక్తాన్. ఎందనిజ్ ఇహొజ మాటు పూర్తి అక్కు మని దేవుణు కొడొఱ్ అదెజ్ ఇజి,

6 మీరుని మాపు వన్ని కొడొఱ్. అందెజె దేవుణు వన్ని మరిసి ఆత్మదిజ్ మా మన్నుదు మండ్రెజ్ ఇజి పొక్తాన్. యా ఆత్మనె మా లొఇహాన్ 'ఓబా', ఇజి కూక్కి మజి పార్లనం కిబిసినాన్.

7 అందెజె ఏలుదాన్ మీరు ఒరెన్ ఒరెన్ వెటి పణికిని వన్నిలెకెండ్ ఆఇదెర్. గాని మీరు ఒరెన్ ఒరెన్ దేవుణు కొడొఱె ఆతి మనిదెర్. అందెజె మీరు వన్ని మరిసిరిర్ సీన ఇజి వాండ్రు ఒట్టు కిత్తి దన్నిజ్ విజు అక్కు మనికిదెర్.

8 ఉండ్రె కాలమ్దు దేవుణుదిజ్ నెన్ఇ ముజాల నిజం ఆఇ దేవుణుక అడిఱిగి మహిదెర్.

9 గాని ఏలు మీరు దేవుణుడిజ్ నెస్తి మనిదెర్. మరి ఒదె వాండ్లు మిజి నెస్త మనాన్. మరి ఎందనిజ్ మీరు సత్తు సిలి పణిదిజ్ రెజ దెయమ్క దరోట్ మర్జనిదెర్. మరిబ దన్ని అడిగి మండ్రెజ్ కోరిజనిదెరా?

10 మీరు నెగ్గి దినమ్కు ఇజ నెగ్గి నెలెజ్ ఇజ సర్ద ఆని కాలమ్కు ఇజ నెగ్గి ఏంటుజ్ ఇజి సూణిదెర్.

11 మీరు కిజిని వన్కాజ్ నాను నెసి, మీ వందిజ్ బాద ఆజిన. నాను మీ నడిఃమి కన్బుడిఃజి కిత్తి సేవ పణి, పణిదిజ్ రెఎండ ఆనాద్ ఇజి బాద ఆజిన.

12 అందెజె తందెరిజాండె, నాను మిజి బతిమాల్లిన. మీరు నజి పొలిజి మండ్రు. ఎందనిజ్ ఇహిజ మోసె సితి రూలుజ బాణిజ్ డిఃబె ఆతి యూదురు ఆజి మీలెకెండె ఆతమన నాను. మీరు ఎస్తివలెబా నజి నెగ్గెండ సుడఃతి మనిదెర్.

13 నాను మిజి సువార్త తొలిత వెప్తివలె నాను ఎలాగ మహ ఇజి మీరు నెస్సిదెర్. నాను నెగెండె సిల్లెండ కన్బం ఆర్తమహ.

14 నాను కన్బం అర్దివలె మీరు నండొ బాద ఆతిదెర్. గాని మీరు నజి ఇజ్జి కణకదాన్ తొఇదెర్. నజి నెక్కి పొక్ఇతిదెర్. అహిజ దేవుణు పొక్తి ఒరెన్ దూత లెకెండె మీరు నజి డగ్గు కిత్తిదెర్. క్రీస్తుయేసుజ్ డగ్గు కిని లెకెండె నజి డగ్గు కిత్తిదెర్.

15 అయావలె మీరు గొప్ప సర్దదాన్ మహిదెర్. ఏలు మీ సర్ద విజు ఇనిక ఆతాద్? మీరు నా వందిజ్ ఇనికబా కిదెజ్ తయార్దాన్ మహిదెర్. మీ సొంత కణకుబా లాగ్గి సీదెజ్ ఇజి నాను లొస్సిక ఇహిజ, అయాకబా కిదెజ్ మీరు తయార్దాన్ మహిదెర్ ఇజి నాను మీ వందిజ్ నిజం వెస్సిన్.

16 ఏలు నాను మిజి నిజం వెస్సినిజ్ మిజి పడఃఇకాన్ ఆతానా?

17 యూదురి రూలుజ్ లొజిదెజ్ వలె ఇజి వెస్సిని వరి వెట మీరు కూడఃదెజ్ ఇజి పటుదలదాన్ నండొ ఆస ఆజినార్. గాని వరి ఉదేసమ్కు నెగ్గికెజ్ ఆఉ. మిజి మా బాణిజ్ దూరం కిదెస్సెజె వారు సుడఃజినార్. ఎందనిజ్ ఇహిజ మీరు వరివెట కూడఃజి, వారు మీ వందిజ్ పటుదలదాన్ ఆస ఆజిని లెకెండె, మీరు వరి వందిజ్ ఆస ఆజి మండ్రెజ్.

18 ఉదెసం నెగ్గిక ఇహిజ పటుదలదాన్ మంజినిక నెగెదె. ఎస్తివలెబా పటుదలదాన్ ఆహె మండ్రెజ్. నాను మీ వెట మని వలెనె ఆఎండ, సిలివలెబా పటుదలదాన్ మండ్రెజ్.

19 నాను ప్రేమిస్సి లోకురండె, నాను మీ వందిజ్ మరిబా బాద ఆజిన. ఏరు ఈబదెజ్ నొప్పిదాన్ బాద ఆని ఉండ్రె బోదెల్లెకెండె నాను మరిబా మీ వందిజ్ బాద ఆజిన. క్రీస్తు నని గుణమ్కు మిజి వానిదాక నాను బాద ఆజినె మంజిన.

20 ఏలు మీ నడిఃమి మంజి, మిజి నిపాతి వెప్టెజ్ ఇజి నాను నండొ ఆస ఆజిన. ఎందనిజ్ ఇహిజ మీరు ఎందనిజ్ యా లెకెండె కిత్తిదెర్ ఇజి నాను గాబ్బ ఆజిన.

ఆగారుని సార

21 మోసె రాస్తి రూలుజ్ లొజిదెజ్ వలె ఇజి వెస్సిని వరిజ్ నాను వెన్బాజిన. మోసె రాస్తి పున్తకమ్కాజ్ ఇనిక రాస్త మనాద్ ఇజి మీరు నెస్సిదెరా?

22 ఇనిక రాస్త మనాద్ ఇహిజ, అబ్రాహముజ్ రిఎర్ మరిసిర్ మహార్. ఒరెన్ వన్నిజ్ వెటి పణిమణిసి కాస్తాద్. మరి ఒరెన్ వన్నిజ్ వెట్టిపణి మణిసి ఆఇకాద్ కాస్తాద్.

23 వెట్టిపణి మణిసి వెట పుట్టికాన్ ఒడొల్ ఆసదాన్ పుట్టాన్. గాని వెట్టిపణి మణిసి ఆఇ దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు పజ పుట్టాన్.

24 యా రుండి బోదెకాజ్ రుండి సజతిజ వెట పోలిసి వెహైజ్ ఆనాద్. యా రుండి బోదెకు దేవుణు లోకుర్ వెట కిత్తి రుండి ఒపుమానమ్కు లెకెండ్ మన్నె. సీనాయి గొరొతు దేవుణు ఇస్రాయేలు లోకురిజ్ రూలుజ్ సితివలె, వరి వెట కిత్తి ఒపుమానం ఆగారుజ్ పోలిత మనాద్. ఆగారు వెట్టిపణి కొడోరిజ్ ఇట్టి లెకెండ్, యా ఒపుమానం లోకురిజ్ వెట్టిపణి మణిసిర్ లెకెండ్ కినాద్.

25 ఏలు అరబెయాదు మని సీనాయి గొరొతు సితి ఒపుమానం ఆగారుజ్ పోలిత మనాద్. వెట్టిపణి మణిసి ఆతి ఆగారు ని దని కొడోర్ లెకెండ్ మనార్. ఏలు యెరూసలెమ్ని బాన్ మని లోకుర్ ఎందనిజ్ ఇహిజ వారు అయా ఒపుమానమ్దు వెహ్నిని రూలుజ అడిగి మనార్.

26 గాని ముస్కు మని యెరూసలెం వెట్టిపణి మణిసి ఆఇకాద్ ఆతి సారెజ్ పోలిత మనాద్. నమ్మితి మజి విజెరిజ్ అయ్సినె సార.

27 ఎందనిజ్ ఇహిజ దేవుణు మాటదు వెహ్నినాద్, “కొడోర్ కాన్ఇ గొడ్డు బోదెలి సర్ద ఆఅ. ఏరు ఈబని వలె మని నొప్పి నెన్ఇకి, నీను గొప్పు సర్ద ఆజి డటం డెడిస్అ. ఎందనిజ్ ఇహిజ, మాసి మని బోదెల్దిజ్ ఇంక మాసి డిస్సి బోదెల్దిజ్ నండ్ండార్ కొడోర్ మనార్”.

28 ఏలు తంబెరిజాండె, మీరు ఇస్సాకు లెకెండ్ మనిదెర్. ఎందనిజ్ ఇహిజ, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్.

29 నస్తవలె ఒడోల్ ఆసదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజ్ కిత్తాన్. అయాలెకెండ్ ఏలుబా జర్గిజనాద్.

30 గాని దేవుణు మాట ఇనిక దిన్ని వందిజ్ వెహ్నినాద్, ‘వెట్టిపణి బోదెల్దిజ్ దని కొడో వెట నెక్కి పొక్తు. ఎందనిజ్ ఇహిజ, వెట్టిపణి మణిసి పొటది కొడోదిజ్, వెట్టిపణి మణిసి ఆఇ దని పొటది కొడో వెట అప్పొసి ఆస్తిదిజ్ అక్కు మండ్రెజ్ వీలు సిల్లెద్’,

31 అందెజె తంబెరిజాండె, మాటు వెట్టిపణి బోదెలి కొడోర్ ఆఎట్. గాని మాటు వెట్టిపణి మణిసి ఆఇ దని కొడోర్నె.

5

1 క్రీస్తు మోసె సితి రూలుజ అడిగిదాన్ డిబిస్తివలె, దని అడిగి మన్ఎండ మంజిని వందిజె డిబిస్టాన్. అందెజె డిబె ఆతి వరిలెకెండ్ నెగ్రెండ నిల్పి మండ్రు. మీరు వెట్టిపణి మణిసి లెకెండ్ రూలుజ అడిగి మన్మాట్.

2 నా మాటెజ్ జాగర్త విండ్రు. పవులు ఇని నాను మిజి వెహ్నిన. దేవుణు ఎద్రు నీతి నిజాయితి మనికిదెర్ ఆదెజ్ మీరు సునతి కిబె ఆదెజ్ సుండెతిజ, క్రీస్తు మీ వందిజ్ ఆతిదని వందిజ్ ఇని విలువ సిల్లెద్.

3 సునతి కిబె ఆని విజెరిజ్ నాను మరిబా వెహ్నిన. మోసె సితి రూలుజ్ విజు మీరు పూర్తి లోజెదెజ్ వలె.

4 మోసె సితి రూలుజ్ లోజెజి, దేవుణు ఎద్రు నీతి నిజాయితి మనికాన్ ఆదెజ్ సూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమదిజ్ నెక్కి పొక్తిదెర్.

5 గాని దేవుణు మజి నీతి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎందనిజ్ యా లెకెండ్ ఆసదాన్ ఎద్రు సుండెజినాట్ ఇహిజ,

దేవుణు మజి నీతి నిజాయితీ మనికార్ ఇజి ఇడ్నాన్ దేవుణు ఆత్మనె మజి దయరం సీజినాన్. ఎందనిజ్ ఇహిజ మాటు క్రీస్తు యేసు ముస్కు నమకం ఇడ్జినాట్.

6 ఎందనిజ్ ఇహిజ, క్రీస్తు యేసు వెట కూడితి మనాట్ ఇజి మాటు నెస్నాట్. ఒరెన్ సునతి కిబె ఆత మనాండ్రె, సిలెనొ ఇజి దేవుణు తోవెన్. గాని దేవుణు సూణిక, ఒరెన్ క్రీస్తు ముస్కు నమకం ఇట్టా మనాండ్రా ఇజినె. మహి వరిజ్ ప్రేమినెనె క్రీస్తు ముస్కు నమకం ఇట్టా మనాన్ ఇజి తోరిస్టెజ్.

7 మీరు నెగ్రెండెనె నమ్మిజి మహిదెర్. మరి, ఎయెన్ మిజి మొసెం కిజి, నిజమాతి సువార్త లోజీఎండ అడు కిత్తాన్?

8 వన్ని లోకుర్ ఆదెజ్ మిజి కూక్తి దేవుణు యా లెకెండ్ మిజి వెహెన్.

9 పులాని దూరు కండెక్ ఆతిజ్బా, కుండార్ మని దూరు విజు పులాజ్ కినాద్. అయాలెకెండ్ ఉండ్రె తపు బొదబ కినాద్.

10 మాటు ప్రబు వెట కూడిత మనాట్. అందెజె మహి బొదెజ మిరు లోజిఇదెర్ ఇజి నాను అనుమానం సిల్లెండ నమ్మిజిన. మిజి పంబ్ర కిబిస్సికాన్, వాండ్రు ఎయెన్ ఆతిజ్బా దేవుణు వన్నిజ్ తగితి సిక్స సీనాన్.

11 తంబెరిజాండె, సెగొండార్ వెహ్నినార్ దేవుణు కొడొరం ఆదెజ్ ఇహిజ సునతి కిబె ఆదెజ్వలె ఇజి. నాను అయాలెకెండ్ వెహ్నిమంజినిక ఇహిజ, యూదురు నజి మాలెజ్ కివతార్మరి. సునతి కిబె ఆదెజ్వలె ఇజి నాను వెహ్నిమంజినిక ఇహిజ, సిలువాదు క్రీస్తు సాతినాపు వందిజ్ నాను వెహ్ని వలె వారు నా ముస్కు కోపం ఆవతార్మరి.

12 సునతి కిబె ఆదెజ్వలె ఇజి వెహ్ని మజి పంబ్ర కిబిస్సి యా లోకుర్, కొడొర్ ఇడ్జెదెజ్ అట్ఇ వరి లెకెండ్ ఆపిర్ ఇజి నాను ఆస ఆజిన.

13 తంబెరిజాండె, డిఃబె ఆతి వరి లెకెండ్ దేవుణు మిజి కూక్త మనాన్. మీరు ఇస్టం ఆతి సెఇకెజ్ కిదెజ్ ఆనాద్ ఇజి ఒడ్జెబిమాట్. గాని మరి ఒరెన్ వన్నిజ్ ప్రేమిసి నేవ కిదెజ్ మిజి అక్కు మనాద్.

14 మోసె సీతి రూలుజ్ విజు ఉండ్రె మాటాద్ కూడితె మన్నె. అయాక ఇనిక ఇహిజ, "నీను నిజి ప్రేమిస్సి లెకెండ్, మహి వరిజ్ ప్రేమిన్అ", ఇజి.

15 గాని మీరు జంతుజ లెకెండ్ కట ఆజి, ముకెజ్ లాగ్గి మహిజ, మీరు ఒరెన్ మరి ఒరెన్ వన్ని బాణిజ్ పూర్తి నాసనం ఆనిదెర్ ఇజి జాగర్త సుడెజ్ఆదు.

దేవుణు ఆత్మ నడిపిసిని బత్తు.

16 అందెజె నాను మిజి వెహ్నిన, దేవుణు ఆత్మ మీ మన్పుదిజ్ వెహ్ని నడి పిసిని వజ నడిదు. అయావలె మీ ఒడొల్ది సెఇ ఆసెజ్ కిబిస్సి సెఇ పణిజ్ మీరు కిఎండ మంజినెదెర్.

17 మా ఒడొల్ది సెఇ ఆసెజ్ పడిఎద్ దేవుణు ఆత్మ. దేవుణు ఆత్మదిజ్ పడిఎద్ సెఇ ఆసెజ్. యా రుండి సెఇ ఆసెజ్ని దేవుణు ఆత్మ కూడిజి మన్ఉ. అందెజె మీరు ఎస్తివలెబా కిదెజ్ కోరిజినిక కిఎండ మండ్రెజ్ అట్టిదెర్.

18 గాని దేవుణు ఆత్మనె మిజి నడిపిసి మహిజ, మీరు మోసె సీతి రూలుజ్ లోజిజి దని అడిగి మన్ఇదెర్.

19-21 ఒడొల్ది సెఇ ఆసెజ్ కిబిస్సి పణిజ్ విజెరి నెస్సికెజె. అయాకెజ్ ఇని ఇనికెజ్ ఇహిజ, రంకు బూలానిక, కెలార్బూలానిక, సాని బూలానిక, బొమెజ మాడిస్సిక, సెట్నిక, పగ ఆనిక, గొడబ ఆనిక, ఆఇవరి వన్కా వందిజ్ నండొ ఆస ఆనిక, సొంత ఇస్టమ్కునె సూణిక, కేటెజ్ ఆనిక, మిజి పడ్జెఇ వరి బాణిజ్ దూరం ఆనిక, మిజి కూడ్డి

వరివెట కూడ్డిక, గోస అనిక, సోస్విక, ఉణిజి తింజి సోసి కర్రజిజి సెజ పణిజ్ కిజినిక. నాను ముజాలె మిజీ డటం వెహ్తి లెకెండ మరి వెహ్సిన. నిని పణిజ్ కిజి బత్కినికార్ దేవుణు ఏలుబడిః కిని లోకుర్ లొఇ మండ్రెజ్ అట్ఎర్.

22-23 గాని దేవుణు ఆత్మ వెహ్సి నడిపిసిని వన్నిజ్ నిని గుణమ్కు మంజినె. అయాకెజ్ ఇని ఇనికెజ్ ఇహిజ, మహి వరిజ్ ప్రేమిస్నాన్, సర్లదాన్ మంజినాన్, సాంతి సమాదనమ్దాన్ మంజినాన్, కిడు కిత్తిజ్బా అయాకెజ్ ఒరిసి మంజినాన్, కనికారం తోరిస్నాన్, నెగ్గికెజ్ కినాన్, నమ్మిదెజ్ తగ్గిక్నాన్, సార్లిదాన్ మంజినాన్, సోన్ఎండ మంజినాన్. యా లెకెండ కిజి మంజనికార్, ఇని రూలుజ్బా తప్ఎర్.

24 క్రీస్తుయేసు వెట కుడిఃతి మనికార్, వరి పడాఃయి బత్కు, వరి సెజ ఆసెజ్ విజు, సిలువాదు కుంటిజాణిజ్ డెయె ఆతి లెకెండ మనాద్. ఇహిజ వారు అయాకెజ్ పూర్తి డిఃస్ట సితార్.

25 దేవుణు ఆత్మ మజి కొత్త బత్కు సిత మనాన్. అందెజె దేవుణు ఆత్మ వెహ్సి నడిపిసిని వజ మాటు బత్కిదెజ్.

26 మాటు గొప్ప పెరికాట్ ఇజి గర్త ఆవిండ మహి వరిజ్ కోపం రేపిన్ఎండ, గోస ఆజి సెఇకెజ్ కిఎండ ఒరెన్ మరి ఒరెన్ వన్ని వెట మండ్రెజ్.

6

1 తంబెరిజాండె, మీ లొఇ ఒరెన్ తపు కిత్తిజ, దేవుణు ఆత్మ నడిపిసిని వజ నడిఃజిని మీరు సార్లిదాన్ వన్ని తపు దిదిజి, నెగ్గి సరిదు తతెజ్. మరి అయాలెకెండ, మీరుబా పాపమ్దు అర్ఎండ జాగర్త సుడఃదెజ్.

2 మహి వరి బాదెజ్, కష్టమ్కు నెసి వరిజ్ సాయం కిదెజ్. యా లెకెండ కిజి క్రీస్తు వెహ్తి రూలుజ్ మీరు పూర్తి కిజినిదెర్.

3 ఎయెన్బా వాండ్రు పెరికాన్ ఆఇతిజ్బా, గొప్ప పెరికాన్ ఇజి ఒడఃబితిజ వన్నిజ్ వాండ్రె మొసెం కిబె ఆజినాన్.

4 విజెరె ఎయెన్ కిజినికెజ్ నెగ్గికెజ్నా సెఇకెజ్నా ఇజి వాండ్రె సుడః ఆదెజ్. అయావలె వాండ్రు కిజిని దనితాన్ వాండ్రు పొగడః ఆదెజ్ అట్నాన్. మహికార్ కిజిని దనిజ్ ఆవిండ, వాండ్రు కిజినిదాన్ సుడఃజి పొగడః ఆదెజ్.

5 ఎందనిజ్ ఇహిజ, ఒరెన్ ఒరెన్ వన్నిజ్, వాండ్రు కిదెజ్ మని బాజిత మనాద్.

6 దేవుణు మాట వెంజి నెసినికాన్ ఎయెన్బా వెహ్సి నెస్పిన్ని వన్నిజ్, వన్నిజ్ కల్గితి మని విజు నెగ్గి వన్కాజ్ లొఇ వంతు సీదెజ్.

7 మిజి మీరె మొసెం ఆమాట్. దేవుణుదిజ్ సుత్రిసి అర్పైజ్ ఆనాద్ ఇజి ఒడిఃబిమాట్. నాను ఎందనిజ్ యాక వెహ్సిన ఇహిజ, విత్కికాన్ ఇనిక విత్నాండ్రొ, అయా పంటనె కొయినాన్.

8 ఒడఃలేది సెఇ ఆసెజ వజి కిజి బత్కిజినికాన్ నాసనం ఆనాన్. ఎందనిజ్ ఇహిజ వాండ్రు సెఇ ఆస వజి బత్కితాన్. గాని దేవుణు ఆత్మ వెహ్సి నడిపిసిని వజ నడిఃనికాన్ ఎలాకాలం దేవుణు వెట బత్కినాన్. ఎందనిజ్ ఇహిజ, వాండ్రు దేవుణు ఆత్మ వెహ్సి నడిపిసిని వజి బత్కితాన్.

9 నెగ్గి పణిజ్ కిదెజ్ విస్కిమాట్. ఎందనిజ్ ఇహిజ, మాటు విస్కిఎండ మహిజ, దేవుణు ఎత్తు కిత్తి సమయమ్దు మాటు కిత్తి దనిజ్ వాండ్రు పలితం సీనాన్.

10 అందెజె మహి వరివందిజ్ సాయం కిదెజ్ సమయం దొప్పివలె, మాటు విజెరిజ్ నెగ్గికెజ్ కిదెజ్. ముకెలం దేవుణుదిజ్, నమ్మితి వరివందిజ్ కిదెజ్.

సునతి ఆవద్ కొత్త బత్కునె ముకెలం.

11 నాను యా మాటెజ్ నా సొంత కీదాన్ నె రాసిన. ఎసొ పెరి అసరమ్కాణిజ్ రాసిన ఇజి సుడెఃదు.

12 మహి యూదురిజ్ సర్ద కిబిస్తెజ్ సూణికారె, మీరు తప్ఎండ సునతి కిబె ఆదెజ్ వలె ఇజి మిజి డటం వెప్పినార్. వారు ఎందనిజ్ యా లెకెండ వెప్పినార్ ఇహిజ, క్రిస్తు సిలువాదు సాతాన్ ఇజి నమ్మితిజనె దేవుణు రక్కిస్నాన్ ఇజి వెప్పిని వలె లోకుర్ వరిజ్ మాలెజ్ కినార్. ఆహె వరి ముస్కు మాలెజ్ రెఎండ మండ్రెజ్ నె సునతి కిబె ఆదెజ్ వలె ఇజి డటం వెప్పినార్.

13 సునతి కిబె ఆతికార్బా, మోసె సితీ రూలుజ్ విజు లోజిఎర్. గాని మిజి సునతి కిబిస్తెజ్ కోరిజినార్. ఎందనిజ్ ఇహిజ, వారు వెప్పినిజ్ మీరు సునతి కిబె ఆతిదెర్ ఇజి మహి యూదురిజ్ వెప్పి వరి నడిఃమి పొగిడెః ఆదెజ్ సుడెఃజినార్.

14 గాని నాను, మా ప్రబు ఆతి యేసు క్రిస్తు సిలువాదు మా వందిజ్ సాతాన్ ఇజి ఆవండ మరి ఇనిదని వందిజ్బా పొగిడెఃఎ. వాండ్రు అయాలెకెండ సాతిజ్, నాను గొప్ప విలువ మనిక ఇజి ఒడెఃబిని దనిజ్ యా లోకమ్దికార్ విలువ సిఎర్. వారు విలువ మనిక ఇజి ఒడెఃబిని దనిజ్ నాను విలువ సిఎ.

15 ఒరెన్ సునతి కిబె ఆతాండ్రా, సిల్లెనా ఇజి ఆవద్ ముకెలం. ముకెలమతిక ఇనిక ఇహిజ, ఒరెన్ పడాఃయి బత్కు డఃసి కొత్తాజ్ ఆతాన్ ఇజినె.

16 యా మాట వెంజి అయా వజ కిని విజెరిజ్ దేవుణు వన్ని సమాదనం సీజి, వన్ని ముస్కు కనికారం తోరిస్నాన్. వీరు ఎయెర్ ఇహిజ, దేవుణు వన్ని వందిజ్ ఎర్లిస్తికారె.

17 ఆకార్దు, ఎయెన్బా నజి మరి బాదెజ్ కిమాట్. ఎందనిజ్ ఇహిజ యేసుజ్ సేవ కిత్తి వందిజ్ నజి కిత్తి బాదెజ మసెజ్ నా ఒడెఃల్దు మన్నె. యాకెజ్ నాను వన్ని వెట్టివణి మణిసి ఇజి తోరిస్సె.

18 తంబెరిజాండె, మా ప్రబు ఆతి యేసుక్రిస్తు దయ దర్మం మీ ముస్కు మనీద్. ఆమెన్.

అపొస్తుడు ఆతి పవులు ఎపెసుదు మని దేవుణుదిజ్ నమ్మితి వరిజ్ రాస్తి ఉత్తం

నెల్వ కిబిస్సిక

అపొస్తుడు ఆతి పవులు ఎపెసు ఇని పట్టుమ్దు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ జెలిదు తోహా ఆత మహాన్. నస్తివలె ఆసియ ఇని రోమ ప్రాంతమ్దు మని ఉండ్రీ ముకెలమాతి పట్టుమ్నె ఎపెసు.

పవులు యా ఉత్తం రాస్తాండ్రె, తుకికు వెట పోక్సినాన్. దేవుణుదిజ్ నమ్మిత్తికార్, వన్ని దయ దర్మం ఎసొ గొప్ప పెరిక ఇజి వారు అర్థం కిజి నెస్టెజ్ రాస్తికాదె. మరి దేవుణు ఎత్తు కిత్తి సజతిజ్ క్రీస్తు వెటనె పూర్తి ఆతె. వాండ్రె విజు వన్కా మున్కు మనికాన్. క్రీస్తు వెటనె దేవుణు యూదురిజ్, యూదురు ఆఇ వరిజ్ రక్సినె వరిజ్ ఉండ్రె ఒడోల్ కిజినాన్. ఇబ్బె ఒడోల్ ఇజి వెస్పినిక, యా లోకమ్దు మని దేవుణుదిజ్ నమ్మిత్తికార్ విజెరె కూడితి మని సజమ్నె. మరి దేవుణు సజం ఎలాగ ఉండ్రె ఆజి మండ్రెజ్ నమ్మిత్తికార్ ఒరెన్ ఒరెన్ ఎలాగ మండ్రెజ్ ఇజి వెస్పినాన్. నమ్మిత్తికార్ ఎద్రిసినిక యా లోకమ్ది లోకుర్ వెటనె ఆవద్. గాని సయతాను వెటనె ఎద్రిసినార్ ఇజి ఎత్తు కిబిసి, ఎలాగ సయతానుజ్ ఎద్రిస్టెజ్ ఇజి వెస్పినాన్.

1 క్రీస్తు యేసు వందిజ్ అపొస్తుడు ఆతి పవులు ఇని నాను ఎపెసు పట్టుమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి వజనె నాను క్రీస్తు యేసు వందిజ్ అపొస్తుడు ఆత. మీరు క్రీస్తు యేసుజ్ నమ్మితి నె మనికిదెర్.

2 మా బుబ్బు ఆతి దేవుణుని ప్రబు ఆతి యేసు క్రీస్తు దయ దర్మమ్దాన్ మీరు నిపాతిదాన్ మండ్రెజ్ సాయం కిపిర్.

3 దేవుణుదిజ్ పొగిడిజినాట్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బుబా. ఎందనిజ్ ఇహిజు, దేవుణు ఆత్మ మా మన్సుదిజ్ వెస్పి, వన్ని సరిదు నడిపిస్సిదనితాన్ మజి వాజిని విజు నెగ్గికెజ్ సీజి వాండ్రె మజి దీవిస్తాన్. పరలోకమ్దాన్ వాజనికెజె అయా నెగ్గికెజ్. క్రీస్తు వెట మజి కుడుప్తాండ్రె, యా నెగ్గికెజ్ మజి సితాన్.

4 ఎందనిజ్ ఇహిజు దేవుణు లోకం పుటిన్ఎండ ముజాలె మజి వన్ని లోకుర్ ఇజి ఎర్లిస్తాన్. క్రీస్తు వెట మజి మని సమమ్దమ్దాన్ యా లెకెండ్రె మజి ఎర్లిస్తాన్. మాటు వన్ని వందిజ్ కేట ఆతి లోకుర్ లెకెండ్రె, ఇని నిందెజ్ సిల్లెండ్రె వన్ని ఎద్రు మండ్రెజ్నె వాండ్రు యా లెకెండ్రె ఎర్లిస్తాన్.

5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడోరో ఆదెజ్ ఇజి నండొ ముజాలె వాండ్రు తిరుమానం కిత్తాన్. వాండ్రు యా లెకెండ్రె తిరుమానం కిత్తాన్. ఎందనిజ్ ఇహిజు, అయాకదె వాండ్రు ఎత్తు కిత్తిక. వన్నిజ్ ఇస్టం ఆతిక.

6 అందెజె గొప్ప బమ్మ కిని వన్ని దయ దర్మం వందిజ్ దేవుణుదిజ్ పొగిడిజినాట్. వాండ్రు ప్రేమిసిని వన్ని మరిసి ఆతి దని దనటానె యా గొప్ప దయ దర్మం మా మున్కు వాతాద్. మజి సెడ్డినె దోహ్కాద్.

7-8 క్రీస్తు మా వందిజ్ నల వాక్కి సాతి సావుదాన్ దేవుణు మా పాపమ్కాణిజ్ మజి డిఁసేస్తాన్. ఇహిజ మా పాపమ్కు సెమిస్తాన్. అయా లెకెండె వన్ని దయ దర్మం గొప్పు పెరిక ఇజి తోరిస్తాన్. మా మున్కు నండొ దయ దర్మం సెడ్డినె తోరిస్తాన్. వన్ని బుద్ది గెణమ్దానె వాండ్రు వన్ని దయ దర్మం మా మున్కు తోరిస్తాన్.

9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్భమ్దు ఎత్తు కిజి డాప్పి ఇట్టి పణి మజి తోరిస్తాన్. అయాక ముజాల్ ఎయెర్బా నెన్ఎతార్.

10 వాండ్రు గర్భమ్దు ఎత్తు కిజి డాప్పి ఇట్టిక ఇనిక ఇహిజ, పరలోకమ్దు మని విజు వన్కాజ్, బూమి మున్కు మని విజు వన్కాజ్, కూడుఁప్పి ఒరెన్ వన్ని అడిగి ఇట్తాన్. వాండ్రె క్రీస్తు. యాక కిదెజ్ తగితి సమయం వానివలె వాండ్రు పూర్తి కినాన్.

11 విజు సజతిజ్ దేవుణు ఎత్తు కిత్తి వజి వాండ్రు కిజినాన్. క్రీస్తు వెట మజి కుడుప్తాండ్రె, వన్ని సొంత లోకుర్ ఇజి మజి ఎర్లిస్తాన్. ఎందనిజ్ ఇహిజ అయా లెకెండె ఎర్లిస్తాజ్ ఇజి వాండ్రు పూర్బమ్దునె తిరుమానం కిత మహాన్. అయాకదె వాండ్రు ఎత్తు కిత్తిక.

12 క్రీస్తు రక్సిస్తెజ్ వానాన్లె ఇజి విజెరె ఇంక ముజాలె నమకం ఇట్టికాపె యూదురు ఆతి మాపు. అందెజె దేవుణు గొప్పు పెరికాన్ ఇజి పొగిడిజినాప్. అయాకదె వన్ని ఉదెసం.

13 అయాలెకెండె యూదురు ఆఇ మీరుబ నిజమాతి బోద వెహిదెర్ ఇహిజ, దేవుణు మిజి రక్సిస్తాన్లె ఇజి వెహిసిని సువార్త వెహిదెర్. మీరు క్రీస్తు మున్కు నమకం ఇట్టిదెర్ వన్ని వెట కూడితి మనిదెర్. అందెజె దేవుణు సీన ఇజి ఒట్టు కిత్తి దేవుణు ఆత్మోజ్ మిజి సితాన్. సితండ్రె దేవుణు మిజి లోకుర్ ఇజి కూక్తాన్. యా దేవుణు ఆత్మని, మీరు దేవుణు లోకుర్ ఇని దనిజ్ ఉండ్రె గుర్తు.

14 మరి దేవుణు వన్ని లోకురిజ్ ఒట్టు కిత్తి విజు మజి దొహ్కైఇని దనిజ్ ఉండ్రె ఆదారమ్నె యా దేవుణు ఆత్మ. వాండ్రు వన్ని లోకురిజ్ పూర్తి విడుఁదల కినివలె అయాకెజ్ మిజి దొహ్కై. దేవుణు గొప్పు పెరికాన్ ఇజి దినితాన్ లోకుర్ పొగిడినార్.

ఎవెసు సజమ్దు మని పరి వందిజ్ పవులు కిజిని పార్దనం

15-16 దేవుణు మిజి మున్కు వెప్తి లెకెండె దీవిస్త మనాన్. అందెజె నాను మీ వందిజ్ వన్నిజ్ పార్దనం కిజిన. మీరు ప్రబు ఆతి యేసుజ్ నమ్మిజినిదెర్. దేవుణు వందిజ్ కేట ఆతి వరిజ్ విజెరిజ్ ప్రేమిసినిదెర్ ఇజి నాను వెహి బాణిజ్ అసి మీ వందిజ్ ఎస్తివలెబా డిఁసేండె దేవుణుదిజ్ వందనమ్కు వెహిసిన. ఎస్తివలెబా నాను పార్దనం కినివలె, మీ వందిజ్ పార్దనం కిజిన.

17 గొప్పు పెరికాన్ ఆతి మా బుబ్బెజ్ పార్దనం కిజిన. వాండ్రె మా బుబ్బు ఆతి యేసు క్రీస్తుజ్ దేవుణు. మీరు వన్నిజ్ బాగ నెస్సి వందిజ్ దేవుణు ఆత్మ మిజి గెణం సీదెజ్ ఇజి, దేవుణు వందిజ్ మిజి తెలివి కిబిస్తెజ్ ఇజి నాను వన్నిజ్ పార్దనం కిజిన.

18 దేవుణు వందిజ్ కేట ఆతి లోకుర్ వందిజ్ వాండ్రు ఇట్టి మని గొప్పు పెరి దీవెనమ్కు ఇనికెజ్ ఇజి మీరు నెస్సి వందిజ్, అయా దీవెనమ్కాజ్ ఆనదాన్ ఎర్దు నూణి వందిజ్ వరిజ్ నెస్సిన్ల ఇజి నాను పార్దనం కిజిన. దేవుణు వన్ని లోకురిజ్ సీన ఇజి ఒట్టు కిత్తి దీవెనమ్కు ఎసా పెరికెజ్ ఇజి మీరు నెస్సెజ్ ఇజి నాను వన్నిజ్ పార్దనం కిజిన.

19-21 వన్నిజ్ నమ్మిజిని మా లోజ మని వన్ని సత్తు ఎసొ పెరిక ఇజి మీరు నెస్తెజ్ ఇజి నాను పార్దనం కిజిన. అయా సత్తు విజు వన్కా ముస్కు గొప్పు పెరిక. యా గొప్పు పెరి సత్తుదాన్ నె దేవుణు క్రీస్తుజ్ సావుదాన్ బత్తిస్తాండ్రె పరలోకమ్దు వన్ని ఉణెర్ పడకాదు బసె కిత్తాన్. క్రీస్తు అబె అతికారం కిజినాన్. విజు రకమ్కాణి అతికారం కిజిని దూతెజ, దెయమ్క ముస్కు అతికారం కిజినాన్. అతికారం కిజిని విజెరె ముస్కు వాండ్రె గొప్పు అతికారం మనికాన్. వన్ని అతికారం ఏలు అతికారం కిజిని వరి ముస్కునె ఆవద్. గాని వాని కాలమ్దు అతికారం కిని వరి ముస్కుబా వాండ్రె గొప్పు అతికారం మనికాన్.

22 దేవుణు విజు వన్కాజ్ క్రీస్తు పాదమ్క అడిగి ఇట్టాన్. దేవుణు సజం ముస్కు అతికారి లెకెండ్ వన్నిజ్ ఏర్పాటు కిత్తాన్.

23 వాండ్రు దేవుణు సజమ్దిజ్ బుర్ర లెకెండ్ దేవుణు సజమ్ నె వన్ని ఒణెల్ లెకెండ్ దేవుణు సజమ్ నె వన్నిజ్ పూర్తి కిజినాద్. ఎంబెబా విజు వన్కాజ్ పూర్తి కిజినికాన్ వాండ్రె.

2

దేవుణు వన్ని కనికారమ్దాన్ మజి రక్కిసినాన్.

1 మీరు క్రీస్తుజ్ నమ్మిజ ముజాల సాతి వరి లెకెండ్ మహిదెర్. ఎందనిజ్ ఇహిజ మీరు దేవుణుదిజ్ లోజిఇతిదెర్, సెజ పణిజ్ కిజి మహిదెర్.

2 యా లోకమ్దు మని దేవుణుదిజ్ దూసిస్సికార్ కిజి మహి లెకెండ్ మీరుబా కిజి మహిదెర్. ఆగాసమ్దు బుల్లెయ్ కిని దెయమ్కాజ్ నెయ్కి ఆతి సయ్తానుజ్ లోజిజి మహిదెర్. వీండ్రె దేవుణుదిజ్ లోజిఇ వరి ముస్కు ఏలు అతికారం కిజినాన్.

3 ఉండ్రె కాలమ్దు, నిజమె, మాటుబా నని వరి లెకెండ్ మహట్. మా సొంత సెజ ఇస్టమ్దానె కిజి మహట్. మ ఒణెల్ది ఆసెజ వజ, సెజ ఆలోనమ్క వజ కిజి మహట్. మహి విజెరె లెకెండ్, మాటుబా దేవుణు కోపమ్దిజ్ గురి ఆతి మహికాట్.

4 గాని దేవుణు నండొ కనికారం మనికాన్. వాండ్రు మజి నండొ ప్రేమిసినాన్.

5 అందెజె మజి క్రీస్తు వెట కుడుప్తాండ్రె మజి కొత్త బత్తు సితాన్. మాటు దేవుణుదిజ్ లోజిఎండ ఆతి మహిజ్, సాతి వరి లెకెండ్ మహట్. అయావలెబా వాండ్రు యా లెకెండ్ కొత్త బత్తు సితాన్. దేవుణు దయాదర్మ్దానె వాండ్రు మజి రక్కిస్తాన్.

6 వాండ్రు మజి క్రీస్తుయేసు వెట సావుదాన్ మరజి బత్తిస్తాండ్రె, పరలోకమ్దు వన్ని వెట కూడకాణి ఏలుబడికె కిదెజ్ బసె కిత్తాన్. క్రీస్తు వెట మజి కుడుప్తాండ్రె యా లెకెండ్ కిత్తాన్.

7 వాని కాలమ్దు లోకుర్ విజెరె వన్ని దయ దర్థం విజు వన్కా ముస్కు గొప్పు నండొ పెరిక ఇజి సుడకెదెజె యా లెకెండ్ క్రీస్తు వెట మా ముస్కు దయ దర్థం తోరిస్తాన్.

8 ఎందనిజ్ ఇహిజ దేవుణు, దయాదర్మ్దానె మిజి రక్కిస్తాన్. మీరు క్రీస్తుజ్ నమ్మిత్తి దనితానె రక్కిస్తాన్. మీరు కిత్తి నెగ్గి పణిజాణిజ్ ఆవద్ వాండ్రు మిజి రక్కిస్తక. అయాక వాండ్రు మిజి సీతి ఉండ్రె ఇనాయమ్ నె.

9 మీరు కిత్తి నెగ్గి పణిజాణిజ్ ఆవద్ దేవుణు మిజి రక్కిస్తక. అందెజె ఎయెన్బా నాను కిత్తి నెగ్గి పణిజాణిజ్ దేవుణు నజి రక్కిస్తాన్ ఇజి పొజిదెజ్ ఆవద్.

10 మాటు నెగ్గి పణిజ్ కిజినె మంజిని వందిజ్ క్రీస్తు యేసు వెట మజి కుడుప్తాండ్రె కొత్త బత్తు మజి సితాన్. మాటు కిదెజ్ మని యా నెగ్గి పణిజ్ వాండ్రు ముజాలె

తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకెండ్ మా బత్తుదిజ్ క్రితాజ్ కితాన్.

11 అందెజె యూదురు జాతిదు పుట్ఠితి మీరు క్రీస్తుజ్ నమ్మిణ ముజాల ఎలాగ మహిదెర్ ఇజి ఎత్తు కిదు. మీరు సునతి కిబె ఆఇకిదెర్ ఇజి యూదురు మిజి వెస్సినార్. ఎందనిజ్ ఇహిజు, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒడొబిజినార్. (గాని యా సునతి ఒరెన్ వన్ని ఒడొల్దు కిని ఆసారమెన్)

12 సుడొదు, అయా కాలమ్దు మీరు క్రీస్తుజ్ దూరం మహిదెర్. దేవుణు లోకుర్ ఆతి ఇస్రాయేలుదిజ్ సెందిఇకిదెర్. మీరు పయివారు. దేవుణు వన్ని లోకురిజ్ కిత్తి ఒట్టుదిజ్ నమందం సిలికిదెర్. మీరు యా లోకమ్దు ఇని ఆస సిల్లెండ, దేవుణుదిజ్ నెన్ఎండ బత్తిజి మహిదెర్.

13 గాని ముజాల క్రీస్తుజ్ దూరం మహి మీరు ఏలు వన్ని వెట కూడితి మనిదెర్. క్రీస్తు నల వాక్కి సాతి సావుదాన్ దేవుణు మిజి డగ్రు కితాన్.

14 క్రీస్తునె యూదురు ఆఇ మిజి, యూదురు ఆతి మజి రాజినం కిబిస్తికాన్. ముజాల మిజి మజి అడ్డు లెకెండ్ మహి పగ వాండ్రు లాగితండ్రె, ఉండ్రె నన్ని లోకుర్ కితాన్.

15 యూదురి రూలుదు మని ఆడ్రెజు, రూలుజు క్రీస్తు వన్ని ఒడొల్దు సాతి సావుదాన్ వన్కాజ్ నత్తు సిల్లెండ కితాండ్రె, అడు లెకెండ్ మహి పగ లాగితాన్. ఎందనిజ్ ఇహిజు, రుండి లోకురిజ్ ఇహిజు, యూదురిజ్, యూదురు ఆఇ వరిజ్ వన్ని వెట కుడుప్పి ఉండ్రె నని క్రొత్త లోకు కితాన్. యా లెకెండ్ వాండ్రు రాజినం కిబిస్తాన్.

16 మరి సిలువాదు సాతి సావుదాన్ వాండ్రు రుండి జాతిజు నడిమి మహి పగ సొన్నిసి, ఉండ్రె నని లోకుర్ లెకెండ్ కిజి, దేవుణు డగ్రు మరజి తతెజ్ యా లెకెండ్ రాజినం కిబిస్తాన్.

17 క్రీస్తు యా లోకమ్దు వాతండ్రె, దేవుణుదిజ్ దూరం మహి యూదురు ఆఇ మిజి, వన్ని డగ్రు మహి యూదురు ఆతి మజి సమాదనం సిజిని సువార్త వెహ్తాన్.

18 వన్ని వెట మజి రిఎరిజ్, ఇహిజు యూదురు ఆఇ మిజి, యూదురు ఆతి మజి, బుబ్బి ఆతి దేవుణు ముజాల దయ్ రమ్దాన్ సొండ్రెజ్ వన్నిజ్ లొస్తాజ్ అక్కు దొహ్కాద్. యాక దేవుణు ఆత్మ వెట మజి దొహ్కాద్.

19 అందెజె మీరు ఏలుదాన్ పయిదికిదెర్ ఆఇదెర్. దేవుణుదిజ్ సెందిఇకిదెర్ ఆఇదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్దికిదెర్.

20 ఉండ్రె ఇల్లు పణకాణిజ్ తొప్పిలెకెండ్ మీరు మనిదెర్. దనిజ్ పునాది ఆతికార్ ప్రవక్తరు, అపొస్తురు. దనిజ్ మూల పణకు క్రీస్తుయేసునె.

21 వాండ్రె ఆ ఇల్లు అరెండ్రె అస్సికాన్. వన్ని వెటనె ఆ ఇల్లు తొహె ఆజి పిరిసి ప్రబు ఆతి యేసు క్రీస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్.

22 క్రీస్తు వెట కూడితి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్మ సత్తుదాన్ మంజిని ఉండ్రె ఇల్లు ఆజినిదెర్.

3

యూదురు ఆఇ వరిజ్ సువార్త వెప్పి పణి పవులుజ్ దేవుణు ఒపజెప్పినాన్

1 అందెజె క్రీస్తు యేసుజ్ సేవ కిని వందిజ్ జెలిదు మని పవులు ఇని నాను మీ వందిజ్ పార్లనం కిజిన. యూదురు ఆఇ మిజీ సువార్త వెప్పొని వందిజె నాను జెలిదు ఆత.

2 మీరు తవ్ఎండ వెహిమనిదెర్. దేవుణు దయ దర్మమదాన్, మిజి సువార్త వెప్పొ పణి నజి ఒపజెప్తాన్

3-4 దేవుణు ఎత్తు కిజి వన్ని గర్భమదు డాప్తి ఇట్టిక వాండ్రు నా వెట తోరిస్తాన్. దిని వందిజ్ నాను ముస్కు కండెక్ రాస్త మన. అయాక మీరు సద్వితిజ, క్రీస్తు వందిజ్ దేవుణు ఎత్తు కిజి గర్భమదు డాప్తి ఇట్టిక నాను నెస్త మన ఇజి మీరు నెస్సిదెర్.

5 యాక దేవుణు పూర్బమదు మహి లోకురిజ్ తోరిసి నెస్పిన్ఎతాన్. గాని ఏలు వన్ని వందిజ్ ఏర్పాటు కిత్తి అపొస్తాడురిజ్, ప్రవక్తరిజ్ తోరిసి నెస్పిస్తాన్. దేవుణు ఆత్మదాన్ కెహు తోరిసి నెస్పిస్తాన్.

6 దేవుణు ఎత్తు కిజి గర్భమదు డాప్తి ఇట్టిక ఇనిక ఇహిజ, యూదురు ఆఇ వరిజ్, యూదురు ఆతి వరివెట దేవుణు సీని దీవెనమ్కాజ్ అక్కు మనాద్. యూదురు ఆఇకార్ని, యూదురు ఉండ్రె ఒడోల్ ఆత మనార్. దేవుణు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజ్బా వంతు మనాద్. యాకెజ్ మీరు సువార్త నమ్మిత్తిజ్ నె దొహ్కె.

7 యా సువార్తనె నాను లోకురిజ్ వెప్పొన. యా సువార్త పణినె దేవుణు వన్ని దయ దర్మమదాన్ నజి ఒపజెప్తాన్. వన్ని సత్తు సీజి నా వెట కిబిసినాన్.

8 దేవుణు లోకుర్ లోఇ నాను ఎందనిజ్ పణిదిజ్ రెఇకాన్. గాని వాండ్రు నజి యా పెరి పణి ఒపజెప్తాన్. ఇహిజ, క్రీస్తు సీజిని అంతు సిలి దీవెనమ్క వందిజ్ యూదురు ఆఇ వరిజ్ వెప్తాజ్,

9 మరి దేవుణు ఎత్తు కిజి గర్భమదు డాప్తి ఇట్టిక ఎలాగ వాండ్రు కినాన్ ఇజి లోకుర్ విజెరిజ్ నెస్పిస్తాజ్ వాండ్రు యా పణి నజి ఒపజెప్తాన్. విజు తయార్ కితి దేవుణు పూర్బమదాన్ అసి వాండ్రు ఎత్తు కిజి గర్భమదు ఇట్టిక లోకురిజ్ డాప్తాన్.

10 వాండ్రు ఎందనిజ్ యా లెకెండ్ డాప్తాన్ ఇహిజ, పరలోకమదు మని దూతారిజ్, వన్యా అతికారిజ, వాండ్రు గొప్ప గెణం మనికాన్ ఇజి దేవుణు నజం వెట ఏలు తోరిస్తాజ్ యాక వన్ని లోకుర్ వందిజ్ వాండ్రు ఆతి దనితాన్ తోరిసినాన్.

11 లోకం పుటిన్ఎండ ముజాలె, యా లెకెండ్ కిదెజ్ ఇజి దేవుణు ఎత్తు కిత్త మహాన్. అయాలెకెండ్ మా ప్రబు ఆతి క్రీస్తు యేసు వెట కిత్తాన్

12 మాటు వన్నిజ్ నమ్మిజినాట్. వన్ని వెట కూడిత మనాట్. అందెజె తియెల్ సిల్లెండ దయ్ రమ్దాన్ దేవుణు డగ్రు సొన్ని లొస్తాజ్ అక్కు దొహ్కె మనాద్.

13 అందెజె మా వందిజె వన్నిజ్ స్రమెజ్ వాతె ఇజి నా వందిజ్ విసారిస్మాట్ ఇజి నాను మిజి బతిమాల్జిన. గాని యా స్రమెజాణిజ్ మిజి గవరం సీనార్.

పవులు ఎపెసుదు మని నమ్మిత్తి వరి వందిజ్ పార్లనం కిజినాన్

14 దినివందిజె, నాను మా బుబ్బ ఆతి దేవుణు ఎద్రు ముణుకుజ్ ఊర్జి మీ వందిజ్ పార్లనం కిజిన.

15 పరలోకమదు మని నమ్మిత్తి విజెరిజ్, యా లోకమదు మని నమ్మిత్తి విజెరిజ్ వీండ్రె బుబ్బ. విజెరె వన్ని కుటుమ్దికార్.

16 వన్ని లోకుర్ వందిజ్ ఇట్టి మని నండొ దివెనమ్కాణిజ్, మీ మన్ను దయరమ్దాన్ నెగ్గెండ మండ్రెజ్ వన్ని ఆత్మ వెట సత్తు సీదెజ్ ఇజి నాను వన్నిజ్ పార్లనం కిజిన.

17 మీరు క్రీస్తుజ్ నమ్మిజినిదెర్. అందెజె వాండ్రు మీ మన్నుదు ఎలాకాలం మండ్రెజ్ ఇజి నాను పార్లనం కిజిన. మీరు దేవుణుదిజ్ ప్రేమిసి మహి వరిజ్ ప్రేమిసి మండ్రెజ్ ఇజి నాను పార్లనం కిజిన. అయ లెకెండొ కిజి మహిజ, బూమి లోఇ సారితీ సోహి వెల్లెజ్ మని మరాన్ లెకెండొ మీరు మనిదెర్. నెగ్గి పునాది మున్ను తోహ్కత్తి మని ఇల్లు లెకెండొ మనిదెర్.

18 అయావలె క్రీస్తు మజి ఎసా ప్రేమిసి నాన్ ఇజి మీరు, దేవుణు వందిజ్ కేట ఆతి లోకుర్ విజెరె వెట పూర్తి నెస్తెజ్ అట్టిదెర్. వాండ్రు మజి అంతు సిల్లెండ నండొ ప్రేమిసి నాన్.

19 ఎయెర్బా అర్లం కిదెజ్ అట్ఇ క్రీస్తు ప్రేమ మీరు నెసి నె మండ్రెజ్ ఇజి నాను పార్లనం కిజిన. దేవుణుదిజ్ మని పూర్తి బుద్ది మిజిబా మంజిని వందిజె నాను ఈహు పార్లనం కిజిన.

20 మాటు లొన్ని విజు దని ఇంక, ఒడిబిని దనిజ్ నండొ కిదెజ్ దేవుణు అట్నాన్. మా లొఇ పణి కిజిని వన్ని ఆత్మ సత్తుదాన్ నె వాండ్రు కిజినాన్.

21 క్రీస్తు యేసు వెట వాండ్రు కితి గొప్ప పణి వందిజ్, దేవుణు సజం వెట వాండ్రు కితి గొప్ప పణి వందిజ్ యా దేవుణుదిజ్ తర తరమ్కు పొగిడిజి మంజినాట్. వన్నిజ్ ఎలాకాలం పొగిడిజినాట్. ఆమెన్.

4

క్రీస్తు వెట ఉండ్రె ఒడొల్ ఆతాట్

1 అందెజె ప్రబుజ్ సేవ కిజిని వందిజ్ జెలిదు ఆతి నాను మిజి బతిమాలిజిన. దేవుణు మిజి నా లోకు ఇజి కూక్తివలె నెగ్గి సరిదు నడిదెజ్ ఇజి కూక్తాన్. దనిజ్ తగ్గి వజ మీరు మండ్రెజ్ ఇజి నాను మిజి బతిమాలిజిన.

2 ఎస్తివలెబా గర్ర అవిండ తగిజి మండ్రు. మహి వరివెట సార్లిదాన్ మండ్రు. మహి వరిజ్ ప్రేమిసి, వరి వందిజ్ ఒరిసి మండ్రు.

3 దేవుణు ఆత్మనె మిజి కుడుప్ప మనాన్. అందెజె మీరు ఉండ్రె ఆజి మంజిని వందిజ్ సమాదనమ్దాన్ కూడొజి పాడొజి మండ్రెజ్ నండొ సుడొదెజ్ వలె.

4 మాటు ఉండ్రె ఒడొల్. ఉండ్రె దేవుణు ఆత్మ మజి దొహ్క మనాన్. దేవుణు మజి వన్ని లోకుర్ ఇజి కూక్తివలె, వాండ్రు సీన ఇజి ఒట్టు కితి ఉండ్రె నని దీవనమ్క వందిజ్ మాటు విజెటి ఆనదాన్ ఎద్రు సుడొజినాట్.

5 మజి విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్తిసం లాగె ఆతాట్.

6 మాటు ఒరెండ్రె దేవుణుదిజ్ మాడిస్నాట్. వాండ్రె విజెరిజ్ బుబ్బు. వాండ్రె విజెరె మున్ను అతికారం కినికాన్. వాండ్రె మా లొఇ మంజినాన్. మా వెట పణి కిబిసి నాన్.

7 గాని మా లొఇ ఒరెన్ ఒరెన్ వన్నిజ్ ఉండ్రె ఉండ్రె వరం, క్రీస్తు మజి సితాన్. అయాక వన్నిజ్ ఇన్లం ఆతి వజ వాండ్రు సీబాత సితాన్.

8 అందెజె దేవుణు మాటదు రాస్త మనాద్, “వాండ్రు ఎత్తు మని బాన్ ఎక్కి సొహివలె, వాండ్రు ఉద్దం గెలస్తవలె, అస్తి వరిజ్ వన్నివెట తోహ్క ఒతాన్. వాండ్రు లోకురిజ్ ఇనాయమ్కు సీబాత సితాన్”, ఇజి.

9 (వాండ్రు ‘ఎక్త సొహాన్’, ఇజి వెహ్నిని దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిగి మని యా బూమిదు వాతాన్.

10 యా బూమి ముస్కు డిగితి వాతికాండ్రె అగాసం డాట్టి ముస్కు నండొ అతికారం మని బాన్ ఎక్కి సొహివాన్. యా బూలోకమ్దు మని విజు వన్నాజ్ వన్ని వెట పూర్తి కిదెజె వాండ్రు ముస్కు ఎక్త సొహాన్)

11 వాండ్రె, లోకురిజ్ ఒరెన్ ఒరెన్ వన్నిజ్ ఉండ్రీ ఉండ్రీ వరం ఒపజెప్తాన్. సెగొండారిజ్ అపొస్తురు ఇజి సెగొండారిజ్ ప్రవక్తరు ఇజి, సెగొండారిజ్ సువార్త వెహ్నివార్ ఇజి, సెగొండారిజ్ దేవుణు సజం సుడెజి, నెస్సిసి, వరిజ్ నెగ్రెండ నడిపిన్ని పాస్టరుజు ఇజి వాండ్రు ఏర్పాటు కిత్తాన్.

12-13 ఎండనిజ్ ఇహిజ, దేవుణు లోకురిజ్ దేవుణు పణి కిదెజె పూర్తి నెస్పిజె యా లెకెండ్ ఏర్పాటు కిత్తాన్. క్రీస్తు ఒడొల్ ఆతి దేవుణు సజమ్దికార్ దేవుణుదిజ్ నెసి పూర్తి పిరిని వందిజె దేవుణు లోకుర్ దేవుణు పణి కిదెజ్. అయా లెకెండ్ మాటు దేవుణుదిజ్ నమ్మిజి, వన్ని మరిసిజ్ నెసి ఉండ్రె ఆజి మంజినాట్. మాటు పూర్తి బుద్ది వాతి వరి లెకెండ్ పిరినాట్ ఇహిజ క్రీస్తు లెకెండ్ పూర్తి ఆనాట్.

14 అయావలె మాటు కొడొర్ లెకెండ్ మన్ఎట్. గాలి డెయిజి, ఉల్కెజ్ ఇతల్ అతాల్ దూక్కిని డొణి లెకెండ్, అబద్ బోద్ నెస్సిన్ని మొసెం కిని వరి బాణిజ్ మొసెం ఆవట్.

15 గాని మాటు ఎస్తివలెబా నిజం వెహ్ని ప్రేమిసి మండ్రెజ్. అయాలెకెండ్ మాటు కిజిని విజు వన్నా లొఇ, క్రీస్తు లెకెండ్ పూర్తి ఆనాట్. వాండ్రె మా బుర్త లెకెండ్.

16 మాటు వన్ని ఒడొల్. ఒడొల్దు ఒడొల్ది అత్కుజ్ అత్కిస్తి లెకెండ్ క్రీస్తు మజి అత్కిస్తాన్. ఒడొల్ది అత్కుజ్ విజు అయాకెజ్ పణి కిదెజ్ మని లెకెండ్ పణి కితిజ, ఒడొల్ సత్తుదాన్ పిపినాద్. అయాలెకెండ్ దేవుణు సజమ్దికార్ ఒరెన్ మరి ఒరెన్ వన్నిజ్ ప్రేమిసి వారు కిదెజ్ మనికెజ్ కితిజనె దేవుణు సజం సత్తుదాన్ పిపినాద్.

17 అందెజె ప్రబు నజి సీతి అతికారమ్దాన్ నాను మిజి వెహ్నిన్. నాను డటమ్నె మిజి వెహ్నిన్. ఏలుదాన్ దేవుణుదిజ్ నెస్ఇకార్ కిజిని లెకెండ్ మీరు మన్మాట్. వారు పణిదిజ్ రెఇకెజ్ ఒడొబినార్

18 వరి మన్నుదు సీకాట్ మని లెకెండ్ మనార్. దేవుణు సీజిని కొత్త బత్కుదిజ్ దూరం మనార్. ఎండనిజ్ ఇహిజ, దేవుణు వందిజ్ నిజమాతికెజ్ వారు అర్దం కివెర్. వరి మన్ను గటిదిక.

19 వరిజ్ సిగు సొహాద్. వారు ఒడొల్ది సెఇ ఆసెజ ఒజ ఆతార్. విజు రకమ్కాణి పాపమ్కు కిజినార్. వారు అయాకెజ్ డిన్ఎర్. మరి మరి కిదెజె ఆస ఆజినార్.

20 గాని మీరు క్రీస్తు వందిజ్ నెస్తివలె అయాలెకెండ్ మండ్రెజ్ అఎద్ ఇజి నెస్తిదెర్.

21 నిజమనె, మీరు వన్ని వందిజ్ వెహిదెర్. మీరు వన్ని వెట కూడితివలె యేసు వందిజ్ నిజమాతి దనిజ్ తగ్గివజ మిజి దేవుణు ఆత్మ నెస్సిన్తు మనాన్.

22 మీరు బత్కిజి మహి పడాఁఇ బత్కు డిస్టు ఇజిని నెస్తిస్తాన్. పడాఁఇ బత్కుదు, మిజి మహి సెఇ ఆసెజ్ మిజి మొసెం కిజి పాడు కిజెనె మహె.

23 మీ బుద్దిని మీ మన్ను దేవుణు మారిస్టెజ్ వలె.

24 దేవుణు మిజి వన్ని నని బుద్ది సితాన్. అందెజె వాండ్రు సితీ ఆ కొత్త బుద్దిదాన్ మీరు మండ్రు. అయావలె నీతి నిజాయితిదాన్ మంజినిదెర్. తప్పజ్ కిఎండ మంజినిదెర్.

25 అందెజె ఏలుదాన్ అబద్దం వర్గిమాట్. మహి వరి వెట నిజం వర్గిదెజ్ వలె. ఎందనిజ్ ఇహిజ మాటు ఉండ్రె ఒడొఁల్దిజ్ సెందితికాట్.

26 మీరు కోపం ఆతిజ, మీ కోపం మిజి పాపం కిబిన్ఎండ సుడఁదెజ్. మీ కోపం వెడారు మండ్రెజ్ ఆవద్.

27 తప్ప కిబిస్తెజ్ నయితాన్దిజ్ సరి సీమాట్.

28 డొజ కిజి మహికాన్ ఏలుదాన్ డొజ కిదెజ్ ఆవద్. గాని వాండ్రు వన్ని కికాణిజ్ కర్ణబడిఁజి వన్నిజ్ పణిదిజ్ వానికెజ్ కిదెజ్. ఎందనిజ్ ఇహిజ, అయావలె వాండ్రు బీదవరిజ్ సాయం కిదెజ్ అట్వాన్.

29 మీ వెయ్దాన్ సెఇ మాటెజ్ వాదెజ్ ఆవద్. గాని మహికార్ నమకమ్దు పిరిదెజ్ తగ్గి నెగ్గి మాటెజ్ వర్గిదెజ్. లోకురిజ్ వరి అవుసరం సుడఁజి వర్గిదెజ్. ఎందనిజ్ ఇహిజ అయావలె మీ మాటెజ్ వెని వరిజ్ లాబం మంజినాద్.

30 దేవుణు ఆత్మదిజ్ దుకం కిబిస్తాట్. ఎందనిజ్ ఇహిజ, దేవుణు మిజి పూర్తి విడుఁదల కిని దినమ్దాక మీరు వన్ని లోకుర్ ఇని దనిజ్ గుర్తు యా దేవుణు ఆత్మనె.

31 మీ లొఇ మని కుత అస్సిక, కోపం, పగ అస్సిక, జటిజ్ ఆనిక, దుసలాడఁనిక, మహి వరిజ్ సెఇకెజ్ కిజి బుద్ది, మీ లొఇహాన్ డిఁస్తు.

32 గాని మహి వరి వందిజ్ నెగ్గికెజ్ కిదు. వరిజ్ కనికారం తోరిస్తు. మిజి కితి సెఇ దని వందిజ్ సెమిస్తు. క్రీస్తు వెట దేవుణు మీ తప్పుజ సెమిస్తి లెకెండ, మీరు వరిజ్ సెమిస్తు.

5

1 అందెజె మీరు దేవుణుదిజ్ పోలిజి మండ్రు. ఎందనిజ్ ఇహిజ, వాండ్రు నండొ ప్రేమిన్ని వన్ని కొడొఁరె మీరు.

2 క్రీస్తు మజి ప్రేమిస్తాండ్రె, మా వందిజ్ సాదెజ్ వన్నిజ్ వాండ్రె ఒపజెపె ఆతాన్. వాండ్రు వన్ని పాణం నెగ్గి వాసనం సీని పూజ లెకెండ సితాన్. దనివెట దేవుణు సర్దద ఆతాన్. అయావజ మీరుబా ఒరెన్ మరి ఒరెన్ వన్నిజ్ ప్రేమిసి మండ్రు.

3 మీ లొఇ ఎయెన్బా రంకు బూలమాట్. కెలార్ బూలమాట్. మని దనిజ్ ఇంక మరి నండొ కావాలి ఇజి ఆస ఆమాట్. నిని పణి మీ లొఇ మంజినె ఇజి మహికార్ వెప్తాజ్బా సరి సీదెజ్ ఆవద్. ఎందనిజ్ ఇహిజ, మీరు దేవుణు లోకుర్.

4 గాని మీ లొఇ కేడి మాటనొ, బుద్ది సీలి మాటనొ వెంజి, సిగు ఆని మాటెజ్నొ వర్గిదెజ్ ఆవద్. అయాకెజ్ మిజి తగ్ఉ. గాని దేవుణుదిజ్ వందనమ్కు మీరు వెప్తాజ్.

5 యాక మీరు తవ్ఎండ నెస్తు రంకు బూలానికాన్, కెలార్ బూలానికాన్, మని దనిజ్ ఇంక మరి నండొ కావాలి ఇజి ఆస ఆనికాన్ ఎయెన్బా దేవుణుని క్రీస్తు ఏలుబడిఁ కిని లోకుర్ లొఇ మన్ఎర్. అబె అక్కు మనికార్ ఆవర్. మని దని ఇంక మరి నండొ కావాలి ఇజి ఆస ఆనికాన్, బొమెజ మాడిఁస్సి వన్నిలెకెండ మనాన్. వాండ్రు వన్నిజ్ కావాలి ఇజి ఆస ఆని దనిజె దేవుణు ఇజి ఒడిఁబినాన్.

6 పణిదిజ్ రెఇ మాటెజ్ వెస్పి ఎయెన్బా మిజి మొసెం కిఎండ సుడఁదు. ఎందనిజ్ ఇహిజ, సెఇకెజ్ కిజి దేవుణుదిజ్ లొజిఎండ మని వరిజ్ వాండ్రు సిక్స నీనాన్.

7 అందెజె నని వరి వెట జత కూడాట్.

8 ఎందనిజ్ ఇహిజ, ఉండ్రీ కాలమ్దు మీరు సీకటుదు బత్కితిదెర్. గాని ఏలు మీరు ప్రబు వెట కూడితిదెరె జాయిదు బత్కిజినిదెర్. అందెజె జాయిదు బత్కిజిని వరిలెకెండ్ బత్కిదు.

9 ఎందనిజ్ ఇహిజ జాయిదు బత్కిజినికార్, ఎస్తివలెబా నెగ్గికెజ్, నీతి మనికెజ్, నిజమాతికెజ్ కిజి మంజినార్.

10 ప్రబుజ్ ఇనికెజ్ ఇస్టం ఇజి నెసి అయావజ కిదెజ్ సుడోదు.

11 సీకటుదు మనికార్ కిని పణిదిజ్ రెఇ పణిజ వెట కూడాట్. గాని అయాకెజ్ సెఇకెజ్ ఇజి లోకురిజ్ వెప్తు.

12 వారు నడి సిల్లెండ కిజిని పణిజ వందిజ్ వెప్తాజ్బా సిగునె.

13 గాని విజు వన్కాజ్ జాయి వెల్లి తపిస్సివలె అయాకెజ్ ఇనికెజ్ ఇజి లోకుర్ నెస్సార్. ఎందనిజ్ ఇహిజ, జాయి నిజమాతికెజె వెల్లి తోర్నాద్.

14 అందెజె వెప్సి మంజినార్, “నెర్ది కిజినికి తెలి ఆఅ. సాతి వరిబాణిజ్ నిజ్అ. క్రీస్తు నిజి జాయి సీనాన్”, ఇజి.

15 అందెజె మీరు ఎలాగ నడిజినిదెర్ ఇజి జాగర్త సుడోదు. బుద్ది సిలివరి లెకెండ్ ఆవండ, బుద్ది మని వరిలెకెండ్ నడిదు.

16 కాలం గడాప్పాట్. ఎందనిజ్ ఇహిజ ఏలు నెగ్గి దనిమ్కు ఆఉ.

17 అందెజె బుద్ది సిలిలెకెండ్ బత్కిమాట్. గాని ప్రబుజ్ ఇనికెజ్ ఇస్టం ఇజి నెసి అయాకెజ్ కిదు.

18 మతు సీనికెజ్ ఉణిజి సోసి మన్మాట్. ఎందనిజ్ ఇహిజ అయాక పాడు కినాద్. గాని దేవుణు ఆత్మదాన్ నిండ్రీజి మండ్రు.

19 మీరు ఒరెన్ మరి ఒరెన్ వన్ని వెట వర్గిని వలె దేవుణు మాటెజ్ పాటెజ్ వజ వెప్సి, దేవుణుదిజ్ పొగిడిజి వందనమ్కు వెప్సి, దేవుణు ఆత్మ మీ మన్నుదిజ్ రేప్సిని వజ పాటెజ్ వెప్సి వర్గిదు. మీ మన్ను పూర్తిదాన్ ప్రబు ఆతి దేవుణుదిజ్ పాటెజ్ పార్డు.

20 మా ప్రబు ఆతి యేసు క్రీస్తు వెట మజి దోహ్కాత్తి మని విజు దని వందిజ్ ఎస్తివలెబా మా బుబ్బు ఆతి దేవుణుదిజ్ వందనమ్కు వెప్తు.

దేవుణు సజమ్దిజ్ క్రీస్తు మాసి

21 క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నిజ్ లోజిదు.

22 బోదెకాండె, మీరు ప్రబుజ్ లోజిజిని వజ మీ మాసిరిజ్ లోజిదు. మాసిరు మీ మున్ను అతికారం మనికార్ ఇజి ఒడోబిజి వరిజ్ లోజిదు.

23 ఎందనిజ్ ఇహిజ క్రీస్తు, విజు దేవుణు సజమ్కాజ్ బుర్ర ఆతి లెకెండ్, మాసి వన్ని బోదెల్దిజ్ బుర్ర ఆత మనాన్. దేవుణు సజమ్కు విజు క్రీస్తు ఒడోల్నె. వాండ్రె విజు దేవుణు సజమ్కాజ్ రక్కిస్సికాన్.

24 విజు దేవుణు సజమ్కు క్రీస్తుజ్ లోజిజిని వజ, బోదెకుబా వన్కా మాసిరిజ్ విజు వన్కా లోఇ లోజిదెజ్.

25 మొగ్గ కొడోరాండె, మీరు మీ బోదెకాజ్ ప్రేమిస్తు. క్రీస్తు విజు దేవుణు సజమ్కాజ్ ప్రేమిసి విజు సజమ్క వందిజ్ సాతిలెకెండ్ మీరు మీ బోదెకాజ్ ప్రేమిస్తు.

26-27 క్రీస్తు ఎందనిజ్ విజు దేవుణు సజమ్కాజ్ వందిజ్ సాతాన్ ఇహిజ, విజు దేవుణు సజమ్కు సుబ్బరమ్దాన్ మండ్రెజ్ ఇజినె. వాండ్రు దేవుణు మాటదాన్,

బాప్తిసమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుజ సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్రెండ తోరిస్తైజె విజు దేవుణు సజమ్క వందిజ్ వాండ్రు సాతాన్.

28 అయలెకెండెన్ క్రీస్తు విజు దేవుణు సజమ్కాజ్ ప్రేమిసినాన్. అయలెకెండెన్ ఒరెన్ మాసి ఆల్పిజ్ ప్రేమిస్తైజ్. ముకెలం మాసిరు వరి సొంత ఒడొల్దిజ్ ప్రేమిస్సి లెకెండ, వరి బోదెకాజ్ ప్రేమిస్తైజ్ వలె. వన్ని బోదెల్దిజ్ ప్రేమిస్సికాన్ వన్నిజ్ వాండ్రె ప్రేమిస్సాన్.

29-30 ఎందనిజ్ ఇహిజు ఎయెన్బా వన్ని సొంత ఒడొల్దిజ్ దూసిన్ఎన్. గాని దనిజ్ నెగ్రెండ సుడొజి పొన్ కినాన్. మాటు క్రీస్తు ఒడొల్దు అత్కిత మనాట్. అందెజె క్రీస్తు వన్ని ఒడొల్ ఆతి విజు దేవుణు సజమ్కాజ్ నెగ్రెండ సుడొజినాన్.

31 యాక దేవుణు మాటదు రాస్తి మని లెకెండ మనాద్. అందెజె, “మొగకొడొ వన్ని అయిసి అప్పొసిరుజ్ డిసి వన్ని బోదెల్ వెట కూడొనాన్. వారు రిఎర్ ఉండ్రె ఒడొల్ అనార్”.

32 యా మాటదిజ్ నండొ నిరి అర్లం మనాద్. గాని యా మాటజ్ క్రీస్తు వెట విజు దేవుణు సజమ్కాజ్ మని సమదం వందిజ్ వెప్పినికెజ్ ఇజి నాను ఒడొబిజిన.

33 గాని యా మాటజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రేమిస్సి లెకెండ, వాండ్రు వన్ని బోదెల్దిజ్బా ప్రేమిస్తైజ్ వలె. మరి బోదెల్ మాసిజ్ గవరం సీదెజ్ వలె.

6

కొడొరిజ్, అయిసి అప్పొసిరిజ్ వెప్పినిక

1 కొడొరాండె, మీరు ప్రబు వెట కూడితి మనికిదెర్. అందెజె మీ అయిసి అప్పొసిరిజ్ లోజిదు. యాక కిదెజ్ తగ్గికాదె.

2-3 దేవుణు మాటదు రాస్త మనాద్, “మీ అయిసి అప్పొసిరిజ్ గవరం సీదు. యాకదె దేవుణు వెప్పొ ఆడెజు లోఇ ఒట్టుదాన్ కూడితి మని మొదొహి ఆడ్ర. అయా ఒట్టు ఇనిక ఇహిజు, ‘మీరు మీ అయిసి అప్పొసిరిజ్ లోజితిజు విజు మిజి నెగ్రెండ మంజినె. మీరు నండొ పంటజ్ యా బూమిదు బత్కినిదెర్’.

4 అప్పొసిరాండె, మీరు మీ కొడొర్ మన్నుదిజ్ కోపం రేవ్మాట్. గాని ప్రబుజ్ ఇస్తుం ఆతి వజు, వరిజ్ బుద్ది వెప్పొ, నెస్సిసి పొస కిదు.

వెట్టిపణి కిని వరిజ్ ఎజుమానిరిజ్ వెప్పొనిక

5 వెట్టిపణి కినికిదెరా, బూమి ముస్కు మని మీ ఎజుమానిరిజ్ లోజిదు. మీరు క్రీస్తుజ్ లోజిజిని లెకెండ వరిజ్ లోజిదు. మీరు పూర్తి మన్నుదాన్ వరిజ్ తియెల్ ఆజి వరిజ్ సీని గవరం సీజి లోజిదు.

6 నెగ్గికార్ ఇజి వెహె ఆదెజ్ వారు సూణివలెనె ఆవెద్. వరిజ్ లోజిదెజ్. గాని మీరు కిదెజ్ ఇజి దేవుణు కొరిజిన వజు మీ పూర్తి మన్నుదాన్ కిదు. ఎందనిజ్ ఇహిజు మీరు క్రీస్తుజ్ వెట్టి పణిమణిసీర్.

7 మీరు పణిజ్ కిని వలె, లోకుర్ వందిజె కిజినాప్ ఇజి ఆవండ, దేవుణు వందిజ్ కిజినాప్ ఇజి సర్దదాన్ కిదు.

8 ఎందనిజ్ ఇహిజు వెట్టిపణి కినికాన్ ఆతిజ్బా, మరి ఎయెన్ ఆతిజ్బా మరి ఇని నెగ్గి పణి కినికాన్ ఆతిజ్బ ప్రబు పలితం సీనాన్ ఇజి మీరు నెసినిదెర్.

9 ఎజమానురుజాండె, మీరుబా మీ వెట్టిపణి మణిసిరిజ్ నెగ్రెండ సుడెడు. వరిజ్ బెద్రిస్సాట్. ఎందనిజ్ ఇహిజ మీరు నెస్సిదెర్, మిజిని వరిజ్ ఒరెన్ ఎజమాని దేవుణు మంజిని బాడిడు మనాన్. ఇజ్రికాన్ పెరికాన్ ఇజి వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజి వెహ్సినాన్

10 కడెవెరిదు నాను మిజి వెహ్సిన, ప్రబు వెట మీరు కూడెజి వన్ని సత్తుదాన్ మండ్రు. ఎందనిజ్ ఇహిజ వన్ని సత్తు గొప్ప పెరిక.

11 దేవుణు సీజిని విజు అయుదమ్కు తొడిగిజి తయార్ ఆజి మండ్రు. సయ్తాను అడ్డుజ ఎద్రిసి గెలస్సివందిజ్ యా లెకెండ తొడిగిజి తయార్ ఆజి మండ్రు.

12 ఎందనిజ్ ఇహిజ, మాటు లోకుర్ వెట ఆవద్ ఎద్రిస్సిక. గాని సీకటుదు మని లోకుర్ ముస్సు అతికారం కిజిని దెయమ్క వెట, వన్యా నెయ్కిర్ వెట, ఆగాసమ్దు మని విజు దెయమ్కాజ్నె మాటు ఎద్రిసినాట్.

13 అందెజె మీరు దేవుణు సీజిని విజు అయుదమ్కు తొడిగిజి సయ్తానుజ్ ఎద్రిస్సిజ్ తయార్ ఆజి మండ్రు. నెఇ దినమ్కు వానివలె, దయిరమ్దాన్ నిల్దెజ్ అట్టిదెర్. ఆకర్ దాక, మీరు దయ్రమ్దాన్ నిల్దెదెర్.

14 అందెజె మీరు దయ్రమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెట్టు తొహె ఆజి విదెమ్దిజ్ తయార్ ఆజిని లెకెండ, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడెండ మంజిని వందిజ్ ఇనుము కవసం తొడిగిజిని లెకెండ దేవుణు ఎద్రు నీతి నిజాయితిదాన్ మంజి, సయ్తాన్ బాణిజ్ తప్రె ఆదు.

15 జార్ఎండ నెగ్రెండ నిల్పి వందిజ్ బూట్టు తొడిగిని లెకెండ సమాదనం సీజిని సువార్త మాట నమ్మిజి, సయ్తానుజ్ ఎద్రిసి నెగ్రెండ నిల్దు.

16 యాకెజె ఆవిండ, ఒరెన్ ఉడ్డం కినికాన్, వన్నిజ్ పడెఇకాన్ వన్ని ముస్సు పొక్కిని సిసు బాణమ్కు డాలు అసి నప్పి ఎద్రిస్సి లెకెండ, సయ్తాను బాణిజ్ తప్రె ఆదెజ్ ఎస్తివలెబా యేసు క్రీస్తు ముస్సు నమకం ఇడ్జిని మండ్రు.

17 బుర్దు దెబ తగ్గిఎండ మంజిని వందిజ్ గొప్ప గటి మని టోపి తొడిగిని లెకెండ దేవుణు మిజి రక్సీనత మనాన్ ఇజి నెసి నమ్మిజి సయ్తాన్ మిజి బాదెజ్ కిఎండ వన్ని బాణిజ్ దూరం మండ్రు. కీదు కూడం అసి తయార్ అతి లెకెండ, దేవుణు మాటదాన్ సయ్తానుజ్ ఎద్రిస్సిజ్ తయార్దాన్ మండ్రు. దేవుణు ఆత్మ మిజి సీజిని కూడెమ్నె దేవుణు మాట.

18 దేవుణు ఆత్మ మన్సుదు వెహ్సి నడిపిస్సి లెకెండ ఎస్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎస్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిెస్సాట్. దేవుణు వందిజ్ కేట అతి లోకుర్ విజెరె వందిజ్ ఎస్తివలెబా పార్దనం కిదు.

19 నా వందిజ్బా పార్దనం కిదు. నాను వర్గిని వలె నెగ్గి మాట నా వెయిదు దేవుణు సిని లెకెండ, ఎందనిజ్ ఇహిజ, సువార్తదు ముజాలె డాజితి మహి. గాని ఏలు దేవుణు తోరిసి నెన్పిస్సి గొప్ప నజతిజ్ వెల్లి తసి దయిరమ్దాన్ లోకురిజ్ తోరిస్సెజ్.

20 యా సువార్త వెహ్సెజ్, వన్ని కబ్బు తనివన్ని లెకెండ యేసుక్రీస్తు నజి ఏర్పాటు కిత్తాన్. దిని వందిజె ఏలు నాను జెలిదు మన. అందెజె నాను నెగ్రెండ దయిరమ్దాన్ వెహ్సెజ్, మని లెకెండ వెహ్సెజ్ నా వందిజ్ పార్దనం కిదు.

21 మాటు ప్రేమ కిజిని మా తంబెరి ఆతి తుకికు, నా వందిజ్ మిజి విజు వెహ్వాన్. నాను ఇనిక కిజిన, ఎలాగ మన ఇజి మీరు నెస్తెజ్ నా వందిజ్ వాండ్రు వెహ్వాన్. వాండ్రు ప్రబు వందిజ్ నమ్మకమ్దాన్ సేవ పణి కిజినికాన్.

22 మజి జర్గిజిని దని వందిజ్ మిజి వెహ్వాజ్, మిజి దయిరం మాట వెహ్పి ఓదరిస్తెజ్, దిని వందిజె నాను వినిజ్ మీ డగ్గు పోక్కిన.

23 మా బుబ్బ ఆతి దేవుణుని మా ప్రబు ఆతి యేసు క్రీస్తు, తంబెరిజు ఆతి మీరు విజెరె, నిపాతిదాన్ మండ్రెజ్ సాయం కిపిన్. మీరు మహి వరిజ్ ప్రేమిసి మండ్రెజ్ క్రీస్తుజ్ నమ్మిజినె మండ్రెజ్ సాయం కిపిన్.

24 కొస సిల్లెండ, మా ప్రబు ఆతి యేసు క్రీస్తుజ్ ప్రేమిన్ని విజెరిజ్ దేవుణు దయ దర్మం మనీద్.

అపొస్తుడు ఆతి పవులు పిలిపియ పట్టుమ్దు మని దేవుణు సజమ్దిజ్ రాస్తి ఉత్తం నెల్వ కిబిస్సిక

అపొస్తుడు ఆతి పవులు పిలిపియ పట్టుమ్దు మని దేవుణుదిజ్ నమ్మిత్తి వరి సజమ్దిజ్ రాసిని ఉత్తమ్నె యాక. యా సజం మొదొల్న్సికాన్ పవులునె. డగ్రు పది పంటిజ్ వెనుక, సువార్త వెప్పిని వందిజ్ పవులు జెలిదు మహివలె, యా సజమ్దికార్ వన్నిజ్ ఎత్తు కితారె, వరి లొఇ మని ఎపప్రాదితుజ్ వన్నిజ్ తోడు: కిని వందిజ్ పోక్కినార్. పవులుజ్ సాయమ్బా వన్ని వెట పోక్కినార్. వారు కితి యా నెగ్గి పణి వందిజ్ వరిజ్ వందనమ్కు వెప్పి రాసిని ఉత్తమ్నె యాక. నిజమాతి సరద యేసుక్రీస్తు బాణిజె వానాద్ ఇజి వెప్పి వరిజ్ దయరం కిబిసిన్.

1 క్రీస్తు యేసు పణిమనిసి ఆతి పవులు ఇని నాను రాసిని ఉత్తం. క్రీస్తు యేసు పణిమనిసి ఆతి తిమోతి నా వెట మనాన్. పిలిపియ పట్టుమ్దు మని క్రీస్తు యేసు వెట కూడితి మని దేవుణుదిజ్ కేట ఆతి విజెరిజ్, మరి సజం నడిపిస్సి ప్లాస్టర్జ, సజ పెద్దల్జ, రాసినిక.

2 బుబ్బు ఆతి దేవుణు ని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

పవులు కిని పార్దనం

3 నాను ఎస్తివలెబా, మిజి ఎత్తు కినివలె, నా దేవుణుదిజ్ మీ వందిజ్ వందనమ్కు వెప్పిన్.

4-5 మీరు సువార్త వెంజి, నమ్మిత్తి దినందాన్ మొదొల్ని ఏలుదాక, సువార్త సాటిస్సి వందిజ్ మీరు నా వెట జత్త కూడితి మనిదెర్. అందెజె మీ విజెరె వందిజ్ నాను పార్దనం కినివలె, నాను సరదదాన్ పార్దనం కిజిన.

6 మరి, మీ మన్నుదు నెగ్గి పణి మొదొల్న్సి దేవుణు, క్రీస్తు యేసు వాని రోజుదు అయాక పూర్తి ఆనిదాక, వాండ్రు నడిపిసినె మంజినాన్. యా సజతి, నాను అనుమానం సిల్లెండ పూర్తి నమ్మిజిన.

7 మిజి నాను నండొ పెమిన్సు. అందెజె మీ విజెరె వందిజ్ యా లెకెండ్ నాను ఒడేబిదెజ్ తగ్గికాదె. ఎందనిజ్ ఇహిజ, నాను జెలిదు మనివలెబా, సువార్తదిజ్ విరోదం ఆతికెజ్ వెప్పి వరిజ్ నెగ్గెండ మర్జి వెప్పి, అయా సువార్త నిజం ఇజి లోకురిజ్ వెప్పి తోరిస్సి వలెబా, దేవుణు సజి సీతి యా గొప్ప పణిదు మీరు విజెరె నా వెట కూడితి మనిదెర్.

8 క్రీస్తు యేసు మిజి ప్రేమిసిని వజనె, నానుబా మిజి ప్రేమిన్సు. మిజి విజెరిజ్ నండొ ఎత్తు కిజిన యాక నిజం ఇని దనిజ్ దేవుణునె సాక్కి.

9-11 నాను ఈహునె మీ వందిజ్ పార్దనం కిజిన ఇనిక వాతిజ్బా, మీరు ఒరెన్ మరి ఒరెన్ వన్నిజ్ నెగ్గెండ లావు ప్రేమిసి మండ్రెజ్ ఇజి పూర్తి నెస్టెజ్ ఇజి, మరి, ఇనిక వాతిజ్బా, నెగ్గెకెజ్ ఇని ఇనికెజ్, సెఇకెజ్ ఇని ఇనికెజ్ ఇజి మీరు పూర్తి నెస్టెజ్ ఇజి నాను పార్దనం కిజిన. నాను ఎందనిజ్ ఈహు పార్దనం కిజిన ఇహిజ, క్రీస్తు వాని

రోజుదాక నెగ్గక ఇనిక ఇజి టెట నెసి మీరు ఇని పాపం సిల్లెండ, ఇని నింద సిల్లెండ నెగ్గెండ మండ్రెజ్. మరి, యేసు క్రీస్తు సత్తుదాన్ మీ బత్తు విజు పలితం వాని లెకెండ నీతి నిజయితిదాన్ మంజిని వందిజ్ నాను ఈహు పార్దనం కిజిన. నాను యా లెకెండ పార్దనం కిజిన, ఎందనిజ్ ఇహిజ, మీ బత్తు సుడేజి లోకుర్ దేవుణుదిజ్ గనం సీదెజ్, పొగిడిదెజ్.

పవులు జెలిదు మనిక సువార్త సాటె ఆని వందిజ్ నెగెద్

12 తంబెరిజాండె, నజి వాతి బాదెజ్ విజు, మరి నండో లోకుర్ సువార్త విని వందిజ్ పణిదిజ్ వాతాద్ ఇజి మీరు నెస్టెజ్ ఇజి నాను కోరిజిన.

13 అందెజె, క్రీస్తు వందిజ్ సువార్త వెప్పిని వందిజ్ నె తోహె ఆత మన ఇజి రాజు ఇండ్రో మని జమనుజు విజెరిని మరి పట్టుమది లోకుర్ విజెరి ఏలు నెస్త మనార్.

14 మరి నాను తోహె ఆతి మనిజ్, నమ్మిత్తి తంబెరిజా లోఇ నండోడార్ దయరమ్దాన్ తియెల్ సిల్లెండ దేవుణు మాట వెప్పినార్. ఎందనిజ్ ఇహిజ, నాను జెలిదు మహివలె, ప్రబు ఎలాగ నజి సాయం కితాన్ ఇజి వారు సుడతార్. అందెజె, వారు ప్రబు ముస్కు నండో నమకం ఇట్టా మనార్.

15-17 నిజమె, నెగొండార్ నా ముస్కు గోస ఆజినార్. గొడుబెజ్ ఆజినార్. అందెజె వారు క్రీస్తు వందిజ్ వెప్పినార్. వీరు నెగ్గి మన్సుదాన్ ఆవిండ, పవులు ముస్కు మాపు పెరికాప్ ఇజి పొజె ఆని వందిజె క్రీస్తు వందిజ్ వెప్పినార్. ఈహు కితిజ, నాను జెలిదు మనివలె, మరి నండో బాదెజ్ నజి వానె ఇజి వారు ఒడేబిజినార్. గాని మరి నెగొండార్ నెగ్గి బుద్దిదాన్ వెప్పినార్. వీరు నజి ప్రెమిసినార్. సువార్తదిజ్ ఎద్రిన్సి వరిజ్, మర్జి వెప్పి నిజం ఇజి తోరిస్టెజ్ దేవుణు నజి ఏర్పాటు కిత మనాన్ ఇజి వీరు నెసినార్. అందెజె వీరు నెగ్గి బుద్దిదాన్ వెప్పినార్.

18 వారు నా వందిజ్ ఇనిక ఒడేబితిజ్బా, ఇనిక కిదెజ్ సుడేతిజ్బా నజి ఇని తియెల్ సిల్లెద్. నెగ్గి బుద్దిదాన్ ఆతిజ్బా, సెఇ బుద్దిదాన్ ఆతిజ్బా, ఎలాగ ఆతిజ్బా, క్రీస్తు వందిజ్ వెహె ఆజినె. అయాకదె ముకెలం. దని వందిజ్ నాను సర్ద ఆజిన.

19 మరి, సర్ద ఆజినె మంజిన. ఎందనిజ్ ఇహిజ, మీ పార్దనమ్దాన్, యేసు క్రీస్తు నజి సీతి దేవుణు ఆత్మ సాయమ్దాన్, నజి ఏలు వాతి యా బాదెజ్ విజు, ఆకార్దు, నా విడుదల వందిజ్ నె వాతె ఇజి నాను నెసిన.

20 నాను ఇని దని లోఇబా సిగు ఆవిండ మండ్రెజ్ ఇజినె నాను నండో ఎద్రు సుడేజి ఆస ఆనిక. గాని ఎస్తివలెబా నాను కితి లెకెండ, ఏలుబా నండో దయరమ్దాన్ క్రీస్తు గొప్ప పెరికాన్ ఇజి తోరిస్తు. ఎందనిజ్ ఇహిజ, నాను సాతిజ్బా, బత్తితిజ్బా క్రీస్తు గొప్ప పెరికాన్ ఇజి నాను కిజిని విజు పణిజాణిజ్ నాను తోరిస్తు.

21 అందెజె నాను బత్తిజిన ఇహిజ క్రీస్తు వందిజె. నాను సాతిజ నజి లాబం. ఎందనిజ్ ఇహిజ, అయావలె నాను క్రీస్తు వెటనె మంజినలె.

22-23 గాని నాను బత్తిజి మహిజ, క్రీస్తు వందిజ్ పలితం వాని పణి కిదెజ్ అట్టు. అయావలె ఇనిక నాను కోరిదెజ్? సాదెజ్నా, బత్తిదెజ్నా? నాను నెన్ఎ. నాను రుండి వన్యాజ్ గుపె ఆజిన. యా లోకం డిసి క్రీస్తు వెట మండ్రెజ్ ఇజినె నా ఆస. ఎందనిజ్ ఇహిజ అయాకదె నజి ఒదె నెగెద్.

24-25 గాని నాను బత్తిజినిక, మిజి గొప్ప అవునరం. యాక నాను పూర్తి నెసిన. అందెజె, నాను మంజి మీ విజెరి వెట కూడేజి మండ్రెజ్ వలె ఇజి నెసిన. ఎందనిజ్

ఇహిజ, అయావలె, మీరు క్రీస్తుజ్ నెగ్రెండ నమ్మిజి మండ్రెజ్ సాయం కిని వందిజ్ నాను అట్టు. అయాలెకెండ మీరు నెగ్రెండ నమ్మిజినిజ్ మీరు సరద ఆనిదెర్.

26 అందెజె, నాను మీ వెట మరి కూడ్నివలె, క్రీస్తు మరి నజి మీ నడిఃమి తపిస్తాన్ ఇని దని వందిజ్ క్రీస్తుయేసుజ్ పొగిడిఃనిదెర్.

27 ఇనిక ఆతిజ్బా, క్రీస్తు వందిజ్ వెహ్నిని సువార్తదు మని దనిజ్ తగ్ని వజ నడిదు. ఎందనిజ్ ఇహిజ, నాను మీ డగ్రు వాజి, మిజి సుడఃతిజ్బా, సిలిజ రెఎండ మీ వందిజ్ వెహ్జబా, మీరు విజిదెరె సువార్తదు వెహ్నిని నమకం వందిజ్ ఉండ్రె మన్సు కల్లిజి ఉండ్రె ఉదెసమ్దాన్ ఉండ్రె ఆజి నెగ్రెండ నిల్పిదెర్లె ఇజి నాను నెస్సాలె.

28 మరి, మిజి ఎద్రిస్సి వరిజ్, ఇని దని లోఱ మీరు తియెల్ ఆఇదెర్ ఇజి నాను నెస్సాలె. యాక దేవుణు వరిజ్ నాసనం కినాన్ ఇని దనిజ్ నెగ్గి రుజుప్ ఆనాద్. గాని దేవుణు మిజి ఎల్లకాలం రక్సిస్సాన్లె ఇని దనిజ్బా రుజుప్ ఆనాద్. దేవుణునె యాకెజ్ విజు కినాన్.

29 క్రీస్తుజ్ నమ్మిదెజ్నె ఆవండ, వన్ని వందిజ్ కస్టమ్కు ఓరిస్తెజ్బా దేవుణు మిజి అక్కు సిత మనాన్.

30 అందెజె సువార్తదిజ్ విరోదం ఆతికెజ్ వెహ్నివరిజ్ ఎద్రిస్తిజ్ కస్టబడిఃజి దనిజ్ మాటు ఉండ్రె ఆతాల్. నాను ముజాలె, పిలిప్పియదు మహివలె ఎద్రిస్తిజ్ కస్టబడిఃతిక మీరు సుడఃతిదెర్. ఏలుబా కస్టబడిఃజినిక వెంజినిదెర్.

2

1 క్రీస్తు వెట కూడిఃతి మనిజ్, మీ బత్కుదు దయరం మనాద్ గదె? క్రీస్తు మిజి ప్రేమిసిని ప్రేమదాన్ మిజి నిపాతి కల్లిత మనాద్గదె? దేవుణు ఆత్మ వెట మిజి సమందం మనాద్ గదె? క్రీస్తు మీ వందిజ్ పాణం నొత మనాన్గదె?

2 ఆహె మహిజ, మీరు ఉండ్రె లెకెండ ఒడఃబిజి, ఒరెన్ మరి ఒరెన్ వన్నిజ్ ప్రేమిని, ఉండ్రె మన్సుదాన్, ఉండ్రె ఉదెసమ్దాన్ మంజి, నా సరద పూర్తి కిదు.

3 సొంత ఇస్టం వందిజ్ ఆవండ, కితి దని వందిజ్ నాను కిత ఇజి పొజె ఆవండ, ఇనికబా కిదెజ్ గాని, మహికార్ నజి ఇంక పెరికార్ ఇజి ఒడిఃబిజి, తగిజి మండ్రెజ్.

4 మీ లోఱ విజిదెరెబా, మీ సొంత పణిజె తొవండ, మహి వరిజ్ సాయం కిదెజ్బా సుడఃదెజ్ వలె.

5 క్రీస్తుయేసుజ్ మహి యా మన్సునె మిజిబా మండ్రెజ్.

6 వాండ్రు ఎస్తివలెబా దేవుణు ననికాన్ ఆతిజ్బా, దేవుణు వెట సమానం ఆతికాన్ ఇజి, అయా అక్కు మండ్రెజ్ వలె ఇజి పటుతల కివెతాన్.

7 గాని వాండ్రు వన్ని మన్సుదాన్, అయాక విజు డిస్తాండ్రె, ఒరెన్ పణి కిని వన్ని లెకెండ ఒడిఃబిజి, లోకు ఆతాన్.

8 వాండ్రు ఒరెన్ లోకు ఆతండ్రె, వన్నిజ్ వాండ్రె తగె ఆతాన్. వాండ్రు దేవుణుదిజ్ లోజితాండ్రె, సాదెజ్బా వన్నిజ్ వాండ్రె ఒపజెపె ఆతాన్. గొప్ప సిగుదాన్ కూడిఃతి మని సిలువాదు సాని సాపు సాదెజ్బా వన్నిజ్ వాండ్రె ఒపజెపె ఆతాన్.

9 అందెజె దేవుణు వన్నిజ్ గొప్ప పెరికాన్ కితాండ్రె, మహి విజు పెర్కు మున్సు గొప్ప పేరు సితాన్.

10-11 దేవుణు యా లెకెండసితాన్. ఎందనిజ్ ఇహిజ, పరలోకమ్దు మనికెజ్ విజు, బూమి మున్సు మనికెజ్ విజు సాతికార్ని మరి తోర్ఇకెజ్ విజు యేసు

పేరుదు ముణుకుజ్ ఊర్జి మాడిస్టెజ్. విజు యేసుక్రీస్తు ప్రబు ఇజి వరి వెయ్దాన్ బప్పుకొండెజ్. అయ లెకెండ బుబ్బు ఆతి దేవుణుదిజ్ గొప్ప గనం సీజినార్.

12 అందెజె నాను ప్రేమిసినికిదెరా, దేవుణు రక్సిస్తి లోకుర్ కిదెజ్ తగ్గి పణిజ్, మీ లోఇ ఒరెన్ ఒరెన్ తియెల్దాన్ వణుకుదాన్ కిదెజ్ నండొ కష్టపడిదెజ్. ఎస్తివలెబా, మీరు నా మాట వెంజె లోజెతిదెర్. నాను మీ వెట మనివలెనె ఆవండ, మీ వెట ఏలు సీలివలె, మరి ఒదె అయాక కిదెజ్ కష్టబాడిదు.

13 మీరు అయాక కిదెజ్ అట్టిదెర్. ఎందనిజ్ ఇహిజు, దేవుణుదిజ్ ఇన్ఱం కితి పణిజ్, కిదెజ్ ఇజి మీ లోఇ ఆస పుటిస్సికాన్ దేవుణునె. అయాక కిదెజ్ సాయం కినికాన్బా దేవుణునె.

14-15 మీరు విజు పణిజ్, ఒరెన్ వన్నిజ్ మొరొ ఆవండ, జటిజ్ ఆవండ కిదెజ్. ఎందనిజ్ ఇహిజు, మీరు మూర్కమ్ది వరి నడిమి, సెఇవరి నడిమి బత్కినివలె, నిందెజ్ సిల్లెండ, పాపం సిల్లెండ, ఇని తపు సీలి దేవుణు కొడొర్ ఇజి తోర్ ఆదెజ్. మీరు నని వరి నడిమి మంజి, బత్కు సీని మాట మీరు నెన్పిస్సివలె, ఆగాసమ్దు సుక్కెజ్ ఎలాగ జాయి సీజినానో, అయా లెకెండ మీరుబా మనిదెర్.

16 మీరు యా లెకెండ మహిజు, క్రీస్తు వాని దినమ్దు నాను గెలస్తి వన్నిలెకెండ సర్ద ఆదెజ్ అట్టు. ఎందనిజ్ ఇహిజు, నాను మీ నడిమి కష్ట బాడిజి కితి పణి, ఎందనిజ్ పణిదిజ్ రెండ ఆవెతాద్ ఇజి మీ బత్కు రుజుప్ కినాద్.

17 మీరు సువార్త నమ్మిత్తివలె, మీ బత్కు దేవుణుదిజ్ సీతిదెర్. ఒరెన్ పుజెరి, దేవుణుదిజ్ పూజ సీనివలె, పూజ సీని దని ముస్కు ద్రాక్కు పట్టు రసం వాక్తి లెకెండ, రోమ అతికారిబు నజి నప్తిజు, నా నల మీ పూజ ముస్కు వాక్తి లెకెండ ఆనాద్. అయ లెకెండ జర్గితిజు, నాను సర్ద ఆజిన. మీ విజెరె వెట సర్ద ఆజిన.

18 అయాలెకెండ మీరు విజెరెబా నా వెట నండొ సర్ద ఆదు.

తిమోతిని ఎపప్రొదితు

19 తిమోతిజ్ మీ డగ్గు బేగి పొక్తెజ్ ప్రబు ఆతి యేసు నజి తవ్వండ సాయం కినాన్ ఇజి నాను ఆస ఆజిన. వాండ్రు నా వందిజ్ వెస్సి, మీజి సర్ద కిబిస్సాన్. అయ లెకెండ వాండ్రు మర్జి వాజి మీ వందిజ్ వెస్తిజు, నాను సర్ద ఆస. అందెజె తిమోతిజ్ మీ డగ్గు బేగి పొక్కిన.

20 మీరు నెగ్గెండ మండ్రెజ్ ఇజి నిజం ఆస ఆజినికాన్ వీండ్రె. మీ వందిజ్ వినిజ్ మని ఆస ననికాన్ మరి ఎయెన్బా నా డగ్గు సీలెన్.

21 మహికార్ విజెరె, వరిజ్ ఇన్ఱం ఆతి సొంత పణిజె సుడొజినార్. గాని యేసు క్రీస్తుజ్ ఇన్ఱం ఆతికెజ్ తోవెర్.

22 గాని, తిమోతి నమ్మకమ్దాన్ ప్రబుజ్ సేవ కిజె నెగ్గికాన్ ఇజి రుజుప్ కితిక మీరు నెస్సిదెర్. అప్పొసి వెట మరిసి ఎలాగ కూడ్డి పణి కినాండ్రొ, అయాలెకెండ సువార్త నండొ లోకుర్ విని వందిజ్ నా వెట కూడ్డి సాటిస్తాన్.

23 అందెజె, ఇబ్బె నజి జర్గిదెజ్ మనిక ఎలాగ జర్గినాద్ ఇజి నెస్తిజు, వెటనె నాను వినిజ్ మీ డగ్గు పొక్తెజ్ ఇజి నాను ఆస ఆజిన.

24 నానుబా బేగి మీ డగ్గు వాదెజ్ ప్రబు నజి తవ్వండ సాయం కినాన్ ఇజి నాను నమ్మిజిన.

25 ఎవప్రాదితుజ్ మీ డగ్రు మర్జి పోక్తెజ్ వలె ఇజి నాను బాగ ఎత్తు కిజిన. వాండ్రు నా తంబెరి ననికాన్. నా వెట జత కూడేజి పణి కినికాన్. క్రీస్తు వందిజ్ నా వెట కూడేజి నండో కన్బాడిజినాన్. నజి అవ్సరం మనివలె తోడుః మంజి సాయం కిదెజ్ మీరు నా డగ్రు పోక్తికాన్.

26 నాను వన్నిజ్ మీ డగ్రు మర్జి పోక్తిన. ఎందనిజ్ ఇహిజ, వాండ్రు మిజి విజెరిజ్ నండో ఎత్తు కిజినాన్. వన్నిజ్ జబ్బు వాతాద్ ఇని మాట మీరు విహిదెర్ ఇజి నెస్తాండ్రె, మీరు వెహిదెర్ ఇజి నండో బాద ఆజినాన్.

27 నిజమె, వాండ్రు నండో కన్బం అర్చి సావు బత్తు ఆతాన్. గాని దేవుణు వన్ని ముస్కు కనికారం తోరిస్తాన్. వన్నిజె ఆవిండ, నా ముస్కు బా కనికారం తోరిస్తాన్. వన్ని జబ్బు వందిజ్ దుకం ఆతి దని ముస్కు వన్ని సావు వందిజ్ బా దుకం ఆవిండ మంజిని వందిజ్ నా ముస్కు కనికారం తోరిస్తాన్. వన్నిజ్ నెగెణ్ కితాన్

28 అందెజె, మీరు వన్నిజ్ మరి సుడేజి సర్ద అని వందిజ్, నజి మని దుకం తకు అని వందిజ్ గజి బిజి పోక్తెజ్ ఇజి ఒదె ఆస ఆజిన.

29-30 అందెజె, ప్రబు వెట కూడితి మని వినిజ్ నండో సర్దదాన్ డగ్రు కిదు. వాండ్రు క్రీస్తుజ్ సేవ కిని వందిజ్ సావు బత్తు ఆతాన్. మీరు నా వందిజ్ కిదెజ్ అట్ ఇతి సాయం కిదెజ్, వాండ్రు వన్ని పాణం సీదెజ్ బా గుసె ఆవిండ కితాన్. అందెజె వినిజ్ గవ్వరం సీదు. విని సని వరిజ్ బా గవ్వరం సీదు.

3

1 ఆకార్దు, నా తంబెరిజాండె, ప్రబు వెట మీరు కూడితి మనిదెర్. అందెజె, మీరు సర్ద ఆజినె మండ్రు. నాను ముజాలె సెగొండార్ సెజ వరి వందిజ్ వెప్తా మన. అయా సజతిజ్ నె మరి మరి రాస్తిజ్ బా నాను వంద్. అయాక మిజి మొసెం కిని వరి బాణిజ్ తప్పిస్తాద్.

2 వెరి నుకుడిజు పొలితి వరి వరిజ్ జాగ్రత మండ్రు. వారు నండో సెజ పణిజ్ కినికార్. దేవుణుదిజ్ నమ్మితి లోకు అని వందిజ్ మొగకొడోర్ సునతి కిబె ఆదెజ్ వలె ఇజి వారు కసితం వెహిస్తాన్. అయాక నిజం ఆవద్. వారు పణిదిజ్ రెవిండ ఒడోల్ కొయ్ జినార్. అందెజె వరి వందిజ్ జాగ్రత మండ్రు.

3 నాను ఆహె వెహిస్తాన్. ఎందనిజ్ ఇహిజ, నిజమాతి సునతి కిబె ఆతికాట్ మాటె. వారు ఆవెర్. ఇహిజ, దేవుణుదిజ్ నిజమాతి లోకుర్ మాటె. దేవుణు ఆత్మదాన్ నె, మాటు దేవుణుదిజ్ పొగిడిజు మాడిసినాట్. క్రీస్తు యేసు మా వందిజ్ కితి దని వందిజ్ సర్ద ఆజినాట్. సునతి ముస్కు ఆవద్, మా నమకం సునతి కితిజ, దేవుణు కొడోర్ ఆదెజ్ ఆనాద్ ఇజి నమ్మివట్.

4 అహిజ, యా లెకెండ మని సజతిజు ముస్కు ఒరెన్ వన్నిజ్ నమకం ఇదెజ్ ఆనాద్ ఇహిజ, మహి వరిజ్ ఇంక నండో వెప్తాజ్ అట్టికాన్ నానె. దేవుణు కొడోర్ ఆదెజ్ యా లెకెండ మని సజతిజు కిదెజ్ ఆనాద్ ఇజి ఎయెన్ బా ఒడేబితిజ, వన్ని ముస్కు మరి ఒదె వెప్తాజ్ అట్టికాన్ నానె.

5 ఎందనిజ్ ఇహిజ, నాను పుట్టి ఎనిమిది రోస్కాజె నజి సునతి కిత్తార్. నాను ఇస్తావెలు జాతిదిదు మని బెనియమిను తెగ్గదు పుట్టికాన్. నా అనిగొర్ విజెరె ఎబ్రివారు. నానుబా పూర్తి ఎబ్రి వాండ్రునె. నాను పరిసయ వాండ్రు. దేవుణు మొసెజ్ సితీ రూలుజ్ నాను పూర్తి లోజిత.

6 యా లెకెండ కినిక దేవుణుదిజ్ ఇన్ఱం ఆతికాదెను ఇజి ఒడిఃబిజి, క్రీస్తు మున్ను నమకం ఇట్టి వరిజ్ నాను నండో బాదెజ్ కితికాన్. మోసెజ్ సీతి రూలుజు లోజిజి, ఒరెన్, నీతి నిజాయితి మనికాన్ ఇజి తోరె ఆదెజ్ అట్టిజు, వన్ని లెకెండ నానుబా తోరె ఆదెజ్ అట్టు. ఎందనిజ్ ఇహిజు, రూలుజు లోఇ ఇనికబా తవ్వెత.

7 నజి లాబం వానిక ఇజి ఒడిఃబితి యా సజతిజ్ విజు, పణిదిజ్ రెఇక ఇజి నాను డిఱ్ఱ సీత. క్రీస్తుజ్ నెన్ని వందిజె డిఱ్ఱ సీత.

8-9 అయాకదె ఆవిండ, నాను ముజాలె కిజి మహి విజు సజతిజ్ పణిదిజ్ రెఇక ఇజి నాను ఒడిఃబిజిన. క్రీస్తు యేసుజ్ నెసెనికాదె విజు వన్కా మున్ను గొప్పు విలువ మనిక. క్రీస్తు యేసుజ్ నెన్ని వందిజె యా సజతిజ్ విజు పణిదిజ్ రెఇక ఇజి డిఱ్ఱ సీత. నాను క్రీస్తు వెట కూడఃజి మంజిని వందిజ్, మరి, నాను పూర్తి క్రీస్తుయేసు వాండ్రు ఆని వందిజ్ నాను అయాకెజ్ విజు గుమమ్ది కనర ఇజి నాను ఒడిఃబిజిన. దేవుణు మోసెజ్ సీతి రూలుదు మనికెజ్ లోజిజినిజ్ ఆవిద్ నాను నీతి నిజాయితి మనికాన్ ఆతిక. నాను క్రీస్తుయేసు మున్ను నమకం ఇడ్జిజె, దేవుణు నజి నీతి నిజాయితి మనికాన్ ఇజి కూక్తాన్.

10-11 నాను క్రీస్తుజ్ పూర్తి నెస్రెజ్ ఇజినె నాను మరి మరి కోరిజిన. ముకెలం, వాండ్రు సావుదాన్ నిజితి వలె, దేవుణు వన్నిజ్ సీతి సత్తు నజిబా కావాలి ఇజి నాను కోరిజిన. వాండ్రు నా వందిజ్ కన్ఱమ్కు ఒరిస్తి లెకెండ నాను వన్నివందిజ్ కన్ఱమ్కు ఒరిసి వన్ని వెట కూడఃజి మండ్రెజ్ ఇజి నాను కోరిజిన. వాండ్రు నా వందిజ్ సాతి లెకెండ నాను వన్ని వందిజ్ సాదెజ్ ఇజి కోరిజిన. నాను సాతి వెనుక మరీజి బత్తిని బత్తు ఎలాగ్ బా నజి దొప్పిద్ ఇజినె నాను అయా లెకెండ కోరిజిన.

12 నాను క్రీస్తు లెకెండ పూర్తి ఆత ఇజి నాను వెహ్ఎ. ఇహిజు, దేవుణుదిజ్ ఇన్ఱం ఆతి వజు నాను పూర్తి ఆతమన ఇజి వెహ్ఎ. గాని క్రీస్తుయేసు నజి కూక్తివలె, నాను ఎలాగ మండ్రెజ్ ఇజి వాండ్రు కోరిత మనాండ్రొ, దని వందిజ్ నాను కన్ఱబడిఃజిన.

13 తంబెరిజాండె, క్రీస్తు లెకెండ నాను పూర్తి ఆత ఇజి నాను వెహ్ఎ. గాని ఉండ్రీ సజతి నాను కిజిన. నాను ముజాలె కిజి మహి వన్కాజ్ పోసి, నాను బత్తిజిని బత్తు అంతు క్రీస్తు లెకెండ మండ్రెజ్ ఇజి నాను సుడఃజి కన్ఱబాడిఃజిన.

14 అందెజె దేవుణు నజి పరలోకమ్దు కూక్కి సీని ఇనాయం లొన్ని నా గురి వందిజ్, నాను కన్ఱబాడిఃజిన. ఎందనిజ్ ఇహిజు, క్రీస్తుయేసు మున్ను నాను నమకం ఇట్టా మన.

15 అందెజె, నమకమ్దు పూర్తి పిరీతి మాటు విజిటి, ముజాలె వెప్తొ వజు మండ్రెజ్ ఇజి, ఉండ్రె మన్ను మండ్రెజ్. గాని ముజాలె వెప్తొ ఇని దని లోఇబా మిజి మరి ఉండ్రీ మన్ను మహిజు, దేవుణు అయాకబా మిజి వెప్పొ తోరిస్సాన్.

16 దేవుణు మిజి వెప్పొ తోరిస్తి వజు మాటు మండ్రెజ్ ఇనికాదె ముకెలం ఆతిక.

17 తంబెరిజాండె, మీరు విజిదెరె, నజి సుడఃజి నడిఃదు. మాపు నడిఃతి వజు నడిఃజిని వరిజ్ సుడఃజి మీరు నడిఃదు.

18 ఎందనిజ్ ఇహిజు, నండొండార్ నమ్మిత్తికావ్ ఇజి వెహ్ ఆనికార్, క్రీస్తు సిలువాదు సాతి ఉదెనమ్దిజ్ పడిఃఎండ మనార్ ఇజి వరి బత్తుదాన్ తోరిసినాద్. నిని వరి వందిజ్ నాను ముజాలె మిజి నండొ సుట్టు వెప్తొ మన. ఏలు వరి వందిజ్ నాను వెప్పొ వలె, అడఃబాజినె వెప్పొన.

19 దేవుణు వరిజ్ నానం కినాన్. వారు ఒడొల్ది ఆన వందిజె బత్తిజినార్. దేవుణుదిజ్ సర్ద కిబిన్జె బత్తిఎర్. సిగు తప్పిన్ పణిజె వారు కిజినార్. వన్కా లోఇనె

సర్ద ఆజినార్. యా లోకమ్ది పణి కిదెజె వారు ఎత్తు కినార్.

20 గాని మాటు పరలోకమ్దు మనికాట్. అబెణిజ్ వాని, మజి రక్సిన్ని వన్నిజ్ మాటు ఎర్దు సుడెజినాట్. వాండ్రు ప్రబు ఆతి యేసు క్రీస్తు.

21 వాండ్రు మరజి వానివలె, మా సత్తు సిలి సబజి సాని ఒడోల్దిజ్, వన్ని సత్తు మని సబజ ఒడోల్ లెకెండ్ కినాన్. విజు వన్కాజ్ అతికారం కిని వన్ని గొప్ప సత్తుదాన్, వాండ్రు యా లెకెండ్ మా ఒడోల్దిజ్ కినాన్.

4

1 అందెజె నా తంబెరిజాండె, ముజాలె నాను నెన్పిస్తి దని వజ మీరు ప్రబు మున్ను మని నమకం డిన్ఎండనె మండ్రు. మీరు నా లెకెండ్ దేవుణుదిజ్ నమ్మిత్తికిదెర్. మీరు నజి నండో ఇస్టం ఆతికిదెర్. మీ వెట మండ్రెజ్ నాను నండో ఆన ఆజిన. మీరె నజి నండో సర్ద కిబిస్సికిదెర్, నజి నెగ్గి పేరు తపిస్సికిదెర్.

2 ఓ యువొదియ సుంటుకె మీరు కూడెజి పాడెజి మండ్రు ఇజి నాను మిజి బతిమాల్లిన. ఎందనిజ్ ఇహిజ, మీరు ప్రబు లోకు.

3 మరి, నా వెట సేవ పణి కినికి, నీను నమ్మిదెజ్ తగ్గికి. నీను యా బొదెక్ కూడెజి పాడెజి మంజిని లెకెండ్ వెహాల ఇజి నాను నిజి వెప్పిన. ఎందనిజ్ ఇహిజ, క్రీస్తు వందిజ్ సువార్త సాటిస్తెజ్ నా వెట నండో కస్టబాడితె. మరి, క్లెమెంతు వెట, నా వెట జత పణి కిని మహి వరి వెటబా కూడెజి సువార్త సాటిస్తెజ్ అవికు నండో కస్టబాడితె. ఎలాకాలం దేవుణు వెట బత్రిని వరి పేర్కు రాని ఇడ్డిని పుస్తకమ్దు వాండ్రు వన్కా పేర్కు రాస్త మనాన్.

4 ఎస్తివలెబా మీరు సర్ద ఆదు. ఎందనిజ్ ఇహిజ, మీరు ప్రబు లోకుర్. నాను మరిబా వెప్పిన, సర్ద ఆదు.

5 మీరు విజెరె వెట సార్లిదాన్ మంజిన ఇజి తోరిన్అ. ప్రబు బేగి వానాన్ ఇజి పోస్టాట్

6 ఇని దని వందిజ్బా విసారిస్మాట్. గాని ఎలాగ మర్తి సమయమ్దుబా, మహిజ్బా, సిలిజ్బా, దేవుణుదిజ్ పార్లనం కిదెజ్. మిజి మని అవ్సరమ్కు వన్నిజ్ వెప్టాజ్. వన్ని సాయం మీరు లొస్తెజ్. వన్నిజ్ ఎస్తివలెబా వందనమ్కు వెప్టాజ్.

7 అయావలె, దేవుణు వన్ని సమాదనం మీ మన్నుదు, మీ గర్భమ్దు మిజి కాపాడెదెజ్ సీనాన్. ఎందనిజ్ ఇహిజ, మీరు క్రీస్తు యేసు వెట కూడితి మనికిదెర్. యా సమాదనం లోకుర్ అర్లం కిదెజ్ అట్ఇక.

8 నా తంబెరిజాండె, ఆకార్దు, నాను ఉండ్రీ వెప్పిన. మీరు ఈహు ఒడిబిజి మండ్రెజ్ ఇజి నాను వెప్పిన. నిజమాతి వన్కాజ్, లోకుర్ గవరం సిదెజ్ తగ్గి వన్కాజ్, నాయం మని వన్కాజ్, పాపం సిలి వన్కాజ్, లోకుర్ ఇస్టం కిదెజ్ తగ్గి వన్కాజ్, గొప్ప పేరు తపిస్సి వన్కాజ్, లోకుర్ పొగిడిని వన్కాజ్ మీరు ఒడిబిజి మండ్రు.

9 మరి నాను మిజి నెన్పిస్తికెజ్, మీరు నమ్మిత్తికెజ్, కిజినె మండ్రు. నా బాణిజ్ మీరు విహికెజ్, నాను కిజినికెజ్ మీరు సుడెతికెజ్ కిజినె మండ్రు. అయావలె, సమాదనం మిజి సీజిని దేవుణు మిజి తోడుః మంజినాన్.

నజి సీజిని సాయం వందిజ్ వందనమ్కు

10 సెగం రోస్కు డిసిద్దెరె, నజీ ఎత్తు కిజినావ్ ఇజి ఏలు మీరు తోరిస్సి వందిజ్ నాను ప్రబుజ్ నరద ఆజి వందనమ్కు వెప్పిన. మీరు ఎస్తివలెబా నజీ ఎత్తు కిజినె మహిదెర్ ఇజి నాను నెస్సు. గాని నజీ సాయం కిజి ఎత్తు కిజినావ్ ఇజి మిజి తోరిస్సెజ్ అవకాసం దోహ్వావెతాద్.

11 నజీ అవ్సరం మనిజ్ ఇజి ఆవద్ యా లెకెండ్ వెప్పినిక. ఎలాగ మర్తి సమయమ్దుబా నజీ మనికాదె సాలు ఇజి సరి కిదెజ్ నెస్త్ మన.

12 ఇహిజ, నజీ కావాలస్తికెజ్ విజు సిలితివలె ఎలాగ మండ్రెజ్ ఇజి నాను నెసిన. నండో మనివలె ఎలాగ మండ్రెజ్ ఇజిబా నాను నెసిన. ఎలాగ మర్తి సమయమ్దుబా సరి కిబె ఆదెజ్ నాను నెస్త్ మన. పొట పంజితి వలెబా, బజ కట్టిని వలెబా, నండో మనివలెబా, ఇనిక సిలివలెబా సరి కిబె ఆదెజ్ నాను నెస్త్ మన.

13 యా లెకెండ్ సరి కిబె ఆదెజ్ విజు నాను అట్సిన. ఎందనిజ్ ఇహిజ, క్రీస్తు నజీ సత్తు సీజినాన్.

14 అహిజ్బా, ఏలు యా లెకెండ్ నాను కష్టమ్దు మనివలె, మీరు నజీ సాయం కితిదెర్. నెగ్గి పణినె కితిదెర్.

15 పిలిప్పియదు మని నమ్మిత్తికిదెరా, మీరు నెస్సిదెర్ నాను సువార్త వెప్తాజ్ మొదొల్లి తోలి రోస్కాజ్, నాను మసిదొనియ రాస్త్తం డిసిద్ది వాతివలె, మీ సజమ్దికిదెరె నజీ సితిదెర్, నా బాణిజ్ లోసె ఆతిదెర్. మరి ఎమేణి సజమ్దికార్బా సివెతార్.

16 మరి నాను తెసెలోనికయ పట్టుమ్దు మహివలెబా నజీ అవ్సరం మహివలె మీరు ఉండ్రీ సుటునె ఆవిండ నండో సుట్టు డబ్బు పొక్తిదెర్.

17 మీరు యా లెకెండ్ మరి డబ్బు పొక్తెజ్ ఇజి నాను ఆస ఆజి వెహ్ఎ. గాని మీరు యా లెకెండ్ సితి దనిజ్ దేవుణు మిజి నండో దీవిన్పిన్ ఇజినె ఆస ఆజిన.

18 ఏలు నజీ సరి ఆని నసా మనాద్. మరి నండోబా మనాద్. మీరు ఎపప్రాదితు వెట పొక్తికెజ్ వాండ్రు తత సితాన్. అందెజె ఒదె నండో మనాద్. మీరు నజీ సితిక, దేవుణుదిజ్ సీజిని వాసనం మని పూజ లెకెండ్ మనాద్. వాండ్రు దని వెట నరద అతండ్రె డగ్రు కితాన్.

19 మరి, నా దేవుణు, మీ అవ్సరం విజు తీరిస్సాన్. లెక్క సిల్లి వన్ని నండో ఆస్తిదాన్ మాటు బమ్మ ఆని లెకెండ్ తీరిస్సాన్. ఎందనిజ్ ఇహిజ, క్రీస్తు యేసు వెట కూడితి మనికిదెర్.

20 మా బుబ్బు ఆతి దేవుణుదిజ్ అంతు సిల్లెండ ఎల్లకాలం గవ్సరం మనిద్. ఆమెన్.

21 క్రీస్తుయేసు ముస్కు నమకం ఇట్టి దేవుణు లోకుర్ ఆతి విజెరిజ్ నాను వెన్బాతి లెకెండ్ వెప్తు. నా వెట మని తంబెర్జు మిజి వెన్బాతి లెకెండ్ వెప్పినార్.

22 ఇబ్బె మని దేవుణు లోకుర్ విజెరె, ముకెలం కయ్సరు రాజు ఇండ్రో పణి కిజిని నమ్మిత్తికార్ మిజి వెన్బాతి లెకెండ్ వెప్పినార్.

23 ప్రబు ఆతి యేసు క్రీస్తు దయా దర్మం మిజి తోడు మనిద్. ఆమెన్.

అపొస్తుడు ఆతి పవులు కొలోసు పట్నమ్దు మని దేవుణు సజమ్దిజ్ రాస్తి ఉత్తం నెల్వ కిబిస్సిక

అపొస్తుడు ఆతి పవులు కొలోసు పట్నమ్దు మని దేవుణు సజమ్దిజ్ రాసిని ఉత్తమ్నె యాక. వాండ్రు రోమ జెలిదు షాకె ఆతి మహివలె రాస్తికాదె. పవులు ఎసెజ్బా కొలోసి పట్నమ్దు సొన్వెతాన్. వాండ్రు దేవుణు దరోట్ నడిఃపిస్సి ఎప్రాదితునె యా పట్నమ్దు దేవుణు సజం మొదొల్స్తాన్.

యా లోకమ్దు మని దేవుణుదిజ్ నమ్మిత్తికార్ విజెరె కూడిఃతి మని సజమ్దిజ్ బుర లెకెండ్ క్రీస్తు మనాన్. వన్ని ఒడొఃల్ దేవుణు సజం. వాండ్రు విజు వన్కాజ్ ముజాలె మనికాన్. విజు తయార్ కితికాన్ వాండ్రె. విజు అతికారమ్క ముస్సు అతికారం మనికాన్ వాండ్రె ఇజి ఎత్తు కిబిసి రాసినాన్.

నమ్మిత్తికార్ యా లోకమ్ది సజతిజ ముస్సు మన్సు ఇడఃఎండ, పరలోకమ్దు మని సజతిజ ముస్సు మన్సు ఇడఃదెజ్ ఇజి వెప్పినాన్. నమ్మిత్తికార్ ఎలాగ నడిఃదెజ్ ఇజిబా యా ఉత్తమ్దు రాసి వెప్పినాన్.

1-2 క్రీస్తు యేసు వందిజ్ అపొస్తుడు ఆతి పవులు ఇని నానుని, మా తంబెరి ఆతి తిమొతి కొలోసి పట్నమ్దు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కితి వజనె నాను క్రీస్తు యేసు వందిజ్ అపొస్తుడు ఆత. మీరు నమ్మిదెజ్ తగ్గి తంబెరిజు. మా బుబ్బు ఆతి దేవుణు దయ దర్మమ్దాన్, మీరు నిపాతిదాన్ మండ్రెజ్ సాయం కిపిన్.

3 మాపు మీ వందిజ్ ఒడఃబిజి పార్దనం కినివలె, ఎస్తివలెబా మా ప్రబు ఆతి యేసుక్రీస్తుజ్ బుబ్బు ఆతి దేవుణుదిజ్ వందనమ్కు వెప్పినామ్.

4 ఎందనిజ్ ఇహిజ, మీరు క్రీస్తు యేసుజ్ నమ్మిజినిదెర్ ఇజి, దేవుణు వందిజ్ కేట ఆతి లోకుర్ విజెరిజ్ ప్రేమిఃనిదెర్ ఇజి మాపు వెహ మనామ్.

5 మీరు యా లెకెండ్, క్రీస్తుయేసుజ్ నమ్మిజినిదెర్, దేవుణు వందిజ్ కేట ఆతి లోకురిజ్ విజెరిజ్ ప్రేమిఃనిదెర్. ఎందనిజ్ ఇహిజ, నిజమాతి బోద, ఇహిజ, సువార్త మీరు వెహివలె, దేవుణు పరలోకమ్దు మీ వందిజ్ ఇడ్డి మని దని వందిజ్ ముజాలె మీరు వెహి మనిదెర్. అయాక తప్ఎండ దొహ్కాద్ ఇజి దని వందిజ్ ఆసదాన్ ఎద్దు సుడఃజినిదెర్.

6-7 లోకమ్ది నండొ దేసమ్కాజ్ యా సువార్త వెహె ఆతి లెకెండ్, మీ నడిఃమిబా వెహె ఆత మనాద్. మీరు అయాక వెంజి దేవుణు దయ దర్మం నిజం ఇజి నెస్తి బాణిజ్ అసి మీ నడిఃమి అయా సువార్త నెగ్గి పణి కిజినాద్. మీ నడిఃమి అయా సువార్త నెగ్గి పణికిజిని లెకెండ్ మహి లోకురిజ్బా నెగ్గి పణి కిబిస్సాద్. మరి, నండొ నండొ లోకుర్ సువార్త నమ్మిజినార్. ఎప్రాని మిజి సువార్త నెన్పిస్తాన్. మాపు వన్నిజ్ ప్రేమిస్సామ్. మజి బదులు వాండ్రు క్రీస్తుజ్ అబె సేవ కిజినాన్. మీ మేలు వందిజ్ నమకమ్దాన్ వాండ్రు క్రీస్తుజ్ సేవ కిజినాన్.

8 దేవుణులు ఆత్మ మీ లోక పుటిస్తే ప్రేమదాన్, మీరు దేవుణులు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజిబా వాండ్రు మజీ వెహ్లా మనాన్.

9 అందెజె, మీ వందిజ్ వెహి బాణిజ్ అసి, డిస్ఎండ ఎస్తివలెబా మీ వందిజ్ దేవుణుదిజ్ పార్దనం కిజినావ్. మీ బత్కుదు మీరు కిదెజ్ ఇజి దేవుణు కోరిజిన విజు సజతిజ్ మీరు బాగ నెస్టెజ్ ఇజి పార్దనం కిజినావ్. ఇహిజ మీరు, దేవుణు ఆత్మ సీజిని విజు గెణం, బుద్ధి మనికిదెర్ ఆదెజ్ ఇజి మాపు పార్దనం కిజినావ్.

10 మాపు ఎండనిజ్ యా లెకెండ పార్దనం కిజినావ్ ఇహిజ, దేవుణు కోరిజిన వజ మీరు బత్కిజి, వన్నిజ్ సర్ద కిబిస్సికెజ్ ఎస్తివలెబా కిదెజ్. ముకెలం, మీరు విజు రకమ్కాణి నెగ్గి పణి కిని వందిజ్, దేవుణుదిజ్ నిజం మరి లాపు నెస్సి వందిజ్ మాపు యా లెకెండ పార్దనం కిజినావ్.

11 దేవుణు, లోకురిజ్ తోరిస్తి గొప్పు బమ్మ కిని వన్ని సత్తుదాన్ మీరు సత్తు మనికిదెర్ ఆని వందిజ్ యా లెకెండ పార్దనం కిజినావ్. ఎండనిజ్ ఇహిజ, ఎస్తివలెబా విజు బాదెజ, సర్దదాన్ విజు ఓరిసి, బరిసి మండ్రెజ్, మీరు సత్తు మనికిదెర్ ఆదెజ్. అందెజె యా లెకెండ పార్దనం కిజినావ్.

12 మరి, దేవుణు ఏలుబడిడు ఇహిజ గొప్పు జాయిదు వన్ని వందిజ్ కేట ఆతి లోకుర్ వందిజ్ వాండ్రు తయార్ కితి ఇడ్డి మని విజు దని లోక మిజిబా అక్కు మండ్రెజ్ తగ్గి పరి లెకెండ మిజి కితి దని వందిజ్ బుబ్బు ఆతి దేవుణుదిజ్ వందనమ్కు వెహ్సినె మండ్రెజ్ ఇజి మాపు మీ వందిజ్ యా లెకెండ పార్దనం కిజినావ్.

13 దేవుణు మజీ సయ్తాన్ అతికారం అడిగి సీకటుదు తోహా ఆతి బాణిజ్ తప్పిస్తాండ్రె వాండ్రు ప్రేమిసిని వన్ని మరిన్ అతికారం అడిగి మజీ తతాన్.

14 వన్ని మరిన్ ఆతి దనితాన్ దేవుణు మజీ విడుదల కిత్తాన్. ముకెలం, మా పాపమ్కు వాండ్రు నెమిస్త మనాన్.

క్రీస్తు విజు వన్కా మున్కు గొప్పు పెరికాన్

15 తోరెద దేవుణు మూర్తి నె క్రీస్తు. దేవుణు ఎలాగ మనాన్ ఇజి వీండ్రు తోరిస్సాన్. దేవుణు విజు తయార్ కిని ముజాల వీండ్రు మహాన్. తయార్ కితి విజు వన్కా మున్కు అతికారం మనికాండ్రె క్రీస్తు.

16 ఎండనిజ్ ఇహిజ, వన్నినవెటనె దేవుణు విజు తయార్ కిత మనాన్. బూమిదు మనికెజ్, ఆగాసమదు మనికెజ్, తోర్నికెజ్, తోరెదకెజ్, ముకెలం గొప్పు సత్తు మని విజు రకమ్కాణి అతికారం కిని విజు దూతెజ దెయమ్కాజ్, విజు వన్ని వెటనె దేవుణు తయార్ కిత్తాన్. విజు క్రీస్తు వెటనె తయార్ కిత్తాన్. విజు వన్నిజ్ గవర్నం సీని వందిజె దేవుణు తయార్ కిత్తాన్.

17 క్రీస్తు, విజు తయార్ ఆని ముజాల మనికాన్. విజు వన్కాజ్ వాండ్రు కుడుప్పి అస్త మనాన్.

18 వన్ని ఒడెజె ఆతి దేవుణు సజమ్దిజ్ బుర్ర వాండ్రె. వన్ని బాణిజె దనిజ్ కొత్త బత్కు వాజినాద్. ఎండనిజ్ ఇహిజ, సాతి పరి బాణిజ్ ముజాల్ మర్జి బత్కితి మనికాన్ వాండ్రె. విజు వన్కా మున్కు గొప్పు పెరికాన్ ఆని వందిజె, సాతి పరి బాణిజ్, ముజాల్ మర్జి బత్కిత మనాన్.

19 ఎండనిజ్ ఇహిజ, వన్ని లోకనె వన్ని బుబ్బు ఆతి దేవుణు వెల్తెతి సిల్లెండ పూర్తి మండ్రెజ్ ఇజి తీర్చనం కిత్తాన్.

20 అందెజె, మరిన్ వెటనె బూమిదు మని విజు వన్యూజ్, పరలోకమ్దు మని విజు వన్యూజ్, వన్ని డగ్గు మర్జి కుడుఃపైజ్ ఇజి దేవుణు తీర్పునం కిత్తాన్. వన్ని మరిన్ సిలువాదు సాతివలె, నల వాక్తి దనితాన్, దేవుణు బూమిదు మని విజు వన్యూ వెట, దేవుణు మంజిని పరలోకమ్దు మని విజు వన్యూ వెట రాజినం ఆతండ్రె, విజు వన్యూజ్ వన్ని డగ్గు మర్జి కుడుఃపాన్.

21 ఉండ్రె కాలమ్దు, మీరు కితి సెజ పణిజాణిజ్, సెజ ఆలోసనెజాణిజ్ దేవుణు బాణిజ్ దూరం మహిదెర్. దేవుణుదిజ్ పడిఃఎండ మహిదెర్.

22 గాని ఏలు, వన్ని మరిన్ ఒరిన్ లోకు ఆజి సాతి సాపుదాన్ వాండ్రు మీ వెట రాజినం ఆతాన్. ఎందనిజ్ ఇహిజ, ఇని నింద సిలి, ఇని నేరమ్కుబా రెజ, నొరె ఆతి లోకుర్ తెకెండ, క్రీస్తు మర్జి వానివలె మిజి దేవుణు ఎద్రు మిజి నిల్పైజె వాండ్రు మీ వెట రాజినం ఆతాన్.

23 మీరు సువార్త నమ్మిజి మహిజ అయాలెకెండ మంజినిదెర్. మీరు నమ్మకమ్దాన్ దిగజొరెండ మండ్రెజ్ వలె. యా సువార్త వెప్పిని ఆస వందిజ్ డిఃన్ఎండ ఎద్రు సుండఃజినె మండ్రెజ్ వలె. యా సువార్తనె నండో దేస్సెమ్కాణి లోకుర్ నడిఃమి వెహె ఆత మనాద్. యాక వెహైజె పవులు ఇని నజి దేవుణు ఏర్పాటు కిత్తాన్.

పవులు దేవుణు నజం వందిజ్ సేవ కిజినాన్

24 ఏలు, మీ మేలు వందిజ్ నాను స్రమెజ్ ఒరిసిన ఇజి సర్ద ఆజిన. ఇహిజ, క్రీస్తు ఒడొఃల్ తెకెండ మని సజమ్ది మేలు వందిజ్ నాను నా ఒడొఃల్దు స్రమెజ్ ఒరిస్తెజ్ వలె ఇజి క్రీస్తు ఏర్పాటు కితిక నాను పూర్తి కిజిన.

25-26 దేవుణు నజి సజమ్దిజ్ సేవ కిదెజ్ ఇజి ఏర్పాటు కిత్తాన్. మీ మేలు వందిజ్, క్రీస్తు వందిజ్ మని సువార్త మిజి పూర్తి నెప్పిన్మి బాజత వాండ్రు నజి సితాన్. యా సువార్త, ముజాలె బత్కితి మహి లోకుర్ బాణిజ్ దేవుణు డాప్పి వన్ని గర్భమ్దు ఇట్టా మహాన్. గాని ఏలు వాండ్రు వన్ని వందిజ్ కేట ఆతి లోకురిజ్ అయాక తోరిసి నెస్పిస్తాన్.

27 దేవుణు అయాలెకెండ కిత్తాన్. ఎందనిజ్ ఇహిజ, వాండ్రు యూదురు ఆఇ వరిజ్ నండో దీవిస్తాన్ ఇజి వన్ని గర్భమ్దు వాండ్రు ఎత్తు కిజి డాప్పి ఇట్టిక వరిజ్ తెలివి కిదెజ్ ఇజి తీర్పునం కిత్తాన్ ఇజి తోరిస్తెజ్. ముకెలం, క్రీస్తు, యూదురు ఆఇ మీ మన్నుదు మంజినాన్. అందెజె, కడఃవేరిదు దేవుణు జాయ్దు మండ్రెజ్ మిజి ఒనిదెర్ ఇజి ఆసదాన్ ఎద్రు సుండఃజి మంజినిదెర్ ఇజి. యాకదె దేవుణు వన్ని లోకురిజ్ తోరిసి నెస్పిస్తె సువార్త.

28 అందెజె మాపు క్రీస్తు వందిజ్ విజెరిజ్ వెప్పినావ్. ముకెలం మాపు నండో గెణమ్దాన్ విజెరిజ్ బుద్ధి వెప్పి నెస్పిస్తావ్. ఎందనిజ్ ఇహిజ, క్రీస్తు వెట కూడిఃతి మని వరిజ్ విజెరిజ్ వాండ్రు మర్జి వానివలె దేవుణు ఎద్రు నిల్పివలె, వారు పూర్తి ఆతికార్ ఆదెజ్ మాపు బుద్ధి వెప్పి నెస్పిస్తావ్.

29 వారు పూర్తి ఆతికార్ ఆని వందిజ్ క్రీస్తు సీజిని గొప్ప సత్తుదాన్ నాను నండో కష్టబాడిఃజిన. అయా గొప్ప సత్తునె, నాను కష్టబాడిఃదెజ్ నజి సత్తు కిలిస్తాద్.

2

1 మీ వందిజ్, లవొదియ పట్నమ్దు మని దేవుణుదిజ్ నమ్మిత్తి వరి వందిజ్, నజి ఎసెజ్బా తొఇ వరి వందిజ్ నాను ఎసొ కష్టబాడిఃజిన ఇజి మీరు నెస్తెజ్ ఇజి నాను

కోరిజిన.

2 నాను ఎందనిజ్ యా లెకెండ కన్ఱబడిఃజిన ఇహిజ, మీరుని వారు, నెగ్రెండ దయరమదాన్ నిల్పి వందిజ్, మరి, మీరు ఒరెన్ మరి ఒరెన్ వన్నిజ్ ప్రేమిసిని వజ, కూడఃజి పాడఃజి మంజని వందిజ్ కన్ఱ బడిఃజిన. ఎందనిజ్ ఇహిజ, అయావలె మీరు అనుమానం సిల్లెండ దేవుణు వన్ని గర్బమదు డాప్తి ఇట్టిక ఇహిజ, క్రీస్తుజ్ పూర్తి నెస్తెజ్.

3 ఎందనిజ్ ఇహిజ, క్రీస్తు వెటన దేవుణు వన్ని గర్బమదు డాప్తి ఇడ్డి విజు గెణమ్ని ఆలోసనెజ్ నెస్తెజ్ అట్టూట్.

4 నాను ఎందనిజ్ యా లెకెండ వెహ్సిన ఇహిజ, ఎయెర్బా మిజి తియాని మాటెజ్ వెహ్సి మోసెం కిఎండ మండ్రెజ్.

5 నాను మీ నడిఃమి సిలితిజ్బా మీ వందిజ్ నండొ ఎత్తు కిజిన. నాను నండొ సరదబా ఆజిన. ఎందనిజ్ ఇహిజ, మీరు ఉండ్రె ఆజి కూడఃజి పాడఃజి మంజనిదెర్. మీరు క్రీస్తుజ్ డటం నమ్మిజనిదెర్ ఇజి నాను నెస్సు.

6 మీరు క్రీస్తుయేసుజ్, ప్రబు ఇజి ఒపుకోటి మనిదెర్. అందెజె వన్ని వెట కూడిఃతి మనికార్ కిదెజ్ మని లెకెండ మండ్రు.

7 వన్ని వందిజ్ మిజి నెన్పిన్తి మనికెజ్ నమ్మిజి, అయకెజ్ కిజినె మండ్రు. అయా సజతిజ్ నలిజిజె నమకమదు పిరిదు. మిజి నెన్పిన్తి వజ నిజమాతి బోదదిజ్ అసినె మండ్రు. మా బుబ్బి ఆతి దేవుణు మీ వందిజ్ కితి దని వందిజ్ పూర్తి మన్సుదాన్ వందనమ్కు వెహ్సినె మండ్రు.

8 ఎయెర్బా మోసెం కిని బోదెజ్ నెస్పిసి మిజి తోహ్కొ మని వరిలెకెండ కిఎండ జాగర్త మండ్రు. వారు మిజి అర్దం సిలి మోసెం కిని లోకురిజ్ మని గెణం నెస్పిసి మోసెం కినార్. అయాకెజ్ క్రీస్తు బాణిజ్ వాజినికెజ్ ఆఉ. గాని పూర్బమదాన్ అసి నెస్పిసిని బోదెజు బాణిజ్ వాజినికెజ్. యా లోకమదిజ్ అతికారం కిజిని దెయమ్క బాణిజ్ వాజినికెజ్.

9 నాను అయ లెకెండ వెహ్సిన. ఎందనిజ్ ఇహిజ, దేవుణు, క్రీస్తు ఒడొఃల్దునె వెల్తి సిల్లెండ పూర్తి మంజినాన్.

10 క్రీస్తు వెట మీరు కూడిఃతి మనిజ్, మీ కొత్త బత్కుదిజ్ కావాలిన్తికెజ్ విజు మిజి సిత మనాన్. అతికారం కిజిని విజు సత్తుజు ముస్కు, ఏలుబడిః కిని వరి ముస్కు, తోర్పి వన్కాజ్ని, తోర్ఇ వన్కాజ్ ముస్కు వాండ్రె గొప్ప అతికారం మనికాన్. తోర్ఇ వన్కాజ్ ఇహిజ, దేవుణు దూతార్ని దెయమ్కు. వన్కా ముస్కు గొప్ప అతికారం మనికాండ్రె వాండ్రు.

11 వన్నివెట మీరు కూడిఃతి మనిదెర్. అందెజె క్రీస్తు బాణిజ్సునతి కిబె ఆతి లెకెండ మనిదెర్. లోకుర్ వరి కికాణిజ్ కిని సునతి కిబె ఆఇదెర్, గాని క్రీస్తు కితి సునతినె కిబె ఆతిదెర్. ఇహిజ, క్రీస్తు మీ సెఇ ఆసెజ్ విజు పూర్తి లాగితాన్.

12 మరి, మీరు బాప్తినం లాగి ఆతివలె, క్రీస్తు వెట సాజి ముసె ఆతి లెకెండ మనిదెర్. వన్ని వెట మర్జి నికె ఆతి లెకెండ మనిదెర్. దేవుణు గొప్ప సత్తు మనికాన్ ఇజి మీరు నమ్మిజని దనిదానె వన్ని వెట మర్జి నికె ఆతిదెర్. దేవుణు సత్తునె వన్నిజ్ సాతి వరి బాణిజ్ బత్కిస్తాన్.

13 ఉండ్రె కాలమ్దు, మీరు సాతి వరి లెకెండ మహిదెర్. ఎందనిజ్ ఇహిజ, మీరు పాపమ్కు కిజినె మహిదెర్, పాపం కిబిన్సి సెఇ ఆసెజ్బా మిజి మహె. అయాకెజ్

సొన్ఎండ మహె. గాని ఏలు మిజెనె దేవుణు క్రీస్తు వెట కొత్త బత్తు సితాన్. ఎందనిజ్ ఇహిజ, వాండ్రు మా పాపమ్కు విజు నొహ్తాన్.

14 ఇహిజ, మజి సిక్కు సీని, మాటు కితి తపుజ్ రాస్తి ఇడ్డి కాకితం సిల్లెండ లెకెండ మనాద్ అయాక క్రీస్తు సాతివలె మా పాపమ్కు వెట అయా కాకితమ్బా సిలువాదు కుంటిజాణిజ్ డెయితాండ్రె అయాకెజ్ పూర్తి సిల్లెండ ఆతె ఇజి తోరిస్తాన్.

15 అతికారమ్దు మహి ఏలుబడిః కిజి మహి దెయమ్కాజ్ మరి తోర్జ సత్తుజ, దేవుణు వీజిస్తాండ్రె, వన్కా ముస్సు గెలస్తాన్. క్రీస్తు సిలువాదు ఆతి దనిదనటాన్ దేవుణు వన్కా ముస్సు గెలస్తాండ్రె, విజెరె ఎద్దు వన్కాజ్ సిగు కిత్తాన్.

16 అందెజె, మీరు నెగం బోజనం ఉణిజి తింజిని వందిజ్ నీలిజ, మీరు ఏంటు ఏంటు బత్తువందిజ్ కిజిని పండొయి కిఇ వందిజ్, ఆమాన్దు పండొయి కిఇ వందిజ్, విస్తాంతి దినం సుడఃఇ వందిజ్ మీరు తపు కితిదెర్ ఇజి తీర్పు కిని వన్నిజ్ దూరం కిఆ.

17 నిని ఆడ్రెజ్ విజు ఉండ్రీ నీడః లెకెండె మన్నె. ఆ నీడ ఎయెదిసొ వాండ్రు వెనుక వాజినాన్. అయా వాండ్రు క్రీస్తునె.

18 'తగ ఆజినాప్' ఇజి వేసం తోరె ఆఇతిజ్, దూతెజ్ మాడిఃన్ఇతిజ్, మీరు తపు కితిదెర్ ఇజి మిజి తీర్పు కిని వన్నిజ్ దూరం ఆదు. ఎందనిజ్ ఇహిజ, వాండ్రు కలాదు సుడఃతి ఇనిదనిజొ ఆదారం ఇడఃజి అతికారం కిజినాన్. వాండ్రు కిజిని అలోసనెజ్ సెఇకెజ్. అందెజె వాండ్రు గర్ర ఆజినాన్. వాండ్రు గర్ర ఆదెజ్ మని ఇని సజతిబా వన్నిజ్ సీలితిజ్బా గర్ర ఆజినాన్.

19 అయా లెకెండ మనికాన్ క్రీస్తు బాణిజ్ ముజాలె దూరం ఆత మనాన్. బుర్ర ఆతి క్రీస్తు వందిజ్ మని నిజమాతి బోద వాండ్రు నెన్పిన్ఎన్. బుర్ర వెప్తి వజనె ఒడొఃల్ సత్తుదాన్ పిపినాద్. ఒడొఃల్ అత్తుజాణిజ్ సీరిజాణిజ్ అత్కిస్త మనాద్. అయాలెకెండె, దేవుణు ఎత్తు కితి వజనె సజమ్దిజ్ సత్తుదాన్ పిరిప్పికాన్ క్రీస్తునె.

20-21 సాతి క్రీస్తు వెట మీరు కూడిఃతి మనిదెర్. అందెజె నని ఆడ్రెజ, బోదెజ లోజిఎండ డిఃబె ఆతిదెర్. అయకెజ్ క్రీస్తుజ్ నమ్మిఇ లోకుర్వందిజ్ఇడ్డి మనికెజె. అందెజె మరి ఎందనిజ్, నెగం సజతిజ్ వాడుకొడుమాట్, రుసి సుణ్మట్, ముట్మాట్, ఇని యా లోకమ్ది ఆడ్రెజ లోజెదెజ్ వలె ఇజి లోజిజి నిదెర్.

22 ఆడ్రెజాదు వెప్పిని బోజనమ్ని మహి సజతిజ్ వాడు కొడుజి మహిజ, సిల్లెండ ఆనె. మరి ఎందనిజ్ అయాకెజ్ లోజిజనిదెర్. అయకెజ్ లోకుర్ ఇడ్డి ఆడ్రెజ బోదెజె.

23 నిని ఆడ్రెజ్, ఇట్టికార్ గొప్ప గెణం మనికార్ ఇజి తోర్పార్. ఎందనిజ్ ఇహిజ, లోకుర్ తీర్మనం కిత ఇట్టా మనార్ ఎలాగ మాడిఃస్తెజ్ ఇజి. అయాలెకెండె కిదెజ్ ఇజి ఆడ్రెజ్ వెప్పినాద్. తగ ఆజినాప్ ఇజి వేసం తోరె ఆదెజ్ ఇజి, దేవుణుదిజ్ నరద కిదెజ్ ఒరెన్ వన్ని ఒడొఃల్దిజ్ బాదెజ్ కిదెజ్ ఇజి ఆడ్రెజ్ వెప్పినాద్. అందెజె నిని ఆడ్రెజ్ నెగ్గిజె ఇజి తోర్పె. గాని, ఒరెన్ వన్నిజ్, వన్ని ఒడొఃల్ది ఆనెజ, ఆప్కిదెజ్ ఇజి ఆన ఆని వన్నిజ్ ఇని సాయమ్బా కిఉ. అందెజె నిని ఆడ్రెజ్ లోకురిజ్ సెఇకెజె కిబిస్సె.

3

పరలోకమ్దు మంజిని సజతిజి వందిజ్ ఎత్తుకిజి మండ్రు

1 క్రీస్తుజ్ సాతి బాణిజ్ దేవుణు బత్కిస్తి లెకెండె, మిజి బా వాండ్రు కొత్త బత్తు సితాన్. అందెజె క్రీస్తు మని దేవుణు మంజిని బాడిఃదు మని సజతిజి వందిజ్ ఎన్తివలెబా నండొ ఆస ఆజి మండ్రు. వన్నిజ్ దేవుణు గొప్ప అతికారమ్ని నండొ మర్యాద సిత మనాన్.

2 యా లోకమేదు మని సజతిజ ముస్సు మీ మన్న ఇడ్మాట్. గాని పరలోకమేదు మని సజతిజ ముస్సు మీ మన్న ఇడ్మేదు.

3 ఎందనిజ్ ఇహిజ, మీ పడాయి బత్సు సాత మనాద్. మీరు ఏలు క్రీస్తు వెట దేవుణు ఎద్రు బత్తిజనిదెర్. అయాక లోకుర్ సుడేదెజ్ అట్ఎర్.

4 మిజీ నిజమాతి బత్సు సీజనికాన్ క్రీస్తునె. వాండ్రు మరజి వానివలె, దేవుణు విజెరె ఎద్రు వన్నిజ్ వెల్లి తోరిస్సి వలె మిజీబా వన్నివెట వెల్లి తోరిస్సాన్. మీరుబా వన్ని వెట వన్ని జాయ్దు మంజనిదెర్. లోకుర్ మిజీ వన్ని వెట గవరం సీనార్.

5 అందెజె, మీరు ముజాలె కిజి మహి యా లోకమేది తపు పణిజ్ పూర్తి డిస్టు. ముకెలం, రంకు బూలమాట్, కేలార్ బూలమాట్. దిన్ని వందిజ్ నండో ఎత్తు ఆజి మన్న ఇడ్మాట్. సెఇకెజ్ కిదెజ్ ఆస ఆమాట్. మని దని ఇంక మరి నండో కావాలి ఇజి ఆస ఆమాట్. ఎందనిజ్ ఇహిజ, అయా లెకెండ కినిక మీరు ఆస ఆనిదనిజ్ మాడిసిని లెకెండ మనాద్.

6 యా లెకెండ కిమాట్. ఎందనిజ్ ఇహిజ, దేవుణు కోపం యా లెకెండ కిజిని వరి ముస్సు వానాద్.

7 ముజాలె మీరుబా దేవుణుదిజ్ లోజిఎండ మహివలె, యా లెకెండ కిజి మహిదెర్.

8 గాని ఏలు యాకెజ్ ఇనికబా కిమాట్. ముకెలం పగ అస్మాట్. కోపం ఆమాట్. మహి వరి వందిజ్ సెఇకెజ్ ఎత్తు కిమాట్. దుసలాడేమాట్. కేడి మాటెజ్ మీ వెయ్దాన్ వర్గిమాట్.

9 మరి ఒరెన్ వన్ని వెట అబద్దం వర్గిమాట్. ఎందనిజ్ ఇహిజ, మీ పడాయి బత్సు మీరు డిస్టిదెరె, నస్తివలె కిజి మహి సెఇ పణిజ్ మీరు డిస్టిదెర్.

10 అయాకెజ్ డిస్టిదెరె, ఉండీ నెగ్గి కొత్త బత్సు బత్తిజనిదెర్. మిజీ తయార్ కితి దేవుణునె యా కొత్త బత్సు మీ లోణ ఇట్టాన్. వన్ని లెకెండ మంజని వందిజ్ మరి మరి మిజీ కొత్తాజ్ కిజినాన్. వన్నిజ్ మీరు నెగ్గెండ నెస్సి వందిజె, యా లెకెండ మరి మరి కొత్తాజ్ కిజినాన్.

11 అందెజె, యూదురు ఇజినో, యూదురు ఆఇకార్ ఇజినో, సునతి కిబె ఆతికార్ ఇజినో, కిబె ఆఇకార్ ఇజినో, తకు జాతిదికార్ ఇజినో, మూర్కమేది నని ఒదె తకు జాతిదికార్ ఇజినో, వెటి పణి కినికార్ ఇజినో, కిఇకార్ ఇజినో ఆవద్ ముకెలం. గాని క్రీస్తునె ముకెలమాతికాన్. వాండ్రు నమ్మిత్తి వరి విజెరె లోణ మంజినాన్.

12 మీరు దేవుణు లోకుర్. వాండ్రు మిజీ ప్రేమిస్తాండ్రె వన్ని సొంత లోకుర్ ఇజి కేట ఇట్టాన్. అందెజె, మీరు మరి ఒరెన్ వన్ని వందిజ్ మీ పాణం నొతెజ్ దయ తోరిస్తు. తగిజి మండ్రు. సార్లిదాన్ మండ్రు. ఒరిసి మండ్రు.

13 మహి వరి వెట బరిస్తు. మీ లోణ ఒరెన్ మరి ఒరెన్ వన్ని వెట మొరొ ఆజి మహిజ, అయాక ఇనిక ఆతిజ్బా సెమిస్తు. ప్రబు ఆతి క్రీస్తు మిజీ సెడ్డినె సెమిస్తి వజ, మీరు సెమిస్తు.

14 దినిజ్ విజు ఇంక మహి వరిజ్ ప్రేమిస్తు. అయాకదె ముకెలం. ఎందనిజ్ ఇహిజ, మీరు ప్రేమిస్సి దనిదనటాన్ మీరు పూర్తి కూడేజి మంజనిదెర్.

15 మీరు ఒరెన్ మరి ఒరెన్ వన్ని వెట కూడేజి పాడేజి మండ్రెజ్ క్రీస్తు సీని సమదనం నీ మన్నదు మంజినాద్. ఎందనిజ్ ఇహిజ, మీరు దేవుణు సజమేదు ఒరెన్ మరి ఒరెన్ వన్నివెట సమాదనమేదాన్ మంజని వందిజె, దేవుణు మిజీ కూక్

మనాన్. దేవుణు కితి సజతిజ వందిజ్ ఎస్తివలెబా పోస్ఎండ దనిజ్ ఎత్తుకిజినె వందనమ్కు వెహ్ని మండ్రు.

16 క్రీస్తు వందిజ్ మని బోద మీరు నెగ్రెండ నెసినె మండ్రు. నండొ గెణమ్దాన్ ఒరెన్ వన్నిజ్ నేర్పిసి, బుద్ధి వెహ్ని మండ్రు. దేవుణు మాటెజ్ పాటెజ్ వజ పార్జి, దేవుణుదిజ్ పొగిడిఃజి వందనమ్కు వెహ్నిని పాటెజ్ పార్జి, దేవుణు ఆత్మ మీ మన్నుదిజ్ రేప్పిని వజ పాటెజ్ పార్జి మండ్రు. దేవుణు కితికెజ్ పోస్ఎండ మీ పూర్తి మన్నుదాన్ దేవుణుదిజ్ పాటెజ్ పార్డు.

17 మీరు ఇనిక వెహ్నిజ్బా, ఇనిక కితిజ్బా ప్రబుయేసుజ్ లోజితికార్ కిదెజ్ మని వజ కిదు. మా ప్రబు ఆతి క్రీస్తు వెట, మిజి దొహ్కొత్తి దని వందిజ్ బుబ్బు ఆతి దేవుణుదిజ్ వందనమ్కు వెహ్నివలె, యా లెకెండ కిదు.

దేవుణుదిజ్ నమ్మిత్తికార్ ఒరెన్ ఒరెన్ ఎలాగ మండ్రెజ్.

18 బోదెకాండె, మీరు మీ మాసిర్ మీ మున్ను ఆతికారం మనికార్ ఇజి ఒడఃబిజి వరిజ్ లోజిదు. మీరు ప్రబు వెట కూడిఃతి మనికిదెర్. అందెజె అయాకదె మీరు కిదెజ్ వనిక.

19 మాసిరాండె, మీరు మీ బోదెకాజ్ ప్రేమిస్తు. వన్కాజ్ బాదెజ్ కిమాట్.

20 కొడఃరాండె, మీరు మీ యాయ బుబ్బెజ్ ఎస్తివలెబా వెండ్రు. ఎందనిజ్ ఇహిజ, యాకదె ప్రబుజ్ ఇన్డం ఆతిక.

21 అప్పాసిరాండె, మీ కొడఃర్ మన్ను రుజ్ఎండ మంజిని వందిజ్ మరి మరి జటిజ్ ఆమాట్.

22 వెటి పణి కినికిదెరా, మీరు యా లోకమ్ది మీ ఎజుమారుజ, విజు వన్కా లోఇ లోజిదు. నెగ్గికార్ ఇజి వెహ్ ఆదెజ్ వారు సూణివలెనె ఆవద్. గాని పూర్తి మన్నుదాన్ వరిజ్ లోజిదు. ఎందనిజ్ ఇహిజ, మీరు ప్రబుజ్ తియెల్ ఆజి గవర్నం సీజినిదెర్.

23 మీరు ఇనిక కితిజ్బా, పూర్తి మన్నుదాన్ కిదు. లోకుర్ వందిజ్ ఆవద్. గాని దేవుణు వందిజ్ కిజినావ్ ఇజి పూర్తి మన్నుదాన్ కిదు.

24 ఎందనిజ్ ఇహిజ, ప్రబునె మిజి పలితం సీనాన్ ఇజి మీరు నెసినిదెర్. ఇహిజ, వాండ్రు ఒట్టు కితికెజ్ మిజి దొహ్కొత్తి. ఎందనిజ్ ఇహిజ మీరు సేవ కిజిని నిజమాతి ఎజమాని ప్రబు ఆత క్రీస్తునె.

25 తవు కిని వన్నిజ్, వాండ్రు ఎయెన్ ఆతిజ్బా వాండ్రు కితి తప్పుదిజ్ దేవుణు సిక్కు సీనాన్. ఇజ్రికార్ పెరికార్ ఇజి దేవుణుదిజ్ తేడ సిల్లెద్.

4

1 ఎజుమానిరాండె, మీరు మీ వెట్టిపణి మనిసీరిజ్ నాయమ్దాన్, వరిజ్ సీదెజ్ మనికెజ్ సీజి నెగ్రెండ సుడఃదు. ఎందనిజ్ ఇహిజ, మిజిబా ఒరెన్ ఎజమాని పరలోకమ్దు మనాన్ ఇజి ఒడఃబిదు.

2 విస్కిఎండ పార్దనం కిజి మండ్రు. మీరు పార్దనం కినివలె మన్ను ఇతాల్ అతాల్ ఆవండ జాగర్దదాన్ మండ్రు. దేవుణు మిజి కితి దని వందిజ్ వందనమ్కు వెహ్ని మండ్రు.

3 మరి మా వందిజ్బా పార్దనం కిదు. దేవుణు బోద వెహ్నిజ్ మిజి సరి దొహ్కొత్తెజ్ సాయం కిప్పిన్ ఇజి పార్దనం కిదు. ఎందనిజ్ ఇహిజ, క్రీస్తు వందిజ్ ఉండ్రీ కాలమ్దు

డాజీతి మహికెజ్ గాని, ఏలు తోరె ఆతి నిజమాతి సజతిజ్ బోదీస్తెజ్. యాక బోదీస్తెజ్నె, నాను జెలిదు ఆత.

4 యాక నాను బోదీస్తెజ్ మనికాదె. అందెజె నాను నెగ్రెండ, అర్థం ఆనిలెకెండ వెప్తాజ్ నజి సరి దోహ్కెజ్ సాయం కిపిన్ ఇజి నా వందిజ్ దేవుణుదిజ్ పార్దనం కిదు.

5 మీరు కిజిని దనితాన్ తెలివిదాన్ నమ్మ ఇ వరివెట మండ్రు. మిజి దోహ్కెజ్ నమయమ్దు విజు క్రీస్తు వందిజ్ వరిజ్ వెప్తాజ్ తయారదాన్ మండ్రు.

6 మీరు తెలివిదాన్, నెగ్రెండ, ఎస్తివలెబా వరి వెట వర్దిదు. అయావలె, వరి లోఇ విజెరె వెట వారు వెన్బాతి దనిజ్ ఎలాగ మరజి వెప్తాజ్ ఇజి ఎస్తివలెబా నెస్సిదెర్.

7 నజి జర్గిజిని విజు సజతిజ్, తుకికు మిజి వెహ్నాన్. వాండ్రు నాను ప్రేమ కిజిని ఒరెన్ తంబెరి. నమ్మకమ్దాన్ దేవుణు సేవ పణి కిజినికాన్. నా వెట జత కూడఃజి ప్రబుజ్ సేవ కిజినికాన్. వాండ్రు నా వందిజ్ మిజి వెహ్నాన్.

8 మజి జర్గినికెజ్ మీరు నెస్సి వందిజ్ నెగ్గి మాట వెహ్ని మిజి దయరం కిబిస్సి వందిజ్ నాను వన్నిజ్ మీ డగ్రు పోక్కిన.

9 ఒనెసిము వన్ని వెట మీ డగ్రు వాజినాన్. వీండ్రు నమ్మిదెజ్ తగ్గికాన్. మాపు ప్రేమిస్సి ఒరెన్ తంబెరి. మీ పట్టుమ్దికాన్. ఇబ్బె జర్గినికెజ్ విజు వీరు మిజి వెహ్నాన్.

10 నా వెట జెలిదు మని అరిస్సర్కు మిజి వెన్బాతి లెకెండ వెహ్నినాన్. బర్నబెజ్ బణిజ ఆతి మార్కుబా మిజి వెన్బాతి లెకెండ వెహ్నినాన్. (విని వందిజ్ ముజాలె మీరు వెహె ఆతి మనిదెర్. అందెజె వాండ్రు మీ డగ్రు వాతిజ డగ్రు కిదు)

11 యుస్తు ఇని యేసుబా మిజి వెన్బాతి లెకెండ వెహ్నినాన్. నమ్మిత్తి యూదుర్జ లోఇ నా వెట కూడఃజి పణి కిజినికార్ వీరు ముఎరె. దేవుణు ఏలుబడిః వందిజ్ వెప్తాజ్ వారు పణి కిజినార్. వారు నజి గొప్ప తోడుః ఆత మనార్.

12 క్రీస్తుయేసుజ్ సేవ కిజిని, మీ లోఇ ఒరెన్ ఆతి ఎవప్రా మిజి వెన్బాతి లెకెండ వెహ్నినాన్. వాండ్రు ఎస్తివలెబా మీ వందిజ్ డిఃన్ఎండ డటం పార్దనం కిజినాన్. మీరు అనుమానమ్కు నిల్లెండ నమకమ్దు పూర్తి పిరిని వందిజ్, దేవుణు ఇష్టం కినికెజ్ విజు మీరు పూర్తి నెస్సి వందిజ్ వాండ్రు డటం పార్దనం కిజినాన్.

13 ఎండనిజ్ ఇపాజ, వాండ్రు మీ వందిజ్, అవొదికియ పట్టుమ్ది నమ్మిత్తి వరి వందిజ్ ఇయరపొలి పట్టుమ్ది నమ్మిత్తి వరి వందిజ్ వాండ్రు నండొ కస్ట బాడిఃజినాన్. యాక నిజం ఇజి నాను వెప్తాజ్ అట్టు.

14 మాపు ప్రేమ కిజిని లూక డాక్టరుని దెమా మిజి వెన్బాతి లెకెండ వెహ్నినార్.

15 అవొదికియ పట్టుమ్దు మని కూలెజ్, నుమ్పాకుజ్, వన్ని ఇండ్రొ కూడఃజి వాజిని దేవుణు సజమ్దిజ్ నాను వెన్బాతి లెకెండ వెహ్అ.

16 మీ లోఇ యా ఉత్రం డటం సద్విజి వెనుక అవొదికియ పట్టుమ్దు మని దేవుణు సజమ్దుబా యాక సద్విదెజ్. అయాలెకెండ అవొదికియ పట్టుమ్దు మని దేవుణు సజమ్దిజ్ నాను రాస్తి ఉత్రం, వారు మిజి పోక్కార్. అయాక మీరుబా డటం సద్విదెజ్.

17 అర్కిపుజ్ వెహ్అ, 'ప్రబు వెట నీను కూడిఃతి మనికి. నిజి ఏర్పాటు కితి పణి పూర్తి కిదెజ్ నుడఃదెజ్ వలె', ఇజి.

18 పవులు ఇని నాను మిజి వెన్బాతి లెకెండ వెహ్నిన. నా సొంత కీదానె ఆకర్తితి యా మాటెజ్ రాసిన. నాను జెలిదు మన ఇజి పోస్కాట్. దేవుణు దయాదర్మం మీ

ముస్కు మనిద్.

అపొస్తుడు ఆతి పవులు తెస్సలోనిక పట్నమ్ది దేవుణు సజమ్జ్ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెసలోనిక పట్నమ్దు మని దేవుణు సజమ్ది వరిజ్ రాస్తి మొదోహి ఉత్తం. పవులు కొరింతు పట్నమ్దు మహిపలె బాణిజ్ యా ఉత్తం రస్తపోక్తాన్ ఇజి నండోండార్ ఒడోబిజినార్. తిమోతి, సిల ఇనికార్ యా ఉత్తం ఒత్త సీత్తార్ ఇజి నండోండార్ ఒడోబిజినార్. పవులుని వన్ని వెట సువార్త పణి కినికార్ కూడోజి దెసలోనిక పట్నమ్దు సొన్ని సువార్త సాటిసి దేవుణు సజం మొదోల్స్త మనాద్. (అపొస్తురు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్తోజ్ మొదోల్స్తాన్. బక్తి మనికార్ ఆతి యూదురు ఆఇకార్ బా నండోండార్ బాన్ కూడ్డి వాజి దేవుణుదిజ్ పొగ్డిజి మాడిసి మహోర్. అందెజె దెసలోనిక పట్నమ్దు మని నెగోండార్ యూదురుని యూదురు ఆఇకార్, పవులు సాటిస్తమని సువార్త నమ్మితార్. యూదురిజ్ ఇంక యూదురు ఆఇకార్ నండోండార్ సువార్త నమ్మితార్. ఇంజముంజు మూండ్రి వారమ్కు బాన్ మహంత్రి వాండ్రు బాణిజ్ సోత సాహన్. కొత్తాన్ దేవుణుదిజ్ నమ్మితి వరిజ్ హిమ్సెజ్ కినార్లెసు ఇజి వరిజ్ దయరం వెప్తాజ్ ఇజి బాన్ తిమోతిజ్ పోక్తాన్. మరి వెనుక దేవుణు సజమ్ది వరిజ్ దయరం వెప్తాజ్ ఇజి, మరి దేవుణుదిజ్ నమ్మితికార్ దేవుణుదిజ్ తియోలాజి ఎలాగ బత్కిదెజ్, మరి బండెజ్ ఆవండ, మహికార్ గవరం సీనిలెకెండె ఎలాగ బత్కిదెజ్ ఇజి నెస్పిస్తోజ్ ఇజి యా ఉత్తం వరిజ్ రాస్తాన్. నండోండార్ యేసుప్రబు మర్జివాని దన్ని వందిజ్ అనుమానమాతార్. దన్ని వందిజ్ వరిజ్ నెస్పిస్తోజ్ ఇజి యా ఉత్తం రాస్తాన్. యేసుప్రబు మర్జివాని వందిజ్ విజు అద్యయమ్కు రాస్తా మనాద్.*

1 బుబ్బాతి దేవుణుదిజ్ దేవుణుదిజ్ని, ప్రబు ఆతి యేసుక్రీస్తుజ్ నెందితి మన్ని, తెస్సలోనిక పట్నమ్దు మని దేవుణు సజమ్ది వరిజ్, పవులుని సిలువాను తిమోతి ఇనికార్ రాసిని ఉత్తం. దేవుణు దయాదర్మమ్దాన్ మీరు నిపాతిదాన్ మండ్రెజ్ నయం కిపిన్.

తెస్సలోనికాది వరి నమకం వందిజ్ దేవుణుదిజ్ నమదనమ్కు!

2 ఎస్తివలెబా మా పార్లనమ్దు మిజి ఎత్తు కిజి, మీరు విజిదెరె వందిజ్ మాపు దేవుణుదిజ్ వందనమ్కు వెహ్సినావ్.

3 మిజి దేవుణు మున్కు మని నమ్మకమ్దాన్ మీరు కితి పణిజి వందిజ్, మహి వరి వందిజ్ ప్రేమాదాన్ మీరు కస్తబాడోజిని దన్ని వందిజ్, ప్రబు ఆతి యేసు క్రీస్తు మున్కు మని ఆనదాన్ ఎద్రు సుడోజి డిన్వండ ఒరిసిని ఒర్పు వందిజ్ మాపు ఎస్తివలెబా మా బుబాతి దేవుణు ముందాల ఎత్తు కిజి మంజినావ్.

4 తంబెరిజాండె, దేవుణు మిజి ప్రేమిస్తాండ్రె ఎర్లిస్త మనాన్ ఇజి మాపు నెస్సావ్.

* 0: 1:0 1:8-10; 2:19-20; 3:13-18; 5:23-24

5 ఎందనిజ్ ఇహిజ, మాపు మిజి వెహ్ని సువార్త, వహి మాటెజాణిజ్ నె ఆవిండ, దేవుణు సత్తుదాన్, దేవుణు ఆత్మదాన్ మరి మా మన్నుదు పూర్తి నమ్మకమదాన్ మిజి నెస్సిస్తావ్. మీ వందిజ్ మాపు మీ వెట కూడఃజి ఎలాగ బత్మితావ్ ఇజి మీరు నెసినిదెర్.

6 గొప్పు పెరి కస్టమ్దు మీరు ప్రబుజ్ ని మజి పొలిసి నడిఃతిదెర్. గొప్పు పెరి కస్టమ్కు మిజి వాతె. గాని దేవుణు ఆత్మ మిజి సితీ సర్దదాన్ మీరు యా సువార్తదిజ్ డగ్రు కితిదెర్.

7 అందెజె అయాలెకెండ నమ్మిత్తికిదెర్ ఎలాగ మండ్రెజ్ ఇజి నెస్సెజ్ మాసిదోణియని అకాయ ఇని ప్రాంతమకాజ్ నమ్మిత్తి వరిజ్ విజెరిజ్ మీరు ఉండ్రీ గుర్తు లెకెండ ఆతిదెర్.

8 మాసిదోణియని అకాయ ప్రాంతమకాజ్ నె ఆవిండ దేవుణు సువార్త మీ బాణిజ్ విజుబాన్ సాటె ఆతాద్. అక్కాదె ఆవిండ దేవుణు మున్ను మిజి మని నమకుం విజెరె నెస్తార్. అందెజె దని వందిజ్ మాపు ఇనికబా వెహ్తాజ్ అకర్ సిల్లెద్.

9-10 ఎందనిజ్ ఇహిజ మీరు ఎలాగ మజి డగ్రు కితిదెర్ ఇజి వారె వెహ్నినార్.

బొమ్మెజు మాడిఃస్సిక డిసి,సిజి బత్మిజిని నిజమాతి దేవుణుదిజ్ పొగ్డిఃజి మాడిఃస్సెజ్ మీరు ఎలాగ దేవుణు దరోటు మహ్నిదెర్ ఇజి వారె వెహ్నినార్. బత్మిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోపమదాన్ మజి తప్సినికాన్ నాతి, సాతివరి బాణిజ్ దేవుణు నిక్తిమని వన్ని మరిన్ ఆతి యేసు, దేవుణు పరలోకమదాన్ డిగ్జి వానాన్లె ఇజి వన్ని వందిజ్ ఆసదాన్ ఎద్రు సుడఃజి మంజినిదెర్.

2

దెసలోనిక పట్టుమ్దు పవులు కితి సువార్త పణి

1 తంబెరిజాండె, మాపు మీ డగ్రు వాతిక పణిదిజ్ రెఎండ ఆవితాద్, ఇజి మీరె నెసినిదెర్.

2 ముజాల పిలిపియా పట్టుమ్దు మజి ఎసా కస్టమ్కు వాతె, మరి ఎసానో సిగు కిత్తార్ ఇజి మీరు నెసినిదెర్. గాని గొప్పు గటిదాన్ అడ్డుజ్ వాతిజ్ బాగాని దేవుణు మజి సితీ దయరమదాన్ సువార్త మాపు మిజి వెహ్తావ్ ఇజి మీరు నెసినిదెర్.

3 మా మన్నుదు ఇనికాదో సెఇ ఉదేసమ్దానో, మజి ఇనికాదో లాబం దొహ్కెజ్ ఇజినో, మిజి మోసెం కిదెజ్ ఇజినో మాపు యా సువార్త మిజి వెహ్ ఏతావ్.

4 గాని అక్కాదె ఆవిండ మాపు తగ్గికావ్ ఇజి దేవుణు మజి సుడఃజి సువార్త వెహ్తాజ్ ఇజి ఒపజెప్తి వందిజ్ మాపు వర్గిజినావ్. అందెజె మాపు లోకురిజ్ సర్ల కిబిస్సికార్ అవిండ, మా మన్నుజు పరిక్ కిజిని దేవుణుదిజ్ నె సర్ల కిబిస్సికార్ ఆదెజ్ ఇజి సుడఃజినావ్.

5 మాపు మిజి వెహ్నికెజ్ ఇనికెజ్ బా పొజిజిని మాటెజ్ ఆఙ ఇజి మీరు నెసినిదెర్. మరి మజి డబ్బు వందిజ్ నండో ఆస మనాద్ ఇజి మీరు నెసెండ, మీ బాణిజ్ ఇనికబా గణస్తెజ్ ఇజి మాపు ఇనికబా డాఃప్సి వర్గివితావ్ ఇనిదన్నిజ్ దేవుణునె సాక్సి.

6 లోకుర్ మజి పొగ్డిఃదెజ్ ఇజి మాపు కోర్ ఏతావ్. మీరు గాని మహికార్ ఎయెర్ బాగాని మజి పొగ్డిఃదెజ్ ఇజి మాపు కోర్ ఏతావ్. మాపు క్రిస్తు వందిజ్ అపొస్తురు ఆతికావ్ ఇజి మీబాణిజ్ లోసె ఆదెజ్ అక్కు మన్నికావ్.

7 గాని అయాలెకెండ కిఎండ, ఉండ్రీ అయేసి దని కొణ్ఠెరిజ్ ఎలాగ సుడఃజినాదో, అయాలెకెండె మాపు మీ నడిఃమి తగె ఆత మహావ్.

8 మీరు మజి నండొ ఇన్ఱం ఆతికిదెర్. అందెజె మాపు గొప్ప సర్దాదాన్ మీ వెట దేవుణు సువార్త వెప్పికదె అవిండ, మరి మీ వందిజ్ మా బత్తుదాన్ ఇనిక కిదెజ్ అట్టాపొ అక్కెజ్ కిదెజ్ బా తయార్ ఆత మహావ్. ఎందనిజ్ ఇహిజ మీరు మజి నసా డగ్రుహికిదెర్ ఆతిదెర్.

9 తంబెరిజాండె, మీ నడిమి సువార్త వెప్పి మహివలె, మాపు మీ ముస్కు ఆదారం అవిండ, రెయు పొగొల్ కన్ఱబాడ్డి పణి కిజి మహావ్. మాపు కన్ఱబాడ్డి పణికితిక మరి మా కన్ఱమ్కు విజి మీరు తవ్విండ ఎత్తు కిజి మంజినిదెర్ ఇజి మాపు నెనినావ్.

10 దేవుణుదిజ్ నమ్మిత్తికిదెర్ ఆతి మీ నడిమి, మాపు ఎసా బక్తిదాన్, నీతి నిజాయితిదాన్, నిందెజ్ సిల్లెండ ఎలాగ బత్తితావ్ ఇని దనిజ్ మిరె సాక్సి, దేవుణుబా సాక్సి.

11-12 ఎందనిజ్ ఇహిజ. వన్ని గొప్ప జాయ్దుని, వన్ని ఏలుబడిడు మండ్రెజ్ ఇజి మిజి కూక్తి మని దేవుణుదిజ్ తగితి లెకెండ మీరు బత్తిదెజ్ ఇజి మిజి ఒరెన్ అప్పొసి వన్ని కొడొర్ వెట ఎలాగ వెప్పి నెగ్గి సర్దు నడిపిసినండ్రొ, అయ లెకెండె మీ లొఇ ప్రతి ఒరెన్ వన్నిజ్ ఉసార్ కిజి, దయరం వెప్పి, బతిమాలజి మాపు మీ వెట మహావ్ ఇజిబా మీరు నెస్సిదెర్.

13 మాపు దేవుణుదిజ్ ఎస్సివలెబా డిన్విండ వందనమ్కు కిజినె మంజినావ్. ఎందనిజ్ ఇహిజ మా బాణిజ్ మీరు వెహి మని దేవుణు మాట, అక్క లొకుర్ బాణిజ్ వాతి మాట లెకెండె అవిండ, అక నిజం మని లెకెండెనె, దేవుణు బాణిజ్ వాతి దేవుణు మాట లెకెండె మీరు డగ్రు కితిదెర్. అందెజె దేవుణుదిజ్ నమ్మిత్తికిదెర్ ఆతి మీ మన్సుదు అక్క నెగ్గి పణి కిజినాద్.

14 తంబెరిజాండె మీరు యూదయ దేసమ్దు మని క్రీస్తు యేసుజ్ నమ్మిత్తి మని దేవుణు సజమ్కాణి వరిజ్ పొలిసి నడిసెనిదెర్. ఎందనిజ్ ఇహిజ, వారు వరి సొంత లొకుర్ ఆతి యూదురు బాణిజ్ స్రమెజ్ ఒరిస్తి మహి లెకెండె మీరుబా మీ సొంత లొకుర్ బాణిజ్ స్రమెజ్ ఒరిస్తిదెర్.

15 యూదురు ఆతికార్ ప్రబు ఆతి యేసుజ్ని దేవుణు ప్రవక్తరుజ సప్టార్. వారు మజిబా డిన్విండ హిమ్మెజ్ కిత్తార్. యూదురు ఆతికార్ సువార్త వీంజి దేవుణు వరిజ్ రక్సిస్టెజ్ అవెద్ ఇజి మాపు వరి వెట వర్గివిండ మజి అడు కిజి దేవుణుదిజ్ పడిఃఇ పణిజ్ కిజి వారు లొకుర్ విజెరిజ్ పగాతికార్ ఆజినార్.

16 యా లెకెండె వారు వరి పాపమ్కు ముస్కు మరి కుడుఃప్పి పూర్తి కిజినార్. అందెజె కడిఃవేరిదు దేవుణు కోపం వరి ముస్కు మనాద్.

తెస్సులొనికది వరిజ్ సుడఃదెజ్ పవులుజ్ మని గొప్ప ఆస

17 తంబెరిజాండె, మాపు సెగం కాలం మీ బాణిజ్ దూరం ఆతి మనిజ్ (మా ఒడొఃల్నె దూరం ఆతాద్ గాని మా మన్సు దూరం అవితాద్) మర్జి మీ డగ్రు వాజి మిజి సుడఃదెజ్ ఇజి నండొ ఆస ఆజి నండొ పణి కిత్తావ్.

18 నిజమె, మీ డగ్రు వాదెజ్ ఇజి గొప్ప ఆస ఆతావ్గాని నయ్తాను దనిజ్ అడ్డు కిత్తాన్. పవులు ఇని నాను మరి మరి మీ డగ్రు వాదెజ్ ఇజి సుడఃత.

19 మాపు ఎయెర్ వందిజ్ దేవుణు ఎద్దు ఆసదాన్ ఎద్దు సుడఃజినావ్? మజి సర్ద కిబిస్సొకార్ ఎయెర్? సిల్లిజి ఎస్సివలెబా మాపు యేసుక్రీస్తు ఎద్దు పొగిడిఃజి, మజి గొప్ప సర్ద కల్లిసిని ఉండ్రొ టోపి లెకెండె మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎద్దు మంజిని మీరెగదె?.

20 నిజమె మీరె మజీ నెగ్గి పేరు తపిసినికిదేర్. మజీ సర్ద కిబిసినికిదేర్ మీరె.

3

1 మిజీ సుడోదెజ్ ఇజి మజీ మని ఆస బరిస్తెజ్ అట్విండాతిజ్, మాపు ఏదెన్సు ఇని పట్టుమ్దు మంజినిక నెగ్గిక ఇజి ఒడిబిజినె,

2 యేసుక్రీస్తు ముస్కు మీరు ఇడ్డి నమకమ్దు కర్ణిఎండ మిజీ దయరం వెహ్ని, సత్తు మని వరి లెకెండ ముజాల నడిపిస్తెజ్ ఇజి యేసుక్రీస్తు వందిజ్ సువార్త సాటిస్తెజ్ మా వెట కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్గు పోక్తావ్.

3 అందెజె మీ లోఇ ఎయెన్బా యా కస్టమ్కాజ్ సుడోజి వెనుక సొన్వండ, యేసుక్రీస్తు ముస్కు మని నమకమ్దు గటిజ నిల్చి మండ్రెజ్ వలె. ఎందనిజ్ఇహిజ మాటు యాకెజ్ ఓరిస్తెజ్ వలె ఇజి మీరు నెసినిదేర్.

4 నిజమె, మాపు మీ వెట మహివలెనె మజీ హిమ్మెజ్ వానె ఇజి మిజీ వెహ్ని మహావ్. యాకెజ్ మాపు వెహితి లెకెండెనె జగ్గితె ఇజి మీరు నెసినిదేర్.

5 ఎలాగబా సర్వూసు సెఇ పణిజ్ కిదెజ్ ఇజి మీ మన్నుదు ఆస పుటిసి, మీ నడిమి మాపు కితి పణిజ్ విజు ఉండ్రీ వేల పణిదిజ్ రెవిండ కిత్తూసు ఇజి నాను తియెలాత. అందెజె దన్ని వందిజ్ ఎత్తు కిజి, యాక ఓరిస్తెజ్ అట్విండా మీ నమకం వందిజ్ నెస్తెజ్ ఇజి నాను తిమోతిజ్ పోక్త.

తిమోతి తతి నెగ్గి కబ్బు

6 గాని తిమోతి మీ బాణిజ్ ఏలె మా డగ్గు వాతాన్. మిజీ దేవుణు ముస్కు మని నమకం వందిజ్, మీ ప్రేమ వందిజ్ నెగ్గి కబ్బు తతాన్. మాపు మిజీ సుడోదెజ్ ఆస ఆజిని లెకెండ, మీరుబా మజీ సుడోదెజ్ ఆస ఆజినిదేర్ ఇజి వాండ్రు వెహ్తాన్. మరి మా వందిజ్ ఎస్తివలెబా సర్దాదాన్ ఎత్తు కిజినిదేర్గె.

7 అందెజె తంబెరిజాండె, మాపు మజీ వాతి దుకమ్దాన్ మహివలె, మజీ హిమ్మెజ్ వాతివలె మీ నమకం వందిజ్ విహాపె ఉసార్ కిబె ఆతావ్.

8 మీరు ప్రబు ముస్కు మని నమకమ్దు గటిజ నిల్చి మంజినిదేర్, అందెజె దేవుణు ముస్కు మిజీ మని నమకం మా బత్తు లెకెండెనె మజీ విలువాతిక ఆజినాద్.

9 దేవుణు ముందాల మీ వందిజ్ మన్ని విజు సర్ద వందిజ్ దేవుణుదిజ్ వందనమ్కు ఎసా వెహ్తాజ సరి ఆనాద్? ఎస్సా మాపు వెహ్తాజ్బా అక్కు తక్కునె మంజినె.

10 మాపు మిజీ మరి ఉండ్రీ సుటు సుడోజి దేవుణు ముస్కు మని మీ నమకమ్దు మిజీ తకు మనిక పూర్తి కిదెజ్ ఇజి ఉండ్రీ సుటు అన్కాసం దోహ్క్తికెజ్ ఇజి రెయు పొకల్ దేవుణు వెట పార్దనమ్దు నండో బతిమాలిజినావ్.

11 మా బుబ్బాతి దేవుణుని మా ప్రబువాతి యేసు మీ డగ్గు వాదెజ్, మజీ ఇని అడ్డు సిల్లెండ సరి తొరిసిన్.

12 మాపు మిజీ ప్రేమిసిని లెకెండ మీరు ఒరెన్ మరి ఒరెన్ వెట ప్రేమిస్తెజ్, మరి మీ లోఇ మని ప్రేమ నండో అజి పొగిజిని లెకెండ ప్రబు మిజీ సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎద్రు మీరు ఇని కరయ సిల్లెండ, నీతి నిజాయితిదాన్ మండ్రెజ్, మీ మన్నుదు దేవుణు మిజీ సత్తు సిపిన్.

4

దేవుణుని ఇష్టమాతి లెకెండ్ బత్కిని వందిజ్

1 తంబెరిజాండె, దేవుణుని ఇష్టం ఆతివజ ఎలాగ బత్కిదెజ్ ఇజి మాపు మిజి నెస్సిస్త మనాప్. మీరు అయాలెకెండ్నె కిజినిదెర్. గాని అక్కర్దిజ్, మాపు మిజి యేసుప్రబు పేరుదాన్ గటిజి సారిసి సారిసి వెస్సినిక ఇనిక ఇహిజ మీరు అయ లెకెండ్ మరి ఒదె నెగెణ్ కిజి మండ్రు.

2 యేసుప్రబు బాణిజ్ మజి దోహ్కొక్తి అతికారమ్దాన్ మాపు మిజి నెస్సిస్తకెజ్ ఇనికెజ్ ఇజి మీరు నెసినిదెర్.

3 మీరు దేవుణు వందిజ్ ఒప్పజెప్పి వన్ని వందిజ్ కేట ఆతికార్ ఆజి మండ్రెజ్ ఇజినె దేవుణు ఇష్టమాజినాన్. మీరు రంకు బూలానిక అవద్ ఇజినె దేవుణు కోరిజినాన్.

4 అక్కాదె అవండ దేవుణు మీ ఒడొల్దిజ్ మని ఆసదిజ్ సరి సిఏండ, ఒరెన్ సొంత ఒడొల్దిజ్ ఇని పాపమ్దిజ్ సొన్ఏండ ఎలాగ తగితి లెకెండ్ దేవుణుదిజ్ ఇష్టమాతి వజ అడిదెజ్ ఇజి మీరు ఒరెన్ ఒరెన్ నెస్తెజ్ వలె.

5 మీరు, దేవుణుదిజ్ నెన్ఇ, దేవుణుదిజ్ నమ్మిఇ వరిలెకెండ్, ఉత్పుత్ ఆజి మండ్రెజ్ అవద్.

6 ఎయెన్బా, ఉత్పుత్ ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడజి మంజి, వన్నిజ్ మొసెం కిదెజ్ అవద్. యా లెకెండ్ కిని వరిజ్ దేవుణు సిక్స సీనాన్. దిన్ని వందిజ్ మాపు ముజాల మీ వెట కనితం వెహ్ మహాప్.

7 ఎండనిజ్ ఇహిజ. రంకు బూలాజి బత్కిదెజ్ ఇజి దేవుణు మజి కూక్తెజ్ సిల్లెన్, గాని పాపం సిలి నెగ్గి బత్కు బత్కిదెజ్ ఇజినె కూక్త మనాన్.

8 అందెజె యా బోదదిజ్ నెక్కి పొక్కికాన్, లోకుదిజ్ నెక్కి పొక్వీన్ గాని దేవుణు ఆత్మదిజ్ మిజి సీజిని దేవుణుదిజ్నె నెక్కి పొక్కికాన్ ఆజినాన్.

9 తంబెరిజ నడిమి, ఒరెన్ వన్నిజ్ మరి ఒరెన్ వన్ని వెట మన్ని ప్రేమ ఎలాగ మండ్రెజ్ ఇజి, మాపు మిజి ఏలు రాస్సెజ్ అవ్సరం సిల్లెద్. ఒరెన్ మరి ఒరెన్ వన్నిజ్ ఎలాగ ప్రేమిసి మండ్రెజ్ ఇజి దేవుణునె మిజి నెస్సిస్త మనాన్.

10 నిజమె మాసిదొనియ ప్రాంతమ్దు మనిక తంబెరిజ విజేరిజ్ మీరు ప్రేమిసినిదెర్. గాని మీరు మరి ఒదె ప్రేమిసి మండ్రెజ్ ఇజి మాపు సారిసి సారిసి వెస్సిినాన్.

11 మాపు ముజాలల్ మిజి ఆడ్ర సిత్తిమహి లెకెండ్ సార్లిదాన్ బత్కిదెజ్ ఆస ఆజి మండ్రు. మరి మీ కికాణిజ్ మీ వందిజ్ పణి కిజి మండ్రు మహివరి సజతిజ లొఇ బుర డూత్ఏండ, మీ పణిజ్ సుడొజి మండ్రు.

12 నస్తివలె మీ బత్కు సడొజి నమ్మిఇకార్ మిజి గవ్వరం సీనార్. మరి మీరు, మహి వరి ముస్సు ఇనిదని వందిజ్బా ఆదారం అవండ మంజినిదెర్.

ప్రబు మర్జి వాని వందిజ్

13 తంబెరిజాండె, దేవుణు ముస్సు నమకం ఇట్టి సాతివరిజ్ ఇనికా జర్గినాదెల్ ఇజి మీరునెసి మండ్రెజ్ ఇజి మాపు కోరిజినాప్. ఎండనిజ్ ఇహిజ దేవుణు ఎద్రు ఇని ఆస సిలి నమ్మిఇ వరి లెకెండ్ మీరు దుకం అవండ మండ్రెజ్ వలె ఇజి మాపు కోరిజినాప్.

14 యేసుప్రబు సాతండ్రె మర్జి నిజితాన్ ఇజి మాటు నమ్మిజినాట్. అయలెకెండ్నె యేసుప్రబు ముస్సు నమ్మకం ఇడొజి సాతివరిజ్బా దేవుణు యేసు వెట కూక్త తనాన్.

15 అందెజె ప్రబు ఆతి యేసు వెప్తా మని మాట అసి మాపు మిజీ దయరమ్దాన్ వెప్పినిక ఇనిక ఇహిజ, ఏలు బత్తిజిని మాటు, యేసు ప్రబు మర్జి వాని రోజు బత్తిజి మహిజ్బా, ప్రబు ముస్సు నమకం ఇడఃజి సాతి వరిజ్ ఇంక ముజాల వన్ని డగ్గు సొండ్రెజ్ అట్వేట్. వారె ముజాల సొనారై.

16 ప్రబువాతి యేసుక్రీస్తు వన్ని గొప్పు పెరి జాటుదాన్ ఆడ్ర సీజి, విజు దాతారి ముస్సు నెయ్యి ఆతి దూత జాటుదాన్ని, దేవుణుది గొప్పు పెరి జోడుఃబంగ ఊక్కి జాటుదాన్ పరలోకమ్దాన్ డిఃగ్గి వానివలె, యేసుప్రబు ముస్సు నమకం ఇడఃజి సాతికార్ ముజాల నిజ్నారలె.

17 నస్తవలె బూమి ముస్సు బత్తిజిని మాటు యేసుప్రబుజ్ దసుల్ ఆదెజ్ ఆకానమ్దు మని మొసొపుదు వరివెట పెరి ఆనాట్లె. అయాలెకెండ మాటు ప్రబు వెట ఎలాకాలం మంజినాట్లె.

18 అందెజె మీరు యా మాటెజాణిజ్ ఒరెన్ మరి ఒరెన్ వన్ని వెట దయరం వెప్పి మండ్రు.

5

1 తంబెరిజాండె, ఎస్తివలె అక్కెజ్ విజు జర్గినాద్లె ఇజి, ఆ గడిఃయ వందిజ్నొ, ఆకెజ్ ఎలాగ జర్గినె ఇని వందిజ్నొ మాపు మిజీ రాస్తెజ్ అవ్నరం సిల్లెద్.

2 ఎందనిజ్ ఇహిజ, ఎయెర్బా ఒడఃబిఎండ మనివలె రెయ్యు, డొజ కిదెజ్ డొజారి ఎలాగ వానాండ్రొ, అయా లెకెండెనె ప్రబు వాని దినంబా మంజినాద్ ఇజి మీరు బాగ నెసినిదెర్.

3 “నమదనమ్దాన్ మనాప్, మజి ఇని తియెల్ సిల్లె”, ఇజి లోకుర్ వర్గిజి మంజిని వలెనె, షొటాదు మన్నిబోదెలిదిజ్ ఎలాగ ఏరు ఈబాని నొప్పి వానాదొ, అయలెకెండెనె వెటనె నాసనం వరి ముస్సు వానాద్లె. అందెజె ఎయెర్బా తప్రె ఆదెజ్ అట్వేర్.

4 తంబెరిజాండె, ఇనికబా ఒడఃబిఎండ మనివలె, ఒరెన్ డొజారి లెకెండె అయూ దినం మీ ముస్సు వాతిజ్బా మీరు బమ్మ ఆఇదెర్. ఎందనిజ్ ఇహిజ, మీరు దిని వందిజ్ నెన్వండ సీకటిదు బత్తిని కిదెర్ ఆఇదెర్.

5 మీరు విజిదెరె జాయ్దు పుట్టి నని వరి లెకెండె మనిదెర్, వెడెదిజ్ పుట్టి నని వరి లెకెండె మన్నిదెర్. మాటు రెయ్యుదిజ్ పుట్టి నని వరి లెకెండె ఆవెట్.

6 అందెజె మాటు మహి వరి లెకెండె నిద్ర కిజి మన్వండ మా మన్నుదిజ్ అడిఃజి తెలిదాన్ మంజినాట్.

7 నిద్ర కినికార్ రెయ్యు నిద్ర కిజినార్. ఊణిజి సొస్సికార్ రెయ్యు సొసి మంజినార్.

8 మాటు వేలెదిజ్ పుట్టి నని వరి లెకెండె మనికాట్. అందెజె మాటు మా మన్నుదిజ్ అడ్డిఃజి, దేవుణు ముస్సు మని నమకమ్ని ప్రేమ, మజి గుండెదిజ్ అడు కిని ఉండ్రొ ఇనుము సొక లెకెండె తోడుఃగినాట్. మరి దేవుణు మజి రక్కిస్సాన్లె ఇజి వన్ని వందిజ్ ఆసదాన్ ఎద్దు సుడఃజి మంజినిక, మజి బురాదిజ్ అడు కిని ఇనుము టోపి లెకెండె తోడిఃగిజి మంజినాట్.

9 ఎందనిజ్ ఇహిజ, మా ప్రబువాతి యేసుక్రీస్తు మజి రక్కిస్సెజ్ ఇజినె దేవుణు మజి ఏర్పాటు కిత్తాన్. గాని వన్ని బాణిజ్ వాని సిక్స వందిజ్ అవద్.

10 మాటు బత్తితి మహిజ్బా, సాతి మహిజ్బా, వాండ్రు మర్జి వానివలె వన్నివెట మజి బత్తిస్సెజ్నె యేసుక్రీస్తు మా వందిజ్ సాతాన్.

11 అందెజె మీరు ఏలు కిజిని లెకెండెనె ఒరెన్ మరి ఒరెన్ వన్ని వెట దయరం వెహ్ని, ఒరెన్ వన్నిజ్ దేవుణు ముస్సు మని నమ్మకమ్దు పిరిని లెకెండె సాయం కిజి మండ్రు.

12 తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెహ్ని, మీ నడిఃమి కన్ఠబాడిఃజి దేవుణు పణి కిని వరిజ్ గవరం సీదు ఇజి మిజి బతిమాలజినాప్.

13 వారు కిజిని పణి వందిజ్ వరిజ్ నండొ ప్రేమిసి గవరం సీజి మండ్రు. ఒరెన్ మరి ఒరెన్ వన్ని వెట నిపాతిదాన్ బత్తిజి మండ్రు.

14 తంబెరిజాండె, మాపు మిజి వెహ్నినిక ఇనిక ఇహిజు, బదకమ్దాన్ మని వరిజ్ మీరు బుద్ది వెహ్ను. విసారం అస్తి మనివరిజ్ దయరం వెహ్ని మండ్రు. దేవుణు ముస్సు మని నమకమ్దు పిరిదెజ్ అట్ఠజ వరిజ్ సాయం కిజి మండ్రు. విజేరె వెట ఓరిసి మండ్రు.

15 ఎయెన్బా వన్ని వెట మరి ఒరెన్ కితి సెజ పణిదిజ్ మర్జి సెజ పణిజ్ కివండె సుండెదు. ఎస్తివలెబా ఒరెన్ మరి ఒరెన్ వన్ని వెట కనికారమ్దాన్ మండ్రు. లోకుర్ విజెరె వెటబా కనికారమ్దాన్ మండ్రు.

16 ఎస్తివలెబా సర్దదాన్ మండ్రు.

17 డిన్వండె పార్దనం కిజి మండ్రు.

18 ఎలాగ మర్తి సమయమ్దుబా విజు దనిజ్ దేవుణుదిజ్ వందనమ్కు వెహ్ని మండ్రు. యేసుక్రీస్తుజ్ నమ్మిత్తి మని మీరు యాలెకెండె మండ్రెజ్ ఇజినె దేవుణు కొరిజినాన్.

19 మీ లోఱ మని దేవుణు ఆత్మదిజ్ నప్పాట్.

20 దేవుణు బాణిజ్ వాతి దేవుణు ప్రవక్తరు వెహ్ని మాటెజు నెక్కి పొక్కాట్.

21 విజు వనకాజ్ పరిస కిజి నెగ్గి దనిజ్ డగ్గు కిదు.

22 సెజ విజు వన్కాజ్ దూరం కిదు.

23 నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎద్దు మీ దేవుణు ఆత్మాని, మీ పాణం, ఒడొల్ విజు ఇని నిందెజ్ సిల్లెండె దేవుణు కాపాడిఃజి మనిన్ ఇజి నాను పార్దనం కిజిన.

24 మిజి కూక్తి మని దేవుణు నమ్మకమాతికాన్. అందెజె వాండ్రు వెహ్ని లెకెండెనె కినాన్.

25 తంబెరిజాండె, మా వందిజ్ పార్దనం కిదు.

26 పూర్తి నెగ్గి మన్సుదాన్ పొంపిజి ముద్దు కిజి తంబెరిజ్ విజెరిజ్ వందనమ్కు వెహ్ను.

27 తంబెరిజ్ విజెరిజ్ యా ఉత్తం సద్విజి వెన్పిస్తెజ్ ఇజి ప్రబువాతి యేసుక్రీస్తు పేరుదాన్ మిజి బతిమాలిజిన.

28 మా ప్రబువాతి యేసుక్రీస్తు దయాదర్శం మీ వెట మనిద్.

అపొస్తుడు ఆతి పవులు దెస్సులోనిక పట్టుమ్ది నమ్మిత్తి వరిజ్ రాస్తి రుండి ఉత్తం

నెల్వ కిబిసినిక

ఇక్క అపొస్తుడు ఆతి పవులు దెస్సులోనిక పట్టుమ్దు మహి దేవుణు సజమ్ది వరిజ్ రాస్తి మన్ని రుండి ఉత్తం. సీలాని తిమోతి ఇనికార్ దెస్సులోనిక పట్టుమ్దు సొన్ని, అపొస్తుడు ఆతి పవులు రాస్తి ఉత్తం సీజి మర్లి వాత్తి వెనుక యా ఉత్తం రాసె ఆత మనాద్ ఇజి ఒడ్డిబిజినార్.

యా ఉత్తమ్దు మొదోహి ఉత్తమ్దు మన్ని దన్నిజ్ సమానమాతి మాటెజ్ మన్నె. (ఉండ్రీ దెస్సులోనిక నెల్వ కిబిసినిక సుడ్డిదు). రుండి ఉత్తమ్కాజ్, వాండ్రు కిత్తి సువార్త పణిదాన్ తయారాతి మన్ని సజమ్కాజ్ వన్ని మన్నుదు మన్ని బాద, పవులు తోరిసినాన్. తప్పు బోదదిజ్, అబద్దం నెస్సిసిని వరిజ్ లోజిజి మన్ఎండ, గటిజ నిల్వి మండ్రు ఇజి పవులు వరిజ్ ఎత్తు కిబిసినిక.

యేసుప్రబు మర్లి వాని వందిజ్ యా ఉత్తమ్దు రాస్త మనాద్. (రుండి దెస్సులోనిక 1:9-10; 2:1-3). యేసుప్రబు సిలువాదు సాజి, మర్లి నిజితి వెనుక ఇంజు ముంజు 17-20 పంటెజ్ డాట్టి వెనుక పవులు ఇక్క రాస్తాన్ ఇజి విజెర ఒడ్డిబిజినార్ దేవుణు మున్ను నమ్మకం ఇట్టి వరిజ్ వాని కాలమ్దు ఇనిక ఆనాద్ ఇజి నెస్సిస్తెజ్, మరి వారు నమకం డిస్ఎండ గటిజ నిల్విమండ్రెజ్ ఇజి యా ఉత్తం రాస్తాన్.

1 బుబ్బాతి దేవుణుదిజ్ని ప్రబు ఆతి యేసు క్రీస్తుజ్ సెందితి మని దెస్సులోనిక పట్టుమ్ది దేవుణు సజమ్దిజ్ పవులుని సిలువానుని తిమోతి రాసిని ఉత్తం.

2 బుబ్బాతి దేవుణుని ప్రబు ఆతి యేసుక్రీస్తు, దయాదర్మమ్దాన్ మీరు నిపాతిదాన్ మండ్రెజ్ సాయం కిపిర్.

3 తంబెరిజాండె, మాపు ఎస్తివలెబా మీ వందిజ్ దేవుణుదిజ్ వందనమ్కు వెప్పినె మండ్రెజ్ వలె. అయ లెకెండ వెప్పినిక, కిదెజ్ మన్ని సరి ఆతి సజతినె. ఎండనిజ్ ఇహిజ దేవుణు మున్ను మని మీ నమకం మరి నండో ఆజి పిరిసినాద్. ఒరెన్ వన్నిజ్ మరి ఒరెన్ వన్ని వెట మని ప్రేమ మీరు విజెరె లోఇ మరి నండో ఆజినాద్.

4 అందెజె మీరు, డిస్ఎండ హిమ్మెజ్ ఒరిసిని వందిజ్, స్రమెజ్ ఒరిసి మహిజ్బా దేవుణు మున్ను మని నమకమ్దు మీరు ఎలాగ గటిజ నిల్వి మంజినిదెర్ ఇజి మహి దేవుణు సజమ్కాజ్ మీ వందిజ్ మాపు పొగ్డిజి వెప్పినావ్.

5 నీతి నిజాయిదాన్ దేవుణు తీర్పు సిజినాన్ ఇని దనిజ్ యాకెజ్ విజు రుజువ్ ఆజినె. దేవుణు కిని ఏలుబడిదు మండ్రెజ్ మీరు తగ్గికిదెర్ ఆజినిదెర్. దని వందిజ్నె యా కస్టమ్కు విజు మీరు ఒరిసినిదెర్.

6-8 మా ప్రబు ఆతి యేసు నేగ్డిజిని సిసు కొనెజాణిజ్ వన్ని గొప్ప సత్తమని దూతెజ వెట పరలోకమ్దాన్ తోరె ఆనివలె, దేవుణుదిజ్ నెన్ఇ వరిజ్ని, మా ప్రబు ఆతి యేసు సువార్త మాటెజ్ లోజిఇ వరిజ్ సిక్స సీనాన్లె. దేవుణు నీతి నిజాయిమనికాన్. అందెజె నస్తివలె మిజి స్రమెజ్ కితి వరిజ్ స్రమెజ్ మరజి సీనాన్లె. స్రమెజ్ ఒరిస్తిమని మిజిని, మజి రొబిస్నాన్లె.

9 నస్తవలె యేసు ప్రభు సెఇ వరిజ్ వన్ని ఎద్రుహన్, వన్ని గొప్పు సత్తుదాన్, వారు వన్ని డగ్రు మన్ ఏండ దూరం కిజి ఎలాకాలం మంజిని నాసనమ్దాన్ సిక్స సీనాన్లె.

10 అయా రోజు, వన్నిజ్ సెందితి వరివెట వన్ని గొప్పు జాయ్ తొరె ఆదెజ్, మరి వన్నిజ్ నమ్మిత్తికార్ విజేరె బమ్మ ఆని లెకెండ్ వరి నడిఃమి ప్రభు వానివలె మాపు వెప్తి మా సాస్యమ్కు నమ్మిత్తికిదెర్ ఆతి మీరుబా వరి వెట మంజినిదెర్లె.

11 యాకా మా మన్నుదు మంజి, మిజి వాండ్రు కూక్తి దనిజ్ తగ్గికిదెర్ లెకెండ్ దేవుణు మిజి సుడఃదెజ్ ఇజి, మరి మీ నెగ్గి ఉదెసమ్కు విజు, మరి మీరు వన్ని మున్ను ఇడ్డి మని నమ్మకమ్దాన్ కిజిని విజు పణిజ్ దేవుణు వన్ని సత్తుదాన్ పూర్తి కిదెజ్ ఇజి మాపు మీ, వందిజ్ ఎస్తివలెబా దేవుణుదిజ్ పార్లనం కిజినావ్.

12 మా దేవుణు బాణిజ్ని ప్రభు ఆతి యేసు క్రీస్తు బాణిజ్ వాతి దయా దర్మమ్దాన్ యేసు ప్రభు పేరు మీ నడిఃమి గొప్పు పెరిక ఆదెజ్, మరి మీరు వన్ని వెట కూడ్డి గొప్పు పేరు పొందితికిదెర్ ఇజి తొరె ఆదెజ్ ఇజి మాపు యా లెకెండ్ మీ వందిజ్ దేవుణుదిజ్ పార్లనం కిజినావ్.

2

దేవుణుదిజ్ పడిఃఇకాన్

1-2 తంబెరిజాండె, మా ప్రభు ఆతి యేసు క్రీస్తు మర్రి వాని దినమ్ వందిజ్ని మాటు వన్ని వెట కూడ్డి మంజిని వందిజ్ ఏలు వెప్పినావ్. ప్రభు ఆతి యేసు వాత మనాన్ ఇజి ఉండ్రీ ప్రవక్త మాటదానో, మా బాణిజ్ వాతి లెకెండ్ ఉండ్రీ ఉత్తం వాతాద్ ఇజినో, కబ్బు వాతాదిజినో వెంజి గజిబిజి ఆజి మీ మన్ను సెద్రిన్ ఏండ, తియెల్ ఆవండ మండ్రెజ్ ఇజి మాపు మిజి బతిమాల్లినావ్.

3 ఎయెర్బా ఇని పణి కిజి మిజి మోసెం కివండ జాగర్ల మండ్రు. (అయ దినం ఏలు దాక రెవెదె). లోకుర్ నండొండార్ దేవుణుదిజ్ పడిఃఇ పణిజ్ కిజి టంటెజ్ ఆనార్లె. మరి దేవుణు రూలుజు విజు పడిఃఇ కిజిని నాసనమ్దిజ్ తగ్గికాన్ ఆతి సెఇకాన్ తొరె ఆనిదాక అయ రోజు రెవెదె.

4 దేవుణు ఇజి పేరు ఇడః ఆతి మని విజు వన్కాజ్, పూజెజ్ కిబె ఆజిని విజు వనకాజ్ పడిఃఏండ పణిజ్ కిజి, అయ విజు వన్కాజ్ మున్ను వన్నిజ్ వాండ్రె దేవుణు ఇజి వెప్పాడ్రె, వాండ్రు దేవుణు గుడిఃదుబా సొన్ని బస్సాన్.

5 నాను మీ వెట మహివలె యా సజతిజ్ మీవెట వెప్తి మహిక మీరు ఎత్తు కిఇదెరా?

6 వన్ని వందిజ్ ఏర్పాటు కితి మని గడిఃయాదునె వాండ్రు తొరె ఆదెజ్ వలె. అందెజె, ఏలు నాసనమ్దిజ్ తగ్గికాన్ ఆతి వన్నిజ్ అడ్డు కిజి నిల్సెనిక ఇనికాదో ఇజి మీరు నెస్సిదెర్.

7 దేవుణు విజు రూలుజు పడిఃఇ పణి కిజిని డాఃజితి మని సత్తు ఏలుబా పణి కిజినాద్. గాని దనిజ్ అడ్డు కిజి నిల్సె మంజినికాన్ నడిఃమిహాన్ లాగె ఆనిదాక యా లెకెండ్ అడ్డు కిజి మంజినాన్.

8 నస్తవలె దేవుణు రూలుజు పడిఃఇ పణిజ్ కినికాన్ తొరె ఆనాన్లె. వన్నిజ్ మా ప్రభు ఆతి యేసు వన్ని వెయుదాన్ వాని ఊప్రీదాన్ సప్పి, వాండ్రు వానివలె మంజిని గొప్పు జాయ్దాన్ వన్నిజ్ నాసనం కినాన్లె.

9-10 దేవుణు రూలుజు పడిఃఇ పణిజ్ కినికాన్ తొరె ఆనివలె సయ్యూసు వన్ని సత్తుదాన్ రకరకమ్ది బమ్మ పణిజ్ని గొప్పు పెరి పణిజ్ కిజి, నాసనం ఆజి సొని వరిజ్

విజెరిజ్ మోసెం కిదెజ్ విజు సెఇ పణిజ్ కిజి తొరిస్నాన్. ఎందనిజ్ ఇహిజు నిజమాతి దనిజ్ ప్రేమిసి దేవుణు వరిజ్ రక్సిస్టెజ్ వారు ఒవ్ఎతార్. అందెజె వారు నాసనం ఆజి సొన్సిన్.

11 అందెజె వారు అబదమ్దిజ్ నమ్మిని లెకెండ్ మోసెం కిని సత్తుదిజ్ దేవుణు వరి ముస్సు పొక్కాన్.

12 అందెజె, నిజమాతి దనిజ్ నమ్మిఎండ సెఇదని వెట నర్ల ఆతి విజెరిజ్ దేవుణు సిక్కు సీనాన్.

గటిజు నిల్ని మండ్రు

13 గాని మీ వందిజ్ ఎన్తివలెబా దేవుణుదిజ్ మాపు వందనమ్కు వెహ్ని మండ్రెజ్ వలె. యాక కిజి మంజనిక సరి ఆతి పణినె. తంబెరిజాండె ఎందనిజ్ ఇహిజు దేవుణు ఆత్తు, వన్ని నెగ్గెక కిజిని పణిదాన్, మీరు నిజమాతి దనిజ్ నమ్మిజి దేవుణు మిజి రక్సిస్టెజ్ ఇజి, దేవుణు యా లోకం పుటెండ ముజాలె మిజి ఎర్లిస్త మహాన్.

14 మీరు యా లెకెండ్ యేసుప్రబు వెట వన్ని గొప్ప పెరి జాయదు మండ్రెజ్ అక్కు మనికిదెర్ అదెజ్ ఇజి మాపు వెహ్ని సువార్దాన్ దేవుణు మిజి కూక్త మనాన్.

15 అందెజె తంబెరిజాండె, మాపు మాటాదానో ఉత్తమ్దానో మిజి నెస్పితికెజ్ డిస్ఎండ మీ మన్నుదు ఇడ్డి కద్దిఎండ మండ్రు.

16-17 మజి ప్రేమిసి ఎలాకాలం ఎద్రు నుడెజి మంజిని ఆసని, ఉసార్ మా మన్నుదు వన్ని దయాదర్మమ్దాన్ మజి సితి మా బుబ్బాతి దేవుణుని, మా ప్రబు ఆతి యేసు క్రీస్తు మీ మన్నుజు దయరం వెహ్ని, మీ విజు నెగ్గి మాటాదుని, మీరు కిజిని నెగ్గి పణిదు సత్తు సిజి నడిపిసిర్.

3

పార్లనం కిజి మండ్రు

1 కడెవేరిది మాట ఇనిక ఇహిజు, తంబెరిజాండె, ప్రబు మాటెజ్ మీ నడిమి సారితి లెకెండ్ మహిబాన్బా మరి బేగి సార్దెజ్, గవరం లొసి అదెజ్ ఇజి మీరు మా వందిజ్ పార్లనం కిజి మండ్రు.

2 విజెరిజ్ నమకం సిల్లెద్గదె, అందెజె మాపు మూర్కతమ్దు మని వరి బాణిజ్ సెఇ వరి బాణిజ్ తప్తె ఆనిలెకెండ్బా మా వందిజ్ పార్లనం కిదు.

3 అహిజు ప్రబు నమ్మిదెజ్ తగ్గికాన్ అందెజె వాండ్రు మిజి సత్తు సీజి సెఇ వన్ని బాణిజ్ వాండ్రు కాపాడ్నాన్.

4 ఇక్కెజ్ మీరు కిజి మండ్రెజ్ ఇజి మాపు మిజి ఆడ్ర సితిమనికెజ్ అయాలెకెండ్ మీరు కిజినిదెర్. మరి కిజి మంజనిదెర్లె ఇజి ప్రబు పేరుదాన్ మాపు మన్నుదు ఒడెబిజినాప్.

5 దేవుణు ముస్సు మని ప్రేమని, మరి మీరు ఎలాగ కష్టమ్కు ఒరిస్టెజ్ ఇజి యేసుక్రీస్తు తొరిస్తి లెకెండ్ ఒరిస్టెజ్ మీ మన్నుదు రేపె ఆజి మండ్రెజ్ దేవుణు మిజి సాయం కిపిన్.

బండెజ్ అదెజ్ ఆవద్

6 తంబెరిజాండె, మా బాణిజ్ మీరు నెస్తిమని లెకెండ్ర్ ఆవండ బదకమ్దాన్ మంజిని వరిజ్ గుర్తు కిజి, వరి బాణిజ్ మీరు ఏడాః డిసి మండ్రు ఇజి మా ప్రబు ఆతి యేసుక్రీస్తు పేరుదాన్ మిజి ఆడ్ర్ సితి లెకెండ్ర్ వెస్సినాప్.

7 మజి సుడఃజి మా లెకెండ్ర్ ఎలాగ నడిదెజ్ ఇజి మీరు నెస్సిదెర్ గదె. మాపు మీ వెట మహివలె బదకమ్దాన్ మన్ ఏతాప్.

8 మాప్ ఎయెర్ బాణిజ్ బా సిడ్డిఃనె తిండి ఉణ్ ఏతాప్. ఎయెన్ ముస్కుబా ఆదారం ఆవండ మాపు రెయు పొగల్ కస్టబాడఃజి పణి కిజి మహిక మీరు నెస్సిదెర్.

9 మీ బాన్ లొసి ఉండెజ్ అతికారం సిల్లెద్ ఇజి ఆవెద్. గాని మీరు మజి సుడఃజి నెసి అయా లెకెండ్ర్ మండ్రెజ్ ఇజినె మాపు అయా లెకెండ్ర్ ఇనికబా లొన్ ఎండ పణి కిజి మహాప్.

10 మరి మాపు మీ నడిమి మహివలె “ఒరెన్ పణి కవండ మహిజ వాండ్రు బోజనం కిదెజ్ ఆవద్”, ఇజి మిజి రూలు సిత్తాప్.

11 మీ లొఇ నెగొండ్ర్ వరి సొంత పణి ఇనికబా కివండ, అనవుసరమ్ దిజ్ ఆఇవరి సజతిజి లొఇ బుర్త డుక్కి మంజినార్ ఇజి మాపు వెహాప్.

12 ననికార్ వారు కిజిని అవ్ సరం సిల్లి పణిజ్ డిసి సిజి నిపాతి పణి కిజి, వరి తిండి వందిజ్ గణస్తెజ్ ఇజి మా ప్రబు ఆతి యేసుక్రీస్తు పేరుదాన్ బతిమాలజి ఆడ్ర్ సితి లెకెండ్ర్ వెస్సినాప్.

13 మరి తంబెరిజాండె మీరు నెగ్గికెజ్ ఆతికెజ్ కిదెజ్ ఎసెజ్ బా వందిదెజ్ అవద్.

14 మాపు యా ఉత్రమ్ దు రాస్తి పొక్తి మాటెజ్ లొజిఇ వన్నిజ్ గుర్తు కిదు. వాండ్రు సిగు అని వందిజ్ వన్ని వెట కూడఃవండ మండ్రు.

15 అహిజ వన్నిజ్ పగాతి వన్ని లెకెండ్ర్ ఒడఃబివండ తంబెరి లెకెండ్ర్ ఒడఃబిజి వన్నిజ్ బుది వెహు.

16 సమాదానమ్ దిజ్ వ ప్రబు ఆతికాన్ ఎస్తివలెబె ఎలాగ మర్తి కాలమ్ దుబా మిజి నిపాతిదాన్ మండ్రెజ్ సిపిన్. ప్రబు మీ విజెరె వెట ఎస్తివలెబా మనిన్.

17 పవులు ఇని నాను, నా కియుదాన్ యా కడఃవెరి మాటెజ్ రాసిన. నా విజు ఉత్రమ్ దు యాకాదె గుర్తు. అందెజె నాను ఎలాగ రాసిన ఇజి మీరు పొలిస్తెజ్ అట్టిదెర్.

18 మా ప్రబు ఆతి యేసు క్రీస్తు దయా దర్పం మీ విజిదెరె వెట మనిద్.

అపొస్తుడు ఆతి పవులు తిమోతిజ్ రాస్తి ఉండ్రీ ఉత్రం

నెల్లు కిబిసినిక

అపొస్తుడు ఆతి పవులు తిమోతిజ్ రాస్తి ఉండ్రీ ఉత్రమనె యాక. ఎపెసి పట్టుమదు మని దేవుణుదిజ్ నమ్మిత్తి వరి సజమదిజ్ నడిపిస్సి వన్ని లెకెండ్ తిమోతిజ్ ఏర్పాటు కిత మనాన్. అందెజె, సజం నడిపిస్సిక ఎలాగ, నడిపిస్సి పాస్టరుజు, పెద్దెల్ జు ఎలాగ మండ్రెజ్ ఇని దనివందిజ్ వెప్పినాన్.

ఎపెసి పట్టుమదు నండొ రకమ్కాణి గుడిజ్ మన్నె. దేసమ్కాజ్ నండొ లోకుర్ బాన్ వానార్. అందెజె క్రీస్తు వందిజ్ నిజమాతి బోదదిజ్ కూడెఇకెజ్ నెన్పిస్సికార్ నండొడార్ మనార్. వరి వందిజ్ జాగ్రత మండ్రు. నని బోద తపిస్సివరిజ్ బాణిజ్ దూరం ఆదు ఇజి వెప్పినాన్.

1-2 క్రీస్తు యేసుజ్ అపొస్తుడు ఆతి పవులు ఇని నాను తిమోతిజ్ రాసిన. నీను నా సొంత మరిన్ లెకెండ్ మని. ఎందనిజ్ ఇహిజు నానె నిజి దేవుణు దరొట్ తత. మజి రక్సినిని దేవుణు వెప్తి ఆడ్ర వజ, మాటు ఆసదాన్ ఏద్రు సుడెజిని క్రీస్తు యేసు వెప్తి ఆడ్ర వజ, నాను క్రీస్తు యేసుజ్ అపొస్తుడు ఆత. బుబ్బు ఆతి దేవుణుని ప్రబు ఆతి క్రీస్తుయేసు దయా దర్మవదాన్, మీ మున్కు కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మనిదోనియదు సొన్సి మహివలె నిజి వెప్తి లెకెండె, నీను ఎపెసుదు మండ్రెజ్ వలె ఇజి నాను కనితం వెప్పిన. ఎందనిజ్ ఇహిజు, అబె సెగొండార్ తపు బోద నెన్పిస్సినార్. వారు అయ్యకెజ్ మరి ఎసెజ్ బా నెన్పిస్సెజ్ అవిద్ ఇజి నీను డటం వెప్టెజ్ వలె. వారు డొక్కార్ వెప్పి మంజిని కత సాన్తరమ్క లోఇ, అంతు సిల్లెండ అని గొగొర్ వందిజ్ వెప్పిని సాన్తరమ్క లోఇ మన్కు ఇడెదెజ్ అవిద్ ఇజి నీను డటం వెప్టెజ్ వలె. అయాకెజ్ దేవుణు ఎత్తు కితి సజతిజు అడ్డు కిజి ఒరెన్ వెట ఒరెన్ తర్కిసిని సజతిజ్ నె రేజ్ జినె. దేవుణు మున్కు మని నమకం దానె, వాండ్రు ఎత్తు కితి సజతిజ్ నెస్సెజ్ అనాద్.

5 నమ్మిత్తికార్, ఒరెన్ వెట ఒరెన్ ప్రేమిసి మండ్రెజ్. అందెజె నీను యా లెకెండ్ డటం వెప్టెజ్ వలె ఇజి నాను నిజి వెప్పిన. నెగ్గి మన్కుదాన్ వాజిని ప్రేమదాన్, నెగెండ గదిసిని గరబందాన్ వాజిని ప్రేమదాన్, దేవుణు మున్కు మని నిజమాతి నమకమ్దాన్ వాజిని ప్రేమదాన్, ప్రేమిసి మండ్రెజ్.

6 సెగొండార్, మున్కు వెప్తి సజతిజు డిస్త సాహార పణిదిజ్ రెఇకెజ్ వర్గిజనార్.

7 వారు దేవుణు మోసెజ్ సితి రూలుజ్ నెస్సిసినికార్ అదెజె కోరిజనార్. గాని ఇని దని వందిజ్ వర్గిజనార్ ఇజినో, నండొ దయరమ్దాన్ నిజమ్నె ఇజి వర్గిజని సజతిజు వందిజ్ నో, వారు నెన్ఎర్.

8 దేవుణు మోసెజ్ సితి రూలుజ్ వాడుకండెజ్ మని వజ వాడుకొటిజు, అయా రూలుజ్ నెగ్గికెజ్ నె ఇజి మాటు నెస్సాట్.

9-11 మరి మాటు నెసిసాట్, దేవుణు మోసెజ్ సితి యా రూలుజ్, నాయమ్దాన్ మని వరిజ్ వరి తపుజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లోజ్ ఇ వరిజ్, నమ్మి ఇ వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజి కణకదాన్

నూణి వరిజ్ మతమదిజ్ దూసిన్ని వరిజ్, అయిసి అప్పొసిరిజ్ సప్పి వరిజ్, లోకాజ్ సప్పి వరిజ్, రంకు బూలాని వరిజ్, మొకకొడో మొకకొడోనెన కూడ్చి వరిజ్, వెట్టిపణి కిదెజ్ లోకురిజ్ అసి పొర్చి వరిజ్, అబద్దం వర్చిని వరిజ్, అబద్దమదిజ్ ఒట్టు కిని వరిజ్, నిజమాతి బోదదిజ్ విరోదం ఆతికెజ్ కిని వరిజ్, నని వరి వందిజె రూలుజ్ సిత మనాన్. నీను మహి లోకురిజ్ వెహ్ అ ఇజి, దేవుణు నజి ఒపజెప్పి సువార్తదు అయా నిజమాతి బోద మనాద్. లోకుర్ పొగిడిజిని కిజిని గొప్పు పెరి దేవుణు బాణిజె అయా సువార్త వాజినాద్.

పవులు ముస్కు దేవుణు తోరిస్తి కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసిన్సికాన్. నమ్మిత్తి వరిజ్ ఇమ్మెజ్ కిజి ఆహె వన్నిజ్ ఇమ్మెజ్ కితికాన్. వన్నిజ్ స్రమెజ్ కితికాన్. అహిజ్ బా నాను నమ్మిదెజ్ తగ్గికాన్ ఇజి వాండ్రు ఒడిబిజి, మహివరిజ్ సువార్త వెప్పిని వన్ని పణిదిజ్ నజి ఏర్పాటు కిత్తాన్. అందెజె నాను మా ప్రబు అతి క్రీస్తు యేసు నజి కితి దని వందిజ్ ఎసెజ్ బా పోన్ ఎండ మన. వాండ్రునె వన్ని పణి కిదెజ్ నజి సత్తు సితాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజె దేవుణు నా ముస్కు కనికారం తోరిస్తాన్.

14 మా ప్రబు దయా దర్మమదాన్, వన్నిజ్ నమ్మిదెజ్, మహివరిజ్ ప్రేమిస్తెజ్ నజి సాయం కిత్తాన్. క్రీస్తుయేసు వెట మాటు కూడితి మని దని దటాన్, నమకమ్ని ప్రేమ నజి దోహ్ కె.

15 పాపం కిని వరిజ్ రక్సిస్తెజ్ క్రీస్తు యేసు లోకమ్దు వాతాన్ ఇని మాట నిజం ఆతిక. అయాక పూర్తి నమ్మిదెజ్ తగ్గిక. నాను కిత్తి పాపం నసా పాపం కినికార్ కివెర్.

16 గాని, నసా పాపం కితి నా ముస్కు దేవుణు కనికారం తోరిస్తాన్. ఎందనిజ్ ఇహిజ, వాని కాలమ్దు యేసు ముస్కు నమకం ఇడేజి, ఎలాకాలం దేవుణు వెట బత్కిని బత్కు దోహ్ క్చి వరిజ్ నాను ఉండ్రీ గుర్తు లెకెండ్ ఆని వందిజ్, నసా పాపం కితి నజి, క్రీస్తుయేసు అంతు సిల్లెండ నండో ఒరిస్తాన్.

17 ఎలాకాలం రాజు ఆతి, ఎసెజ్ బా సాఇ, నుడేదిజ్ అట్ ఇ ఒరెండ్రె దేవుణుజ్ ఎలాకాలం గవరం సీజి పొగిడిజి మనీర్. ఆమెన్.

18 నా మరిన్ లెకెండ్ మని తిమోతి యాకదె నాను వెప్పిని బుద్ధి 'నీను కిదెజ్ మని వన్యా వందిజ్ ప్రవక్తరు ముజాలె వెప్తా మనార్ గదె. వారు వెప్తి వజనె నాను వెప్పిన. వారు వెప్తి మని వజ లోజిజి, తపు బోద నెన్ పిన్చి వరిజ్ గటిజ ఎద్రిన్ అ.

19 నా ముస్కు మని నీ నమకం డిసన్. గర్బం గదిన్ ఎండ నెగ్రిండ మన్ అ. నెగొండార్, గర్బం గదిసి వెప్పిని దనిజ్ నెక్త పొక్తారె వరి నమకం పాడు కిత్తార్.

20 నని వరి లోఇ, హుమెనియ, అలక్సాండర్ ఇనికార్ మనార్. దేవుణుదిజ్ దూసిస్తెజ్ ఆవిద్ ఇజి వారు నెస్చి వందిజ్, సయ్ తాను కిదు నాను వరిజ్ ఒపజెప్త మన.

2

నజమ్దు పార్దనం కిని వందిజ్ వెప్పినాన్.

1 అందెజె మరి ముకెలం, లోకుర్ విజెరె వందిజ్, దేవుణుదిజ్ పార్దనం కిదెజ్. వరిజ్ కావాలిన్చెజ్ సిత ఇజి బతిమాల్ జి లోస్టెజ్, వరి విజు వన్యా వందిజ్ ఎన్చివలెబా

పార్లనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమ్కు వెహైజ్ ఇజి నాను మిజీ ఉసార్ కిబిన్ను.

2 యా లెకండ రాజార్ వందిజ్, అదికారమ్దు మని విజెరి వందిజ్ పార్లనం కిదెజ్. ఎందనిజ్ ఇహిజ, మాటు సాంతి సమాదనమ్దాన్ మహి వరి ఎద్దు నెగ్రెండ బత్కిదెజ్, దేవుణుదిజ్ తియెల్ ఆజి పూర్తి బక్తిదాన్ మండ్రెజ్.

3 యా లెకండ కినిక నెగెద్. మజి రక్సిన్సి దేవుణుదిజ్ ఇస్తం ఆతిక.

4 ఎందనిజ్ ఇహిజ, లోకుర్ విజెరిజ్ ఎల్లకాలం మని సిక్సదాన్ తపిస్తెజ్ ఇజి, లోకుర్ విజెరి క్రిస్తు వందిజ్ నిజమాతి మాటెజ్ నెస్తెజ్ ఇజి దేవుణు కోరిజినాన్.

5 దేవుణు ఒరెండ్రె. దేవుణు, లోకుర్ నడిఃమి ఒపిస్సికాన్ ఒరెండ్రె మనాన్. అయా ఒరెన్ క్రిస్తుయేసునె.

6 వాండ్రు లోకుర్ విజెరి పాపమ్కాజ్, ఎల్లకాలం మని సిక్సదాన్ తపిస్సి వందిజ్ సాదెజ్ వన్నిజ్ వాండ్రె ఒపజెవె ఆతాన్. యాకదె, దేవుణు ఏర్పాటు కితి కాలమ్దు, లోకుర్ విజెరిజ్ రక్సిన్సి దేవుణు కోరిజిని దనిజ్ సాన్యం.

7 అందెజె, ఒరెన్ సాటిన్సి వన్ని లెకండ, అపొస్తుడు లెకండ, నేర్పిస్సి వన్ని లెకండ, యూదురు ఆఇకార్ యేసు వందిజ్ నిజమాతి సజతిజ్ నెసి నమ్మిదెజ్, వరి వందిజ్ దేవుణు నజి ఏర్పాటు కిత్తాన్. ఈహు నజి ఏర్పాటు కిత్తాన్ ఇజి వెహిన్సిక నిజమ్నె అబద్దం ఆవెద్.

8 అందెజె, దేవుణుదిజ్ పార్లనం కిదెజ్ మీరు కూడఃజి వానివలె ఎంబెబా మొకకొణ్డోర్ పార్లనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్కు బత్కిదెజ్ వలె. వారు పార్లనం కినివలె, వరి మన్నుదు కోపం సిల్లెండ, ఎయెవెటబ బటిజ్ ఆవండ కిక్కు పెర్జి కిదెజ్.

9 అయాలెకండ, దేవుణుదిజ్ పార్లనం కిదెజ్ మీరు కూడఃజి వానివలె, బోదెకు నెగ్రెండ తయార్ ఆజి, వన్నాజ్ తగ్గి వజ తయార్ ఆజి వాదెజ్. అవికు సోకుజాణిజ్ మూల కసిని, బజారమ్నో, నండొ కరీద్ది పూసెజ్నో నండొ కరీద్తి పాతెజ్నో పార్పాజి తయార్ ఆదెజ్ ఆవెద్.

10 గాని దేవుణుదిజ్ నమ్మిజినికెజ్ ఇజి వెహె ఆని బోదెకు మహివరి వందిజ్ నెగ్గి పణిజ్ కిజి వన్నా సోకు తోరె ఆదెజ్.

11 మొకకొణ్డోర్ నెన్పిస్సివలె, బోదెకు నెగ్రెండ వెంజి, జమ్న మంజి, వరిజ్ లోజిజి నెస్తెజ్.

12 మొక వరిజ్ నెన్పిస్సిజ్నో వరి ముస్సు అతికారం కిదెజ్నో బోదెకాజ్ నాను సెల్వ సిఎ. అవికు జమ్న మండ్రెజ్.

13 ఎందనిజ్ ఇహిజ, దేవుణు అవ్వెజ్ ఆవెద్, ఆదముజునె ముజాలె తయార్ కిత్తాన్.

14 సయ్తాను ఆదముజ్ ఆవెద్, అవ్వెజ్నె మొసం కిత్తాన్. ఆహె అది పాపమ్దు అర్దాద్.

15 గాని అవికు దేవుణు ముస్సు మని నమకం డిన్ఎండ, మహి వరిజ్ ప్రేమిసి, దేవుణుదిజ్ ఒపజెవె ఆతి లోకు వజ నెగ్రెండ బత్కిదెజ్. ఆహె బత్కిజి మహిజ, కొణ్డోరిజ్ ఏరుఈబాని వలె దేవుణు బోదెకాజ్ రక్సిన్సిన్.

3

1 ఒరెన్ పాస్టరు ఆదెజ్ కోరిజినాన్ ఇహిజ, వాండ్రు నెగ్గి పణి కోరిజినాన్. యా మాట పూర్తి నమ్మిదెజ్ తగ్గిక్.

2 పాస్టరు నింద సిలికాన్ ఆదెజ్ వలె. ఉండ్రె ఆల్ని మంజినికాన్, అణసె ఆజి మంజినికాన్ ఆదెజ్ వలె. నెగ్గి బుది మంజినికాన్, వని పణిజాణిజ్ తగమాతికాన్ ఇజి తోరె ఆదెజ్ వలె. వాతి వరిజ్ నెగ్రెండ డగ్రు కినికాన్ ఆదెజ్ వలె. దేవుణు మాట నెగ్రెండ నెస్పిన్నికాన్ ఆదెజ్ వలె.

3 వాండ్రు సోస్ఎండ, డెయ్సె ఆవండ మంజినికాన్, సార్లిదాన్ మంజినికాన్, జటిజ్ ఆవండ మంజినికాన్ ఆదెజ్ వలె. వాండ్రు డబ్బుదిజ్ అస ఆఇకాన్ ఆదెజ్ వలె.

4 వాండ్రు వన్ని సొంత ఇండ్రెణి వరిజ్ నెగ్రెండ సూణికాన్ ఆదెజ్ వలె. వన్ని కొడెఱ్ ఎస్తివలెబా విజెరిజ్ గవరం సీజి, వన్ని మాటదిజ్ లోజిజిని వరి లెకెండ వాండ్రు కిదిజ్.

5 ఎండనిజ్ ఇహిజ, సొంత ఇండ్రెణి వరిజ్ నెగ్రెండ సుడెఱ్ నెస్ఇకాన్ ఇహిజ ఎలాగ దేవుణు సజం నడిపిస్తెజ్ అట్టాన్.

6 వాండ్రు కొత్తాజ్ నమ్మిత్తికాన్ ఆజి మండ్రెజ్ ఆవెద. ఎండనిజ్ ఇహిజ, కొత్తాజ్ నె వన్నిజ్ యా పెరి పణిదిజ్ ఏర్పాటు ఆత ఇజి గర్ర ఆజి, సయ్తాన్ ఎలాగ దేవుణు తీర్పు ఆజి సిక్కుడు అర్త మనాండ్రె, అయ లెకెండ వీండ్రు బా అర్వాన్.

7 మహికార్ వన్ని వందిజ్ సెఇకెజ్ వెహ్ఎండ, సయ్తాన్ సికుడు అర్ఎండ మంజిని వందిజ్ నమ్మిఇ వరి ఎర్దు పల్కుబడిః మనికాన్ ఆదెజ్ వలె.

8 అయాలెకెండ, పెద్దెల్జు, విజెరి వన్నిజ్ గవరం సిదెజ్ తగ్గి వరి లెకెండ మండ్రెజ్. వారు రుండి నాలికిజ్ మన్ఇకార్ ఆదెజ్ వలె. వారు సోస్ఎండ, డబ్బు వందిజ్ ఆసగోజు ఆవండ మంజినికార్ ఆదెజ్ వలె.

9 దేవుణు ఏలు తోరిసి నెస్పిన్ని డాఃజితి మహి గొప్ప నిజమాతి సజతిజ్, వన్ని గర్బం వన్నిజ్ గదిసిని లెకెండ ఆవండ నెగ్రెండ మంజినికాన్ ఆదెజ్.

10 పెద్దెల్జు ఇజి వరిజ్ ఏర్పాటు కిని ముజుల, వారు నెగ్రెండ మంజినారా, నమ్మక్మదాన్ పణి కిజినారా ఇజి సుడెఱ్. నింద సిలికార్ ఇజి వారు రుజుప్ కితిజ, వారు పెద్దెల్జు పణి కిదిజ్.

11 అయాలెకెండ, పెద్దెల్జు బోదెకు, మహికార్ వరిజ్ గవరం సిని వరి లెకెండ మండ్రెజ్. అవికు సొండిజ్ వర్లిఎండ, సోస్ఎండ మండ్రెజ్ వలె. విజు దని లోఇబా మాపు నమ్మిదెజ్ తగ్గిక్ ఇజి తోరె ఆదెజ్ వలె.

12 పెద్దెలి ఉండ్రె ఆల్ని మంజినికాన్ ఆదెజ్ వలె. వన్ని కొడెఱ్రిజ్ వన్ని ఇండ్రెమని వరిజ్ నెగ్రెండ సుడెఱ్ నడిపిన్నికాన్ ఆదెజ్ వలె.

13 నెగ్రెండి పణి కిని పెద్దెలి ఎయెస్ వన్నిజ్ బా పల్కు బడిః మనాద్. క్రీస్తు యేసు మున్కు మని వన్ని నమకం వందిజ్ వెహ్జెజ్ వన్నిజ్ తియెల్ సిల్లెద్.

14 నీ డగ్రు బేగి వాదెజ్ ఇజి నాను ఆస ఆజిన. అహిజ్ బా, నాను యా సజతిజ్ నిజి రాసిన.

15 ఎండనిజ్ ఇహిజ, నాను వాదెజ్ ఆల్సెం ఆతిజ, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెస్తిలె. బత్కిజిని దేవుణు సజమ్దికార్ విజెరినె దేవుణు కుటుమ్దికార్. ఉండ్రె నిట కొహి ఉండ్రె ఇల్లు అర్ఎండ అన్ని లెకెండ దేవుణు సజమ్దికార్ దేవుణు వందిజ్ నిజమాతికిజ్ అస్సార్. అయాలెకెండ, ఉండ్రె పునాది లెకెండ దేవుణు సజమ్దికార్ దేవుణు వందిజ్ నిజమాతికిజ్ అస్సార్.

16 మాటు నమ్మిజిని మతమ్మదు మని, యేసుక్రీస్తు వందిజ్ ముజాలె డాజితి మహికెజ్, గాని ఏలు దేవుణు తోరిసి నెన్పిస్తి నిజమాతికెజ్ గొప్ప పెరిక ఇజి ఎయెర్బా ఒప్పకొణార్. క్రీస్తు లోకు వజ లోకమ్మదు వాతాన్. దేవుణు ఆత్మ, వాండ్రు నీతి నిజాయితి మనికాన్ ఇజి రుజువ్ కిత్తాన్. దేవుణు దూతార్ వన్నిజ్ సుడేతార్. లోకుర్ వన్ని వందిజ్ యూదురు ఆజి వరిజ్ వెహార్. లోకమ్మదు ఎంబెబా, లోకుర్ వన్నిజ్ నమ్మితార్. పరలోకమ్మదు దేవుణు వన్నిజ్ ఒత మనాన్.

4

తప్పుబోద నెన్పిసినికార్.

1 కడెవెరి దినమ్కాజ్ సెగొండార్, వారు నమ్మిత్తి నిజమాతి మాటెజ్ డిసి, అబద్దం వర్గిని దెయమ్మకు వెట సానారె, అయా దెయమ్మకు బోద వినారె దనిజ్ లోజినార్ ఇజి దేవుణు ఆత్మ టెటెజ్ వెప్పినాన్.

2 అబద్దం వర్గిని వేసం కినికారె యా బోదెజ్ నెన్పిసినికార్. ఇనుముదాన్ సుహ్మతిజి ఎలాగ మా తోలు సాతి లెకెండ్ ఆనాదొ అయ లెకెండ్ వరి గర్బం గదిన్ఎండ సాత మనాద్.

3 పెండ్లి ఆనిక తపు ఇజి, సెగం రకమ్కాణి ఉణి తినికెజ్ తిండ్రెజ్ ఆవిద్ ఇజి వారు నెన్పిస్సార్. గాని దేవుణుదిజ్ నమ్మిత్తి, నిజమాతి మాటెజ్ నెస్తికార్, దేవుణుదిజ్ వందనమ్మకు వెప్పి తిండ్రెజ్ ఇజిని దేవుణు అయాకెజ్ తయార్ కిత్తాన్.

4 ఎందనిజ్ ఇహిజ, దేవుణు తయార్ కితికెజ్ విజు నెగ్గెకెజె. ఇనికబా నెక్కి పొక్కిక ఆవిద్. గాని దేవుణుదిజ్ వందనం వెప్పి అయకెజ్ తిండ్రెజ్.

5 ఎందనిజ్ ఇహిజ, దేవుణు మాటదాన్, పార్దనదాన్ దేవుణు వందిజ్కేట ఆతికెజ్ ఆతె మన్నె.

6 నీను యా సజతిజ్, నీ సజమ్మదు మని తంబెర్సిరిజ్ నెస్తిసి మహిజ, నీను క్రీస్తు యేసుజ్ నెగ్గి పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెప్పిని మాటదాన్ నిజమాతి నెగ్గి బోదదాన్ నీను నమకమ్మదు పిరిఅ

7 వర్గిదెజ్బా విలువ సిలి, డొక్టార్ వెప్పి మంజిని కత సాన్తరమ్కాణిజ్ నీను దూరం మన్అ. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆఅ.

8 ఒడొల్దిజ్ రూణు వాక్కి ఒజ్జ కితిజ నెగెద్. గాని దేవుణు వందిజ్ తియెల్ ఆజి బక్తి మహిజ, విజు వన్కా లోఇ గొప్ప లాబం మంజినాద్. ఎందనిజ్ ఇహిజ, అయాలెకెండ్ మహిజ, ఏలుబా నెగ్గి బత్తు మంజినాద్, వాని కాలమ్మదుబా నెగ్గి బత్తు మంజినాద్ ఇజి ఒట్టు కిజినాద్.

9 నాను మున్ను వెప్పి సజతి నమ్మిదెజ్ తగ్గిక్. పూర్తి నమ్మిదు.

10 బత్తిజిని దేవుణు మున్నునె మా ఆస మాటు ఇట్టా మనాట్. అందెజె మాటు అయా నెగ్గి బత్తు వందిజ్ నండొ అరల ఆజి కన్బడిజినాట్. వాండ్రె లోకుర్ విజెరిజ్ ముకెలం వన్ని మున్ను నమకం ఇడ్డి వరిజ్ రక్కిస్సికాన్.

11 నీను యా సజతిజ్ నీ సజమ్మదు మని వరిజ్ నెన్పిసి, ఆహె కిదెజ్ ఇజి డటం వెహ్ఆ.

12 నీను దజడః ఇజి, ఎయెర్బా నిజి ఇజ్జి కణక సుడేఎండ నీను నిజి సుడేఆ. గాని నీను వర్గిని మాటదు, నడిఃని నడఃకదు, నీను ప్రేమిస్సి ప్రేమదు, దేవుణు మున్ను.

మని నీ నమకమ్దు, ఇని పాపం సిలి నీ బత్సుడు, నమ్మిత్తి వరిజ్ ఉండ్రీ గుర్తు లెకెండ నీను మన్అ. వారు నిజి సుడేజి అయాలెకెండ మండ్రేజ్, నీను గుర్తు లెకెండ మన్అ.

13 నాను వానిదాక, నీను విజెరిజ్ దేవుణు మాట నదవిజి విన్పిసినె, బోదిసినె, నెన్పిసినె మన్అ.

14 సజం పెద్దెల్జు నీ మున్సు కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్మ నిజి సీతి వరం డిన్ఎండ, నీను అయాక కిల.

15 యా సజతిజ్ నీను జాగర్దదాన్ కిల. నీ మన్సు విజు, దిని మున్సునె ఇడేజి. ఎందనిజ్ ఇహిజ, నీను నమకమ్దు పిరిజనిక లోకుర్ విజెరె టటజ్ సుడేదెజ్. అందెజె, నీ మన్సు విజు దని మున్సునె ఇడేజి.

16 నీను కిజిని పణి నెగ్రెండ కిల. నీను నెస్పిసిని బోదదు తవు సిల్లెండ నెస్పిన్అ. నీను అయకెజ్ డిన్ఎండ కిజి మన్అ. ఎందనిజ్ ఇహిజ, నీను అయ లెకెండ కితిజ, ఎలాకాలం మని సావుదాన్ నిజి నీనె తప్రె ఆనిలె. నీను వెస్పినికెజ్ వెని వరిజ్బా తప్రిన్సిలె.

5

1-2 నీ సజమ్దు మని డొకెజ్ జటిజ్ ఆవిండ వన్నిజ్ బుబ్బు లెకెండ ఒడిజిబిజి, పణిసి వెహ్అ. దజడారిజ్ తంబెరిజు లెకెండ సుడేజి. డొక్రికాజ్ యాయెక్ లెకెండ సుడేజి. దజడికాజ్ తవు అలోసనదాన్ సుడేఎండ, తజిక్ లెకెండ సుడేజి.

3 దిక్కు సిల్లి రాండి బోదెకాజ్ గవరం సిల.

4 ఎంబెణి రాండి బోదెలదిజ్బా కొడొర్నో నాతిసిర్నో మహిజ, వీరు వరి సొంత ఇండ్రొణి వరిజ్ సుడేదెజ్ వలె. సొంత ఇండ్రొణి వరిజ్ సూణికాదె దేవుణుదిజ్ సేవకిని వందిజ్ ముకెలమతిక ఇజి ముజులె నెస్సెజ్ వలె. అయ లెకెండ అయసి అప్పొసిజ్, అని అమ్మొజ్ రుణం తీర్సినార్. ఎందనిజ్ ఇహిజ, అయాక దేవుణుదిజ్ ఇన్సం ఆతిక.

5 దిక్కు సిలి రాండి బోదెలి దేవుణు మున్సునె వాండ్రు కావలిన్సికెజ్ విజు సీనాన్ ఇజి, దని ఆస ఇట్టా మనాద్. అది రెయు పొగాల్ పార్దనం కిజి, వన్ని సాయం లోసి మంజినాద్.

6 గాని ఉణిజి, తింజి సుకం వందిజ్ బత్తిజిని రాండి బోదెలి బత్తితిజ్బా ఆత్మియ బత్తు సాతి లెకెండ మనాద్.

7 మహికార్ ఎయెర్బా వరిజ్ దుసలాడేఎండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిల.

8 ఎయెన్బా వన్ని కుటుమ్ది వరిజ్, ముకెలం వన్ని సంత ఇండ్రొణి వరిజ్ సుడేఎండ మహిజ, వన్ని నమకం డిస్సి లెకెండెనె దేవుణు ఎద్రు మనాన్. వాండ్రు నమ్మిజ వన్ని ఇంక నండొ నెఇకాన్.

9 ఉండ్రీ రాండి బోదెల్దిజ్ అరువయ్ పంటిజ్ లావు మహిజని, దనిజ్ రాండి బోదెక్ లెక్కాదు కూడువ్అ. మరి, అది ఒరెన్ వన్నిజె పెంట్టి ఆతిమహికాద్ ఆదెజ్ వలె.

10 నెగ్గి పణిజ వందిజ్ నెగ్గికాద్ ఇజి పేరు అనుపె ఆతికాద్ ఆదెజ్. ఇహిజ, దని కొడొరిజ్ నెగ్రెండ పొస కితాదా, నెల్వు సిల్లి వరిజ్బా డగ్గు కిజి నెగ్రెండ సుడేతదా, దేవుణుదిజ్ నమ్మిత్తి వరి పాదమ్కు నొర్జి మహదా, కన్సమ్దు మని వరిజ్ సాయం కిజి మహదా, విజు నెగ్గి పణిజ వందిజ్ దనిజ్ అదిని ఒపజెపె ఆజి మహదా, ఇజి సుడేదెజ్. యా లెకెండ మని వన్యాజ్ లెక్కాదు కూడువ్అ.

11 దజుడిః కాలమ్దు రాండి ఆతి బోదెకాజ్ లెక్కాదు కూడుఃబమ. ఎందనిజ్ ఇహిజ, సెగం కాలం వెన్కా అవికు మన్ను అస్తెజ్ అట్ఎండ పెండ్లి ఆనె. ఆహె క్రీస్తుజ్ డిఃస్సె.

12 అయావలె, మరి పెండ్లి ఆఎ ఇజి దేవుణు పణినె కిన ఇజి ముజాల కితి ఒట్టు తప్పినె. అందెజె, అవికు తప్పె ఇజి లోకుర్ బాణిజ్ వెహె ఆనె.

13 మరి అవికు బదకం ఆజి ఇల్కు ఇల్కు బూలాదెజ్ ఒజ ఆనె. బదకమ్నె ఆవిండ సాండిజు వర్గిజి మహి వరి సజతిజ జోలి కినె. వర్గిదెజ్ ఆఇకెజ్ వర్గినె.

14 అందెజె, దజుడిః కాలమ్దు రాండి ఆతి బోదెకు పెండ్లి ఆజి, కొడోర్ ఇడఃజి, ఇండ్రోణి పణి సుడఃజి మండ్రెజ్ ఇజి నాను కోరిజిన. ఆహె, సజమదిజ్ దూసిస్తెజ్ పడఃఇ వన్నిజ్ అవసరం సిదెజ్ ఆవిద్ ఇజి నాను కోరిజిన.

15 దజుడిః కాలమ్దు రాండి ఆతి సెగిండెక్ నమకం డిఃస్సెనె సయ్తాన్ వెట సాహె.

16 దేవుణుదిజ్ నమ్మిత్తి ఉండ్రె దని కుటుమ్దు రాండి బోదెక్ మహిజ, అది వన్కాజ్ సుడఃదెజ్ వలె. వెన్కా బాజిత సజమదు ఒవజెప్పెజ్ ఆవిద్. ఎందనిజ్ ఇహిజ, దిక్కు సిలి రాండి బోదెకాజ్ సుడఃదెజ్ సజం ఆనాద్.

17 దేవుణు సజం ఏలుబడిః కిజిని పెద్దెల్జ, ముకెలం కన్ఠబడిఃజి దేవుణు మాట బోదిసి నెస్పిసిని వరిజ్ వరి జితమదిజ్ మరి నసానె కుడుఃప్పి లొసె ఆదెజ్ వారు తగ్గికార్.

18 ఎందనిజ్ ఇహిజ, “కలమ్దు మటిసిని డాఃను మూతుదు కిమ తొహమాట్” ఇజి, “పణికినికాన్ జితమదిజ్ తగ్గికాన్”, ఇజి దేవుణు మాటదు వెప్పినాద్.

19 ఒరెన్ పెద్దెలి మున్కు మోప్తి నేరమదిజ్ రిఎర్ ముఎర్ సాసిరు మహిజనె అయాక నమ్మిదెజ్.

20 మహికార్ తప్పుదిజ్ తియెల్ ఆజి మంజిని వందిజ్ పాపం కిజినె మంజిని పెద్దలుజ వరి సజమదు మని విజెరె ఎద్దు డటం దిదిఅ.

21 ఇజ్రికాన్ పెరికాన్ ఇజి తేడ తొండ నాను మున్కు వెప్తి సజతిజ్ నీను కిదెజ్ వలె ఇజి దేవుణు ఎద్దు, క్రీస్తుయెను ఎద్దు, ఏర్పాటు ఆతి దేవుణు దూతార్ ఎద్దు నాను నిజి ఆడ్ర సీజిన.

22 గబి బిజి, ఎయెరి మున్కుబా పెద్దెలి పణి వందిజ్ కిక్కు ఇడఃజి దివిన్మ. మహి వరి పాపమ్కాజ్ వెట కూడఃజి మన్అ. విజు పాపమ్కాజ్ నీను దూరం మన్అ.

23 నీను ఉణిజినిక అర్గిని వందిజ్, డిఃన్ఎండ వాజిని జబ్బు వందిజ్ ఏరునె ఉణెఎండ, బుకెండ ద్రాక్చ కల్లుబ ఉణెఅ.

24 సెగిండార్ కిజిని పాపమ్కు విజెరె ఎద్దు తోర్జినె. వారు, తీర్పు తిరసె ఆదెజ్ సాని ముజాలె, తీర్పు సీనికార్ వరి సజతి నెసినార్. గాని మరి సెగిండారి పాపమ్కు వెన్కుకనె తెలిసె.

25 అయాలెకెండ, సెగిండార్ కితి నెగ్గి పణి విజెరె ఎద్దు తోర్జినె. విజెరె ఎద్దు తోర్ఇక ఎసెజ్బా డాజ్జి మండ్రెజ్ అట్ఉలె.

6

వెటిపణి కినికార్ ఎలాగ మండ్రెజ్

1 దేవుణుదిజ్ నమ్మితి వెట్టిపణి కినికార్ విజెరె వరి ఏజుమానురిజ్ సీని గవరం విజు సిదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యెను వందిజ్ మాపు నెస్పిసిని మాటదిజ్ దూసిన్ఎండ మంజిని వందిజ్ వరిజ్ సిదెజ్ మన్ని గవరం సిదెజ్.

2 వరి ఏజుమానిరు నమ్మిత్తికార్ ఇహిజ, వారు మా తంబెరిజునెగదె ఇజి తక్కు గవ్వరం సీదెజ్ ఆవద్. గాని వారు మరి ఒదె ఏజుమానిరు వందిజ్ పణికిదెజ్. ఎందనిజ్ ఇహిజ, వారు ప్రేమిసేని నమ్మిత్తి వరిజె వారు కిజిని పణిజాణిజ్ మేలు వాజినె. నీను యా సజతిజ్ నీ సజమదు మని వరిజ్ నెన్పిసి, డటం వెహ్తాజ్ వలె.

డబ్బు వందిజ్ ఆస ఆదెజ్ ఆవద్.

3-5 ఎయెన్బా యేసుప్రబు వందిజ్ ఆఇ బోదెజ్ నెన్పిసి, మా ప్రబు ఆతి యేసుక్రీస్తు వెహ్తా నిజమాతి బోదెజ ఒపుకొండెండ, దేవుణు బక్తిదాన్ కూడితి మని బోదెజ ఒపుకొండెండ మనికాన్ గర్దాన్ నిండ్రిత మనాన్. వన్నిజ్ ఇనికబా తెలివద్. వన్నిజ్ అవ్వసరం మన్ని దన్నిజ్, అవ్వసరం సిల్లి దన్నిజ్ విజు వన్కా వందిజ్ తర్కిస్తెజ్ పెరి ఆస మనాద్. క్రీస్తు వెహ్తా మాటెజ అర్దం వందిజ్ జటిజ్ ఆనాన్. యా లెకెండ కినిక, గోస, జటిజ్, దుసలాడెనిక, సెఇ అనుమానమకు విజు పుటిస్సు. ఎన్తివలెబా గొడెబెజ్ పుటిస్సు. యా లెకెండ తర్కిస్సి వరి బుద్ది సెద్రిత మనాద్. వరి లొఇ నిజమాతి బోదె సిల్లెద్. క్రీస్తు మతం వందిజ్ వెహ్తా, ఆస్తి గణస్తెజ్ ఇజి వారు ఒండెబిజనార్.

6 దేవుణుదిజ్ ఇస్తం ఆతివజ బత్కిజి, దన్ని దటాజ్ నరదె ఆజి, నజి యాకదె సాలు ఇజి ఎత్తు కిని వన్నిజ్ గొప్ప లాబం మనాద్

7 ఎందనిజ్ ఇహిజ, మాటు పుట్టివలె ఇనికబా యా లోకమదు తెవతాట్. మాటు సానివలె యా లోకమదాన్ ఇనికబా ఒతెజ్ అట్వెట్.

8 అందెజె, మజి ఉణిక మహిజ, పొర్పాదెజ్ పాత పర మహిజ, అయాకదె మజి సాలు.

9 గాని ఆస్తి మన్నికానాదెజ్ కోరిజినికాన్ డబ్బు గణస్తెజ్ ఇని ఆసెజ సిక్కుదు అర్నాన్. బుద్ది సిలి పాడు కిని నండో ఆసెజ్ ఉరి లెకెండ ఆజి, అయాకెజ్ వన్నిజ్ పాడు కిసె, నాసనం కిసె.

10 ఎందనిజ్ ఇహిజ, ఉండ్రీ మొకదిజ్ వెల ఎలాగ మంజినాదో, అయ లెకెండ విజు సెఇ పణిదిజ్ డబ్బు ఆసనె వెల. సెంగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిసి, వరి మన్సు కూడం గుత్తి సాహిజ ఎలాగ మంజినాద్, అయ లెకెండ వరిజ్ వారె నండో బాదెజ్ కల్లిస్తె.

11 గాని దేవుణు లోకు ఆతి నీను యా సెఇ ఆసెజాణిజ్ దూరం మన్అ. నీతి నిజయ్తాకెజ్ నెగ్గికెజ్ కిజి దేవుణు బక్తిదు మన్అ. దేవుణుదిజె నమ్మిజి మహి వరిజ్ ప్రేమిసి, కష్టమకు ఓరిసి, సార్లిదాన్ మన్అ.

12 నీను యేసుక్రీస్తుజ్ నమ్మితిజ్ కష్టమకు వానె. వన్కాజ్ నీను గెలస్తెజ్ నీను నెగ్రెండ సుడెఅ. నీను అయాలెకెండ గెలస్తిజ, ఎలాకాలం బత్కిని బత్కు దోహ్కాద్. దిని వందిజె దేవుణు నిజి కూక్త మనాన్. 'నాను క్రీస్తుజ్ నమ్మిజన', ఇజి నండో లోకుర్ ఎద్దు నీను ఒపుకొటివలె, నని బత్కు వందిజె దేవుణు నిజి కూక్తాన్.

13-14 విజు వన్కాజ్ పాణం సీజిని దేవుణు ఎద్దుని పొంతి పిలాతు ముజాలె వెన్బాతివలె, దయ్ రమ్దాన్ నెగ్రెండ ఒపుకొటి క్రీస్తుయేసు ఎద్దు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమదాక నీను పాపం సిల్లెండ, నిందెజ్ సిల్లెండ నాను నిజి వెహ్తా సజతిజ్ కిజి మన్అ ఇజి ఆడ్ర సీజిన.

15 దేవుణు ఏర్పాటు కితి సమయమదు యేసుప్రబుజ్ వాండ్రు రపిస్నాన్. గొప్ప పెరికాన్ ఆతి విజు వన్కా మున్సు ఒరెండ్రె అతికారం మనికాండ్రె దేవుణు. వాండ్రు రాజురిజ్ ఇంక పెరి రాజు. ప్రబురిజ్ ఇంక పెరి ప్రబు.

16 వాంఛు ఒరెండ్రె ఎసెజ్బా సాఇకాన్. డగ్రు సొండ్రెజ్ అట్ఇ నసా జాయ్దు బత్తిజినాన్. వన్నిజ్ ఎయెర్బా ఎసెజ్బా తొఎర్. ఎయెర్బా ఎసెజ్బా సుడెడెజ్ అట్ఎర్. వన్నిజ్ విజు గవ్ఠమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్త్ర ఆవండ, ఆస్తి ముస్సు ఆన ఆవండ మండ్రెజ్ ఇజి నీను డటం వెహ్అ. యా ఆస్తిదిజ్ నమ్మిదెజ్ అట్ఇక. గాని వరి ఆస దేవుణు ముస్సు ఇడెడెజ్ ఇజి నీను వెహ్అ. సుకమ్దాన్ నర్ద ఆజి మండ్రెజ్ దేవుణునె తకు సిల్లెండ విజు సీనికాన్.

18 వారు మహి వరిజ్ నండొ మేలు కిదెజ్, నండొ నెగ్గి పణిజ్ కిదెజ్, నీను వారు ఆవండ, నండొ సీబాజి సీనికార్ ఆదెజ్ ఇజి నీను వరిజ్ వెహ్అ.

19 అయాలెకెండె, వాని కాలమ్ది వరి బత్తు వందిజ్ వారు ఉండ్రె నెగ్గి పునాది తయార్ కిజినార్. ఎందనిజ్ ఇహిజు, అయావలె వరిజ్ దేవుణు వెట ఎలాకాలం బత్తిని బత్తు దొహ్కాద్.

20 ఓ తిమోతి, దేవుణు నిజి ఒపజెప్తి సేవ పణి నీను నెగ్రెండ సుడెడె. పణిదిజ్ రెఇ సెఇ మాటెజ వర్గిఎండ దూరం మన్అ. అర్దం సిల్లెండ తర్కిస్సి వన్యాజ్ దూరం మన్అ. దనిజె సెంగొండార్ అబద్ధమ్క గెణం ఇజి కూక్సినార్.

21 సెగొండార్, 'అయాక నజి మనాద్', ఇజి ఒపుకొటారె, యేసు వందిజ్ నిజమాతి సజతిజ్ డెస్స సాహార్. దేవుణు దయా దర్మం మీ వెట మనిద్.

అపొస్తుడు ఆతి పవులు తిమోతిజ్ రాస్తి రుండి ఉత్రం

నెల్వ కిబిస్సిక

అపొస్తుడు ఆతి పవులు ఎపెసి సజం నడిపిసిని తిమోతిజ్ రాస్తి రుండి ఉత్రమనె యాక. పవులు, సాదెజ్ కాలం డగ్రు ఆతాద్ ఇజి నెస్తాండ్రె, నజమ్దిజ్ నెగ్రెండ నడిపిసి, నిజమాతి బోద వరిజ్ నెన్పిస్టెజ్ వలె ఇజి తిమోతిజ్ వెప్పినాన్.

1-2 క్రీస్తుయేసు పొక్తి అపొస్తుడు ఆతి పవులు ఇని నాను, నా సొంత మరిన్ లెకెండ్ నాను ప్రేమిసిని తిమోతిజ్ రాసిన్. దేవుణు ఎత్తు కితి వజనె నాను అపొస్తుడు ఆత. క్రీస్తుయేసు వెట మాటు కూడితి మన్ని దన్నితాన్ లోకుర్ ఎలాకాలం బత్కినార్ ఇజి దేవుణు కితి ఒట్టు వెహైజ్ నె నాను అపొస్తుడు ఆత. మా బుబ్బ ఆతి దేవుణుని ప్రబు ఆతి క్రీస్తుయేసు దయా దర్మమాదాన్ మీ ముక్కు కనికారం తోరిసి, నిపాతిదాన్ మండ్రెజ్ సాయం కిపిర్.

నమకమ్దాన్ మంజిని వందిజ్ దయరం వెప్పినాన్

3 రెయు పొకాల్ నాను పార్దనం కినివలె డిన్ఎండ నిజి ఒడిబిజి దేవుణుదిజ్ వందనమ్కు వెప్పిన. నా అనిగొగొరు వన్నిజ్ పొగిడిజి మాడిస్తి లెకెండ్, నానుబా నా గర్బం నజి గదిన్ఎండ నెగ్రెండ వన్నిజ్ పొగిడిజి మాడిసిన్.

4 నాను నిజి డిస్టానె వాజి మహిజ్, నీను అడబాతి. అయాక ఎత్తు కితానె నిజి సుండెదెజ్ ఇజి నండో ఆస ఆజిన్. ఎందనిజ్ ఇహిజ, నజి సర్ద పూర్తి వానాద్.

5 నీను క్రీస్తుయేసుజ్ నిజం నమ్మిజిని. అయాక నాను ఎత్తు కిజిన్. ముజాలె, నీ డొక్ర బీబి ఆతి లొయిని నీ యాయ యునికె, క్రీస్తుయేసుజ్ నమ్మిత మహె. అయ లెకెండ్ ఏలు నీనుబా నమ్మిజిని ఇజి నాను తవ్వెండ నెసిన్.

6 అందెజె నీను కిదెజ్ ఇజి దేవుణు నిజి సీతి, వరం నీను నెగ్రెండ నండో కిదెజ్ ఇజి నాను నిజి ఎత్తు కిబిసిన్. నాను దేవుణు సేవ పణి వందిజ్ నీ ముస్కు కిక్కు ఇడిజి దివిస్తివలె, దేవుణు అయా వరం నిజి సిత్రాన్.

7 నీను కిదెజ్ ఇజి దేవుణు నిజి సీతి వరం నీను కితి. ఎందనిజ్ ఇహిజ, దేవుణు వన్ని ఆత్మ మజి సీత మనాన్. అయాక మజి తియెల్ పుటిసిని ఆత్మ ఆవెద్. గాని దేవుణు పణి కిదెజ్ సత్తు సీని, మహి వరిజ్ని దేవుణుదిజ్ ప్రేమిసిని, మాటు అణసె ఆజి మండ్రెజ్ సాయం కిని ఆత్మనె సీత మనాన్.

8 అందెజె, మా ప్రబు వందిజ్ వెహైజ్ నీను సిగు ఆమ. వన్ని వందిజ్ వెహైజ్ జెలిదు ఆతి, నా వందిజ్బా సిగు ఆమ. గాని సువార్త వందిజ్ నా వెట కస్టమ్కు ఓరిన్అ. దేవుణు సత్తుదాన్ అయాక ఓరిన్అ.

9 దేవుణు మజి రక్సిస్తాండ్రె, వన్ని వందిజ్ కేట ఆతి బత్కు బత్కిదెజ్ ఇజి మజి కూక్తాన్. మాటు కితి పణిజాణిజ్ ఆవెద్ గాని వన్ని సొంత ఎత్తుదాన్ వన్ని దయా దర్మమాదాన్ వాండ్రు మజి రక్సిస్తాండ్రె కూక్తాన్. లోకం పుట్ఎండ ముజాలె, క్రీస్తు యేసు కితి దనితాన్ యా దయా దర్మం దేవుణు మజి సీత మనాన్.

10 గాని మజీ రక్సిన్ని క్రీస్తుయేసు లోకమీదు వాతివలెనె అయాక ఏలు తోరె ఆతాద్. వాండ్రు సావుదిజ్ సిల్లెండ కితాండ్రె, సువార్త వెంజి నమ్మిని దనితాన్, సాఎండ దేవుణు వెట ఎలాకాలం బత్కిని బత్కు తోరిస్తాన్.

11 యా సువార్త వెప్పి వందిజె, ఒరెన్ సాటిన్ని వన్ని లెకెండ్రె, అపొస్తుడు లెకెండ్రె, నెన్పిన్ని వన్ని లెకెండ్రె దేవుణు నజి ఏర్పాటు కిత్తాన్.

12 అందెజె నాను యా కస్టమ్కు ఓరిసిన. గాని నాను సిగు ఆఎ. ఎందనిజ్ ఇహిజు, నాను నమ్మిత్తి వన్నిజ్ నాను నెన్ను. వాండ్రు, తీర్పు కిదెజ్ వాని దినమ్దాక, నజి ఒపజెప్తి సువార్త కాపాడెదెజ్ వాండ్రు అట్టికాన్ ఇజి నాను నిజం నెన్ను.

13 నిజమాతి మాట నీను నా బాణిజ్ విహి లెకెండ్రె నీను మహి వరిజ్ వెహ్అ. క్రీస్తుయేసు వెట మని సమందమ్దాన్ మని సమకమ్దు ప్రేమాదు నీను మన్అ.

14 దేవుణు నిజి ఒపజెప్తి సువార్త ఎయెర్బా మారిన్ఎండ నీను సుడెఱ. మా లోఇ మంజిని దేవుణు ఆత్మ సాయమ్దాన్ అయాక కాపాడెఱ.

15 ఆసియ ప్రాంతమ్దు మన్ని నమ్మిత్తికార్ విజెరె నా బాణిజ్ దూరం ఆతార్ ఇజి నీను నెన్ను. పుగెలు హెర్మెను ఇనికార్ వరి లోఇ మనార్.

16 ఒసెసిపారు ఇండ్రోణి వరిజ్ ప్రబు కనికారం తోరిన్పెన్. ఎందనిజ్ ఇహిజు, వాండ్రు నజి నండో సుట్కు ఆదరిస్తాన్. నాను జేల్లిదు మహిజ్బా వాండ్రు నా వందిజ్ సిగు ఆతాన్.

17 గాని వాండ్రు రోమ పట్టుమ్దు వాతివలె, నాను తోర్నిదాక నండో రెబాతాన్.

18 నాను ఎపెసుదు మహివలె, వాండ్రు నజి నెగ్రెండ్రె సుడెఱి, ఎసా సాయం కిత్తాన్ ఇజి నీను బాగ నెసిని. ప్రబు తీర్పు కిని దినమ్దు ప్రబు వన్నిజ్ కనికారం తోరిన్పెన్.

2

1 అందెజె నా మరిన్ లెకెండ్రె మని నీను, క్రీస్తుయేసు దయా దర్మమ్దాన్ సత్తు పొందిజి మన్అ.

2 నండో లోకుర్ ఎర్దు నాను వెప్టా నిజమాతి మాటెజ్ నీను వెహిమని. అయా మాటెజ్ నమ్మిదెజ్ తగ్ని వరిజ్ ఒపజెప్అ. వారు యా నిజమాతి మాటెజ్ మహివరిజ్ బాగ నెన్పిన్జెబా అట్టికార్ ఆదెజ్.

3 ఒరెన్ నెగ్గి విద్దె కినికాన్ వన్ని కస్టమ్కు ఓరిసిని లెకెండ్రె నీను క్రీస్తుయేసు వందిజ్ మా వెట కస్టమ్కు ఓరిసి మన్అ.

4 ఒరెన్ ఉద్దం కినికాన్, వన్ని బత్కు వందిజ్ మరి ఆఇ పణిజు సొన్ఎన్. ఎందనిజ్ ఇహిజు, సొహిజు వన్నిజ్ సయనమ్దు ఏర్పాటు కితి అతికారిజ్ సర్ద కిబిన్ఎన్. అయా లెకెండ్రె నీనుబా క్రీస్తు సేవ పణిదు మన్అ.

5 మరి అయాలెకెండ్రె, ఊహ్కొ పందెమ్దు ఒరెన్ ఊహ్కొకాన్ పందెమ్దు వెప్టా రూలు వజ ఊహ్కొఎండ మహిజు, వాండ్రు గెలెన్ఎన్. వన్నిజ్ ఇనాయం దొహ్కొఎద్. అయా లెకెండ్రె నీనుబా క్రీస్తు సేవ పణిదు మన్అ.

6 కస్టవడిఱి పణి కిని ఒరెన్ రయ్దు వన్నిజ్, పండితి పంటది తోలి వంతు దొహ్కొకెజ్వలె. అయా లెకెండ్రె నీనుబా క్రీస్తు సేవ పణిదు మన్అ.

7 నాను ముస్కు వెప్టా దన్ని వందిజ్ నీను మరి మరి ఆలోసనం కితి. ఎందనిజ్ ఇహిజు, నీను ఆలోసనం కితిజు, నీను నెన్జెజ్ మన్ని విజు వన్కాజ్ వాండ్రు అర్దం కిబిస్తాన్.

8 ఎస్తివలెబా క్రీస్తు యేసుజ్ ఒడోబిలు. సావుదాన్ దేవుణు వన్నిజ్ బత్కిస్త మనాన్. దావీదు రాజు తెగ్గదు పుట్టి మనికాన్. యాకదె నాను లోకురిజ్ వెప్పొని సువార్త.

9 నాను యా సువార్త వెప్పొనిజ్, నజి బాదెజ్ వాజినె. తప్పుజి కితి ఒరెన్ వన్నిజ్ తొప్పొలెకెండ, నాను తొహె ఆజిన. గాని దేవుణు మాట తొహె ఆవెతాద్.

10 అందెజె, దేవుణు ఏర్పాటు కితి వరి వందిజ్ నాను విజు కస్టమ్కు ఓరిసిన. క్రీస్తుయేసు వరిజ్బా రక్కిసి, దేవుణు గొప్ప జాయ్దు మంజిని బాడిఁదు వన్ని వెట ఎల్లకాలం వారుబా మంజిని వందిజ్, వరి వందిజ్ నాను కస్టమ్కు ఓరిసిన.

11 యా మాటెజ్ నమ్మిదెజ్ తగ్గిక మాటు వన్ని వెట సాతిజ వన్నివెట బత్కినాట్మరి.

12 మాటు మా కస్టమ్కు ఓరిస్తెజ వన్నివెట ఏలుబడిఁ కినాట్మరి. వన్నిజ్ నెన్ఎ ఇహిజ వాండ్రుబా మజి నెన్ఎ ఇనాన్.

13 మాటు నమ్మిదెజ్ తగ్గికాట్ ఇహిజ వాండ్రు ఎస్తివలెబా నమ్మిదెజ్ తగ్గికాన్ ఆజి మంజినాన్. ఎందనిజ్ ఇహిజ వన్నిజ్ వాండ్రె తప్పెజ్ అట్ఎన్.

నమకమాతి నెగి పణిమణిసి

14 నాను ముస్కు వెప్తి సజతిజ్ లోకురిజ్ ఎత్తు కిబిసి మన్అ. ఇని ఇని మాటెజ వందిజ్ జటిజ్ ఆమాట్ ఇజి దేవుణు ఎద్దు వరిజ్ సరి దిదిఅ. అయాక పణిదిజ్ రెజక. వెనివరి నమకం పాడుఁ కిజినాద్.

15 నెగ్గి పణి మనిసి ఇజి దేవుణు బాణిజ్ అనుపె ఆదెజ్, నీను అయ లెకెండ మండ్రెజ్ బాగ సుడోఅ. కిని పణిజ వందిజ్ దేవుణు వెనబానివలె, సిగు ఆవిండ మంజిని పణి మనిసి లెకెండ నీను మన్అ. నిజమాతి మాట నెగ్గెండ నెన్పిన్ని వన్ని లెకెండ మన్అ.

16 పణిదిజ్ రెజ, సెజ మాటెజణిజ్ నీను దూరం మన్అ. ఎందనిజ్ ఇహిజ, నని మాటెజ్ వర్గిజ మంజినికార్ మరి ఒదె సెజకార్ ఆజి దేవుణు బాణిజ్ దూరం ఆనార్.

17 మలెరియ నోబు నండోడారిజ్ పాడు కిని లెకెండ, వారు నెస్పిసిని మాటెజ్ మహివరిజ్ పాడుఁ కినె. నని వరి లోజ మనికారె హుమెనయ, పిలెతు ఇనికార్.

18 వీరు నిజమాతి మాటెజ డిస్త సొహార్. వారు తపు వెప్పొనార్, దేవుణు సాతి సొహి వరిజ్ మర్జి బత్కిస్త మనాన్ ఇజి ఆహె వెప్పొ, ఇనిక నమ్మిదెజ్ ఇజి నెన్ఎండ, ఇతల్ అతాల్ కిజి సెగొండారిజ్ బమ్మ కిజినార్.

19 అహిజ్బా, దేవుణు బాణిజ్ వాతి నిజమాతి మాట తవ్వెదు. అయాక నెగెండ నిల్పిని ఉండ్రె పునాది లెకెండ మనాద్. 'ప్రబు వన్ని సొంత వరిజ్ నెస్సాన్' ఇజి, 'యేసుజ్ నా ప్రబు ఇజి ఒప్పుకొణికార్ విజెరెబా సెజ పణిజాణిజ్ దూరం ఆదెజ్ వలె' ఇజి అయా పునాదిదు ముద్ద పొక్త మనాద్.

20 ఉండ్రె పెరి ఇండ్రె నండో రకమ్కాణి కుండెజ్ మండిజ్ మంజినె. సెగం వెండిదాన్, బజారమ్దాన్ తయార్ కితికెజ్, మరి సెగం సెకదాన్, దుల్లిదాన్ తయార్ కితికెజ్. విన్యా లోజ వెండిదాన్ బజారమ్దాన్ తయార్ కితికెజ్ నెగ్గి పణిదిజ్ వాడుకొణార్. సెకదాన్, దుల్లిదాన్ తయార్ కితికెజ్ ఆఇ పణిదిజ్ వాడుకొణార్. అయాలెకెండె, దేవుణుదిజ్ నమ్మిత్తి వరి సజమ్దు, దేవుణు వందిజ్ నెగ్గి పణి కిదెజ్ తగ్గికార్ మంజినార్. ఆఇకార్బా మంజినార్.

21 అందెజె ఎయెన్బా సెఇకెజ్ విజు డిస్తెజ, వాండ్రు నెగ్గిపణి కిదెజ్ తగ్గికాన్ ఆనాన్. పెరి ఇండ్రెణి ఎజమాని, నెగ్గి పణిదిజ్ వాడుకొండెజ్ కేట ఇడ్డి వెండి

బజారమ్ ది కుండెజ్ మండిజ్ లెకెండ, వీండ్రుబా దేవుణు వందిజ్ ఇని నెగ్గి పణిడిజ్ బా తగ్గి కాన్ ఆనాన్.

22 దజడాారిజ్ మని ఉత్పత్తదాన్ దూరం మన్ అ. గాని నీతి నిజయ్ దికెజె కిదెజె సుడె:అ. దేవుణు వందిజ్ నిజమాతి మాటెజ్ నమ్మి అ. ఎస్తివలెబా ప్రేమ తోరిన్ అ. విజెరె వెట సాంతి సమాదనమ్ దాన్ మండ్రెజ్ సుడె:అ. నెగ్గి మన్సుదాన్ ప్రబుజ్ పార్లనం కినివరి వెట కూడె:జి మన్ అ.

23 బుద్ది సిల్లెండ అర్లం సిల్లెండ తర్కిసిని వరి బాణిజ్ దూరం మన్ అ. ఎందనిజ్ ఇహిజ, వారు జటిజ్ పుటిసి నార్ ఇజి నీను నెసిని.

24 దేవుణు పణి మనిసి జటిజ్ ఆదెజ్ ఆవెద్. గాని వాండ్రు విజెరివెట కనికారం ఆజి మండ్రెజ్ వలె. నెగ్రెండ నేపిసిని కాన్ ఆదెజ్ వలె. ఓరిసిని కాన్ ఆదెజ్ వలె.

25 నిజమాతి మాటెజ, ఎద్రిస్సి వరిజ్ వాండ్రు సార్ లిదాన్ వెప్పి దిదిదెజ్. వారు పాపమ్ కు ఒప్పకొడి:జి, నిజమాతికెజ్ నెస్సి వందిజ్, దేవుణు ఉండ్రీ వేలా వరి మన్సు మారిస్సాన్ సు.

26 అహె వారు బుద్దిదు వాజి, సయ్తాన్ ఉరిదాన్ తప్రె ఆనార్. సయ్తాను, వన్ని ఇన్లమ్ కు కిబిన్జె వరిజ్ అన్లమనాన్. అందెజె దేవుణు పణి మనిసి వరిజ్ సార్ లిదాన్ వెప్రాజ్.

3

కడె:వెరి దినమ్ క వందిజ్ వెప్పినిక

1 యేసుప్రబు వాని ముజాల, కడె:వెరి దినమ్ కాజ్ నండొ తియెల్ ఆని రోస్కు మంజినెలె ఇజి నీను నెన్ అ.

2-5 లోకుర్, వరిజ్ వారి నెగ్రెండ మండ్రెజ్ ఇజి సుడె: ఆనార్ డబ్బుదిజ్ ఆస ఆనార్. నా ననికాన్ మరి ఎయెన్ బా సిలెన్ ఇజి వెహె ఆనార్. గర్ల ఆనార్, దూసిస్సార్. యాయబ్బారిజ్ లోజెవర్. మేలుదిజ్ నెస్ ఎర్, సెఇకార్ ఆనార్. ప్రేమ సిల్లికార్ ఆనార్, సెమిస్ ఇకార్ ఆనార్. సాండి:జ్ వెప్పికార్ ఆనార్. అణసె ఆఇకార్ ఆనార్. అడి:వి జంతు నని మూర్కమ్ దికార్ ఆనార్. సాంత వరిజ్ బా మొసెం కినికార్ ఆనార్. బుద్ది సిల్లెండ ఇని ఇనికెజ్ కినార్. గర్ల ఆనార్. దేవుణుదిజ్ ప్రేమిన్ ఎండ వరి సుకమ్ కాజ్ ప్రేమిస్సార్. వారు దేవుణు బక్తి మనికార్ ఇజి ముస్కునె తొరె ఆనార్. గాని వన్నిజ్ లోజెదెజ్ వాండ్రు సీజిని సత్తుదిజ్ నెక్కి షొక్కినార్. నని వరి బాణిజ్ దూరం మన్ అ.

6-7 ఎందనిజ్ ఇహిజ, నని వరి లోఇ నెగొండార్, లోకుర్ వెట నెల్వ ఆజి ఇల్కాజ్ వానారె, తపు బోదెజ్ వెప్పి, బాన్ మని బుద్ది సిలి బోదెకాజ్ మోసం కినార్. అవికు వీరు వెప్పినికెజ్ నమ్మిజి మోసం ఆనె. అవికు కితి నండొ పాపమ్ క వందిజ్ వన్కా గర్లబమ్ కు గదిసిని మంజినె. అవికు, వన్కా ఆసెజ విజు ఎత్తు కిజినె మంజినె. ఎస్తివలెబా నెనె ఆదెజ్ ఆస ఆనె. గాని నిజమాతికెజ్ ఇనికెజ్ ఇజి టెటజ్ నెన్ ఉ.

8 యెనె, యెంబై ఇనికార్ మోసెజ్ ఎద్రిస్తిలెకెండ, వీరుబా దేవుణు వందిజ్ నిజమాతికెజ్ ఎద్రిసి నార్. వీరు విరి మన్సుదు సెఇకెజ్ నె ఒడె:బినార్. అందెజె వారు నమ్మిజినికెజ్ పణిడిజ్ రెఇకెజ్

9 యెనె, యెంబై బుద్ది సిలికార్ ఇజి లోకుర్ విజెరె టెటజ్ సుడి:తి లెకెండ, వీరుబా బుద్ది సిలికార్ ఇజి లోకుర్ విజెరె టెటజ్ సూణార్ లె. అందెజె ఎలాకాలం దేవుణు మాటదిజ్ ఎద్రిసి సాండ్రెజ్ వారు అట్ ఎర్.

తిమోతిజ్ ఆడ్ర సీజినాన్.

10-11 గాని నాను నెస్పికికెజ్, నాను ఎలాగ బత్తిజి నడిత ఇజి నాను కిదెజ్ ఇజి నా బత్తుదు మని ఉదెసం, నాను దేవుణుదిజ్ ఎలాగ నమ్మిజి మహా ఇజి, నజి కితి కీడుదిజ్ ఎలాగ ఓరిన్తి ఇజి, నాను ఎలాగ మహి వరిజ్ ప్రేమిన్తి ఇజి నీను పూర్తి నెసిని. లోకుర్ నజి బాదెజ్ కితివలె నాను ఎలాగ అయికెజ్ ఓరిన్తిజ్ అట్ట ఇజి నీను నెసిని. నజి వాతి హిమ్సెజ్ విజు నీను నెసిని. అందియొకయ, ఇకొనియ, లున్త్ర ఇని పట్నమ్కాజ్ నజి వాతికెజ్ విజు నీను నెసిని. లోకుర్ కితి నండో బాదెజ్ నాను ఓరిన్తి. గాని ప్రబు వన్కా బాణిజ్ విజు నజి తప్తిస్తాన్.

12 క్రీస్తుయేసు వెట సమందం ఆజి, దేవుణు బక్తిదాన్ బత్తిదెజ్ ఆస ఆని ఎయెరిజ్బా బాదెజ్ వానె.

13 గాని సెఇ పణిజ్ కినికార్ని, మహివరిజ్ మొసం కినికార్ ఇంక ఒదె పాడాఃనార్. వారు మొసం కినార్. మొసం కిబె ఆనార్.

14-15 గాని నీను, నెస్తిమనికెజ్, తవ్వెండ నమ్మిజి మనికెజ్ డిఃన్ఎండ మన్అ. ఎందనిజ్ ఇహిజ, నిజి నెస్పిన్తి వరిజ్ నీను నెసిని. ఇజ్రివలెహాన్ అసి నీను దేవుణు మాట ఎలాగ నెస్తి ఇజి నీను నెసిని. యాకెజ్, క్రీస్తు యేసు ముస్కు నీను ఇడ్డి నమ్మకమ్దాన్, దేవుణు నీ పాపమ్కాజ్ నిజి రక్సిన్తి వందిజ్ నిజి గెణం సీదెజ్ అట్టి.

16 దేవుణు మాటజ్ విజు దేవుణు వన్ని ఊప్తిదాన్ వెహ్ని రాస్పిన్తికెజె. అయాకెజ్, నిజమాతికెజ్ మజి నెస్పిన్తిజ్, మా తప్పజ్ తోరిన్తిజ్, మజి సరి దిదిదెజ్, నీతి నిజయితికెజ్ కిదెజ్ నెస్పిన్తిజ్ పణిదిజ్ వానికెజ్.

17 ఈహునె ఒరెన్ దేవుణు లోకు వాండ్రు కిదెజ్ మనికెజ్ విజు కినాన్. విజు నెగ్గి పణి కిదెజ్ ఎస్తివలెబా తయార్ ఆనాన్.

4

1 దేవుణు ఎద్దు, సాతి వరిజ్ బత్తిజిని వరిజ్ తీర్పు సీని క్రీస్తుయేసు ఎద్దు నాను నిజి ఆడ్ర సీజిన. ఎందనిజ్ ఇహిజ వాండ్రు మర్జి వాజి రాజు వజ ఏలుబడిః కినాన్లె.

2 నాను నిజి ఈహు ఆడ్ర సీజిన నీను దేవుణు మాట లోకురిజ్ వెహ్అ. లోకుర్ వినారొ, వినేరొ ఇజి నెగ్గి సమయం, ఆఇ సమయం తొఎండ ఎస్తివలెబా అయాక వెహ్తెజ్ తయార్ ఆజి మన్అ. లోకురిజ్ వరి తప్పజ్ తోరిని వెహ్అ. వరి తప్పజు దిదిఅ. వారు కిదెజ్ మనికెజ్ పణిన్అ. నీను కోపం ఆవండ నిపాతిదాన్ వరిజ్ నెస్పిన్అ.

3 ఎందనిజ్ ఇహిజ, లోకుర్ నిజమాతికెజ్ వినేఎండ బత్తిని కాలం వానాద్. గాని వరిజ్ ఇన్తం ఆని వజ లోతు మాట వెహ్ని నని బోద్ కిని నండొండారిజె వారు తపిసి డగ్గు కినార్. అందెజె, నని వరిజ్ తపిసి డగ్గు కినార్.

4 ఇహిజ, నిజమాతి మాట వారు వినేవర్. గాని కత సాన్తరమ్క దరోబ్ మర్నార్.

5 గాని ఓ తిమోతి, నీను విజు వన్కా లోఇ నెగ్గి బుద్దిదాన్ మన్అ. కన్తమ్కు ఓరిన్అ. క్రీస్తుయేసు వందిజ్ సువార్త లోకురిజ్ వెహ్అ. దేవుణు సేవపణి కినివలె, నీను కిదెజ్ మనిక విజు పూర్తి కిఅ.

6 ఎందనిజ్ ఇహిజ, నాను పూజ ఆదెజ్ సమయం డగ్గు ఆత మనాద్. నాను సాదెజ్ సమయం డగ్గు ఆత మనాద్.

7 పందెమ్మదు ఒరెన్ కస్టబడితి లెకెండ్, నాను సువార్త లోకురిజ్ వెప్పి వందిజ్ కస్టబడిత. ఉప్పి పందెమ్మదు, ఒరెన్ ఉప్పిక, పూర్తి కిని లెకెండ్, నాను కిదెజ్ దేవుణు నజి వెప్పికెజ్ పూర్తి కిత. దేవుణు ముస్కు మని నమకం డిన్ ఎత.

8 అందెజె నజి ఉండ్రె ఇనాయం మనాద్. నాను నీతి నిజాయితిదాన్ బత్తితి దని వందిజ్ సీని ఇనాయం. అయాక ఆకరి దినమది తీర్పుదు, నీతి నాయమ్దాన్ తీర్పు సీని ప్రబు అయాక నజి సీనాన్. నజిన్ ఆవండ వాండ్రు వాని దనిజ్ ఎద్దు సుడఃజి ఆన ఆని విజెరిజ్ సీనాన్.

9-10 తిమోతి, నా డగ్రు బేగి వాదెజ్ నీను సుడఃఅ. ఎందనిజ్ ఇహిజ, దెమ, యా లోకమ్ది సజతిజ్ ప్రేమిసి, నజి డిస్త సాహాన్. వాండ్రు దెనలోనిక పట్టుమ్దు సాహాన్. క్రెనె ఇనికాన్ గలతియ ఇని ముటాదు సాహాన్. తీతు దెల్మియ జిల్లాదు సాహాన్.

11 లూక ఒరెండ్రె నా వెట మనాన్. నీను వానివలె మార్కుజ్ నీ వెట కూక్కి తగ్గఅ. ఎందనిజ్ ఇహిజ, వాండ్రు నజి తోడుఃదిజ్ బాగ మంజినాన్.

12 తుకికుజ్ ఎపెసు పట్టుమ్దు పొక్త.

13 నీను వానివలె త్రొయ పట్టుమ్దు కార్పు ఇని వన్ని బాన్ నాను ఇట్టా వాత సాల్వు తగ్గఅ. పుస్తకమ్కుబా తగ్గఅ, ముకెలం తోలుదు రాస్తి మనికెజ్.

14 అలెక్సెజండర్ ఇని కంసు తయార్ కిని సరాబు నజి నండో బాదెజ్ కిత్తాన్. వాండ్రు కితి దనిజ్ ప్రబు వన్నిజ్ సిక్కు సీనాన్.

15 వాండ్రు నిజిబా బాదెజ్ కిండం నీను జాగర్త మన్అ. ఎందనిజ్ ఇహిజ, మాటు బోదిస్తి మాటెజ, వాండ్రు నండో ఎద్రిస్తాన్.

16 నజి ముజాలె, కోర్టుదు ఒసి వెనబాతివలె, నజి నానె ముదాయి. ఎయెర్ బా నా దరోట్ వర్గెతార్. విజెరె నజి డిస్త సాహాన్. దిన్ని వందిజ్ దేవుణు వరిజ్ సిక్కు సీఎండ మన్సీన్.

17 అహిజ, కోర్టుదు మహి యూదురు ఆఇకార్ విజెరె, నా వెట సువార్త పూర్తి విని వందిజ్, ప్రబు నా పడఃకాద్ మంజి, నజి నత్తు సితాన్. నొరెన్ వెయుదాన్ తప్రిస్తి లెకెండ్ సాపు సిక్కుదాన్ తప్రిస్తాన్.

18 అందెజె, ప్రబు నజి విజు సెఇ వన్కా బాణిజ్ తప్రిసి, వాండ్రు రాజు వజ ఏలుబడికిని పరలోకమ్దు నెగ్రెండ కూక్కు ఒనాన్. వన్నిజ్ ఎలాకాలం గవరం మనీద్. ఆమెన్.

19 ప్రిస్కిలెజ్, అక్కులెజ్, ఒనెసిఫారు ఇండ్రొణి వరిజ్ నాను వెన్బాతి లెకెండ్ వెహ్హాఅ.

20 ఎరాస్టు కొరింతు పట్టుమ్దు నిహాన్. త్రొపిముజ్ కస్టం అర్దిజ్, వన్నిజ్ మిలెతు పట్టుమ్దు డిస్త వాత.

21 పినికాలం రెండం ముజాలె, నీను బేగి వాదెజ్ సుడఃఅ. యుబులు, పుదె, లిను, క్లడయ ఇనికార్ నిజి వెన్బాతి లెకెండ్ వెప్పినార్. అయ లెకెండ్ యా పట్టుమ్దు మని మహి నమ్మిత్తికార్ బా వెన్బాతిలెకెండ్ వెప్పినార్.

22 ఓ తిమోతి, ప్రబు నీ వెట తోడుః మనీన్. వన్ని దయా దర్మం మీ విజిదెరె వెట మనీద్.

అపొస్తుడు ఆతి పవులు తీతుజ్ రాస్తి ఉత్రం

నెల్లు కిబిసినిక

అపొస్తుడు ఆతి పవులు తీతుజ్ రాస్తి ఉత్రమనె యాక. పవులువెట దేవుణు సేవపణి కినివరి లొఇ ఒరెనె తీతు. క్రేతు దేసమ్దు మన్ని దేవుణుదిజ్ నమ్మితి వరి సజమ్కాజ్ నెగ్రెండ నడిపిస్తాజ్, వన్నిజ్ సజం ముస్కు అతికారి లెకెండ పవులు ఏర్పాటు కిత్తాన్. అందెజె సజమ్కాజ్, ఎలాగ మన్ని పెద్దల్జ నిల్పాజ్, వారు కిదెజ్ మన్ని పణిజ్, దిన్ని వందిజ్ వెహ్ని పవులు తీతుజ్ రాసిన్. మరి, సజమ్దు మన్ని ఒరెన్ ఒరెన్ ఎలాగ మండ్రెజ్ ఇజిబా వెహ్నినాన్.

1-4 దేవుణు సేవకిని, యేసు క్రీస్తు వందిజ్ అపొస్తుడు ఆతి పవులు ఇని నాను తీతుజ్ రాసిన్. నీను నా సొంత మరిన్ లెకెండ మన్ని. ఎందానిజ్ ఇహిజ, దేవుణు వందిజ్ వెహ్ని మన్ని మాటెజ్, నాను నమ్మిజనికెజె నీనుబా నమిజిని. దేవుణుదిజ్ నెగ్రెండ నమ్మిదెజ్, వాండ్రు ఏర్పాటు కిత్తి లోకురిజ్ నడిపిస్సివందిజ్, వాండ్రు నజి ఏర్పాటు కిత్తాండ్రె పోక్తాన్. మరి, దేవుణు వందిజ్ నిజమాతి సజతిజ్ నెన్పిసిని వందిజ్ వాండ్రు నజి ఏర్పాటు కిత్తాండ్రె పోక్తాన్. యా నిజమాతి సజతిజ్ దేవుణుదిజ్ లోజిజి నడిఃనిక ఎలాగ ఇజి వెహ్ని తోరిస్తాద్. అయావలె వారు ఎలాకాలం దేవుణు వెట బత్కిని బత్కుదిజ్ ఆసదాన్ ఎద్దునూణార్. అబద్దం వర్గిజ దేవుణు, ఎలాకాలం వన్నివెట బత్కిని బత్కు వందిజ్ లోకుర్ వెట ఒట్టు కిత్తాన్. నిరకారమ్బా సిల్లెండ మన్నివలె మహి వన్ని ఉదెసం వజనె వాండ్రు ఒట్టు కిత్తాన్. దేవుణు పణిమనిసిర్ సువార్త వెహ్నార్. ఆహె వాండ్రు ఏర్పాటు కిత్తి కాలమ్దు, లోకురిజ్ సువార్త వెన్పిస్తాన్. అయాక వెహ్నాజ్ నజి ఒపజెప్తు మనాన్. మజి రక్సిసిని దేవుణు ఆడ్ర వజనె నాను వెహ్నిన. బుబ్బాతి దేవుణుని, మజి రక్సిసిని క్రీస్తుయేసు, దయాదర్మమ్దాన్, నీను నిపాతిదాన్ మండ్రెజ్ సాయం కిపిర్.

క్రేతు దేసమ్దు తీతు కిదెజ్ మన్ని పణి

⁵ నాను నిజి వెహ్ని వజనె, తప్తికెజ్ దిదిజి, దేవుణు సజమ్కు మన్ని పట్నమ్కాజ్ విజు పెద్దెలుజ నిల్వఅ. దిన్నివందిజె నాను నిజి క్రేతు దేసమ్దు డిఃస్త వాత.

⁶ దేవుణు సజమ్దు, పెద్దెలి ఆనికాన్ ఎయెన్ ఇహిజ, నింద సిల్లికాన్. ఉండ్రె ఆల్సి మంజినికాన్. వన్ని కొడొఃర్ దేవుణుదిజ్ నమినికార్ ఆదెజ్. కొడొఃర్, సెఇ పణిజ వందిజ్ నేరం మొపె ఆఇకార్ ఆదెజ్. వెహ్నిమాట వెనికార్ ఆదెజ్. నన్నివరి అప్పొసిని పెద్దెలి ఆదెజ్.

⁷ పాస్టరు నింద సిల్లికాన్ ఆదెజ్వెలె. ఎందానిజ్ ఇహిజ, వాండ్రు దేవుణుదిజ్ నమ్మితి వరిజ్ నడిపిస్సికాన్. వాండ్రు గర్త ఆఇకాన్. మూంజిద్ కోపం మన్ఎండ, సోన్ఎండ, డెయ్సె ఆవండ, సిగు వాని సెఇ పణిజ్ కిజి లాబమ్వందిజ్ సుడఃఎండ మంజినికాన్ ఆదెజ్వెలె.

⁸ అహిజ, వాండ్రు వాతివరిజ్ డగ్గు కినికాన్, నెగ్గి వన్కాజ్ కోరిజినికాన్, అణసె ఆజి మంజినికాన్, నీతి నిజాయి్ మనికాన్, దేవుణు వందిజ్ కేట ఆతికాన్, నెగ్గి బుద్ది మనికాన్ ఆజి మండ్రెజ్.

9 పాస్టరు ఆనికాస్ యేసుక్రీస్తు వందిజ్ మాటు నెన్పిస్తి నిజమాతి మాటెజ్ అయావజ గటిజ నమ్మినికాన్ ఆదెజ్వెలె. ఎందానిజ్ ఇహిజ, వాండ్రు నమ్మిత్తి వరిజ్ నిజమాతి మాటెజ్ నెన్పిసి, నిజమాతి మాటెజ్ ఎద్రిసిని వరిజ్ వరి తప్పుజ తోరిస్తెజ్ అట్టికాన్ ఆదెజ్.

10 ఎందానిజ్ ఇహిజ, నండొండార్ మనార్, అతికారమ్దిజ్ లోజిఎండ, పోక్రి వర్గిజి, మొసం కినికార్ నండొండార్ మనార్. ముకెలం, యేసుప్రబు రక్సిస్తెజ్ ఇహిజ నునతి కిబె ఆదెజ్ వెలె ఇజి కసితం వెప్పినికారె యాలెకెండ మనార్.

11 వరి వెయికు మీరు మూక్తెజ్వెలె. ఎందానిజ్ ఇహిజ, వారు నమ్మిత్తి వరిజ్ తప్పుజ్ నెన్పినార్. ఆహె నమ్మిత్తి వరి కుటుమ్దికార్ విజేరె నిజమాతి మాటెజ్ నమ్మిఎండ ఆప్కిజినార్. వరి సొంత లాబం వందిజె వారు ఈహు కిజినార్.

12 క్రేతుదికాండ్రె వెప్తాన్, “క్రేతుదికార్ ఎస్తివలెబా అబద్దం వర్గినికార్, మూర్కమ్దికార్, బదకం ఆజి తిండికకుర్తి అతికార్”, ఇజి. యా లెకెండ వెప్తాకాన్, వరి లోఇ ఒరెన్ పల్కుబడిః మన్నికాండ్రె.

13 వాండ్రు క్రేతుది వరి వందిజ్ వెప్తాకెజ్ నిజమనె. అందెజె బాన్ మన్ని నమ్మితికార్ నిజమాతి మాటెజ్ నెగ్రెండ నమ్మిని వందిజ్ నీను వరిజ్ డటిసి డటిసి దిదిఅ.

14 వారు అర్దం సిల్లి యూదురి కత సాన్తరమ్కు అన్ఎండ మంజిని వందిజ్ నీను వరిజ్ దిదిఅ. మరి, నిజమాతి సజతిజ్ డిఃసి సొహివరి మాటెజ్ లోజిఎండ మంజిని వందిజ్ నీను వరిజ్ డటం దిదిఅ.

15 మన్ను పాపమ్కాజ్ సుబరం ఆతివరిజ్, విజుబా సుబరం ఆతిలెకెండ నెగెండ మనాద్. గాని, మన్ను సుబరం ఆవిండ, యేసుక్రీస్తుజ్ నమ్మిఇ వరిజ్ ఇనికబా సుబరం ఆవిండ నెవెణ్ మనాద్. ఎందానిజ్ ఇహిజ, వరి గర్బం సెఇక అత మనాద్. వారు సెఇకెజ్ కినివెలె, ‘తప్తాప్’, ఇజుబా వరి గర్బం గదిన్విద్.

16 వారు దేవుణుదిజ్ నెస్సాప్ ఇజి వెహె ఆజినార్. గాని వరి పణిజాణిజ్ వన్నిజ్ నెక్కిపొక్కినార్. వారు పెంటు లెకెండ మనికార్. దేవుణుదిజ్ లోజిఇకార్. ఇని నెగ్గి పణిజ్ కిదెజ్బా తగ్గిఇకార్.

2

నిజమాతి మాటెజ్ వెప్పినాన్

1 తీతు, నీను దేవుణుదిజ్ నమ్మిత్తి వరిజ్, నిజమాతి మాటెదిజ్ కూడిఃతి మన్ని సజతిజ్ నెన్పిన్అ.

2 డొక్రారిజ్ నెన్పిన్అ, వారు సోన్ఎండ మండ్రెజ్ ఇజి. విజేరె వరిజ్ గవరం సీజి మంజిని లెకెండ మండ్రెజ్ ఇజి. నెగ్గి బుద్దిదాన్ మండ్రెజ్ ఇజి నెస్పిన్అ. మరి, వారు నిజమాతి మాటెజ్ నెగ్రెండ నమ్మిజి, మహివరిజ్ ప్రేమిసి ఒరిసి మండ్రు ఇజి నెస్పిన్అ.

3 అయాలెకెండ, డొక్రికాజ్బా నెన్పిన్అ, అవిక్ బక్తిదాన్ మంజిని వరిలెకెండ మండ్రెజ్ ఇజి. అవిక్ సొండిజ్ వర్గిఎండ, సోన్ఎండ, మహి వన్నాజ్ నెగ్గి సజతిజ్ నెన్పిస్తెజ్ ఇజి.

4⁵ అయాలె అవిక్, బోదెకాజ్ నెన్పిస్తెజ్ ఆనాద్. ఇనికెజ్ నెన్పిస్తెజ్ ఇహిజ, వనక మాసిరిజ్ని కొండొరిజ్ ప్రేమిస్తెజ్, అణసె ఆజి మండ్రెజ్, నెగ్గి మన్నుదాన్ మండ్రెజ్, ఇండ్రొణి పణిజ్ సుడఃజి, కనికారం తోరిసి మండ్రెజ్, మాసిరిజ్ లోజిదెజ్ ఇజి. బోదెక్ అయాలెకెండ మండ్రెజ్, ఎందానిజ్ ఇహిజ దేవుణు మాట ఎయెన్బా దూసిన్ఎండ మండ్రెజ్.

6 అయాలెకెండ, దక్షిణాద్ అణసె ఆజి మండ్రెజ్ వరిజ్ ఉసార్ కిబిన్ల.

7-8 నీను విజు వనకాజ్ లోణ నెగ్గెకెజ్ కిజి వరి ఎద్రు ఉండ్రీ గుర్తు లెకెండ తోరె ఆఅ. నీను నెన్పిసినివెలె, డొజ సాటు వెహె ఆవిండ, నీను వెహ్నిని మాటదు మొసం సిల్లెండ, పూర్తి నీను వరిజ్ నెన్పిన్ల. ఎందానిజ్ ఇహిజు, మజి పడెఃఇకార్ మా ముస్సు సెఇ మాటెజ్ వర్గిదెజ్ ఆవిండ, సిగు ఆజి మండ్రెజ్.

9-10 నీను వెటి పణి కినివరిజ్ నెన్పిన్ల, వారు విజు దని లోణ ఎజుమానిరిజ్ లోజిజి, వరిజ్ ఇస్టం ఆనివజ కిజి మండ్రెజ్ ఇజి. ఎజుమానిరిజ్ మర్జి వెహ్విండ, డొజ కివిండ మండ్రెజ్ ఇజి నెన్పిన్ల. వారు ఎజుమానిరిజ్, 'మజి పూర్తి నమ్మిదెజ్ ఆనాద్', ఇజి తోరెస్టెజ్. వెట్టిపణి కినికార్ అయాలెకెండ మండ్రెజ్. ఎందానిజ్ ఇహిజు, వారు కిని విజు దన్ని లోణ లోకుర్ నెస్టెజ్, మజి రక్కిసిని దేవుణు వందిజ్ మన్నిమాటెజ్ గొప్ప నెగ్గెకెజ్ ఇజి.

11 ముజాలె వెహ్విలెకెండ నమ్మిత్తి వరిజ్, నీను నెన్పిస్టెజ్. ఎందానిజ్ ఇహిజు, లోకురిజ్ విజెరిజ్ రక్కిసివందిజ్ దేవుణు, వన్ని దయాదర్మమదాన్ యేసుక్రీస్తుజ్ యా లోకమ్దు పోక్తాన్.

12 వాండ్రు మజి వన్ని దయా దర్మమదాన్ నెన్పినాన్, దేవుణుబాణిజ్ దూరం కిబిసిని విజు నజతిజు డిఃన్ల, ఇజి. యా లోకమ్ది లోకుర్ ఆస ఆజినికెజ్ డిఃన్ల', ఇజి నెస్పిసినినాన్. మరి, మాటు నెగ్గి బుద్ధిదాన్, నీతి నిజయ్తిదాన్, దేవుణుదిజ్ సర్ల సీనికెజ్ కిజి యా తరమ్దు మండ్రెజ్ ఇజి నెన్పిస్సాన్.

13 మాటు అయాలెకెండ మండ్రెజ్. ఎందానిజ్ ఇహిజు, మజి గొప్ప సర్ల కిబిస్సి ఉండ్రీ రోజువందిజ్ మాటు ఆసదాన్ ఎద్రు సుడఃజినాట్. ఇహిజు, మాటు మజి రక్కిసిని పెరి దేవుణు ఆతి యేసుక్రీస్తు వాజిని రోజు వందిజ్ ఆసదాన్ మజి కొత్తాజ్ పుటిస్తాండ్రె ఎద్రు సుడఃజినాట్. వాండ్రు గొప్ప జాయ్ కూడిఃతి మన్ని నండో సోకుదాన్ వానాన్.

14 మా విజు పాపమ్కాజ్ మజి డిఃన్పిస్టెజ్, సాదెజ్ వన్నిజ్ వాండ్రె ఒపజెపె ఆతాన్. మరి, మజి సుబరం కిజి, నెగ్గెకెజ్ కిదెజ్ పూర్తి ఒపజెపె ఆతి వన్ని సొంత లోకుర్ లెకెండ తయార్ కిదెజ్ వాండ్రె ఒపజెపె ఆతాన్.

15 నాను ఏలు వెహ్వికెజ్ విజు నమ్మితివరిజ్ పూర్తి అతికారమ్దాన్ నెస్పిన్ల. వారు అయాలెకెజ్ కిదెజ్ వరిజ్ పణిని వెహ్ల. అయాలెకెజ్ కిఇవరిజ్ దిదిల. నిజి ఎయెన్బా దుసలాడఃవిండ సుడఃల.

3

నెగ్గి పణిజ్ కినివందిజ్ వెహ్నినాన్

1 దేవుణుదిజ్ నమ్మితి లోకుర్ అతికారిజు లోజిదెజ్, వెహ్వి మాట వెంజి మండ్రెజ్, ఇని నెగ్గి పణిజ్ కిదెజ్బా తయారాజి మండ్రెజ్ ఇజి నీను వరిజ్ ఎత్తు కిబిసి మన్ల.

2 వారు, ఎయెరిజ్బా సెఇకెజ్ వెహ్విండ, జటిజ్ ఆవిండ, సార్లిదాన్ విజెరె వెట తగిజి మండ్రెజ్ ఇజి వరిజ్ వెహ్ని మన్ల.

3 ఎందానిజ్ ఇహిజు, మాటుబా ముజాలె నమ్మితి వరిలెకెండ, బుద్ధి సిల్లెండ మహాట్. మాటు ఎయెరిజ్బా లోజివిండ మహాట్. మొసెం కిబె ఆజి మహాట్. యా లోకమ్ది సెఇ ఆసెజ్ని సుకమ్కాజ్ నండో ఆస ఆజి మహాట్. పగదాన్, గోసదాన్ కాలం గడఃప్పి మహాట్. మహి వరిజ్ దూసలాడఃజి మహాట్. వారు మజి దూసలాడఃతార్.

4 గాని అయాలెకెండ్ మహివలెనె, మజీ రక్సిసిని దేవుణు వన్ని కనికారం తోరిస్తాండ్రె, ప్రేమ తోరిస్తాండ్రె మజీ రక్సిస్తాన్.

5 మాటు కిత్తి నీతి పణిజాణిజ్ ఆవద్. గాని వన్ని కనికారమ్దానె మజీ రక్సిస్తాన్. దేవుణు ఆత్మదాన్, వాండ్రు మా పాపమ్కు నొరజి మజీ కొత్తాజ్ పుటిస్తాండ్రె, ఉండ్రీ కొత్త బత్తు సిత్తాండ్రె మజీ రక్సిస్తాన్.

6-7 దేవుణు దయా దర్మమ్దాన్ మాటు నీతి నిజయ్లు మన్నికాట్ ఇజి వాండ్రు తీర్పు సితాన్. ఆహె, తీర్పు సిత్తిజ్ మాటు కోరిజిని ఎలాకాలం దేవుణు వెట బత్తిని బత్తుదిజ్ అక్కు మన్నికార్ అనివందిజ్ మా ముస్కు దేవుణు ఆత్మ నండొ పొక్తాన్. వాండ్రు మజీ రక్సిసిని యేసుక్రీస్తు వెటనె దేవుణు ఆత్మ నండొ పొక్తాన్.

8 యా మాట పూర్తి నమ్మిదెజ్ తగ్గుక. అందెజె దేవుణుదిజ్ నమ్మితి వరిజ్ అయాకెజ్ డటిసి నీను నెన్పిస్తాజ్ ఇజి నాను కోరిజిన. ఎందానిజ్ ఇహిజ, వారు మహి వరిజ్ వరి మస్కు పూర్తిదాన్ నెగ్గి పణిజ్ కిదెజె. ముస్కు వెప్తా మన్ని మాటెజ్ విజు విజెరిజ్ నెగ్గిజెనె, పణిదిజ్ వానికెజెనె.

9 గాని అర్దం సిల్లెండ తర్కిస్సికెజ్, అనిగొగొర్ వందిజ్ వెప్సినికెజ్, జటిజ్ ఆనికెజ్, యూదురి రూలుజ వందిజ్ వెప్సి గొడఃబ కినికెజ్ విజు, ఎందానిజ్ పణిదిజ్ రెకెజ్, విలువ సీలికెజ్. అందెజె వనక వందిజ్ దూరం మన్అ.

10 నమ్మిత్తి వరి సజమ్దు, నిజమాతి మాటెజ వెట కూడఃఇకెజ్ నెన్పిసి, వరిజ్ ఎర్లిసి కేట కిని వన్నిజ్ ఉండ్రీ రుండి సుట్టు బుద్ధి వెహెఅ. మరి, వాండ్రు వినవిండ మహిజ, వన్నిజ్ దూరం కిఅ.

11 నన్నికాన్ నిజమాతి సజతిజ్ సరి తప్పి పాపం కిజినాన్ ఇజి నిజి తెలినాద్. వన్ని పాపమ్కు వాండ్రు తప్పు కిజినాన్ ఇజి రుజుప్ కిజినె.

12 నాను పిన్ని కాలం నికొపొలితు గడఃప్తెజ్ ఇజి తిరుమానం కిత్త మన. అందెజె నాను అరైమానుజ్ ఇని వన్నిజ్నొ, తుకికుజ్నొ నీ డగ్గు పొక్కు. నస్తివలె నీను అబె నా డగ్గు వాదెజ్ సుడఃఅ.

13 జెనా ఇని లాయిరు, అపొలు, క్రేతు దేసం డిఃసి మరి సొండ్రెజ్ సుడఃజినార్. వరి పయ్నమ్దు ఇనికబా తక్కు సిల్లెండ వరిజ్ కావాలిన్తికెజ్ విజు సీజి నెగ్రెండ పోక్అ.

14 నమ్మితికార్ పణిదిజ్ రెక బత్తు బత్తిఎండ, పణిదిజ్ వానికెజ్ కిజి మండ్రెజ్. అందెజె, వారు వరి సమయం విజు అవ్నరం మన్ని వరిజ్ సాయం కిదెజ్ నెస్తెజ్వెలె.

15 నా వెట మనికార్ విజెరె నిజి వెన్బాతిలెకెండ్ వెప్సిని. మాటు నమ్మిజిని లెకెండ్ నమ్మిజి, మజీ ప్రేమిస్సివరిజ్ నాను వెన్బాతి లెకెండ్ వెహెఅ. దేవుణు దయా దర్మం మీరు విజిదెరె వెట మనీద్.

అపొస్తుడు ఆతి పవులు పిలెమొనుజ్ రాస్తి ఉత్తం

నెల్వ కిబిస్సిక

అపొస్తుడు ఆతి పవులు కొలోసి పట్నమ్దు మని పిలెమొను ఇని ఒరెన్ దేవుణుదిజ్ నమ్మిత్తి వన్నిజ్ రాస్తి ఉత్తమ్నె యాక. పిలెమొనుజ్ ఒనెసిము ఇని ఒరెన్ వెట్టివణి మనిసి మహాన్. ఒనెసిము పిలెమొనుజ్ డిస్తాండ్రె, ఉహ్ క్వి ఎంబెనొ సోహాన్. వాండ్రు సోహి మహివలె పవులుజ్ దసూల్ ఆతాన్. పవులు వన్నిజ్ నువార్త వెప్టాజ్, వాండ్రు యేసుక్రీస్తుజ్ నమ్మితాన్.

పవులు ఒనెసిముజ్ పిలెమొను డగ్రు మర్జి పోక్కినాన్. నీను, ఒనెసిముజ్ సెమిసి ఒరెన్ తంబెరి లెకెండ వన్నిజ్ డగ్రు కిఅ, ఎందనిజ్ ఇహిజు, వాండ్రు ఏలు దేవుణు వెట నమందం ఆతికాన్ ఇజి యా ఉత్తమ్దు రాసి ఒనెసిము వెట పోక్కినాన్.

1-2 క్రీస్తుయేసు వందిజ్ జెలిదు మన్ని పవులు ఇని నాను రాసిని ఉత్తం. మా వెట నువార్త పణి కిజిని మా సొంత కూలాయెన్ ఆతి పిలెమొనుజ్, మా తజీ లెకెండ మని ఆపియెజ్, మా వెట క్రీస్తు వందిజ్ సేవకిదెజ్ నండొ కన్జబడిజి కాట్లాడజిని అరకిపుజ్, మీ ఇండ్రొ కూడజి వాజిని దేవుణు సజమ్దిజ్ రాసిన. మా కూలాయెన్ ఆతి తిమోతిబా నా వెట మిజి వెన్బాతి లెకెండ వెస్సానాన్.

3 మా బుబ్బు ఆతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

దేవుణుదిజ్ వందనమ్కు

4-5 ఓ పిలెమొను, నాను నిజి ఒడిబిజి పార్లనం కినివలె, నా దేవుణుదిజ్ ఎస్తివలెబా వందనమ్కు వెహ్సాన్. ఎందనిజ్ ఇహిజు, లోకుర్ నజి వెహ్సానార్ నీను ప్రబు ఆతి యేసుజ్ నమ్మిజిని ఇజి. దేవుణుదిజ్ నమ్మిత్తి వరిజ్ విజెరిజ్ ప్రేమిస్సి ఇజి. దిని వందిజ్ నాను దేవుణుదిజ్ వందనమ్కు వెహ్సాన్.

6 క్రీస్తు వందిజ్ నీను నమ్మిత్తి సజతిజ్ మహివరిజ్ ఉసార్దాన్ వెహ్టాజ్ ఇజి నాను పార్లనం కిజిన. అయావలె దేవుణు మజి సీజిని విజు నెగ్గి ఇనాయమ్కు నీను పూర్తి నెస్తిలె. యేసు క్రీస్తు వెట మాటు కూడితి మనితానె దేవుణు అయా ఇనాయమ్కు మజి సీనాన్.

7 ఓ తంబెరి, దేవుణుదిజ్ నమ్మిత్తి వరిజ్ నీను ప్రేమిసి, వరి పాణమ్దిజ్ నిమాలం కిబిన్అ. ఆహె, నీను నజి నండొ సర్ద కిబిస్తిదె ఆదరిస్తి.

పవులు ఒనెసిము వందిజ్ బతిమాల్జినాన్.

8-10 అందెజె, క్రీస్తు నజి సితీ అతికారమ్దాన్ నీను కిదెజ్ మని పణి కిఅ ఇజి ఆడ్ర సీదెజ్ నజి అక్కు మనాద్. గాని నాను నిజి బతిమాల్జిన. ఎందనిజ్ ఇహిజు, నీను దేవుణుదిజ్ నమ్మిత్తి వరిజ్ ప్రేమిస్సికి ఇజి నాను నెసిన. డొక్ర ఆత, ఏలు క్రీస్తుజ్ సేవ కిని వందిజ్ జెలిదు మని పవులు ఇని నాను నిజి బతిమాల్జిన. నా మరిన్ లెకెండ మని ఒనెసిముజ్ సాయం కిని వందిజ్ నాను బతిమాల్జిన. నాను గిలుస్కాణిజ్ మహివలె వాండ్రు నా మరిన్ లెకెండ ఆతాన్. నానె వన్నిజ్ దేవుణు దరోట్ తత.

11 వాండ్రు* ముజాల, నిజి ఎందనిజ్ పణిదిజ్ రెఇకాన్. ఎందనిజ్ ఇహిజ, వాండ్రు నిజి డిఃస్త సాహాన్. గాని ఏలు నిజిని నజీ పణిదిజ్ వాతికాన్ ఆతాన్.

12 నజీ నండో ఇస్తం ఆతి వినిజ్ నీ డగ్రు మర్జి పోక్కిన.

13 సువార్త వెహ్నిని వందిజ్ నాను గొలుస్కాణిజ్ మనివలె, నజీ సాయం కిదెజ్ వినిజ్ నా డగ్రు ఇడోదెజ్ నజీ ఇస్తం మనాద్. ఎందనిజ్ ఇహిజ, విన్ని సాయం నీను కితి లెకెండో ఆదెజ్.

14 గాని నీను వెహ్ఎండ నాను వినిజ్ ఇబ్బె ఇడోఎ. ఎందనిజ్ ఇహిజ, నా వందిజ్ నీను కిని ఇని మేలుబా నాను డటిసి వెహ్హిజ్ ఇజి ఆమాట్. గాని నిజి ఇస్తం ఆతివజ, పూర్తి మన్నుదాన్ కిదెజ్.

15-16 వాండ్రు మర్జి వానిక నీ డగ్రు ఎలాకాలం మంజిని వందిజ్ నెను. వాండ్రు సెగం కాలం దూరం ఆత మహాన్. అందెజె ఏలుదాన్ వాండ్రు నీ వెట్టిపణి కిని వన్నిలెకెండో ఆఎన్. దన్నిజ్ ఇంక నండో ఇస్తం మని ఒరెన్ తంబెరి లెకెండో మనాన్. నజీ వన్ని మున్కు ఒరెన్ తంబెరి లెకెండో నండో ఇస్తం మనాద్. గాని వన్నిజ్ నిజి ఒదె ఇస్తం మంజినాద్లె. ఒరెన్ వెట్టిపణి కిని వన్ని వజ ఇస్తం మంజినాద్లె. యేసుప్రబు వెట కూడితి మని దనితాన్ ఒరెన్ తంబెరి వజబా ఇస్తం మంజినాద్లె.

17 అందెజె క్రీస్తు వందిజ్ నీ వెట జత కూడోజి పణికినికాన్ ఒరెన్ ఇజి, నజీ ఒడోబితిజ, నీను నజీ ఎలాగ డగ్రు కినిదో, అయా లెకెండో వన్నిజ్ డగ్రు కితి.

18 వాండ్రు నిజి ఇని తపు కితిజనో, నిజి అప్పు మర్జి సీదెజ్ మహిజనో, అయాక నా మున్కు మోప్ అ.

19 పవులు ఇని నాను నా సొంత కీదాజె రాసిన. నీను దేవుణు దరోట్ వాదెజ్ నానె సాయం కిత. అందెజె నీ కొత్త బత్తు వందిజ్, నజీ నీ బత్తునె సీదెజ్ మనాద్. గాని నాను అయాక లోన్ ఎ. వాండ్రు సీదెజ్ మనికెజ్ నాను తిరిస్త.

20 ఓఓ తంబెరి, యేసుప్రబు వెట మజి మని సమందమ్ దాన్, నీ బాణిజ్ నాను యా సాయం కోరిజిన. యేసుప్రబు వెట కూడితి మని దనితాన్ వన్నిజ్ డగ్రు కిజి నజీ సర్దడ్ కిబిన్ అ.

21 నాను వెహ్హికెజ్ నీను తవ్ ఎండ కిని ఇజి నాను నెసిన. అందెజె నాను నిజి రాసిన. ఒబ, నాను వెహ్హి దని మున్కు నీను నండో కినిలె ఇజి నాను నెసిన.

22 జెలిదాన్ నజీ డిఃస్ని వందిజ్ మీరు పార్లనం కిజినిదెర్. మీ పార్లనం దేవుణు వెంజి, మీ డగ్రు మర్జి వాదెజ్, దేవుణు సాయం కినాన్ ఇజి నాను కోరిజిన. అందెజె నా వందిజ్ ఉండ్రీ బాడ్డిః తయార్ కితి.

23 యేసు క్రీస్తుజ్ వెహ్నిని వందిజ్ నా వెట జెలిదు మని ఎవప్ర నిజి వెన్ బాతి లెకెండో వెహ్హినాన్.

24 అయాలెకెండో, నా వెట సేవ పణి కిజిని మార్కు, అరిస్తార్కు, దెమ, లూక ఇనికార్ బా నిజి వెన్ బాతి లెకెండో వెహ్హినార్.

25 ప్రబు ఆతి యేసుక్రీస్తు దయా దర్మం మిజితోడు మనీద్.

* 1:11 1:11 ఒనెసిము ఇని పేరుదిజ్ అర్దం పణిదిజ్ వానికాన్ ఇజి.

ఎబ్రి లోకురిజ్ రాస్తి ఉత్తమదిజ్ నెల్వ కిబిసినిక

ఇస్రాయేలు లోకుర్ అయ్గుప్తు దేసమ్దు వెటిపణి కిజి మహర్. వారు నండొ బాదెజ్ ఆజి మహర్. దేవుణు ఇస్రాయేలు లోకురిజ్ అయ్గుప్తు దెసమ్దాన్ డిసేపిసి, కానాను దేసమ్దు ఒత్తెజ్ ఇజి, మోసె వరిజ్ నడిపిసి తత్తాన్. కానాను దేసమ్నె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయనం కిజి మహి వలె, మోసె వెట దేవుణు వరిజ్ పది ఆడ్రెజ్ సీజినాన్. దన్ని వెట దేవుణు వెప్పినాన్, “నాను వరి నడిఃమి మండ్రెజ్ ఇజి నా వందిజ్ నెగ్గి ఇల్లు లెకెండ్ మంజిని ఉండ్రీ గుడారం తొహ్తాజ్”, ఇజి (నిర్గమ 25:8). యాక ఎలాగ తొహ్తాజ్ ఇజి గుర్తులెకెండ్ ఉండ్రీ రూపు దేవుణు మోసెజ్ తోరిసినాన్. “నాను మిజి నుడఃజి, మీ వెట అబ్బె వర్గిన”, ఇజి దేవుణు వెహ్తాన్ (నిర్గమ 29:42). అందెజె, దేవుణు మంజిని ఉండ్రీ బాడ్డినె గుడారం. దేవుణు మంజిని బాడ్డిదిజ్ పోలిత మనాద్ యా గుడారం (ఎబ్రి 9:11).

పుజేరిజు - యూదురి మతమ్దు, లేవి తెగాదు మన్ని వరిజె, పుజేరిజు ఇజి ఏర్పాటు కినార్. మహి తెగాదికార్ విరిజ్ వరి దసమ్బాగం సీదెజ్. పుజేరిజు ఆవిండ, పెరి పుజేరిజు ఇజి, విజేరె పుజేరిజ మున్కు మన్ని పెరి పుజేరిజు ఇజి నండొండార్బా మహర్. ఉండ్రీ కాలమ్దు విజేరె పుజేరిజ మున్కు మన్ని పెరి పుజేరి ఇజి దేవుణు తోలిత ఏర్పాటు కిత్తాన్*. పుజేరిజు దేవుణుదిజ్ ఒద్దె కెట ఆతి గదిదు డుఃగజ సేవ కిత్తార్. గాని విజేరె పుజేరిజ మున్కు మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుఃగజ సేవ కిత్తాన్. ఏలు యేసు మా వందిజ్ విజేరె పుజేరిజ మున్కు మన్ని పెరి పుజేరి వజ వాత మనాన్.

గుడారం - దేవుణు మోసెజ్ తోరిస్తి రూపు వజ తయార్ కిత్తి ఉండ్రీ టంబు గుడుఃసని దన్నిలోఇ మన్ని వనక వందిజ్నె గుడారం ఇనార్. ఇబ్బెనె దేవుణు వన్ని లోకుర్ వెట వర్గినాన్. టంబు గుడుఃసదిజ్ రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కెట ఆతి గది ఇజి రుండి మన్నె. యా రుండి గదిజ్బా దేవుణు వందిజ్ కేట ఆతి ఇట్టికెజె. ఉండ్రీ తెరనె యా రుండి గదిజ కేట కేట కిత్తాద్. తెర, సీరి దుపాటి లెకెండ్ మనాద్. రుండి గదిజ నడిఃమి డొయె ఆత మనాద్. అయాక నండొ దలం మన్నుక, నండొ సోకుదాన్ అట మనార్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ సీరిండ్, 15 మూరెజ్ ఒసార్ మహద్. దిన్ని లోఇ దేవుణు ఎద్రు రొటెజ్ ఇడ్డి బల్ల ఉండ్రీ కల్లితి సిల్లి బజారమ్దాన్ తయార్ కిత్తి దీవెజ్ డండి ఉండ్రీ, దేవుణుదిజ్ దూపం సురుని మాలి పెటె ఉండ్రీ, మన్నె.

1 దేవుణు ఎద్రు రొటెజ్ ఇడ్డి బల్ల

దేవుణుదిజ్ కేట ఆతి గదిది ఉణెర్ పడఃకాదు యా బల్ల మంజినాద్. యాక తుంబ మరాతి నెక్కెజాణిజ్ తయార్ కితిక. దిన్ని మున్కు కల్లిసిల్లి బజారమ్దాన్ పూత రాస్త మనాద్. దేవుణు ఎద్రు ఇడ్డి రొటెజ్ ఎస్తివలెబ దిన్ని మున్కు మంజినె. యూదురి ఆసారం వజ యా రొటెజ్ ఉండ్రీ పలెమ్దు, రుండి వర్సెజ్ ఆరు దొత్తిజ్ మంజినె. విస్త్రాంతి దినమ్దునె యాకెజ్ మారిసి మరి కొత్తకెజ్ ఇడ్సార్. అయా పడాయి రొటెజ్

* 0: 1:0 ఎబ్రి 5:4

పుజెరిబునె తిండ్రెజ్. మరి ఎయెర్బా తిండ్రెజ్ ఆవిద్. లేవి తెగాదు మన్నికారె, యా రొటెజ్ తయార్ కినార్. విస్త్రాంతి దినమ్దిజ్ ముజాల మన్ని రెయునె తయార్ కినార్.†

2 కల్తి సిల్లి బజారమ్దాన్ తయార్ కిత్తి దీవ డండిజ్

యా డండిజ్ కల్తి సిల్లి బజారమ్దాన్ తయార్ కిత్తిక్కాదె. దేవుణు వందిజ్ కేట ఆతి గదిది డేబ్ర పడఃకాద్ మంజినాద్. యా కంతుదు ఏడు దీవెజ్ మంజినె. దిన్ని ముజాల మన్ని బాడ్డిదు జాయ్ మండ్రెజ్నె యాక మంజినాద్. ఒరెన్ పుజేరి పెందల్కని పొదొయ్క కసిసి మంజినాన్.‡

3 దూపం సుర్ని మాలి పెటె

యాక, నడిమి డెర డగ్గు మంజినాద్. దిన్ని ముస్సు దూపమ్నె ఆవిండ మరి ఇనికబా కూలిజ్నో, జంతుజ్నో పార పొట్టిజ్నో సుర్దెజ్ ఆవిద్. పెందల్కని పొదొయ్క దూపం సుర్నార్. గాని యాక దేవుణు వందిజ్ ఒద్దె కేట ఆతి గదిదు మన్ని ఉండ్రీ వస్తు. అందెజె, దేవుణు వందిజ్ ఒద్దె కేట ఆతి గద్దిదు మంజినక ఇజ ఒడఃబిజినార్.§

దేవుణు వందిజ్ ఒద్దె కేట ఆతి గది - దేవుణు వందిజ్ ఒద్దె కేట ఆతి గది నీరిండ, ఒసార్ ఉండ్రె సమానమ్నె. 15 మూరెజ్ మన్నె. దిన్ని లోఇ మందసం మనాద్. మందసం ఇహిజ ఉండ్రీ పెటె. యాక దేవుణు మనాన్ ఇజి ఉండ్రీ గుర్తు లెకెండ మనాద్. దేవుణుదిజ్ కేట ఆతి గదిదిజ్ని ఒద్దె కేట ఆతి గదిదిజ్ నడిమి ఉండ్రీ డెర అడ్డు మనాద్. యా డెర నండో దలం మన్నిక. నండో కరీదిక. దన్ని ముస్సు నండో సోకుదాన్ అటార్. దేవుణు వందిజ్ ఒద్దె కేట ఆతి గదిదు విజేరి పుజేరిజ ముస్సు పెరి పుజేరి ఒరెండ్రె సొనాన్. మరి ఎయెన్బ సొన్ఎన్. వాండ్రుబా ఏంటుదిజ్ ఒర్చునె, సొనాన్. లోకురి విజెరె పాపమ్క వందిజ్ పూజ సిదెజ్ ఉండ్రీ రోజు మనాద్. నాండిజె డేర పెర్జె, లోఇ సొనాన్.*

యేసు మా వందిజ్ విజెరె పుజేరిజ ముస్సు మన్ని పెరి పుజేరి ఆత మనాన్. వాండ్రు సిలువాదు సాతిజ్, పాపమ్క వందిజ్ ఎలాకాలం వందిజ్ ఉండ్రీ సుట్టు పూజ లెకెండ వన్నిజ్ వాండ్రె ఒపజెవె ఆతాన్.† యేసు సిలువాదు సాతి గడియాదు దేవుణు గుడిడు దేవుణు వందిజ్ కేట ఆతి గదిదిజ్ని దేవుణు వందిజ్ ఒద్దె కేట ఆతి గదిదిజ్ నడిమి మహి డేర, ముస్సుహాన్ అడిగిదాక రుండి బదెజ్ ఆజి కింజితాద్.‡ ముజాల డేర పెర్జె విజేరి పుజేరిజ ముస్సు మన్ని పెరి పుజేరి ఒరెండ్రె దేవుణు వెట వర్గిదెజ్ లోఇ డుగ్గనాన్. గాని క్రిస్తు సాతిజ్, వన్ని ముస్సు నమకం ఇడ్డి ఎయెన్బా దేవుణు డగ్గు సాండ్రెజ్ అట్టాన్. మరి పూజదిజ్ అవ్సరమ్బా సిల్లెద్.

మందసం - మందసం ఉండ్రె దేవుణు వందిజ్ కేట ఆతి గదిదు మన్ని వస్తు. మందసం ఇహిజ ఉండ్రె పెటెనె. యాక తుంబ మరాతి నెక్కెజాణిజ్ తయార్ కిజి దిన్ని ముస్సుని లోఇ కల్తి సిల్లి బజారమ్దాన్ పూత రాసె ఆతమనాద్. దిన్ని ముస్సు ఉండ్రీ మూత మనాద్. అయాకబా కల్తి సిల్లి బజారమ్దాన్ పూత రాసె ఆత మనాద్. అయాక మూత నెక్కి ముద కిదెజ్ ఆనాద్. లాగిజ సాపైజబా ఆనాద్.§ యా మూతదిజ్ “కరుణ పీటం” ఇనార్.* కరుణ పీటం ఇహిజ, పాపమ్కు నెమిన్ని బాడ్డి ఇజి అర్థం. కరుణ పీటం ముస్సు కెరూబుజ్ మన్నె. కెరూబుజ్ లోకు మూర్తి

† 0: 1:0 లేవి 24:5-9 ‡ 0: 1:0 నిర్గమ 26:35 § 0: 1:0 ఏబ్రి 9:4, 1రాజు 6:22 * 0: 1:0 ఏబ్రి 9:27 † 0: 1:0 ఏబ్రి 7:27 ‡ 0: 1:0 మత్తయి 27:51 § 0: 1:0 నిర్గమ 25:10-15 * 0: 1:0 నిర్గమ 25:7

వజనె మన్నె గాని రెక్కెజ్ మన్నె. యా కెరుబుజ్ ఇతాన్ ఉండ్రె ఆతాన్ ఉండ్రె ఎద్దు నిల్చి, కరుణ పీటమ్దునె బేసి రెక్కెజ్ కోరిస్తె మన్నె.† కెరుబుజు నడిఃమి మొసాప్ మనాద్. కరుణా పీటం ముస్సు యా మొసాప్దు దేవుణు మంజినాన్. పరిసుద్దమాతి దేవుణు యా లెకెండ బాన్ మంజినాన్. అందెజె ఇని సెఇకాన్నో తప్పు కిత్తికాన్నో బాన్ కరుణ పీటం డగ్గు సొండ్రెజ్ అట్వన్. గాని దేవుణు ఏర్పాటు కిత్తి విజేరె పుజేరిజ ముస్సు మన్ని పెరి పుజేరి ఒరెండ్రె సొండ్రెజ్ అట్వాన్. వాండ్రుబా వన్ని సొంత ఇస్లమ్దాన్నో, పూజ కిత్తి దన్ని నల సిల్లెండ్రె సొండ్రెజ్ ఆవద్. యా లెకెండ సిల్లెండ్రె సొహిజు వాండ్రు నిజం సానాన్.

మందనమ్దు మన్నికెజ్ - మందనమ్దు దేవుణు మొసెజ్ సిత్తి పది ఆడ్రెజ్ రాస్తి మన్ని రుండి పల్కెజ్ మన్నె. కల్తెసిల్లి బజారమ్దాన్ తయార్ కిత్తి జగ్గుదు మన్నా మనాద్. మరి, సిగిరిస్తెమన్ని, అహరోసు డుడ్డుబా మనాద్.

మన్నా ఇహిజ తెలాని గింజు లెకెండ మనాద్. తేనె నూనె లెకెండ రుసి మంజినాద్. దేవుణు ఇస్రాయేలు లోకురిజ్ బిడిఃమ్ బూమిదు నడిఃపిని మహివలె వరిజ్ తిండ్రెజ్ యాక సిత్తాన్.‡

పది ఆడ్రెజ్ రాస్తి ఇడ్డి పల్కెజ్ - యా పల్కెజ్ పణకాణిజ్ తయార్ కిత్తికెజె. నన్ని పల్కెజు ఆడ్రెజ్ గిస్త మనాద్.§

డేవ - డేవ నడిఃమి టుంబు గుడుఃస మనాద్. డేవ సుటులం వెల్గ్రు మనాద్. దిన్నిజ్ ఉండ్రె సరి మానాద్. డేవదు సంత సుర్ని మాలి పీటని నొరబాదెజ్ ఏరు ఇడ్డి పలెం మన్నె.

సంత సుర్ని మాలి పీట - యాక తుంబ మరాతి సెక్కెజాణిజ్ తయార్ కిత్తిక. దిన్ని ముస్సు కంసు పూత రాస్త మనాద్. ఇబ్బెనె సంద సుర్ని పూజ కినార్. యా పీటదు సిసు ఎస్తివలెబా నమ్బివండ కసీనె మండ్రెజ్, యా మాలి పీట సరి డగ్గు మంజినాద్.

నొరబాదెజ్ ఏరు ఇడ్డి పలెం - యా పల్లెం సంద సుర్ని మాలి పీటని, గుడారం నడిఃమి మంజినాద్. యాకబా కంసుదాన్ తయార్ కిత్తిక. పుజేరిజు పూజ కిని ముజుల్నో, గుడారమ్ లొఇ సొని ముజుల్నో నొరబాదెజ్ ఏరు ఇడ్డికాదె యాక.

ఏబ్రి లోకురిజ్ రాస్తి ఉత్తం

నెల్గు కిబిసినిక

ఏబ్రి లోకురిజ్ రాసిని ఉత్తమనె యాక. ఏబ్రి లోకుర్ ఇహిజ, క్రీస్తు ముస్సు నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివద్. యేసు ప్రబునె, దూతారిజ్ ఇంక మోసెజ్ ఇంక, మోసె సీతి రూలు వజ పుజెరి పణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్దు వెప్పినాద్. పూజెజ్ లోకురి పాపమ్కు సొన్పిన్ఉ. గాని యేసు ప్రబు పూజ ఆతి దన్నితాన్నె లోకురి పాపమ్కు సొనె. వన్ని నలదాన్నె, లోకుర్ సుబ్బరం ఆనార్. దేవుణు డగ్గు దయరమ్దాన్ మండ్రెజ్ అట్వార్. అయాలెకెండ్రె, కొత్త ఒప్పమానం నడిఃపిస్సికాండ్రె యేసు ఇజి వెప్పినాద్. మరి దేవుణు ముస్సు నమకం ఇట్టి పూర్బమ్దు బత్తిజి మహి నండొండార్ వరిజ్ వెప్పినార్. కండెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్దు వెప్పినాద్.

1 పూర్బమ్దు, ఆఇ ఆఇ నండొ సమయమ్దు, నండొ రకమ్కాణిజ్, దేవుణు ప్రవక్తరు వెట మా అనిగొగొరిజ్ వర్గితాన్.

† 0: 1:0 నిర్గమ 25:18-22 ‡ 0: 1:0 నిర్గమ 16:14-31 § 0: 1:0 నిర్గమ 31:18

2 గాని యా కడఁవెరి దినమ్కాజ్, వాండ్రు వన్ని మరిన్ వెట మజి వర్గితాన్. వన్ని వెటనె బూలోకమ్ని దని లోఇ మనికెజ్ విజు దేవుణు తయార కిత్తాన్. వన్నిజె, విజు దనిజ్ అక్కు మనికాన్ ఇజి ఏర్పాటు కిత్తాన్.

3 దేవుణు గొప్ప పెరికాన్ ఇజి తోరిస్సికాండ్రె మర్రిన్. వన్ని లెకెండె వీండ్రు మనాన్. గొప్ప సత్తు మని వన్ని మాటదాన్, బూలోకమ్దు మని విజు వన్కాజ్ వీండ్రు నడిఁపెసినాన్. లోకురి పాపమ్కు నోదెజ్ వాండ్రు సాతి వెనుక, గొప్ప పెరి దేవుణు ఉణెర్ పడఁకాదు అతికారమ్దు బస్తాన్.

4 అందెజె, వాండ్రు దూతార్ ముస్సు గొప్ప పెరికాన్ ఆతాన్. దూతార్ పేర్కు ముస్సు దేవుణు వన్నిజ్ నీతి పేరు గొప్ప పెరిక మని లెకెండె, వాండ్రు పెరికాన్ ఆతాన్.

5 ఎందనిజ్ ఇహిజ, దేవుణు యేసుప్రబుజ్నె ఆవిండ, వన్ని దూతారిజ్ ఎయెరిజ్బా ఎసెజ్బా వెహ్ఎతాన్, “నీను నా మర్రిన్. నేండ్రు నానె నీ బుబ్బు ఆత మన”,* ఇజి. మరి, దేవుణు దూతారిజ్ ఎయెరిజ్బా ఎసెజ్బా వెహ్ఎతాన్”, నానె వన్ని బుబ్బు ఆన. వాండ్రె నా మరిన్ ఆనాన్లె”,* ఇజి.

6 మరి, దేవుణు వన్ని లోల్సర కొడెడిజ్ యా లోకమ్దు తపిసిని వలె, వెహ్సినాన్, “దేవుణు దూతార్ విజెరె వన్నిజ్ పొగిడిఁజి మాడిఁసెజ్వలె”,* ఇజి.

7 దూతార్ వందెజ్ వెహ్సినవలె, వాండ్రు ఈహు వెహ్సినాన్, “గాలి లెకెండె వన్ని దూతారిజ్ తయార కిజినాన్, కనిస్సి నీను లెకెండె, వన్ని పణి మణిసిరిజ్ తయార కిజినాన్”,* ఇజి.

8 గాని వన్ని మరిన్ వందిజ్ ఈహు వెహ్సినాన్, “ఓ దేవుణు, నీను బన్ని సిమాసనం అంతు సిల్లెండె ఎల్లాకలం మంజినాద్. నీను నీతి నిజాయితిదాన్ రాజు వజి ఏలుబడిఁ కిన్సి.

9 నీను నిజమాతి దనిజ్ ప్రేమిస్తి మని. నెఇ దనిజ్ దూసిస్తి మని. అందెజె, నీ దేవుణు ఆతి దేవుణు నిజి ఎర్రిసి సర్ద ఆని గొప్ప గనం సితాన్. యాక నీ జత మని వరిజ్ నీతి దన్నిజ్ ఇంక నండొ గొప్ప పెరిక”,* ఇజి, దేవుణు మరిన్ వందిజ్ వెహ్సినాన్.

10 వాండ్రు మరి వెహ్సినాన్, “ఓ ప్రబువా, లోకం పుటిన్ఎండ ముజాలె, యా లోకమ్దిజ్ పునాది ఇడ్డికి నీనె. ఆగాసం తయార కితికి నీనె.

11 అయాకెజ్ విజు నాసనం ఆనె. గాని నీను మంజిని. పాత పణిదిజ్ రెఎండ పడాఁయింక ఆనిలెకెండె అయాకెజ్ విజు పణిదిజ్ రెఎండ పడాఁయింకెజ్ ఆనె.

12 పంసె మడఁత కినిలెకెండె, నీను వన్కాజ్ మడఁత కిని. పాత మారిసిని లెకెండె, వన్కాజ్ మారిసిని. గాని నీను ఎలాకాలం ఉండ్రె లెకెండె మంజిని. నీను ఎసెజ్బా డొక్ర ఆఇ”,* ఇజి.

13 దేవుణు వన్ని దూతార్ ఎయెరిజ్బా ఎసెజ్బా వెహ్ఎతాన్, “నాను నీ పగాతి వరిజ్ నీ పాదమ్క అడిఁగి ఇడ్డిదాక, నీను నా ఉణెర్ పడఁకాద్ మసి మన్అ”,* ఇజి.

14 అహిజ, దూతార్ ఎయెర్? వారు విజెరె దేవుణుదిజ్ సేవ కిని ఆత్మెజ్నె. దేవుణు రక్కిసిని వరిజ్ సాయం కిదెజ్, వాండ్రు పొక్కికారె.

2

యేసు రక్కిస్నాన్ ఇని నిజమాతి పెరి నజతి నెక్కిపొక్ఎండ జాగర్తు వెండ్రెజ్.

* 1:5 1:5 క్రిస్వ 2:7. * 1:5 1:5 1సము 7:14; 1దినరు 17:13. * 1:6 1:6 ద్వైత్తి 32:43. * 1:7 1:7 క్రిస్వ 104:4. * 1:9 1:9 క్రిస్వ 45:6,7. * 1:12 1:12 క్రిస్వ 102:25-27. * 1:13 1:13 క్రిస్వ 110:1.

1 అందెజె మాటు వెహిమని నిజమాతి సజతిజ్, మరి నండొ జాగర్తదాన్ వెండ్రెజ్ వలె. ఎందనిజ్ ఇహిజ, దని బాణిజ్ దూరం ఆవండ మంజిని వందిజె.

2 దేవుణు దూతారిజ్ వాండ్రు వెహిపిన్తి మాటెజ్, నిజం ఇజి రుజుప్ ఆత మనాద్. అయా మాటెజ్ తప్పికాన్, లోజిఇకాన్ ఎయెన్ ఆతిజ్బా, తగితి సిక్కు వన్నిజ్ దోహ్క మనాద్.

3 అహిజ, దేవుణు లోకురిజ్ సిక్కుదాన్ ఎలాగ గెల్పెన్జె ఇజి వెహిని ముకెలమాతి బోద మాటు నమ్మిదెజ్ కెఇతిజ, అయా సిక్కుదాన్ ఎలాగ తపై ఆదెజ్ అట్వాట్? గెల్పెన్సి వందిజ్ మని యా బోద ప్రబునె తొలిత వెహ్తాన్. వాండ్రు వెహ్తాకెజ్ వెహికార్, అయాక నిజం ఇజి మజి రుజుప్ కిత్తార్.

4 మరి, దేవుణుబా విజు రకమ్కాణి సత్తుమని పణిజ్, గొప్ప బమ్మాని పణిజ్ కిజి రక్కుణ వందిజ్ వెహ్తాక నిజం ఇజి రుజుప్ కిత్తాన్. వన్నిజ్ ఇష్టం ఆతివజ, దేవుణు ఆత్మెజ్ సీబాజి సీజి దేవుణు రుజుప్ కిత్తాన్.

యేసుప్రబునె లోకురిజ్ రక్కిన్సికాన్.

5 వాజిని కాలమ్ది లోకం ఏలుబడిః కిదెజ్ దేవుణు, దూతారిజ్ ఒపజెవ్ఎతాన్. పరలోకం వందిజె మాటు వర్గిజనాట్.

6 గాని దేవుణు మాటదు ఎంబెనొ ఎయెండ్రొ డటిసి ఈహు వెహ్సినాన్, “ఓ దేవుణు, నీను ఎత్తు కిదెజ్ లోకు ఏపటిదికాన్? నీను బాగ సుడెదెజ్ లోకు ఏపటిదికాన్?”

7 నీను దూతారిజ్ ఇంక వన్నిజ్ సణెం ఇజ్రికాన్ కితి. నీను వన్నిజ్ పెరికాన్ కితి. గవ్ రవమ్దిజ్ తగ్గికాన్ లెకెండ కితి.

8 విజు వన్నాజ్ మున్సు వన్నిజ్ అతికారం సితి* ✱. లోకురిజ్ విజు వన్నాజ్ మున్సు దేవుణు అతికారం సితి”, ఇజి వెహ్సినాన్. ఇహిజ, విజు వన్నాజ్ మున్సు అతికారం వన్నిజ్ మనాద్. గాని ఏలు, లోకుర్ విజు వన్నాజ్ మున్సు అతికారం కిజినిక తొవెట్.

9 గాని ఏలు, యేసుజ్ గొప్ప గనమ్దాన్, గొప్ప గవ్ రవమ్దాన్ దేవుణు పెరికాన్ కితిక మాటు సుడెజినాట్. ఎందనిజ్ ఇహిజ, వాండ్రు నండొ బాదెజ్ ఓరిసి సాతాన్. వన్నిజ్ దూతారిజ్ ఇంక సణెం దేవుణు ఇజ్రికాన్ కిత్తాన్. ఎందనిజ్ ఇహిజ, వాండ్రు యా లెకెండ లోకుర్ విజెరె వందిజ్ సాదెజ్. యా లెకెండ, దేవుణు దయా దర్మం కిత్తాన్.

10 విజు, దేవుణు తయార్ కిత్తాన్. విజు వన్నివందిజె తయార్ కిత్తాన్. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి అతికాన్ ఆతాన్. అయ లెకెండ యేసుజ్ పూర్తి కిజినిక తగ్గికాదె. ఎందనిజ్ ఇహిజ, నండొ కొడెరిజ్ వాండ్రు ఎలాకాలం దేవుణు వెట బత్కిని బత్కుదు నడిపెన్జెజ్. యేసునె వరిజ్ రక్కుణదు నడిపెన్సికాన్.

11 వాండ్రె లోకురిజ్ దేవుణు వందిజ్ కేట ఆతి వరి లెకెండ కిజినాన్. వన్నిజ్ని వాండ్రు దేవుణు వందిజ్ కేట కిత్తి లోకురిజ్, బుబ్బు ఒరెండ్రె. అందెజె వరిజ్ తంబెరిజు ఇజి కూకెజ్ యేసు సిగు ఆవన్.

12 వాండ్రు దేవుణుదిజ్ వెహ్సినాన్, “నీ వందిజ్ నాను నా తంబెరిజ వెహ్సా, నీ లోకుర్ కూడెనిబాన్, నాను నిజి పొగిడిన” ✱ ఇజి.

13 మరి వాండ్రు వెహ్సినాన్, “నాను వన్ని మున్సు నా నమకం ఇడ్డు” ✱ ఇజి. మరి బా వెహ్సినాన్, “ఇదిలో, నానుని దేవుణు నజి సితి కొడెరి” ✱ ఇజి.

✱ 2:8 2:8 కీర్తన 8:4-6. ✱ 2:12 2:12 కీర్తన 22:22. ✱ 2:13 2:13 యెసయ 8:17. ✱ 2:13 2:13 యెసయ 8:18.

14 దేవుణు కొణ్డోర్ నలని, కండదాన్ తయార్ ఆతి లోకుర్నె. అందెజె యేసుప్రబుబా నలని, కండదాన్ తయార్ ఆతి లోకు వజ ఆతాన్. ఎందనిజ్ లోకు ఆతాన్ ఇహిజ, ఒరెన్ లోకు వజనె సాదెజ్ అట్నాన్. వాండ్రు సాజినె, సాపు మున్సు అతికారం మని సయ్తానుజ్ సిల్లెండ కిదెజ్ అట్నాన్.

15 అయా లెకెండ, సాపుదిజ్ తియెల్ ఆజి, వరి బత్కు విజు సాపు తియెల్దిజ్ అడిఃగి మని విజెరిజ్ డిఃన్పిస్సెజ్ అట్నాన్.

16 నిజమె, వాండ్రు దూతారిజ్ సాయం కిఎన్. గాని అబ్రాహము* తెగ్గాది వరిజ్ సాయం కిజినాన్.

17 దిన్ని వందిజ్, వాండ్రు ఎల్లగాతిజ్బా వన్ని తంబెరిజు లెకెండ ఆదెజ్వలె. ఎందనిజ్ ఇహిజ, వాండ్రు నండో కనికారం మని, నమ్మిదెజ్ తగ్గి పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పాపమక వందిజ్ పూజ కిదెజ్.

18 వాండ్రె పరిసెజ్ కిబె ఆజి, బాదెజ్ ఆతాన్. అందెజె పరిసెజ్ కిబె ఆని వరిజ్ సాయం కిదెజ్ అట్నాన్.

3

యేసు మోసె మున్సు పెరికాన్.

1 అందెజె దేవుణు వందిజ్ కేట ఆతి, దేవుణు కూకె ఆతి తంబెరిజాండె, యేసుప్రబుజ్ ఎత్తు కిదు. వాండ్రె, దేవుణు పోక్తి అపొస్తుడుః ఇజి, విజెరె పుజెరిజు మున్సు పెరి పుజెరి ఇజి, మాటు నమ్మిజి ఒపుకొడిఃజనాట్.

2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండ, వీండ్రుబా వన్నిజ్ పణి ఒపజెప్పి దేవుణుదిజ్ నమ్మకమ్దాన్ సేవ కిత్తాన్.

3 ఉండ్రె ఇల్లుదిజ్ ఇంక ఇల్లు తొహిస్తి వన్నిజె గొప్ప గనం వానాద్. అయాలెకెండ, మోసె ఇంక యేసునె గొప్ప గనమ్దిజ్ తగ్గికాన్.

4 నిజమె, విజు ఇల్కుబా, ఎయెండ్రె ఒరెన్ తొహ్నాన్. గాని విజు తొహ్పికాన్ దేవుణునె.

5 దేవుణు కుటుమ్ది వరిజ్ విజెరిజ్, ఒరెన్ సేవమపణిమణిసి వజ మోసె నమ్మిదెజ్ తగ్గికాన్ ఆతాన్. వాని కాలమ్దు దేవుణు వెహైజ్ మనికెజ్ వాండ్రు వెహ్నాన్.

6 గాని దేవుణు కుటుమ్ది వరి మున్సు అతికారం మని మరిన్ వజ, క్రీస్తు నమ్మిదెజ్ తగ్గికాన్. మాటు దయ్ఠమ్దానె నిల్చి, మాటు ఎద్దు సుడఃజిని ఆసదిజ్ డిఃన్ఎండ గటిజ ఆసినె మహిజ, మాటు వన్ని కుటుమ్దికాట్.

నమ్మిఇతి వందిజ్ సారిసి సారిసి వెహ్పినిక.

7-8 అందెజె, దేవుణు ఆత్మ ఈహు వెహ్పిని లెకెండ, “నేండ్రు మీరు దేవుణు వెహ్పినిక వెహిజ, అయా దినమ్దు బీడిఃమ్ బూమిదు దేవుణుదిజ్ లోజెదెజ్ కెఇత్తి వలె, వన్నిజ్ వరిన కితివలె, మీ మన్సుజ్ గర్ర ఆతి లెకెండ గర్ర కిమాట్.

9 అబె, నాల్పయి పంటజ్ నాను కితి గొప్ప బమ్మ ఆతి పణిజ్ సుడఃతిజ్బా, మీ అనిగొగొర్ నజి పరిన కిజి నజి లోజెదెజ్ కెవతార్.

10 అందెజె నాను అయా తరమ్ది లోకుర్ వెట కోపం ఆతానె వెహ్నా. “ఎన్సివలెబా వరి మన్సు నా బాణిజ్ దూరం ఆజినాద్, నాను వెహ్పినికెజ్ వారు వెన్ఎర్”, ఇజి.

* 2:16 2:16 అబ్రాహము తెగ్గాతికార్ ఇజి వెహ్పినిక దేవుణు లోకుర్ వందిజె.

11 అందెజె నాను నండో కోపం ఆజి ఉండ్రీ ఒట్టు కిత, 'వారు ఎసెజ్బా నా డగ్రు వాజి నా వెట రోమ్బెవెర్లె',[☆] ఇజి.

12 తంబెరిజాండె, మీ లోఇ ఎయెన్ వన్నిజ్బా, బత్తిజిని దేవుణు బాణిజ్ దూరం కిబిన్ని నమకం సిలి, సెఇ మన్ను మన్ఎండ జాగర్త నుడొడు.

13 గాని, విజు దినమ్కాజ్ మీరు ఒరెన్ మరి ఒరెన్ వన్నిజ్ బుద్ది వెప్పి, ఆదరిసి మండ్రెజ్ వలె. 'నేండ్రు' ఇజి వెప్పి దినం విజు, అయాలెకెండ కిజి మండ్రెజ్ వలె. ఎండనిజ్ ఇహిజ, మీ లోఇ ఎయెన్బా పాపమ్దాన్ మొసెం ఆజి, మన్ను గటి ఆవండ మంజిని వందిజ్ ఆదరిసి మండ్రెజ్ వలె.

14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండ, ఆకర్దాక డటం నమకమ్దాన్ మహిజనె, మాటు క్రీస్తు వెట జత కూడితి మనికాట్.

15 దేవుణు మాటదు ముజాలె వెప్పిని లెకెండ, "నేండ్రు, మీరు దేవుణు వెప్పినిక వెహిజ, దేవుణుదిజ్ లోజిదెజ్ కెఇత్తి వలె మీ మన్ను గర్త ఆతిలెకెండ గర్త కిమాట్"[☆].

16 దేవుణు వెప్పినిక వెంజి, వన్నిజ్ లోజిదెజ్ కెఇతికార్ ఎయెర్? ఎయెర్ ఇహిజ, అయ్గుప్పు దేసమ్దాన్ మొసె డిస్సిసి, నడిపెసి తతి లోకుర్ విజెరె గదె.

17 ఎయెర్ వెట దేవుణు నలపయ్ పంటజ్ కోపం దాన్మహాన్? పాపం కిజి, బీడిఃమ్ బూమిదు సొతి వరివెట గదె కోపమ్దాన్ మహాన్.

18 "వారు ఎసెజ్బా నా డగ్రు వాజి నా వెట రోమ్బెవెర్లె", ఇజి దేవుణు ప్రమానం కితివలె ఎయెర్ వందిజ్ వెప్టాన్? వాండ్రు వెప్టికెజ్ వెన్ఇతి వరి వందిజ్ గదె వెప్టాన్.

19 అందెజె, వారు నమ్మిఇతిజ్నె, దేవుణు డగ్రు సొన్ని రోమ్బిదెజ్ అట్ఎతార్ ఇజి మాటు నెసొట్.

4

దేవుణు లోకురిజ్ రోమ్బిదెజ్ సిత మనాన్

1 దేవుణు డగ్రు సొన్ని వన్ని వెట రోమ్బిదెజ్ అట్నార్లె ఇజి వాండ్రు కితి ఒట్టు ఏలుబా మనాద్. అందెజె, మీ లోఇ ఎయెన్ వన్నిజ్బా అయా ఒట్టు కితిక తప్పి సొన్ఎండ మండ్రెజ్, మాటు జాగర్త మంజినాట్.

2 ఎండనిజ్ ఇహిజ, బీడిఃమ్ బూమిదు నడిఃతికార్ వెహిలెకెండెనె మాటుబా సువార్ వెహా మనాట్. గాని వారు వెహి మని దేవుణు మాట, వరిజ్ ఎండనిజ్ పణిదిజ్ రెవతాద్. ఎండనిజ్ ఇహిజ, వారు అయా మాట నమ్మివతార్.

3 ఏలు అయాక నమ్మిత్తి మాటు, దేవుణు డగ్రు సొన్ని వన్నివెట రోమ్బిజినాట్. యాక, వాండ్రు వెప్టి లెకెండెనె మనాద్. "అందెజె, నాను నండో కోపం ఆజి ఉండ్రీ ప్రమానం కిత. 'వారు ఎసెజ్బా నా డగ్రు వాజి రోమ్బెవెర్లె', ఇజి. దేవుణు లోకం తయార్ కితి వలెహాన్ అసి, వన్ని డగ్రు సొన్ని మాటు వన్నివెట రోమ్బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు ఆహె వెప్టాన్.

4 ఎండనిజ్ ఇహిజ, దేవుణు మాటదు ఎంబెనో ఏడు దినం వందిజ్ వెప్పినాద్. "దేవుణు విజు పణిజ్ పూర్తి కితండ్రె, ఏడు దినమ్దు రొంబితాన్", ఇజి.

5 మరి, ముజాలె వెప్పిని మాటదు వెప్పినాద్, "వారు ఎసెజ్బా నా డగ్రు వాజి రోమ్బెవెర్లె",[☆] ఇజి.

☆ 3:11 3:11 కీర్తన 95:7-11. ☆ 3:15 3:15 కీర్తన 95:7,8. ☆ 4:5 4:5 కీర్తన 95:11.

6 ముజాలె సువార్త వెహి మనికార్, దేవుణు డగ్రు సొన్ని వన్నివెట రోమ్బెవర్లె. ఎందనిజ్ ఇహిజ, వారు నమ్మిఎతార్. గాని, దేవుణు డగ్రు సొన్ని వన్ని వెట రోమ్దెజ్ మహి సెగొండార్ మనార్.

7 అందెజె, దేవుణు, వన్ని డగ్రు సొన్ని వన్ని వెట రోమ్బిదెజ్ మరి ఉండ్రీ రోజు ఇట్టాండ్రె, 'నేండ్రు', ఇజి కూక్తాన్, దిన్ని వందిజ్, నండో కాలం వెనుక దావీదు వెట వెహ్పిస్తి వలె, ముజాలె వెహ్తి అయా మాటనె వెహ్పిస్తాన్. "నేండ్రు మీరు దేవుణు వెహ్పినిక వెహిజ, మీ మన్ను గర్ర కిమాట్",* ఇజి.

8 దేవుణు డగ్రు సొన్ని వన్నివెట రోమ్బిదెజ్, యెహ్సూవ వరిజ్ నడిపిసి మంజిని కిహిజ, మరి ఉండ్రీ రోమ్ని దినం వందిజ్ దేవుణు వెనుక వెహ్ఎండ మహాన్ మరి.

9 అందెజె దేవుణు ఏడు దినమ్దు రోమ్బితిలెకెండ, లోకుర్బా రోమ్బిదెజ్ ఇజి వాండ్రు సిత మనాన్.

10 ఎందనిజ్ ఇహిజ, దేవుణు డగ్రు సొన్సి వన్ని వెట రోమ్ని ఎయెన్బా, దేవుణు వన్ని పణిజ్ వీస్తాండ్రె రోమ్బితి లెకెండ, వాండ్రుబా వన్ని పణిజ్ వీస్తాండ్రె రోమ్బిజినాన్.

11 అందెజె, దేవుణు డగ్రు సొన్ని వన్నివెట రోమ్బిదెజ్ మాటు నండో క్కబ్బడిజినాట్. ఎందనిజ్ ఇహిజ, ఇస్రాయేలు లోకుర్ దేవుణుదిజ్ లోజిఎండ అర్దిలెకెండ ఎయెన్బా అర్ఎండ మండ్రెజ్.

12 ఎందనిజ్ ఇహిజ, దేవుణు మాట పాణం మనిక. నండో సత్తు మనిక. రుండి దరోట్ తెవుగు మని ఎలాగ మర్తి కుర్దదిజ్ ఇంక ఒదె తెవుగు మనిక. దేవుణు మాట, లోఇ డుగ్జి మన్నుదిజ్ గర్బుమదిజ్ ఎర్లిసి డూగ్గు సొనాద్. అత్కుజ, ముల్వెజు ఎర్లిసినాద్. ఆలోసనమ్కాజ్, మన్నుదు మని ఉదెసమ్కాజ్ పరిక్కి కినాద్.

13 తయార్ ఆతి ఇనికబా దేవుణు బాణిజ్ డపె ఆదెజ్ అట్ఉ. విజు వన్ని కణకెజు ఎద్రు టెటాజ్ తోర్జినె, డాజ్ఎండ తోర్జినె వన్నిజె, మాటు కితి విజు వన్కా వందిజ్ లెక ఒపజెప్తెజ్ మనాద్.

యేసునె విజు పుజెరిజ మున్ను గొప్ప పెరి పుజెరి.

14 అందెజె, మాటు డటం వెహ్సొని నమకం డిఃస్ఎండ అసి మంజినాట్. ఎందనిజ్ ఇహిజ, అగాసం డాట్టి, దేవుణు డగ్రు సొహి విజెరె పుజెరిజ మున్ను మని పెరి పుజెరి ఒరెన్ మజి మనాన్. వాండ్రు దేవుణు మరిసి ఆతి యేసు.

15 మా విజెరె పుజెరిజ మున్ను మని పెరి పుజెరి, మజి మని తకుజ విజు నెన్ఇకాన్ ఆఎన్. గాని మజి వాజిని విజు రకమ్కాణి పరిసెజ్, వన్నిజ్బా వాతె. గాని వాండ్రు పాపం కిఎతాన్.

16 అందెజె నండో దయా దర్మం తోరిసిని దేవుణు బన్ని సిమసనం డగ్రు మాటు తియెల్ సిల్లెండ దయరమ్దాన్ సొనాట్. అబె వన్ని కనికారం మజి దొహ్నాద్. మజి అవ్సరం మనివలె మజి సాయం కిదెజ్ వన్ని దయా దర్మం దొహ్నాద్.

5

1 విజెరె పుజెరిజ మున్ను మని పెరి పుజెరిజబా వరి లోకుర్ నడిపిహానె దేవుణు ఎర్లిస్తాండ్రె, లోకుర్ వందిజ్ దేవుణుదిజ్ సేవ కిదెజ్, వాండ్రు ఏర్పాటు కినాన్. ఎందనిజ్ ఇహిజ, వారు లోకురి దేవుణుదిజ్ సీదెజ్.

* 4:7 4:7 కీర్తన 95:7,8.

2 విజెరె పుజెరిజ ముస్కు మని పెరి పూజెరి, నెన్ఎండ తపు కినివరిజ్, సరి తప్పి సాని వరిజ్ సారీలి తోరెస్తెజ్ అటూన్. ఎండనిజ్ ఇహిజ, వరిజ్ మని తకుజ్ విన్నిజ్బా మన్నె.

3 దిన్ని వందిజె, లోకురి పాపమ్క వందిజె ఆవిండ, వన్ని సొంత పాపమ్క వందిజ్బా, వాండ్రు పూజెజ్ సీదెజ్ మనాద్.

4 ఎయెన్బా వన్నిజ్ వాండ్రె, విజు పుజెరిజ ముస్కు మని పెరి పూజెరి ఇని పెరి గనం తపె ఆవెన్. అహారోనుజ్ విజెరె పుజెరిజ ముస్కు మని పెరి పూజెరి ఇజి దేవుణు ఎరీపాటు కితి లెకెండ, దేవుణునె వన్నిజ్ ఎరీపాటు కిదెజ్ వలె.

5 అయాలెకెండ, క్రీస్తుబా వన్నిజ్ వాండ్రె విజెరె పుజెరిజ ముస్కు మని పెరి పుజెరి ఇని యా పెరి గనం తపె ఆతాన్. గాని విజెరె పుజెరిజ ముస్కు మని పెరి పుజెరి ఇజి వన్నిజ్ ఎరీపాటు కితి దేవుణు వన్నిజ్ వెహ్హాన్. “నీను నా మరిన్. నేండ్రు నాను నీ బుబ్బు ఆత మన”, ఇజి.

6 మరి, ఎంబెనోబా దేవుణు వెహ్హినాన్, “మెల్కిసెదెక్ మహి లెకెండ, నీను ఎల్లకాలం మని ఒరెన్ పుజెరి”, ఇజి.

7 యేసు బూమిదు మహివలె, వన్నిజ్ సావుదాన్ తపిస్తెజ్ అట్టి దేవుణుదిజ్ డటం అడఃబాజి, కణెర్ వాక్కి పార్లనం కిత్తాన్. వన్ని మొరొ దేవుణు వెహ్హాన్ ఎండనిజ్ ఇహిజ వాండ్రు తియెల్దాన్ తగె ఆత మహాన్.

8 వాండ్రు దేవుణు మరిసి ఆతిజ్బా, వన్నిజ్ వాతి స్రమెజాణిజ్ దేవుణుదిజ్ లోజిదెజ్ వాండ్రు నెస్తాన్.

9 దేవుణు వన్నిజ్ పూర్తి కితివలె, వన్నిజ్ లోజిని వరిజ్ విజెరిజ్ రక్సిస్సికాన్ ఆతాన్.

10 మెల్కిసెదెక్ మహి లెకెండ, విజెరె పుజెరిజ ముస్కు మని పెరి పుజెరి ఇజి దేవుణు వన్నిజ్ ఎరీపాటు కిత్తాన్.

నమకమ్దాన్ అరెండ జాగర్ల సుడఃదెజ్.

11 దిన్ని వందిజ్ మరి నండొ వెహ్హెజ్ మజి మన్నె గాని, మీరు నిపాతినె అర్లం కిజినిదెర్. అందెజె నండొ వెహ్హెజ్ కస్టం ఆజినాద్.

12 మీరు దేవుణుదిజ్ నమ్మిజి నండొ పంటజ్ ఆజినాద్. ఏలు మహి వరిజ్ బోద్దిస్తెజ్ మనికిదెరె మీరు. గాని, దేవుణు మాటదు తొలిత నెస్తెజ్ మని నిజమాతి సజతిజ్ మరిబా నెస్సిస్తెజ్ ఎయెన్బా నెన్పిస్సాన్ మండ్రెజ్ వలె. పాలు ఉణిజిని లేత కొడొర్ లెకెండ మీరు మరిదెర్. బోజనం ఉండెజ్ అల్ఠిఇకిదెర్.

13 పాలు ఉణికాన్ ఎయెన్బా లేత కొడొనె. నిజమాతికెజ్ ఇనికెజ్ ఇజి నెన్పిసిని బోద్ నెన్వన్.

14 గాని పెరి వరిజె బోజనం మనాద్. నెగ్గికెజ్, సెఇకెజ్ తేడ నెసి, నెగ్గికెజ్ కిదెజ్ నెస్తిమనికారె వారు.

6

1 అందెజె, క్రీస్తు వందిజ్ తొలిత నెస్తి మహి బోదెజె నెసినె మన్ఇండ, మరి పెరి మాటెజ్బా నెసి పిరినాట్. సావుదు నడిఃపిసిని సెఇ పణిజ్ ఒప్పుకొడిఃజి డిఃసి సీజి, దేవుణు ముస్కు నమకం ఇడఃదెజ్ ఇజి మరి మరి వెహ్హినె మన్మాట్.

2 బాప్తిసం లాగె ఆని దని వందిజ్, కికు ఇడ్డి దని వందిజ్, లోకుర్ సావుదాన్ మరజి నిజ్ని దని వందిజ్, ఆకార్దు దేవుణు సీని లిరపు వందిజ్ మరి మరి వెహ్హినె మన్మాట్.

3 దేవుణుడిజ్ ఇస్టం ఇహిజ, మరి లావు నెసి పిరినాట్.

4-6 ఉండ్రి కాలమ్దు దేవుణు జాయ్దు మహికార్, పరలోకమ్ది ఇనాయం వందిజ్ బాగ నెస్తి మనికార్, దేవుణు ఆత్మ వెట కూడితికార్, దేవుణు మాట నెగ్గక ఇజి నెస్తికార్ క్రిస్తు మర్జి వానివలె నమ్మిత్తి లోకురిజ్ నస్తివలె మంజిని పెరి సత్తు వందిజ్ నెస్తికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకోడిజిని వరిజ్ మర్జి తతెజ్ అట్ఎద్. ఎందనిజ్ ఇహిజ, వారు దేవుణు మరిసిజ్ మరి ఉండ్రి సులుబా సిలువాదు కుటిజాణిజ్ డెయ్జి, విజెరె ఎద్రు సిగు కిబిస్సార్.

7 నిన్ని వరిజ్ పణిదిజ్ రెఇ బూమిదిజ్, పోలిస్తిజ్ ఆనాద్. ఎందనిజ్ ఇహిజ, ఎసెజ్ ఎసెజ్ అరిసిని పిరుదాన్ ఊద్ని బూమిదు, పంట పండిసిని వన్నిజ్ పణిదిజ్ వానిలెకెండ్ బూమి పంట పండిసి సీనాద్. అయా బూమిదిజ్ దేవుణు దీవిస్సాన్.

8 గాని లటెజ్ సాప్పుజ్ పండిసిని బూమి పణిదిజ్ రెఎద్. దేవుణు దనిజ్ తవ్ఎండ సాయిపు సీనాన్ కడెవేరిదు సిసుదాన్ నాసనం మనాద్.

9 గాని తంబెరిజాండె, మాపు యా లెకెండ్ వెప్తాజ్బా, మీరు అయాలెకెండ్ ఆఇదెర్, ఇజి మాపు పూర్తి నమ్మిజినావ్. క్రిస్తు మున్సు నమకం ఇడెజి రక్కణదు వాతి లోకుర్ కిని నెగ్గి పణిజె, మీరుబా కిజినిదెర్ ఇజి మాపు పూర్తి నెసినావ్.

10 దేవుణు అనెయం కినికాన్ ఆఎన్. మీరు వన్ని వందిజ్ కితి పణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని ప్రేమ వాండ్రు పోస్ఎన్.

11 మీ లోఇ విజిదెరిబా, యా లెకెండ్ కడెవేరిదాక మండ్రెజ్ ఇజి మాపు ఆస ఆజినావ్. ఎందనిజ్ ఇహిజ, మీరు ఆస ఆజినికెజ్ విజి తవ్ఎండ పూర్తి ఆదెజ్

12 మీరు బండెజ్ ఆదెజ్ ఇజి మాపు కోరిఎవ్. గాని దేవుణు మున్సు మని నమ్మకమ్దాన్, కస్టమ్కు ఓరిసినిదనితాన్ దేవుణు సీన ఇజి ఒట్టు కితికెజ్ దోహక్కి వరిలెకెండ్ మీరు ఆదెజ్ ఇజి కోరిజినావ్.

దేవుణు అబ్రాహముజ్ కితి ఒట్టు

13 దేవుణు అబ్రాహముజ్ నెగ్గికెజ్ కిని ఇజి ఒట్టు కిత్తాన్. కితివలె వన్ని మున్సు ఎయెన్బా పెరికాన్ సిలితిజ్, వాండ్రు వన్నిజె, తోడు: ఇడ్డె: ఆజి అబ్రాహముజ్ ఒట్టు కిత్తాన్.

14 వాండ్రు వెప్తాన్, “నాను నిజి తవెఎండ దీవిసి, నిజి నండొ తెగ్గది వరిజ్ సీన”,* ఇజి.

15 అబ్రాహము ఓరిసి కావ్ కిజి మహాన్. అందెజె దేవుణు సీన ఇజి ఒట్టు కితిక వన్నిజ్ దోహక్కాద్.

16 లోకుర్ ఒట్టు కినివలె వరిజ్ ఇంక పెరి వరిజ్, వాండ్రె నజి తోడు: ఇజి వెప్పి ఒట్టు కినార్. వరి నడిఃమి మని గొడుఃబెజ్ విజు ఉండ్రి ఒట్టుదాన్ సార్లి ఆనె.

17 దేవుణు, వాండ్రు ఒట్టు కితిక దోహక్కెజ్ అక్కు మని వరిజ్, వన్ని ఉదెనం వాండ్రు కండెక్బా మారిన్ఎన్, ఇజి వరిజ్ టెటాజ్ నెన్పిసిని వందిజ్, వాండ్రు వన్నిజె తోడు: ఇడ్డె: ఆజి ఒట్టు కిత్తాన్.

18 అందెజె దేవుణు మజి వన్ని ఒట్టు సిత మనాన్. వన్నిజె తోడు: ఇడ్డె: ఆజి సిత మనాన్. యా రుండి సజలిజ్ మార్ఉ. ఎందనిజ్ ఇహిజ, దేవుణు అబద్దం వర్గెదిజ్ అట్ఎన్. అందెజె, దేవుణునె నా గతి ఇజి నమకం ఇడ్డి మజి, మా ఎద్రు ఇడ్డి మని ఆసదిజ్ డిఃన్ఎండ అస్తిజ్ దయ్ఠం మంజినాద్.

* 6:14 6:14 ఆది 22:17.

19 మా పాణం ఇతల్ అతాల్ కద్దింండ, నెగెండ నిల్తెజ్ యా ఎద్దు సూణి ఆననె ఉండ్రీ కన్నె లెకెండ మనాద్. తెర వెన్నా మని దేవుణు వందిజ్ ఒదె కేట ఆతి గదిదు అయాక ఒనాద్.

20 యేసు మా వందిజ్ మజి ఇంక ముజాలె అబె సాహాన్. మెల్కిసెదెకు మహివజు, వాండ్రు ఎలాకాలం ఒరెన్ విజెరె పుజెరిజు మున్ను మని పెరి పుజెరి ఆత మనాన్.

7

పుజెరి ఆతి మెల్కిసెదెకు

1 యా మెల్కిసెదెక్ సాలెం పట్టుమ్ది రాజు. విజు దని మున్ను ఆతికారం మని దేవుణు పుజెరి. నండో రాజురి మున్ను విదెం కిజి గెలసి, అబ్రాహాము వన్ని ఇండ్రో మర్జి వాజి మహివలె, మెల్కిసెదెక్ వన్నిజ్ దసూల్ ఆతండ్రె, దీవిస్తాన్.

2 అయావలె అబ్రాహాము, వాండ్రు ఉద్దం కిజి గెలసి దోహాక్తి విజు వన్నాజ్ లొఇ మెల్కిసెదెకుజ్ దసంబాగం సితాన్. వన్ని పేరు తొలిత అర్దం ఇనిక ఇహిజు, నీతి నిజాయితిదాన్ ఏలుబడిః కిని రాజు. మరి ఉండ్రీ అర్దం ఇనిక ఇహిజు సమాదనమ్దాన్ ఏలుబడిః కిని రాజు ఇజి. ఎండనిజ్ ఇహిజు, వాండ్రు సాలెం పట్టుమ్ది రాజు. సాలెం ఇహిజు సమాద్దనం.

3 వన్ని అయేసి అప్పొసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పావు వందిజ్నో తెలివిద్. వాండ్రు దేవుణు మరిసి లెకెండ ఎల్లకాలం ఒరెన్ పుజెరి.

4 యా మెల్కిసెదెకు ఎసా పెరికాన్ ఇజి ఎత్తు కిదు. దేవుణు ఏర్పాటు కితి లోకుర్ లొఇ గొప్ప పెరి అనిగొగొ ఆతి అబ్రాహాము, విదెమ్దు గెలసి వన్నిజ్ దోహాక్తి విజు వన్నాజ్ లొఇ వన్నిజ్ దసంబాగం సితాన్.

5 మోసె సితీ రూలు వజ, లేవి తెగ్గదు పుట్టి పుజెరిజు ఆతికార్, ఇస్తాయేలు లోకుర్ బాణిజ్ దసంబాగం లొసినార్. ఇహిజు వారు వరి సొంత లోకుర్ బాణిజ్ లొసినార్. యా పుజెరిజుబా, అబ్రాహాము తెగ్గదు పుట్టికార్ ఆతిజ్బా వరి సొంత లోకుర్ బాణిజ్ దసంబాగం లొసినార్.

6 మెల్కిసెదెకు లేవి తెగ్గదు పుట్టికాన్ ఆఎన్. గాని వాండ్రు అబ్రాహాము బాణిజ్ దసంబాగం లొస్తాండ్రె, దేవుణు సితీ ఒట్టుజ్ మని అబ్రాహాముజ్, దీవిస్తాన్.

7 దీవిస్సికాండ్రె, దీవన లొసె ఆని వన్నిజ్ ఇంక పెరికాన్ ఇని మాట అనుమానం సిలికాదె.

8 యూదురి పుజెరిజు సుడఃతిజు, సాజిసానికారె దసంబాగం లొసినార్. గాని మెల్కిసెదెకుజ్ సుడఃతిజు, దసంబాగం లొసె ఆనికాన్ బత్కిజినాన్ ఇజినె దేవుణు మాట వెప్పినాద్.

9 అహిజు, దసంబాగం లొసిని లేవి తెగ్గదు పుట్టికార్, మెల్కిసెదెకుజ్ దసంబాగం సితార్. వరి అనిగొగొ ఆతి అబ్రాహాము సిలిదనితాన్ వారు సితార్ ఇజి ఒరెన్ వన్నిజ్ వెహెజ్బా ఆనాద్.

10 ఎండనిజ్ ఇహిజు, మెల్కిసెదెకు అబ్రాహాముజ్ సుడఃతివలె, లేవి పుట్వెండ్రె. వాండ్రు అబ్రాహాము పొటాద్నె నస్తివలె మహాన్.

మెల్కిసెదెకు లెకెండ యేసు ఒరెన్ పుజెరి

11 దేవుణు మెసె వెట మజి రూలుజ్ సిత మనాన్. అయా రూలుజ్ వజ, లేవి తెగ్గదు పుట్టికార్ పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజు

ఆరోను కుటుమ్దికార్ దేవుణు ఎత్తు కితి ఉపదేసమ్కు పూర్తి కిదెజ్ అట్టార్ ఇహిజు, మరి ఒరెన్ పుజెరి వాదెజ్ అవ్సరం సిలెతాద్ మరి. అహారోను కుటుమ్దు మనికాన్ ఆవ్ండ, మెల్కిసెదెకు మహి లెకెండ ఒరెన్ వన్నిజ్ పోకెజ్ అవ్సరం సిల్లెద్.

12 పుజెరిబు యా లెకెండ మారితిజు, మోసె సితి రూలుజ్బా మార్దెజ్ వలె.

13 ఎయె వందిజ్ మాటు వెహ్సినాటో, వాండ్రు మరి ఉండ్రె తెగ్గదు మనికాన్. అయా తెగ్గదు మనికార్ ఎయెర్బా పుజెరి వజు, మాలి పీటదు ముజాలె సేవ పణి కిఎర్. యా సజతిజ్, మా ప్రబు వందిజె వెహ్సె మన్నె.

14 వాండ్రు యూద తెగ్గదు పుట్టికాండె ఇజు టెటాజ్ నెసినాట్. పుజెరిజు వందిజ్ మోసె వెహ్సెవలె, యూద తెగ్గ వందిజ్ ఇనికబా వెహ్ఎతాన్.

15 మెల్కిసెదెకు పుజెరి మహివజు, మరి ఒరెన్ పుజెరి వాత మనాన్. అందెజె, మాటు వెహ్సెక మరి ఒదె టెటాజ్ అర్దం ఆజినాద్.

16 లేవి తెగ్గదు మనికాండె పుజెరి ఆదెజ్ ఇని రూలు వాండ్రు పూర్తి కిఎండ పుజెరి ఆతాన్. గాని నాసనం కిదెజ్ అట్ఇ, బత్కిజిని సత్తుదాన్ నె పుజెరి ఆతాన్.

17 ఎందనిజ్ ఇహిజు “మెల్కిసెదెకు మని లెకెండ, నీను ఎలాకాలం ఒరెన్ పుజెరి”,* ఇజి దేవుణు మాటు క్రీస్తు వందిజ్ వెహ్సినాద్.

18 అందెజె, పుజెరిజు వందిజ్ మని పడాఱు రూలుదిజ్ విలువ సిల్లెద్. ఎందనిజ్ ఇహిజు దనిజ్ సత్తు సిల్లెతాద్. పణిదిజ్ రవెతాద్.

19 ఎందనిజ్ ఇహిజు, మోసె సితి రూలుజ్, ఇని దనిజ్బా పూర్తి కిఉతె. ఏలు మాటు ఎద్రు నుండెతిక మోసె సితి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవుణు డగ్గు సొండ్రెజ్ అట్నాట్.

20 క్రీస్తు ఎలాకాలం మని ఒరెన్ పుజెరి ఇజి దేవుణు ఒట్టు కిత్తాన్. గాని మరి ఎమేణి పుజెరిబా దేవుణు యా లెకెండ ఒట్టు కివెతాన్.

21 దేవుణు యేసుజ్ నె వెహ్సెన్, “ప్రబు ఉండ్రె ప్రమాణం కిత మనాన్. అయాక ఎనెజ్బా తవ్ఎన్. ‘నీను ఎలాకాలం మని ఒరెన్ పుజెరి’*”, ఇజి.

22 దేవుణు యా లెకెండ ఒట్టు కతాన్. అందెజె, యాక ఉండ్రె నెగ్గి ఒపుమానం ఇజి తవ్ఎండ నిజం కినికాన్ యేసునె.

23 పడాఱు అలవాటు వజు నండెండార్ పుజెరిబు మహార్. ఒరెన్ సాతిజు, మరి ఒరెన్ వన్ని పణి కినాన్.

24 గాని యేసు ఎలాకాలం మని ఒరెన్ పుజెరి. ఎందనిజ్ ఇహిజు, వాండ్రు ఎలాకాలం బత్కిజినాన్.

25 అందెజె వాండ్రు, ఏలు మరి ఎలాకాలం వన్ని వెట దేవుణు డగ్గు సొని పరిజ్ రక్సిన్లెజ్ వాండ్రు అట్నాన్. ఎందనిజ్ ఇహిజు, వరి వందిజ్ దేవుణుదిజ్ బతిమాల్దెజ్ వాండ్రు ఎల్లకాలం బత్కిజినాన్.

26 అందెజె, మా అవ్సరమ్కు తిరిసిని విజు పుజెరిజు ముస్కు మని పెరి పుజెరి యేసునె. వాండ్రు ఇని పాపం సిలికాన్, నింద సిలికాన్, ఇని తపు సిలికాన్, పాపం కిని పరిబాణిజ్ కేట ఆతికాన్. వన్నిజె పరలోకమ్దు గొప్ప పెరి గవరం సిత మనాన్.

27 మహి పెరి పుజెరిబు లెకెండ, వాండ్రు రోజు పూజెజ్ సీదెజ్ అవ్సరం సిల్లెద్. ముజాలె వన్ని పాపమ్క వందిజ్, వెనుక లోకురి పాపమ్క వందిజ్ పూజెజ్ సీదెజ్

అవ్సరం సిల్లేద్. వన్నిజ్ వాండ్రె సిలువాదు ఒపజెప్పి వలె, వరి పాపమ్క వందిజ్, ఎలాకాలం వందిజ్ ఉండ్రె నుటు పూజ సితాన్.

28 మోసె సితె రూలు వజ ఏర్పాటు ఆతి విజెరె పుజెరిజ ముస్కు మని పెరి పుజెరిజు పూర్తి ఆఇకార్. గాని మోసె సితె రూలుజ్ వెనుక, దేవుణు ఒట్టు కిత్తాన్. అయా ఒట్టు వజ మరిసి విజెరె పుజెరిజ ముస్కు మని పెరి పుజెరి ఇజి ఏర్పాటు ఆతాన్. దేవుణు వన్నిజ్ ఎలాకాలం పూర్తి ఆతికాన్ కిత్తాన్.

8

యేసునె పుజెరిజ ముస్కు మన్ని మా పెరి పుజెరి.

1 మాపు వెప్పిని నజతిజ లోఇ ముకెలమాతి మాట యాకదె. అయాక ఇనిక ఇవెహిజ పరలోకమ్దు గొప్ప పెరి దేవుణు బసినె సమాసనం ఉణెర్ పడకాదు, గొప్ప బస్సిమని ఒరెన్ విజెరె పుజెరిజ ముస్కు మని పెరి పుజెరి మజి మనాన్.

2 వాండ్రు దేవుణు వందిజ్ ఒదె కేట కితి గదిదు విజు పుజెరిజ ముస్కు మని పెరి పుజెరి వజ సేవ కిజినాన్. ఇహిజ, ప్రబునె తయార్ కిజి ఇడ్డి నిజమాతి గుడారమ్దు సేవ కిజినాన్. లోకుర్ తయార్ కితి గుడారమ్దు ఆవిద్ సేవ కిజినక.

3 విజెరె పుజెరిజ ముస్కు మని పెరి పుజెరిజుబా, నండో రకమ్కాణి పూజెజ్ దేవుణుదిజ్ సీదెజ్ ఏర్పాటు ఆత మనార్. అందెజె, విజెరె పుజెరిజ ముస్కు మని యా పెరి పుజెరిబా ఇనికబా ఉండ్రె పూజ సీదెజ్ వలె.

4 వాండ్రు యా లోకమ్దునె మంజనిక ఇహిజ వాండ్రు ఒరెన్ పుజెరిబా ఆతాన్మరి. ఎందనిజ్ ఇహిజ, మోసె సితె రూలుజ్ వజ పూజెజ్ సీని నండో పుజెరిజు మనార్.

5 వారు సేవ కిజిని గుడారం, పరలోకమ్దు మని నిజమాతి గుడారమ్ది ఉండ్రె రూపునె, నీడనె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మొదోల్స్తివలె దేవుణు డటం వెప్తాన్, “నిజి గొరొతు తోరిస్తి రూపు వజనె విజు తయార్ కిదెజ్ జాగ్రత సుడెదెజ్వలె”, ఇజి.

6 గాని ఏలు, దేవుణుదిజ్ లోకుర్ నడివియె యేసు ఏర్పాటు కితి ఒప్పమానమ్నె గొప్ప నెగ్గక. అయాలెకండె, మహి పుజెరిజ పణి ఇంక, యేసుజ్ దోహక్తి మని పుజెరి పణినె గొప్ప నెగ్గక. ఎందనిజ్ ఇహిజ, నెగ్గి నజతిజ్ సీన ఇజి కితి ఒటుదిజ్ ఆదారం ఇడెజినె యేసు అయా ఒప్పమానం ఏర్పాటు కిత్తాన్.

7 మొదోహి ఒప్పమానం, ఇని తపు సీలిక ఆనిక ఇహిజ, మరి ఉండ్రె ఒప్పమానమ్దిజ్ అవ్సరం సిల్లేతాద్మరి.

8 గాని దేవుణు, లోకుర్ లోఇ తపు సుడెతండ్రె, వరి తప్పుజ తోరిసి, వరిజ్ ఈహు వెప్తాన్, “ప్రబు వెప్పినాన్, ‘ఇస్రాయేలు లోకుర్ వెట, యూద తెగ్గాది వరి వెట నాను ఉండ్రె కొత్త ఒప్పమానం కిని కాలం వాజినాద్.

9 నాను వరి అనిసిరిజ్ అయ్గుస్తు దేసెమ్దాన్ వరి కియు అసి వెల్లి నడిపిస్తివలె వరివెట కితి ఒప్పమానం లెకెండె ఆవిద్ యా ఒప్పమానం. నాను వరివెట కితి ఒప్పమానం వారు తప్తార్. అందెజె, నాను వరిజ్ డిస్త సిత”, ఇజ ప్రబు వెప్పినాన్.

10 మరి ప్రబు వెప్పినాన్, ఇస్రాయేలు లోకుర్ వెట నాను కిని ఒప్పమానం యాకదె. వాని దినమ్కాజ్ వెనుక, నాను నా రూలుజ్ వరి గబమ్దు ఇడ్డు. నాను వరి మన్సుదు అయాకెజ్ రాస్సు. నాను వరి దేవుణు ఆన. వారు నా లోకుర్ ఆనార్.

11 ఎయొర్బా వరి పడఃకది వరిజొ, వరి సొంత ఇంత్రొణి వరిజొ, 'మీరు ప్రబుజ్ నెస్తు, ఇజి నెన్పిన్ఎర్. ఎందనిజ్ ఇహిజ, వారు విజెరె నజి నెస్సార్. ఇజ్రివరి బాణిజ్ మొదొల్సి, పెరివరిదాక నజి నెస్సార్.

12 నాను, వారు కితి సెఇకెజ్ సెమిస్తు. వరి పాపమ్కు నాను ఎసెజ్బా ఎత్తు కిఎ', ✱ ఇజ్రి.

13 యా ఒప్పుమానమ్దిజ్, 'కొత్తక' ఇజి దేవుణు వెహ్సి, మొదొహి ఒప్పుమానమ్దిజ్ పడఃయ్క కిత్తాన్. పణిదిజ్ రఇ పడఃయ్ ఒప్పుమానం బేగినె సిల్లెండ ఆనాద్.

9

కొత్త ఒప్పుమానమ్ది విజేరె పుజేరిజ ముస్సు మన్ని పెరి పుజేరి

1 దేవుణుని వన్ని లోకుర్ నడిఃమి మహి మొదొహి ఒప్పుమానమ్దు, దేవుణుదిజ్ పొగ్డిఃజి మాడిఃసిని వందిజ్ రూలుజ్ మహె. యా బూమిదు దేవుణుదిజ్ పొగ్డిఃజి మాడిఃస్తెజ్ ఉండ్రీ గూడారమ్బా మహాద్.

2 ఉండ్రీ గుడారం తయార్ కిత మనాద్. దన్నిజ్ రుండి గదిజ్ మహె. మొదొహి గదిదు దీవ డండి ఉండ్రీ, బల్ల ఉండ్రీ, మరి దేవుణు ఎద్రు ఇడ్చి రొటెజ్ మహె. యా గదిదిజ్ దేవుణు వందిజ్ కేట ఆతి గది ఇనార్.

3 (యా రుండి గదిజ నడిఃమి అడ్డు వజ ఉండ్రీ తెర మనాద్) తెర వెనుక మన్ని గదిదిజ్ దేవుణు వందిజ్ ఒద్దె కేట ఆతి గది ఇనార్.

4 అబ్బె బజారమ్దాన్ తయార్ కితి దూపం సుర్ని మాలి పెటె, ఒప్పుమానం కితిక ఇడ్చిమని మందసం మన్నె. మందసమ్దిజ్, లొఇ వెల్లి సుటులం బజారం పూత రాస్త మనాద్. యా మందసం లొఇ బజారమ్దాన్ తయార్ కితి జగ్గుదు మన్ను, సిగిరితిమన్ని ఆహారోను డుడ్డుని దేవుణు మోసెజ్ సీత్తి పతి ఆడ్రెజ్ రాస్త ఇడ్చి పల్కెజ్ మన్నె.

5 మందసం ముస్సు, దేవుణు మనాన్ ఇజి, తోరిసిని కెరూబుజ్ మన్నె. కెరూబుజ్ కరుణపీటం ముస్సు, ఇహిజ, మందసం మూత్త ముస్సు రెక్కెజ్ కోరిసయ్యె మన్నె. ఏలు యా సజతిజ్ లాపు వెహ్సెజ్ మాటు అట్ఎట్.

6 యాలెకెండ, విజు నెగ్రెండ ఇడ్చివెనుక, పుజేరిజు, మొదొహి గదిదు వరి సేవపణి కిదెజ్ ఎస్సినస్తివలె డుఃగ్నార్.

7 గాని విజేరె పుజేరిజ ముస్సు మన్ని పెరి పుజేరి ఒరెండ్రె, లొఇమన్ని గదిదు డుఃగ్నాన్. అయాకబా వాండ్రు ఏంటుదు ఉండ్రీ సుటునె డుఃగ్నాన్. డుఃగ్నివలె నల సిల్లెండ డుఃగ్ఏన్. అయాక వాండ్రు వన్ని పాపమ్కాజ్ వందిజ్, నెన్ఏండ లోకుర్ కితి పాపమ్కాజ్ వందిజ్ దేవుణుదిజ్ పూజ సీనాన్.

8 యాలెకెండ కిజిని అలవాటుదాన్, దేవుణు ఆత్మ టెటాజ్ నెస్పిసిని సజతి ఇనిక ఇహిజ, మొదొహి గదిని అబ్బె కిని అలవాటుజ్ విజు నిల్చి మంజినివలె, లోకుర్ దేవుణు వందిజ్ ఒదె కేట ఆతి గదిదు సొండ్రెజ్ అట్ఎర్.

9 యాక యా కాలమ్దిజ్ ఉండ్రీ గుర్తు. ఇనిక ఇహిజ, దేవుణుదిజ్ పూజ సీని విజు రకమ్కాణి పూజెజ్, సీనివన్ని గర్భమ్దు సుబ్బరం కిదెజ్ అట్ఉ.

10 యా పడఃయ్ ఆసారం, తిండి వందిజ్, ఊణి దన్ని వందిజ్, రకమ్రకం సమయమ్దు నోర్బాని దన్ని వందిజె వెహ్సిని రూలుజ్. యా రూలుజ్ ముస్సు కిజినికెజ్. కొత్త రూలుజ్ వాని కాలమ్దాక యా రూలుజ్ మంజినె.

11 గాని, ఇబ్బె ఏలె మన్ని నెగ్గి నజతిజ్ కల్గిసిని విజేరె పుజేరిజ ముస్కు మన్ని పెరి పుజేరి ఇజి క్రీస్తు వాత మనాన్. వాండ్రు సేవ కిని గుడారం ఇహిజ పరలోకం. గొప్పు ముకెలమతిక. నండో పూర్తియాతిక. అయాక లోకుర్ తయార్ కితిక ఆవిద్. తయారాతి లోకమ్దు మనిక ఆవిద్.

12 క్రీస్తు గుడారమ్దు డుఃగ్గజి, ఎలాకాలం వందిజ్ ఉండ్రీ సుటు, దేవుణు వందిజ్ ఒదె కేట ఆతి గదిదు సాహివలె, పూజ సీదెజ్ ఇజి గొర్రెజ, దూడెజ నల వాండ్రు ఒవన్. గాని, వాండ్రు వన్ని సొంత నలనె ఒతాండ్రె మజి పాపమ్కాణిజ్ సావుదాన్ ఎలాకాలం డిఃన్పిస్తాన్.

13 మోసె సిత్తి రూలుజ వజ, గొర్రెజ, కొడ్డిజ నలని దూడెజ్ సుప్తి నీరు, మయిల* ఆతి లోకురి ఒడోల్దు వాక్కార్. ఎందనిజ్ ఇహిజ, వరి ఒడోల్ సుబ్బరం ఆజి దేవుణు వందిజ్ ఒవజెప్పె ఆజి కేట ఆదెజ్.

14 అహిజ, క్రీస్తు నల ఎసొ నెగ్రెండ సుబ్బరం కినాద్ ఇజి ఎత్తు కిదు. ఎలాకాలం మన్ని ఆత్మనత్తుదాన్, క్రీస్తు మా పాపమ్కాజ్ వందిజ్ వన్నిజ్ వాండ్రె దేవుణుదిజ్ ఒవజెప్పె ఆతాన్. ఇని పాపం సిల్లి పూజ లెకెండ, వన్నిజ్ వాండ్రె ఒవజెప్పె ఆతాన్. సావు తపిస్సి నెఇ పణిజాణిజ్ వన్ని నల మా గర్బం మజి గదిన్విండలెకెండ సుబ్బరం కినాద్. ఎందనిజ్ ఇహిజ బత్కిజిని దేవుణుదిజ్ మాటు పొగ్గిడిజి మాడిఃస్తెజ్.

15 అందెజె క్రీస్తునె అయా కొత్త ఒపుమానం నడిఃపిస్సికాన్. ఎందనిజ్ ఇహిజ, దేవుణు కూక్తి లోకురిజ్ దేవుణు సీన ఇజి ఒట్టు కితి ఎలాకాలం మంజిని దీవెనమ్కు దొహ్కెజ్. మొదొల్ కితి ఒపుమానమ్దిజ్ అడిఃగి మహివలె, వారు కితి తప్పుజాణిజ్ వాజిని సిక్సదాన్ వరిజ్ డిఃసిపిస్తెజె, క్రీస్తు సాతాన్.

16 ఉండ్రీ తీర్మన పత్రం రాస్తి ఇడ్డిమహిజ, అయా తీర్మన పత్రం తయార్ కితికాన్ సాత మనాన్ ఇజి రుజుప్ ఆదెజ్.

17 అయాక రాస్తిమన్నికాన్ బత్కిజి మహిజ, అయా తీర్మన పత్రమ్దిజ్ విలువ సిల్లెద్. వాండ్రు సాతివెనుకానె అయా తీర్మన పత్రం పణిదిజ్ వానాద్.

18 అందెజె, మొదొల్ సిత్తి ఒపుమానమ్దిజ్బా నల సిల్లెండ సత్తు మన్విద్.

19 దేవుణు వెప్తి రూలుజ్ విజు, లోకురిజ్ విజేరిజ్ సిత్తివెనుక, మోసె దూడెజ నల, ఏరువెట కలప్తాండ్రె, ఇసొపు మొక్కాది కొముదాన్, నండో ఎరాని బులుస్కుదాన్ లోకుర్ విజేరె ముస్కు, దేవుణు రూలుజ్ రాస్తి ఇడ్డి పున్కం ముస్కు సిల్కరిస్తాన్.

20 వాండ్రు వెప్తాన్, "మీరు కిదెజ్ ఇజి దేవుణు ఆడ్ర సిత్తి ఒపుమానమ్దిజ్ ముద్దనె యా నల"*, ఇజి.

21 అయాలెకెండె, గుడారం ముస్కుని అబ్బె మన్ని విజు వనకాజ్ ముస్కు నల సిల్కరిస్తాన్.

22 మోసె సిత్తి రూలుదు వెహ్నిని వజ విజు నలదాన్ సుబ్బరం ఆనాద్ ఇజి వెప్తాజ్ ఆనాద్. నల వాక్విండ, పాపమ్కు సొన్ఉ.

23 అందెజె, పరలోకమ్దు మన్ని వనకాజ్ రూపు లెకెండ మన్ని లోకమ్ది గూడారమ్ని దన్ని లొఇ మనికెజ్, జంతుజ నలదాన్ సుబ్బరం ఆదెజ్ వలె. గాని పరలోకమ్దు మనికెజ్ జంతుజ నలదాన్ ఆవిండ, దన్నిజ్ ఇంక నెగ్గి పూజెజాణిజ్ సుబ్బరం ఆదెజ్ వలె.

* 9:13 9:13 ఇబ్బె మయిల ఇజి వెహ్నినిక దేవుణుదిజ్ డగ్రు కిదెజ్ అట్ఇ నజతిజ్, సిల్లిజ దేవుణు ఎద్దు కల్లి ఆతికెజ్ * 9:20 9:20 నిర్గమ 24:8.

24 ఎందనిజ్ ఇహిజ, క్రీస్తు పరలోకమ్దు సొహాన్. ఏలు మా వందిజ్ దేవుణు ఎద్దు జామ్లి నిల్సిని వన్నిలెకెండ నిల్దెజ్ సొహాన్. వాండ్రు లోకుర్ కీదాన్ తయారాతి గుడారమ్దు డుఃగ్వితాన్. అయాక నిజమాతి గుడారమ్ది ఉండ్రీ మూర్తినె.

25 యూదురిజ పెరి పుజేరి, ఏంటు ఏంటు జంతుజ నలదాన్ దేవుణు వందిజ్ ఒదె కేట ఆతి గదిదు డుఃగ్వాన్. గాని, యేసు వన్నిజె ఒపజెపె ఆదెజ్ మరి మరి పరలోకమ్దు సొన్వన్.

26 ఆహె సొండ్రెజ్ ఇహిజ, లోకం పుటిన్తి బాణిజ్ అసి, వాండ్రు మరిమరి సాదెజ్ మహాద్ మరి. గాని కాలమ్ది ఆకార్దు, వాండ్రు పూజ ఆతి దన్నిదటాన్, పాపం సిల్లెండ కిదెజ్, వాండ్రు ఎలాకాలం వందిజ్ ఉండ్రీ సుటు తోరె ఆతాన్.

27 లోకుర్ విజేరె ఉండ్రీ సుటు సాదెజ్ వలె. వెనుక దేవుణు బాణిజ్ తీర్పు జర్గిదెజ్ వలె, ఇజి ఏర్పాటు మనాద్.

28 అయాలెకెండ, నండొండారి పాపమ్కు సొన్పిన్తెజ్, క్రీస్తు పూజ ఆతాన్. వాండ్రు మరి మర్జి వానాన్, పాపమ్కు సొన్పిన్తెజ్ ఆవద్; గాని వన్నిజ్ ఆనదాన్ ఎద్దునుడెఃజి మంజిని వరిజ్ రక్సిన్తెజె వానాన్.

10

క్రీస్తు ఎలాకాలం వందిజ్ ఉండ్రీ సుటు పూజ ఆతాన్

1 మోసె సితి గూలుజ్దు మని పడాఃయి ఆసారమ్కు, వాని కాలమ్దు వాజిని నెగ్గి నజతిజ ఉండ్రీ నీడఃనె. అయాకెజ్ నిజమాతి నజతిజ్ ఆఉ. అందెజె పడాఃయి ఆసారం వజ కిని పూజెజ్, డిఃన్ఎండ ఏంటు ఏంటు కిజి మహార్. గాని దేవుణుదిజ్ పొగిడిఃజి మాడిఃస్తెజ్ వాని వరిజ్ పూర్తి సుబ్రం కిదెజ్ అట్ఉ.

2 దేవుణుదిజ్ పొగిడిఃజి మాడిఃస్తెజ్ వాతి లోకుర్, వరి పాపమ్దాన్ పూర్తి సుబ్రం ఆతార్ ఇహిజ, వారు మరి మరి పాపమ్క వందిజ్ ఎత్తు కిజి బాద ఆఎతార్ మరి. విజు పూజెజ్బా ఆవ్ ఆతె మరి.

3 గాని యా పూజెజ్, ఏంటు ఏంటు, లోకురిజ్ వరి పాపమ్కు ఎత్తు కిబిన్తి.

4 ఎందనిజ్ ఇహిజ, కొడ్డిఃజ, గొరెజ నల పాపమ్కు సొన్పిన్తెజ్ అట్ఉ.

5 అందెజె, క్రీస్తు యా లోకుమ్దు వాతివలె వాండ్రు దేవుణుదిజ్ వెప్తాన్, “పూజెజ్ని సందెజ్, నీను కోరిః. గాని నీను నా వందిజ్ ఉండ్రీ ఒడొల్ తయార్ కితి”.

6 మాలి పీట ముస్కు సుప్తి జంతుజాణిజ్ నీను సర్ద ఆఱ. పాపమ్కు సొన్పిన్తెజ్ సీజిని పూజెజాణిజ్ సర్ద ఆఱ, ఇజి.

7 నన్తివలె నాను వెప్తా, “ఓ దేవుణు, ఇదిలో నాను దేవుణు మాటదు నా వందిజ్ రాస్తి మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్న”,* ఇజి.

8 ముజాలె వాండ్రు వెప్తాన్, “పూజెజ్ని సందెజ్ పూజ సీని పెటె ముస్కు సురుజిని జంతుజని పాపమ్కు సొన్పిన్తెజ్ సీని పూజెజ్ నీను కోరిః. వన్యాణిజ్ నీను సర్ద ఆఱ”, ఇజి. (మోసె సితి రూలుజ వజ యా పూజెజ్ కిదెజ్ మనికాదె. గాని వాండ్రు అయాలెకెండ వెప్తాన్)

9 వెనుక వాండ్రు వెప్తాన్. “ఇదిలో నీను కోరిజినికెజ్ కిదెజ్ నాను వాత మన”, ఇజి. అందెజె, దేవుణు పడాఃయి పూజెజ్ విజు సిల్లెండ కిజి, క్రీస్తు పూజ ఆతి దనిజ్ పడాఃయి పూజెజ ముస్కు ఇడ్డినాన్

* 10:7 10:7 కీర్తన 40:6-8.

10 దేవుణు కోరితికెజ్ వాండ్రు కిత్తాన్. అందెజె యేసు క్రీస్తు ఒడొఱదాన్ ఎలాకాలం వందిజ్ ఉండ్రీ సుటు పూజ ఆతి దనిదాన్, మాటు పాపమ్కాణిజ్ సుబ్రం ఆత మనాట్.

11 యూదురి పుజెరిబు విజెరి, మాల్లి పీట ముజాలె నిల్చి, రోజు రోజు వరి పుజెరి పణి కిజినార్. మరి మరి ఉండ్రె నని పూజెజె కిజినార్. అయా పూజెజ్ ఎసెజ్బా పాపమ్కు సొన్పిన్ఉ.

12 గాని క్రీస్తు ఎలాకాలం వందిజ్ దేవుణుదిజ్ ఉండ్రీ పూజ ఆతాన్. వాండ్రె అయా పూజ ఆతాన్. ఎలాకాలం వందిజ్ పూజ ఆతాన్. వెనుక వాండ్రు దేవుణు ఉణెర్ పడఁకాద్, గొప్ప మర్యాద్దు బసె ఆతాన్.

13 అబ్బె, ఏలు క్రీస్తు పడిఁగ వరిజ్, వన్ని పాదమ్క అడిఁగి దేవుణు ఇడ్పిదాక వాండ్రు కాప్ కిజినాన్.

14 ఎందనిజ్ ఇహిజ, అయా ఉండ్రీ పూజదాన్ పాపమ్కాణిజ్ సుబ్రం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్.

15 దేవుణు ఆత్మబా యాక నిజం ఇజి నెసి వెప్పినాన్. తొలిత వెప్పి నాన్.

16 “వాని దినమ్కాజ్ వెనుక, నాను వరివెట కిని కొత్త ఒపుమానం యాకదె. నాను వరి గర్భమ్దు నా రూలుజ్ ఇడ్డు. వరి మన్నుదు అయాకెజ్ రాస్సు, ఇజి ప్రబు వెప్పినాన్”,* ఇజి.

17 వెనుక వాండ్రు వెప్పినాన్, “నాను వరి పాపమ్కు, వరి సెఇ పణిజ్ ఎసెజ్బా ఎత్తు కిఎ”,* ఇజి.

18 దేవుణు పాపమ్కు సెమిసి మహివలె, పాపం సెమిస్తెజ్ మరి పూజ అవునరం సిల్లెద్.

నమ్మిజినె మండ్రెజ్.

19 అందెజె, తంబెరిజాండె, యేసు నల వాక్కి సాతి సావుదాన్ దేవుణు వందిజ్ ఒద్దె కేట ఆతి గదిదు, మాటు దయరమ్దాన్ డుఁగ్దెజ్ ఆనాద్.

20 వాండ్రు మా వందిజ్, బత్కుదు నడిఁపిసిని ఉండ్రీ కొత్త సరి రేతాన్. అయాక తెరదాన్, ఇహిజ వన్ని సాంత ఒడొఱదాన్ రేతాన్.

21 దేవుణు లోకుర్ మున్ను అతికారం మని ఒరెన్ పెరి పుజెరినె మజి మనాన్.

22 అందెజె, మాటు వన్నిజ్ పూర్తి నమ్మిజి నెగ్గి మన్నుదాన్ దేవుణు ఎద్దు సొనాట్. మజి సుబ్రం కిదెజ్, మా సెఇ పణిజ్ నెసిని మన్ను, క్రీస్తు నలదాన్ సిల్కరెసె ఆత మనాద్. మా ఒడొఱ, నెగ్గి ఏరుదాన్ నొరె ఆత మనాద్. ఆహె మాటు దేవుణు ఎద్దు సొనాట్.

23 ఇతల్ ఆతల్ కద్దిఎండ, మటు మనాట్ ఇజి మాటు వెహె ఆజిని ఎద్దు సూణి ఆసదిజ్ డటం అన్నాట్. ఎందనిజ్ ఇహిజ, మా వెట ఒట్టు కితికాన్ నమ్మిదెజ్ తగ్గికాన్.

24 మహికార్ ప్రేమ తోరిస్తెజ్, నెగ్గి పణిజ్ కిదెజ్ వరిజ్ ఉసార్ కిబిన్నిక ఎలాగ ఇజి ఎత్తుకిజినాట్.

25 నెగొండార్ డిఁసి సీజిని లెకెండ, కూడఁజి వాజిని అలవాటు మాటు డిఁస్తెజ్ ఆఎద్. గాని మాటు ఒరెన్ మరి ఒరెన్ వన్నిజ్ మరి ఒదె దయరం కిబిసి మంజినాట్. ఎందనిజ్ ఇహిజ, ప్రబు వాని దినం డగ్రు ఆజినాద్ ఇజి మీరు సుడఁజినిదెర్.

* 10:16 10:16 యిర్షియా 31:33. * 10:17 10:17 యిర్షియా 31:34.

26 నిజం నెస్తి వెనుక మరి మరి పాపముకు కిజినాట్ ఇహిజ, అయా పాపముకు సాన్పిస్తైజ్ మరి పూజ సిల్లెద్.

27 గాని మరి మనిక ఇనిక ఇహిజ, దేవుణు సీని తీర్పుదిజ్, వన్నిజ్ పడేఱ వరిజ్ నాసనం కిని గొప్ప పెరి సిసుదిజ్ ఎద్రు సుడేఱనికాదె.

28 మోసె సితీ రూలుజ్ లోజిఇతి ఎయె వన్నిజ్బా, రిఎరొ, ముఎరొ సాక్కిరు వాండ్రు తప్ప కిత్తాన్ ఇజి వెహ్టాజ, కనికారం తోఎండ సప్పార్.

29 అహిజ, దేవుణు మరిసిజ్ దూసిస్తి వరిజ్ ఎసా పెరి సిక్కు మనాద్. వరిజ్ దేవుణు వందిజ్ కేట కిత్తి నలదిజ్ పణిదిజ్ రెఱ లెకెండ్ సుడేఱతి వరిజ్ ఎసా పెరి సిక్కు మనాద్. అయా నలనె ఒప్పుమానం తపిస్తాద్. కనికారం తోరోసిని దేవుణు ఆత్మదిజ్ దూసిస్తి వరిజ్ ఎసా పెరి సిక్కు మనాద్ ఇజి ఎత్తు కిదు.

30 ఎందనిజ్ ఇహిజ, “సిక్కు నానె సీన. సిక్కుదిజ్ తగితి వరిజ్, నాసు మర్జి సీన”, ఇజి వెహ్టా వన్నిజ్ మాటు నెసినాట్. మరిబా వెప్పినాన్, “ప్రబునె వన్ని లోకురిజ్ తీర్పు సీనాన్”,^{*} ఇజి.

31 బత్కిజిని దేవుణు కీదు అర్నిక గొప్ప తియెల్ కల్గిస్తి నజతిసె.

32 మీరు క్రీస్తు వందిజ్ తొలిత నెస్తి రోస్కు ఎసెజ్బా పోస్మాట్. నండొ బాదెజ్ వాతిజ్బా, నమ్మకమ్దాన్ ఎలాగ నిహి మహిదెర్ ఇజి ఎత్తు కిదు.

33 సెగం కాలమ్దు, మిజి విజెరె ఎద్రు దూసిస్తార్. మిజి డెయ్తార్. మరి సెగం కాలమ్దు, మీరు, అయాలెకెండ్ బాదెజ్ ఆతి వరివెట కూడేఱని హిదెర్.

34 జెలిదు ఆతి వరిజ్ సుడేఱ్ మీ పాణం నోతాద్. మిజి కల్గిజి మనికెజ్ విజు లాగ్గి ఒతివలెబా సర్దదాన్ ఓరిస్తిదెర్. ఎందనిజ్ ఇహిజ, ఎలాకాలం మనికెజ్, మిజి మన్నె ఇజి నెసినిదెర్. అయాక కల్గితి మహిదని ఇంక మరి ఒదె నెగ్గిక.

35 అందెజె, దయ్ రమ్దాన్ మండ్రు. ఎందనిజ్ ఇహిజ నండొ పలితం దోహ్కాద్.

36 మీరు ఓరిసి మండ్రెజ్ వలె. ఎందనిజ్ ఇహిజ, మీరు దేవుణుదిజ్ ఇస్టం ఆతికెజ్ కితి వెనుక, వాండ్రు సీన ఇజి ఒట్టు కితికెజ్ దోహ్కాద్.

37 ఎందనిజ్ ఇహిజ, దేవుణు మాటదు వెప్పిని లెకెండ్, “సణెం కాలం లోఱ, వాదెజ్ మనికాన్ బేగినె వానాన్. ఆల్సెం ఆఎన్.

38 సితీ నిజాయితి మని నా వారు, నమ్మకమ్దాన్ బత్కినార్. వారు మర్జి వెనుక సాహిజ, నాను వరివెట సర్ద ఆఎ”,^{*} ఇజి.

39 మాటు, మర్జి వెనుక సాన్ని నాసనం ఆని లోకు ఆఎట్. గాని మజి దేవుణు ముస్కు నమకం మనాద్. వాండ్రు మజి రక్కిస్తాన్.

11

1 నమకం ఇహిజ, మాటు ఆస ఆనిక తవ్ఎండ జర్గినాద్ ఇజి పూర్తి నమ్మిజినిక. కణకదాన్ సుడేఱకెజ్ నిజం మన్నె ఇజి పూర్తి నమ్మిజినిక.

2 దేవుణు ముస్కు నమకం ఇడ్డి లోకుర్ పూర్బమ్మదు మహోర్. అందెజె దేవుణు బాణిజ్ అనుపె ఆతార్.

3 దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎందనిజ్ ఇహిజ, మాటు ఏలు సూణికెజ్, సుడేఱ వన్కా బాణిజ్ తయార్ కితికెజె.

^{*} 10:30 10:30 ద్విత్తి 32:35. ^{*} 10:38 10:38 అబ్బుకు 2:3,4.

4 నమకమ్దానె, కయిను సీతి దని ముస్కు ఏబలు దేవుణుదిజ్ నెగ్గి పూజ సీతాన్. వన్ని నమకమ్దానె, నీతి నిజాయితి మనికాన్ ఇజి దేవుణు బాణిజ్ మెపు దోహ్కాద్. ఎందనిజ్ ఇహిజ, వాండ్రు సీతి సందదు దేవుణు సరద ఆతాన్. వాండ్రు సేనదనమ్కాజ్ ముజాలె సాత సాహాన్. అహిజ్బా, వన్ని నమకమ్దాన్ ఏలు బా మజీ వర్గిజనాన్.

5 నమకమ్దానె, హానోకు సాఎండ దేవుణు మంజిన బాడ్డిడు దేవుణు ఒత మనాన్. ఎయెర్బా వన్నిజ్ సుడోదెజ్ అట్ఎతార్. ఎందనిజ్ ఇహిజ, దేవుణునె వన్నిజ్ ఒత మహాన్. వన్నిజ్ ఒఇ ముజాలె, దేవుణుదిజ్ సరద కితికాన్ ఇజి అనుపె ఆతాన్.

6 నమకం సిల్లెండ, దేవుణుదిజ్ సరద కితికాజ్ అట్ఎట్. ఎందనిజ్ ఇహిజ, వన్ని డగ్రు వానికాన్ ఎయెన్బా దేవుణు మనాన్ ఇజి నమ్మిదెజ్వలె. వన్నిజ్ నిజం రెబాని వరిజ్ వాండ్రు నెగ్గికెజ్ కినాన్ ఇజి నమ్మిదెజ్వలె.

7 నమకందానె, నోవ వని ఇండ్రోణి వరిజ్ పెరి గడదాన్ రక్సిస్తెజ్ ఉండ్రీ ఓడః తయార్ కిత్తాన్. జర్గిదెజ్ మని సజతిజ వందెజ్ దేవుణు డటం వెహ్తివలె వాండ్రు లోజీతాన్. వన్ని నమకమ్దానె, లోకమ్దు మహి, మహి లోకురిజ్ దేవుణు ముస్కు నమకం సిల్లెద్ ఇజి వాండ్రు తోరిస్తాన్. అందెజె వారు తపు కిత్తార్ ఇజి దేవుణు తీర్పు కితాండ్రె, నోవెజ్ నీతి నిజాయితి మనికాన్ ఇ జి ఇట్టాన్. నోవ నమకమ్దానె నీతి నిజాయితి మనికాన్ ఇజి ఇట్టాన్.

8 నమకమ్దానె, అబ్రాహము, 'నీను నీ ఇల్లు డిసి, నీది ఇజి వెనుక దోహ్కొక్కి బాడిడు సాన్అ', ఇజి దేవుణు వెహ్తివలె, లోజీతాండ్రె సాహాన్. ఎంబె సాన్సినాన్ ఇజి తెలిఎండ వాండ్రు సాహాన్.

9 నమకమ్దానె, పయువాండ్రు లెకెండ దేవుణు సీన ఇజి ఒట్టు కితి దేసమ్దు బత్కితాన్. వాండ్రు గుడారమ్దు బత్కితాన్. అయాలెకెండె, ఇసాకు ని యాకోబు బా. వరిజ్బా వెనుక అయా ఒట్టనె దేవుణు సీతాన్.

10 అబ్రాహము పయువాండ్రు లెకెండ అబె బత్కితాన్. ఎందనిజ్ ఇహిజ, వాండ్రు ఎలాకాలం నిల్చిని నిజమాతి పునాది మని పట్టుం వందిజ్ ఎద్రు సుడోజి మహాన్. అయా పట్టుం రూపు సీజి తోహ్పివాన్ దేవుణు.

11 నమకమ్దానె, అబ్రాహము నండొ డొక్ర ఆతిజ్బా, సార గొడ్డు బోదెలి ఆతిజ్బా అప్పొసి ఆతాన్. ఎందనిజ్ ఇహిజ, సీన ఇజి ఒట్టు కితికాన్ నమ్మిదెజ్ తగ్గివాన్ ఇజి ఒడిఃబితార్.

12 అందెజె, సాతిలెకెండ మని యా ఒరెన్ వన్ని బాణిజ్, నండొ నండొ లోకుర్ ఆతార్. ఆగాసమ్దు మని సుకెజె లెకెండ, సమ్దరమ్ది ఒడ్డుదు మని లెక కిదెజ్ అట్ఇ ఇస్కు లెకెండ, లోకుర్ ఆతార్.

13 యా లోకుర్ విజెరె, సానిదాక వారు నమకమ్దానె బత్కిజి మహార్. దేవుణు సీన ఇజి ఒట్టు కితికెజ్ దోహ్కుతె. వారు నండొ ముజాలె వన్కా వందిజ్ ఆనదాన్ ఎద్రు సుడోజి వన్కాజ్ సరద ఆతార్. యా బూమిదు వారు పయువారు ఇజి ఒప్పుకోటార్.

14 యా లెకెండ వెహ్పి లోకుర్, వరిజ్ సాంత ఉండ్రీ దేసెం వందిజ్ ఎద్రు సుడోజినార్ ఇజి టెటాజ్ తోరిసినాద్.

15 వారు డిసి వాతి దేసెం వందిజ్ ఎత్తు కిఎర్. ఎత్తు కిత్తార్ ఇహిజ, మర్జి సాండ్రెజ్ అవ్సరం మహాద్మరి.

16 గాని వారు, ఇంక నెగ్గి ఉండ్రీ దేసెం వందిజ్ కోరితార్. ఇహిజ పరలోకమ్ది

దేసం వందిజ్ కోరితార్. అందెజె, దేవుణు, వరి దేవుణు ఇజి వెహె ఆదెజ్ సిగు అవన్. ఎందనిజ్ ఇహిజు, వాండ్రు వరి వందిజ్ వరలోకమ్దు ఉండ్రి పట్టుం తయార్ కిత మనాన్.

17 నమకమ్దానె, దేవుణు అబ్రాహముజ్ వరిస కితివలె, వన్ని మరిసి ఇస్సాకుజ్, పూజు లెకెండ్ సితాన్. దేవుణు అబ్రాహముజ్నె ఒట్టు సితాన్. గాని వన్ని ఒరెండ్రి ఒరెన్ మరిసిజ్ పూజు లెకెండ్ సిదెజ్ వాండ్రు తయార్ ఆతాన్.

18 దేవుణు అబ్రాహముజ్ వెహ్హన్, “ఇస్సాకు వెటనె నీ తెగ్గదికార్ పుట్వార్”,* ఇజి

19 సాతి వరిజ్ మర్జి బత్తిస్తెజ్ దేవుణు అట్నాన్ ఇజి అబ్రాహము ఒడెబితాన్. యాక సుడెతిజు, అబ్రాహముజ్ సావుదాన్ ఇస్సాకుజ్ మర్జి దోహక్తి లెకెండ్ మనాద్.

20 నమకమ్దానె, ఇస్సాకు, యాకోబుజ్నెని యాసావుజ్, వరిజ్ వానికాలం వందిజ్ దీవిస్తాన్.

21 నమకమ్దానె, యాకోబు వాండ్రు సాని ముజాలె యోసేపు మరిసిర్ రిఎరిజ్ దీవిస్తాన్. వన్ని డుడుదు ఒర్గితాండ్రి దేవుణుదిజ్ పొగిడిజి మాడిస్తాన్.

22 నమకమ్దానె, యోసేపు సాదెజ్ డగ్గు ఆతివలె ఇస్సాయేలు లోకురిజ్ అయిగుప్పు దేసెమ్దాన్ దేవుణు నడిపిసి తనిదని వందిజ్ వెహ్హన్. వన్ని డుముక వందిజ్ ఇనిక కిదెజ్ ఇజి ఆడ్ర సితాన్.

23 నమకమ్దానె, మోసె అయిసి అప్పొసిర్, వాండ్రు పుట్టి మూండ్రి నెలెజ్ డాప్పి ఇట్టార్. ఎందనిజ్ ఇహిజు, వాండ్రు నెగ్గి ఒరెన్ కొడెః ఇజి వారు నెస్తార్. రాజు సీతి ఆడ్రదిజ్ తప్పెజ్ వారు తియెల్ ఆవతార్.

24 నమకమ్దానె, మోసె, వాండ్రు పిరితి వలె పరో గాల్ని మరిసి ఇజి కూకె ఆదెజ్ కెఎతాన్.

25 వాండ్రు, పాపం తప్పిన్ని సణెం మంజిని సర్దదు మంజిని దని ముస్సు, దేవుణు లోకుర్ వెట బాద ఆదెజ్ కోరితాన్.

26 అయిగుప్పు దేసెమ్ది ఆస్తి ముస్సు, క్రీస్తు వందిజ్ బాదెజ్ అనికాదె విలువ మనిక ఇజి వాండ్రు ఒడెబితాన్. ఎందనిజ్ ఇహిజు, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్రు ఎర్దు సుడెతాన్.

27 నమకమ్దానె, మోసె, రాజు కోపమ్దిజ్ తియెల్ ఆవండ, అయిగుప్పు దేసెం డిస్తాన్. వాండ్రు మర్జి వాదెజ్ కెఎతాన్. ఎందనిజ్ ఇహిజు, వాండ్రు తోరెఇ దేవుణుదిజ్ సుడెతి లెకెండ్ మనాద్.

28 నమకమ్దానె, మోసె, ఇస్సాయేలు లోకురిజ్ పులాజ్ ఆఇ రొటెజ్ తయార్ కిని పండెయి కిదెజ్ ఇజి ఆడ్ర సితాన్. వరి తోలిత పుట్టి కొడెఃరిజ్, సప్పి దూత సవ్వెండ మండ్రిజ్, వరి దార్బందరమ్దు నల సీల్కరిస్తెజ్ ఇజి ఆడ్ర సితాన్.

29 నమకమ్దానె, ఇస్సాయేలు లోకుర్ ఎర్తజ్ సమ్దరమ్దాన్ వహ్తి బూమిదు నడిసి లెకెండ్ నడిసి సాహార్. అయిగుప్పు దేసెమ్దికార్ అయాలెకెండ్ కిదెజ్ సుడెతి వలె వారు ముడుఃగితార్.

30 నమకమ్దానె, ఇస్సాయేలు లోకుర్ ఏడు రోస్సు యెరికొ పట్టుం సుటులం బూలాతివలె, పట్నమ్ది గోడెజ్ అర్తె.

31 నమకమ్దానె, సాని బూలాని రాహబు, దేవుణుదిజ్ లోజెఇ దని పట్నమ్ది వరివెట సావతాద్. ఎందనిజ్ ఇహిజు, దేసెమ్దిజ్ గుటు లాగిదెజ్ వాతి వరిజ్ అది డగ్గు కితాద్.

* 11:18 11:18 అది 21:12.

32 నాను మరిబా వెహ్తాజా? గిదియెను, బరాకు, సంసాను, యెష్ట, దావీదు, సముయెలు, ప్రవక్తరు నిని వరి వందిజ్ వెహ్తాజ్ నజి సమయం సాల్ఎద్.

33 నమకమ్దానె, వారు దేసేమ్కాజ్ ముస్సు విద్దెం కిజి గెలస్తార్. వారు నీతి నిజాయితికెజ్ కితారె, దేవుణు ఒట్టు కితికెజ్ దోహ్కా. వారు నొరెస్కు వెయుమ్మాక్తార్.

34 నండొ కస్సి సిసుదిజ్ నస్తార్. కూర్దెజాణిజ్ సాఎండ తప్తె ఆతార్. వారు సత్తుసిలికార్ గాని సత్తు మనికార్ ఆతార్. వారు విదెమ్దు సత్తు మనికార్ ఆతార్ పయి సయనమ్ది వరిజ్ ఉలుస్తార్.

35 సెగొండెక్ బోదెకాజ్, వరి సొంతది వరిజ్ సావుదాన్ మరజి దోహ్కా. మహికార్ నండొ బాదెజ్ ఆతిజ్బా, వారు దేవుణు ముస్సు మని నమకం డిసి, డిబె ఆని దని ముస్సు సానిక నెగెద్ ఇజి సుడెఃతార్. ఎందనిజ్ ఇహిజ, వారు మరజి నిజ్ని వలె నెగ్గి బత్సు దోహ్కాజ్.

36 సెగొండార్ దూసె ఆతార్. కొరడెఃజాణిజ్ డెయ్ఎ ఆతార్. మరి సెగొండార్ తోహె ఆతారె, జెలిదు ఇడ్డెః ఆతార్.

37 వారు పణకాణిజ్ డెయ్ఎ ఆతార్. రంపమ్కాణిజ్ రుండి ముకెజ్ కొయె ఆతార్. కుర్దెజాణిజ్ సపె ఆతార్. సెగొండార్ మెండ గొరెదినొ, ఏలెటు గొరెదినొ తోలు పొర్పె ఆజి, బజ ఆజి, బాదెజ్ ఆజి, దూసె ఆజి బూలాతార్.

38 యా నెగ్గి లోకుర్ మండ్రెజ్, యా లోకం తగ్ఎద్. వారు బీడిఃమ్ బూమిజ, గొరొకాజ్ బూలాతార్. సాలమ్క లొఇ, బూమిదు మని బొరోజ డాఃజితార్.

39 వారు నమకం ఇట్టార్. అందెజె, నెగ్గికార్ ఇజి దేవుణు బాణిజ్ మెపు దోహ్కాద్. గాని వరి లొఇ ఎయెరిజ్బా, దేవుణు సీన ఇజి ఒట్టు కితికెజ్ దోహ్కాతె.

40 ఎందనిజ్ ఇహిజ, దేవుణు మా వందిజ్ ఇంక నెగ్గిక వీర్పాటు కిత మనాన్. మా వెటనె, వరిజ్ పూర్తి కిదెజ్ ఇజి వన్ని ఉదెసం.

12

దేవుణు వన్ని కొడొఃరిజ్ దిదిజి సిక్కు సీజినాన్

1 అందెజె, మా సుటులం సీన సాక్సిరు మనార్. అందెజె, అడు కిజిని సజతిజ డిసి, మజి సిక్కుజ అర్పేసిని పాపం డిసి, దేవుణు మా ఎద్రు ఇడ్డె బత్సు ఇని ఉహ్కాక్సి పోటిదు ఓరిసినె ఉహ్కాట్.

2 మా గురి యేసు దరోట్నె ఇడెఃజి ఉహ్కాట్. వాండ్రె మా నమకం మొదొల్స్తెకాన్. పూర్తి కినికాన్. వాండ్రు సిలువాదు సిగు మని సాపు సాదెజ్ తయార్ ఆతాన్. ఎందనిజ్ ఇహిజ, వెనుక వన్నిజ్ మంజిని నరద వాండ్రు నెస్నాన్. ఏలు పరలోకమ్దు దేవుణు సిమసనం ఉణెర్ పడెకాదు గొప్ప మర్యాద్దాన్ బస్త మనాన్.

3 పాపం కినికార్ కితి నండొ బాదెజ్ వాండ్రు ఓరిస్తికెజ్ ఎత్తు కిదు. అందెజె, మీరు మన్ను విస్కిఎండ, డిసిసిఎండ మండ్రెజ్, వన్నిజ్ ఎత్తు కిదు.

4 పాపం వెట కాట్లాడెఃజనిక నల సీని నసా ఏలుదాక మీరు ఎద్రిన్ఇతిదెర్.

5 దేవుణు వన్ని కొడొఃర్ లెకెండె మిజి ఉసార్ కిబిస్సి మాట మీరు పోస్తిదెరా?. “నా కొడొః, ప్రబు నిజి దిదిని వలె మన్ను బాద కిమాట్. వాండ్రు డటం వెహ్పా వలె మీ మన్ను విస్కిమాట్.

6 ఎందనిజ్ ఇహిజ, ప్రబు వాండ్రు ప్రేమిసిని వరిజ్ దిదినాన్. వన్ని మరిన్ ఇజి డగ్రు కిని వన్నిజ్ దిదినాన్”, ఇజి వెహ్పానాన్.

7 ఒరెన్ అప్పొసి దిదిని వజ, మీ స్రెమెజ్ ఓరిస్తు. ఎందనిజ్ ఇహిజ, మీ స్రెమెజ్, దేవుణు మిజి వన్ని కొడొర్ లెకెండ సుడఃజినాన్ ఇజ తోరిస్తు. అప్పొసి దిదిగ మరిసి ఎయెన్బా మనాండ్రా?

8 వన్ని మరిసిర్ విజెరిజ్ దిజినిలెకెండ, మిజి దిదిఎండ మహిజ, మీరు వన్ని నిజమాతి కొడొర్ ఆఎర్. గాని ఆఇ కొడొర్ ఇజినె అర్థం.

9 మజి విజెరిజ్ కాస్తి అప్పొసిర్ మహార్. వారు మజి దిదిజి మహార్. మాటు వరిజ్ గవ్ఠం సీజి మహార్. అహిజ, మా అయా లోకమ్ది బుబ్బు ఆతికాన్దిదినివలె, ఎసా లావు వన్నిజ్లోజిజి మాటు ఎలాకాలం బత్తిదెజ్?

10 మా బుబ్బర్, సెగం కాలం మజి దిదితార్. ఎందనిజ్ ఇహిజ అయాక నెగెద్ ఇజి వారు ఒడఃబితార్. గాని, మా నెగ్గిదనివందిజ్ దేవుణు మజి దిదిజినాన్. ఎందనిజ్ఇహిజ, మాటు వన్నిలెకెండ పరిసుదమ్క మండ్రెజ్.

11 మజి దిదినివలె, అయాక సర్ద కిబిన్ఎద్, దుకం కిబిస్సాద్. గాని అయాలెకెండ దిదిజి సిక్స లాగ్ ఆజి నెగ్గి సరిదు వాతికార్, వెనుక నీతి నిజాయితిదాన్ కిజి, సమాదనందాన్ మంజినార్.

12 అందెజె, డిఃప్తి* మీ కికు పెర్దు. వణక్సిని ముణుకుజ్ సత్తు కిబిస్తు†.

13 “మీ కాల్యాజ్ తినాజ్ సరి తయార్ కిదు”‡. సొట కాల్యు బెణ్ఎండ, సత్తు ఆని వందిజ్ తినాజ్ సరి తయార్ కిదు.

దేవుణుదిజ్ నెక్సి పొక్మాట్

14 విజెర్ వెట సమాదనమ్దాన్ కూడఃజి పాడఃజి మండ్రెజ్ సుడఃదు. పాపం కిఇ, దేవుణు వందిజ్ కేట ఆతి బత్తు బత్తిదెజ్ సుడఃదు. ఎందనిజ్ ఇహిజ, అయాలెకెండ బత్తిఇకాన్, ప్రబుజ్ సుడఃఎన్.

15 ఎయెన్బా దేవుణు బాణిజ్ వాజిని వన్ని దయా దర్థం తప్పి సొన్ఎండ జాగర్త సుడఃదెజ్. ఉండ్రీ సేందు మొక్క పిరిసి దని సేందు నండొండారిజ్ బాద కినిలెకెండ, ఎయెన్బా ఆవిండ జాగర్త సుడఃదెజ్.

16 సావు లెకెండ సాని బూలాజినో, దేవుణు వందిజ్ బక్తి సిల్లెండనో, ఎయెన్బా మన్ఎండ జాగర్త సుడఃదెజ్. వాండ్రు ఉండ్రీ పుటా తిండి వందిజ్, వన్ని పెరి మరిసి ఇని అక్కు పొర్తాన్.

17 మీరు నెసిని లెకెండ, వెనుక వన్ని అప్పొసి. సీని దీవెనమ్కు వాండ్రు కోరితివలె, వాండ్రు నెక్సి పొకె ఆతాన్‡. ఎందనిజ్ ఇహిజ, వాండ్రు కితిక మారిస్తెజ్ వాండ్రు అట్ఎతాన్. వాండ్రు నండొ అడఃబాజి దీవెనమ్కు లొస్తిజ్బా దొహ్కుతె.

18 మీరు, ఇస్రాయేలు లోకుర్ సీనాయి గొరొణ్ డగ్గు వాతి లెకెండ రెఇతిదెర్. ముట్టి నెస్టెజ్ ఆని, సిసు కసిసి, గొప్ప సీకట్మని, తుపాన్ మని గొరొణ్ డగ్గు రెఇతిదెర్.

19 వారు, జోడుబాంకెజ్ ఊహ్కాన్ పిరి జాటు, వర్గిని జాటు వెహార్. అయాక వెహివలె, మరి వరివెట వర్గిమా ఇజి దేవుణుదిజ్ బతిమాల్తార్.

20 ఎందనిజ్ ఇహిజ, “ఉండ్రీ జంతు ఆతిజ్బా, గొరొతు మట్టిజ, దనిజ్ పణాణిజ్ డెయిజి సప్తెజ్”‡, ఇజి దేవుణు వెప్తా ఆడ్ర ఓరిస్తెజ్ అట్ఎతార్.

* 12:12 12:12 దిని అర్థం ఇనిక ఇహిజ, కస్టమ్కు వాని వలె మీరు మనుసు విస్సిఎండ దయరమ్దాన్ నిల్దు ఇజినె. † 12:12 12:12 స్రమెజ్ వాని వలె, మన్సు విస్సిఎండ దయరమ్దాన్ నిల్లి మండ్రు ఇజినె అర్దం. ‡ 12:13 12:13 సామెత 4:26. † 12:17 12:17 మరి ఉండ్రీ రకం వెప్తెజ, వాండ్రు కిత్తి తప్పి బుప్పొకొండెజ్ వన్నిజ్ అట్ఎండ ఆతాద్ ఇజి. ✧ 12:20 12:20 నిర్గమ 19:12,13.

21 అబ్బె తోరె ఆతిక, గొప్ప తియెల్ కల్గిస్సిక. అందెజె మోసె వెహ్తాన్, “నాను గొప్ప తియెల్ ఆజి వణకేసిన”, ఇజి. నని గొరొన్ డగ్గు ఆవద్ మీరు వాతిదెర్.

22 గాని మీరు, సియెను గొరొత్నె వాతి మనిదెర్. బత్తిజిని దేవుణు మంజిని పట్టుమ్దునె వాతి మనిదెర్. ఇహిజ, పరలోకమ్ది యెరుసలెమ్దునె వాతి మనిదెర్. సేన దూతార్ సర్దదాన్ కూడితి మని బానె, వాతి మనిదెర్.

23 దేవుణు తొలిత కొడోజె, కూడితి మని బానె వాతి మనిదెర్. వరి పేర్కు పరలోకమ్దు రాస్తె ఇడ్డె మన్నె. మీరు దేవుణు డగ్గునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమ్దు మని నీతి నిజాయితి మని వరి పాణమ్క, డగ్గునె వాతిమనిదెర్. వారు పూర్తి కిబె ఆతికార్.

24 మీరు యేసు డగ్గునె వాతి మనిదెర్. వాండ్రె, అయా కొత్త ఒప్పుమానం నడిపిస్సికాన్. మీరు, సిల్కరెనె ఆతి నల డగ్గు వాతి మనిదెర్. ఏబేలు నల వెహ్సాని దన్నిముస్కు నెగ్గి మాట వెహ్సాని నల డగ్గు వాతి మనిదెర్.

25 అందెజె, మీ వెట వర్గిజిని దేవుణుదిజ్ జాగర్త వెండ్రు. యా లోకమ్దు, దేవుణు డటం వెహ్సావలె వెండ్రెజ్ కెఇతి ఇస్రాయేలు లోకర్, దేవుణు సీని తీర్పుదాన్ తప్పె ఆదెజ్ అట్ఎతార్ ఇహిజ, పరలోకమ్దాన్ డటం వర్గిజిని వన్నిజ్ నెక్తి పొక్తిజ, మాటు సిక్కుదాన్ తప్పె ఆదెజ్ అట్టుట?.

26 దేవుణు, సీనాయి గొరొత్దాన్ వర్గితివలె, బూమి కద్లితాద్. గాని ఏలు వాండ్రు ఒట్టు కిత మనాన్. “మరి ఉండ్రీ సుటుబా, నాను బూమిదిజ్నె ఆవండ, ఆగాసమ్దిజ్బా కద్లిన్సలె”^{*} ఇజి.

27 ‘మరి ఉండ్రీ సుటుబా’, ఇని మాటదిజ్, కద్లినికెజ్ మారిన్సె ఇజినె అర్దం. ఇహిజ, తయార్ కితికెజ్ కద్లిజి మారె ఆనె ఇజి. ఎందనిజ్ ఇహిజ, కద్లికెజ్ ఎలాకాలం మండ్రెజ్.

28 అందెజె దేవుణు ఏలుబడిః ఎసెజ్బా కద్లిఎద్. అందెజె^{*} దేవుణుదిజ్ వందనం వెహ్సి తియెల్దాన్ గవర్మ్దాన్, వాండ్రు సర్ద ఆని వజి మాడిఃస్నాట్.

29 ఎందనిజ్ ఇహిజ, “మా దేవుణు సుర్పి సెసు ననికాండ్రె.

13

దేవుణుదిజ్ ఎలాగ సర్ద కిబిన్సెజ్

1 క్రీస్తు వెట కూడితి మని తంబెరిజు ఇజి, ఒరెన్ మరి ఒరెన్ వన్నిజ్ ప్రేమిసినె మండ్రు.

2 నెన్ఇ వరిజ్ డగ్గు కిదెజ్ పొస్మాట్. యా లెకెండ డగ్గు కిజి, సెగొండార్, నెన్ఎండనె దూతారిజ్ డగ్గు కిత్రార్.

3 జెలిదు మని వరిజ్ ఎత్తు కిదు. మీరు వరి వెట బాన్ మహివజి ఎత్తుకిదు. బాద ఆని వరిజ్ ఎత్తు కిదు. మీరు వరి లెకెండ బాద ఆజి మహివజి వరిజ్ ఎత్తు కిదు.

4 పెండ్రెదిజ్ విజెరె గవరం సిదెజ్వలె. ఆల్ని మాసిర్ రిఎర్బా, ఒరెన్ మరి ఒరెన్ వన్నిజ్ నమ్మిదెజ్ తగ్గి వరిలెకెండ మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తప్పెండ సిక్కు సీనాన్.

^{*} 12:26 12:26 అగ్గయి 2:6. ^{*} 12:28 12:28 ద్విత్తి 4:24.

5 డబ్బుదిజ్ ఆస అమాట్. మిజి కల్లితి మనిదనితాన్ సర్ద ఆదు. ఎందనిజ్ ఇహిజ, దేవుణు వెప్తా మనాన్, “నాను ఎసెజ్బా మిజి డిఃన్ఎ, నాను ఎసెజ్బా మిజి నెక్కి పొక్ఎ”,* ఇజి.

6 అందెజె దయ్ రమ్దాన్ వెప్తాజ్ అట్నాట్, “ప్రబునె నజి తోడుః. నాను తియెల్ ఆవు. లోకు నజి ఇని కిదెజ్ అట్ఎర్”*.

7 దేవుణు మాట మిజి వెహ్సా, మిజి నడిఃపిసిని వరిజ్ ఎత్తు కిదు. వరి బత్కుదాన్ వాతి విజు నెగ్గి దని వందిజ్ ఎత్తు కిదు. వారు నమ్మిత్తి లెకెండ్ నమ్మిరు.

8 యేసు క్రీస్తు ఇవన్, నేండ్రు, ఎలాకాలం ఉండ్రె లెకెండ్ మంజినాన్.

9 విజు రకమ్కాణి నెన్ ఇ బోదెజ వెట సొన్మాట్. దేవుణు దయా దర్మమ్దాన్ మా మన్ను నత్తు ఆనికాదె నెగెద్. తిండి వందెజ్ మని రూలుజ లోజిజి ఆవెద్. అయాకెజ్ లోజితి వరిజ్ ఇని లాబమ్బా రెవెద్.

10 మజి ఉండ్రె పూజ సిని మాలి పీట మనాద్. దని బాణిజ్, గుడారమ్దు సేవ కిజిని పుజెరిజ తిండ్రెజ్ అక్కు సిల్లెద్.

11 యూదురి రూలు వజ, విజు పుజెరిజ మున్ను మని పెరి పుజెరి పాపం వందిజ్ పూజ లెకిండ్ జంతుజ నల దేవుణు వందిజ్ ఒద్దె కేట ఆతి గదిదు తనాన్. గాని కండ పట్టు వెల్లి సుర్నార్.

12 అందెజె, యేసుబా పట్టుమిది వెల్గు వెల్లి బాద ఆతండ్రె సాతాన్. వన్ని సొంత నల వాక్కి వన్ని లోకురిజ్ పాపం సిలివరి లెకెండ్ కిదెజ్ వాండ్రు పట్టుమిది వెల్గు వెల్లి బాద ఆతండ్రె సాతాన్.

13 అందెజె మాటు పట్టు వెల్గు వెల్లి వన్ని డగ్రు సొన్ని వాండ్రు లాగి ఆతి సిగుదు వన్నివెట కూడ్నాట్.

14 ఎందనిజ్ ఇహిజ యా బూమిదు మజి ఎలాకాలం మని ఉండ్రె పట్టు సిల్లెద్. వాదెజ్ మని పట్టు వందిజ్ మాటు ఎద్రు సుడఃజినాట్.

15 అందెజె, యేసు పేరుదాన్, పూజ లెకెండ్ దేవుణుదిజ్ ఎస్సివలెబా పొగిడిఃజినాట్. ఇహిజ, వాండ్రు ప్రబు ఇజి మా వెయ్దాన్ ఒపుకొడిఃజిని పూజ సీనాట్.

16 మహి వరి వందెజ్ నెగ్గికెజ్ కిదెజ్, వరిజ్ సాయం కిదెజ్ పొస్మాట్. ఎందనిజ్ ఇహిజ, నిని పూజెజ దేవుణు సర్ద ఆనాన్.

17 మీ అతికారిజ మాటెజ్ వెండ్రు. వరి అతికారమ్దిజ్ లోజిదు, వారు మిజి జాగర్ల సూణార్. ఎందనిజ్ ఇహిజ వరి పణిదిజ్ దేవుణుదిజ్ లెక్క ఒవజెప్తెజ్ ఇజి వారు నెస్నార్. మీరు వరిజ్ లోజితిజ, వారు సర్దదాన్ వరి పణిజ్ కినార్. సిలిజ వారు దుకమ్దాన్ కినార్. అయాకెజ్ మిజి నెగికెజ్, సిఉ.

18 మా వందిజ్ పార్లనం కిదు. మా గర్బం మజి గదిన్ఎండ మన ఇజి మాపు పూర్తి నమ్మిజినాప్. మాపు కిజిని దని లోఇ నెగ్రెండ విజు కిదెజ్ కోరిజనాప్.

19 దేవుణు బేగినె నజి మీ డగ్రు మర్జి తలెజ్ మీరు మరి లాపు పార్లనం కిదెజ్ ఇజి నాను ముకెలం బతిమాల్లిన.

20-21 దేవుణు మా ప్రబు ఆతి యేసుజ్ సావుదాన్ నిక్తాన్. వాండ్రె గొరెజ పెరి గవుడుఎన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒపుమానం ముద్ద కిత్తాన్. లోకురిజ్ సమాదనం సిని

* 13:5 13:5 ద్వితి 31:6. * 13:6 13:6 కీర్తన 118:6-7.

దేవుణు, వన్నిజ్ ఇస్టం ఆతికెజ్ కిదెజ్, మిజి నెగ్గికెజ్ వాదెజ్ సాయం కిపిన్. యేసు క్రిస్తు సత్తుదాన్, వన్నిజ్ ఇస్టం ఆతికెజ్ విజు మా లోఇ కిపిన్. వన్నిజ్ ఎల్లకాలం గవ్ఠం మనిద్. ఆమెన్.

22 తంబెరిజాండె, నాను మిజి ఉండ్రీ ఇజ్రి ఉత్తమ్నె రాస్త మన. అందెజె, నాను పణస్తి మాటెజ్ జాగర్త వెండ్రు ఇజి ఉసార్ కిబిన్.

23 మా తంబెరి ఆతి తిమోతి బెలిదాన్ డీఃబె ఆతాన్ ఇజి మీరు నెస్తెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజి నుడఃదెజ్ వన్నిజ్బా నా వెట తన.

24 మిజి నడిఃపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండె వెప్టు. ఇటలిదు మని నమ్మిత్తికార్ మిజి వెన్బాతి లెకెండె వెహ్సినార్.

25 దేవుణు దయా దర్మం మీ విజిదెరె వెట మనిద్.

యాకోబు రాస్తా ఉత్త్రం

నెల్వకిబిసినిక

యా ఉత్త్రం రాస్తా యాకోబు ప్రబుఆతి యేసుజ్ తంబెర్సి ఆతికాన్. యాకోబు యెరుసలేమ్దు మన్ని సజమ్ది పెద్దెలిజ లోఇ ఒరెన్. యాక రాస్తా కాలం రమారమి క్రీస్తు సకం 45 దాన్ 50 నడిఃమి కాలమ్దు రాస్త మనాన్. యా ఉత్త్రమ్దు ముకెలమాతిక నమకమ్దిజ్ రుజుప్ కినికాదె. నమకం నిజమాతికదో ఆవిదో ఇజి ఎలాగ నెస్టెజ్ ఇజి రాస్త మనాన్.

1 దేవుణుదిజ్ని, ప్రబు ఆతి యేసు క్రీస్తుజ్, సేవకినికానాతి యాకోబు, ఆఇ దేసెమ్కాజ్ సెద్రితి మని దేవుణు లోకాజ్ విజేరిజ్ రాసిని ఉత్త్రం. మిజి విజేరిజ్ వందనమ్కు.

మాలెజ్ వానివలె అక్కెజ్ ఓరిస్టెజ్వలె

2-3 నాసు ప్రేమిసిని తంబెరిజండె, నండొ మాలెజ్ వానివలె మీరు సర్దదాన్ మండ్రు. ఎందనిజ్ ఇహిజ, మాలెజ్ వానివలె యేసుప్రబు మున్కు మన్ని నమకం డిస్ఎండ మహిజ, మాలెజ్ బిరిస్టెజ్ మిజి సత్తు మనాద్ ఇజి దినివలెహాన్ రుజుప్ వానాద్.

4 మీరు కిజిని పణిదు డిస్ఎండ ఓరిసి మండ్రు. అయాలెకెండ కితిజ మీరు కస్తం బరిస్సిదన్ని లోఇ పూర్తి ఆతికిదెర్ ఆనిదెర్. అయావెలె మీ గుణమ్దు ఇనికబా తక్కు సిల్లెండ మంజినిదెర్.

5 మీ లోఇ ఎయెజ్బా గెణం తక్కు మహిజ, వాండ్రు దేవుణుదిజ్ లోస్టెజ్. దేవుణు వన్నిజ్ సీనాన్. ఎందానిజ్ లోసినార్ ఇజి కోపం ఆవిండ దేవుణు విజేరిజ్ తక్కు సిల్లెండ సీనాన్.

6 గాని, వాండ్రు కండెకబా అనుమానం సిల్లెండ నమకమ్దాన్ దేవుణుదిజ్ లోస్టెజ్. ఎందానిజ్ ఇహిజ అనుమానం ఆనికాన్ గాలిదాన్ ఎగ్రిని సమ్దరమ్ది ఉల్కాలెకెండ తూల్లి అర్ని జోజ్జివజ ఆనాన్.

7-8 అనుమానం ఆనికాన్ దేవుణు బాణిజ్ ఇనికబా దొహ్కాద్ను ఇజి ఒడ్ఃబినిక ఆవెద్. అనుమానం ఆనికాన్ రుండి మన్కుజ్ ఆజి ఇనిదన్ని లోఇబా స్తిరం సిల్లికాన్.

9 దేవుణుదిజ్ నమ్మితి బీదవాండ్రు, దేవుణు వన్నిజ్ పెరికాన్ కిత్తిజ్ సర్ద ఆజి మండ్రెజ్.

10 అయావజనె ఆస్తి మనికాన్, వన్నిజ్ కల్గితిక తక్కు ఆజి ఇజిరికానాతిజ్బా సర్ద ఆజి మండ్రెజ్. ఎందానిజ్ ఇహిజ ఉండ్రీ గడ్డి పూజు వెటనె రాల్పివజ, ఆస్తి మనికాన్ ఆహె ఆన సొనాన్ ఇజి వాండ్రు నెస్సాన్.

11 పొద్దు సోసి నండొ ఎండ కిత్తిజ గడ్డి వహ్నా సొనాద్, పూజు రాల్పా సొనాద్. అయ పూజు సోకు విజు పాడాఃన సొనాద్. అయావజనె గణస్టెజ్ కిని పణిలోఇ ఆస్తి మన్నికాన్ సిల్లెండ ఆనాన్.

12 మాలెజ్ వానివలె దేవుణు మున్కు నమకం డిస్ఎండ అక్కెజ్ బరిస్సికాన్ సర్ద ఆనాన్. మాలెజ్ విజు బిరిస్తి వెనుక దేవుణుజ్ ప్రేమిస్తివరిజ్ సీనా ఇజి ఒట్టు కిత్తి ఎలాకాలం బత్తిని బత్తు ఇని ఇనాయం దేవుణు సీనాన్.

13 తప్పుపణి కిదెజ్ మన్నుద్ వాతివెలె, అక్క దేవుణు సత్తిక ఇజి ఎయెన్బా వెప్పిక ఆవెద్. ఎందానిజ్ ఇహిజ సెఇ దన్నిదటాన్ దేవుణు తప్పుపణి కిబిస్తెజ్ అట్వన్. తప్పుపణి కిబిస్తెజ్ దేవుణు ఎయెరి మన్నుదుబా ఆస పుటిన్ఎన్.

14 గాని ఒరెన్ ఒరెన్ వన్ని సొంత మన్నుదాన్ మన్ని ఆసదాన్ మర్జి లాగె ఆజి సెఇ పణి కిజినాన్.

15 తప్పుకిదెజ్ మన్ని ఆస ఎలాగ ఇహిజ అయ్లికొడొః పొటాద్ పిండెం ఆతిలెకెండె అయాక పిరితివలె ఏరు ఈబాజినాద్. అయాలెకెండ ఒరెన్ మన్నుదు సెఇ ఆస నండొ ఆజి పాపం పుట్వాద్. పాపం ముద్రితిజ వన్నిజ్ సాపు వాజినాద్.

16 నాను ప్రేఇని తంబెరిజండె, ఎయెర్బా మిజి మోసెం కిపిండ సుడొఃదు.

17 నెగ్గెకెజ్ విజు, కల్లిసిల్లికెజ్ విజు దేవుణు సీని ఇనాయమ్కునె. ఆగనమ్దు మన్ని జాయ్ విజు వుటిస్తి దేవుణుబాణిజ్ నెగ్గెకెజ్ విజు వాజినె. జాయ్ సొన్ని నీడః వానాద్. గాని దేవుణు మార్ఇకాన్.

18 నిజమాతి వన్ని మాటదాన్ వాండ్రు తీర్మనం కిత్తిలెండె దేవుణు మజి కొత్త బత్తు సిత్తాన్. ఎందానిజ్ ఇహిజ పుటిస్తి విజు వనకముస్కు దేవుణు మజి వన్ని వందిజ్ ఎర్లిసి ఇట్టాన్.

దేవుణు మాట వెంజి అయ మాటవజ నడిఃదెజ్వలె

19 నాను ప్రేమిసిని తంబెరుజాండె, యాక నెగ్గెండ వెండ్రు. ఒరెన్ ఒరెన్ బాగ వెంజి, వెహి వెటనె వర్గివిండ, వెహి వెటనె కోపం ఆఎండ మండ్రెజ్.

20 ఒరెన్ కోపం ఆతిజ దేవుణుదిజ్ ఇస్టమాతివజ నీతినిజయ్తిదాన్ పణి కిదెజ్ అట్వన్.

21 అందెజె మన్నుద్ నిండ్రెతి సెఇకెజ్ విజు డిఃసిసీజి, పిరిజివాని సెఇ అలవాటుజ్ విజు డిఃసిసీజి, మిజినె తగిసి దేవుణు మీ మన్నుదు ఇట్టి మాటెజ లొజిదు. దేవుణు మీ మన్నుదు ఇట్టి ఆ మాటెజలొఇ, మిజి గెల్లిస్తెజ్ నత్తు మన్నె.

22 మీరు దేవుణు మాటెజ్ వెండ్రెజె ఆవెద్. దేవుణు మాట వెంజి అయ మాట వజ నడిఃదెజ్బావలె. దేవుణు మాటెజ్ వెంజి అయవజనె నడిఃఎండ మహిజ మిజి మీరె మొసెం కిజినెదెర్.

23 దేవుణు మాట వెంజి అయావజ నడిఃఇకాన్ అద్దమ్దు వన్ని మొకొం సుడొఃతి వన్నిలెకెండె మనాన్.

24 వాండ్రు అద్దమ్దు సుడొఃజి మర్జి సొహి వెటనె వన్ని మొకొం, ఎలాగ మర్రికదొ ఇజి పొస్సినాన్.

25 దేవుణు వెప్తి పూర్తి ఆతి రూలుజ్ లోకాజ్ పాపమ్దాన్ డిఃస్సిస్తాద్వలె. ఒరెన్ లోకు దేవుణు వెప్తి అయ మాటెజ్ విజు నెగ్గెండ సద్వీజి బాన్ మనికెజ్ పొన్ఎండ అయావజనె వన్ని బత్కుదు నడిఃతిజ, వాండ్రు కిని విజు పణిజలొఇ దేవుణు వన్నిజ్ దీవిస్తాన్.

26 ఎయెన్బా, నజి దేవుణు ముస్కు నండొ బక్తి మనాద్ ఇజి వెహి వెనుక, వన్ని నాలిక అడ్డు సిల్లెండ వర్గితిజ వన్నిజ్ మన్నిబక్తి విలువ సిల్లికాద్. వన్నిజ్ వాండ్రె మొసెం కిబె ఆజినాన్.

27 మా బుబ్బాతి దేవుణు సుడొఃతిజ నిజమాతి బక్తి ఇనిక ఇహిజ, యాయ బుబ్బార్ సిల్లి కొడొఃరిజ్, ముండ మణిసి ఆతి అయ్లికొడొఃకాజ్ వరి కస్టమ్దు సాయం కిదెజ్, దేవుణుదిజ్ పడిఃఇ వనకలొఇ కూడొఃఎండ మండ్రెజ్ ఇకాదె నిజమాతి బక్తి.

2

విజేరిజ్ ఉండ్రెలెకెండ్ సుడోదెజ్వలె

1 నాను ప్రేమినిని తంబెరిజండె, గొప్ప జాయ్దాన్ నిండ్రెతి సోకు మన్ని ప్రబువాలి యేసుక్రీస్తుజ్ నమ్మిత్తి మీరు, లోకాజ్ నడిఃమి తేడ తోరిస్మాట్.

2-4 ఎలాగ ఇహిజ బజారం బొందు ఇట్కిజి, నండో దరది సొక్కెజ్ పొర్పాజి ఒరెన్, మరి ఒరెన్ బీదవాండ్రు, మీరు పార్లనం కినిబాన్ యా రిఎర్ వాతార్ ఇహిజ, నెగ్గి సొక్క పొర్పాజి వాతివన్నిజ్ మర్యాద సీజి అయ బీదవన్నివెట, “నీను అబ్బె నిల్అ, సిల్లిజ నా కాల్కు డగ్గు ఇబ్బె అడిగి బన్అ”, ఇజి వెహ్హిజ, మీరు బీదవన్నిజ్ ఆస్తిమన్ని వన్నిజ్ ఎర్లిస్తిలెకెండ్ మంజినాద్. ఈహు మీరు మీ మన్నుదు మన్ని నెజ ఉదెసమ్దాన్ లోకాజ్ తీర్పు కిజినిదెర్.

5 నాను ప్రేమినిని తంబెరిజండె, మీరు నెగ్గెండ వెండ్రు. యా లోకమ్ది బీదవారు దేవుణు మున్ను ఇడ్డి నమకం వందిజ్ ఆస్తి మన్నికారాదెజ్ దేవుణు వరిజ్ ఏర్పాటు కితాన్. దేవుణుదిజ్ ప్రేమినిని వరిజ్ సీనా ఇజి ఒట్టు కిత్తి దేవుణు రాజ్యం దేవుణు వరిజ్ సీనాన్.

6 గాని మీరు బీదవరిజ్ సిగు కిజినిదెర్. మిజి మాలెజ్ కినికార్ ఆస్తిమన్నికారె గదె. మిజి కోర్టుదు లాగ్జి ఒనికార్ వారె గదె.

7 మీరు అనిని యేసుక్రీస్తు నెగ్గి పేరు, వీరె దూసినినార్గదె.

8 దేవుణు మాటదు మన్ని ముకెలమాతి రూలు ఇనిక ఇహిజ, నీను నిజి ప్రేమినిని లెకెండ్ మహివరిజ్బా ప్రేమిన్అ⁵ ఇజి ఆహు కిత్తిజ మీరు బాగ నడిఃసినిదెర్.

9 గాని మీరు విజేరిజ్ ఉండ్రె లెకెండ్ సుడోఎండ మహిజ పాపం కిజినిదెర్. దేవుణు సిత్తి రూలు మీరు తప్పిదెర్ ఇజి తీర్పు వాజినాద్.

10 ఎయెరుబా దేవుణు రూలుజ విజు వన్కాజ్ లోజిజి ఉండ్రె రూలు తప్పిజ విజు రూలుజ్ తప్పిలెకెండ్.

11 మీరు రంకు బూలానిక ఆవద్ ఇజి రూలు మనాద్. లోకాజ్ సప్పిక ఆవద్ ఇజిబా రూలు మనాద్. మీరు రంకు బూలాఇదెర్ గాని లోకాజ్ సప్పిజ విజు రూలుజ్ తప్పిలెకెండ్.

12 లోకాజ్ విడుఃదల సీని రూలుదాన్ దేవుణు మిజి తీర్పు కినినాలె. అందెజె సరి ఆతి మాట వర్గిదు, ఆహె నడిఃదు.

13 ఎందానిజ్ ఇహిజ, కనికారం తోరిన్ఇ వన్నిజ్ కనికారం సిల్లి తీర్పు వానాద్. గాని దేవుణు తీర్పుకినివలె కనికారం తోరిస్తి వన్ని మున్ను దేవుణు కనికారమ్నె గెలిస్నాడ్దె. వన్నిజ్ తీర్పు రెవిద్. ఎందానిజ్ ఇహిజ దేవుణు తీర్పు కిదెజ్ తయార్ ఆతిజ్బా వన్ని కనికారం తీర్పుదిజ్ ఇంక పెరిక.

నెగ్గి పణిని నమకం

14 నా తంబెరిజండె, ఒరెన్ దేవుణు మున్ను నమకం మనాద్ ఇజి వెహ్హి నమ్మకమ్దిజ్ తగ్గివజ పణి కివిండ మహిజ వన్నిజ్ లాబం సిల్లెద్. నన్ని నమకం వన్నిజ్ గెల్వినవద్.

15-16 ఉండ్రె వేల ఒరెన్ తంబెరి గాని తజిసి గాని సరి ఆతి సొక్కపాతెజ్ సిల్లెండ, తిండి సిల్లెండ మహివలె వరిజ్ కావాలిస్తి వనకాజ్ వందిజ్ ఇని సాయం కివిండ, “ఏలు సొన్అ, నీను కాయ్జి నెగ్గెండ ఉణిజి మన్అ”, ఇజి వెహ్హిజ ఇని లాబంబా సిల్లెద్.

17 అయావజనె నమకమ్దిజ్ తగితి పణి కివ్ండ, నమకం ఉండ్రై మహిజ అయ నమకమ్దాన్ ఇని లాబం సిల్లెద్.

18 గాని మీరు ఒప్పుకొడెదెర్ను. ఒరెన్ వన్నిజ్ దేవుణు ముస్సు నమకం మనాద్ ఇజి వెస్సినిదెర్ను, మరి ఒరెన్ వన్నిజ్ నెగ్గి పణిజ్ మన్నె. గాని నెగ్గి పణిజ్ కివ్ండ మిజి నమకం మనాద్ ఇజి ఎలాగ మీరు తోరిస్సిదెర్ ఇజి నాను వెన్బాజిన. నాను నా నెగ్గి పణిజాణ్ నా నమకం తోరిస్సు.

19 దేవుణు ఒరెండ్రై ఇజి నీను నమ్మిజిని. ఆహె నమ్మిదెజ్ నెగ్గెదె. దెయమ్కుబా ఆహె నమ్మిజి తియెలాజి వణకిన్.

20 బుద్ది సిల్లికి, నిజి నమకం మనాద్ ఇజి తోరిసిని నెగ్గి పణిజ్ సిల్లు ఇహిజ అయ నమకం పణిదిజ్ రెఇక ఇజి నీను నెన్ఇదా?

21 మా అనిగొగొ ఆతి అబ్రహాం, వన్ని మరిసి ఆతి ఇస్సాకుజ్ పూజ కిదెజ్ పూజ బసాదు ఒత్తివలె, వాండ్రు కిత్తి పణిదాన్ నీతి నిజయ్దు మన్నికాన్ ఇజి దేవుణు వన్నిజ్ ఇడ్డాన్.

22 సుడోదు, వన్ని నమకమ్ని, వాండ్రు కిత్తి పణి రుండిబా కూడజి వన్ని నమకం పూర్తి ఆతాద్.

23 “అబ్రహాం దేవుణుదిజ్ నమ్మితాన్. అందెజె దేవుణు వన్నిజ్ నీతినిజయ్దు మన్నికాన్ ఇజి ఒప్పుకొటాన్”, ఇజి దేవుణు మాటదు రాస్తి మాట ఆహె జర్గితాద్. మరి దేవుణు కూలాయెన్ ఇజి పేరు వన్నిజ్ వాతాద్.

24 ఎయెన్బా దేవుణు ముస్సు మన్ని నమకం ఉండ్రైదానె ఆవిద్, నెగ్గి పణిజాణ్బా నీతినిజయ్దుకాన్ ఇజి దేవుణు ఇడ్డాన్ ఇజి మీరు నెసినిదెర్.

25 అయావజనె సాని బూలానికాద్ ఆతి రాహాబుబా పట్టుమ్దిజ్ నడి: సిల్లెండ్రై సుడోదెజ్ వాతి వరిజ్ దన్ని ఇండ్రై బాడ్డి సీజి ఆఇ సరి దాన్ పొక్తాద్. అది కిత్తి నెగ్గి పణిదాన్ నీతినిజయ్దుకాద్ ఇజి దేవుణు ఇడ్డాన్.

26 పాణం సిల్లి ఒడోల్ సాతికదె. అయావజనె నెగ్గి పణి సిల్లి నమకం సాతి వజనె.

3

నాలికదిజ్ అడ్డు కిదెజ్

1 నాను ప్రేమిసిని తంబెరిజండె, మీ లొఇ నండొండార్ బోద వెప్పికిదెర్ ఆమాట్. ఎందానిజ్ ఇహిజ, బోదెసినికార్ ఆతి మిజి దేవుణు గటిజ్ ఆతి తీర్పు సీనాన్ ఇజి మీరు నెసినిదెర్.

2 మాటు విజేటి నండొ పణిలొఇ తప్పి సొన్సినాట్. గాని ఎయెన్బా వాండ్రు వెప్పి మాటెజి లొఇ ఎనెజ్బా తవ్విండాతిజి వాండ్రు పూర్తి ఆతికాన్, ఇని తప్ప సిలికాన్. వాండ్రు వన్ని ఒడోల్ మన్ను విజి అణసె ఆజి మండ్రెజ్ అట్నాన్.

3 గుర్రమది వెయ్దు కలెం* ఇట్టిజి అక్క లొజిజినాద్. అయ ఇజిరి కలెమ్దానె మజి ఇస్టమాతి బాడ్డిదు దన్నిజ్ మహైజ్ ఆనాద్.

4 సిల్లిజి ఉండ్రై ఓడోదిజ్ సుడోదు. అక్క ఎసా పెరిక ఆతిజ్బా, పెరి గాలిదాన్ సొనికెజ్ ఆతిజ్బా, ఓడోదు మన్ని సుకాని ఇని ఇజిరి మరదాన్ ఓడో: నడి:పిసినికాన్, వన్నిజ్ ఇస్టమాతి బాడ్డిదు ఒసినాన్.

* 3:3 3:3 గుర్రం వెయ్దు ఇడ్డి ఇజిరి సెక్కు ముక్కు అక్క గుర్రం వెయ్దు మహిజానె దన్నిజ్ నడి:పిన్జ్ ఆనాద్.

5 అయాలెకెండ్ నాలికబా ఇజిరిక ఆతిజ్బా అక్క గొప్పు వనక వందిజ్ పొజిజి వరగిజినాద్ ఎస్సా ఇజిరి సిసు ఆతిజ్బా పెరి గొలొన్ది మరకాజ్ విజు సుర్నపొక్కాద్.

6 నాలికబా ఉండ్రీ సిసు లెకెండ్. ఒడొల్దు మన్ని వనకలొఇ అక్క పూర్తి సెఇక. అక్క ఒరెన్ వన్నిజ్ పూర్తి సెఎణ్ కిజినాద్. నరకమ్దానె వాతి సిసు నాలికాదు కసి వన్ని బత్తు విజు నాసనం కిజినాద్.

7 విజు రకమ్కాణి జంతుజ, ఆగనమ్దు మన్ని పొటిజ, సరాన్కాజ్, ఏరు లొఇ మన్ని విజు మొయెజ, లొజెస్టెజ్ లోకు అట్నాన్.

8 గాని ఎయెర్బా నాలికదిజ్ లొజెస్టెజ్ అట్ఎర్. అది పూర్తి సెఇక. దనిజ్ అడ్డు కిడెజ్ ఎయెర్ అట్ఎర్. సావుదిజ్ తగితి వినం తసినాద్.

9 యా నాలికదానె బుబ్బాతి దేవుణుదిజ్ స్తుతి కిజినాట్. యా నాలికదానె దేవుణు మూర్తి లెకెండ్ పుటిస్తి లోకాజ్ సయిప్ సీజినాట్.

10 ఉండ్రె వెయుదానె నెగ్గి మాటజ్, సయిప్ సీని మాటెజ్ వాజినాద్. నా తంబెరిజాండ్, మీరు ఆహె మంజినిక ఆవిద్.

11 ఉండ్రె ఊటదానె నెగ్గి ఏరుని సెఇ ఏరు రెఉ.†

12 బొడె మరాతు ఒలివ పట్టు అన్ఉ. ద్రాక్కు తివాద్ బొడె పట్టు రెఉ. అయావజనె సొరు ఏరు సొని ఊటదాన్ నెగ్గి ఏరు రెఉ.

రుండి రకమ్కాణి గెణమ్కు

13 మీ లొఇ గెణం తెలివి మన్నికాన్ మహిజ, అక్క వన్ని నెగ్గి బత్తుదాన్ రుజుప్ కిడెజ్. గెణమ్దాన్, లొజిజి మంజిని గుణం వానాద్. నజి గెణం తెలివి మనాద్ ఇజి లొజిజి మంజిని గుణమ్దాన్ వాండ్రు కిని పణి లొఇ తోరిసన్.

14 గాని మీ మన్నుదు నండొ పగ, గోస, మీ వందిజ్ మన్ని మన్ను ఇడొతిజ మీ గెణం వందిజ్ పొజిడెజ్ ఆవిద్. మీ గెణం వందిజ్ వెప్పిక నిజం ఆవిద్.

15 నన్ని బుద్ది దేవుణు సిత్తిక ఆవిద్. అక యా లొకమ్దాన్, లోకు బుద్దిదాన్, సయ్తానుబాణిజ్ వాతి గెణమె.

16 ఎంబె గోస, మీ వందిజె మని మన్ను మనాదొ, అబ్బె టంటెజ్, విజు రకమ్కాణి పాపమ్కు మంజినె.

17 గాని దేవుణుబాణిజ్ వాని గెణం కల్తి సిల్లిక. అయ గెణం మన్నికార్ సమదనమ్దాన్, సార్లిదాన్, విజేరెవెట కూడొజి, లొజిజి మంజిని బుద్దిదాన్, కనికారమ్దాన్, నెగ్గి పణిజాణ్, విజేరిజ్ ఉండ్రెలెకెండ్ సుడొజి, నిజమ్దాన్ పణి కినార్.

18 నమదనం కినికార్ సమదనం విత్తి, నీతి నిజయ్తి ఇని పంట కొయ్నార్.

4

దేవుణుదిజ్ లొజిదు

1 మీ లొఇ జటిజ్ ఆదిజ్, పొట్లాడొడిజ్ బుద్ది మనాద్. సుకం మున్ను మండ్రెజ్ ఇజి మీ మన్నుదు మన్ని ఆసదానె నన్ని బుద్ది వాజినాద్.

2 మీరు ఇనికెజొ దొహ్కూద్ ఇజి ఆస ఆజినిదెర్ గాని అకెజ్ మిజి దొహ్కొండ్ ఆజినె. అయావలె మీరు సప్పిదెర్. ఇతాహ వరిది ఆస ఆనిదెర్ గాని దొహ్కొస్తిజ్ అట్ఇదెర్.

† 3:11 3:11 బూమిలొఇహాన్ నెగ్గి ఏరుని సెఇ ఏరు వానె. బానె సెఇ ఏరునె వానె. తియాజ్ ఆఉ. సొరు మన్నికాదె.

మీరు టంటెజ్ ఆజి పోట్లాడఁజినిదెర్. మిజి కావాలస్తిక ఎందానిజ్ దోహాక్ ఏద్ ఇహిజ, మీరు దేవుణుదిజ్ లోన్ ఇదెర్.

3 మీరు లోస్తివలె మిజి దోహాక్ ఏద్. ఎందానిజ్ ఇహిజ మీరు సెఇ ఉదెసమ్ దాన్ లోస్తిదెర్. సుకం మున్సు మండ్రెజ్ ఇజి మీరు లోస్తిదెర్.

4 మీరు దేవుణుదిజ్ డిసి సోహికిదెర్. యా లోకమ్ దిజ్ ప్రేమిస్తికాన్ దేవుణుదిజ్ విరోధమాతికాన్ ఇజి మీరు నెన్ ఇదెరా? యా లోకమ్ దిజ్ కూల తోహ్తాకాన్ దేవుణుదిజ్ పడిఁజికాన్ ఆనాన్.

5 దేవుణు మా లోఇ ఇడ్డి ఆత్మ, మా వందిజ్ నండో ఆస ఆజినాన్ ఇజి దేవుణు మాటదు వునాద్. అయ మాట నిజం ఇజి మీరు నెసినిదెర్.

6 గాని దేవుణు సత్తుదాన్ కూడిఁతి దయాదర్థం మీరు ఆస ఆని దన్నిజ్ ఇంక నండో సీజినాన్. అందెజె “గర్త ఆని వరిజ్ దేవుణు ఎద్రిసినాన్. గాని తగె ఆతి మన్ని వరిజ్ దయాదర్థం సీజినాన్”, ఇజి దేవుణు మాటదు వెప్పినాద్.

7 అందెజె మీరు దేవుణుదిజ్ లోజిదు. సయ్ తాన్ దిజ్ ఎద్రిస్తు. అయావలె సయ్ తాన్ మీబాణిజ్ ఉహాక్కు సానాన్.

8 మీరు దేవుణు డగ్గు రద్దు. అయావలె మీ డగ్గు రద్దు. అయావలె దేవుణు మీ డగ్గు వానాన్. మీరు కిని పణిజ లోఇ ఇని తప్పుబా మన్ ఏండ మండ్రెజ్, పాపం పణిజ్ విజు డిసిసిదు. దేవుణుదిజ్, లోకమ్ దిజ్, ప్రేమిసిని రుండి మన్ను డిసిసిజి, దేవుణుదిజ్ ప్రేమిసిని ఉండ్రె మన్ను ఆజి మండ్రు.

9 మీ పాపం వందిజ్ ఒడఁబిజి దుకం ఆజి నండో అడఁబాదు. మీరు సిక్కిక డిసి, అడఁబాదు. మీరు సర్ ద డిసి, దుకం ఆదు.

10 దేవుణు ముజాల మీరు తగిజి మండ్రు. అయావలె దేవుణు మిజి గవరం సీనాన్.

11 నాను ప్రేమిసిని తంబెరిజాండె, ఒరెన్ మున్సు ఒరెన్ విరోదం వర్ గిమాట్. మరి ఒరెన్ వన్నిజ్ పడిఁజక వెప్పికాన్, మరి ఒరెన్ వన్నిజ్ తీర్పు కినికాన్. దేవుణు వెహ్తా రూలుదిజ్ విరోదం ఆజినాండ్రె దేవుణు సిత్తి రూలుదిజ్ వాండ్రు నెక్కిపొక్కినాన్. మీరు దేవుణు రూలుజ్ నెక్కిపొక్కిజ మీరు దేవుణు రూలుదిజ్ లోబడఁజదెర్. గాని దేవుణు రూలుజ్ సరిఆతికెజో, ఆవ్ దో ఇజి మీరు తీర్పు తీరిసినికార్ ఆనిదెర్.

12 విజు రూలుజ్ సీనికాన్ దేవుణునె. విజెరిజ్ తీర్పు సీనికాన్ దేవుణునె. ఒరెన్ వన్నిజ్ గెల్పొస్తెజ్ వాండ్రు అట్నాన్. ఒరెన్ వన్నిజ్ నాసనం కిదెజ్ వాండ్రు అట్నాన్. పడఁకాతి వన్నిజ్ తీర్పు సీదెజ్ నీను ఎయి?

మర్ న రోజు వందిజ్ పొజిదెజ్ ఆవ్ ద్

13 నాను వెప్పికాన్ నెగ్రెండ వెండ్రు. మీ లోఇ నెగొండార్ ఈహు వెహ్నార్, “నేండ్రు సిల్లె, విగెహాజ్ ఎంబె ఎంబె ఉండ్రె పట్టుం సొన్ని, అబ్బె ఉండ్రె ఏంటు మంజి బేరం కిజి నండో డబ్బు గణన్న”.

14 అహిజ, విగెహాజ్ నీ బత్తుదు ఇనిక వానాదో నిజి తెలివద్. నీ బత్తు సణెం తోరి ఆజి సణెమ్ దిజె మాయ ఆని ఆవిరి నన్నిక.

15 అందెజె మీరు ఈహు వెహ్తాజ్, “దేవుణుదిజ్ ఇన్ఱం మహిజ మాపు బత్కినావ్, అక్క కినావ్, ఇక్క కినావ్”.

16 గాని మీరు గర్త ఆజినిదెర్. మీరు మీ వందిజె పొజిజనిదెర్. ఇక్క విజు తప్పు.

17 ఎయెర్ బా సరిఆతి పణి ఎమేణిక ఇజి నెసి, అయాలెకెండో కిఏండ మహిజ వాండ్రు పాపం కిజినాన్.

5

ఆస్తి మన్నికార్ జాగర్త మండ్రు

1 ఆస్తి మన్నికార్ నాను వెప్పిక వెండ్రు. మిజి వాని గొప్ప కస్టమ్క వందిజ్ దుకమ్దాన్ నండో అడజబాదు.

2 మీ ఆస్తి విజు పాడాఃన సొనాద్లె. మీ పాతెజ్ విజు సెద తినెలె.

3 మీ బజారం, వెండిదిజ్ కరి తినాద్లె. దేవుణు తీర్పు కినివలె ఆ కరి నీ ముస్సు. రుజుప్ మంజి సిసువజ మిజి నాసనం కినాద్లె. మీరు గణస్తి ఆస్తి విజు, దేవుణు తీర్పు కిని రోజు వందిజ్ కుంబ కిజినిదెర్.

4 సుడఃదు, మీ బూమిదు పణి కిత్తివరిజ్ కూలి డబ్బు సిఇతిదెర్. అయా కూలిడబ్బు మీ ఎద్దు మొరొ ఆజినె. మీ పంట కొయ్తువరి మొరొ గొప్ప సత్తు మన్ని దేవుణుబాన్ సొహాద్.

5 మీరు యా లోకమ్దు మహివలె సుకం ముస్సు. మంజి సర్దదాన్ బత్తితిదెర్. కొయ్దెజ్ బలస్తి మన్ని కోడ్డిలెకెండ కడఃవెరి దినమ్కాజ్ వాని మీ నాసనమ్ వందిజ్ మీ మన్ను బలిసి వాతాద్.

6 తప్పు కిజ వరిజ్ తప్పు కిత్తికార్ ఇజి నేరం మొప్పి, వరిముస్సు తీర్పు తపిసి సప్పిదెర్. మిజి ఎద్రిస్తిజ్ వారు అట్టెవతార్.

కస్టమ్దు ఓరిసి మండ్రు

7 అందెజె, నా తంబెరిజాండె, ప్రబు ఆతి యేసు క్రిస్తు వాని దాక వన్నివందిజ్ ఓరిసి మండ్రు. సుడఃదు, ఒరెన్ రెయ్తు వాండ్రు గొప్ప విలువాతి వన్ని బూమి పంట బూమిపంట వానేండ ఎస్సా కాలం కాన మంజినాన్. ముజాల్ పిరుదిజ్, కడిఃవేరి పిరుదిజ్ వాండ్రు కాన మంజినాన్.

8 అయావజనె మీరుబా ఓరిసి మండ్రు. మీ మన్ను కద్దివీండ ఇడఃదు. ప్రబు ఆతి యేసు క్రిస్తు వాని రోజు డగ్గు ఆతాద్.

9 నాను ప్రేమిసిని తంబెరిజాండె, దేవుణు మిజి తీర్పు కివీండ మండ్రెజ్ ఇహిజ ఒరెన్ ముస్సు. ఒరెన్ మొరొ ఆమాట్. ఎందానిజ్ ఇహిజ దేవుణు మిజి తీర్పు సీనాద్లె. తీర్పు కినికాన్ డగ్గునె మనాన్.

10 దేవుణు మాట వెప్తి ప్రవక్తరు ఎలాగ మహార్ ఇజి సుడఃదు. వరిజ్ నండో మాలెజ్ కిత్తిజ్బా వారు అక్కెజ్ బరిస్తార్.

11 నమకం డిఃన్వీండ బరిసి మహికార్ సర్ల ఆనికార్ ఇజి మాప్ వెప్పినాప్ ఇజి మీరు నెసినిదెర్. యోబు, కస్టమ్కు వాతివలె ఓరిస్తిజ్ దేవుణు ఎలాగ వన్ని ఉదెనమ్కు పూర్తి కిత్తాన్ ఇజి మీరు వెహిదెర్. ఎందానిజ్ ఇహిజ దేవుణు నండో కనికారం, దయ మన్నికాన్.

12 ముకెలమాతి ఉండ్రీ మాట ఇనిక ఇహిజ మీరు ఆగనం తోడు గాని, బూమి తోడు గాని, మరి ఇనిదన్ని తోడుబా గాని అసి ప్రమాణం కినిక ఆవద్. మీ మాట ఒఓ ఇహిజ ఒఓ ఇజి, ఆవద్ ఇహిజ ఆవద్ ఇజి మండ్రెజ్. ఆహె మహిజ దేవుణు తీర్పు సీనివెలె మిజి సిక్కు రెవద్.

నమకమ్దాన్ కూడిఃతి పార్లనం

13 మీ లోఇ ఎయెజ్బా మాలెజ్ వాతిజ వాండ్రు దేవుణుదిజ్ పార్లనం కిదెజ్. మీ లోఇ ఎయెజ్బా సర్దదాన్ మహిజ దేవుణు వందిజ్ పాటెజ్ పార్దెజ్.

14 మీ లోక ఎయెజ్ బా జబ్బు మహిజ వాండ్లు నజం పెద్దెల్ జ కూకైజ్. వారు ప్రబు పేరుదాన్ నూనె రాసి వన్ని వందిజ్ పార్లనం కిదెజ్.

15 నమకమాతి పార్లనం ఆ జబ్బుది వన్నిజ్ నెగెండ్ కినాద్. దేవుణు వన్నిజ్ నిక్కాన్. వన్ని పాపమ్ కు దేవుణు సెమిస్సాన్.

16 అందెజె మీరు నెగెండ్ ఆనివందిజ్ ఒరెన్, పాపమ్ కు మరి ఒరెన్ వన్నిజ్ ఒప్పుకొడిఃజి, ఒరెన్, మరి ఒరెన్ వందిజ్ పార్లనం కిదు. నీతి నిజయ్లు వాండ్లు కిని పార్లననమ్ దిజ్ గొప్పు సత్తు మనాద్.

17 ఏలియ ప్రవక్త మానన్ని లోకునె. వాండ్లు బూమి ముస్కు పిరు రమ ఇజి గటిజ పార్లనం కితిజ్, మూండ్రి పంటెజ్ ఆరు నెలెజ్ దాక బూమి ముస్కు పిరు రెవతాద్.

18 ఏలియ మరి పార్లనం కితిజ్ ఆగసం పిరు సిత్తాద్. పిరు సిత్తిజ్ బూమి పంట సిత్తాద్.

19 నా తంబెరిజాండె, మీరు యాక నెస్తు. మీ లోక ఎయెన్ బా నిజమాతి సరి తప్పిజ, వన్నిజ్ మరి ఒరెన్ నిజమాతి సరిదు తత్తెజె.

20 అహు కితిజ పాపం కిత్తిజ్ వాతి సావుదాన్, వన్ని ఆత్మదిజ్ తప్పిస్సాన్. దేవుణు వన్ని పాపమ్ కాజ్ విజు సెమిస్సాన్.

పేతురు రాస్తి మొదోహి ఉత్త్రం

నెల్వ కిబిసినిక

యా ఉత్త్రం రాస్తికాన్ యేసుప్రబుజ్ అపొస్తుడు ఆతి పేతురు. రమారమి క్రీస్తు సెకం 60 దు యా ఉత్త్రం రాస్తిన్. అయా కాలమ్దు ఆసియాదు బానె బత్తిజి మహి క్రీస్తు లోకాజ్ మాలెజ్ వాజి మహె. ఏలుబడిః కిని రాజుర్ క్రీస్తు లోకాజ్ వరి నమకం వందిజ్ హిమ్స కిత్తార్. వరిజ్ దయరం కిబిసైజ్ యా ఉత్త్రం రాస్తిన్. ముకెలమాతి మాటెజ్ ఇహిజ, కస్టమ్కు వానివలె ఓరిసి మండ్రెజ్, అతికారి లోకాజ్ లోజిజి మండ్రెజ్, దేవుణు వందిజ్ బత్తిదెజ్ ఇహిజ ఎలాగ నినికెజె.

1 యేసు క్రీస్తుజ్ అపొస్తుడు ఆతి పేతురు రాసిని ఉత్త్రం. పొంతు, గలతీయ, కపదోకియ, ఆసియ, బితునియ ఇని దేసమ్కాణ్ సెద్రితి మని ఆఇ దేసెమ్ది వరి లెకెండ్ మనివరిజ్, ఎయెర్ ఇహిజ దేవుణు వన్ని వందిజ్ ఏర్పాటు కితి వరిజ్ రాసిన్.

2 బుబ్బాతి దేవుణు మిజి ఎర్లిస్తాజె ఇజి ఒడఃబితాండ్రె వన్ని వందిజ్ మిజి ఎర్లిస్తాన్. యేసు క్రీస్తుజ్ లోజిజి వన్ని నలదాన్ నొరె ఆజి సుబరం ఆజి మండ్రెజ్ దేవుణు ఆత్మ మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనీద్.

ఎలాకాలం ఎద్రు సుడఃజి మండ్రెజ్.

3-4 మాటు దేవుణుదిజ్ నండో పొగిడిఃనాట్. వాండ్రె, మా ప్రబు ఆతి యేసుక్రీస్తుజ్ బుబ్బ. దేవుణు గొప్ప కనికారమ్దాన్ మజి కొత్త బత్తు. సితాన్. ఎలాగ ఇహిజ, యేసు ప్రబుజ్ సాతి వరి లోఇహాన్ నిక్తాన్. నిక్తిజ్ ఎల్లకాలం ఎద్రు సుడఃజి మండ్రెజ్ కొత్త బత్తు. మజి సితాన్. అక్కదె అవిండ మజి ఉండ్రె అక్కు సితాన్. అక్కు పాడాఃజి సాన్ఇక, పూర్తి నెగ్గిక. ఎల్లకాలం మంజినిక. అక్కు పరలోకమ్దు మీ వందిజ్ ఇట్టా మనాన్.

5 మీరు దేవుణుదిజ్ నమ్మితిజ్ దేవుణు వన్ని గొప్ప సత్తుదాన్ మిజి కాపేకిజి ఇడ్వాన్. కడెవెరి రోస్కాణ్ మజి వాని సిక్కుదాన్ ఎలాగ గెల్పిస్నాన్ ఇజి తోరిస్నాన్.

6 దిన్ని వందిజ్ మీరు నండో సర్ల ఆదు. గాని ఏలు సెగం రోస్కు మిజి కల్లితి అనెకమాతి విజు రకమ్కాణి కస్టమ్క వందిజ్ దుకం ఆదెజ్ వలె.

7 ఎండనిజ్ ఇహిజ, పడాఃజి సాని బజారం సినుదు ఇడ్డి సుబ్రం కినార్ గదె. అయ లెకెండ్ బజారం ముస్కు విలువ మన్ని మీ నమకమ్బా కల్లి సెలిక ఇజి రుజుప్ కిదెజ్ వలె. ఆహె రుజుప్ కితిజి యేసు క్రీస్తు తోరె ఆనివలె నని నమకమ్ వందిజ్ మిజి పొగిడిఃనాన్. మిజి, గొప్ప గనం దోహ్కాద్.

8-9 మీరు వన్నిజ్ సుడఃజినిదెర్ గాని వన్నిజ్ ప్రేమిసినిదెర్. ఏలు సుడఃఎండ మహిజ్బా వన్నిజ్ నమ్మిజినిదెర్. మరి, వెప్టాజ్ ఆట్ఇ నని గొప్ప సర్లదాన్ సర్ల ఆజినిదెర్. ఎండనిజ్ ఇహిజ మిజి యేసు క్రీస్తు ముస్కు మన్ని నమకమ్దానె, మీ పాణం ఎలాకాలం మంజిని కిక్కుదాన్ గెల్పిస్టెజ్ అట్టాద్.

10 మిజి వాని రక్కుణ వందిజ్ దేవుణు మాటెజ్ వెప్టి ప్రవక్తరు రెబాతరె బాగ నెస్టెజ్ సుడుఃతార్. దేవుణు మిజి సీదెజ్ ఇడ్డి యా దయా దర్మం వందిజ్ వారు వర్లితార్.

11 క్రీస్తు కష్టమేకు ఓరిస్తీ వెనుక గొప్ప గనం కల్గినాడే ఇజ ప్రవక్తరు లోక మన్ని క్రీస్తు ఆత్మ అక్క జర్గివీండ మహి నండొ ముందాలనె వరిజ్ వెహ్తా మహార. వెహ్తాజ్ దన్ని అర్ధం ఇనిక ఇజి వారు రెబాతార. అక్కెజ్ ఎసెజ్ జర్గినెలె, ఎలాగ జర్గినెలె ఇజి రెబాతార.

12 ఆహు రెబాతిజ్, వారు వరి వందిజ్ నె ఆవద్, మీ వందిజి వెహ్సినార ఇజి దేవుణు ఆత్మ వరిజ్ నెస్పిస్తారన్. పరలోకమదాన్ దేవుణు షొక్తి వన్ని ఆత్మ సత్తుదాన్ మిజి సువార్త వెహ్తాకార్ యాక్కెజ్ మిజి నెస్పిస్తారన్. పరలోకమదు మని దూతెజ్ బా దిన్ని వందిజ్ నెస్పెజ్ ఇజి ఆస ఆజినారన్.

దేవుణు వందిజ్ కేట ఆజి మండ్రు.

13 అందెజె మీ మన్నుదిజ్ తయార కిజి మండ్రు. మన్నుదు అణసె ఆజి మండ్రు. యేసుక్రీస్తు తోరె ఆనివలె మిజి దోహాక్కి దేవుణి దయా దర్మం వందిజ్ పూర్తి ఆసదాన్ ఎద్రు సుడెజి మండ్రు.

14 దేవుణుదిజ్ లోజిజి వన్ని కొడోర్ లకెండ మండ్రు. ముజల్ నె మీరు దేవుణుదిజ్ నెన్ ఎండ మహివలె సెజ ఆసెజి వందిజ్ లెకెండ ఆమాట్.

15 గాని మీరు కిని విజు దని లోనుబా దేవుణు వందిజ్ కేట ఆజి మండ్రు. ఎండనిజ్ ఇహిజి వన్ని సొంతం ఇజి మిజి ఇడ్డికాన్ పరిసుదం ఆతికాన్.

16 ఎండనిజ్ ఇహిజి దేవుణు పరిసుదం ఆతికాన్. అయ లెకెండ మీరుబా పరిసుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బ ఇజి కూక్కి మీరు పార్దనం కిజిని దేవుణు విజెరిజ్ వరి పణిజి సుడెజి ఇని తేడః సిల్లెండ తీర్పు కిజినాన్. అందెజె మీరు యా లోకమదు కూడః వాతి వరిలెకెండ బత్కిని వలె దేవుణుదిజ్ తియెల్ ఆజి మండ్రు.

18 మీ అనిగొగొర్ బత్కిని లెకెండ దేవుణుదిజ్ నెన్ ఎండ బత్కిని మీ బత్కు పణిదిజ్ రెజక. నన్ని బత్కుదాన్ యేసు ప్రబునె మిజి డిఃబిస్తారన్. సిల్లెండ ఆజి సొని వెండి బజారం మిజి డిఃబిన్ ఎతాద్ ఇజి నెస్పిదెర్ గదె.

19 గాని ఇని తపు సిలి గొరె పిల్ల నని యేసుక్రీస్తు విలువాతి నలదాన్ నె మీరు డిఃబె ఆతిదెర్.

20 యా లోకెమదిజ్ పుటి నెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్గిస్తారన్. గాని యా కడెఃవెరి రోస్కాజ్ నె వన్నిజ్ షొక్తాన్. మీ వందిజె షొక్తాన్.

21 సాతి వరిబాణిజ్ దేవుణు నిక్తి యేసు క్రీస్తు వెటనె మిజి దేవుణు మున్ను నమకమ్ మనాద్. నిక్తిజ్ వన్నిజ్ గొప్ప పెరికాన్ ఇజి ఇట్టాన్. అందెజె మీ నమకం దేవుణు మున్ను ఇడ్డిదెర్. అందెజె దేవుణు ఒట్టు కితి దనిజ్ ఎద్రు సుడెజి మంజినిదెర్.

22 నిజమాతి మాటదిజ్ మీరు లోజితిజ్ మీరు టేటజ్ ఆతిదెర్. అందెజె నమ్మితి వరిజ్ కల్లి సిల్లెండ ప్రేమిసినిదెర్. అహిజి నిజమాతి ప్రేమదాన్ మీ మన్ను పూర్తి సెమిస్తెజ్ వలె.

23 ఎండనిజ్ ఇహిజి సాజి సొని లోకాజ్ ఆవద్. గాని ఎల్లకాలం బత్కిని దేవుణుదునె మీరు పుట్టిదెర్. ఎల్లకాలం బత్కిని దేవుణు మాటదాన్ నె మీరు మరి పుట్టిదెర్.

24-25 ఎండనిజ్ ఇహిజి, “విజెరె లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వహ్నాద్. పుజు రాల్ప అర్నాద్. గాని ప్రబు ఆతి దేవుణు మాట ఎల్లకాలం మంజినాద్”, అయా మాట ఇనిక ఇహిజి మిజి సువార్త వెహ్తా మని మాటనె.

2

1-3 యేసు క్రీస్తు ఎసా నెగ్గికాన్ ఇజి మీరు నెసి సుడేజి మహిదెర్. అందెజె ఆఇ వన్ని ముస్సు కుట్ర కినికెజ్, విజు మొసెం పణిజ్, మీ మన్సుదు మనికెజ్, డాఃప్పి మరి ఉండ్రీ వెప్పికెజ్, కినికెజ్, గోస, మరిఒరెన్ వన్నిజ్ దూసిస్సిక యాకెజ్ విజు డిఃస్తు. ఏలు పుట్టి ఇజ్రి కొడోఱ్ లెకెండ దేవుణు మాట ఇని కల్తి సీలి పాలు ఉండెజ్ నండో ఆస ఆదు. దని నత్తుదాన్ పిరిజి మీ బత్సు రక్సిస్తు.

పాణం మన్ని పణుకు, దేవుణుదిజ్ ఎర్లిసి మన్ని లోకుర్.

4 మీరు బత్తిజి మని క్రీస్తుబాన్ వాతిదెర్. ఇల్లు తొప్పికార్ పణిదిజ్ రెఇక ఇజి నెక్కి పొక్కి పణుకు లెకెండె క్రీస్తు. లోకుర్ వన్నిజ్ నెక్తపొక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్.

5 మీరుబా పణుకుజ్ లెకెండె దేవుణు మండ్రెజ్ ఇజి తొహె ఆని గుడిదిజ్ మీరు పణుకుజ్ లెకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పొగడిఃజి, వందనమ్కు వెప్పి, వన్నిజ్ లొజిజి మంజి యేసు క్రీస్తు వలెహాన్ వన్నిజ్ తగితి పూజెజ్ సీదు.

6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియెనుదు ఉండ్రీ పణుకుదిజ్ ఎర్లిసిన. అయా మూల పణుకు గొప్ప విలువాతిక. వన్ని ముస్సు నమకం ఇడ్వికాన్ ఎయెన్బా సిగు ఆవెన్.

7 అందెజె, యేసు క్రీస్తుజ్ నమ్మిత్తి మిజి, యా పణుకు గొప్ప విలువాతి పణుకు. గాని నమ్మిఇ వరిజ్ ఇనిక ఆనాద్ ఇహిజ, “ఇల్లు తొప్పికార్ నెక్కి పొక్కి పణుకునె మూలదిజ్ మూల పణుకు ఆతాద్”.

8 మరి రాస్త మనాద్ ఇనిక ఇహిజ “అయ పణుకునె లోకాజ్ ఆడ్డు కినాద్. అయ పణుకుదిజ్ తొరొడిఃజి అర్నార్. ఎలాగ్ అర్నార్ ఇహిజ దేవుణు మాటదిజ్ లొజిఎర్. దేవుణు మాటదిజ్ లొజిఇకార్ అర్నార్ ఇజి దేవుణు ముందాలై నెస్తాండ్రె వెప్తా మహాన్.

9 గాని మీరు దేవుణు ఎర్లిస్తి జాతి. రాజుజ్ పుజెరి లోకుర్. దేవుణుదిజ్ కేట ఆతి వన్ని సొంత లోకుర్. ఆహె పాపం ఇని సీకటిదాన్ వాని గొప్ప బమ్మాతి జాయ్దు మిజి కూక్త తతాన్. వన్ని గొప్ప బమ్మాతి పణిజ వందిజ్ సాటిస్తెజె ఇట్టాన్.

10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొహ్కెతాద్. ఏలు కనికారం దొహ్కెతాద్.

11 నాను ప్రేమిసిని తంబెరిజాండె, నాను మిజి బతిమాల్లి వెప్పిన, మీరు యా లోకమ్ది వరి లెకెండె అఇదెర్, ఆఇ దేసెమ్ది వరి ననికిదెర్. దేవుణు వందిజ్ మని ఆసెజ అడ్డు వాజని ఒడోల్ది ఆసెజ్ డిఃస్తు.

12 దేవుణుదిజ్ నెన్ ఇ లోకుర్ నడిఃమి మీరు నెగ్రెండ మండ్రెజ్. ఎండనిజ్ ఇహిజ ఇని దని లొఇబా మిజి సెఇకార్ ఇజి వారు వెప్తాజ, మీ నెగ్గి బత్కుదిజ్ సుడేజి దేవుణు తీర్పు కిదెజ్ వాని రోజుదు వారు దేవుణుదిజ్ పొగడిఃదెజ్.

అతికారమ్దు మన్ని వరిజ్ లొజిజి మండ్రు.

13-14 ఏలుబడిః కినివరి లొఇ పెరికాన్ ఆతి రాజుజ్ గాని, అతికారమ్దు మని వరిజ్ గాని క్రీస్తు వెప్తా లెకెండె లొజిజి మండ్రు. తప్ప కితి వరిజ్ సిక్స సీదెజ్, నెగ్గికెజ్ కితి వరిజ్ పొగడిఃదెజ్ విరిజ్ పొక్తాన్ గదె.

15 ఎందనిజ్ లోజీదెజ్ ఇహిజ, మీ నెగ్గి పణిజ తోరిసి మీరు బుద్ది సిల్లెండ వర్గిని వరి వెయు మూక్తెజ్ ఇజి దేవుణు కోరిజినాన్.

16 మీరు డిజె ఆతి లోకుర్. అహిజ, మీరు ఎయెర్ నెసెఎండ సెఇ పణిజ్ కిదెజ్ ఆవద్. దేవుణు అడ్డి పణి కినివరి లెకెండ మండ్రు.

17 విజెరిజ్ మర్యాద సీదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజుజ్ మర్యాద సీదు.

18 పణి మణిసిర్ వరి ఎజుమానిరిజ్ నండొ మర్యాద సీజి లోజీజి మండ్రెజ్. మీ మున్సు కనికారమ్దాన్ సార్లిదాన్ మని వరిజె ఆవద్. మీ మున్సు కనికరం సిలి వరిజ్ బా లోజీజి మండ్రు.

19 ఎందనిజ్ ఇహిజ, నాయం సిల్లెండ ఎయెన్ బా మిజి బాద కితిజ అక్కు మీరు దేవుణు వందిజ్ ఓరిస్తు. ఆక నెగ్గికదె. దేవుణుదిజ్ ఇస్తుమాతి పణిసె.

20 మీరు తపు కితి వందిజ్ ఉండ్రె దెబ తిహిజ అక ఓరిస్సిదెర్. గాని మిజి ఇని లాబం? గాని దేవుణు ఎద్రు సరి ఆతికెజ్ కితి దనిజ్ సిక్కు వానివలె అక ఓరిస్సిజ ఆక నెగ్గికదె. దిని వందిజె దేవుణు మిజి ఏర్పాటు కిత్తాన్.

21 ఎందనిజ్ ఇహిజ క్రీస్తుబా మీ వందిజ్ కస్టం ఓరిస్తాండ్రె మీరుబా వాండ్రు నడిఃతి లెకెండ నడిఃదెజ్ ఉండ్రె గుర్తు తోరిస్త సితాన్.

22 "క్రీస్తు ఇని తపుబా కివెతాన్. వన్ని మాటెజ్ లోఇ ఇని అబద్దమ్ బ సిల్లెతాద్.

23 వన్నిజ్ దూసిస్తి వలె మర్జి దూసిన్ ఎతాన్. వన్నిజ్ మల్లెజ్ కితివలె వరిజ్ బెద్రిన్ ఎతాన్. నాయమ్దాన్ తీర్పు కిని దేవుణుదిజ్ వానిజ్ వాండ్రె ఒపజెపె ఆతాన్.

24 యేసుక్రీస్తు సిలువాదు సాతివలె మా పాపమ్ కు పిండితాన్. ఎందనిజ్ ఇహిజ మాటు పాపమ్ కు పూర్తి డిఃసినిదెజ్ ఇజి, దేవుణు ఎద్రు సరి ఆతి బత్తు. బత్కిదెజ్ ఇజి. వన్ని ఒడొల్ ది దెబ్బెజాణిజ్ మాటు నెగెణ్ ఆతాట్.

25 ఎందనిజ్ ఇహిజ మీరు గొర్రెజ్ లెకెండ తప్తి సాహిదెర్. గాని ఏలు గవుడుఃఎన్ ఆతి వన్ని డగ్గు, మీ పాణం కాప్ కిని వన్ని డగ్గు మర్జి వాతిదెర్.

3

అల్పమాసిర్

1-2 అయావజనె, అల్పిక్ ఆతికెజ్ వన్కా సొంత మాసిరిజ్ లోజీజి మండ్రెజ్. ఎందనిజ్ ఇహిజ, మాసిర్ దేవుణు మాట నమ్మిఇకార్ ఆతిజ్ బా వన్కా నెగ్గి బత్కుదాన్ దేవుణుబాన్ వరిజ్ తతెజ్ అట్టె. ఎలాగ ఇహిజ వన్కా కల్పిసిల్లి బత్కుని, దేవుణు మున్సు మన్ని తియెల్ నూణారె దేవుణుదిజ్ నమ్మినార్.

3-4 నెగ్రెండ తోర్ ఆదెజ్ ఇజి బుర్ర డూసి మండ్రెజ్, బజారం గొలున్సు ఇట్కిదెజ్, నెగ్గి పాతెజ్ పొర్పాదెజ్, గాని వనక వందిజె మన్సు ఇడొదెజ్ ఆవద్. మీ మన్సుదు ఇని ఇనికెజ్ ఇడొజినిదెర్ ఇజి సుడొదు. ఇనికెజ్ ఇహిజ సార్లిదాన్, నిపాతి మన్సుదాన్, పాడాఃజి సొన్ ఇ నన్ని నెగ్గి గుణమ్ కు మన్సుదు ఇడొదు. నన్నికదె దేవుణుదిజ్ గొప్ప విలువాతికాద్.

5-6 అయావజనె, పూర్పమ్ దు దేవుణు మున్సు నమకం ఇడ్డి బోదెక్, దేవుణు ఒట్టు కితి దన్నిజ్ ఎద్రుసుడొఃజి మహెనె, వన్కా సొంత మాసిరిజ్ లోజీజి వన్కా నెగ్గి గుణమ్ కు అయాలెకెండ తోరిస్తె. అబ్రాహం ఆల్పి ఆతి సార నన్నికదె. అది

అబ్రాహాముజ్ లోజీత్తాదె, వాండ్రు నా మున్ను అతికారం మన్నికాన్ ఇజి మర్యాద సిత్తాద్. మీరుబా అయావజనె సరి ఆతికెజ్ కిజి ఇనిదన్నిజ్ బా తియెల్ సిల్లెండ మహిజ సార పొటది గాల్కిక్ ఆనిదెర్.

7 అయావజనె, మాసీర్ వరి బోదెకాజ్, మజి ఇంక సత్తు తక్కు మనికెజ్ ఇజి నెసి, వన్యాజ్ గవరం సీజి, నెగ్గెండ సుడేజి మండ్రెజ్ వలె. దేవుణు కనికారమ్ దాన్ సిత్తి ఎలాకాలం బత్తిని బత్తు ఉండ్రె లెకెండ మీ వెట వనకాజ్ బా సీనాన్. అందెజె వన్యాజ్ మీరు మర్యాద సీదెజ్. అయాలెకెండ కితిజ మీ పార్దనమ్ దిజ్ ఇని అడ్డుబా మన్ వద్.

సరి ఆతికెజ్ కితి వందిజ్ వాజిని బాద

8 ఆక్కర్దు నాను విజేరిజ్ వెప్పిన, ఉండ్రె మన్ను ఆజి మండ్రు. ఒరెన్ మరి ఒరెన్ వెట వన్నిజ్ సర్ల మహివలె గాని దుకం మహివలె గాని కూడేజి పాడేజి మండ్రు. తంబెరిజు లెకెండ ఒరెన్ మరిఒరెన్ వన్నిజ్ ప్రేమకిజి మండ్రు. ఒరెన్ మరిఒరెన్ వందిజ్ పాణం నొత్తెజ్. నాను పెరిక ఇజి గర్త ఆవిండ విజెరె వెట ఉండ్రె మన్ను ఆజి మండ్రు.

9 ఎయెన్ బా మిజి కీడు కితిజ మరజి వన్నిజ్ కీడు కిమాట్. దూసిస్తిజ మరజి దూసిస్మాట్. ఆసా కివిండ వరిజ్ నెగ్గెకెజ్ రపిద్ ఇజి దేవుణుదిజ్ వెప్తు. ఎందనిజ్ ఇహిజ మిజి దేవుణు బాణిజ్ నెగ్గెకెజ్ దోహ్ కెజె, దేవుణు మిజి దీవిస్తిజె, వన్ని వందిజ్ ఎర్గిసి ఇట్టా మనాన్.

10 అందెజె “నెగ్గె బత్తు బత్తిదెజ్ సుడేజినాన్, నెగ్గె రోస్సు గడేపైజ్ సుడేజినాన్ ఎయెన్ బా సెఇ మాటెజ్ వర్గివిండ, అబద్దం మాటెజ్ వర్గివిండ మండ్రెజ్ వలె.

11 వాండ్రు సెఇకెజ్ డిసి మండ్రెజ్, నెగ్గెకెజ్ కిజి మండ్రెజ్. సమదనమ్ వందిజ్ సుడేజి అక్కాదె దోహ్ కెజ్ ఇజి దన్ని వందిజ్ రెబాదెజ్.

12 ఎందనిజ్ ఇహిజ, దేవుణు ఎర్దు సరి ఆతికెజ్ కిని వరిజ్ దేవుణు కాప్ కిజినాన్. వరి పార్దనమ్ కు వెనాన్. గాని సెఇ పణిజ్ కిని వరివెట దేవుణు వన్ని మొకొ కోపం దాన్ ఇడ్డాన్”.

13 మీరు నెగ్గె పణిజ్ కిదెజ్ ఇజి నండో ఆస ఆజి మహిజ, ఎయెర్ బా బాద కివర్ గదె.

14 గాని దేవుణు ఎర్దు సరి ఆతికెజ్ కితి వందిజ్ ఉండ్రె వేలా బాద వాతిజ్ బా సర్ల ఆదు. వరిజ్ తియెల్ ఆమాట్. వరిజ్ బెద్రిమాట్.

15-16 మీ మన్నుదు క్రీస్తుజ్ మీ ప్రబు ఇజి బనె కిదు. మరి, మీ నమకమ్ వందిజ్ మిజి వెన్ బాని వరిజ్ నెగ్గెండ వెప్తాజ్ ఎస్తివలెబా తయార్ ఆజి మండ్రు. గాని సార్లిదాన్, దేవుణుదిజ్ తియెల్ దాన్ వెప్తాజ్. ఎందనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎర్దు నిపాతి మండ్రెజ్. మీరు క్రీస్తు లోకుర్ ఇజి, నెగ్గె గుణమ్ కు కల్లిజి మనికార్ ఇజి సుడేజి వారు సిగు ఆదెజ్.

17 సరి ఆతికెజ్ కితి వందిజ్ కస్టం బరిస్టెజ్ ఇజి దేవుణు ఇస్టం ఆతిజ అక్క నెగ్గికాద్. సెఇకెజ్ కితి వందిజ్ కస్టం బరిసిని మున్ను అక్కాదె నెగ్గికాద్.

18 ఎందనిజ్ ఇహిజ క్రీస్తుబా ఉండ్రె సుటునె పాపమ్ కు లాగ్ దెజ్ సాతాన్. మజి దేవుణుబాన్ తతెజ్ ఇజి దేవుణు ఎర్దు నీతిమనికాన్ ఆతికాన్ దేవుణు ఎర్దు నీతి సిల్లెండ మహి వరి వందిజ్ సాతాన్. వన్ని ఒడోల్ సప్తార్. గాని దేవుణు ఆత్మ వన్నిజ్ నిక్రాన్.

19 క్రీస్తు ఆత్మ అయా లోకమ్దు తోహా ఆతిమని వరి నడిఃమి సాహాండ్రె సువార్త సాటిస్తాన్.

20 మీరు నోవవు కాలమ్దు దేవుణుదిజ్ లోజిఏండ మహికార్. నోవవు ఓడః తయార్ కిజిమహివలె దేవుణు విరివందిజ్ ఓరిస్త మహాన్. గాని ఓడః తయార్ ఆతిజ్ సెగొండారె, ఇహిజ ఎనిమిది మణిసిరె పెరి గడ్డదాన్ తప్రె ఆతార్.

21 యాక బాప్తిసమ్దిజ్ పోలిత మనాద్. యా బాప్తిసమ్దానె దేవుణు మిజి రక్సినిసాన్. యా బాప్తిసం ఒడోల్ సుబ్బరం ఆదెజ్ ఆవిద్. గాని ఏలు దేవుణు ఎర్దు పాపం సిల్లెండ మండ్రెజ్ ఒప్పుకోడఃజినాప్ ఇజి తోరిస్తెజె యా బాప్తిసం. యేసు క్రీస్తు సావుదాన్ నిజిత్తిజ్ మీరు సావుదాన్ తప్రె ఆతిదెర్ ఇజి తోరిస్తెజె.

22 యేసు క్రీస్తు సావుదాన్ నిజితండ్రె పరలోకమ్దు ఎక్సి సాహాండ్రె, దూతారిజ, అతికారిజ, సత్తు మన్నివరిజ వన్ని అడ్డి ఇట్టాండ్రె, దేవుణు ఉణెర్ పడఃకాద్ బస్తాన్.

4

పేతురు రాస్తొ మొదోహి ఉత్తం

1 అందెజె క్రీస్తు, వన్ని ఒడోల్దు కన్ఠం ఓరిస్తొ లెకెండ కన్ఠం ఓరిస్తెజ్. మీరుబా మన్ను తయార్ కిజి మండ్రు. ఎందనిజ్ ఇహిజ ఒడోల్దు కన్ఠం ఓరిస్తొకాన్ పాపమ్దు నడిఃవన్.

2 అహిజ ఏలుహాన్ అసి సావుదాక, మాములుక లోకుర్ ఆస ఆని వజ ఆవిద్, దేవుణుదిజ్ ఇన్ఠం ఆతి లెకెండ బత్కిదెజ్.

3 గడిఃస్తొ సాహి కాలమ్దు దేవుణుదిజ్ నెసికార్ బత్కిని లెకెండ మీరు బత్కిజి మహిదెర్. ఎలాగ ఇహిజ, రంకు బూలాజి, ఒడోల్ వందిజ్ ఆసెజ్ ఆజి, కల్లు ఉణిజి సోసి, సిగు సిల్లెండ డాట్టి కర్గిజి, కల్లు విందుజ్ నడఃపిసి, దెయమ్కాజ్ పూజ కిజి మహిదెర్.

4 ఏలు మీరు వరివెట కూడఃఎండ, వారు కిని వెరి పణిజ్ లొఇ సాన్ఎండ ఆజినిజ్ వారు బమ్మ ఆజి మిజి దూసినినార్.

5 గాని బత్కిని వరిజ్ సాతి వరిజ్ తీర్పు తీరిస్తెజ్ తయార్ ఆజి మని డేవుణుబాన్ వారు బత్కితి బత్కు వందిజ్ ఎందనిజ్ నన్ని సెకెజ్ కిజి బత్కిత్తార్ ఇజి వెహ్తెజ్ వలె.

6 అందెజె సాతిసాహి నమ్మిత్తి వరిజ్ సువార్త సాటె ఆజి మహాద్. ఎందనిజ్ ఇహిజ యా బత్కుదు మహివలె లోకాజ్ తీర్పు లెకెండ సావు వానాద్. గాని సాతి వెనుక దేవుణు బత్కిజిని లెకెండ బత్కిదెజె.

7 అహిజ విజు దన్నిజ్ ఆక్కురో స్కూ వాజినాద్. అందెజె నెగ్గి బుది కల్గిజి మండ్రు. మన్నుదు అణసె ఆజి మండ్రు. నస్తవలె మీరు ప్రార్దనం కిదెజ్ అట్టిదెర్.

8 అక్కుదె ఆవిద్. విజు దని ముస్కు మని సజతి ఇనిక ఇహిజ, ఒరెన్ మరి ఒరెన్ వన్నిజ్ నెగ్రెండ ప్రేమ కిజి మండ్రు. ఎందనిజ్ ఇ హిజ మహికార్ కితి విజు తప్పజ్ మాటు ప్రేమదాన్ సెమిస్తెజ్ అట్నాట్.

9 మొరొ ఆవిండ ఒరెన్ మరి ఒరెన్ వన్నిజ్ డగ్గు కిజి సీనికార్ ఆజి మండ్రు.

10 ఒరెన్ మరి ఒరెన్ వన్నిజ్ దేవుణు సీతి వరమ్దాన్ తోడుః కిజి మండ్రెజ్. దేవుణు సీతి విజు రకమ్ది వరమ్కు నెగ్రెండ వాడు కొండెజ్.

11 ఎయెన్బా దేవుణు మాట బోదిస్తాన్ ఇహిజ వాండ్రు దేవుణు మాట బోదిస్తెజ్ వలె. ఎయెన్బా మహి వరిజ్ తోడుః కిదెజ్ ఇహిజ దేవుణు సీతి సత్తుదాన్ కిదెజ్ వలె.

యేసు క్రీస్తు పేరుదాన్ దేవుణుడిజ్ఞ పొగడూ; కల్గిదెజ్ఞ ఇజి యాకెజ్ఞ విజు కిదు. వన్నిజ్ఞనె అంతు సిల్లెండ ఎల్లకాలం గనమ్ని, సత్తు మనీద్. ఆమెన్.

12 నాను ప్రేమిసిని తంబెరిజాండె, మీ నమకం ఎలాగిమహ్నికద్ ఇజి రుజుప్ కిదెజ్ఞ సిసు నని పెరి కష్టమ్కు వానివలె ఇనిక జగ్గినాదొ ఇజి బమ్ము ఆమాట్.

13 క్రీస్తు మహిమదాన్ యా లోకమ్దు వానివలె మీరుబా గొప్పు సర్ల ఆజి మండ్రెజ్ఞ ఇజి క్రీస్తు ఓరిస్తి కష్టమ్క లోఇ మీరుబా కూడ్డి ఓరిసి సర్ల ఆదు.

14 క్రీస్తు వందిజ్ఞ ఎయెన్బా మిజీ దూసలాడిఃతిజ సర్ల ఆదు. ఎందనిజ్ఞ ఇహిజ గొప్పు పెరికాన్ ఆతి ఆత్తు, ఇహిజ దేవుణు ఆత్తు మీ ముస్కు మనాద్.

15 మీ లోఇ ఎయెన్బా ఓరిస్తిజ్ఞ ఇహిజ అక్క ఒరెన్ వన్నిజ్ఞ సప్తి వందిజ్ఞ ఆవెద్. డొఃజు కితి వందిజ్ఞ ఆవెద్. సెన పణి కితి వందిజ్ఞ ఆవెద్. అఇ వరి వెట ఒడెః ఆదెజ్ఞ ఆవెద్.

16 గాని మీ లోఇ ఎయెన్బా క్రీస్తు లోకు ఆతిదని వందిజ్ఞ ఓరిస్తిజు సిగు ఆమాట్. గాని క్రీస్తు పేరు అస్సిదని వందిజ్ఞ దేవుణుడిజ్ఞ స్తుతి కిదెజ్ఞ.

17 ఎందనిజ్ఞ ఇహిజ దేవుణు తీర్పు వన్ని లోకుర్ లోఇ మొదొల్నిని కాలం వాత మనాద్. దేవుణుడిజ్ఞ నమ్మిత్తి వరి లోఇనె తీర్పు మొదొల్స్తిజు సువార్తదిజ్ఞ లోజీఇతివరి గతి ఇనిక ఆనాదొ.

18 “దేవుణు ఎద్దు నితి నిజాయితిదాన్ మన్ని వరిజ్ఞ నిసా కష్టం వాతిజు దేవుణుడిజ్ఞ నెసిఇకార్ ఎలాకాలం మన్ని సిక్కుదాన్ తప్రె ఆదెజ్ఞ ఒద్దె అట్వీరె”,

19 అందెజె దేవుణుడిజ్ఞ ఇష్టం ఆతి వజు కష్టమ్కు ఓరిస్తికార్ వరి బత్తు, పుటిస్తి దేవుణుబాన్ ఒపజెప్తెజ్వులె. వాండ్రు నమ్మిదెజ్ఞ తగ్గికాన్. వారు నెగ్గి పణిజ్ఞ కిజి బత్తిజు మండ్రెజ్ఞ.

5

పెద్దెలుజు వందిజ్ఞ వెహ్నిని మాటెజ్ఞ.

1 క్రీస్తు కష్టమ్కు ఓరిస్తిక నాను సుడఃత. క్రీస్తు ఎసా గొప్పు పెరికాన్ ఇజి తోరిసి గొప్పు జాయ్దాన్ మరజి వానివలె నానుబా వన్ని జాయ్దు మంజినాలె. అందెజె, మీ లెకెండ ఒరెన్ పెద్దెలి ఆతి నాను పెద్దెలుజు ఆతి మిజీ దటిసి వెహ్నిన.

2 గొర్రెజ్ఞ అడినికాన్ గొర్రెజు నెగ్రెండ సూణి వజు మీ అడిగి మన్ని దేవుణు లోకాజ్ఞ నెగ్రెండ నడిఃప్పు. బల్మి కిత్తిజ్ఞ ఆవెద్. పూర్తి మన్నుదాన్ కిదు. దేవుణు ఇష్టమ్దు కూడిఃతి లెకెండ సుడఃదు. ఇనికదొ లాబం వానాద్ ఇజి ఆస ఆజి సుడఃమాట్. గాని నెగ్గి మన్నుదాన్ సుడఃదు.

3 మీ అడ్డి మని లోకాజ్ఞ ముస్కు గర్రదాన్ ఏలుబడిః కినిక ఆవెద్. మీ నెగ్గి గుణమ్కు సుడఃజు వారుబా అయాలెకెండ నడిఃని వజు మండ్రు.

4 అహిజ గొర్రెజ్ఞ అడిని వరి లోఇ పెరి గవ్వుడుయెన్ ఆతికాన్ తోరె ఆనివలె ఎసెజ్ఞబా పాడాఃజి సాన్ఇ మెరిసిని టోపి మిజీ దొహ్కాద్.

5 అయ వజునె ఇజిరికిదెరా, మీరుబా పెద్దెల్జు లోజీజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ఞ ఇహిజ “గర్ర ఆని వరిజ్ఞ దేవుణు ఎద్రిసినాన్. గాని తగి ఆతి మని వరిజ్ఞ వన్ని దయా దర్మం సీజినాన్”,

6 అందెజె దేవుణు, సరియాతి టయ్ముదు మిజి పెరికాన్ కిదెజ్ఞ ఇజి వన్ని గొప్పు సత్తుమని అతికారమ్దిజ్ఞ తగి ఆజి మండ్రు.

7 మీ విసారముకు విజు దేవుణు మున్ను పొక్తు. ఎందనిజ్ ఇహిజ దేవుణు మిజి విజు సీదెజ్ సుడజిజినాన్.

8 మీ మన్నుదు అణసె ఆజి మండ్రు. నెగ్గి బుద్ధి కల్గిజి తెలిదాన్ మండ్రు. ఆక్కర్నిని ఉండ్రీ పెరి నొరెన్ లెకెండ్ మిజి విరోదమాతి సర్వూన్ ఎయెరిజ్ డిజ్ దెజి ఇజి రెబాజి బులాజినాన్.

9 మీ నమకమ్దిజ్ గటిజి అసి సర్వూనుజ్ ఎద్రిసి మండ్రు. విజు లోకమ్దు మని నమ్మిత్తికార్ నిన్ని కస్టమ్కాణ్ బాద ఆజినార్ ఇజి నెసి మండ్రు.

10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్దు మంజిని వందిజ్ మిజి కూక్టాన్. మాటు క్రీస్తు వెట కూడితిజ్ యాక జగ్గిజినాద్. సెగం కాలం మీరు కస్టమ్కు ఒరిస్తి వెనిక దేవుణు మిజి విజు దన్ని లొఇ పూర్తి ఆతికార్ కద్దివండ, సత్తుదాన్ నిల్పాన్.

11 వన్నిజె అంతు సిల్లెండ ఎలాకాలం గొప్ప సత్తు మనీద్. ఆమెన్.

12 దేవుణు గొప్ప ప్రేమ కిజి తోరిస్తి నిజమాతి దయాదర్మమ్దు గటిజి నిల్ని మండ్రు, ఇజి నాను రాసిన. వెహ్సిన. అయ క్రుపాదు గటిజి నిల్ని మండ్రు ఇజి నాను బతిమాల్లిన. యాక నాను బాగ నమకమ్ ఇడ్డి సిల్వాను దిన్ని వందిజ్ నాను సాసి వెహ్సిన. యాక నాను బాగ నమకం ఇడ్డి సిల్వాను ఇని వన్ని కియుదాన్ రాస్పినిన.

13 మీ లెకెండ్ బబులోను పట్టుమ్దు దేవుణు ఏర్పాటు కిత్తి సజమ్దికార్ మిజి వందనమ్కు వెహ్సినార్. నజి మరిన్ లెకెండ్ మని మార్కు మిజి వందనమ్కు వెహ్సినాన్.

14 క్రీస్తు ప్రేమదాన్ ఒరెన్ మరిఒరెన్ వన్నిజ్ ముదు కిజి వందనమ్కు వెహ్సు. క్రీస్తుబాన్ కూడితి మిజి విజెరిజ్ సమదనం మనీద్.

పేతురు రాస్తే రుండి ఉత్తం

నెల్ల కిబిసినక

యేసుప్రబుజ్ అపొస్తుడు ఆతి పేతురు యా ఉత్తం రాస్తాన్. పేతురు వన్ని బత్తు అందిదెజ్ డగ్రు ఆతివలె యాక రాస్తాన్ ఇజి బయ్బిల్ వందిజ్ నెస్తికార్ వెహ్సినార్. క్రీస్తు సకం 68 దు క్రీస్తు లోకాజ్ మాలెజ్ కిత్తి నీరో ఇని రోమ వరి పెరి రాజు పేతురుజ్ సపిస్తాన్ ఇజిబా బయ్బిల్ వందిజ్ నెస్తికార్ వెహ్సినార్. యా ఉత్తమ్దు ఇనికెజ్ రాస్తాన్ ఇహిజ, అయ కాలమ్దు సొత్తిమహి తప్పు బోద నెస్సిసిని వరి వందిజ్ జాగర్త మండ్రు ఇజి వెహ్సినాన్. యేసుక్రీస్తు మరజి రెవీన్ ఇజిబా వారు వెహ్సినాని వందిజ్ జాగర్త మండ్రు ఇజినాన్. దేవుణు కనికారమ్దాన్, గెణమ్దాన్ నెగ్రెండ పిరిదు ఇజి రాసినాన్.

1 యేసుక్రీస్తుజ్ పణి కినికాన్ ఆతి, అపొస్తుడు ఆతి సిమొను పేతురు రాసిని ఉత్తం. దేవుణు దయా దర్మమ్దాన్, రక్సిస్తికానాతి యేసు క్రీస్తుజ్ దయా దర్మమ్దాన్ గొ పువిలవాతి నమకం మజి దొహ్దా. మజి దొహ్కొ లెకెండ అయ గొప్ప విలువాతి నమ్మకం దొహ్కొ మన్ని వరిజ్ యాక రాసిన.

2 మిజి దేవుణు దయాదర్మం, నిపాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిని దన్నితాన్ వాని గెణమ్దాన్, ప్రబువాతి క్రీస్తుజ్ నెసిని దన్నితాన్ వాని గెణమ్దు పిరిదు.

దేవుణు ఎర్లిస్తి లోకుర్ ఇజి రుజుప్ కిదెజ్.

3 దేవుణు వన్ని గొప్ప జాయ్దాన్ నెగ్గి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తుదాన్ మా బత్తుదిజ్ కావల్స్తికెజ్ విజు సితాన్. దేవుణుదిజ్ బక్తి మన్ని మన్ను సితాన్. యాకెజ్ విజు దేవుణుదిజ్ నెసిని దన్నితాన్ నె వణి తొహ్కె.

4 యా గొప్ప జాయ్దాన్ నెగ్గి గుణమ్దాన్ దేవుణు వన్ని ఒద్దె విలువాతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజుణిజ్ దేవుణు గుణం కల్లిజి మండ్రెజ్ అట్పాట్. యా లోకమ్దు సెన ఆసదాన్ మజి సెవెణ్ కిని విజు వన్కా బాణిజ్ తప్రె ఆదెజ్ అట్పాట్.

5-7 అందెజె మీరు నిని వన్కా వందిజ్ అక్కెజ్ దొహ్కొ లెకెండ కస్టబాడిజి మండ్రు. ఇనికెజ్ ఇహిజ మీ నమకం వెట నెగ్గి గుణమ్కు కూడెప్పు. నెగ్గి గుణమ్కు వెట గెణం కూడెప్పు. గెణం వెట మన్ను అణసె ఆజి మంజిని గుణం కూడెప్పు. దన్ని వెట విజు దనిజ్ ఓరిస్టెజ్ మని బుద్ధి కూడెప్పు. ఓరిసినిదని వెట దేవుణు వందిజ్ బక్తిమని మన్ను కూడెప్పు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిని దన్ని వెట విజేరిజ్ ప్రేమిసిని మన్ను కూడెప్పు.

8 యా గుణమ్కు మీ బత్తుదు పిరిజి ఒద్దె నిండ్రెజి వాతిజి యేసు క్రీస్తుజ్ పుర్తి నెస్సి దనిజ్ అక్కెజ్ పణి కినె. బండెజ్ ఆని వరి లెకెండ ఆఇదెర్లె. పణిదిజ్ రెజి వరి లెకెండ మన్ఇదెర్లె.

9 యా గుణమ్కు కల్లిజి నిండ్రెజి మనికార్ గుడ్డి వరి లెకెండ, దూరమ్దు మనికెజ్ తోరెండ ఆనె. ముందాల్ కితి పాపమ్కాణిజ్ నొరె ఆతాప్ ఇజి పొసినార్.

10 అందెజె నా తంబెరుజాండె, దేవుణు మిజీ ఎర్లిసి, వన్ని లోకుర్ ఇజి కూక్కి ఎర్లిస్తాన్. మీరు అక్క ఒదె నెగ్రెండ రుజుప్ కిదెజ్. నిన్ని పణిజ్ కినికిదెజ్ ఇహిజ ఎస్తవలెబా జార్జి అర్ఎండ నిల్లిదెర్.

11 యా లెకెండ మా ప్రబుని, మజీ రక్కిస్సికాన్ ఆతి యేసుక్రీస్తు ఎల్లకాలం మంజిని రాజెమ్దు మజీ గొప్పు మర్యాద సీజి కూడెప్పి వలె, మజీ సీని అవకాసం తక్కు ఆవద్.

ప్రవక్తరు దేవుణు మాటెజ్ వెహ్తార్.

12 అహిజ, ఏలు మీరు అస్తిమని దేవుణు వందిజ్ నిజమాతి యా సజతిజ్ మీరు బాగ నెసి కద్దివడ నిల్లి నిదెర్ గాని, మిజీ నాను యా సజతిజి వందిజ్ ఎస్తివలెబ ఎత్తు కిబిస్సెజ్ తయార్ ఆజి మంజిన.

13 నాను సాని దాక యా సజతిజి వందిజ్ మిజీ మరి మరి ఎత్తు కిబిస్సెజ్ నా బాజిత ఇజి నాను ఒడెబిజిన.

14 ఎండనిజ్ ఇహిజ, మా ప్రబు ఆతి యేసుక్రీస్తు నజి వెహ్తి లకెండ నాను యా బత్తు బెగినె డిసి సొండ్రెజ్ వలె ఇజి నెస్సు.

15 మరి నాను సాతి సాహి వెనుక మీరు ఎస్తివలెబా యా సజతిజ్ ఎత్తుకిజి మంజిని వందిజ్ నాను నండొ పణికిన.

16 ఎలాగ ఇహిజ, మా ప్రబువాతి యేసు క్రీస్తుజ్ మని గొప్పు సత్తు వందిజ్, వాండ్రు మర్జి వాని వందిజ్ మిజీ నెస్సిన్తి వలె, అక్క ఉండ్రీ కత సాన్తరం వలె అక్క ఉండ్రీ కత సాన్తరం వెహ్తి లెకెండ ఆవద్. గాని వాండ్రు ఎస్సాని గొప్పు పెరికాన్ ఇజి మాపు కణకాణిజ్ సుడెతాపె, అక్కాదె మిజి వెహ్తాప్.

17 ఎలాగ ఇహిజ, గొప్పు మెరిస్సి జాయ్ కల్లితి మహిమ నిండ్రీతి మహి బాణిజ్ ఉండ్రీ జాటు వాతాద్. ఇనిక ఇహిజ, “వీండ్రు నాను నా నండొ ప్రేమిసిని మరిన్. విన్ని ముస్కు నాను సర్ల ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిసి ఆతి యేసుజ్ గొప్పు పేరు, మహిమ కల్లితాద్.

18 మాపు వన్ని వెట అయా పరిసుదం ఆతి గొరొణ్ ముస్కు మహివలె ఆగాసమ్దాన్ వాతి యా జాటు మాపె విహాప్.

19 మరి, ఒద్దె నిజమాతి మాటెజ్, ఇహిజ ప్రవక్తరు వెహ్తి మాటెజ్ మజి మన్నె. అక్కెజ్ మీరు జాగర్ల విండ్రెజ్. ఉండ్రీ కస్తిమని దీవ జాయిదాన్ సీకటిదు మనికెజ్ సుడెదెజ్ అట్నాట్. అయాలెకెండె ప్రవక్తరు వెహ్తి మాటెజ్ జాయ్ వానిదాక మీ గర్బుమ్దు ఇడెదు. కోడిజామ్దు తోరె ఆని జాయ్ ఆని సుక్క మీ గర్బుమ్దు సోనాద్.

20 విజు వన్కాజ్ ఇంక ముకెలం మీరు నెస్సిక ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా పరి సొంత ఆలోసనమ్దాన్ వెహ్తి లెకెండ వెహ్ఎతార్.

21 దేవుణు మాటెజ్ లోకు వన్నిజ్ ఇస్టం ఆతి వజి వెహ్తికెజ్ ఆఉ. గాని దేవుణు ఆత్మ సత్తుదానె దేవుణు మాటెజ్ లోకుర్ వెహ్తార్.

2

తప్పు బోద నెస్సిసిని వరిజ్ వాని నాసనం.

1 గాని అయ కాలమ్దు లోకు నడిమి తప్పు బోద నెస్సిసినికార్బా మహార్. అయ వజనె మీ నడిమి తప్పు బోద నెస్సిసినికార్ వానార్. వారు ఇనిక కినార్ ఇహిజ వన్ని సొంత పాణం సీజి కొటి ప్రబుజ్ నెక్ట పొక్కారె గొప్పు నాసనమ్దు ఒని ఆజి బోదెజ్ డాప్పి నెస్సిసినార్. అయావజనె వరిజ్ వారి వెటనె వాని నాసనం తపె ఆజినార్.

2 నండొండార్ వీరు నెస్పితి సిగు అని పణిజ్ వెంజి ఆహా నడిసార్లె. వరి సెన పణిజ్ సుడేజి క్రిస్తుజ్ని వాండ్రు నెస్పిస్తి నిజమ్తి దన్ని వందిజ్ లోకుర్ దూసిన్నార్లె.

3 యా తప్పు బోద వెప్పికార్ డబ్బుదిజ్ గొప్పు అస ఆజి నిజం ఆజ మాటెజాణిజ్ మిజి మొసెం కినార్. వరిజ్ ముందాల్నె తీర్పు సీదెజ్ తయార్ ఆత మనాద్. వరిజ్ నాననం తపెవిండ వానాద్.

4 ఎలాగ ఇహిజ, పాపం కితి దూతారిజ్ డిసెంండ తీర్పు వాని దాక ఇడేదెజ్ దేవుణు వరిజ్ ఎలాకాలం సిసు మంజిని బాడిదు పోక్తాన్. సీకటి మని సాలం లొఇ తొహిస్తి ఇట్టాన్.

5 మరి, హూర్బకాలమ్దు పాపం కిజి మహి లోకాజి సిక్కు దాన్ తప్పిసెంండ, దేవుణు వరి ముస్కు పెరి గడ్డ తపిస్తాన్. గాని నీతినిజాయితి వందిజ్ వెప్పి మహి నోవాహుజ్ని, వన్ని వెట మహి ఏడుగురుదిజ్ గడ్డదాన్ తప్పిస్తాన్.

6 మరి సొదొమ, గొమొర్త ఇని పట్టుమ్కాన్ మహికార్ పాపం కిజి మహిజ్ దేవుణు వరిజ్ తీర్పు సితండ్రె సిసుదాన్ అయ పట్టుమ్కాజ్ సుహ్తాన్ దేవుణుదిజ్ ఇన్టం ఆఇ లెకెండ సెఇ పణి కిని వరిజ్ వాండ్రు ఇనిక కినాన్ ఇజి ఉండ్రె గుర్తు లెకెండ వరిజ్ ఇడ్తాన్.

7 నీతి నిజాయితిదాన్ పణి కితి లోతు వన్ని సురుల జర్గిజి మహి గొప్పు సిగ్గు ఆతి పాపం పణిజ్ సుడేజి గొప్పు బాద ఆజి మహిజ్ దేవుణు వన్నిజ్ గెల్పిస్తాన్.

8 ఎందనిజ్ ఇహిజ అయ నీతి మనికాన్ వరి గొప్పు సెఇ పణిజ్ సుడేజి అక్కెజ్ వెంజి రోజు వన్ని నెగ్గి మన్నుదాన్ గొప్పు బాద ఆజి మహాన్.

9 దేవుణు ముస్కు బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెసినాన్. దేవుణు ఎద్రు నీతి నిజాయితి సిల్లెండ నడిసెని వరిజ్ సిక్కు సీజి తీర్పు దినమ్దాక ఇడ్డెజ్బా నెసినాన్.

10 సెఇ ఆలోసనమ్దాన్ పుట్టి ఒణెల్ వందిజ్ మన్ని సెఇ ఆసెజ్ వందిజ్ బత్తిజి దేవుణు అతికారమ్దిజ్ లోజిఎండ దన్నిజ్ నెక్కిపొక్కి వరిజ్ సిక్కు సీదెజ్ దేవుణు ఇడ్డ మనాన్. యా తప్పు బోద నెస్పిసినికార్ గొప్పు గర్ర ఆజి ఇనిక కిదెజ్బా తయార్ ఆనికార్. వరి సొంత ఇన్టమ్దాన్ విజు కినార్. గొప్పు బమ్మ ఆతి వనక వందిజ్ సెఇకెజ్ వెప్తెజ్బా తియెల్ ఆఇకార్ వీరు.

11 దేవుణు దూతార్ గొప్పు సత్తు మనికారె ఇహిజ్బా దేవుణు ముందాల్ వినక వందిజ్ వరిజ్ దూసిన్ఎర్.

12 గాని యా తప్పు బోద నెస్పిసినికార్, వారు నెన్ఇ వన్నా వందిజ్బా దూసలాడ్తార్. వారు బుద్ది కిదెజ్ ఆట్ఇ మూర్కతం మన్ని జంతుజ్ లెకెండ ఆలోసనం కిదెజ్ ఆట్ఎర్. వేట కినికార్ వనకాజ్ అసి సప్పి లెకెండ వీరుబా ముర్కతం మన్ని అడవి జంతుజ్ లెకెండ పాడాన సొనార్.

13 వారు కిజిని నాననమ్దిజ్ వరిజ్ మర్జి నాననం వాజినాద్. ఒణెల్ ఆస వందిజ్ సిగు అని ఇని పణిబా కిదెజ్ సర్ల ఆజి వేడెకానె అయా సెఇ ఆసెజ్ సొన్పిసినికార్. మీరు కిజిని ప్రేమ విందుజ లొఇ వారుబా కూడ్డి మజినార్. వారు మన్ను రుజ్ని లెకెండ ఉణిజి తింజి ఒణెల్దిజ్ సుకం కిబిసినార్. తెలాని పాతాదు మని మన సిగు తపిస్సి లెకెండ వీరుబా సిగు తపిసినికార్.

14 బోదెకాజ్ సుడేజి వనక వెట పాపం కిదెజ్ ఇజి ఆస ఆజి మంజినార్. పాపం కిదెజ్ మని ఆస ఎసెజ్బా డిసెంఎర్. ఇతాల్ అతాల్ మన్ను మన్ని వరిజ్ వారు ఆసెజ్ తొరిసి ఇఇసరి నడిసెనిసినార్. వరి వందిజె లాబం తప్పె ఆదెజ్ సుడేజి మంజినార్. దేవుణు వరిజ్ సిక్కు సీనాన్.

15 వారు సరిఅతి బత్తు బత్తిఎండ, బెయ్యిరి ఇని వన్ని పొటదికాన్ బిలాము ఇని వన్ని లెకెండ ఆత మనార. ఎలాగ ఇహిజ తప్పు కిత్తి వందిజ్ దోహక్తి డబ్బు వందిజ్ ఆజి బిలాము సరి తప్ప సాహాన్.

16 గాని అయ బిలాము కితి సెజ పణిదిజ్ వాని గాడెడి అడ్డు కితాద్. మాటెజ్ నెసి అయ గాడెడి లోకు లెకెండ వర్గిజి బిలాము ఇని ప్రవక్త ఒడిజిబితి వెరి పణిదిజ్ అడ్డు కితాద్.

17 నిని బోద కినికార్ ఏరు సిలి ఊట లెకెండె, సుర గాలి ఎగ్రిసి ఒని మొసాప్ లెకెండె విరి వందిజ్ గొప్ప సీకటి మని బాడ్డి దేవుణు తయార కిత మనాన్.

18 ఎందనిజ్ ఇహిజ యా తప్పు బోద నెస్సిసినికార్ పణిదిజ్ రెజ బడాయ్ మాటెజ్ వర్గిజి అయ మాటెజాణిజ్ వరి ఒడోజ్ ఆసెజ్ సొన్నిస్తెజ్ సుడెజినార. తప్ప సరి నడిసిని వరి లోఇహాన్ ఏలె తప్పె ఆతి లోకాజ్, వీరు మరి తప్పు సరి నడిసినినార.

19 ఇని దని అడ్డిబా మన్ఎండ పూర్తి విడుదల మన్నిబాన్ ఒనాప్ ఇజి వీరు వెహ్ని మంజినార. గాని వీరె నాసనం తప్పిసిని పాపమ్దిజ్ తోహా ఆత మనార. ఎందనిజ్ ఇహిజ ఒరెన్ ఇని దనిజ్ గెల్స్తెజ్ అట్ఎండ మంజినాండ్రె, దనిజె వెటిపణి మణిసిని వజ అడిగి మంజినాన్.

20 మా ప్రబుని, రక్సిస్సికాన్ ఆతి యేసు క్రీస్తుజ్ బాగ నెస్తి వెనుక, యా లోకమ్ది సెజ వన్యాణిజ్ తప్పె ఆతి వెనుక, మరి అర్తిజ అకెజ్ వన్నిజ్ అడిగి ఇట్టిజ వారు ముందాల ఆతిమహి దన్నిజ్ ఇంక ఒద్దె సెఇకార్ ఆనార.

21 దేవుణు బాణిజ్ వాతి ఆడ్ర వరిజ్ ఒపజెపె ఆతి వెనుక అక్క తప్పి సాహార్. అహా తప్పిసాని దన్నిజ్ ఇంక అయ నీతి నిజాయితి మన్ని సరి వందిజ్ నెన్ఎండ మంజినిక ఇహిజానె వరిజ్ నెగ్గెత మహాద్ మరి

22 “నుకుడి: అది కక్తిక మరి మర్జి తింజినాద్”, “ఏరుదాన్ నొరె ఆతి పండ్రె మరి బుర్లదు నూడ్పాదెజ్ సొన్నినాద్”, ఇజి వెహ్ని మని మాటెజ్ తప్ప సరిదు మహ్ని సాహా విరి వందిజ్ నిజం ఆజినాద్.

3

ప్రబు మర్జి వాని దినం.

1 నాను ప్రేమిసినికిదెరా, తొలిత ఉండ్రె ఉత్రం రాస్త. మీరు ముందల్ నెస్తిమన్ని వనకాజ్ ఎత్తు కిబిస్తెజ్ ఏలు నాను మిజి మరి ఉత్రం రాసిన. కల్లిసిల్లి మీ మన్నుదిజ్ ఉసార్ కిబిస్తెజ్ ఇజి యా రుండి ఉత్రమ్కు రాసిన.

2 దేవుణు ప్రవక్తరు పూర్బకాలమ్దు వెహ్ని మాటెజ్, మరి మా ప్రబుని రక్సిస్సికానాతి యేసుక్రీస్తు మీ అపొస్తుడుర్ సీత్తి ఆడ్రెజ్ మిజి ఎత్తు కిబిస్తెజ్ ఇజి నాను ఆస ఆజిన.

3 ముకెలమాతి ఉండ్రె సజతి మీరు అర్లం కిజి మండ్రు. ఇనిక ఇహిజ, కడెవెరి రోస్కాజ్ సెగొండార్ వెక్సిసికార్ వానార్. వారు వరి ఒడోజ్ సెజ ఆసెజ్ సొన్నిసి మంజినార. వారు మిజి లివాల్ కినార.

4 వారు ఇనిక వెహ్నార్ ఇహిజ, “వాండ్రు వానన్ ఇజి ఒట్టు కితిత్తాన్గదె. ఎసెజ్ వానన్లె? మా అనిగొగొర్ సాత సాహార్. గాని ఏలుదాక వాండ్రు వాదెజ్ సిల్లె. యా లోకం పుట్టిబాణిజ్ అసి విజు యా లెకెండ మనాద్, ఇని తేడ సిల్లెద్”, ఇజి వెహ్నార్.

5 గాని పూర్వకాలమందు దేవుణు వన్ని మాటదాన్ ఆగాసమ్దిజ్ బూమిదిజ్ తయార్ కిత్తాన్. యా బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్తిమహికెజ్ వారు పోస్తెజె ఇజి సుడఃజినార్.

6 వన్ని మాటదాన్ నె పెరిగడ్డ వాజి అయ ఏరుదాన్ అయావలె మహి లోకం విజు ముడుఃగితాదె పాడాతా సోహాద్.

7 దేవుణు అయా మాటదానె ఏలు మని ఆగాసమ్దిజ్ బూమిదిజ్ సిసుదాన్ నాసనం కిదెజ్ తీర్పు కిని రోజుదాక ఇట్టా మనాన్. దేవుణు వందిజ్ బక్తిసిల్లి లోకుర్ అయావలె పాడాజి సొనార్.

8 నాను ప్రేమిసిని తంబెరుజాండె, దిని వందిజ్ పోస్మాట్. ప్రబు ఎద్దు ఉండ్రీ రోజు వెయి పంటెజ్ లెకెండ మనాద్. వెయి పంటెజ్ ఉండ్రీ రోజు లెకెండ మన్నె.

9 ప్రబు ఒట్టు కితి లెకెండ మర్జి వాదెజ్ ఆలస్యం ఆజినాద్ ఇజి సెగొండార్ ఒడఃబిజినార్. గాని ఎయెర్బా పాడాజి సొన్ఎండ, విజేరె పాపమ్కు డిసి మన్ను మారిస్తెజ్ ఇజి మీ వందిజ్ ఓరిస్త మనాన్.

10 గాని ప్రబు మర్జి వాని దినం తవ్వెండ వానాద్. ఒరెన్ డోజారి ఎస్తివలె వానండ్రొ ఇజి నెన్ఎండ వాని లెకెండ వానాద్. నస్తివలె ఆగాసమ్దు దిడిజిని వలె సిల్లెండ ఆనె. ఆగాసమ్దు మని విజు, సిసుదాన్ వేనె సొనె. బూమి ముస్సు మనికెజ్ విజు వేనె సొనె.

11 విజు యా లెకెండ పాడానె సొనె. అందెజె మీరు దేవుణు వందిజ్ కేట ఆతి లోకుర్ ఆజి దేవుణు వందిజ్ బక్తిమన్ని లోకుర్ ఆజి బత్తిదు.

12 దేవుణు వాని రోజు వాదెజ్ ఇజి మీరు ఎద్దు సుడఃజినిదెర్. అయా దినం బేగినె వాదెజ్ ఇజి మీరు గటిజ పణి కిదు. అయ దినమ్దు ఆగాసమ్కు దని లోక మనికెజ్ విజి సిసుదాన్ వేనె సొనె. అయ సిసు వేడిదిజ్ విజు కర్జిజి సొనె.

13 గాని దేవుణు ఒట్టు కితి నని కొత్త ఆగాసమ్దిజ్, కొత్త బూమిదిజ్ మాటు ఎద్దు సుడఃజినాట్. బానె విజు నీతి నజాయితి పూర్తి మంజినాద్లె.

14 అందెజె నాను ప్రేమిసినికిదెరా, మీరు ఇని తవు సిల్లెండ, ఇని పాపమ్బా సిల్లెండ దేవుణు ఎద్దు నండొ కస్టబాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏద్దు సుడఃజినిదెర్.

15 యాక నెస్తు. దేవుణు మా వందిజ్ ఎందనిజ్ ఓరిస్త మనాన్. ఇహిజ మాటు పాపం డిసి మన్ను మారిస్తెజె ఇజి. మాటు ప్రేమిసిని అన్న పవులుబా దేవుణు సితి గెణమ్దాన్ వినుక వందిజ్ రాస్త మనాన్.

16 పవులు రాస్తి విజు ఉతరమ్క లోక యా లెకెండనె రాస్త మనాన్. వన్కా లోక సెగం అర్థం కిదెజ్ కస్టం ఆతికెజ్. వనక వందిజ్ నెన్ఇకార్, దేవుణు ముస్సు మన్ని నమకమ్దు ఇత్తాల్ ఆత్తాల్ దుజ్నికార్ అయ మాటెజ అర్థం మారిసినార్. మహి దేవుణు మాటెజ లోక మన్ని సెగమ్కుబా మారిసినార్. దిన్ని వందిజ్ వారు నాసనం ఆన సొనార్.

17 నాను ప్రేమిసినికిదెరా, మీరు యా నజతిజ్ ముజాలె నెస్తి మనిదెర్. అందెజె జాగర్త మండ్రు. దేవుణు రూలుజ లోజిఇకార్ వెప్పిని తవు బోదెజాణిజ్ మొసెం కిబె ఆమాట్. ఎందనిజ్ ఇహిజ వరి బోదెజ్ మీ స్తిరం ఆతి మన్నిజ కద్లిన్నాద్.

18 గాని మీరు మా ప్రబు రక్తిస్సికాన్ ఆతి యేసు క్రీస్తు సిత్తి వన్ని దయా దర్మమ్దాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవ్వరం కల్లిపిద్. ఆమెన్.

యోహాను రాస్తి మొదోహి ఉత్త్రం

నెల్వ కిబిసినిక

యేసు క్రీస్తు అపొస్తుడు ఆతి యోహాను యా ఉత్త్రం రాస్తాన్. వాండ్రు యా ఉత్త్రం యేసుప్రబుజ్ నమ్మితి వరిజ్ రాస్తాన్. యేసుప్రబు సాజి నిజీతి వెనుక అరువయ్ పంటజ్ డాట్టాద్. యోహాను డొక్ర ఆత మహాన్. మహి సిసూర్ విజేరి సాత సాహార్. అయావలె బానె మహి సంగమ్కాజ్ యోహాను నడిఃపిసిని వన్ని లెకెండ్ మహాన్.

బత్కు ఆతి మాట

1 దేవుణు మాట ఆతి వన్ని వందిజ్, నాను మిజి రాసిన. వాండ్రు దేవుణు వెట అతు సిల్లి బత్కుకు సినికాన్. వాండ్రు యా లోకం పుట్వెండ ముజాల్ మహాన్. గాని వాండ్రు యా లోకమ్దు వాతిజ్ మాపు వన్నిజ్ వెహాప్. మాపు వన్నిజ్ సుడఃతాప్. మాపు వన్నిజ్ బెస్తామహాప్. మా కికాణిజ్ వన్నిజ్ ముట్టమహాప్. అయాక మిజి నెస్పిసినాప్.

2 బత్కు సీని వినిజ్ దేవుణు మా నడిఃమి పొక్తాన్. మాపు వన్నిజ్ సుడఃతాప్. మాపు సుడఃతిజ్ వన్నివందిజ్ మిజి నిజం వెహినాప్. బత్కు సీని వాండ్రు ఎల్లకాలం మంజి బత్కు ఇజి మిజి నెస్పిసినాప్. వాండ్రు ముందాహాన్ అసి బుబ ఆతి దేవుణుబాన్ మహాన్. ఏలు వన్నిజ్ దేవుణు మజి తోరిస్తాన్.

3 మాపు సుడఃతి వన్ని వందిజ్, వెహివన్ని వందిజ్ మిజిబా వెహినాప్. ఎందనిజ్ ఇహిజ మీరు వన్నిజ్ నమ్మిదెజ్. ఆహె మా బాన్ కూడ్డి మండ్రెజ్ ఇజి. మాపు బుబ్బి ఆతి దేవుణు వెట, మరిన్ ఆతి యేసు క్రీస్తు వెట కూడిఃత మనాప్.

4 మీరుబా ఆహె కూడిఃతిజ మా సర్ద పూర్తి ఆనాద్లె. అందెజె మాపు ఇకెజ్ రాసినాప్.

జాయ్దు నడిఃనిక

5 అహిజ యేసు క్రీస్తు మజి వెహి మాటెజ్ ఏలు మిజి వెహినాప్. యాకదె మాట. అక ఇనిక ఇహిజ దేవుణు జాయి లెకెండ్ మనాన్. పూర్తి నెగ్గికాన్. వన్ని లో సికాటి ఆన్ల సిల్లెద్. ఇని కల్తిబ సిల్లెద్.

6 అందెజె మాటు దేవుణు వెట కూడిఃత మనాట్ ఇజి వెహి మా లోఇ సీకాటి మని లెకెండ్ బత్కితిజ మాటు అబద్దం వర్గిజినికాట్. దేవుణు నెస్పిస్తి నిజమాతి సరిదు నడిఃనికాట్ ఆవెట్.

7 గాని దేవుణు విజు దన్ని లోఇ జాయ్ తోరిసిని లెకెండ్ మాటు విజు పణిజ లోఇ జాయ్ తోరిస్తిజ, మాటు నమ్మితి వరి వెట కూడ్డి మంజినాట్. మరి దేవుణు మరిసి ఆతి యేసుప్రబు నల్ల, మాటు కిజిని విజు పాపమ్కాణిజ్ మజి సుబరం కిజినాద్.

8 మాటు ఇని తపుబా కినికాట్ ఆవెట్ ఇజి వెహిజ మజి మాటె మోసం కెబె ఆజినాట్. ఎందనిజ్ ఇహిజ దేవుణు నెస్పిస్తి వన్ని నిజమాతి మాట వజ మాటు కిదెజ్ సిల్లె.

9 గాని మాటు తపు కితాట్ ఇజి దేవుణుబాన్ ఒప్పుకోటిజ దేవుణు మా లోఇ మని సెఇకెజ్ విజు లాగ్టి పొక్తాండ్రె సుబరం కినాన్. ఎందనిజ్ ఇహిజ సెమిస్సు ఇజి దేవుణు

మాట వెప్తా మనాన్. వాండ్రు నమ్మిదెజ్ తగ్గికాన్. నాయం మనికాన్. వెప్తా వజ క్రినికాన్.

10 మాటు తప్పు కిఇకాట్ ఇజి వెప్తాజ దేవుణు అబద్ధం వెప్పికాన్ ఇజి మాటు వెప్పినాట్. మాటు ఆహె వెప్తాజ దేవుణు వెప్తా మాట అస్సికాట్ ఆఎట్. ఎందనిజ్ ఇహిజ విజెరె లోకురె పాపం కిత్తార్ ఇజి దేవుణు వెప్తా మనాన్ గదె.

2

1 నజి కొడోర్ లెకెండె మీరు, అందెజె మిజి రాసిన. మీరు పాపం కిదెజ్ ఆవిద్ ఇజి యా సజతిజ్ మిజి రాసిన. గాని ఎయెన్ బా పాపం కిత్తాన్ ఇహిజ దేవుణు ఆతి దేవుణుబాన్ మా వందిజ్ వెప్పికాన్ ఒరెన్ ఒపిసినికాన్ మనాన్. విరి పాపమ్ కు సెమిస అ ఇజి వాండ్రు వెహ్నాన్. వాండ్రు నీతి నిజాతి మనికాన్ ఆతి యేసు క్రిస్తునె.

2 వాండ్రు మా పాపమ్ కు సాన్ పిస్తెజ్ పూజ ఆతికాన్. వాండ్రు పూజ ఆతిజ్ దేవుణు మా పాపమ్ కు సెమిస్తెజ్ అట్ నాన్. మా పాపమ్ కాజ్ వందిజ్ ఉండ్రె ఆవిద్. యా లోకమ్ దు విజెరి పాపమ్ క వందిజ్ పూజ ఆతికాన్.

3 మాటు దేవుణుజ్ నెస్తికాట్ ఇజి మజి ఎలాగ తెలిజినాద్. దేవుణు మజి సీతి ఆడ్రెజ లోజితిజనె తెలినాద్.

4 నాను దేవుణుదిజ్ నెన్న ఇజి వెప్పి, దేవుణు సీతి ఆడ్రెజ లోజిఇకాన్ అబదం వెప్పికాన్. దేవుణు నెన్ పిస్తి నిజం ఆతి మాటెజ వాండ్రు లోజిఎన్.

5-6 దేవుణు వెప్తా మాటదిజ్ ఎయెన్ బా లోజితిజ, దేవుణు ముస్కు వన్నిజ్ పూర్తి ప్రేమ మనాద్ ఇజి తోరిస్సాన్. దేవుణు వెట కుల తోప్తామన ఇజి వెప్పికాన్, యేసు ప్రబు నడిఃతి లెకెండె దేవుణుదిజ్ లోజిజి నడిఃదెజ్. ఆహె దేవుణు వెట కూడఃజి మంజినాట్ ఇజి మాటు నెస్సాట్.

7 నాను ప్రేమిసినికిదెరా, నాను ఉండ్రె కొత్త ఆడ్ర మిజి రాన్ ఎ. గాని ముజాల నెన్ పిస్తి ఉండ్రె పడాఃయ్ ఆడ్రనె రాసిన. అయా ఆడ్ర మీరు క్రిస్తు లోకు ఆతి బాణిజ్ అసి నెస్తికదె. అయ ఆడ్ర మీరు వెహిమని దేవుణు మాటనె.

8 గాని నాను ఏలు రాసిని మాట కొత్త ఆడ్రనె. ఎలాగ ఇహిజ యేసు ప్రబు వన్ని బత్తుదు యా ఆడ్ర తోరిస్సాన్. మీ బత్తుదుబా మీరు తోరిస్సిదెర్. ఎందనిజ్ ఇహిజ మీ లోఇ సీకటి లెకెండె మని పాపం ఏలు సొన్నినాద్. జాయ్ లెకెండె మని నిజమాతికెజ్ మీ లోఇ వాజినె.

9 జాయ్ దు నడిఃజిన ఇజి వెప్పి ఒరెన్, క్రిస్తుజ్ నమ్మిత్తి వన్నిజ్ దూసిస్సికాన్ ఇహిజ వాండ్రు ఏలుబ సీకటిదునె నడిఃజినాన్.

10 మరి ఒరెన్ క్రిస్తుజ్ నమ్మిత్తి వన్నిజ్ ప్రేమిస్సికాన్ ఇహిజ వాండ్రు జాయ్ దు నడిఃజినాన్. వన్ని బత్తుదు పాపం కిబిస్సిక ఇనికబ సిల్లెద్.

11 మహివరిజ్ పగ ఆతికాన్ సీకటిదు మంజి సీకటిదు నడిఃజినాన్. ఎంబె సాన్ సినాండ్రె ఇజి వాండ్రు నెన్ ఎన్. ఎందనిజ్ ఇహిజ సీకటిదు వన్నిజ్ గుడ్డి వన్ని లెకెండె కిత్తాద్.

12 నాను ప్రేమిసిని బయిరాండె, క్రిస్తు మీ వందిజ్ సాతిజ్ దేవుణు మీ పాపమ్ కు సెమిస్తాన్. అందెజె నాను యాకెజ్ మిజి రాసిన.

13 బుబ్బరాండె, దేవుణు ఇనికబా పుటిన్ ఎండ ముజాల మహి యేసు క్రిస్తుజ్ మీరు నెస్తిదెర్. అందెజె నాను మిజి రాసిన. దజ్ డారండె, మీరు సెఇ బుద్ధి కల్గితి

సయతానుజ్ గెలిస్తెదెర్. అందెజె నాను మిజి రాసిన. నాను ప్రేమిసిని బయిరండె, బుబ్బు ఆతి దేవుణుదిజ్ మీరు నెస్తిమనిదెర్. అందెజె నాను మిజి రాసిన.

14 అందెజె నాను మిజి రాసిన. దజ్డారండె, దేవుణు మాట మీ లొఇ మనిజ్ మీరు సత్తుమనికిదెర్ ఇజి తొరిస్సిదెర్. మీరు సయతనుజ్ గెలిస్తె మనిదెర్ అందెజె మిజి రాసిన.

లోకమ్దు మని వనకాజ్ ప్రేమ కిమాట్

15 యా లోకమ్దు మని వనక మున్సు మన్సు ఇడ్మాట్. యా లోకమ్ది బత్తుదిజ్ ప్రేమిన్మాట్. ఎందనిజ్ ఇహిజు యా లోకమ్దిజ్ ప్రేమిన్ని వన్నిజ్ దేవుణు మున్సు ప్రేమ సిల్లెద్.

16 ఎందనిజ్ ఇహిజు, యా లోకమ్దికెజ్ విజు దేవుణు బాణిజ్ వానికెజ్ ఆఉ. అక్కెజ్ ఇనికెజ్ ఇహిజు ఇనికెజ్ ఇనికెజ్ కిదెజ్ ఇజి ఆస ఆనాదొ, అక్కెజ్ విజు కిదెజ్ ఇజి ఒడెబినిక, మరి, కణకెజిణిజ్ నుడెజినికెజ్ విజు కావాలి ఇజి ఆస ఆనిక, మరి, ఆస్తి కలిగితిమని వందిజ్ గర్త ఆనిక, నినికెజ్ యా లోకమ్దిజ్ ప్రేమ కినివలె వానె.

17 యా లోకమ్ది లోకుర్ ఆస ఆనికెజ్ విజు సిల్లెండ ఆనెలె. గాని దేవుణుజ్ ఇన్దుం ఆతివజ నడినికాన్ ఎలా కాలం బత్కినాన్లె.

క్రీస్తుజ్ ఎద్రిస్సికార్ వానార్

18 నాను ప్రేమిసిని బయిరండె, లోకం అందిని కడివేరి దినమ్కు ఆజినె. కడివేరి దినమ్కాజ్ క్రీస్తుజ్ ఎద్రిస్సికాన్ వానాన్ ఇజి మీరు నెస్తిదెర్ గదె. అహిజు ఏలు క్రీస్తుజ్ ఎద్రిస్సికార్ నండొండొర్ సొత మనార్. అందెజె కడివేరి దినమ్కు ఆతె ఇజి మాటు నెస్సాట్.

19 వారు మా బాన్కూడిత మహార్. గాని డిస్త సొహార్. ఎలాగ ఇహిజు వారు మా లోకాజ్ సెందితికార్ ఆవిర్. వారు మా బాన్ మంజినికార్ ఇహిజు మా వెత్తనె కూడిజి పొడ్డి మహార్మరి. గాని మజి డిస్త సొహారె, మజి సెందితికార్ ఆవిర్ ఇజి వారు తొరిస్సార్.

20 గాని క్రీస్తు పొక్తి దేవుణు ఆత్మ మిజి మనాన్. అందెజె మీరు విజిదెరె నిజమాతికెజ్ నెసినిదెర్.

21 మీరు నిజం నెస్ఇదెర్ ఇజి నాను యాక రాస్సిక ఆవెద్. నిజమాతికెజ్ మీరు నెసినిదెర్. అందెజె నాను రాసిన. నిజమాతి దని లొఇ అబద్దం ఆతి బోద సిల్లెద్ ఇజి మీరు నెస్తిదెర్. అందెజె నాను రాసిన.

22 యేసు, దేవుణు పొక్తి క్రీస్తు ఆవెన్ ఇజి వెప్పికాండె అబద్దం వెప్పికాన్. ఆహు వెప్పినికాన్ క్రీస్తుజ్ ఎద్రిసినికాజ్. వాండ్రు బుబ్బు ఆతి దేవుణుదిజ్, మరిసి ఆతి క్రీస్తుజ్ నెక్కి పొక్సినికాన్.

23 దేవుణు మరిసి ఆతి యేసుక్రీస్తుజ్ నెక్కిపొక్కినికాన్ ఎయెన్బా బుబ్బు ఆతి దేవుణుదిజ్బ నెక్కిపొక్కినాన్. మరిసి ఆతి యేసుక్రీస్తుజ్ డగ్రు కినికాన్ బుబ్బు ఆతి దేవుణుజ్బా డగ్రు కిజినాన్.

24 యేసు క్రీస్తుజ్ నమ్మితి బాణిజ్ అసి మీరు వెహి మనికెజ్ విజు మీ మన్సుదు నెగ్రెండ అసి మండ్రెజ్. ఆహె నెగ్రెండ మీ మన్సుదు మహిజు, మీరుబా మరిసి ఆతి యేసు క్రీస్తుబాన్, బుబ్బు ఆతి దేవుణుబాన్ కూడజి మంజినిదెర్.

25 మాటు ఆహె వన్నిబాన్ కూడతి మహిజు, మజి సిన ఇజి యేసు ఒట్టు కితి ఎలా కాలం బత్తుని బత్తు మజి దొహ్కాద్.

26 మిజీ మోసం కిదెజ్ నూణి వరి వందిజ్ ఇకెజ్ నాను రాసిన.

27 క్రీస్తు పోక్తి దేవుణు అత్యు మీ లోఇ మనాద్. అందెజె మరి ఎయెన్బా మిజీ నేర్పిస్తెజ్ అవ్వరం సిల్లెద్. ఎందనిజ్ ఇహిజ దేవుణు అత్యు పూర్తి నిజమె. ఇని అబద్దం సిల్లెద్. దేవుణు అత్యునె మీరు నెస్తెజ్ మని విజు వన్కా వందిజ్ నేర్పిస్తాన్. అందెజె దేవుణు అత్యు నెన్పిస్తి లెకెండ్నె మీరు క్రీస్తు బాన్ నిల్పి మండ్రు.

మాటు దేవుణు కొడోణ్

28 అందెజె నాను ప్రేమిసిని నా బయిరండె, క్రీస్తుబాన్ నిల్పి మండ్రెజ్. ఎందనిజ్ ఇహిజ వన్ని వెట నిల్సి మహిజ క్రీస్తు మర్జి వానివలె వన్ని ఎద్రు సిగు ఆవండ దయ్యరమ్దాన్ నిల్దెజ్ ఆనాద్.

29 దేవుణు నీతి నిజాయితీ మనికాన్ ఇజి మీరు నెస్తిదెర్. అహిజ దేవుణు వెప్తి వజ కిని ఎయెన్బా దేవుణు కొడోణ్ ఇజి మీరు నెస్తిదెర్.

3

1 బుబ్బు ఆతి దేవుణు మజీ నండో ప్రేమిస్తిజ్ మాటు దేవుణు కొడోణ్ ఇజి కూకె ఆజినాట్. నసా దేవుణు ప్రేమ మా ముస్కు మంజినాద్. మాటు దేవుణు కొడోణ్నె. గాని దేవుణుదిజ్ నమ్మిఇకార్, బుబ్బు ఆతి దేవుణుదిజ్ నెన్ఎర్. అందెజె మాటు దేవుణు కొడోణ్ ఇజి వారు అర్దం కిఎర్.

2 నాను ప్రేమిసినికిదెరా, ఏలు మాటు దేవుణు కొడోణ్ అత మనాట్. మాటు ఇనిక ఆనాట్లె ఇజి దేవుణు ఇంక మజీ తోరిన్ఎతాన్. గాని యేసు క్రీస్తు తోరె ఆనివలె వాండ్రు మని లెకెండ్ మాటుబ అనాట్లె ఇజి నెన్నాట్. ఎందనిజ్ ఇహిజ వాండ్రు మనిలెకెండ్ మాటు వన్నిజ్ సుణాట్లె.

3 యేసు క్రీస్తు తోరె ఆని వందిజ్ ఎద్రు సుడేజిని ఎయెన్బా వని వజ ఆస ఆజి పాపం డిసి బత్కిజినాన్. ఎందనిజ్ ఇహిజ క్రీస్తు పాపం సిలికాన్.

4 పాపమ్కు కిజినె మంజినికాన్ ఎయెన్బా దేవుణు ఆడ్రెజ్ నెక్కిపొక్కినికాజ్. పాపం ఇనిక ఇహిజ, దేవుణు ఆడ్రెజ్ నెక్కి పొక్కిక.

5 మా పాపమ్కు విజు లాగ్గి పొక్కెజె క్రీస్తు యా లోకమ్దు వాతాన్ ఇజి మీరు నెసినిదెర్. అకదె ఆవద్, వన్ని లోఇ పాపం ఇనికబా సిల్లెద్ ఇజిబా మీరు నెసినిదెర్.

6 అందెజె యేసు క్రీస్తు వెట కూల తోహ్వికాన్ పాపం కిజినె మన్ఎన్. పాపం కిజినె మనికాన్ ఎయెన్బా క్రీస్తు ఎయెన్ ఇజి అర్దం కిఎన్.

7 నాను ప్రేమిసిని బయిరండె, ఎయెర్బా మిజీ మోసం కిఎండ సుడేదు. యేసు క్రీస్తు నీతిమనికాన్. క్రీస్తు వెప్తి మాటెజ్ వజ నడిసికాన్, దేవుణు ఎద్రు నీతి నిజాయితీ మనికాన్.

8 పాపం కిజినె మంజినికాన్ నయ్తాను జటుదికాన్. ఎందనిజ్ ఇహిజ యా లోకం పుట్వండ మహి బాణిజ్ అసి నయ్తాన్ పాపం కిజినె మంజినాన్. దేవుణు మరిసి ఆతి యేసుక్రీస్తు యా లోకమ్దు ఎందనిజ్ వాతాన్ ఇహిజ నయ్తాన్ కిని విజు వణిజ పూర్తి నాసనం కిదెజె వాతాన్.

9 దేవుణు కొడోణ్ ఆతికాన్ ఎయెన్బా పాపం కిజినె మన్ఎన్. ఎందనిజ్ ఇహిజ దేవుణు గుణం వన్ని లోఇ మనాద్. వాండ్రు దేవుణు పొటాదికాన్. అందెజె పాపం కిజి మండ్రెజ్ అట్ఎన్.

10 దేవుణు కొడోకొర్ ఎయెర్, నయతాన్ కొడోకొర్ ఎయెర్ ఇజ మాటు ఎలాగ నెస్నాట్ ఇహిజ దేవుణు ఎర్దు సరియాతికెక్ కిఇకాన్ దేవుణు కొడోకొ ఆవెన్. మహి వరిజ్ ప్రేమ కిఇకాన్బా దేవుణు కొడోకొ ఆవెన్.

ఒరెన్ మరి ఒరెన్ వన్నిజ్ ప్రేమిస్తెజ్

11 అందెజె మీరు నమ్మితి బాణిజ్ అసి వెహిక యాకదె. ఇనిక ఇహిజ మాటు, ఒరెన్ మరి ఒరెన్ వన్నిజ్ ప్రేమిస్తెజ్ ఇజి,

12 మాటు కయిను లెకెండ మండ్రెజ్ ఆవెద్. వాండ్రు నయతాను జుబుదికాన్ ఆతండ్రె వన్ని తంబెర్సిజ్ సప్తాన్. ఎండనిజ్ సప్తాన్ ఇహిజ వన్ని పణిజ్ నెఇ బుద్ది కలగితికెజ్. వన్ని తంబెర్సి పణిజ్ దేవుణు ఎర్దు సరియాతికెక్ఎన్ ఆతెమహె.

13 అహిజ నా తంబెరుజాండె, దేవుణుదిజ్ నమ్మిఇకార్ మీ ముస్సు పగ ఆతిజ బమ్మ ఆమాట్.

14 మాటు మహి వరిజ్ ప్రేమ కిజి మహిజ మాటు సాతి వరి లెకెండ్రె ఆవెట్. ఎలా కాలం బత్కిని బత్కుదు బత్కిజినాట్ ఇజి నెసినాట్. మహి వన్నిజ్ ప్రేమ కిఇకాన్ సాతి వన్ని లెకెండ్రె మునాన్.

15 మాటు ఒరెన్ వన్ని ముస్సు పగ అస్తిజ, వన్నిజ్ సప్తలెకెండ్రె. లోకాజ్ సమ్మి వన్నిజ్ ఎలా కాలం బత్కిని బత్కు సిల్లెద్ ఇజి మీరు నెసినెదెర్.

16 ప్రేమ ఇహిజ ఇనిక ఇజి మాటు ఎలాగ నెస్నాట్ ఇహిజ, యేసు క్రీస్తు, వాండ్రె వన్ని పాణం మా వందిజ్ సితాన్. అకదె ప్రేమ. అయవజనె మాటుబా మా తంబెరిజి వందిజ్ మా పాణం సీదెజ్వలె.

17 విజు కల్గితి మనికాన్ ఒరెన్, అవసరమ్దు మని ఒరెన్ వన్నిజ్ కనికారం తోరిన్ఎండ మహిజ అయ విజు కలగితి మనికాన్ దేవుణుదిజ్ నెగ్రెండ్రె ప్రేమిన్ఎన్ ఇజి తోరిస్నాన్.

18 నాను ప్రేమిసిని బయిరండె, మాటు మాట ఉండ్రె దానె ఆవెద్. మా పణిబ మా ప్రేమ నిజమె ఇజి తోరిస్నాట్.

19 మాటు మా పణిబాణిజ్ మహి వరిజ్ నిజం కిజి ప్రేమిస్తిజ మాటు నిజమాతిదాన్ లోజిజినాట్ ఇజి నెస్నాట్లె. మరి దేవుణు ఎర్దు మా మస్సు నిపాతి మంజినాద్లె.

20 ఎండనిజ్ ఇహిజ మాటు తప్తాట్ ఇజి మా మస్సు ఉండ్రె వేలా వెహ్నాద్ను గాని, దేవుణు మా మస్సుదిజ్ ఇంక పెరికాన్. దేవుణు నెన్ఇకెక్ ఇనికెక్ సిలు.

21 నాను ప్రేమిసినికిదెరా, మాటు తపు కిఎట్ ఇజి మా మస్సుదు నెస్తిజ మాటు దేవుణు వెట కూడెజి దయరం కల్గిజి మంజినాట్.

22 మాటు ఇనిక లోస్తిజ్బా దేవుణు బాణిజ్ దొహ్కొనాద్. ఎండనిజ్ ఇహిజ దేవుణు వెహ్తికెక్ మాటు కిజినాట్. దేవుణుదిజ్ ఇస్టం ఆతి పజ బత్కిజినాట్.

23 యాకదె దేవుణు మజి వెహ్తి రూలు. ఇహిక ఇహిజ యేసు క్రీస్తు దేవుణు మరిసి ఇజి మాటు నమ్మిదెజ్ వలె. క్రీస్తు వెహ్తి లెకెండ్రె ఒరెన్ మరి ఒరెన్ వన్నిజ్ ప్రేమిస్తెజ్.

24 దేవుణు సితి రూలుజ్ వజ నడినికాన్ దేవుణు వెట మంజినాన్. దేవుణు వన్ని వెట మంజినాన్. దేవుణు మా వెట మునాన్ ఇజి ఎలాగ నెస్నాట్ ఇహిజ, దేవుణు ఆత్మ మా లోఇ మనిజ్ మాటు నెస్నాట్.

4

విజు ఆత్మెజ నమ్మిదెజ్ ఆవెద్

1 నాను ప్రేమినిసికిదెరా, దేవుణు ఆత్మదాన్ వర్గిజిన ఇజి వర్గిని విజు వన్యాజ్ నమ్మిమాట్. విజు దేవుణు బాణిజ్, వాతికదో ఆవదో ఇజి నెగ్రెండ నెసి సుడేదు. ఎండనిజ్ ఇహిజ అబద్దం వెప్పొ ప్రవక్తరు నండొండార్ యా లోకమ్దు సోతారె తప్పు మాటెజ్ బోదినినార్.

2 దేవుణు ఆత్మ మనికార్ ఎయెర్ ఇజి ఎలగ నెస్సాట్ ఇహిజ లోకు వజ దేవుణు బాణిజ్ వాతి యేసు క్రీస్తుజ్ నాను సెందితికాన్ ఇజి ఒప్పుకొణికాన్ ఎయెన్బా దేవుణు ఆత్మ మనికాన్ ఇజి నెస్సెజ్.

3 గాని ఎయెన్బా, యేసు ప్రబు నా ప్రబు ఆఎన్ ఇజి వెప్పొజ వాండ్రు దేవుణు బోద వెప్పొకాన్ ఆఎన్. వాండ్రు క్రీస్తుజ్ పడికాన్ క్రీస్తుజ్ పడిఎండ వెప్పొకార్ వానార్ ఇజి మీరు వెహికెజ్ యాకదె. అయ గుంపుదికార్ ఏలు మా నడిమ్మి మనార్.

4 ఇజిరి బయిరండె, మీరు దేవుణుదిజ్ సెందితికిదెర్. మీరు వరి బోద కెఱతిదెర్, వరిజ్ గెల్స్తిదెర్. మీ లోఇ మని దేవుణు ఆత్మ సత్తు లోకమ్దు మని సయతాన్ సత్తు మున్సు పెరికదె. అందెజె మీరు వరిజ్ గెల్స్తిదెర్.

5 తప్పు మాటెజ్ బోదెస్సికార్ యా లోకమ్దికార్. అందెజె వరి బోద యా లోలమ్ది వరి ఆలోసం లెకెండ మన్నె. అందెజె యా లోకమ్దికార్ వరి బోద వెనార్.

6 మాటు ఇహిజ దేవుణుదిజ్ సెందితికాట్. దేవుణుదిజ్ నెస్తికాన్ మా మాటెజ్ వినాన్. ఆఇకాన్ విన్ఎన్. నిజం వెప్పొకార్ ఎయెరో, తప్పు వెప్పొకార్ ఎయెరో ఇజి మాటు ఈహు నెస్సాట్.

దేవుణు ప్రేమని, లోకు ప్రేమ

7 నా తంబెరిజడె, మాటు ఒరెన్, మరి ఒరెన్ వన్నిజ్ ప్రేమిస్సెజ్వలె. ఎండనిజ్ ఇహిజ దేవుణు బాణిజె ప్రేమ వాజినాద్. మరి ఒరెన్ వన్నిజ్ ప్రేమిస్సికాన్ దేవుణు బాణిజ్ పుట్టికాన్. వాండ్రు దేవుణుదిజ్ బాగ నెస్తికాన్.

8 మహి వరిజ్ ప్రేమిస్ఇకాన్ దేవుణుదిజ్ నెన్ఇకాన్. ఎండనిజ్ ఇహిజ దేవుణు ప్రేమ మనికాన్.

9 దేవుణు మజి ప్రేమిస్సాన్ ఇజి ఈహు తోరిస్తాన్. ఎలాగ ఇహిజ వన్ని ఒరెండ్రె మరిసిజ్ యా లోకమ్దు పొక్తాన్. మజి ఎలా కాలం బత్కిని బత్కు దొహ్కెజ్ ఇజి దేవుణు వన్నిజ్ పొక్తాన్.

10 నిజమాతి ప్రేమ ఇహిజ మాటు దేవుణుదిజ్ ప్రేమిస్సాట్ ఇజి ఆవద్. నిజమాతి ప్రేమ ఇహిజ యాకదె. ఏలాగ ఇహిజ దేవుణు మజి ప్రేమిస్సాండ్రె మా పాపమ్కు సొన్నిస్సి వందిజ్ వన్ని మరిసిజ్ పొక్తాన్. మా పాపమ్కు వందిజ్ పూజ ఆదెజ్ పొక్తాన్. అకదె ప్రేమ.

11 నాను ప్రేమినిసికిదెరా, దేవుణు మజి నిసా ప్రేమిస్సాన్. అందెజె మాటుబా ఒరెన్ మరి ఒరెన్ వన్నిజ్ ప్రేమిస్సెజ్వలె.

12 ఎయెర్బా ఎనెజ్బా దేవుణుదిజ్ సుడేదెజ్ సిల్లె. గాని మాటు ఒరెన్ మరి ఒరెన్ వన్నిజ్ ప్రేమిస్సిజ దేవుణు మా లోఇ బత్కిజినాన్. అయావలె దేవుణు ప్రేమినిసి లెకెండ్రె మా ప్రేమబ పూర్తి ఆనాద్లె.

13 దేవుణు వన్ని ఆత్మ మజి సిత మనాన్. అందెజె మాటు దేవుణు వెట కూడిత మనాట్ ఇజి, మరి దేవుణు మా లోఇ మంజినాన్ ఇజి నెసినాట్.

14 మరి బుబ్బు ఆతి దేవుణు, మరిసి ఆతి యేసుక్రీస్తుజ్ పోక్తాన్. లోకాజ్ వరి పాపమ్కాణిజ్ వాని సిక్కుదాన్ తప్రెస్తిజ్ ఇజి పోక్తాన్. యాక మాపు సుడేతాపె విజేరిజ్ వెహ్నినావ్. యాక నిజమె ఇజి సాక్కి వెహ్నినావ్.

15 యేసు దేవుణు మరిసి ఇజి ఎయెన్బా ఒప్పుకొటిజు, దేవుణు వన్ని వెట మంజినాన్. వాండ్రు దేవుణు వెట కూడేజి మంజినాన్.

16 దేవుణు మా ముస్సు తోరిస్తి ప్రేమ మాటు నెస్టు మనాట్, నమ్మిత మనాట్. దేవుణు ప్రేమ మనికాన్. అందెజె మహి వరిజ్ ప్రేమిసినికాన్ దేవుణుబాన్ కూడేజి మంజినాన్. దేవుణు వన్నిబాన్ కూడేజి మంజినాన్.

17 దేవుణు ప్రేమిసిని లెకెండ మా నడిమి మని ప్రేమ పూర్తి ఆనాద్లె. అందెజె దేవుణు తీర్పు సీని వలె తియెల్ ఆవిండ మంజినాట్. ఎందనిజ్ ఇహిజ యేసుప్రబు యా లోకమ్దు ఎలాగ బత్కెతాండ్రో మాటుబ అయాలెకెండె బత్కెదెట్.

18 ప్రేమ లోక తియెల్ సిల్లెద్. అక్కాదె ఆవద్. పూర్తి ఆతి ప్రేమ మహిజ అక్క తియెల్ సొసిస్సాద్. ఎందనిజ్ ఇహిజ సిక్కు వానాద్ ఇజినె తియెల్ వానాద్. తియెల్ ఆని వన్నిజ్ పూర్తి ప్రేమ సిల్లెద్.

19 దేవుణునె మజి ముజాల ప్రేమిస్తిజ్, మాటు వన్నిజ్ ప్రేమిస్తిజ్ అట్సినాట్.

20 ఎయెన్బా, 'నాను దేవుణుదిజ్ ప్రేమిస్ను' ఇజి వెహ్ని, మరి ఒరేన్ నమ్మిత్తి వన్నిజ్ ప్రేమ కిఎండ మహిజ వాండ్రు అబద్ధం వెహ్నినాన్. ఎందనిజ్ ఇహిజ తోరిజిని వన్నిజ్ ప్రేమిస్ఇకాన్ తోరె ఇ దేవుణుదిజ్ ప్రేమిస్తిజ్ అట్వెన్.

21 యేసు క్రీస్తు మజి ఇని రూలు సిత మనాన్ ఇహిజ, దేవుణుదిజ్ ప్రేమిస్నికాన్ మహి క్రీస్తు లోకాజ్బా ప్రేమిస్తిజ్ వలె.

5

దేవుణు మరిసి ముస్సు నమ్మకం

1 యేసునె క్రీస్తు ఇజి నమ్మినికాన్ ఎయెన్బా దేవుణు బాణిజ్ పుట్టాన్. బుబ్బెజ్ ప్రేమిస్నికాన్ ఎయెన్బా వన్ని బాణిజ్ పుట్టి విజేరిజ్ ప్రేమిస్నాన్.

2 దేవుణుదిజ్ ప్రేమిసి, వాండ్రు వెహ్ని రూలుజ వజ కితిజ, మాటు దేవుణు కొడోరిజ్ ప్రేమిస్నాట్ ఇజి నెస్నాట్.

3 దేవుణుదిజ్ ప్రేమిస్తిజ్ ఇహిజ వన్ని రూలుజ వజ కిదెజె. వన్ని రూలుజ్ కన్టం ఆతికెజ్ ఆడ. సుల్కాణికెజె.

4 దేవుణుబాణిజ్ పుట్టికార్ విజేరె యా లోకమ్దు దేవుణుదిజ్ పడిఱ విజు వన్కాజ్ జయిస్తిజ్ అట్నార్. దేవుణుదిజ్ పడిఱ విజు వన్కాజ్ జయిస్తిజ్ ఎలాగ అట్నాట్ ఇహిజ, మాటు యేసుప్రబుజ్ నమకం ఇట్టివలెదాన్ అట్నాట్.

5 దేవుణుదిజ్ పడిఱ వన్కాజ్ జయిస్నికాన్ ఎయెన్? యేసు, దేవుణు మరిసి ఇజి నమ్మినికాండ్రె.

6 క్రీస్తు ఆతి యేసు యా లోకమ్దు వాతండ్రె. ఏరుదు బాప్తిసం లాగెఆతాన్. సిల్వారు నల వాక్కి సాతాన్. బాప్తిసం ఉండ్రె ఆవద్. సిలువారు నల వాక్కి సాదెజె వాతాన్. యాక నిజమె ఇజి దేవుణు ఆత్మ సాక్కి వెహ్నినాన్. అందెజె యాక నిజమె. ఎందనిజ్ ఇ హిజ దేవుణు ఆత్మ నిజమెనె వెహ్నినాన్.

7 క్రీస్తు వందిజ్ సాక్కి వెహ్నికెజ్ మూండ్రె మన్నె.

8 దేవుణు ఆత్మ, బాప్తిసం లాగె ఆతి ఏరు, సిలువాదు వాక్తి నల. యా మూండ్రి ఒప్పు కొడిఃజి క్రీస్తు వందిజ్ సాక్సి వెహ్సినె.

9 మాటు, లోకుర్ సాక్సి అస్నాట్ గదె. అహిజ దేవుణు సీని సాక్సి ఒదె సత్తు మనికగదె. ఎందనిజ్ సత్తు మనిక ఇహిజ, దేవుణు వన్ని సొంత మరిసి ఆతి యేసు వందిజ్ వెహ్సినె సాక్సినె.

10 దేవుణు మరిసి ముస్కు నమం ఇట్టి వన్ని లోణ యా సాక్సి మనాద్. గాని దేవుణు ముస్కు నమ్మకం ఇడఃఇకాన్ దేవుణు మని మరిసి వందిజ్ వెహ్సినె సాక్సి నమ్మిఎన్. అందెజె వాండ్రు దేవుణు అబద్దం వెహ్సినెకాన్ ఇజి వెహ్సినాన్.

11 దేవుణు వెహ్సినె సాక్సి యాకదె. ఇనిక ఇహిజ దేవుణు వెట ఎలా కాలం బత్కిని బత్కు దేవుణు మజి సితాన్. యా బత్కు మజి ఎలాగ వాతాద్ ఇహిజ యేసు క్రీస్తు ముస్కు నమకం ఇడఃజి వన్ని వెట కూడఃతి మహిజ్ వాతాద్.

12 దేవుణు మరిసి ఆతి యేసు క్రీస్తు వెట కూడఃజి మంజిని వన్నిజ్ యా బత్కు మనాద్. దేవుణు మరిసి వెట కూడఃజి మన్ ఇ వన్నిజ్ దేవుణు వెట ఎలా కాలం బత్కిని బత్కు సిల్లెద్.

13 దేవుణు మరిసి ముస్కు నమ్మకం ఇడఃఇతి వరిజ్ నాను ఇక్కెజ్ రాసిన. ఎందనిజ్ రాసిన ఇహిజ మిజి దేవుణు వెట ఎలా కాలం బత్కిని బత్కు మనాద్ ఇజి నెస్టెజె రాసిన.

14 అహిజ మజి దేవుణు ముస్కు మని దయరం ఇనిక ఇహిజ, మాటు దేవుణు ఇస్టమ్దిజ్ కూడఃతి మని ఇనికబా లోస్తిజ, వాండ్రు అక కినాన్.

15 మాటు ఇనిక లోస్తిజబా దేవుణు వెంజినాన్ ఇజి మాటు నెస్తిజ, మాటు దేవుణుబాణిజ్ లోస్తికెజ్ విజు దొహ్కె లెకెండె నెసినాట్.

16 ఒరెన్ నమ్మిత్తికాన్ సాపు తెఇ పాపం కిజి మహిజ ఎయెన్బా అక సుడిఃతిజ, వన్ని వందిజ్ పార్దనం కిదెజ్. దేవుణు వన్నిజ్ బత్కు సీనాన్. సాపు తెఇ పాపం కినివరి వందిజె వెహ్సినె. గాని సాపు తపిన్ని పాపం మనాద్. నని పాపం కిని వరి వందిజ్ పార్దనం కి అ ఇజి నాను వెహ్ఎ.

17 ఇని తపు కితిజ్బా పాపమ్నె. గాని లోకాజ్ సాపు తపిన్ ఇ పాపమ్కు మన్నె.

18 దేవుణు బాణిజ్ పుట్టికాన్ ఎయెన్బా పాపం కిజినె మన్ఎన్ ఇజి మాటు నెసినాట్. ఎందనిజ్ ఇహిజ దేవుణు మరిసి వన్నిజ్ కావ్కిజినాన్. అహిజ సయ్తాను వన్నిజ్ ముట్టి నాసనం కిదెజ్ అట్ఎన్.

19 మాటు దేవుణు కొడొర్ ఇజి నెసినాట్. దేవుణుదిజ్ సెందితికార్ ఆఇకార్ సయ్తాను అడిఃగి మంజినార్ ఇజి నెసినాట్.

20 మరి దేవుణు మరిసి వాతండ్రి, నిజమాతి దేవుణుదిజ్ మాటు నెస్టెజ్ మజి తెలివి సితాన్. మాటు వన్ని వెట కూడఃతిజ్ నిజమాతి దేవుణు వెట కూడఃత మనాట్. వీండ్రి నిజమాతి దేవుణు. వీండ్రి దేవుణు వెట ఎలా కాలం బత్కిని బత్కు లోకాజ్ సీనికాన్.

21 నాను ప్రేమిసిని బయిరండె, బోమ్మెజ మాడిఃస్టెజ్ ఆవిద్.

యోహాను రాస్తి రుండి ఉత్త్రం

నెల్ల కిబిసినిక

యేసు క్రీస్తు అపొస్తుడు ఆతి యోహాను రాస్తి ఉత్త్రమనె యాక. నండో ముజాలె సువార్త వెప్పికార్ బూలాజి బూలాజినె సువార్త సాటిసి మహార్. అయావలె యేసుజ్ నమ్మిత్తికారె, యాలెకెండ సువార్త వెప్పి వరిజ్ వరి ఇండ్రో డగ్రు కిజి, వరిజ్ కావాలిన్తికెజ్ సీజి పొక్కి మహార్. తప్పు బోద వెప్పికార్బా మహార్. వారుబా యాలెకెండ బూలాజి బూలాజినె కిజి మహార్. అందెజె నన్ని వరివందిజ్ జాగర్త మండ్రెజ్ ఇజి యా ఉత్త్రమదు రాసి వెప్పినాన్. నిజమాతికెజ్ నమ్మిజి అయాలెకెండ బల్కిదెజ్ వలె ఇజిబా వెప్పినాన్.

1-2 పెదెలి ఆతి నాను, దేవుణు ఏర్పాటు కితి అమ్మెజ్, దన్ని కొడొరిజ్ రాసిన. నాను మిజి నిజమనె ఎత్తు కిజిన. నాను ఒరెనె ఆవండ, దేవుణు తోరిన్తి నిజమాతి సజతిజ్ నెస్తికార్ విజెరెబా మిజి ఎత్తు కిజినార్. ఎందనిజ్ ఇహొజ, దేవుణు తోరిన్తి నిజమాతికెజ్ మజి తెలిజి మంజినె. అయాలెకెజ్ మాటు ఎలాకాలం తెలిజి మంజినె.
³ దేవుణు తోరిన్తి నిజమాతికెజ్ మాటు నమ్మిజినాట్. వాండ్రు మజి ప్రేమిస్సాన్. అందెజె బుబ్బి ఆతి దేవుణుని మరిసి ఆతి యేసు క్రీస్తు, దయా దర్మమదాన్, మా ముస్కు కనికారం తోరిసి మాటు నిపాతిదాన్ మండ్రెజ్ సాయం కిపిర్.

ప్రేమదాన్ నడినివందిజ్ వెప్పినిక.

⁴ మీ కొడొర్ లొఇ సెగొండార్, దేవుణు తోరిన్తి నిజమాతి సజతిజ్ వజ నడిజినార్ ఇజి నాను నెస్తి. అందెజె నాను నండో సర్ద ఆజిన. బుబ్బి మజి ఆడ్ర సిత్తివజనె వారు నడిజినార్.

⁵ అహొజ ఓ అమ్మ, నాను కొత్త ఆడ్ర మిజి రాన్వ. గాని క్రీస్తుజ్ నమ్మిత్తిబాణిజ్ అసి, మాటు నెస్తి మన్ని ఆడ్రనె రాసిన. మాటు ఒరెన్ వన్నివెట ఒరెన్ ప్రేమిస్సెజ్ ఇని ఆడ్రనె వెప్పిన.

⁶ మాటు వన్ని ఆడ్రెజి లొజిజి, అయావజి నడితిజనె దేవుణుదిజ్ ప్రేమిస్సాట్. మీరు క్రీస్తుజ్ నమ్మితి బాణిజ్ అసి వెహాలెకెండ, మాటు ఒరెన్ వన్ని వెట ఒరెన్ ప్రేమిసి అయాలెకెండ నడిదెజ్ ఇజినె వన్ని ఆడ్ర.

మొసెం కినివరివందిజ్ జాగర్త మండ్రు.

⁷ యేసుక్రీస్తు, యాయపొటలొఇహొన్ వాతికాన్ ఇజి ఒప్పుకొడొరిజ్ నండొండార్ మొసెం కినికార్ లొకమదు సొత్త మనార్. ననికాండ్రె మొసెం కినికాన్, క్రీస్తుజ్ ఎద్రిన్తికాన్.

⁸ అపొస్తురు ఆతి మాపు, మీ వెట మీ నడిమి కితి పణిజి పలితం, పాడు ఆవండ మంజిని వందిజ్, మొసెం కినివరి ముస్కు జాగర్త మండ్రు. మరి, దేవుణు వెట ఎలాకాలం బల్కిని బత్తు దొహ్కొప్పందిజ్, మొసెం కినివరి ముస్కు జాగర్త మండ్రు.

⁹ ఎయెంబా, క్రీస్తు నెన్పిన్తి మాట నమ్మిజి మన్వండ, వన్ని సొంత మాటెజ్, క్రీస్తు నెన్పిన్తి మాటవెట కలప్తిజి, వాండ్రు దేవుణుదిజ్ సేందిఇకాన్. క్రీస్తు నెన్పిన్తి మాట నమ్మిజి మంజినికాన్ బుబ్బిజ్ని మరిసిజ్ సెందితికాన్.

10 ఎయెన్బా క్రీస్తు నెన్పిస్తి మాట వెహ్‌వండ, మీ డగ్రు వాతిజ, మీరు వన్నిజ్ ఇంఠ్రొ కూక్యాట్. వన్నిజ్ డగ్రు కిమాట్.

11 ఎందనిజ్ ఇహిజ, వన్నిజ్ డగ్రు కితికాన్ ఎయెన్బా వన్ని సెఇపణిజవెట కూడిఃత మనాన్.

12 నండొ సజతిజ్ మిజి రాస్తాజ్ మనాద్. గాని ఉత్రమ్దాన్ వెహైజ్ నజి మన్సు సిల్లెద్. మా సర్ద పూర్తి ఆదెజ్ మీ డగ్రు వాజి, మిజి సుడఃజి వర్గిదెజ్ నాను ఆస ఆజిన.

13 దేవుణు ఏర్పాటు కితి నీ తజి కొడొఃర్, మిజి వెన్బాతి లెకెండ్ వెహ్సినార్.

యోహాను రాస్తి మూండ్రి ఉత్తం.

నెల్ల కిబిసినిక

యేసు క్రీస్తు అపొస్తుడు ఆతి యోహాను రాస్తి ఉత్తమనె యాక. వన్ని కూలాయెనాతి గాయుజ్ రాసినాన్. యా గాయు ఇనికాన్, యోహాను అతికారం అడిగి మన్ని దేవుణు సజం ఉండ్రి సుడేజి నడిపిన్నాన్. బూలాజి బూలాజి సువార్త వెప్పి వాజిని వరిజ్ వాండ్రు డగ్గు కిజి నెగ్రెండ మర్జి పొక్కిని దన్ని వందిజ్ యోహాను వన్నిజ్ వందనమ్ కు వెప్పినాన్. మరి, దియొత్తెపె ఇనికాన్ బూలాజి బూలాజి సువార్త కిని వరిజ్ డగ్గు కివిండ మర్జి పొక్తాన్. వాండ్రు యోహాను అతికారం అడిగి మండ్రెజ్ కెవి ఇజినాన్. వన్నిజ్ డటిసి వెప్పిదన్ని వందిజ్ బా యా ఉత్తమదు రాసినాన్.

1 పెదెలి ఆతి నాను నిజం ఎత్తు కిజిని నా సొంత కూలాయెన్ ఆతి గాయుజ్ రాసిన.

2 ఓ, నాను ప్రేమిసిని కూలాయెన్, దేవుణు వెట నిజి మన్ని సమందం పిరిసిని వజ, నీను విజు వన్కా లొక పిరిదెజ్ ఇజి నాను పార్దనం కిజిన. నీను నోబు నొప్పి సిల్లెండ నెగెండ్ నెగెండ్ మండ్రెజ్ ఇజిబా నాను పార్దనం కిజిన.

3 సెగొండార్ నమ్మితికార్ నా డగ్గు వాతార్. వారు, దేవుణు తోరిస్తి నిజమాతి సజతిజ్ నీను లొజిజిని ఇజి, అయావజ నీను నెగ్రెండ నడిజిని ఇజి వెహ్తార్. అయాలెకెండ్ వెహ్తారె నజి నండొ సర్ద కిబిస్తార్.

4 నా కొడొర్ దేవుణు తోరిస్తి నిజమాతి సజతిజ్ లొజిజినార్. వారు అయావజ నడిజినార్ ఇజి వెంజినికాదె నజి నండొ సర్ద. దన్నిజ్ మిస్తి సర్ద సిల్లెద్.

5 ఓ, నాను ప్రేమిసిని కూలాయెన్, బూలాజి బూలాజి సువార్త వెప్పి వాజిని వరిజ్ నీను డగ్గు కిజిని. వారు నిజి తెలికార్ ఆతిజ్ బా నీను వరి వందిజ్ కిజిని ఇనికబా నమ్మకమ్ దానె కిజిని.

6-7 వారు నీ ప్రేమ వందిజ్ ఇబ్బె దేవుణు సజం ఎద్రు సాసి వెహ్తార్. నీను, దేవుణుదిజ్ ఇస్టం ఆతి వజ వరి పయనమ్ దు అవసరం ఆతికెజ్ సీజి పొక్ అ. ఎందనిజ్ ఇహిజ, వారు క్రీస్తుజ్ నమ్మితి వరిబాణిజ్ ఇనికబా లొన్ విండ, క్రీస్తుజ్ వెహ్తాజ్ సొత్తార్.

8 అందెజె వారు వెప్పివలె, మాటు వరివెట జత కూడేజి, దేవుణు వందిజ్ నిజమాతికెజ్ నెన్ పిన్నివందిజ్, నన్నివరిజ్ మాటు డగ్గు కిదిజ్ వలె.

దియొత్తెపెని దెమెత్రియు.

9 నాను దేవుణు సజమ్ దిజ్ ఉండ్రి సజతి రాస్త. గాని దియొత్తెపె నా అతికారమ్ దిజ్ లొజివన్. ఎందనిజ్ ఇహిజ, వాండ్రు దేవుణు సజమ్ దు పెరికాన్ ఆదిజ్ కోరిజినాన్.

10 వాండ్రు మా మున్కు సెక మాటెజ్ వర్గిజినాన్. యాకాదె ఆవిండ బూలాజి బూలాజి దేవుణు మాట వెప్పి వరిజ్ డగ్గు కివన్. వరిజ్ డగ్గు కిదిజ్ మన్ను మన్ని వరిజ్ అడ్డు కిజి దేవుణు సజమ్ దాన్ వరిజ్ వెల్లి పొక్కినాన్. అందెజె నాను వాతిజ, వాండ్రు కిజిని సెక పణిజ దేవుణు సజం ఎద్రు వెహ్పా.

11 ఓ, నాను ప్రేమినిని కూలాయెన్, సెఇ పణిజ్ కిజిని వరిజ్ సుడఃజి నడిఃఏండ, నెగ్గి పణిజ్ కిజిని వరిజ్ సుడఃజి నడిఃఅ. నెగ్గి పణిజ్ కినికాన్ ఎయెన్బా దేవుణుదిజ్ సెందితికాన్. సెఇ పణిజ్ కినికాన్ ఎయెన్బా దేవుణుదిజ్ నెన్ఏన్.

12 దెమెత్రియు వందిజ్ లోకుర్ విజేరె నెగ్గికెజ్ పొగ్డిఃజినార్. దేవుణు తోరిస్తి నిజమాతి సజతిజ్ లోజిజి వాండ్రు నడిఃజినాన్. అయాక వాండ్రు నెగ్గి లోకు ఇజి రుజుప్ కిజినాద్. మాపుబా వన్ని వందిజ్ నెగ్గికెజ్ వెప్పినాప్. మా సాసి నిజమాతికెజ్ ఇజి నీను నెన్సి.

13 నండొ సజతిజ్ నిజి రాస్తెజ్ మనాద్. గాని ఉత్తమ్దాన్ వెహైజ్ నజి మన్సు సిల్లెద్.

14 నిజి బేగి సుడఃదెజ్ ఆనాద్ ఇజి నాను కోరిజిన. అయావలె మాటు కూడఃజి వర్గినాట్.

15 నిజి సమాదనం రపిద్. ఇబ్బెణి దేవుణు సజమ్దికార్ నిజి వెన్బాతి లెకెండ్ వెప్పినార్. అబ్బె మన్ని వరిజ్ విజేరిజ్ వెన్బాతి లెకెండ్ వెహేఅ.

యాద రాస్తి ఉత్తం

నెల్ల కిబిసినిక

మా ప్రబు ఆతి యేసుక్రీస్తుజ్ తంబెరిజ్ ఇజి వెహె ఆతి వరి లోఇ మన్ని యూద ఇనికాన్ యా ఉత్తం రాస్తాన్. వాండ్రు యాకోబుజ్బా తంబెర్ని. క్రీస్తు సకం 68-80 నడిఁమి కాలమ్దు యా ఉత్తం రాస్త మనాద్దు. క్రీస్తుజ్ నమ్మిత్తివరి సజమ్కలోఇ నిజతిమాతి బోద నెక్కిపోక్కి తప్పుజ్ నెస్సిసిని వరి వందిజ్ రాస్తాన్. వరి బోదవందిజ్ వరి బత్తువందిజ్ డటిసి రాస్తాన్. నమ్మిత్తి వరిజ్ దేవుణు సిత్తి రక్కణ వందిజ్, నిజం వందిజ్ కాట్లాడఁదెజ్ ఇజి రాస్త మనాన్.

1 యేసు క్రీస్తుజ్ పణి కినికానాతి యూద (వాండ్రు యాకోబుజ్ తంబెరి) రాసిని ఉత్తం. దేవుణు కూక్తి వరిజ్ నాను రాసిన. బుబాతి దేవుణు నండో ప్రేమిసి యేసు క్రీస్తు మర్జి వానిదాక కాప్ కిజి ఇడ్డిని మిజేనె రాసిన

2 మిజి కనికారం, నిపాతి, దేవుణు - బాణిజ్ వాని ప్రేమ ఒదె నిండ్రిజి మనిద్.

దేవుణు వందిజ్ మన్ను సిల్లి వరిజ్ వాని సిక్కు.

3 నాను నండో ప్రేమిసినికి దెరా, మజి విజెరిజ్ దోహ్కక్తి రక్కణ వందిజ్ మిజి రాస్తజ్ ఇజి నండో ఆన ఆత మహ. గాని దేవుణుదిజ్ కేట ఆతి వరిజ్ ఉండ్రె సుటునె ఒపజెప్తి నిజతిమాతి నమకం కాపాడిఁజి ఇడదెజ్ మీరు కాట్లాడఁజి మండ్రెజ్ వలె ఇజి మిజి బతి మాల్లి రాస్తజె ఏలు ఒడఁబిజిన.

4 సెగొండోర్ లోకుర్ మిజి తెలివండ మీలోఇ డుఁగిత మనార్. దేవుణుబాణిజ్ వరిజ్ వాని తీర్పు వందిజ్ పూర్బకాలమ్దు దేవుణు - మాటుదు రాస్త మనాద్. వారు దేవుణు - వందిజ్ బక్తిసిల్లి లోకుర్. వారు ఒడఁగిల్వందిజ్ మని, వరి సెఇ ఆసెజి వజి కిజి సర్ద ఆనివందిజ్ దేవుణుబాణిజ్ వాతి, వన్ని దయదర్మమదిజ్ మారిస్తార్. అహు కితిజ్ మాటు సేవకిని ఒరెండ్రె ఎజుమాని ఆతి మా ప్రబు ఆతి యేసు క్రీస్తుజ్ నెక్త పొక్కార్.

5 నాను వెహ్సాని యా సజతిజ్ విజు మీరు ముజాలె నెస్తి మన్నిదెర్ గాని నాను మిజి మరి ఎత్తు కిబిస్తిజ్ ఆస ఆజిన. అక్క ఇనిక ఇహిజి పుర్పుం అయ్గుప్పు దేసమ్దాన్ ఇస్తాయేలు లోకురిజ్ ఉండ్రె సుటునె గెల్పిస్తాన్. గాని వెనుక వరి లోఇ నమ్మిఎండ్రాతి వరిజ్ దేవుణు నాసనం కిత్తాన్.

6 దేవుణు సిత్తి అతికారమ్దు మండ్రెజ్ ఇన్ఱం ఆవిండ, వరిజ్ మహి అతికారం డిఁస్తిసిత్తి దేవుణు దూతార్ వందిజ్ ఎత్తు కిదు. తీర్పు సిజి సిక్కు సీని పెరిదినమ్ దాక, ఎల్లకాలం మంజిని గొలు గొలుస్కాణిజ్ తోహ్పి - స్తాండ్రె సీకటి మన్ని బాడ్డిదు దేవుణు వరిజ్ ఇట్ట మనాన్.

7 అయలెకెండ్రె సొదొమ గొమొర్ర పట్టుమ్క లోకాజ్, వనక సుటులం మన్ని నాహ్మణి లోకాజ్ ఇనిక జగ్గితాద్ ఇజి ఎత్తు కిదు. వారు దేవుణు దూతార్ కితిలెకెండ్రెనె, ఒడఁగిల్ది సెఇ ఆసెజ్ వజి కిజి సర్ల ఆని కిని పణిజ్ కిత్తార్. ఆఇ బోదెకవెట ఉండ్రె ఆవిద్, మొగవరివెట మొగవారు కూడఁజి పాపం కితార్ ఎలాకాలం నంబిజి సినుదాన్ సురె ఆతార్. నిన్నివరిజ్ ఇని సిక్కు వానాద్ ఇని దన్నిజ్ అక్క విజెరిజ్ ఉండ్రె గుర్తులెకెండ్రె మనాద్.

8 అయలెకెండెనె వీరు కలెజ్ గాసి ఒడొల్దెదె సెఇ ఆసెజ్ వజ కిజి సర్ద ఆని పణిజ్ కిజినార్. మరి, ఏలుబడిః కినివరిజ్ లోజివర్. వారు దేవుణు దూతారిజ్ దూసిస్సార్.

9 అహిజ దేవుణు దూతార్ ముస్సు పెరి దూత ఆతి మికావీలుబా, మోసె పీనుగు వందిజ్, సయేతాను మికాయెలుజ్ ఒదిస్సివలె ఇనిక కిత్తాన్ ఇహిజ, వన్నిజ్ దూసిసిని మాటెజాణ్ నేరం మొవ్విన్. గాని “ప్రబునె నిజి గదిసిన్”, ఇజి వెహ్తాన్.

10 గాని వీరు ఇహిజ వరిజ్ అర్థం ఆఇవనకవందిజ్ దూసిసినార్. బుద్దిసిల్లి జంతుజ్ లెకెండె, మన్సుదు బాగ ఒడిఃబిదెజ్ అట్విర్. జంతుజులెకెండె ఒడొల్ ఆసెజ్ వజ కిజి సర్ద ఆదెజ్ సుడఃజినార్. వరి సెఇ పణిజాణ్ వారి పాడాఃజి సొస్సినార్.

11 అబయ! వరిజ్ కష్టమకు తవ్ఉ. ఎందనిజ్ ఇహిజ, వారు సెఇ పణి కితి కయిసు లెకెండెబా మనార్.* వారు బిలాము ఇని ప్రవక్త లెకెండెబా ఇనాయం దొప్పిద్ ఇజి, వరి బత్సు తప్పుదిజ్ పూర్తి ఒపజెప్త మనార్.† వారు కోర ఇనివన్ని - లెకెండెబా మనార్. మోసె వెహ్తాదన్నిజ్ మర్జి వెహ్తాడె డటం ఎద్రిస్తాన్‡. వీరుబా వన్నిలెకెండె నాసనం ఆస సొనార్.

12 మీరు కిజిని ప్రేమవిందుజ్లోఇ వారు తెల్లాని పాతాదు మన్ని మస లెకెండె సిగు తపిసినార్. ఇని తియెల్ సిల్లెండె పొటపంజు ఉణిజి వరిజ్ వారి పోస కిబె ఆజినార్. వారు గాలి డెయేజి ఒసిని పిరు సిల్లి మొసాప్ ననికార్. వారు కాయెజ్ అస్సి కాలమ్దు కాయెజ్ అస్ఇ మరెక్ లకెండె. అక్కాదె ఆవిద్. వారు వలెజాణిజ్ తెరె ఆతి మరెకలెకెండె. పాణం సిల్లికార్, పూర్తి సాతికార్ వారు.

13 వారు సమ్దరమ్ది పెరి ఉల్కెజ్ లెకెండె మనార్. వరి సిగుపణిజ్ ఉల్కెజ్ డెయేజి తసిని పొబు లెకెండె మన్నె. మరి సరి తప్పి బూలాని సుక్కెజ్ లెకెండె మనార్, వారు. అందెజె దేవుణు వరివందిజ్ ఎలాకాలం మండ్రెజ్ గొప్ప సికటి మన్ని బాడ్డి* తయార్ కిజి ఇడ్డమనాన్.

14 ఆదముదాన్ మొదొల్లి ఏడవ తరమ్దికాన్ ఆతి హానోకు పూర్బకాలమ్దు దేవుణుబాణిజ్ వాతి మాటెజ్ వెహ్తాన్. విరివందిజ్ వెహ్తా అయ మాటెజ్ వాని కాలమ్దు జర్గిని వందిజె. ఇనిక ఇహిజ “ఇదిలో ప్రబు వన్ని వెయు వెయిజ్ దూతార్ వెట వాజినాన్.

15 విజెరిజ్ తీర్ప కిదెజ్ ప్రబు వాజినాన్. దేవుణు వందిజ్ బక్తి సిల్లి వరిజ్ తీర్పు సీజి సిక్స సీదెజ్ వాండ్రు వాజినాన్. ఎందనిజ్ ఇహిజ దేవుణు వందిజ్ బక్తి సిల్లికార్, దేవుణుబాణిజ్ మన్సు దూరం ఇడ్డి సెఇ పణిజ్ కిత్తార్. దేవుణు వందిజ్ బక్తి సిల్లికార్ తియెల్ సిల్లెండె దేవుణు ఎద్రు వన్నిజ్ పడిఃఇ కటిసమతి మాటెజ్ వర్గితార్”.

16 వారు దేవుణు ఎద్రు సణిజిజినార్. ఆఇవరి ముస్సు నింద మోప్పినికార్. వారు వరి ఒడొల్దెదె సెఇ ఆసెజ్ వజ కిజి సర్ద ఆదెజ్ ఇజిని సుడఃజినార్. వారు వరి వందిజెనె పణిదిజ్ రెఇ బడాయ్ మాటెజ్ వర్గిజినార్. ఆఇ వరిబాణిజ్ ఇనికబా దొప్పిద్ ఇజి వరిజ్ పొగడిఃజినార్.

ఓరిసి మండ్రెజ్ ఇజి వెహ్తానాన్.

* 1:11 1:11 కయిసు వందిజ్ సద్విదు, ఆదికాండం 4:1-16 † 1:11 1:11 బిలాము వందిజ్ సద్విదు, సకియా పుస్తకం 22 - 24. అద్యాయమక లోఇ మనద్ ‡ 1:11 1:11 కోర వందిజ్ సద్విదు, సకియా పుస్తకం 16:1-35 § 1:13 1:13 యా సుక్కెజ్ బూమి నన్నికెజ్ గాని ఎసెజ్ ఎసెజ్ సొని సరి తప్పి సొని

* 1:13 1:13 ఒదె సికటి మని బాడ్డి. యా బాడ్డి సరకమ్నె

17 అహిజ నాను నండో ప్రేమిసినికిదెరా, మా ప్రబు ఆతి యేసు క్రీస్తుజ్ అపొస్తురు ఆతికార్ మిజీ ముజాల వెహ్తామని సజతిజ్ మీరు ఎత్తు కిదు.

18 వారు ఇనిక వెహ్తార్ ఇహిజ, కడెవెరి రోస్కాన్ వెక్రిసినికార్ వానార్. వారు దేవుణు వందిజ్ బక్తి సిల్లెండ, వరి ఒడోల్లి సెఇ ఆసెజ్ వజ కిజి సర్ద ఆజినె మంజినార్.

19 లోకాజ్ కేటెజ్ కేటెజ్ కిబిస్సికార్ వీరె. పాపం ఏలుబడిః కిని మన్ను మన్నికార్, దేవుణు ఆత్మ సిల్లికార్ వీరు.

20 గాని మీరు, ఇహిజ నాను నండో ప్రేమిసినికిదెరా, దేవుణుబాణిజ్ మిజీ దోహ్కాక్తి నమకమ్దు పిరిజి వాదెజ్ ఒరెన్ మరి ఒరెన్ వన్నిజ్ తోడుః కిదెజ్. దేవుణు ఆత్మ నడిఃపిసిని వజ పార్దనం కిజి మండ్రు.

21 దేవుణు మీ మున్ను తోరిస్తి మన్ని ప్రేమదు మండ్రు. ప్రబు ఆతి యేసు క్రీస్తు మీ మున్ను కనికారం మాజి, దేవుణు వెట ఎల్లకాలం బత్కిని బత్కు సీదెజ్ ఇజి ఎద్రు నుడఃజి మండ్రు.

22 దేవుణు మున్ను మన్ని నమకం వందిజ్ అనుమానం మని వరి మున్ను కనికారం తోరిస్టు.

23 నమకమ్దాన్ తప్పిసాహి సెగొండారిజ్, సిను నడిఃమిహాన్ వెల్లి లాగితిలెకెండ్ రక్సిస్తు. తప్పి సాహి మరి సెగొండారిజ్ కనికారం తోరిస్టు. గాని తియెల్దాన్ మండ్రు. వరి పణిజ్ మజి పడిఃఏద్. వారు కిని సెఇ పణిజాజ్ మాటు సెఎణ్ ఆదెజ్ ఆఏద్.

24 మీరు పాపమ్దు తోరో ఒడిఃజి అరేవిండ మిజి కాప్ కిదెజ్, దేవుణు గొప్ప పెరి జాయ్ ఎద్రు, గొప్ప సర్దదాన్, ఇని తప్పుబా సిల్లెండ మిజి నిల్పెజ్, మజి రక్సిస్సికాన్ ఆతి ఒరెండ్రె దేవుణు అటాన్.

25 మజి రక్సిస్సికాన్ ఆతి దేవుణు, ఒరెండ్రె దేవుణు. మా ప్రబు ఆతి యేసు క్రీస్తు - వలెహానె వన్నిజ్ పొగడిఃనాట్. ఎందనిజ్ ఇహిజ వాండ్రె జాయ్దాన్ నిండ్రెతి సోకు మన్నికాన్, వాండ్రె గొప్ప పెరికాన్, వాండ్రె గొప్ప సత్తు మన్నికాన్, వాండ్రె విజుదన్ని - మున్ను యా అతికారం మన్నికాన్. వాండ్రు విజు వనకాజ్ ముజాల యావజ మహాన్, వాండ్రు ఏలు యావజ మనాన్, వాండ్రు వాని కాలమ్దు యావజ మంజినాన్. ఆమెన్.

ప్రకటన పుస్తకం డాజేతిమన్నికెజ్ దేవుణు యోహానుజ్ తోరిస్తికెజ్

నెల్వ కిబిసినిక

ఇక్క బయ్బిల్దు మన్ని కడెవెరి పుస్తకం. తెలుగు బయ్బిలుదు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాజేతిమన్నికెజ్ వెలి తోరిసినిక, టుకుర్ ఇడ్డిమన్నిక టుకుర్ లాగ్గి తోరిసినిక ఇజి అర్థం మనాద్. ఇక్కెజ్ ఎయెర్బా ముజాల నెస్తిమన్ని మాటెజ్ ఆఉ. యేసుప్రబు వందిజ్ని దేవుణుమాటదిజ్ సాస్యం వెప్పి వందిజ్, యేసుప్రబు సిసుర్లోఇ ఒరెన్ ఆతి యోహాను ఇనివన్నిజ్ రోమప్రబుత్వం ఆతికారిబు, నారు డిబిస్తి పోక్టార్. ఈజియన్ సమ్దరం నడిమిమన్ని పత్తోస్ ఇని లోకు సిల్లి ఇజిరి దేసమ్దు పోక్టార్ (ప్రకటన 1:9).

వాండ్రు అయ ద్వీపుదు మహివలె, దేవుణు వన్ని దూతవెట యోహానుజ్ తోరిస్తికెజ్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మరజి నిజిత్తి వెనుక, ఇంజుముంబు 60 పంటెజ్ డాట్టివెనుక యా పుస్తకం రసి ఆత మనాద్ ఇజి నమ్మిజినార్.

యా పుస్తకం, ఆసియాదు మన్ని ఏడు సజమ్కాజ్ రాస్సి ఉండ్డి ఉత్తమ్లెకెండ్ మనాద్ (ప్రకటన 1:10-11). వాని కలమ్దు ఇనికెజ్ జర్గినెలె ఇని వందిజ్ యా పుస్తకమ్దు రాస్త మనాద్. యేసుప్రబు మరజి వానివందిజ్, మరి యా లోకమ్దు జర్గిదెజ్ మన్నికెజ్వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డెమిసియన్ ఇనికాన్ రోమ రాజు మహివలె యా పుస్తకం రాసి ఆత మనాద్ ఇజి నంఠెండార్ నమ్మిజినార్.

మొదోల్

1 యాక డాజేతిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తికెజ్ ఇజి వన్నిజ్ తోరిస్తికెజ్. వెటన ఇనికెజ్ జర్గినెలె ఇజి యేసు క్రీస్తు, వన్ని దూతెజ్ వెప్తా పోక్టాండ్రె, అయ సజతిజ్ వన్ని పణిమణిసి ఆతి యోహానుజ్ తోరిస్తికెజ్.

2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తి విజు వనకాజ్ సుడెజి నిజమాతికెజ్ ఇజి యోహాన్ సాస్యం వెప్పినాన్.

3 దేవుణుబాణిజ్ వాతి యా ప్రవక్త మాటెజ్, డటం సదివీజి మహివరిజ్ వెన్పిసినికాన్ని, సద్వినికెజ్ వెంజి అయాకెజ్ మన్పుదు ఇడ్డి నమ్మిజి మంజినికాన్ దేవుణు సీజిని దీవెనమ్కు మంజినికాన్ ఆనాన్. ఎందానిజ్ ఇహిజ, అయాకెజ్ అయాలెకెండ్ జర్గిదెజ్ నమయం డగ్రు ఆత మనాద్.

దేవుణుదిజ్ పోగ్డిజిజి వెప్పిని మాటెజ్.

4 అసియాదు మన్ని ఏడు, దేవుణు సజమ్కాజ్ యోహాను రాసినాన్. ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతికాన్, మరి వాండ్రు బస్తిమన్ని వన్ని సింహాసనం ఎద్రుమన్ని ఏడు ఆత్మెజ్, వన్ని దయదార్మం మీ మున్పు మంజి, మీరు నిపాతిదాన్ మండ్రెజ్ సాయం కిపిన్.

5-6 నమ్మకమాతికాన్ ఆతి సాసి, సాతి వరిబాణిజ్ తొలిత నిజిత్తికాన్, బూమి ముస్సు ఏలుబడిః కిజిని విజు రాజురిజ్ ముస్సు రాజు ఆతి యేసుక్రీస్తుబా వన్ని దయదార్మదాన్ మీరు నిపాతిదాన్ మండ్రెజ్ సాయం కిపిన్. మజి ప్రేమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రె రాజ్యం లెకెండని, వన్నిజ్ పణి కిని పుజేరిజ్ లెకెండ కిత్తిమన్ని యేసుక్రీస్తుజ్ గొప్ప గవర్నమని అతికారం అంతు సిల్లెండ ఎలాకాలం మనీద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణుకెజ్ వన్నిజ్ నూణెలె. వన్నిజ్ బల్లెమ్దాన్ గుత్తికార్బా నూణార్లె. బూమి ముస్సు మనికార్ విజేరి, వన్నిజ్ సుడఃజి గుండె కొత్తె ఆజి అడఃబనార్లె. అయాలెకెండనె ఆనాద్లె. ఆమెన్.

8 “అల్పాని ఒమెగ* నానె”, ఇపాజ మొదొల్ని కొన నానె. “ముజాల మహికాన్, ఏలు మన్నికాన్, వాని కాలమ్దు మంజినికాన్ ఆతి విజు దన్నిజ్ సత్తు మన్నికాన్” ఆతిమన్ని ప్రబు ఆతి దేవుణు వెప్పినాన్.

లోకుమరిసి లెకెండ ఒరెన్

9 యేసువందిజ్ వాజిని స్తమెజు లోఇ, వాండ్రు కిని ఏలుబడిఃదుని, వన్ని వందిజ్ కర్ణమ్కు ఓరిస్తెజ్, మీవెట కూడఃజి మన్నికాన్ ఆతి, మీ తంబెరి ఆతి యోహాను ఇని నాను, దేవుణు మాట వందిజ్ని యేసువందిజ్ సాస్యం వెప్పి వందిజ్, సమ్దరం నడిఃమి మన్ని పత్మోను ఇని ద్విప్పుదు† ఒరెనె మహా.

10-11 వారమ్దిజ్ మొదొహి రోజు ఆతి ప్రబు దినమ్దు, నాను దేవుణు ఆత్మదాన్ నిండ్రెతి మహివలె, జోడు బాంగ ఉక్కిలెకెండ ఉండ్రె కంటం నా వెనుకహాన్ వెహా. నీను సుడఃజినికెజ్ విజు ఉండ్రె పుస్తకమ్దు రాసి, ఎపెను, స్మూర్న, పెర్గాము, తుయతయర, సర్దిను, పిలదెల్పియ, లవొదికియ ఇని ఏడు, దేవుణు సజమ్కాజ్ పోక్అ ఇజి, అయా కంటం నజి వెప్తిమన్నిక, నా వెనుకహాన్ నాను వెహా.

12 యాక వెహానె, నావెట వర్రిజిని కంటం ఇనికాదొ ఇజి సుడఃదెజ్, నాను వెనుక మహ్తా. నాను వెనుక మహ్తాజ్, బజారమ్దాన్ తయారొ కిత్తి ఏడు దీవ డండిజ్ సుడఃత.

13 అయ దీవ డండిజు నడిఃమి, లోకు మరిసి ఆతి వన్నిజ్ పోలితి ఒరెన్ వన్నిజ్ సుడఃత. వాండ్రు వన్ని పాదమ్ దాక అందితి మన్ని ఉండ్రె నీరి సొక్క పొర్పాజి గుండెదు బజారమ్దాన్ మన్ని కంటువ తొహా ఆత మహాన్.

14 వన్ని బురాని వన్ని బుర్రది కొప్పు తెల్లాని దూతిదిజ్ పోలిసి, గాందులెకెండ తెలాజ్ మహాద్. వన్ని కణుకెజ్, నీను కొనెజ్లెకెండ మహా.

15 వన్ని పాదమ్కు కంసు సొల్లుదు కాప్తి, కంజు మెర్నినిలెకెండ మహా. వన్ని కంటం గొప్పు పెరి గడ్డ జాటు లెకెండ మహాద్.

16 వాండ్రు వన్ని ఉణెరి కియుదు ఏడు సుక్కెజ్ అస్త మహాన్. రుండి దరిజ్బా తెవుగు మన్ని కుర్ల లెకెండ మన్ని మాటెజ్ వన్ని వెయుదాన్ వెల్లి వాతె. వన్ని మొకొ పూర్తి జాయ్దాన్ మెర్నిని పొద్దుది జాజ్ లెకెండ మహాద్.

17 వన్నిజ్ సుడఃతానె, నాను సాతివన్నిలెకెండ వన్ని పాదమ్కాజ్ అర్త. అయావలె వాండ్రు వన్ని ఉణెరి కియు మా ముస్సు ఇడఃజి ఈహు వెహ్తాన్. “తియెల్ ఆమా. నాను మొదొహికాన్. నాను కడఃవెరిదికాన్.

* 1:8 1:8 అల్ప గ్రీకుబానది మొదొహి అక్కరం. ఒమెగ కడఃవెరి అక్కరం † 1:9 1:9 ద్విప్పుసురుల సమ్దరం మన్ని ఇజి దేసెం

18 నాను బత్కిజి మంజినికాన్. నాను సాతిమహికాన్ గాని ఇదిలో ఎలాకాలం బత్కిజిన. మరి సావుదిని సాతికార్ మంజిని అయా లోకమ్ది తాలంకియు నా కీదు మనాద్.

19 అందెజె, ఏలు మన్ని వనకాజ్ వందిజ్, మరి వాని కాలమ్దు జర్గిదెజ్ మనికెజ్, నీను సుడఃతి మనికెజ్ నీను రాస్అ.

20 నా ఉణెర్ కియుదు నీను సుడఃతి మన్ని ఏడు సుక్కెజ్, ఏడు దేవుణు సజమ్క దూతార్. మరి బజారమ్దాన్ తయార్ కితి మన్ని ఏడు దీవ డండిజ్, ఏడు దేవుణు సజమ్కు.

2

ఎవెసు పట్టుమ్దు మన్ని దేవుణు సజమ్దిజ్ రాసిని ఉత్తం

1 “ఎవెసు పట్టుమ్దు మన్ని దేవుణు సజమ్ది దూతెజ్ రాస్అ, వన్ని ఉణెర్ కియుదు ఏడు సుక్కెజ్ అసి, ఏడు దీవడండిజు నడిఃమి బూలాజినికాన్ వెప్పాని మాటెజ్ ఇక్కెజ్.

2 నీను కిజిని పణిజ్ని, నీను కస్టబాడఃతికెజ్ నాను నెసిన. నీను ఎస్సానో హిమ్మెజ్ ఓరిస్తీమన్ని ఇజిబా నాను నెసిన. సెకెజ్ కినివరిజ్ నీను ఓరిసి మండ్రెజ్ అటెజ్ ఇజి నాను నెసిన. అపొస్తురు ఇజి వెహె ఆజి అపొస్తురు ఆక వరిజ్ నీను పరిస కిజి, వారు అబద్దం వెప్పికార్, ఇజి నీను నెస్తి ఇజి నాను నెసిన.

3 నీను నా పేరు వందిజ్ హిమ్మెజ్ డిస్విండ ఓరిస్తీ మన్ని మరి కస్టమ్కు బరిస్తీమన్ని గాని నీను దన్ని వందిజ్ ఎనెజ్బా వందితిఇ ఇజిబా నాను నెసిన.

4 అహిజ్బా, మొదోహాన్ నా వందిజ్ నిజి మహి మొదోహి ప్రేమ, నీను డిస్సినిత్తి ఇజి ఉండ్రీ తప్పు నీ మున్సు. సుడఃత.

5 నా మున్సు మన్ని ప్రేమ డిసిసిజి, నీను ఎస్సా వెనుక సొన్ని మహి ఇజి నీను ఒడిఃబిఅ. దన్ని వందిజ్ నీ మన్సు మరిసి, తప్పుజ్ ఒప్పుకోడఃజి డిసిసిజి, ముజాల కిజి మహికెజ్ కిజి మన్అ. నీను మన్సు మారిసి, పాపమ్కు ఒప్పుకోడఃజి డిసి - సివిండ మహిజ, నాను నీడగ్రు వాజి, నీ దీవడండిజ్ దన్ని బాడ్డిదాన్ లాగ్గు ఏసిర్ను.

6 గాని, నీవందిజ్ ఉండ్రీ నెగ్గి సజతి మనాద్. నాను ఇస్టం కిఇకార్ ఆతి నికొల జటుదివరి పణిజ్ నీనుబా ఇస్టం కిఇతి.

7 దేవుణు అత్మ దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడఃజి వెంజి అయావజ నడిఃజి మండ్రు. సెకెజి మున్సు గెలిస్సి వన్నిజ్ పరలోకం ఆతి పరదీనుదు మన్ని పాణం సీని మరాతి పట్కు తిండ్రెజ్ అక్కు నీనా.

స్మూర్న పట్టుమ్దు మన్ని దేవుణు సజమ్దిజ్ రాసిని ఉత్తం

8 “స్మూర్న పట్టుమ్దు మన్ని దేవుణు సజమ్ది దూతెజ్ రాస్అ. మొదోహికాన్ని కడఃవెరిదికాన్ ఆతి, సాతి వెనుక మరజి నిజితికాన్ వెప్పాని మాటెజ్ ఇక్కెజ్.

9 నీ కస్టమ్కు, నీ కరు బత్కు నాను నెసిన. గాని దేవుణుదిజ్ సెందితి సజతిజిలోఇ నీను ఆస్తి మన్నికిలెకెండెనె. మాపు యూదురు ఇజి వెప్పాని దేవుణు లోకుర్ ఆఇకార్ ఆతి, సయ్తానుజ్ సెందితికార్ ఆతి యూదురు, నీవందిజ్ వెప్తి దూసణ మాటెజ్ నాను నెసిన.

10 నీ మున్సు వాదెజ్ మన్ని కస్టమ్కాజ్ వందిజ్ నీను తియెల్ అమా. నిజి పరిస కిదెజ్, నీ లోకురిజ్ సెగొండారిజ్ సయ్తాను అస్సిసి జెలిదు ఇడిస్సాన్లె. పది దినమ్కు

నీను హిమ్మోజ్ ఓరిసి మండ్రెజ్ వలె. గాని నా ముస్సు మన్ని నమకమ్వందిజ్ సావు వాతిజ్బా నమకమాతికి ఆజి మన్త. ఎలాకాలం మంజిని బత్తు ఇని ఇనాయం నాను నిజీ సీనాలె.

11 దేవుణు ఆత్మ దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడజి వెంజి, అయావజి నడిసి మండ్రు. సెఇకెజి ముస్సు గెలిన్ని వన్నిజ్ రుండి సావు ఇని దెబ తగ్గివద్.

పెర్గాము పట్టమ్దు మన్ని దేవుణు సజమ్దిజ్ రాసిని ఉత్తం

12 పెర్గాము పట్టమ్దు మన్ని దేవుణు సజమ్ది దూతెజ్ రాన్త.

“రుండి దరిజ్ తెవుగు మన్ని కుర్లెకెండ్ మన్ని మాటెజ్ మన్నికాన్ వెప్పినికెజ్ ఇక్కెజ్.

13 నయ్తాను ఏలుబడిః కిజిని పట్టమ్దు నీను బత్తిజిని ఇజి నాను నెసిన. నయ్తాను ఏలుబడిః కిజిని అయ పట్టమ్దు నా ముస్సు నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా ముస్సు ఇడ్డి నమకం డిసిసివిండ, నా పేరు వందిజ్ నీను నిజం నిహిమహి ఇజి నాను నెసిన.

14 గాని నజీ పడిఃఇకెజ్ సెగం సజతిజ్ నీబాన్ మన్నె. బొమ్మెజి పూజి సత్తికెజ్ తింజి, రంకు బూలాజి పాపం కిదెజ్ ఇస్రాయేలు లోకురిజ్ రేప్పి మన్నికాన్ ఆతి బాలాకుజ్ * అక్కెజ్ నెప్పిసి మన్నికానాతి బిలాము† బోద లోజిజి నడిసినికార్ నీ లొఇ మనార్.

15 నికొల బోద లోజిజి మన్నికార్బా నీ లొఇ మనార్.

16 అందెజె నీను మన్ను మారిసి పాపమ్కు ఒప్పుకోడఃజి డిసిసి. సిలిజి నాను బేగి నీడగు వాజి నా వెయుదాన్ వాజిని కుర్లెకెండ్ మన్ని మాటెజాణిజ్ పరివెట విదెం కీనా.

17 దేవుణు ఆత్మ, దేవుణు సజమ్కాజ్ వెప్పికెజ్ ఇనికెజ్ ఇజి గిబ్బిజ్ ఒడజి వెంజి అయావజి నడిఃజి మండ్రు. సెఇవనకాజ్ ముస్సు గెలిసినివన్నిజ్ నాను పరలోకమ్దు డాఃజితి మన్ని మన్న ఇని తిండి సెగం ఉండెజ్ సీనా. మరి, దొహ్కీకాండ్రె ఆవిండ, మరి ఎయెన్ వన్నిజ్బా నెన్ఇ ఉండ్రె కొత్త పేరు రాస్తి మన్ని ఉండ్రె తెల్లాని పణకుబా సీనా.

తుయతయిర పట్టమ్దుమన్ని దేవుణు సజమ్దిజ్ రాసిని ఉత్తం

18 “తుయతయిర పట్టమ్దు మన్ని దేవుణు సజమ్ది దూతెజ్ రాన్త కణుకెజ్ సిసుకొనెజ్ లెకెండ్ మన్ని, మెర్నిని కంజుదిజ్ పొలితి పాదమ్కు మన్ని దేవుణు - మరిసి ఆతి వన్ని మాటెజ్ ఇక్కెజ్.

19 నీను కిజిని పణిజ్ ఎలాగ మర్తికెజ్, నీ ప్రేమ ఎలాగ మర్తిక, నీ నమకం ఎలాగ మర్తిక ఇజి నాను నెసిన. నీను మహివరి వందిజ్ కిజిని పణిజ్ని నీను హిమ్మోజ్ డిసివిండ ఓరిసి మంజినిక విజి నాను నెసిన. నిజమె ముజాల కిజి మహి దన్నిజ్ ఒద్దె నెగెండ్ నీను ఏలు కిజిని.

20 గాని నజీ నపిఇ ఉండ్రె సజతి నీబాన్ మనాద్. దన్నిజ్ అదినె దేవుణు ప్రవక్త ఇజి వెప్పిని యెజెబెలు ఇని బోదెలిదిజ్, నీబాన్ మండ్రెజ్ ఒప్పుకోటి ఇజి ఉండ్రె

* 2:14 2:14 ఇస్రాయేలు లోకురి ముస్సు. సయెప్ సీదెజ్ ఇజి బిలాము ఇని ఒరెన్ గురు నన్ని ప్రవక్తెజ్ కూక్తి మన్ని మెయాబు దేసిమిది రాజు. బుద్ది సెల్లెండ దేవుణుదిజ్ వెత్తకమాతి పణి కితి వందిజ్ వన్ని వందిజ్ దేవుణు మాటదు రాస్త మనాద్. సంకియా 22-24, యెహోసువ 24:9, నాయాది 11:25. † 2:14 2:14 ఇస్రాయేలు లోకురి ముస్సు. సయెప్ సీదెజ్ ఇజి మెయాబు దేసిమిది రాజు బాలాక్ కూక్తి మని ఒరెన్ గురు నన్ని ప్రవక్త. సంకియా 22-24.

తప్పు నీ ముస్కు వెహైజ్ మనాద్. అది దన్ని బోదదాన్ రంకు బూలాదెజ్ మరి బొమ్మెజ మాడిసి, బొమ్మెజ పూజెజ్ సిత్తికెజ్ తిండ్రెజ్ ఆనాద్ ఇజి నా ముస్కు నమకుం ఇడ్డిమన్ని, నా పణికిని వరిజ్ మొసెం కిజి తప్పు సరిదు నడిసిసినాద్.

21 అది రంకు బూలానిక డిసిసీజి, దన్ని మన్సు మారిసి పాపమ్కు ఒప్పుకొడెజి డిసిసీదెజ్ సమయం సిత్త, గాని అది ఒవ్ ఏతాద్.

22 ఇదిలో నాను దన్నిజ్ నిజ్ దెజ్ అట్ ఇ పెరి కస్టమ్ కాజ్ మంసమ్దు తెర్ ప్పాలె. దన్నివెట కూడెజి రంకు బూలాతికార్, వారు దన్ని వెట కూడెజి కిత్తిమహి పణిజవందిజ్ ఒడిసిబిజి, వనకాజ్ ఒప్పుకొడెజి డిసిసీవిండ మహిజ, వరిజ్ నాను నండొ కస్టమ్దు అర్ ప్పాలె.

23 దన్ని కొడొరిజ్ నాను సప్ప. అయావలె నాను లోకురి మన్సుజ మన్ని ఆలోసనమ్కుని ఆసెజ్ ఇనికెజ్ ఇజి సుడెజి నెసినికాన్ ఇజి విజు దేవుణుసజమ్కు నెసిసె. నీ లోజ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండ్ నాను నూణా.

24 దన్ని బోదదిజ్ లోజివరిజ్ ని మరి సయ్యూనులో ఇ డాజితి మన్ని వనకాజ్ నెన్జెజ్ వరి మన్సు ఇడెవిండ మంజిని వరిజ్, నాను వెహినిక ఇనిక ఇహిజ, మీరు మరి ఇనికబా కిదెజ్ ఇజి వెహి, మీ ముస్కు మరి ఇని బరు నాను మొవ్ ఏ.

25 గాని నాను వానిదాక మీరు నెస్తిమన్ని వనకాజ్ నెగెండ్ అసి మండ్రు.

26 ఆక్కర్ దాక నజి ఇస్థమాతి వజ కిజి మంజి, సెఇ వనకాజ్ ముస్కు గెలిసినివన్నిజ్, దేసమ్కు లోకురి *ముస్కు ఏలుబడి కిదెజ్ అతికారం సీనా.

27 నా బుబ్బాతి దేవుణుబాణిజ్ నజి అతికారం దొహ్ క్తిమన్నిలెకెండ్, వన్నిజ్ లోకురి ముస్కు అతికారం సీనా. దేవుణు మాటదు రాస్తిమన్నిలెకెండ్, “వాండ్రు ఇనుము డుడ్డుదాన్ వరిజ్ ఏలుబడి కిసాన్. కుంబెరి వన్ని కుండెజ్ లెకెండ్ వరిజ్ పెడెల్ కొత్సాన్”

28 సెఇ వనకాజ్ ముస్కు గెలిస్తి వన్నిజ్, నాను కొడిజామ్దు సోని సుక సీనా.

29 దేవుణు ఆత్మ దేవుణు సజమ్ కాజ్ వెహినికెజ్ ఇనికెజ్ ఇజి గిబ్బిజ్ ఒడిసి వెంజి అయావజ నడిసి మండ్రు.

3

నర్ దిను పట్టమ్దు మన్ని దేవుణు సజమ్ దిజ్ రాసిని ఉత్తం.

1 “నర్ దిను పట్టమ్ది దేవుణు సజమ్ ది దూతెజ రాస్ అ. ఏడు సుక్కెజ్ ని దేవుణు ఏడు ఆత్మ మన్నికాన్ వెహిని మాటెజ్ ఇక్కెజ్. నీను కిజిని పణిజ్ నాను నెసిసె. బత్తిజినికాన్ ఇజి నిజి పేరు మనాద్. గాని నీను సాతికినె.

2 నా దేవుణు ఎద్దు నీ పణిజ్ పూర్తి ఆతికెజ్ ఇజి తోర్ ఉతె. అందెజి నీను, నిజ్ జి తెలి ఆజి, సాదెజ్ డగ్గు ఆతి మన్ని మిగిలిత్తి వనకాజ్ సత్తు కిబిన్ అ.

3 అందెజి నీను ముజాల ఇనిక నెస్తి మన్నిదొ, ఎలాగ వెహి మన్నిదొ ఇజి ఎత్తు కితి. వనకాజ్ లోజిజి పాపమ్కు ఒప్పుకొడెజి డిసిసీజి, మారు మన్సు పొంది అ. నీను నిజ్ జి తెలి ఆజి మన్ ఏండ మహిజ, ఒరెన్ డొజారి వానిలెకెండ్ నాను వానా. ఇనిక ఇహిజ ఎవేణి గడియారు నాను, నీ డగ్గు వానానొ ఇజి నిజి తెలివిద్.

4 గాని వరి సొక్కెజ్ మొహ్కా ఆవండ, నుబరం మన్నికార్ సెగొండార్ సర్దీన్ పట్నమ్దు నీబాన్ మనార్. అందెజె వారు మొహ్కా సిల్లి తెల్లాని సొక్కెజ్ తోడిఃగిజి, నావెట బూలాదెజ్ తగ్గికార్.

5 సెఇ వనకాజ్ గెలిసినికాన్, వరిలెకెండ్ తెల్లాని సొక్కెజ్ తోడిఃగిజి మంజినాన్. దేవుణు వెట ఎలాకాలం బత్కినివరి పేరుకు రాసి ఇడఃజిని పుస్తకమ్దాన్ నాను వన్ని పేరు ఎనెజ్బా డెయ్జి షోక్వ. గాని నా బుబ్బ ఎద్దుని వన్ని దూతార్ ఎద్దు వాండ్రు నజీ సెందితికాన్ ఇజి వన్ని పేరు ఒప్పకొణా.

6 దేవుణు ఆత్మ దేవుణు సజమ్కాజ్ వెహ్సానికెజ్ ఇనికెజ్ ఇజి గిబ్బిజ్ ఒడఃజి వెంజి అయావజ నడిఃజి మండ్రు.

పిలదెల్పియ పట్నమ్దు మన్ని దేవుణు సజమ్దిజ్ రాసిని ఉత్తం.

7 "పిలదెల్పియ పట్నమ్దు మన్ని దేవుణు సజమ్ది దూతెజ రాస్అ. పరిసుద్దమాతికాన్* నిజామాతికాన్ ఆతి, దావీదు పట్నమ్దిజ్ ఏలుబడిః కిదెజ్ అతికారం మన్నివన్నిలెకెండ్ దన్ని తాలమ్కియు మన్నికాన్ వెహ్సాని మాటెజ్ ఇక్కెజ్. వాండ్రు రేతిజి ఎయెన్బా కెహ్సాజ్ అట్ఎన్. వాండ్రు కెహ్సాజి ఎయెన్బా రేదెజ్ అట్ఎన్.

8 నీను కిజిని పణిజ్ నాను నెసిన. నిజీ మన్ని సత్తు కండెక్ అతిజ్బా నీను నా మాటెజ్ లోజిజి నా పేరు నెస్ఎ ఇజి వెహ్ఇతి. ఇదిలో నీ ఎద్దు నాను సేహ్లా రేత మన్ను. దన్నిజ్ ఎయెన్బా కెహ్సాజ్ అట్ఎన్.

9 యూదురు ఆవండ, మాపు యూదురుబు, మాపు దేవుణు లోకుర్ ఇజి అబద్దం వెహ్సాని సయ్తూను సజమ్దివరిజ్, నీ డగ్గు వాజి నీ పాదమ్కాజ్ అర్పి మాడిఃస్సిలెకెండ్ నాను కినా. నాను నిజీ ప్రేమిస్త మన్న ఇజి అయావలె వారు నెస్సార్లె.

10 స్రమెజ్ డిఃస్ఎండ ఓరిసినివందిజ్ నాను సిత్తి ఆడ్రెజ్ నీను లోజిత్తి మహి. అందెజె బూమి మున్ను బత్కిని వరిజ్ విజిరిజ్ వాజిని పెరి కస్టమ్కాజ్ కూడిఃతి పరిస కాలమ్దు నాను మిజి కాపాడ్వా.

11 ఇదిలో, నాను బేగినె వాజిన. నీను గెలిస్సివందిజ్ నిజి దోహ్కాని ఇనాయం మరి ఎయెన్బా ఒవండ, నీను నెస్తిమన్ని వనకాజ్ డిఃస్ఎండ గటిజి అసి మన్అ.

12 సెఇ వనకాజ్ మున్ను గెలిస్సి వన్నిజ్ నా దేవుణు గుడిఃదు ఉండ్రీ తంపం లెకెండ్ కిన. వాండ్రు ఎనెజ్బా దన్ని బాణిజ్ డిఃసి సొన్ఎన్. నా దేవుణు పేరుని, పరలోకమ్దాన్ దేవుణుబాణిజ్ డిగ్గి వాజిని కొత్త యెరూసలేం ఇని నా దేవుణు పట్నం పేరుని, నా కొత్త పేరుబా నాను వన్ని మున్ను రాస్సా.

13 దేవుణు ఆత్మ దేవుణు సజమ్కాజ్ వెహ్సానికెజ్ ఇనికెజ్ ఇజి గిబ్బిజ్ ఒడఃజి వెంజి అయావజ నడిఃజి మండ్రు.

లవొదికియ పట్నమ్దు మన్ని దేవుణు సజమ్దిజ్ రాసిని ఉత్తం.

14 "లవొదికియ పట్నమ్దు మన్ని దేవుణు సజమ్ది దూతెజ రాస్అ. నమ్మకమాతికాన్ని నిజామాతి సాసి ఆతికాన్, దేవుణు తయార్ కితి విజు వనకాజ్ మున్ను అతికారం ఆతి ఆమెన్ ఇనికాన్ వెహ్సాని మాటెజ్ ఇక్కెజ్.

* 3:7 3:7 గొప్ప నెగ్గికాన్, ఇని తప్పుబా సిలికాన్

15 నీ పణిజ్జ్ ఎలాగ మర్దికెజ్ ఇజ నాను నెసిన. నీను సలాజ్ మనికి ఆఇ. వేసాజ్ మన్నికిబా ఆఇ. నీను ఎమేణికబా ఉండ్రీ రకం ఆజి మంజినిక ఇహిజ బాగ మహాద్, ఇజి నాను కోరిజిన†

16 నీను పణిదిజ్ రెఇకి. నీను సలాజ్ సిల్లెద్. వేసాజ్బా ఆఇ. నీను గోరువేసాజ్ నన్నికి. అందెజె నా వెయుదాన్ నాను నిజి పూస్సు విసీర్పు.

17 నీను గత్ర నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్ ఏండ, నజీ ఆస్తి మనాద్, నాను డబ్బుజ్ గణస్త మనా, నజీ ఇనిక తక్కు సిల్లెద్ ఇజి నీను వెహె ఆజిని.

18 గాని నాను నిజి బుద్ది వెహినిక ఇనిక ఇహిజ, నీను ఆస్తి మనికి అదెజ్ ఇజి సిస్సుదు సుర్జె సుబరం ఆత్తి బజారం నా బాణిజ్ క్కొల్త. మరి నీ సిగ్గు డ్హాజ్జీనిలెకెండ్ పొర్పాదెజ్ తెల్లాని సొక్కెజ్ నా బాణిజ్ క్కొల్త. నీ కణుకెజ్ టెటాజ్ తోర్దెజ్ కణుకెజ్ రాస్తెజ్ కాటికబా నా బాణిజ్ క్కొల్త.

19 నాను ప్రేమిసిని విజేరిజ్ బుద్ది వెహి, సిక్కుదాన్ దిదిజినా. అందెజె నీను మన్నుదు నిజం ఆస ఆజి మన్త. మరి మారు మన్ను పొందిజి నీ పాపమ్కు ఒప్పుకోడెజి డిఃసి సిఅ.

20 ఇదిలో, నాను సేప్లా డగ్గు నిల్సి, సేప్లా రేఅ ఇజి క్కొత్తినా. ఎయెన్బా నా కంటం వెంజి సేప్లా రేతిజ, నాను లొఇ సొన్సి వన్నివెట బోజనం కినా. వాండ్రుబా నావెట బోజనం కినాన్.

21 నాను ఎలాగ సెఇ వనకాజ్ మున్ను గెలిసి, నా బుబ్బువెట వన్ని సింహాసనమ్దు బస్త మనానొ, అయాలెకెండ్నె, సెఇ వనకాజ్ మున్ను గెలిస్సి వన్నిజ్ నావెట నా సింహాసనమ్దు బస్తెజ్బా అక్కు సీనా.

22 దేవుణు ఆత్మ దేవుణు సజమ్కాజ్ వెహినికెజ్ ఇనికెజ్ ఇజి గిబ్బిజ్ ఒడెజి వెంజి అయావజ సడెజి మండ్రు”.

4

పరలోకమ్దుమన్ని సింహాసనం.

1 యా సజతిజ్ జర్గితి వెనుక నాను సుడెతిజ్ ఇదిలో పరలోకమ్దు ఉండ్రీ సేప్లా రే ఆత్తి మహిక సుడెత. జోడుబాంక పలక్తినిన్ని జాటులెకెండ్, నావెట ముజాల వర్గితి మన్ని కంటం మన్నికాన్, “ఇబ్బె ఎక్కి రఅ. దిన్ని వెనుక ఇనికెజ్ జర్గిలెతి ఇజి నాను నిజి తోరిస్నాలె”, ఇజ వెప్తాన్.

2 వెటనె నాను దేవుణు ఆత్మ వెట నిండ్రిత. నస్తివలె పరలోకమ్దు ఉండ్రీ సింహాసనమ్దు ఒరెన్ బస్తిమన్నిలెకెండ్, నా ఎద్దు తోరె ఆతాద్.

3 అయ సింహాసనమ్దు బస్తి మన్నికాన్ పొద్దులెకెండ్ గొప్ప జాయ్ మన్ని ఎరాని రంగు పణుకుదిజ్ పోలిసి తోరితాన్. సింహాసనమ్దిజ్ సుటులం గొప్ప జాయ్ మన్ని ఆకు రంగుది కొడెవేలి మహాద్.

† 3:15 3:15 లవొదికియ పట్టుమ్దిజ్ డగ్గు గొప్ప పేరు మన్ని రుండి పట్టుమ్కు మహె. హయెరపోలిన్ ఇని పట్టుమ్దు వేసాజ్ ఏరు సొని ఉండ్రీ గడ్డ మహాద్. లోకుర్ వరి జబ్బుజ్ సొండ్రెజ్ ఇజి, బాన్ సొన్సి అయ గడ్డాదు ఏరుకాబాజి మహార్. కొలోసాన్ ఇని పట్టుమ్దు ఉండ్రెజ్ గొప్ప రుని మన్ని ఏరు సొని ఉండ్రీ గడ్డ మహాద్. గాని లవొదికియ పట్టుమ్ది ఏరు సపాజ్ మహాద్. అందెజె లవొదికియ పట్టుమ్ది దేవుణు సజమ్దిజ్ ఇని పణిదిజ్బా రెఇ సపాజ్ ఏరుదిజ్ పోలిసి యేసు క్రీస్తు వెహినికెజ్ ఇజి సెగెండార్ వెహినికెజ్.

4 అయి సింహాసనమదిజ్ నుట్టులం ఇరువయ్ నాల్లి సింహాసనమకు మహా. అయి ఇరువయ్ నాల్లి సింహాసనమకాజ్, తెల్లాని సొక్కెజ్ తోడిఁగిజి, రాజురి టోపిజ్ నన్ని బజారం టోపిజ్ బురారు తోడిఁగిజి ఇరువయ్ నాల్వెర్ పెద్దెలుజు బస్త మహార్.

5 అయి సింహాసనమదాన్ గొప్ప మెర్సిని జాయ్, దీడిఁజినికెజ్, పిడుఁగుజ్ వెల్లి వాజి మహా. అయి సింహాసనం ఎర్దు ఏడు దీవెజ్ జాయ్ సీజి మహా. అక్కెజ్ దేవుణు ఏడు ఆత్మెజ్.

6 అయి సింహాసనం ఎర్దు గటి మన్ని గాజుదిజ్ పొలితి నమ్దరమ్లెకెండ్ మహాద్. అక్క ఇని రంగు సిల్లి గటి మన్ని అద్దం లెకెండ్ మహాద్. నడిఁమిని, అయి సింహాసనమదిజ్ నుట్టులం, ఒడోల్ ముస్సు, వెనుక ముందాల విజు, కణుకెజాణిజ్ నిండ్రితి మన్ని పాణం మన్ని నాల్లి జంతుజ్ మహా.

7 పాణం మన్ని, మొదోహి జంతు మొకొం సింహం లెకెండ్ మహాద్. రుండి జంతు మొకొం దూడలెకెండ్ మహాద్. మూండ్రి జంతు లోకు మొకొం నన్ని మొకొం మహికాద్. నాల్లి జంతు ఎగ్రిని డేగలెకెండ్ మహాద్.

8 యా నాల్లి జంతుజు, ఉండ్రి ఉండ్రి దన్నిజ్ ఆరెసిజ్ రెక్కెజ్ మహా. అయి రెకెజు ముస్సుని అడిఁగి విజు నిండ్రు కణుకెజ్ మహా. అయి నాల్లి జంతుజ్.

“ముజాల మహికాన్, ఏలు మన్నికాన్, వాని కాలమ్దు మంజినికానాతి విజు వనకాజ్ అతికారం మన్ని దేవుణు పరిసుద్దమతికాన్, పరిసుద్దమాతికాన్, *పరిసుద్దమతికాన్”, ఇజి రెయు పొగల్ డిఁన్ఏండ పార్జి మహా.

9 ఎస్తివలెబా అయి పాణం మన్ని నాల్లి జంతుజ్, అయి సింహాసనమదు బస్తి మన్ని ఎలాకాలం బత్తిజినికాన్ ఆతి వన్నిజ్, పొగిడిఁజి గవరం సీజి వందనమకు వెప్పి పొగిడిఁజి మహారో,

10 నస్తివలె అయి ఇరువయ్ నాల్వెర్ పెద్దెలుజు అయి సింహాసనమదు బస్తి మన్నివన్నిజ్ ఎర్దు పడగ్జి అర్తారె, ఎలాకాలం బత్తిజిని వన్నిజ్ మాడిఁసి యా లెకెండ్ పొగిడిఁజి వెప్పి మహార్.

11 “మా ప్రబు ఆతి దేవుణు, విజు వనకాజ్ తయార్ కిత్తికి నీనె. నీను ఇస్టమాతి వజు అక్కెజ్ విజు తయార్ ఆతె. అయాలెకెండ్నె అక్కెజ్ మన్నె. అందెజె నీ గొప్ప గవరం వందిజ్, నీ గొప్ప సత్తు వందిజ్ లోకురె విజెరె నిజి గవరం సీజి పొగిడిఁజి మంజినార్”, ఇజి వెప్పి బజారమదాన్ తయార్ కిత్తి రాజురి టోపిలెకెండ్ మన్ని వరి టోపిజ్, సింహాసనం ఎర్దు ఇడ్వార్.

5

దేవుణు కియుదు మన్ని పుస్తాకమ్ని గొరెపిల్ల.

1 నస్తివలె, లోఇని వెల్లి రాసె ఆతిమని, ఏడు సీలుజ్ పొక్తిమన్ని ఉండ్రి పుస్తకం అయి సింహాసనమదు బస్తి మన్నివన్ని ఉణెరె కియుదు అస్తి మన్నిక సుడఁత.

2 “అయి సీలుజ్ లాగ్జి పుస్తకం రెక్కెజ్ తగ్గికాన్ ఎయెన్ మనాన్”, ఇజి గొప్పు సత్తుమన్ని ఒరెన్ దేవుణు దూత డటం డేల్లి వెప్పిక సుడఁత.

* 4:8 4:8 ఇని కల్లి సిల్లెండ గొప్ప నెగ్గికాన్

3 గాని, పరలోకమేదు మన్ని వరి లోక గాని, బూమి మున్ను మన్ని వరి లోక గాని, అయా లోకమేదు మన్ని వరి లోక గాని అయ పుస్తకం రెక్కెన్ లోక సుడెడెన్ అట్టి ఎంబె వన్నిజ్ బా తోరవితాద.

4 అయ పుస్తకం రెక్కెన్ లోక సుడెడెన్ తగ్గి ఎయెన్ వన్నిజ్ బా తోరకతిజ్ నాను నండొ అడెబాజి మహా.

5 నస్తవలె, అయ పెద్దెలుజులొక ఒరెన్, “నీను అడెబామా. ఇదిలో, దావీదు మొదొల్దాన్ సిగ్రిస్తి, యూద కుటుమదికాన్ ఆతి సింహం ఇజి పేరు మన్నికాన్, అయ ఏడు సీలుజ్ లాగ్గి పుస్తకం రెక్కెన్ అట్టి వన్ని లెకెండ్ గెలస్త మనాన్”, ఇజి నజీ వెహ్హాన్.

6 నస్తవలె, అయ పెద్దెలుజు నడిమిని పాణం మన్ని నాల్గి జంతుజు నడిమి మన్ని అయ సింహాసనం నడిమి, ముజాల కత్తె ఆతిమనిక, గాని ఏలు నిల్పి మంజిని ఉండ్రీ గొరె పిల్లదిజ్ సుడెత. అయ గొరె పిల్లదిజ్ ఏడు కొముకుని ఏడు కణుకెజ్ మహా. అయ కణుకు బూమి మున్ను విజు బాడ్డిజు పొక్తిమన్ని దేవుణు ఏడు ఆత్మెజ్.

7 వాండ్రు వాతాండ్రె అయ సింహాసనమేదు బస్తమన్ని వన్ని ఉణెర్ కియుదు మన్ని పుస్తకం లొస్తాన్.

8 వాండ్రు అయ పుస్తకం లొస్తవలె, పాణం మన్ని అయ నాల్గి జంతుజ్ని, అయ ఇరువయ నాల్ఎర్ పెద్దెలుజు విజెరె, టొయ్ లెజ్ని, నమ్మితి వరి పార్దనమకు ఆతి నెగ్గి వాసనం సీజిని దుపమకు ఇడ్డి మన్ని బజారమేది గిన్నెజ్ ఒరెన్ ఒరెన్ వరి కియుదు అస్తారె గొరె పిల్ల ఎద్రు పడగజి అర్దార్.

9 అయావలె, “నీను అయ పుస్తకం లొసి, దన్ని సీలుజ్ లాగ్దెజ్ తగ్గికి. ఎండానిజ్ ఇహిజు నినె కత్తె ఆతి, నీ నలదాన్ విజు జాతిజుణిజ్, విజు బాసెజాణిజ్, విజు లోకుర్ బాణిజ్, విజు దేసమకాణిజ్ లోకురిజ్ దేవుణు వందిజ్ కొటి.

10 మరి వరిజ్ దేవుణుదిజ్ ఉండ్రీ రాజ్యం లెకెండ్ని వన్నిజ్ పణి కిని పుజెరిజులెకెండ్ కిత్తి. వారు బూమి మున్ను ఏలుబడి: కిసార్”, ఇజి అయ పాణం మన్ని నాల్గి జంతుజ్ని ఇరువయ నాల్ఎర్ పెద్దెలుజు ఉండ్రీ కొత్త పాట పార్దార్.

11 నస్తవలె నాను సుడెతిజ్ నండొ దూతారి కంటం వెహా. వరి లెక్క కొటి కొటిదిజ్ ఇంక లావ్ మహా. వారు అయ సింహాసనమేదిజ్ని అయ పాణం మన్ని నాల్గి జంతుజ్ని అయ ఇరువయ నాల్ఎర్ పెద్దెల్జు సుటులం మంజి,

12 “కత్తె ఆతి గొరె పిల్ల పొగ్డె: ఆదెజ్ తగ్గికాన్. అతికారం మన్నికాన్ ఆదెజ్, ఆస్తి మన్నికాన్ ఆదెజ్, గెణం మన్నికాన్ ఆదెజ్, సత్తుమన్నికాన్ ఆదెజ్, మర్యాద లొసె ఆదెజ్, గవరం లొసె ఆదెజ్, పొగ్డె: ఆదెజ్ తగ్గికాన్”, ఇజి గొప్పు పెరి కంటమేదాన్ పార్ది మహార్.

13 నస్తవలె పరలోకమేదు మన్ని, బూమి మున్ను మన్ని, బూమి అడి:గి మన్ని, సమదరమేదు మన్ని, పాణం మనికెజ్ విజు కూడె:జి.

“సింహాసనమేదు బస్త మన్నివన్నిజ్ని, గొరెపిల్లదిజ్, పొగ్డె: ఆజి మంజినిక, మర్యాద, గవరం, సత్తు అంతు సిల్లెండ ఎలాకాలం మనీద్”, ఇజి వనక కంటమకాణిజ్ పార్జినిక, పొగ్డె:జి మంజినిక నాను వెహా.

14 పాణం మన్ని అయ జంతుజ్ “ఆమెన్”, ఇజి వెహ్హాజ్ అయ ఇరువయ నాల్ఎర్ పెద్దెలుజు పడగజి అర్చి, గొరెపిల్లదిజ్ పొగిడి:జి మాడి:స్తార్.

6

సీలుజ్

1 నస్తవలె, గొర్రెపిల్ల అయ ఏడు సీలుజు లోఇ, మొదోహి దన్నిజ్ లాగితిక నాను సుడఃత. అయావలె అయ పాణం మన్ని నాల్లి జంతుజులోఇ, ఉండ్రీ జంతు పిడుగు జాటు నన్ని కంటమ్దాన్ “రఅ!”, ఇజి వెహ్తాక వెహ.

2 నాను సుడఃతిజ్, ఉండ్రీ తెల్లాని గుర్రం తోరితాద్. దన్ని మున్కు ఒరెన్ దోను అసి బస్త మహాన్. వన్నిజ్ బజారమ్దాన్ తయార్ కిత్తి, రాజురి టోపి నన్ని ఉండ్రీ టోపి దోహ్కాద్. వాండ్రు గెలిస్తాన్ ఆజి మరి గెలిస్తాజ్ ఇజి సోత్తాన్.

3 గొర్రెపిల్ల రుండి సీలు లాగితివలె పాణం మన్ని రుండి జంతు “రఅ!”, ఇజి వెహ్తాక నాను వెహ.

4 నస్తవలె సిసు నన్ని ఎరాని రంగు మన్ని ఉండ్రీ గుర్రం వెల్లి వాతాద్. బూమి మున్కు మన్ని లోకుర్, ఒరెన్ మరిఒరెన్ వన్నిజ్ సప్తాజ్ ఇజి, బూమి మున్కు సమదనం సిల్లెండ కిదెజ్ అయ గుర్రం మున్కు బస్తమన్నివన్నిజ్ అతికారం దోహ్కాద్. వన్నిజ్ ఉండ్రీ పెరి కుర్ద దోహ్కాద్.

5 గొర్రెపిల్ల మూండ్రీ సీలు లాగితివలె పాణం మన్ని మూండ్రీ జంతు “రఅ!”, ఇజి వెహ్తాక నాను వెహ. నాను సుడఃతిజ్, ఇదిలో, ఉండ్రీ కర్ని గుర్రం తోరితాద్. దన్ని మున్కు బస్త మన్నికాన్ తూన్నిక వన్ని కియుదు అస్త మహాన్.

6 “ఉండ్రీ రోజుదిజ్ కూలి ఉండ్రీ డొక్కు గొదుము ఇజి, మరి, ఉండ్రీ రోజుదిజ్ కూలి మూండ్రీ డొక్కుజ్ సామ ఇజి వెహ్తాన్. మరి నూనెదిజ్ ఒలివ మరెక్ని, ద్రాసపట్టురసమ్వందిజ్ ద్రాక్కు టోటదిజ్ పాడః కిదెజ్ ఆవద్”, ఇజి అయ పాణం మన్ని నాల్లి జంతుజు నడిఃమిహాన్ వెహ్తాలెకెండ్రీ ఉండ్రీ కంటం నాను వెహ.

7 గొర్రెపిల్ల నాల్లి సీలు లాగితివలె, పాణం మన్ని నాల్లి జంతు “రఅ!”, ఇజి వెహ్తాక నాను వెహ.

8 నాను సుడఃతిజ్ నస్తవలె, నీరు నన్ని రంగు మన్ని ఉండ్రీ గుర్రం తోరితాద్. దన్ని మున్కు బస్తమన్ని వన్ని పేరు, సాపు. అయా లోకం వన్ని వెనుక నడిఃజి మహాద్. కుర్దెజాణిజ్, కరుదాన్, జబ్బుజాణిజ్, బూమిదు మన్ని అడిఃవి జంతుజు వెట, బూమి మున్కు బత్తిజిని వరిజ్ నాల్లి బాటెజ్లోఇహాన్ ఉండ్రీ బాటది వరిజ్ సప్తాజ్ ఇజి వన్నిజ్ అతికారం దోహ్కా మనాద్.

9 గొర్రెపిల్ల అయదు సీలు లాగితివలె, దేవుణు మాట లోజిత్తివందిజ్, మరి దేవుణుమాటవందిజ్ మన్ని నెగ్గి సాస్యం వందిజ్ కత్తె ఆతిమన్ని వరి ఆత్మెజు, పూజ సిని మాలిపీట అడిఃగి నాను సుడఃత.

10 వారు గొప్ప పెరి కంటమ్దాన్, “పరిసుద్దమాతికాన్ ఆతి విజు దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్స సివిండ, బూమి మున్కు బత్తిని వరిజ్ తీర్పు తీరిసి, సిక్స సివిండ ఎస్సా కాలం మంజినిలె?”, ఇజి డేల్ని వెహ్సి మహార్.

11 నస్తవలె వరిజ్ ఒరెన్ ఒరెన్ వన్నిజ్ తెల్లాని సొక్కెజ్ దోహ్కాక్. వెనుక వారు సప్తె ఆతిలెకెండ్రీ సప్తె ఆదెజ్ మన్ని తంబెరిజు లెక్క, మరి వరివెట కూడఃజి పణికితివరి లెక్కబా పూర్తి అనిదాక మరి కండెక్ కాలం కాప్ కిజి మండ్రెజ్, ఇజి వరిజ్ వెహ ఆతాద్.

12 గొర్రెపిల్ల ఆరు సీలు లాగితిక నాను సుడత. నస్తవలె గొప్పు గట్టిజ బూమి కద్దితాద్. పొద్దు, కర్ని రంగులెకెండ ఆతాద్. నెల పూర్తి, నలరంగు లెకెండ ఎర్రజ్ ఆతాద్.

13 పెరి గాలిదిజ్ దూకె ఆజి బొడె: మరాతి ఆకృరి కాయెజ్ రాలితిలెకెండనె ఆగనమ్దాన్ సుక్కెజ్ రాలై.

14 ఉండ్రీ కాకితం సుటిసి లెకెండనె ఆగసం సుటి ఆజి తొవండ ఆతాద్. విజు గొరొక్, సమ్దరం నడిమి మన్ని ఇజిరి దేసెమ్కు విజు వనక వనక బాడ్డిదాన్ డిసెన్తి సొహె.

15 నస్తవలె, బూమి మున్ను మన్ని రాజుర్, ఏలుబడి: కినికార్, సయనమ్ది నెయ్యిర్, ఆస్తి మనికార్, గొప్పు అతికారం మన్నికార్, వెట్టిపణి కినికార్ని వెట్టిపణిమణసిర్ ఆఇకార్ విజేరె త్రియెల్ ఆతారె, గొరొక సొలమ్కాజ్ లొఇ, సట్టు పొరొజ డాజెతార్.

16 వారు గొరొకాజ్ని సట్టుజ యాలెకెండ వెప్పి మహార్, “మీరు మా మున్ను అర్ని, సింహాసనమ్దు బస్తిమన్ని వన్ని మొకొమ్దాన్ని గొర్రెపిల్ల కోపమ్దాన్ మజి డాప్పు”.

17 “ఎందానిజ్ ఇహిజ దేవుణుని గొర్రెపిల్ల బూమి మున్ను మన్నివరి మున్ను తీర్పు తీరిస్సి రొజ వాతాద్. వరి ఎద్దు ఎయెన్ నిల్లెజ్ అట్వాన్?”.

7

సీలు పొకె ఆతి 144,000 లోకుర్.

1 దిన్ని వెనుక బూమి మున్నుబా సమ్దరం మున్నుబా మరెక మున్నుబా గాలి కివండ, నాల్లి దిక్కుజ గాలి అస్తారె బూమిది నాల్లి దిక్కుజ, నాల్వెర్ దూతార్ నిల్పి మంజినిక నాను సుడత.

2 బత్తిజిని దేవుణుది సీలు అస్తిమన్ని, మరి ఉండ్రీ దూత పొద్దు సొని దరోటాన్ వాతిక నాను సుడత. బూమిదిజ్ని సమ్దారమ్దిజ్ పాడె: కిదెజ్ అతికారం దొహ్కామన్ని దూతార్వెట ఈహు వెహ్సాన్.

3 “మాపు దేవుణు పణి కినివరి నొద్దుజ సీలు పొక్కిదాక బూమిదిజ్బా, సమ్దరమ్దిజ్బా, మరెకాజ్బా పాడె: కిమాట్”, ఇజి వాండ్రు డటం వెహ్సాన్.

4 నస్తవలె, సీలు పొకె ఆతివరి లెక్క వెహ్కాక నాను వెహ. ఇస్తాయెలుది విజు తెగెజాణిజ్ లక్క నలపయనాల్లి వెయిజ్ లోకుర్ మహార్.

5 సీలు పొకె ఆతికార్ యూదా తెగదాన్ పన్నెండు వెయిజ్ లోకుర్ మహార్. రూబెను తెగదాన్ పన్నెండు వెయిజ్ లోకుర్ మహార్. గాదు తెగదాన్ పన్నెండు వెయిజ్ లోకుర్ మహార్.

6 ఆసేరు తెగదాన్ పన్నెండు వెయిజ్ లోకుర్ మహార్. నస్తాలి తెగదాన్ పన్నెండు వెయిజ్ లోకుర్ మహార్. మనసె తెగదాన్ పన్నెండు వెయిజ్ లోకుర్ మహార్.

7 సీమెను తెగదాన్ పన్నెండు వెయిజ్ లోకుర్ మహార్. లేవి తెగదాన్ పన్నెండు వెయిజ్ లోకుర్ మహార్. ఇసాకారు తెగదాన్ పన్నెండు వెయిజ్ లోకుర్ మహార్.

8 జెబులూను తెగదాన్ పన్నెండు వెయిజ్ లోకుర్ మహార్. యోసేపు తెగదాన్ పన్నెండు వెయిజ్ లోకుర్ మహార్. బెన్యామిను తెగదాన్ పన్నెండు వెయిజ్ లోకుర్ మహార్.

తెల్లాలి సొక్కెజ్ తొడు:గితిమన్ని గొప్పు మంద లోకుర్

9 దన్ని వెనుక నాను సుడతెజ్, విజు దేసెమ్కాణిజ్, విజు జాతిజణిజ్, విజేరె లోకుర్ బాణిజ్, విజు బాసెజ్ వర్నిని వరిబాణిజ్ వాతి ఎయెన్బా లెక్క కిదెజ్ అట్ఇనన్ని

గొప్ప మంద లోకుర్ అయ సింహాసనం ఎదుని గొర్రెపిల్ల ఎదు నిల్సి మంజినిక సుడేశత. వారు తెల్లాని సొక్కెజ్ తొడిగిజి ఈత మరాతి మటెజ్ కికాజ్ అస్త మహార్.

10 “సింహాసనమ్దు బస్తి మన్నికాన్ ఆతి మా దేవుణుని గొర్రెపిల్ల మజి రక్సిస్త మనార్”, ఇజి వారు గొప్ప పెరి కంటమ్దాన్ వెప్పి మహార్.

11 అయ సింహాసనమ్దిజ్ని అయ పాణం మన్ని నాల్లి జంతుజ్ని ఇరువయ్ నాల్వెర్ పెద్దెల్జ సుటులం దేవుణు దూతార్ విజెరి నిహ మహార్. వారు సింహాసనం ఎదు పడగ్జి అర్పి దేవుణుదిజ్ పొగ్డిజి మాడిస్తార్.

12 “అమెన్, వన్ని గొప్ప పేరు వందిజ్, వన్ని గెణమ్వందిజ్, వన్ని అతికారమ్ వందిజ్, వన్ని సత్తువందిజ్ మాటు మా దేవుణుదిజ్ అంతుసిల్లెండ ఎలాకాలం పొగిడిజి మంజినాట్. మాటు విజెటె వన్నిజ్ గవరం సీజి వందనమ్కు వెప్పి మంజినాట్. అమెన్”, ఇజి వారు వెప్పి మహార్.

13 నస్తివలె అయ పెద్దెలుజులొఇ ఒరెన్, “యా తెల్లాని సొక్కెజ్ తొడుగితి మనికార్ ఎయెర్? వారు ఎమేణిజ్ వాత మనార్”, ఇజి నజి వెన్బాతాన్.

14 “బాబు సీనె నెన్సి”, ఇజి నాను వన్నిజ్ వెప్తూ. వాండ్రు నావెట ఈహు వెప్తూన్. “వీరు గొప్ప పెరి కష్టమ్కాణిజ్ వాతికార్. వారు గొర్రెపిల్ల నలదాన్ వరి సొక్కెజ్ నోర్బజి వనకాజ్ తెల్లాజ్ కిత్తికార్.

15 అందెజె, “వారు దేవుణు సింహాసనం ఎదు మంజి రెయుపొగొల్ వన్ని గుడిడు వన్నిజ్ పణి కిజి మంజినార్. సింహాసనమ్దు బస్తి మన్నికాన్, వాండ్రె ఆజి వన్ని టంబు వరి ముస్సు వ్డక్సి వరిజ్ కాపాడ్నాన్.

16 మరి ఎసెజ్బా వరిజ్ బజ కట్వద్. మరి ఎసెజ్బా వారు ఏహ్పి సావర్. పొద్దుది గొప్ప ఏండ వరి ముస్సు తగ్గివద్. మరి సుర్నిలెకెండ మన్ని వేడిజబా వరిజ్ తగ్గివద్.

17 ఎందానిజ్ ఇహిజ, సింహాసనం నడిమి మన్ని గొర్రెపిల్ల వరిజ్ గవుడుయెన్ ఆత మనాన్. పాణం సీని ఏరు వాని ఊట డగ్రు వాండ్రు వరిజ్ నడిపిస్తాన్. దేవుణు వరి కణుకేజాణిజ్ కణెర్ విజా తేల్నాన్”.

8

ఏడు సీలుని బజరమ్ది దూపమ్సుర్ని గిన్న

1 గొర్రెపిల్ల ఏడు సీలు లాగితివలె పరలోకమ్దు అరగంట జమ్నె మహద్.

2 నస్తివలె, దేవుణు ఎదు ఏడు దేవుణు దూతార్ నిల్సి మంజినిక నాను సుడేశత. వరిజ్ ఏడు జోడు బాంగెజ్ దొహ్కె మహె.

3 మరి ఒరెన్ దేవుణు దూత బజరమ్దాన్ తయార్ కిత్తిమన్ని దూపం సుర్ని గిన్న కియుదు అస్తాండ్రె దూపం సుర్ని మాలి పెటె ఎదు వాతాండ్రె నిహాన్. సింహాసనం ఎదు బజరమ్దాన్ తయార్ కిత్తి దూపం సుర్ని మాలి పెటెదు, దేవుణు వందిజ్ కేట ఆతివరి పార్దనమ్కువెట సుర్ని పూజ సీదెజ్ అయ దూతెజ్ నెగ్గి వాసనం సీని దూపం నండొ దొహ్కె.

4 నస్తివలె నెగ్గి వాసనం సీని దూపమ్ది గోయి దేవుణు వందిజ్ కేట ఆతివరి పార్దనమ్కువెట కూడెజి దేవుణు దూత కియుదాన్ ముస్సు దేవుణు దరోట్ సొహె.

5 వెనుక అయ దేవుణు దూత దూపం సుర్ని గిన్న అస్తాండ్రె, దూపం సుర్ని మాలి పెటెదాన్ డిప్పు లాగ్గి అయ గిన్నాదు నిండ్రెస్తాండ్రె, అయ డిప్పుజ్ బూమి ముస్సు.

విసిర్తాన్. నస్తవలె గొప్ప దీడఃనికెజ్, పిడుఃగుజ్, మెర్నినికెజ్ విజు వాతె. బూమి కడ్డితాద్.

ఏడు జోడుఃబాంకెజ్.

6 నస్తవలె ఏడు జోడుఃబాంకెజ్ అస్తిమన్ని ఏడు దూతార్ వనకాజ్ ఊక్తెజ్ తయార్ ఆతార్.

7 మొదొహి దేవుణు దూత వన్ని జోడుఃబాంక ఉహ్కెజ్, వడఃజాని సిసు నలదాన్ కూడఃజి బూమి ముస్సు సెదరె ఆజి అరె. అందెజె బూమిదు మూండ్రి వంతుజ లొఇ ఉండ్రి వంతు వెతాద్. మరెకబా మూండ్రి వంతుజ లొఇ ఉండ్రి వంతు వెతాద్. పసి గడ్డి విజు వెతాద్.

8 రుండి దేవుణు దూత వన్ని జోడుఃబాంక ఉహ్కెజ్, కసి మంజిని ఉండ్రి పెరి గొరొన్ నన్నిక నమ్దరమ్దు అర్తాద్. సమ్దరం మూండ్రి వంతుజ లొఇ ఉండ్రి వంతు నల ఆతాద్.

9 సమ్దరమ్దు మన్ని పాణం మన్ని జంతుజ్, మూండ్రి వంతుజ లొఇ ఉండ్రి వంతు సాతె. ఓడెజ్బా మూండ్రి వంతుజ లొఇ ఉండ్రి వంతు నాసనం ఆతె.

10 మూండ్రి దేవుణు దూత వన్ని జోడుఃబాంక ఉహ్కెజ్ కగడలెకెండ్ కసిమంజిని ఉండ్రి పెరి సుక్క ఆగసమ్దాన్ రాల్లి పెరి గడ్డెజ ముస్సుని ఏరు సోని ఊటెజ మూండ్రి వంతుజ లొఇ ఉండ్రి వంతు ముస్సు అర్తాద్.

11 అయ సుక్క పేరు సేందు. అందెజె మూండ్రి వంతుజ ఉండ్రి వంతు సేందు ఆతాద్. ఏరు సేందు ఆతిజ్ లోకుర్ నంణెండార్ సాతార్.

12 నాల్లి దేవుణు దూత వన్ని జోడుఃబాంక ఉక్తిజ్, పొద్దు మూండ్రి వంతుజ లొఇ ఉండ్రి వంతు నెఎణ్ ఆతాద్. నెల మూండ్రి వంతుజ లొఇ ఉండ్రి వంతు సీకటి ఆతాద్. సుక్కెజ దెబ్బ తగ్గితిజ్ మూండ్రి వంతుజ లొఇ ఉండ్రి వంతు సీకటి ఆతాద్. అందెజె వేడెక మూండ్రి వంతుజ లొఇ ఉండ్రి వంతు జాయ్ మన్వితాద్. రెయ్యు మూండ్రి వంతుజ లొఇ ఉండ్రి వంతు నెల సుక్కెజ జాయ్ మన్వితాద్.

13 నాను సుడఃజి మహిజ్ నంణె ముస్సు ఎగ్రిజి మంజిని ఉండ్రి డేగ, “మరి ఊక్తెజ్ మన్ని మూండ్రి జోడుఃబాంకెజ జాటుదాన్ బూమి ముస్సు బత్తిని వరిజ్, అబాయా క్షం, క్షం, క్షం”, ఇజి గొప్ప పెరి జాటుదాన్ వెహ్తిమన్నిక వెహ్.

9

1 అయ్దు దేవుణు దూత వన్ని జోడు బాంక ఉహ్కెజ్ ఆగసమ్దాన్ బూమి ముస్సు రాల్లి మహి ఉండ్రి సుక్క సుడఃత. దర్లిది తాలం కిక్కు అయ సుక్కదిజ్ దొహ్కాద్.

2 వాండ్రు అయ మటుసిల్లి దాస్తిమన్ని దర్లిదిజ్ రెతిజ్, గొప్ప పెరి సొల్లుదాన్ సిసుదాన్ గోయ్ వాతి లెకెండ్ గోయ్ వాతాద్. అయ దర్లిదాన్ వాతి గోయ్దాన్ పొద్దుని, ఆగసం సీకటి ఆతాద్.

3 అయ గోయ్దాన్ మేపిలెక బూమి ముస్సు వాతె. బూమి ముస్సు మన్ని కిపిడారొదిజ్ మన్నిలెకెండ్ వనకాజ్ సత్తు దొహ్కె.

4 నొద్రుజ దేవుణుగుర్తు సిల్లి లోకురిజ్ బాదకిదెజ్నె ఆఎండ, బూమి ముస్సు మన్ని గడ్డిదిజ్బా, ఇని మొక్కదిజ్బా, ఇని మరాతిజ్బా పాడః కిదెజ్ ఆవద్ ఇజి వనకాజ్ అడ్ర దొహ్కాద్.

5 వరిజ్ సప్తైజ్ వనకాజ్ అతికారం సిల్లెతాద్. గాని అయ్దు నెలెజ్ దాక వరిజ్ హిమ్మెజ్ కిజి మండ్రెజ్ వనకాజ్ అతికారం దోహక్త మనాద్. అవిక్ హిమ్మెజ్ కితిజ్ వరిజ్ వాతి కన్టం, కుసిడారో లోకురిజ్ కట్టిజ వాని నొప్పిలెకెండ మహాద్.

6 అయ దిన్మకాజ్ లోకుర్ సావుదిజ్ రెబానార్ గాని సావు వరిజ్ తప్తె ఆనాద్లె. వారు సావువందిజ్ ఆస ఆనార్లె గాని సావు వరిజ్ డిసి సొనాద్లె.

7 అయ మేపిలెక్ విదెమ్దిజ్ సాండ్రెజ్ తయార్ కితిమన్ని గుర్మకాజ్ పోలితె మన్నె. బజారమ్దాన్ తయార్ కిత్తి టోపి నన్నిక ఉండ్రీ, వనక బురెక మున్ను మహె. వనక మొక్కొమ్కు లోకు మొక్కొ లెకెండ మహె.

8 వనక కొప్పు బోదెక బురాతి కొప్పులెకెండ మహాద్. వనక పల్కు సింహం పల్కు లెకెండ మహె.

9 ఇనుముదాన్ తయార్ కితిమన్ని లెకెండ గుండెదిజ్ అడిసి సొక్కెజ్ వనకాజ్ మహె. వనక రెక్కెజాణి జాటు విదెమ్దిజ్ ఉహ్కీని గుర్మకు లాగ్జిని రదమ్క గొప్పు పెరి జాటులెకెండ మహాద్.

10 వనకాజ్ కిసిడారో తోకెజ్ నన్ని సాప్పు మన్ని తోకెజ్ మహె. లోకురిజ్ అయ్దు నెలెజ్ గుత్తి బాదెజ్ కిదెజ్ అయ తోకెజ్ వనకాజ్ సత్తు మహాద్.

11 దర్దిదిజ్ అతికారం మన్ని దూత పరి మున్ను రాజు లెకెండ మహాన్. ఏబ్రి బాసాదు వన్నిజ్ పేరు 'అబదోను' ఇని పేరు. గ్రీకు బాసాదు వన్ని పేరు 'అప్సొలుయోను' ఇని పేరు.

12 మొదోహి కన్టం గడఃస్తాద్. ఇదిలో, మరి రుండి కన్టమ్కు వాదెజ్ మన్నె.

13 ఆరు దేవుణు దూత వన్ని జోడుబాంక ఉహ్కీజ్, దేవుణు ఎర్దు మన్ని బజారమ్దాన్ తయార్ కిత్తి పూజ సీని మాలిపీటది కొముజాణిజ్ ఉండ్రీ జాటు వెహ.

14 "యూప్రటిను ఇని గొప్పు పెరి గడ్డ జోరెదు తోహె ఆతిమన్ని నాల్ఎర్ దూతారిజ్ కుత్తి డిసీఅ", ఇజి వెహ్కాక నాను వెహ.

15 బామి మున్ను మన్ని లోకురి మూండ్రీ వంతుజ లోఇ ఉండ్రీ వంతుది వరిజ్ సప్తైజ్ ఇజి యా వంటాది, యా నెలాది, యా రోజుది, యా గంటవందిజ్ తయార్ కిబె ఆజి ఇడ్డి మన్నికారె, అయ నాల్ఎర్ దూతార్.

16 గుర్మకు మున్ను ఎక్తిమన్ని సయ్నమ్ది వరిలెక్క రుండి వందెజ్ లెక్కెజ్. వరి లెక్క నిస్సా ఇజి నాను వెహ.

17 గుర్మకాజ్ని వనక మున్ను బస్తిమన్ని వరిజ్ నజి వాతి కలాదు నాను యాలెకెండ సుడఃత. వరిజ్ సిను నన్ని ఎరాని రంగుది, మరి నీలి రంగుది, మరి పసిజ్ రంగుది గుండెదిజ్ అడిని సొక్కెజ్ మహె. గుర్మక బురెక్ సింహం బురెక్లెకెండ మహె. వనక వెయుజాణిజ్ సిను, గోయ్, రెంజికం వెల్లి వాజి మహె.

18 వనక వెయుజాణిజ్ వాతి సిను, గోయ్, రెంజికం ఇని మూండ్రీ దెబ్బెజాణిజ్ లోకురి మూండ్రీ వంతుజ లోఇ ఉండ్రీ వంతు లోకుర్ సప్తె ఆతార్.

19 అయ గుర్మక సత్తు వనక వెయుజలోఇని వనక తోకెజ్ మహె. లోకురిజ్ కట్టి గాయమ్కు కిదెజ్ బురెక్ మన్ని సరాసలెకెండ మన్ని తోకెజ్ వనకాజ్ మహె.

20 యా మూండ్రీ దెబ్బెజాణిజ్ సావిండ మిగిలితి మన్ని లోకుర్ ఏలుబా వరి కిక్కాణిజ్ తయార్ కితిమన్ని దెయమ్కాజ్ని బొమ్మెజ్ మాడిసినిక డిసిసిజి పాపమ్కు ఒప్పుకోడఃజి మన్ను మారిన్వితార్. వారు వరి కిక్కాణిజ్ బజారమ్దాన్, వెండిదాన్, కంసుదాన్, పణుకుదాన్, సెక్కదాన్ తయార్ కితిమన్ని సుడఃదెజ్ అట్ఇ, వెండ్రెజ్ అట్ఇ, నడిదెజ్ అట్ఇ సత్తు సిల్లి వనకాజ్ మాడిసినిక డిసి సివితార్.

21 అక్కాడె ఆఎండ, లోకురిజ్ సప్పిక, గురుజవెట సెట్టి కినిక, రంకు బూలానిక, డొజ కినిక యాలెకెండ్ వారు కిజి మహికెజ్ డిసిసిజి పాపమ్కు ఒప్పుకొండేజి డిసిసిజి మన్ను మారిన్వితార్.

10

ఇజిరి పుస్తకం అస్తిమన్ని దేవుణు దూత.

1 నస్తివలె గొప్ప సత్తు మన్ని మరి ఒరెన్ దేవుణు దూత పరలోకమ్దాన్ డిగ్గి వాజినిక నాను సుండేత. వాండ్రు మొసాప్ తొడుఃగిత మహాన్. వన్ని బుర్ర ముస్కు కొడెవేలి సుటి ఆత మహాద్. వన్ని మొకొం పొద్దులెకెండ్ని వన్ని పాదమ్కు తంపం లెకెండ్ మన్ని సిసు కొనెజ్లెకెండ్ మహె.

2 వన్ని కియుదు రెక్తిమన్ని ఉండ్రీ పుస్తకం మహాద్. వాండ్రు వన్ని ఉణెర్ పాదం సమ్దరం ముస్కు మట్ట మహాన్. వన్ని డేబ్ర పాదం బూమి ముస్కు మట్ట మహాన్.

3 సింహం ఆక్కర్న్తి లెకెండ్ వాండ్రు ఉండ్రీ గొప్ప పెరి జాటు సిత్తాన్. వాండ్రు జాటు సిత్తివలె ఏడు పిడుఃగుజ్ వనక వనక జాటుజాణిజ్ వర్గితె.

4 అయ ఏడు పిడుఃగుజ్ వర్గితివలె, నాను రాస్తెజ్ తయార్ ఆతిజ్, “అయ ఏడు పిడుఃగుజ్ వర్గితి సజతిజ సీలు పొక్అ. వనకాజ్ రాస్మ”, ఇజి పరలోకమ్దాన్ ఉండ్రీ కంటం వెహ్పాక వెహ.

5 నస్తివలె, సమ్దరం ముస్కుని బూమి ముస్కు నిహిమన్ని దేవుణు దూత వన్ని ఉణెర్ కియు పరలోకం దరోట్ పెహ్తొండ్రె యాలెకెండ్ వెహ్హాన్.

6 పరలోకమ్ని అబ్బె మన్ని విజువనకాజ్ని, బూమిని బూమి ముస్కు మన్ని విజువనకాజ్ని, సమ్దరమ్ని సమ్దరమ్దు మన్ని విజు వనకాజ్ తయార్ కిత్తికానాతి ఎలాకాలం బత్తిజిని దేవుణు పేరు అసి యా లెకెండ్ ఒట్టు పొక్తాన్. “మరి ఆలస్యం మన్ఏద్”.

7 ఏడు దేవుణు దూత వన్ని జోడుఃబాంక ఊక్కి దినమ్కాజ్ దేవుణుది డాజితి మన్ని సజతిజ్, దేవుణు, వన్ని పణికిని వరివెటని వన్ని ప్రవక్తర్ వెట ముజాల వెహె ఆతిమహిలెకెండ్ పూర్తి ఆనాద్లె”.

8 నస్తివలె పరలోకమ్దాన్ నాను ముజాల వెహిమన్ని కంటం మరి నావెట, “నీను సొన్ని సమ్దరం ముస్కుని బూమి ముస్కు నిహిమన్ని అయ దేవుణు దూత కియుదు మన్ని రెకె ఆతిమన్ని ఇజిరి పుస్తకం లొన్అ”, ఇజి వెహ్పాక నాను వెహ.

9 అందెజి నాను సొన్ని “అయ ఇజిరి పుస్తకం నజి సిదా”, ఇజి అయ దేవుణు దూతెజ్ లొస్త. వాండ్రు, “దన్నిజ్ లాగ్గి తిన్అ. అయాక నీ పొటాదు సేందు ఆనాద్ గాని నీ వెయ్దు తేనె లెకెండ్ తియాజ్ మంజినాద్”, ఇజి నావెట వెహ్హాన్.

10 అయావలె దేవుణు దూత కియుదాన్ అయ ఇజిరి పుస్తకం నాను లొస్తానె తిహా. అయాక నా వెయుదిజ్ తేనెలెకెండ్ తియాజ్ మహాద్. గాని అక తిహి వెనుక నా పొటాదు సేందు ఆతాద్.

11 అయావలె వాండ్రు, “నీను నండొ లోకుర్ వందిజ్, నండొ జాతిజాణివరివందిజ్, నండొ బాసెజ్ వర్గినివరివందిజ్, నండొండొ రాజర్వందిజ్ దేవుణు ప్రవక్తలెకెండ్ మరి వెహ్హాజ్ వలె”, ఇజి నజి వెహ్హాన్.

11

దేవుణు వందిజ్ వాతి రిఎర్ సాసిర్.

1 మరి కొల్త కిని ఉండ్రీ డుడ్డు నజీ సితాండ్రై ఈహు వెహ్హాన్. “నీను నిజ్జి దేవుణు గుడిసి, దేవుణుదిజ్ పూజ సీని మలిపీటదిజ్ కొల్త కిజి, దేవుణు గుడిఁదు పొగిడిఁజి మాడిఁసీనివరిజ్ లెక్క కిత.

2 గుడిఁదిజ్ వెల్లి మన్ని డేవ కొల్త కివండ డిఁసా. అయాక దేవుణుదిజ్ నమ్మిఇవరి వందిజ్ మన్నిక. వారు నల్పయరుండి నెలెజ్ పరిసుద్దమతి యెరూసలేం పట్టుమ్దిజ్ వరికొల్కాణిజ్ మట్నూర్లె.

3 మరి నాను నా రిఎర్ సాసిరిజ్ అతికారం సీనాలె. వారు బస్త సొక్కెజ్ తొడిఁగిజి పన్నెండు వందెజ్ అరువయిరోస్కు దేవుణు ప్రవక్తరు లెకెండ దేవుణు మాటెజ్ సాటిస్సార్.

4 బూమిదిజ్ ప్రబు ఆతి దేవుణు ఎద్దు నిల్పి మంజిని రుండి ఒలివ మరెకెని రుండి దీవ డండిజ్ అతికారె యా రిఎర్ సాసిర్.

5 ఎయెర్బా వరిజ్ హిమ్సెజ్ కిదెజ్ సుడఁతిజ, వరి వెయుదాన్ సీను వాజి వరిజ్ పగతివరిజ్ సుర్పు విసీర్నాద్. వరిజ్ హిమ్సెజ్ కిదెజ్ సూణికార్ యాలెకెండ సాదెజ్వలె.

6 వారు ప్రవక్తరులెకెండ దేవుణు మాటెజ్ వెహ్హి దినమ్దు ఆగసమ్దాన్ పిరు రెవండ అడ్డు కిదెజ్ వరిజ్ అతికారం మంజినాద్. మరి వరిజ్ ఇస్తమాతి వజి ఎస్తవలెబా బూమిదు మన్ని ఏరుదిజ్ నలలెకెండ కిదెజ్, మరి నండొ రకమ్ది జబ్బుజాణిజ్ బూమి ముస్కు మన్ని వరిజ్ బాదెజ్ కిదెజ్ వరిజ్ అతికారం మంజినాద్.

7 వారు సాస్యం వెహ్హి మంజినిక పూర్తి ఆతిజసరి దర్లిదాన్ వాని క్రూరమతి జంతు వరివెట ఉద్దం కిజి వరిజ్ సన్నాద్.

8 వరి పీనుగుజ్ యెరూసలేం ఇని అయ పెరి పట్టుమ్ది సర్దు అరై మంజినె. అయ పట్టుమ్దిజ్ సొదొమ పట్టుమ్దిజ్, అయగుప్పు దేసెమ్దిజ్ పొలిసి వెహె ఆజినాద్. అబ్బె వరి ప్రబుబా సిలువ పొకె ఆత మహాన్.

9 వరి పీనుగుజ్ మూస్సెజ్ సరి సిపండ విజు దేసెమ్దికార్, విజు తెగెజాణికార్, విజు బాసెజాణికార్, విజు జాతిదికార్ విజేరె మూండ్రినర రోస్కు వరి పీనుగుజ్ సుడఁజి మంజినార్.

10 యా రిఎర్ ప్రవక్తరు బూమి ముస్కు మన్ని వరిజ్ బాదెజ్ కిత్తి వందిజ్, బూమి ముస్కు మనికార్ విజేరె వరిజ్ జర్గితిక సుడఁజి గొప్ప సర్దు ఆజి ఒరెన్ మరి ఒరెన్ వన్నిజ్ ఇనామ్కు సీజి పండ్రయ్ కినార్.

11 గాని అయ మూండ్రినర రోస్కు ఆతి వెనుక దేవుణుబాణిజ్ పాణం మన్ని ఆత్మ వాజి వరి లొఇ డుఁగితిజ్ వారు కిక్కు బూమిదు తిగజి నిజ్జి నిల్తార్. వరిజ్ సుడఁతికార్ విజేరె గొప్ప తియెల్ ఆతార్.

12 నస్తవలె, “ఇబ్బె ఎక్కి రదు”, ఇజి పరలోకమ్దాన్ గొప్ప పెరి కంటమ్దాన్ వరిజ్ వెహ్హిక వారు వెహెరె, వరిజ్ పగతికార్ సుడఁజి మహివలెనె వారు మొసొపుదాన్ పరలోకమ్దు పెరి ఆజి సొహార్.

13 అయ గడిఁయాదునె గొప్ప గటిజి బూమి కర్లితిజ్, అయ పట్టుమ్ది పది వంతుజి లొఇ ఉండ్రీ వంతు అర్తాద్. బూమి కర్లితిజ్ ఏడు వెయుజ్ లోకుర్ సాతార్.

మిగిలిత్తికార్ గుండెజ్ వణిక్కిలెకెండ తియెలాజి పరలోకమ్దు మన్ని దేవుణుదిజ్ పొగిడితార్.

14 రుండి కస్టం వీజితాద్. ఇదిలో, మూండ్రి కస్టం బేగినె వానాద్లె.

మిగిలిత్తిమన్ని ఏడు జోడుఃబాంక.

15 ఏడు దేవుణు దూత వన్ని జోడుఃబాంక ఊక్తిజ్ పరలోకమ్దు గొప్ప పెరి కంటమ్దాన్ యాలెకెండ డేల్నిని జాటుజ్ వాతె. “యా లోకమ్దు ఏలుదాన్ ఏలుబడిః కినిక, మా ప్రబుజ్ని వన్ని క్రీస్తుజ్ ఆత మనాద్. వాండ్రు అంతుసిల్లెండ ఎలాకాలం ఏలుబడిః కిజి మంజినాన్లె”.

16 నస్తివలె, దేవుణు ఎద్దు సింహాసనమ్కాజ్ బస్తిమన్ని అయ ఇరువయ్ నాలెవర్ పెద్దెలుబు పడగిజి అర్ని దేవుణుదిజ్ యా లెకెండ వెప్పి పొగిడిఃజి మాడిఃసి మహార్.

17 “ఏలు మన్నికి, ముజాల మహికి ఆతి, విజుదన్నిజ్ అతికారం మన్ని మా ప్రబు ఆతి దేవుణు, నీను నీ గొప్ప పెరి సత్తుదాన్ ఏలుబడిః కిదెజ్ మొదొలిస్తివందిజ్ మాపు మిజి వందనమ్కు వెప్పినావ్.

18 దేవుణుదిజ్ నమ్మిఇకార్ ఆతి యా లోకమ్ది లోకుర్ కోపమ్దాన్ నిండ్రితార్. ఎందానిజ్ ఇహ్విజి నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిస్తిజ్ గడిఃయ వాతాద్. నీ పణిమణిసిరిజ్, ప్రవక్తరిజ్, నిజి నమ్మిత్తి వరిజ్, నీ పేరు వందిజ్ గవరం సీజి బత్కితి ఇజిరివరిజ్ని పెరివరిజ్ విజేరిజ్ తగితి ఇనాయం సిదెజ్ గడిఃయ వాతాద్. బూమిదిజ్ నాసనం కినివరిజ్, నాసనం కిదెజ్ గడిఃయ వాతాద్”.

19 నస్తివలె, పరలోకమ్దు మన్ని దేవుణుగుడిః రే ఆతిజ్, దేవుణు లోకుర్ వెట కిత్తి ఒట్టు రాస్తి ఇడ్డి మన్ని మందనం తోరె ఆతాద్. నస్తివలె, మెర్సిని జాయ్, పిడుఃగుజ్, దిడిఃజినికెజ్, వాతె. బూమి కడ్లితాద్. గొప్ప వడఃజెజ్ అర్దె.

12

ఉండ్రి బోదెలిని ఉండ్రి గొప్ప పెరి సరాన్.

1 నస్తివలె పరలోకమ్దు ఉండ్రి బమ్మాతి గుర్తు తోరితాద్. పొద్దుదిజ్ పొర్పాతి మన్ని ఉండ్రి బోదెలి తోరె ఆతాద్. దన్ని పాదమ్క అడిఃగి నెల మహాద్. బురాదు పనెండు సుక్కెజ్ మన్ని రాజురి టోపిలెకెండ ఉండ్రి బజారం టోపి మహాద్.

2 అది పాత డిఃస్త మహాద్. అది ఏరు ఈబాదెజ్ నొప్పిదాన్ గొప్ప డేల్ని అడఃబాజి మహాద్.

3 నస్తివలె, మరి ఉండ్రి గుర్తు పరలోకమ్దు తోరితాద్. ఇదిలో, ఉండ్రి గొప్ప పెరి ఎరాని సరాన్ తోరితాద్. దన్నిజ్ ఏడు బురెక్ని పది కొమ్ము మహె. దన్ని బుర్ర మున్ను రాజురి టోపిలెకెండ బజరమ్ది ఏడు టోపిజ్ మహె.

4 ఆగనమ్ది సుక్కెజి మూండ్రి వంతుజ్లోఇ ఉండ్రి వంతు సుక్కెజ్ దన్ని తోక డెయ్జి బూమి మున్ను అర్వ్తాద్. ఏరు ఈబాదెజ్ తయార్ ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃజ్దెజ్ ఇజి అయ సరాన్ అయ బోదెలి ఎద్దు నిహ మహాద్.

5 అది ఒరెన్ మరినిజ్ కాస్తాద్. లోకమ్ది లోకురిజ్ విజేరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొడొఃదిజ్ ఇట్టాద్. అది కాస్తి బయి దేవుణు డగ్రుని వన్ని సింహాసనం డగ్రు వెటనె లాగిజి పెరె ఆతాన్.

6 అది వన్నెండు వందెజ్ అరువయ్ రోస్సు, దేవుణు దన్నిజ్ పోస కిదెజ్ ఇజి బిడిఃమ్బూమిదు దన్ని వందిజ్ తయార్ కితిమన్ని బాడ్డిదు ఉహాక్కి సాహద్.

7 నస్తివలె పరలోకమ్దు ఉద్దం ఆతాద్. మికాయెలు ఇని దేవుణుదూతని వన్ని జటుది దూతార్ కూడఃజి అయ గొప్ప పెరి సరాన్వెట ఉద్దం కితార్. అయ గొప్ప పెరి సరాన్ని వన్ని దూతార్ మరజి ఉద్దం కితార్.

8 గాని వారు దేవుణు దూతార్ ముస్సు గెలిస్తెజ్ అట్వెతార్. అందెజె పరలోకమ్దు మరి ఎనెజ్బా వరిజ్ మండ్రెజ్ బాడ్డి మన్వితాద్.

9 లోకమ్దు మన్ని లోకురిజ్ విజేరిజ్ మొసెం కిజి నడిఃపిస్సికాన్ ఆతి సెఇకాన్ ఆతి సయ్తాన్ ఇజి పేరు ఇడ్డెః ఆతి మొదోహి సరాన్ ఇని అయ గొప్ప పెరి సరాన్ పరలోకమ్దాన్ బూమి ముస్సు అర్పె ఆతాన్. వాండ్రుని వన్ని దూతార్ బూమి ముస్సు అర్పె ఆతార్.

10 నస్తివలె పరలోకమ్దు యాలెకెండ్ వెహిని ఉండ్డి పెరి కంటం నాను వెహా. “రెయుపోగొల్ మా దేవుణు ఎద్దు, మా తంబెరిజ ముస్సు తప్పు మొప్పి మహికాన్ ఆతి సయ్తాన్ అర్పె ఆత మనాన్. అందెజె వన్ని గొప్ప నత్తుదాన్ మజి రక్కిస్తి దేవుణు ఎలాకాలం ఏలుబడిః కిజి మంజినాన్. మరి అతికారం వన్ని క్రిస్టుజ్ ఆతాద్.

11 మా తంబెరిసిర్ గొరెపిల్ల నలదాన్, వారు వప్తిమన్ని సాస్యమ్దాన్ సయ్తాన్ ముస్సు గెలస్త మనార్. వారు వరి సొంత పాణమ్కాజ్ గొప్ప పెరిక ఇజి ఒడిఃబిఎండ సాదెజ్బా తయార్ ఆత మహోర్.

12 అందెజె పరలోకమ్దికిదెరా మీరు సర్ల ఆదు. బూమిదుని సమ్దరమ్దు మన్ని విజేరిజ్ కస్టమ్కునె. ఎందానిజ్ ఇహిజ సయ్తాను మీ డగ్రు వాత మనాన్. వన్నిజ్ సమయం తక్కునె మనాద్ ఇజి నెసి వాండ్రు నండో కోపమ్దాన్ నీ డగ్రు వాత మనాన్”.

13 బూమి ముస్సు అర్పె ఆతాన్ ఇజి నెస్తాండ్రె, అయ గొప్ప పెరి సరాన్, అయ మొగకొడెఃదిజ్ కాస్తి బోదెలిదిజ్ అసి మాలెజ్ కిదెజ్ ఇజి వెటప్పెర్లి రెబాదెజ్ మొదోల్స్తాన్.

14 అందెజె, అయ గొప్ప పెరి సరన్బాణిజ్ తప్తె ఆజి దేవుణు దన్ని వందిజ్ బిడిఃజ్బూమిదు తయార్ కితి మన్ని బాడ్డిదు ఎగ్రిజి సొండ్రెజ్ ఇజి రుండి పెరి డేగ రెక్కెజ్ దన్నిజ్ దోహాక్కె. అబ్బె అయ గొప్ప పెరి సరాన్ దన్నిజ్ తోవెండ ఉండ్డి కాలం, కాలమ్కు, సెగం కాలం పోస కిబె ఆతాద్.

15 నస్తివలె, అయ బోదెలిదిజ్ గడ్డ పెర్లి ఒతెజ్ ఇజి అయ గొప్ప పెరి సరాన్ దన్ని వెయ్దాన్ పెరి గడ్డలెకెండ్, అయ బోదెలి వెనుకహాన్ ఏరు కక్తాన్.

16 గాని బూమి బదెజ్ ఆజి రే ఆతాదె, అయ గొప్ప పెరి సరాన్ వెయ్దాన్ కక్తి ఏరుదిజ్ డిఃజ్జి అయ బోదెలిదిజ్ తోడుః కితాద్.

17-18 అందెజె అయ గొప్ప పెరి సరాన్ అయ బోదెలి ముస్సు కోపం ఆతాదె, దేవుణు ఆడ్రెజ్ లోజిజి యేసువందిజ్ సాసెం వెహ్పిమన్నికార్ ఆతి దన్ని పొటాదు పుట్టిమహివరివెట ఉద్దం కిదెజ్ ఇజి తయార్ ఆతాద్. వరివెట ఉద్దం కిదెజ్ ఇజి అయ గొప్ప పెరి సరాన్ సొత్తాదె సమ్దరం ఒడ్డుదు నిహోద్.

13

సమ్దారమ్దాన్ ఎక్కి వాతి జంతు.

1 మరి, పది కొముకుని ఏడు బురెక్ మన్ని ఉండ్రి క్రూరమతి జంతు సమ్దారమ్దాన్ వెల్లి వాతిక నాను సుడత. దన్ని కొముకాజ్ పది టోపిజ్ మహా. ఉండ్రి ఉండ్రి బుర ముస్సు దేవుణుదిజ్ దుసలాడిజిని ఉండ్రి ఉండ్రి పేరుకు మహా.

2 నాను సుడతమన్ని అయ జంతు సిటాడః నొరెన్ లెకెండ్ మహాద్. గాని దన్ని పాదమ్కు ఒడుజు పాదమ్కు లెకెండ్ మహా. దన్ని వెయు పెరి నొరెన్ వెయులెకెండ్ మహాద్. అయ గొప్ప పెరి సరాన్ దన్ని నత్తుని వన్ని సింహాసనమ్ని దన్ని గొప్పు అతికారం విజు అయ జంతుదిజ్ సితాన్.

3 అయ జంతుది ఏడు బురెకలోణ ఉండ్రి బురాదు సాదెజ్ సరియాతి పెరి గాయం తగ్గిత మహాద్. గాని సాదెజ్ సరియాతి అయ పెరి గాయం మాందితాద్. అందెజె బూమి ముస్సు మన్ని లోకుర్ విజేరె బమ్మ ఆజి అయ జంతువెట కూడితార్.

4 అయ జంతుదిజ్ అతికారం సత్తివందిజ్ వారు అయ గొప్ప పెరి సరాన్దిజ్ పొగిడిజి మాడిసి మహాద్. మరి వారు అయ జంతుదిజ్ పొగిడిజి మాడిసి, “యా జంతులెకెండ్ మన్నికాన్ ఎయెన్బా సితెన్. మరి దన్ని వెట ఉద్దం కిదెజ్ అట్టికాన్ ఎయెన్బా సితెన్”, ఇజి గొప్ప వెప్పి మహాద్.

5 పొజె ఆని మాటెజ్ ఆహ వెహె ఆజి దేవుణుదిజ్ దుసలాడిజి వర్దిదెజ్ దన్నిజ్ వెయు వాతాద్. నలవయరుండి నెలెజ్ దన్ని పణిజ్ కిదెజ్ దన్నిజ్ అతికారం దొహ్కాద్.

6 అందెజె దేవుణుదిజ్ దుసలాడిజి, వన్ని పేరుదిజ్ అబద్దం మాటెజ్ వెప్పి, పరలోకమ్దిజ్, పరలోకమ్దు బత్కిని వరివందిజ్ దుసలాడిజి అయ జంతు దన్ని వెయుదాన్ వర్దిజి మహాద్.

7 దేవుణు వందిజ్ కేట ఆతి వరివెట విదెం కిజి, వరిజ్ గెలిస్తెజ్ దన్నిజ్ అతికారం దొహ్కాద్. విజు తెగిజాణివరి ముస్సు, విజు జాతిజాణి వరి ముస్సు, విజు బాసెజ్ వర్దిని వరి ముస్సు, విజు దేసెమ్దివరి ముస్సు దన్నిజ్ అతికారం దొహ్కాద్.

8 బూమి ముస్సు బత్కినికార్ విజేరె అయ జంతుజ్ పొగిడిజి మాడిస్సార్. బూమి పుట్విండ ముందాల్పై కత్తె ఆతిమని గొరెపిల్లిదిజ్ సెందితి మన్ని, దేవుణు వెట ఎలాకాలం బత్కిని వరి పేరుకు రాసి ఇడ్డిని పుస్తకమ్దు పేరు సిల్లికార్ విజేరె జంతుదిజ్ పొగిడిజి మాడిస్సార్లె. వరి పేరుకు అయ పుస్తకమ్దు సితెద్.

9 వెండ్రెజ్ ముస్సు మన్నికాన్ గిబ్బిజ్ ఒడిజి వెంజి అయావజ నడిజి మండ్రు.

10 ఎయెన్బా ఆజ దేసెమ్ది వరివెట అస్సి ఆజి, ఆజ దేసెం సొనికాన్ అయాలెకెండ్ సొనాన్లె. ఎయెన్బా కుర్దదాన్ సప్పె ఆదెజ్ మన్నికాన్, కుర్దదాన్ సప్పె ఆనాన్లె. దేవుణు వందిజ్ కేట ఆతివరి ఓర్పు, మరి దేవుణు ముస్సు వరిజ్ మన్ని నమకం దన్నిదటాన్ తోరె ఆనాద్.

బూమిదాన్ వెల్లి వాతి జంతు

11 మరి బూమిదాన్ మరి ఉండ్రి క్రూరమతి జంతు వెల్లి వాతిక నాను సుడత. గొరెపిల్లి కొము నన్నిరుండి కొముకు దన్నిజ్ మహా. గాని గొప్ప పెరి సరాన్లెకెండ్ వర్దిజి మహాద్.

12 అయ జంతుజ్, మొదొహి జంతుజ్ మహి విజు అతికారం దన్ని బాణిజ్ దొహ్కాద్. అయ అతికారమ్దాన్ బూమి ముస్సు బత్కినికార్ విజేరె సాదెజ్ సరియాతి గాయం తగ్గిజి నెగెండ్ ఆతి మన్ని మొదొహి జంతుజ్ పొగిడిజి మాడిస్సెజ్ ఇజి బలవంతం కిజి మహాద్.

13 అయ జంతు లోకుర్ విజేరె సూణిలెకెండ ఆగసమ్దాన్ సిను డిగ్గి వాని నన్ని గొప్ప పెరి బమ్మాతి పణిజ్ గుర్తు లెకెండ కిజి తోరిసి మహద్.

14 మొదోహి జంతు దన్ని పేరుదాన్ బమ్మాతిపణిజ్ గుర్తు లెకెండ కిజి తోరిస్తెజ్ అతికారం దోహ్కాక్తి అయ జంతు బూమి ముస్సు బత్తిని వరిజ్ మొసెం కితాద్. కుర్దదాన్ గాయం అతిజ్బా సావిండ బత్తితి మొదోహి జంతుది బొమ్మ ఉండ్రీ తయార్ కిదెజ్ ఇజి ఆడ్ర్ సిత్తాద్.

15 అయ మొదోహి జంతుది బొమ్మదిజ్ వర్గిదెజ్ అట్టిలెకెండ పాణం సీదెజ్ దన్నిజ్ అతికారం దోహ్కాద్. అందెజె బొమ్మదిజ్ మాడిఃన్విండ మంజిని వరిజ్ సప్తెజ్బా అతికారం దోహ్కా మనాద్.

16 అయ జంతు విజేరిజ్, అహిజ ఇజరికారాతిజ్బా పెరికారాతిజ్బా, ఆస్తి మన్నికారాతిజ్బా బిదాదికారాతిజ్బా, వెట్టిపణిమణిసిర్ ఆకకార్ ఆతిజ్బా వెట్టిపణి కినికారాతిజ్బా విజేరె వరి ఉణెర్ కిక్కాజ్నో, సిల్లిజ నొద్దుదునో మొదోహి జంతుది గుర్తు పోకె ఆదెజ్ ఇజి బలవంతం కిత్తాద్.

17 ఎందానిజ్ ఇహిజ, అయ జంతు పేరునో, దన్ని పేరుది అంకి ఆతి గుర్తునో పోకె ఆతివరిజ్నె ఆవిండ మరి ఎయెరిజ్బా ఇనికబా కొండెజ్నో, పొర్తెజ్నో అతికారం సిల్లెద్.

18 ఏలు బుద్దిమన్నికాన్ ఎయెర్బా వన్ని బుద్దిదాన్ జంతు అంకి ఎసా ఇజి లెకిస్తెజ్ అట్టిజ లెక్కిసిన్. అక ఉండ్రీ లోకుది అంకి. ఆరువందెజ్ అరువయ్ఆరు. యాక లెకిస్తెజ్ బుద్ది అవ్సరం.

14

గొరెపిల్లని లక్కనాల్పయ్నాల్లి వెయ్ లోకుర్.

1 నస్తవలె, నాను సుండెతిజ్ అయ గొరెపిల్ల యెరూసలేమ్దు మన్ని సియెను గొరొన్ ముస్సు నిహ మనాన్. అయ గొరెపిల్ల పేరుని, వన్ని బుబ్బాతి దేవుణు పేరు వరి నొద్దుదు రాసె ఆతిమని లక్క నాల్పయ్నాల్లి వెయు లోకుర్ వన్నివెట మహార్.

2 గొప్ప పెరి గడ్డాది జాటు లెకెండని గొప్ప పిడుఃగు జాటు లెకెండ ఉండ్రీ కంటం పరలోకమ్దాన్ వాతిక నాను వెహ. నాను వెహిమన్ని కంటం టోయ్ల పలక్తివలె వాతి జాటు లెకెండ మహద్.

3 అయ లక్క నాల్పయ్ నాల్లి వెయిజ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజ ఎద్దుని ఇరువయ్ నాల్వర్ పెద్దెలిజ ఎద్దు, ఉండ్రీ కొత్త పాట పార్దార్. యా లోకమ్దాన్ కొలె ఆతి, వారె ఆవిండ మరి ఎయెర్బా అయ పాట నెన్వితార్.

4 వీరు బోదెకవెట కూడఃజి, వరిజ్ వారె సెఇకార్ కిబె ఆవిండ నెగెండ మన్నికార్. గొరెపిల్ల ఎంబె సాహిజ్బా వీరుబా వన్నివెట సొన్ని మహార్. వీరు తొలిత పంటితి పంటలెకెండ దేవుణు వందిజ్, మరి గొరెపిల్లవందిజ్ బూమి ముస్సు మన్ని విజి లోకుర్ బాణిజ్ ఎర్లె ఆజి కేట అతికార్.

5 వీరు వెయుదాన్ ఇని అబద్దం మాటబా వర్గివితార్. వీరు ఇని కల్తి సిల్లి నెగ్గికార్.

మూండ్రీ దేవుణు దూతార్

6 నస్తవలె బూమి ముస్సు మన్నివరిజ్ విజేరిజ్, అహిజ విజి జాతిజణి వరిజ్, విజి తెగాతివరిజ్, విజి బాసెజ వర్గిని వరిజ్, విజి దేసమ్ది లోకురిజ్, వెహ్తాజ్ దేవుణు వెట

ఎలాకాలం మంజిని బత్సు సీని నువార్త అసి మరి ఉండ్రీ దేవుణు దూత ఆగనమ్దు ఎగ్రిజి మంజినిక నాను సుడేత.

7 వాండ్రు, “మీరు దేవుణుదిజ్ లోజిజి, వన్నిజ్ గవరం సీదు. ఎందానిజ్ ఇహిజ వాండ్రు తీర్పు తీరిసిని గడియ వాత మనాద్. అందెజె ఆగనమ్దిజ్, బూమిదిజ్, సమ్దారమ్దిజ్, ఏరు వాని ఊటబ పుటిన్తి వన్నిజె పొగిడిజి మాడిస్టు”, ఇజి గొప్ప పెరి కంటమ్దాన్ వెహ్హన్.

8 మరి ఉండ్రీ దూత వన్ని వెనుక వాజి, “ఉత్పత్ కిబిన్సి, రంకు బూలాజిని దన్ని పణిజాణిజ్ విజు లోకురిజ్ మత్తు కిబిన్సిలెకెండ్ ఉట్టిపన్తికాద్ ఆతి గొప్ప పెరి పట్టుం ఆతి బబులోను అర్దాద్, అర్దాద్”, ఇజి వెహ్హన్.

9-10 అయ రుండి దేవుణు దూతార్ వెనుక, మరి ఒరెన్ దూత వన్ని వెనుక వాజి గొప్ప పెరి కంటమ్దాన్ ఈహు వెహ్హన్. “ఎయెన్బా అయ జంతుజ్ మాడిసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునొ, కియుదునొ పొకె ఆతికాన్, ఇనికబా కలవ్విండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిన్సి కల్లు ఉణాన్లె. గొరెపిల్ల ఎద్దుని, దేవుణు వందిజ్ కేట ఆతికార్ ఆతి దేవుణు దూతార్ ఎద్దు, నెగ్డిసి సిసుదాన్, వెయ్విని గందకమ్దాన్ ఇమ్సెజ్ కిబె ఆనాన్.

11 వారు హిమ్సెజ్ కిబె ఆజిని దన్ని గోయ్ ఎలాకాలం డిన్విండ ముస్సు సొన్ని మంజినాద్. అయ క్రూరమతి జంతుదిజ్ గాని, దన్ని బొమ్మదిజ్ గాని పొగిడిజి మాడిస్సికార్, దన్ని పేరుమన్ని గుర్తు ఎయెన్బా పొకె ఆతిజ అబ్బె రెయుపొగొల్ కాళి సిల్లెండ హిమ్సెజ్ కిబె ఆజి మంజినాన్.

12 అందెజె దేవుణు ఆడ్రెజ్ లోజిజి మంజి, యేసువందిజ్ మన్ని నమకమ్దు నమకమాతివరిలెకెండ్ మంజినికార్, హిమ్సెజ్ విజు డిన్విండ ఓరిసి మంజినార్. వారు దేవుణుదిజ్ సెందితికార్ ఇజి తోరె ఆజినార్.

13 నస్తవలె, “ప్రబు ముస్సు నమకం ఇడేజి ఏలుదాన్ సానికాన్ దేవుణు సీని దీవెనమ్కు మంజినికార్ ఇజి రాన్అ”, ఇజి పరలోకమ్దాన్ ఉండ్రీ కంటం వెహ్హిక వెహా. “నిజమె, వారు కస్తబాడేజినిక డిసి రోమ్మార్. వారు కితిమన్ని పణిదిజ్ తగితి లెకెండ్ వరిజ్ ఇనాయం దొహ్కాద్”, ఇజి దేవుణు ఆత్మ వెహ్హినాన్.

బూమిది పంట కొయ్నిక.

14 మరి నాను సుడేతిజ్, ఇదిలో, తెల్లాని మొసాప్ తోరితాద్. “లోకు మరిసి” ఆతి వన్నిజ్ పోలితి ఒరెన్ మొసాప్ ముస్సు బస్త మహాన్. వన్ని బుర ముస్సు బజారం టోపి మహాద్. వన్ని కీదు తెవుగు మన్ని కొడెవేలి అస్త మహాన్.

15 నస్తవలె మరి ఉండ్రీ దేవుణు దూత, దేవుణుగుడిదాన్ వెల్లి వాజి, “బూమిది పంట పండిత మనాద్. కొయ్దెజ్ కాలం వాతాద్. అందెజె నీ కొడెవేలి అసి కొయ్అ”, ఇజి మొసాపు ముస్సు బస్తమన్ని వన్నిజ్ పెరి కంటమ్దాన్ వెహ్హన్.

16 మొసాపు ముస్సు బస్త మన్నికాన్ వన్ని కొడెవేలి బూమి ముస్సు సెల్హ్హాన్. బూమిదు పంటితి మన్ని పంట కొయె ఆతాద్.

17 నస్తవలె మరి ఉండ్రీ దేవుణు దూత పరలోకమ్దు మన్ని దేవుణుగుడిదాన్ వెల్లి వాతాన్. వన్నిజ్బా తెవుగుమన్ని ఉండ్రీ కొడెవేలి మహాద్.

18 మరి ఉండ్రీ దేవుణు దూత దేవుణుదిజ్ పూజ సీని మాలిపీటదాన్ వెల్లి వాతాన్. వాండ్రు సిసు ముస్సు అతికారం మన్నికాన్. “బూమి ముస్సు మన్ని ద్రాక్స పట్టు.

కొయ్ దెజ్ పాకం వాతె. అందెజె తెవుగు మన్ని నీ కొడెఃవేలిదాన్ దన్ని గెలెజ్ కొయ్ అ”, ఇజి గొప్ప పెరి కంటమ్ దాన్ వాండ్రు కొడెఃవేలి అస్తిమన్ని దూతెజ్ వెహ్లాన్.

19 అందెజె అయ దేవుణు దూత వన్ని కొడెఃవేలి బూమి ముస్సు సెల్ ఫ్రాండ్రె, ద్రాక్ష్ పట్టు కొయ్ జి, ద్రాక్ష్ పట్టు మట్టి రసం లాగ్ జిని గనుగుదు ఇత్తాన్. యా గనుగు దేవుణు బాణిజ్ వాజిని సిసునన్ని కోపమ్ దిజ్ గుర్తు.

20 ద్రాక్ష్ పట్టు మట్టిని గనుగుదు పట్టుమ్ దిజ్ వెల్లి వారు మట్టార్. రుండి వందెజ్ మయిలుజ్ దూరం, గుర్తం వెయుది కలెమ్ దిజ్ సమానం ఆతిలెకెండ, అయదు అడుగుజ్ లోతు మన్ని గడ్డ లెకెండ, అయ గనుగుదాన్ నల సొత్తాద్.

15

ఏడు దేవుణు దూతార్ ని ఏడు జబ్బుజ్.

1 మరి ఉండ్రె గొప్ప బమ్మాతి గుర్తు పరలోకమ్ దు నాను సుడెఃత. దేవుణు కోపం పూర్తి ఆనిలెకెండ కిదెజ్ ఇజి, కడెఃవెరిది ఏడు జబ్బుజ్ అస్తి మన్ని ఏడు దూతారిజ్ సుడెఃత.

2 మరి సిసుదాన్ కూడిఃతి మన్ని గాజుదిజ్ పొలితి సమ్ దరం లెకెండ మన్నిక నాను సుడెఃత. అయ క్రూరమతి జంతుజ్ ని దన్ని బోమ్మ దిజ్, దన్ని పేరుది అంకిదిజ్ లోజివండ దన్నిజ్ గెలిస్తెకార్, దేవుణు వరిజ్ సిత్తి టొయ్ లెజ్ అసి అయ గాజు నన్ని సమ్ దరం పడెకాదు నిల్చి మంజినిక సుడెఃత.

3 వారు, “ప్రబు ఆతి దేవుణు, విజు దన్నిజ్ అతికారం మన్నికి నీ పణిజ్ గొప్ప పెరికెజ్ ని బమ్మాతికెజ్. బూమి ముస్సు మన్ని లోకుర్ ముస్సు ఎలాకాలం రాజు ఆతికి, నీ సరిజ్ నాయం ఆతికెజ్ ని నిజమాతికెజ్ మన్నె.

4 ప్రబువా, నీను ఒరిదె గొప్ప నెగ్గికి, నీ నన్నికాన్ మరి ఎయెన్ బా సిల్లెన్. లోకుర్ విజేరె నిజి లోజిజి మంజినార్. బూమి ముస్సు మన్ని లోకుర్ విజేరె నీపేరుదిజ్ గవరం సినార్ లె. తోరె ఆతిమని నీతినిజయ్ మన్ని పణిజి వందెజ్ లోకుర్ విజేరె వాజి నీ ఎద్దు నిజి పొగిడిఃజి మాడిఃస్సార్ లె”, ఇజి దేవుణు పణికినికాన్ ఆతి మోసె పాటని గొరెపిల్ల పాట పార్తార్.

5 దన్నివెనుక, నాను సుడెఃతిజ్ సాస్యమదిజ్ గుడారం ఇని దేవుణు గుడిః పరలోకమ్ దు రే ఆత్తాద్.

6 అయ ఏడు జబ్బుజ్ అస్తి మన్ని ఏడు దూతార్, కల్లిసిల్లి మెర్సిని తెల్లాని సొక్కెజ్ తోడిఃగిజి, దన్ని ముస్సు గుండెదు బజారమ్ దాన్ తయార్ కితి జమిదం తోహె ఆజి అయ దేవుణు - గుడిఃదాన్ వెల్లి వాతార్.

7 నస్తివలె, అయ పాణం మన్ని నాల్లి జంతుజు లోఇ ఉండ్రె జంతు ఎలాకాలం బత్తిజిని దేవుణు కోపమ్ దాన్ నిండ్రెతి మన్ని, బజారమ్ దాన్ తయార్ కితి ఏడు కుడుకెజ్ అయ ఏడు దేవుణు దూతారిజ్ సిత్తాన్.

8 అయావలె దేవుణు జాయ్ దాన్ ని వన్ని సత్తుదాన్ వాతి గోయ్ దాన్ దేవుణు గుడిః నిండ్రెతాద్. అయ ఏడు దేవుణు దూతార్ వెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్ బా దేవుణు గుడిఃదు డుగ్ దెజ్ అట్ ఏతాన్.

16

దేవుణు కోపం నిండ్రెతి మన్ని ఏడు కుడుకెజ్

1 నస్తవలె, “మీరు సొన్ని దేవుణు కోపమ్దాన్ నిండ్రితీ మన్ని అయ ఏడు కుడుకెజ్ బూమి మున్ను వాక్త”, ఇజి దేవుణు గుడిఃదాన్ అయ ఏడు దేవుణుదూతారిజ్ గొప్ప పెరి కంటమ్దాన్ వెహ్తాక వెహ.

2 మొదొహి దెవుణుదూత సొహొండ్రె వన్ని కుడుకాదు మన్నిక బూమి మున్ను వాక్తిజ్, అయ క్రూరమతి జంతుది గుర్తు పొకె ఆతి వరిజ్ని దన్ని బొమ్మదిజ్ మాడిఃస్సివరిజ్ డటం నొప్పి కిజిని సెఇ పుట్టు పుట్టె.

3 దన్ని వెనుక రుండి దేవుణు దూత సొన్ని వన్ని కుడుకాదు మన్నిక సమ్దరమ్దు వాక్తిజ్, సమ్దరమ్ది ఏరు పీనుగుది నల లెకెండ్ ఆతాద్. అందెజె సమ్దరమ్దు మన్ని పాణం మనికెజ్ విజు సాతె.

4 అయ రుండి దేవుణు దూత వెనుక మూండ్రీ దేవుణు దూత సొన్ని వన్ని కుడుకాదు మన్నిక పెరి గడ్డెజని ఏరు సొని ఊటెజ వాక్తిజ్, వనక ఏరు విజు నల ఆతె.

5 నస్తవలె, “ఏలు మన్నికి, ముజాల మహికి ఆతి నీను ఒరిదె పరిసుద్దమాతికాన్ ఆతికి. నీ నన్నికాన్ మరి ఎయెన్బా సిల్లెన్.

6 వారు దేవుణు వందిజ్ కేట ఆతి వరిజ్ని దేవుణు ప్రవక్తరుజ్ సప్టార్. అందెజె వరిజ్ తగ్గులెకెండ్ తీర్పు తీరిసి, వరిజ్ ఉండెజ్ నల సిత్తిజ్, నీను నీతినిజాయ్దాన్ తీర్పు తీరిసికి ఆజిని”, ఇజి ఏరుదిజ్ అతికారం మన్ని దేవుణు దూత వెహ్నినిక వెహ.

7 అందెజె “నిజమె, ప్రబు ఆతి దేవుణు, విజు దన్నిజ్ అతికారం మన్నికి, నీను తీరిస్సి తీర్పుజ్ నిజమాతికెజ్, నాయమాతికెజ్”, ఇజి పూజ సీని మాలిపీటదాన్ వెహ్తాక వెహ.

8 అయ మూండ్రీ దేవుణు దూత వెనుక నాల్లి దేవుణు దూత సొన్ని వన్ని కుడుకాదు మన్నిక, పొద్దుమున్ను వాక్తిజ్ లోకురిజ్ సినుదాన్ సురదెజ్ పొద్దుదిజ్ అతికారం దొహ్కాద్.

9 అందెజె లోకుర్ నండొ వేడిఃదాన్ వెయ్జి, పుట్టాజ్ని నొప్పి కిబిస్సి జబ్బుజ్ లోకుర్ మున్ను పొక్తిమన్ని దేవుణు పేరుదిజ్ దుసలాడిఃతార్. గాని వారు, వరి పాపమ్కు ఒప్పుకొండఃజి డిఃసిసీజి మన్ను మారిస్తెజ్ ఒవ్ఎతార్. వారు దేవుణుదిజ్ పొగిడిఃదెజ్బా ఒవ్ఎతార్.

10 అయ నాల్లి దేవుణు దూత వెనుక అయ్దు దేవుణు దూత సొన్ని వన్ని కుడుకాదు మన్నిక అయ క్రూరమతి జంతు బన్ని సింహొసనం మున్ను వాక్తిజ్, అది ఏలుబడిః కిని దేసెం విజు సీకటి ఆతాద్. లోకుర్ వరిజ్ వాజిని నొప్పిజ్ బరిస్తెజ్ అట్ఏండ వరి నాలికెజ్ అడ్డం కొహ్కా ఆతార్.

11 వరి పుట్టుజవందిజ్, నొప్పిజవందిజ్ పరలోకమ్దు మన్ని దేవుణుదిజ్ దుసలాడిఃతార్. గాని వారు కిత్తి మహి సెఇ వణిజ వందిజ్ ఒడిఃబిజి మన్ను మరిసి పాపమ్కు ఒప్పుకొండఃజి డిఃసిసీదెజ్ ఒవ్ఎతార్.

12 అయ అయ్దు దేవుణు దూత వెనుక ఆరు దేవుణు దూత సొన్ని వన్ని కుడుకాదు మన్నిక యూప్రటిను ఇని గొప్ప పెరి గడ్డ మున్ను వాక్తిజ్, తూర్పు దొటాన్ వాని రాజురిజ్ వాదెజ్ సరి తయార్ ఆతిలెకెండ్ గడ్డ వహ్తా సొహద్.

13 నస్తవలె, అయ గొప్ప పెరి సరాసు వెయుదాన్, మరి అయ క్రూరమతి జంతు వెయుదాన్ని అబద్దం వెహ్ని ప్రవక్త వెయ్దాన్ కపొకిజ్ నన్ని మూండ్రీ దెయమ్కు వెల్లి వాతిక సుడఃత.

14 అయ దెయమ్మకు బమ్మాని గుర్తుజ్ కిజి తోరిసినె. అవి విజు దన్నిజ్ అతికారం ఆతిమన్ని దేవుణు తీర్పు తీరిస్సి, గొప్ప తియెల్ ఆని రోజుదు, దేవుణు వెట ఉద్దం కిదెజ్ ఇజి లోకమ్దు మన్ని విజు రాజురిజ్ కుడుఃప్పి తత్తెజ్ ఇజి వరి డగ్గు సొహె.

15 “ఇదిలో, ఎయెన్బా ఒడిఃబివిండ మహివలె, డోఃజారి డోఃజి కిదెజ్ వానిలెకెండ్ నాను వాజిన. నాను వానివలె సిగు ఆనిలెకెండ్ డుమ్డ నడిఃవిండ మండ్రెజ్ ఇజి తెలి ఆజిమంజి వన్ని సొక్కెజ్ కాప్కిజి మంజినికాన్ దేవుణు సీజిని దీవనమ్మకు మంజినికాన్ ఆనాన్”.

16 నస్తివలె, అయ దెయమ్మకు ఏబ్లి బాసదు ‘అర్మెగెదొను’ ఇజి కూకె ఆజిని బాడ్డిదు లోకమ్ది రాజురిజ్ విజేరిజ్ కుడుఃప్పి తత్తె.

17 అయ ఆరు దేవుణు దూత వెనుక ఏడు దేవుణు దూత సొన్ని వన్ని కుడుఃకాదు మన్నిక ఆగనమ్దిజ్ని బూమిదిజ్ నడిఃమి మన్ని బాడ్డిదు వాక్తిజ్, “పూర్తి ఆతాద్”, ఇజి దేవుణుగుడిఃలో ఇ మన్ని సింహాసనమ్దాన్ వెప్పిని ఉండ్రి పెరి కంటం వాతాద్.

18 నస్తివలె మెర్చిని జాయ్, దీడిఃజినికెజ్, పిడుఃగుజ్, విజు వాతె. బూమి గొప్పజ కద్దితాద్. బూమి ముస్సు లోకుర్ పుట్టిబాణిజ్ అసి ఎనెజిబా జర్రిఇలెకెండ్ నసొ గొప్ప గటిజ బూమి కద్దితాద్.

19 గొప్ప పేరు పొందితిమన్ని బబులోసు పట్టుం బదెజ్ ఆజి మూండ్రి ముకెజ్ ఆతె. దేవుణుదిజ్ నమ్మిఇవరి పట్టుమ్మకు అర్తె సొహె. బబులోసు పట్టుమ్దిజ్, దన్ని పాపమ్క వందిజ్, సిసు లెకెండ్మన్ని, వన్ని గొప్ప పెరి కోపం మన్ని గిన్న ఉండెజ్ నీదెజ్ దేవుణు ఎత్తు కిత్తాన్.

20 నమ్దరం నడిఃమి మన్ని ఇజిరి దేసెమ్మకు (ద్విపుజ్) విజు ముడుఃగితె సొహె. గొరొక్ అణసె ఆజి నద్దుజ్ ఆతె.

21 డగ్గు యబాయ్ కేజిజ్ బరు మంజిని వడఃజెజ్ ఆగనమ్దాన్ లోకురి ముస్సు అర్తె. అయ వడఃజెబాణిజ్ తగ్గితి గాయమ్మకు గొప్ప పెరికెజాతిజ్, లోకుర్ అయ గాయమ్మక వందిజ్ దేవుణుదిజ్ దుసలాడిఃతార్.

17

బోదెలిని జంతు

1 ఏడు కుడుఃకెజ్ అస్తిమన్ని ఏడు దూతార్లో ఇ ఒరెన్ దూత వాతాండ్ర నావెట, “నీను ఇబ్బె రఅ. గొప్ప రంకు బూలాని బోదెలిలెకెండ్ మన్ని, నండో గడ్డెజి వడకాదుమన్ని పెరి పట్టుమ్దిజ్ తీర్పు కిజి, సీజిని సిక్కు నిజి తోరిస్సాలె”, ఇజి వెప్తాన్.

2 బూమి ముస్సు మన్ని రాజుర్ దన్ని వెట కూడిఃజి గూర్తార్. బూమి ముస్సు బత్తినికార్ దన్ని రంకు బూలాని పణిజాణిజ్ మత్తు ఆజి సొస్టార్.

3 నస్తివలె, దేవుణు ఆత్మదాన్ నిండ్రితి మన్ని నజి, అయ దేవుణు దూత బిడిఃమ్బూమిదు లాగ్గి ఒత్తాన్. అబ్బె దేవుణు పేరుదిజ్ దుసలాడిఃజిని పేరుదాన్ నిండ్రితి మన్ని ఏడు బురెక్కిని వది కొమ్ము మన్ని, ఉండ్రి ఎరాని జంతు ముస్సు బస్తిమన్ని ఉండ్రి బోదెలిదిజ్ సుడఃత.

4 అయ బోదెలి నీలి రంగు కూడిఃతి మన్ని ఎరాని రంగుది గొప్ప విలువాతి పాత పొర్పాజి, మెర్చిని బజారం, విలువాతి రంగువణకుది విలువాతి పూసెజ్ ఇట్టిజి మహాద్. అది కిజి మంజిని నెఇ పణిజాణిజ్. మర్రి అది కిజిని రంకు బూలాని వణిది నెఇ గుణముకు విజు నిండ్రితి మన్ని ఉండ్రి బజరమ్ది గిన్న కియుదు అస్త మహాద్.

5 అర్దం కిదెజ్ అట్ఠ ఇ లెకెండ్ దన్ని పేరు దన్ని నొద్దుదు యాలెకెండ్ రాసె ఆత మహాద్.

“బూమి మున్ను మన్ని రంకు బూలాని బోదెకాజ్‌ని విజు సెజ పణిజ అయ్‌సి ఆతిమన్ని గొప్ప పెరి బబులోను”.

6 అయ బోదెలి దేవుణు వందిజ్ కేట ఆతిమన్ని వరి నలని యేసువందిజ్ సాస్యం వెహ్తాజ్ నప్పె ఆతివరి నల ఉణిజి మత్తు ఆజి సోస్త మహాద్. నాను దన్నిజ్ సుడేజి నండో బమ్మ ఆత.

7 నస్తివలె, అయ దేవుణు దూత నావెట ఈహు వెహ్తాన్. “నీను ఎందానిజ్ బమ్మ ఆజిని అయ బోదెలివందిజ్‌ని మరి ఏడు బురెక్‌ని పది కొముకుమన్ని అది బస్తిమన్ని జంతువందిజ్ డాజితి మన్ని సజతిజ్ నాను నిజీ తెలియ కినా”.

8 నీను సుడేతి అయ జంతు ముజుల్ మహాద్ గాని ఏలు సిల్లెద్. గాని వెటనె దర్లిదాన్ వెల్లి వాజి, దన్ని వందిజ్ తయార్ ఆతిమని లెకెండ నాసనం ఆజి సానాద్. బూమి పుట్‌విండ ముజుల్వై, దేవుణు వెట ఎలాకాలం బత్కిని వరి పేరుకు రాసి ఇడేజిని పుస్తకమ్దు పేర్కు సిల్లి, బూమి మున్ను బత్కినికార్ అయ జంతుజ్ సుడేజి, ఇక్క ముజుల మహాద్, ఏలు సిల్లెద్. గాని మరి వానాద్‌లె, ఇజి బమ్మ ఆనార్.

9 ఇక్క నెస్టెజ్ గెణం మన్ని మన్ను మండ్రెజ్ వలె. అయ జంతుది ఏడు బురెక్ ఇహిజ, అయ బోదెలి బస్తిమన్ని ఏడు గొరొక్.

10 అయ ఏడు బురెక్, ఏడుగురు రాజురిజ్‌బా పొలిత మనార్. అయ్‌దుగురుది కాలం గడేస్తాద్. ఒరెన్ ఏలుబడి: కిజి మంజినాన్. కడేవెరిదికాన్ ఇంక రెవిండ్రె. గాని వాండ్రు వానివలె, కండెక్ కాలం వాండ్రు ఏలుబడి: కిజి మండ్రెజ్ వలె.

11 అయ క్రూరమతి జంతు ముజుల మహికాండ్రె గాని ఏలు సిల్లికాన్ ఆతి ఎనిమిది రాజు. వాండ్రు, వన్ని ముజుల మహి ఏడు రాజుజ్ సెందితికాన్. వాండ్రు వన్ని వందిజ్ మన్ని ఎలాకాలం మంజిని నాసనమ్దిజ్ సాన్నినాన్.

12 నీను సుడేతి మన్ని పది కొముకు, పది మణిసి రాజురిజ్ పొలిత మనార్. వరిజ్ ఏలుబడి: కిదెజ్ ఏలుదాక అతికారం దొహ్కావదె. గాని ఉండ్రె గడేయ అయ క్రూరమతి జంతు వెట రాజుర్ లెకెండ వరిజ్ అతికారం దొహ్కావదెలె.

13 వారు ఉండ్రె ఉదెసమ్దాన్ వరి సత్తుని అతికారం విజు అయ జంతుదిజ్ ఒపజెప్పార్లె.

14 వారు గొరెపిల్లవెట విదెం కినార్ గాని రాజురిజ్ రాజు, ప్రబురిజ్ ప్రబు ఆతిమన్ని గొరెపిల్ల వరి మున్ను గెలిస్నాన్‌లె. వాండ్రు కూకె ఆతిమన్నికార్, మరి వన్ని వందిజ్ ఎర్రె ఆతిమన్నికార్‌ని వన్నిజ్ లోజిజి మంజిని నమ్మకమాతికార్ వన్నివెట మంజినార్‌లె.

15 నస్తివలె, అయ దేవుణు దూత నజి ఈహు వెహ్తాన్. “నీను సుడేతిమన్ని, అయ గొప్ప రంకు బూలాని బోదెలి బస్తిమన్ని నండో పెరి గడ్డెజ్ ఇనిక ఇహిజ, యా లోకమ్దు మన్ని విజు జాతిజాణికార్, విజు దేసమ్క లోకుర్, విజు తెగాదికార్, విజు బాసెజ్ వర్గినికార్.

16 నీను సుడేతి మన్ని అయ క్రూరమతి జంతుని అయ పది కొముకు, అయ రంకు బూలాని బోదెలిదిజ్ ఇన్టం ఆవర్. వారు దన్నిజ్ కల్గితి మన్నికెజ్ విజు లాగ్లి విసిర్‌జి, నగడి కిజి, దన్ని కండ కోయ్‌జి తింజి, మిగిలిత్తిక సిసుదాన్ సుర్పు విసిర్నార్.

17 దేవుణు మాటదు మన్నిలెకెండ పూర్తి ఆనిదాక ఏలుబడి: కిదెజ్ ఇజి అయ క్రూరమతి జంతుజ్, వరి అతికారమ్కు విజు సీదెజ్ ఇజి దేవుణు వన్ని ఉదెసం పూర్తి కిదెజ్ ఇజి వరి మన్నుజ బుద్ది సిత్రాన్

18 మరి నీను నుడఃతి అయ బోదెలి బూమి మున్కు మన్ని రాజురిజ్ మున్కు ఏలుబడిః కిని అయ గొప్ప పెరి పట్టుమనె”.

18

బబులోను పట్టుం అర్పినిక

1 దిన్ని వెనుక మరి ఒరెన్ దేవుణు దూత పరలోకమదాన్ డిఃగజి వానిక నాను నుడఃత. వన్నిజ్ గొప్ప పెరి అతికారం మహద్. వన్నిబాణిజ్ వాతిమన్ని గొప్ప జాయ్దాన్ బూమి విజు జాయ్ ఆతాద్.

2 వాండ్రు గొప్ప పెరి కంటమ్దాన్ ఈహు డేల్ని వెహ్సన్. “గొప్ప పెరి పట్టుం ఆతి బబులోను అరి ఆతాద్, అరి ఆతాద్. అక్క దెయమ్కాజ్ మండ్రెజ్ ఇల్లు ఆత మనాద్. విజు సెఇ ఆత్మెజ్ బత్కిజిని బాడ్డి ఆత మనాద్. విజు సెఇకెజ్ని ఇష్టం కిదెజ్ అట్ఇ పొటిజ్ బత్కిజిని బాడ్డి ఆతాద్.

3 ఎందానిజ్ ఇహిజ మత్తు కబిన్ని కల్లు నన్ని, ఉత్పుత్ కిబిన్ని, దన్ని రంకు బూలాని పణిజాణిజ్, ఉణిజి సోస్తిలెకెండ, విజు దేసెమ్కాణి లోకురి సోస్తార్. బూమి మున్కు మన్ని రాజుర్ దన్ని వెట గూర్తార్. దన్నిజ్ మహి నండో లావ్ ఆతిమన్ని, ఒణిఃలది ఆసెజ సర్ల కిబిన్ని పణిజాణిజ్ బూమి మున్కు మన్ని సవుకారిజు గొప్ప ఆస్తి మనికార్ ఆతార్.

4 నస్తివలె, యాలెకెండ మరి ఉండ్రీ కంటం పరలోకమదాన్ వెహ్తిక వెహ. “నజీ ఇస్టమాతికిదెరా, మీరు దన్ని పాపమ్క లొఇ కూడఃజి మనివండ, దన్ని జబ్బుజ్ ఇనికబా మిజీ అసెవండ, మీరు దన్ని బాణిజ్ వెల్లి రదు.

5 అది కితి పాపమ్కు ఆగనమ్దు అందితిలెకెండ కొట్టు ఆతె మన్నె. అది కిత్తి తపుజ్ విజు దేవుణు ఎత్తు కిత మనాన్.

6 అది సిత్తిమన్ని లెకెండె దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలప్తిమన్ని దన్ని గిన్నదాన్ ఉండెజ్ రుండి వంతుజ్ కలప్పి దన్నిజ్ సీదు.

7 నాను రాణిలెకెండ బస్త మన్న. నాను రాండి బోదెలి ఆఎద్. నాను ఎసెజ్బా దుకమ్దాన్ అడఃబావ”, ఇజి దన్ని మన్నదు అది పొజిజినాద్. అందెజె దన్నిజ్ అదిని ఎస్సానో పొజిజి ఒణిఃలది ఆసెజ సర్ల కిబిన్జెజ్ కిత్తిమన్ని పణిజ సమానం ఆతి నసా దుకమ్ని హిమ్సెజ్ దన్నిజ్ మరజి సీదు.

8 అందెజె, ఉండ్రె రోజుదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తీరిసి సిక్స సీని ప్రబు ఆతి దేవుణు గొప్ప సత్తు మన్నికాన్, అందెజె దన్నిజ్ సిసుదాన్ సుర్పు విసీర్నాన్.

9 అది సురి ఆని సిసుదాన్ వాని గోయ్ నుడఃజి, దన్ని వెట గూర్తి మహికార్, దన్ని ఒణిఃలది ఆసెజ సర్ల కిబిన్ని పణిజ వందిజ్ కూడిఃతికారాతి బూమి మున్కు మన్ని రాజుర్ గుండె కొత్తె ఆజి దన్ని వందిజ్ అడఃబానార్.

10 వారు, దన్నిజ్ వాతి సిక్సదిజ్ నుడఃజి తియెలాజి దూరం నిల్ని మంజి, అడఃబాజి, “అబాయా, అబాయా, గొప్ప పెరి పట్టుమాతి బబులోను, సత్తుమన్ని పట్టుమా, ఉండ్రీ గడిఃయూదునె నాసనం వాతాద్”, ఇజి వెహె ఆజి మంజినార్.

11 అయ పట్నం నాసనం ఆతిక సుడేజి, వరి వస్తుజ్ కొణికార్ మరి ఎయెర్బా సిల్లెర్ ఇజి బూమి ముస్కు మన్ని బేరం కినికార్ దన్నిజె సుడేజి గుండె కొత్తె ఆజి అడేబానార్.

12 వారు పొర్తి మహి వస్తుజ్ ఇహిజ, బజారం, వెండి, విలువతి రంగు పణకుజ్ని పూసెజ్, విలువతి నూలు పాతెజ్, మరి నీలి రంగు కూడితి ఎరాని పాతెజ్, సిల్కు పాతెజ్, విలువతి నల రంగునన్ని ఎరాని పాతెజ్, రకరకమ్ది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమ్ది ఒస్తుజ్, నండో విలువ మన్ని మరెకాణి ఒస్తుజ్, కంసు, ఇనుము, నునాజ్ మన్ని పణకు సెక్కెజ్, దాసిని మరాతి తోలు, వాసనం మన్ని కాయెజ్, దూపం సుర్ని ఒస్తుజ్, వాసనం మన్ని నూనె, కల్లు,

13 ఒలివ నూనె, మెత్తాని దూరు, గొదము, కోడ్డిజ్, గొర్రెజ్, గుర్రమ్కు, గుర్రమ్కు లాగ్నిని బండిజ్, వెట్టిపణి కిని లోకురిజ్బా వారు పొర్ని మహార్. విలుదాన్ ఇక్కెజ్ కొణికార్ సిల్లెర్ ఇజి వారు అడేబానార్.

14 “నీను కోరిత్తిమన్ని విలువతి గొప్ప నెగ్గి వస్తుజ్ విజు నీ బాణిజ్ లాగె ఆతాద్. మరి ఎనెజ్బా మరజి దొహ్కెఇలెకెండ, నీ విలువతి వస్తుజ్ని ఆస్తి విజు సిల్లెండాతాద్ ఇజి సవ్కారిజు దన్నిజ్ వెహ్నార్.

15 అయ పట్నమ్దు సొన్ని వరి వస్తుజ్ పొర్ని దన్ని బాణిజ్ ఆస్తి గణస్తికార్ ఆతి బేరం కినికార్, దన్నిజ్ వాతిమన్ని బాదెజ్ సుడేజి తియెలాజి గుండె కొత్తె ఆజి అడేబాజి యాలెకెండ వెహ్నార్.

16 “అబాయా, అబాయా, విలువతి నూలు పాతెజ్, నీలిరంగు కూడితి మన్ని ఎరాని పాతెజ్ని నలరంగు నన్ని విలువతి ఎరాని పాతెజ్ పొర్నాజి, మెర్నిని బజారమ్ని విలువతి రంగు పణకుజ్ని పూసెజ్ అయ పట్నమ్దు దొహ్కె మహాద్.

17 నిస్సా గొప్ప పెరి ఆస్తి ఉండ్రీ గడియూదునె పాడాత సొహదా ఇజి ఓడెజు నడిపిసిని విజు నెయ్కార్, ఓడెజు పయనం కినికార్, ఓడెజు పణి కినికార్, సమ్దరమ్దు పణి కిజి బత్కినికార్ విజేరె దూరం నిల్నిమంజినార్.

18 అది సురె ఆజిని సినుది గోయి సుడేజి, “యా గొప్ప పెరి పట్నమ్దిజ్ సమానం ఆతి మరి ఉండ్రీ పట్నం ఎంబెబా మనాదా”, ఇజి గొప్ప డేల్ని వెహ్నార్.

19 వారు వరి బురెకాజ్ ముస్కు దుల్లి వాకె ఆజి గుండె కొత్తె ఆజి అడేబాజి.

“అబాయ, అబాయ, సమ్దరం ముస్కు ఓడెజ్ మనికార్ విజేరె బేరం కిజి ఆస్తి గణస్తి మన్ని యా గొప్ప పెరి పట్నమ్ది ఆస్తి ఉండ్రీ గడియూదునె నాసనం ఆత సొహాద్”, ఇజి డటం డేల్ని మంజినార్.

20 పరలోకమ్దు మన్నికిదెరా, అయ పట్నం నాసనం ఆతివందిజ్ మీరు సర్ల ఆదు. దేవుణుదిజ్ నమ్మిత్తికిదెరా, అపొస్తురు ఆతికిదెరా, దేవుణు ప్రవక్తరు ఆతికిదెరా మీరు సర్ల ఆదు, ఎందానిజ్ ఇహిజ అది ఎలాగ మిజి తీర్పు సిత్ర మనాదో, అయాలెకెండెనె దేవుణు అయ పట్నం ముస్కు తీర్పు తీరిస్త మనాన్.

21 నస్తివతి, సత్తుమన్ని ఒరెన్ దేవుణు దూత, ఉండ్రీ గొప్ప పెరి జత్త పణకు నన్ని ఉండ్రీ పెరి పణకు పేరజి సమ్దరమ్దు విసీరతాండ్రె, “మరి ఎనెజ్బా తొర్వెండాతిలెకెండ గొప్ప పెరి పట్నమాతి బబులోను గొప్ప పెరి టండెజాణిజ్ యాలెకెండ అడిగి అరె ఆనాద్తి.

22 టోయ్లెజ్ వలక్కి జాటుజ్, పాటెజ్ పార్నివరి జాటుజ్, పిరుడిః ఊక్కి జాటుజ్, జోడుఃబాంక ఊక్కి జాటుజ్ మరి ఎసెజ్బా మీబాణిజ్ వెన్పె ఆఊ. ఎమేణి రకమ్ది పణి కినికాన్ ఎయెన్బా, మరి ఎసెజ్బా మీబాన్ తోర్వన్. జత్తపణుకుదు నూర్ని జాటు మరి ఎసెజ్బా మీ లొఱహన్ విన్పె ఆవ

23 ఉండ్రీ దీవ మరి ఎసెజ్బా మీలొఱ జాయ్ సీజి మన్వద్. పెండ్లి దజ్డః జాటు గాని పెండ్లి బోదెలి జాటు గాని మరి ఎసెజ్బా మీలొఱ వెన్పె ఆఊ. నీ బేరం కినికార్, బూమి ముస్సు మన్ని గొప్ప పెరికార్ ఆత మహార్. విజి దేసెమ్కాణి లోకుర్ విజేరె నీ మాయ పణిజాణిజ్, మొసెం కిజి, తప్పు సరిదు నీను నడిఃపిన్సి.

24 మరి దేవుణు ప్రవక్తరిజ్ సప్తివందిజ్, దేవుణుదిజ్ నమ్మితి వరిజ్ సప్తి వందిజ్, బూమి ముస్సు సప్పె ఆతి విజేరె వందిజ్ బబులోసు పట్టుమ్దిజ్ యా సిక్స వాతాద్", ఇజి అయ దేవుణు దూత వెహ్హన్.

19

దేవుణుదిజ్ పొగిడిఃదు (హల్లెలుయ)

1-2 దన్ని వెనుక పరలోకమ్దు గొప్ప పెరి మంద లోకురి గొప్ప పెరి కంటం యాలెకెండ్రె వెహ.

“దేవుణుదిజ్ పొగిడిఃదు. మజి రక్కిస్తివన్నిజ్ పొగిడిఃదు. వాండ్రు ఒరెండ్రె పూర్తి జాయ్ని సత్తు మన్నికాన్. ఎందానిజ్ ఇహిజ, ఎస్తివలెబా వాండ్రు నిజమాతి, నాయమాతి తీర్పుజ్ సీజినాన్. దన్ని రంకు బూలాని పణిజాణిజ్ బూమి ముస్సు మన్ని వరిజ్ అది పాడః కిత్తాద్. అయ గొప్ప రంకు బూలాని బోదెలిదిజ్ వాండ్రు తీర్పు తీరిసి సిక్సన్తాన్. వన్ని పణికినివరి నలవందిజ్ వాండ్రు దన్నిజ్ అయాలెకెండ్రెనె మరజి సిక్సన్తాన్.

3 వెనుక వారు మరి ఈహు డేల్ని వెహ్హర్. “హల్లెలుయ. అది సిసుదు సురె ఆజిని గోయ్ డిఃన్వీండ్రె ఎలాకాలం ముస్సు సొన్సి మంజినాద్.

4 నస్తివలె, అయ ఇరువయ్ నాల్వర్ పెద్దెలుజ్ని, పాణం మన్ని నాల్లి జంతుజ్ పడగ్జి అర్ని “ఆమెన్, దేవుణుదిజ్ పొగిడిఃదు”, ఇజి వెహ్హి సింహాసనమ్దు బస్తిమన్ని దేవుణుదిజ్ మాడిఃస్టార్.

5 “మా దేవుణుదిజ్ సెందితికిదెరా, వన్నిజ్ లొజిజి మంజిని ఇజిరికార్ని పెరికార్ ఆతికిదెరా, మీరు విజిదెరె దేవుణుదిజ్ పొగిడిఃదు”, ఇజి వెహ్హిని ఉండ్రీ కంటం అయ సింహాసనమ్దాన్ వాతాద్.

6 నస్తివలె, గొప్ప పెరి గడ్డ సొని జాటులెకెండ్రెని పిడుఃగుజ గొప్ప పెరి జాటుదిజ్ పొలితి గొప్ప పెరి మంద లోకురి కంటమ్లెకెండ్రె ఉండ్రీ జాటు యాలెకెండ్రె వెహ్హినిక నాను వెహ. “హల్లెలుయ! మా ప్రబు ఆతి దేవుణు, విజి దన్నిజ్ అతికారం మన్నికాన్ ఏలుబడిః కిజినాన్.

7 అందెజి మాటు సర్గ ఆజి డాట్నూట్. వన్నిజ్ గవ్రం సినాట్. ఎందానిజ్ ఇహిజ గొరెపిల్ల పెండ్లి సమయం వాతాద్. వన్నిజ్, పెండ్లి దజ్డః దన్నిజ్ అదినె తయార్ కిజినాద్”.

8 “దన్నిజ్ పొర్పాదెజ్ ఇజి నమ్మితి వరి నీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్నిని పాతెజ్ దన్నిజ్ దొహ్కె.

9 మరి “గొర్రెపిల్ల పెండ్లి విందుదు కూకె ఆతికార్ దీవనమ్కు పొందితికార్ ఇజి రాస్అ”, ఇజి అయ దేవుణు దూత నజీ వెహ్తాన్. “యా మాటెజ్ దేవుణు వెహ్తా నిజమాతి మాటెజ్”, ఇజిబా అయ దేవుణు దూత నజీ వెహ్తాన్.

10 అయావలె, నాను వన్నిజ్ పొగిడిజి మాడిసైజ్ ఇజి వన్ని పాదమ్కాజ్ పడగ్జి అర్తిజ్ వాండ్రు, “నీను అయాలెకెండ్ కిమా. నానుబా, యేసువందిజ్ సాస్యం వెహ్తాని మీ తంబెరిజవెటని, నీ వెట కూడజి పణికినికాండ్రె. దేవుణుదిజ్నే పొగిడిజి మాడిసైజ్. దేవుణుబాణిజ్ వాతి మాటెజ్, దేవుణు ఆత్మదాన్ వెహ్తా దేవుణు పణిమణిసిర్ యేసు తోరిస్తామన్ని నిజమాతికెజ్నే వెహ్తానార్”, ఇజి నజీ వెహ్తాన్.

తెల్లాని గుర్రమ్మున్ను బస్తి మన్నికాన్.

11 మరి పరలోకం రే ఆతిమనిక నాను సుడజెత. ఇదిలో, తెల్లాని గుర్రం ఉండ్రి తోరితాద్. దన్ని మున్ను బస్తి మన్నికాన్, నమ్మకమాతికాన్, నిజామాతికాన్ ఇని పేరు మన్నికాన్. వాండ్రు నాయమ్దాన్ తీర్పు తీరిసి లోకురిజ్ సిక్స సీజి, నాయమ్దాన్ వన్ని విదెం కిజి మంజినాన్.

12 వన్ని కణుకు సిసుకొనెజ్లెకెండ్ మన్నె. వన్ని బుర మున్ను బజారమ్దాన్ తయార్ కిత్తి రాజురి టోపిజ్ నన్ని, నండ్ టోపిజ్ మన్నె. వన్నిజె ఆఎండ మరి ఎయెర్బా నెన్ఇ ఉండ్రి పేరు వన్ని మున్ను రాసె ఆతిక, వన్నిజ్ మనాద్.

13 నలాదు ముడుకుక్తిమన్ని సొక్క వాండ్రు తోడుగిత్త మనాన్. దేవుణు మాట ఇని పేరు వన్నిజ్ మనాద్.

14 పరలోకమ్దు మన్ని సయనమ్దికార్, కల్లిసిల్లి తెల్లాని నూలు పాతెజ్ తోడిగిజి తెల్లాని గుర్రమ్క మున్ను ఎక్కి వన్నివెట సొన్ని మహార్

15 దేసెమ్కాణి లోకురిజ్ డెయ్దెజ్, వన్ని వెయ్దాన్ తెవుగు మన్ని ఉండ్రి కుర్ల వెల్లి వాజి మహాద్. వాండ్రు ఇనుము డుడ్డుదాన్ వరిజ్ ఏలుబడి కినాన్. విజు దన్నిజ్ అతికారం మన్ని దేవుణుది సిసు నన్ని కోపం, గనుగుదు ద్రాక్స పట్టు. మటిసి ద్రాసపట్టురసం లాగ్గినిలెకెండ్, వాండ్రు మటిసినాన్.

16 రాజురిజ్ రాజుని ప్రబురిజ్ ప్రబు ఇని పేరు వన్ని సొక్క మున్నుని వన్ని కుర్లుదు రాసె ఆత మనాద్.

17-18 మరి ఉండ్రి దేవుణు దూత పొద్దుదు నిహి మనిక నాను సుడజెత. వాండ్రు గొప్ప పెరి కంటమ్దాన్ డేల్ని వెహ్తాన్. “దేవుణు నండ్ కండ సీని గొప్ప పెరి విందుదిజ్ రదు. రాజురి కండ, మరి సయనమ్దిజ్ నడిపిసినివరి కండ, మరి గొప్ప సత్తుమన్నివరి కండ, గుర్రమ్క కండ, మరి వన్కా మున్ను బస్తిమన్నివరి కండ, మరి వెట్టిపణిమణిసిర్ ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ్ లోకుర్ విజేరి కండ తిండ్రెజ్ మీరు రదు”, ఇజి ఆగసం అడిగి ఎగ్రిజిని విజు పొటిజ వెహ్తాన్.

19 నస్తివలె, అయ గుర్రం మున్ను బస్తిమన్నివన్నివెటని వన్ని సయనమ్ది వరివెట విదెం కిదెజ్ ఇజి, అయ క్రూరమతి జంతుని బామి మున్ను మన్ని రాజుర్ని వరి సయనమ్కు విజు కూడజి వాతిక నాను సుడజెత.

20 నస్తివలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ్ కిజి తోరిస్తా మన్ని అబద్దం వెహ్తా ప్రవక్తబా అస్సె ఆతార్. అయ క్రూరమతి జంతుది గుర్తు పోకె ఆతి వరిజ్ని దన్ని బొమ్మదిజ్ పొగిడిజి మాడిసైజ్ మహిపరిజ్ వాండ్రు బమ్మాతి

పణిజాణిజ్ మొసెం కిజి మహాన్. వారు రిఎర్ గందకం వెయ్జిని సిను మన్ని బాడ్డిదు పాణం డసానె అర్యె ఆతార్.

21 మిగిలిత్తి మహికార్, గుర్రం ముస్సు బస్తమన్ని వన్ని వెయుదాన్ వాతి కర్దదాన్ సప్పె ఆతార్. పొటిజ్ విజు వనక పొట పంజు వరి కండ తిహె.

20

వెయిజ్ పంటెజ్ మన్ని ఏలుబడి:

1 మరి దర్లిది తాలమ్కియుని ఉండ్రె గొప్ప పెరి గొలుసు కీదు అస్తమన్ని మరి ఒరెన్ దేవుణు దూత, పరలోకమ్దాన్ డిగ్జి వాతిక నాను సుడత.

2 వాండ్రు, అయ మొదొహి సరాన్దిజ్, అహిజ అయ గొప్ప పెరి సరాన్ ఇని, సయ్తాను ఇని సెజ వన్నిజ్ అస్తాండ్రె వెయు పంటెజ్ దాక తొవ్తా డిస్తాన్.

3 అయ వెయు పంటెజ్ గడెస్సిదాక ఎమేణి దేసెమ్కాణి లోకురిజ్బా మొసెం కివిండ మండ్రెజ్ ఇజి అయ గొప్ప పెరి సరాన్దిజ్, దర్లిదు అర్ప్పి మూక్కి దన్ని ముస్సు. సిలు పొక్తాన్. వెయిజ్ పంటెజ్ వెనుక వాండ్రు సెగం కాలం వన్నిజ్ కుత్తి డిస్తాన్.

4 నస్తవలె, నాను సింహాసనమ్కాజ్ సుడత. అయ సింహాసనమ్క ముస్సు బస్తమన్నివరిజ్, తీర్పు తీరిస్తెజ్ అతికారం దొవ్కె. దేవుణు మాట వందిజ్ని యేసువందిజ్ వారు వెహ్తి సాస్యం వందిజ్ బురెక్ కత్తె ఆతివరి ఆత్మ సుడత. వారు అయ క్రూరమతి జంతుదిజ్నో, దన్ని బొమ్మదిజ్నో పొగిడిజి మాడిసేవిండ మహికార్. వరి నొద్రుజ గాని వరి కికాజ్ గాని దన్ని గుర్తు పోకె ఆఎండ మనికార్. వారు బత్తిత్తారె వెయు పంటెజ్ క్రిస్తు వెట కూడెజి ఏలుబడి: కితార్.

5 (మిగిలిత్తి మన్ని సాతికార్ అయ వెయిజ్ పంటెజ్ వీజినిదాక బత్తివితార్) యాకాదె సాతి వరిబాణిజ్ తొలిత మర్జి నిజె ఆనిక.

6 తొలిత మర్జి నిజ్నిదన్నిలోఇ కూడెజి మంజినికార్ దేవుణు సిని దీవనమ్కు మన్నికార్. వారు దేవుణు వందిజ్ పూర్తి కేట ఆతికార్. నిన్నివరిముస్సు రుండి సాపుదిజ్ అతికారం సిల్లెద్. గాని వారు దేవుణుదిజ్నో క్రిస్తుజ్ పూజేరిజులెకెండ మంజి క్రిస్తు వెట కూడెజి వెయిజ్ పంటెజ్ ఏలుబడి: కినార్.

సయ్తాను నాసనం ఆజినిక

7 వెయిజ్ పంటెజ్ పూర్తి ఆతి వెనుక సయ్తాను తొహె ఆతిబాణిజ్ డిస్తాన్ ఆనాన్.

8 వాండ్రు బూమి ముస్సు నాల్లి దిక్కుజాణి విజు దేసెమ్కాణి లోకురిజ్ మొసెం కిజి, విదెం కిదెజ్ ఇజి గొప్ప పెరి సయ్మేదిజ్ గోగిని మాగోగి ఇనిబాన్ కూడుప్పి తనాన్లె. వరి లెక్క సమ్దరం పడెకాది ఇస్కలెకెండ మంజినాద్.

9 వారు బూమి ముస్సు మన్ని విజు దేసెమ్కాజ్ సాహార్. దేవుణు లోకుర్ మంద కూడెజిమంజిని, దేవుణు గొప్పజ ఇస్టం కిజిని పట్టుమ్దిజ్ సుటులం ఆతార్, గాని పరలోకమ్దాన్ సిను డిగ్జి వాజి వరిజ్ సుర్తాద్.

10 వరిజ్ మొసెం కిత్తికానాతి సయ్తాన్ గందకమ్దాన్ కసిని సిను మంజిని బాడ్డిదు అర్యె ఆతాన్. అబ్బె అయ క్రూరమతి జంతుని అబద్దం వెహ్తి వన్ని ప్రవక్త మనార్. అబ్బె వారు రెయుపొగోల్ డిసేవిండ ఎలాకాలం హిమ్సెజ్ కిబె ఆజి మంజినార్.

సాతికార్ తీర్పు పొందిజినార్.

11 నస్తవలె, గొప్ప తెల్లాజ్ మన్ని ఉండ్రీ పెరి సింహాసనమ్ని దన్ని ముస్సు ఒరెన్ బస్తమన్నకబా నాను సుడత. బూమిని ఆగసం వన్ని ఎద్దుహాన్ ఉహ్కీ సోహి లెకెండ్రీ సిల్లెండ్రీ ఆతె. అక్కెజ్ తోవిండాతె.

12-13 మరి సాతికార్ విజేరె, అహిజ పెరికార్ని ఇజిరికార్ విజేరె అయ గొప్పపెరి సింహాసనం ఎద్దు నిహిమన్నక సుడత. సమ్దరమ్దు సాతికార్ విజేరె సమ్దరమ్దాన్ డిస్సె ఆతార్. సాతికార్ మంజిని అయా లోకమ్దు మహికార్బా డిస్సె ఆతార్. నస్తవలె, పుస్తకమ్కు రెకె ఆతె. దేవుణు వెట ఎలాకాలం బత్కిని వరి పేరుకు రాసి ఇడతజిని మరి ఉండ్రీ పుస్తకమ్బా రెకె ఆతార్. అయ పుస్తకమ్కాజ్ రాస్తి ఇడ్డిమన్నలెకెండ్రీ, ఒరెన్ ఒరెన్ కితిమన్ని పణిజ తగితి లెకెండ్రీ సాతికార్ తీర్పు పొందితార్.

14 సాపుని అయా లోకం గందకమ్దాన్ సిసు కసి మంజిని సెరు నన్ని బాడ్డిదు అరై ఆతె. యా సిసు మంజిని బాడ్డి రుండి సాపు.

15 దేవుణు వెట ఎలాకాలం బత్కిని వరి పేరుకు రాసి ఇడతజిని పుస్తకమ్దు పేరు తోరవిండాతిజ ఎయెన్బా అయ సిసు మంజిని బాడ్డిదు అరై ఆనాలె.

21

కొత్త యెరూసలేం

1 నస్తవలె, నాను ఉండ్రీ కొత్త ఆగాసమ్ని ఉండ్రీ కొత్త బూమి సుడత. మొదోహి ఆగసమ్ని మొదోహి బూమి సిల్లెండ్రీ ఆతె మహె. సమ్దరమ్బా సిల్లెండ్రీ ఆతె మహాద్.

2 మరి కొత్త యెరూసలేము ఇని దేవుణు పట్టుం, మాసి సొండ్రెజ్ ఇజి విజు ఇట్కిజి గొప్ప నెగండ్ తయారాతిమన్ని పెండ్లి దజ్డిలెకెండ్రీ, పరలోకమ్దాన్ డిగ్జి వాతిక నాను సుడత.

3 నస్తవలె, “ఇదిలో, దేవుణు లోకుర్ వెట బత్కిని ఇల్లు మనాద్. వాండ్రు, వరి వెటని బత్కినాన్. వారు వన్ని లోకుర్ ఆన మంజినార్. దేవుణు వన్నిజ్ వాండ్రె ఆజి వరివెట మంజి వరి దేవుణు ఆన మంజినాన్.

4 వాండ్రు వరి కణుకెజాణి కణిర్ తేల్పాన్. మరి సాపు, దుకం, అడతబానిక, నొప్పిజ్ ఎసెజ్బా మన్ఉ. ఎందానిజ్ ఇహిజ మొదోహి సజతిజ్ విజు గడతె సోహి”, ఇజి అయ సింహాసనమ్దాన్ ఉండ్రీ పెరి కంటం వెహ్కె వెహ.

5 అయ సిమసనమ్దు బస్త మన్నికాన్, “ఇదిలో నాను విజు కొత్తాకెజ్ కిజిన్”, ఇజి వెహ్కాన్. మరి “యా మాటెజ్ నమ్మిదెజ్ అట్కికెజ్ నినిజమాతికెజ్. అందెజె ఇక్కెజ్ రాసి ఇడతఅ”, ఇజి వాండ్రు నజి వెహ్కాన్.

6 మరి నావెట వాండ్రు ఈహు వెహ్కాన్. “విజు పూర్తి ఆతె. అల్పాని ఒమెగ నానె. మొదోలీని ఆక్కర్ నానె. ఏహ్కీ కట్టివన్నిజ్, పాణం సీని ఏరు వాని ఊటదాన్, వన్నిజ్ ఉండ్రీజ్ ఏరు, నాను సెడ్డిని సీనా.

7 సెఇవనకాజ్ ముస్సు గెలిస్సికాన్ వినకాజ్ విజు అక్కు మన్నికాన్ ఆనాన్. నాను వన్నిజ్ దేవుణు ఆన మంజినాన్. వాండ్రు నజి మరిన్ ఆన మంజినాన్.

8 గాని పహ్కాదికార్, దేవుణు ముస్సు నమకం సిల్లికార్, సెఇ పణిజ్ కినికార్, లోకురిజ్ సప్పికార్, రంకు బూలానికార్, గార్డి కినికార్, బొమ్మెజు మాడిస్సికార్, విజు

రకమ్ది అబద్ధం వర్గినికార్, నిన్నికార్ విజేరే గందకమ్దాన్ సిను కసిని సెరు నన్ని బాడ్డిదు అర్పె ఆనార్. అక్క వరి వంతు. యాకదె రుండి సావు.

9 నస్తవలె, కడెవెరిది జబ్బుజాణిజ్ నిండ్రితి మన్ని ఏడు కుడుకెజ్ అస్తిమన్ని ఏడు దేవుణుదూతార్లో ఇ ఒరెన్ వాజి, “ఇబ్బె రల. గొరెప్పిల్ల ఆల్ని ఆతి పెండ్లె దజ్డిడిజ్ నిజి తోరిన్సు”, ఇజి నజి వెహ్లాన్.

10 దేవుణుఅత్మదాన్ నిండ్రితి మన్ని నజి, వాండ్రు గొప్ప ఎత్తు మన్ని ఉండ్రి పెరి గొరెన్ మున్సు, ఒతాండ్రి, యెరూసలేము ఇని దేవుణు పట్టుం, పరలోకమ్దాన్ దేవుణుబాణిజ్ డిగిజి వాజినిక తోరిస్తాన్.

11 అయ పట్టుం, దేవుణు జాయ్దాన్, దగదగ మెరిసిమంజిని జాయ్ మన్ని సూర్య కాంతం ఇని పేరు మన్ని ఎరాని జాయ్ మంజిని గొప్ప విలువతి రంగు పణకుది జాయ్లెకెండ్ని, గటిమన్ని గాజు లెకెండ్ మహాద్.

12 అయ పట్టుమ్దిజ్ గొప్ప ఎత్తు మన్ని గోడెని, మరి అయ గోడెదిజ్ పన్నెండు దారబంద్రమ్కు మహె. అయ దారబంద్రమ్కాజ్ పన్నెండు దేవుణు దూతార్ మహార్. దారబంద్రమ్కాజ్ ఇస్రాయేలుది పన్నెండు తెగెజి పేరుకు రాసె ఆతె మహె.

13 తూర్పు దరిజ్ మూండ్రి దారబంద్రమ్కుని ఉత్తరదరిజ్ మూండ్రి దారబంద్రమ్కుని దసిణదరిజ్ మూండ్రి దారబంద్రమ్కుని పడమాట దరిజ్ మూండ్రి దారబంద్రమ్కు మహె.

14 అయ పట్టుమ్ది గోడెదిజ్ పన్నెండు పునాదిజ్ మహె. అయ పన్నెండు పునాదిజ్ మున్సు, గొరెప్పిల్ల అపొస్తురు ఆతి పన్నెండు మణిసిరి పేరుకు తోర్జి మహె.

15 అయ పట్టుమ్దిజ్ని, దన్ని గోడెజ్ని దారబంద్రమ్కు కొలిదెజ్, నావెట వర్గిని దేవుణు దూత కియుదు బజారమ్దాన్ తయార్ కితిమన్ని ఉండ్రి కొలిని డుడ్డు మహాద్.

16 అయ పట్టుం నాల్లి దరిజ్ ఉండ్రి లెకెండ్ కొల్త మన్నిక. దన్నినిరిండ్, దన్నివెడల్పు సమానం మహె. వాండ్రు అయ కొలిని డుడ్డుదాన్ అయ పట్టుమ్దిజ్ కొలిత్తిజ్, దన్ని కొల్త రుండి వెయుజ్ నాల్లి వందెజ్ కిలోమీటరుజ్ ఆతె. దన్నినిరిండ్, ఎత్తు, వెడల్పు విజు సమానం మహె.

17 వాండ్రు దన్ని గోడెజు కొలిత్తిజ్, అది లోకురి కొల్తదిజ్ వంద నాల్పయ్ నాల్లి మూరెజ్ దలం మనాద్. అయ కొల్తదానె దేవుణు దూత కొలిత్తాన్.

18 దన్ని గోడెజు, సూర్య కాంతం ఇని పేరు మన్ని ఎరాని జాయ్ మన్ని విలువతి రంగు పణకుజాణిజ్ తొహ్తా మనాద్. మరి అయ పట్టుం గాజు లెకెండ్ మన్ని మెర్పిని బజారమ్దాన్ తయార్ ఆత మనాద్.

19 అయ పట్టుమ్ది గోడెజు పునాది రకరకమ్ది గొప్ప విలువతి రంగు పణకుజాణిజ్ సోకుదాన్ తయార్ ఆత మనాద్. మొదోహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూండ్రి పునాది జమున రంగు పణకు, నాల్లి పునాది ఆకు రంగు పణకు.

20 అయ్దు పునాది వయ్డుర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారం రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది పుస్యరంగం ఇని రంగు పణకు, పది పునాది సొర్లసూనియం

ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకాణిజ్ కిత్త మనాద్

21 దన్ని వన్నెండు దారబంద్రమ్కు పన్నెండు ముజెలుజాణిజ్ కిత్త మనాద్. ఉండ్రీ ఉండ్రీ దారబంద్రం ఉండ్రై పూనదానె కిత్త మనాద్. పట్నమ్ది రోడుజ్ అడ్డి మన్నికెజ్ తోరిజిని గాజుదిజ్ పోలితి బజారమ్దాన్ తయార్ ఆత మనాద్.

22 విజు దన్నిజ్ అతికారం మన్ని ప్రబు ఆతి దేవుణుని గొర్రెపిల్ల దన్ని దేవుణు గుడిః ఆతిమన్నిజ్ అయ పట్నమ్ లొఇ దేవుణు గుడిః ఉండ్రీబా తోర్వితాద్.

23 అయ పట్నమ్దిజ్ జాయ్ సీదెజ్ ఇజి పొద్దుబా నెలబా అక్కర్ సిల్లెద్. ఎందానిజ్ ఇహిజ, దేవుణు గొప్ప జాయ్నె పట్నం విజు జాయ్ సీజి మహాద్. గొర్రెపిల్ల దన్నిజ్ దీవలెకెండ్ మహాద్.

24 విజు దేసెమ్కాణి లోకుర్ అయ జాయ్దు నడిఃనార్. బూమి ముస్సు మన్ని రాజుర్, వరిజ్ కల్గితిమన్ని విజు గవరమ్ని ఆస్తి అయ పట్నమ్ లొఇ తనార్.

25 అబ్బై రెయు సిల్లెండ, జాయ్నె మన్నిజ్ ఎనెజ్బా అయ పట్నమ్ది దారబంద్రమ్కు కెహావద్.

26 విజు దేసెమ్కాణికార్ వరి ఆస్తిజ్ని వరిజ్ గవరం తప్పికికెజ్ విజు అయ పట్నమ్ లొఇ తనార్.

27 దేవుణు వెట ఎలాకాలం బత్తిని వరి పేరుకు రాసి ఇణ్ఃజిని గొర్రెపిల్లాది పుస్తకమ్దు పేరుకు మన్నికార్, దన్ని లొఇ సొనార్. గాని సెఇ పణిజ్ కినికార్, మొసెం కినికార్, సిగు ఆనికెజ్ కినికార్ ఎయెర్బా దన్ని లొఇ సొండ్రెజ్ అటవర్.

22

పాణం సీని గడ్డ

1 నస్తివలె, కల్లిసిల్లి అద్దం నన్ని, పాణం సీని ఏరు మన్ని గడ్డ, దేవుణుదిని గొర్రెపిల్లది సింహాసనమ్దాన్ సొన్ని మంజినిక అయ దేవుణు దూత నజీ తోరిస్తాన్.

2 అయ గడ్డ పట్నమ్ది రోడు నడిఃమిహాన్ సొన్ని మహాద్. అయ పెరి గడ్డాది రుండి ఒడ్డుజ పన్నెండు నెలెజ, పన్నెండు సుట్టు కాయెజ్ కాసి పట్టు సీని పాణం సీని మరాన్ మనాద్. అయ పాణం సీని మరాతి ఆకుజ్ విజు జాతిజణి వరిజ్ జబ్బుజాణిజ్ నెగెండ్ ఆదెజ్ పణి కినాద్.

3 దేవుణు సయివ్ సెత్తి మహికెజ్ ఇనికబా అయ పట్నమ్దు మన్వద్. దేవుణుదిని గొర్రెపిల్లది సింహాసనం అబ్బై మంజినాద్. వన్ని పణికినికార్ వన్నిజ్ పొగ్డిఃజి మాడిఃసి మంజినార్.

4 వారు దేవుణు ఎద్దు మంజి. మొకొ నిండ్రు వన్నిజ్ సుణ్ఃజి మంజినార్. వన్ని పేరు వరి నొద్దుజ రాసి ఆనాద్లె.

5 అబ్బై ఎనెజ్బా రెయు మన్వద్. దీవ జాయ్ గాని పొద్దు జాయ్ గాని వరిజ్ అక్కర్ సిల్లెద్. ఎందానిజ్ ఇహిజ, ప్రబు ఆతి దేవుణునె వరిజ్ జాయ్ సీజి మంజినాన్. వారు అంతుసిల్లెండ ఎలాకాలం ఏలుబడిః కిజి మంజినార్.

6 మరి అయ దేవుణు దూత, నజీ యాలెకెండ్ వెప్తాన్. “యా మాటెజ్ నమ్మిదెజ్ తగ్గికికెని నిజమాతికెజ్. ఎందానిజ్ ఇహిజ ఇనికెజ్ వెప్తాజ్ ఇజి వన్ని ప్రవక్తరిజ్ వెప్పిని దేవుణు, బేగి జర్గిదెజ్ మన్ని వనకాజ్ వన్నిజ్ సెందితివరిజ్ తోరిస్తెజ్ ఇజి వన్ని దూతెజ్ పోక్తాన్.

యేసు ఘోరజి వాజినాన్.

7 “ఇదిలో నాను బేగినె వాజిన. యా పుస్తకమ్దు మన్ని, దేవుణుబాణిజ్ వాతి మాటెజ్, వెంజి, లోజిజి, నడినికాన్ దేవుణు సీని దీవెనమ్కు మంజినికాన్ ఆనాన్”.

8 యోహాను ఇని నాను, యా సజతిజ్ వెహ మన్ను, నుండేత మన్ను. నాను యాకెజ్ వెంజి వెనుక, యాకెజ్ నజి తోరిసిని వన్నిజ్ పొగిడిజి మాడిస్సెజ్ ఇజి అయ దూత పాదమ్కాజ్ పడఃగిజి అర్త.

9 గాని వాండ్రు, “పోని, నీను యాలెకెండ కిమా. నాను, నీవెటని, ప్రవక్తరు ఆతి నీ తంబెరిజవెటని, యా పుస్తకమ్దు మన్ని మాటెజ్ లోజిజి నడినివరివెట కూడిజి పణికినికానె. దేవుణుదిజె పొగిడిజి మాడిస్అ”, ఇజి నజి వెహన్.

10 మరి నావెట ఈహు వెహన్. “యా పుస్తకమ్దు మన్ని మాటెజ్ దేవుణు వెహికెజ్, అందెజె దిన్నిజ్ మూక్కి సీలు కిదెజ్ అవెద. ఎందానిజ్ ఇహిజి యాకెజ్ విజు జగ్గిదెజ్ కాలం డగ్గు ఆత మనాద్.

11 తప్పు పణిజ్ కినికాన్ మరి ఒదె తప్పు పణిజ్ కిపిన్. ఎయెన్బా కెలార్ బూలానికాన్ మరి కెలార్ బూలాజి మనీన్. నీతి మన్నికెజ్ కినికాన్ మరి ఒద్దె నీతి మనికెజ్ కిపిన్. దేవుణు వందిజ్ కేట ఆతికాన్, మరి అయాలెకెండ దేవుణు వందిజ్ కేట ఆజి మనీన్”.

12 “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్రు కితి పణిదిజ్ తగితి లెకెండ సీదెజ్ ఇనాయం తనా.

13 అల్పాని ఒమెగ నానె. మొదొహి - కాన్ని కడెవెరిదికాన్ నానె. మొదొల్ని ఆకార్ నానె.

14 పాణం సీని మరాతి పట్టు తిండ్రెజ్ అక్కు మన్నికారాజి దారబంద్రమ్కాణిజ్ అయ పట్టుమ్ లోఇ సాండ్రెజ్ వరి సాక్కెజ్ నోరబానికార్ దేవుణు సీని దీవెనమ్కు మంజినికార్ ఆనార్.

15 నుకుడిజ్ నీ మత్రిసినికార్, రంకు బూలానికార్, లోకురిజ్ సప్పికార్, బొమ్మెజి మాడిస్సికార్, అబద్దమ్దిజ్ ప్రేమిసి అయాలెకెండ కిజి మంజినికార్ విజేరి వెల్లి మంజినార్.

16 దేవుణు సజమ్కాజ్ మన్నివరివందిజ్, యా సజతిజి వందిజ్ సాస్యం వెహైజ్ యేసు ఇని నాను, నా దూతెజ్ పోక్త మన్ను. నాను దావీదువెలెదాన్ సోత్తి సిగ్గుని వన్ని తెగాదు పుట్టికాన్. కోడిజామ్దు సోని గొప్ప జాయ్ మన్ని సుక ఆత మన్ను”.

17 మరి దేవుణు ఆత్మని పెండ్రె దజ్డిః, “రఅ”, ఇజి వెహ్పినార్. యాక వినికాన్బా “రఅ” ఇజి వెహైజ్వలె. ఎయెన్బా ఏహ్పి కట్టిజి వాండ్రు రపిన్. ఎయెన్బా వాండ్రు కోరిత్తిలెకెండ, పాణం సీని ఏరు ఇని ఇనాయం సెడ్డిఃనె లోసిన్.

18 యా పుస్తకమ్దు మన్ని దేవుణు ప్రవక్త వెహై మాటెజ్ వెనివరిజ్ విజేరిజ్, వారు జాగర్త మండ్రెజ్ ఇజి నాను వెహ్పినిక ఇనిక ఇహిజి, ఎయెన్బా దిన్నివెట మరి ఇనికబా కూడుఃప్తిజి యా పుస్తకమ్దు రాస్తిమని జబ్బుజ్ విజు, దేవుణు వన్ని మున్ను తపిస్సాన్.

19 ఎయెన్బా యా పుస్తకమ్దు మన్ని దేవుణు ప్రవక్త వెహ్తా మాటెజు, ఇనికబా లాగితిజు, వన్నిజ్ దేవుణు యా పుస్తకమ్దు వెహ్తామని పాణం సీని మరాతి పట్కు తిండ్రెజ్ అక్కు సిల్లికాన్ లెకెండ్ కినాన్. నెగ్గి పట్టుమ్దు వంతు మన్ఇకాన్ లెకెండ్ కినాన్.

20 యా సజుతిజు వందిజ్ సాస్యం వెహ్తాకాన్, “నిజమె నాను బేగినె వాజిన”, ఇజి వెహ్తానాన్. ఆమెన్. ప్రబు ఆతి యేసు రఅ.

21 ప్రబు ఆతి యేసు దయాదర్మం దేవుణులోకుర్ విజెరె వెట మనీద్. ఆమెన్.